



# GINITAĀO VARIĀUNA

Sinaugoro New Testament

---

## Contents

MATAIO	1
MAREKO	62
LUKA	98
IOANE	160
APOSTOLO	206
ROMA	262
1 KORINTO	290
2 KORINTO	317
GALATIA	337
EFESO	348
FILIPI	358
KOLOSE	365
1 TESALONIKA	373
2 TESALONIKA	378
1 TIMOTEO	382
2 TIMOTEO	390
TITO	395
FILEMONA	399
HEBERU	401
IAKOBO	421
1 PETERO	428
2 PETERO	436
1 IOANE	441
2 IOANE	448
3 IOANE	450
IUDAS	452
APOKALUPO	454

# GINITAĠO VARIĠUNA

## The New Testament in the Sinaugoro Language of Papua New Guinea

Nupela Testamen long tokples Sinaugoro long Niugini

Language: Sinaugoro

Provided by: Wycliffe Bible Translators

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit [www.dbs.org](http://www.dbs.org) (USA), [www.bibleleague.ca](http://www.bibleleague.ca) (Canada), and [www.opendoors.org](http://www.opendoors.org) (Europe).

### Copyright and Permission to Copy

Copyright © 1995 The Bible Society of Papua New Guinea

This translation is made available to you under the terms of the Creative Commons Attribution-No Derivatives license 4.0. You may share and redistribute this Bible translation or excerpts from it in any format, provided that:

You include the above copyright information.

You do not make any derivative works that change any of the actual words or punctuation of the Scriptures.

Pictures included with Scriptures and other documents are licensed just for use with those Scriptures and documents. For other uses, please contact the respective copyright owners.

PDF, ePub, and MOBI Bible covers and design are copyrighted 2017 by the Digital Bible Society ([www.dbs.org](http://www.dbs.org)).

---

PDF generated on 2017-08-24 from source files dated 2017-08-24.

8b40fbc3-cb0f-5949-93d1-8c0867dfd496

ISBN: 978-1-5313-0586-4

## VARI NAMONA MATAIO NA ETOREATO

Mataio vaġa-foforina guruġari

Mataio arana ta tu Levi. Ġia tovotovonai tu takesi gogo tarimana, senaġi Iesu na ekeaiato, benamo ġena mero ai eiaġoto.

Ġia tu Iuda tarimana, ma mai Vari Namona tu Iuda tarimari ġeri etoreato.

Ġia na Iuda tarimari ekirarito, Iesu tu moġoni Barau na ekiraġi-toreato Kerisona o vevaġa-maġuri verena. Ginitaġo Guinena o Old Testament ai Keriso beiaġomani guruġana ġetoreato tu varau bema moġoni. Barau ġena guruġa tauri mabarari tu beġe vetoreni veġata (Mataio 5:17). Mataio na ġena Vari Namona nuġanai Keriso varina Old Testament ai ġekiraġi-toreato guruġari ġutuma ma ema torerito anina tu moġea.

Mataio na mai buka tu laġani 58 ema 70 fakari ai etoreato, mo tu Iesu emaseto murinai.

Mataio ġena toretore tu maiġesina eboioġaiato:

1. Iesu aiġesina eiaġomato besena ema ġena maġuri varina - karoa 1-2
2. Ġena vetuġunaġi ġauveina bene sinaia ġana tauġena everovinato varina - karoa 3-4:11
3. Ġena ġauvei esinaiato, evevaġa-ribato, eġobatato, e keve evaġa-namorito variri - karoa 4:12-25:46
4. Ġena midigumidigu varina - karoa 26-27
5. Mase na evariġisi-ġenoġoito ema ġena mero etuġurito variri - karoa 28

### Iesu eiaġomato besena

**1** Iesu Keriso emaġurito, tubuna ġatana ġerina eiaġomato varina tu maiġa: Iesu tu Davida garakana, Davida tu Aberahamo garakana.

<sup>2</sup>Aberahamo tu Isako tamana; Isako tu Iakobo tamana; Iakobo tu Iuda ma kakana ema tarina merori ġesi tamari; <sup>3</sup>Iuda tu Perese e Sera tamari, sinari tu Tamar; Perese tu Hesron tamana; Hesron tu Ram tamana; <sup>4</sup>Ram tu Aminadab tamana; Aminadab tu Nasona tamana; Nasona tu Salmon tamana; <sup>5</sup>Salmon tu Boas tamana, Boas sinana tu Rahaba; Boas tu Obed tamana, Obed sinana tu Ruta; Obed tu Iese tamana; <sup>6</sup>Iese tu Kini Davida tamana.

Davida tu Solomona tamana. Solomona tu Uria ġaraġona ġenana emaġurito, (Uria ġaraġona etava-verariato murinai); <sup>7</sup>Solomona tu Rehoboam tamana; Rehoboam tu Abia tamana; Abia tu Asa tamana; <sup>8</sup>Asa tu Iehosafat tamana; Iehosafat tu Ioram tamana; Ioram tu Usia tamana; <sup>9</sup>Usia tu Iotam tamana; Iotam tu Ahasa tamana; Ahasa tu Hesekia tamana; <sup>10</sup>Hesekia tu Manase tamana; Manase tu Amon tamana; Amon tu Iosia tamana; <sup>11</sup>Iosia tu Iekonia ma tarina merori ġesi tamari. Mo ġaro ai Babulona tarimari na Isaraela tarimari ġeġabi-iaġorito Babulona ġana.

<sup>12</sup>Babulona ġana ġeġabi-iaġorito murinai, Iesu eiaġomato besena ema ġemaġurito varina tu maiġa: Iekonia tu Sealtiele tamana; Sealtiele tu Serubabele tamana; <sup>13</sup>Serubabele tu Abiud tamana; Abiud tu Eliakim tamana; Eliakim tu Asoro tamana; <sup>14</sup>Asoro tu Sadok tamana; Sadok tu Akim tamana; Akim tu Eliud tamana; <sup>15</sup>Eliud tu Eleasara tamana; Eleasara tu Matan tamana; Matan tu Iakobo tamana; <sup>16</sup>Iakobo tu Iosefa tamana, Iosefa ġaraġona tu Maria. Maria ġenana Iesu emaġurito; Iesu arana

ġekiraġiani Keriso ġetoni. (Keriso anina tu Barau na ekiraġi-toreato vevaġa-maġuri tauna).

<sup>17</sup> Ġuru mabarari Aberahamo ġenana eiaġomato mo Kini Davida tu ġuru gabanana vasivasi (14), e Davida ġenana eiaġomato mo Babulona ġana ġeġabi-iaġorito tu ġuru gabanana vasivasi (14), ema Babulona ġana ġeġabi-iaġorito negana na eiaġomato mo Keriso tu ġuru gabanana vasivasi (14).

### Iesu eġorato

*Luka 2:1-7*

<sup>18</sup> Iesu Keriso tu maiġesi eġorato: Ġia sinana Maria tu Iosefa kirakauna, senaġi ġia tauri ruarua tu roġosi roġo beġene veġaraġo nuġanai, Iauka Veaġa na mero evaġa-ġoraiato Maria diana nuġanai. <sup>19</sup> Iosefa, Maria ġaraġona, tu vei iobukaiobuka tarimana, ema asi eurato, tarimarima ġoirari ai Maria bene vaġa-maiakaia. Moġesina naima ġena ura tu, vekure-toġai vau Maria bene dobi-kwanea etato. <sup>20</sup> Ġia moġesi etuġamaġito-ġoi nuġanai, Vereġauka ġena aneru ta nuvi ai efororito, benamo ekiraiato, ekirato, “Iosefa, Davida natuna, kirakaumu Maria ġabiraġena garina asi bono vei, korana ġia tu Iauka Veaġa na mero bevaġa-ġoraiia ġia diana nuġanai. <sup>21</sup> Ġia na mero ta beġabiani, arana bono vatoa Iesu, (Iesu anina tu vevaġa-maġuri tauna); korana ġia na ġena tarimarima ġeri rakava ġerina bevaġa-maġuririni.”

<sup>22</sup> Maiġeri dagara mabarari ġeġorato tu, Vereġauka na peroveta tarimana muruna na ekiraġirito guruġari bene vaġa-moġoniri ġana, ekirato,

<sup>23</sup> “Ġoġitaia, ġuiato ta bekuġani, mero ta beġabiani, mo mero keina arana beġe vatoani Emanuela.”

Emanuela anina tu ‘Barau tu ġita sevisevirai.’

<sup>24</sup> Iosefa gena na etataġato nai tu, Vereġauka ġena aneru na ekiraiato veiġari eveirito. Maria eġabi-raġeato, benamo eġaraġoato. <sup>25</sup> Senaġi ġia ġesi asi ġegenasebonato mo, natuna eġabiato. Benamo mero arana evatoato, Iesu.

### Iaunega tarimari ġaro-raġeraġena rekena na ġeiaġomato

**2** Iesu tu Iudea tanonai vanuġa ta arana Betelehema ai emaġurito. Mo tu Kini Heroda na Iudea tanona eġitaġauato-ġoi neganai. Iesu emaġurito murinai, iaunega tarimari tu ġaro eraġeni rekena na ġeiaġomato, Ierusalemaj ġema-raġasito. <sup>2</sup> Benamo ġevedanaġito, ġekirato, “Iuda tarimari ġeri kini ta bemaġuri ġetoni tu ainai? Ġia ġena visiġu baġa ġitaia ġaro eraġeni rekena. Ġai tu ġia toma-rakariġo vinina baġa iaġoma.”

<sup>3</sup> Kini Heroda na mo guruġa eseġaġiato nai, nuġana eketo-bokoto, ema Ieruselema tarimari mabarari maki. <sup>4</sup> Benamo ġia na Rubu Veaġa vereri baregori e taravatu vaġa-riba-iaġina tarimari mabarari evaġa-vegogorito, benamo edanaġirito, ekirato, “Peroveta tarimari tu kara ġetato, Keriso, (Barau na ekiraġi-toreato vevaġa-maġuri tauna), tu ainai bemaġurini?” <sup>5</sup> Ġia na ġevaġa-veseato, ġekirato, “Betelehema vanuġana, mo tu Iudea tanonai, korana peroveta tarimana Mika na maiġesi etoreato,

<sup>6</sup> Betelehema o, Iudea tanonai otanuni vanuġana, Iuda vanuġari vekaravari ai ġoi tu dia vanuġa misina, asi arana vanuġana ta, korana tu veġorikau tauna ta ġoi ġemuna beiaġomani, ġia na au ġegu Isaraela tarimari beguine-iaġirini.”

<sup>7</sup>Benamo Heroda na iaunega tarimari vekuretoḡai ekearito, benamo edanaḡi-ginikau ginikaurito, ekirato, kamara ḡaro korikori ai visiḡu eforito. <sup>8</sup>Benamo etuḡurito Betelehema ḡana, ekirato, “Ḡoiaḡo, mero misina boḡonoa vetau-ginikaua, boḡo doḡariani neganai, boḡonoma vaḡa-ribagu, be au maki bana iaḡo, bana toma-rakariḡo vinia.”

<sup>9</sup>Heroda ḡena guruḡa ḡeseḡaḡiatio murinai, ma ḡerakato dabara na. Dabara na ḡeiaḡoto-ḡoi nuḡanai, mo visiḡu, ḡaro eraḡeni rekenai ḡeḡitaiatio visiḡuna, na eguine-iaḡirito mo, mero misina ḡena gena gabuna iatanai eruḡa-tarito. <sup>10</sup>Gia na mo visiḡu ḡeḡitaiatio nai, ḡeiaḡu-rakavato. <sup>11</sup>Mo numai ḡeraka-toḡato nai, mero misina ma sinana Maria ḡesi ḡeḡitarito, benamo ḡevetui-tarito, ḡetoma-rakariḡoato. Moḡa murinai ḡeri farefare ḡeḡurarito dagarari ḡekeorito, bena ḡevarevare-viniatio. Ḡevarevare-viniatio dagarari tu golo, e muramura arana frenkinsens, mai tu goḡuna ma bonana namona muramurana, ema vedau muramurana arana muro. <sup>12</sup>Benamo Barau na nuvi ai evaḡa-ribarito, ekirato, “Heroda ḡenai asi boḡono ḡenoḡoi.” Moḡa lorinai dabara boruna na ḡeri tanobara e vanuḡa ḡana ḡeḡenoḡoito.

### Iesu Aigupito ḡana ḡeḡwa-iaḡoato

<sup>13</sup>Ḡia ḡerakato murinai, Vereḡauka ḡena aneru nuvi ai Iosefa ḡenai eforito, ekirato, “Novaisiraḡe, mero misina ma sinana ḡesi Aigupito ḡana noraga-ḡori iaḡori. Monai boḡono tanu mo, au na ma bavaḡa-guruḡamuni, korana Heroda na mero misina evetauani, bene vaḡi-masea etoni.” <sup>14</sup>Benamo Iosefa evariḡisito, mero misina ma sinana ḡesi eḡabirito, boḡi nuḡanai Aigupito ḡana ḡeiaḡoto. <sup>15</sup>Monai ḡetanuto mo, Heroda emaseto. Moḡesina Vereḡauka na peroveta tarimana muruna na eki-raḡiatio guruḡana ema moḡonito, ekirato, “Aigupito na natugu akea-rosiatio.”

### Heroda ḡena guruḡa lorinai mero misiri ḡutuma ḡevaḡi-maserito

<sup>16</sup>Heroda eriba-maoroto, mo iaunega tarimari na ḡia tu ḡeḡofaiatio nai, ebarurakava rakavato. Benamo vetari tarimari o soldia etuḡurito, Betelehema e rikina tanori ai mero misiri ḡeri maḡuri laḡaniri ruarua e gabivau ma ḡemaḡurito mabarari ḡevaḡi-maserito. Mo mero misiri ḡeri maḡuri laḡanina ruarua ma murinai ḡevaḡi-maserito anina tu, iaunega tarimari na visiḡu ḡeḡitaiatio ḡarona na, eiaḡoto mo, Heroda eribato ḡarona tu laḡani ruarua kavana. <sup>17</sup>Mo ḡaro ai Barau na peroveta tarimana Ieremia muruna na kara ekiraḡiatio guruḡana tu ema moḡonito, ekirato, <sup>18</sup>“Ḡaro ta Rama vanuḡanai ḡeseḡaḡiatio, taḡi-koḡokoḡo e taḡi-vanorovanoro tu barego, Rahela natuna taḡiri eveini, e asi eurani beḡene vaḡa-magoa, korana natuna tu beḡe mase.”

### Nasareta ḡana ḡeḡenoḡoito

<sup>19</sup>Heroda emaseto murinai, Vereḡauka ḡena aneru Iosefa ḡenai nuvi ai ma eforito Aigupito ai. <sup>20</sup>Benamo mo aneru Iosefa ekiraiatio, ekirato, “Novaisiraḡe, mero misina ma sinana ḡesi noḡabiri, Isaraela tanona ḡana ḡoiaḡo. Korana tu mero misina beḡene vaḡi-masea ḡetato-ḡoi tarimari tu varau beḡe mase.” <sup>21</sup>Iosefa evariḡisito, benamo mero misina ma sinana ḡesi eḡoririto, Isaraela tanona ḡana ḡeiaḡoto.

<sup>22</sup>Senaḡi Iosefa eseḡaḡito, Akelao na Iudea eḡitaḡauato-ḡoi tamana Heroda gabunai, benamo mo ḡana iaḡo tu egarito. A Barau na nuvi ai evaḡa-ribaiatio ilailanai eraka-vanaḡito, eiaḡoto Galilea tanona rekena ḡana. <sup>23</sup>Galilea tanonai vanuḡa ta

arana Nasaretai etanuto. Monana Barau na peroveta tarimari ġerina Iesu ekiraġiato guruġana emoġonito, ekirato, “Ġia tu Nasareta tarimanai beġe kiraġiani.”

### Ioane Babatiso eġobatato

*Ioane 1:19-28*

**3** Moġeri ġarori ai Ioane Babatiso eiaġomato, tano fakanai Iudea nuġanai eġobatato-ġoi, ekirato, <sup>2</sup>“Ġemi rakava ġerina ġovetuġamaġi-kure, ema ġoraka-kure Barau ġenai, korana Guba Basileiana tu bevotu, (Barau ġena veġitaġau seġukana evaġa-ruġaiani maiġa).” <sup>3</sup>Mai Ioane maiġa tu Isaia peroveta tarimana na ekiraġiato-ġoi, maiġesi ekirato,

“Tarima ta tano fakanai ekeani, ekirani, ‘Vereġauka ġena dabara ġoiarevaia, ġena iaġoma dabarana ġovaġa-maoromaoroa.”

<sup>4</sup>Ioane ġena dabuġa tu kamela ġuiri na ġeveiato, ġena gabaġau tu nanigosi kefina. Ġana ġaniġani dagarari tu madudu e gode nanuri moġo. <sup>5</sup>Tarimarima Ieruselema na e Iudea mabarana na ema Ioridana douka vanuġari mabarari na maki ġeiaġoto-ġoi Ioane ġenai. <sup>6</sup>Ġeri rakava ġekiraġi-foforirito-ġoi vau, ebabatisorito-ġoi Ioridana ġarukanai.

<sup>7</sup>Farisea e Sadukea tarimari ġutuma maki ġia ġenai ġeiaġoto bene babatisori ġana. Ioane na eġitarito nai, ekirarito, ekirato, “Ġomi mota naturi, dei na bekirami, Barau ġena Kota baregona ġarona ġenana boġo raga-maġurini?” <sup>8</sup>Ġemi rakava ġerina boġono vetuġamaġi-kure, benamo ġemi maġuri ai ġwaġwa namori boġono vaġa-ġwari. <sup>9</sup>Ema nuġami ai asi boġono kira, ‘Aberahamo tu ġai tamama, (be Barau na beġabi-raġemani).’ Korana akiramini, Barau tu ma seġukana, Aberahamo natuna tu mai fore ġerina bevaġa-ġorarini!” <sup>10</sup>Toma koko tu ġau korari ai varau beġe toreri; moġa lorinai ġwaġwa namori asi ġevaġa-ġorarini ġauri mabarari tu beġe basirini, karavai beġe fiu-raġerini.

<sup>11</sup>Deikara ġena rakava ġerina evetuġamaġi-kureni tarimana, au na tu nanu na ababatisoani. Senaġi au murigu na beiaġomani tarimana ġena seġuka tu lelevaġi, au ġegu seġuka maki evanaġiani, ema ġia ġena tamaka maki au na asi baġwa-rakaorakaoani riba. Ġia na tu Iauka Veaġa e karava na bebabatisomini. <sup>12</sup>Ġia ġi-manai tu iareva-iareva dagarana, widi momona tu widi tauri ġenana bene iareva-ġitakauri ġana. Benamo widi tu ġena vaġa-vegogo numanai bevaġa-vegogorini, senaġi widi momona begabuani asi ebuseni karavanai.”

### Ioane na Iesu ebabatisoato

*Mareko 1:9-11; Luka 3:21-22*

<sup>13</sup>Moġa neganai Iesu tu Galilea vanuġana na Ioridana ġarukana ġana eiaġoto, Ioane na bene babatisoa ġana. <sup>14</sup>Senaġi Ioane na ekiraġoiato, ekirato, “Bere namo ġoi na au boro babatisogu. Karase nai au ġegu ai boiaġoma?” <sup>15</sup>A Iesu na evaġa-veveato, ekirato, “Veġana noveia, korana veġa iobukaiobuka o Barau ġena ura veġari mabarari bitana korana-iaġiri tu namo.” Benamo Ioane na Iesu ġena ura veġana eveiato.

<sup>16</sup>Iesu ebabatisoato, nanu na eraka-raġasito nuġanai, guba evekeo-fakato, benamo ġia na Barau Iaukana eġitaiato, pune kavana emariġoto ġia iatanai. <sup>17</sup>Ema garo ta guba na ekea-riġoto, ekirato, “Mai tu au Natugu, aura-viniani; ema ġia ġenai aiakurakavani maki.”

### Diabolo o Satani na Iesu eriba-ġaniato

**4** Moġa murinai Iauka Veāġa na Iesu tano fakana ġana eġori-iaġoato, Diabolo na bene riba-ġania ġana. <sup>2</sup> Ġaro e boġi gabana vasivasi (40) nuġari ai asi eġaniġan-ito, eġani-veaġato; moġa lorinai vito na eġabi-rakavaiaato. <sup>3</sup> Benamo Veribaġani Tarimana Diabolo ġia ġenai eiaġoto, ekiraiato, ekirato, “Bema ġoi Barau Natuna nai, mai fore nokirari, be ġaniġani ai ġeiaġo.” <sup>4</sup> A Iesu na evaġa-veaseato, ekirato, “Buka Veāġa nuġanai maiġesi ekirani, ‘Tarimarima tu dia ġaniġani na moġo bemaġurini. Senaġi Barau ġena guruġa beġabi-raġerini e bekorana-iaġirini tarimana tu maġuri beġabiani.’”

<sup>5</sup> Benamo Diabolo na Ierusalem, siti veaġana, ġana eġori-iaġoato, Rubu Veāġa tuġuna vanigerenai evaġa-ruġakauato. <sup>6</sup> Benamo ekirato, “Bema ġoi Barau Natuna, mainana noburi-firiġo, korana Buka Veāġa nuġanai maiġesi ekirani, ‘Barau na ġena aneru bevaġa-naġirini, benamo ġimari na beġe ġobemuni, beġe ġabi-vaissimuni, kwakumu fore ai asi boraraiani.’”

<sup>7</sup> Iesu na ma evaġa-veaseato, ekirato, “Buka Veāġa nuġanai maki ekirani, ‘Vereġauka ġoi ġemu Barau asi bono riba-ġania.’”

<sup>8</sup> Benamo Diabolo na Iesu eġori-raġeato ġoro baregona e maukana ta tuġunai, tanobara basileiari mabarari ma marevari namori e ma seġukari ġesi evaġa-ġitaiaato, <sup>9</sup> ekirato, “Bema ġoiragu ai bovetui-tarini e au botoma-rakarioġo viniguni nai tu, maiġeri mabarari au na bavanimuni.” <sup>10</sup> Benamo Iesu na ekiraiato, ekirato, “Satani, au ġeguna noraka-veġita. Korana Buka Veāġa nuġanai ekirani, ‘Vereġauka ġoi ġemu Barau bono toma-rakariġo vinia, ġia moġo ġereġana vetuġunaġina bono iaġo-vini!’”

<sup>11</sup> Benamo Diabolo na eraga-kwaneato. Aneru kotari Iesu ġenai ġeiaġoto, ġenariato.

### Iesu ġena ġauvei esinaiaato Galileai

*Mareko 1:14-15; Luka 4:14-15*

<sup>12</sup> Iesu eseġaġito, Ioane ġe-diburaiato, benamo Galilea tanona ġana ma eġenoġoi-iaġoto. <sup>13</sup> Senaġi Nasareta vanuġana ma eragakwaneato, asi etanuto, eiaġoto, Kaperanaumai ea tanuto. Kaperanaumai tu Genesareta kouna sevina vanuġana ta, Sebulun e Naftali tanori nuġanai. <sup>14</sup> Moġa ġenana Isaia, peroveta tarimana, ġena guruġa emoġonito, ekirato,

<sup>15</sup> “Sebulun e Naftali tanori ai ġotanuni tarimami o, Galilea kouna rikinai ema Ioridana ġarukana mo rekenai, irau bese tarimami, Barau asi ribami tarimami, ġemi Galilea tu moġa, ġoseġaġi.

<sup>16</sup> Mukunai ġetanuto-ġoi tarimari tu mama barana varau ġeġitaiani. E mo dei mukuna furufuru tanonai ġetanuto-ġoi tarimari iatari ai mama varau bema fofori.”

<sup>17</sup> Mo negai vau Iesu na ġena vari eġobata-iaġi-foforiato, ekirato, “Ġemi rakava ġerina ġovetuġamaġi-kure, ema ġoraka-kure Barau ġenai, korana Guba Basileiana tu bevotu, (Barau ġena veġitaġau seġukana evaġa-ruġaiani maiġa).”



## Iesu na tarima vasivasi (4) ekearito, ġia murinai beġene raka

*Mareko 1:16-20; Luka 5:1-11*

<sup>18</sup> Iesu Galilea kouna kone rikina na eraka-iaġoto-ġoi nuġanai, tarikaka ruarua, Simona, arana ta tu Petero, ma tarina Anduru ġesi eġitarito, ġeri reke kou ai ġefiuato, korana ġia tauri ruarua tu maina tarimari. <sup>19</sup> Benamo Iesu na evaġa-guruġarito, ekirato, “Goiaġoma, murigu ai ġoma raka, be au na tu tarimarima maina viniri bana vaġa-ribami.” <sup>20</sup> Benamo maoromaoro ġeri reke ġeraga-kwanerito, Iesu murinai ġerakato.

<sup>21</sup> Monana ġeraka-iaġoto-ġoi nai, Iesu na tarikaka ruarua ma eġitarito, Iakobo (o James) Sebedaio ma tarina Ioane ġesi; ġeri ġasi ai tamari Sebedaio ġesi ġeri reke ġwadarerri ġeturirito. Iesu na ekearito, <sup>22</sup> benamo maoromaoro ġeri ġasi e tamari ġeraga-kwanerito, Iesu murinai ġerakato.

## Iesu evevaġa-ribato ema keve tarimari evaġa-namorito

*Luka 6:17-19*

<sup>23</sup> Iesu Galilea tanona mabarana erakaoto-ġoi, Iuda tarimari ġeri rubu nuġari ai evevaġa-ribato-ġoi, e Barau ġena Basileia, (ġena veġitaġau seġukana evaġa-ruġaiani), varina namona eġobata-iaġiato-ġoi. Ema tarimarima ġeri keve e midigu iraurau mabarari evaġa-namorito. <sup>24</sup> Ġia varina ġefiuato, Siria tanona mabarana eġabiato, benamo tarimarima na ġeri keve tarimari mabarari ġia ġenai ġeġwa-iaġorito e ġeġori-iaġorito: Midigu iraurau, iauka rakavari na ġeboroġirito tarimari, ġue na evaġiani kevena, tauġani ġeġoġoġoġoni, e tauġaniri tavi tari ġemaseto tarimari, Iesu na mabarari evaġa-namorito. <sup>25</sup> Tarimarima ġutuma-bara ġia murinai ġerakato, Galilea na, Vanuġa Gabanana (10) na, Ierusalemna na, Iudea na, ema Ioridana ġarukana mo rekena na maki ġia ġekavaiato.

## Iesu ġoro tuġunai eġobatato

**5** Iesu na tarima ġutuma-bara eġitarito, benamo ġoro tai eraġeto, iatanai etanutarito. Ġena mero ġia ġenai ġeiaġoto. <sup>2</sup> Benamo ġia na evaġa-riba matamarito, maiġesina ekirato:

### Iaku e verere korikorina

*Luka 6:20-23*

<sup>3</sup> “Manau tarimari, Barau ġenai moġo ġevetabeikauni tarimari, tu beġene iaku, korana Barau ġena Basileia tu ġia ġeri.

<sup>4</sup> Deidei toma ġenuġa-midigu midiguni tarimari tu beġene iaku, korana Barau na ġeri nuġa-midigumidigu bevaġa-magorini.

<sup>5</sup> Manau tarimari tu beġene iaku, korana Barau na tanobara mabarana ġia bevinirini.

<sup>6</sup> Veġa iobukaiobuka vitona ġevito-iaġiani e nanumasena ġenanumase-iaġiani tarimari tu beġene iaku, korana vau beġe ġani-maseni.

<sup>7</sup> Vevetuġaġwa tarimari tu beġene iaku, korana Barau na ġia maki bevetuġa-ġwarini.

<sup>8</sup> Deidei nuġari namo vedaurea tarimari tu beġene iaku, korana ġia na Barau beġe ġitaiani.

<sup>9</sup> Deidei na toma vevaġa-maino veġari ġeveirini tarimari tu beġene iaku, korana Barau na ġia natunai bekiraġirini.

<sup>10</sup>Deidei na toma veīga iobukaiobukari ġeveirini ġaramanai ġevaġa-midigu midig-urini e ġevaġa-rakavarini tarimari tu beġene iaku, korana Guba Basileia tu ġia ġeri.

<sup>11</sup>Bema au murigu ai ġorakani ġaramanai ġomi beġe mugumugu-iaġimini, beġe vaġa-midigu midigumini, e veīga rakavari irauirau ġemi ai beġe kiraġirini beġe ġofaġofa-iaġimini nai, boġono iaku. <sup>12</sup>Boġono iaku, boġono verere, korana Barau na voimi baregona bevinimini gubai. Maiġesina veīga ilailana, ġomi murimi tarimari, peroveta tarimari guineri, na maki moġesi ġevaġa-rakavarito.”

### **Damena e mama**

*Mareko 9:50; Luka 14:34-35*

<sup>13</sup>“Ġomi tu tanobara damenana. Bema damena mamina korikorina bekorini nai, kamara dabarai mamina ma beġenoġoini? Mai tu varau berakava, asi ġena namo ta. Moġa lorinai beġe fitoġaiiani, benamo tarimarima kwakuri na ma beġe fanafanatariani.

<sup>14</sup>Ġomi tu tanobara mamana. Ġoro tuġunai ġevaġa-ruġaiato vanuġana tu asi bevekuretoġani riba. <sup>15</sup>Lamefa beġe gabuani maki, ġuro gaburenai asi beġe torenani, senaġina lamefa toretorena fatana korikorinai beġe tore-kauani. Benamo ġia mamana na numa tarimari mabarari bevinirini. <sup>16</sup>Ilailana, ġomi ġemi mama tarimarima ġoirari ai moġesi boġono vaġa-foforiri, be ġemi veīga namori beġene ġitari, benamo Tamami gubai etanuni tu beġene vaġa-raġea.”

### **Iesu ema taravatu**

<sup>17</sup>“Maiġesina asi boġono tuġa-maġi, au aiaġomato tu, Mose ġena taravatu e peroveta tarimari ġeri guruġa asi aniri ai bana vaġa-iaġori ġana. Asiġina. Au tu asi aiaġomato moġeri guruġa asi tauri ai bana vaġa-iaġori ġana, senaġi bana vaġa-moġoniri e bana vaġa-kori ginikauri uranai aiaġomato. <sup>18</sup>Moġoni akira-mini, guba e tanobara roġo ġetanuni nuġanai, taravatu ġena leta misina korokorona ta o ġena koma ta asiġina ġinavaġi berekwa-rekwani, beiaġoni mo, taravatu mabarari tauri korikori beġea ġorani. <sup>19</sup>Moġa lorinai, tarima ta na taravatu misina korokorona ta bekira-sirivaġi viniani, ema ġena ura veīganai tarima kotari mai veīga ilailana ma bea vaġa-ribarini, ġia tu Guba Basileiai gabi tarimanai beġe kiraġiani. Senaġina tarima ta na taravatu bekorana-iaġirini ema tarima kotari ma bea vaġa-riba iaġirini, ġia tu guine tarimanai beġe kiraġiani Guba Basileia nuġanai. <sup>20</sup>Akira-korikorimini, bema ġomi ġemi vei-iobukaiobuka na Farisea e taravatu ġevevaġa-riba iaġiani tarimari ġeri vei-iobukaiobuka asi bevanaġiani nai, ġomi tu Guba Basileia nuġanai asi boġo raka-toġani, asiġina ġinavaġi.”

### **Vaġivaġi**

*Luka 12:57-59*

<sup>21</sup>“Ġomi ma ribami, tarima guineri na taravatu guruġari ġeġabirito, ġekirato, ‘Asi bono vaġivaġi! A deikara na tarima ta bevaġiani nai, ġia tu Kota gabuna ġana beiaġoni.’ <sup>22</sup>Senaġi toma au na akiramini: Tarima ta tarikakana bebaru-viniani nai, ġia tu Kota gabunai beġe danaġiani. E dei na tarikakana beguruġa-rakava viniani nai, ġia tu Kota baranai beġe vaġa-ruġaiiani. Ema dei na tarikakana bekiraiani, ‘Ġoi tu babo korikori’ betoni nai, ġia tu asi ebuseni karavana ġana beiaġoni.

<sup>23</sup> Moġa lorinai, bema ġemu varevare dagarana fata veaġana iatanai bono torekaua, Barau bono vinya otoni nuġanai, ġoi tarikamu otuġamaġiani, ġia ma ġena meto ġoi ġemu ai, <sup>24</sup> benamo ġemu varevare dagarana fata veaġana ġoiranai noraga-kwanea, noiaġo, tarikakamu ġesi maino boġono ġabia roġo, gabivau bono ġenoġoi-iaġo, ġemu varevare dagarana fata veaġanai bono torea Barau ġena.

<sup>25</sup> Ġoi ebaru-vinimuni tarimana ġesi maino boġono raga-ġabia, Kota gabuna ġana roġo mani ġoraka-vegogoni nuġanai. Korana ebaru-vinimuni tarimana na Kota eseġaġini tarimana ġimanai bea tore-kaumuni ġesi, ema Kota eseġaġini tarimana na dibura numana ġitaġauna tarimana ġimanai betoremuni, benamo ġia na dibura numana nuġanai bebiri-ġaumuni garina. <sup>26</sup> Au na akira-korikorimuni: Monana asi roġo boraka-rosini, beiaġoni mo, ġemu meto voina bodava-ġosiani.”

### Veġura-vanaġi

<sup>27</sup> “Ġomi ma ribami, tarima guineri na taravatu guruġari ġeġabirito, ġekirato, ‘Asi bono veġura-vanaġi!’ <sup>28</sup> Senaġi au na akiramini: Deikara na tarima ta ġaraġona beġita-karakaraiani ma eurani bene ġabia ġia ġena, ġia tu nuġana tuġamaġina ġenana varau beveġura-vanaġi mo vavine ġenai. <sup>29</sup> Bema ġoi matamu aroribana na evaġa-rakavamuni nai, bono ġibo-vaġia, bono fitoġaia! Korana tauġanimu rakavana rekena berekwa-rekwani tu namo, a asi namo tauġanimu mabarana karava asi ebuseni gabunai beġe fiu-kauani. <sup>30</sup> Ma bema ġoi ġimamu aroribana na evaġa-rakavamuni nai, bono basi-ġutua, bono fitoġaia. Veġa namona tu, tauġanimu rakavana rekena bono fitoġa-guinea, be tauġanimu mabarana karava eġara-vanaġi vanaġini gabuna ġana asi bene iaġo.”

### Vavine tuġuraka

*Mataio 19:9; Mareko 10:11-12; Luka 16:18*

<sup>31</sup> “Tarima guineri na taravatu guruġari ġeġabirito, ġekirato, ‘Tau ta ġaraġona betuġu-rakaiani nai, ġia na veġaraġo ruġaruġana fefana bene tore-vinia.’ <sup>32</sup> Senaġina au na akiramini: Bema tarima ta ġaraġona betuġu-dobiani, senaġi vavine tu veġura-vanaġi veġari asi eveini, mo tau na ġaraġona tu veġuravanaġi vavinenai evaġa-iaġoani. Ema deikara na etuġu-rakaiato vavinenana beġaraġoani tarimana tu, beveġura-vanaġini.”

### Guruġatore

<sup>33</sup> “Ġita senera ġevaġa-ribarito guruġari ġomi tu ma ribami: ‘Ġemi guruġatore asi boġono vaġa-rakavaia, senaġi Vereġauka ġoiranai ġokiraġi-toreto dagarari boġono veiri.’ <sup>34</sup> Senaġi au na akiramini: Asi boġono guruġatore veġata! Ġemi guruġa vaġa-gwaġiġiri ġana guba asi boġono kiraġia, guba aranai asi boġono guruġatore, korana ġia tu Barau ġena terona; <sup>35</sup> o tanobara aranai maki asiġina, korana ġia tu Barau kwakuna ġena fanakau dagarana; o Ierusalem a aranai, korana ġia tu Kini baregona ġena siti. <sup>36</sup> Ġoi debamu, ġemu maġuri, maki asi bono kiraġia ġemu guruġatore vaġa-gwaġiġina ġana, korana ġoi na ġuimu sebona ta asi bovaġa-kurokuroani e asi bovaġa-dubadubaiiani riba. <sup>37</sup> Namona tu maiġa: Ġemu guruġa bono kiraġia, ‘Oi’ bene oi e ‘Asiġina’ bene asiġina. Moġa moġo, a guruġa tari ma okiraġirini tu Tarima Rakavana, Satani, ġenana eiaġomani.”

### Evaġa-rakavamuni tarimana voina asi bono veia

*Luka 6:29-30*

<sup>38</sup>“Tarima guineri ġevaġa-ribarito guruġari ġomi tu ma ribami, maġesi ġekirato: ‘Mata voina mata e doġa voina doġa.’ <sup>39</sup> Senaġina au na akiramini, veġa rakavana evei-vinimuni tarimana asi bono veġa rakava-vinia. Bema tarima ta na taġomu aroribana beforoani nai, taġomu kaurina ma bono vinia maki. <sup>40</sup> E bema tarima ta na Kotai betoremuni ġemu sedi bene ġabia ġana nai, ġemu koudi maki bono vinia. <sup>41</sup> Ema tarima ta na belau-naġimuni, kilomita sebonai bono kavaia betoni nai, kilomita ruarua ai ma bono raka ġia ġesi. <sup>42</sup> Ema enoġinoġini tarimana bono vinia, e ġemu ai bene ġabitore etoni tarimana maki asi bono kira-sirivaġi vinia.”

### Ġevaġa-rakavamuni tarimari bono ura-viniri

*Luka 6:27-28; 6:32-36*

<sup>43</sup>“Tarima guineri ġevaġa-ribarito taravaturo ma ribami, ġekirato: ‘Ġoi sevimu tarimana bono ura-vinia, a evaġa-rakavamuni tarimana bono vaġa-rakavaia.’ <sup>44</sup> Senaġina au na akiramini: Ġebaru-vinimuni tarimari boġono ura-viniri, e dei na ġevaġa-rakavamuni tarimari maki iatari ai boġono ġauġau. <sup>45</sup> Maiġa ġenana boġo vaġa-foforiani, ġomi tu Tamami gubai etanuni na natunai evaġa-iaġomito. Korana ġia na ġaro tu veġa rakava tarimari e veġa namo tarimari iatari ai evaġa-raġekauani, ema ġura maki veġa iobukaiobuka e veġa ġeġeva-ġeġeva tarimari ġeri etuġu-riġoani. <sup>46</sup> Bema ġoura-vinirini tarimari tu ġomi ġeura-vinimuni tarimari moġo nai, kamara varevare namona boġo ġabiani? Takesi ġegogoni tarimari o ġofaġofa tarimari na maġesina maki ġeveiani. <sup>47</sup> Ema tarikakami moġo boġo vaġa-namorini, ġemi namo tu kara? Barau asi ribari tarimari na maki mai veġa ġeveiani. <sup>48</sup> Moġa lorinai ġomi tu asi vetoukaumi boġono tanu, ġomi Tamami gubai etanuni asi vetou-kauna kavana.”

### Vini korikorina rabu tarimari ġeri ai

**6** “Rorimi boġono vetore, ġemi veġa namori tarimarima ġoirari ai asi boġono vaġa-foforiri, ġia na beġene vaġa-raġemi ġana. Maiġeri boġo veirini nai, Tamami gubai etanuni ġenana voimi asi boġo ġabini.

<sup>2</sup> Moġesi nai, ġemu varevare rabu tarimari bovinirini nai, asi bono ġobata-iaġia ma kibimu ġesi, ġofaġofa tarimari rubu ai e vanuġa ġatamanai ġeveini kavana, tarimarima na beġene vevato-iaġiri ġana. Akira-korikorimini, ġia tu tarimarima na ġevaġa-raġerini, be voiri tu varau ġeġabirito. <sup>3</sup> Sena-ġina ġoi ġemu varevare asi ġena-ġana tarimana novinia botoni nai, ġimamu kaurina asi bene riba, ġoi ġimamu aroribana na kara eveiani. <sup>4</sup> Be ġemu varevare vekuretoġai bono vini. Ema Tamamu na, kara eġorani vekure-toġai eġitarini, ġia na vau voimu bevinimuni.”

### Vereġauka ġena ġauġau

*Luka 11:2-4*

<sup>5</sup>“Bema boġo ġauġauni nai, ġofaġofa tarimari kavana asi boġono iaġo! Ġia ruġaruġari ai ma iakuri ġesi ġeġuriġurini, rubu nuġari ai e vanuġa ġatamanai ema dabarai maki, tarimarima na beġene ġitari ġana. Au na akira-korikorimini, ġia voiri varau ġeġabito. <sup>6</sup> A ġoi ourani bono ġauġau otoni nai, ġemu numma daiġu-

tuna nuḡanai bono rakatoḡa, ḡatama-boka bono biri-ḡaua, monai vau Tamamu bono noḡi-vinia, ḡia tu vekuretoḡai etanuni. Ema Tamamu na, kara eḡorani vekuretoḡai eḡitarini, ḡia na vau voimu bevinimuni.

<sup>7</sup> Ḡomi boḡo ḡauḡauni nai, asi boḡono kiraḡi ḡenoḡoi-ḡenoḡoi guruḡa asi aniri ḡeri ai, Barau asi ribari tarimari ḡeveini kavana. Ḡia ḡetuḡamaḡini, ḡeri guruḡa vovoka ḡekiraḡirini naima, Barau na beseḡaḡirini. <sup>8</sup> Ḡia kavari asi boḡono iaḡo. Korana ḡomi na kara ḡoura-vinirini, Tamami na eriba-guineani, gabivau ḡomi na ḡonoḡi-viniani.

<sup>9</sup> Maḡesina boḡono ḡuriḡuri:

‘Ḡai Tamama o, gubai otanuni; ḡoi aramu baḡana vaḡa-veaḡaia;

<sup>10</sup> ḡemu Basileia bene iaḡoma; ḡemu ura tanobarai baḡana veia, gubai ḡeveiani kavana.

<sup>11</sup> Ḡema-ḡama toma bono vinima.

<sup>12</sup> Ḡema rakava notuḡamaḡi-fitoḡari, ḡai ḡevaḡa-rakavamani tarimari ḡeri rakava ḡatuḡamaḡi-fitoḡarini vaḡa-ilailana.

<sup>13</sup> Veribaḡani ai asi bono ḡori-kauma, a Rakava Tarimana, Satani, ḡimana na bono vaḡa-maḡurima. [Korana Basileia tu ḡoi ḡemu, seḡuka ḡoi ḡemu, mareva baregona ḡoi ḡemu, toma bene iaḡo mo vanaḡivanaḡi, Amen.]’

<sup>14</sup> Bema ḡomi na ḡevaḡa-rakavamini tarimari ḡeri rakava boḡo tuḡamaḡi-fitoḡarini nai, Tamami gubai etanuni na ḡemi rakava maki betuḡamaḡi-fitoḡarini. <sup>15</sup> Senaḡina, bema ḡomi na ḡevaḡa-rakavamini tarimari ḡeri rakava asi boḡo tuḡamaḡi-fitoḡarini nai, Tamami na ḡemi rakava maki asi betuḡamaḡi-fitoḡarini.”

### Ḡaniveaḡa

<sup>16</sup> “Boḡo ḡani-veaḡani nai, asi boḡono boḡe-vetuḡa, ḡofaḡofa tarimari ḡeveini kavari. Ḡoirari ai ḡevevaḡa-fofori ḡofakauni, tarimarima na matoru beḡene kira, ‘Ḡeḡani-veaḡani kika’ beḡene si. Akira-korikorimini, ḡia voire tu varau ḡeḡabirito.

<sup>17</sup> A ḡoi, bema bono ḡani-veaḡa botoni nai, debamu ai deoro bono tore e ḡoiramu bono ḡuriḡia, <sup>18</sup> be tarimarima na asi beḡene ribamu, ḡoi tu oḡani-veaḡani, senaḡina Tamamu veḡuni ai moḡo bene riba. Ema Tamamu na, kara eḡorani vekuretoḡai eḡitarini, ḡia na vau voimu bevinimuni.”

### Ḡemi farefare gubai boḡono vaḡa-vegogo

*Luka 12:33-34*

<sup>19</sup> “Ḡemi farefare tu mai tanobarai asi boḡono vaḡa-vegogo! Korana faro ema lalalala o rasta na beḡe vaḡa-rakavarini ḡesi, ema lema tarimari na numa beḡe dareani ema beḡe lemarini. <sup>20</sup> Ḡemi farefare gubai boḡono vaḡa-vegogo, faro e lalalala na asi beḡe vaḡa-rakavarini, ema lema tarimari na maki numa asi beḡe dareani ema asi beḡe lemarini riba. <sup>21</sup> Ḡoi ḡemu farefare ainai etanuni, ḡoi nuḡamu maki monai etanuni.”

### Mata tu tauḡani ḡena mama

*Luka 11:34-36*

<sup>22</sup> “Mata tu tauḡani ḡena lamefa kavana. Bema ḡoi matamu namo nai, tauḡanimu mabarana maki bemamani. <sup>23</sup> Senaḡina bema ḡoi matamu tu rakava nai, tauḡanimu mabarana maki bemukunani. A bema mama ḡoi nuḡamu ai tu mukuna nai, mai mukuna tu bebarego-vedaureani!”

## Tarima ta vere ruarua vetuḡuri asi beiaḡo-vinini riba

*Luka 16:13*

<sup>24</sup> “Tarima ta na vere ruarua vetuḡunaḡiri asi beiaḡo-vinirini riba. Korana ḡia na ta tu asi beura-viniani, a ta tu beura-viniani; ta bevaḡa-moḡoniani, a ta tu beḡofaḡofa-iaḡiani. Barau ema moni nega sebonai vetuḡunaḡiri asi boḡo iaḡo-vinirini riba.”

## Asi boḡono nuḡa-vekwaraḡi

*Luka 12:22-31*

<sup>25</sup> “Moḡesi naima akiramini, ḡemi maḡuri asi boḡono tuḡamaḡiri, kara boḡo ḡanini o boḡo niuni; o tauḡanimi kara na boḡo dabuḡarini. Aiḡa tu dagara barana, maḡuri ba ḡaniḡani? E aiḡa tu dagara barana, tauḡani ba dabuḡa? <sup>26</sup> Gubai ḡerovoni manuri ḡoḡitari! ḡia tu asi ḡevarovaroni e asi ḡekwakwani, ema vamoka numari ai maki ḡaniḡani asi ḡevaḡa-vegogoni. Senaḡi Tamami gubai etanuni na eḡuburini. Ḗomi tu dagara baregomi, a manu tu kei! <sup>27</sup> Ḗomi deikara onuḡa-vekwaraḡini nai, ḡemu maḡuri kota ma bovaḡa-maukaiani riba ba?

<sup>28</sup> Karase dabuḡa urari ai ḡove-tuḡamaḡi-vekwaraḡini? Boḡa veraverari ḡoḡitari, aiḡesi ḡegarani. Asi ḡeḡauveini e dabuḡa asi ḡeturini. <sup>29</sup> Senaḡina akiramini, Kini Solomona ḡena vedabuḡa marevana maki ḡevanaḡiani. <sup>30</sup> Mai tu Barau na tano ḡauḡari evaḡa-dabuḡarini, ḡia tu toma ḡegarani, a boinani tu karavai beḡe fiuraḡerini, Barau tu moḡesina evaḡa-dabuḡarini. Ḗia na ḡomi asi veḡatana bevaḡa-dabuḡamini, ei? Ḗomi veḡabidadama misimisi tarimami! <sup>31</sup> Moḡesi nai, asi boḡono nuḡa-vekwaraḡi, asi boḡono kira, ‘Kara toma taḡanini?’ O ‘Kara toma taniuni?’ O ‘Kara toma tariḡoni?’ <sup>32</sup> Barau asi ribari tarimari na maḡeri dagara mabarari ḡeraga-vetaurini, a Tamami gubai etanuni tu ribana, ḡomi na maḡeri ḡoura-vinirini. <sup>33</sup> Senaḡina giniguine ḡia ḡena Basileia ema ḡena vei-iobukaiobuka boḡono vetauḡuineri, benamo maḡeri dagara mabarari ḡomi bevinimini. <sup>34</sup> Moḡesina naima boinani ḡaro tuḡamaḡi-vekwaraḡina asi boḡono vei; boinani ḡaro ḡena vekwaraḡi tu Barau ḡimanai. Toma ḡaro ḡena vekwaraḡi iatanai meto ma boḡo torekauani nai, kamasi boḡo ḡwaiiani?”

## Tarimarima asi boḡono vetau-viniri

**7** <sup>1</sup> “Tarimarima asi boḡono vetau-viniri, be Barau na maki asi bene vetau vinimi. <sup>2</sup> Korana tu ḡomi ḡemi vetauvini ilailanai, ḡomi maki moḡesina moḡo Barau na bevetau-vinimini; ema aiḡesi ḡovevaḡa-vetovo vinirini, Barau na maki moḡesi bevevaḡa-vetovo vinimini. <sup>3</sup> Karase nai tarikakamu matanai libika oḡitaiani, senaḡi ḡau tubina ḡoi matamu nuḡanai maḡiḡa tu asi otuḡamaḡiani? <sup>4</sup> Kamara dabarai ḡoi tarikakamu okiraiani, ‘Ḗata, au na roḡo matamu ai libika nakokia,’ senaḡina ḡoi tauḡemu matamu ai ḡau tubina ta etanuni? <sup>5</sup> Ḗoi ḡofaḡofa taumu, guine tu ḡoi matamu ai ḡau tubina nokoki-vaḡia roḡo, benamo boboḡeboḡe-ginikauni vau, tarikakamu matanai libika bono ḡabi-vaḡia.

<sup>6</sup> Dagara veaḡari kwaiva (o kira-sirivaḡi tarimari) asi boḡono viniri, ema ḡemi aḡeva maki asi boḡono fiu-rosiri bai ḡoirari ai! Kwakuri na beḡe fana-taririni, benamo beḡe doḡe-kureni, ma beḡe dare-misi misimini garina.”

## Noġinoġi, vetauvetau, sekeseke o fidifidi

*Luka 11:9-13*

<sup>7</sup>“Noġinoġi ai Barau na bevini-mini, vetauvetau ai boġo doġarini, sekeseke ai ġemi ġatama boka bekeoani. <sup>8</sup>Korana benoġi-noġini tarimana tu beġabini, bevetau tarimana bedoġarini, ema beseke-sekeni tarimana Barau na ġena ġatama-boka bekeoani.

<sup>9</sup>Gomi dei bema natumu merona ġaniġani benoġini nai, ġoi na fore boviniani? <sup>10</sup>O maġani-kone benoġini nai, mota boviniani? <sup>11</sup>Boġono tuġamaġi, ġomi tu rakava tarimami, senaġi dagara namori natumi viniviniri ma ribami, moġa lorinai ġomi Tamami gubai etanuni, ġia na dagara namori ġenoġi-viniani tarimari bevinirini veġatana!

<sup>12</sup>Ġomi kara ġourani tarimarima na ġemi ai beġene veiri veġari, ġia ġeri ai maki moġeri veġa boġono veiri. Mose ġena taravatu e peroveta ġeri vevaġa-riba guruġari tauna korikorina tu moġa.”

## Barau ġena Basileia rakatoġana

*Luka 13:24*

<sup>13</sup>“Ġatama-boka kibobonai boġono rakatoġa. A mase gabuna ġana eiaġoni dabarana tu baġaka, e ġena ġatama-boka tu barego rakava, ema ġutuma maki monai ġeraka-toġani. <sup>14</sup>Senaġi maġuri vanaġivanaġi ġana eiaġoni ġatama bokana tu kibobo e dabara maki kei rakava, ema tarimarima viravira na moġo ġedoġariani.”

## Peroveta tarimari ġofaġofari

*Luka 6:43-44*

<sup>15</sup>“Rorimi boġono vetore peroveta tarimari ġofaġofari ġerina. Ġia ġomi ġemi ai ġeiaġomani tu ma mamoe dabuġari ġesi, senaġina nuġari ai ġeri tuġamaġi tu boġa kwaivari rakavari kavari. <sup>16</sup>Ġia ġwaġwari ai vau boġo ribarini. Vine ġwari (o grapes) tu ġau ma giniri ġerina asi ġebokoni, ema figi ġwari maki ġauġa ġiniġiniri ġeri ai asi ġeġabini. <sup>17</sup>Ġau namona ġenana ġwaġwana namona bevaġa-ġoraiani, a ġau rakavana ġenana maki ġwaġwana rakavana bevaġa-ġoraiani. <sup>18</sup>Ġau namona na ġwaġwa rakavana asi beġwani riba, ilailana ġau rakavana na ġwaġwa namona asi beġwani riba. <sup>19</sup>Ġwaġwa namori asi ġeġwani ġauri tu beġe basirini, ma karavai beġe fiuraġerini. <sup>20</sup>Moġesina ilailana peroveta tarimari ġofaġofari tu ġwaġwari ai boġo ribarini.

<sup>21</sup>Dia ‘Vereġauka, Vereġauka,’ ġetoguni tarimari mabarari tu Guba Basileiai beġe raka-toġani. Asiġina. Deikara Tamagu gubai etanuni ekorana-iaġiani e ġena ura veġari eveirini tarimana ġereġana moġo. <sup>22</sup>Kota baregona ġarona beraġasini nai, tarima ġutuma na beġe kiraguni, beġe kirani, ‘Vereġauka, Vereġauka, ġoi aramu ai ġaperovetato, e ġoi aramu ai iauka rakavari ġalai-vaġirito, ma ġoi aramu ai nuġa-farevaġi veġa boruri ġutuma maki ġaveirito.’ <sup>23</sup>Benamo au na bakirarini, bakirani, ‘Au asi ribaġu ġomi. Ġeguna ġoraka-veġita, ġomi veġa rakava tarimami!’”

## Numa ruarua ragaragari tauri

*Luka 6:47-49*

<sup>24</sup> “Moğa lorinai, tarima ta na ġegu guruġa maiġeri eseġaġirini, ma veiġari eveirini tu, tarima iaunegana na ġena numa fore iatari ai evaġa-ruġaiato kavana. <sup>25</sup> Ġura baregona eraguto, ġaruka mabarari ġeġabatarito, iavara asikeikeina eragato nai, mo numa edoriato; senaġina asi eġwa-lauato, korana ġia tu fore iatanai evaġa-ruaġaiato nai. <sup>26</sup> A deikara na ġegu guruġa maiġeri eseġaġirini, senaġi veiġari tu asi eveirini, ġia tu tarima babona noġa, numa eragato nai, miri iatanai moġo evaġa-ruġaiato. <sup>27</sup> Ġura baregona eraguto, ġaruka mabarari ġeġabatarito, iavara asikei eraġasito, mo numa edoriato nai, eġwa-lauato, benamo eġwa-rovorovoto.”

<sup>28</sup> Iesu na ġena ġobata guruġari maiġeri ekiraġi-ġosirito nai, mai vegogo tarimari ġutuma-bara na ġena vevaġa-riba guruġari ġeġaba-iaġirito. <sup>29</sup> Korana ġena guruġa ma seġukana, dia ġeri taravatu ġevevaġa-riba iaġiato-ġoi tarimari ġeri guruġa kavana.

## Iesu na lepera tarimana evaġa-namoato

*Mareko 1:40-44; Luka 5:12-14*

**8** Iesu ġoro tuġuna na ma emariġoto nai, tarima ġutuma-bara ġia murina na ġerakato. <sup>2</sup> Benamo tarima ta ma leperana Iesu ġenai eiaġoto, ġoiranai evetuitarito, ekirato, “Vereġauka, bema ġoi ourani nai, moġoni boiarevaguni, bovaġa-namoguni riba!” <sup>3</sup> Iesu na ġimana eduġi-roroġotoato, keve tarimana eġabi-karaiato, ekirato, “Aurani, be nonamo!” Benamo vaġa-sebo lepera na enamoto. <sup>4</sup> Iesu na evaġa-guruġaiato, ekirato, “Tarima ta asi bono kira-varaia. Noiaġo, Rubu Veaġa verena na bene ġitam, ema veiareva varevare dagarari Mose na ekiraġiato ilailanai bono vinia; be tarimarima beġene riba, ġoi tu bonamo.”

## Roma vetari verena ġena vetuġunaġi merona

*Luka 7:1-10*

<sup>5</sup> Iesu Kaperanauma ai eraġasito nai, Roma vetari verena ta ġia ġenai eiaġoto, Iesu enoġiato, <sup>6</sup> ekirato, “Vereġauka, ġegu vetuġunaġi merona tauġanina asi eġarevani, be numai egenataġoni, ema midigu maki barego eġanini.” <sup>7</sup> Iesu na ekiraiato, ekirato, “Au aiaġosini, be asi-vaġa-namoani.” <sup>8</sup> Vetari verena na evaġa-veaseato, ekirato, “Vereġauka, au tu asi ilaila ġoi ġegu numai boraġe-kauni; senaġi ġoi noguruġa moġo, benamo au ġegu vetuġunaġi merona benamoni. <sup>9</sup> Au maki tarima kota ġeri veġitaġau gabureri ai, ema vetari tarimari o soldia tu au gaburegu ai. Au na ta bakiraiani, ‘Noraka!’, benamo berakani, ma ta bakiraiani, ‘Noiaġoma!’, benamo beiaġomani. Ema au ġegu vetuġunaġi merona bakiraiani, ‘Maiġa noveia!’, benamo beveiani.”

<sup>10</sup> Iesu na ġena guruġa eseġaġiato nai, eġaba-rakavato. Benamo ġia murinai ġerakato tarimari evaġa-guruġarito, ekirato, “Au na akira-korikorimini, Isaraela nuġanai mai-ġesina veġabidadama ta roġosi bana doġaria. <sup>11</sup> Au na akiramini maki, tarimarima ġutuma ġaro-raġe e ġaro-riġo rekeri na beġe iaġomani, Aberahamo, Isako, e Iakobo ġesi vereko baregonai beġe ġani-vegogoni Guba Basileiana nuġanai. <sup>12</sup> Senaġina tovotovonai Barau na eġabi-viriġirito tarimari, Basileia nuġanai beġene



tanu etato tarimari tu, Barau na befiu-rosirini murikai, mukuna furufuru nuġanai. Monai beġe taġini, e gadikari maki beġe veġara-tarini.”

<sup>13</sup> Benamo Iesu na vetari verena ekiraiato, ekirato, “Noiaġo, ġemu numa ġana! Boveġabidadama lorinai, veġana beġorani.” Ġena vetuġunaġi merona mo horai varau enamoto.

### **Iesu na Simona ġena taġama evaġa-namoato**

*Mareko 1:29-31; Luka 4:38-39*

<sup>14</sup> Iesu Petero ġena numai eraka-toġato. Monai Petero ġena taġama vavinena ekeveto, tauġanina eseġukato, be egena-taġoto-ġoi, Iesu na eġitaiato; <sup>15</sup> ġimanai eġabito, benamo ġena keve ekorito, evaisi-raġeto, benamo ġia eġubato.

### **Iesu na tarimarima ġutuma evaġa-namorito**

*Mareko 1:32-34; Luka 4:40-41*

<sup>16</sup> Lavilavi ai iauka rakavari na ġeboroġirito tarimari ġutuma Iesu ġenai ġeġori-iaġorito. Iesu na moġeri iauka rakavari ġena guruġa seġukana ġenana moġo elai-vaġirito, e keve tarimari mabarari maki evaġa-namorito. <sup>17</sup> Maiġeri veġa vaġa-moġoniri tu Isaia, peroveta tarimana, na ekiraġiato kavana, ekirato, “Ġia na ġera midigumidigu eġabi-veġitarito, ema ġera keve irauirau eġwarito, evaġa-namorito.”

### **Iesu murinai beġene raka ġetato tarimari**

*Luka 9:57-60*

<sup>18</sup> Iesu na tarimarima ġutuma na ġevegogo-ġeġeraġiato eġitarito, benamo ġena mero ekirarito, ekirato, “Siveġasi-vanaġi, kou mo rekena ġana.” <sup>19</sup> Nuġanai taravatu evevaġa-riba iaġiato-ġoi tarimana ta Iesu ġenai eiaġoto, ekirato, “Vevaġa-riba tarimamu, ġoi aiġana boiaġoni nai, au ġoi murimu ai moġo bana raka atoni.” <sup>20</sup> Iesu na ekiraiato, ekirato, “Boġa kwaivari ma ġeri kouġa, ema manu ma ġeri nuġi, senaġi Tarimarima Natuna tu asi ġena gena gabuna.”

<sup>21</sup> Iesu ġena mero ta na maki evaġa-guruġaiato, ekirato, “Vereġauka, mani ġemu veġa, naġenoġoi, be tamagu roġo naguria.” <sup>22</sup> Iesu na evaġa-veseato, ekirato, “Murigu ai noma raka, mani tu noiaġuiri; mase tarimari (o Barau asi ġekorana-iaġiani tarimari) na ġeri mase tauġeri na beġene guriri.”

### **Iesu na iavara e geta o ureure ekira-ġoirito**

*Mareko 4:36-41; Luka 8:22-25*

<sup>23</sup> Iesu ġasi ai eraġeto nai, ġena mero maki ġia ġesi ġeraġe-sebonato. <sup>24</sup> Ġeiaġoto-ġoi nai, asikauna iavara asikei kou ai eraġasito, benamo ureure tu ġasi nuġanai ġevebubu-ġurato. A Iesu tu egenato-ġoi. <sup>25</sup> Benamo ġena mero ġeiaġoto ma ġevaġoato, ġekirato, “Vereġauka, novaġa-maġurima, ġita tu mai taburuni, dori tamaseni. <sup>26</sup> Iesu na evaġa-veserito, ekirato, “Karase nai ġogarini? Veġabidadama kei rakava tarimami!” Benamo Iesu evariġisito, iavara ma ureurena ġesi ekira-ġoirito, benamo ġedokoto, ġemeġomeġo-tarito. <sup>27</sup> Tarimarima mabarari ġeġabarakavato, ġekirato, “Mai tu kamara tarima se? Iavara e ureure na maki garona ġeseġaġiani!”

## Iesu na tarima ruarua iauka rakavari na ġeboroġirito evaġa-namorito

*Mareko 5:1-17; Luka 8:26-37*

<sup>28</sup> Galilea kouna tavina rekenai, Gadara (o Gerasa) tarimari ġeri tano ai, Iesu er-aġasito, benamo iauka rakavari na ġeboroġirito tarimari ruarua gara kouġari na ġeiaġomato-ġoi Iesu ġenai. Mai tarima ruarua tu ma gariri, moġa lorinai tarima ta mo dabara na asi eraka-vanaġito-ġoi. <sup>29</sup> Benamo tauri ruarua Iesu ġeġaba-viniato, ġekirato, “Barau Natuna o, kara ġai ġemai noveia otoni? Ġoi boiaġoma maiġa tu, noma vaġa-midiguma ġana, ġaro korikorina roġosi roġo bene raġasi nuġanai, ei?”

<sup>30</sup> Monai, asi manaġa lelevaġi, bai serina ġedokadokato-ġoi. <sup>31</sup> Moġesina nai iauka rakavari na Iesu ġenoġiato, ġekirato, “Bema ġoi na ġai bolai-vaġimani nai, notuġuma bai ġeri ai, ġia nuġari ai ġaraka-toġa.” <sup>32</sup> Iesu na ekirarito, ekirato, “Be ġoiago!” Benamo iauka rakavari mo tarima ruarua ġerina ġeraka-vaġito, ġeiaġoto, bai ġeri ai ġeraka-toġato. Benamo bai serina mabarana eġwa-bubu-lausiato, lalaġa na ġekokosi-firiġoto, kou ai ġeveġuġutu-maseto.

<sup>33</sup> Bai ġitaġauri tarimari ġeraga-kwareġato, vanuġa ġana ġeiaġoto, vari mabarana ġekiraġiato, ema iauka rakavari na ġeboroġirito tarimari ġeri ai kara ġeġorato mabarari maki ġevaġa-foforirito. <sup>34</sup> Benamo vanuġa tarimari mabarari ġeġoto-iaġoto, Iesu beġene ġitaia ġana. Iesu ġenai ġeraġasito nai, ġenoġiato, ġeri tano na bene raka-veġita.

## Iesu na rakava etuġamaġi-fitoġarito

**9** Iesu ġasi tai eraġekauto, ma eġenoġoito, kou na evanaġito, ġena vanuġa korikori ġana eiaġoto. <sup>2</sup> Monai tarima kotari na tauġanina tavi ta emaseto tarimana ta gedai genagenanai Iesu ġenai ġeġwa-iaġoato. Iesu na ġeri veġabidadama vetoġana aiġa barana eġitaiato, benamo keve rakava tarimana ekiraiato, ekirato, “Natugu, bono kokore, ġemu rakava batuġamaġi-fitoġari.”

<sup>3</sup> Benamo taravatu ġevevaġa-riba iaġiato-ġoi tarimari tauġeri maiġesina ġekirato, “Mai tarima na Barau ekira-fitoġaiani.”

<sup>4</sup> Iesu ma ribana ġia kara ġetuġa-maġirito-ġoi nai evaġa-guruġarito, ekirato, “Karase nai maniġesina tuġamaġi rakavari ġogabini? <sup>5</sup> Aiġesina baguruġani tu mer-aġa, ‘Ġemu rakava batuġamaġi-fitoġari’ banasi, ba bara kira, ‘Noruġa-vaishi, noraka’ barasi? <sup>6</sup> Au na navaġa-ġitami, Tarimarima Natuna tu ma ġena maoro, rakava betuġamaġi-fitoġarini tanobarai.” Benamo Iesu na keve rakava tarimana evaġa-guruġaiato, ekirato, “Novariġisi, ġemu gEDA noġabia, be numa ġana noiaġo!” <sup>7</sup> Benamo mo tarima evaisiraġeto, ġena numa ġana eiaġoto. <sup>8</sup> Tarimarima na mo veġa ġeġitaiato nai, ġegarito e Barau ġevaġa-raġeato, korana seġuka moġesina tarimarima evinirito nai.

## Iesu na Mataio ekeaiato

*Mareko 2:13-17; Luka 5:27-32*

<sup>9</sup> Iesu monana eraka-vanaġito nai, ġia na tarima ta arana Mataio eġitaiato, takesi moniri ġeġabito-ġoi numanai etanu-taġoto-ġoi nai eġitaiato. Benamo Iesu na ekiraiato, ekirato, “Murigu ai noma raka.” Benamo Mataio evaisiraġeto, Iesu murina na eiaġoto.

<sup>10</sup> Iesu Mataio ġena numai eġaniġanito-ġoi nai, takesi gogo tarimari vovoka e vei-rakava tarimari ġutuma maki ġeiaġomato, Iesu ma ġena mero ġesi ġeġaniġani-vegogoto. <sup>11</sup> Farisea tarimari kotari na ġeġitaiato nai, Iesu ġena mero ġedanaġirito, ġekirato, “Karase nai ġomi ġemi vevaġa-riba tarimana tu takesi gogo e vei-rakava tarimari ġesi ġeġaniġani-vegogoni?”

<sup>12</sup> Iesu na mo guruġa eseġaġiato, benamo evaġa-veserito, ekirato, “Namo tarimari na doketa asi beġe vetaurini, senaġina keve tarimari na moġo. <sup>13</sup> Goiaġo, tauġemi na Buka Veaġa na ekiraġiani guruġana ġoa vetaua, maġesina ekirani, ‘Au na dia ġomi ġemi ġinitaġo o boubou varevareri aura-vinirini. Au aurani ġomi na vevetuġaġwa e veiau-namo boġono vaġa-foforiri.’ Au tu vei-iobukaiobuka tarimari keakeari asi aiaġomato, senaġi vei-rakava tarimari moġo.”

### Ġaniveaġa

*Mareko 2:18-22; Luka 5:33-39*

<sup>14</sup> Moġa murinai Ioane Babatiso ġena mero Iesu ġenai ġeiaġoto, benamo ġedanaġi-ato, ġekirato, “Karase nai ġai e Farisea tarimari tu ġaġani-veaġani, a ġoi ġemu mero tu asi ġeġani-veaġani?”

<sup>15</sup> Iesu na evaġa-veserito, ekirato, “Ġomi ġotuġamaġini, veġaraġo varigu tarimana ġatana seviri ai etanuni nuġanai beġe taġini ba? Asiġina! Ġarona eiaġomani, veġaraġo variġu tarimana ġatana ġerina beġe ġabi-veġitaiani, monai vau beġe ġani-veaġani.

<sup>16</sup> Tarima ta na dabuġa variġuna veseana dabuġa guinena ġesi asi bebani-vegogoani. Bema moġesina beveini nai, dabuġa variġuna na guinena bedareani, ema vedarena maki bebaregoni. <sup>17</sup> Tarima ta na maki vine nanuna variġuna nanigosi kefina guinenai asi besisiani. Bema moġesina beveini nai, nanigosi kefina guinena bevedareni, vine nanuna bebebubuni, ema kefi maki berakavani. Senaġina vine nanuna variġuna nanigosi kefina variġunai bebubu-ġuriaiani tu namo. Benamo ruarua, vine nanuna e kefi, beġe tanuni, asi beġe rakavani.”

### Iesu na kekeni ta ema vavine ta evaġa-namorito

*Mareko 5:22-43; Luka 8:41-56*

<sup>18</sup> Iesu na roġo ġena mero evaġa-ribarito-ġoi nuġanai, vere ta eraġasito, Iesu kwakuna koranai evetui-tarito, ekirato, “Au natugu kekenina inivau moġo bemase. Si-iaġo, ġimamu iatanai bono tore-kaua, benamo natugu bemaġurini.” <sup>19</sup> Iesu evaisi-raġeto, ġia ġesi ġeiaġoto. Ġena mero maki ġia ġesi ġeiaġo-sebonato.

<sup>20</sup> Ġeiaġoto-ġoi nuġanai, vavine ta, ġena keve tu rara kevena, laġani gabanana ruarua (12) ekeve-iaġiato, eiaġomato Iesu murina rekena na, ma ġena dabuġa dudunai eveġabikauto. <sup>21</sup> Korana tu ġia evetuġamaġito, “Ġena dabuġai moġo baveġabikauni nai, banamoni.” <sup>22</sup> Iesu eruġa-kureto, eġitaiato, ekirato, “Natugu, bono kokore! Ġemu veġabidadama na bevaġa-namomu.” Benamo vaġa-sebo ġena keve enamo-ġosito.

<sup>23</sup> Iesu tu mo vere ġena numai eraka-toġato. Ivirikou furufuru tarimari e taġitaġi tarimari ma gururi baregori ġesi eġitarito, <sup>24</sup> benamo Iesu na evaġa-guruġarito, ekirato, “Ġoraka-rosi. Kekeni tu asi bemase, ġia tu egenani moġo.” Senaġi tarimarima na ġerikiriki-iaġiato. <sup>25</sup> Iesu na mo tarimarima ġutuma etuġu-rosirito murinai, ġia

eraka-toĝato numa nuĝanai, kekeni ĝimanai eĝabito; benamo mo kekeni evaisi-raĝeto. <sup>26</sup> Mai veiĝa varina tu mo tano mabaranai ĝevarifiu-iaĝiato.

### Iesu na mata-bubu tarimari ruarua evaĝa-namorito

<sup>27</sup> Iesu na mo gabu ma eraga-kwaneato. Erakato-ĝoi nai, mata-bubu tarimari ruarua murina na ĝeiaĝoto, ĝekea-viniato, ĝekirato, “Davida Natuna o, ĝai novetuĝama!” <sup>28</sup> Iesu numai eraka-toĝato nai, mo mata-bubu tauri ruarua maki ĝeraĝe-kauto. Benamo Iesu na edanaĝirito, ekirato, “Ĝomi na ĝovaĝa-moĝoniguni, au na bavaĝa-namomini riba?” Ĝia ĝevaĝa-veseto, ĝekirato, “Vereĝauka, oi, ĝavaĝa-moĝonimuni.” <sup>29</sup> Benamo Iesu na matari eĝabi-kararito, ekirato, “Ĝemi veĝabidadama lorinai, veiĝana tu bana veia ĝemi.” <sup>30</sup> Benamo matari ĝefafato. Iesu na ma nuĝana mabarana ĝesi evaĝa-guruĝa gwaĝiĝi-rito, ekirato, “Mai veiĝa beĝora maiĝa varina tarima ta asi boĝono kira-varaia!” <sup>31</sup> Senaĝina tauri ruarua ĝerakarasito, ĝeiaĝoto, Iesu varina mo tano mabaranai ĝea varifiu-rovorovoato.

### Iesu na muru-bubu tarimana ta evaĝa-namoato

<sup>32</sup> Tauri ruarua numa na ĝeraka-rosito-ĝoi nuĝanai, tarima ta, iauka rakavana na eborogiato nai asi eguruĝato-ĝoi, Iesu ĝenai ĝeĝabi-iaĝoato. <sup>33</sup> Iesu na iauka rakavana elai-vaĝiato murinai, mo muru-bubu tarimana varau eguruĝato. Tarimarima mabarari na mai eĝorato veiĝana ĝeĝaba-iaĝiato, ĝekirato, “Maiĝesina veiĝana ta Isaraela nuĝanai roĝosi bene ĝora!” <sup>34</sup> A Farisea tarimari ĝekirato, “Mai tu iauka rakavari ĝeri vere ĝena seĝukana na iauka rakavari ĝia na elai-vaĝirini.”

### Iesu na ĝena mero Isaraela tarimari ĝeri ai etuĝurito

<sup>35</sup> Iesu na vanuĝa baregori ema keiri mabarari eiaĝo-vinirito: Ĝeri rubu ai evevaĝa-ribato-ĝoi, Barau ĝena Basileia varina namona eĝobata-iaĝiato-ĝoi, ema keve e midigu-midigu tarimari mabarari evaĝa-namorito. <sup>36</sup> Iesu na mo tarimarima ĝutuma-bara eĝitarito nai evetuĝarito, korana ĝenuĝa-vekwararito e asi ĝeri veduru ĝabi tarimari, vaĝa-ilailana mamoe asi ĝitaĝauri tarimana ta kavana. <sup>37</sup> Benamo Iesu na ĝena mero ekirarito, ekirato, “Makora ĝitaĝitana tu barego, senaĝina ĝauvei-iaĝina tarimari tu asi ĝutuma. <sup>38</sup> Vamoka ĝaniĝanina vinivinina Vereĝaukana boĝono noĝia, be ĝauvei tarimari bene tuĝuri, ĝena ĝaniĝani gogo vamokari ĝana.”

### Iesu na ĝena apostolo merori gabanana ruarua (12) ekearito

**10** Iesu na ĝena mero gabanana ruarua (12) ekearito, benamo seĝuka evinirito, iauka rakavari beĝene lai-vaĝiri, e keve ema midigu-midigu mabarari beĝene vaĝa-namori ĝana.

<sup>2</sup> Mai apostolo tarimari gabanana ruarua (12) arari tu maiĝeri: Giniguinena tu Simona, arana ta tu Petero, e ĝia tarina Anduru; Iakobo (o Iames), Sebedaio natuna, ma tarina Ioane ĝesi; <sup>3</sup> Filipo e Batolomeo; Tomasi e takesi gogo tarimana Mataio; Iakobo (o Iames), Alfeo natuna, e Tadeo; <sup>4</sup> Simona, Selote tarimana, ema Iudas Isakariota, Iesu berevaijani tarimana.

## Iesu na apostolo tarimari ġeri ġauvei evinirito

*Mareko 6:7-13; Luka 9:1-5*

<sup>5</sup> Mai tarima gabanana ruarua (12) Iesu na etuġu-rosirito ema velaunaġi sisibari maiġesina evinirito, ekirato, “Irau bese tarimari ġeri ai asi boġono iaġo, e Samaria vanuġari tai maki asi boġono raka-toġa; <sup>6</sup> senaġina Isaraela besena ġeri ai boġono iaġo, ġia tu ġerekwa-rekwato mamoeiri kavana. <sup>7</sup> Goiaġo, ma maiġesi boġono ġobata, boġono kira, ‘Guba Basileiana tu bevotu, (Barau ġena veġitaġau seġukana evaġa-ruġaiani maiġa)!’ <sup>8</sup> Keve tarimari boġono vaġa-namori, mase tarimari boġono vaġa-maġuriri, lepera tarimari boġono iarevari boġono vaġa-namori, e iauka rakavari boġono lai-vaġiri! Ġomi na ġoġabiato asi voina, boġono vini maki asi voina.

<sup>9</sup> Ġemi iaġoiaġo ai moni asi boġono ġabikau, golo o silva moniri o kopa moniri maki asi boġono ġwakau. <sup>10</sup> Dura asi boġono ġabikau, sedi ruarua, tamaka, ema togoi maki asi boġono ġabi. Korana ġauvei tarimana ġena-ġana tu beġene vinia veġata.

<sup>11</sup> Vanuġa baregona tai o vanuġa keina tai boġo raka-toġani nai, deikara euran ġena numai bene ġabi-raġemi etoni tarimana boġono vetaua. Mo numai moġo boġono tanu, bene iaġo mo, vanuġa ma boġono raga-kwanea. <sup>12</sup> Numai ġorakatoġani nai, numa tarimari boġono vaġa-namori, boġono kira, ‘Maino ġomi ġemi ai bene tanu!’ <sup>13</sup> Bema mo numa tarimari na beġe ġabi-raġemini nai, Barau ġena maino ġeri ai betanuni. Senaġina bema ġia na asi beġe ġabi-raġemini nai, Barau ġena maino ġeri ai asi betanuni, ġemi ai ma beġenoġoini. <sup>14</sup> Kamara numai o vanuġai tarimarima na asi beġe ġabi-raġemini e ġemi guruġa asi beġe seġaġirini nai, mo numa o vanuġa boġono iaġuia, kwakumi kauri boġono kwari-ketoketori, (ġia ġeri kira-sirivaġi vaġa-moġoniri ġana). <sup>15</sup> Au na akira-korikorimini, Barau ġena Kota ġaronai mo numa o vanuġa ġeri rakava voina metona tu barego lelevaġi beġabiani, Sodoma e Gomora ġeri rakava voina maki bevanaġiani.”

## Vanevane e midigumidigu ġoirai

*Mareko 13:9-13; Luka 21:12-17*

<sup>16</sup> “Ġoseġaġi, au na mai atuġumini mamoe kavana boġa kwaivari rakavari ve-fakari ai. Moġa lorinai, mota kavana boġono iaunega ema boġono manau pune kavana. <sup>17</sup> Lorimi boġono vetore tarimarima ġeri ai! Korana ġia na beġe ġabimini ma beġe tuġu-iaġomini Iuda ġeri kanisoro tarimari ġeri ai, ema ġeri rubu nuġari ai beġe kwarimini. <sup>18</sup> Au ġoġabi-raġeguni dainai, gavana e vere barari o kini ġeri ai roġo beġe ġabi-iaġomini, ġia ġoirari ai au vaġa-moġonigu ai boġono iaġo, korana irau bese tarimari maki Vari Namona beġene ribaia. <sup>19</sup> Bema Kota tarimari ġoirari ġana beġe ġabi-iaġomini nai, kara toma boġoa kiraġirini o kamasi boġo kiraġirini guruġari asi boġono nuġa-vekwaraġi-iaġiri. Korana mo ġaro ai kara boġo kiraġirini guruġari tu, Barau na vau bevinimini. <sup>20</sup> Dia ġomi boġo guruġani, senaġina Barau Iaukana ġomi ġemina beguruġani.

<sup>21</sup> Kakana na tarina berevaiani bene mase ġana, tamana na natuna maki moġesina beveiani. Naturi na tamari sinari beġe seġafore-vinirini ema mase ai maki beġe torerini. <sup>22</sup> Tarimarima mabarari na beġe iau-rakavamini, korana au ġoġabi-raġeguni nai. Senaġina deikara bevevaġa-gwaġiġini mo dokona tu bemaġurini. <sup>23</sup> Vanuġa tai beġe vaġa-rakavamini e beġe laimini nai, vanuġa ta ġana ma boġono

raga-iaġo. Boġono riba-maoro, ġegu ġauvei asi roġo boġo vaġa-koriani Isaraela vanuġari mabarari nuġari ai, beiaġoni mo, Tarimarima Natuna bema-raġasini.

<sup>24</sup> Riba evetauani merona na ġena vevaġa-riba tarimana asi bevanaġiani; vetuġunaġi tarimana na guine-iaġina tarimana maki asi bevanaġiani riba. <sup>25</sup> Riba evetauani merona bevevaġa-iaġoni ġena vevaġa-riba tarimana ġesi beġe ilailani, ema vetuġunaġi tarimana guine-iaġina tarimana ġesi maki beġe ilailani tu namo. Boġono tuġamaġia, tarimarima kotari na au tu doġoro debana, Belsebul o Satani ġetoni, be ġomi, ġegu doġoro tarimami, maki moġesi beġe kiramini, ema beġe vaġa-metomini maki.”

### **Barau boġono gari-vinia**

*Luka 12:2-7*

<sup>26</sup> “Moġa lorinai, tarimarima gariri asi boġono vei. Vekuouġau dagarari mabarari beġe foforini, vekuretoġa guruġari mabarari beġe ribani. <sup>27</sup> Au na kara dagara akira-varamini mukunai tu, ma boġono kiraġi-ġenoġoiri laġani matabarai, kara dagara ġereġami na boġo seġaġia tu, numa tuġuri na ma boġono kiraġi-foforia, (tarimarima mabarari na beġene seġaġia ġana). <sup>28</sup> Tauġanina beġe vaġiani tarimari asi boġono gari-viniri, korana ġia na iauka asi beġe vaġiani. A Barau garina neġi boġono gari, korana ġia na ruarua bevaġirini riba, tauġanina e iauka, karava asi ebuseni gabunai.

<sup>29</sup> Bisini ruarua maki fene sebona na moġo ġevoirini, ene? Senaġina moġeri ta maki asi beketo-riġo kavani tano ai, bema Tamami asi beurani nai. <sup>30</sup> A ġomi tu debami ġuiri maki mabarari Barau na eiavi-ginikaurito. <sup>31</sup> Be asi boġono gari; ġomi voimi tu varaġe lelevaġi, bisini ġutuma voiri maki ġovanaġirito.”

### **Iesu asi boġono kira-ġuniġaua**

*Luka 12:8-9*

<sup>32</sup> “Deikara na au tarimarima ġoirari ai bekiraġi-foforiguni, ġia maki au na bakiraġi-foforiani Tamagu gubai etanuni ġoiranai. <sup>33</sup> Senaġina au deikara na tarimarima ġoirari ai beruġaguni e bekira-ġuniġauguni, ġia maki au na baruġaiiani e bakira-ġuniġauani Tamagu gubai etanuni ġoiranai.”

### **Dia maino, senaġi vetari**

*Luka 12:51-53; 14:26-27*

<sup>34</sup> “Asi boġono tuġamaġi, au tu maino tanobara ġana aġwa-iaġomaiato. Asiġina, au tu dia maino aġwa-iaġomaiato, senaġi vetari urana na aiaġomato. <sup>35</sup> Au aiaġomato tu, maiġeri nama vaġa-ruġari ġana: Natu tauri na tamari beġe vevaġi-vinirini, natu vavineri na sinari beġe vevaġi-vinirini, taġama vavine keiri na ġeri taġama vavine barari beġe vevaġi-vinirini. <sup>36</sup> Numa biaguna tu tauġena ġena numa tarimari na moġo beġe iau-rakava viniani.

<sup>37</sup> Deikara tamana o sinana beuravini-baregoani, a au tu betuġamaġi-keiguni nai, ġia tu asi ilaila au ġegu tarimai beġe kiraġiani. Ema deikara na natuna merona o kekenina beuravini-baregoani, a au beuravini-keiguni nai, ġia tu asi ilaila au ġegu tarimai beġe kiraġiani. <sup>38</sup> E deikara tauġena ġena satauro asi beġwaiani, ema murigu na asi berakani, ġia tu asi ilaila au ġegu tarimai beġe kiraġiani. <sup>39</sup> Deikara ġena maġuri moġo lorina etoreani tarimana, ġena maġuri befitoġaiiani. A deikara au daigu ai ġena maġuri befitoġaiiani tarimana, ġena maġuri asi bevei-rekwarekwaiani.”

## Iesu ġena mero beġe ġabi-raġerini tarimari na voiri namori beġe ġabirini

*Mareko 9:41; Luka 10:16*

<sup>40</sup>“Dei na ġomi eġabi-raġemini, au maki eġabi-raġeguni, ema au eġabi-raġeguni tarimana na au etuġuguto Barauna maki eġabi-raġeani. <sup>41</sup>Dei na peroveta tarimana ta eġabi-raġeani, korana ġia tu Barau ġena guruġa vaġa-foforina tauna ta, ġia na peroveta tauna davana tu beġabiani. Ema dei na veiġa iobukaiobuka tarimana eġabi-raġeani, korana ġia tu Barau ġena ura ekorana-iaġiani tauna, ġia na vei-iobukaiobuka tarimana davana beġabiani. <sup>42</sup>E tarima ta na mai ġegu mero ta nanu faraka kapusi sebna ta beviniani, korana ġia tu au ġegu vetuġunaġi tarimana, akira-korikori-mini, ġia voina tu beġabiani veġata.”

### Ioane na ġena mero Iesu ġenai etuġu-iaġorito

**11** Iesu na moġeri sisiba guruġari ġena mero gabanana ruarua (12) ġeri ekiraġi-ġosirito murinai, ġia monana Galilea vanuġari ġana eiaġoto, monai Barau ġena guruġa bene vevaġa-riba iaġia e bene ġobata-iaġia ġana.

<sup>2</sup>Ioane Babatiso dibura numanai etanuto-ġoi nai, Keriso ġena ġauvei veiġari varina eseġaġiato, benamo ġia na ġena mero Iesu ġenai etuġu-iaġorito. <sup>3</sup>Iesu ġedanagiato, ġekirato, “Barau na ekiraġi-toreato beiaġomani tarimana tu ġoi, ba tarima boruna ta baġana vaġa-nogaia?”

<sup>4</sup>Benamo Iesu na evaġa-veserito, ekirato, “Ġoġenoġoi, ġomi na boġo seġaġiri e boġo ġitari veiġari Ioane boġono kira-varaia: <sup>5</sup>Mata-bubu tarimari ġeboġeboġeni, kwaku rakava tarimari ġerakani, lepera tarimari ġenamoni, seġa-bubu tarimari ġeseġaġini, mase tarimari ġevariġisi-ġenoġoini, ema Vari Namona gara veġubu e asi ġeri-ġari tarimari ġeri eġobata-iaġiani. <sup>6</sup>Au ġegu ai asi ġena daradara tarimana tu eiakuni.”

<sup>7</sup>Ioane ġena mero ġerakato vau, Iesu na ġevegogoto tarimari evaġa-guruġarito, Ioane varina ġeri ekiraġi-ato, ekirato, “Ioane ġenai ġoiaġoto nai, mo tano fakanai tu kara boġono ġitaia ġana? Gobu iavara na ekwari-ġareva ġarevaiani ġitaġitana ġoiaġoto? <sup>8</sup>Bema asiġina nai, kara boġono ġitaia ġana ġoiaġoto? Dabuġa namona eveiani tarimana ġitaġitana ġoiaġoto? Asiġina. Dabuġa namori ġeveirini tarimari tu kini ġeri numai ġetanuni. <sup>9</sup>Be, kara boġono ġitaia ġana ġoiaġoto? Peroveta tarimana dainai? Aba! Akiramini, ġoġitaiato tarimana tu peroveta tarimari mabarari evanaġirini. <sup>10</sup>Ioane varina Buka Veaġai maiġesi etoreato, Barau ekirato, ‘Au na ġegu vetuġunaġi tarimana tu batuġu-ġuineani, ġemu dabara ġoiramu ai vaġa-maġatana.’

<sup>11</sup>Moġoni akiramini, mai tanobarai beġe maġuri tarimari mabarari fakari ai Ioane Babatiso tu barego vedaurea, ta na asi bevanaġiani. Senaġina Guba Basileiana nuġanai gabi tarimana na Ioane tu evanaġiani. <sup>12</sup>Ioane Babatiso ġena ġobata evari-fiurito-ġoi ġenana beiaġoma mo initoma, Barau na ġena Basileia o veġitaġau seġukana evaġa-ruġaiani, senaġina tarima tari na ġevevaġi-viniani, ġeri ura tu tauġeri beġene veġitaġau, a deikara Barau ġena Basileia neraka-toġa etoni tarimana, ġia na ġekouani. (Mataio23:13).

<sup>13</sup>Peroveta tarimari mabarari e Mose ġena taravatu maki na Barau ġena Basileia o veġitaġau ġeġobata-iaġiato-ġoi, eiaġomato mo, Ioane ġena negai. <sup>14</sup>Ema ġomi

na ġeri guruġa boġo ġabi-raġeani ba asiġina, senaġina Ioane tu moġoni peroveta tarimana Elia, ġena iaġoma tu ġekiraġiato-ġoi. <sup>15</sup> Ma seġana tarimana bene seġaġi.

<sup>16</sup> Toma ġuru tarimari tu deikara ġesi bavaġa-ilailarini? Ġia tu noġa mero keiri kavana, vanuġa ġatamanai ġetanu-taġoni, ġeġereni, tavi ta merori na tavi tai ġekea-vinirini, ġekirani,

<sup>17</sup> ‘Ġai tu veġaraġo vererenai gita ġalauto-ġoi ġomi ġemi, senaġi ġomi tu asi ġobarato-ġoi! Ġai tu mase mariri ġaġabito-ġoi, senaġi ġomi tu asi ġotaġito-ġoi!’

<sup>18</sup> Ioane eiaġomato, eġani-veaġato ema vine nanuna asi eniuato. Benamo ġekirani, ‘Ġia tu iauka rakavana na eboroġiato,’ ġetoni. <sup>19</sup> A Tarimarima Natuna eiaġomato, ġia tu ġaniġani ta asi eruġaiani. Benamo ġekirani, ‘Ġia tu boġeka tarimana ema vine nanuna eniu-ġutumani tarimana, takesi gogo tarimari e vei-rakava tarimari ġatari!’ ġetoni. Senaġi Barau ġena iaunega vaġa-foforina e vaġa-moġonina tu ġena vetoġa namori ġerina.”

### **Asi veġabidadama vanuġari**

*Luka 10:13-15*

<sup>20</sup> Iesu na ġena seġuka ġauveiri vanuġa baregori tari nuġari ai eveirito, senaġi ġeri rakava ġerina asi ġevetuġamaġi-kureto-ġoi, naima Iesu na moġeri vanuġa tarimari evanerito. <sup>21</sup> Ekirato, “Korasini o, ġoi ema Betesaida, vetuġami kika! Korana nuġa-farevaġi veġa boruri ġemi ai ġefoforito-ġoi tu, Taia e Sidono nuġari ai beġere fofori, benamo ġia tu irau laġani ai ġere vetuġamaġi-kure, fuse rakavari ai e tauġaniri ma gurumari ai ġeri vetuġamaġi-kure ġere vaġa-foforia. <sup>22</sup> Senaġina akiramini, Barau na tarimarima bekota-vinirini ġaronai, ġomi na boġo doġariani metona tu Taia e Sidono ġeri meto bevanaġiani. <sup>23</sup> Ġoi maki, Kapera-nauma o, ġoi ourani guba ġana bono varaġe otoni? Asiġina, ġoi tu mase gabuna ġana boiaġoni! Bema nuġa-farevaġi veġa boruri ġemi ai ġefoforito-ġoi tu Sodoma nuġanai beġere fofori nai, ġia tu roġo bere tanu mo initoma. <sup>24</sup> Senaġina akira-mini, Barau na tarimarima bekota-vinirini ġaronai, ġomi na boġo doġariani metona tu Sodoma ġeri meto bevanaġiani.”

### **Au ġegu ai ġoiaġoma, be ġoiaġaraġi**

*Luka 10:21-22*

<sup>25</sup> Mo negai Iesu ekirato, “Tamagu o, guba ema tanobara Verena, avaġa-namomuni, korana ġoi na ma iaunegari e riba tarimari ġeri ai okure-toġarini dagarari tu, asi ġeri riba tarimari ġeri ai ovaġa-foforirini. <sup>26</sup> Aba, Tamagu, ġemu ura tu maiġesina bene vetore veġata. <sup>27</sup> Dagara mabarari Tamagu na eviniguto. Natuna tarima ta asi ribana, senaġina Tamana ġereġana moġo ribana, ema Tamana tarima ta asi ribana, senaġi Natuna ġereġana moġo ribana, ema Natuna na bene vaġa-fofori vinya etoni tarimana.

<sup>28</sup> Au ġegu ai ġoiaġoma, ġomi deikara maruna metori ġoġwani e boġo gau tari-mami mabarami, au na iaġaraġi banama vinimi. <sup>29</sup> Au ġegu maruna, mai tu ġegu veġitaġau namona, ġoma ġabi-raġea, ma au ġegu ai riba maki ġoma ġabia! Korana au na asi badori-naġinaġimini e asi baġita-fitoġamini. Au ġegu ai iaġaraġi korikorina boġo doġariani. <sup>30</sup> Auna maruna tu meraġa e ġegu ġwaġwa iatami ai batore-kauani maki asi metona.”



### Iesu tu Sabadi Verena

**12** Mo negai Iesu tu Sabadi ai widi vamokari na eraka-vanaḡito. Ĝena mero ġe-vitorito nai, widi ġwaḡwari ġebukito-ḡoi e ġeganirito-ḡoi. <sup>2</sup> Farisea tarimari na ġeḡitarito, benamo Iesu ġekiraiaito, ġekirato, “Noḡitaia, ġemu mero na ġita ġera taravatu asi ġekorana-iaḡiani, Sabadi ai widi ġebukini.” <sup>3</sup> Iesu na evaḡa-veserito, ekirato, “Davida na veiḡa ta eveiato, ġia ma karona ġesi ġevitorito nai, ġomi na mai veiḡa eḡorato tu roḡosi roḡo boḡono iavia? <sup>4</sup> Barau ġena numai eraka-toḡato, Barau ġoiranaḡi ġetorerito-ḡoi beredi ġia ma karona ġesi ġeganito. Mo beredi tu veaḡa, Rubu Veaḡa vereri moḡo ḡari, taravatu. <sup>5</sup> Ema ġomi na Mose ġena taravatu nuḡanaḡi mai guruḡa maki roḡosi roḡo boḡono iavia, ekirani, Sabadi ai Rubu Veaḡa vereri tu Rubu Veaḡaḡi ġeḡauveini. Moḡesina nai Sabadi taravatuna ġevaḡa-rakavaiani, senaḡi ġia tu asi ġeri kerere? <sup>6</sup> Au na akiramini, mainai tarima ta, ġia na Rubu Veaḡa evanaḡiani. <sup>7</sup> Buka Veaḡa ekirani, ‘Vevetuḡaḡwa neḡi aurani, a varevare dagarana tu asiḡi.’ Bema mai guruḡa anina ḡoro riba nai, asi ġeri kerere tarimari ġomi na asi ḡoro vaḡa-bade-iaḡiri. <sup>8</sup> Korana Tarimarima Natuna tu Sabadi Verena.”

### Iesu na ġima boso tarimana evaḡa-namoato

*Mareko 3:1-6; Luka 6:6-11*

<sup>9</sup> Iesu na mo gabu eiaḡuiato, ma eiaḡoto, Iuda tarimari ġeri rubu ai eraka-toḡato, <sup>10</sup> ġimana ebosoto tarimana ta maki monai. Benamo Farisea tarimari na Iesu beḡene ḡofaḡofa-iaḡia ḡana ġedanaḡiato, ġekirato, “Sabadi ai keve bita vaḡa-namorini tu ma taravatuna ba?” <sup>11</sup> Benamo Iesu na evaḡa-veserito, ekirato, “Ĝomi ta ġena mamoe sebona kwariḡutu moḡo, Sabadi ai guri tai beketo-riḡoni nai, vaḡa-maḡurina ḡana ġomi na asi boḡo inu-raḡeani? <sup>12</sup> Boḡono tuḡamaḡi: Tarimarima tuḡamaḡi-iaḡina tu barego vedaurea, a mamoe ġenai tu kei! Moḡa lorinaḡi Sabadi ai veiḡa namona veiveina tu maoro vedaurea.” <sup>13</sup> Benamo Iesu na mo ġima boso tarimana ekiraiaito, ekirato, “Ĝimamu noduḡi-roroḡotoa.” Ĝia ġimana eduḡi-roroḡotoato, benamo mabarana enamo-ḡosito, ġimana reke ta kavana. <sup>14</sup> Senaḡi Farisea tarimari ġerakariosito, benamo ġea boioḡa-vegogoto, kamasi Iesu beḡene vaḡi-masea dabarana ġea vetauato.

### Iesu tu Barau na eviriḡiato tarimana

<sup>15</sup> Farisea ġeri boioḡa Iesu na varau eriba-guineato nai, ġia mo gabu na eraka-veḡitato. Tarimarima ḡutuma ġia murina na ma ġeiaḡoto, ema keve tarimari mabarari evaḡa-namorito. <sup>16</sup> Senaḡi eguruḡa gwaḡiḡi-vinirito, ġia varina tarima ta maki asi beḡene vaḡa-ribaia. <sup>17</sup> Maiḡesi eguruḡato, korana Isaia peroveta tarimana muruna na eraka-rosito guruḡana bene moḡoni ḡana, ekirato, <sup>18</sup> “Mai tu au ġegu vetuḡunaḡi tarimana, aviriḡiato. Au na ġia aura-viniani, e ġia ġenai maki aiakuni; Au Iaukaḡu ġia ġenai batoreani, e ġia na au ġegu guruḡa e veiḡa iobuka-iobukari beḡobata-iaḡirini bese mabarari ġeri ai. <sup>19</sup> Ĝia asi bevanevaneni, ma asi befararani; ema ḡatamai garona maki ta na asi beseḡaḡiani. <sup>20</sup> Ĝia na gobulefa moirana asi betau-koruani, ema irau mo emoreni lamefana maki asi bevei-buseani, beiaḡoni mo, ġia na guruḡa e veiḡa iobukaiobukari bea vaḡa-ruḡarini, benamo beḡe kokoreni.

<sup>21</sup> Ĝia ĝenai tarimarima mabarari ĝeri vetuĝamaĝikau beĝe toreani.”

### Iesu e Belsebul

*Mareko 3:20-30; Luka 11:14-23; 12:10*

<sup>22</sup> Benamo kotari na iauka rakavana na eborogĝiato tarimana Iesu ĝenai ĝeĝabi-iaĝoato. Mo tarima tu matana bubu e muruna bubu. Iesu na evaĝa-namoato, benamo ma eguruĝato e eboĝeboĝeto. <sup>23</sup> Tarimarima mabarari na mai veĝa eĝorato ĝeĝaba-iaĝiato, ĝekirato, “Mai tu betaĝu Davida Natuna banaĝu, (Barau na ekiraĝi-toreato vevaĝa-maĝuri tauna)?” <sup>24</sup> Senaĝi Farisea tarimari na maiĝa ĝeseĝaĝiato nai, ĝekirato, “Mai tu Belsebul, iauka rakavari ĝeri vere, na seĝuka eviniani nai, mai tarima na iauka rakavari elai-vaĝirini.”

<sup>25</sup> Iesu na ĝeri tuĝamaĝi varau eribarito nai, ekirarito, ekirato, “Gavamani bevetavini, tauĝena bevevaĝi-vinini nai, ĝia tu berakavani; e vanuĝa ta o doĝoro ta bevetavini, tauĝena bevevaĝi-vinini nai, asi beruĝani riba. <sup>26</sup> E diablo ta na diablo ta belai-vaĝiani nai, Satani tu tauĝena bevevaĝini, moĝa anina tu, doĝoro tatai varau bevetavi nai, asi beruĝani riba? <sup>27</sup> Ĝomi ĝokirani, au tu Belsebul ĝena seĝuka na iauka rakavari alai-vaĝirini, a ĝomi murimi ai ĝerakani tarimari na iauka rakavari aiĝesi ĝelai-vaĝirini? Ĝia na ĝevaĝa-moĝoniani, ĝomi ĝemi guruĝa tu kerere. <sup>28</sup> Asiĝina, dia Belsebul, senaĝina Barau Iaukana ĝena seĝukai alai-vaĝirini, naima boĝono riba, Barau ĝena Basileia tu ĝomi ĝemi ai varau beraĝasi. <sup>29</sup> Tarima ta gwada tarimana ĝena numa asi bedareani riba, ma ĝena farefare beĝwa-rakarini, senaĝi ĝia na gwada tarimana varo na bebarubaruani, monai vau ĝia na ĝena numa farefareri beĝabi-rakarini. <sup>30</sup> Deikara na au asi evaĝa-kavaguni, ĝia na tu au eruĝaguni, e deikara au ĝesi asi etore-vegogoni, tarimana tu eveiari-lausilausini. <sup>31</sup> Moĝa lorinai akiramini, tarimarima rakava beĝe veini ema Barau beĝe kira-rakava viniani tarimari, ĝeri rakava mabarari Barau na betuĝamaĝi-fitoĝarini riba, senaĝi tarima ta na Iauka Veaĝa bekira-rakava viniani tarimana, ĝena rakava asi betuĝamaĝi-fitoĝaiani. <sup>32</sup> Tarima ta na Tarimarima Natuna bekira-rakava viniani nai, ĝena rakava tu betuĝamaĝi-fitoĝaiani, senaĝi tarima ta na Iauka Veaĝa bekira-rakava viniani tarimana, ĝena rakava asi betuĝamaĝi-fitoĝaiani, toma mai maĝuri ai ema maĝuri gabinai maki asi betuĝamaĝi-fitoĝaiani.”

### Ĝau e ĝia ĝwaĝwana

*Luka 6:43-45*

<sup>33</sup> “Bema ĝau namo nai tu, ĝwaĝwana maki namo, a bema ĝau rakava nai, ĝwaĝwana maki rakava. Ĝau tu ĝwaĝwana ĝenana boribaiani. <sup>34</sup> Ĝomi mota naturi, ma rakavami ĝesi ĝotanuni, be guruĝa namona ta tu kamasi boĝo kiraĝiani? Korana tarima tu nuĝana na kara eiaĝomani, murunai ekiraĝirini. <sup>35</sup> Tarima namona na dagara namori nuĝanai evaĝa-vegogorini dagarari bevaĝa-raka-rosirini. Tarima rakavana na dagara asi namori nuĝanai evaĝa-vegogorini dagarari bevaĝa-raka-rosirini.

<sup>36</sup> Senaĝi au na akiramini, guruĝa taĝuitaĝui mabarari, tarimarima na beĝe kiraĝirini tu, Barau ĝena Kota baregona ĝaronai voiri beĝe ĝabirini. <sup>37</sup> Ĝemu guruĝa ĝenana Barau na vei-iobukaiobuka tarimamu bekiraĝi-muni, o vei-rakava tarimamu bekiraĝimuni.”

## Farisea tarimari na vetoġa ġevetauani Iesu ġenai

*Mareko 8:11-12; Luka 11:29-32*

<sup>38</sup> Taravatu vaġa-riba-iaġina tarimari e Farisea tarimari kotari na Iesu ġevaġa-guruġaiato, ġekirato, “Vevaġa-riba tarimamu, ġai ġaurani vetoġa boruna ta ġoi ġe-muna baġana ġitaia.”

<sup>39</sup> Iesu na evaġa-veserito, ekirato, “Toma ġuru rakavana ma veġura-vanaġina ġesi, (Barau ġenana ġeveġitato ġuruna), seġuka vetoġana ta ġeġita-vetauani, senaġi vetoġa ta asi beġe doġariani, Iona, peroveta tarimana, vetoġana moġo. <sup>40</sup> Iona tu ġaro toitoi ema boġi toitoi maġani-kone barana, rakana donodono diana nuġanai etanuto, moġesina kavana Tarimarima Natuna maki ġaro toitoi ema boġi toitoi tano nuġanai betanuni. <sup>41</sup> Kota baregona ġaronai Niveva tarimari beġe ruġa-vaishini, toma ġuru tarimari beġe samanirini, korana Iona ġena ġobata ġeseġaġiatio neganai, ġia ġeri rakava ġerina ġevetuġamaġi-kureto, ema ġeraka-kureto Barau ġenai. Senaġi ġoġi-taia, tarima ta na Iona evanaġiani tu maġa. <sup>42</sup> Kota baregona ġaronai maki, Seba vavine baregona o Kwin beruġa-vaishini, mai ġuru tarimari besamanirini, korana ġia tu ġena tanobara manaġana na eiaġomato, Solomona ġena iaunega guruġari bene seġaġiri ġana. Senaġi ġoġitaia, tarima ta na Solomona evanaġiani tu maġa.”

## Iauka rakavana ma eġenoġoito

*Luka 11:24-26*

<sup>43</sup> “Iauka rakavana ta tarima ta ġenana eraka-vaġito, benamo gabu kaukauri na eraka-vanaġito, iaġana bene ġania etato, senaġi iaġaraġi gabuna ta asi edoġariato. <sup>44</sup> Benamo ġia tauġena ekirato, ‘Naġenoġoi, araga-kwaneato numana ġana.’ Eġenoġoi-iaġoto, numa edoġariato. Numana tu korina, veiareva ema ġitaġitana namo vedaurea. <sup>45</sup> Benamo ġia na iauka rakava kwaikwairi imaima ruarua (7) ma eġori-iaġorito, mabarari ġeraka-toġato, monai ġetanuto. Moġa lorinai mo tarima tu guinenai ġena rakava tu kota misina, senaġi dokonai ġena rakava tu barego vedaurea. Maiġesina toma ġuru rakavana ġenai beġorani.”

## Iesu sinana e tarina doġoro

*Mareko 3:31-35; Luka 8:19-21*

<sup>46</sup> Iesu tu tarimarima roġo evaġa-guruġarito-ġoi nai, ġia sinana e tarina doġoro ġeraġasito. Numa murikanai ġeruġa-tarito, ġeri ura tu Iesu beġene vaġa-guruġaia. <sup>47</sup> Benamo tarima ta na ekiraiato, ekirato, “Ġoi sinamu e tarimu merori tu numa murikanai ġeruġa-taġoni, ġevaġa-guruġamu ġetoni.” <sup>48</sup> Iesu na evaġa-veserito, ekirato, “Au sinagu tu dei, e au tarigu merori tu deikarari?” <sup>49</sup> Benamo ġia ġimana na ġena mero eduġi-vinirito, ekirato, “Au sinagu e au tarigu merori tu maġeri!” <sup>50</sup> Deikara na au Tamagu gubai etanuni ġena ura veiġari eveirini tarimana tu, au tarigu tauna, e au tarigu vavinena, ema au sinagu.”

## Barabore - Iaraġa tarimana na widi ġueri efiurito

**13** Mo ġaro sebonai moġo Iesu na numa eraga-kwaneato, eiaġoto, Galilea kouna rikinai etanu-tarito. <sup>2</sup> Tarimarima ġutuma-bara na ġevegogo-ġeġeraġiatio nai, ġia tu ġasi tai eraġekauto, benamo etanu-tarito, a tarima mabarari tu fenu ai ġeruġato. <sup>3</sup> Iesu na dagara ġutuma barabore ai evaġa-ribarito.

Ekirato, “Iaraġa tauna ta ġena widi ġueri varovarori eiaġoto. <sup>4</sup> Ġia na widi ġueri efiu-lausilausirito-ġoi nai, gabu irauriau ai ġeketoto. Kotari dabarai ġeketoto, benamo manu ġeiaġomato, ġeġani-ġosirito. <sup>5</sup> Kotari forefore gaburi ai ġeketokauto tano maġiġiri ai. Asikauna ġegarato, korana tano iatanai moġo. <sup>6</sup> Senaġi ġaro eraġekauto nai, etunurito, ema lamuri asi ġevariġo-ġinikauto nai, asikauna ġemaraito. <sup>7</sup> Kotari tu ġauġa ġiniġiniri vefakari ai ġeketoto. Mai ġauġa ġiniġiniri ġetubu-baregato nai, varovaro dagarari ġetubu-ġaurito. <sup>8</sup> A kotari tu tano namonai ġeketoto, ġwaġwari ġetaunato nai, kotari sinau ta (100), ma kotari gabana imaima ma gabanana (60), ema kotari tu gabana toitoi (30).” <sup>9</sup> Iesu ġena guruġa dokonai ekirato, “Ma seġana tarimana bene seġaġi!”

### **Kara dainai Iesu na barabore ekiraġirito**

*Mareko 4:10-12; Luka 8:9-10*

<sup>10</sup> Iesu ġena mero ġia ġenai ġe-iaġoto, benamo ġedanaġiato, ġekirato, “Kara dainai barabore ai tarimarima ovaġa-guruġarini?” <sup>11</sup> Iesu na evaġa-veserito, ekirato, “Guba Basileia ġena riba vekuretoġari ġomi ġemi ai tu fofori, senaġi ġia ġeri ai tu asiġina. <sup>12</sup> Ma ġena seġaġi tarimana Barau na tuġamaġi-faka beviniani, barego vedaurea bene doġari ġana. Asi ġena seġaġi tarimana, ġena tuġamaġi-faka misina maki beġabi-vaġiani. <sup>13</sup> Moġesi naima au na barabore ai avaġa-guruġarini. Korana matari na ġeboġe-boġeni, senaġi asi ġeġita-maġatani, seġari na ġeseġaġini, senaġi asi ġetuġamaġi-maoroni. <sup>14</sup> Ġia ġeri ai Isaia ġena peroveta guruġana bema moġoni, maiġesi ekirato,  
‘Ġomi tu boġo seġaġini,  
ma boġo seġaġini,  
senaġi asi boġo riba-maoroni.  
Ġomi tu boġo ġitani,  
ma boġo ġitani,  
senaġi debami asi beġe vekeoni.

<sup>15</sup> Korana mai bese tarimari nuġari tu gwaġiġi foroforo,  
seġari maki bubu,  
matari maki ġevékouto.  
Matari na beġe ġitani garina,  
seġari na beġe seġaġini,  
e nuġari na beġe riba-maoroni garina,  
ma au ġegu ai beġe vetuġamaġi-kurenai ġeri Barau,  
benamo bavaġa-maġuririni garina.’

<sup>16</sup> A ġomi tu boġono iaku, korana matami tu ġeġitani e seġami tu ġeseġaġini. <sup>17</sup> Au na akira-korikorimini: Peroveta tarimari vovoka ma Barau ġena vei-iobukaiobuka tarimari ġutuma kaiveġata na ġeri ura baregona tu, ġomi na initoma kara ġoġitaiani beġene ġitaia, senaġi asi ġeġitaia, e ġomi na kara ini ġoseġaġiani beġene seġaġia, senaġi asi ġeseġaġiato.”

### **Widi ġueri baraborena anina**

*Mareko 4:13-20; Luka 8:11-15*

<sup>18</sup> “Ġoseġaġi, widi fiu-rovorovona tarimana baraborena anina tu maiġa: <sup>19</sup> Tarima kotari na Barau ġena Basileia varina ġeseġaġiani, senaġi asi ġetuġamaġi-fakaiani.

Benamo Satani eiaḡomani, ma mo kara ḡia nuḡari ai beḡe varo dagarari tu, ḡia na eḡabi-vaḡirini. Moḡeri tarima tu widi ḡuturi dabarai ḡeketoni kavana. <sup>20</sup> Widi ḡueri kotari forefore ai ḡeketoto, mai tu tarima kotari na Barau ḡena Vari Namona ma iakuri ḡesi ḡeseḡaḡiani e ḡeḡabi-raḡeani. <sup>21</sup> Senaḡina ḡia nuḡari ai asi erakatoḡa-ginikauni nai, asi etanu-maukani. Barau ḡena guruḡa dainai nega rakavari ḡeḡoitaḡoni e ḡevaḡa-midigu midigurini ḡarori ai, ḡia ḡenana ḡeraka-veḡitani. <sup>22</sup> Widi ḡueri kotari tu ḡauḡa ḡiniḡiniri vekaravari ai ḡeketoto, mainana ekiraḡiani tu, tarima kotari na Barau ḡena guruḡa ḡeseḡaḡiani, senaḡi tauḡeri ḡeri maḡuri e farefare ḡutumari ḡetuḡamaḡi-baregorini ḡerina, Barau ḡena guruḡa ḡevekouni, e ḡwaḡwana maki asi evetoreni. <sup>23</sup> A widi ḡueri kotari tu tano namonai ḡeketoto, mainana ekirarani tu, tarima kotari na Barau ḡena guruḡa ḡeseḡaḡiani, ma ḡeḡabi-raḡeani nuḡari mabarari ḡesi, ḡia ḡwaḡwari ḡevetoreni maki, kotari sinau ta (100), ma tari gabana imaima ma gabanana (60), ma kotari gabana toitoi (30).”

### Barabore - Widi e ḡauḡa

<sup>24</sup> Iesu na barabore ta ḡeri ma ekiraḡiato, ekirato: Guba Basileia tu tarima ta kavana, ḡue ḡuturi namori ḡena vamokai evarorito. <sup>25</sup> Benamo boḡi tai, tarimarima mabarari roḡo ḡegenato-ḡoi nai, ebaru-viniato-ḡoi tarimana eiaḡomato, ḡauḡa ḡuturi widi vekaravari ai efiurito, benamo erakato. <sup>26</sup> Widi ḡetubu-foforito, ḡegara-baregote e ḡwaḡwari ḡeburito nai, ḡauḡa rakavari maki ḡia vefakari na ḡefoforito. <sup>27</sup> Benamo vamoka biaguna ḡena vetuḡunaḡi merori ḡia ḡenai ḡeiaḡomato, ḡekirato, ‘Vereḡauka, ḡoi ḡemu vamokai ḡue ḡuturi namori ovarorito, nene? Senaḡi mai ḡauḡa rakavari tu ainana beḡe iaḡoma?’ <sup>28</sup> Ḗia na evaḡa-veserito, ekirato, ‘Ebaru-vinirani tarimana na mai veiḡa bema veia.’ Vetuḡunaḡi merori na ḡedanaḡiato, ḡekirato, ‘Bema ourani nai, ḡaiaḡo, be baḡana lauri ba?’ <sup>29</sup> Ḗia evaḡa-veseto, ekirato, ‘Asiḡina, korana ḡomi na ḡauḡa boḡo laurini nai, widi maki lamuri ḡesi boḡo lau-sebonarini garina. <sup>30</sup> Ḗia ruarua beḡene gara-sebona, ma beḡene tanu mo, widi ḡwaḡwana basibasina ḡarona bene raḡasi. Mo ḡaro ai au na basi-basina tarimari maiḡesina bakirarini, bakirani: Giniguine tu, ḡauḡa mabarari ḡovaḡa-vegogori, ḡobaru-sebonari, be karava na bene ḡarari, a widi ma boḡono vaḡa-vegogoa, be ḡegu ḡaniḡani vaḡa-vegogo gabunai boḡono toreri.”

### Barabore - Mastadi ḡauna ḡutuna

*Mareko 4:30-32; Luka 13:18-19*

<sup>31</sup> Iesu na barabore ta ma ekira-vararito, ekirato, “Guba Basileia tu mastadi ḡauna ḡutuna kavana, tarima ta na eḡabiato, ḡena vamokai evaroato. <sup>32</sup> Tanobarai varovaro dagarari ḡueri mabarari fakari ai ḡia ḡereḡana misina korokoro, senaḡi etubuni nai, varovaro dagarari mabarari fakari ai ḡia moḡo barego vedaurea. Ḗia tu ḡau ai eiaḡoni naima, rovo manuri ḡeiaḡomani, ma ḡeri nuḡi ḡeveini ḡia leganai.”

### Barabore - Farao vaḡa-tubuna muramurana

*Luka 13:20-21*

<sup>33</sup> Iesu na barabore ta ḡeri ma ekiraḡiato, ekirato, “Guba Basileia tu farao vaḡa-tubuna muramurana kavana, vavine ta na kotuna ta moḡo eḡabiato, benamo farao fuseri toitoi ḡesi egiroato, eiaḡoto mo, muramura na mabarana evaḡa-tubu baregooto.”

## Barabore aniri

### Mareko 4:33-34

<sup>34</sup> Iesu na mai dagara mabarari barabore ai tarimarima evaḡa-riba iaḡirito-ḡoi. Ḡena ḡobatai barabore asi eraga-kwanerito-ḡoi. <sup>35</sup> Mai veiḡa eveiato ḡenana, per-oveta tarimana ḡena guruḡa ema vaḡa-moḡoniato, ekirato, “Au na barabore ḡerina ḡia bavaḡa-guruḡarini; tanobara evesinato ḡarona na beiaḡoma mo initoma veḡuni ḡetanuni dagarari, au na ḡia ḡeri bakiraḡi-foforirini.”

### Iesu na widi e ḡauḡa baraborena anina ekiraḡi-foforiato

<sup>36</sup> Iesu na mo tarimarima ḡutuma eraga-kwanerito, benamo numai eraka-toḡato. Ḡena mero ḡia ḡenai ḡeiaḡomato, bena ḡekiraiato, ḡekirato, “Ḡauḡa rakavari va-moka nuḡanai baraborena ḡai ḡemai nokiraḡi-maḡataia.”

<sup>37</sup> Iesu na evaḡa-veserito, ekirato, “Widi ḡueri namori evarorini tarimana tu Tari-marima Natuna. <sup>38</sup> Vamoka tu tanobara, ḡue ḡuturi namori tu Barau ḡena Basileia o veḡitaḡau seḡukana gaburenai ḡetanuni tarimari; ḡauḡa rakavari tu Satani ḡena tari-marima doḡoro. <sup>39</sup> E ḡauḡa varovarona tarimana tu Diabolo, ḡita ebaru-vinirani tari-mana; kwakwa tu tanobara magona beraḡasini kavana. Ḡwaḡwana kwakwa e ba-sibasina tu aneru na beḡe korana-iaḡiani. <sup>40</sup> Vaḡa-ilailana ḡauḡa ḡevaḡa-vegogorini, ma karavai ḡegaburini, ḡeḡara-ḡosirini, tanobara bea korini nai, moḡesina kavana bevetoreni: <sup>41</sup> Tarimarima Natuna na ḡena aneru tu betuḡurini, benamo tarimarima ḡeḡori-kerererini tarimari, ema veiḡa rakavari ḡeveirini tarimari mabarari, Barau ḡena Basileia ḡenana beḡe ḡabi-veḡitarini, <sup>42</sup> e karava seḡukana ma moremorena nuḡanai beḡe fiu-toḡarini, ema monai roḡo beḡe taḡini, gadikari maki beḡe veḡaratarini. <sup>43</sup> Moḡa ḡaronai maki Barau ḡena vei-iobukaiobuka tarimari tu, ḡaro kavana ma mamari ḡesi Tamari ḡena Basileia nuḡanai beḡe tanuni. Deikara ma seḡana tarimana, bene seḡaḡi.”

### Barabore - Tarima ta na farefare namona ta ekure-toḡaiato

<sup>44</sup> “Guba Basileia tu farefare vekuretoḡana tanobarai kavana. Tarima ta na edoḡariato, benamo ma eguriguri-ḡauato. E ma iakuna ḡesi eiaḡoto, ḡena dagara mabarari ea voivoi-iaḡirito, benamo mo tano evoiato.”

### Barabore - Galasi forena davana barego forena

<sup>45</sup> “Guba Basileia tu bisinesi tarimana kavana, galasi foreri davari barego dagarari evetaurini. <sup>46</sup> Ḡia na voina barego lelevaḡina forena ta edoḡariato, benamo ḡena farefare mabarari evoivoi-iaḡi fitoḡarito roḡo, monai vau mo davana forena evoiato.”

### Barabore - Reke

<sup>47</sup> “Guba Basileia tu reke kavana, davarai ḡefiu-riḡoani nai, maḡani-kone irauirau nuḡanai ḡetoḡani. <sup>48</sup> Reke evonuni nai, ḡeinu-raḡeani tanobara ḡana, benamo reke

tarimari ġetanu-tarini vau, maġani-kone reke nuġanai moġeri mabarari ġeviriġirini, namori mabarari tu baketi ai ġeġurarini, a rakavari tu ġefitoġarini. <sup>49</sup> Moġesi ve-toġa bevetoreni, tanobara magona beaġasini nai. Aneru beġe iaġomani nai, veiġa rakava tarimari tu beġe tore-veġitarini veiġa iobukaiobuka tarimari ġerina; <sup>50</sup> e kar-ava more-morena nuġanai beġe fiu-toġarini. Monai beġe taġini, gadikari maki beġe veġara-tarini.”

### Guruġa moġoniri variġuri e guineri

<sup>51</sup> Iesu na ġena mero edanaġirito, ekirato, “Mai guruġa mabarari nuġami ai boġo riba-ġitakauri ba?” Ġia na ġekiraiato, “Oi, Vereġauka.” <sup>52</sup> Iesu na ma ekirarito, ekirato, “Moġesina nai, bema taravatu vaġa-ribana tarimana ta Guba Basileia ġena vevaġa-riba tarimanai beiaġoni neganai, ġia tu numa biaguna ta kavana, ġena farefare variġuri ema guineri eġabi-rosirini ġena farefare vaġa-vegogo numana na.”

### Nasareta tarimari na Iesu asi ġeġabi-raġeato

*Mareko 6:1-6; Luka 4:16-30*

<sup>53</sup> Iesu na maiġeri barabore ekiraġi-ġosirito vau, mo gabu eraga-kwaneato. <sup>54</sup> Monana vau ebaregoto vanuġanai eraġasito. Iuda tarimari ġeri rubu ai evevaġa-ribato-ġoi nai, ġia ġeseġaġiato-ġoi tarimari na ġena ġobata guruġari ġeġaba-iaġirito, ema maiġesi ġevedanaġito, ġekirato, “Mai tarima ġena riba tu ainana eġabito, e mai nuġa-farevaġi veiġari maki kamasi eveirini? <sup>55</sup> Ġia tu kamuda tarimana natuna, ene? Ġia sinana arana Maria ġetoni, ene? E ġia tarina merori arari tu Iakobo (o Iames) e Iosefa, Simona e Iudas, ene? <sup>56</sup> Ema ġia tarina vavineri mabarari maki ġita ġesi maiġeri. Senaġi mai riba ema seġuka mabarari ne ainana eġabito?” <sup>57</sup> Moġesi ġetuġamaġi-ġutuma viniato nai, ġia na asi ġeġabi-raġeato. Iesu na maiġesi ekirarito, ekirato, “Peroveta tarimana tu gabu mabarari ai beġe gubakauani, senaġi ġena vanuġa korikori ema ġena numa tarimari na moġo asi beġe gubakauani.” <sup>58</sup> Monai nuġa-farevaġi veiġa boruri viravira moġo eveirito, korana asi ġeri veġabidadama nai.

### Ioane Babatiso ġena mase

**14** Mo negai Heroda, Galilea verena, Iesu varina eseġaġiato. <sup>2</sup> Benamo ġia na ġena vetuġunaġi tarimari evaġa-guruġarito, ekirato, “Mai tu Ioane Babatiso mase na bevaisiraġe-ġenoġoi nai, seġuka veiġari boruri eveirini.”

<sup>3</sup> Heroda na Ioane eġabi-tariato ma ebarubaruato, dibura numai ekou-ġauato. Ġia na maiġesina evei-viniato, korana ġia kakana Filippo ġaraġona, Herodia, ġaramanai. <sup>4</sup> Ioane Babatiso na Heroda evaġa-guruġaiato-ġoi, ekirato, “Ġoi na Herodia boġaraġo-veraria tu asi maoro.” <sup>5</sup> Heroda eura-rakavato, Ioane bene vaġia, senaġi tarimarima gariri eveito, korana ġia na Ioane ġetuġamaġiato-ġoi tu peroveta tarimana ta.

<sup>6</sup> Senaġi Heroda ġena ġora ġaronai o betdei, Herodia natuna ġuiatona tu varivari tarimari ġoirari ai ebarato. Heroda maki mai bara na evaġa-iakuato. <sup>7</sup> Moġesina nai ġia ma nuġana mabarana ġesi guruġa gwaġiġinai maiġesina bara-ġuiatona ekiraġitore-viniato, ekirato, “Ġoi kara oura-viniani dagarana nokiraġia, benamo bavanimuni.” <sup>8</sup> Ġuiato tu sinana na varau evaġa-guruġa guineato ema elaunaġiato nai, ġia maiġesina ekirato, “Ioane Babatiso debana diġu ai mainai noma vinigu.”

<sup>9</sup>Heroda nuġana emetoto, senaġi ġena guruġatore ġuiato ġenai varau eveiato e ġena varivari tarimari dairi ai ekirato, beġene vinia. <sup>10</sup>Benamo tarima debari ebasi-ġuturito-ġoi tarimana ta etuġuato dibura numai, Ioane debana ebasi-ġutuato. <sup>11</sup>Ioane debana tu diġu ai ġeġuraiato vau, ġuiato ġeviniato, benamo sinana ġenai eġwa-iaġoato. <sup>12</sup>Benamo Ioane ġena mero ġeiaġomato, tauġanina ġeġabiato, ġe-guriato. Moġa murinai ġeiaġoto Iesu ġekira-varaiato.

### **Iesu na tarimarima daġara imaima (5,000) eġburito**

*Mareko 6:31-44; Luka 9:10-17; Ioane 6:1-13*

<sup>13</sup>Iesu na Ioane ġena mase varina eseġaġiato nai, ġia monana eraka-ġerevaġito ġasi na, asi tarimarima gabuna ġana eiaġoto. Senaġi tarimarima na ġeseġaġiato nai, ġeri vanuġa ġeiaġuirito, tano na kwakuri na ġerakoto, Iesu murina na ġeiaġoto. <sup>14</sup>Iesu fenu ai edarokauto nai, ġia na tarimarima ġutuma-bara eġitarito, benamo etvetuġa-rakavarito, ema ġeri keve tarimari evaġa-namorito.

<sup>15</sup>Lavilavi rekenai Iesu ġena mero ġia ġenai ġeiaġoto, bena ġekirato, “Mai tu gabu fakana, asi tarima-rimana, ġaro varau bevariġo naima, mai tarimarima ġutuma-bara notuġuri, be vanuġai ġari ġaniġani beġenea voi.” <sup>16</sup>A Iesu ekirato, “Ġia asi beġene raka-veġita, ġomi na ġari boġono viniri, be beġene ġaniri.” <sup>17</sup>Ġia na ġekiraiato, ġekirato, “Ġai ġemai tu beredi imaima (5) e maġani-kone ruarua (2) moġo maiġeri.” <sup>18</sup>Iesu na ekirarito, ekirato, “Maiġana ġoġabi-iaġomari au ġegu ai.”

<sup>19</sup>Benamo ġia na mai ġutuma-bara elaunaġirito, ġauġa iatari ai beġene tanutanu-tari etato, monai vau ġia na beredi imaima e maġani-kone ruarua eġabirito, gubai eboġe-raġeto, Barau evaġa-namoato vau, etavi-kirakirarito, ġena mero evinirito, benamo ġia na vau mai tarimarima ġutuma-bara ġevinirito. <sup>20</sup>Mabarari ġeġanimaseto; ġaniġani kwari ġevaġa-vegogorito, boseġa gabanana ruarua (12) ġevaġa-vonurito. <sup>21</sup>Ġeġaniġanito, tau moġo, mabarari tu 5,000 kavana, senaġi vavine ma naturi keikeiri ġesi tu asi ġeivirito.

### **Iesu nanu iatanai erakato**

*Mareko 6:45-52; Ioane 6:16-21*

<sup>22</sup>Moġa murinai Iesu na ġena mero evaġa-guruġarito, ġasi ai beġene raġekau, beġene guine, kou reke ta ġana beġene iaġo etato. A ġia tu mo tarimarima ġutuma-bara roġo etuġu-rovorovorito. <sup>23</sup>Mai tarimarima vovoka etuġu-rakarito vau, ġia ġereġana ġoro ġana evaraġeto, bene ġauġau ġana.

Varau eboġito nai, ġia tu roġo moġa, ġereġana. <sup>24</sup>Ġasi tu kotuna ma fakana tano-bara ġenana kou nuġanai, e ureure na edori-ġareva ġarevaiato, korana iavara na ġasi ġena raga ġoirana rekena na etoġato-ġoi nai. <sup>25</sup>Horāġauna 3 ema 6 koloko vekar-avari ai boġiboġi rekenai, Iesu ġia ġeri ai eiaġoto. <sup>26</sup>Senaġi ġena mero na nanu iatana na erakato-ġoi ġeġitaiato, benamo nuġari maki ġefare-vaġito, ema ġegari-rakavato, ġekirato, “Mo tu murava ta!” Ġegarito nai ġeġabato maki. <sup>27</sup>Iesu na asikauna evaġa-guruġarito, ekirato, “Ġonuġa-gwaġiġi, mai tu au; asi ġogari.”

<sup>28</sup>Petero na evaġa-veaseato, ekirato, “Vereġauka, bema moġoni ġoi neganai, bono launaġigu, be nanu iatanai bana raka, ġemu ai bana iaġosi.” <sup>29</sup>Iesu ekirato, “Noiaġoma!” Benamo Petero ġasi na eraka-riġoto, nanu iatanai erakato, Iesu ġenai eiaġoto. <sup>30</sup>Senaġi Petero na iavara (e ureure) eġitaiato, benamo egarito, erei-riġoto nai eġaba-fouto, ekirato, “Vereġauka o, noma vaġa-maġurigu.” <sup>31</sup>Iesu asikauna ġi-



mana etuġu-iaġoato, ġenai eveġabikauto, ekirato, “Veġabidadama kei tarimana, karase nai odaradarani?” <sup>32</sup> Tauri ruarua ġasi ai ġeraġekauto vau iavara edokoto. <sup>33</sup> Ġasi tarimari tu ġia ġoiranai vau ġetoma-rakarigoto, ġekirato, “Moġoni veġata, ġoi tu Barau Natuna.”

### Iesu na keve tarimari Genesareta ai evaġa-namorito

*Mareko 6:53-56*

<sup>34</sup> Ġia ġasi na ġevanaġito, Genesareta tanonai ġeraġasito. <sup>35</sup> Mo gabu tarimari na Iesu ġea ġita-doġariato, benamo ġia varina mo gabu vanuġari mabarari ġevaġa-ribarito. Benamo keve tarimari ġia ġenai ġeġwa-iaġorito, <sup>36</sup> e ġenoġiato, ġena dabuġa dudunai moġo maki beġene veġabikau. Gabivau, ġeveġabi-kauto tarimari mabarari varau ġenamoto.

### Namo e rakava

**15** Farisea tarimari e taravatu ġevevaġa-riba iaġiato-ġoi tarimari kotari Ierusalemna na Iesu ġenai ġeiaġoto, ġekirato, <sup>2</sup> “Karase nai ġoi ġemu mero na ġita senera vereri ġeri vevaġa-riba asi ġeseġaġirini? Ġia ġimari maki dabara korikoriri ai asi ġeġuriġirini vau ġeġaniġanini!” <sup>3</sup> Iesu na evaġa-veserito, ekirato, “Be karase senemi vereri ġeri vevaġa-naġi boġono korana-iaġiri urari ai, Barau ġena taravatu guruġari ġoruġarini? <sup>4</sup> Barau ekirato, ‘Tamamu e sinamu bono gubakauri,’ ema ‘Deikara ta na tamana o sinana beguruġa-rakava viniani tarimana tu boġono vaġi-mase!’ <sup>5</sup> Senaġi ġomi ġokirani, tarima ta na tamana o sinana bevaġa-guruġaiani, bekirani, ‘Au na ġomi asi bavaġa-kavamini, korana bara vinimi dagarana tu Barau ġena dagara, naima ġia aviniani.’ <sup>6</sup> Moġesi veġai ġomi na tarima ġokouani, tamana e sinana asi bene vaġa-kavari e asi bene gubakauri ġana. Ġemi sene maġuriri maiġesiri ġerina Barau ġena taravatu guruġari asi aniri ai ġovaġa-iaġorini. <sup>7</sup> Ġofaġofa tarimami, Isaia na eperoveta-iaġimito tu moġoni, ekirato, <sup>8</sup> ‘Mai besena tu mururi koriri ai moġo au ġegubakauguni ġeri Barau, senaġina ġia nuġari tu manaġa rakava au ġegu ai. <sup>9</sup> Ġetoma-rakarigoto vini-kavaguni, ġeri vevaġa-riba tu tarimarima ġeri vevaġa-naġi taravaturi, a dia au ġegu!’”

### Dagara kotari na tarima ġevaġa-rakavarini

*Mareko 7:14-23*

<sup>10</sup> Iesu na tarimarima ġutuma ġia ġenai ekea-iaġomarito, benamo ekirarito, ekirato, “Ġoseġaġi, ema boġono riba-maoro: <sup>11</sup> Murika na eraka-toġani tarima murunai dagarana na ġia asi evaġa-rakavaiani, senaġina kara ġia nuġana o loruna ġutuna na ma muruna na eraka-rosini dagarana na ġia evaġa-rakavaiani.”

<sup>12</sup> Ġena mero ġia ġenai ġeiaġomato, benamo ġekiraiato, ġekirato, “Ġoi ribamu, Farisea tarimari tu ġoi ġemu guruġa beġe seġaġia nai, nuġari beġe midigu?” <sup>13</sup> Iesu evaġa-veseto, ekirato, “Tamagu gubai etanuni na ġau asi evarorito mabarari tu beġe raġa-vaġirini. <sup>14</sup> Ġotuġamaġi-fitoġari! Ġia matari bubu, senaġi ġeurani mata-bubu

tarimari begene ġori-kauri. Bema mata-bubu tarimana na mata-bubu tarimana ta beġori-kauani nai, tauri ruarua koufai beġe keto-riġoni.”

<sup>15</sup> Petero na ekiraiato, ekirato, “Mai guruġa veabanaġina tauna korikori novaġa-ribama.” <sup>16</sup> Iesu na ekirarito, ekirato, “Ġomi maki asi ġotuġamaġi-fakani tarima kotari kavana? <sup>17</sup> Asi ġoribani maki? Dagara ta tarima muruna na eraka-toġani, eiaġoni sinaġenai, monana eiaġoni tauġanina ġenana ea raka-rosini. <sup>18</sup> Senaġina muruna na ġeraka-rosini dagarari tu nuġana o loruna na ġeiaġomani naima, maiġeri dagara na tarima ġevaġa-rakavaiani. <sup>19</sup> Tarima nuġana o loruna ġenana tuġamaġi rakavari ġeraġeni nai, evaġivaġini, eveġura-vanaġini, emata-boraġani, elemani, Kota gabunai ġofaġofa guruġari ekiraġirini, ema tarima namori arari ġofaġofa veiġari ai evari-fiurini. <sup>20</sup> Maiġeri dagara na tarima evaġa-rakavaiani; senaġina ġimamu asi oġuriġiani vau oġaniġanini, monana tarima asi evaġa-rakavaiani.”

### **Irau bese vavinena ta ġena veġabidadama**

*Mareko 7:24-30*

<sup>21</sup> Iesu na mo gabu eraga-kwaneato, eraka-iaġoto Taia e Sidono rekeri tanori ai eraġasito. <sup>22</sup> Benamo monai etanuto-ġoi vau, Kanana vavinena ta Iesu ġenai eiaġomato, eġaba-fouto, ekirato, “Vereġauka, Davida Natuna o, au novetuġagu! Au natugu ġuiatona tu iauka rakavana na beboroġia nai, ġena midigu initoma tu barego rakava moġo.” <sup>23</sup> Senaġina Iesu na ġia asi evaġa-veseato. Benamo ġena mero ġia ġenai ġeiaġomato, ġenoġiato, ġekirato, “Notuġu-rakaia! Ġita murira na eiaġomani ema guru baregona eveiani.”

<sup>24</sup> Iesu evaġa-veseto, ekirato, “Barau na au etuġuguto tu, rekwerekwa mamoreri, Isaraela tarimari, ġeri moġo.” <sup>25</sup> Benamo mo vavine Iesu kwakuna koranai evetuitarito, ekirato, “Vereġauka, novaġa-kavagu!” <sup>26</sup> Iesu evaġa-veseto, ekirato, “Mero misiri ġari ġaniġani bita ġabirini, ma kwaiva bita fiu-vinirini tu asi maoro.” <sup>27</sup> Vavine na evaġa-veseato, ekirato, “Vereġauka, mani tu moġoni, senaġina kwaiva na ġaniġani kwari ġeketo-firiġoni, biaguri ġeri ġaniġani fatari na, maki ġeġanirini.” <sup>28</sup> Benamo Iesu na evaġa-veseato, ekirato, “Veġabidadama barego vavinemu! Kara oura-viniani veiġana beġorani.” Mo horai moġo ġia natuna ġuiatona enamoto.

### **Iesu na keve tarimari vovoka evaġa-namorito**

<sup>29</sup> Iesu na mo gabu eiaġuiato, Galilea kouna sevina na eraka-vanaġito. Benamo ġoro tai eraġeto, tuġunai etanu-tarito. <sup>30</sup> Tarimarima ġutuma-bara ġia ġenai ġeiaġomato, keve irauirau tarimari ġeġabi-iaġomarito, kotari kwaku rakava, mata-bubu, kobari na ġedarato-ġoi tarimari, muru-bubu, ema keve irauirau ġutuma maki. Iesu kwakuna koranai ġema tore-taririto, benamo ġia na evaġa-namorito. <sup>31</sup> Tarimarima mabarari na mai vetoġa ġeġitaiato nai, ġeġaba-rakavato, korana mururi bubu tarimari ġeguruġato, ġedarato-ġoi tarimari tauġaniri vinuba gaburi ai ġevetoreto, kwaku rakava tarimari ġerakato, mata-bubu tarimari ġeboġe-boġeto. Benamo ġia na Isaraela ġeri Barau ġevaġa-raġeato.

### **Iesu na tarimarima daġara vasivasi (4,000) eġuburito**

*Mareko 8:1-10*

<sup>32</sup> Iesu ġena mero ġia ġenai ekea-iaġomarito, ekirato, “Au na mai tarimarima avetuġarini, korana ġaro toitoi veġatana au ġesi mainai beġe tanu, ma kara ta

maki roḡosi roḡo beḡene ḡania. Ḡaniḡani ta roḡosi roḡo beḡene ḡani nuḡanai, au na asi batuḡu-rakarini, korana dabarai beḡea borimarini garina.”<sup>33</sup> Ḡena mero na ḡedanaḡiato, ḡekirato, “Mai tano fakanai ḡaniḡani vovoka tu kamasi bita doḡarini vau, mai ḡutuma-bara bita ḡuburini?”<sup>34</sup> Iesu na evaḡa-veserito, ekirato, “Ḡomi ḡemi ai beredi tu vira maniḡa?” Ḡia ḡekirato, “Beredi imaima ruarua (7) ḡai ḡemai maiḡa, ema maḡani-kone misiri kotari maki.”

<sup>35</sup> Benamo Iesu na mai tarimarima asisebo ekirarito, tano ai ḡetanutanu-tari. <sup>36</sup> Benamo beredi imaima ruarua (7) e maḡani-kone eḡabirito, Barau evaḡa-namoato, ebuki-ḡuturito, ḡena mero evinirito, ḡia na vegogo tarimari ma ḡevinirito. <sup>37</sup> Mabarari ḡeḡani-maseto murinai, Iesu ḡena mero na ḡaniḡani kwari ḡegogorito, boseḡa imaima ruarua (7) ḡevaḡa-vonurito. <sup>38</sup> Mo ḡaniḡani ḡeḡaniato ḡenana tau moḡo mabarana tu 4,000, senaḡina vavine ma naturi ḡesi tu asi ḡeivirito. <sup>39</sup> Benamo Iesu na mai ḡutuma-bara etuḡu-rovo rovorito, a ḡia ḡasi ai eraḡeto, Magadan tanona ḡana eiaḡoto.

### Farisea e Sadukea tarimari ḡeri ura vetoḡa ta guba na bene mariḡo

**16** Farisea e Sadukea tarimari kotari Iesu ḡenai ḡeiaḡoto, benamo ḡedanaḡi-ribaḡaniato. Ḡeri ura vetoḡa ta guba na bene mariḡo, beḡene ḡitaia, ḡia tu moḡoni Barau na etuḡuato tarimana. <sup>2</sup> Senaḡi Iesu na evaḡa-veserito, ekirato, “Lav-ilavi ai ḡaro evariḡoni nai, ḡokirani, ‘Guba bekakakaka, be ḡura asi beraguni, ḡitaḡi-tana tu nega namo.’<sup>3</sup> A boḡi-boḡi rekenai ḡokirani, ‘Toma tu ḡura ma iavarana ḡesi eiaḡomani, korana guba bekakakaka, ema ḡitaḡitana maki ma garina.’ Guba ḡoḡitai-iani nai, kara boḡo kiraḡiani, nega namo o nega rakava ḡeri ai tu lorinai, senaḡina maitoma ḡaro vetoḡari tu asi ribami!<sup>4</sup> Maitoma ḡuru rakavana ma veḡura-vanaḡina ḡesi, (Barau ḡenana ḡeveḡitato ḡuruna), vetoḡa ma evetauani, senaḡina vetoḡa ta asi bavinimini, a Iona, peroveta tauna, ḡenai eḡorato vetoḡana moḡo.” Benamo Iesu na eraga-kwanerito, ḡerina eraka-veḡitato.

### Iesu ḡena mero ḡedaradarato

#### *Mareko 8:14-21*

<sup>5</sup> Kou na ḡeḡasi-vanaḡito reke ta kefo ai vau, Iesu ḡena mero ḡeribato, ḡaniḡani asi ḡeḡabikauto. <sup>6</sup> Benamo Iesu na ekirarito, ekirato, “Lorimi boḡono vetore, boḡono boḡeboḡe, korana Farisea tarimari e Sadukea tarimari ḡeri farao vaḡa-tubuna muramurana lorina boḡono torea.” <sup>7</sup> Ḡia tauḡeri ḡeguruḡa-guruḡa iaḡi-vegogo-ato, ḡekirato, “Ḡia maiḡesi eguruḡani, korana beredi asi bita ḡabikau nai.” <sup>8</sup> Iesu ribana ḡia na kara ḡekiraḡiato naima, edanaḡirito, ekirato, “Karase nai ḡereḡami na beredi asi boḡo ḡabikau ḡoguruḡa-guruḡa iaḡiani? Veḡabidadama kei tarimami! <sup>9</sup> Ḡomi roḡosi roḡo boḡono riba-maoro? E asi ḡotuḡamaḡiani beredi imaima (5) ḡenana tarimarima 5,000 ḡeḡaniḡanito, e beredi kwari ḡogogorito tu boseḡa vira ḡovaḡa-vonurito? <sup>10</sup> Ema ta maki, farao imaima ruarua (7) ḡenana tarimarima 4,000 ḡeḡaniḡanito, e beredi kwari ḡogogorito tu boseḡa vira ḡovaḡa-vonurito? <sup>11</sup> Kamasi se nuḡami asi ḡevekeoni, ma asi ḡoribani, au na tu dia beredi aguruḡa-iaḡiani? Ma nakira: Farisea tarimari e Sadukea tarimari ḡeri farao vaḡa-tubuna dagarana lorina boḡono torea!” <sup>12</sup> Benamo ḡia nuḡari ḡevekeoto, ema ḡeribato maki, Iesu na dia farao vaḡa-tubuna muramurana eguruḡa-iaḡiato, senaḡina Farisea e Sadukea tarimari ḡeri vevaḡa-ribo guruḡari ḡofaḡofari rekeri ai eguruḡato.

### Petero na Iesu ekiraĝi-foforiato, Keriso

*Mareko 8:27-30; Luka 9:18-21*

<sup>13</sup> Iesu eiaĝoto, Kaisarea Filipi vanuĝana tanona rekenai eraĝasito. Monai vau ĝia na ĝena mero edanaĝirito, ekirato, “Tarimarima tu kara ĝetoni, Tarimarima Natuna tu deikara?” <sup>14</sup> Ĝia ĝekirato, “Kotari ĝekirani, ĝoi tu Ioane Babatiso, kotari ĝekirani, Elia, ma tari ĝekirani tu, Ieremia o peroveta tarimana ta.” <sup>15</sup> Iesu na ĝia edanaĝirito, ekirato, “A ĝomi tu kara ĝotoni au tu deikara?” <sup>16</sup> Simona Petero na evaĝa-veseato, ekirato, “Ĝoi tu Keriso, maĝuri Barauna Natuna.” <sup>17</sup> Iesu na evaĝa-veve viniato, ekirato, “Simona, Ioane natuna, bono iaku ema vevaĝa-namo iatamu ai bene tanu, korana mai vevaĝa-veve moĝonina bovinia, maĝa tu dia tarima ta ĝenana beiaĝoma, senaĝina mai tu au Tamagu gubai etanuni na ĝoi bevinimu. <sup>18</sup> Moĝa lorinai akiramuni: Ĝoi tu Petero, (anina tu fore), ema mai fore iatanai au ĝegu ekalesia bavaĝaruĝaiani. Mase ĝena seĝuka na maki asi bevaĝa-darereani. <sup>19</sup> Au na Guba Basileia kiri maki ĝoi baviniuni; tanobarai bobarurini dagarari mabarari gubai maki Barau na bebarurini; e tanobarai boruĝarini dagarari mabarari gubai maki Barau na beruĝarini.” <sup>20</sup> Benamo Iesu na ĝena mero ekirarito, tarima ta asi beĝene vaĝa-ribaia ĝia tu Keriso, (Barau na ekiraĝi-toreato vevaĝa-maĝuri tauna).

### Iesu na ĝena mase e variĝisi-ĝenoĝoi eguruĝa-iaĝirito

*Mareko 8:31-9:1; Luka 9:22-27*

<sup>21</sup> Mo nega na veĝata Iesu na ĝena mero evaĝa-riba guinerito, ekirato, “Au tu Jerusalema ĝana aiaĝoni, be Iuda vereri, e Rubu Veaĝa vereri baregori, ema taravatu vaĝa-riba-iaĝina tarimari ĝerina roĝo amidigu-lelevaĝini; ema beĝe vaĝi-maseguni maki, senaĝina ĝaro vaĝa-toitoinai vau, mase na ma bavaisiraĝe-ĝenoĝoini.” <sup>22</sup> Petero na eĝori-veĝitaiato, benamo esisiba-viniato, ekirato, “Vereĝauka, dia maniĝesina; maniĝesina asi beĝe vei-vinimuni, ma asi beĝorani maki.” <sup>23</sup> Benamo Iesu eboĝe-kureto, Petero ekiraiato, ekirato, “Ĝoi Satani, ĝeguna noraka-ĝerevaĝi! Au ĝegu iaĝoiaĝo ĝoi na odiau-ĝauani, korana mai ĝemu tuĝamaĝi guruĝana tu dia Barau ĝenana eiaĝomani, senaĝina tarimarima ĝerina.”

<sup>24</sup> Iesu na ĝena mero evaĝa-guruĝarito, ekirato, “Bema tarima ta au murigu ai bene raka etoni nai, tauĝena bene veruĝa, ĝena satauro bene ĝwaia, ma murigu ai bene raka.” <sup>25</sup> Moĝa lorinai deikara tauĝena moĝo ĝena maĝuri lorina etoreani tarimana, ĝena maĝuri befitoĝaiani. A deikara au daĝu ai ĝena maĝuri befitoĝaiani tarimana, ĝena maĝuri asi bevei-rekwarekwaiani, senaĝi bedoĝariani. <sup>26</sup> Tarima ta na tanobara mabarana uranai ĝena maĝuri befitoĝaiani, ĝena namo tu kara ĝia ĝenai? Korana tarima ta ĝena maĝuri efitoĝaiato nai, kara na vau ma bevoi-ĝenoĝoiani? <sup>27</sup> Korana Tarimarima Natuna tu Tamana mamana marevana e seĝuka baregona e ma ĝena aneru mabarari ĝesi beĝe iaĝomani, benamo tarimarima tata ĝeri veĝa ilailanai voiri tu bevinirini. <sup>28</sup> Moĝoni akiramini, mai kotari ini ĝeruĝa-taĝoni maĝeri tu asi roĝo beĝe maseni, beiaĝoni mo, Tarimarima Natuna ĝena Basileia nuĝanai beiaĝomani beĝe ĝitaiani.

### Iesu vetoĝana eirauto

**17** Ĝaro imaima sebona (6) ĝekorito murinai, Iesu na Petero, e Iakobo (o Iames), ema tarina Ioane eĝabirito, ĝoro baregona ta tuĝuna ĝana ĝevaraĝeto, monai

ġia ġereġari moġo. <sup>2</sup>Ġia ġeboġe-taġoto-ġoi nuġanai, Iesu ġitaġitana varau eirauto: Ġia ġoirana ekimore-kimoreato ġaro noġa, ma ġena dabuġa ekuro-ġaroġaroto. <sup>3</sup>Benamo mai mero toitoi na Mose e Elia ġeġitarito, Iesu ġesi ġeguruġa guruġato-ġoi. <sup>4</sup>Monai Petero eguruġa-fouto, Iesu ekiraiato, ekirato, “Vereġauka, namo vedaurea ġita mainai maiġera! Be, ourani nai, fouta toitoi naragari, ta ġoi ġemu, ta Mose ġena, ema ta Elia ġena.” <sup>5</sup>Ġia roġo eguruġato-ġoi, magube kuro-ġaroġarona na ema ġabi-ġaurito vau, garo ta mai magube nuġana na ekea-rosito, ekirato, “Mai tu au Natugu, auravini-baregoani; ġia ġenai aiaku-rakavani. Ġia boġono seġaġi-vinia!” <sup>6</sup>Iesu ġena mero toitoi na mai garo ġeseġaġiato nai, tano ai ġeketo-tarito ġoirari maki tano ai, korana ġegari-rakavato nai. <sup>7</sup>Benamo Iesu tu ġia ġeri ai eiaġoto, tauġaniri eġabikararito, ekirato, “Ġovaisivaisi-raġe, asi ġogari.” <sup>8</sup>Ġia ġeboġe-vaisito nai, ġia na tarima ta asi ġeġitaiato ġia ġesi, Iesu moġo ġereġana.

<sup>9</sup>Mabarari ġoro na ġemariġoto-ġoi nai, Iesu na evaġa-guruġarito, ekirato, “Boġo ġita dagarari tarima ta asi boġono vaġa-ribaia, bene iaġo mo, Tarimarima Natuna mase na bene variġisi-ġenoġoi.”

<sup>10</sup>Benamo Iesu ġena mero na ġedanaġiato, ġekirato, “Kara dainai taravatu vaġa-riba-iaġina tarimari ġekirani, Elia tu beiaġoma-guineni?” <sup>11</sup>Iesu evaġa-veseto, ekirato, “Moġoni veġata, Elia tu beiaġoma-guineni, dagara mabarari bevaġa-variġu ġenoġoirini. <sup>12</sup>A au na akiramini, Elia tu varau eiaġomato, senaġi tarimarima tu asi ribari ġia tu deikara. Ġeri ura veiġari ai moġo ġevei-viniato-ġoi. Moġa ilailanai Tarimarima Natuna maki beġe vaġa-midigu midiguani.” <sup>13</sup>Mai guruġa ġerina Iesu ġena mero ġeribato, ġia na tu Ioane Babatiso ekiraġi-kara-viniato.

### Iesu na iauka rakavana na eboroġiato merona evaġa-namoato

*Mareko 9:14-29; Luka 9:37-42*

<sup>14</sup>Ġia ma ġeġenoġoito tarimarima ġutuma ġeri ai nai, tarima ta Iesu ġenai eiaġomato, ġoiranai ema vetui-tarito, <sup>15</sup>ekirato, “Vereġauka, au natugu merona novetuġaia! Ġia tu ġue na evaġiani, ema tauġanina evaġa-ġoġo-ġogo rakavaiani. Nega ġutuma karavai eburi-raġeni e nanu ai eburi-reini. <sup>16</sup>Ġemu mero ġeri ai aġabi-iaġoato, senaġina vaġa-namona ġia tu asi ilaila.” <sup>17</sup>Iesu evaġa-veseto, ekirato, “Asi veġabidadamami e kira-sirivaġi ġuruna! Ġaro vira au tu sevimi ai bana tanu? Ġaro vira bana vevaġa-gwaġiġi vinimi? Mero ġegu ai ġoġori-iaġomaia!” <sup>18</sup>Iesu na mero tauġanina ġenai etanuto iauka rakavana ekira-ġoiato, benamo iauka rakavana eraka-vaġito, ma asikauna mero enamoto.

<sup>19</sup>Gabivau Iesu ġena mero ġenai ġeiaġoto, vekuretoġai ġedanaġiato, ġekirato, “Karase nai ġai na iauka rakavana asi ilaila baġa lai-vaġia?” <sup>20</sup>Iesu na evaġa-veserito, ekirato, “Korana ġemi veġabidadama asi ilaila naima. Akira-korikorimini, bema ġemi veġabidadama mastadi ġutuna misina korokorona kavana nai, mai ġoro boġo kiraiani, boġo kirani, ‘Mainana noveġabi-vaisi, ma iomonai noa vettore!’, benamo beveġabi-vaisini ma beiaġoni. Veiġa mabarari maki boġo veirini riba. [<sup>21</sup>Iauka rakavari maiġesina lailairi tu dabara irauna tai asiġina, senaġina ġauġau e ġaniveaġai ġereġana moġo.]”

## Iesu ġena mase ma ekiraġi-ġenoġiato

*Mareko 9:30-32; Luka 9:43-45*

<sup>22</sup> Ġaro ta, Iesu ma ġena mero ġesi Galileai ġetanuto-ġoi nai, Iesu na ekirar-ito, ekirato, “Tarimarima Natuna tu beġe revaiani vau tarimarima ġimari ai beġe toreani. <sup>23</sup> Benamo beġe vaġi-maseani, senaġi ġaro vaġa-toitoinai ma bevaisiraġe-ġenoġoini.” Ġena mero ġeseġaġiato nai, nuġari ġemeto-rakavato.

## Rubu Veaġa takesi moniri vinina

<sup>24</sup> Iesu ma ġena mero ġesi Kaperanauma vanuġanai ġeraġasito, benamo Rubu Veaġa monina ġegogoato-ġoi tarimari ġeiaġomato, Petero ġedanaġiato, ġekirato, “Ġomi ġemi vevaġa-riba tauna Rubu Veaġa ġena takesi moniri tu evinini ba asiġina?” <sup>25</sup> Petero na evaġa-veseato, ekirato, “Oi, evinini.” Petero numa ġana eġenoġoito nai, Iesu na edanaġiato, ekirato, “Simona, ġoi ġemu tuġamaġi tu kamasi? Tanobara vereri o kini ġeri takesi moniri tu deikara na beġene viniri? Ġia naturi na ba tarima boruri na beġene viniri?” <sup>26</sup> Petero evaġa-veseto, ekirato, “Tarima boruri na.” Iesu na ekiraiato, ekirato, “Moġa anina, ġia naturi tu asi beġe vinini. <sup>27</sup> Senaġina asi bitana vaġa-baruri ġana, naima noiaġo kou ġana. Kimai bono fiu-riġoa, maġani-kone giniguinena boinu-raġeani nai, bokana bono keo-baġakaia, silva monina ta bodoġariani nuġanai. Bono ġabia, benamo bono viniri ġita taura ruarua ġera Rubu Veaġa takesi monina.”

## Deikara tu barego vedaurea Guba Basileia nuġanai?

**18** Mo negai Iesu ġena mero ġenai ġeiaġoto, ġekirato, “Deikara tu barego vedau-rea Guba Basileia nuġanai?”

<sup>2</sup> A Iesu na mero misina ta ekea-iaġomaiato, benamo vekaravari ai evaġa-ruġa-tariato, <sup>3</sup> ekirato, “Moġoni veġata, akiramini, ġomi asi boġo vetuġamaġi-kureni e mai mero misina kavana asi boġo iaġoni nai, ġomi tu Guba Basileia nuġanai asi boġo raka-toġani. <sup>4</sup> Tarima ta tauġena evevaġa-manauni mai mero misina kavana, ġia tu barego lelevaġi Guba Basileia nuġanai. <sup>5</sup> Ema deikara mero misina maiġesina kavana au aragu ai beġabi-raġeani tarimana na au maki eġabi-raġeguni.”

## Tarima ta na mero misina ġena veġabidadama asi bene vaġa-rakavaia

*Mareko 9:42-48; Luka 17:1-2*

<sup>6</sup> Senaġina bema tarima ta na au eġabidadama-viniguni mero misina ta ġena veġabidadama evaġa-rakavaiani, ġia tu bere namo fore barana ġaiġonai ġere baru-kaua, ma davara dodokunai bere vebora-mase. <sup>7</sup> Tanobara vetuġana kekei, korana veribaġani ġenana tarima ġeri veġabi-dadama evaġa-rakavaiani. Dagara moġesina vanaġivanaġi beġe ġorani veġata, senaġina veribaġani evaġa-ġoraiani tarimana neġi, vetuġana kekei.

<sup>8</sup> Bema ġoi ġimamu o kwakumu na rakavai etoremuni nai, bono basi-ġutua, bena bono fitoġaia! Ġimamu sebonai o kwakumu sebonai maġuri vanaġivanaġi bono doġaria tu namo, a asi namo ġimamu ruarua ma kwakumu ruarua karava eġara-vanaġi vanaġini gabunai beġe fiu-kaumuni. <sup>9</sup> Bema ġoi matamu na rakavai etoremuni nai, bono ġibo-vaġia, bena bono fitoġa-kwareġaia. Matamu sebonai maġuri

vanaġivanaġi bono doġaria tu namo, a asi namo matamu ruarua karava eġara-vanaġi vanaġini gabunai beġe fiu-kaumuni.”

### **Barabore - Rekwerekwa mamoe**

*Luka 15:3-7*

<sup>10</sup>“Lorimi boġono vetore, mai mero misiri ta boġo ruġaiiani ġesi. Korana akiramini: Ġia aneruri na au Tamagu gubai etanuni ġoirana nega vanaġivanaġi ġeġitaiani. [<sup>11</sup>Tarimarima Natuna tu rekwerekwa tarimari vaġa-maġuriri ġana eiaġomato.]

<sup>12</sup>Kamasi ġotuġamaġiani? Bema tarima ta ma ġena mamoe sinau ta (100), senaġina sebna berekwa-rekwani nai, ġia kara beveini? Ġia na tu 99 ġoro gabakanai beraga-kwane-rini, benamo beiaġoni, rekwa-rekwa mamoe bea vetauani. <sup>13</sup>Bedoġariani nai, moġoni akiramini, beiaġu-rakavani moġo. A ġena mamoe 99, asi ġedobito dagarari, maki bevanaġirini. <sup>14</sup>Moġa ilailanai Tamami gubai etanuni asi ġena ura, mai mero misiri ta bene rekwerekwa.”

### **Tarikakamu ta na bevei-rakava vinimuni**

<sup>15</sup>“Bema ġoi tarikakamu ta na bevei-rakava vinimuni nai, bono iaġo, ġena veiġa rakavana bono vaġa-fofori vinia. Senaġina, vekuretoġai mai veiġa bono veia, ġia ma ġoi ġesi moġo. Bema ġia na ġoi beseġaġimuni ema beġabi-raġemuni nai, tarikakamu ġoi ġemu ai beġenoġoi. <sup>16</sup>Senaġina bema asi beġabi-raġemuni nai, tarima sebna o ruarua bono ġabiri, ġoi ġesi boġono iaġo ġenai, benamo ‘guruġa mabarari beġene vaġa-moġoniri, seġaġiseġaġi tarimari ruarua o toitoi ġerina,’ Buka Veġa ekirani kavana. <sup>17</sup>Bema ġia asi beseġaġirini nai, beġe ġora dagarari mabarari tu rubu o ekalesia vegogona bono kira-varaia. Bema ekalesia vegogona garona asi beseġaġiani, ġoi na ġia tu Barau asi ribana tarimanai ema takesi gogo o vei-rakava tarimanai bono vaġa-iaġoa.

<sup>18</sup>Moġoni akiramini: Tanobarai boġo barurini dagarari mabarari gubai maki Barau na bebarurini; e tanobarai boġo ruġarini dagarari mabarari gubai maki Barau na beruġarini.

<sup>19</sup>Au na akira-ġenoġoimuni: Tano-barai ġomi tarima ruarua dagara tai nuġami boġo tore-sebonaiani ema boġo ġauġau-iaġiani tu, Tamagu gubai etanuni na bevinimuni. <sup>20</sup>Korana au aragu ai tarima ruarua o toitoi beġe tanu-vegogoni gaburi ai, au maki ġia ġesi monai.”

### **Barabore - Rakava asi etuġamaġi-fitoġaiiani tarimana**

<sup>21</sup>Benamo Petero tu Iesu ġenai eiaġoto, ekirato, “Vereġauka, au tari-kakagu bevaġa-rakava iaġoguni nai, ġena rakava tu nega vira kavana bana tuġamaġi-fitoġaia? Imaima ruarua (7) ba?” <sup>22</sup>Iesu evaġa-veseto, ekirato, “Asiġina, dia 7 moġo, senaġina 70 ma vaġa-baregona 7, o 70 taims 7, (moġa anina tu vanaġivanaġi).

<sup>23</sup>Ġoseġaġi, Guba Basileia tu vere ta kavana, ġia eurato, ġena vetuġu-naġi tarimari ġeri ġabitore bene vetauri ema bene vaġa-maorori. <sup>24</sup>Ġia na ġabitore dori evetaurito-ġoi nuġanai, vetuġunaġi tarimana ta ġema-ġabi-toġaiato, ġia ġena ġabitore ġenai vira milion kina, moni barego vedaurea, eveiato. <sup>25</sup>Mai vetuġunaġi tauna ġena moni asi ilaila ġena ġabitore voina vinivinina ġenai. Moġesina naima vere na ġena vetuġu-naġi merori ekirarito, mai tarima beġene voivoi-iaġia, vere ta

ġena vetuġunaġi meronai bene iaġo, ma ġaraġona e ma natuna ema ġena farefare mabarari ġesi maki, mo ġena ġabitore bene davaia ġana. <sup>26</sup> Vetuġu-naġi tauna vere kwakuna koranai evetui-tarito, enoġiato, ekirato, ‘Au ġegu ai bono vevaġa-gwaġiġi. A au na ġemu dagara mabarari voiri bavinimuni.’ <sup>27</sup> Vere na evetuġaiato nai, vetuġunaġi tauna ġena ġabitore etuġamaġi-fitoġaiato, benamo etuġu-rakaiato.

<sup>28</sup> Mai vetuġunaġi tauna eraka-rosito, ġia ġatana vetuġunaġi tarimana ta edoġariato. Mai ġatana moni kotuna eġabi-toreato ġia ġenai. Eġabi-tariato, ma ġaiġona egigiatto, ekirato, ‘Au ġegu ai oġabi-toreato monina voina novinigu!’ <sup>29</sup> Gatana vetuġunaġi tarimana ġia kwakuna koranai evetui-tarito, enoġiato, ekirato, ‘Nega kota novinigu roġo, be voina mabarana bana vinimu!’ <sup>30</sup> Senaġina ġia asi eurato, benamo dibura numai edori-toġaiato. Monai bene tanu, bene iaġo mo, ġena ġabitore voina bene dava-iaġia etato.

<sup>31</sup> Benamo ġia ġesi vetuġunaġi ġeiaġo-vini vegogoato-ġoi tarimari na mo veiġa ġeġitaiato nai, ġia nuġari ġemetoto, benamo ġeiaġoto vere ġenai, mo kara ġeġorato dagarari mabarari ġevaġa-ribaiato. <sup>32</sup> Moġesi nai ġia na vetuġunaġi tauna numai ekea-toġaiato, ekiraiato, ekirato, ‘Ġoi vetuġunaġi tauna rakavana! Au na ġoi moni vira milion au ġegu ai oġabi-toreato dagarari mabarari atuġamaġi-fitoġarito, voina asi oviniguto, korana onoġiguto nai. <sup>33</sup> Ilailana ġoi na maki karomu vetuġunaġi tauna boro vetuġa-ġwaia, au na ġoi avetuġa-ġwamuto kavana.’ <sup>34</sup> Mai vere ebaru-rakavato, benamo vetuġunaġi tauna dibura numai etoreato, monai metona bene ġwaia mo, ġena ġabitore voina mabarana ma bene vini-ġenoġoia.

<sup>35</sup> Iesu ġena guruġa magona rekenai maiġesina ekirato: Tamagu gubai etanuni na ġomi mabarami mai veiġa sebonai moġo bevei-vinimini, bema ġoi tarikakamu ġena rakava nuġamu mabarana ġesi asi botuġamaġi-fitoġaiati nai.”

### Veġaraġo ruġaruġana

**19** Iesu na maiġeri dagara mabarari eguruġa-iaġi ġosirito murinai, Galilea eiaġuiato, Iudea tanona ġana eiaġoto, Ioridana ġarukana reke ta kefonai. <sup>2</sup> Tarimarima ġutuma-bara ġia murinai ġeiaġomato, e monai ġeri keve evaġa-namorito.

<sup>3</sup> Farisea tarimari kotari ġia ġenai ġeiaġoto, ġevedanaġi-veribaġaniato, ġekirato, “Tau ta ġena ura ġaraġona bene fitoġaia etoni nai, taravatu na beġabiani?”

<sup>4</sup> Iesu na evaġa-veserito, ekirato, “Ġomi na Buka Veaġa asi ġoiaviani? Maiġesi ekirani, “Tovotovona na veġata, Barau na dagara mabarari eveirito nai, ġia na tarimarima maki eveirito tau e vavine.’ <sup>5</sup> Benamo Barau ekirato, ‘Moġesina nai tau ta na tamana e sinana beraga-kwanerini, ġaraġona ġesi beġe tanuni, benamo ġia tauri ruarua beġe sebonani.’ <sup>6</sup> Moġa lorinai ġia tu dia ruarua, senaġi sebona moġo. Moġesi nai Barau na etore-sebonarito tarimari tu, tarima ta na asi ma bene tore-kirari.”

<sup>7</sup> Farisea tarimari na ġekiraiato, ġekirato, “Karase nai Mose na taravatu eveiato nai, ekirani, tau na veġaraġo ruġaruġana fefana betoreani vau, ġaraġona betuġu-rakaiati?”

<sup>8</sup> Iesu evaġa-veseto, ekirato, “Mose na maoro evinimito, ġaraġomi boġono tuġu-rakari ġana, korana ġomi vaġa-ribami tu gwaġiġi rakava nai. Senaġina Barau na dagara mabarari eveirito nai, maiġesina tu asiġina. <sup>9</sup> Akiramini: Deikara na ġaraġona, enabe asi eveġura-vanaġini, senaġi efitoġaiati moġo, vavine ta ma beġaraġoani, ġia tu beveġura-vanaġini.”



<sup>10</sup> Iesu ġena mero na ġekiraiato, ġekirato, “Veġaraġo dabarana mo-ġesina nai, tarimarima asi beġene veġaraġo tu namo banaġu.” <sup>11</sup> Iesu evaġa-veseto, ekirato, “Mai vevaġa-riba maiġa tarimarima mabarari na asi beġe tuġamaġi-fakaiani, senaġi Barau na deikara tuġamaġi-faka evinirito tarimari moġo. <sup>12</sup> Tarimarima kotari asi ġeveġaraġoni, korana moġesi veġatana ġemaġurito sinari ġerina, be asi ilaila beġe veġaraġoni; ma kotari tu eunuko tauri kavari, (tarimarima na seuri ġefararini); ema kotari tu Guba Basileia o Barau vetuġunaġina beġene iaġo-vinia uranai asi ġeveġaraġoni.”

### Iesu na mero misiri evaġa-namorito

*Mareko 10:13-16; Luka 18:15-17*

<sup>13</sup> Tarima kotari na naturi Iesu ġenai ġeġwa-iaġorito, ġimana ġia iatari ai bene tore-kauri, ema bene ġauġau ġana. Senaġina ġena mero na ġekira-ġoirito. <sup>14</sup> Iesu na ekirarito, ekirato, “Mani mero misiri ġeiaġoma au ġegu ai, asi ġokira-ġoiri, korana Guba Basileia tu maniġesina kavana tarimari ġeri.” <sup>15</sup> Benamo Iesu ġimana iatari ai etore-kaurito, evaġa-namorito vau eiaġuirito.

### Tarima variġuna ma ġena farefare vovoka

*Mareko 10:17-31; Luka 18:18-30*

<sup>16</sup> Ġaro tai tau ta Iesu ġenai eiaġoto, ekirato, “Vevaġa-riba tauna, kara dagara namona baveiani vau, maġuri vanaġivanaġi baġabiani?” <sup>17</sup> Iesu na evaġa-veseato, ekirato, “Karase nai au odanaġiguni, aiġa tu dagara namona? Sebona moġo namo, Barau. Bema ourani maġuri vanaġi-vanaġi bono ġabia nai, Barau ġena taravatu bono korana-iaġiri.” <sup>18</sup> Ġia na Iesu edanaġiato, ekirato, “Kamara taravatu okiraġirini?” Iesu ekirato, “Asi bono vaġivaġi, asi bono veġura-vanaġi, asi bono lema, asi bono vevaġa-bade ġofaġofa, <sup>19</sup> tamamu e sinamu bono gubakauri, e sevimu tarimana maki bono ura-vinia, ġoi tauġemu oveura-vinini kavana.” <sup>20</sup> Mai maraġa variġuna ekirato, “Au na mani taravatu mabarari akorana-iaġirini. Kamara dagara tu au na ma bana veia?”

<sup>21</sup> Iesu na ġia evaġa-veseato, ekirato, “Bema ġoi ourani bono iobukaiobuka nai, ġiniguine tu noiaġo, ġemu farefare mabarari bono voivoi-iaġiri, be moniri tu asi ġeri-ġari tarimari bono viniri, benamo gubai tu ma ġemu farefare. Gabivau murigu ai bonoma raka.” <sup>22</sup> Maraġa variġuna na maiġa eseġaġiato nai, nuġana ma metona ġesi eiaġuiato, korana ġia tu ma ġena farefare ġutuma tarimana.

<sup>23</sup> Iesu na ġena mero ekirarito, ekirato, “Au na akira-korikorimini: Farefare vovoka tarimari ġeri rakatoġa Guba Basileia nuġanai tu gwaġiġi rakava. <sup>24</sup> Ma akiramini: Kamela tu nila kadarena na bevanaġini kotuna gwaġiġi, senaġi ġena farefare vovoka tarimana Barau ġena Basileiai ġena rakatoġa tu gwaġiġi rakava.” <sup>25</sup> Ġena mero mai guruġa ġeseġaġiato nai, ġeġaba-rakavato moġo. Benamo ġevedanaġito, ġekirato, “Be deikara na maġuri vanaġivanaġi bedoġariani?” <sup>26</sup> A Iesu na eġita-karakararito, benamo evaġa-veserito, ekirato, “Tarimarima ġeri ai tu asi ilaila, senaġi Barau ġenai dagara mabarari tu ilaila.”

<sup>27</sup> Benamo Petero eguruġa-fouto, ekirato, “Ġoi ribamu, ġai ġema dagara mabarari tu ġaraga-kwanerito, benamo ġoi murimu ai ġarakani! Be ġai kara baġa ġabini?”

<sup>28</sup> Iesu na ekirarito, ekirato, “Moġoni akiramini, tanobara variġuna befororini nai, Tarimarima Natuna ġena terona o vere seana kimorekimoreni betanu-kauni, ma

gomi gabanana ruarua (12) au murigu ai gōrakani tarimami maki vere seari gabanana ruarua (12) ai boḡo tanukauni, Isaraela gēna doḡoro gabanana ruarua (12) boḡo gīta-gaurini, ema boḡo ḡori-kaurini. <sup>29</sup>Tarima ta na gēna numa, kakana, tarina, tobana, tamana ma sinana e natuna, ema gēna tano, au uragu ai beiaḡuirini nai, gīa tu sinau-sinau ai dagara bedoḡarini, ema maḡuri vanaḡivanaḡi maki beḡabiani. <sup>30</sup>Senaḡina tarimarima ḡutuma toma ḡeguineni tu beḡe gabini, ema ḡutuma maki inītoma ḡegabini tu beḡe guineni.”

### Barabore - Ḡauvei tarimari vine tavoḡanaī

**20** “Guba Basileia tu maiḡesi kavana: Vine tavoḡana tarimana ta boḡi-boḡi iamoiamo ai numa na eraka-rosito, gēna vine tavoḡanaī beḡene ḡauvei tarimari evetaurito. <sup>2</sup>Benamo ḡauvei tarimari ḡesi ḡeguruḡa-vegogoto ma ḡevaḡa-moḡoniato, mo ḡauvei tarimari ḡaro sebona ta beḡe ḡauveini voiri silva monina sebona bevinirini ḡetato. Benamo gēna vine tavoḡana nuḡanaī etuḡu-iaḡorito. <sup>3</sup>Boḡi-boḡi 9 koloko kavana gīa ma eraka-rosito, maketi gabuna gāna eiaḡoto, monai tarima kotari ḡeruḡa-reko rekoto-ḡoi eḡita-rito. <sup>4</sup>Benamo ekirarito, ekirato, ‘Ḡomi maki ḡegu vine tavoḡana gāna ḡoiaḡo, ḡoa ḡauvei, be voimi maorona bana vinimi.’ <sup>5</sup>Gīa maki ḡeiaḡoto. Ḡaroḡota 12 koloko ma 3 koloko kavana gīa numa na ma eraka-rosito, kotari ma edoḡaririto, etuḡurito. <sup>6</sup>Lavilavi rekenai 5 koloko kavana ma erakarosi-ḡenoḡoito, kotari roḡo mo ḡeruḡa-taḡoto-ḡoi nai edoḡaririto. Benamo edanaḡirito, ekirato, ‘Karase nai mainai ḡoruḡa-kava ruḡa-kavani mo, ḡaro mo evar-iḡoni?’ <sup>7</sup>Gīa na ḡevaḡa-veseato, ḡekirato, ‘Korana tarima ta na ḡauvei asi evinimani nai.’ Benamo ekirarito, ‘Ḡomi maki ḡegu vine tavoḡana gāna ḡoiaḡo, ḡoa ḡauvei.’

<sup>8</sup>Ḡaro eboraiato-ḡoi nai, tavoḡa biaguna na ḡauvei tarimari eḡita-ḡaurito-ḡoi tauna ekiraiato, ekirato, ‘Ḡauvei tarimari nokeari, be voiri noviniri, vau beḡe ḡauvei tarimari bono vini-guine, bene iaḡo mo, bakea-guineri tarimari bono vini-raḡasi. <sup>9</sup>Benamo mo lavilavi 5 koloko etuḡurito tarimari ḡeiaḡoma-guineto, benamo silva moniri sebori-sebori ḡeḡabito. <sup>10</sup>Ḡeiaḡo-guineto tarimari ḡeiaḡomato nai, gīa mataboru ḡekirato tu, voiri kotari ma betore-kaurini, senaḡi gīa maki silva moniri sebori-sebori moḡo ḡeḡabito. <sup>11</sup>Ḡeri moni ḡeḡabito nai, ḡemugu-muguto tavoḡa biaguna gēnai, <sup>12</sup>ḡekirato, ‘Mai tarimarima gabivau ḡeiaḡomato maiḡeri tu, hora sebonaī moḡo beḡe ḡauvei ma voiri, a ḡai tu ḡaro vinubana ḡavekwarāḡini, ma ḡaro gēna seḡuka na etunu-rakavamani, nuḡanaī voima gīa ḡeri ḡesi bovini-sebonama.’

<sup>13</sup>Tavoḡa biaguna na gīa ta ekiraiato, ekirato, ‘Ḡatagu, noseḡaḡi, au na ḡoi asi baḡofamu. Taguruḡa-vegogoto nai, ḡaro sebona voina tu silva monina sebona tatato, nene? <sup>14</sup>Mai moḡo voimu noḡabia, be noraka! Au aurani mai gabi tarimana bana vīnia, ḡoi bavīnīmu ilailanaī. <sup>15</sup>Be, au ma ḡegu maoro, mai ḡegu moni tu ḡegu ura ilailani bana vini. Ba ḡoi obaruni, korana au tu nuḡagu ma iakuna ḡesi avinini nai?’

<sup>16</sup>Iesu gēna guruḡa evaḡa-magoato nai ekirato, “Guine tarimari tu beḡe gabini, ma gabi tarimari tu beḡe guineni.”

### Iesu gēna mase ma ekiraḡi-foforiato

*Mareko 10:32-34; Luka 18:31-33*

<sup>17</sup>Iesu Ierusalemā dabarana na evaraḡeto-ḡoi nai, gīa na gēna mero gabanana ruarua (12) eḡabi-ḡere-vaḡirito, veḡuni ai evaḡa-guruḡarito, ekirato, <sup>18</sup>“Ḡoseḡaḡi, gīa tu Ierusalemā gāna tavaḡaḡeni. Monai Tarimarima Natuna tu Rubu Veaḡa vereri

baregori ema taravatu vaġa-riba-iaġina tarimari ġimari ai beġe toreani. Ġia na ġena mase guruġana beġe vaġa-moġoniani, <sup>19</sup>benamo irau bese (o Roma) tarimari beġe vinirini, ġia na beġe vaseva-vaseva iaġiani, beġe kwariani e beġe vaġa-satauroani; senaġi ġaro vaġa-toitoinai vau ma bevaisiraġe-ġenoġoini.”

### Sina ta ġena noġinoġi

*Mareko 10:35-45*

<sup>20</sup> Benamo Sebedαιο ġaraġona ma natuna ruarua Iakobo (o Iames) ema Ioane ġesi Iesu ġenai ġeiaġoto, ġoiranai ea vetui-tarito, dagara ta nenogġa ġana. <sup>21</sup> Benamo Iesu na vavine edanaġiato, ekirato, “Ġoi kara ourani?” Ġia evaġa-veseto, ekirato, “Nokira-varagu, au natugu tauri ruarua iniġeri, ġoi ġesi beġeneasi tanu, ta aroribamu ai, ma ta kaurimu ai ġemu Basileia nuġanai.” <sup>22</sup> A Iesu na evaġa-veserito, ekirato, “Ġomi tu asi ribami kara ġonoġiani. Au na midigu bedina banġuani ġomi maki boġo niuni riba?” Ġia ġevaġa-veseto, ġekirato, “Oi, baġa niuani.” <sup>23</sup> Iesu na ma ekirarito, ekirato, “Moġoni, au ġegu bedi na ġomi maki boġo niuni, senaġi au aroribagu rekenai o kaurigu ai boġono tanu ġotoni tu, dia au na bavaġa-moġoniani; a mai tu au Tamagu na eġabi-torerito tarimari ġeri.”

<sup>24</sup> Mero gabanana (10) na maiġa ġeseġaġiato nai, tarikaka ruarua Iakobo (o Iames) ema Ioane ġebaru-vinirito. <sup>25</sup> Benamo Iesu na mabarari ekea-vegogorito, benamo evaġa-guruġarito, ekirato, “Ġomi ribami, irau bese tarimari ġeri vere na tarimarima ġedori-naġinaġirini, ema ġeri veguine-iaġi tarimari baregori na tu ġeri maoro seġukari na ġelaunaġi-naġirini. <sup>26</sup> Senaġi ġomi fakami ai moġesina tu asi boġono vei. Bema ta ġomi fakami ai bene barego etoni nai, ġia tu ġomi mabarami vetuġunaġimi bene iaġovini, <sup>27</sup> ema dei bene guine etoni tarimana, ġia tu ġemi vetuġunaġi tarimanai bene iaġo. <sup>28</sup> Tarimarima Natuna kavana, ġia eiaġomato tu, dia tarimarima na ġia vetuġunaġina beġene iaġovini ġana, senaġina ġia eiaġomato tu, tarimarima vetuġunaġiri bene iaġovini, ema ġena maġuri bene tore-taria, tarimarima ġutuma bene voi-ġenoġoiri e bene vaġa-maġuriri ġana.”

### Iesu na mata-bubu tarimari ruarua evaġa-namorito

*Mareko 10:46-52; Luka 18:35-43*

<sup>29</sup> Iesu ma ġena mero ġesi Ieriko ġeraga-kwaneato, tarimarima ġutuma-bara ġia murina na ġeiaġoto. <sup>30</sup> Mata-bubu tarimari ruarua dabara rikinaġi ġetanu-taġoto-ġoi, ġeseġaġito Iesu eraka-vanaġito, benamo ġekea-fouto, ġekirato, “Vereġauka o, Davida natuna, ġai novetuġama!” <sup>31</sup> Tarimarima na ġekira-ġoirito, asi beġene guruġa ġetato, senaġi ġia ġekea-ġiġiraġe ġiġiraġeto-ġoi, “Vereġauka, Davida Natuna o, ġai novetuġama!” <sup>32</sup> Iesu eruġa-tarito, benamo ekea-iaġomarito, ekirato, “Kara ġemi naveia ġotoni?” <sup>33</sup> Ġia na ġekiraiato, ġekirato, “Vereġauka, ġai ġaurani tu, matama noma keo-fakari!” <sup>34</sup> Benamo Iesu na evetuġa-ġwarito, matari eġabikararito, ma asikauna matari ġenamato e ġeboġeboġe-ġinikauto, benamo Iesu murina na ġeiaġoto.

### Iesu ġena rakatoġa Ierusalemaj ġevonevone-raġe viniato

*Ioane 12:12-19*

**21** Iesu ma ġena mero ġesi ġeraka-iaġoto-ġoi, Ieruselema ġekavinaġiato-ġoi, ma Betefage ai ġeraġasito Olive Ġorona rekenai, benamo Iesu na ġena mero

ruarua etuḡu-guinerito, <sup>2</sup>ekirarito, ekirato, “Ḡoiaḡo, ḡoira vanuḡana ḡana. Monai doniki ta barutari ma natuna ḡesi boḡo doḡaririni, boḡono ruḡari, benamo au ḡegu ai boḡono ḡori-iaḡomari. <sup>3</sup>Bema tarima ta na bedanaḡimini nai, boḡono kiraia, ‘Vereḡauka na eura-vinirini, vau ma betuḡu-iaḡomarini, asi bekwaiboni.’” <sup>4</sup>Maiḡa eḡorato ḡenana, peroveta tauna ḡena guruḡatore guruḡana evaḡa-moḡoniani, ekirani, <sup>5</sup>“Siona natuna, (Ierusalemata tarimari), nokirari, ‘Noḡitaia, ḡemu Vere mani eiaḡomani, manau tarimana, doniki tuḡunai eraḡeni, mai tu doniki natuna doḡenai betanukau.’”

<sup>6</sup>Mai mero ruarua ḡeiaḡoto, Iesu na ekirarito veiḡana ilailanai ḡeveiato. <sup>7</sup>Ḡia na doniki ma natuna ḡesi Iesu ḡenai ḡeḡori-iaḡorito, ḡeri dabuḡa barari doniki doḡeri ai ḡeiaiva-kaurito, benamo Iesu etanu-kauto. <sup>8</sup>Tarimarima ḡutuma-bara ḡeri dabuḡa barari dabarai ḡeiavarito, kotari tu ḡau legari ma lauri ḡesi ḡebasito, benamo dabarai ḡeivato. <sup>9</sup>Tarimarima ḡutuma-bara ḡia ḡoiranai ḡerakato e murinai ḡerakato, maiḡesina ḡevone-raḡeto-ḡoi, ḡekirato, “Hosana, Davida natuna ḡena! Vereḡauka aranai eiaḡomani tarimana sivaḡa-namo! Hosana guba tuḡuna vanigerenai!”

<sup>10</sup>Iesu Ierusalemata eraka-toḡato nai, vanuḡa tarimarimari mabarari ḡeveraga veragato-ḡoi ema ḡevedanaḡi-vedanaḡito-ḡoi, ḡekirato, “Mai tu deikara?” <sup>11</sup>Iesu ḡesi ḡeraka-sebonato tarimari ḡevaḡa-veseto, ḡekirato, “Mai tu Iesu, peroveta tauna, Galilea vanuḡana Nasareta na eiaḡomani.”

### Iesu na Rubu Veḡa eiarevaiato

*Mareko 11:15-19; Luka 19:45-48; Ioane 2:13-22*

<sup>12</sup>Iesu Rubu Veḡa nuḡanai eraka-toḡato, benamo voivoi tarimari mabarari elairosirito. Moni ḡesenisito-ḡoi tarimari ḡeri fata e pune ḡevoivoi iaḡirito-ḡoi tarimari ḡeri diḡoka eḡuke-vebuburito, <sup>13</sup>ema ekirarito, ekirato, “Buka Veḡa nuḡanai tu maiḡesi etoreato, Barau ekirato, ‘Au ḡegu numa tu bese irauirau ḡeri ḡuriguḡu numanai beḡe kiraḡiani,’ senaḡi ḡomi na tu lema tarimari ḡeri gumu gabunai boḡo vaḡa-iaḡoa.”

<sup>14</sup>Mata-bubu e kwaku rakava tarimari Iesu ḡenai ḡeiaḡomato Rubu Veḡa nuḡanai, benamo ḡia na evaḡa-namorito. <sup>15</sup>Rubu Veḡa vereri baregori e taravatu ḡevevaḡa-riba iaḡiato-ḡoi tarimari na ḡena nuḡa-farevaḡi veiḡari ḡeḡitarito, ema mero misiri garori ḡeseḡaḡirito, Rubu Veḡa nuḡanai ḡevone-raḡeto-ḡoi, ḡekirato, “Hosana, Davida natuna ḡena,” benamo ḡia tu ḡebaru-rakavato, <sup>16</sup>benamo Iesu ḡedanaḡiato, ḡekirato, “Ḡia na ini kara ḡekiraḡirini ne oseḡaḡirini ba?” Iesu na evaḡa-veserito, ekirato, “Oi aseḡaḡini, senaḡi ḡomi na Buka Veḡa nuḡanai asi ḡoiviani, ‘Mero misiri ema sinari ratari roḡo ḡeniurini merori na maki ḡoi ḡevaḡa-raḡemuni!’” <sup>17</sup>Benamo Iesu na eraga-kwanerito, vanuḡa barana na eraka-rosito, Betania ḡana eiaḡoto, monai ea genato.

### Iesu na figi ġauna etovoġaiato

*Mareko 11:12-14; 11:20-24*

<sup>18</sup> Boġiboġi, Iesu vanuġa barana ġana ma eġenoġoito, eraka-iaġoto-ġoi nuġanai, ġia evitoato. <sup>19</sup> Ġia na figi ġauna ta dabara rikinai eġitaiato, benamo eiaġo-viniato, senaġi asi ġwaġwana, a launa korina moġo. Benamo Iesu na figi ġauna ekiraiato, ekirato, “Ġoi ġemuna ġwaġwamu asi ma befofori-ġenoġoini!” Asikauna moġo figi ġauna emarai-ġosito.

<sup>20</sup> Ġena mero na figi ġauna emarai-ġosito ġeġitaiato nai, ġeġaba-rakavato, ġekirato, “Figi ġauna tu kamasi se beraga-mase moġo?” <sup>21</sup> Iesu evaġa-veseto, ekirato, “Moġoni akiramini, bema ġomi boġo veġabidadamani, ma asi boġo daradarani nai, ġomi na maki mai figi ġauna ġenai baveia kavana boġo veiani riba; a dia moġa moġo, senaġi mai ġoro boġo kiraiani, ‘Noveġabivaisi, be davarai noa vefiu-rei,’ benamo mo veġa tu beġorani. <sup>22</sup> Dagara mabarari ġauġau ai boġo kiraġirini ma veġabidadamami ġesi nai tu, boġo doġaririni.”

### Iesu ġena seġuka korana ġevedanaġi-iaġiato

*Mareko 11:27-33; Luka 20:1-8*

<sup>23</sup> Iesu Rubu Veaġa nuġanai eraka-toġato, evevaġa-ribato-ġoi nai, Rubu Veaġa vereri baregori ema Iuda vereri ġia ġenai ġeiaġomato, benamo ġedanaġiato, ġekirato, “Kamara seġukai ġoi na mai veġa oveirini? Dei na maoro evinimuto?”

<sup>24</sup> Iesu na evaġa-veserito, ekirato, “Au na maki vedanaġi sebona avinimini; bema boġo vaġa-veseani nai, au na kamara maoro ai mai veġa aveirini bakira-varamini. <sup>25</sup> Ioane ġena babatiseo veġana tu ainana eiaġomato? Guba na eiaġomato, ba tarimarima ġerina?” Ġia fakari ai ġeverorito, ġekirato, “Bema ġita bita kirani, ‘Barau ġenana’ bita toni nai, ġia bekirani ‘Karase nai Ioane asi ġovaġa-moġoniato?’ betoni. <sup>26</sup> Senaġi bema ġita bita kirani, ‘Tarimarima ġerina’ bita toni nai, tarimarima gariri bitana vei, korana ġia ribari, Ioane tu proveta tarimana korikori.” <sup>27</sup> Moġa lorinai ġia na Iesu ġevaġa-veseato, ġekirato, “Ġai asi ribama.” Benamo Iesu na ġia ekirarito, “Au na maki kamara maoro ai mai veġa aveirini tu, asi bakira-varamini.”

### Barabore - Mero ruarua

<sup>28</sup> “Mai barabore tu kamasi ġotuġa-maġiani? Tarima ta ma natuna ruarua. Tau-guinena ġenai eiaġoto, ekiraiato, ekirato, ‘Natugu, toma noiaġo, vine tavoġanai noa ġauvei!’ <sup>29</sup> Natuna na evaġa-veseato, ekirato, ‘Asi aurani,’ senaġina gabivau evetuġa-maġi-kureto, benamo eiaġoto. <sup>30</sup> Ġia ma eiaġoto natuna vaġa-ruaruana ġenai, tau-guinena evaġa-guruġaiato ilailanai ekiraiato. Mero evaġa-veseto, ekirato, ‘Aiaġoni,’ senaġi asi eiaġoto. <sup>31</sup> Ġia tauri ruarua vekaravari ai dei na tu tamari ġena ura eveiato?” Ġia ġevaġa-veseto, ġekirato, “Tau-guinena.” Iesu na ekirarito, “Moġoni veġata akiramini, takesi gogo tarimari e mata-boraġa vavineri na ġeguine-iaġimini Barau ġena Basileia rakatoġanai. <sup>32</sup> Ioane Babatiseo ġomi ġemi ai eiaġomato tu, vei-iobukaiobuka dabarana ġemi ai evaġa-foforiato, senaġi asi ġoseġaġi-viniato. A takesi gogo tarimari e mata-boraġa vavineri na ġevaġa-moġoniato. Ġomi na maki ġoġitar-ito, senaġi asi ġovetuġamaġi-kureto, asi ġovaġa-moġoniato.”

## Barabore - Tavoğa narinarina tarimari rakavari

*Mareko 12:1-12; Luka 20:9-19*

<sup>33</sup> Iesu ekirato, “Barabore ta ma gōseğāgia: Tano biaguna ta na vine tavoğana evaroato, mağuna eğabiato, tano ai vine gigi-gigina gurina ekwaiato, tavoğa narinarina numana maki evağa-ruğaiato. Moğa murinai tavoğa ġitağaua tarimari ġeri ai ġena tavoğa eraga-kwaneato, benamo erakato gabu ta ġana. <sup>34</sup> Vine ġwari (o grapes) ġemağeto, benamo ġia na ġena vetuğunaği tauri etuğurito tavoğa narinarina tarimari ġeri ai, ġena vine ġwağwari kota beğenea ġabi ġana. <sup>35</sup> Senaği tavoğa ġitağaua tarimari na vetuğunaği tauri ġeğabi-taririto, benamo ta ġekwariato, ma ta ġevağiato, ema ta fore na ġetakiato. <sup>36</sup> Tavoğa biaguna na ġena vetuğunaği tauri vovoka kotari ma etuğurito, senaği moğesina ma ġevei-vinirito. <sup>37</sup> Dokonai ġia na natuna korikori ġeri ai etuğu-iağoato, ekirato, ‘Natugu na-tuğua, ġia na beğene gubakaua.’ <sup>38</sup> Senaği tavoğa ġitağaua tarimari natuna ġeğitaiato nai, tauğeri ġeveguruğa-vevinito, ġekirato, ‘Mani tu tavoğa beğauaiani merona, be siğabia, sivaği-masea, be ġena tavoğa bitana ġaunaia!’ <sup>39</sup> Benamo ġeğabi-tariato, vine tavoğana murikanai ġeinu-iağoato, ġevaği-maseato.”

<sup>40</sup> Iesu evedanağito, ekirato, “Tavoğa biaguna beiağomani nai, mo tavoğa ġitağaua tarimari kamasi beveirini?”

<sup>41</sup> Ģia ġevağa-veseto, ġekirato, “Mo veiğa rakava tarimari ġia na bevağirini veğata, ma vine tavoğana tu narinarina tarima boruri tari ma bevinirini, benamo ġeri ġwağwa negari ai, ġwağwari ġia ġenai beğene ġwa-iağori.”

<sup>42</sup> Iesu na ma ekirarito, ekirato, “Ģomi na mai toretore Buka Veağai asi ġoiaviani, iniğesi ekirani,

‘Fore numari ġeragarini  
tarimari na asi ġeura-viniato  
ma ġefitoğaiato forena tu  
duğu forenai eiağoto.  
Mai veiğa maiğa tu  
Vereğauka na eveiato,  
matara na tağitaiani,  
ġitağitana irau veğata.’

<sup>43</sup> Moğesi naima akiramini, Barau ġena Basileia tu ġemina beğabi-vağiani, ema ġwağwa evağa-ğorani besena beviniani. [<sup>44</sup> Deikara mo fore iatanai beketokauni tarimana tu, beğwa-kirakiraiani; ema mai fore tarima ta iatanai beketokauni nai, bevare-fatafataiani.]”

<sup>45</sup> Rubu Veağa vereri baregori e Farisea tarimari na Iesu ġena barabore ġeseğāğirito nai, ġeribato, Iesu na tu ġia ekirağirini, <sup>46</sup> naima ġia ġeri ura tu beğene ġabitaria. Senaği tarimarima ġutuma ġevegogo tağoto-ğoi gariri ġeveito, korana ġia na ġetuğamağiato-ğoi, Iesu tu proveta tauna ta.

## Barabore - Veğarağo verekona

**22** Iesu na Iuda vereri ġeri barabore ta ma ekirağiato: <sup>2</sup> “Guba Basileia tu noğa moğō vere ta, natuna ġena veğarağo verekona evei-toreato kavana. <sup>3</sup> Benamo ġena vetuğunaği tarimari etuğurito, ekea-kaurito tarimari keakeari, senaği asi ġeurato nai, asi ġeiağomato. <sup>4</sup> Moğa lorinai ġia na vetuğunaği tarimari tari ma etuğurito,

ekirarito, ‘Akea-kaurito tarimari ġoa kirari, “Au ġegu vereko tu badabara-ġosia, ġegu boromakau tauri ema boromakau naturi mona mase tu bavaġiri, dagara mabarari bavei-toreri, be ġoiaġoma vereko ġana.”’<sup>5</sup> Senaġi ġia tu ġeġoiaġito, ġeri ura ġauveiri moġo ġeveito. Ta vamoka ġana eiaġoto, ma ta tu ġena sitoa ġana eiaġoto.<sup>6</sup> O tari tu vetuġunaġi tarimari ġeġabi-taririto, ġekwaririto, ema ġevaġi-maserito.

<sup>7</sup> Vere tu ebaru-rakavato, ġena vetari doġorori etuġurito, mo vaġivaġi tarimari ġevaġi-maserito, ma ġeri vanuġa barana ġegabu-kauato.<sup>8</sup> Benamo ġia na ġena vetuġunaġi tarimari evaġa-guruġarito, ekirato, ‘Au ġegu veġaraġo verekona tu bavei-torea, senaġi au na akea-kaurito tarimari tu asi ilaila beġe iaġomani.<sup>9</sup> Moġa lorinai mai moġo ġoiaġo, ġatama baregori rakaġutu dabarari ai boġo doġaririni tarimari mabarari boġono kirari, beġene iaġoma vereko ġana.’<sup>10</sup> Benamo vetuġunaġi tarimari ġeiaġoto, ġatamai ema dabarai ġedoġaririto tarimari mabarari, namori, rakavari, ġegogo-iaġorito, veġaraġo numana maki ġevaġa-vonuato.

<sup>11</sup> Benamo vere eraka-toġato, ġeiaġomato tarimari ġitaġitari nuġanai, ġia na tarima ta monai eġitaiato, asi ġena veġaraġo dabuġana.<sup>12</sup> Benamo edanaġiato, ekirato, ‘Ġata, ġoi tu ainana boraka-toġa, asi ġemu veġaraġo dabuġana?’ Senaġi mo tarima asi eguruġato.<sup>13</sup> Benamo vere na ġena vetuġunaġi tarimari evaġa-guruġarito, ekirato, ‘Ġimana ema kwakuna ġobarubaruri, benamo ġofiu-rosia murika mukunanai. Monai bene taġi, gadikana maki bene vaġa-ġaratariri.’<sup>14</sup> Korana tarima ġutuma Barau na ekearito, senaġi viravira moġo eġabi-torerito maġuri beġe ġabiani.”

### **Kaisara, Roma ġeri vere, ġena takesi moniri**

*Mareko 12:13-17; Luka 20:20-26*

<sup>15</sup> Farisea tarimari ġeraka-veġitato, ġeboioġa-vegogoto, Iesu beġene vaġa-vedaġa-raġea vedanaġiri ġea veito.<sup>16</sup> Benamo ġia na ġeri mero tari ema Heroda murinai ġerakato-ġoi tarimari tari ġetuġu-iaġorito, ġekirato, “Vevaġa-riba tarimamu, ġai ribama ġoi tu moġoni vei-iobukaiobuka tarimamu. Ġoi na moġoni ai Barau ġena dabara ovevaġa-riba iaġi-ġitakauani. Tarimarima gariri asi oveini, tarima ġeri dagi maki asi otuġamaġirini.<sup>17</sup> Moġa lorinai nokira-varama, kamasi otuġa-maġini: Kaisara, Roma ġeri vere, ġenai takesi baġana vini ba asiġi?”

<sup>18</sup> Senaġi Iesu ma ribana ġeri boioġa rakavari nai, ekirarito, “Ġomi ġofaġofa tarimami! Karase nai au ġoribaġaniguni?<sup>19</sup> Takesi monina ta ġovinigu, nama ġitaia!” Benamo silva monina ta ġeviniato.<sup>20</sup> Benamo ġia na edanaġirito, ekirato, “Mai tu dei laulauna ema dei arana?”<sup>21</sup> Ġia ġevaġa-veseto, “Kaisara ġena.” Iesu na evaġa-guruġarito, ekirato, “Be, Kaisara ġena dagara Kaisara boġono vinia, Barau ġena dagara Barau boġono vinia.”<sup>22</sup> Mo guruġa ġeseġaġiato nai, ġeġaba-rakavato, benamo ġeraga-kwaneato, ġerakato.

### **Variġisi-ġenoġoi guruġari**

*Mareko 12:18-27; Luka 20:27-40*

<sup>23</sup> Mo ġaro sebonai Sadukea tarimari kota Iesu ġenai ġeiaġoto. Ġia ġeri tuġamaġi tu mase tarimari asi ma beġe variġisi-ġenoġoini. Benamo Iesu ġedanaġiato, ġekirato,<sup>24</sup> “Vevaġa-riba tarimamu, Mose maiġesi ekirato, ‘Bema tau ta asi natuna bemaseni nai, ivana vabuna kakana o tarina ta na bene ġaraġoa, naturi beġene maġuri mase tauna ġena.’<sup>25</sup> Mero mabarari tu imaima ruarua (7) mainai ġetanuto-ġoi. Mero guinena na eġaraġoato, ma emaseto asi natuna, benamo tarina na ma eġaraġoato.

<sup>26</sup> Mo veigā sebona tarina vaġa-ruaruana ġenai eġorato, mero vaġa-toitoina maki moġesina moġo mo vaġa-imaima ruaruana (7). <sup>27</sup> Dokonai mo vavine maki emaseto. <sup>28</sup> Variġisi-ġenoġoi ġaronai mo vavine tu dei ġaraġona? Korana ġia tu tauri 7 na ġeġaraġoato.”

<sup>29</sup> Iesu na evaġa-veserito, ekirato, “Ġomi tu ġokererēni, korana Buka Veaġa anina ema Barau ġena seġuka asi ribami. <sup>30</sup> Mase na ma beġe variġisi-ġenoġoini tarimari tu asi ma beġe veġaraġoni. Ġia tu aneru kavana gubai. <sup>31</sup> A mase na ma beġe variġisi-ġenoġoini guruġari Barau ġena bukai asi ġoiaviani? Ġia ekirato, <sup>32</sup> ‘Au tu Aberahamo ġena Barau, Isako ġena Barau, ema Iakobo ġena Barau.’ Ġia tu maġuri tarimari ġeri Barau, dia mase tarimari ġeri Barau!” <sup>33</sup> Tarimarima ġutuma na mo guruġa ġeseġaġiato nai, nuġari ġefarevaġito ġena vevaġa-riba guruġari na.

### **Veuravini tu taravatu mabarari evanaġirito**

*Mareko 12:28-31; Luka 10:25-28*

<sup>34</sup> Farisea tarimari ġeseġaġito, Iesu na Sadukea tarimari ġeri guruġa ekou-ġaurito, benamo ġeraka-vegogoto. <sup>35</sup> Ġia fakari ai ta tu taravatu vaġa-riba-iaġina tarimana. Ġia na Iesu edanaġi-veribaġaniato, ekirato, <sup>36</sup> “Vevaġa-riba tarimamu, taravatu nuġanai kamara taravatu tu barego vedaurea?” <sup>37</sup> Iesu na evaġa-veseato, ekirato, “Vereġauka ġoi ġemu Barau bono ura-vinia ma nuġamu mabarana, ma iaukamu mabarana, ma ġemu tuġamaġi mabarana ġesi.’ <sup>38</sup> Maiġa tu taravatu giniguinena ema barego vedaureana. <sup>39</sup> Taravatu barego vedaureari vaġa-ruaruana ġia ilailana tu maiġa: ‘Sevimu tarimana bono ura-vinia, ġoi tauġemu oveura-vinini kavana!’ <sup>40</sup> Maiġeri taravatu ruarua na taravatu mabarari ema peroveta tarimari ġeri guruġa mabarari eġabi-vegogorini.”

### **Keriso tu Davida natuna ba Barau Natuna?**

*Mareko 12:35-37; Luka 20:41-44*

<sup>41</sup> Farisea tarimari ġevegogoto-ġoi nai, Iesu na edanaġirito, ekirato, <sup>42</sup> “Ġomi na Keriso tu aiġesi ġotuġa-maġiani? Ġia tu deikara natuna ġotoni?” Ġia ġevaġa-veseto, ġekirato, “Ġia tu Davida natuna.”

<sup>43</sup> Iesu na ma edanaġirito, ekirato, “Davida tu kamasi nai Keriso tu ‘Vereġauka’ etoni? Korana Davida Iauka Veaġa na tuġamaġi-faka e riba eviniato, benamo ekirato,

<sup>44</sup> ‘Barau na au ġegu Vereġauka ekiraiato:

Au ġimagu aroribana rekenai

noma tanu,

bene iaġo mo, ġoi ġebaru-vinimuni tarimari ġoi kwakumu gaburenai batorerini.’

<sup>45</sup> Bema Davida na Keriso tu ‘Vereġaukana’ ekiraġito, kamasi nai Keriso tu Davida natuna?” <sup>46</sup> Ġia mabarari ta na maki asi evaġa-veseato, ema mo nega na eiaġoto mo, tarima ta na maki asi ma edanaġiato, korana ġegarito nai.

### **Iesu na taravatu vaġa-riba-iaġina tarimari ema Farisea tarimari evanerito**

*Mareko 12:38-39; Luka 11:43; 11:46; 20:45-46*

**23** Iesu na tarimarima ġutuma-bara e ġena mero evaġa-guruġarito, ekirato, <sup>2</sup> “Taravatu vaġa-riba-iaġina tarimari e Farisea tarimari na Mose ġena taravatu ġevevaġa-riba iaġirini. <sup>3</sup> Moġa lorinai ġomi ġevaġa-ribamini guruġari mabarari



boĝono korana-iaĝiri e boĝono veiri. A ĝeri veiĝa asi boĝono tovtovori, korana kara ĝeĝobata-iaĝirini, tarimarima na beĝene veiri veiĝari tu, tauĝeri na asi ĝekorana-iaĝirini. <sup>4</sup> Ĝia na maruna metori tarimarima ĝevaĝa-faĝarini, senaĝina ĝimari didiri na ta maki ĝeri marunai asi ĝeveĝabikauni, asi ĝevaĝa-kavarini, maruna beĝene ĝwari ĝana. <sup>5</sup> Ĝeri veiĝa mabarari ĝeveirini tu, tarimarima na beĝene ĝitari ĝana. Ĝia bakuri e ĝimari ai tu dagara veaĝari ĝebarubarurini, nuĝari ai Buka Veaĝa siriri ĝeĝurarini, moĝeri dagara ĝevaĝa-baregorini, ema ĝeri dabuĝa geveri maki ĝevaĝa-maukarini. <sup>6</sup> Ganivegogo gaburi ai e rubu nuĝari ai ĝeri ura tanutanu namori ai beĝene tanu. <sup>7</sup> Ĝia ĝeurani maketi gaburi ai beĝene rakaorakao, tarimarima na beĝene vaĝa-namori urari ai, ema tarimarima na ‘Veaĝa-riba Tarimari’ beĝene kiraĝiri.

<sup>8</sup> A ĝomi tu ‘Veaĝa-riba Tarimami’ ai asi beĝene kiraĝimi, korana Barau ĝereĝana moĝo ĝemi Veaĝa-riba Tauna, ema ĝomi mabarami tu tarikaka. <sup>9</sup> Ema tanobarai tarima ta ‘Tama’ asi boĝono kiraĝia, korana ĝomi Tamami tu sebona moĝo, ĝia tu gubai etanuni. <sup>10</sup> Ĝomi maki ‘Veĝori-kau Tarimami’ asi beĝene kiraĝimi, korana ĝemi Veĝorikau Tauna tu sebona moĝo, Keriso, (Barau na ekiraĝi-toreato vevaĝa-maĝuri tauna). <sup>11</sup> Deikara barego vedaurea ĝomi fakami ai, ĝia tu ĝomi vetuĝunaĝimi beiaĝo-vinini. <sup>12</sup> Tauĝena eveĝabi-vaisini tarimana tu Barau na bevaĝa-manauani, a tauĝena evevaĝa-manauni tarimana tu beĝabi-vaisiani.”

### **Iesu na Farisea tarimari e taravatu vaĝa-riba-iaĝina tarimari ĝeri ĝofaĝofa ekiraĝirito**

*Mareko 12:40; Luka 11:39-52; 20:47*

<sup>13</sup> “Taravatu vaĝa-riba-iaĝina tarimami e Farisea tarimami, ĝofaĝofa tarimami, vetuĝami kika! Korana Guba Basileia ĝatama bokana tu tarimarima ĝoirari ai ĝokou-ĝauani. Ĝomi tauĝemi asi boĝo raka-toĝani, ema ĝeraka-toĝa ĝetoni tarimari ĝeri dabara maki ĝomi na ĝokourini. [<sup>14</sup> Taravatu ĝovevaĝa-riba iaĝiani tarimami e Farisea tarimami, ĝofaĝofa tarimami, vetuĝami kika! Gomi na vabu ĝeri numa e ĝeri farefare ĝovaĝa-koririni. Ĝemi ĝauĝau tu mauka kenene, ĝoĝofaĝofani. Moĝesi nai ĝomi tu meto barego vedaurea boĝo ĝabiani.]

<sup>15</sup> Taravatu vaĝa-riba-iaĝina tarimami e Farisea tarimami, ĝofa-ĝofa tarimami! Ĝomi gabu mabarari ĝana ĝoiĝoni, davarai e tanobarai, tarima sebona kwar-ĝutu ĝemi doĝoro ai bene raka-toĝa uranai. Ĝoĝabiani, benamo karava eĝara-vanaĝi vanaĝini gabuna natunai ĝovaĝa-iaĝoani, ĝemi kira-sirivaĝi e seĝafore maki bevanaĝi-lelevaĝirini.

<sup>16</sup> Veĝorikau taumi, matami bubuĝau, vetuĝami kika! Ĝemi vevaĝa-ribai ĝokirani, Rubu Veaĝa aranai bekiraĝi-toreni tarimana ĝena kiraĝitore tu asi anina ĝotoni, a Rubu Veaĝa golona (o gold-na) aranai bekiraĝi-toreni tauna tu, ĝena kiraĝitore roĝo bekorana-iaĝiani. <sup>17</sup> Babo e mata-bubu tarimami! Aiĝa tu barego, golo ba golo evaĝa-veaĝaiani Rubu Veaĝana? <sup>18</sup> Ma ĝokirani, fata veaĝana aranai bekiraĝi-toreni tarimana ĝena kiraĝitore tu asi anina, a varevare dagarana fata veaĝana iatanai ĝetoreato dagarana aranai bekiraĝi-toreni tarimana tu ĝena kiraĝitore roĝo bekorana-iaĝiani. <sup>19</sup> Mata-bubu taumi. Aiĝa tu barego, varevare dagarana ba varevare dagarana evaĝa-veaĝaiani fata veaĝana? <sup>20</sup> Moĝa lorinai fata veaĝa aranai ekiraĝi-toreni tarimana na fata veaĝa e fata veaĝa iatanai ĝetorerito dagarari mabarari arari ai ekiraĝi-toreni. <sup>21</sup> Ema Rubu Veaĝa aranai ekiraĝi-toreni tarimana na Rubu Veaĝa

ema nuḡanai etanuni Barauna arari ai ekiraḡi-toreni. <sup>22</sup> Ema guba aranai ekiraḡi-toreni tarimana na Barau ḡena terona e iatanai etanuni Barauna arari ai ekiraḡi-toreni.

<sup>23</sup> Taravatu vaḡa-riba-iaḡina tarimami e Farisea tarimami, ḡofaḡofa tarimami, vetuḡami kika! Korana ḡomi na Barau ḡovarevare-viniani dagarari, ḡemi ḡaniḡani ḡailauri misimisiri maki, karava gabanana (10) ḡoveirini, karava sebona boubou dagaranaḡi ḡovaḡa-iaḡoani, senaḡina taravatu ḡena dagara baregori, vei-iobukaiobuka, vevetuḡaḡwa ema vetuḡamaḡikau tu ḡolearini. Gomi na tu maiḡeri veiḡa baregori ḡoro veiri ema mo veiḡa keiri maki asi boḡoro iaḡuri. <sup>24</sup> Veḡorikau tarimami, matami bubu! ḡami nanu na nagama ḡovei-vaḡiani, senaḡina kamela tu ḡolauboḡerini.

<sup>25</sup> Taravatu vaḡa-riba-iaḡina tarimami e Farisea tarimami, ḡofaḡofa tarimami, vetuḡamai kika! ḡomi ḡemi kapusi e mereki muriri moḡo ḡoḡuriḡirini, senaḡi nuḡari tu lema e mata-ḡaniḡani ḡoveini dagarari na beḡe vonuvonu-raḡe. <sup>26</sup> Farisea tarimami, matami bubu! Kapusi e mereki nuḡari ai ḡotorerini dagarari boḡono iareva-guineri, benamo murina rekena maki bene veiareva.

<sup>27</sup> Taravatu vaḡa-riba-iaḡina tarimami e Farisea tarimami, ḡofaḡofa tarimami, vetuḡami kika! ḡomi tu gara gaburi ḡefeni-kuro-kurorito kavana, murikari ḡitaḡitari tu namo vedaurea, senaḡina nuḡari tu mase tarimari turiḡari ema miro mabarari na ḡevonuto. <sup>28</sup> ḡomi maki moḡesina, tarimarima na ḡeḡitamini veiḡa iobukaiobuka tarimari noḡa, senaḡina nuḡami tu ḡofaḡofa e vei-rakava na ḡevonuvonu-raḡeto.”

### **Iesu na taravatu vaḡa-riba-iaḡina tarimari e Farisea tarimari ḡeri kerere voiri ekiraḡirito**

<sup>29</sup> “Taravatu vaḡa-riba-iaḡina tarimami e Farisea tarimami, ḡofaḡofa tarimami, vetuḡami kika! ḡomi na peroveta tarimari ḡeri gara gaburi ḡovei-ginikaurini, tuḡamaḡi-iaḡina foreri ḡovaḡa-ruḡarini, ema vei-iobukaiobuka tarimari ḡeri gara gaburi ḡovaḡa-vera verarini. <sup>30</sup> ḡokirani, ‘Tubuma ḡatama ḡeri negai ḡara maḡuri nai, peroveta tarimari vaḡivaḡiri ai asi ḡara vaḡa-kavari.’ <sup>31</sup> Moḡesi ḡokirani nai, tauḡemi ḡovekiraḡini, ḡomi tu peroveta ḡevaḡirito tarimari naturi. <sup>32</sup> Oba, ḡomi maki tubumi ḡatami ḡeveito-ḡoi kavana ma ḡovei-iaḡoni, ḡeri rakava ḡomi na ḡovaḡa-ḡuḡururini.

<sup>33</sup> ḡomi mota! Mota naturi! Barau ḡena Kota baregona ḡarona beraḡasini nai, karava eḡara-vanaḡi vanaḡini gabuna na kamasi boḡo raga-maḡurini? <sup>34</sup> Moḡa lorinai akiramini, au na peroveta tarimari e iaunega tarimari ema vevaḡa-riba tarimari batuḡu-iaḡorini. Benamo kota tu boḡo vaḡi-maserini, aba, boḡo vaḡa-sataurorini; ma kotari tu rubu nuḡari ai boḡo kwaririni, rarari maki beḡe riḡoni, ema vanuḡa ta na boḡo lairini ma vanuḡa ta. <sup>35</sup> Moḡesina nai vei-iobukaiobuka tarimari ḡevaḡirito metori tu ḡomi iatami ai, Abela ḡevaḡi-maseato, monana eiaḡomato mo Sakaria, Barakia natuna, ḡia tu fata veaḡana ema numa veaḡana fakari ai ḡovaḡi-maseato. <sup>36</sup> Akira-korikorimini, mabarari metori tu toma ḡuru tarimami iatami ai beḡe ketokauni.”

## Iesu Ierusalemata taġina eveito

*Luka 13:34-35; 19:41-44*

<sup>37</sup> “Ierusalemata, Ierusalemata o, ġoi na peroveta tarimari ovaġirini ema Barau na etuġu-iaġosirini tarimari fore na otaki-maserini. Nega ġutuma aurato, natumi bana gana-ġeġeraġiri, kokoroku vavinena na natuna egoru-taririni kavana, senaġi ġomi tu asi ġourato! <sup>38</sup> Moġa lorinai ġemi vanuġa ema Rubu Veaġa tu korina betanuni. <sup>39</sup> Korana au na akiramini, ġomi roġo au asi boġo ġitaguni, beiaġoni mo, ġaro ta beraġasini, monai vau boġo kirani, ‘Barau aranai eiaġomani tauna sivaġa-namoa.’”

### Iesu na vau beġea ġorani dagarari ekiraġirito

**24** Iesu Rubu Veaġa na eraka-rosito, eraka-veġitato nuġanai, ġena mero ġia ġenai ġeiaġoto, ġeri ura Rubu Veaġa numari baregori beġene vaġa-ġitaia. <sup>2</sup> Senaġi Iesu na evaġa-guruġarito, ekirato, “Mai dagara mabarari ġoġitarini? Au na moġoni akiramini: Mai fore ta fore ta iatanai asi beġe tanuni, mabarari beġe varebubu riġorini.”

<sup>3</sup> Iesu Olive Ġoronai etanu-taġoto-ġoi, benamo ġena mero ġia ġenai ġeiaġoto, ġedanaġi-ġairiato, ġekirato, “Nokira-varama, mai dagara tu aitoma beġe ġorani? E ġoi boġenoġoi-iaġomani ema tanobara dokona beġabiani maki kamara vetoġa na bevaġa-foforiani?”

<sup>4</sup> Iesu evaġa-veseto, ekirato, “Ġomi lorimi boġono vetore, tarima ta na asi bene ġofami. <sup>5</sup> Korana tarima ġutuma au aragu ai beġe iaġomani, beġe kirani, ‘Keriso tu au maiġegu!’ Tarima vovoka beġe ġofarini. <sup>6</sup> Ġomi na vetari gururi e tuari variri boġo seġaġirini nai, nuġami asi beġene raġe. Maniġeri dagara tu beġe ġorani, senaġi dokona tu asi roġo. <sup>7</sup> Tanobara ta tanobara ta ġesi beġe vevaġini, gavamani ta gavamani ta ġesi beġe vetarini. Gabu ġutuma nuġari ai doġe beġe ġorani, tano maki beġe iagani. <sup>8</sup> Mai tu midigu moġo besinaiani, noġa moġo mero keina emaġurini midiguna kavana.

<sup>9</sup> Mo negai beġe ġabi-tarimini, beġe vaġa-midigu midigumini, beġe vaġi-masemini. Bese mabarari na beġe baru-vinimini, korana au ġovaġa-moġoniguni dainai. <sup>10</sup> Benamo tarima ġutuma ġeri veġabidadama beġe raga-kwanerini, tata beġe verevani e beġe vebaru-vevinini. <sup>11</sup> Peroveta ġoġaġofa tarimari beġe variġisini, tarima ġutuma beġe ġofarini. <sup>12</sup> Vei-rakava maki beġora-rovorovoni, benamo ġutuma ġeri veuravini maki beġe farakani. <sup>13</sup> Senaġina deikara bevevaġa-gwaġiġini mo magona tu bemaġurini. <sup>14</sup> Barau ġena Basileia Varina Namona tu tanobara mabarani beġe ġobata-iaġiani, bese mabarari na beġene seġaġia ġana, moġa murinai vau magona beraġasini.”

### Vevaġa-gari dagarana beforini

*Mareko 13:14-23; Luka 21:20-24*

<sup>15</sup> “Ġomi na dagara rakava vedaureana, vevaġa-gari dagarana, peroveta tarimana Daniela na ekiraġiato dagarana, boġo ġitaiani gabu veaġanai beruġani.” Mai guruġa beiaġiani tarimana bene riba maoro anina tu kara. <sup>16</sup> “Benamo deidei Iudeai ġetanuni tarimari ġoro ġana beġene raga-iaġo. <sup>17</sup> Deikara numa tuġunai etanu-taġoni tu, asi ma bene raka-toġa numa nuġana ġana ġena farefare ġabiġabiri. <sup>18</sup> Deikara vama moka nuġanai maki asi ma bene ġenoġoi ġena koudi ġabiġabina. <sup>19</sup> Mo negai vavine

ma baniri e ġabi-variġu vavineri kika ma vetuġari! <sup>20</sup>Boġono ġauġau Barau ġenai, be ġura e nagure negari ai o Sabadi ai asi boġono raga-kwareġa! <sup>21</sup>Korana mo negai midigumidigu tu asi keikeiri beġe ġorani, Barau na tanobara eveiato beiaġoma maitoma, midigu moġesina asi ġeġorani. Ma maiġa murinai moġesina kavana ta asi ma beġora-ġenoġoini. <sup>22</sup>Bema Barau na mo ġaro rakavari asi bere vaġa-kubiri, tarimarima ta asi bere maġuri riba, senaġi eġabi-hidirito tarimari dairi ai, ġia na ġarori bevaġa-kubirini.

<sup>23</sup>Mo negai, bema tarima ta na bekiramini, ‘Ġoġitaia, Keriso tu maiġa!’ o ‘Ġia tu iomoġa!’ betoni nai, asi boġono vaġa-moġonia. <sup>24</sup>Korana tu Keriso ġofaġofari e peroveta tarimari ġofaġofari beġe fororini, vetoġa boruri e nuġa-farevaġi veiġari baregori beġe veirini, Barau na eġabi-viriġirito tarimari beġene ġofa-veġonuri ġana.

<sup>25</sup>Boġono tuġamaġi-taġoa, maiġeri dagara tu akiravara-guinemini, hora roġosi bene raġasi nai. <sup>26</sup>Bema tarima ta na bekiramini, ‘Ġoġitaia, ġia tu tano fakanai moġa,’ moġana asi boġono iaġo; o bekirani, ‘Ġoġitaia, ġia tu mo numa nuġanai etanuni,’ asi boġono vaġa-moġonia. <sup>27</sup>Korana Tarimarima Natuna beiaġomani tu fofori-taġo, noġa moġo kiriku ekimoreani gubai ġaro raġeraġena na mo ġaro riġoriġona kavana; <sup>28</sup>ma mase tauġanina etanuni gabunai gaio maki monai beġe vegogoni, (be ġia na beġe vaġa-foforiani).”

### **Tarimarima Natuna ġena iaġoma**

*Mareko 13:24-27; Luka 21:25-28*

<sup>29</sup>“Mo rakava beġe ġorani murinai, ġaro bemukunani e ġue maki asi bema-mani, visiġu guba na beġe ketoni e guba seġukari beġe iagaiagani. <sup>30</sup>Benamo Tarimarima Natuna vetoġana gubai befororini. Mo ġaro ai tanobara beseri mabarari beġe taġi-vanoro vanoroni, korana Tarimarima Natuna beġe ġitaiani, magube iatana na beiaġomani ma seġuka barana e ma marevana ġesi. <sup>31</sup>Benamo ġia na ġena aneru betuġurini ma kibi gururi baregori ġesi, eġabi-viriġirito tarimari beġe vaġa-vegogorini tanobara mabarari na.”

### **Barabore - Vevaġa-riba figi ġauna ġenana**

*Mareko 13:28-31; Luka 21:29-33*

<sup>32</sup>“Figi ġauna ġenana mai barabore boġono ribaia: Kabona ġefori-raġeni e launa ġefafani nai, ġoribani, ġaro ġena tora taimina tu bekavinaġi ġotoni. <sup>33</sup>Moġa ilailanai, ġomi maki bema mai dagara mabarari beġe ġorani boġo ġitarini nai, boġono riba, Tarimarima Natuna tu bekavinaġi ġatama bokai. <sup>34</sup>Moġoni akiramini, mai ġuru asi bekorini, beiaġoni mo, mai dagara mabarari beġe ġorani. <sup>35</sup>Guba e tanobara beġe rekwa-rekwani, senaġi au ġegu guruġa tu asi beġe rekwa-rekwani, beġe tanu-vanaġi vanaġini.”

### **Ġaro e hora tarima ta asi ribana**

*Mareko 13:32-37; Luka 17:26-30; 17:34-36*

<sup>36</sup>“Senaġi mo ġaro e hora tu tarima ta asi ribana, aneru gubai asi ribari e Natuna maki asi ribana, senaġi Tamana ġereġana moġo ma ribana. <sup>37</sup>Tarimarima Natuna ġena iaġoma tu noġa moġo Noa ġena negai kara ġeġorato kavana. <sup>38</sup>Ġutuġutu roġosi bere raga nai, tarimarima tu ġeveini kavana ġeġaniġanito-ġoi, ġeniuniuto-ġoi, ema tau e vavine ġeveġaraġoto-ġoi, eiaġomato mo, Noa ġena lagatoi ai eraka-toġato

ġaronai. <sup>39</sup> Senaġi matari asi ġekanito, asi ġeribato kara beġorani mo, ġutuġutu eraġasito, benamo mabarari eġutu-masemaserito. Tarimarima Natuna beiaġomani maki moġesina beġorani. <sup>40</sup> Mo ġaro ai tau ruarua vamokai beġe ġauveini, ta tu Barau na beġabi-vaġiani, a ta tu betanuni. <sup>41</sup> Vavine ruarua widi giro dagarana beġe girovegogoani, ta tu beġabi-vaġiani, a ta tu betanuni. <sup>42</sup> Moġesi nai tataġa-taġo boġono tanu, korana ġomi asi ribami ġemi Vereġauka tu aitoma beiaġomani. <sup>43</sup> Boġono riba-maoro: Bema numa tarimana ma ribana kamara aoanai lema tarimana beiaġomani nai, ġia tu tataġa-taġo betanuni, benamo lema tauna na numa asi bedareani. <sup>44</sup> Moġa lorinai ġomi maki boġono verovina-tore, korana Tarimarima Natuna aitoma beraġasini aoanai ġomi asi boġo ribani.”

### Vetuġunaġi tarimana namona

*Luka 12:42-46*

<sup>45</sup> “Deikara tu mo farefare nari tarimari na guruġa eseġaġini ema veiġa roroġotori eveini, ġena vere na eġabi-hidiato numa ema vetuġunaġi tarimari bene ġitaġauri, ema ġani-ġani maki nega korikori ai bene viniri? <sup>46</sup> Mo vetuġunaġi tarimana, ġena vere na ekiraiato ilailanai eġauveini, bema-ġoitaġoani tu namo. <sup>47</sup> Moġoni akiramini, ġia tu ġena vere ġena farefare mabarari ġitaġauri tarimanai betoreani. <sup>48</sup> Senaġina bema ġia vetuġunaġi tarimana rakavana, tauġena nuġana bekirani, ‘Au ġegu vere ġena ġenoġoi tu bekwaibo-rakava,’ <sup>49</sup> benamo ġia na karona bekwaririni, ma ġia tu niuniu tarimari ġesi beġe ġaniġani-vegogoni e beġe niuniu-vegogoni. <sup>50</sup> Vetuġunaġi tarimana ġena vere ġena ġenoġoi ġarona tu asi etuġamaġiani ġaronai, ma asi eribaiani aoanai beraġasini. <sup>51</sup> Benamo ġena vere na bea basi-ġutuġutuani, ma ġofaġofa tarimari ġesi bea toreani. Monai beġe taġini, gadikari maki beġe veġaratarini.”

### Barabore - Ġuiato gabanana (10)

**25** “Mo ġaro ai Guba Basileia tu noġa moġo ġuiato gabanana (10) kavana, ġeri lamefa ġeġabirito, ġeraka-rosito, veġaraġo variġu tauna ġesi beġene vedoġari ġetato. <sup>2</sup> Ġuiato imaima (5) tu ma iaunegari, a imaima (5) tu babori. <sup>3</sup> Korana ġuiato babori ġeri lamefa moġo ġeġabito, senaġi keresini kota ma asi ġeġabikauto. <sup>4</sup> A iaunega ġuiatori ġeri lamefa ġeġabito nai, keresini maki kavabu ai ġeġabikauto. <sup>5</sup> Veġaraġo variġu tauna ekwaiboto dainai, gena na matari eġarararito, benamo mabarari ġegenato.

<sup>6</sup> Boġi nuġanai ta ekoġoto, ekirato, ‘Veġaraġo variġu tauna mani eiāġomani, be ġoiāġo, ġia ġesi boġono vedoġari!’ <sup>7</sup> Benamo ġuiato 10 ġetataġato, ġeri lamefa ġeiarevarito. <sup>8</sup> Ġuiato babori na iaunega ġuiatori ġevaġa-guruġarito, ġekirato, ‘Ġemi keresini kota ġovinima, korana ġai ġema lamefa mai ġebuseni.’ <sup>9</sup> Senaġi iaunega ġuiatori ġevaġa-veseto, ġekirato, ‘Asiġina, ġomi ema ġai tu asi beilailani. Namona tu sitoa ġana ġoiāġo, tauġemi ġemi ġoa voi.’ <sup>10</sup> Keresini voi ġeiaiġoto-ġoi nai, veġaraġo variġu tauna eraġasito. Benamo ġerovina-toreto ġuiatori tu ġia ġesi veġaraġo verekonai ġeraka-toġato. Benamo ġatama-boka ġekou-ġauato.

<sup>11</sup> Gabivau ġuiato tari maki ma ġevotuto, ġekirato, ‘Vereġauka, Vereġauka o, ġema ġatama-boka noma keoa!’ <sup>12</sup> Senaġi veġaraġo variġu tauna evaġa-veseto, ekirato, ‘Moġoni akiramini, au tu asi ribaġu ġomi.’ <sup>13</sup> Moġa lorinai, boġono venari-taġo, korana ġemi Vereġauka beiaġomani ġarona e horana asi ribami.”

## Barabore - Vetuḡunaḡi tarimari moni ḡenarito

*Luka 19:11-27*

<sup>14</sup>“Guba Basileia tu noḡa moḡo tarimana ta, gabu manaḡana ḡana bene iaḡo etato. Roḡosi bere raka nai, ḡena vetuḡunaḡi tarimari ekea-iaḡomarito, ḡena farefare evinirito, beḡene ḡauvei-iaḡiri ḡana. <sup>15</sup>Ḡia na golo moniri ḡia tata sebori sebori ḡeri riba e kokore ilailari ai evinirito. (Golo monina ta tu tarima ta davana laḡani toitoi nuḡanai beḡabini kavana). Ta tu golo moniri imaima (5) eviniato, ma ta tu golo moniri ruarua (2), ma ta tu golo monina sebona eviniato. Benamo eraga-kwanerito, ḡena iaḡoiaḡo eiaḡoto. <sup>16</sup>Golo moniri imaima eḡabirito tarimana maoro-maoro eiaḡoto, ḡena moni eḡauvei-iaḡirito, golo moniri boruri imaima ma edoḡaririto. <sup>17</sup>Moḡesina kavana golo moniri ruarua eḡabirito tarimana na maki moni boruri ruarua ma edoḡaririto. <sup>18</sup>Senaḡi golo monina sebona eḡabiato tarimana eiaḡoto, tano ai guri ekwaiato, biaguna ḡena moni ekure-toḡaiato.

<sup>19</sup>Nega varau emanaḡato nuḡanai, mo vetuḡunaḡi tarimari ḡeri vere ma eḡenoḡoi-iaḡomato, ḡena moni kamasi ḡeḡauvei-iaḡirito beḡene vevarifiu-iaḡiri etato. <sup>20</sup>Benamo golo moniri imaima eḡabirito tarimana ema raka-toḡato, moni boruri imaima eḡabi-kaurito, ekirato, ‘Verebara, ḡoi na golo moniri imaima oviniguto nuḡanai, au na tu moni boruri imaima ma badoḡariri maiḡeri.’ <sup>21</sup>Ḡia na evaḡa-namoato, ekirato, ‘Namo baregona! Ḡoi tu vetuḡunaḡi taumu namona, ma vetuḡamaḡikaumu! Dagara misiri oḡau-vei-iaḡi ginikaurini nai, au na dagara ḡutumama avinimuni, ḡoi na boḡita-ḡaurini. Noma raka-toḡa, au ḡesi sima iaku-vegogo!’

<sup>22</sup>Benamo golo moniri ruarua eviniato tarimana ma ema raka-toḡato, ekirato, ‘Verebara, ḡoi na golo moniri ruarua oviniguto nuḡanai, au na tu moni boruri ruarua ma badoḡariri, maiḡeri.’ <sup>23</sup>Ḡena vere na evaḡa-namoato, ekirato, ‘Namo vedaurea! Ḡoi tu vetuḡunaḡi taumu namomu, ma vetuḡamaḡikaumu! Dagara misiri oḡauvei-iaḡi ginikaurini nai, au na dagara ḡutumama avinimuni, ḡoi na boḡita-ḡaurini. Noma raka-toḡa, au ḡesi sima iaku-vegogo!’

<sup>24</sup>Benamo golo monina sebona eḡabiato tarimana ema raka-toḡato, ekirato, ‘Verebara, au ribagu ḡoi tu asi vegubakau taumu, dia ḡoi na ovarorito dagarari okwarini, ema dia ḡoi na ḡue-ḡuturi ofiu-rovorovorito dagarari ovaḡa-vegogorini. <sup>25</sup>Moḡesi naima agarito, aiaḡoto, ḡemu moni tano nuḡanai akure-toḡaiato. Noḡitaia, dagarana iniḡa, ḡemu noḡabia.’

<sup>26</sup>Ḡena vere na ekiraiato, ekirato, ‘Ḡoi vetuḡunaḡi taumu rakavamu ma ḡubule-fimu. Ḡoi ribamu, dia au na avarorito dagarari akwarini, ema dia au na afu-rovorovorito dagarari avaḡa-vegogorini. <sup>27</sup>Kamuto, bere namo ḡegu moni tu banikai boro torea, benamo au bara ḡenoḡoi-iaḡoma nai tu, ma toreauna ḡesi bara doḡaria. <sup>28</sup>Bevaitovo, ḡia na vetuḡunaḡi tarimari tari ekirarito, ekirato, ‘Mani moni sebona ḡenai maniḡa ḡoḡabia, moni gabanana (10) tarimana ḡovinia. <sup>29</sup>Korana ma ḡena-ḡana tarimana tu ḡutumari ma baviniiani, be barego lelevaḡi beḡabini, a asi ḡena-ḡana tarimana tu ḡenai misina maki baḡabi-vaḡiani. <sup>30</sup>Ma mai vetuḡunaḡi tarimana rakavana ḡofiu-rosia murika mukunana ḡana. Monai bene taḡi, gadikana maki bene vaḡa-ḡaratariri.’”

### Kota baregona ġarona

<sup>31</sup> “Tarimarima Natuna tu ma mamana marevana e seġuka baregona, ema ma ġena aneru mabarari ġesi beġe iaġomani, ġena teronai betanu-kauni. <sup>32</sup> Bese mabarari ġia ġoiranai beġe vaġa-vegogorini, benamo ġia na bevaġa-farararini, noġa moġo mamoe narinariri tarimana na mamoe nanigosi ġerina etore-ġerevaġirini kavana. <sup>33</sup> Mamoe tu aroribana rekenai, ma nanigosi tu kaurina rekenai betorerini. <sup>34</sup> Benamo Vere na aroribana tarimari bevaġa-guruġarini, bekirani, ‘Ġoiaġoma! Tamagu na evaġa-namomini tarimami, ġoiaġoma! Barau ġena Basileia ġoma ġabia, guba tanobara eveirito neganai varau erovina-toreato ġomi ġemi. <sup>35</sup> Korana au evitoguto nai, ġoġubuguto; bokagu ekoketo nai, nanu ġoviniguto; au vanuġa boru tarimagu ġomi fakami ai atanuto, senaġi ġoġabi-raġeguto; <sup>36</sup> au asi ġegu dabuġa, ġovaġa-dabuġaguto; akeveto nai, ġonariguto; dibura numai atanuto nai, ġoraka-ġitaguto.’

<sup>37</sup> Benamo vei-iobukaiobuka tarimari na beġe vaġa-veseani, beġe kirani, ‘Vereġauka, aitoma ġaġitamuto ovitoto, ġaġubumuto? O onanu-maseto, nanu ġavinimuto? <sup>38</sup> Aitoma ġoi vanuġa boru tarimamu ai ġaġitamuto, ġaġabi-raġemuto ġai ġema numai, o asi ġemu dabuġa, ġavaġa-dabuġamuto? <sup>39</sup> Kamara ġaro ai ġaġitamuto ġoi okeveto, o diburai otanuto, ġaraka-ġitamuto?’

<sup>40</sup> Benamo Vere na bevaġa-veserini, bekirani, ‘Moġoni akiramini, tarikakagu asi ġeiavirini tarimari maiġeri ta ġovei-viniato ilailanai, au maki moġesi ġovei-viniguto.’

<sup>41</sup> Benamo kaurina rekena tarimari bevaġa-guruġarini, bekirani, ‘Au ġegu na ġoraka-veġita, meto barego lele-vaġina iatami ai etanuni tarimami, ġoiaġo, eġaravanaġi vanaġini karavana ġana, Satani ma ġena aneru ġeri Barau na varau eveitoreato. <sup>42</sup> Korana evitoguto, senaġi asi ġoġubuguto; nanu na emaseguto, senaġi nanu asi ġoviniguto; <sup>43</sup> au tu vanuġa boru tarimagu ġomi fakami ai atanuto, senaġi asi ġoġabi-raġeguto ġemi numai; asi ġegu dabuġa, senaġi asi ġovaġa-dabuġaguto; akeveto ema dibura numai atanuto, senaġi asi ġoraka-ġitaguto.’

<sup>44</sup> Benamo ġia maki beġe vaġa-veseani, beġe kirani, ‘Vereġauka, kamara ġaro ai ġaġitamuto, ovitoto o onanu-maseto, o vanuġa boru tarimamu, o asi ġemu dabuġa, o okeveto, o diburai otanuto, ġai na asi ġavaġa-kavamuto?’ <sup>45</sup> Benamo Vere na bevaġa-veserini, bekirani, ‘Moġoni akiramini, ġomi na mai tarikaka asi ġeiavirini tarimari maiġeri, ta asi ġovaġa-kavaiato nai, au maki moġesi ġovei-viniguto, asi ġovaġa-kavaguto.’ <sup>46</sup> Tauna moġa, ġia tu midigu vanaġivanaġi gabuna ġana beġe iaġoni, a vei-iobukaiobuka tarimari tu maġuri vanaġivanaġi gabuna ġana beġe iaġoni.”

### Iesu beġene vaġi-masea dabarana ġevetauato

*Ioane 11:45-53*

**26** Iesu na maiġeri dagara mabarari evevaġa-riba iaġi-ġosirito nai, ġena mero evaġa-guruġarito, ekirato, <sup>2</sup> “Ġomi ma ribami, ġaro ruarua moġo, benamo Pasova beġe veiani. (Moġa tu Iuda tarimari mase aneruna na evanaġirito moġo, asi evaġirito verekona). Mo ġaro ai Tarimarima Natuna tarima tari ġimari ai beġe toreani, beġene vaġa-satauroa ġana.”

<sup>3</sup> Benamo Rubu Veaġa vereri baregori ema Iuda ġeri vere baregori ġesi ġevegogoto, Kaiafas, Rubu Veaġa verena barana, ġena numai. <sup>4</sup> Ġeboioġato, Iesu beġene

ġabi-lemaia, benamo beġene vaġi-masea. <sup>5</sup> Senaġi ġekirato, “Dia vereko nuġanai bene ġora, korana vereko beġe iaġomani tarimari ġia iatana na beġe burini garina.”

### **Vavine ta na Iesu ediġaiato Betania ai**

*Mareko 14:3-9; Ioane 12:1-8*

<sup>6</sup> Iesu tu Betania ai, Simona, lepera tarimana, ġena numai. <sup>7</sup> Ġeġaniġanito-ġoi nuġanai, vavine ta ġia ġenai eiaġoto; kavabu namona ta, alabasta forena na ġeveiato kavabuna, eġabi-kauato, nuġanai tu muramura ma bonana namona, voina barego vedaurea; Iesu ġaniġani gabunai etanu-taġoto-ġoi nai, mo vavine na Iesu debanai ebubuato. <sup>8</sup> Ġena mero na ġeġitaiato, benamo ġebaruto, ġekirato, “Karase nai mai muramura efitoġa-kavaiani? <sup>9</sup> Mai muramura bere voivoi-iaġia, be moni baregona bere ġabia, benamo asi ġeri-ġari tarimari bere viniri!

<sup>10</sup> Iesu ribana ġia tu kara ġekiraġiato, moġesina nai evaġa-guruġa-rito, ekirato, “Karase nai mai vavine ġomugumugu-iaġiani? Mai vavine na veiġa namona au ġegu ai beveia. <sup>11</sup> Asi ġeri-ġari tarimari tu ġomi ġesi boġo tanu-vanaġi vanaġini. Senaġi au tu dia ġaro mabarari ġomi ġesi batanuni. <sup>12</sup> Mai vavine na muramura au tauġanigu ai bebubu-guinea, gurigurigu ġana. <sup>13</sup> Moġoni akiramini, Vari Namona beġe ġobata-iaġiani tanobara mabarari nuġari ai, mai vavine na veiġa beveia veiġana maki beġea kiraġiani, ġia tuġamaġi-iaġina.”

### **Iudas na Iesu erevaiato**

*Mareko 14:10-11; Luka 22:3-6*

<sup>14</sup> Benamo gabanana ruarua (12) tarimari ta, arana Iudas Isakariota, Rubu Veaġa vereri baregori ġeri ai eiaġoto, <sup>15</sup> edanaġirito, ekirato, “Kara boġo viniguni, bema Iesu ġimami ai batore-kauani nai? Ġia na silva moniri gabana toitoi (30) ġeivirito, benamo ġeviniato. <sup>16</sup> Mo nega monana Iudas na ġimari ai betore-kauani dabarana evetauato-ġoi.

### **Iesu ma ġena mero ġesi ġinitaġo mamoea ġeġaniato**

*Mareko 14:12-21; Luka 22:7-14; 22:21-23; Ioane 13:21-30*

<sup>17</sup> Asi etubuni faraona verekona ġarona giniguenai ġena mero Iesu ġenai ġeiaġoto, ġedanaġiato, ġekirato, “Ġai tu ainai Rubu Veaġa verekona baġana veitorea, bono ġania?” <sup>18</sup> Benamo Iesu na evaġa-veserito, ekirato, “Ġoiġo vanuġa barana nuġanai, mo bakiraġia tarimana ġenai, boġono vaġa-guruġaia, boġono kira, ‘Vevaġa-riba tauna ekirani: Ġegu hora varau beraġasi. Ġegu mero ġesi ġoi ġemu numai ġinitaġo mamoea baġa ġaniani.” <sup>19</sup> Benamo mero Iesu na ekirarito ilailanai vereko ġevei-toreato.

<sup>20</sup> Lavilavi ai Iesu ma ġena mero gabanana ruarua (12) ġesi ġetanu-tarito, vereko ġeġania ġana. <sup>21</sup> Benamo ġeġaniġanito-ġoi nai, ekirarito, ekirato, “Moġoni akiramini, ġomi ta na au borevaguni.” <sup>22</sup> Ġia mabarari nuġari ma metori ġesi irau sebori irau sebori na ġedanaġiato, ġekirato, “Vereġauka, moġoni dia au, ene?” <sup>23</sup> Iesu evaġa-veseto, ekirato, “Au ġesi diġu sebonai ġanaba-riġoni tarimana na au berevaguni. <sup>24</sup> Tarimarima Natuna bemaseni Buka Veaġai ġetoreato ilailanai. Senaġi Tarimarima Natuna berevaiani tarimana ġenai tu vetuġana kekei; asi bere maġuri tu namo.” <sup>25</sup> Benamo Iudas, reva tarimana, ekirato, “Vevaġa-riba taumu, moġoni dia au, ene?” Iesu evaġa-veseto, ekirato, “Dagarana maniġa, mani okiraġiani.”



### Vereġauka ġena ġanivegogo veaġana

*Mareko 14:22-26; Luka 22:15-20; 1Korinto 11:23-25*

<sup>26</sup> Ġeġaniganito-ġoi nuġanai, Iesu na beredi eġabiato, Barau evaġa-namoato, etaviato, evinirito, benamo ekirato, “Gogabia, ġoġania, mai tu au tauġanigu.” <sup>27</sup> Ġia na kapusi ma eġabiato, evaġa-namoato murinai, evinirito, ekirato, “Goniua, ġomi mabarami. <sup>28</sup> Korana mai tu au raragu, Ginitaġo Variġuna evaġa-moġoniani, bevebubuni, tarimarima ġutuma ġeri rakava tuġamaġi-fitoġari ġana. <sup>29</sup> Akiramini, mai vine nanuna asi ma banieu-ġenoġoiani, beiaġoni mo, ġaro beraġasini vau, au ġomi ġesi ma bita niu-vegogoani au Tamagu ġena Basileia nuġanai.” <sup>30</sup> Benamo mari ta ġemariato murinai, ġeraka-rosito, Olive Gorona ġana ġeiaġoto.

### Iesu na Petero ġena vekira-ġuniġau ekiraġi-toreato

*Mareko 14:27-31; Luka 22:31-34; Ioane 13:36-38*

<sup>31</sup> Benamo Iesu na evaġa-guruġarito, ekirato, “Toma boġi ġomi mabarami ġemi veġabidadama au ġegu ai boġo raga-kwaneani, korana Buka Veaġai maiġesi ekirani, ‘Au na mamoe ġitaġauri tarimana bavaġiani, benamo mamoe mabarari beġe raga-lausini.’

<sup>32</sup> Senaġi au mase na ma bavariġisi-ġenoġoiani murinai, baraka-guineni Galilea ġana. Monai vau bitana vedoġari.”

<sup>33</sup> Petero eguruġa-fouto, Iesu ekiraiato, ekirato, “Bema mabarari na ġeri veġabidadama ġoi ġemu ai beġe raga-kwaneani, senaġi au na tu asiġina.” <sup>34</sup> Iesu na Petero evaġa-guruġaiato, ekirato, “Moġoni akiramuni, toma boġi kokoroku roġosi bene goġi nuġanai, ġoi na au vaġa-toittoi bokira-ġuniġauguni.” <sup>35</sup> Senaġi Petero eguruġa-ġiġiraġeto, ekirato, “Bema ġoi ġesi bita mase-vegogoni maki, au na ġoi tu asi veġata bakira-ġuniġaumuni.” Ġena mero mabarari maki moġesi ġekirato.

### Iesu eġauġauto Getesemane ai

*Mareko 14:32-42; Luka 22:39-46*

<sup>36</sup> Iesu ma ġena mero ġesi ġeiaġoto gabu ta arana Getesemane, benamo ġia na evaġa-guruġarito, ekirato, “Mainai ġotanutaġo, au tu iomo ġana aiaġoni, naġauġau.”

<sup>37</sup> Benamo Petero ema Sebedaio natuna ruarua moġo eġoririto, ġia ġesi ġeiaġoto. Moġa nuġanai Iesu tau-ġanina efarakaiato, egarito, nuġana maki evekwaragi-to-ġoi. <sup>38</sup> Benamo ekirarito, ekirato, “Au nuġagu na meto asikei eġwaiiani, dori evaġi-guni. Mainai ġotanu, boġono vevaġa-gwaġiġi au ġesi.” <sup>39</sup> Iesu kota ma eraka-naġito, ġoirana tano ai ekokofa-tarito, benamo eġuriġurito, ekirato, “Tamagu o, bema ma dabara ta, mai midigu bedina ġeguna noma ġabi-vaġia. Senaġi dia au ġegu ura, ġoi ġemu ura moġo.”

<sup>40</sup> Ġena mero toittoi ġeri ai eġenoġoito nuġanai, ġia tu gena-maseri ai eġoitaġorito, benamo Petero ekiraiato, ekirato, “Kamasi nai ġomi taumi toittoi au ġesi aoa sebona ta kavana maki asi boġo vevaġa-gwaġiġini? <sup>41</sup> Boġono vevaġa-gwaġiġi, boġono ġauġau, be veribaġani beiaġomani nai tu, asi boġono moira. Iauka tu moġoni eurani, senaġi tau-ġani tu emoirani.”

<sup>42</sup> Iesu nega vaġa-ruarua eraka-veġitato, ea ġuriġurito, ekirato, “Tamagu o, bema asi dabara ta mai midigu bedina ġeguna boġabi-vaġiani nai, ġoi ġemu ura bono veia moġo.” <sup>43</sup> Ma eġenoġoi-iaġomato nuġanai tu, ġia asi ġeri vevaġa-gwaġiġi nai, genamaseri ai ma edoġaririto, korana matari tu gena na eġabi-rakavarito.

<sup>44</sup> Iesu na ma eiaġuirito, ma eiaġoto, vaġa-toittoi ma eġauġauto, ġena ġuriġuri guruġari guineri ma ekiraġi-ġenoġoirito. <sup>45</sup> Benamo ġena mero ġeri ai ma eġenoġoi-iaġomato, ekirarito, “Gomi tu roġo ġogenani e ġoiaġaraġini? Goġitaia! Aoana varau beraġasi! Tarimarima Natuna tu beġe revaia, rakava tarimari ġimari ai beġe torea. <sup>46</sup> Ġovariġisi, be si-iaġosi! Ġoġitaia, au revarevagu tarimana mai beraġasi!”

### Iesu tuari tarimari na ġeġabiato

*Mareko 14:43-50; Luka 22:47-53; Ioane 18:3-12*

<sup>47</sup> Iesu roġo eguruġato-ġoi nuġanai, Iudas, mero gabanana ruarua (12) tauna ta, eraġasito. Tarimarima ġutuma maki ġia ġesi ma ġeri vetari baġari e vevaġi kwariri. Ġia tu Rubu Veaġa vereri baregori ema Iuda vereri na ġetuġurito. <sup>48</sup> Reva tarimana na vetoġa ta ekiravara-torerito, ekirato, “Baverauani tarimana tu moġa, boġono ġabi-taria.” <sup>49</sup> Iudas eraġasito nai, maoromaoro eiaġoto Iesu ġenai, benamo ekirato, “Vevaġa-riba tarimamu, boġi namona!” benamo everauato. <sup>50</sup> Iesu na evaġa-veseato, ekirato, “Ġata, veiveina uranai boiaġoma veiġana noraga-veia!” Benamo ġeiaġomato, ġimari na Iesu ġeġabi-tariato, ġedegodegoato.

<sup>51</sup> A Iesu ġena mero ta ġena vetari baġana einu-vaġiato, edaveato, benamo Rubu Veaġa verena baregona ġena vetuġunaġi tarimana seġana ebasi-vaġiato. <sup>52</sup> Benamo Iesu na ekiraiato, ekirato, “Ġemu baġa tu ġuraġurana gabunai noġura-ġenoġoia. Korana vetari baġari ġeġabini tarimari mabarari tu vetari baġari na beġe maseni. <sup>53</sup> Ġoi asi ribamu, Tamagu ġena vevaġa-kava banoġiani, benamo ġia na aneru vaġa-sebo au ġegu ai betuġurini, aneru doġorori gabanana ruarua (12) o 70,000 ema tari maki betuġurini au vaġa-kavagu? <sup>54</sup> Moġesi bere vei, senaġi Buka Veaġai varau ġetoreato guruġana tu kamasi bemoġonini? Be, maiġesi moġo beġene vetore!”

<sup>55</sup> Iesu na monai mo tarima ġutuma evaġa-guruġarito, ekirato, “Au tu seġafore doġorona ta aġori-kauani, be ġomi boġo iaġoma au ġabiġabigu tu ma ġemi vetari baġari e vevaġi kwariri ġesi? Ġaro mabarari ai au tu ġomi sevimi ai, Rubu Veaġa nuġanai avevaġa-ribato-ġoi, senaġi asi ġoġabi-tariguto. <sup>56</sup> A mai dagara mabarari ġeġoranai tu, peroveta tarimari na Buka Veaġai ġetore-guinerito guruġari vaġa-moġoniri ġana.” Benamo Iesu ġena mero mabarari na ġeraga-kwaneato, ġeraga-rovorovoto.

### Iesu kanisoro tarimari ġoirari ai

*Mareko 14:53-65; Luka 22:54-55; 22:63-71; Ioane 18:13-14; 18:19-24*

<sup>57</sup> Mo ġeġabi-tariato tarimari na Iesu ġeġori-iaġoato, Kaiafas, Rubu Veaġa verena baregona, ġena numa ġana. Monai taravatu ġevevaġa-riba iaġiato-ġoi tarimari ema Iuda vereri varau ġeraka-vegogoto. <sup>58</sup> Petero na Iesu eraka-tuġuato-ġoi, ma fakana eiaġoto mo, Rubu Veaġa verena baregona ġena numa ġana. Eraka-toġato maġu nuġanai, benamo veġitaġau tarimari fakari ai ea tanu-tarito, bene ġita, mo veiġa magonai kara befoforini.

<sup>59</sup> Rubu Veaġa vereri baregori e Iuda ġeri kanisoro tarimari mabarari na vevaġa-bade ġofaġofa tarimari ġevetaurito, Iesu beġene ġofaġofa-iaġia, be beġene vaġia

gana. <sup>60</sup> Vevağa-bade gōfağofa tarimari gūtuma gēvarigisito, gēgōfağofa-iağiato, senaği ġeri guruğa tu asi gēsebonato-ğoi. Magonai vau gōfağofa tarimari ruarua gēvaisi-rağeto, <sup>61</sup> gēkirato, “Mai tarima ekirato, ‘Au tu ma seğukagu mai Barau ġena Rubu Veağa barovoani, ema ġaro toitoi nuğanai ma bavağa-ruğa ġenoğoiiani.’”

<sup>62</sup> Benamo Rubu Veağa verena baregona eruğa-vaisito, Iesu edanağiato, ekirato, “Ġoi tu asi bovağa-veseni? Maiğeri na ġoi gēvarifiu-iağimuni guruğari tu kaması?” <sup>63</sup> Senaği Iesu asi eguruğato. Rubu Veağa verena baregona na ma edanaği-ğenoğoiato, ekirato, “Mağuri Barauna aranai au na ġoi akiramuni, nokira-varama: Ġoi tu Keriso, Barau Natuna?” <sup>64</sup> Iesu na evağa-veseato, ekirato, “Dagarana okirağiani maniğa! Ma au na ġomi mabarami akiramini: Mai ġaro maiğa, mo beiağoni ġoirai, ġomi na Tarimarima Natuna roğo boğo ġitaiani, seğuka Barauna ġimana aroribanai betanuni, e guba maguberi iatari na beiağomani!”

<sup>65</sup> Benamo Rubu Veağa verena baregona tauğena ġena dabuğa edareato, ekirato, “Barau vağa-rakavana guruğana tu ekiraği-ğosiato! Karase vevağa-ğita tarimari roğo tavetaurini? Barau vağa-rakavana guruğana bekirağia, varau boğo seğağia. <sup>66</sup> Kara mani ġotoni?” Ġia mabarari gēkirato, “Bene mase moğo.” <sup>67</sup> Benamo ġoirana gēkanunuato, gēfaisiato. Kotari na gēforoato, <sup>68</sup> gēkirato, “Keriso, ġoi tu peroveta tari mana, be nokira-varama, deikara na bebotamu?”

### Petero na Iesu ekira-ğuniğauato

<sup>69</sup> Petero roğo numa mağuna nuğanai etanu-tağoto-ğoi, benamo vetuğunaği ġuiatona ta ġia ġenai eiağomato, ekirato, “Ġoi maki Iesu, Galilea tauna, ġesi orakaoto-ğoi, okavaiato-ğoi.” <sup>70</sup> Senaği Petero evekira-ğuniğauto mabarari ġoirari ai, ekirato, “Au asi ribagu ġoi kara okirağiani.” <sup>71</sup> Benamo eraka-rosito, mağū ġatama bokana sevina ġana eiağoto. Ma vetuğunaği ġuiatona ta na eğitaiato, benamo sevina tarimari evağa-guruğarito, ekirato, “Ġia maki Iesu, Nasareta tarimana, ekavaiato tarimana.” <sup>72</sup> Petero ma evekira-ğuniğauto, eguruğa-gwağiğito, ekirato, “Au asi ribagu mani tarima.” <sup>73</sup> Nega kotuna evanağito nuğanai, monai ġeruğa-tağoto-ğoi tarimari Petero ġenai ġeiağomato, gēvağa-guruğaiato, gēkirato, “Moğoni, ġoi maki ġia ġesi tarimamu ta, korana garomu na evağa-foforimuni.” <sup>74</sup> Benamo Petero na ekirarito, “Asiğina ġinavaği, akira-korikorimini, mani tarima au asi ribagu!”

Asikauna kokoroku egoğito. <sup>75</sup> Benamo Petero na Iesu ġena guruğa etuğamağidoğariato, ekiraiato, “Kokoroku roğosi bene goği nai, ġoi na au vağa-toitoi bokira-ğuniğauguni.” Benamo eraka-rosito murikai, etaği-rakava rakavato.

### Iesu gēğori-iağoato Pilato ġenai

**27** Boğiboği ekini-mama mamaiato-ğoi, Rubu Veağa vereri baregori mabarari ema Iuda vereri ġeboioğa-vegogoto, Iesu beğene vağia ġana. <sup>2</sup> Seini na ġebarubaruato, gēğori-iağoato, Pilato, Roma gavana, ġimanai ġetore-kauato.

### Iudas Isakariota emaseto

#### *Apostolo 1:18-19*

<sup>3</sup> Iudas, reva tauna, na Iesu eğitaiato, vağa-masena guruğana varau ġeveiato, benamo evetuğamaği-kureto. Benamo silva moniri gabana toitoi (30) eğwa-ğenoğoirito Rubu Veağa vereri barari e Iuda vereri ġeri ai. <sup>4</sup> Ekirato, “Au tu bavei-rakava, korana asi ġena rakava tarimana barevaia, bemaseni.” Ġevağa-veseto, gēkirato, “Mani

tu dia ġai ġema nuġa-vekwaraġi, mani tu ġoi tauġemu ġemu ġauvei moġo.”<sup>5</sup> Iudas na silva moniri Rubu Veaġa nuġanai efu-toġarito, eraka-veġitato. Benamo eiaġoto, tauġena ea veborato.

<sup>6</sup> Benamo Rubu Veaġa vereri baregori na mo silva moniri ġeġabirito, ġekirato, “Mai tu rara voina monina, be boubou mauġanai asi veġata bita ġuraiani, taravatu.”

<sup>7</sup> Ġeguruġa-iaġiato, ġevaġa-moġoniato murinai, mo moni ġeġabiato, ġuro eveini tarimana ġena tano ġevoiato, tanobara boru tarimari ġeri gara gabunai ġevaġa-iaġoato. <sup>8</sup> Moġesina nai mo tano arana ġevatoani “Rara Tanona” beiaġoma mo maitoma.

<sup>9</sup> Monana Ieremia peroveta tarimana ġena guruġa ema moġonito, ekirato, “Mo silva moniri gabanana toitoi (30) ġeġabirito, mo tu Isaraela tarimari na ġevaġa-moġoniato voina misina, mo tau beġene voia ġana. <sup>10</sup> Ma mo moni na ġuro eveini tarimana ġena tano ġevoiato, Vereġauka ekirato ilailanai.”

### Iesu Pilato ġoiranai

*Mareko 15:2-5; Luka 23:3-5; Ioane 18:33-38*

<sup>11</sup> Iesu Roma gavanana ġoiranai eruġato, ġia na edanaġiato, ekirato, “Ġoi tu Iuda tarimari ġeri kini ba?” Iesu evaġa-veseto, ekirato, “Oi, okiraġiani maniġa.”

<sup>12</sup> Benamo Rubu Veaġa vereri baregori ema Iuda vereri na Iesu ġeġofaġofa-iaġiato, senaġi guruġa ta asi ekiraġiato. <sup>13</sup> Moġa lorinai Pilato na evaġa-guruġaiato, ekirato, “Ġoi asi oseġaġini, iatamu ai tu meto ġutuma ġekiraġirini?” <sup>14</sup> Senaġi Iesu asi eġoiaġito, guruġa sebona tai maki asi evaġa-veserito. Monana gavana nuġana efarevaġi-rakavato.

### Pilato na Iesu ġena mase ekiraġiato

*Mareko 15:6-15; Luka 23:13-25; Ioane 18:38-19:16*

<sup>15</sup> Vanaġivanaġi Pasova verekona ġaronai tu gavana na ġia ġeri dibura numai etanuni beġe kiraġiani tarimana ta etuġu-rosiato-ġoi. <sup>16</sup> Mo laġani ai tarima rakava kwaikwaina ta dibura numai etanuto, arana tu Barabas. <sup>17</sup> Moġa lorinai tarima ġutuma ġevegogoto nuġanai, Pilato na edanaġirito, ekirato, “Deikara ġoura-viniani natuġu-rosia: Barabas ba Iesu, ġekiraġiani Keriso?” <sup>18</sup> Korana Pilato ribana ġinikau, Iuda tarimari baregori ġeri mama dainai, Iesu ġia ġimanai ġetoreato.

<sup>19</sup> Pilato na Kota eġorikauato-ġoi nuġanai, Pilato ġaraġona na ġena keakau ta etuġu-raġasiato, ekirato, “Mani vei-iobukaiobuka tarimana ġenai dagara ta asi bono veia, korana au tu boġi ai banuvi, ġegu nuvi ai midigumidigu baregona na beġabigu ġia dainai.”

<sup>20</sup> Senaġi Rubu Veaġa vereri baregori ema Iuda vereri na vegogo tarimari nuġari ġeġanirito, Pilato beġene kiraia, Barabas bene tuġu-rosia, a Iesu bene mase. <sup>21</sup> Senaġi gavana na vegogo tarimari ma edanaġirito, ekirato, “Ġia tauri ruarua dei tu ġomi ġemi natuġu-rosia?” Vegogo tarimari ġefararato, ġekirato, “Barabas!” <sup>22</sup> Benamo Pilato na edanaġirito, ekirato, “O mai Iesu, ġekiraġiani Keriso, tu kamasu bana veia?” Ġia mabarari ġevaġa-vese vegogoto, ġekirato, “Novaġa-satauroa!” <sup>23</sup> Senaġi Pilato na ma edanaġirito, ekirato, “Kara dainai? Kamara veiġa rakavana eveiato nai?” Senaġi mabarari ġefarara-gigitarito, ġekirato, “Novaġa-satauroa!”

<sup>24</sup> Pilato etuġamaġi-fakato, ġia ġena riba guruġari tu asi beġe ġabi-raġerini, ma tarimarima ġia iatana na beġe burini garina, benamo ġia tu nanu eġabito, ġi-

mana eġuriġiato mo tarimarima ġutuma ġoirari ai, ema maiġesi ekirato: “Au tu asi ġegu kerere mai vei-iobukaiobuka tarimana rarana ġenai; mai tu ġomi ġemi ġauvei moġo!” <sup>25</sup> Vegogo tarimari mabarari ġevaġa-veseto, ġekirato, “Mai tarima rarana o ġena mase metona tu ġai iatamai bene tanu ema ġai natuma iatari ai.” <sup>26</sup> Benamo Pilato na Barabas etuġu-rosiato ġia ġeri, a Iesu tu ġekwaria etato vau soldia evinirito, beġene vaġa-satauroa ġana.

### Iesu ġevaseva-vaseva iaġiato

*Mareko 15:16-20; Ioane 19:2-3*

<sup>27</sup> Benamo Pilato ġena vetari tarimari na Iesu ġeġori-iaġoato gavana ġena numa nuġanai, benamo karori mabarari ġekea-vegogorito, bena ġeruġa-ġeġeraġiato. <sup>28</sup> Ġena dabuġa ġeruġa-vaġirito, dabuġa kakakakana ġevaġa-veiato, <sup>29</sup> debana dagarana ġau ma giniginina na ġevatoato, korona noġa ġeveiato, benamo Iesu debanai ġetore-kauato. Oro ta maki ġimana aroribanai ġevaġa-ġabiato, benamo ġoiranai ġevetui-tarito, ġevaseva-vaseva iaġiato, ġekirato, “Iuda ġeri Kini o, ġaro namona!” <sup>30</sup> Benamo ġekanunu-kanunuato, mo oro ġeġabi-rariato, debana ġekwari-ġenoġoi ġenoġoiato-ġoi. <sup>31</sup> Ġevaseva-vaseva iaġi-ġosiato murinai, dabuġa kakakakana ġeġabi-vaġiato, ġena dabuġa korikorina ma ġevaġa-veiato. Benamo ġeġori-rosiato, beġenea vaġa-satauroa ġana.

### Iesu ġevaġa-satauroato

*Mareko 15:21-32; Luka 23:26-43; Ioane 19:17-27*

<sup>32</sup> Ġeraka-rosito-ġoi nai, Kurene tarimana ta ġeġoitaġoato arana Simona. Vetari tarimari o soldia na ġelaunaġi-naġiato, Iesu ġena satauro neġwaia. <sup>33</sup> Benamo vanuġa na ġeraka-rosito, gabu tai ġeraġasito arana tu Golgota, anina tu ‘Deba Ġavana Gabuna’. <sup>34</sup> Monai vine nanuna midigu vaġa-keina muramurana arana gal ġesi ġebubu-vegogoato dagarana, Iesu ġeviniato; eiamuse-tovoato, senaġi asi eniuato.

<sup>35</sup> Ġevaġa-satauroato murinai, ġena dabuġa ġia fakarai ai ġevarerito kasi ai. <sup>36</sup> Moġa murinai ġetanutanu-tarito, benamo ġenariato. <sup>37</sup> Ġia debana iatanai kara koranai ġevaġa-satauroato guruġana ġekafa-kauato, maiġesi ġetoreato, “MAI TU IESU, IUDA ĠERI VERE.” <sup>38</sup> Seġafore tarimari ruarua maki Iesu ġesi ġevaġa-sataurorito, ta aroribana rekenai, ma ta kaurina rekenai.

<sup>39</sup> Ġeraka-vanaġito-ġoi tarimari debari ġekorakorarito-ġoi, guruġa rakavari Iesu ġeviniato-ġoi, <sup>40</sup> ġekirato-ġoi, “O ġoi okirato, Rubu Veaġa borovoani, ġaro toitoi nuġanai ma bovaġa-ruġa ġenoġoiani otato, tauġemu novevaġa-maġuri! Bema ġoi Barau Natuna, satauro tuġuna na noraka-riġo.”

<sup>41</sup> Rubu Veaġa vereri baregori e taravatu ġevevaġa-riba iaġiato-ġoi tarimari ema Iuda vereri na maki maiġesi ġevaseva-vaseva iaġiato-ġoi, ġekirato, <sup>42</sup> “Ġia na tarima boruri evaġa-maġuririto-ġoi, kamuto ġia tauġena tu asi evevaġa-maġurini! Bema ġia moġoni Isaraela tarimari ġeri vere nai, satauro na inimoġo neraka-riġo, be baġana vaġa-moġonia. <sup>43</sup> Ġia na Barau eġabadadama viniato-ġoi, be siġitaia, Barau na maki betuġamaġi-kauani, bevaġa-maġuriani ba? Evekiraġito-ġoi, ‘Au tu Barau Natuna,’ nene?” <sup>44</sup> Iesu ġesi ġevaġa-satauro vegogorito seġafore tarimari ruarua na maki moġesi ġeguruġa-rakava viniato.

### Iesu ġena mase

*Mareko 15:33-41; Luka 23:44-49; Ioane 19:28-30*

<sup>45</sup> Horaġauna 12 koloko ea ġabiato nai, tanobara mabarana mukuna na eġabi-  
ġauato, mukuna etanuto eiaġoto mo horaġauna 3 koloko. <sup>46</sup> Horaġauna 3 koloko  
rekenai Iesu eġabato, ekirato, “Eloi, eloi, lama sabaktani?” anina tu, “Au ġegu Barau,  
au ġegu Barau, kara dainai au boraga-kwanegu?” <sup>47</sup> Tarimarima tari monai ġeruġa-  
taġoto-ġoi nai, ġeseġaġiato, benamo ġekirato, “Ġia tu Elia ekeaiani.” <sup>48</sup> Benamo ġeri  
tarima ta eraga-iaġoto, nanu erimaiani dagarana ta eġabiato, vine nanuna mamak-  
ina nuġanai eduġi-fereiato, gobu lefai egwanu-kauato, benamo eduġi-raġeato, Iesu  
na neniua ġana. <sup>49</sup> Senaġi kotari ġekirato, “Sivaġa-noga roġo, siġitaia, Elia beiaġo-  
mani, bevaġa-maġuriani ba asiġina.” <sup>50</sup> Iesu ma eġaba-fouto murinai emaseto.

<sup>51</sup> Benamo mo negai moġo Rubu Veaġa nuġanai veaġa lelevaġi daiġutunai, kouġau  
dabuġana o ketin evedare-kikimato, eruaruato, tuġuna na mo gabigabina. Tano eia-  
gaiagato, fore barari ġeġwa-kirarito. <sup>52</sup> Mase guriri ġevekeo-fakato, ma tarima ġu-  
tuma, Barau ġena ura ġeveirito-ġoi tarimari, mase na ma ġevaisiraġe-ġenoġoito,  
<sup>53</sup> ġeri guri gaburi ġeiaġuirito. Iesu ġena variġisi-ġenoġoi murinai, Siti Veaġana ġana  
ġeiaġoto, monai tarimarima ġutuma ġoirari ai ġefoforito.

<sup>54</sup> Vetari verena ma ġena vetari tarimari ġesi, Iesu ġenariġauato-ġoi tarimari, na  
tano-iaga ema ġeġorato dagarari mabarari ġeġitarito nai, ġegari-rakavato, ġekirato,  
“Mai tarima tu moġoni Barau Natuna!”

<sup>55</sup> Vavine ġutuma maki monai, kotuna manaġai ġeruġato, ġemarereto-ġoi. Moġeri  
vavine Iesu murinai ġerakato Galilea na eiaġoto mo Ierusalemna ġana, ema ġia  
vetuġu-naġina ġeiaġo-vinito-ġoi. <sup>56</sup> Ġia fakari ai tu Maria, Magadala vavinena;  
Maria, Iakobo (o Iames) e Ioane sinari; ema Iakobo e Ioane Sebedaio sinari.

### Iesu ġeguriato

*Mareko 15:42-47; Luka 23:50-55; Ioane 19:38-42*

<sup>57</sup> Mo lavilavi ai farefare ġutuma tarimana Arimatea vanuġa na eraġasito, arana  
tu Iosefa; ġia maki Iesu ġena mero ta. <sup>58</sup> Ġia tu Pilato ġenai eiaġoto, benamo enoġi-  
ato, Iesu tauġanina bene ġabia etato. Benamo Pilato na ġena vetari tarimari eki-  
rarito, Iesu tauġanina Iosefa beġene vinia. <sup>59</sup> Moġa lorinai Iesu tauġanina eġabiato,  
dabuġa kurokurlona namona na ekumuato, <sup>60</sup> gara gabuna fore kouġanai ea tore-  
toġaiato. Mo gara tu fore gwaġiġinai kouġa ta ġekoroato, ġia tauġena ġena guri  
gabuna variġuna ta. Fore baregona na ġatama-boka ekure-ġauato, benamo eraga-  
kwaneato. <sup>61</sup> Maria, Magadala vavinena, ema Maria ta tu monai ġetanu-taġoto-ġoi,  
guri ġetanu-ġoiraiato.

### Vetari tarimari na gara gabuna ġenari-ġauato

<sup>62</sup> Vereko ġevei-toreani ġarona ekorito vau, Sabadi varau beġabia, Rubu Veaġa  
vereri baregori e Farisea tarimari Pilato ġenai ġeiaġoto, <sup>63</sup> ġekirato, “Verebara, ġai  
ġatuġa-maġini, mo ġofaġofa tarimana roġo maġuri nai, ekirato, ‘Ġaro toitoi muri-  
nai au tu mase na ma bavariġisi-ġenoġoini.’” <sup>64</sup> Moġa lorinai gadi tauri bono kirari,  
be guri gabuna beġene nari-ġinikaua, bene iaġo mo, ġaro toitoi murinai. Irau ġena  
mero beġe iaġoni, ma tauġanina beġe lemaiani, benamo tarimarima beġe ġofarini,  
beġe kirani, ‘Ġia tu mase na bevariġisi-ġenoġoi,’ beġe toni garina. Mai ġofaġofa

maiġa na ġofaġofa guinena bevanaġiani.” <sup>65</sup> Pilato na ekirarito, ekirato, “Gadi tari-mari ġoġabiri, ġeiaġo, be guri gabuna beġene ruġaġau-ginikaua.” <sup>66</sup> Benamo gara ġana ġeiaġoto, guri kouġana ekou-ġauato forena ġekada-ġauato, tabu vetoġana ta ġeveiato, benamo gadi tarimari ġetorerito, beġene riviġaua.

### Iesu evariġisi-ġenoġoito Ioane 20:1-18

**28** Sabadi ekorito murinai, fura ġarona giniguenai, boġiboġi iamoiamo, Maria, Magadala vavinena, Maria ta ġesi ġeiaġoto, gara gabuna ġea ġitaiato. <sup>2</sup> Asikauna tu tano-iaga baregona eġorato, korana Vereġauka ġena aneru ta guba na emariġoto, fore ekure-veġitaiato, benamo iatanai etanukauto. <sup>3</sup> Ġia vetoġana tu noġa moġo kiriku ekimoreani kavana, ema ġena dabuġa tu kuro-ġaroġaro kaufa o snou noġa. <sup>4</sup> Guri gabuna ġeġitaġauto tarimari tu ġegari-rakavato nai ġeġoġo-ġoġorito, benamo tano ai ġeketo-tarito mase tarimari kavana.

<sup>5</sup> Aneru na mo vavine evaġa-guruġarito, ekirato, “Asi ġogari, au ribagu ġomi tu Iesu, ġevaġa-satauroato tauna, ġovetauani. <sup>6</sup> Ġia mainai tu asiġina; ġia tu bevariġisi-ġenoġoi, evaġa-guruġamito ilailanai. Ġetoreato gabuna ġoma ġitaiata. <sup>7</sup> Be ġoiaġo-ġariġari, ġena mero boġonoa kira-varari, boġono kira, ‘Iesu tu mase na bevariġisi-ġenoġoi, ema beguineni Galilea ġana. Monai vau boġoa ġitaiani.’ Mai guruġa nakiravarami ġana baiaġoma.”

<sup>8</sup> Benamo mo vavine na guri gabuna ġeragakwane-ġariġariato, ma gariri e ma verereri ġesi ġeragato ġena mero ġeri ai, mo aneru ġena guruġa ġea vaġa-ribari ġana. <sup>9</sup> Ġeragato-ġoi nai, asikauna Iesu tu ġia ġoirari ai eruġato, ekirato, “Maino ġomi ġesi bene tanu!” Benamo ġoiranai ġevetui-tarito, kwakuna ġereġorito, ġetoma-rakariġo viniato. <sup>10</sup> Iesu na evaġa-guruġarito, ekirato, “Asi ġogari, ġoiaġo, au tarikakagu ġoa kiriri, Galilea ġana beġene iaġo; monai vau au beġene ġitagu.”

### Guri gabuna ġenari-ġauato vetari tarimari ġeri ġofaġofa guruġana

<sup>11</sup> Vavine ruarua dabara na ġeiaġoto-ġoi nuġanai, tuari tarimari tari, guri gabuna ġenari-ġauato tarimari, ġeġenoġoito vanuġa barana ġana, karakara ġeġorato dagarari mabarari Rubu Veaġa vereri baregori ġekira-vararito. <sup>12</sup> Benamo mo Rubu Veaġa vereri barari tu Iuda vereri ġesi ġeboioġa-vegogoto, gadi tarimari moni baregona ġevinirito. <sup>13</sup> Maiġesi ġekirarito, ġekirato, “Ġomi tu boġono kira, ‘Ġena mero boġi nuġanai beġe iaġoma, ġai tu genamai beġe lemaia.’ <sup>14</sup> Bema mai vari gavana na beseġaġiani nai tu, ġai na ġia nuġana baġa vei-magomagoani, be ġomi veiġa rakavana ta asi bevei-vinimini.” <sup>15</sup> Gadi tarimari na moni ġeġabiato, ġevaġa-guruġarito ilailanai ġeguruġato. Mai vari tu Iuda tarimari fakari ai ġekiraġi-rakaorakaoato, ma maitoma maki roġo ġekiraġiani.

### Iesu ġena mero ġeri ai eforito

*Mareko 16:14-18; Luka 24:36-49; Ioane 20:19-23*

<sup>16</sup> Ġena mero gabanana sebona (11) tu Galilea ġana ġeiaġoto, Iesu na ekiraġi-guineato ġorona ġana. <sup>17</sup> Monai ġeġitaiato nai, ġetoma-rakariġo viniato; senaġi tari tu ġedaradarato: ‘Mai tu moġoni Iesu ba?’ <sup>18</sup> Benamo Iesu eraka-kavito, evaġa-guruġarito, ekirato, “Barau na seġuka mabarana gubai ema tanobarai au varau bevinigu. <sup>19</sup> Moġa lorinai ġoiaġo tanobara mabarari ġana, bese mabarari ġegu mero ai boġono vaġa-iaġori. Ema Tamana, Natuna, Iauka Veaġa aranai boġono babatisori.

<sup>20</sup> Boḡono vaḡa-ribari maki, avinimito vevaḡa-naḡiri mabarari beḡene korana-iaḡiri. Boḡono riba, au tu ḡaro mabarari ai ḡomi ḡesi bita tanuni, beiaḡoni mo, tanobara magona!”



## VARI NAMONA MAREKO NA ETOREATO

Mareko vaġa-foforina guruġari

Mareko arana ta tu Ioane. Ġia tu dia mo Iesu ġena mero gabanana (12) vekaravari ai tarimana ta. Mai Vari Namona tu laġani 64 beiaġo 68 fakari ai ta etoreato, mo tu Iesu emaseto murinai. Mai fefa tu Roma siti ai Petero ġesi ġeġauvei-vegogoto nuġanai etoreato. Iesu ġekorana-iaġiato-ġoi tarimari Roma nuġanai ġetanuto-ġoi tarimari Iesu Varina Namona ekiravara-ginikaurito.

Mareko na ġia guruġana baregona ekira-vararito tu ekirarito, Iesu tu Barau ġena vetuġunaġi-iaġovinina tarimana namo vedaureana e ma ġena vetuġamaġikau (Mareko 10:45). Korana Iesu tu Barau ġena maoro baregona gaburenai eġauveito-ġoi ema ġena guruġa mabarari ekorana-iaġirito-ġoi. Moġeri tu Iesu na ġauvei e nuġa-farevaġi veiġari eveirito-ġoi moġerina ġeri ai evaġa-foforirito ġeri.

Mareko ġena toretore tu maiġesina eboioġaiato:

1. Vetuġunaġi tarimana Iesu ġena iaġoma ema everovinato veiġana - karoa 1:1-13
2. Vetuġunaġi tarimana ġena ġauvei - karoa 1:14-13:37
3. Vetuġunaġi tarimana ġena mase - karoa 14-15
4. Vetuġunaġi tarimana ġena variġisi-ġenoġoi ema guba vanuġana ġana ma evaraġeto - karoa 16

### Ioane Babatiso ġena ġobata

**1** Iesu Keriso Barau Natuna Varina Namona maiġesina evesinato. <sup>2</sup>Peroveta tari-  
mana arana Isaia na etoreato,

“Barau ekirato,

‘Au na ġegu vetuġunaġi tarimana tu batuġu-guineani,  
ġemu dabara vaġa-maġatana.’

<sup>3</sup>Tarima ta tano fakanai ekeani, ekirani,

‘Vereġauka ġena dabara ġoiarevaia,

ġena iaġoma dabarana ġovaġa-maoromaoroa!’”

<sup>4</sup>Moġa lorinai Ioane eiaġomato, tano fakanai tarimarima ebabatorito-ġoi e eġobatato-ġoi, tarimarima ġeri rakava ġerina beġene vetuġamaġi-kure e beġene raka-kure, ema babatiso beġene ġabia, Barau na ġeri rakava bene tuġamaġi-fitoġari ġana. <sup>5</sup>Tarimarima mabarari Iudea vanuġari na e Ierusalem na ġeiaġoto-ġoi Ioane ġenai. Ġeri rakava ġekiraġi-foforirito-ġoi vau, ebabatorito-ġoi Ioridana ġarukanai.

<sup>6</sup>Ioane ġena dabuġa tu kamela ġwiri na ġeveiato, ġena gabaġau tu nanigosi ke-  
fina, ġana ġaniġani dagarari tu madudu e gode nanuri moġo. <sup>7</sup>Eġobatato-ġoi, eki-  
rato, “Tarima ta au murigu na beiaġomani, ġia ġena seġuka na au ġegu seġuka tu  
evanaġiani. Au maki asi ilaila ġia ġena tamaka varona baruġaiani. <sup>8</sup>Au na ġomi tu  
nanu na ababatorismini, a ġia na tu Iauka Veaġa na bebabatorismini.”

### Ioane na Iesu ebabatorisoato

*Mataio 3:13-17; Luka 3:21-22*

<sup>9</sup>Mo negai Iesu tu Nasareta, Galilea vanuġana ta, na eiaġomato, benamo Ioane  
na Ioridana ġarukanai ebabatorisoato. <sup>10</sup>Iesu nanu na eraka-raġasito nuġanai, guba  
eġitaiato, evekeo-fakato, benamo Iauka Veaġa pune kavana emariġoto ġia ġenai.

<sup>11</sup> Benamo garo ta guba na ekea-riḡoto, ekirato, “Ḡoi tu au Natugu, aura-vinimuni; ema ḡemu ai aiaku-rakavani maki.”

### **Satani na Iesu eribaḡaniato**

*Mataio 4:1-11; Luka 4:1-13*

<sup>12</sup> Moḡa murinai Iauka Veaḡa na Iesu tano fakana ḡana etuḡu-iaḡoato. <sup>13</sup> Monai ḡaro e boḡi gabana vasivasi (40) etanuto, Satani na eriba ḡaniato-ḡoi. Ḡia tu boḡa bairi ḡesi ḡetanuto-ḡoi, aneru na ḡenariato-ḡoi.

### **Iesu ḡena ḡauvei esinaiato Galileai**

*Mataio 4:12-17; Luka 4:14-15*

<sup>14</sup> Ioane ḡediburaiato murinai, Iesu Galilea ḡana eiaḡoto, Barau Varina Namona ea ḡobata iaḡiato-ḡoi. <sup>15</sup> Eḡobatato, ekirato, “Barau ḡena ḡaro tu varau beraḡasi, ḡena Basileia bevotu, (ḡena veḡitaḡau seḡukana evaḡa-ruḡaiani maiḡa)! Ḡemi rakava ḡe-rina ḡovetuḡamaḡi-kure, Vari Namona nuḡami na ḡovaḡa-moḡonia!”

### **Iesu na tarima vasivasi (4) ekearito, ḡia murinai beḡene raka**

*Mataio 4:18-22; Luka 5:1-11*

<sup>16</sup> Iesu Galilea kou rikina na eraka-iaḡoto-ḡoi nuḡanai, Simona ma tarina Anduru ḡesi eḡitarito, ḡeri reke kou ai ḡefiuato, korana ḡia tu maina tarimari. <sup>17</sup> Benamo Iesu na evaḡa-guruḡarito, ekirato, “Ḡoiaḡoma, murigu ai ḡoma raka, be au na tu tari-marima maina viniri bana vaḡa-ribami.” <sup>18</sup> Benamo maoromaoro ḡeri reke ḡeraga-kwanerito, Iesu murinai ḡerakato.

<sup>19</sup> Asi ḡeraka-manaḡato, benamo Iesu na Iakobo (o Iames) Sebedaio, tarina Ioane ḡesi eḡitarito, ḡasi ai ḡeri reke ḡwadareri ḡeturirito-ḡoi; <sup>20</sup> ekearito, benamo ḡia na tamari Sebedaio ma ḡena ḡauvei tarimari ḡesi ḡasi ai ḡeraga-kwanerito, Iesu murinai ḡerakato.

### **Iauka rakavana na eboroḡiato tarimana**

*Luka 4:31-37*

<sup>21</sup> Ḡeraka-iaḡoto, Kaperanaumai ḡevotuto. Monai Sabadi ai Iesu Iuda tarimari ḡeri rubu ai eraka-toḡato, benamo evevaḡa-ribato. <sup>22</sup> Ḡia ḡena vevaḡa-riba guruḡari tari-marima na ḡeseḡaḡirito nai, ḡeḡaba-rakavato, korana tu ḡena guruḡa ma seḡukana, dia taravatu ḡevevaḡa-riba iaḡiato-ḡoi tarimari ḡeri guruḡa kavana.

<sup>23</sup> Mo rubu ai tarima ta tu iauka rakavana na eboroḡiato tarimana. Ḡia ekeato, ekirato, <sup>24</sup> “Iesu, Nasareta tarimamu o, kara ḡemai noveia otoni? Ḡoi tu ḡai vaḡa-rakavama uranai boiaḡoma? Au ribagu ḡoi tu deikara, ḡoi tu Barau ḡena Veaḡa Tarimamu!” <sup>25</sup> Iesu na ekira-ḡoiato, “Gurumu! Ḡia ḡenana noraka-vaḡi!” <sup>26</sup> Benamo iauka rakavana na mo tarima evaḡa-ḡoḡo-ḡoḡoato, benamo ma ḡabana ḡesi eraka-vaḡito. <sup>27</sup> Tarimarima mabarari ḡeḡaba-rakava rakavato, benamo tauḡeri ḡevedanaḡi-vedanaḡito, ḡekirato, “Mai tu kara? Vevaḡa-riba variḡuna? Ḡia tu ma seḡukana na iauka rakavari evaḡa-guruḡarini, ema garona maki ḡeseḡaḡiani!” <sup>28</sup> Benamo Iesu varina asikauna eraga-rovorovoto Galilea vanuḡari mabarari ai.

## Iesu na keve tarimari vovoka evaḡa-namorito

*Mataio 8:14-15; Luka 4:38-39*

<sup>29</sup> Rubu na ḡeraka-rosito murinai, Iakobo (o Iames) ema Ioane ḡesi ḡeiaḡoto, Simona ema Anduru ḡeri numai ḡea raḡekauto. <sup>30</sup> Simona ḡena taḡama vavinena tu ekevevo, tauḡanina eseḡukato, be egena-taḡoto-ḡoi, benamo Iesu ḡekira-varaiato. <sup>31</sup> Iesu eiaḡoto ḡenai, ḡimanai eḡabito, benamo evaḡa-tanu vaiasiato. Mo keve eko-rito, benamo ḡia eḡuburito.

<sup>32</sup> Lavilavi, ḡaro eketoto murinai, tarimarima na keve tarimari e iauka rakavari na ḡeboroḡirito tarimari Iesu ḡenai ḡeḡori-iaḡorito. <sup>33</sup> Vanuḡa tarimari mabarari numa ḡoiranai ḡevevogoto. <sup>34</sup> Iesu na keve irauirau tarimari vovoka evaḡa-namorito e iauka rakavari ḡutuma elai-vaḡirito. Iauka rakavari mururi ekourito asi beḡene gu-ruḡa, korana ḡia ribari Iesu.

## Iesu Galilea vanuḡari ai eḡobatato

*Luka 4:42-44*

<sup>35</sup> Boḡiboḡi rekenai, roḡosi bene laḡani nai, Iesu evariḡisito, tano fakana ḡana eiaḡoto, ea ḡuriḡurito. <sup>36</sup> Benamo Simona ma karoni ḡesi Iesu ḡea vetauato, <sup>37</sup> ḡea doḡariato nai, ḡekiraiato, ḡekirato, “Tarimarima na tu ḡoi ḡevetaumuni!” <sup>38</sup> Iesu evaḡa-veseto, ekirato, “Vanuḡa kavinaḡiri ḡana si-iaḡo. Moḡeri ai maki bana ḡobata, au ḡegu iaḡoma korana tu moḡa.” <sup>39</sup> Benamo ḡia eiaḡoto Galilea vanuḡari mabarari ḡana. Rubu ai eḡobatato-ḡoi e iauka rakavari elai vaḡirito-ḡoi.

## Lepera tarimana Iesu na evaḡa-namoato

*Mataio 8:1-4; Luka 5:12-16*

<sup>40</sup> Lepera tarimana ta Iesu ḡenai eiaḡoto, evetui-tarito, benamo enoḡiato, ekirato, “Bema ḡoi ourani nai, moḡoni boiarevaguni, bovaḡa-namoguni riba.” <sup>41</sup> Iesu na eve-tuḡaiato, ḡimana etuḡu-iaḡoato, eḡabi-karaiato, benamo ekirato, “Aurani, be non-amo!” <sup>42</sup> Benamo vaḡa-sebo lepera na eraga-kwaneato, enamoto. <sup>43</sup> Iesu na evaḡa-guruḡa gwaḡiḡiato, ekirato, <sup>44</sup> “Mai veiḡa tarima ta asi bono kira-varaia. Noiaḡo, Rubu Veaḡa verena na bene ḡitamu, ema veiareva varevare dagarari Mose na eki-raḡiato ilailanai bono vinia. Be tarimarima beḡene riba, ḡoi tu bonamo.”

<sup>45</sup> Senaḡi ḡia tu eiaḡoto, mo veiḡa varina efiuato. Moḡesi nai Iesu tu vanuḡa tai asi ma eraka-toḡato, a tano fakari ai moḡo etanuto-ḡoi. Senaḡina tarimarima gabu irauirauri na Iesu tu roḡo ḡeiaḡo-viniato-ḡoi.

## Iesu na rakava etuḡamaḡi-fitoḡarito

**2** ḡaro kotari ḡevanaḡito vau, Iesu Kaperanauma ḡana eḡenoḡoito. Tarimarima na varina ḡeseḡaḡiato Iesu tu numai. <sup>2</sup> Moḡa lorinai tarimarima ḡutuma ḡeḡaru-vegogoto, numa nuḡana ḡevaḡa-vonuato, eiaḡoto ḡatama-boka korana maki asi faka ta. Monai vau Iesu na Vari Namona eḡobata-vinirito, <sup>3</sup> nuḡanai tarima vasi-vasi (4) na tauḡanina tavi ta emaseto tarimana ta Iesu ḡenai ḡeḡwa-iaḡoato. <sup>4</sup> Tari-marima ḡutuma nai, asi ḡeri dabara Iesu sevina ḡana beḡe raka-kavi iaḡoni. Naima ḡia na Iesu eruḡato iatana ḡuduḡuna ḡeḡiu-vaḡiato vau, keve rakava tarimana ma gedana ḡesi ḡetuḡu-riḡoato Iesu ḡoirana ḡana. <sup>5</sup> Iesu na ḡeri veḡabidadama eḡitaiato

nai, ġia na keve rakava tarimana evaġa-guruġaiato, ekirato, “Natugu, ġemu rakava batuġamaġi-fitoġari.”

<sup>6</sup>Taravatu ġevevaġa-riba iaġiato-ġoi tarimari kotari monai tanutaġori ai, nuġari ai maiġesi ġetuġamaġito, <sup>7</sup>“Karase nai mai tarima moġesina ekirani? Ġia na Barau ekira-fitoġaiani. Dei na rakava betuġamaġi-fitoġarini? Barau moġo ġereġana!” <sup>8</sup>Iesu ma ribana ġia kara ġetuġamaġirito-ġoi nai edanaġirito, ekirato, “Karase nai maniġesi ġotuġamaġini? <sup>9</sup>Aiġesina baguruġani tu meraġa, keve rakava tarimana bavaġa-guruġaia, bakira, ‘Ġemu rakava batuġamaġi-fitoġari’ banasi, ba bara kiraia, ‘Noruġa-vaissi, ġemu geda noġabia, be noraka’ barasi? <sup>10</sup>Au na navaġa-ġitami, Tarimarima Natuna tu ma ġena maoro, rakava betuġa-maġi-fitoġarini mai tanobarai.” Ġia na keve rakava tarimana evaġa-guruġaiato, ekirato, <sup>11</sup>“Akiramuni, noruġa-vaissi, ġemu geda noġabia, be numa ġana noiaġo!” <sup>12</sup>Maoromaoro eruġa-vaissito, ġena geda eġabiato, tarimarima ġoirari ai eraka-rosito. Moġa lorinai mabarari ġeġaba-rakava rakavato, Barau ġevaġa-raġeato, ġekirato, “Maiġesina kavana ta roġosi tara ġitaia.”

### Iesu takesi gogo tarimari ġesi ġeġaniġani-vegogoto

*Mataio 9:9-13; Luka 5:27-32*

<sup>13</sup>Iesu ma eiaġoto kou rikinai. Tarimarima ġutuma ġia ġenai ġeiaġoto, benamo ġia na evaġa-ribarito. <sup>14</sup>Iesu eraka-iaġoto-ġoi nuġanai, ġia na Alfeo natuna arana Levi takesi moniri ġeġabito-ġoi numanai tanutaġo eġitaiato, benamo ekiraiato, ekirato, “Murigu ai noma raka.” Benamo Levi evariġisito, Iesu murinai erakato.

<sup>15</sup>Iesu Levi ġena numai eġani-ġanito-ġoi nai, takesi gogo tarimari e vei-rakava tarimari ġutuma maki Iesu ma ġena mero ġesi ġeġaniġani-vegogoto, korana tarimarima vovoka ġia murinai ġerakato-ġoi. <sup>16</sup>Taravatu ġevevaġa-riba iaġiato-ġoi tarimari, Farisea ġeri doġoro tarimari, na Iesu ġeġitaiato, takesi gogo tarimari e vei-rakava tarimari ġesi ġeġaniġani-vegogoto-ġoi, benamo ġia na Iesu ġena mero ġedanaġirito, ġekirato, “Ġia tu karase nai takesi gogo e vei-rakava tarimari ġesi ġeġaniġani-vegogoni?” <sup>17</sup>Iesu eseġaġito, benamo evaġa-guruġarito, ekirato, “Namo tarimari na doketa asi beġe vetaurini, senaġina keve tarimari na moġo. Au aiaġo-mato maki dia vei-iobukaibuka tarimari keakeari, senaġi vei-rakava tarimari.”

### Ġaniveaġa

*Mataio 9:14-17; Luka 5:33-39*

<sup>18</sup>Ġaro ta Ioane Babatiso ġena mero e Farisea tarimari ġeġani-veaġato-ġoi nai, tarima kotari Iesu ġenai ġeiaġoto, benamo ġedanaġiato, ġekirato, “Kara dainai Ioane Babatiso ġena mero e Farisea tarimari ġeri mero tu ġeġani-veaġani, senaġi ġoi ġemu mero tu asiġi?”

<sup>19</sup>Iesu na evaġa-veserito, ekirato, “Ġomi ġotuġamaġini, veġaraġo variġu tauna ġatana seviri ai etanuni nuġanai beġe ġani-veaġani ba? Asiġina! Veġaraġo variġu tauna ġatana seviri ai neganai, asi beġe ġani-veaġani. <sup>20</sup>Ġarona eiaġomani veġaraġo tauna ġatana ġerina beġe ġabi-veġitaiani, monai vau beġe ġani-veaġani.

<sup>21</sup>Tarima ta na dabuġa variġuna veseana dabuġa guinena ġesi asi bebani-vegogoani. Bema moġesina beveiani nai, dabuġa variġuna na guinena bedareani, ema vedarena maki bebaregoni. <sup>22</sup>Tarima ta na vine nanuna variġuna nanigosi ke-fina guinenai asi besisiani. Bema moġesina beveiani nai, vine nanuna variġuna na

nanigosi kefina guinena bevei-fakaiani. Vine nanuna e kefi beĝe rakavani. Senaĝi vine nanuna variĝuna nanigosi kefina variĝunai besisiani tu namo.”

### Iesu tu Sabadi Verena

*Mataio 12:1-8; Luka 6:1-5*

<sup>23</sup> Sabadi tai Iesu ma ĝena mero ĝesi widi vamokari na ĝeraka-vanaĝito-ĝoi nai, ĝena mero tu rakarakari ai widi ĝebukito-ĝoi. <sup>24</sup> Farisea tarimari na Iesu ĝekiraiato, ĝekirato, “Noĝitari, ĝia kara ĝeveini! Maniĝesi asi beĝene vei Sabadi ai, taravatu.”

<sup>25</sup> Iesu na evaĝa-veserito, ekirato, “Davida na kara eveiato guruĝari ĝoiaviato ba asiĝina, ĝia ma karona ĝesi ĝevitorito nai? <sup>26</sup> Barau ĝena numai eraka-toĝato, Barau ĝoiranai ĝetorerito-ĝoi beredi eĝabito, eĝanito, karona maki evinirito. Mo beredi tu veaĝa veĝata, Rubu Veaĝa vereri ĝereĝari moĝo ĝari. Mo veĝa tu Abiata Rubu Veaĝa verena baregona ĝena negai eĝorato.”

<sup>27</sup> Benamo Iesu na ma ekirarito, ekirato, “Barau na Sabadi eveiato tu tarimarima ĝeri, dia tarimarima eveirito Sabadi ĝena. <sup>28</sup> Moĝesi nai Tarimarima Natuna tu Sabadi Verena.”

### Ĝima boso tarimana

**3** Ĝaro tai Iesu rubu ai ma eraka-toĝato. Ĝima boso tarimana ta tu monai. <sup>2</sup> Tarima kotari maki monai, Iesu ĝeĝita-taĝoato-ĝoi, Sabadi ai mo tarima bevaĝa-namoani ba, beĝene ĝita-kaua, be beĝene vaĝa-bade-iaĝia ĝetato-ĝoi nai. <sup>3</sup> Iesu na ĝima boso tarimana evaĝa-guruĝaiato, ekirato, “Noruĝa-vaisi, tarima mabarari ĝoirari ai noma ruĝa.” <sup>4</sup> Benamo Iesu na edanaĝirito, ekirato, “Aiĝa tu maoro, Sabadi ai veĝa namori veiveiri namo ba veĝa rakavari sini veiri? Tana vevaĝa-maĝuri ba tana vaĝivaĝi?”

Senaĝi ĝia asi ĝeguruĝato. <sup>5</sup> Iesu ma baruna e ma nuĝa-metona ĝesi eĝita-ĝeĝeraĝirito, korana tarimarima ĝenuĝa-bubuto nai. Benamo ĝima boso tarimana ekiraiato, ekirato, “Ĝimamu notuĝu-roroĝotoa.” Ĝimana etuĝu-roroĝotoato, benamo enamoto. <sup>6</sup> Moĝa murinai Farisea tarimari rubu na ĝeraka-rosito, Heroda murinai ĝerakato-ĝoi tarimari ĝesi ĝeboioĝa-vegogoto, Iesu kamasi beĝe vaĝiani dabarana ĝevetauato.

### Tarimarima ĝutuma Galilea kouna rikinai

*Luka 6:17-19*

<sup>7</sup> Iesu ma ĝena mero ĝesi ĝeraka-veĝitato, Galilea kouna ĝana ĝeiaĝoto. Tarimarima ĝutuma lelevaĝi Galilea na ĝia murina na ĝeiaĝoto, ema vovoka lelevaĝi maki Iudea na, <sup>8</sup> Ieruselema na, Idumea na, Ioridana ĝaruka mo reke na, Taia e Sidono rekeri na ĝeiaĝoto, korana Iesu varina ĝeseĝaĝiati nai. <sup>9</sup> Tarimarima ĝutuma nai, Iesu na ĝena mero ekirarito, ĝasi misina ta beĝene ĝabi-torea, tarimarima ĝutuma be beĝe ruĝaruĝa-ĝaŭani garina. <sup>10</sup> Iesu na keve tarimari ĝutuma evaĝa-namorito dainai, keve tarimari mabarari maki ĝeĝoto-iaĝoto, Iesu ĝenai beĝene veĝabi-kau ĝana. <sup>11</sup> Iauka rakavari na ĝeboroĝirito tarimari na ĝia ĝeĝitaiato tu, ĝoiranai ĝeketo-tarito, ĝekoĝoto, ĝekirato, “Ĝoi tu Barau Natuna!”

<sup>12</sup> Iesu na evaĝa-guruĝa gwaĝiĝirito, asi beĝene vaĝa-foforia ĝia tu deikara.

## Iesu na tarima gabanana ruarua (12) eḡabi-viriḡirito

*Mataio 10:1-4; Luka 6:12-16*

<sup>13</sup> Moḡa murinai Iesu ḡoro ḡana evaraḡeto, benamo eura-vinirito tauri ea kearito, benamo ḡia ḡenai ḡeiaḡoto. <sup>14</sup> Iesu na tarima gabanana ruarua (12) eḡabi-viriḡirito, arari apostolo evatorito, ḡia beḡene kavaia. Benamo ma bene tuḡuri, beḡene ḡobata, <sup>15</sup> ema seḡuka beḡene ḡabi, iauka rakavari beḡene lai-vaḡiri.

<sup>16</sup> Eḡabi-viriḡirito tarimari tu maiḡeri: Simona, arana variḡuna evatoato Petero; <sup>17</sup> Iakobo (o Iames), Sebedaiο natuna, ma tarina Ioane ḡesi, arari variḡuna evatoato, Boanere, anina tu guba eguruani natuna; <sup>18</sup> Anduru; Filipino; Batolomeo; Mataio; Tomasi; Iakobo (o Iames), Alfeo natuna; Tadeo; Simona, Selote tarimana; <sup>19</sup> ema Iudas Isakariota, ḡia tu Iesu berevaiani tarimana.

## Iesu ema Belsebul

*Mataio 12:24-32; Luka 11:14-23; 12:10*

<sup>20</sup> Iesu tu numai ma eraḡekauto. Tarimarima ḡutuma lelevaḡi ma ḡevegogo-ḡenoḡoito nai, ḡia ma ḡena mero ḡesi asi ḡeri ḡaniḡani dabarana. <sup>21</sup> Iesu garagarana na varina ḡeseḡaḡiatio, benamo ḡabiḡoina ḡeiaḡoto, korana tarimarima ḡekirato, “Ḡia tu bebabo!” ḡetato nai.

<sup>22</sup> Taravatu ḡevevaḡa-riba iaḡiatio-ḡoi tarimari Ierusalemna na ḡemariḡoto, ḡekirato, “Belsebul, (mai tu Satani), iauka rakavari ḡeri vere, na ḡia eboroḡiatio nai, iauka rakavari elai-vaḡirini.”

<sup>23</sup> Benamo Iesu na ekea-iaḡoma-rito, barabore ai evaḡa-guruḡarito, ekirato, “Satani na Satani kamasi belai-veḡitaiani? <sup>24</sup> Bema gavamani ta bevetavini, tauḡena bevevaḡi-vinini nai, mo gavamani asi beruḡani riba. <sup>25</sup> Bema doḡoro ta bevetavini, tauḡena bevevaḡi-vinini, mo doḡoro maki asi beruḡani riba. <sup>26</sup> Bema Satani bevetavini, tauḡena bevevaḡi-vinini, ḡia asi beruḡani, senaḡi bekorini.

<sup>27</sup> Tarima ta na gwada tarimana ḡena numai asi beraka-toḡani riba, ḡena farefare asi beberariani riba, senaḡi mo gwada tarimana bebarubaru-guineani vau, ḡena numa farefareri beberariani.

<sup>28</sup> Moḡoni akiramini, tarimarima rakava beḡe veini ema Barau beḡe kira-fitoḡaiani tarimari ḡeri rakava mabarari Barau na betuḡamaḡi-fitoḡarini riba. <sup>29</sup> Senaḡi tarima ta na Iauka Veaḡa bekira-fitoḡaiani tarimana, ḡena rakava asi betuḡamaḡi-fitoḡaiani, mo rakava tu betanu-vanaḡi vanaḡini.” <sup>30</sup> Iesu moḡesi ekirato, korana tarima kota ḡekirato, “Ḡia tu iauka rakavana ḡia nuḡanai” ḡetato nai.

## Iesu sinana ema tarina

*Mataio 12:46-50; Luka 8:19-21*

<sup>31</sup> Benamo Iesu sinana ma tarina ḡeraḡasito. Numa murikanai ḡeruḡa-tarito, ḡevetuḡuto, Iesu ḡea kiraia, ḡema vaḡa-guruḡaia ḡana. <sup>32</sup> Ḡia tu tarimarima ḡutuma na ḡetanu-ḡeḡeraḡiatio, benamo ḡekiraiatio, ḡekirato, “Ḡoi sinamu e tarimu tu murikai, ḡoi ḡevetaumuni.” <sup>33</sup> Iesu na evaḡa-veserito, ekirato, “Au sinagu e au tarigu tu deiri?” <sup>34</sup> Benamo ḡetanu-ḡeḡeraḡiatio tarimari eḡitarito, ekirato, “Au sinagu e au tarigu tu maiḡeri!” <sup>35</sup> Barau ḡena ura ḡeveirini tarimari tu au tarigu, e au tobagu, ema au sinagu.”

### Barabore - Iaraġa tarimana na widi ġueri efiurito

**4** Iesu ma ea vevaġa-riba ġenoġoito Galilea kouna rikinai. Tarimarima ġutuma lel-evaġi na ma ġea vegogo-ġeġeraġiatio nai, ġasi ai ma eraġekauto, benamo etanutarito. Ġasi kota ġelei-veġitatio, a tarimarima tu kou rikina na moġo ġevegogo-iaġoto. <sup>2</sup> Iesu na dagara vovoka evaġa-ribarito barabore ai. Ġia ġena vevaġa-riba nuġanai ekirato,

<sup>3</sup> “Goseġaġi! Iaraġa tarimana ta eiaġoto, ġena widi ġueri benea fiuri ġana. <sup>4</sup> Efiurito-ġoi nai, kota tu dabarai ġeketoto. Benamo manu ġeiaġomato, ġeġanir-ito. <sup>5</sup> Kotari tu forefore gaburi ai ġeketokauto tano maġiġiri ai. Asikauna ġetuburaġeto, korana tano iatanai moġo. <sup>6</sup> Benamo ġaro eraġekauto nai, ġia ġemaġuġuto, korana lamuri asi ġevariġo-ġitakauto lorinai, asikauna ġemaseto. <sup>7</sup> Kotari tu ġauġa ġiniġiniri nuġari ai ġeketoto. Benamo ġauġa ġiniġiniri ġetubu-baregato, varovaro dagarari ġetubu-ġaurito e ġetuturarito nai, asi ġeġwato. <sup>8</sup> Kotari tu tano namonai ġeketoto, benamo ġetubu-ġinikauto, ġegara-baregato, ġeġwato kotari ġwari tu gabana toitoi (30), kotari tu gabana imaima ma gabanana (60), kotari tu sinau sebona (100).”

<sup>9</sup> Benamo Iesu ekirato, “Ma seġana tarimana bene seġaġi!”

### Kara dainai Iesu na barabore ekiraġirito

*Mataio 13:10-17; Luka 8:9-10*

<sup>10</sup> Iesu ġereġana moġo ġaronai, ġena mero gabanana ruarua (12) ma ġia murinai ġerakato-ġoi tarimari kotari tu ġia sevinai ruġa-ġeġeraġi, benamo mo barabore anina ġevedanaġi-iaġiatio. <sup>11</sup> Iesu na evaġa-guruġarito, ekirato, “Barau ġena Basileia guruġari vekuretoġari ġomi ġemi ai tu fofori, senaġi murika tarimari tu barabore ai avaġa-guruġarini, korana tu,

<sup>12</sup> ‘beġene ġitaia,

senaġi anina asi beġene ribaia,

beġene seġaġia,

senaġi asi beġene tuġamaġi-maoroa,

beġe vetuġamaġi-kureni Barau ġenai,

benamo ġeri rakava betuġamaġi-fitoġarini garina.”

### Widi ġueri baraborena anina

*Mataio 13:18-23; Luka 8:11-15*

<sup>13</sup> Benamo Iesu na ma evaġa-guruġarito, ekirato, “Mai barabore anina asi ġorib-aiiani nai, barabore tari tu kamasi boġo ribarini? <sup>14</sup> Iaraġa tarimana na Barau ġena guruġa efiuani. <sup>15</sup> Tarima kotari tu widi ġueri dabarai ġeketoni kavana. Guruġa ġeseġaġini nai, Satani na eġabivaġi-ġariġaririni. <sup>16</sup> Tarima kotari tu widi ġueri forefore ai ġeketoni kavana. Guruġa ġeseġaġini nai, ma iakuri ġesi ġeġabi-raġeani. <sup>17</sup> Senaġi guruġa tarima nuġari ai asi ġevetoreni nai, asi ġetanu-maukani. Barau ġena guruġa dainai, nega rakavari ġeġoitaġoni, e ġevanerini, o ġevaġa-midigu midigurini ġarori ai ġia ġenana ġeraka-veġitani. <sup>18</sup> Tarima kotari tu widi ġueri ġauġa ġiniġiniri nuġari ai ġefiurini kavana. Barau ġena guruġa ġeseġaġiani, <sup>19</sup> senaġi tanobara dagarari tuġamaġiri na, tanobara farefareri ġetuġamaġi-gogogorini, ema ġeri ura dagarari kotari na Barau ġena guruġa ġelautariani, naima Barau ġena guruġa ġia

ġeri ai asi ġwaġwari. <sup>20</sup> Tarima kotari tu widi ġueri tano namonai ġefiurini kavana. Guruġa ġeseġaġiani, ġeġabi-raġeani, tauri ġevetoreni kotari tu gabana toitoi (30), kotari tu gabana imaima ma gabanana (60), kotari tu sinau sebona (100).”

### Lamefa betore-kauani

*Luka 8:16-18*

<sup>21</sup> Iesu na ma evaġa-guruġarito, ekirato, “Tarima ta lamefa begabuani nai, ġuro na beġoġoi-tariani o fata gaburenai betoreani? Asiġina, toretorena fatanai betore-kauani. <sup>22</sup> Vekuretoġa dagarari mabarari beġe foforini, ġeseġo-ġaurito dagarari mabarari beġe ġabi-fakarini. <sup>23</sup> Ma seġana tarimana bene seġaġi!”

<sup>24</sup> Iesu na ma ekirarito, ekirato, “Boġo seġaġirini guruġari boġono tuġamaġi-ginikauri. Ġemi seġaġi ilailari ai Barau na riba e tuġamaġi-faka bevinimini. Tuġamaġi-faka kotari ma betore-kaurini. <sup>25</sup> Ma ġena seġaġi tarimana tu tuġamaġi-faka beviniani, asi ġena seġaġi tarimana, ġena tuġamaġi-faka misina maki beġabi-vaġiani.”

### Barabore - Widi ġueri tauġeri ġetubuni

<sup>26</sup> Iesu ma ekirato, “Barau ġena Basileia tu noġa moġo tarima ta, widi ġueri tano ai efiurini kavana. <sup>27</sup> Ġia tu boġi ai egenani, laġani ai evariġisini nuġanai, mo widi ġueri ġetubuni, ġegarani, senaġina ġia tu asi ribana kamasi ġegarani. <sup>28</sup> Tano tauġena na tauna evaġa-ġoraiani. Guine tu gwabena etoreani, gabivau fekana, moġa murinai tauna etoreani feka nuġanai. <sup>29</sup> Tauna bekirini nai, bebasiani, korana basi-basi ġarona bevotu.”

### Barabore - Mastadi ġauna ġutuna

*Mataio 13:31-32; Luka 13:18-19*

<sup>30</sup> Iesu evedanaġito, ekirato, “Barau ġena Basileia tu kara ġesi bita vaġa-ilailaiiani? Kamara barabore na bevaġa-foforiani? <sup>31</sup> Ġia tu mastadi ġauna ġutuna ta noġa, tano-barai varovaro dagarari ġueri mabarari fakari ai ġia ġereġana misina korokoro, tano ai ġevaroani. <sup>32</sup> Senaġi tano ai ġevaroani nai, egara-varaġeni, varovaro dagarari mabarari fakari ai ġia moġo barego vedaurea. Ġia legana maki baregori ġetubuni. Monai rovo manuri ġia legana iauġanai ġenuġini.”

<sup>33</sup> Moġesina kavana baraboreri asisebo ai Iesu na Barau ġena guruġa eġobata-vinirito-ġoi, ġia ġeri riba e tuġamaġi-faka ilailari ai. <sup>34</sup> Ġena ġobatai barabore asi eraga-kwanerito-ġoi, senaġi ġena mero moġo ġereġari ai vau, guruġa aniri mabarari evaġa-foforirito-ġoi.

### Iesu na iavara e geta o ureure ekira-ġoirito

*Mataio 8:23-27; Luka 8:22-25*

<sup>35</sup> Mo lavilavi ai Iesu na ġena mero ekirarito, ekirato, “Siveġasi-vanaġi, kou mo rekena ġana.” <sup>36</sup> Benamo mo tarimarima ġutuma ġeraga-kwanerito, ġena mero na ġekavaiato Iesu etanu-taġoto-ġoi ġasinai, benamo ġeġura-rakaiato. Ġasi kotari maki ġia ġesi. <sup>37</sup> Iavara asi keikeina ta eraġasito e ureure barego maki ġasi ai evebubugurato-ġoi, ġasi maki dori evonuto-ġoi. <sup>38</sup> Iesu tu ġasi gabina filatanai egenato-ġoi. Ġena mero na ġevaġoato, ġekirato, “Vevaġa-riba tarimamu o, ġoi tu asi ogarini? Ġita tu mai taburuni!”



<sup>39</sup> Benamo Iesu evariĝisito, iavara ekira-ĝoiato e ureure ekiraiato, “Nodoko, asi noĝareva.” Benamo iavara edokoto e emeĝomeĝo-tarito, asi eĝareva-ĝarevato. <sup>40</sup> Iesu na ĝena mero ekirarito, ekirato, “Karase nai ĝogarini? Ĝomi tu roĝo asi ĝemi veĝabidadama?”

<sup>41</sup> Ĝia ĝegari-rakava rakavato, benamo tauĝeri ĝevedanaĝi-vedanaĝito, ĝekirato, “Mai tu kamara tarima? Iavara e ureure na maki garona ĝeseĝaĝiani!”

### Iesu na iauka rakavari na ĝeboroĝiatio tarimana evaĝa-namoato

**5** Kou tavi tai ĝea vanaĝito Gerasa (o Gadara) tarimari ĝeri gabu ai. <sup>2</sup> Iesu ĝasi na eraka-rigoto-ĝoi nai, iauka rakavana na eboroĝiatio tarimana ta gara gabuna na eiaĝomato-ĝoi Iesu ĝenai. <sup>3</sup> Ĝia tu gara kouĝari ai etanuto-ĝoi. Tarimarima ĝia barutarinai ĝeferauto, seini maki ĝia ĝenai asi gwaĝiĝi. <sup>4</sup> Nega ĝutuma kwakuna e ĝimana seini na ĝebarurito-ĝoi, senaĝi seini edabu-ĝuturito-ĝoi, ema kwakunai auri dagarari maki elau-kirarito-ĝoi. Ĝia tu gwada rakava, tarima ta na maki asi bevaĝa-maranaiani riba. <sup>5</sup> Boĝi e laĝani ai ĝia tu garai e ĝoro tuĝuri ai ekoĝoto-ĝoi ema tauĝena maki fore na everamato-ĝoi.

<sup>6</sup> Ĝia na Iesu manaĝai eĝitaiato, eraga-iaĝoto, ĝoiranai eketo-tarito, <sup>7</sup> ekoĝoto eduetto, ekirato, “Iesu o, Iaru-korokoro Barauna Natuna, kara au ĝegu ai noveia otoni? Barau aranai anoĝimuni, asi bono vaĝa-midigu midigugu.” <sup>8</sup> Ĝia moĝesi ekirato, korana Iesu na evaĝa-guruĝaiato, ekirato, “Iauka rakavamu, mani tarima ĝenana noraka-vaĝi!” <sup>9</sup> Benamo Iesu na edanaĝiatio, ekirato, “Ĝoi aramu tu deikara?” Ĝia evaĝa-veseto, ekirato, “Au aragu tu ‘Vetari Tarimari Ĝutuma,’ korana ĝai tu vovoka.” <sup>10</sup> Ĝia na Iesu enoĝi-ĝiĝiraĝeato, mo gabu na asi bene lai-rosiri.

<sup>11</sup> Monai bai serina ĝoro gabakanai ĝedokadokato-ĝoi. <sup>12</sup> Moĝesina nai iauka rakavari na Iesu ĝenoĝiatio, ĝekirato, “Notuĝuma bai ĝeri ai, ĝia nuĝari ai ĝaraka-toĝa.” <sup>13</sup> Iesu na etuĝu-iaĝorito. Benamo iauka rakavari mo tarima ĝenana ĝeraka-vaĝito, bai nuĝari ai ĝeraka-toĝato. Benamo lalaĝa na ĝekokosi-firiĝoto, kou ai ĝevebora-ĝuĝututo. Mo bai serina nuĝanai bai mabarari 2,000 kavana.

<sup>14</sup> Bai ĝitaĝauri tarimari ĝeragato, mo vari ĝea fiuato vanuĝa barana nuĝanai e vanuĝa keiri ai. Tarimarima ĝeraka-rosito, ĝeiaĝoto mo kara eĝorato dagarana ĝitaĝitana. <sup>15</sup> Iesu ĝenai ĝeraĝasito nai, ĝia na mo tarima iauka rakavari vovoka na ĝeboroĝiatio tarimana ĝeĝitaiato, ma dabuĝana e ĝena tuĝamaĝi maki maoro etanutaĝoto-ĝoi, benamo ĝia mabarari ĝegarito. <sup>16</sup> Mo veĝa ĝeĝorato, ĝeĝitarito tarimari na iauka rakavari na ĝeboroĝiatio tarimana varina, ema bai variri, tarimarima ĝekiravararito. <sup>17</sup> Benamo ĝia na Iesu ĝenoĝiatio, ĝeri tano na bene raka-veĝita.

<sup>18</sup> Iesu ĝasi ai eraĝekauto-ĝoi nai, iauka rakavari ĝenana ĝeraka-vaĝito tarimana na enoĝiatio, Iesu ĝesi bene iaĝo etato. <sup>19</sup> Senaĝi Iesu na ekiraiato, ekirato, “Noĝenoĝoi numa ĝana e ĝemu numa tarimari ĝeri ai. Benamo bonoa kira-varari, Barau na ĝemu ai kara beveia ema ĝena vevetuĝaĝwa ĝemu ai beĝora dagarana.” <sup>20</sup> Benamo ĝia eiaĝoto Vanuĝa Gabanana (10) tanori ai, ea vevari-fiuto, kara Iesu na ĝia ĝenai eveiato. Benamo tarimarima mabarari ĝeĝaba-rakavato.

### Iesu na kekeni ta ema vavine ta evaĝa-namorito

*Mataio 9:18-26; Luka 8:40-56*

<sup>21</sup> Iesu ĝasi na ma eĝenoĝoito kou tavi ta ĝana maia. Mo kou rikinai tarimarima ĝutuma lelevaĝi na ma ĝea ĝaru-ĝeĝeraĝiatio. <sup>22</sup> Rubu ĝitaĝauna tarimana ta arana Iairo

eiaĝoto, Iesu eĝitaiato nai, kwakuna koranai evetui-tarito, <sup>23</sup> ma nuĝana mabarana ĝesi enoĝiatio, ekirato, “Au natugu kekenina bekeve-rakava, dori emaseni. Mani ĝemu veĝa, noiaĝoma, ĝimamu iatanai bono tore-kaua, be natugu bene namo!”

<sup>24</sup> Benamo Iesu ĝia ĝesi ĝeiaĝoto-ĝoi nai, tarimarima ĝutuma lelevaĝi maki ĝeĝo-tokauto, ĝia na ĝeraka-vebibu vebibiatio-ĝoi.

<sup>25</sup> Monai vavine ta, ĝena keve tu rara kevena, laĝani gabanana ruarua (12) ekeve-iaĝiatio. <sup>26</sup> Doketa vovoka na muramura ĝeviniatio-ĝoi, senaĝi asi enamoto-ĝoi. Ĝena moni mabarari evaĝa-koririto, nenamo ĝana, senaĝi asi enamoto-ĝoi, ĝena keve moĝo emeto-iaĝoto-ĝoi. <sup>27</sup> Ĝia na Iesu varina eseĝaĝiatio naima eiaĝomato, tarimarima ĝutuma nuĝari na eraka-rokarokato mo Iesu murinai ea raĝasito, benamo ĝena dabuĝai eveĝabikauto. <sup>28</sup> Korana tu ĝia evetuĝamaĝito, “Ĝena dabuĝai moĝo haveĝabikauni nai banamoni.” <sup>29</sup> Benamo rara kevena edokoto, tauĝaninai emami-raĝiatio ĝena keve varau ekorito.

<sup>30</sup> Mo negai Iesu eribato, ĝia ĝenana seĝuka eraka-vaĝito. Benamo tarimarima ĝutuma nuĝari na eruĝa-kureto, evedanaĝito, ekirato, “Deikara na au ĝegu dabuĝa beĝabi-karaia?” <sup>31</sup> Ĝena mero ĝevaĝa-veseto, ĝekirato, “Noboĝeboĝe, mai tarimarima tu ĝutuma na ĝebebesi-karamuni, kamasu tu ma ovedanaĝini, okirani, ‘Deikara na beĝabi-karagu?’” <sup>32</sup> Senaĝi Iesu tu roĝo eboĝeboĝeto-ĝoi, eĝabi-karaiato tarimana eĝita-vetauato-ĝoi. <sup>33</sup> Mo vavine eriba-maoroto kara ĝenai eĝorato, benamo ma garina e ma ĝoĝo-ĝoĝona ĝesi Iesu kwakuna koranai ea vetui-tarito, benamo kara eĝorato mabarana ekiraĝi-foforirito. <sup>34</sup> Iesu na mo vavine evaĝa-guruĝaiatio, ekirato, “Natugu, ĝemu veĝabidadama na bevaĝa-namomu. Be, ma iakumu ĝesi noiaĝo, ĝemu keve bekori-moĝovaĝi.”

<sup>35</sup> Iesu roĝo eguruĝato-ĝoi nuĝanai, rubu ĝitaĝauna tauna Iairo ĝena numa na tarima kotari ĝeiaĝomato, Iairo ĝekiraiatio, ĝekirato, “Natumu tu bemase. Vevaĝariba tarimana asi novaĝa-vekwaraĝia.” <sup>36</sup> Iesu na mo guruĝa tu eseĝaĝi-ĝuiragiatio moĝo, benamo rubu ĝitaĝauna tarimana evaĝa-guruĝaiatio, ekirato, “Asi bono gari, bono veĝabidadama moĝo.” <sup>37</sup> Benamo Iesu na mabarari ekira-ĝoirito, murina na asi beĝene iaĝo, senaĝi Petero, e Iakobo (o Iames), ema tarina Ioane moĝo ĝia ĝesi beĝene iaĝo. <sup>38</sup> Iairo ĝena numai ĝeraĝasito, benamo Iesu na tarimarima eĝitarito, ĝeguru-raĝeto-ĝoi e ĝetaĝi-guruĝa guruĝato-ĝoi. <sup>39</sup> Benamo Iesu numai erakatoĝato, evaĝa-guruĝarito, ekirato, “Karase nai ĝoguru-raĝeni e ĝotaĝini? Kekeni tu asi bemase, ĝia tu egenani moĝo.” <sup>40</sup> Senaĝina tarimarima na ĝerikiriki-iaĝiatio. Benamo Iesu na etuĝu-rosirito, bena kekeni tamana sinana e ĝia ĝekavaio tarimari toitoi ĝesi moĝo kekeni ĝevaĝa-ĝenaiatio gabunai ĝeraka-toĝato. <sup>41</sup> Benamo Iesu na kekeni ĝimanai eĝabito, evaĝa-guruĝaiatio, ekirato, “Talita kumi!” Mo guruĝa anina tu “Kekeni, au na ĝoi akiramuni, novariĝisi!” <sup>42</sup> Benamo kekeni vaĝa-sebo evarigiatio, erakaorakaoto. Ĝia ĝena laĝani tu gabanana ruarua (12). Mai veĝa eĝorato nai, tarimarima ĝeĝaba-rakava rakavato. <sup>43</sup> Iesu na evaĝa-guruĝarito, mai veĝa varina asiĝina ĝinavaĝi beĝene kiraĝia etato, ema ekirarito, mo kekeni beĝene ĝubua.

### Iesu Nasareta tarimari na asi ĝeĝubakauato

**6** Iesu na mo gabu eraga-kwaneato, benamo ĝena vanuĝa ĝana eiaĝoto; ĝia ĝena mero maki murina na ĝeiaĝoto. <sup>2</sup> Sabadi ĝaronai Iesu tu rubu ai ma ea vevaĝa-ribato, tarimarima ĝutuma na ĝeseĝaĝiatio tu, ĝeĝaba-rakavato, ĝekirato, “Mai tarima mai riba tu ainana eĝabito? Ĝena iaunega maki dei na eviniatio? Mai

nuġa-farevaġi veiġa boruri tu kamasi eveirini ġimana na? <sup>3</sup> Ġia tu kamuda tarimana, ene? Maria natuna; Iakobo (o Iames), e Iosefa, e Iudas, e Simona kakari, ema tobana naki sevirai inġeri.” Benamo asi ma ġevaġa-moġoniato-ġoi.

<sup>4</sup> Iesu na ekirarito, ekirato, “Peroveta tarimana tu gabu mabarari ai beġe gubakauani, senaġi ġena vanuġa korikori, garagarana, ema ġena numa tarimari, na moġo asi beġe gubakauani.”

<sup>5</sup> Monai ġia na seġuka veiġari boruri asi eveito, a keve tarimari tu sebosebo moġo iatari ai ġimana etore-kauato, evaġa-namorito. <sup>6</sup> Iesu edaradara-rakavato, korana asi ġeri veġabadama nai.

### Iesu ġena mero gabanana ruarua (12) etuġurito

*Mataio 10:5-15; Luka 9:1-6*

Benamo Iesu ma erakato, eiaġoto vanuġa kotari ai ma ea vevaġa-ribato-ġoi. <sup>7</sup> Benamo Iesu na ġena mero gabanana ruarua (12) ekearito, benamo ruari ruari etuġurito, ema seġuka evinirito, iauka rakavari beġene lai-vaġiri ġana. <sup>8</sup> Iesu na evaġa-naġirito, ekirato, “Kara ta asi boġono ġabi-kaua ġemi iaġoiġo ai, togoi moġo. Dura, ġaniġani dagarari e moni maki asi boġono ġwakau. <sup>9</sup> Tamaka boġono vei, senaġi sedi ruarua asi boġono vei.” <sup>10</sup> Ma evaġa-guruġarito, ekirato, “Numa tai boġo raġekauni nai, mo numai moġo boġono tanu, bene iaġo mo, vanuġa boġono raga-kwanea. <sup>11</sup> Bema vanuġa tai asi beġe ġabi-raġemini e garomi asi beġe seġaġirini nai, boġono raga-kwanea, kwakumi kauri moġo boġono kwari-ketoketori ġia ġeri kira-sirivaġi vaġa-moġoniri ġana.”

<sup>12</sup> Benamo ġeiaġoto, ġea ġobatato, tarimarima ġeri rakava na beġene vetuġamaġi-kure e beġene raka-kure ġana. <sup>13</sup> Iauka rakavari vovoka tarimarima ġerina ġelai-vaġirito, keve tarimari ġutuma maki diġa na ġedaurito, ġevaġa-namorito.

### Ioane Babatise ġena mase

*Mataio 14:1-12; Luka 3:19-20; 9:7-9*

<sup>14</sup> Heroda, Galilea verena, na mai veiġa variri ea seġaġirito, korana Iesu arana gabu mabarana eraga-rovorovoto. Tarima kotari ġekirato, “Ioane Babatise mase na ma bevariġisi-ġenoġoi. Moġa lorinai mai veiġa baregori mabarari evaġa-foforirini.”

<sup>15</sup> Ma kota ġekirato, “Mai tu Elia,” ma kota ġekirato, “Mai tu Peroveta tarimana ta, peroveta tarimari guineri kavana.” <sup>16</sup> Senaġi Heroda eseġaġito nai, ekirato, “Mai tu Ioane Babatise, au na debana abasi-ġutuato tarimana, mase na ma bevariġisi-ġenoġoi!”

<sup>17</sup> Korana Heroda tauġena evetuġuto, Ioane ġea ġabi-tariato, benamo dibura numai ġebarubaruato, ġebiri-ġauato. Mo veiġa eveiato, korana tu etava-rariato vavina Herodia, ġia kakana Filipino ġaraġona, bene vaġa-iakua ġana. <sup>18</sup> Ioane na Heroda evaġa-guruġaiato-ġoi, ekirato, “Ġoi na kakamu ġaraġona boġaraġo-veraria tu asi maoro!” <sup>19</sup> Moġesina nai Herodia na Ioane ebaru-viniato, ġena ura bene vaġia, senaġina asi ġena dabara, <sup>20</sup> korana Heroda na Ioane egari-viniato-ġoi e eġita-ġauato-ġoi. Heroda ribana Ioane tu vei-iobukaiobuka ema veaġa tarimana. Ioane garona eseġaġiato nai, edaradarato-ġoi, senaġi eurato bene seġaġi-vinia.

<sup>21</sup> Herodia ġena ġaro namona ta eraġasito. Heroda ġena ġora ġarona vetuġamaġi-iaġina verekona o betdei pati eveiato, ġena veġuine-iaġi tarimari baregori, e vetari ġorikauri tarimari, ema Galilea vanuġari ai veġuine-iaġi tarimari ekearito. <sup>22</sup> Hero-

dia natuna ġuiatona ema raka-toġato, benamo ebarato nai, Heroda ma ġena varivari tarimari mabarari ġesi evaġa-iakurito. Benamo Heroda na mo ġuiato ekiraiato, ekirato, “Ġoi kara oura-viniani dagarana nokiraġia, benamo bavinimuni.” <sup>23</sup> Benamo ekiraiato, ekirato, “Kara bonoġiguni dagarana bavinimuni, ġegu Basileia tavina bonoġiguni maki bavinimuni.”

<sup>24</sup> Benamo eraka-rosito, sinana edanaġiato, ekirato, “Kara banasi?” Sinana na evaġa-veseato, ekirato, “Ioane Babatiso debana, bonosi!” <sup>25</sup> Benamo mo ġuiato ma eraga-ġenoġoito, benamo vere barana Heroda enoġiato, ekirato, “Au aurani inimoġo Ioane Babatiso debana diġu ai novinigu.”

<sup>26</sup> Vere barana ma evetuġamaġi-ġenoġoito, senaġi asi eurato bene kira-sirivaġi, korana ġena varivari tarimari ġoirari ai ekiraġi-toreato bene. <sup>27</sup> Maoromaoro vere barana Heroda na tarima debari ebasi-ġuturito-ġoi tarimana ta etuġuato, Ioane debana bene ġwa-iaġomaia ġana. Benamo ġia eiaġoto, Ioane Babatiso dibura numanai debana ebasi-ġutuato. <sup>28</sup> Benamo diġu ai eġwa-ġenoġoito, benamo mo ġuiato ema viniato. Ġia na sinana eviniato. <sup>29</sup> Ioane ġena mero na mo vari ġeseġaġiato, benamo ġeiaġoto, tauġanina ġea ġabiato, benamo gara gabunai ġea guriato.

### Iesu na tarima daġara imaima (5,000) eġuburito

*Mataio 14:13-21; Luka 9:10-17; Ioane 6:1-13*

<sup>30</sup> Apostolo tarimari ma ġeġenoġoito Iesu ġenai, benamo kara ġeveito e ġevevaġa-riba iaġirito dagarari mabarari ġekira-varaiato. <sup>31</sup> Iesu na evaġa-guruġarito, ekirato, “Gabu fakana ta ġana si-iaġosi, ġoa iaġaraġi kotuna.” Korana tarimarima vovoka ġeiaġomato-ġoi ema mainana ġeiaġoto-ġoi, be ġia maki asi ilaila beġene iaġaraġi o beġene ġaniġani. <sup>32</sup> Benamo mabarari ġasi tai ġeraġeto, gabu fakana ta ġana ġeiaġoto.

<sup>33</sup> Senaġi tarimarima ġutuma na ġeġitarito, ġeribato aiġana ġeiaġoni. Benamo vanuġa tata tarimarimari mabarari kwakuri na ġeraka-ragaraga-iaġoto, mo gabu ai ġea raġasi-guineto. <sup>34</sup> Iesu ġasi na eraka-riġoto nai, tarimarima vovoka lelevaġi eġitarito, benamo evetuġarito, korana ġia tu noġa moġo mamoe asi ġitaġauri tarimana ta noġa. Benamo ġia na dagara vovoka evaġa-ribarito. <sup>35</sup> Elavilavito-ġoi nai, Iesu ġena mero ġia ġenai ġeiaġoto, benamo ġekirato, “Mai tu gabu fakana e ġaro maki mo evariġoni. <sup>36</sup> Notuġu-rakari, vamoka vei tarimari ġeri tanu gaburi e vanuġa kavinaġiri ġana ġeiaġo, be ġari ġaniġani ġea voi.”

<sup>37</sup> Senaġi Iesu na evaġa-veserito, ekirato, “Ġomi na ġaniġani tari ġoviniri.” Benamo ġia na ġedanaġiato, ġekirato, “Ġoi ourani tu ġaiaġo, beredi silva moniri sinau ruarua (200) na ġavoiri, benamo ġama-ġuburi otoni?” (Mai tu tarima ta davana ġue imaima toitoi (8) nuġanai beġabini kavana). <sup>38</sup> Iesu na ekirarito, ekirato, “Ġomi ġemi ai beredi tu vira maniġeri? Ġoiaġo, ġoa ġitari.” Ġea ġitarito, benamo ġekirato, “Beredi imaima, maġani-kone ruarua maki.”

<sup>39</sup> Iesu na ġena mero evaġa-guruġarito, tarimarima beġene vareri, doġoro doġoro ai ġauġa iatari ai beġene tanutanu-tari. <sup>40</sup> Benamo doġoro loriri ai ġetanuto, tari sinau sebori (100), tari gabana imaimari (50). <sup>41</sup> Benamo Iesu na mo beredi imaima e maġani-kone ruarua eġabirito, eboġe-raġeto, gubai eġitaiato, Barau evaġa-namoato vau, beredi etavi-kirakirarito, benamo ġena mero evinirito beġene vareri ġana. Maġani-kone ruarua maki moġesina edudu-ġutuġuturito. <sup>42</sup> Tarimarima mabarari ġeġani-maseto. <sup>43</sup> Murinai vau Iesu ġena mero na beredi kwari e maġani-kone

kwari mabarari ġevaġa-vegogo-rito, boseġa gabanana ruarua (12) ġevaġa-vonurito. <sup>44</sup> Ġeġaniġanito tauri mabarari tu 5,000.

### Iesu nanu iatanai erakato

*Mataio 14:22-33; Ioane 6:16-21*

<sup>45</sup> Maoromaoro Iesu na ġena mero ġasi ai evaġa-raġerito, benamo etuġu-guinerito kou tavi tai Betesaida ġana, ma ġia tu mo tarimarima ġutuma roġo etuġu-lausirito. <sup>46</sup> Benamo etuġu-lausirito murinai, ġoro ġana evaraġeto ġuriġuri. <sup>47</sup> Emukuna-mukunato-ġoi nai, ġasi tu kou nuġanai, a Iesu tu ġereġana tano ai. <sup>48</sup> Benamo ġena mero eġitarito, ġevewaraġi rakavato-ġoi levai, korana iavara tu ġoirari na eiaġomato-ġoi. Benamo Iesu ġeri ai eraka-iaġoto nanu iatana na, ġasi bene raka-vanaġia etato. Mo tu horaġauna 3 ema 6 koloko vefakanai boġiboġi rekenai. <sup>49</sup> Senaġi ġena mero na ġeġitaiato, nanu iatanai erakato-ġoi, ġetuġamaġito, ġekirato, “Murava ta!” ġetato. Benamo ġeġaba-fouto, <sup>50</sup> korana mabarari na ġeġitaiato e ġegari-rakavato.

Senaġina Iesu na eraga-vaġa-guruġarito, ekirato, “Ġokokore, mai tu au, asi ġogari!” <sup>51</sup> Benamo ġasi ai eraġekauto, ema iavara maki edokoto. Ġena mero ġeġabarakavato, <sup>52</sup> korana tu mo beredi evaġa-ġutumarito nuġa-farevaġi veiġana anina roġosi ġere tuġamaġi-doġaria, nuġari roġo bubu nai.

### Iesu na keve tarimari evaġa-namorito e evaġa-maġuririto Genesareta ai

*Mataio 14:34-36*

<sup>53</sup> Benamo ġasi ai kou na ġevanaġito, Genesareta tanonai ġeraġasito. Ġeri ġasi monai ġebaru-tariato. <sup>54</sup> Benamo ġasi na ġeraka-vaġito nai, maoromaoro tarimarima na ġeġita-leaiato, ġeribato mo tu Iesu. <sup>55</sup> Benamo mo tano mabarana ġeraga-ġauato, benamo ġeri keve tarimari ma gedari ġesi Iesu ainai ġeseġaġiato-ġoi gaburi ġana ġeġwa-iaġorito-ġoi. <sup>56</sup> Iesu na eiaġo-vinirito-ġoi gaburi mabarari ai, vanuġa barari ai, vanuġa keiri ai, vamoka vei tarimari ġeri tanu gaburi ai, ġeri keve tarimari maketi gaburi ai ġetorerito-ġoi, benamo ġenoġiato-ġoi, ġena dabuġa rikinai moġo maki beġene veġabikau. Ġeveġabikauto-ġoi tarimari tu ġenamoto-ġoi e ġemaġurito-ġoi.

### Namo e rakava

**7** Farisea tarimari e taravatu ġevevaġa-riba iaġiato-ġoi tarimari kota Ieruselema na ġeiaġomato, Iesu ġevegogo-ġeġeraġiato. <sup>2</sup> Benamo ġena mero ġeġitarito, ġeġaniġanito-ġoi kota ġimari ma “mirori” ġesi, ġimari asi ġeġuriġirito ġia seneri vereri ġeri vevaġa-naġi ilailanai. <sup>3</sup> Boġono riba, Farisea tarimari e Iuda tarimari mabarari tu asi roġo beġe ġaniġanini, senaġi ġimari roġo beġe ġuriġirini murinai vau beġe ġaniġanini. Mai tu ġia seneri vereri na ġevaġa-moġoniato ema ġevei-iaġomaiato-ġoi veiġana. <sup>4</sup> Maketi gaburi na beġe iaġomani maki asi roġo beġe ġaniġanini, senaġi beġe veġuriġi-guineni vau. Seneri ġeri vevaġa-naġi vovoka kotari maki ġekorana-iaġirito-ġoi, kapusi ġuriġi, ġuro, ketolo [e geda maki] ġeġuriġirito-ġoi.

<sup>5</sup> Moġesi nai Farisea tarimari e taravatu ġevevaġa-riba iaġiato-ġoi tarimari na Iesu ġedanġiato, ġekirato, “Karase nai ġemu mero na senera vereri ġeri vevaġa-naġi asi ġekorana-iaġirini, ġimari ma ‘mirori’ ġesi ġeġaniġanini?”

<sup>6</sup> Iesu na evaġa-veserito, ekirato, “Isaia na eperoveta-iaġimito ġofaġofa tarimami tu moġoni, maiġesi etoreato,

‘Mai besena tu

mururi koriri ai moġo

au ġegubakauguni ġeri Barau,

senāġina ġia nuġari tu manaġa rakava.

<sup>7</sup> Getoma-rakariġo vini-kavaguni,

ġeri vevaġa-riba tu tarimarima ġeri vevaġa-naġi taravaturi,

a dia au ġegu!’

<sup>8</sup> Ġomi na Barau ġena taravatu tu ġoraga-kwanerini, benamo tarimarima ġeri vevaġa-naġi ġokorana-iaġirini.”

<sup>9</sup> Iesu na ma ekirarito, “Moġoni, ġomi na Barau ġena taravatu ġotuġamaġi-fitoġarini, tauġemi ġemi vevaġa-naġi boġono korana-iaġiri ġana. <sup>10</sup> Mose ekirato,

‘Tamami sinami boġono gubakauri. Dei na tamana o sinana guruġa rakavari eviniani tarimana tu boġono vaġi-masea.’ <sup>11</sup> Senāġi ġomi ġokirani, tarima ta na tamana o sinana bevaġa-guruġaiiani, bekirani, ‘Au na ġomi asi bavaġa-kavamini, korana bara vinimi dagarana tu au na Koban aviniani nai.’ Koban anina tu Barau ġena. <sup>12</sup> Moġesi

veiġai ġomi na tarima ġokouani, tamana e sinana asi bene vaġa-kavari ġana. <sup>13</sup> Ġomi na senemi ġeri vevaġa-naġi ġerina Barau ġena guruġa asi tauri ai moġo ġovaġa-iaġorini. Dagara vovoka moġesi ġoveirini.”

### **Tarimarima ġevaġa-rakavarini dagarari**

*Mataio 15:10-20*

<sup>14</sup> Benamo Iesu na tarimarima ġutuma ma ekea-vegogorito ġenai, benamo ekirarito, ekirato, “Mabarami ġoseġaġi ema boġono riba-maoro. <sup>15</sup> Tarimarima murika na ġeġanirini, ġevariġoni tarima nuġari ġana, dagarari na tarima asi ġevaġa-rakavarini, senāġi tarimarima nuġari o loruri ġuturi na ġemaraġeni dagarari na vau tarimarima ġevaġa-rakavarini. [<sup>16</sup> Ma seġana tarimana bene seġaġi!]”

<sup>17</sup> Iesu na mai tarimarima ġutuma eraga-kwanerito, numai eraġekauto; benamo ġena mero na mo barabore anina ġevedanaġi-iaġiato. <sup>18</sup> Iesu na evaġa-guruġarito, ekirato, “Ġomi maki asi ġotuġamaġi-fakani? Asi ġoribani, murika na ġevariġoni dagarari na tarimarima asi ġevaġa-rakavarini? <sup>19</sup> Korana mo tu dia loruna na ġevariġoni, senāġina sinaġena na ġevariġoni, be ġeiaġoni moġo.” Moġa anina tu, ġia na ġaniġani mabarari evaġa-moġonirito, asi ġeri rakava.

<sup>20</sup> Benamo ma ekirato, “Kara tarimarima loruna na emaraġeni, monana tarimarima evaġa-rakavaiani, <sup>21</sup> korana tarima loruna na tuġamaġi rakavari, kima veiġari, lema, vaġivaġi, <sup>22</sup> veġura-vanaġi, mata-ġaniġani, veiġa rakavari mabarari, ġofaġofa, mata-boraġa, mama, vevaġa-bade, veiavi, vei-babobabo ġeiaġomani.

<sup>23</sup> Mabarari dagara rakavari, maiġeri loruna na ġemaraġeni, tarima ġevaġa-rakavarini.”

### **Vavine ta ġena veġabidadama**

*Mataio 15:21-28*

<sup>24</sup> Iesu monana evariġisito, Taia e Sidono tanori ġana eiaġoto. Benamo numa tai ea raġekau-ġairito, ġia asi eurato tarima ta na bene ribaia ġia tu monai, senāġi asi ġena vekuretoġa dabarana. <sup>25</sup> Vavine ta, natuna ġuiatona iauka rakavana na eboroġiato,

Iesu varina eseḡaḡiatio nai, eiaḡoto, kwakuna koranai evetui-tarito. <sup>26</sup> Mo vavine tu Grik vavinena, Siriafonesia ai emaḡurito. Benamo ḡia na Iesu enoḡiatio, mo iauka rakavana natuna ḡuiatona ḡenana bene lai-vaḡia. <sup>27</sup> Benamo Iesu na ekiraiatio, ekirato, “Mero misiri roḡo beḡene ḡani-mase guine, korana asi maoro, mero misiri ḡari ḡaniḡani bita ḡabirini, kwaiva bita fiu-vinirini.”

<sup>28</sup> Vavine na ma evaḡa-veseato, ekirato, “Vereḡauka, mani tu moḡoni, senaḡi kwaiva maki fata gaburenai mero misiri ḡeḡaniḡanini momori tu ḡeḡanirini.”

<sup>29</sup> Benamo ḡia na mo vavine ma evaḡa-guruḡaiatio, ekirato, “Maniḡesi bovaḡa-vese dainai, noḡenoḡoi, iauka rakavana tu natumu ḡenana beraka-vaḡi.” <sup>30</sup> Benamo mo vavine eḡenoḡoito ḡena numa ḡana nuḡanai, natuna ḡuiatona ea doḡariatio, ḡena ḡedai egena-taḡoto-ḡoi eḡitaiatio, iauka rakavana tu moḡoni eraka-vaḡito.

### Iesu na seḡa-bubu e muru-bubu tarimana evaḡa-namoato

<sup>31</sup> Benamo Iesu Taia tanona eraga-kwaneato, Sidono e Vanuḡa Gabanana (10) tanori eraka-vanaḡirito, Galilea kou ai eraḡasito. <sup>32</sup> Benamo tarima kotari na seḡa-bubu e asi eguruḡa-ginikauto-ḡoi tarimana ta ḡeḡabi-iaḡoato, benamo ḡenoḡiatio, ḡimana iatanai bene tore-kaua. <sup>33</sup> Benamo Iesu na tarimarima ḡutuma nuḡari na eḡori-veḡitaiatio, didina seḡana kouḡanai eduḡi-toḡarito, ekanunuto, benamo meana eḡabi-karaiatio. <sup>34</sup> Gubai eboḡe-raḡeto, eiaḡa-raḡeto ma ḡabana ḡesi, ekirato, “Efata!” anina tu “Noḡwa-faka!”

<sup>35</sup> Benamo seḡana ḡeḡwa-fakarito, meana everuḡato, eroroḡototo, benamo eguruḡa-ḡitakauto. <sup>36</sup> Iesu na ekirarito, tarima ta asi beḡene kira-varaia, senaḡi ekirarito-ḡoi guruḡari tu asi ḡeseḡaḡiatio-ḡoi, ḡia varina tu ḡefiu-rovorovoatio-ḡoi. <sup>37</sup> Tarimarima nuḡari ḡefarevaḡi-rakavato, ḡekirato, “Ḗia na dagara mabarari evei-ḡitakaurini, seḡa-bubu tarimari evaḡa-seḡaḡirini, muru-bubu tarimari evaḡa-guruḡarini.”

### Iesu na tarimarima daḡara vasivasi (4,000) eḡuburito

**8** Mo negai tarimarima ḡutuma lelevaḡi ma ḡevegogo-ḡenoḡoito. Ḗia asi ḡari ḡaniḡani nai, Iesu na ḡena mero ekea-kavirito sevina ḡana, benamo evaḡa-guruḡarito, ekirato, <sup>2</sup> “Au na mai tarimarima avetuḡarini, korana mai tu ḡaro toitoi veḡata au ḡesi maiḡeri, nuḡanai tu asi ḡari ḡaniḡani. <sup>3</sup> Bema au na batuḡu-ḡenoḡoirini ḡeri vanuḡa ḡana ma vitori ḡesi nai, dabarai beḡe borimarini, korana kotari tu gabu manaḡa na ḡeiaḡomato nai.” <sup>4</sup> Benamo ḡena mero na ḡevaḡa-veseato, ḡekirato, “Kamara dabarai tarima ta na mai tarimarima beredi na beḡuburini mai tano fakanai?” <sup>5</sup> Benamo Iesu na edanaḡirito, ekirato, “Ḗomi ḡemi ai beredi tu vira?” Ḗia ḡevaḡa-veseto, ḡekirato, “Imaima ruarua (7).”

<sup>6</sup> Iesu na vegogo tarimari evaḡa-guruḡarito, tano ai ḡetanutanu-tari. Benamo beredi imaima ruarua (7) eḡabirito, Barau evaḡa-namoato, ebuki-ḡuturito, ḡena mero evinirito, mo tarimarima ḡoirari ai beḡene toretore-tariri ḡana. Benamo moḡesi ḡeveirito. <sup>7</sup> Ḗia ḡeri ai maki maḡani-kone misiri kotari. Iesu na Barau ma evaḡa-namoato, ḡena mero ekirarito, moḡeri maki ḡevareri. <sup>8</sup> Benamo tarimarima ḡeḡanimaseto murinai, Iesu ḡena mero na ḡaniḡani kwari ḡegogorito, boseḡa mabarari imaima ruarua (7) ḡevaḡa-vonurito. <sup>9</sup> Tarimarima mabarari tu 4,000 kavana. Benamo Iesu na etuḡu-rovorovorito, <sup>10</sup> ma ḡia ema ḡena mero ḡesi ḡasi ai ḡeraḡeto, Dalmanuta tanona ḡana ḡeiaḡoto.

## Farisea tarimari ġeri ura vetoġa ta guba na bene mariġo

*Mataio 16:1-4*

<sup>11</sup> Farisea tarimari kota Iesu ġenai ġeiaġoto, benamo ġedanaġi-ribaġaniato. Ġeri ura vetoġa ta guba na bene mariġo. <sup>12</sup> Iesu iaġana eġaniato ma nuġa metona ġesi, benamo ekirato, “Karase nai toma ġuru tarimari na vetoġa ġeġita-vetaurini? Moġoni akiramini, vetoġa ta asiġina ġinavaġi bavinimini!” <sup>13</sup> Benamo eraga-kwanerito, ġasi ai ma eraġeto, kou tavi ta ġana ea vanaġito.

## Farisea tarimari e Heroda

*Mataio 16:5-12*

<sup>14</sup> Iesu ġena mero ġevetuġa-rekwato, ġaniġani asi ġeġabikauto, beredi sebona moġo ġasi ai. <sup>15</sup> Benamo Iesu na esisiba-vinirito, ekirato, “Lorimi boġono vetore, Farisea tarimari e Heroda ġari farao evaġa-tubuani muramurana garina.”

<sup>16</sup> Benamo mo guruġa tauġeri fakari ai ġeverori-iaġiato, ġekirato, “Moġesina bekira, korana ġita tu asi ġara beredi nai.”

<sup>17</sup> Iesu na eribarito, benamo evaġa-guruġarito, ekirato, “Karase nai beredi ta sevimimi ai asiġi guruġana ġoveini? Ġomi roġosi boġono riba, roġosi boġono tuġamaġi-faka? Nuġami maki roġo bubu? <sup>18</sup> Ma matami, senaġi asi ġoġitani? Ma seġami, senaġi asi ġoseġaġini? Asi ġovetuġamaġi-taġoni maki? <sup>19</sup> Au na beredi imaima abuki-ġutuġuturito tarimarima 5,000 ġari nai, beredi kwari ġogogorito tu, boseġa vira ġovaġa-vonurito?” Ġia ġevaġa-veseto, ġekirato, “Gabanana ruarua (12).”

<sup>20</sup> “Au na beredi imaima ruarua (7) abuki-ġutuġuturito tarimarima 4,000 ġari nai, beredi kwari ġogogorito tu boseġa vira ġovaġa-vonurito?” Ġia ġevaga-veseto, ġekirato, “Imaima ruarua (7).” <sup>21</sup> Benamo Iesu na ekirarito, “Ġomi roġosi boġono tuġamaġi-faka?”

## Iesu na mata-bubu tauna matana evaġa-iaġaiato Betesaida ai

<sup>22</sup> Ġia Betesaida ġana ġeiaġoto, benamo tarima kotari na mata-bubu tauna ta Iesu ġenai ġeġori-iaġoato, benamo ġenoġiato, bene ġabi-karaia. <sup>23</sup> Benamo Iesu na mata-bubu tauna ġimananai eġabito, eġori-rosiato vanuġa na, benamo matana ekanunuato, ma ġimana ġenai etore-kaurito, edanaġiato, “Dagara tari oġitarini ba?”

<sup>24</sup> Mo tarima eboġe-vaisito, ekirato, “Oi, tarima tari aġitani, senaġina noġa moġo ġau noġa ġerakao-rakaoni.”

<sup>25</sup> Benamo Iesu ġimana matananai ma etore-kaurito, benamo eboġeboġe-ginikauto, dagara mabarari eġita-ginikaurito. <sup>26</sup> Benamo Iesu na numa ġana etuġu-iaġoato, evaġa-guruġaiato, ekirato, “Vanuġa nuġana na asi bono iaġo.”

## Petero na Iesu tu Kerisona ekiraġito

*Mataio 16:13-20; Luka 9:18-21*

<sup>27</sup> Iesu ma ġena mero ġesi Kaisarea Filipi tanona vanuġari ġana ġeiaġoto-ġoi nuġananai, dabarai Iesu na ġena mero edanaġirito, ekirato, “Tarimarima tu kara ġetoni au tu dei?” <sup>28</sup> Ġia ġevaġa-veseto, ġekirato, “Kotari ġekirani tu Ioane Babatiso, ma kotari tu Elia, ma kotari tu peroveta tarimana ta.” <sup>29</sup> Iesu na edanaġirito, ekirato, “Senaġi ġomi tu kara ġotoni au tu dei?” Petero na evaġa-veseto, ekirato, “Ġoi tu



Keriso, (Barau na ekiraġi-toreato vevaġa-maġuri tauna).”<sup>30</sup> Benamo Iesu na evaġa-guruġarito, tarima ta asi beġene kira-varaia.

### Iesu ġena mase e variġisi-ġenoġoi guruġari

*Mataio 16:21-28; Luka 9:22-27*

<sup>31</sup> Benamo Iesu na ġena mero ma evaġa-ribarito, ekirato, “Tarimarima Natuna tu midigu vovoka roġo beġanini. Iuda vereri, e Rubu Veaġa vereri baregori, e taravatu ġevevaġa-riba iaġiani tarimari na beġe ruġaiani; ema beġe vaġi-maseani maki, senaġina ġaro toitoi murinai mase na ma bevariġisi-ġenoġoini.”<sup>32</sup> Mai guruġa ekiraġi-foforiato, benamo Petero na eġori-veġitaiato, ekira-ġoiato.<sup>33</sup> Senaġi Iesu eruġa-kureto, ġena mero eġitarito, ġia na Petero ekira-ġoiato, ekirato, “Satani, noraka-veġita, korana ġemu tuġamaġi tu dia Barau ġena, senaġi tarimarima ġeri moġo.”

<sup>34</sup> Iesu na tarimarima ġutuma ma ġena mero ġesi ekea-vegogorito, benamo evaġa-guruġarito, ekirato, “Bema tarima ta eurani au murigu ai bene raka etoni tarimana, tauġena bene veruġa, ġena satauro bene ġwaia, au murigu ai bene raka.”<sup>35</sup> Korana deikara ġena maġuri moġo lorina etoreani tarimana, ġena maġuri befitoġaiiani. A deikara au daigu ai e Vari Namona dainai ġena maġuri befitoġaiiani tarimana, ġena maġuri asi bevei-rekwarekwaiani.<sup>36</sup> Bema tarima ta na tanobara mabarana uranai ġena maġuri befitoġaiiani, ġena namo tu kara ġia ġenai?<sup>37</sup> Korana tarima ta ġena maġuri efitoġaiato nai tu, kara na vau ma bevoi-ġenoġoiani?<sup>38</sup> Deikara na au bemaiake-viniguni ema ġegu guruġa bemaiake-viniani mai veġura-vanaġi e veirakava tarimari ġoirari ai, ġia maki Tarimarima Natuna na bemaiake-viniani ġena iaġomai, ġia Tamana mamana marevana e seġuka baregona e ma ġena aneru veaġari ġesi beġe iaġomani ġaronai.”

**9** Benamo ekirarito, ekirato, “Moġoni akiramini: Tarima kotari mai ġeruġa-taġoni tu asi roġo beġe maseni, beiaġoni mo, Barau ġena Basileia ma seġukana ġesi beiaġomani beġe ġitaiiani.”

### Iesu vetoġana eirauto

*Mataio 17:1-13; Luka 9:28-36*

<sup>2</sup> Ġaro imaima sebona (6) ġevanaġito murinai, Iesu na Petero, e Iakobo (o Iames), ema Ioane eġabirito, benamo ġoro baregona tai eġori-raġerito. Monai ġia ġereġari moġo nuġanai Iesu ġeġitaiato, vetoġana eirauto,<sup>3</sup> ema ġena dabuġa ekuro-ġaroġaroto, tanobarai tarima ta na asi ilaila moġesina bevaġa-kurokuroani.<sup>4</sup> Benamo ġia ġoirari ai Elia ma Mose ġefoforito, Iesu ġesi ġeguruġa guruġato-ġoi.

<sup>5</sup> Benamo Petero na Iesu evaġa-guruġaiato, ekirato, “Vevaġa-riba tarimamu o, namo vedaurea ġita tu maiġera, be fouta toitoi ġaragari. Ta ġoi ġemu, ta Mose ġena, ta Elia ġena.”<sup>6</sup> Petero asi ribana kara bekiraġiani, korana ġia tu ġegari-rakavato.<sup>7</sup> Benamo magube na ema iauka-taririto, ekumu-ġaurito nuġanai, garo ta magube nuġana na ekea-rosito, ekirato, “Mai tu au Natugu, aura-viniani; ġia boġono seġaġi-vinia!”<sup>8</sup> Ġia na mo gabu ġeraga-ġita-ġeġeraġiato, senaġi ta asi ġeġitaiato ġia ġesi, Iesu moġo ġereġana.

<sup>9</sup> Ġoro na ġemariġoto-ġoi nuġanai, Iesu na evaġa-guruġarito, kara ġeġitaiato dargarana tarima ta asi beġene kira-varaia, bene iaġo mo, Tarimarima Natuna mase na ma bene variġisi-ġenoġoi.<sup>10</sup> Moġa lorinai ġena guruġa fakari ai moġo etanuto,

senāgi ģia fakari ai ģeverorito, mai mase na variģisi-ģenoģoi anina tu kara. <sup>11</sup> Benamo ģia na Iesu ģedanāģiato, ģekirato, “Karase nai taravatu ģevevaģa-riba iaģiani tarimari ģekirani, Elia tu beiaģoma-guineni?”

<sup>12</sup> Iesu evaģa-veseto, ekirato, “Moģoni, Elia tu beiaģoma-guineni, dagara mabarari bevaģa-variģurini. A Tarimarima Natuna guruģana kamasi ģetoreato midigu vovoka beģanini e beģe ģita-fitoģaiani? <sup>13</sup> Senāģi akiramini, Elia tu varau eiaģomato, ema ģeri ura veiģari ģia ģenai varau ģeveirito, ģia guruģana Buka Veaģai ģetore-guineato ilailanai.”

### **Iesu na iauka rakavana na eboroģiato merona evaģa-namoato**

*Mataio 17:14-21; Luka 9:37-43*

<sup>14</sup> Ģena mero ģeri ai ģevotuto tu, tarimarima ģutuma lelevaģi na ģeruģa-ģeģeraģirito, ģeģitarito, taravatu ģevevaģa-riba iaģiato-ģoi tarimari maki ģia ģesi ģeveģare veģareto-ģoi. <sup>15</sup> Tarimarima na Iesu ģeģitaiato nai, nuģari ģefarevaģito, benamo ģenai ģeraga-iaģoto, ģea vaģa-namoato. <sup>16</sup> Iesu na edanaģirito, ekirato, “Mai tarima ģesi tu kara veģare-veģarena ģoveini?”

<sup>17</sup> Benamo tarima ta ģutuma nuģari na evaga-veseto, ekirato, “Vevaģa-riba tarimamu, au natugu ģoi ģemu ai baģori-iaģomaia. Ģia tu muru-bubu iaukana na eboroģiato nai, asi eguruģani. <sup>18</sup> Ma mai iauka na eģabiani ģarori ai, tano ekwaraģi-iaģiani. Bokana na kaburoburo ģeraka-rosini, gadikana eveģara-tarini, tauģanina egwaģiģini. Moģa lorinai ģoi ģemu mero banoģiri, mai iauka rakavana ģelai-vaģia basi, senāģi beģe lai-kavaia.”

<sup>19</sup> Benamo Iesu ekirato, “Asi veģabidadama tarimami! Ģaro vira au ģomi sevimi ai bana tanu? Ģaro vira bana vevaģa-gwaģiģi vinimi? Ģoģori-iaģomaia!” <sup>20</sup> Benamo mo mero Iesu sevina ģana ģeģori-iaģoato. Iauka rakavana na Iesu eģitaiato nai, vaģa-sebo mero evaģa-ģoģo-ģoģoato, tano ai eketoto, eģena-vebiro vebirotu, bokana na kaburoburo ģeraka-rosito.

<sup>21</sup> Iesu na mero tamana edanaģiato, ekirato, “Aitoma mai keve edoģariato?” Tamana evaģa-veseto, ekirato, “Mai tu keina na veģata! <sup>22</sup> Nega vovoka iauka rakavana na karavai eģiu-kauani, ema nanu ai eģiu-reiani bene vaģia ģana. Bema dagara ta boveiani riba nai, manī ģemu veiģa, boro vetuģa-ģwama, boro vaģa-kavama.” <sup>23</sup> Benamo Iesu ekirato, “Bema dagara ta boveiani riba otoni? Barau ģenai eveģabi-dadamani tarimana dagara mabarari beveirini riba.” <sup>24</sup> Benamo mero tamana asikauna eģaba-fouto, ekirato, “Au aveģabidadamani, senāģi ģegu tuģamaģi iauvoiauvo noma boroģia.”

<sup>25</sup> Iesu na tarimarima ģutuma ģeraga-veģogoto-ģoi eģitarito nai, ģia na mo iauka rakavana ekira-ģoiato, ekirato, “Muru-bubu e seģa-bubu iaukana, akiramuni, noraka-vaģi, ma nuģanai asi ma bono raka-toģa ģenoģoi!” <sup>26</sup> Benamo iauka rakavana eģaba-fouto, ģia na mero evaģa-ģoģoģoģo rakavaiato, benamo eraka-vaģito. Mero tu ģitaģitana noģa emaseto, moģa lorinai tarimarima ģutuma ģekirato, “Mai tu bemase.” <sup>27</sup> Senāģi Iesu na ģimanai eģabito, einu-vaisiatio, benamo eruģa-vaisito.

<sup>28</sup> Moģa murinai Iesu numai eraģekauto, ģena mero na vekuretoģai ģedanāģiato, ģekirato, “Karase nai ģai na iauka rakavana asi ilaila baģa lai-vaģia?” <sup>29</sup> Benamo Iesu na evaģa-veserito, ekirato, “Iauka maiģesina lailairi tu kara ta asiģina, senaģina ģauģau [e ģaniveaģa] ģereģana moģo.”

### Iesu ġena mase ma ekiraġi-ġenoġoiato

*Mataio 17:22-23; Luka 9:43-45*

<sup>30</sup> Mo gabu ġeraga-kwaneato, Galilea tanona na ġevanaġito. Iesu asi ġena ura tarima ta bene riba ġia tu ainai, <sup>31</sup> korana ġena mero evaġa-ribarito, ekirato, “Tari-marima Natuna tu beġe revaiani vau, tarimarima ġimari ai beġe toreani, benamo beġe vaġi-maseani, senaġi beġe vaġiani nai, ġaro toitoi murinai tu ma bevariġisi-ġenoġoini.”

<sup>32</sup> Senaġi ġia tu asi ġeriba-maoroto Iesu tu kara ekiraġiato, senaġi asi ma ġedanaġi-ato, korana ġegarito nai.

### Deikara tu barego vedaurea

*Mataio 18:1-5; Luka 9:46-48*

<sup>33</sup> Kaperanaumai ġeraġasito, benamo Iesu na numa nuġanai vau edanaġirito, ekirato, “Gomi dabarai tu kara ġokiraġiani-ġoi?” <sup>34</sup> Senaġi ġia tu asi ġevaġa-veseto, korana dabarai tu, deikara barego vedaurea ġekiraġiato-ġoi. <sup>35</sup> Iesu etanu-tarito, ġena mero gabanana ruarua (12) ekearito, benamo ekirarito, ekirato, “Dei bene guine etoni tarimana tu gabi taunai bene iaġo, ema tarimarima mabarari vetuġunaġiri bene iaġo-vini.” <sup>36</sup> Benamo ġia na mero keina ta eġabiato, ġia fakari ai evaġa-ruġa-tariato, efani-vaishiato, benamo ekirarito, ekirato, <sup>37</sup> “Dei na mero keina maiġesina kavana beġabi-raġeani au aragu ai, ġia na tu au beġabi-raġeguni. Bema tarima ta na au beġabi-raġeguni tu, dia au ġereġagu moġo beġabi-raġeguni, senaġi etuġuguto Barauna maki beġabi-raġeani.”

### Deikara na ġita asi bevaġa-rakavarani tarimana tu ġita ġesi

*Luka 9:49-50*

<sup>38</sup> Ioane na Iesu ekiraiato, ekirato, “Vevaġa-riba tarimamu, tarima ta ġaġitaiato, ġoi aramu ai iauka rakavari elai-vaġirito-ġoi, senaġi ġai na ġakira-ġoiato, korana ġia tu dia ġita ġesi taraka-vegogoni.”

<sup>39</sup> Iesu na ekirarito, ekirato, “Asi boġono kira-ġoia, korana tarima ta au aragu ai nuġa-farevaġi veġa boruri eveirini tarimana tu, au murigu ai au asi ma bekira-rakavaguni. <sup>40</sup> Korana deikara na ġita asi evaġa-rakavarani tarimana tu ġita ġesi. <sup>41</sup> Moġoni akiramini, tarima ta na nanu kapusina au aragu ai bevinimini, korana ġomi tu Keriso ġena tarima nai, ġia voina tu beġabiani veġata.”

### Tarima ta na mero misina ġena veġabidadama asi bene vaġa-rakavaia

*Mataio 18:6-9; Luka 17:1-2*

<sup>42</sup> “Bema tarima ta na au eġabidadama-viniguni mero misina ta ġena veġabidadama evaġa-rakavaiani, ġia tu bere namo fore baregona ta ġaiġonai ġere baru-kaua, davarai ġere fiu-reia. <sup>43</sup> Bema ġoi ġimamu na evaġa-rakavamuni nai, bono basi-ġutua. Ġimamu sebonai maġuri vanaġivanaġi bono doġaria tu namo, a asi namo ġimamu ruarua karava eġara-vanaġi vanaġini asi ebuseni gabuna ġana boiaġoni. [<sup>44</sup> Monai ‘dimu na beġe ġani-vanaġi vanaġimini, ema karava asi ebuseni.’] <sup>45</sup> Bema ġoi kwakumu na evaġa-rakavamuni nai, bono basi-ġutua. Kwakumu sebonai maġuri vanaġivanaġi bono doġaria tu namo, a asi namo kwakumu ruarua karava eġara-vanaġi vanaġini gabunai beġe fiu-kaumuni.

[<sup>46</sup> Monai ‘dimo na beḡe ḡani-vanaḡi vanaḡimini, ema karava asi ebuseni.’] <sup>47</sup> Bema ḡoi matamu na evaḡa-rakavamuni nai, bono ḡibo-vaḡia. Matamu sebonai Barau ḡena Basileiai bono raka-toḡa tu namo, a asi namo matamu ruarua karava eḡara-vanaḡi vanaḡini gabunai beḡe fiu-kaumuni. <sup>48</sup> Monai ‘dimo na beḡe ḡani-vanaḡi vanaḡimini, ema karava asi ebuseni.’

<sup>49</sup> Mabarari karava na bedamenarini, beiarevarini.

<sup>50</sup> Damena tu namo, senaḡi bema damena mamina bekorini nai, mamina kamasi ma bovaḡa-mamina ḡenoḡoiani? Nuḡami ai damena bene tanu, e ḡomi tata karomi ḡesi maino nuḡanai boḡono tanu.”

### Veḡaraḡo ruḡaruḡana

**10** Iesu mo gabu eraga-kwaneato, benamo Iudea tanona ḡana eiaḡoto, Ioridana ḡarukana tavi tai evanaḡito. Tarimarima ḡutuma lelevaḡi ḡia ḡenai ma ḡeiaḡoto, benamo eveito-ḡoi kavana ma evaḡa-ribarito.

<sup>2</sup> Benamo Farisea tarimari ma ḡeiaḡoto, benamo ḡea danaḡi-ḡofakauato, ḡekirato, “Tau ta ḡaraḡona befitoḡaiani nai, taravatu na beḡabiani?” <sup>3</sup> Iesu na ma evaḡaveserito, ekirato, “Mose ḡena taravatu nuḡanai kara etoni?” <sup>4</sup> Ḗekirato, “Mose ḡena taravatu tu maiḡesi ekirani, veḡaraḡo ruḡaruḡana fefana betoreani vau, ḡaraḡona betuḡu-rakaiani.” <sup>5</sup> Iesu na ekirarito, ekirato, “Mose na mai taravatu etoreato, korana ḡomi nuḡami tu roḡo bubu. <sup>6</sup> Senaḡina Barau na dagara mabarari eveirito nai, ḡia na tarimarima maki eveirito tau e vavine. <sup>7</sup> Moḡesina nai tau ta na tamana e sinana beraga-kwanerini, ḡaraḡona ḡesi beḡe tanuni. <sup>8</sup> Benamo ḡia tauri ruarua beḡe sebonani, moḡa lorinai ḡia tu dia ruarua, senaḡi sebona moḡo. <sup>9</sup> Moḡesi nai dei Barau na evaḡa-sebonarito tu, tarima ta na asi ma bene tore-kirari.”

<sup>10</sup> Ma ḡeḡenoḡoito numai, ḡena mero na ma ḡedanaḡiato mo guruḡa anina tu kara.

<sup>11</sup> Iesu na evaḡaveserito, ekirato, “Deikara na ḡaraḡona betuḡu-rakaiani, vavine ta ma beḡaraḡoani, ḡia tu beveḡura-vanaḡini. <sup>12</sup> Vavine maki moḡesina, ḡia ḡaraḡona beraga-kwaneani, tau ta na ma beḡaraḡoani, ḡia maki beveḡura-vanaḡini.”

### Iesu na mero misiri evaḡa-namorito

*Mataio 19:13-15; Luka 18:15-17*

<sup>13</sup> Tarima kotari na naturi ḡeḡwa-iaḡorito-ḡoi Iesu ḡenai bene ḡabi-karari ḡana, senaḡi ḡena mero na ḡekira-ḡoirito. <sup>14</sup> Iesu na eḡitarito nai tu ebaruto. Benamo ḡena mero ekirarito, ekirato, “Mani mero misiri ḡeiaḡoma au ḡegu ai, asi ḡolai-ḡoiri, korana Barau ḡena Basileia tu maniḡesina kavana tarimari ḡeri. <sup>15</sup> Moḡoni akiramini, dei na Barau ḡena Basileia asi beḡabi-raḡeani mero misina na kavana, ḡia Basileiai tu asi beraka-toḡani.” <sup>16</sup> Benamo Iesu na mero misiri efaḡa-vaisirito, benamo ḡimana iatari ai etore-kaurito, evaḡa-namorito.

### Farefare vovoka tarimana

*Mataio 19:16-30; Luka 18:18-30*

<sup>17</sup> Iesu monana ma evaisi-raḡeto, benamo erakato nuḡanai, tarima ta ḡenai eraga-iaḡoto, benamo ḡoiranai ea vetui-tarito, edanaḡiato, ekirato, “Vevaḡa-riba tarimamu namona, au tu kara baveini vau maḡuri vanaḡivanaḡi baḡabiani?” <sup>18</sup> Iesu na evaḡaveseato, ekirato, “Ḗoi tu karase nai au namogu okiraḡini? Tarima ta asi namo, Barau moḡo ḡereḡana. <sup>19</sup> Taravatu mabarari ma ribamu, ‘Asi bono vaḡivaḡi, asi

bono veğura-vanaği, asi bono lema, asi bono vevağa-dağa ġofağofa, asi bono ġabikuretoğa, tamam sinamu bono gubakauri.”

<sup>20</sup> Benamo mo tarima ekirato, “Vevağa-riba tarimamu, au tu keigu na beĩgoma toma, mani taravatu mabarari akorana-iağirini.” <sup>21</sup> Iesu na eğitaiato ma veuravinina ġesi ekirato, “Dagara sebona moğo orabuni, noiağo, ġemu farefare mabarari noa voivoi-iağiri, rabu tarimari bono viniri, benamo gubai tu ma ġemu farefare; ma bono iağoma, murigu ai bonoma raka.” <sup>22</sup> Mo tarima na mai guruğa eseğagiato nai, ġoirana evağa-gwağigiato, nuğana ma metona ġesi eraka-veğitato, korana ġia ġena farefare tu ġutuma lelevaği.

<sup>23</sup> Benamo Iesu na ġena mero eğita-ğeğerağirito, benamo evağa-guruğarito, ekirato, “Ġeri farefare vovoka tarimari Barau ġena Basileiai ġeri rakatoğa tu gwağigi rakava.” <sup>24</sup> Benamo Iesu ġena mero na mo guruğa ġeseğagiato nai, nuğari ġefarevağito, senaği Iesu na ma evağa-guruğa ġenoğoirito, ekirato, “Natuğore, Barau ġena Basileia rakatoğana tu gwağigi rakava.” <sup>25</sup> Kamela nila kadarena na bevanağini tu kotuna gwağigi, senaği ġena farefare vovoka tarimana Barau ġena Basileiai ġena rakatoğa tu gwağigi rakava.” <sup>26</sup> Benamo ġena mero nuğari ġefarevaği-rakavato, benamo ġevağa-guruğaiato, ġekirato, “Be deikarari vau mağuri beğe ġabiani?” <sup>27</sup> Iesu na eğitarito, benamo ekirato, “Tarimarima ġeri ai tu asi ilaila, senaği Barau ġenai tu ilaila, korana Barau ġenai dagara mabarari tu ilaila.”

<sup>28</sup> Petero na ekiraiato, ekirato, “Ġoi ribamu, ġai ġema dagara mabarari tu ġaragakwanerito, benamo ġoi murimu ai ġarakani.” <sup>29</sup> Iesu evağa-veseto, ekirato, “Moğoni akiramini, tarima ta ġena numa eraga-kwaneato, o tarikakana merori, tobana, sinana, tamana, natuna e ġena tano au daigu ai ema Vari Namona dainai, <sup>30</sup> ġia mai mağuri nuğanai ġena numa, tarikakana merori, tobana, sinana, natuna e tano sinau-sinau beğoitagoni, ema midigumidigu maki; ema ġaro beiağomani nai, mağuri vanağivanaği bedoğariani. <sup>31</sup> Senaği tarimarima ġutuma toma ġeguineni tu beğe gabini, gabi tarimari tu beğe guineni.”

### **Iesu ġena mase ma ekiraği-foforiato**

*Mataio 20:17-19; Luka 18:31-34*

<sup>32</sup> Iesu ma ġena mero ġesi Ierusalemata ġana ġevarağeto-ğoi, dabara na ġeraka-iağoto-ğoi, Iesu tu ġoirari ai erakato, benamo ġia ġeğaba-rakavato, ema muriri na ġerakato tarimari maki ġegarito. Benamo Iesu na ġena mero gabanana ruarua (12) ma eğori-veğitarito, benamo ġenai kara beğe ġorani dagarari ekira-vararito, <sup>33</sup> ekirato, “Ġoseğagi, ġita tu Ierusalemata ġana tavağeni. Monai Tarimarima Natuna tu Rubu Veğa vereri baregori e taravatu ġevevağa-riba iağiani tarimari ġimari ai beğe toreani. Ġia na ġena mase guruğana beğe vağa-moğoniani, benamo irau bese (o Roma) tarimari ġimari ai beğe toreani. <sup>34</sup> Ġia na beğe vaseva-vaseva iağiani, beğe kanunuani, beğe kwariani e beğe vaği-maseani. Senaği ġaro toitoi murinai ma bevarigiši-ğenoğoini.”

### **Iakobo (o Iames) ma Ioane ġeri noğinoği**

*Mataio 20:20-28*

<sup>35</sup> Benamo Sebedaio natuna, Iakobo ma Ioane, Iesu ġenai ġeiağoto, benamo ġekirato, “Vevağa-riba tarimamu, ġai ġaurani kara bağa noğimuni dagarana bono vinima.” <sup>36</sup> Iesu na ekirarito, ekirato, “Kara ġemi ai bana veia ġotoni?” <sup>37</sup> Benamo ġia

na ġevaġa-guruġaiato, ġekirato, “Ġai ġaurani, ġai ta aroribamu rekenai, ma ta tu kaurimu rekenai baġana tanu ġoi ġemu Basileia marevana nuġanai.”

<sup>38</sup> Senaġi Iesu na ekirarito, ekirato, “Ġomi tu asi ribami kara ġonoġiani. Au na midigu bedina banuani ġomi maki boġo niuni riba? Au beġe babatisoguni babatisona ġomi na maki boġo ġabiani riba?” <sup>39</sup> Ma ġevaġa-veseto, ġekirato, “Oi.” Iesu na ekirarito, ekirato, “Moġoni, au banuani bedinai ġomi maki boġo niuni, ema au beġe babatisoguni babatisona ġomi maki beġe babatisomini. <sup>40</sup> Senaġi aroribagu rekenai o kaurigu ai boġono tanu ġotoni tu, dia au na bavaġa-moġoniani, a mai tu Barau na eġabi-torerito tarimari ġeri.”

<sup>41</sup> Mai guruġa mero gabanana (10) ġeseġaġiatio nai, Iakobo e Ioane ġebaru-vinirito. <sup>42</sup> Benamo Iesu na mabarari ekea-vegogorito, benamo evaġa-guruġarito, ekirato, “Ġomi ribami, irau bese tarimari ġeri vere na tarimarima ġedori-naġinaġirini, ema ġeri veguine-iaġi tarimari baregori na tu ġeri maoro seġukari na ġelaunaġi-naġirini. <sup>43</sup> Senaġi ġomi fakami ai moġesina tu asi boġono vei. Bema ta ġomi fakami ai bene vere etoni nai tu, ġomi mabarami vetuġunaġimi bene iaġo-vini, <sup>44</sup> ema dei bene guine etoni tarimana, ġia tu mabarari ġeri vetuġunaġi tarimanai bene iaġo. <sup>45</sup> Korana Tarimarima Natuna eiaġomato tu, dia tarimarima na ġia vetuġunaġina beġene iaġo-vini ġana, senaġina ġia eiaġomato tu, tarimarima vetuġunaġiri bene iaġo-vini, ema ġena maġuri bene tore-taria, tarimarima ġutumma bene voi-ġenoġoiri e bene vaġa-maġuriri ġana.”

### **Iesu na mata-bubu tarimana Batimeo matana evaġa-namoato**

*Mataio 20:29-34; Luka 18:35-43*

<sup>46</sup> Ieriko ai ġeraġasito, monana Iesu ma ġena mero e tarimarima ġutumma lelevaġi ġesi Ieriko ma ġeraga-kwaneato nuġanai, Batimeo, mata-bubu e noġivegame tarimana, Timeo natuna, dabara rikinai etanu-taġoto-ġoi. <sup>47</sup> Ġia eseġaġito Iesu, Nasareta tarimana, tu ġia sevinai, benamo ekea-fouto, ekirato, “Iesu o, Davida natuna, au novetuġa-ġwagu!” <sup>48</sup> Tarimarima ġutumma na ġekira-ġoiato, asi bene guruġa ġetato, senaġi ġia ekea-ġiġiraġe ġiġiraġeto-ġoi, “Davida Natuna o, au novetuġa-ġwagu!”

<sup>49</sup> Iesu eruġa-tarito, benamo ekirato, “Gokeaia.” Benamo ġia na mata-bubu tarimana ġekeaiato, ġekirato, “Asi bono gari, novariġisi, Iesu na ekeamuni bene.” <sup>50</sup> Benamo ġena koudi efitoġaiato, eburi-vaesito, Iesu sevinai ġana eiaġoto. <sup>51</sup> Benamo Iesu na edanaġiatio, ekirato, “Kara ġemu naveia otoni?” Mata-bubu tarimana evaġa-veseto, ekirato, “Vevaġa-riba tarimamu, matagu noma keo-fakaia.” <sup>52</sup> Benamo Iesu ekirato, “Noiaġo, ġemu veġabidadama na bevaġa-namomu.” Benamo asikauna matana enamoto e eboġeboġe-ginikauto, benamo Iesu murina na dabara na eraka-iaġoto.

### **Iesu ġena rakatoġa Ierusalemata ai ġevonevone-raġe viniatio**

*Ioane 12:12-19*

**11** Ġeraka-iaġoto-ġoi, Ierusalemata ġekavinaġiatio-ġoi, ma Betefage e Betania ai ġeraġasito Olive Ġorona rekenai, benamo Iesu na ġena mero ruarua etuġu-guinerito, <sup>2</sup> ekirarito, ekirato, “Ġoiaġo, ġoira vanuġana ġana. Boġo raġasini nai, doniki natuna ta barutarinai boġo ġitaiani, iatanai tarima ta roġosi bene raġe. Boġono ruġaia, benamo boġono ġori-iaġomaia. <sup>3</sup> Bema tarima ta na bedanaġi-

mini, bekirani, ‘Ġomi tu karase nai maniġesi ġoveiani?’ betoni nai, boġono kiraia, ‘Vereġauka na eura-viniani, vau ma betuġu-ġenoġoiani.’”

<sup>4</sup> Benamo ġerakato, ġeiaġoto, doniki natuna ġea ġoitaġoato numa ta ġoiranai baru-tari. Ġeruġaiato-ġoi nuġanai, <sup>5</sup> monai ġeruġa-taġoto-ġoi tarimari na ġedanaġirito, ġekirato, “Ġomi tu karase nai mani doniki natuna ġoruġaiiani?” <sup>6</sup> Benamo ġevaġa-veserito Iesu na ekirarito kavana, vau ġetuġu-rakarito.

<sup>7-8</sup> Benamo doniki natuna Iesu ġenai ġeġori-iaġoato, ġeri dabuġa barari doniki doġenai ġeiaiva-kaurito, benamo Iesu etanukauto. <sup>8</sup> Tarimarima ġutuma ġeri dabuġa barari dabarai ġeiavarito. Kota tu ġau lauri boġai ġebasito, benamo dabarai ġe-  
getorerito. <sup>9</sup> Ġoirai e gabi ai ġerakato tarimari mabarari na ġevone-raġeato-ġoi, ġekirato,

“Hosana, Vereġauka aranai  
eiaġomani tarimana sivaġa-namoa!

<sup>10</sup> Davida ġita Tamara  
ġena Basileia eiaġomani,  
sivaġa-namoa!

Hosana guba tuġunai!”

<sup>11</sup> Iesu Ierusalemaj eraġasito nai, Rubu Veaġa nuġanai eraka-toġato, dagara mabarari eġita-vaġa-ġaurito. Senaġi elavilavito nai, ġia ma ġena mero gabanana ruarua (12) ġesi ġeraka-rosito, Betania ġana ma ġeġenoġoito.

### Iesu na figi ġauna etovoġaiato

*Mataio 21:18-19*

<sup>12</sup> Ma elaġanito, ġia na Betania ġeraga-kwaneato, ġeraka-iaġoto-ġoi nuġanai, Iesu evitoato. <sup>13</sup> Eboġeto, figi ġauna ma launa ta eġitaiato fakana kota manaġai, benamo eiaġoto, nea ġitaia ma tauna ba asiġina. Monai ea raġasito tu, ġwana ta asi edoġariato, launa korina moġo, korana ġena ġwa ġarona roġo nai. <sup>14</sup> Benamo Iesu na figi ġauna ekiraiato, ekirato, “Ġoi ġwaġwamu tarima ta na asi ma beġaniani, toma beiaġoni vanaġivanaġi!” Mai guruġa ġena mero na ġeseġaġiato.

### Iesu na Rubu Veaġa eiarevaiato

*Mataio 21:12-17; Luka 19:45-48; Ioane 2:13-22*

<sup>15</sup> Ierusalemaj ġevotuto, Iesu Rubu Veaġa nuġanai eraka-toġato, benamo voivoi tarimari elai-rosirito. Moni ġesenisito-ġoi tarimari ġeri fata e pune ġevoivoi-iaġirito-ġoi tarimari ġeri diġoka eġuke-vebuburito. <sup>16</sup> Rubu Veaġa nuġana na ġeri fare-fare ġeġwa-iaġorito-ġoi tarimari maki ekira-ġoirito. <sup>17</sup> Benamo tarimarima evaġa-ribarito, ekirato, “Buka Veaġa nuġanai tu maiġesi etoreato, Barau ekirato, ‘Au ġegu numa tu bese irauirau ġeri ġuriġuri numanai beġe kiraġiani,’ senaġi ġomi na tu lema tarimari ġeri gumu gabunai boġo vaġa-iaġoa.”

<sup>18</sup> Rubu Veaġa vereri baregori e taravatu ġevevaġa-riba iaġiato-ġoi tarimari na ġeseġaġiato nai, Iesu beġene vaġia dabarana ġevetauato. Iesu garina ġeveito-ġoi, korana tarimarima mabarari na ġena vevaġa-riba guruġari ai ġeġaba-rakavato-ġoi.

<sup>19</sup> Elavilavito, benamo Iesu ma ġena mero ġesi vanuġa barana ġeraga-kwaneato.

## Figi ġauna emaseto

*Mataio 21:20-22*

<sup>20</sup> Boġiboġi ai dabara na ma ġeraka-vanaġito nuġanai, mo figi ġauna ġeġitaiato, emarai-ġosito, ġokana maki ġemaseto. <sup>21</sup> Petero na etuġamaġi-taġoato, benamo Iesu ekiraiato, ekirato, “Vevaġa-riba tarimamu, noġitaia, ġoi na mo figi ġauna otovoġa-iatto dagarana tu varau bemase.”

<sup>22</sup> Benamo Iesu na evaġa-veserito, ekirato, “Barau boġono ġabidadama-vinia. <sup>23</sup> Moġoni akiramini, tarima ta na mai ġoro bekiraiani, ‘Noveraġa-raġe, be davarai noa vefiu-rei,’ benamo nuġana asi ma bedaradarani, senaġi bevaġa-moġoniani, kara bekiraġiani dagarana bemoġonini nai, mo veġa tu beġorani. <sup>24</sup> Moġa lorinai akiramini, kara boġo noġini ġauġau ai nai, boġo vaġa-moġonia, boġo doġaria, benamo boġo ġabiani. <sup>25</sup> Bema ġoruġa-tarini, benamo ġoġauġauni nai, rakava boġono tuġamaġi-fitoġari, bema tarima ta ġenai ma ġemi nuġa meto nai, benamo ġomi Tamami gubai etanuni na maki ġemi rakava betuġamaġi-fitoġarini. [<sup>26</sup> Senaġi bema ġomi na tarima ġeri rakava asi boġo tuġamaġi-fitoġarini nai, ġomi Tamami gubai etanuni na maki ġemi rakava asi betuġamaġi-fitoġarini.]”

## Iesu ġena seġuka korana ġedanaġiatio

*Mataio 21:23-27; Luka 20:1-8*

<sup>27</sup> Benamo ġia Ierusalemaj ma ġeraġasito. Monaj Iesu Rubu Veaġa nuġanaj erakato-ġoi nuġanaj, Rubu Veaġa vereri baregori, e taravatu ġevevaġa-riba iaġiatio-ġoi tarimari, ema Iuda vereri ġia ġenaj ġeiaġoto. <sup>28</sup> Benamo ġedanaġiatio, ġekirato, “Kamara maoro ai ġoi na mai veġa oveirini? Dei na maoro evinimuto?”

<sup>29</sup> Iesu na evaġa-veserito, ekirato, “Au na vedanaġi sebna avinimini, boġo vaġa-veseani nai, au na kamara maoro ai mai veġa aveirini bakira-varamini. <sup>30</sup> Ioane ġena babatiso veġana tu guba na eiaġomato, ba tarimarima ġerina?”

<sup>31</sup> Ġia fakari ai ġeverorito, ġekirato, “Bema ġita bita kirani, ‘Barau ġenana’ bita toni nai, ġia bekirani, ‘Karase nai Ioane asi ġovaġa-moġoniato?’ betoni. <sup>32</sup> Senaġi bema ġita bita kirani, ‘Tarimarima ġerina’ bita toni nai maki asi ilaila.” Ġia tu tarimarima gariri ġegarito, korana ġia ribari, Ioane tu proveta tarimana korikori.

<sup>33</sup> Moġa lorinaj ġia na Iesu ġevaġa-veseato, ġekirato, “Ġai asi ribama.” Benamo Iesu na ġia maki ekirarito, ekirato, “Au na maki kamara maoro ai mai veġa aveirini asi bakira-varamini.”

## Barabore - Vine tavoġana ġitaġauna tarimari rakavari

**12** Iesu na barabore ai ma evaġa-guruġarito, ekirato, “Tarima ta vine tavoġana evaroato, maġuna eġabiato, tano ai vine ġiġi-ġiġina gurina ekwaiato, tavoġana ġitaġauna numana maki evaġa-ruġaiato. Moġa murinaj tavoġa ġitaġauna tarimari ġeri ai ġena tavoġa eraga-kwaneato, benamo erakato gabu ta ġana. <sup>2</sup> Vine ġwari (o grapes) ġemaġeto, benamo ġia na ġena vetuġunaġi tauna ta etuġuato tavoġa narinarina tarimari ġeri ai, vine ġwari kota benea ġabi ġana. <sup>3</sup> Senaġi ġeġabi-tariato, benamo ġekwariato vau, ġimana kori ġetuġu-ġenoġoiato. <sup>4</sup> Tavoġa biaguna na ġena vetuġunaġi tauna ta ma etuġuato, senaġi ġia tu debana ġekodo-fakaiato e ġeveimaiaka maiakaiato. <sup>5</sup> Benamo ta ma etuġuato, senaġi ġevaġi-maseato; ema vetuġunaġi tarimari ġutuma etuġurito, kota tu ġekwaririto, kota tu ġevaġirito. <sup>6</sup> Tarima



sebona ta tu roĝo ĝia sevinai, ĝia natuna korikori, ĝena lalokau merona. Dokonai ĝia etuĝuato, ekirato, ‘Natugu natuĝua, ĝia na beĝene gubakaua.’<sup>7</sup> Senaĝi tavoĝa ĝitaĝauna tarimari tauĝeri ĝeveguruĝa-vevinito, ĝekirato, ‘Mani tu tavoĝa beĝaunaiani merona, be siĝabia, sivaĝia, benamo tavoĝa tu ĝita ĝera.’<sup>8</sup> Benamo ĝeĝabitariato, ĝevaĝiato, vine tavoĝana murikanai ĝefiu-rosiato.”

<sup>9</sup> Iesu evedanaĝito, ekirato, “Tavoĝa biaguna na tu kara beveiani? Ĝia beiaĝomani, tavoĝa narinarina tarimari bevaĝi-ĝosirini, benamo vine tavoĝana tarima irauri tari ma bevinirini.<sup>10</sup> Gomi na mai toretore Buka Veaĝai asi ĝoiaviani, iniĝesi ekirani, ‘Fore numari ĝeragarini

tarimari na asi ĝeura-viniato

ma ĝefitoĝaiato forena tu

duĝu forenai eiaĝoto.

<sup>11</sup> Mai veiĝa maĝa tu

Vereĝauka na eveiato,

matara na taĝitaiani,

ĝitaĝitana irau veĝata.”

<sup>12</sup> Benamo Iuda vereri na Iesu beĝene ĝabia dabarana ĝevetauato, korana ĝia ribari, Iesu na mai barabore tu ĝia ekiraĝirito-ĝoi nai. Senaĝi tarimarima ĝutuma ĝevegogo-taĝoto-ĝoi gariri ĝeveito naima ĝeraga-kwaneato, ĝerakato.

### **Kaisara, Roma ĝeri vere, ĝena takesi moniri**

*Mataio 22:15-22; Luka 20:20-26*

<sup>13</sup> Gabivau Farisea tarimari e Heroda murinai ĝerakato-ĝoi tarimari kotari Iesu ĝenai ĝetuĝu-iaĝorito, ĝena guruĝai beĝene vaĝa-vedaĝa-raĝea e beĝene ĝabia ĝana.

<sup>14</sup> Ĝeiaĝomato, benamo Iesu ĝema ribaĝaniato, ĝekirato, “Vevaĝa-riba tarimamu, ĝai ribama ĝoi tu moĝoni vei-iobukaiobuka tarimamu, tarimarima gariri asi oveini. Tarima ĝeri dagi maki asi otuĝamaĝirini, senaĝi ĝoi na moĝoni ai Barau ĝena dabara ovevaĝa-riba iaĝi-ĝitakauani. Novaĝa-ribama, Kaisara, Roma ĝeri vere, ĝenai takesi baĝana dava ba asiĝi? Baĝana vinia ba asi baĝana vinia?”

<sup>15</sup> Senaĝi Iesu na ĝeri ĝofaĝofa eribaĭato nai, ekirarito, ekirato, “Karase nai au ĝoribaĝaniguni? Silva monina ta ĝoĝwa-iaĝomaia, nama ĝitaia.”<sup>16</sup> Benamo ta ĝeĝwa-iaĝomaĭato, Iesu na edanaĝirito, ekirato, “Mai tu dei laulauna e dei arana?” Ĝia ĝevaĝa-veseto, ĝekirato, “Kaisara ĝena.”<sup>17</sup> Iesu na ekirarito, “Kaisara ĝena dagara Kaisara boĝono vinia, Barau ĝena dagara Barau boĝono vinia.” Benamo ĝeĝabarakavato ĝia ĝenai.

### **Variĝisi-ĝenoĝoi guruĝari**

*Mataio 22:23-33; Luka 20:27-40*

<sup>18</sup> Sadukea tarimari kota Iesu ĝenai ĝeiaĝoto. Ĝia ĝeri tuĝamaĝi tu, mase tarimari asi ma beĝe variĝisi-ĝenoĝoini. Benamo Iesu ĝedanaĝiato, ĝekirato,<sup>19</sup> “Vevaĝa-riba tarimamu, Mose na taravatu ĝai ĝema maiĝesina etoreato, ‘Bema tau ta kakana bemaseni, vabuna bemase-kwaneani, ma asi naturi nai, mo tau na kakana vabuna bene ĝaraĝoa, naturi beĝene maĝuri mase tauna ĝena.’<sup>20</sup> Mero mabarari tu imaima ruarua (7). Mero guinena na eĝaraĝoato, ma emaseto asi natuna.<sup>21</sup> Mero vaĝa-ruaruana na vabuna ma eĝaraĝoato, senaĝi ĝia maki emaseto asi natuna. Mero vaĝa-toitoina maki moĝesina moĝo.<sup>22</sup> Moĝa nuĝanai ĝia mabarari tu imaima ruarua (7),

naturi ta asi ġevaġa-ġoraiato. Dokonai mo vavine maki emaseto. <sup>23</sup> Variġisi-ġenoġoi ġaronai mo vavine tu dei ġaraġona? Korana ġia tu tauri 7 na ġeġaraġoato.”

<sup>24</sup> Iesu na evaġa-veserito, ekirato, “Ġomi tu ġokerereni, korana Buka Veaġa anina ema Barau ġena seġuka asi ribami. <sup>25</sup> Mase na ma beġe variġisi-ġenoġoini tarimari tu asi ma beġe veġaraġoni. Ġia tu aneru kavana gubai. <sup>26</sup> Mase na ma beġe variġisi-ġenoġoini guruġari Mose ġena bukai asi ġoiaviani? Ġau eġaraiato varina nuġanai Barau na Mose ekiraiato, ekirato, ‘Au tu Aberahamo ġena Barau, Isako ġena Barau, ema Iakobo ġena Barau.’ <sup>27</sup> Ġia tu dia mase tarimari ġeri Barau, senaġi maġuri tarimari ġeri Barau. Ġomi tu ġokerere-rakava rakavani!”

### **Veuravini tu taravatu mabarari evanaġirito**

*Mataio 22:34-40; Luka 10:25-28*

<sup>28</sup> Taravatu ġevevaġa-riba iaġiato-ġoi tarimana ta eiaġomato, ġeri guruġa-guruġa eseġaġiato, benamo eġitaiato, Iesu na evaġa-vese ginikaurito nai, edanaġiato, ekirato, “Taravatu mabarari nuġari ai aiġa tu barego vedaureana?” <sup>29</sup> Iesu na evaġa-veseato, ekirato, “Barego vedaureana tu maiġa: ‘Isaraela tarimami o, ġoseġaġi, Vereġauka ġita ġera Barau tu Vereġauka sebna kwariġutu. <sup>30</sup> Vereġauka ġoi ġemu Barau bono ura-vinia ma nuġamu mabarana, ma iaukamu mabarana, ma ġemu tuġamaġi mabarana, ma kokoremu mabarana ġesi.’ <sup>31</sup> Vaġa-ruaruana tu maiġa: ‘Sevimu tarimana bono ura-vinia, ġoi tauġemu oveura-vinini kavana.’ Taravatu ta na mai taravatu ruarua asi bevanaġirini.”

<sup>32</sup> Taravatu evevaġa-riba iaġiato-ġoi tarimana ma evaġa-veseto, ekirato, “Vevaġa-riba tarimamu, ġoi ġemu guruġa tu moġoni, Barau tu sebna moġo, asi ta maia. <sup>33</sup> Bono ura-vinia ma nuġamu mabarana, ma ġemu tuġamaġi mabarana, ma gwadamu mabarana, ema sevimu ai etanuni tarimana maki bono ura-vinia, ġoi tauġemu oveura-vinini kavana. Maiġa tu barego vedaurea, ginitaġo dagarari e boubou dagarari mabarari evanaġirito.”

<sup>34</sup> Benamo Iesu na mo tarima ġena vevaġa-vese eġitaiato ma iaunegana e ma tuġamaġi-fakana ġesi, benamo ekiraiato, ekirato, “Ġoi e Barau ġena Basileia fakami tu asi manaġa.”

Moġa murinai tarima ta na asi ma edanaġiato, korana ġegarito nai.

### **Keriso tu Davida natuna ba Davida ġena Vereġauka?**

*Mataio 22:41-46; Luka 20:41-44*

<sup>35</sup> Iesu Rubu Veaġa nuġanai evevaġa-ribato-ġoi nuġanai, ekirato, “Taravatu ġevevaġa-riba iaġiani tarimari tu kamasi nai Keriso tu Davida natuna ġetoni?”

<sup>36</sup> Davida Iauka Veaġa na riba e tuġamaġi-faka eviniato, benamo eguruġa-foforito, ekirato,

‘Barau na au ġegu Vereġauka ekiraiato:

Au ġimagu aroribana rekenai

noma tanu,

bene iaġo mo, ġoi ġebaru-vinimuni tarimari ġoi kwakumu gaburenai batorerini.’

<sup>37</sup> Davida na Keriso tu ‘Vereġaukana’ ekiraġito; kamasi nai Keriso tu Davida natuna?”

## Taravatu ġevevaġa-riba iaġiato-ġoi tarimari ġeri ġofaġofa veġari

*Mataio 23:1-36; Luka 11:37-54; 20:45-47*

Tarimarima ġutuma lelevaġi Iesu ġena guruġa ma iakuri ġesi ġeseġaġiato. <sup>38</sup> Ġena vevaġa-riba nuġanai ekirato, “Taravatu ġevevaġa-riba iaġiani tarimari boġono ġita-ġinikauri. Ġia ġeurani dabuġa maukari beġene riġo, maketi gaburi ai beġene rakao-rakao, tarimarima na beġene vaġa-namori urari ai. <sup>39</sup> Rubu nuġari ai e ġanivegogo gaburi ai ġeri ura sea namori ai beġene tanu. <sup>40</sup> Ġia na vabu ġeri numa e farefare ġevaġa-koririni. Ġeri ġauġau tu mauka kenene, ġeġofaġofani. Ġia tu meto barego vedaurea beġe ġabini.”

### Vabu ġena boubou monina

*Luka 21:1-4*

<sup>41</sup> Iesu moni-tore mauġana ġoiranai etanu-tarito, benamo tarimarima moni ġeġurato-ġoi eġitarito. Farefare e moni vovoka tarimari ġutuma moni barari ġeġurato-ġoi. <sup>42</sup> Senaġi asi-ġena e asi-ġana vabuna ta eiaġomato, ġena moni misiri ruarua moġo eġura-riġorito, mai tu noġa moġo toea sebona kavana. <sup>43</sup> Benamo Iesu na ġena mero ekearito ġia ġenai, benamo ekirarito, ekirato, “Moġoni akiramini, mai vabu na beġuraia monina na mabarari ġeri vini bevanaġiri. <sup>44</sup> Korana ġia mabarari ġeri moni vovoka ġerina koturi moġo beġe vini, senaġi mai vabu tu asi ġena-ġana na nuġanai ġenai kara ġetanuni ġena maġuri ai bere vevaġa-kava-iaġiri dagarari mabarari beġurari.”

### Iesu na vau beġe ġorani dagarari ekiraġirito

**13** Iesu Rubu Vevaġa na eraka-rosito-ġoi nai, ġena mero ta na ekiraiato, ekirato, “Vevaġa-riba tarimamu, mai fore asikeikeiri noġitari e mai numa baregori ma marevari maki noġitari.” <sup>2</sup> Iesu na evaġa-veseato, ekirato, “Mai numa baregori oġitarini? Mai fore ta fore ta iatanai asi beġe tanuni, mabarari beġe vare-bubu-riġorini.”

<sup>3</sup> Iesu Olive Ġorona tuġunai etanu-taġoto-ġoi, Rubu Vevaġa Ierusalemaj eġita-iaġoato-ġoi nuġanai, Petero, e Iakobo (o Iames), e Ioane, ema Anduru na ġedanaġi-ġairiato, ġekirato, <sup>4</sup> “Nokira-varama, mai dagara tu aitoma beġe ġorani, ema beġe ġorani nai, kamara vetoġa na bevaġa-foforiani, maniġeri mabarari beġe ġorani?”

<sup>5</sup> Benamo Iesu na evaġa-veserito, ekirato, “Ġomi lorimi boġono vetore, tarima ta na asi bene ġofami. <sup>6</sup> Tarima vovoka au aragu ai beġe iaġomani, beġe kirani, ‘Tarimana tu au maiġegu!’ Tarima ġutuma beġe ġofarini. <sup>7</sup> Bema ġomi na vetari o tuari gururi e tuari variri boġo seġaġirini nai, nuġami asi beġene raġe. Maniġeri dagara tu beġe ġorani, senaġi dokona tu asi roġo. <sup>8</sup> Tanobara ta tanobara ta ġesi beġe vevaġini, gavamani ta gavamani ta ġesi beġe vetarini. Gabu ġutuma nuġari ai tano beġe iaġani, doġe maki beġe ġorani. Mai tu midigu moġo besinaiani, noġa moġo mero keina emaġurini midiguna kavana.

<sup>9</sup> Tauġemi boġono venari-ġinikau, korana beġe ġabimini, Iuda ġeri kanisoro tarimari ġeri ai beġe ġori-iaġomini e rubu nuġari ai beġe kwarimini. Au ġoġabi-raġeguni dainai, gavana e vere barari o kini ġoirari ai roġo boġo ruġani, au vaġa-moġonigu ai boġono iaġo. <sup>10</sup> Vari Namona tu tanobara mabarari nuġari ai beġe ġobata-iaġi guineani. <sup>11</sup> Bema Kota tarimari ġoirari ġana beġe ġori-iaġomini nai,

kara toma boĝoa kiraĝirini guruĝari asi boĝono nuĝa-vekwaragi-iaĝiri. Ĝarona be-raĝasini vau, Barau na kara bevaĝa-ribamini guruĝari boĝono kiraĝiri, korana dia ĝomi boĝo guruĝani, senaĝi Iauka Veaĝa beguruĝani. <sup>12</sup> Kakana na tarina bereviani bene mase ĝana, tamana na natuna maki moĝesina beveiani. Naturi na tamari sinari beĝe seĝafore-vinirini ema beĝe vaĝirini. <sup>13</sup> Tarimarima mabarari na beĝe iau-rakavamini, korana au ĝoĝabi-raĝeguni nai. Senaĝina deikara bevevaĝa-gwaĝiĝini mo dokona tu bemaĝurini.”

### **Vevaĝa-gari dagarana beforini**

*Mataio 24:15-28; Luka 21:20-24*

<sup>14</sup> “Bema ĝomi na dagara rakava vedaureana, vevaĝa-gari dagarana, boĝo ĝitai-iani, asi bene ruĝa gabunai beruĝani.” Mai guruĝa beiaviani tarimana bene riba maoro anina tu kara. “Benamo deidei Iudeai ĝetanuni tarimari ĝoro ĝana beĝene raga-iaĝo. <sup>15</sup> Deikara numa tuĝunai etanu-taĝoni tu, asi ma bene raka-toĝa numa nuĝana ĝana ĝena farefare ĝabiĝabiri. <sup>16</sup> Deikara vamoka nuĝanai maki asi ma bene ĝenoĝoi ĝena koudi ĝabi-ĝabiri. <sup>17</sup> Mo negai vavine ma baniri e ĝabi-variĝu vavineri kika ma vetuĝari! <sup>18</sup> Boĝono ĝauĝau, mai dagara asi bene ĝora ĝura e nagure ĝarori ai! <sup>19</sup> Korana mo negai rakava e midigu barego beĝe raĝasini, Barau na tanobara eveiato beiaĝoma maitoma, rakava e midigu moĝesina asi ĝeĝorani. Ma maiĝa murinai moĝesina kavana ta asi ma beĝorani. <sup>20</sup> Bema Vereĝauka na mo ĝaro rakavari asi bere vaĝa-kubiri, tarima ta asi bere maĝuri riba, senaĝi eĝabi-hidirito tarimari dairi ai, ĝia na ĝarori evaĝa-kubirito.

<sup>21</sup> Mo negai, bema tarima ta na bekiramini, ‘Ĝoĝitaia, Keriso tu maiĝa!’ o ‘Ĝoĝitaia, ĝia tu iomoĝa!’ betoni nai, asi boĝono vaĝa-moĝonia. <sup>22</sup> Korana tu Keriso ĝo-faĝofari e peroveta tarimari ĝofaĝofari beĝe foforini, vetoĝa boruri e nuĝa-farevaĝi veigari beĝe veirini, Barau na eĝabi-viriĝirito tarimari beĝene ĝofa-veĝonuri ĝana. <sup>23</sup> Moĝesi nai tauĝemi boĝono venari; dagara mabarari tu akiravara-guinemini, aoa roĝosi bene raĝasi nai.”

### **Tarimarima Natuna ĝena iaĝoma**

*Mataio 24:29-31; Luka 21:25-28*

<sup>24</sup> “Senaĝi mo negai, rakava beĝe ĝorani murinai, ĝaro bemukunani e ĝue maki asi bemamani, <sup>25</sup> visiĝu guba na beĝe ketoni e guba seĝukari beĝe iagaiagani. <sup>26</sup> Benamo tarima na Tarimarima Natuna beĝe ĝitaiani, magube na beiaĝomani ma seĝuka barana e ma marevana ĝesi. <sup>27</sup> Benamo ĝia na aneru betuĝurini, eĝabi-viriĝirito tarimari beĝe vaĝa-vegogorini tanobara mabarari na.”

### **Barabore - Vevaĝa-riba figi ĝauna ĝenana**

*Mataio 24:32-35; Luka 21:29-33*

<sup>28</sup> “Figi ĝauna ĝenana mai barabore boĝono ribaia: Kabona ĝefori-raĝeni e launa ĝefafani nai, ĝoribani, ĝaro ĝena tora taimina tu bekavinaĝi ĝotoni. <sup>29</sup> Moĝa ilailanai, ĝomi maki bema mai dagara beĝe ĝorani boĝo ĝitarini nai, boĝono riba, Tarimarima Natuna tu bekavinaĝi ĝatama bokai. <sup>30</sup> Moĝoni akiramini, mai ĝuru asi bekorini, beiaĝoni mo, mai dagara mabarari beĝe ĝorani. <sup>31</sup> Guba e tanobara beĝe rekwa-rekwani, senaĝi au ĝegu guruĝa tu asi beĝe rekwa-rekwani, beĝe tanu-vanaĝi vanaĝini.”

## Ĝaro ema hora tarima ta asi ribana

*Mataio 24:36-44*

<sup>32</sup>“Senaĝi mo ĝaro ema aoa tu tarima ta asi ribana, e aneru gubai asi ribari, ema Natuna maki asi ribana, senaĝi Tamana ĝereĝana moĝo ma ribana. <sup>33</sup>Lorimi boĝono vetore, boĝono venari-ginikau, korana asi ribami, aitoma mo aoa beraĝasini.

<sup>34</sup>Ĝia tu maiĝesina kavana, tarima ta eraka-ĝerevaĝito, ĝena numa eraga-kwaneato, benamo ĝena vetuĝunaĝi tarimari maoro evinirito, tata ĝeri ĝau-vei beĝene vei. Ĝatama-boka narinarina tarimana maki ekiraiato, bene riv-iĝaua. <sup>35</sup>Moĝesi nai ĝomi maki tataĝa-taĝo boĝono tanu, korana numa biaguna beĝenoĝoini aoana tu asi ribami, lavilavi ai, ba boĝi nuĝanai, ba kokoroku beĝoĝini ai, ba boĝiboĝi ai. <sup>36</sup>Irau mai moĝo beraĝasini, benamo genami ai beĝoitaĝomini ĝesi. <sup>37</sup>Au na kara ĝomi akira-varamini guruĝana tu tarimarima mabarari maki akira-vararini, akirani, “Tataĝa-taĝo boĝono tanu e boĝono venari-ginikau!”

## Iesu beĝene vaĝia dabarana ĝevetauato Ioane 11:45-53

**14** Ĝaro ruarua moĝo, benamo Pasova verekona o Iuda tarimari mase aneruna na evanaĝirito asi evaĝirito verekona e asi etubuni faraona verekona beĝe veiani nuĝanai, Rubu Veaĝa vereri baregori e taravatu ĝevevaĝa-riba iaĝiato-ĝoi tarimari na Iesu beĝene ĝabi-lemmaia, benamo beĝene vaĝi-masea dabarana ĝevetauato-ĝoi. <sup>2</sup>Senaĝi ĝekirato, “Dia vereko nuĝanai bene ĝora, korana vereko beĝe iaĝoma tarimari ĝia iatana na beĝe burini garina.”

## Vavine ta ĝena veiĝa namona

*Mataio 26:6-13; Ioane 12:1-8*

<sup>3</sup>Iesu Betania ai Simona lepera tarimana ĝena numai eĝaniĝanito-ĝoi nuĝanai, vavine ta eraka-toĝato, kavabu namona ta, alabasta forena na ĝeveiato kavabuna, eĝabi-kauato, nuĝanai tu muramura ma bonana namona. Mo muramura tu ĝauĝa arana nad ĝokana na ĝeveito-ĝoi dagarana, ma voina tu varaĝe rakava. Mo vavine na mo kavabu bokana ebota-fakaiato, benamo muramura Iesu debanai ebubuato. <sup>4</sup>Ĝia sevinai tarimari kota tu ma nuĝa-metori ĝesi ĝeveguruĝa-vevinito, ĝekirato, “Karase nai mai muramura bonana namona efitoĝa-kavaiani? <sup>5</sup>Bere voivoi-iaĝia, benamo silva moniri sinau toitoi (300) bere ĝoitaĝoa, (mai tu tarima ta davana laĝani ta nuĝanai kavana), benamo asi ĝeri-ĝari tarimari bere viniri.” Benamo ĝia na mo vavine ĝevaneato.

<sup>6</sup>Senaĝi Iesu ekirato, “Ĝoraga-kwanea! Kara dainai ĝomi na meto ĝoviniani? Mai vavine na tu veiĝa namona au ĝegu ai beveia. <sup>7</sup>Asi ĝeri-ĝari tarimari tu ĝomi ĝesi boĝo tanu-vanaĝi vanaĝini, be boĝo urani nai, boĝono vaĝa-kavari. Senaĝi au tu dia ĝaro mabarari ĝomi ĝesi batanuni. <sup>8</sup>Mai vavine na tu kara bere veia dagarana beveia, ĝia na au tauĝanigu ai muramura bebubu-guinea gurigurigu ĝana. <sup>9</sup>Moĝoni akiramini, Vari Namona beĝe ĝobata-iaĝiani tanobara mabarari nuĝari ai, mai vavine na veiĝa beveia veiĝana maki beĝe kiraĝiani, ĝia tuĝamaĝi-iaĝina.”

### Iudas na Iesu erevaiato

*Mataio 26:14-16; Luka 22:3-6*

<sup>10</sup> Benamo Iudas Isakariota, gabanana ruarua (12) tarimana ta, Rubu Veāga vereri baregori ġeri ai eiaġoto, Iesu benea revaia ġia ġeri ai ġana. <sup>11</sup> Benamo ġia na ġe-seġaġiato nai, ġeiau-rakavato, benamo ġekira-toreato, moni beġe viniani. Benamo Iudas na ġimari ai betore-kauani dabarana ma evetauato-ġoi.

### Iesu ma ġena mero ġesi ġinitaġo mamoea ġeġaniato

*Mataio 26:17-25; Luka 22:7-14; 22:21-23; Ioane 13:21-30*

<sup>12</sup> Ġaro ġiniguinenai, asi etubuni faraona verekona veiveina e ġinitaġo mamoea vaġivaġina ġaronai, Iesu ġena mero ġevedanaġito, ġekirato, “Ġai tu ainai Pasova verekona baġana vei-torea, bono ġania?” <sup>13</sup> Benamo Iesu na ġena mero ruarua etuġurito, ekirarito, ekirato, “Vanuġa baregonai boġono raka-toġa, benamo tarima ta nanu gwaġutuna befaġaiani boġo ġoitaġoani. Murina na boġono iaġo. <sup>14</sup> Benamo be-raġekauni numanai numa biaguna boġono vaġa-guruġaia, boġono kira, ‘Vevaġa-riba tarimana ekirani: Au ġegu varivari daiġutuna tu aiġa, ġegu mero ġesi monai ġinitaġo mamoea baġana ġania?’ <sup>15</sup> Benamo ġia na daiġutu baregona ta numa tuġunai bevaġa-ġitamini iarevatore. Monai boġono dabaraia ġita ġara.”

<sup>16</sup> Benamo mero ġeiaġoto, vanuġa barana nuġanai ġeraka-toġato, Iesu na ekiraġirito ilailari ai ġedoġaririto. Monai vereko ġeveiato.

<sup>17</sup> Elavilavito, Iesu ma ġena mero gabanana ruarua (12) ġesi ma ġeraġasito. <sup>18</sup> Ġeġaniġanito-ġoi nuġanai Iesu ekirato, “Moġoni akiramini, ġomi ta na au borevaġuni, ta au ġesi ini taġaniġani-vegogoni tarimamu ta na.” <sup>19</sup> Ġia mabarari nuġari ma metori ġesi irau sebori irau sebori na ġedanaġiato, ġekirato, “Moġoni dia au, ene?”

<sup>20</sup> Iesu na ekirarito, ekirato, “Mai tu ġomi gabanana ruarua (12) fakami ai ta dei au ġesi diġu sebonai ġanaba-riġoni tarimana. <sup>21</sup> Tarimarima Natuna bemaseni, Buka Veāgai ġetoreato ilailanai. Senaġi Tarimarima Natuna berevaiani tarimana vetuġana kekei, asi bere maġuri tu namo.”

### Vereġauka ġena ġanivegogo veaġana

*Mataio 26:26-30; Luka 22:15-20; 1 Korinto 11:23-25*

<sup>22</sup> Ġia ġeġaniġanito-ġoi nuġanai, Iesu na beredi eġabiato, Barau evaġa-namoato, etaviato, evinirito, benamo ekirato, “Ġoġabia, mai tu au tauġanigu.”

<sup>23</sup> Ġia na kapusi ma eġabiato, evaġa-namoato murinai evinirito, benamo mabarari na ġeniuato. <sup>24</sup> Benamo Iesu na ekirarito, ekirato, “Mai tu au raragu, Ġinitaġo Var-iġuna evaġa-moġoniani, bebebubuni, tarimarima ġutuma vaġa-maġuriri. <sup>25</sup> Moġoni akiramini, vine nanuna asi ma baniau-ġenoġoiani, beiaġoni mo, Barau ġena Basileiai vau ma baniau-ġenoġoiani.”

<sup>26</sup> Benamo mari ta ġemariato murinai, ġeraka-rosito, Olive Ġorona ġana ġeiaġoto.

### Iesu na Petero ġena vekira-ġuniġau ekiraġi-toreato

*Mataio 26:31-35; Luka 22:31-34; Ioane 13:36-38*

<sup>27</sup> Benamo Iesu na evaġa-guruġarito, ekirato, “Ġomi mabarami ġemi veġabidadama au ġegu ai boġo raga-kwaneani, korana Buka Veāgai maiġesi etoreato,

‘Au na mamoe ġitaġauri  
tarimana bavaġiani,  
benamo mamoe mabarari  
beġe raga-lausini.’

<sup>28</sup> Senaġi au mase na ma bavariġisi-ġenoġoini murinai, baraka-guineni Galilea ġana. Monai vau bitana vedoġari.”

<sup>29</sup> Petero ekirato, “Mabarari na ġeri veġabidadama ġoi ġemu ai beġe raga-kwaneani, senaġi au na tu asiġina.” <sup>30</sup> Iesu na evaġa-veseato, ekirato, “Moġoni aki-ramuni, toma boġi kokoroku vaġa-ruarua roġosi bene goġi nuġanai, ġoi na au vaġa-toitoi bokira-ġuniġauguni.” <sup>31</sup> Senaġi Petero eguruġa-ġiġiraġeto, ekirato, “Bema ġoi ġesi bita mase-vegogoni maki, au na ġoi tu asi veġata bakira-ġuniġaumuni.” Mabarari moġesi moġo ġekirato.

### Iesu eġauġauto Getesemane ai

*Mataio 26:36-46; Luka 22:39-46*

<sup>32</sup> Ġia gabu arana Getesemane ai ġea raġasito, benamo Iesu na ġena mero evaġa-guruġarito, ekirato, “Mainai ġotanu, au tu naiaġo, naġuriġuri roġo.” <sup>33</sup> Benamo Petero, e Iakobo (o Iames), ema Ioane moġo eġoririto, ġia ġesi ġeiaġoto. Moġa nuġanai Iesu tauġanina efarakaiato, eġarito, nuġana maki evekwaraġito-ġoi. <sup>34</sup> Benamo ekirarito, ekirato, “Au nuġagu na meto asikei eġwaiiani, dori evaġiġuni; mainai ġotanu, boġono venari.” <sup>35</sup> Iesu kota ma eraka-naġito, tano ai eketo-tarito, benamo Barau enoġiato, ekirato, bema ma dabara ta moġa neganai, mai aoa metona ġenana bene vanaġi. <sup>36</sup> Ekirato, “Tama, Tamagai o, dagara mabarari ġoi ġemu ai veiveiri tu ilaila. Mai midigu bedina ġeguna noma ġabi-vaġia. Senaġi dia au ġegu ura, ġoi ġemu ura moġo.”

<sup>37</sup> Benamo eġenoġoito nuġanai tu, ġena mero genamaseri ai eġoitaġo-rito, benamo Petero ekiraiato, ekirato, “Simona, ġoi tu ogenani? Aoa sebna ta kavana maki asi bovevaġa-gwaġiġini?” <sup>38</sup> Boġono venari, boġono ġauġau, be veribaġani beiaġomani nai, asi boġono moira. Iauka tu moġoni eurani, senaġi tauġani tu emoirani.”

<sup>39</sup> Benamo ma eraka-veġitato, ea ġuriġurito, mo ġauġau guruġari guineri ma ea kiraririto. <sup>40</sup> Ma eġenoġoi-iaġomato nuġanai tu, genamaseri ai ma edoġaririto, korana matari tu gena na eġabi-rakavarito. Ġia asi ribari kamasi beġe vaġa-veseani.

<sup>41</sup> Vaġa-toitoina ma eġenoġoito, benamo ekirarito, ekirato, “Ġomi tu roġo ġogeani e ġoiaġaraġini? Bevaitovo! Aoana varau beraġasi! Ġoġitaia, Tarimarima Natuna tu beġe revaia, rakava tarimari ġimari ai beġe torea. <sup>42</sup> Ġovariġisi, be si-iaġosi! Ġoġitaia, au revarevaġu tarimana mai beraġasi!”

### Iesu tuari tarimari o soldia na ġeġabiato

*Mataio 26:47-56; Luka 22:47-53; Ioane 18:3-12*

<sup>43</sup> Iesu roġo eguruġato-ġoi nuġanai, Iudas, mero gabanana ruarua (12) tauna ta, eraġasito. Tarimarima ġutuma maki ġia ġesi ma ġeri vetari baġari e vevaġi kwariri. Ġia tu Rubu Veaġa vereri baregori, e taravatu ġevevaġa-riba iaġiato-ġoi tarimari, ema Iuda vereri na ġetuġurito. <sup>44</sup> Reva tarimana na vetoġa ta ekiravara-torerito, ekirato, “Baverauani tarimana tu moġa. Boġono ġabi-taria, boġono ġori-iaġoa ġomi ġemi veġitaġau gaburenai.”

<sup>45</sup> Iudas eraĝasito nai, maoromaoro eiaĝoto Iesu ĝenai, benamo ekirato, “Vevaĝa-riba tarimamu o!” benamo everauato. <sup>46</sup> Benamo tuari tarimari na ĝeĝabi-tariato, ĝedegodegoato.

<sup>47</sup> Senaĝi monai eruĝa-taĝoto-ĝoi tarimana ta, ĝena vetari baĝana einu-vaĝiato, edaveato, benamo Rubu Veaĝa verena baregona ĝena vetuĝunaĝi tarimana seĝana ebasi-vaĝiato. <sup>48</sup> Iesu na ekirarito, ekirato, “Au tu seĝafore doĝorona ta aĝori-kauani? Be ĝomi boĝo iaĝoma au ĝabiĝabigu tu, ma ĝemi vetari baĝari e vevaĝi kwariri ĝesi? <sup>49</sup> Ĝaro mabarari ai au tu ĝomi sevimi ai Rubu Veaĝa nuĝanai avevaĝa-ribato-ĝoi, senaĝi asi ĝoĝabiguto. A mai tu Buka Veaĝai ĝetore-guineato guruĝana vaĝa-moĝonina ĝana.”

<sup>50</sup> Ĝena mero mabarari na ĝeraga-kwaneato, ĝeraka-rovorovoto.

<sup>51</sup> Mero variĝuna ta tu kefina korina, senaĝi dabuĝa ta na moĝo tauĝanina eriĝo-ĝauato, Iesu murinai erakato. Ĝia maki ĝeĝabi-tariato, <sup>52</sup> senaĝi ĝena dabuĝa ĝimari ai eraga-kwaneato, kefina kori moĝo eraga-kwaraĝato.

### Iesu kanisoro tarimari ĝoirari ai

*Mataio 26:57-68; Luka 22:54-55; 22:63-71; Ioane 18:13-14; 18:19-24*

<sup>53</sup> Ĝia na Iesu ĝeĝori-iaĝoato Rubu Veaĝa verena baregona ĝenai, ema Rubu Veaĝa vereri baregori, e Iuda vereri, ema taravatu ĝevevaĝa-riba iaĝiato-ĝoi tarimari mabarari ĝeraka-vegogoto. <sup>54</sup> Petero na Iesu eraka-ĝiuato, senaĝi ma fakana eiaĝoto mo, Rubu Veaĝa verena baregona ĝena numa maĝuna nuĝanai eraka-toĝato. Monai gadi tarimari fakari ai ea tanuto, benamo karava na etunuato-ĝoi.

<sup>55</sup> Rubu Veaĝa vereri baregori e Iuda ĝeri kanisoro tarimari mabarari na tu Iesu vaĝa-masena korana ta ĝevetauato, senaĝi ta tu asi ĝedoĝari-ato. <sup>56</sup> Tarimarima ĝutuma ĝeri ĝofaĝofa guruĝari na ĝevaĝa-badeato-ĝoi, senaĝi ĝeri guruĝa tu asi ĝesebonato-goi. <sup>57</sup> Benamo tarima kota ĝeruĝa-vaisito, benamo mai ĝofaĝofa guruĝari ĝekiraĝirito, ĝekirato, <sup>58</sup> “Ĝai tu ĝia ĝena guruĝa baĝa seĝaĝia, bekira, ‘Au na mai tarimarima ĝimari na ĝeragaiato Rubu Veaĝana barovoani, ema ĝaro toitoi nuĝanai ta ma baragaiani dia ĝima veiveina rubuna.’” <sup>59</sup> Senaĝi ĝia ĝeri vevaĝa-bade guruĝari maki asi sebona.

<sup>60</sup> Benamo Rubu Veaĝa verena baregona ĝoirari ai eruĝa-vaisito, benamo Iesu edanaĝiato, ekirato, “Ĝoi tu asi bovaĝa-veseni? Maiĝeri na ĝoi ĝevarifiu-iaĝimuni guruĝari tu kamasi?” <sup>61</sup> Senaĝi Iesu asi eguruĝato, ma asi evaĝa-veserito. Benamo Rubu Veaĝa verena baregona na ma edanaĝi-ĝenoĝoiato, ekirato, “Ĝoi tu Keriso, ĝevaĝa-namoani Barauna Natuna?” <sup>62</sup> Iesu na evaĝa-veseato, ekirato, “Tarimana au maiĝegu! Ĝomi na Tarimarima Natuna roĝo boĝo ĝitaiani, Seĝuka Barauna ĝimana aroribanai betanuni, e guba maguberi iatari na beiĝomani!”

<sup>63</sup> Benamo Rubu Veaĝa verena baregona na ĝena dabuĝa edareato, ekirato, “Karase vevaĝa-ĝita tarimari roĝo tavetaurini? <sup>64</sup> Barau vaĝa-rakavana guruĝana boĝo seĝaĝia. Ĝomi kara ĝotoni?” Ĝia mabarari ĝekirato, “Bene mase moĝo.”

<sup>65</sup> Benamo kota na ĝekanunuato, matana ĝekumu-ĝauato, ĝefaisiato, ĝekiraiato, ĝekirato, “Ĝoi tu peroveta tarimana, be nokiraĝia, deikara na bekwarimu?” Benamo gadi tarimari na ĝeĝabiato, ĝimari na ĝeforoato.



### Petero na Iesu ekira-ḡuniḡauato

*Mataio 26:69-75; Luka 22:56-62; Ioane 18:15-18; 18:25-27*

<sup>66</sup> Petero roḡo numa maḡuna nuḡanai, Rubu Veaḡa verena baregona ḡena vetuḡunaḡi ḡuiatori ta eiaḡoto. <sup>67</sup> Ġia na Petero karava na etunuato-ḡoi eḡitaiato, benamo eḡita-ginikauato, ekiraiato, ekirato, “Ġoi maki Iesu, Nasareta tauna, ḡesi orakaoto-ḡoi, okavaiato-ḡoi.” <sup>68</sup> Senaḡi ḡia evekira-ḡuniḡauto, ekirato, “Au asi ribagu ḡoi kara okiraḡiani,” benamo eraka-rosito maḡu ḡatama bokana ḡana, benamo kokoroku egoḡito.

<sup>69</sup> Mo vetuḡunaḡi ḡuiatona na ma eḡitaiato, benamo monai ḡeruḡa-taḡoto tarimari ekirarito, ekirato, “Tarimana ta tu maniḡa.” <sup>70</sup> Petero ma evekira-ḡuniḡauto. Nega kotuna evanaḡito nuḡanai, ḡia sevinai ḡeruḡa-taḡoto-ḡoi tarimari na ḡekiraiato, ḡekirato, “Moḡoni, ḡoi maki ḡia ḡesi ḡorakaoto-ḡoi tarimamu ta, korana ḡoi tu Galilea taumu.” <sup>71</sup> Benamo Petero na ekirarito, ekirato, “Asiḡina ḡinavaḡi, akirakorikorimini, ḡomi na ḡokiraḡiani tarimana au tu asi ribagu.”

<sup>72</sup> Kokoroku vaḡa-ruaruana ma egoḡito, benamo Petero na Iesu ḡena guruḡa etuḡamaḡi-doḡariato, ekiraiato, “Kokoroku vaḡa-ruaruana roḡosi bene goḡi nai, ḡoi na au vaḡa-toitoi bokira-ḡuniḡauguni.” Benamo etaḡi-rakava rakavato.

### Iesu Pilato ḡoiranai

**15** Boḡiboḡi iamoiamo, Rubu Veaḡa vereri baregori, e Iuda vereri, e taravatu ḡevevaḡa-riba iaḡiatio-ḡoi tarimari, ema kanisoro tarimari mabarari na ḡevaḡa-moḡoniato. Benamo Iesu ḡebarubaruato, ḡeḡori-iaḡoato, Roma Gavana Pilato ḡea viniato. <sup>2</sup> Pilato na edanaḡiatio, ekirato, “Ġoi tu Iuda tarimari ḡeri vere o kini?” Iesu na evaḡa-veseato, ekirato, “Oi, okiraḡiani maniḡa.” <sup>3</sup> Benamo Rubu Veaḡa vereri baregori na Iesu ḡevaḡa-badeato, guruḡa ḡutuma ḡekiraḡirito. <sup>4</sup> Pilato na ma edanaḡi-ḡenoḡoiatio, ekirato, “Ġoi tu asi bovaḡa-veseni? Noḡitaia, ḡoi iatamu ai tu meto ḡutuma ḡekiraḡirini.” <sup>5</sup> Senaḡi Iesu asi eguruḡato, benamo Pilato tu edaradarato.

### Pilato na Iesu ḡena mase ekiraḡiatio

*Mataio 27:15-26; Luka 23:13-25; Ioane 18:38-19:16*

<sup>6</sup> Vanaḡivanaḡi Pasova verekona ḡaronai tu Pilato na ḡia ḡeri dibura numanai etanuni, beḡe kiraḡiani tarimana ta, etuḡu-rosiatio-ḡoi. <sup>7</sup> Mo laḡani ai tarima ta arana Barabas, ḡia tu dibura numai etanuto tarima kota ḡesi, korana ḡevevaḡito nai, tarima ta ḡevaḡi-maseato. <sup>8</sup> Benamo ḡutuma monai ḡevegogoto tarimari Pilato ḡenoḡiatio, eveini kavana ma bene vei ḡana. <sup>9</sup> Pilato na edanaḡirito, ekirato, “Ġomi ḡourani au na Iuda tarimami ḡemi vere natuḡu-rosia ba?” <sup>10</sup> Ġia ribana, Rubu Veaḡa vereri baregori ḡeri mama dainai, Iesu ḡia ḡimanai ḡetoreato.

<sup>11</sup> Senaḡi Rubu Veaḡa vereri baregori na tarimarima nuḡari ḡeḡanirito, Pilato na Barabas bene tuḡu-rosia. <sup>12</sup> Benamo Pilato na ma edanaḡirito, ekirato, “O mai Iuda tarimami ḡemi vere ḡotoni tu kamasi bana veia?”

<sup>13</sup> Ġia ḡefararato, ḡekirato, “Novaḡa-satauroa!” <sup>14</sup> Pilato na edanaḡirito, ekirato, “Karase nai, kamara veḡa rakavana eveiatio nai?” Senaḡi mabarari ḡefararaḡigitarito, ḡekirato, “Novaḡa-satauroa!” <sup>15</sup> Pilato ḡena ura mo tarimarima ḡutuma

nuḡari bene vaḡa-namori ḡana, ḡia na Barabas etuḡu-rosiato, senaḡi Iesu tu ḡekwariato murinai, evinirito beḡene vaḡa-satauroa ḡana.

### Iesu ḡevaseva-vaseva iaḡiato

*Mataio 27:27-31; Ioane 19:2-3*

<sup>16</sup> Vetari tarimari na Iesu ḡeḡori-iaḡoato gavana ḡena numa nuḡanai, benamo karori mabarari ḡekea-vegogorito. <sup>17</sup> Benamo dabuḡa kakakakana ḡevaḡa-veiato, debana dagarana ḡau ma giniginina na ḡevatoato, korona noḡa ḡeveiato, benamo Iesu debanai ḡetore-kauato. <sup>18</sup> Benamo ḡevaḡa-namoato, ḡekirato, “Iuda ḡeri Kini o, ḡaro namona!” <sup>19</sup> Benamo oro kwarina na debana ḡekwari-ḡenoḡoi ḡenoḡoiato-ḡoi, ḡekanunu-kanunuato, ḡevetui-tari viniato, ḡetoma-rakaraiḡo ḡofakau-viniato. <sup>20</sup> ḡevaseva-vaseva iaḡi-ḡosiato murinai, dabuḡa kakakakana ḡekoki-vaḡiato, ḡena dabuḡa korikorina ma ḡevaḡa-veiato. Benamo ḡeḡori-rosiato beḡenea vaḡa-satauroa ḡana.

### Iesu ḡevaḡa-satauroato

*Mataio 27:32-44; Luka 23:26-43; Ioane 19:17-27*

<sup>21</sup> Kurene tarimana ta arana Simona, Alesanda e Rufo tamari, gunika vanuḡana ta na eiaḡomato-ḡoi, vetari tarimari na ḡelaunaḡi-naḡiato Iesu ḡena satauro neḡwaia.

<sup>22</sup> Benamo Iesu ḡeḡori-iaḡoato gabu ta arana Golgota ḡana, anina tu “Deba ḡavana Gabuna.” <sup>23</sup> Benamo ḡia na vine nanuna, midigu vaḡa-keina muramurana arana muro ḡesi ḡebubu-vegogoato, ḡeviniato, senaḡi asi eniuato.

<sup>24</sup> Benamo ḡevaḡa-satauroato; ḡena dabuḡa dainai laki ḡerena ta ḡeveiato, benamo ḡevarerito fakari ai. <sup>25</sup> Boḡiboḡi ai horaḡauna 9 koloko rekenai ḡevaḡa-satauroato. <sup>26</sup> Kara koranai ḡevaḡa-satauroato guruḡana satauro iatanai maiḡesi ḡetoreato, “IUDA TARIMARI ḡERI VERE.” <sup>27</sup> Lema tarimari ruarua maki Iesu ḡesi ḡevaḡa-sataurorito, ta aroribana rekenai, ma ta kaurina rekenai. [<sup>28</sup> Monana Buka Veaḡai ḡetore-guineato guruḡana evaḡa-moḡoniato, ekirato, “Ḗia vei-rakava tarimari ḡesi ḡeiavi-vegogoato.”]

<sup>29</sup> Geraka vanaḡito-ḡoi tarimari na guruḡa rakavari Iesu ḡeviniato-ḡoi, debari ḡekorakorarito, ḡekirato, “Aha, be ḡoi okirato Rubu Veaḡa borovoani, ḡaro toitoi nuḡanai ma bovaḡa-ruḡa ḡenoḡoiani otato! <sup>30</sup> Satauro tuḡuna na noraka-riḡo, tauḡemu novevaḡa-maḡuri!”

<sup>31</sup> Rubu Veaḡa vereri baregori e taravatu ḡevevaḡa-riba iaḡiato-ḡoi tarimari na maki fakari ai maiḡesi ḡevaseva-vaseva iaḡiato, ḡekirato, “Ḗia na tarima boruri evaḡa-maḡuririto, senaḡi tauḡena tu asi evevaḡa-maḡurini! <sup>32</sup> Keriso, Isaraela tarimari ḡeri vere, satauro na inimoḡo noraka-riḡo ḡai ḡoiramai, be baḡana vaḡa-moḡonimu!” Iesu ḡesi ḡevaḡa-satauro vegogorito tarimari ruarua na maki ḡeguruḡa-rakava viniato.

### Iesu ḡena mase

*Mataio 27:45-56; Luka 23:44-49; Ioane 19:28-30*

<sup>33</sup> Horaḡauna 12 koloko ea ḡabiato nai, tanobara mabarana mukuna na eḡabi-ḡauato; mukuna etanuto, eiaḡoto mo, horaḡauna 3 koloko. <sup>34</sup> Horaḡauna 3 koloko rekenai Iesu eḡabato, ekirato, “Eloi, eloi, lama sabaktani?” anina tu, “Au ḡegu Barau, au ḡegu Barau, kara dainai au boraga-kwanegu?” <sup>35</sup> Iesu sevinai ḡeruḡa-taḡoto-ḡoi

tarimari kota geseḡaḡito, benamo ḡekirato, “Ḡoseḡaḡi, Elia ekeaiani.” <sup>36</sup> Benamo tarima ta eragato, nanu erimaiani dagarana ta eḡabiato, vine nanuna mamakina nuḡanai efereiato, gobu lefai egwanu-kauato, benamo eduḡi-raḡeato Iesu na neniua ḡana, ekirato, “Siḡitaia, Elia beiaḡomani, bema ḡabi-riḡoani ba?” <sup>37</sup> Benamo Iesu eḡaba-fouto murinai emaseto.

<sup>38</sup> Benamo Rubu Veaḡa nuḡanai veaḡa lelevaḡi daiḡutuna kouḡauna dabuḡana o ketin evedare-kikimato, eruaruato, tuḡuna na mo gabigabina. <sup>39</sup> Roma vetari verena Iesu ḡoiranai eruḡa-taḡoto-ḡoi, ḡena ḡaba eseḡaḡiato e kamasi emaseto eḡitaiato, benamo ekirato, “Moḡoni veḡata, mai tarima tu Barau Natuna!”

<sup>40</sup> Vavine kotari maki ḡemarereto-ḡoi, kotuna manaḡai ḡeruḡato, fakari ai tu Maria, Magadala vavinena; e Maria, mai tu Iakobo (o Iames) keina e Iosefa ḡesi sinari; ema Salome. <sup>41</sup> Galileai mai vavine tu Iesu murina na ḡerakato-ḡoi e ḡia vetuḡunaḡina ḡeiaḡo-vinito-ḡoi. Vavine vovoka ḡia ḡesi Ierusalemna ḡana ḡemaraḡeto vavineri maki monai.

### Iesu ḡeguriato

*Mataio 27:57-61; Luka 23:50-55; Ioane 19:38-42*

<sup>42</sup> Mo lavilavi ai vereko beḡe vei-toreani, Sabadi ḡarona roḡosi bere ḡabia nai. <sup>43</sup> Iosefa, Arimatea vanuḡa tarimana, ḡematauraiato-ḡoi kanisoro fakari ai tarimana ta, Barau ḡena Basileia evaḡa-nogaiato-ḡoi tarimana, Pilato ḡenai eiaḡoto, benamo enoḡi-ginikauato, Iesu tauḡanina bene ḡabia etato. <sup>44</sup> Pilato eseḡaḡito Iesu tu varau emaseto nai, nuḡana efarevaḡito, benamo vetari verena ekeaiato, edanaḡi-ato, ekirato, “Moḡoni, Iesu tu bemase ba?” <sup>45</sup> Benamo vetari verena na Iesu ḡena mase evaḡa-moḡoniato vau, Iesu tauḡanina Iosefa eviniato. <sup>46</sup> Moḡa murinai Iosefa na dabuḡa kurokuro na mona ta evoiato, benamo Iesu eḡabi-riḡoato, dabuḡa na ekumuato. Gara gabuna fore kouḡanai ea tore-toḡaiato murinai, fore baregona na ḡatama-boka ekure-ḡauato. <sup>47</sup> Maria, Magadala vavinena, e Maria, Iosefa sinana, na etoreato gabuna ḡeḡita-kauato.

### Iesu evariḡisi-ḡenoḡoito

*Ioane 20:1-10*

**16** Iuda tarimari ḡeri Sabadi ekorito murinai, Maria, Magadala vavinena, e Maria, Iakobo (o Iames) sinana, ema Salome muramura ma bonana namona ḡevoito, beḡene iaḡo, Iesu tauḡanina beḡene daua ḡana. <sup>2</sup> Fura ḡarona giniguinena o Sandei ai, boḡiboḡi ḡaro eraḡekauto nai, gara ḡana ḡeiaḡoto. <sup>3</sup> Benamo tauḡeri moḡo ḡeverorito-ḡoi, ḡekirato, “Deikara na mo fore barana gara ḡekouḡau-iaḡiatio tu, dei na toma ea kure-veḡitaiani?” <sup>4</sup> Senaḡi ḡeboḡe-iaḡoto nuḡanai, mo fore baregona tu irau ai vetore. <sup>5</sup> Ḡia gara kouḡana nuḡanai ḡeraka-toḡato nai tu, mero variḡuna ta ḡeḡitaiato, aroriba rekenai etanuto, ḡena dabuḡa tu kurokuro e mauka kenene, benamo nuḡari ḡefarevaḡi-rakavato.

<sup>6</sup> Ḡia na ekirarito, ekirato, “Asi ḡogari, au ribaḡu ḡomi tu Iesu, Nasareta tauna, ḡevaḡa-satauroato tarimana ḡovetauani. Ḡia tu bevariḡisi-ḡenoḡoi! Ḡia mainai tu asiḡina, ḡetoreato gabuna ḡoma ḡitaia. <sup>7</sup> Be ḡoiaḡo, ḡena mero e Petero boḡonoa kira-varari, boḡono kira, ‘Iesu tu beguineni Galilea ḡana. Monai vau boḡoa ḡitaiani evaḡa-guruḡamito ilailanai.’”

<sup>8</sup>Benamo mo vavine ġeraka-rosito gara nuġana na, korana nuġari ġefarevaġito e tauġaniri ġeġoġo-ġoġorito-ġoi nai. Tarima ta maki asi ġevaġa-guruġaiato, korana ġegarito nai.

### **Maria, Magadala vavinena, na Iesu eġitaiato**

*Mataio 28:9-10; Ioane 20:11-18*

[<sup>9</sup>Fura ġarona giniguinenai, boġi-boġi iamoiamonai, Iesu evariġisi-ġenoġoito, benamo Maria, Magadala vavinena, ġenai efori-guineto. Ġia ġenana tu iauka rakavari imaima ruarua (7) elai-vaġirito. <sup>10</sup>Ġia eiaġoto, benamo Iesu murina na ġerakato-ġoi tarimari ġeri nuġaraġe e taġitaġi nuġanai ekira-vararito. <sup>11</sup>Ġeseġaġi-ato Iesu tu maġuri, Maria na eġitaiato, senaġi ġena guruġa asi ġevaġa-moġoniato.

### **Dabarai tarima ruarua na Iesu ġeġitaiato**

*Luka 24:13-35*

<sup>12</sup>Moġa murinai ġia tauri ruarua gabu ta ġana ġeraka-iaġoto-ġoi nuġanai, Iesu ġeri ai eforito, senaġi vetoġana tu eirauto. <sup>13</sup>Benamo tauri ruarua ġeġenoġoito, karori ġekira-vararito, senaġi ġeri guruġa asi ġevaġa-moġonirito.

### **Iesu ġena mero ġeri ai eforito e ġia na seġuka evinirito**

*Mataio 28:16-20; Luka 24:36-49; Ioane 20:19-23*

<sup>14</sup>Moġa murinai ġena mero gabanana sebona (11) ġeġaniġanito-ġoi nuġanai, ġeri ai eforito, evanerito, korana asi ġeri veġabidadama e ġeri nuġa-gwaġiġi dainai, korana mase na evariġisi-ġenoġoito murinai, ġeġitaiato tarimari ġeri guruġa asi ġevaġa-moġonirito. <sup>15</sup>Benamo ekirarito, ekirato, “Goiāġo, tanobara mabarari ai Vari Namona tarimarima mabarari ġoirari ai boġono ġobata-iaġia. <sup>16</sup>Deikara na mai Vari Namona bevaġa-moġoniani ema babatiso beġabiani tarimana tu bemaġurini, senaġi asi bevaġa-moġoniani tarimana Barau na rakava voina beviniani. <sup>17</sup>Ġeveġabidadamani tarimari ġesi mai vetoġa beġe iaġo-sebonani: Iauka rakavari au aragu ai beġe lai-vaġirini. Garo variġuri iraurau ai beġe guruġani. <sup>18</sup>Mota rakavari beġe ġabi-vaisini, mase ġarikiri beġe niurini, senaġi asi beġe vaġa-rakavarini. Gimari keve tarimari iatari ai beġe tore-kaurini, benamo keve tarimari beġe namoni.”

### **Iesu tu Barau na eġabi-varaġeato guba ġana**

*Luka 24:50-53; Apostolo 1:9-11*

<sup>19</sup>Iesu Vereġauka na evaġa-guruġarito murinai, Barau na eġabi-vaisiato, guba ġana evaraġeto, benamo Barau aroribana rekenai etanu-tarito. <sup>20</sup>Benamo Iesu ġena mero ġeraka-lausito, gabu mabarari ai ġea ġobatato. Vereġauka maki ġia ġesi ġeġauvei-vegogoto-ġoi, ema ġeri guruġa evaġa-moġonirito-ġoi nuġa-farevaġi veiġa boruri ai.]

## VARI NAMONA LUKA NA ETOREATO

Luka vaġa-foforina guruġari

Luka tu doketa tarimana, ma ġia tu irau bese tarimana. Ġia tu dia mo Iesu ġena mero 12 vekaravari ai tarimana ta, senaġi ġia tu Paulo ġesi erakaorakaoto-ġoi tauna.

Luka na mai Vari Namona tu Teofilo ġena etoreato. Etoreato laġanina tu 60 beiaġo 65 fakanai ta, mo tu Iesu emaseto murinai.

Luka ġena ura baregona Teofilo e Grik tarimari ema tarimarima mabarari maki beġene riba, Iesu tu Barau na evaġa-moġoniato, e tarima namo vedaureana, e tarimarima na Barau ġena vevaġa-maġuri beġene ġabia ġana uranai eruġa-boroġirito, benamo ġeri rakava eġwaiato, satauro ai emaseto, ema Iesu ġereġana ġenana moġo Barau ġena vevaġa-maġuri tarimarima na beġe ġabiani.

Luka ġena toretore tu maiġesina eboioġaiato:

1. Iesu keina na beiaġo mo etarimato varina - karoa 1:1-4:13
2. Iesu ġena vetuġunaġi ġauveiri eveirito variri - karoa 4:14-21:38
3. Iesu ġena midigumidigu ema ġena mase variri - karoa 22-23
4. Iesu ġena variġisi-ġenoġoi, e ġena tarimarima ġeri ai efororito, ema guba vanuġana evaraġeto variri - karoa 24

### Luka na Vari Namona etoreato Teofilo ġena

**1** Vere taumu Teofilo, ġoi atore-vinimuni. Tarimarima ġutuma Iesu na eveirito veġari ġita fakarai variri varau ġetorerito. <sup>2</sup>Tovotovona na tarimarima na matari na ġeġitarito dagarari ema ġeġobata-iaġirito variri ilailari ġevaġa-ribarato. <sup>3</sup>Moġa lorinai au maki atuġamaġini, namona maiġa, Vere o, karakara ġeġorato dagarari sigana toġana na bavetau-ġitakauri, benamo ġeġorato ilailari ai ama torerini ġoi ġemu. <sup>4</sup>Benamo vau bono riba, ġevaġa-ribamuto-ġoi guruġari tu moġoni veġata.

### Ioane Babatiso ġena ġora ġekiraġi-foforiato

<sup>5</sup>Heroda, vere barana o kini, na Iudea tanona eġitaġuato-ġoi nuġanai, Rubu Veaġa verena ta etanuto-ġoi arana Sakaria, Abia ġena doġoro tarimana. Ġaraġona arana tu Elisabeta. Ġia maki Arona senena, Rubu Veaġa vereri doġorori vavinena. <sup>6</sup>Ġia tauri ruarua tu vei-iobukaiobuka tarimari Barau ġoiranai. Vereġauka ġena taravatu ema vevaġa-naġi mabarabarari ġekorana-iaġirito-ġoi ma nuġari mabarari ġesi. <sup>7</sup>Senaġi tauri ruarua asi naturi, korana Elisabeta tu gabani, ema ġia tauri ruarua tu varau ġeġaukato.

<sup>8</sup>Ġaro ta Sakaria ġena vevaġa-veaġa ġauveiri eveirito Rubu Veaġai Barau ġoiranai, korana ġena doġoro ġeri nega dainai. <sup>9</sup>Benamo Rubu Veaġa vereri ġeri veġa ilailanai Sakaria ġeġabi-hidiato, muramura ma bonana namona bene gabu ġana. Moġa lorinai eraka-toġato Vereġauka ġena Rubu Veaġa nuġanai, <sup>10</sup>a tarimarima mabarari tu murikai ġeġuriġurito-ġoi muramura egabuto-ġoi nuġanai.

<sup>11</sup>Benamo Vereġauka ġena aneru ta ġia ġenai efororito, muramura goġuna ma bonana fatana veaġana aroriba rekenai eruġataġoto-ġoi. <sup>12</sup>Sakaria na eġitaiato nai, nuġana efarevaġito ema egarito. <sup>13</sup>Senaġi aneru na ekiraiato, ekirato, "Sakaria, asi nogari, korana ġemu ġauġau Barau na beseġaġia. Ġaraġomu Elisabeta na natumu ta beġabiani, arana bono vatoa Ioane. <sup>14</sup>Ġoi boiakuni, boverereni, tarimarima ġu-

tuma maki ġia bemaġurini nai, beġe iakuni. <sup>15</sup> Korana Vereġauka ġoiranai ġia tu vere baregonai beiaġoni. Ġia tu vine nanuna asi bene niua ema niuniu dagarari gwaġġiri maki asiġina moġo. Ġia roġo sinana dianai, Iauka Veaġa na bevaġa-vonuani. <sup>16</sup> Ġia na Isaraela tarimari vovoka beġori-kurerini Vereġauka, ġeri Barau, ġenai. <sup>17</sup> Vereġauka ġoiranai berakani Elia peroveta tarimana ġena kokore ema ġena seġuka kavana. Tama e natu ġia na ma bevaġa-tanu vegogorini. Kira-sirivaġi tarimari maki bevaġa-tanu kurerini, vei-iobukaiobuka tarimari ai beġe iaġoni; benamo ġia na tarimarima beġabi-torerini Vereġauka ġena.”

<sup>18</sup> Sakaria na aneru ekiraiato, ekirato, “Au tu kaması baribaiani? Au tu ġauka, ġaraġoġu maki beġauka.”

<sup>19</sup> Aneru evaġa-veseto, ekirato, “Au tu Gabriela, Barau ġoiranai aruġani. Barau na au betuġugu, bana vaġa-guruġamu ema mai vari namona bana kira-varamu. <sup>20</sup> Senaġi au ġegu guruġa asi ovaġa-moġoniani nai, ġoi murumu bebubuni, asi boguruġani, beiaġoni mo, mai guruġa anina bea ġorani ġaronai. Akiraġirini dagarari ġeri nega korikori ai beġe ġorani.”

<sup>21</sup> Mai veiġa eġorato-ġoi nuġanai, tarimarima na ġenari-kavaiato nai, ġeverorito karase nai Sakaria Rubu Veaġa nuġanai ea kwaibo-rakavato. <sup>22</sup> Eraka-rosito nai, asi evaġa-guruġarito, benamo ġeribato, ġia tu emata-vanaġito, kara ta eġitaiato Rubu Veaġa nuġanai. Benamo ġia na vetoġai moġo evaġa-ribarito, asi eguruġato, korana muruna ebubuto nai.

<sup>23</sup> Sakaria ġena ġauvei ġarori Rubu Veaġai evaġa-koririto murinai, eġenoġoito ġena vanuġa ġana. <sup>24</sup> Moġa murinai ġia ġaraġona Elisabeta varau ekuġato, benamo ġue imaima (5) etanu-vekuretoġato numai. <sup>25</sup> Ekirato, “Vereġauka na bevetuġagu, maiġesina au ġegu ai beveia. Ġegu maiaka tarimarima ġoirari ai beġabi-vaġia.”

### Iesu ġena ġora aneru na ekiraġiato

<sup>26</sup> Elisabeta ma banina ġue imaima sebona (6) nuġanai, Barau na aneru ta arana Gabriela etuġuato vanuġa ta Galilea nuġanai arana Nasareta ġana. <sup>27</sup> Ġuiato ta monai. Ġia tu ma kirakauna arana Iosefa, Davida ġena doġoro tarimana. Mo ġuiato arana tu Maria. <sup>28</sup> Aneru ġia ġenai eiaġoto, ekirato, “Ġaro namona, Vereġauka tu ġoi ġesi ema ġena vevaġa-namo bara ġoi ġemu ai.”

<sup>29</sup> Maria na mai guruġa eseġaġiato nai, nuġana evekwaraġi-rakavato, etuġamaġito mai vevaġa-namo anina tu kara. <sup>30</sup> Benamo aneru na ma ekiraiato, ekirato, “Maria, asi nogari, Barau na ġena namo e varevare-bara ġoi iatamu ai betorea. <sup>31</sup> Ġoi tu bokuġani ema mero ta boġabiani, arana bono vatoa Iesu. <sup>32</sup> Ġia arana bevaraġeni ema beġe kiraġiani Iaru-korokoro Barauna Natuna. Barau tuġutuġu na kini ai bevaġa-iaġoani, ġia senena Davida kavana. <sup>33</sup> Ġia tu vere tuġutuġu ai beiaġoni, vere betanu-vanaġi vanaġini Iakobo besena ġeri, ġena Basileia asi bekorini.”

<sup>34</sup> Maria na aneru ekiraiato, ekirato, “Mai tu kaması beġorani? Au tau ta ġesi tu roġosi baġana gena-vegogo.”

<sup>35</sup> Aneru na evaġa-veseato, ekirato, “Iauka Veaġa ġoi iatamu ai beforini, Barau ġena seġuka na beboroġimuni. Moġesina nai ġoi ġemuna bemaġurini merona veaġana tu Barau Natunai beġe kiraġiani. <sup>36</sup> Bono riba, ġoi garagaramu Elisabeta, ġia varau beġauka, senaġi ma banina. Ribamu, tarimarima na ġekiraġiato-ġoi, ġia tu gabani vavinena ġetato-ġoi, senaġi toma ġena ġue imaima sebona (6) maiġa. <sup>37</sup> Korana Barau tu dagara mabarari veiveiri ma ribana.”

<sup>38</sup> Maria ekirato, “Au tu Veregauka ġena vetuġunaġi vavinegu, be bokira kavana au ġegu ai bene ġora.” Benamo aneru na eraga-kwaneato, erakato.

### Maria Elisabeta ġenai eiaġoto

<sup>39</sup> Mo negai Maria evariġisito, Iudea ġorori vanuġana ta ġana eraga-iaġoto. <sup>40</sup> Monai Sakaria ġena numai eraġekauto, Elisabeta evaġa-namoato. <sup>41</sup> Elisabeta na Maria ġena vevaġa-namo guruġana eseġaġiato nai, natuna tu diana nuġanai eġarevato, benamo Elisabeta Iauka Veaġa na evaġa-vonuato, mamina eġabiato. <sup>42</sup> Benamo eguruġa-baregoto, ekirato, “Vavine vefakari ai Barau ġena vevaġa-namo ġoi iatamu ai tu barego vedaurea, ema boġabiani merona iatanai maki! <sup>43</sup> Senaġi au ġegu namo tu kara Veregauka sinana ġegu ai beiaġoma? <sup>44</sup> Ġemu vevaġa-namo guruġana baseġaġia nai, natugu tu nuġagu ai eiaġuni nai eġarevani. <sup>45</sup> Ġoi overereni, korana oveġabi-dadamato, Veregauka ġena guruġa bemoġonini otato nai.”

### Maria ġena iaku marina

<sup>46</sup> Benamo Maria ekirato,

“Au nuġagu na Veregauka evaġa-raġeani.

<sup>47</sup> Au iaukagu na maki au vaġa-maġurigu Barauna eiaku-viniani,

<sup>48</sup> korana tu au,

ġena vetuġunaġi vavinena,

ġegu tanu lealeai roġo

etuġamaġi-taġoguni!

Mainana, beiaġoni mo,

ġuru mabarari beġe kirani,

Barau ġena vevaġa-namo tu

au iatagu ai beġe toni,

<sup>49</sup> korana tu vejġa baregori

Seġuka Barauna na au ġegu ai beveiri.

Ġia arana tu veaġa.

<sup>50</sup> Ġena vetuġaġwa tu

ġia ġegari-viniani tarimari

iatari ai betoreani,

ġuru ta beiaġoni ġuru ta

iatari ai betanuni.

<sup>51</sup> Ġia ġimana eġabi-vaisirito seġukana na ġeveiavini tarimari elai-karovorito.

<sup>52</sup> Ġia na vere baregori

ġeri tanutanu gaburi na

edori-firiġorito,

a tanu lealea tarimari

ġia na eġabi-vaisirito.

<sup>53</sup> Vito tarimari maki dagara namori ai evaġa-vonurito,

a farefare vovoka tarimari

ġia na ġimari kori

evaġa-ġenoġoirito.

<sup>54</sup> Ġena kiraġitore ġita tubura ġatara Israela tarimari ġesi asi etuġa-rekwarito, ema ġia eiaġomato

ġena vetuġunaġi tarimari Isaraela bene vaġa-kavari ġana,

<sup>55</sup> senera ekiraġitore-vinirito ilailana.

Aberahamo ma besena ġesi roġo bevetuġa-ġwa vanaġi-vanaġirini, etato.”

<sup>56</sup> Maria monai tu Elisabeta ġesi ġetanuto ġue toitoi (3). Moġa murinai ġena vanuġa ġana ma eġenoġoi-iaġoto.

### **Ioane Babatiso emaġurito**

<sup>57</sup> Elisabeta ġena ġabi ġarona varau eraġasito nai, mero ta eġabiato. <sup>58</sup> Benamo sevinai ġetanuto tarimari ema garagarana na varina ġeseġaġiato nai, ġia ġesi ġeialku-vegogoto, korana Vereġauka ġena namo e varevare-bara ġia ġenai eġorato nai.

<sup>59</sup> Garo vaġa-imaima toitoinei (8) mero tauġanina kefina beġene lama-vaġia ġana ġevevogoto. Mai ġaro sebonai maki arana beġene vatoa Sakaria, tamana beġene turaia ġetato. <sup>60</sup> Senaġi sinana asi eurato nai ekirato, “Asiġina! Ġia arana tu Ioane.”

<sup>61</sup> Ġia ġekirato, “Senaġi ġoi ġemu bese nuġanai mai ara tu asiġina!” <sup>62</sup> Benamo ġia na mero tamana ġimari ai moġo ġedanaġiato, mero arana tu deikara beġene si.

<sup>63</sup> Sakaria na toretore vetuġuna ta ekiraġiato, benamo maiġesi etoreato, “Ġia arana tu Ioane.” Benamo mabarari nuġari ġefarevaġito. <sup>64</sup> Monai vau muruna evekeoto, meana maki eroroġototo, benamo eguruġato, Barau evaġa-namoato.

<sup>65</sup> Moġa lorinai seviri ai ġetanuto tarimari mabarari ġeġaba-rakavato ema mo veiġa varina Iudea ġoro vanuġari mabarari nuġari ai ġevari-fiuato. <sup>66</sup> Varina ġeseġaġiato tarimari mabarari na ġetuġamaġi-iaġiato, ġekirato, “Mai mero tu kamasi beveini?” Korana tu Vereġauka ġimana seġukana tu ġia iatanai.

### **Sakaria ġena mari**

<sup>67</sup> Ioane tamana Sakaria Iauka Veaġa na evaġa-vonuato, benamo Barau ġena gu-ruġa evaġa-foforiato, ekirato,

<sup>68</sup> “Vereġauka,

Isaraela tarimari ġeri Barau,

sivaġa-namo,

korana tu ġia ġena bese

tarimari eiaġoma-vinirito

bene voi-ġenoġoiri ema

bene vaġa-maġuriri ġana.

<sup>69</sup> Vevaġa-maġuri tauna ma seġukana ġesi etuġuato ġita ġera,

ġia tu ġena vetuġunaġi tauna

Davida garakana.

<sup>70</sup> Mai kiraġitore tu

ġena peroveta tarimari veaġari na irau laġani ai ġekiraġi-foforiato:

<sup>71</sup> Ġita tu ġia na ekira-ġaurato,

ġevetari-vinirani ema ġebaru-vinirani tarimari ġimari na ġia na bevaġa-maġurirani etato.

<sup>72</sup> Ekirato maki, ġita tubura ġatara bevetuġa-ġwarini,

ema ġena kiraġitore veaġana

asi betuġa-rekwaiani.

<sup>73</sup> Ġia na ġita senera Aberahamo ekiraġitore-viniato,

<sup>74</sup> benamo ekirato, ġevetari-vinirani tarimari ġimari na beġabi-maġurirani.



Benamo vetuḡunaḡina bisini iaḡo-vini asi garira ḡesi.

<sup>75</sup> Ġoiranai bisini raka ma veaḡara e ma iobukaiobukara ḡesi ḡera maḡuri ḡarori mabarari ai.

<sup>76</sup> Natugu o, ḡoi tu Iaru-korokoro Barauna ḡena peroveta tarimana beḡe kiraḡimuni, korana tu boraka-guineni Vereḡauka ḡena dabara bono vaḡa-maḡataia ḡana.

<sup>77</sup> Ġena bese tarimari

bono vaḡa-ribari,

ḡia na ḡeri rakava bene tuḡamaḡi-fitoḡari ema bene vaḡa-maḡuriri.

<sup>78</sup> Korana ḡita ḡera Barau ḡena vetuḡaḡwa tu barego ḡita ḡerai.

Ġaro eraḡekauni mamana kavana vevaḡa-maḡuri ḡita iatarai betanuni.

<sup>79</sup> Benamo mukunai e mase gari nuḡanai ḡetanuni tarimari bevaḡa-mamarini, ema maino dabaranai beḡori-kaurini.”

<sup>80</sup> Ioane ebaregoto ema iaukana egwadato. Tano fakanai etanuto-ḡoi, eiaḡomato mo, Isaraela tarimari ḡeri ai eforito ḡarona.

### Iesu ḡena ḡora

**2** Mo negai Kaisara Augusto, Roma ḡeri vere, na ḡena vevaḡa-naḡi etuḡuato, tano-bara tarimari mabarari arari beḡene toreri, sensisi beḡene ḡabia. <sup>2</sup> Mai tu sensisi giniguinena, Kwirinio na Siria evereato-ḡoi neganai ḡeḡabiato. <sup>3</sup> Moḡa lorinai tarimarima mabarari arari toretoreri uranai tata ḡeri vanuḡa korikori ḡana ḡeḡenoḡoito.

<sup>4</sup> Iosefa maki erakato. Nasareta, Galilea rekena vanuḡa ta na, Betelehema ḡana eiaḡoto, Iudea rekena vanuḡa ta, Davida ḡena vanuḡa. Mo ḡana eiaḡoto, korana ḡia tu Davida ḡena doḡoro tarimana. <sup>5</sup> Monai arana beḡene torea ḡana, ḡia kirakauna Maria ḡia ḡesi ḡeiaḡoto. Ġia tu ma banina. <sup>6</sup> Tauri ruarua monai ḡetanuto-ḡoi nuḡanai, ḡena ḡabi ḡarona varau evotuto. <sup>7</sup> Ġia eḡabito, mero guinena eḡabiato, dabuḡai eseḡoato, boromakau ḡeri ḡaniḡani fatanai evaḡa-genakauato, korana varivari tarimari ḡeri numa asi faka ta dainai.

### Mamoe narinari tarimari ma aneru ḡesi

<sup>8</sup> Mo tano monai mamoe ḡenaririto-ḡoi tarimari kota tu boḡai ḡetanuto-ḡoi, boḡi ai ḡeri mamoe ḡeḡitaḡaurito-ḡoi. <sup>9</sup> Benamo Vereḡauka ḡena aneru ta ḡia ḡeri ai eforito, Vereḡauka mamana na emama-taririto; ḡegari-rakavato, <sup>10</sup> senaḡi aneru na ekirarito, ekirato, “Asi ḡogari! Vari Namona au na baḡwa-iaḡomaia ḡomi ḡemi, tarimarima mabarari vaḡa-iakuri ema vaḡa-verereri ḡana. <sup>11</sup> Maitoma Davida ḡena vanuḡai ḡemi vevaḡa-maḡuri tarimana bemaḡuri, Keriso Vereḡauka! <sup>12</sup> Vetoḡana tu maiḡa, mero raraka-raraka boḡo doḡariani boromakau ḡeri ḡaniḡani fatanai genakau, dabuḡa na beseḡoa.”

<sup>13</sup> Benamo asikauna guba aneruri ḡutumama mai aneru sebona ḡesi ḡefofori-barato, Barau ḡevaḡa-namoato, ḡekirato,

<sup>14</sup> “Guba tuḡuna vanigerenai

Barau beḡene vonevone-raḡe vinia,

ema tanobarai maino

ḡia na eiaunamo-vinirini

tarimari na beḡene ḡabia!”

<sup>15</sup> Aneru mabarari na ġeraga-kwanerito, guba ġana ġeġenoġoito murinai, mamoe ġitaġauri tarimari ġeguruġa-vegogoto, ġekirato, “Ġita tu Betelehema ġana si-iaġo, Vereġauka na bevaġa-ribara dagarana sia ġitaia.”

<sup>16</sup> Benamo ġeraga-iaġoto, Maria e Iosefa ġedoġaririto, mero keina maki boro-makau ġeri ġaniġani fatanai genataġonai ġeġoitaġoato. <sup>17</sup> Mero ġeġitaiato, benamo aneru na ġevaġa-ribarito mero varina ġekiraġi-foforiato. <sup>18</sup> Benamo ġeseġaġito tarimari mabarari mamoe ġitataġori tarimari ġeri guruġa na nuġari ġefarevaġito. <sup>19</sup> Maria na mo guruġa mabarari nuġanai etorerito ema etuġamaġirito-ġoi. <sup>20</sup> Mamoe ġeġitaġauto-ġoi tarimari ġeġenoġoito, Barau ġevevato-iaġiato, ġevaġa-raġeato, korana ġeseġaġirito ema ġeġitarito dagarari tu moġoni, aneru na ġia evaġa-ribarito ilailana.

### Iesu arana ġevatoato

<sup>21</sup> Ġaro vaġa-imaima toitoinei (8), mero tauġanina kefina beġe lama-vaġiani ġaronai, ġia arana ġevatoato, Iesu. Sinana na roġosi bene ġoitaġoa nuġanai, aneru na ekiraġiato arana ġeviniato.

### Iesu Rubu Veaġai ġea vaġa-foforiato

<sup>22</sup> Mero eġorato ġaro gabana vasivasi (40) murinai, ġia ġeri veiareva ġarona eraġasito, Mose ġena taravatu ekirani ilailanai. Benamo Iosefa e Maria na Iesu Ieruselema ġana ġeġwa-iaġoato, Vereġauka ġoiranai ġea vaġa-foforia ġana. <sup>23</sup> Korana Vereġauka ġena taravatu ekirani, “Ġora guine merori mabarari tu veaġa Vereġauka ġena.” <sup>24</sup> Vere-ġauka ġena taravatu ilailana varevare dagarana beġene vinia ġetato, pune ruarua o pune variġuri ruarua.

<sup>25</sup> Tau ta Ieruselemai etanuto-ġoi, arana tu Simeona. Ġia tu vei-iobukaiobuka tarimana ema Barau ġena taravatu ekorana-iaġiato-ġoi tarimana. Ġia na Isaraela ġeri vevaġa-maġuri enariato-ġoi ema Iauka Veaġa na evaġa-vonuato. <sup>26</sup> Iauka Veaġa na maki evaġa-guruġaiato, ekirato, ġia asi roġo bemaseni mo, Keriso, (Barau na ekiraġi-toreato vevaġa-maġuri tauna), roġo beġitaiani. <sup>27</sup> Iauka Veaġa na Rubu Veaġa nuġanai Simeona eġori-toġaiato vau, Iesu tamana ema sinana na ġeġwa-toġaiato, taravatu ekirani veiġana beġene veia ġana. <sup>28</sup> Benamo Simeona na mero eġabiato, efaniato, Barau evaġa-namoato, ekirato,

<sup>29</sup> “Vereġauka, ġemu vetuġunaġi tauna mai vau bono tuġu-fitoġagu,

ma mainoġu ġesi mai baiaġoni

ġemu kiraġitore vaġa-ilailana.

<sup>30</sup> Varau ġemu vevaġa-maġuri

matagu na bama ġitaia,

<sup>31</sup> ġoi na ovei-toreato tarimarima mabarari ġoirari ai.

<sup>32</sup> Mamana maiġa,

bese irairau vaġa-mama-iaġiri,

ma ġoi ġemu bese Isaraela

vevato-iaġiri ġana.”

<sup>33</sup> Mero tamana e sinana na Simeona ġena guruġa ġeseġaġito nai, ġeġabarakavato. <sup>34</sup> Benamo Simeona na tauri ruarua evaġa-namorito, Maria ekiraiato, ekirato, “Mai mero na Isaraela tarimari ġutuma vaġa-ketori ema ġutuma vaġa-vaisiraġeri ai beiaġoni. Ġia tu vetoġa ta Barau ġenana, tarimarima ġutuma na beġe

kiraġi-fitoġaiani, <sup>35</sup> moġesi tarimarima nuġari vekuretoġari dagarari mabarari beġea foforini. Ġoi, Maria, maki midigumidigu asikei boġoitaġoni, noġa moġo lorumu kaia na beġe gwanu-toġaiani midiguna kavana.”

<sup>36</sup> Monai peroveta vavinena ta arana Ana. Ġia tu Fanuela natuna, Asere ġena doġoro vavinena. Ġia tu eveġaraġoto, laġani imaima ruarua (7) ġaraġona ġesi ġetanuto, <sup>37</sup> benamo evabuto, laġani gabana imaima ma gabana toitoi vasivasi (84) etanuto, varau eġaukato. Rubu Veaġa asi eraga-kwaneato, laġani e boġi ai Barau etoma-rakariġo viniato-ġoi, eġuriġurito-ġoi ema eġaniveaġato-ġoi. <sup>38</sup> Mo hora sebonai ġia maki eraġasito, benamo Barau evaġa-namoato, Ierusalemema vaġa-maġurina ġenariato-ġoi tarimari ġoirari ai mai mero varina ekiraġiato.

### Nasareta ġana ma ġeġenoġoito

<sup>39</sup> Iosefa ema Maria na Vereġauka ġena taravatu ekirani veiġari mabarari ġeveirito murinai, Galilea ġana ġeġenoġoito, ġeri vanuġa Nasareta ġana. <sup>40</sup> Mai mero ebaregoto ma gwadana ġesi; Barau ġena iaunega na evonuvonu-raġeto ema ġena namo e varevare-bara tu ġia iatanai.

### Iesu Rubu Veaġa nuġanai

<sup>41</sup> Laġani mabarari nuġari ai Iesu tamana ema sinana tu Ierusalemema ġana ġeiaġoto-ġoi, Pasova verekona dainai. (Moġa tu Iuda tarimari mase aneruna na evanaġirito moġo, asi evaġirito verekona). <sup>42</sup> Iesu ġena laġani gabanana ruarua (12) eġabiato nai, ġia maki tamana ema sinana ġesi vereko urana ġeiaġoto, ġeveito-ġoi kavana. <sup>43</sup> Vereko ekorito murinai, ġeġenoġoito ġeri vanuġa ġana, senaġi ġia asi ribari, Iesu tu Ierusalemema ġeraga-kwaneato. <sup>44</sup> Ġia ġeri tuġamaġi Iesu tu ġia ġesi. Ġaro sebona ġerakato murinai, garagarari ema ġatari fakari ai ġevetauato. <sup>45</sup> Ġevetauto nuġanai asi ġeġoitaġoato, moġa lorinai ma ġeġenoġoito Ierusalemema ġana Iesu vetauvetauna. <sup>46</sup> Ġaro toitoi murinai ġeġoitaġoato, Iesu tu Rubu Veaġa nuġanai Iuda tarimari ġeri vevaġa-riba tarimari ġesi. Barau ġena guruġa ġekiraġirito-ġoi eseġaġirito-ġoi ema ġia na maki edanaġirito-ġoi mai guruġa aniri tu kara. <sup>47</sup> Mabarari na Iesu ġena vedanaġi ema evaġa-veseto guruġari ġeseġaġito nai, ġeġaba-rakavato. <sup>48</sup> Iesu tamana ema sinana mainai ġeġoitaġoato nai, nuġari ġefarevaġi-rakavato, benamo sinana na ekiraiato, ekirato, “Natugu, karase nai ġoi na ġai maiġesi boveima? Ġoi tamamu ema au tu ġoi daimu ai dābarama maki beġe doko, kamasī ta mai bovei baġasi.”

<sup>49</sup> Iesu ekirato, “Karase nai au ġovetauguni? Ġomi asi ribami au tu Tamagu ġena numai?” <sup>50</sup> Senaġi ġia asi ribari, Iesu karase maiġesina evevaġa-veseto.

<sup>51</sup> Moġa murinai Iesu tamana ma sinana ġesi ġeġenoġoito Nasareta ġana. Ġeri guruġa mabarari eiaġo-vinirito-ġoi. Maiġeri dagara ġeġorato mabarari Maria na nuġanai etorerito ema etuġamaġi taġorito-ġoi. <sup>52</sup> Iesu efutuato ma iaunegana ġesi, Barau ema tarimarima na maki ġeuraviniato-ġoi.

### Ioane Babatise eġobatato

*Ioane 1:19-28*

**3** Tiberio Kaisara, Roma ġeri vere, evereto laġani gabanana imaima (15) nuġanai, Pontio Pilato tu Iudea ġeri gavana, Heroda tu Galilea verena, tarina Filippo tu Iturea ma Trakoniti tanori ġeri vere, Lisania tu Abilene verena. <sup>2</sup> Anas ma Kaiafas

tu Rubu Veāga vereri baregori. Mo negai Barau na Ioane Sakaria evaāga-guruāiati tano fakanai. <sup>3</sup>Benamo Ioane na Ioridana ġarukana tanona mabarana eraka-vaāga-ġauato, eġobatato-ġoi, tarimarima ġeri rakava ġerina beġene vetuāmaāgi-kure e beġene raka-kure, ema babatiso beġene ġabia, Barau na ġeri rakava bene tuāmaāgi-fitoāari ġana. <sup>4</sup>Isaia, peroveta tarimana, ġena bukai etoreato ilailanai, ekirato,

“Tarima ta tano fakanai ekeani, ekirani,

‘Vereġauka ġena dabara ġoiarevaia,

ġena iaġoma dabarana ġovaāga-maoromaoroa.

<sup>5</sup>Douka gaburi mabarari

boġono vaāga-vonuri,

ġoro baregori e ġoro keiri mabarari boġono vaāga-faiarari.

Dabara ġeġeva-ġeġevari

boġono vaāga-maoromaorori,

ema dabara koufakoufari maki boġono vaāga-vonuri.

<sup>6</sup>Benamo tarimarima mabarari na Barau ġena vevaāga-maāuri beġe ġitaiani!”

<sup>7</sup>Tarimarima ġutumama Ioane ġenai ġeiaġoto, bene babatisori ġana. Benamo Ioane na eġobatarito, ekirarito, “Ġomi mota naturi, dei na bekirami, Barau ġena vevaāga-maoro ġenana boġo raga-maāurini?” <sup>8</sup>Ġemi rakava ġerina boġono vetuāmaāgi-kure, ema boġono raka-kure Barau ġenai, benamo ġemi maāuri ai ġwaāgwa namori boġono buri. Asi boġono kira, ‘Aberahamo tu ġai tamama, (be Barau na beġabi-raġemani).’ Korana boġono riba, Barau tu ma seġukana Aberahamo natuna tu mai fore ġerina bevaāga-ġorarini! <sup>9</sup>Koko tu ġau korari ai varau beġe toreri. Benamo ġwaāgwa namori asi beġe ġwani ġauri mabarari tu beġe basirini, karavai beġe fiu-raġerini.”

<sup>10</sup>Vegogo tarimari na Ioane ġedanaāgiato, ġekirato, “Be, ġai tu kara baāana vei?”

<sup>11</sup>Ġia na evaāga-veserito, ekirato, “Ġomi deidei ġemi sedi ruarua nai, ta tu asi ġena sedi tarimana bono vinia, e ma ġana ġaniġani tarimana na maki moġesi bene vei.”

<sup>12</sup>Takesi gogo tarimari maki babatiso beġene ġabi ġana Ioane ġenai ġeiaġoto, ġedanaāgiato, ġekirato, “Vevaāga-riba taumu, ġai tu kamasi baāana vei?” <sup>13</sup>Ġia evaāga-veseto, ekirato, “Taravatu ekirani lorinai moġo boġono gogo.”

<sup>14</sup>Vetari tarimari o soldia na maki ġedanaāgiato, ġekirato, “Ġai maki kamasi baāana vei? Ġia evaāga-veseto, ekirato, “Tarima ġeri moni asi boġono verariri ema asi boġono kira-rakavari. Ġomi davami dainai maki asi boġono mugumugu.”

<sup>15</sup>Tarimarima nuāari ai maiġesi ġetuāmaāgiato, “Mai tarima tu Keriso, (Barau na ekiraāgi-toreato vevaāga-maāuri tauna), banaāu,” ġetato. <sup>16</sup>Benamo Ioane na mabarari evaāga-guruāarito, ekirato, “Au tu nanu na ababatisomini, senaāi tarima ta beiaāġomani, ġia ġena seġuka na au ġegu seġuka tu evanaāiani. Au tu asi ilaila ġia ġena tamaka varona baruāaiiani. Ġia na Iauka Veāga ema karava na bebabatisomini. <sup>17</sup>Ġia ġimanai tu iareva-iareva dagarana, widi momona tu widi tauri ġenana bene iareva-ġitakauri ġana. Benamo widi tu ġena vaāga-vegogo numanai bevaāga-vegogorini, senaāi widi momona tu begabuani asi ebuseni karavanai.”

<sup>18</sup>Ioane na mo guruāai ema guruāa ġutumai maki Barau ġena Vari Namona tarimarima eġobata-vinirito, ema enoāirito, ġeri rakava ġerina beġene vetuāmaāgi-kure. <sup>19</sup>Ioane na maki Heroda, Galilea verena, evaneato, korana tu ġia kakana Filipino ġaraāona eġaraāoato nai, ema veiāa rakavari ġutumama eveirito nai. <sup>20</sup>Heroda na mo rakava mabarari iatari ai ta ma etore-kauato, ġia na Ioane dibura numanai ma ekou-ġauato.

### Ioane na Iesu ebabatisoato

*Mataio 3:13-17; Mareko 1:9-11*

<sup>21</sup> Tarimarima mabarari Ioane na ebabatorito-ḡoi nai, Iesu maki ebabatisoato. Benamo Iesu eḡauḡauto-ḡoi nuḡanai, guba evekeo-fakato, <sup>22</sup> Iauka Veāḡa emariḡoto ḡia iatanai, vetoḡana noḡa pune kavana. Garo ta guba na ekea-riḡoto, ekirato, “Ḡoi tu au Natugu, aura-vinimuni; ema ḡemu ai aiaku-rakavani maki.”

### Iesu tubuna ḡatana arari

*Mataio 1:1-17*

<sup>23</sup> Iesu na ḡena ḡauvei esinaiato nai, ḡena laḡani tu gabana toitoi (30) kavana. Tarimarima ḡekirato-ḡoi, ḡia tu Iosefa natuna. Besena tu maḡeri: Iosefa tu Heli natuna, <sup>24</sup> Heli tu Matat natuna, Matat tu Levi natuna. Levi tu Melki natuna. Melki tu Ianai natuna. Ianai tu Iosefa natuna. <sup>25</sup> Iosefa tu Matatia natuna. Matatia tu Amosa natuna. Amosa tu Nahum natuna. Nahum tu Eseli natuna. Eseli tu Nagai natuna. <sup>26</sup> Nagai tu Mahat natuna. Mahat tu Matatia natuna. Matatia tu Semein natuna. Semein tu Ioseka natuna. Ioseka tu Ioda natuna. <sup>27</sup> Ioda tu Ioanan natuna. Ioanan tu Resa natuna. Resa tu Serubabele natuna. Serubabele tu Sealtiele natuna. Sealtiele tu Neri natuna. <sup>28</sup> Neri tu Melki natuna. Melki tu Adi natuna. Adi tu Kosam natuna. Kosam tu Elmadam natuna. Elmadam tu Ere natuna. <sup>29</sup> Ere tu Iosua natuna. Iosua tu Eliesere natuna. Eliesere tu Iorim natuna. Iorim tu Matat natuna. Matat tu Levi natuna. <sup>30</sup> Levi tu Simeona natuna. Simeona tu Iuda natuna. Iuda tu Iosefa natuna. Iosefa tu Ionam natuna. Ionam tu Eliakim natuna. <sup>31</sup> Eliakim tu Melea natuna. Melea tu Mena natuna. Mena tu Matata natuna. Matata tu Natan natuna. Natan tu Davida natuna. <sup>32</sup> Davida tu Iese natuna. Iese tu Obed natuna. Obed tu Boas natuna. Boas tu Salmone natuna. Salmone tu Nasona natuna. <sup>33</sup> Nasona tu Aminadab natuna. Aminadab tu Admin natuna. Admin tu Areni natuna. Areni tu Hesron natuna. Hesron tu Perese natuna. Perese tu Iuda natuna. <sup>34</sup> Iuda tu Iakobo natuna. Iakobo tu Isako natuna. Isako tu Aberahamo natuna. Aberahamo tu Tera natuna. Tera tu Nahoro natuna. <sup>35</sup> Nahoro tu Serug natuna. Serug tu Reu natuna. Reu tu Peleg natuna. Peleg tu Ebere natuna. Ebere tu Sela natuna. <sup>36</sup> Sela tu Kainana natuna. Kainana tu Afasada natuna. Afasada tu Sem natuna. Sem tu Noa natuna. Noa tu Lameka natuna. <sup>37</sup> Lameka tu Metusela natuna. Metusela tu Enoka natuna. Enoka tu Iared natuna. Iared tu Mahalalel natuna. Mahalalel tu Kainana natuna. <sup>38</sup> Kainana tu Enos natuna. Enos tu Seta natuna. Seta tu Adamu natuna. Adamu tu Barau natuna.

### Satani na Iesu eriba-ḡaniato

**4** Iesu Ioridana ḡarukanai Iauka Veāḡa na evaḡa-vonuato vau, ea ḡenoḡoito, benamo Iauka na tano fakana ḡana eḡori-iaḡoato. <sup>2</sup> Monai ḡaro e boḡi gabana vasi-vasi (40) Diabolo na eribaḡaniato-ḡoi. Mo ḡaro mabarari nuḡari ai asi eḡaniḡanito-ḡoi, moḡa lorinai mo ḡaro ḡekorito murinai, ḡia evito-rakavaiato.

<sup>3</sup> Diabolo na ekiraiato, ekirato, “Bema ḡoi Barau Natuna nai, mai fore nokiraia, be ḡaniḡani ai neiaḡo.” <sup>4</sup> A Iesu na evaḡa-veseato, ekirato, “Buka Veāḡa nuḡanai maiḡesi ekirani, “Tarimarima tu dia ḡaniḡani na moḡo bemaḡurini.”

<sup>5</sup> Benamo Diabolo na Iesu eḡori-raḡeato gabu ta tuḡunai, tanobara basileiari mabarari vaḡa-sebo evaḡa-ḡitaiato. <sup>6</sup> Benamo Diabolo ekirato, “Au na seḡuka bavin-

imuni, maiġeri dagara mabarari boġita-ġaurini, aramu maki bebaregoni. Mai dagara mabarari tu au ġegu, benamo aura-viniani tarimana baviniani. <sup>7</sup> Moġa lorinai bema au botoma-rakariġo viniguni nai, maiġeri dagara mabarari boġabirini ġoi ġemu.”

<sup>8</sup> Senaġi Iesu evaġa-veseto, ekirato, “Buka Veaġai tu maiġesi ġetoreato, ‘Vereġauka, ġoi ġemu Barau bono toma-rakariġo vinya, ġia moġo ġereġana vetuġunaġina bono iaġo-vini!”

<sup>9</sup> Benamo Satani na Ierusalemata ġana eġori-iaġoato, Rubu Veaġa tuġunai evaġaruġakauato, ekiraiato, “Bema ġoi Barau Natuna, mainana noburi-firiġo, <sup>10</sup> korana Buka Veaġa nuġanai maiġesi ekirani, ‘Barau na ġena aneru bekirarini, ġoi beġe narimuni.’ <sup>11</sup> Ekirani maki, ‘Aneru na ġimari na beġe ġobemuni, beġe ġabivaisimuni, kwakumu fore ai asi boraraiani.”

<sup>12</sup> Iesu evaġa-veseto, ekirato, “Buka Veaġa nuġanai maki ekirani, ‘Vereġauka ġoi ġemu Barau asi bono riba-ġania.”

<sup>13</sup> Satani ġena veribaġani mabarari evaġa-koririto, benamo eraga-kwaneato, eiaġoto mo, ġaro ta.

### Iesu ġena ġauvei esinaiato Galileai

*Mataio 4:12-17; Mareko 1:14-15*

<sup>14</sup> Iesu ma eġenoġoito Galilea ġana, Iauka Veaġa seġukana maki ġia ġesi. Ġia varina Galilea tano nuġanai ġefiu-rovorovoato. <sup>15</sup> Iesu tu ġeri rubu nuġari ai evevaġaribato-ġoi, mabarari na ġevaġa-raġeato.

### Nasareta tarimari na Iesu asi ġeġabi-raġeato

*Mataio 13:53-58; Mareko 6:1-6*

<sup>16</sup> Benamo Iesu Nasareta ġana eiaġoto. Mai tu ġia ebaregoto vanuġana. Vanaġi-vanaġi eveito-ġoi kavana Sabadi ai ġia rubu ai eraka-toġato. Benamo Buka Veaġa bene iavia ġana evariġisito nai, <sup>17</sup> Isaia peroveta tarimana ġena buka rubu ġi-taġauna tarimana na Iesu eviniato, benamo ġia na ereraiato, ġena iavi-iavi gabuna eġoitaġoato, maiġesi ekirani,

<sup>18</sup> “Vereġauka Iaukana tu

au ġegu ai maiġa,

korana ġia na tu

au eboroġiguto,

ema eviriġiguto,

Vari Namona gara veġubu tarimari bana ġobata-viniri ġana.

Etuġuguto, dibura tarimari ġeri ai Barau na dibura na varau eġabi-vaġirato varina

bana varifiua ġana,

ema mata-bubu tarimari

matari maki beġene fafa.

Ġevaġa-rakavarini tarimari

bana vaġa-maġuriri,

<sup>19</sup> ema Vereġauka na tarimarima bevaġa-maġuririni laġanina bana ġobata-iaġia.”

<sup>20</sup> Benamo Iesu na buka ma eiokuato, rubu ġitaġauna tarimana ma evini-ġenoġoiato, benamo etanu-tarito. Mabarari rubu nuġanai tarimari na ġeġita-karakaraiato. <sup>21</sup> Benamo Iesu na eġobata-vinirito, ekirato, “Mai boġo seġaġia gu-ruġana tu toma ġaro ai bemoġoni.”

<sup>22</sup> Benamo mabarari na ġevaġa-namoato e ġeġabato, korana guruġa namori eki-raġirito nai. Ġekirato, “Mai tu Iosefa natuna ba?”

<sup>23</sup> Benamo Iesu na ekirarito, ekirato, “Au ribagu ġomi na mai sisiba guruġana au ġegu ai boġo kira-varaguni, boġo kirani, ‘Doketa tarimamu, tauġemu bono vevaġa-maġuri! Kaperanaumai oveirito veiġari variri ġama seġaġirito, be mainai ġemu vanuġa korikori ai maki bono vei.’” <sup>24</sup> Moġoni akiramini, peroveta tarimana tu ġena vanuġa korikori ai asi beġe ġabi-raġeani. <sup>25</sup> Maiġa maki boġono seġaġi: Moġoni, Elia ġena negai vabu ġutuma Isaraelai ġetanuto-ġoi. Laġani toitoi (3) ma ġue imaima se-bona (6) nuġanai ġura asi eraguto-ġoi, tanobara mabarana doġe na eġabi-ġauato. <sup>26</sup> Senaġi mo Isaraela vaburi ġeri ai Barau na Elia asi etuġu-iaġoato. Irau gabu vanuġana ta arana Sarefata, Sidono tanonai, vabu ta ġenai etuġu-iaġoato. <sup>27</sup> Elisa, peroveta tarimana, ġena negai lepera tarimari ġutuma Isaraelai ġetanuto-ġoi, senaġi sebona ta asi evaġa-namoato, Naman, Siria tarimana, moġo ġereġana.

<sup>28</sup> Rubu ai ġevevogoto tarimari mabarari mo guruġa ġeseġaġiato nai, ġebaru-rakavato. <sup>29</sup> Benamo ġevariġisito, Iesu vanuġa na ġeinu-rosiato, ġeri vanuġa ġevaġa-ruġaiato ġorona tavi ta reke lofa asikeina na beġene fiu-riġoa ġetato. <sup>30</sup> Senaġi Iesu tu ġia fakari na moġo eraka-vaġito, mo eiaġoto.

### Iesu na iauka rakavana elai-vaġiato

*Mareko 1:21-28*

<sup>31</sup> Iesu tu Kaperanauma, Galilea vanuġana ta, ġana evariġoto. Benamo Sabadi ai evevaġa-ribato. <sup>32</sup> Ġia ġena vevaġa-riba guruġari tarimarima na ġeseġaġiato nai, ġeġaba-rakavato, korana ġena guruġa ma seġukana.

<sup>33</sup> Rubu nuġanai iauka rakavana na eboroġiato tarimana ta etanu-taġoto-ġoi. Ġia ekoġo-giġitarito, ekirato, <sup>34</sup> “Iesu, Nasareta taumu o, kara ġemai noveia otoni? Ġoi ġai vaġa-rakavama uranai boiaġoma, ene? Au ribagu, ġoi tu Barau ġena Veaġa Tarimamu.”

<sup>35</sup> Iesu na ekira-ġoiato, ekirato, “Gurumu, ġia ġenana noraka-vaġi!” Benamo mo iauka rakavana na tano eġidara-iaġiato tarimarima ġoirari ai, ġia ġenana eraka-vaġito, fau ta maki asi eforito ġia ġenai.

<sup>36</sup> Benamo tarimarima mabarari nuġari ġefarevaġi-rakavato, ġeveguruġa-vevinito, ġekirato, “Mainai kamasi eguruġani? Be, ma seġukana e ma gwadana ġesi iauka rakavari evaġa-guruġarini, benamo ġeraka-vaġini!” <sup>37</sup> Benamo Iesu varina mo gabu mabaranaġi ġefiu-rovorovoato.

### Iesu na Simona ġena taġama evaġa-namoato

*Mataio 8:14-15; Mareko 1:29-31*

<sup>38</sup> Iesu rubu eraga-kwaneato, benamo Simona ġena numa ġana eiaġoto. Simona ġena taġama vavinena ekeveto, tauġanina eseġuka-rakavato; benamo Iesu ġenoġiato bene vaġa-kavaia. <sup>39</sup> Benamo Iesu eiaġoto mo vavine sevinaġi eruġato, keve ekira-ġoiato, benamo keve ekorito. Vavine maoromaoro evariġisito, benamo eġuburito.

### Keve tarimari ġutuma Iesu na evaġa-namorito

*Mataio 8:16-17; Mareko 1:32-34*

<sup>40</sup> Ġaro ea keto-firiġoto-ġoi nai, tarimarima na keve irauirau tarimari mabarari Iesu ġenai ġeġori-iaġorito. Ġia ġimana tarima tata iatari ai etore-kaurito evaġa-

namorito. <sup>41</sup> Iauka rakavari maki tarimarima ġutuma ġerina ġeraka-vaġito, benamo iauka rakavari ġekoġoto, ġekirato, “Ġoi tu Barau Natuna!” Senaġi Iesu na evaġa-guruġarito asi beġene guruġa, korana ġia ribari Iesu tu Keriso, (Barau na ekiraġi-toreato vevaġa-maġuri tauna).

### Iesu rubu nuġari ai eġobatato-ġoi

*Mareko 1:35-39*

<sup>42</sup> Elaġanito, Iesu evariġisito, tano fakana ġana eiaġoto. Tarimarima na ġea tauato, ġedoġariato, ġeġabi-tariato asi ġeri ura ġia na bene raga-kwaneri ġetato.

<sup>43</sup> Senaġi Iesu na evaġa-guruġarito, ekirato, “Au tu vanuġa irauri ai maki bana ġo-bata, Barau ġena Basileia varina namona bana fiua, Barau na etuġuguto korana tu moġa.”

<sup>44</sup> Benamo Iudea tanona ruburi nuġari ai eġobatato-ġoi.

### Iesu na ġena mero ekearito

**5** Ġaro ta Iesu tu Genesareta kouna rikina i eruġa-taġoto-ġoi, tarimarima na ġeraga-ġeġeraġiato, Barau ġena guruġa beġene seġaġia ġana. <sup>2</sup> Ġia tu ġasi ru-arua eġitarito, kou rikina i ġeinu-raġerito; maina tarimari na ġeraga-kwanerito, ġeri reke ġeġuriġirito-ġoi. <sup>3</sup> Benamo Iesu tu mo ġasi tai eraġeto, Simona ġena ġasi. Ġia na Simona ekiraiato, kota negini-rosia nanu ġana. Benamo ġasi ai etanu-tarito, tarimarima ġutuma evaġa-ribarito.

<sup>4</sup> Egruġa-ġosito vau, ġia na Simona ekiraiato, ekirato, “Ġemi ġasi dodoku rekena ġana ġogini-rosia, be ġemi reke boġono toreri, maġani-kone boġono vaġi ġana.”

<sup>5</sup> Simona evaġa-veseto, ekirato, “Vevaġa-riba taumu, ġai tu baġa vekwarāġi-laġani, maġani-kone ta maki asi baġa doġaria, senaġi ġoi ġemu guruġa dainai reke atorerini.”

<sup>6</sup> Benamo ġetorerito, maġani-kone asisebo ġetoġato, ġeri reke maki dori ġevedareto. <sup>7</sup> Moġesi nai karori ġasi tai ġelau-iaverito, beġene iaġoma, be ġia beġenema vaġa-kavari ġetato. Ġeiaġomato, ġasi ruarua maġani-kone na ġevaġa-vonurito, dori ġeburuto-ġoi.

<sup>8</sup> Simona Petero na mo veġa eġorato dagarana eġitaiato, benamo Iesu kwakuna korana i eketo-tarito vau ekiraiato, ekirato, “Vereġauka, noraka-veġita au ġe-guna, au tu vei-rakava tarimagu!” <sup>9</sup> Korana tu ġia ma karonna mabarana ġesi nuġari ġefarevaġi-rakavato, mo maġani-kone asisebo ġevaġirito nai. <sup>10</sup> Simona ġesi ġemainna-vegogoto-ġoi tarimari maki Iakobo (o Iames) e Ioane, Sebedaijo natuna, ġeġaba-rakavato. Iesu na Simona ekiraiato, ekirato, “Asi nogari; maitoma bevesina beiaġoni, ġoi tu tarimarima bomaina-vinirini.” <sup>11</sup> Benamo ġasi ruarua tu kou rikina i ġeinu-raġerito, ġeri dagara mabarari ġeraga-kwanerito, Iesu murina i ġerakato.

### Iesu na lepera tarimana evaġa-namoato

*Mataio 8:1-4; Mareko 1:40-45*

<sup>12</sup> Ġaro ta Iesu tu vanuġa ta nuġanai, tarima ta monai kefina mabarana lepera moġo. Ġia na Iesu eġitaiato nai, ġoiranai evetui-tarito, enoġiato, ekirato, “Vereġauka, bema ġoi ourani nai, moġoni boiarevaguni, bovaġa-namoguni riba!”

<sup>13</sup> Iesu ġimana etuġu-iaġoato, eġabi-karaiato, ekirato, “Aurani, be nonamo!” Benamo vaġa-sebo lepera na eraga-kwaneato.



<sup>14</sup> Iesu na evaḡa-guruḡaiato, ekirato, “Tarima ta asi bono kira-varaia.” Ma ekirato, “Noiaḡo, Rubu Veḡa verena na bene ḡitamu, ema veiareva varevare dagarari Mose na ekiraḡiatio ilailanai bono vinia, be tarimarima beḡene riba, ḡoi tu bonamo.”

<sup>15</sup> Senaḡi Iesu varina tarimarima na ḡefiu-rovorovoato-ḡoi vau, tarimarima ḡutuma-bara ḡevevogoto-ḡoi, ḡia ḡena guruḡa seḡaḡi-seḡaḡiri e ḡeri keve vaḡa-namori uranai. <sup>16</sup> Senaḡi Iesu tu eraka-veḡitato-ḡoi tano fakana ḡana, ea ḡuriḡurito-ḡoi.

### Iesu na rakava etuḡamaḡi-fitoḡarito

*Mataio 9:1-8; Mareko 2:1-12*

<sup>17</sup> Ḡaro tai Iesu evevaḡa-ribato-ḡoi nuḡanai, Farisea tarimari e taravatu vaḡa-ri-ba-iaḡina tarimari Galilea e Iudea vanuḡari mabarari na, ema Ieruselema na ḡeiaḡo-mato, ḡia sevinaḡi ḡema tanu-tarito. Barau ḡena seḡuka Iesu ḡenai evaḡa-foforiato, keve tarimari bene vaḡa-namori ḡana. <sup>18</sup> Tarima kotari na tauḡanina tavi ta emaseto tarimana ta gedai genagenanai ḡeḡwa-iaḡoato. Numa nuḡanai beḡene raka-toḡa dabarana ḡevetauato, Iesu ḡoiranai beḡene tore-taria ḡetato. <sup>19</sup> Senaḡi tarimarima ḡutuma naima, rakatoḡa dabara ta asi ḡedoḡariato. Moḡa lorinaḡi keve rakava tarimana ma gedana ḡesi ḡeḡwa-raḡeato numa tuḡunai, ḡuduḡu ḡeḡiu-fakaiato vau, ḡetuḡu-riḡoato tarimarima fakari ai Iesu ḡoiranai. <sup>20</sup> Iesu na ḡeri veḡabidadama eḡi-taiato, benamo keve rakava tarimana ekiraiato, ekirato, “Gata, ḡoi ḡemu rakava batuḡamaḡi-fitoḡari.”

<sup>21</sup> Farisea tarimari e taravatu ḡevevaḡa-ri-ba iaḡiatio-ḡoi tarimari maiḡesi ḡetuḡa-maḡito, “Mai tu deikara, ḡia na Barau ekira-fitoḡaiiani? Barau ḡereḡana na moḡo rakava etuḡamaḡi-fitoḡarini!”

<sup>22</sup> Iesu ma ribana ḡia kara ḡetuḡamaḡirito-ḡoi, benamo evaḡa-guruḡarito, ekirato, “Karase nai nuḡami ai maniḡesi ḡotuḡamaḡini?” <sup>23</sup> Aiḡesina baguruḡani tu mer-aḡa, ‘Ḡemu rakava batuḡamaḡi-fitoḡari’ banasi, ba bara kira, ‘Novariḡisi, be no-raka’ barasi? <sup>24</sup> Au na navaḡa-ḡitami, Tarimarima Natuna tu ma seḡukana rakava betuḡamaḡi-fitoḡarini tanobarai.” Ḡia na keve rakava tarimana evaḡa-guruḡaiato, ekirato, “Novariḡisi, ḡemu geda noḡabia, be numa ḡana noiaḡo!”

<sup>25</sup> Benamo ḡia maoromaoro evariḡisito tarimarima ḡoirari ai, egena-iaḡirito dagarari eḡabirito, ḡena numa ḡana eiaḡoto, Barau evaḡa-raḡeato. <sup>26</sup> Tarimarima mabarari nuḡari ḡefarevaḡito ema Barau ḡevaḡa-raḡeato. Gari na evaḡa-vonurito, benamo ḡekirato, “Veiḡa boruri toma ḡaro ai bita ḡita!”

### Iesu na takesi gogo tarimana arana Levi ekeaiato

*Mataio 9:9-13; Mareko 2:13-17*

<sup>27</sup> Moḡa murinaḡi Iesu tu vanuḡa na eraka-rosito, benamo takesi gogo tarimana arana Levi takesi moniri ḡeḡabito-ḡoi numanai tanutaḡo eḡitaiato. Benamo Iesu na ekiraiato, ekirato, “Murigu ai noma raka.” <sup>28</sup> Benamo Levi evariḡisito, ḡena dagara mabarari eraga-kwanerito, Iesu murinaḡi erakato.

<sup>29</sup> Benamo Levi na ḡaniḡani baregona ḡena numai eveiatio Iesu ḡana. Varivari tarimari vefakari ai tarimarima ḡutuma takesi gogo tarimari ema tarima tari ḡia ḡesi ḡeḡaniḡanito. <sup>30</sup> Farisea tarimari tari e taravatu ḡevevaḡa-ri-ba iaḡiatio-ḡoi tarimari, ḡia ḡeri doḡoro tarimari, ḡevanevaneto Iesu ḡena mero ḡeri ai, ḡekirato, “Karase nai ḡomi tu takesi gogo tarimari e vei-rakava tarimari ḡesi ḡoḡaniḡanini ema ḡoniuniu-

vegogoni?”<sup>31</sup> Iesu na evaḡa-veserito, ekirato, “Namo tarimari tu doketa asi beḡe ve-taurini, senaḡi keve tarimari moḡo.”<sup>32</sup> Au maki vei iobukaiobuka tarimari keakeari asi aiaḡomato, senaḡi vei-rakava tarimari beḡene vetuḡamaḡi-kure e beḡene raka-kure ḡana aiaḡomato.”

### Ḡaniveaḡa

*Mataio 9:14-17; Mareko 2:18-22*

<sup>33</sup> Farisea tarimari na Iesu ḡevaḡa-guruḡaiato, ḡekirato, “Ioane Babatiso ḡena mero nega-ḡutuma ḡeḡani-veaḡani e ḡeḡuriḡurini. Ḡai ḡema mero maki moḡesi ḡeveini, a ḡoi ḡemu mero tu ḡeḡaniḡanini e ḡeniuniuni moḡo.”

<sup>34</sup> Iesu na evaḡa-veserito, ekirato, “Ḡomi ḡotuḡamaḡini veḡaraḡo variḡu tari-mana ḡatana seviri ai etanuni nuḡanai beḡe ḡani-veaḡani ei?”<sup>35</sup> Ḡarona eiaḡomani, veḡaraḡo variḡu tarimana ḡia ḡerina beḡe ḡabi-veḡitaiani, monai vau beḡe ḡani-veaḡani.”

<sup>36</sup> Iesu na ḡeri barabore ta ma ekiraḡiatio, ekirato, “Tarima ta na dabuḡa var-iḡuna asi bedareani, dabuḡa guinena bani-iaḡina. Bema moḡesi beveini nai, dabuḡa variḡuna bedareani, ema dabuḡa variḡuna veseana dabuḡa guinena ḡesi asi beḡe ilailani.”<sup>37</sup> Tarima ta na vine nanuna variḡuna nanigosi kefina guinenai asi besisiani. Bema moḡesi beveini nai, vine nanuna variḡuna na kefi guinena beḡani-fakaiani. Vine nanuna bevebubuni e kefina berakavani.”<sup>38</sup> Senaḡi vine nanuna var-iḡuna nanigosi kefina variḡunai besisiani tu namo!<sup>39</sup> Ema tarima ta na vine nanuna guinena eniuani murinai vine nanuna variḡuna asi beura-viniani, korana ḡia beki-rani, ‘Vine nanuna guinena tu namo vedaurea.’”

### Iesu tu Sabadi Verena

**6** Sabadi tai Iesu widi vamokari nuḡari na eraka-iaḡoto-ḡoi, benamo ḡena mero widi ḡebukito, ḡimari ai ḡemuturito-ḡoi, benamo tauri tu ḡeḡanirito-ḡoi.<sup>2</sup> Farisea tarimari kotari na ḡedanaḡirito, ḡekirato, “Ḡomi tu kara dainai ḡaina tar-avatu asi ḡokorana-iaḡiani, Sabadi ai widi ḡobukini?”

<sup>3</sup> Iesu na evaḡa-veserito, ekirato, “Ḡomi Davida ma karona ḡesi ḡevitorito nai, Davida na veḡa ta eveiatio guruḡana tu asi ḡoiaviani?”<sup>4</sup> Barau ḡena numai eraka-toḡato, Barau ḡoiranai ḡetorerito-ḡoi beredi eḡabito, eḡanito ema karona maki evinirito. Mo beredi tu veaḡa, Rubu Veaḡa vereri moḡo ḡari, taravatu.”<sup>5</sup> Iesu na ma ekirarito, ekirato, “Tarimarima Natuna tu Sabadi Verena.”

### Ḡima boso tarimana

*Mataio 12:9-14; Mareko 3:1-6*

<sup>6</sup> Ma Sabadi tai Iesu rubu ai eraka-toḡato, benamo evevaḡa-ribato-ḡoi. Monai tarima ta tu ḡimana aroribana tu ebosoto.<sup>7</sup> Taravatu ḡevevaḡa-riba iaḡiatio-ḡoi tari-mari e Farisea tarimari na tu ḡia ḡeḡita-taḡoato-ḡoi, mai Sabadi ai bevevaḡa-namoni ba asiḡi, korana beḡene samania ḡana.”<sup>8</sup> Senaḡina Iesu na ḡia kara ḡetuḡamaḡiatio-ḡoi tu eribiaiatio, benamo mo tarima ḡimana boso ekiraiatio, ekirato, “Noruḡa-vaisi, mainai noma ruḡa.” Benamo eruḡa-vaisito, ea ruḡato.”<sup>9</sup> Benamo Iesu na evaḡa-guruḡarito, ekirato, “Nadanaḡimi roḡo, taravatu nuḡanai aiḡa tu namo, Sabadi ai veḡa namori veiveiri namo ba veḡa rakavari sini veiri? Tana vevaḡa-maḡuri ba tana vaḡivaḡi?”<sup>10</sup> Eboḡe-ḡeḡeraḡito, mabarari eḡitarito, benamo mo tarima ekira-

iato, ekirato, “Ĝimamu notuĝu-roroĝotoa.” Ĝimana etuĝu-roroĝotoato, benamo enamoto ĝimana reke ta kavana.

<sup>11</sup> Senaĝina ĝia tu ĝebaru-rakavato, benamo tauĝeri fakari ai moĝo ĝeguruĝa-vegogoto Iesu kamasi ta beĝene veia ĝana.

### Iesu na tarima gabanana ruarua (12) eĝabi-hidirito

*Mataio 10:1-4; Mareko 3:13-19*

<sup>12</sup> Mo ĝaro tai Iesu ĝoro ta tuĝuna ĝana evaraĝeto ĝurigiuri, benamo mo boĝi vinubana Barau ĝenai eĝauĝauto. <sup>13</sup> Elaĝanito, ĝena mero ekea-vegogorito, benamo gabanana ruarua (12) eĝabi-viriĝirito, arari evatorito, apostolo. <sup>14</sup> Simona, arana ta tu Petero, ma tarina Anduru; e Iakobo (o Iames), e Ioane, e Filipino, e Batolomeo, <sup>15</sup> e Mataio, e Tomasi; e Iakobo (o Iames), Alfeo natuna; e Simona, Selote tarimana; <sup>16</sup> e Iudas, Iakobo (o Iames) natuna; ema Iudas Isakariota, Iesu berevaiiani tarimana.

### Iesu evevaĝa-ribato e keve evaĝa-namorito

*Mataio 4:24-25; Mareko 3:7-12*

<sup>17</sup> Ĝia ĝesi ĝoro na ĝeseiriĝoto tano faiaranai, benamo Iesu ema ruĝa-tarito. Ĝia ĝenai riba ĝeĝabito-ĝoi tarimari ĝutuma ema tarimarima ĝutuma lelevaĝiri maki Iudea ema Ierusalemna na ĝeiaĝomato, Taia konena na e Sidono konena na ĝeiaĝomato, <sup>18</sup> ĝia beĝene seĝaĝia uranai ema ĝeri keve bene vaĝa-namori ĝana. Iauka rakavari na ĝeboroĝirito tarimari maki evaĝa-namorito. <sup>19</sup> Benamo tarimarima mabarari ĝeurato-ĝoi Iesu beĝene ĝabi-karaia, korana tu seĝuka ĝia ĝenana eiaĝomato-ĝoi, benamo tarimarima mabarari ĝeri keve ĝenamato-ĝoi.

### Deikara beĝene iaku e deikara ĝeri ai tu rakava

*Mataio 5:1-12*

<sup>20</sup> Iesu eboĝeboĝeto, benamo eboĝe-iaĝoto ĝena mero eĝitarito vau ekirato:

“Gara veĝubu tu ĝoiaku,

korana Barau ĝena Basileia tu ĝomi ĝemi.

<sup>21</sup> Ĝomi deidei toma ĝevitomini tu boĝono iaku,

korana ĝomi roĝo boĝo ĝani-maseni bene.

Ĝomi deidei toma ĝotaĝi-taĝini tu boĝono iaku,

korana boĝo rikini bene.

<sup>22</sup> Boĝono verere bema tarima na beĝe baru-vinimini, beĝe kira-fitoĝamini, beĝe rori-toremni, ema arami beĝe vaĝa-rakavarini Tarimarima Natuna dainai. <sup>23</sup> Moĝeri beĝe ĝorani ĝaronai boĝono iaku e boĝono buri-vaisi ma vereremi ĝesi, korana davami tu asikeikeina gubai. Korana ĝia seneri na maki peroveta tarimari moĝesi ĝeveirito.

<sup>24</sup> Senaĝina ĝomi ma ĝemi

farefare ĝutuma tarimami

vetuĝami kika,

korana vaĝa-iakumi farefareri tu varau ĝoĝabito bene.

<sup>25</sup> Toma ĝoĝani-maseni tarimami,

vetuĝami,

korana beĝea vitomini.

Toma ĝorikini tarimami,

vetuḡami kika,  
korana nuḡami beḡea metoni  
e boḡoa taḡini.

<sup>26</sup> Tarimarima na ḡekiraḡi-varaḡe varaḡemini tarimami, vetuḡami, korana seneri na maki peroveta tarimari ḡofaḡofari tu maniḡesi ḡevaḡa-raḡerito.”

### **ḡevaḡa-rakavamini tarimari boḡono ura-viniri**

*Mataio 5:38-48*

<sup>27</sup> “Senaḡina au ḡoseḡaḡiguni tarimami akiramini: ḡebaru-vinimini tarimari boḡono ura-viniri, ḡevaḡa-rakavamini tarimari veiḡa namori boḡono vei-viniri. <sup>28</sup> ḡekira-rakavamini tarimari boḡono vaḡa-namori ema veiḡa rakavari ḡevei-vinimini tarimari ḡeri boḡono ḡuriḡuri. <sup>29</sup> Bema tarima ta na taḡomu tavi ta beforoani nai, taḡomu reke ta maki bono vinia. Tarima ta na ḡemu koudi beḡabiani nai, sedi maki asi bono ḡabi-taria, bene ḡabia. <sup>30</sup> ḡemu ai beḡe noḡinoḡini tarimari bono viniri ema deikara na ḡemu dagara ta beḡabi-rakaiani, ḡabiḡoina guruḡana asi bono vei. <sup>31</sup> Kara ourani tarimarima na ḡemu ai beḡene veia veiḡana, ḡia ḡeri ai maki mo veiḡa bono veia.

<sup>32</sup> Bema ḡoura-vinirini tarimari tu ḡomi ḡeura-vinimini tarimari moḡo nai, ḡomi ḡemi namo tu kara? Rakava tarimari maki ḡeura-vinirini tarimari moḡo ḡeura-vinirini. <sup>33</sup> O bema veiḡa namori ḡemi ai ḡeveini tarimari moḡo veiḡa namori ḡovei-vinirini, ḡomi ḡemi namo tu kara? Rakava tarimari maki mani veiḡa sebona ḡeveiani. <sup>34</sup> O bema ma beḡe vini-ḡoimini tarimari moḡo ḡovinirini, ḡomi ḡemi namo tu kara? Rakava tarimari na maki tarima ḡevinirini, murinai tu mabarari ma beḡene dava-ḡoiri ḡetoni. <sup>35</sup> Senaḡina ḡebaru-vinimini ema ḡevaḡa-rakavamini tarimari boḡono ura-viniri, veiḡa namori ḡeri ai boḡono vei, boḡono viniri, a tuḡu vaḡavoi tuḡamaḡina asi boḡono vei. Benamo davami beḡene barego, ema Iaru-korokoro Barauna natunai boḡono iaḡo, korana tu ḡia na asi ḡevaḡa-namoani tarimari e veirakava tarimari evaḡa-namorini. <sup>36</sup> Boḡono vevetuḡa-ḡwa, ḡomi Tamami evevetuḡa-ḡwani kavana.”

### **Nuḡami ai tarimarima asi boḡono vaḡa-rakavari**

*Mataio 7:1-5*

<sup>37</sup> “Nuḡami ai tarimarima asi boḡono kira-kerereri. Moḡesi tu Barau na maki asi bekiraḡimini ḡomi tu kerere. Rakava voina tarimarima ḡeri ai asi boḡono kiraḡikaua, benamo Barau na rakava voina ḡemi ai asi bekiraḡi-kauani. Rakava boḡono tuḡamaḡi-fitoḡaia, be Barau na maki ḡemi rakava bene tuḡamaḡi-fitoḡari. <sup>38</sup> Boḡono vini, be Barau na maki bene vinimi, ḡutumari bene dori-riḡori, bene kora-vegogori, bene vonu-fokafoka, bene ḡiḡiḡiḡi-seḡi, bene bubu-riḡoa ḡemi ai. Korana aiḡesi ḡomi ḡovinini, Barau na maki moḡesi bevinimini.”

<sup>39</sup> Iesu na barabore ta ma ekira-vararito, ekirato, “Mata-bubu tarimana na mata-bubu tarimana ta beḡori-kauani riba ba? Ba tauri ruarua koufai beḡea keto-ḡurani? <sup>40</sup> Riba vetau merona na evaḡa-ribaiani tarimana asi bevanaḡiani, senaḡina ḡena sikuli bevaḡa-koriani vau, evaḡa-ribaiani tarimana ḡesi beḡe ilailani.

<sup>41</sup> Kara dainai tarikakamu matanai libika oḡitaiani, senaḡi ḡoi matamu ai ḡau tubina tu asi otuḡamaḡiani. <sup>42</sup> Kamara dabarai ḡoi tarikakamu okiraiani, okirani, ‘Ḡata, au na roḡo matamu ai libika nakokia,’ senaḡina ḡoi tauḡemu matamu ai ḡau

tubina tu asi oġitaiani? Ġofaġofa tarimamu, guine tu ġoi matamu ai ġau tubina nokoki-vaġia roġo, benamo boboġeboġe-ginikauni vau, tarikakamu matanai libika bono kokia.”

### Ġau ta ġwaġwana

*Mataio 7:16-20; 12:33-35*

<sup>43</sup>“Ġau namona beġwani ġwaġwana tu dia rakava, ema ġau rakavana beġwani ġwaġwana tu dia namo. <sup>44</sup>Ġau mabarari tu ġwari ai bita ribani. Figi ġwari maki ġau ma giniginiri ġerina asi ġebokoni, ema vine ġwari (o grapes) ġauġa ġiniginiri ġeri ai asi ġebokoni. <sup>45</sup>Tarima namona na dagara namori nuġanai evaġa-vegogorini dagarari bevaġa-raka-rosirini. Tarima rakavana na dagara asi namori nuġanai evaġa-vegogorini dagarari bevaġa-raka-rosirini. Korana tarima tu nuġana na kara eiaġo-mani murunai ekiraġirini.”

### Numa ġeragani tarimari ruarua

*Mataio 7:24-27*

<sup>46</sup>“Karase nai au ġokiraġiguni, ġokirani, ‘Vereġauka, Vereġauka,’ nuġanai au aguruġani veiġari tu asi ġoveirini? <sup>47</sup>Navaġa-ribami, deikara au ġegu ai eiaġomani, au ġegu guruġa ema seġaġini ma veiġari eveirini tu kamasi. <sup>48</sup>Ġia tu tarima ta ġena numa eragaiato kavana. Guri ekwa-variġo kwareġaiato, ema fore iatanai evaġaruġaiato, benamo ġabata baregona eragato, mo numa edoriato, senaġi asi eketoto, korana fore iatanai eragaiato nai. <sup>49</sup>A tarima ta au ġegu guruġa eseġaġirini, senaġi veiġari tu asi eveirini, ġia tu numa eragaiato nai, tano moirana iatanai moġo evaġaruġaiato, ġabata na mo numa edoriato nai, eketo-tarito, benamo eġwa-rovorovoato.”

### Roma vetari verena ġena vetuġunaġi merona

**7** Iesu na moġeri guruġa mabarari tarimarima ġoirari ai ekiraġi-ġosirito vau, Kaperanauma vanuġanai eraka-toġato. <sup>2</sup>Monai Roma vetari verena ta etanuto-ġoi. Gena vetuġunaġi merona, euravini-baregoato-ġoi merona, ekeve-rakavato, dori emaseto-ġoi. <sup>3</sup>Vetari verena na Iesu varina eseġaġiato, benamo Iuda tarima baregori kota etuġu-iaġorito, Iesu beġene noġia, bene iaġoma, ġena vetuġunaġi merona benema vaġa-namo. <sup>4</sup>Benamo Iesu ġenai ġeiaġoto, ma nuġari mabarari ġesi ġenoġiato, ġekirato, “Mai vetari verena tu tarima namona naima bono vaġa-kavaia. <sup>5</sup>Korana ġia na ġita besera eura-vinirini, ema ġai ġema rubu maki ġia na eragaiato.”

<sup>6</sup>Iesu ġia ġesi ġeiaġoto. Numa ġeraka-kavinaġiato-ġoi nai, vetari verena na ġatana kota etuġu-iaġorito Iesu ġoirana ġana, benamo vetari verena ġena guruġa Iesu ġekira-varaiato, ġekirato, “Vereġauka, asi novekwaragi, au tu asi ilaila, ġoi ġegu numai boraġekauni. <sup>7</sup>Au maki asi ilaila, ġoi ġemu ai baiaġosini. Senaġi ġoi noguruġa moġo, benamo au ġegu vetuġunaġi merona benamoni. <sup>8</sup>Au maki tarima kota ġeri veġitaġau gabureri ai ema vetari tarimari o soldia tu au gaburegu ai. Au na ta bakiraiani, ‘Noraka!’ benamo berakani, ma ta bakiraiani, ‘Noiaġoma!’ benamo beiaġomani. Ema au ġegu vetuġunaġi merona bakiraiani, ‘Maiġa noveia!’ benamo beveiani.”

<sup>9</sup>Iesu na mai guruġa eseġaġiato nai, eġaba-rakavato, eruġa-kureto, ġia murinai ġerakato tarimari ġutuma evaġa-guruġarito, ekirato, “Au na ġomi akiramini, veġabidadama maiġesi kavana Isaraela nuġanai asi adoġariato.”

<sup>10</sup> Benamo vetari verena na etuḡurito tarimari ma ḡeḡenoḡoito ḡia ḡena numa ḡana. Keve merona ḡedoḡariato, ḡena keve varau ekorito.

### Iesu na vabu ta natuna mase na evaḡa-maḡuri-ḡenoḡoiato

<sup>11</sup> Moḡa murinai Iesu tu vanuḡa ta ḡana eiaḡoto arana Nain. Ḡena mero ema tari-marima ḡutuma maki ḡia ḡesi ḡeiaḡoto. <sup>12</sup> Vanuḡa nuḡanai roḡosi ḡene raka-toḡa nuḡanai, mase ta vanuḡa nuḡana na ḡeḡwa-rosiato-ḡoi. Vabu ta natuna merona ḡora ḡereḡa emaseto. Vanuḡa tarimari ḡutuma na vabu ḡekavaiato. <sup>13</sup> Iesu na mo vabu eḡitaiato, benamo evetuḡaiato, ekiraiato, ekirato, “Asi notaḡi.” <sup>14</sup> Benamo Iesu eraka-kavi-iaḡoto, mase mauḡana eḡabi-karaiato. Mauḡa ḡeḡwaiato tarimari ḡeruḡa-tarito. Benamo Iesu ekirato, “Mero futua, akiramuni, novariḡisi!” <sup>15</sup> Benamo etanu-vaisito, eguruḡato. Moḡa murinai Iesu na ḡia sinana na evini-ḡenoḡoiato.

<sup>16</sup> Mabarari gari na evaḡa-vonurito. Barau ḡevaḡa-raḡeato, ḡekirato, “Peroveta tarimana barana ta ḡita fakarai bema fofori!” ema, “Barau na ḡena bese tarimari benema vaḡa-kavari ḡana beiaḡoma!”

<sup>17</sup> Benamo mai veiḡa varina Iudea mabaranai ema Iudea sevina vanuḡari mabarari ai ḡefiu-rovorovoato.

### Iesu ma Ioane Babatiso

*Mataio 11:2-19*

<sup>18</sup> Ioane ḡena mero na mai dagara mabarari ḡeḡorato dagarari ḡekira-varaiato. Benamo Ioane na ḡena mero ruarua ekearito, <sup>19</sup> etuḡurito Vereḡauka ḡenai, ḡene danaḡia, “Ioane na ekiraḡiato, beiaḡomani tarimana tu ḡoi, ba tarima boruna ta baḡana vaḡa-nogaia?”

<sup>20</sup> Tauri ruarua Iesu ḡenai ḡeraḡasito, benamo ḡekirato, “Ioane Babatiso na betuḡuma, bekira, ‘Ḡia na ekiraḡiato beiaḡomani tarimana tu ḡoi, ba tarima boruna ta baḡana vaḡa-nogaia?’”

<sup>21</sup> Mo aoa ai Iesu na tarimarima ḡutuma evaḡa-namorito, keve tarimari, midigu ḡeḡanito-ḡoi tarimari, iauka rakavari na ḡeboroḡirito tarimari. Mata-bubu tarimari ḡutuma maki matari evaḡa-iaḡarito. <sup>22</sup> Benamo Iesu na tauri ruarua evaḡa-veserito, ekirato, “Ḡoḡenoḡoi, ḡomi na boḡo ḡitari e boḡo seḡaḡiri veiḡari Ioane boḡono kira-varaia: Mata-bubu tarimari ḡeboḡeboḡeni, kwaku rakava tarimari ḡerakani, lepera tarimari ḡenamoni, seḡa-bubu tarimari ḡeseḡaḡini, mase tarimari ḡevariḡisi-ḡenoḡoini, ema asi ḡeri-ḡari tarimari ḡeri ai Vari Namona eḡobata-vinirini. <sup>23</sup> Ḡena veḡabidadama au ḡegu ai asi beraga-kwaneani tarimana tu eiakuni!”

<sup>24</sup> Ioane ḡena vetuḡunaḡi tarimari ḡerakato vau, Iesu na ḡevegogoto tarimari evaḡa-guruḡarito, Ioane varina ḡeri ekiraḡiato, ekirato, “Kara boḡono ḡitaia ḡana tano fakana ḡana ḡoiaḡoto? Gobu iavara na ekwari-ḡareva ḡarevaiani ḡitaḡitana ḡoiaḡoto? <sup>25</sup> Kara boḡono ḡitaia ḡana ḡoiaḡoto? Dabuḡa namona eveiani tarimana ḡitaḡitana ḡoiaḡoto? Asiḡina, dabuḡa namori ḡeveirini tarimari ema ḡaniḡani namori ḡeḡanirini tarimari tu vere tarimari ḡeri numai ḡetanuni! <sup>26</sup> Be, kara boḡono ḡitaia ḡana ḡoiaḡoto? Peroveta tarimana dainai? Aba! Akiramini, ḡoḡitaiato tarimana tu peroveta tarimari mabarari evanaḡirini. <sup>27</sup> Ioane varina Buka Veaḡai maiḡesi etoreato, Barau ekirato, ‘Au na ḡegu vetuḡunaḡi tarimana tu batuḡu-guineani, ḡemu dabara ḡoiramu ai

vaḡa-maḡatana.”

<sup>28</sup> Iesu ma ekirato, “Akiramini, mai tanobarai beḡe maḡuri tarimari mabarari fakari ai ta na Ioane asi bevanaḡiani. Senaḡi Barau ḡena Basileia nuḡanai gabi tarimana na Ioane tu evanaḡiani.”

<sup>29</sup> Tarimarima mabarari ema takesi gogo tarimari maki mai guruḡa ḡeseḡaḡiato nai, ḡia na Barau ḡena dabara ḡevaḡa-moḡoniato, Ioane ḡena babatiso ḡeḡabiato. <sup>30</sup> Senaḡi Farisea tarimari e taravatu ḡevevaḡa-riba iaḡiato-ḡoi tarimari na Barau ḡena vevaḡa-maḡuri dabarana ḡia ḡeri ai ḡetuḡamaḡi-fitoḡaiato. Ioane ḡena babatiso ḡia ḡeri ai asi ḡeḡabi-raḡeato.

<sup>31</sup> “Toma ḡuru tarimari tu deikarari ḡesi bana vaḡa-ilailari? ḡia tu kamasi? <sup>32</sup> ḡia tu noḡa mero keiri kavana, vanuḡa ḡatamanai ḡetanu-taḡoni, ḡeḡereni, tavi ta merori na tavi tai ḡekea-vinirini, ḡekirani,

‘ḡai tu veḡaraḡo vererenai gita ḡalauto-ḡoi ḡomi ḡemi, senaḡi ḡomi tu asi ḡobarato-ḡoi! ḡai tu mase mariri ḡaḡabito-ḡoi, senaḡi ḡomi tu asi ḡotaḡito-ḡoi!’

<sup>33</sup> Korana tu Ioane Babatiso eiaḡomato, eḡani-veaḡato ema vine nanuna asi eniuato. Benamo ḡomi ḡokirani, ‘ḡia tu iauka rakavana na eboroḡiato,’ ḡotoni. <sup>34</sup> Tarimarima Natuna eiaḡomato, ḡia tu ḡaniḡani ta asi eruḡaiani. Benamo ḡomi ḡokirani, ‘ḡia tu boḡeka tarimana ema vine nanuna eniu-ḡutumani tarimana, takesi gogo tarimari e vei-rakava tarimari ḡatari,’ ḡotoni. <sup>35</sup> Senaḡi Barau ḡena iaunega ḡeḡabi-raḡeani tarimari na Barau ḡena iaunega ḡevaḡa-moḡoniani.”

### Iesu tu Simona, Farisea tarimana, ḡena numai

<sup>36</sup> Farisea tarimana ta na Iesu enoḡiato, beḡene ḡaniḡani-vegogo etato. Benamo Iesu eiaḡoto ḡena numa ḡana, ḡaniḡani gabunai etanu-tarito. <sup>37</sup> Mo vanuḡai vavine ta etanuto-ḡoi, ḡia tu mata-boraḡa vavinena. ḡia eseḡaḡito, Iesu tu Farisea tarimana ḡena numai eḡaniḡanito-ḡoi, benamo fore kavabuna namona, alabasta forena na ḡeveiatio kavabuna, nuḡanai tu muramura ma bonana namona eḡabikauato, <sup>38</sup> eiaḡoto Iesu murinai eritoḡo-tarito, kwakuna koranai etaḡi-rakavato, benamo matana nanuna na Iesu kwakuna evaḡa-nufarito. Benamo ḡwina na ma edau-kaukaurito, kwakuna everauato, muramura ma bonana namona kwakunai ebubuato.

<sup>39</sup> Farisea tarimana na, mo veiḡa eḡitaiato nai, ḡia nuḡanai maiḡesi etuḡamaḡito, “Mai tau bema moḡoni peroveta tarimana nai tu, ḡia bere riba, ḡia eḡabi-karaiani vavinena tu deikara. ḡia bere riba, mo vavine tu mata-boraḡa vavinena!”

<sup>40</sup> Benamo Iesu na ḡia evaḡa-guruḡaiato, ekirato, “Simona, au tu ma ḡegu guruḡa ḡoi ḡemu ai.” Simona ekirato, “Vevaḡa-riba taumu, noguruḡa, be naseḡaḡi.”

<sup>41</sup> Iesu ekirato, “Tarima ruarua na moni evinito-ḡoi tarimana ḡenai moni ḡeḡabitoreto. Tarima ta na silva moniri sinau imaima (500) eḡabi-torerito, ma ta na tu silva moniri gabana imaima (50) eḡabi-torerito. <sup>42</sup> Senaḡi mai tarima ruarua na ḡeri ḡabitore vaḡa-ḡenoḡoina tu gwaḡiḡi rakava nai, moni evinito-ḡoi tarimana na ḡeri ḡabitore etuḡamaḡi-fitoḡaiato moḡo. Dei na mo tarima euravini-baregoato?”

<sup>43</sup> Simona evaḡa-veseto, ekirato, “Au atuḡamaḡini tu, eḡabitore-baregoto tarimana.” Iesu ekirato, “Oi, ḡemu vaḡa-vese tu maoro.” <sup>44</sup> Moḡa murinai Iesu etanukureto, vavine eḡoiraiato vau, Simona ekiraiato, ekirato, “Mai vavine oḡitaiani? Au ḡoi ḡemu numai bama raḡekau nai, kwakugu ḡuriḡi-ḡuriḡina nanuna ta asi boḡwiaiḡomaia, a mai vavine na tu matana gorana na au kwakugu beḡuriḡia vau, ḡwina

na bedau-kaukauri. <sup>45</sup> Ĝoi na ĝita ĝera veĝabiraĝe veraunai au asi boĝabi-raĝegu, a mai vavine oĝitaiani, roĝosi bene doko au kwakugu roĝo everauani. <sup>46</sup> Ĝoi na debagu ai diĝa ta asi bobubua, a ĝia tu au kwakugu muramura ma bonana namona na bevaĝa-fari vekoraĝiri. <sup>47</sup> Moĝa lorinai au na ĝoi akiramuni, ĝena rakava ĝutuma, senaĝi Barau na varau betuĝamaĝi-fitoĝari. Moĝa lorinai ĝena veuravini tu barego. A ĝena rakava koturi moĝo etuĝamaĝi-fitoĝarito tarimana tu ĝena veuravini maki asi barego.”

<sup>48</sup> Benamo Iesu na mai vavine ekiraiato, ekirato, “Ĝemu rakava varau bama tuĝamaĝi-fitoĝari.”

<sup>49</sup> Ĝia ĝesi ĝeĝaniĝani-vegogoto tarimari ĝevedanaĝi-vedanaĝito, ĝekirato, “Mai tu kamara tarima, be ĝia na tarima ĝeri rakava maki etuĝamaĝi-fitoĝarini etoni?”

<sup>50</sup> Senaĝi Iesu na vavine ma evaĝa-guruĝaiato, ekirato, “Ĝemu veĝabidadama na varau bevaĝa-maĝurimu. Maivau noiaĝo ma nuĝa namomu ĝesi.”

### Vavine kota Iesu ĝesi ĝeiaĝoto

**8** Moĝa murinai Iesu na vanuĝa barari e vanuĝa keiri eiaĝo-vinirito-ĝoi, Barau ĝena Basilea Varina Namona eĝobata-iaĝiato-ĝoi. Ĝena mero gabanana ruarua (12) ĝia ĝekavaĝiato. <sup>2</sup> Vavine kota maki ĝia ĝesi ĝeiaĝoto. Iesu na iauka rakavari mo vavine ĝerina elai-vaĝirito ema ĝeri keve evaĝa-namorito. Ta tu Maria, arana ĝevatoato Magadala vanuĝana vavinena. Mai tu iauka rakavari imaima ruarua (7) ĝia ĝenana elai-vaĝirito vavinena. <sup>3</sup> Ma ta tu Ioana, Kusa ĝaraĝona. Kusa tu Heroda ĝena farefare eĝita-ĝaurito-ĝoi tarimana ta. Ta tu Susana ema vavine vovoka maki. Moĝeri vavine na Iesu ma ĝena mero ĝeri farefare na ĝevaĝa-kavarito.

### Barabore - Iaraĝa tarimana widi ĝueri evaroto

*Mataio 13:1-9; Mareko 4:1-9*

<sup>4</sup> Tarimarima ĝutuma bara ĝevegogoto, vanuĝa mabarari na Iesu ĝenai ĝeiaĝoto. Benamo ĝia na ĝeri barabore ta ekiraĝiato, ekirato,

<sup>5</sup> “Iaraĝa tarimana vamoka ĝana eiaĝoto, ĝena widi ĝueri bene fiu-rovorovori ĝana. Efiurito-ĝoi nai, kota dabarai ĝeketoto. Benamo tarimarima na ĝefana-veĝonurito ema guba manuri na ĝeĝanirito. <sup>6</sup> Kotari tu fore tanonai ĝeketoto. Ĝetubuto, senaĝi asikauna ĝemaraito, korana tano tu asi nanuna nai. <sup>7</sup> Kotari tu ĝauĝa ĝiniĝiniri nuĝari ai ĝeketoto. Benamo ĝauĝa ĝiniĝiniri ĝesi ĝetubu-sebonato, senaĝi varovaro dagarari ĝetuturarito nai ĝemaseto. <sup>8</sup> Kotari tu tano namonai ĝeketoto. Benamo ĝetubu-ginikauto, ĝeĝwato, tata ĝwana sinau ta (100).” Benamo Iesu garona evaĝa-baregoato, ekirato, “Ma seĝana tarimana bene seĝaĝi.”

### Kara dainai Iesu na barabore ekiraĝirito

*Mataio 13:10-17; Mareko 4:10-12*

<sup>9</sup> Ĝena mero na Iesu ĝedanaĝiato mo barabore anina tu kara. <sup>10</sup> Iesu evaĝa-veseto, ekirato, “Barau ĝena Basilea guruĝari vekuretoĝari ĝemi ai evaĝa-foforirini, senaĝi mabarari tu barabore ai avaĝa-guruĝarini, beĝene ĝita, senaĝi anina asi beĝene ribaia, beĝene seĝaĝi, senaĝi asi beĝene tuĝamaĝi-fakaia.”



### Widi ġueri baraborena anina

*Mataio 13:18-23; Mareko 4:13-20*

<sup>11</sup> Mai barabore anina tu maiġa: Widi ġueri tu Barau ġena guruġa. <sup>12</sup> Dabarai ġeketoto widi ġueri tu tarimarima na Barau ġena guruġa ġeseġaġiani. Senaġi Sātani eiaġomani, Barau ġena guruġa ġia nuġari na eġabi-vaġirini, Vari Namona beġe vaġa-moġoniani e beġe maġurini garina. <sup>13</sup> Tano ma forenai widi ġueri ġeketoto tu tarimarima na Barau ġena guruġa ġeseġaġiani e ma iakuri ġesi ġeġabi-raġeani. Senaġi ġia tu noġa tarima asi lamuri kavana. Nega-kotuna moġo Barau ġena guruġa ġekorana-iaġiani, senaġi veribaġani beraġasini nai, beġe ketoni. <sup>14</sup> Ġauġa ġiniġiniri nuġari ai ġeketoto widi ġueri tu tarimarima na Barau ġena guruġa ġeseġaġiani, senaġi ġetuġamaġi-ġutumani, tanobara farefareri ġetuġamaġi-gogo gogorini ema tanobara ġena maġuri iakuri na Vari Namona elau-tariani. Moġa lorinai ġwaġwa namori asi ġeġorani. <sup>15</sup> Senaġi tano namonai ġeketoto widi ġueri tu tarimarima na Barau ġena guruġa ġeseġaġiani, ma nuġari namori e ma manauri ġesi ġeġabi-raġeani, ġeġabi-tariani mo, ġwaġwa namori ġeġorani.

### Lamefa toretorena gabuna

*Mareko 4:21-25*

<sup>16</sup> “Tarima ta lamefa begabuani nai tu, dia ġuro na beġoġoi-tariani o fata gaburenai betoreani. Asiġina, ġia tu lamefa toretorena fatanai betore-kauani. Benamo tarima beġe raġekauni nai, mabarari na mama beġene ġitaia ġana.

<sup>17</sup> Vekuretoġa dagarari mabarari beġe foforini, veġuni guruġari beġe ribani e beġe kiraġi-foforirini.

<sup>18</sup> Moġa lorinai ġoseġaġirini guruġari loriri boġono toreri. Korana ma ġena seġaġi tarimana Barau na riba e tuġamaġi-faka beviniani, asi ġena seġaġi tarimana, ġia etuġa-maġini ma ġena tuġamaġi-faka, senaġi ġena tuġamaġi-faka aiġesi misina maki beġabi-vaġiani.”

### Iesu sinana ema tarina merori

*Mataio 12:46-50; Mareko 3:31-35*

<sup>19</sup> Iesu sinana ema tarina merori ġia ġenai ġeiaġoto, senaġi tarimarima ġutuma nai, asi ġeri dabara Iesu ġenai beġe raka-kavini. <sup>20</sup> Tarima ta na Iesu ekira-varaiato, ekirato, “Ġoi sinamu ema tarimu tu murikai ġeruġa-taġoni, ġoi ġevetaumuni.” <sup>21</sup> Benamo Iesu na mabarari ekirarito, “Barau ġena guruġa ġeseġaġirini e ġeveirini tari-mari tu au sinagu ema au tarigu.”

### Iesu na iavara e geta o ureure ekira-ġoirito

*Mataio 8:23-27; Mareko 4:35-41*

<sup>22</sup> Ġaro ta Iesu ma ġena mero ġesi ġasi ai ġeraġekauto, benamo Iesu na evaġa-guruġarito, ekirato, “Siveġasi-vanaġi, kou mo rekena ġana.” Benamo ġeiaġoto. <sup>23</sup> Ġeiaġoto-ġoi nuġanai, Iesu egena-maseto. Benamo iavara asikei kou ai eraġa-sito, benamo ureure ġasi nuġanai ġevebubu-ġurato nai, ġasi dori eburuto. <sup>24</sup> Benamo ġena mero Iesu ġenai ġeiaġoto, ġevaġoato, ġekirato, “Vevaġa-riba taumu o, vevaġa-riba taumu o, ġita tu mai taburuni!” Iesu evarigisito, iavara e ureure ekira-ġoirito, benamo ġedokoto, ġemeġomeġo-tarito. <sup>25</sup> Iesu na ġena mero evaġa-guruġarito, eki-

rato, “Ĝomi ĝemi veĝabidadama tu ainai?” Ĝia ĝegarito e ĝeĝaba-rakavato nai, tauĝeri mo ĝevedanaĝi-vedanaĝito, ĝekirato, “Mai tarima tu dei? Ĝia na iavara e ureure evaĝa-guruĝarito nai, garona ĝeseĝaĝiani!”

### Iesu na iauka rakavari na ĝeboroĝiato tarimana evaĝa-namoato

*Mataio 8:28-34; Mareko 5:1-20*

<sup>26</sup> Monana Iesu ma ĝena mero ĝeiaĝoto, Gerasa (o Gadara) tarimari ĝeri gabu ai ĝeraĝasito, Galilea tavi ta kefonai. <sup>27</sup> Iesu ĝasi na eraka-rigoto nuĝanai, iauka rakavari na ĝeboroĝiato tarimana ta eiaĝomato Iesu ĝenai. Ĝia tu mo vanuĝa tarimana. Kai-veĝata asi dabuĝana etanuto-ĝoi, dia numai, senaĝi gara gabuna fore kouĝari ai. <sup>28</sup> Ĝia na Iesu eĝitaiato nai, ekoĝo-fouto, benamo Iesu kwakuna koranai eketo-tarito, ekirato, “Iesu o, ĝoi Iaru-korokoro Barauna Natuna, kara au ĝegu ai noveia otoni? Anoĝimuni, asi bono vaĝa-midigu midigugu!” <sup>29</sup> Ĝia moĝesi ekirato, korana Iesu na iauka rakavana evaĝa-guruĝaiato, mo tarima ĝenana neraka-vaĝi. Nega ĝutuma iauka rakavana na eĝabiato-ĝoi, kwakuna e ĝimana seini na ĝebarurito-ĝoi, senaĝi seini edabu-ĝuturito-ĝoi, benamo iauka rakavana na tano fakana ĝana eĝwa-iaĝoato-ĝoi.

<sup>30</sup> Iesu na edanaĝiato, ekirato, “Ĝoi aramu tu deikara?” Ĝia na evaĝa-veŝeato, ekirato, “Au aragu tu ‘Ĝutuma,’” korana iauka rakavari vovoka na ĝeboroĝiato nai. <sup>31</sup> Benamo iauka rakavari na Iesu ĝenoĝiato-ĝoi, guri variĝo kwareĝana ĝana asi bene tuĝu-iaĝori. (Mo tu iauka rakavari ĝeri dibura gabuna).

<sup>32</sup> Monai bai serina tu ĝoro gabakanai ĝedokadokato-ĝoi. Moĝa lorinai iauka rakavari na Iesu ĝenoĝiato, bai nuĝari ai ĝeraka-toĝa, ĝetato. Benamo Iesu na ekirarito, “Be, ĝoiago!” <sup>33</sup> Benamo iauka rakavari mo tarima ĝenana ĝeraka-vaĝito, bai ĝeri ai ĝeraka-toĝato. Benamo moĝeri bai ĝeĝwa-bubu-lausiato, lalaĝa na ĝekokosi-firigoto, kou ai ĝevebora-maseto.

<sup>34</sup> Bai ĝitaĝauri tarimari na kara eĝorato dagarana ĝeĝitaiato, benamo ĝeragato, mo vari ĝea fiuato vanuĝa baranai e vanuĝa keiri ai. <sup>35</sup> Tarima-rima ĝeĝoto-iaĝoto, kara eĝorato dagarana ĝea ĝitaia ĝana. Iesu ĝenai ĝeraĝasito nai, ĝia na mo tarima, iauka rakavari vovoka ĝia ĝenana ĝeraka-vaĝito tarimana, ĝedoĝariato, Iesu kwakuna koranai etanu-taĝoto-ĝoi ma dabuĝana e ĝena tuĝamaĝi maki maoro. Benamo ĝia mabarari ĝegarito. <sup>36</sup> Mo veĝa ĝeĝitaiato tarimari na iauka rakavari na ĝeboroĝiato tarimana kamasĝi enamoto varina tarimarima ĝekira-vararito. <sup>37</sup> Benamo Gerasa tano tarimari mabarari na Iesu ĝenoĝiato, neraga-kwaneri ĝetato, korana ĝegari-rakavato nai. Moĝa lorinai Iesu ĝasi ai eraĝekauto, ma eĝenoĝoito. <sup>38</sup> Iauka rakavari ĝia ĝenana ĝeraka-vaĝito tarimana na enoĝiato, Iesu ĝesi bene iaĝo etato. Senaĝi Iesu na etuĝu-ĝenoĝoio, ekirato, <sup>39</sup> “Noĝenoĝoi ĝemu numa ĝana. Barau na ĝoi ĝemu ai beveia veĝana tarimarima bono kira-varari.” Benamo ĝia eiaĝoto, ĝena vanuĝa tarimari mabarari Iesu ĝena veĝa ĝia ĝenai ĝeĝorato eĝobata-iaĝirito.

### Iesu na kekeni ta ema vavine ta evaĝa-namorito

*Mataio 9:18-26; Mareko 5:21-43*

<sup>40</sup> Iesu kou mo reke na ma eĝenoĝoito nai, tarimarima ĝutuma na ĝeĝabi-raĝeato ma iakuri ĝesi, korana mabarari na Iesu ĝevaĝa-nogaiato-ĝoi. <sup>41</sup> Benamo tau ta arana Iairo, rubu ĝitaĝauna tarimana, Iesu ĝenai eiaĝoto, kwakuna koranai evetui-tarito,

enoġiatio, ġena numa ġana ġeiaġo etato, <sup>42</sup> korana ġia natuna kekenina, ġora ġereġa, dori emaseto-ġoi nai. Ġena laġani tu gabanana ruarua (12).

Iesu eiaġoto-ġoi nuġanai, tarimarima ġutuma na ġeraka-vebibi vebibiato-ġoi. <sup>43</sup> Moġa nuġanai vavine ta, ġena keve tu rara kevena; laġani gabanana ruarua (12) ekeve-iaġiatio. Ġia na ġena farefare e moni mabarari evaġa-koririto doketa ġeri ai ġena keve beġene vaġa-namoā ġana. Senaġi ta na asi evaġa-namoato. <sup>44</sup> Tarimarima ġutuma muriri ai vau evebibi-toġato, ma tavi ta na ea raka-rosito mo, Iesu sevinai ea raġasito. Iesu ġena dabuġa dudunai eveġabikauto. Benamo vaġa-sebo ġena rara kevena ekorito. <sup>45</sup> Iesu evedanaġito, ekirato, “Dei na au beġabikaragu?” Mabarari ġevekira-ġuniġauto, ġekirato, “Au tu asiġi.” Benamo Petero ekirato, “Vevaġa-riba taumu, tarimarima oġitarini, ġekou-ġeġeraġimuni ema ġerakavebebesi vebebesini.” <sup>46</sup> Senaġi Iesu ekirato, “Ta na au beġabikaragu, korana au ribagu, seġuka au ġeġuna varau beraka-vaġi.” <sup>47</sup> Mai vavine varau eribato, ġia asi ġena vekuretoġa dabarana, benamo ma ġoġo-ġoġona ġesi eiaġoto, Iesu kwakuna koranai evetui-tarito, Iesu kara dainai eġabi-karaiato ema ġena keve vaġa-sebo ekorito varina ekiraġi-foforirito tarimarima ġoirari ai. <sup>48</sup> Benamo Iesu na ekiraiato, ekirato, “Natugu, ġemu veġabidadama na bevaġa-namomu. Be, ma nuġa namomu ġesi noiaġo.”

<sup>49</sup> Iesu roġo mo eguruġato-ġoi nuġanai, tarima ta rubu ġitaġauna tauna Iairo ġena numa na eiaġomato, ekirato, “Natumu varau bemase. Vevaġa-riba tauna asi novaġa-vekwaraġia.” <sup>50</sup> Iesu na mo guruġa eseġaġiatio nai, Iairo ekiraiato, ekirato, “Asi bono gari, bono veġabidadama moġo, benamo ġia tu bemaġurini.” <sup>51</sup> Iairo ġena numai eraġasito, benamo Iesu na tarimarima ekirarito, numai asi beġene raġekau, Petero, e Iakobo (o Iames), e Ioane, ema kekeni tamana ma sinana moġo. <sup>52</sup> Mabarari tu ġetaġito-ġoi ema ġetaġi-guruġa guruġato-ġoi nuġanai, Iesu ekirato, “Asi ġotaġi, kekeni tu asi bemase, ġia tu egenani moġo.” <sup>53</sup> Tarimarima na ġerikiriki-iaġiatio, korana ġia ribari, kekeni tu emaseto. <sup>54</sup> Senaġi Iesu na kekeni ġimanai eġabito, evaġa-guruġaiato, ekeato, “Natugu o, novariġisi!” <sup>55</sup> Benamo iaukana eġenoġoito, ma emaġurito, vaġa-sebo evariġisito. Iesu na ekirarito, kekeni beġene ġubua. <sup>56</sup> Ġia tamana sinana ġeġaba-rakavato, senaġi Iesu na evaġa-naġirito, mai veiġa varina tarima ta asi beġene kira-varaia.

### Iesu na ġena mero gabanana ruarua (12) etuġurito

**9** Iesu na ġena mero gabanana ruarua (12) ekea-vegogorito, seġuka evinirito, iauka rakavari mabarari beġene lai-vaġiri, ema keve tarimari beġene vaġa-namori ġana. <sup>2</sup> Benamo etuġurito, Barau ġena Basileia varina beġene ġobata-iaġia, ema keve tarimari beġene vaġa-namori. <sup>3</sup> Evaġa-guruġarito, ekirato, “Ġemi iaġoiaġo ai kara ta asi boġono ġabi-kaua, togoi, dura, ġaniġani daġarari, moni, ema sedi ruarua maki asi boġono ġabi. <sup>4</sup> Beġe ġabi-raġemini numanai boġono tanu, bene iaġo mo, vanuġa boġono raga-kwaneā. <sup>5</sup> Bema vanuġa tai asi beġe ġabi-raġemini nai, mo vanuġa boġono raga-kwaneā, kwakumi kauri boġono kwari-ketoketori, ġia ġeri kira-sirivaġi vaġa-moġoniri ġana.”

<sup>6</sup> Iesu ġena mero ġerakato, vanuġa tata ġana ġeiaġoto, Vari Namona ġeġobata-iaġiatio-ġoi ema keve tarimari ġevaġa-namorito-ġoi gabu mabarari ai.

## Heroda ġena daradara

*Mataio 14:1-2; Mareko 6:14-16*

<sup>7</sup>Heroda, Galilea tanona verena, Iesu varina eseġaġiato, benamo edaradarakavato, korana tarima kota ġekirato, Ioane Babatiso tu mase na ma evariġisi-ġenoġoito. <sup>8</sup>Ma kota ġekirato, Elia efororito. Ma kota ġekirato, peroveta tarimana guinena ta evariġisi-ġenoġoito, ġetato. <sup>9</sup>Senaġi Heroda ekirato, “Ioane debana tu au na abasi-ġutuato. Be, mai varina aseġaġiani tarimana tu dei?” Heroda eurato Iesu bene ġitaia.

## Iesu na tarimarima daġara imaima (5,000) eġuburito

*Mataio 14:13-21; Mareko 6:30-44; Ioane 6:1-13*

<sup>10</sup>Iesu ġena apostolo ma ġeġenoġoito, karakara ġeveirito veiġari variri Iesu ġekiravaraiato. Benamo Iesu na eġori-ġerevaġirito, vanuġa ta arana Betesaida ġana eġori-iaġorito. <sup>11</sup>Senaġi tarimarima na ġeseġaġirito nai, Iesu murina na ġerakato. Benamo Iesu na eġabi-raġerito, Barau ġena Basileia varina eġobata-vinirito ema keve tari-mari evaġa-namorito. <sup>12</sup>Ġaro evariġoto-ġoi nuġanai, ġena mero gabanana ruarua (12) Iesu ġenai ġeiaġoto, ġekirato, “Mai tarimarima notuġuri, be kavinaġi vanuġari ai ema vamoka vei tarimari ġeri tanu gaburi ai, ġari ġaniġani e gena-gaburi ġea vetau, korana mai tu tano fakana nai.” <sup>13</sup>Senaġi Iesu na evaġa-guruġarito, ekirato, “Ġomi na ġaniġani ġoviniri.” Ġia na ġevaġa-veseato, ġekirato, “Ġai ġemai beredi tu imaima (5) ema maġani-kone ruarua (2) moġo. Ġoi ourani ġai baġana iaġo, ġaniġani baġana voiri mai tarimarima ġutuma ġari?” <sup>14</sup>Korana tau mabarari tu 5,000 kavana.

Iesu na ġena mero ekirarito, ekirato, “Tarimarima ġovareri doġoro ta gabana imaima (50), doġoro ta gabana imaima (50), benamo ġene tanutanu-tari.” <sup>15</sup>Iesu ekirato lorinai ġeveiato, tarimarima mabarari ġevaġa-tanutanu-taririto. <sup>16</sup>Moġa murinai Iesu na beredi imaima e maġani-kone ruarua eġabirito, gubai egaga-raġeto, Barau evaġa-namoato vau, ebuki-ġutuġuturito ema ekini-misimisirito, benamo ġena mero evinirito beġene vareri. <sup>17</sup>Tarimarima na ġeġanirito nai, mabarari ġeġani-maseto. Gabivau Iesu ġena mero na ġaniġani kwari ġevaġa-vegogorito, boseġa gabanana ruarua (12) ġevaġa-vonurito.

## Petero na Iesu tu Kerisona ekiraġito

*Mataio 16:13-19; Mareko 8:27-29*

<sup>18</sup>Ġaro ta Iesu ġereġana eġuriġurito, ġena mero maki ġia ġesi. Benamo Iesu na edanaġirito, ekirato, “Tarimarima tu kara ġetoni au tu dei?” <sup>19</sup>Ġia ġevaġa-veseto, ġekirato, “Kota ġekirani ġoi tu Ioane Babatiso, ma kota tu Elia, ma kota tu peroveta tarimana guinena ta evariġisi-ġenoġoito.” <sup>20</sup>Iesu na ekirarito, ekirato, “Senaġi ġomi tu kara ġotoni au tu dei?” Petero na evaġa-veseato, ekirato, “Ġoi tu Barau ġena Keriso, ġia na ekiraġi-toreato vevaġa-maġuri tauna.”

## Iesu ġena mase ema variġisi-ġenoġoi ekiraġirito

*Mataio 16:20-28; Mareko 8:30-9:1*

<sup>21</sup>Iesu na elaunaġirito, ġia varina tarima ta asi beġene kira-varaia. <sup>22</sup>Ġia ma ekirato, “Tarimarima Natuna midigu vovoka roġo beġanini. Iuda vereri, e Rubu Veaġa vereri baregori, e taravatu ġevevaġa-riba iaġiani tarimari na beġe ruġaiani; ema

beḡe vaḡi-maseani maki, senaḡina ḡaro vaḡa-toitoinai vau mase na ma bevariḡisi-ḡenoḡoini.”

### Maḡuri guruḡari o Iesu murinai raka

*Mataio 10:33; 10:39; Ioane 12:25*

<sup>23</sup> Iesu na ḡia mabarari evaḡa-guruḡarito, ekirato, “Bema tarima ta eurani au murigu ai bene raka etoni tarimana, tauḡena bene vekira-fitoḡa, ḡena satauro bene ḡwaia ḡaro mabarari ai, au murigu ai bene raka. <sup>24</sup> Korana deikara ḡena maḡuri moḡo lorina etoreani tarimana, ḡena maḡuri befitoḡaiani. A deikara au daigu ai ḡena maḡuri befitoḡaiani tarimana, ḡena maḡuri asi bevei-rekwarekwaiani. <sup>25</sup> Bema tarima ta na tanobara mabarana uranai ḡena maḡuri befitoḡaiani, a ḡia tauḡena ḡena maḡuri bevaḡa-rakavaiani, ḡena namo tu kara ḡia ḡenai? <sup>26</sup> Bema tarima ta na au ema ḡegu guruḡa maiakari na bemaikaaiani nai tu, Tarimarima Natuna na maki ḡia bemaikaa-viniani ḡena iaḡomai, ma mamana marevana e seḡuka baregona ḡesi, Tamana ma aneru veaḡari ḡesi beḡe iaḡomani ḡaronai. <sup>27</sup> Moḡoni akiramini, mainai ḡeruḡa-taḡoni tarimari kota asi roḡo beḡe maseni, Barau ḡena Basileia beḡe ḡitaiani.”

### Iesu vetoḡana eirauto

*Mataio 17:1-13; Mareko 9:2-13*

<sup>28</sup> Mai guruḡa ekiraḡi-ḡosiatu murinai, ḡaro imaima toitoi (8) kavana ḡevanaḡito vau, Iesu na Petero, e Ioane, ema Iakobo (o Iames) eḡabirito, ḡoro ta ḡana ḡevaraḡeto bene ḡuriḡuri ḡana. <sup>29</sup> Eḡauḡauto-ḡoi nuḡanai, ḡia ḡoirana vetoḡana eirauto, ema ḡena dabuḡa ekuro-ḡaroḡaroto. <sup>30</sup> Benamo tarima ruarua ḡefofoforito, Mose ma Elia, Iesu ḡesi ḡeguruḡa guruḡato-ḡoi. <sup>31</sup> Tauri ruarua ma marevari e mamari ḡesi ḡefofoforito, Iesu ḡesi ḡeguruḡato, Ierusalemi bemaseni ḡetato, Barau ḡena ura ilailanai. <sup>32</sup> Petero ma karona ḡegenamaseto, senaḡi ma ḡetataḡato nai, Iesu ma marevana e mamana ḡesi ḡeḡitaiato, ema ḡia ḡesi ḡeruḡa-taḡoto tarimari maki ḡeḡita-rito. <sup>33</sup> Tauri ruarua Iesu ḡeraga-kwaneana ḡana nuḡanai, Petero na Iesu ekiraiato, ekirato, “Vevaḡa-riba taumu, namo vedaurea ḡita tu maiḡera, be mainai fouta toitoi ḡaragari. Ta ḡoi ḡemu, ta Mose ḡena, ta Elia ḡena.” ḡia asi ribana kara ekiraḡiato.

<sup>34</sup> ḡia roḡo eguruḡato-ḡoi nai, magube na ema iauka-taririto. Magube na eḡabi-ḡaurito nai, ḡia ḡegarito. <sup>35</sup> Garo ta magube nuḡana na ekea-rosito, ekirato, “Mai tu au Natugu, aḡabi-hidiato tarimana, ḡia boḡono seḡaḡi-vinia!”

<sup>36</sup> Mo garo ekorito nai, Iesu ḡereḡana ḡeḡitaiato. Mai veḡa ḡeḡitarito dagarari, tarima ta asi ḡekira-varaiato mo negai.

### Iesu na iauka rakavana na eboroḡiato merona evaḡa-namoato

*Mataio 17:14-21; Mareko 9:14-29*

<sup>37</sup> ḡaro ta ekorito murinai, ḡia tu ḡoro na ḡeraka-variḡoto-ḡoi nuḡanai, tarimarima ḡutuma lelevaḡi ḡesi ḡeraka-veḡoitaḡoto. <sup>38</sup> Benamo tau ta ḡutuma nuḡari na ekeafouto, ekirato, “Vevaḡa-riba taumu o, anoḡimuni, au natugu merona noma ḡitaia. Mai tu au natugu sebona, ḡora ḡereḡa. <sup>39</sup> Nega tari ai ḡia tu iauka rakavana na eḡabi-ani, benamo ekoḡo-founi; tauḡanina maki evaḡa-ḡoḡo-ḡoḡoani, benamo bokana na kaburoburo ḡeraka-rosini. Maiḡesina evaḡi-mase vanaḡi-vanaḡiani. <sup>40</sup> ḡoi ḡemu mero banoḡiri, ḡelai-vaḡia basi, senaḡi ḡia asi beḡe ilaila.”

<sup>41</sup> Iesu evaḡa-veseto, ekirato, “Asi veḡabidadama ema kira-sirivaḡi ḡuruna o! Āaro vira au tu sevimi ai bana tanu? Āaro vira bana vevaḡa-gwaḡiḡi-vinimi?” Benamo Iesu na mo tau ekiraiato, ekirato, “Natumu noḡori-iaḡomaia.” <sup>42</sup> Mero eiaḡomato-ḡoi nai, iauka rakavana na tano ekwaraḡi-iaḡiato, tauḡanina evaḡaḡoḡo-ḡoḡoato. Senaḡi Iesu na iauka rakavana ekira-ḡoiato, mero evaḡa-namoato, benamo tamana ma evini-ḡenoḡoiato. <sup>43</sup> Tarima mabarari ḡeḡaba-rakavato, korana Barau ḡena seḡuka ḡeḡitaiato nai.

### Iesu ḡena mase ma ekiraḡi-ḡenoḡoiato

*Mataio 17:22-23; Mareko 9:30-32*

Tarimarima roḡo Iesu ḡena veiḡa ḡeḡaba-iaḡiato-ḡoi nai, Iesu na ḡena mero evaḡa-guruḡarito, ekirato, <sup>44</sup> “Au na guruḡa ta ḡemi nakiraḡia, be ḡoseḡaḡi ema asi boḡono tuḡa-rekwaia. Tarimarima Natuna tu beḡe revaiani vau tarimarima ḡimari ai beḡe toreani.” <sup>45</sup> Senaḡi ḡena mero na asi ḡetuḡamaḡi-doḡariato, Iesu tu kara ekiraḡiato. Mo guruḡa anina tu ḡia ḡeri ai vekuretoḡa, asi beḡene ribaia ḡana, ema Iesu maki asi ḡedanaḡiato, korana ḡegarito nai.

### Deikara tu barego vedaurea

*Mataio 18:1-5; Mareko 9:33-37*

<sup>46</sup> Iesu ḡena mero fakari ai vevane eḡorato, korana tu ḡekirato, dei tu barego vedaurea ḡia fakari ai. <sup>47</sup> Iesu varau eribato kara ḡetuḡamaḡiato, moḡa lorinai mero keina ta eḡabiato, ḡia sevinai evaḡa-ruḡa-tariato vau, <sup>48</sup> ekirarito, ekirato, “Dei na mai mero beḡabi-raḡeani au aragu ai, ḡia na au beḡabi-raḡeguni. Bema tarima ta na au beḡabi-raḡeguni, etuḡuguto Barauna maki beḡabi-raḡeani. Korana deikara ḡomi na ḡokira-fitoḡaiiani tarimana ḡomi fakami ai, ḡia tu barego vedaurea.”

### Iesu aranai nuḡa-farevaḡi veiḡa boruri eveirito tarimana

*Mareko 9:38-40*

<sup>49</sup> Ioane na Iesu evaḡa-guruḡaiato, ekirato, “Vevaḡa-riba taumu, tarima ta ḡaḡi-taiato, ḡoi aramu ai iauka rakavari elai-vaḡirito-ḡoi, senaḡi ḡai na ḡakira-ḡoiato, korana ḡia tu dia ḡita ḡesi taḡauveini nai.”

<sup>50</sup> Iesu na ekirarito, ekirato, “Asi boḡono kira-ḡoia, korana deikara na ḡomi asi evaḡa-rakavamini tarimana tu ḡomi evaḡa-kavamini.”

### Samaria tarimari kotari na Iesu asi ḡeḡabi-raḡeato

<sup>51</sup> Iesu guba ḡana bevaraḡeni ḡarona ekavinaḡiato-ḡoi nai, Ieruselema bene iaḡo-vinia, etato. <sup>52</sup> Benamo Iesu na vetuḡunaḡi tarimari etuḡu-guinerito, Samaria vanuḡana tai ḡeraḡasito, Iesu ḡena totoḡa gabuna ḡea vetauato. <sup>53</sup> Senaḡi vanuḡa tarimari na Iesu asi ḡeḡabi-raḡeato, korana tu Ieruselema eiaḡo-viniato-ḡoi nai. <sup>54</sup> Iesu ḡena mero Iakobo (o Iames) e Ioane mo veiḡa ḡeḡitaiato, benamo ḡekirato, “Vereḡauka, ḡoi ourani karava guba na baḡana kiraḡia, bene mariḡo, bene vaḡa-rakavari?”

<sup>55</sup> Iesu eruḡa-kureto, tauri ruarua ekira-ḡoirito. <sup>56</sup> Benamo ḡia ma ḡerakato, vanuḡa ta ḡana ḡeaiḡoto.

## Iesu murinai beġene raka ġetato tarimari

*Mataio 8:19-22*

<sup>57</sup> Ġia dabara na ġeiaġoto-ġoi nai, tarima ta na Iesu evaġa-guruġaiato, ekirato, “Ġemu iaġoiaġo gaburi mabarari ai bana kavamu.” <sup>58</sup> Iesu na ekiraiato, ekirato, “Boġa kwaivari ma ġeri kouġa, ema manu ma ġeri nuġi, senaġi Tarimarima Natuna tu asi ġena gena-gabuna.”

<sup>59</sup> Iesu na tarima ta ma evaġa-guruġaiato, ekirato, “Murigu ai noma raka.” Senaġi mo tarima evaġa-veseto, ekirato, “Vereġauka, asi roġo, naġenoġoi, be tamagu roġo naguria.” <sup>60</sup> Iesu na evaġa-veseato, ekirato, “Mani tu noiaġuiri, mase tarimari (o Barau asi ġekorana-iaġiani tarimari) na ġeri mase tauġeri na beġene guriri. Senaġi ġoi tu noiaġo, Barau ġena Basileia varina noa vari-fiua.”

<sup>61</sup> Tarima ta na ma ekiraiato, ekirato, “Vereġauka, murimu ai naraka, senaġi na-iaġo roġo, ġegu numa tarimari ġesi ġaveġabi-tuġu.” <sup>62</sup> Iesu na evaġa-veseato, ekirato, “Tarima ta efokafokani nai, murina ġana ma eboġe-ġenoġoini, ġia tu asi ilaila Barau ġena Basileia beġabiani.”

## Iesu na tarima gabana imaima ema gabana ruarua ma ruarua (72) etuġurito

**10** Moġa murinai Vereġauka na tarima 72 eġabi-viriġirito, benamo ruari ruari etuġu-guinerito, ġia beiaġoni vanuġari e gaburi mabarari ġana. <sup>2</sup> Evaġa-guruġarito, ekirato, “Kwakwa ġaniġaniri tu ġutuma lelevaġi, senaġi kwakwa tarimari tu viravira moġo. Moġa lorinai kwakwa Vereġaukana ġonoġia, be kwakwa tarimari tari ma bene tuġu-iaġori, ġaniġani beġenea kwari. <sup>3</sup> Ġoiaġo, au na mamoe kavana atuġumini, boġa kwaivari rakavari fakari ai. <sup>4</sup> Moni fusefuseri, dura e tamaka asi boġono ġabikau; dabarai tarima ta asi boġono vaġa-guruġaia. <sup>5</sup> Bema numa tai boġo raġekauni nai, boġono kira, ‘Maino mai numai bene tanu.’ <sup>6</sup> Bema maino eura-viniani tarimana monai etanuni nai, ġemi maino guruġana ġia iatanai bene tanu. Bema asiġina nai, maino tu ġemi ai ma bene ġenoġoi. <sup>7</sup> Karakara beġe vinimini boġono ġaniri e boġono niuri, korana eġauveini tarimana davana bene ġabia ġana. Numa ta na ma numa ta ġana asi boġono iaġo, senaġi mo numa sebonai moġo boġono tanu.

<sup>8</sup> Bema vanuġa tai boġo raġasini, beġe ġabi-raġemini, karakara ġoirami ai beġe tore-rosirini dagarari boġono ġaniri. <sup>9</sup> Mo vanuġai keve tarimari boġono vaġanamori e tarimarima boġono vaġa-guruġari, boġono kira, ‘Barau ġena Basileia, (ġena veġitaġau seġukana evaġa-ruġaiani), tu sevimi ai maġa.’ <sup>10</sup> Senaġi bema vanuġai boġo raġasini, benamo asi beġe ġabi-raġemini nai, ġatamanai boġono raka-rosi, boġono kira, <sup>11</sup> ‘Ġemi vanuġa gagauri kwakumai beġe kafakau dagarari maki mai ġakora-vaġirini ġemi kira-sirivaġi vaġa-foforiri ġana. Senaġi boġono riba, Barau ġena Basileia tu bekavi-naġi.’ <sup>12</sup> Au na akiramini, Kota baregona ġaronai mai vanuġa na meto beġwaiani tu, Sodoma ġena meto maki bevanaġiani.”

## Asi veġabidadama vanuġari

*Mataio 11:20-24*

<sup>13</sup> “Korasini o, ġoi ema Betesaida, vetuġami kika! Korana nuġa-farevaġi veiġari ġemi ai ġefoforito-ġoi tu, Taia e Sidono nuġari ai beġere fofori, benamo ġia tu irau laġani ai ġere vetuġamaġi-kure, fuse rakavari ai e tauġaniri ma gurmari ai ġeri

vetuġamaġi-kure ġere vaġa-foforia. <sup>14</sup>Barau na tarimarima bekota-vinirini ġarona baregonai, ġomi na boġo doġariani metona tu Taia e Sidono ġeri meto bevanaġiani. <sup>15</sup>Ġoi maki, Kaperanauma o, ġoi ourani guba ġana bono varaġe otoni? Asiġina, ġoi tu mase gabuna ġana boiaġoni!”

<sup>16</sup>Iesu na ġena mero evaġa-guruġarito, ekirato, “Dei na ġomi beseġaġi-vinimini, au maki beseġaġi-viniguni; dei na asi beġabi-raġemini, au maki asi beġabi-raġeguni; ema dei na asi beġabi-raġeguni, etuġuguto Barauna maki asi beġabi-raġeani.”

### Iesu na etuġurito tarimari 72 ġeġenoġoito

<sup>17</sup>Ġena mero 72 ma ġeġenoġoito ma iakuri ġesi, ġekirato, “Vereġauka o, iauka rakavari ġoi aramu ai ġavaġa-guruġarito, benamo garoma ġeseġaġirito-ġoi.” <sup>18</sup>Iesu na evaġa-veserito, ekirato, “Satani aġitaiato, kiriku ekimoreani kavana guba na eketo-firiġoto. <sup>19</sup>Boġono riba, au na seġuka varau avinimito, mota ema kavikavi boġono fana-tariri, ema Satani ġena seġuka maki boġono vaġa-farakaia ġana; dagara ta na asi bevaġa-rakavamini. <sup>20</sup>Senagi, dia boġono iaku korana iauka rakavari ġomi ġemi seġuka nuġanai, asiġina, a ġomi tu boġono verere korana arami gubai etorerito nai.”

### Iesu eiakuni

*Mataio 11:25-27; 13:16-17*

<sup>21</sup>Mo tanu-vegogo nuġanai Iauka Veaġa na Iesu tu iaku na evaġa-vonuato, benamo ekirato, “Tamagu o, avaġa-namomuni, guba ema tanobara Verena! Korana ġoi na ma iaunegari e riba tarimari ġeri ai okure-toġarini dagarari tu, asi ġeri riba tarimari ġeri ai ovaġa-foforirini. Aba, Tamagu, mai tu ġoi ġemu veuravini korana evaġa-foforiani. <sup>22</sup>Dagara mabarari Tamagu na eviniguto. Tarima ta asi ribana ġia Natuna, Tamana moġo ġereġana, ema ta asi ribana ġia Tamana, senaġi Natuna ġereġana moġo, ema Natuna na eura-vinirini tarimari ġeri ai vau evaġa-foforirini.”

<sup>23</sup>Benamo Iesu eboġe-kureto ġena mero ġeri ai, veġuni ai evaġa-guruġarito, ekirato, “Ġomi tu boġono iaku, korana tu mai ġoġitarini dagarari dairi ai. <sup>24</sup>Au na akiramini, peroveta tarimari e tanobara vereri baregori o kini vovoka ġeurato, mai ġoġitarini dagarari beġere ġitari, senaġi asi ġeġitarito, ema ġoseġaġirini dagarari beġere seġaġiri, senaġi asi ġeseġaġirito.”

### Barabore - Samaria tarimana namona

<sup>25</sup>Taravatu evevaġa-riba iaġiato-ġoi tarimana ta evariġisito, benamo Iesu eriba-ġaniato, ekirato, “Vevaġa-riba taumu, au tu kara baveini vau, maġuri vanaġi-vanaġi badoġariani?” <sup>26</sup>Iesu na evaġa-veveato, ekirato, “Taravatu tu kara etoni? Ġoi na tu kamasi oiaviani?” <sup>27</sup>Ġia evaġa-veseto, ekirato, “Vereġauka ġoi ġemu Barau bono ura-vinia ma nuġamu mabarana, ma iaukamu mabarana, ma kokoremu mabarana, e ma tuġamaġimu mabarana”; ema ‘Sevimu tarimana maki bono ura-vinia ġoi tauġemu oveura-vinini kavana.”

<sup>28</sup>Iesu na ekiraiato, ekirato, “Bovaġa-vese maoro, maniġesi bono vei, be bono maġuri.”

<sup>29</sup>Senaġi taravatu evevaġa-riba iaġiato-ġoi tarimana tu ma veiavina ġesi Iesu ma edanaġi-veribaġaniato, ekirato, “Au sevigu tarimana tu dei?”



<sup>30</sup> Iesu evaḡa-veseto, ekirato, “Tau ta Ierusalemā na Ieriko evariḡo-viniato-ḡoi nuḡanai, lema tarimari na dabarai ḡeguru-viniato, ḡena dabuḡa ḡekokirito, ḡevaḡa-vevaḡiato, dori moḡo ḡevaḡi-maseato, benamo monai ḡeraga-kwaneato. <sup>31</sup> Moḡa Rubu Veaḡa verena ta mo dabara na evariḡoto-ḡoi nai, mo tau edoḡariato, senaḡi eraka-ḡevi-raḡiato moḡo. <sup>32</sup> Levi doḡorona tarimana ta, (Rubu Veaḡai vetuḡunaḡi tauna), maki moḡesi, mo tau ea doḡariato nai, maki eraka-ḡevi-raḡiato moḡo. <sup>33</sup> Senaḡina Samaria tarimana ta ḡena iaḡoiaḡo ai mo tau ea doḡariato, eḡitaiao nai, evetuḡaiao. <sup>34</sup> Sevina ḡana eiaḡoto, diḡa e vine nanuna manuḡanai ebubuto, ekumuato, benamo ḡena doniki ai evaḡa-tanu-kauato, vinitaḡo numana ḡana eḡori-iaḡoato, monai enariato. <sup>35</sup> Boḡiboḡi evariḡisito nai, silva moniri ruarua numa ḡi-taḡauna tarimana eviniato, ekirato, ‘Mai tau bono nariḡau-ḡitakaua. Bema moni asi beilailani nai, ḡegu ḡenoḡoi ai vau ḡemu moni davana bavinimuni.’”

<sup>36</sup> Iesu evedanaḡito, ekirato, “Ḡoi tu kara otoni? Mai tarima toitoi fakari ai deikara sevina tarimana tu mo lema tarimari na ḡevaḡa-vevaḡiato tauna ḡenai bita ki-raḡiani?” <sup>37</sup> Taravatu evevaḡa-riba iaḡiato-ḡoi tarimana evaḡa-veseto, ekirato, “Evetuḡaiao tarimana.” Benamo Iesu na ekiraiato, “Noiaḡo, ḡoi maki moḡesi bono vei.”

### Mareta e Maria

<sup>38</sup> Iesu ma ḡena mero ḡesi ḡeri iaḡoiaḡo ai vanuḡa tai ḡea votuto. Monai vavine ta arana Mareta ḡena numai eḡabi-raḡeato. <sup>39</sup> Ḡia tu ma tarina arana Maria, benamo Maria tu eiaḡoto, Vereḡauka kwakuna koranai etanu-tarito, ḡena guruḡa eseḡaḡirito-ḡoi. <sup>40</sup> Mareta tu veḡabiraḡe dagarari eveito-ḡoi, evekwarāḡito-ḡoi. Benamo eiaḡo-mato, ekirato, “Vereḡauka, ḡoi tu otuḡamaḡini ba? Tarigu na beraga-kwanegu, au ḡereḡagu moḡo avekwarāḡini. Nokiraia, be nema vaḡa-kavagu!”

<sup>41</sup> Vereḡauka na evaḡa-veseato, ekirato, “Mareta! Mareta! Dagara ḡutumari na nuḡamu ḡevaḡa-veḡonuani e ḡevaḡa-vekwarāḡiani, <sup>42</sup> senaḡi dagara sebona moḡo ḡerevaḡi. Maria na tu namona beḡabi-viriḡia, ta na ḡia ḡenana asi ma beḡabi-vaḡiani.”

### Iesu na ḡena mero ḡuriḡuri evaḡa-ribarito

**11** Ḡaro tai Iesu tu gabu tai eḡauḡauto. Ekorito nai, ḡena mero ta na evaḡa-guruḡaiao, ekirato, “Vereḡauka o, ḡuriḡuri novaḡa-ribama Ioane na ḡena mero evaḡa-ribarito ilailanai.” <sup>2</sup> Iesu na ekirarito, ekirato, “Ḡoḡuriḡurini nai, boḡono kira:

‘Ḡai Tamama o,

ḡoi aramu baḡana vaḡa-veaḡaia;

ḡemu Basileia bene iaḡoma.

<sup>3</sup> Ḡaro tata ḡai ḡema-ḡama bonoma vinima.

<sup>4</sup> Ḡema rakava notuḡamaḡi-fitoḡari,

korana ḡai maki ḡevaḡa-rakavamani tarimari ḡeri rakava ḡatuḡamaḡi-fitoḡarini.

Ema veribaḡani ai asi bono ḡori-kauma.”

<sup>5</sup> Benamo Iesu na evaḡa-guruḡarito, ekirato, “Bema ḡomi ta boḡi nuḡanai ḡatana ḡenai bere iaḡo, bere noḡia, bere kira, ‘Ḡatagu o, ḡaniḡani dagarari kota naḡabitoreri roḡo, <sup>6</sup> korana au ḡatagu ta tu ḡena iaḡoiaḡo ai ḡegu ai beiaḡoma, senaḡi au tu asi ḡegu ḡaniḡani ḡia baḡubuanai.’ <sup>7</sup> Benamo mo tarima na numa nuḡana na bere vaḡa-vesea, bere kira, ‘Asi novaḡa-vekwarāḡigu. Ḡatama-boka varau babiria,

ema au tu natugu ġesi ġagenani. Au tu asi bavariġisini, dagara ta asi bavinimuni.’

<sup>8</sup> Akiramini, enabe ġia ġatana, senaġi asi bevariġisini, ġaniġani asi beviniani, senaġi ġena noġinoġi ġenoġoi-ġenoġoi dainai bevariġisini, eura-vinirini dagarari beviniani.

<sup>9</sup> Moġa lorinai, au na ġomi akiramini, noġinoġi ai Barau na bevinimini, vetauvetau ai boġo doġarini, sekeseke o fidifidi ai ġemi ġatama-boka bekeoani. <sup>10</sup> Korana benoġi-noġini tarimana tu beġabini, bevetauni tarimana bedoġarini, ema beseke-sekeni tarimana Barau na ġena ġatama boka bekeoani.

<sup>11</sup> Gomi tama fakami ai deikara bema natumu merona maġani-kone benoġini nai, ġoi na tu mota boviniani? <sup>12</sup> O ġatoi benoġini nai, kavikavi boviniani? <sup>13</sup> Boġono tuġamaġi, ġomi tu rakava tarimami, senaġi dagara namori natumi viniviniri ma ribami, moġa lorinai ġomi Tamami gubai etanuni, ġia na Iauka Veaġa ġenoġi-viniani tarimari bevinirini veġatana!”

### Iesu e Belsebul

*Mataio 12:22-30; Mareko 3:20-27*

<sup>14</sup> Iesu na iauka rakavana, muru-bubu iaukana, elai-vaġiato, benamo mo muru-bubu tarimana eguruġato. Tarimarima ġutuma na ġevaġa-raġeato, <sup>15</sup> senaġi tarima kota ġekirato, “Mai tu Belsebul, iauka rakavari ġeri vere, ġena seġukai iauka rakavari elai-vaġirini.”

<sup>16</sup> Tarima kotari na Iesu ġedanaġi-veribaġaniato, vetoġa ta guba na bene viniri ġetato. <sup>17</sup> Senaġi Iesu na ġia ġeri tuġamaġi eribarito, benamo evaġa-guruġarito, ekirato, “Gavamani ta beveġabi-kirani, ġia tu berakavani, ema doġoro ta beveġabi-kirani, ġia tu beketoni. <sup>18</sup> Moġa lorinai Satani tu tauġena moġo bebevare-kirani, ġena basileia tu kamasi beruġani? Maġesi akiraġiani, korana tu ġomi ġokirani, au tu Belsebul ġena seġukai iauka rakavari alai-vaġirini. <sup>19</sup> Bema au iauka rakavari Belsebul ġena seġukai alai-vaġirini nai, ġomi murimi ai ġerakani tarimari na iauka rakavari aiġesi ġelai-vaġirini? Ġia na ġevaġa-moġoniani ġomi ġemi guruġa tu asi anina. <sup>20</sup> Senaġi bema au iauka rakavari Barau ġena seġukai alai-vaġirini nai, boġono riba, Barau ġena Basileia, ġena veġitaġau seġukana, tu ġomi ġemi ai varau beraġasi.

<sup>21</sup> Kokore tarimana ma ġena vaġivaġi dagarari ġesi ġena numa beġita-ġauani nai, ġena farefare tu roġo beġe tanu-ginikauni. <sup>22</sup> Senaġina kokore vedaurea tarimana ta ma beiaġomani, mai tarima bevaġa-vevaġiani, benamo bevaġa-darereani, ġia ġena vaġivaġi dagarari, veġabidadama dagarari, beverariani, benamo ġena farefare mabarari bevare-rovorovorini.

<sup>23</sup> Deikara dia au ġatagu tu, au ġegu inai tarimana, ema deikara au ġesi asi etorevegogoni tu eveiari-laussilausini.”

### Iauka rakavana ma eġenoġoito

*Mataio 12:43-45*

<sup>24</sup> “Iauka rakavana ta tarima ta ġenana eraka-rosito, benamo gabu kaukauri na eraka-vanaġito, iaġana bene ġania etato, senaġi iaġaraġi gabuna ta asi edoġariato. Benamo ġia tauġena ekirato, ‘Naġenoġoi, araga-kwaneato numana ġana.’ <sup>25</sup> Eġenoġoi-iaġoto, numa edoġariato. Numana tu veiareva ema ġitaġitana namo vedaurea. <sup>26</sup> Benamo ġia na iauka rakava kwaikwairi imaima ruarua (7) ma eġori-iaġorito, mabarari ġeraka-toġato, monai ġetanuto. Moġa lorinai mo tarima tu

tovotovonai ġena rakava tu kota misina, senaġi dokonai ġena rakava tu barego vedaurea.”

### Verere moġonina

<sup>27</sup> Mo guruġa ekiraġiato-ġoi nai, vavine ta tarimarima ġutuma fakari na eguruġa-vaishito, ekirato, “Ġoi evaġa-maġurimuto e evini-rurumuto vavinena tu namo!”

<sup>28</sup> Senaġi Iesu evaġa-veseto, ekirato, “Iniġesi nokira, Barau ġena ġuruġa ġe-seġaġiani ema ġekorana-iaġiani tarimari neġi namo!”

### Seġuka vetoġana ġevetauato

*Mataio 12:38-42; Mareko 8:12*

<sup>29</sup> Tarimarima ġutuma na Iesu ġeruġa-ġeġeraġiato, benamo evaġa-guruġarito, ekirato, “Toma ġuru tu ġuru rakavana! Seġuka vetoġana ġevetauani, senaġi vetoġa ta asi beġe doġariani, Iona, peroveta tarimana, vetoġana moġo. <sup>30</sup> Korana Iona tu vetoġa ta Nineva tarimari ġeri ai, moġa ilailanai Tarimarima Natuna tu vetoġai beiaġoni mai ġuru tarimari ġeri ai. <sup>31</sup> Barau na tarimarima bekota-vinirini ġaronai, Seba vavine baregona o Kwin beruġa-vaishini, mai ġuru tarimari besamanirini, korana ġia tu ġena tanobara manaġana na eiaġomato, Solomona ġena iaunega guruġari bene seġaġiri ġana. Senaġi ġoġitaia, tarima ta na Solomona evanaġiani tu maiġa. <sup>32</sup> Barau ġena Kota baregona ġaronai, Nineva tarimari beġe ruġa-vaishini, toma ġuru tarimari beġe samanirini, korana Iona ġena ġobata ġeseġaġiato neganai, ġia ġeri rakava ġerina ġevetuġamaġi-kureto. Senaġi tarima ta na Iona evanaġiani tu maiġa.”

### Tauġani mamana

*Mataio 5:15; 6:22-23*

<sup>33</sup> “Tarima ta na lamefa begabuani nai, asi bekure-toġaiani, diġu na asi beġoġoitariani, senaġi lamefa tore-torena gabuna korikorinai betoreani, beġe raka-toġani tarimari na mama beġene ġitaia ġana. <sup>34</sup> Ġoi matamu tu ġoi tauġanimu ġena lamefa kavana. Bema ġoi matamu namo nai, tauġanimu mabarana bemamani. Senaġi ġoi matamu rakava nai, tauġanimu mabarana bemukunani. <sup>35</sup> Moġa lorinai, lorimu bono vetore, mama ġoi nuġamu ai bemukunani garina. <sup>36</sup> Bema ġoi tauġanimu mabarana mama na bevonuvonu-raġeni, mukuna kota maki asi betanuni, ġia tu mama dikadika, lamefa emore-rovorovoni, ġoi evaġa-mamamuni kavana.”

### Iesu na Farisea tarimari ema taravatu ġevevaġa-riba iaġiato-ġoi tarimari evanerito

*Mataio 23:1-36; Mareko 12:38-40; Luka 20:45-47*

<sup>37</sup> Iesu eguruġa-ġosito nai, Farisea tarimana ta na ekeaiato, ġia ġesi beġene ġaniġani-vegogo; benamo ġena numa ġana eiaġoto, ġaniġani gabunai etanu-tarito.

<sup>38</sup> Mo Farisea tarimana na eġitaiato nai, nuġana efarevaġi-rakavato, korana Iesu tu asi eveġuriġito, (ġia seneri vereri ġeri vevaġa-naġi ilailanai), senaġi eġani-ġanito moġo. <sup>39</sup> Benamo Vereġauka na evaġa-guruġaiato, ekirato, “Ġomi Farisea tarimami na ġemi kapusi ema disi muriri rekeri moġo ġoġuriġi-ginikaurini, senaġi nuġami tu verariverari ema vei-taġuitaġui na ġevonu-fokafokato. <sup>40</sup> Ġomi tu babo! Ġomi asi ġoribani, murika rekena eveiato Barauna na nuġana rekena maki ġia na eveiato?”

<sup>41</sup> Senaġi kapusi ema disi nuġari dagarari tu asi ġeri-ġari tarimari boġono viniri vau, dagara mabarari ġemi ai beġe veiarevani.

<sup>42</sup> Farisea tarimami, vetuġami kika! Korana ġomi na Barau ġovarevare-viniani dagarari misimisiri, ġemi sivoġa, kodukarava ema ġaniġani ġailauri maki karava gabanana (10) ġoveirini, karava sebona boubou dagaranai ġovaġa-iaġoani, senaġina vei-iobukaiobuka ema Barau uravinina maġurina tu ġoleaiani. Gomi na tu maiġeri veiġa baregori ġoro veiri ema mo veiġa keiri maki asi boġoro iaġuiri.

<sup>43</sup> Farisea tarimami, vetuġami kika! Korana ġemi ura rubu ai tu tanutanu namori ai boġono tanu, ema ġemi ura maki maketi gaburi ai beġene vaġa-namomi. <sup>44</sup> Vetuġami kika! Gomi tu asi ġita vetoġari gara gaburi kavana, tarimarima iatari na ġeraka-vanaġini nai ġemirorini, ġia asi ġeribani mo tu gabu rakavana.”

<sup>45</sup> Taravatu ġevevaġa-riba iaġiato-ġoi tarimana ta na Iesu evaġa-guruġaiato, ekirato, “Vevaġa-riba taumu o, maiġesi okirani nai, ġai maki okira-fitoġamani!”

<sup>46</sup> Iesu evaġa-veseto, ekirato, “Gomi taravatu ġovevaġa-riba iaġiani tarimami maki vetuġami kika! Gomi na maruna metori tarimarima ġovaġa-faġarini, senaġi ġimami didina ta maki ġeri marunai asi ġoveġabikauni, asi ġovaġa-kavarini. <sup>47</sup> Vetuġami kika! Gomi tubumi ġatami na peroveta tarimari ġevaġi-maserito, ema ġomi na tu ġeri gara gaburi namori ġoveirini. <sup>48</sup> Moġesi ġomi tauġemi tubumi ġatami ġeri veiġa ġokiraġi-foforirini ema ġovaġa-moġonirini; moġoni veġata, tubumi ġatami na peroveta tarimari ġevaġi-maserito, ema ġomi na ġeri gara gaburi ġoveirini. <sup>49</sup> Moġa lorinai Barau ġena Iaunega ekirani, ‘Au na peroveta tarimari ema apostolo tarimari batuġu-iaġorini ġeri ai, benamo tari tu beġe vaġi-maserini, ma tari tu beġe lai-lausilausirini.’ <sup>50</sup> Moġesi nai, peroveta tarimari mabarari ġevaġi-maserito, Barau na tanobara eveiato veġata beiaġoma mo maitoma, metona tu toma ġuru tarimari na beġe ġabiani. <sup>51</sup> Abela ġevaġi-maseato, monana eiaġomato mo Sakaria, ġia tu fata veaġana ema Barau ġena numa veaġana fakari ai ġevaġi-maseato. Aba, au na akiramini, mabarari metori tu toma ġuru tarimari na beġe ġabiani!

<sup>52</sup> Taravatu ġovevaġa-riba iaġiani tarimami, vetuġami kika! Riba numana keofakana ġatama-boka kina tu ġomi na ġoġabiato. Gomi ġereġami asi boġo raka-toġani, ema ġeraka-toġa ġetoni tarimari ġeri dabara ġomi na ġokourini!”

<sup>53</sup> Iesu mo gabu na eraka-rosito, benamo taravatu ġevevaġa-riba iaġiato-ġoi tarimari ema Farisea tarimari na ġekira-fitoġaiato, ema dagara vovoka ġevedanaġi-viniato, <sup>54</sup> ġeribaġaniato, ġeri ura tu dagara ta bene kiraġi-kererea, be beġene samania ġana.

### Ġeġofaġofani tarimari boġono nariri

**12** Mo faka nuġanai tarimarima ġutuma lelevaġi varau ġevegogoto, asi-iaġo asifana, benamo Iesu na ġena mero evaġa-guruġa guinerito, ekirato, “Boġono venari-ginikau Farisea tarimari ġeri farao evaġa-tubuani muramurana ġerina, korana mani tu ġia ġeri ġofaġofa veiġana bene. <sup>2</sup> Vekouġau dagarari mabarari beġea foforini, vekuretoġa guruġari mabarari beġea ribani. <sup>3</sup> Moġa lorinai kara dagara mukunai ġokiraġiato, mamai beġea seġaġiani, kara dagara koutoġai seġai ġoguruġa-ġurato dagarana, beġea kiraġi-foforiani numa tuġuna na, tarimarima mabarari na beġene seġaġia ġana.”

## Barau bitana gari-vinia

*Mataio 10:28-31*

<sup>4</sup>“Ġatagu mabarami, akiramini, tauġani beġe vaġiani, ma murinai kara ta ma asi beġe veiani tarimari gariri asi boġono vei. <sup>5</sup> Senaġi navaġa-ribami, deikara garina boġono vei: Barau boġono gari-vinia. Tauġani bevaġiani murinai ma ġena seġuka, ġomi ma befiu-ġuramini, karava eġara-vanaġi vanaġini gabunai. Aba, au na akiramini, ġia moġo boġono gari-vinia!

<sup>6</sup> Bisini imaima (5) maki fene ruarua na moġo ġevoirini, ene? Senaġina Barau na tu sebona ta maki asi etuġa-rekwaiani. <sup>7</sup> Moġoni veġatana, ġomi tu debami ġuiri maki mabarari Barau na eiavi-ginikaurito. Be asi boġono gari; ġomi voimi tu varaġe lelevaġi, bisini ġutuma voiri maki ġovanaġirito!”

## Iesu bekiraġi-foforiani ema bekira-ġuniġauani

*Mataio 10:32-33; 12:32; 10:19-20*

<sup>8</sup>“Au na akiramini, deikara na au tarimarima ġoirari ai bekiraġi-foforiguni, ġia maki Tarimarima Natuna na Barau ġena aneru ġoirari ai bekiraġi-foforiani. <sup>9</sup> Senaġina au deikara na tarimarima ġoirari ai beruġaguni e bekira-ġuniġauguni, ġia maki Barau ġena aneru ġoirari ai baruġaiani e bakira-ġuniġauani.

<sup>10</sup> Tarimarima Natuna deikara na bekira-rakavaiani, Barau na ġia ġena rakava betuġamaġi-fitoġaiani, senaġina deikara na Iauka Veaġa bekira-rakavaiani, ġia ġena rakava tu asi betuġamaġi-fitoġaiani.

<sup>11</sup> Iuda tarimari ġeri rubu ai beġe vaġa-kotamini, ema vanuġa vereri e Kota baregori ġeseġaġini tarimari ġoirari ġana beġe ġori-iaġomini nai, nuġami asi beġene vekwaraġi, aiġesi toma boġo guruġani o kara toma boġo kiraġirini. <sup>12</sup> Korana Iauka Veaġa na mo ġaro ai kara boġo kiraġirini guruġari bevaġa-ribamini.”

## Barabore - Farefare vovoka tarimana

<sup>13</sup> Tarimarima ġutuma nuġana na tarima ta na Iesu ekiraiato, ekirato, “Vevaġa-riba tarimamu o, au kakagu nokiraia, ġai tamama na eraga-kwanerito farefareri nevareri, be au tavi ta nevinigu.” <sup>14</sup> Iesu na evaġa-veveato, ekirato, “Ġoi tau o, au tu deikara na ġomi taumi ruarua ġemi farefare-tore viriġi-viriġina ġana etoreguto?”

<sup>15</sup> Benamo evaġa-guruġarito, ekirato, “Boġono boġeboġe! Lorimi boġono vetore, farefare vovoka mata-ġaniġaniri boġo veini garina; korana tarimarima ġeri maġuri korikori tu dia ġeri farefare vovoka na ġevaġa-ġorarini.”

<sup>16</sup> Benamo mai barabore ekiraġiato, ekirato, “Farefare vovoka tarimana ta ġena tano na ġaniġani namori evaġa-ġorarito. <sup>17</sup> Ġia etuġa-maġito, ekirato, ‘Kamasi toma baveini? Mai ġaniġani mabarari tu ainai bana vaġa-vegogori?’ <sup>18</sup> Benamo ekirato, ‘Au tu maiġesi navei. Ġaniġani atorinerini numari guineri narovori, benamo numa baregori naraġari. Mainai vau au ġegu ġaniġani e farefare mabarari monai bana vaġa-vegogori. <sup>19</sup> Benamo au tauġegu bana vekira, ‘Ġoi ġemu dagara namori tu ġutuma gorogoro bovaġa-vegogori laġani vovoka ġana. Be, noiaġaraġi, noġaniġani, noniuniu e noverere.’ <sup>20</sup> Senaġina Barau na ekiraiato, ekirato, ‘Kamuto, ġoi tu babo! Toma boġi ġoi ġemu maġuri aġabi-vaġiani ġemuna, benamo mai ġemu farefare bovaġa-vegogorini tu deikara na beġabirini?’

<sup>21</sup> Maiġesina mo deidei tauġeri moġo ġeri farefare ġevaġa-vegogoni tarimari tu asi ġeri farefare Barau ġoiranai.”

### **Asi bono tuġamaġi-vekwaraġi**

*Mataio 6:25-34*

<sup>22</sup> Benamo Iesu na ġena mero evaġa-guruġarito, ekirato, “Moġa lorinai, akiramini, ġemi maġuri asi boġono tuġamaġiri, kara boġo ġanini; o tauġanimi kara na boġo dabuġarini. <sup>23</sup> Maġuri tu dagara baregona, a ġaniġani tu dagara keina, ema tauġani tu dagara baregona, a dabuġa tu dagara keina. <sup>24</sup> Gaio ġotuġamaġiri, asi ġevarovaroni ema asi ġekwa-kwani; asi ġeri ġaniġani-tore numari, senaġina Barau na eġuburini! Ġomi tu dagara baregomi, a manu tu kei! <sup>25</sup> Ġomi deikara otuġamaġi-vekwaraġini nai, ġemu maġuri kota maia bovaġa-maukaiani? <sup>26</sup> Mai dagara misina asi boveiani riba, karase nai tu dagara tari maia urari ai ovetuġamaġini?”

<sup>27</sup> Boġa veraverari ġoġitari aiġesi ġegarani. Asi ġeġauveini ema dabuġa asi ġeturini. Senaġina akiramini, Kini Solomona ġena vedabuġa marevana maki ġevanaġiani. <sup>28</sup> Bema Barau na tanobara ġauġari moġesi edabuġarini, ġia toma tu ġegarani, ma boinani tu karavai beġe fiu-raġerini, Barau na ġomi tu bevaġa-dabuġa ġinikau-raġemini. Ġomi veġabidadama misimisi tarimami! <sup>29</sup> Moġa lorinai asi boġono boġe vetau-vetau, kara toma ġoġanini e kara toma ġoniuni; ema asi boġono tuġamaġi-vekwaraġi maki. <sup>30</sup> Korana Barau asi ribari tarimari mabarari tu maniġeri dagara ġevetaurini, a ġomi Tamami tu ma ribana maniġeri dagara tu ġoura-vinirini. <sup>31</sup> Senaġina Barau ġena Basileia boġono vetaua, benamo maniġeri dagara mabarari bevinimini.”

### **Farefare boġono vaġa-vegogo gubai**

*Mataio 6:19-21*

<sup>32</sup> “Seri misina, asi boġono gari, korana Tamami ġena ura tu ma nuġa namona ġesi ġena Basileia bene vinimi. <sup>33</sup> Ġemi farefare ġovoivoi-iaġiri, ma moni asi-ġeri e asi-ġari tarimari ġoviniri. Asi beġe rakavani moni fusefuseri ġoġabiri, ġemi farefare gubai ġovaġa-vegogori, monai tu asi beġe korini, monai lema tarimari asi beġe rakavini ema faro na maki asi beġe vaġa-rakavarini. <sup>34</sup> Korana tu ġomi ġemi farefare ainai, ġomi nuġami maki monai.”

### **Vetuġunaġi tarimari namori**

*Mataio 24:42-51*

<sup>35</sup> “Ġauvei ġana boġono vedabuġa-tore ema ġemi lamefa beġene ġara-taġo. <sup>36</sup> Vetuġunaġi tarimari na ġeri vere numai ġenari-taġoani kavana boġono tanu. Vevaġa-veġaraġo verekona na ma beġenoġoini, ġatama-bokai befidifidini nai, ġena ġatama beġene raġa-keoa ġana. <sup>37</sup> Vetuġunaġi tarimari roġo tataġa ġeri vere beġenoġoini tu namo. Moġoni akiramini, ġena rami beriġoani, ġaniġani gabunai bevaġa-tanurini, benamo ġaniġani bevinirini. <sup>38</sup> Mo vetuġunaġi tarimari roġo naritaġo ġeri vere beġenoġoini tu namo, kamasi boġi nuġanai o boġiboġi rekenai beiaġomani.

<sup>39</sup> Senaġi boġono riba, bema numa tarimana ma ribana, kamara horai lema tarimana beiaġomani tu, numa benariani, be lema tarimana maki lema bevedaureani. <sup>40</sup> Moġa lorinai ġomi maki boġono venari-taġo, korana Tarimarima Natuna tu asi ġotuġamaġiani aoanai beiaġomani.”

<sup>41</sup> Benamo Petero na edanaġiato, ekirato, “Vereġauka, mai barabore tu ġai ġemai moġo okiraġiani, ba tarimarima mabarari ġeri ai maki?” <sup>42</sup> Vereġauka evaġa-veseto, ekirato, “Deikara tu mo farefare nari tarimari na guruġa eseġaġini ema veġa roroġo-tori eveini, ġena vere na eġabi-viriġiato, numa ema vetuġunaġi tarimari bene ġi-taġauri, ema ġaniġani maki nega korikori ai bene viniri?” <sup>43</sup> Mo vetuġunaġi tarimana, ġena vere na ekiraiato ilailanai eġauveini, bema-ġoitaġoani tu namo. <sup>44</sup> Moġoni akiramini, ġia tu ġena vere ġena farefare mabarari ġitaġauri tarimanai bevaġa-iaġoani. <sup>45</sup> Senaġina bema vetuġunaġi tarimana bekirani, ‘Au ġegu vere ġena ġenoġoi tu bekwaiwo rakava,’ benamo vetuġunaġi tauri ema vavineri bekwaririni, ma beġanini e beniu-babobaboni. <sup>46</sup> Vetuġunaġi tarimana ġena vere ġena ġenoġoi ġarona tu asi etuġamaġiani ġaronai, ma asi eribaiani aoanai beraġasini. Ġena vere na bea basi-ġutuġutuani, ma asi ġevaġa-moġonini tarimari ġesi bea toreani.

<sup>47</sup> Mo vetuġunaġi tarimana ġena vere ġena ura tu ma ribana, senaġi asi eġabikavini ema ġena vere ġena ura asi eveiani tu, ribi baregona korikori beġabiani. <sup>48</sup> A vetuġunaġi tarimana asi ribana ġena vere ġena ura, ma bea ġauvei-kavani, voina tu ribi, senaġi asi vovoka beġabini. Ġutumari eviniato tarimana ġenana tu ġutumari ma beura-viniani; vovoka lelevaġiri eviniato tarimana ġenana tu vovoka lelevaġiri ma bevetau-viniani.”

### **Dia maino, senaġi vetavi**

*Mataio 10:34-36*

<sup>49</sup> “Au tu karava aġabi-iaġomaiato tanobara ġana, ema ġegu ura bere ġarakau guine tu namo! <sup>50</sup> Senaġi au tu babatiso ta baġabiani, ema au tu anuġa-vekwaraġini, beiaġoni mo, bavaġa-koriani! <sup>51</sup> Ġomi ġotuġamaġini, au tu maino tanobara ġana aġabi-iaġomaiato? Asiġi, senaġi akiramini, vetavi-kirakira urana na aiaġomato. <sup>52</sup> Toma beiaġoni mo ġoira laġaniri ai, bese tai imaima tu beġe vetavi-kirani, toitoi beġe veġitani ruarua ġerina, ema ruarua beġe veġitani toitoi ġerina. <sup>53</sup> Tamana natuna tauna ġenana beveġitani, natuna tauna tamana ġenana beveġitani; sinana natuna vavinena ġenana beveġitani, ma natuna vavinena sinana ġenana beveġitani; taġama vavine barana taġama vavine keina ġenana beveġitani, ma taġama vavine keina taġama vavine barana ġenana beveġitani.”

### **Aoa beraġasini vetoġana**

*Mataio 16:1-4*

<sup>54</sup> Iesu na tarimarima ġutuma evaġa-guruġarito, ekirato, “Bema ġaro eketoni rekenai magube dubadubari ġeraġekauni ġoġitarini nai tu, ġokirani, ‘Ġura beraguni,’ benamo eraguni. <sup>55</sup> Ma gabina rekena (o south) na iavara eiaġomani nai ġokirani, ‘Ġaro beseġukani,’ benamo ġaro eseġukani. <sup>56</sup> Ġofaġofa tarimami! Tanobara e guba vetoġari kiraġi-kiraġiri tu ma ribami; kamasi nai mai toma ġaro vetoġana tu asi ribami?”

<sup>57</sup> Karase nai tauġemi na asi ġotuġamaġi-fakaiani kara tu maoro? <sup>58</sup> Esamanimuto tarimana ġesi roġo ġoiaġoni Kota ġana nuġanai boġono maino. Bema asiġina nai, Kota eseġaġini tarimana ġimanai bea tore-kaumuni, ma Kota eseġaġini tarimana na folisi ġimanai bea tore-kaumuni, benamo folisi na dibura numanai bea fiutoġamuni. <sup>59</sup> Akiramuni, asi boraka-vaġini, beiaġoni mo, moni mabarana boa vaġa-voi-ġosiani.”

**Ĝemi rakava ĝerina boĝono vetuĝamaĝi-kure e  
boĝono raka-kure boĝo maseni ĝesi**

**13** Mo negai tarima kota Iesu ĝenai ĝeiaĝoto, benamo Iesu ĝekira-varaiato, Galilea tarimari Pilato na evaĝirito, ĝeri ginitaĝo dagarari Barau ĝeviniato-ĝoi nuĝanai; ĝia rarari tu ginitaĝo dagarari rarari ĝesi ebubu-sebonarito. <sup>2</sup> Iesu na evaĝa-veserito, ekirato, “Ĝomi ĝotuĝa-maĝini, mo Galilea tarimari moĝesi ĝevaĝirito-ĝoi nai, monana ĝevaĝa-moĝoniato, ĝeri rakava tu Galilea tarimari mabarari ĝeri rakava evanaĝirito? <sup>3</sup> Asiĝina! Au na akiramini, bema ĝemi rakava ĝerina asi boĝo vetuĝamaĝi-kureni, ĝomi mabarami moĝesi boĝo maseni ĝia ĝemaseto kavana. <sup>4</sup> A mo tarima gabanana imaima toitoi (18) Siloam kounai numa baregona eketoto ĝia iatari ai nai, evaĝirito tu kamasi? Ĝomi ĝotuĝamaĝini, mo tarima ĝeri rakava tu Ierusalemata tarimari mabarari ĝeri rakava evanaĝirito? <sup>5</sup> Asiĝina! Au na akiramini, bema ĝemi rakava ĝerina asi boĝo vetuĝamaĝi-kureni, ĝomi mabarami maki boĝo maseni ĝia ĝemaseto kavana.”

**Barabore - Figi ĝauna asi ĝwana**

<sup>6</sup> Iesu na mai barabore ekira-vararito, ekirato, “Tarima ta ĝena vine tavoĝana nuĝanai figi ĝauna evaroato. Benamo eiaĝoto, figi ĝauna ĝwaĝwana ea vetauato, senaĝina ĝwana ta asi edoĝariato. <sup>7</sup> Moĝa lorinai ĝena vamoka narinarina tarimana evaĝa-guruĝaiato, ekirato, ‘Noĝitaia, laĝani toitoi beĝe iaĝo, au mai ĝau ĝitaĝitana aiaĝomani, senaĝina ĝwana ta asi adoĝariani. Nobasi-laua, korana asi tauna bene! Mai tano eĝauvei-iaĝi-taĝuiani.’ <sup>8</sup> Senaĝi vamoka ĝitaĝauna tarimana evaĝa-veseto, ekirato, ‘Vereĝauka, noraga-kwaneana, mai laĝani sebona moĝo bene tanu. Au na bakwa-ĝeĝeraĝiani ema tano namori ma babubuni. <sup>9</sup> Benamo ĝwaĝwana namori beĝe burini laĝani ĝoirai tu namo, bema asiĝi nai, vau bono basia.”

**Iesu na Sabadi ai asi erakato vavinena evaĝa-namoato**

<sup>10</sup> Sabadi tai Iesu tu evaĝa-ribatoĝoi rubu ta nuĝanai. <sup>11</sup> Vavine ta monai iauka rakavana na eboroĝiato, eveli-kevekeveato laĝani gabanana imaima toitoi (18). Ĝia doĝena eĝeĝevato, asi eruĝa-vaisito-ĝoi. <sup>12</sup> Iesu na eĝitaiato, benamo ekea-iaĝomaiato, ekiraiato, “Vavine o, ĝoi tu mani keve manina na varau bofaka.” <sup>13</sup> Benamo Iesu ĝimana mo vavine iatanai eveĝabikauto nai, vaĝa-sebo moĝo doĝena eroroĝototo, Barau evaĝa-raĝeato.

<sup>14</sup> Rubu ĝitaĝauna tarimana ebaruto, korana Iesu na Sabadi ai evevaĝa-namoto nai. Moĝa lorinai ĝia na tarimarima evaĝa-guruĝarito, ekirato, “Ĝaro imaima sebona tarimarima ĝeri ĝauvei ĝarori. Mo ĝaro ai vevaĝa-namo uranai boĝono iaĝoma, senaĝi Sabadi ai asi boĝono iaĝoma.”

<sup>15</sup> Vereĝauka na evaĝa-veseato, ekirato, “Ĝofaĝofa tarimami! Sabadi ai ĝemi boro-makau o doniki asi ĝoruĝarini, ĝeri numa na asi ĝoĝori-rosirini nanu niu? <sup>16</sup> A mai vavine, Aberahamo besena vavinena, Satani na laĝani gabanana imaima toitoi (18) ebarubaruato, au na Sabadi ai barubaru ĝenana asi baruĝaiani ba?” <sup>17</sup> Moĝesi ekirato nai, ĝebaru-viniato-ĝoi tarimari ĝemaiakarito, senaĝi tarimarima mabarari na Iesu ĝena veĝa boruri ĝeĝitarito nai, ĝeikaku-rakavato.



### Barabore - Mastadi ġauna ġutuna

*Mataio 13:31-32; Mareko 4:30-32*

<sup>18</sup> Benamo Iesu na edanaġirito, ekirato, “Barau ġena Basileia tu aiġesi? Kara ġenai bavaġa-ilailaiani? <sup>19</sup> Ġia tu mastadi ġauna ġutuna kavana. Tarima ta na eġabiato, ġena vamokai evaroato. Mastadi ġauna ġutuna egarato, ġau ai eiaġoto, benamo guba manuri leganai ġesikokauto.”

### Faroo evaġa-tubuani muramurana

*Mataio 13:33*

<sup>20</sup> Iesu na ma edanaġirito, ekirato, “Barau ġena Basileia tu kara ġesi bavaġa-ilailaiani? <sup>21</sup> Ġia tu maġesi, vavine ta na farao evaġa-tubuani muramurana kotuna ta moġo eġabiato, benamo farao fuseri toitoi ġesi egiroato, eiaġoto mo, muramura na mabarana evaġa-tubu baregoato.”

### Barau ġena Basileia rakatoġana

*Mataio 7:13-14; 7:21-23*

<sup>22</sup> Iesu Ierusalem dabanani eiaġoto-ġoi nai, vanuġa baregori ema keiri nuġari ai evevaġa-ribato-ġoi. <sup>23</sup> Tarima ta na edanaġiatio, ekirato, “Vereġauka, tarima viravira moġo beġe maġurini ba?” Iesu na evaġa-veserito, ekirato, <sup>24</sup> “Boġono vebibi-toġa, ġatama-boka kibobona boġono raka-toġa ġana, korana au na akiramini, tarimarima ġutuma ġeraka-toġa ġetoni, senaġi asi beġe raka-toġani. <sup>25</sup> Numa tarimana bevar-iġisini, ġatama-boka bekouani murinai, ġomi tu murikai boġo ruġa-taġoni, ġatama-bokai boġo fidifidini, boġo kirani, ‘Vereġauka, ġai ġema ġatama-boka nokeoa!’ senaġi ġia bekirani, ‘Au asi ribagu ġomi ainana boġo iaġoma!’ <sup>26</sup> Benamo ġomi boġo kirani, ‘Ġai tu ġoi ġesi taġaniġanito-ġoi ema taniuniu-vegogoto-ġoi; ema ġoi tu ġai ġema vanuġa ġatamanai ovevaġa-ribato-ġoi!’ <sup>27</sup> Senaġina ġia ma bekirani, ‘Au asi ribagu ġomi ainana ġoiaġomani. Au ġeguna ġoraka-veġita vei-rakava tarimami!’ <sup>28</sup> Benamo Aberahamo, Isako, Iakobo, ema peroveta tarimari mabarari boġo ġitarini Barau ġena Basileia nuġanai, senaġi ġomi tu murikai beġe dori-rosimini; mo ġaro ai boġo taġini, gadikami beġe veġara-tarini. <sup>29</sup> Tarimarima ġaro eraġekauni ema ġaro evariġoni, e debana (o north) ema gabina (o south) rekena na beġe iaġomani, beġe tanu-tarini vereko ai Barau ġena Basileia nuġanai. <sup>30</sup> Boġono riba, toma ġegabini tarimari tu beġe guineni, a ġeguineni tarimari tu beġe gabini.”

### Iesu Ierusalem taġina eveito

*Mataio 23:37-39*

<sup>31</sup> Mo negai Farisea tarimari kota Iesu ġenai ġeiaġoto, ġevaġa-guruġaiato, ġekirato, “Mai gabu noraga-kwanea, gabu ta ġana noiaġo, korana Heroda eurani ġoi bene vaġimu etoni.” <sup>32</sup> Iesu evaġa-veseto, ekirato, “Ġoiaġo, mo boġa kwaivana ġoa kiraia, ‘Au tu iauka rakavari alai-vaġirini ema tarimarima avaġa-namorini toma, boinani, ema ġaro vaġa-toitoinali ġegu ġauvei bavaġa-kori ginikauani.’ <sup>33</sup> Senaġi toma, boinani, ilaġani ġegu iaġoiaġo ai roġo baiaġoni, korana peroveta tarimana tu irau gabu ai asi bemaseni, senaġi Ierusalem ai moġo!”

<sup>34</sup> Ierusalem, Ierusalem o, ġoi na peroveta tarimari ovaġirini ema Barau na etuġu-iaġosirini tarimari fore na otaki-maserini. Nega ġutuma aurato, natumi bana

gana-ġeġeraġiri, kokoroku vavinena na natuna egoru-taririni kavana, senaġi ġomi tu asi ġourato! <sup>35</sup> Moġa lorinai ġemi vanuġa e Rubu Veaġa korina betanuni. Au na akiramini, ġomi roġo au asi boġo ġitaguni, beiaġoni mo, ġaro ta beraġasini, monai vau boġo kirani, ‘Barau aranai eiaġomani tauna sivaġa-namo.’”

### Iesu na Sabadi ai keve tarimana evaġa-namoato

**14** Sabadi tai Iesu (ġekeaiato nai) eiaġoto, Farisea ġeri veġorikau tarimana ta ġena numai beġene ġaniġani ġana, benamo tarimarima na ġena veiġa ġeġita-ġinikaurito-ġoi. <sup>2</sup> Monai tarima ta ġia tauġanina eroro-roroto, Iesu ġoiranai etanu-taġoto. <sup>3</sup> Benamo Iesu na taravatu ġevevaġa-riba iaġiato-ġoi tarimari e Farisea tarimari edanaġirito, ekirato, “Sabadi ai keve vaġa-namo tu maoro ba asiġina?” <sup>4</sup> Senaġi ġia asi ġeguruġato, ta na maki asi evaġa-veġeato. Benamo Iesu na mo keve tarimana eġabiato, evaġa-namoato murinai etuġuato. <sup>5</sup> Benamo ekirarito, ekirato, “Ġomi deikara natumu o ġemu boromakau nanu gurina nuġanai bere keto-ġura nai, ġoi na Sabadi ai boro inu-raġea ba asiġina?” <sup>6</sup> Senaġi ġia na Iesu asi ġevaġa-veġeato.

### Barabore - Veġaraġo verekona

<sup>7</sup> Iesu na varivari tarimari eġitarito, tanutanu namori moġo ġeġaunarito, benamo ġeri barabore ta ekiraġiato, ekirato, <sup>8</sup> “Bema tarima ta na bekeamuni, veġaraġo verekona raka-vegogonai, gabu namonai asi bono tanu-tari, korana irau vereko ġorikauna tauna na tarima barana ta bekeaiani ġesi. <sup>9</sup> Benamo ekeamito tarimana beiaġomani, bekiramuni, ‘Noveġita, mai vere ġena tanutanu novaġa-fakaia.’ Ġoi tu bemaikamuni, benamo botanu-riġoni. <sup>10</sup> Bema ġoi ġekeamuni nai, tanutanu tanonai bono tanu. Benamo vereko ġorikauna tarimana beiaġomani nai, bekirani, ‘Ġata, tuġuna ġana novaraġe.’ Benamo ġoi tu beġe vaġa-raġemuni vereko tarimari mabarari na. <sup>11</sup> Korana tu tauġena eveġabi-vaġisini tarimana tu, Barau na betore-riġoani, a tauġena evetore-riġoni tarimana tu, beġabi-vaġisiani.”

<sup>12</sup> Iesu na vereko ġorikauna tarimana ekiraiato, ekirato, “Bema ġoi ġaniġani o vereko ta bodabaraiani nai, ġatamu, tarikakamu, garagaramu o sevimu ai ġetanuni taġa tarimari asi bono keari, korana ġia na ġoi ma beġe keamuni, ġoina keakau beġe vaġa-voiani. <sup>13</sup> Senaġi bema vereko ta bodabaraiani nai, gara veġubu, tauġaniri rakava, kwaku rakava, mata-bubu tarimari bono keari, <sup>14</sup> benamo ġoi tu Barau ġena vevaġa-namo boġoitaġoani. Moġoni, ġia na asi beġe vaġa-voimuni, senaġi veiġa iobuka-iobuka tarimari mase na ma beġe variġisi-ġenoġoini ġaronai vau, voimu boa ġoitaġoani.”

### Barabore - Vereko barana

#### *Mataio 22:1-10*

<sup>15</sup> Iesu ġesi ġeġaniġani-vegogoto tarimana ta na mo guruġa eseġaġiato nai, ekiraiato, ekirato, “Barau ġena Basileiai vereko bea ġaniani tarimana tu beiakuni.” <sup>16</sup> Iesu na evaġa-veġeato, ekirato, “Tarima ta na vereko barana ta edabaraiato, benamo tarimarima ġutuma ekearito. <sup>17</sup> Ġani-vereko ġaronai ġena vetuġunaġi tarimana ta etuġuato, ekearito tarimari nea kirari, ‘Ġoiaġoma, dagara mabarari beġe rovina-toreri.’ <sup>18</sup> Senaġi ġia mabarari ġekira-sirivaġito. Ta ekirato, ‘Au tu tano ta bavoia, be aurani bana ġitaia nai, asi bono baru.’ <sup>19</sup> Ta ma ekirato, ‘Au tu boromakau ga-

banana (10) bavoiri nai, aiaḡoni fokafokai atovo-naḡirini, be asi bono baru.’<sup>20</sup> Ta ma ekirato, ‘Au tu inivau mo haveḡaraḡo nai, asi baiaḡosini.’

<sup>21</sup> Vetuḡunaḡi tarimana eḡenoḡoito, ḡena vere ekira-varaiato. Benamo numa tari-mana ma baruna ḡesi ḡena vetuḡunaḡi tarimana ekiraiato, ekirato, ‘Noraga-iaḡo vanuḡai, gara veḡubu, tauḡaniri rakava, mata-bubu ema kwaku rakava tarimari bono ḡori-iaḡomari.’<sup>22</sup> Benamo vetuḡunaḡi tarimana eḡenoḡoito, ekirato, ‘Vere o, mani ḡemu ura ḡauveina tu varau haveia, senaḡi numa roḡosi bene vonu.’<sup>23</sup> Benamo vere na vetuḡunaḡi tarimana ma ekiraiato, ekirato, ‘Noiaḡo dabara barai ema vamoka dabarari ai, tarimarima bono kirari, beḡene iaḡoma, be auna numa benema vonu.’<sup>24</sup> Au na akiramini, akearito tarimari ta na ḡegu vereko ḡaniḡanina misina ta asi bevaḡa-mamiani.”

### Barabore - Iesu ḡena mero tu vevaḡa-gwaḡiḡi tarimari

*Mataio 10:37-38*

<sup>25</sup> Tarimarima ḡutuma-bara Iesu ḡesi ḡeiaḡoto-ḡoi, benamo eruḡa-kureto, ekirar-ito, ekirato, <sup>26</sup> “Bema tarima ta eurani, au ḡegu ai bene iaḡoma etoni, senaḡi ḡia tamana ema sinana, ḡaraḡona ema natuna, kakana tarina ema tauḡena ḡena maḡuri maki veuraviniri asi betuḡamaḡi-fitoḡaiiani nai, ḡia tu dia au ḡegu mero.”<sup>27</sup> Deikara tauḡena ḡena satauro asi beḡwaiiani, benamo au murigu na asi berakani, ḡia tu dia au ḡegu mero.

<sup>28</sup> Bema ḡomi ta eurani numa ta bene ragaia etoni nai, betanu-tari guineni, numa voina beribaiani, moni beilailani ba asiḡina, ene?<sup>29</sup> Irau ḡauvei besinaiani, benamo asi bevaḡa-koriani, mabarari na beḡe ḡitaiani tarimari na beḡe rikiriki-iaḡiani,<sup>30</sup> beḡe kirani, ‘Mai tarima na esinaiato, senaḡi asi evaḡa-koriato.’

<sup>31</sup> O kamara vanuḡa verena, irau vanuḡa verena ta bene vetari-vinia etoni, benamo asi betanu-tari guineni, sisiba asi bevetauni, ḡena vetari tarimari mabarari 10,000, ema reke ta vere ḡena 20,000, ḡia ḡeiaḡoma-viniani nai, bevaḡa-darereani ba?<sup>32</sup> Bema ḡia asi ilaila nai, ḡia aranai ḡena tarima tari betuḡu-iaḡorini, mo doḡoro barana roḡo fakari manaḡa nuḡanai, maino beḡene ḡabia dabarana beḡea veiani.<sup>33</sup> Moḡa ilailanai deikara ḡena dagara mabarari asi beiaḡuirini tu asi au ḡegu mero.”

### Barabore - Damena

*Mataio 5:13; Mareko 9:50*

<sup>34</sup> “Damena tu namo, senaḡi bema damena mamina berekwa-rekwani nai, kamara dabarai mamina ma beḡenoḡoini?<sup>35</sup> Ḗia tu asi ilaila tano vaḡa-namona ema asi namo varovaro dagarari ḡesi vaḡa-garari ḡana; moḡa lorinai tarima na beḡe fitoḡai-iani. Ma seḡana tarimana bene seḡaḡi!”

### Barabore - Rekwerekwa mamoeina

*Mataio 18:12-14*

**15** Takesi gogo tarimari ema vei-rakava tarimari ḡutuma Iesu ḡenai ḡeiaḡoto, ḡena guruḡa beḡene seḡaḡiri ḡana.<sup>2</sup> Farisea tarimari ema taravatu ḡevevaḡa-riba iaḡiato-ḡoi tarimari ḡemugumuguto, ḡekirato, “Mai tarima tu rakava tarimari eḡabi-raḡerini ema ḡia ḡesi ḡeḡaniḡani-vegogoni!”

<sup>3</sup> Benamo Iesu na mai barabore ḡeri ekiraḡiato, ekirato, <sup>4</sup> “Bema ḡomi ta ma ḡena mamoe sinau ta (100), benamo sebona berekwa-rekwani nai, ḡia tu kara

beveini? Ĝia na 99 tano fakanai beraga-kwanerini, edobito mamoea bevetauani mo beĝoitaĝoani. <sup>5</sup> Bedoĝariani nai, ĝabanai befaĝa-gabagabaiani ma iakuna ĝesi, <sup>6</sup> benamo numa ĝana beiaĝoni. Beraĝasini nai, ĝatana e sevina tarimari bekearini, bekirani, 'Sima iaku-vegogo, korana ĝegu mamoe, edobito dagarana, ma badoĝaria.' <sup>7</sup> Au na akiramini, moĝa ilailanai rakava tarimana ta ĝena rakava ĝerina evetuĝamaĝi-kureni nai, gubai iaku ema verere tu barego lelevaĝi, a vei-iobukaiobuka tarimari 99 ĝeri vei-iobukaiobuka dairi ai asi beĝe vetuĝamaĝi-kureni maki bevanaĝirini."

### Barabore - Rekwerekwa monina

<sup>8</sup> "Bema vavine ta ĝena silva moniri mabarana gabanana (10), benamo sebona bevei-rekwa-rekwani nai, ĝia tu kara beveini? Ĝia na lamefa begabuani, numa bedaroani, mo moni sebona bevetau-ĝitakuani mo bea ĝoitaĝoani. <sup>9</sup> Bedoĝariani nai, ĝia na ĝatana e sevina tarimari bekearini, bekirani, 'Sima iaku-vegogo, korana tu ĝegu silva monina, erekwa-rekwato dagarana, varau badoĝaria.' <sup>10</sup> Au na akiramini, rakava tarimana ta ĝena rakava ĝerina evetuĝamaĝi-kureni nai, Barau ĝena aneru moĝesi beĝe iakuni."

### Barabore - Rekwerekwa merona

<sup>11</sup> Iesu ma ekirato, "Tarima ta natuna ruarua. <sup>12</sup> Tau muriseina na tamana ekiraiato, ekirato, 'Tama, ĝitana farefare novareri, be au debagu farefareri tu novinigu.' Benamo farefare mabarari natuna ruarua fakari ai evarerito. <sup>13</sup> Ĝaro asi vovoka ĝeiaĝoto nuĝanai, tau muriseina ĝena farefare evaĝa-vegogoto, benamo tano manaĝa ĝana erakato. Monai ĝena farefare ea ĝere-iaĝirito. <sup>14</sup> Ĝena farefare mabarari evaĝa-koririto murinai, mo tano ai doĝe barego eĝorato. Ĝia varau asi-ĝena, asi-ĝana. <sup>15</sup> Benamo eiaĝoto, mo tanobara tarimana ta ĝenai ĝauvei ea vetauto, benamo ĝia na etuĝuato ĝena tano ai bai bene ĝitaĝauri ĝana. <sup>16</sup> Ĝia evito-rakavaiato nai, bai ĝari ĝaniĝani bene ĝaniri etato, senaĝi mo ĝaniĝani maki ta na asi eviniato. <sup>17</sup> Benamo ea vetuĝamaĝi-kureto, ekirato, 'Tamagu ĝena ĝauvei tarimari tu vovoka, ema ĝari ĝaniĝani maki ĝutuma, senaĝi au tu mainai vitona evaĝiguni. <sup>18</sup> Naĝenoĝoi, tamagu ĝenai niaĝo, benamo bana kiraia: Tama, Barau ĝoiranai ema ĝoi ĝoiramu ai avei-rakavato. <sup>19</sup> Au tu asi ilaila ĝoi natumu ai ma bono kiraĝigu; senaĝi anoĝimuni, ĝemu vetuĝunaĝi tarimanai bono vaĝa-iaĝogu, banasi.' <sup>20</sup> Benamo evariĝisito, tamana ĝenai eiaĝoto.

Gabu manaĝa na roĝo eiaĝomato-ĝoi nai, tamana na varau eĝita-doĝariato, benamo evetuĝa-rakavaiato, benamo eraga-iaĝoto, ea faĝa-maĝuriato, everauato. <sup>21</sup> Benamo natuna na ekiraiato, ekirato, 'Tama, au tu Barau ĝoiranai ema ĝoi ĝoiramu ai ma ĝegu vei-rakava. Au tu asi ilaila ĝoi natumu ai bono kiraĝigu.' <sup>22</sup> Senaĝi tamana na ĝena vetuĝunaĝi tarimari evaĝa-guruĝarito, ekirato, 'Ĝoraga-vei! Dabuĝa namo vedaureana ta ĝoĝwa-iaĝomaia, ĝoma vaĝa-riĝoa. Rini ta didinai ĝoma dori-toĝaia, ema tamaka maki kwakunai ĝoma toreri. <sup>23</sup> Ema boromakau natuna ma monana ĝoĝwa-iaĝomaia, ĝovaĝia, benamo bisini ĝania e bisini verere-vegogo. <sup>24</sup> Korana natugu maiĝa emaseto, senaĝi ma bemaĝuri-ĝenoĝoi; erekwa-rekwato, senaĝi ma bama doĝaria!' Benamo ĝia ĝeverere-vegogoto.

<sup>25</sup> Natuna tau guinena tu vamokai. Vamoka na eĝenoĝoito, numa eiaĝo-viniato-ĝoi nai, mari e bara gururi eseĝaĝirito. <sup>26</sup> Benamo vetuĝunaĝi tarimana ta ekeaiato, mo guru korana evedanaĝi-iaĝiato. <sup>27</sup> Vetuĝunaĝi tarimana na evaĝa-veseato, ekirato,

‘Goi tarimu beġenoġoi, tamamu na ma namona e ma maġurina ġesi bema doġaria lorinai, ġia na vetuġunaġi tarimari bevaġa-guruġari, boromakau natuna ma monana ġesi beġe vaġia.’

<sup>28</sup> Tau guinena ebaru-rakavato, numai asi eraka-toġato, benamo tamana erakarisito, enoġiato neraka-toġa ġana. <sup>29</sup> Senaġi ġia na tamana evaġa-veseato, ekirato, ‘Noġitaia, au tu laġani ġutuma ġoi rekemu ai atanuni, vetuġunaġimu aiaġo-vinini, ġemu ura mabarana akorana-iaġirini, ġemu vevaġa-naġi ta asi afitoġaiato, senaġi ġoi na nanigosi natuna ta maki asi oviniguni au ma ġatagu ġesi vaġa-iaku-iaġima ġana. <sup>30</sup> A mai natumu mata-boraġa vavineri ġeri ai ġemu farefare mabarari bea vaġa-koriri; bea ġenoġoi nai tu, ġoi na tu boromakau natuna mona mase bovaġia ġia ġana!’ <sup>31</sup> Tamana evaġa-veseto, ekirato, ‘Natugu, ġoi tu au sevigu ai otanuvanaġi vanaġini, au ġegu dagara mabarari tu ġoi ġemu. <sup>32</sup> A toma ġita si-iaku, bisini verere, korana tarimu emaseto, senaġi bemaġuri; erekwa-rekwato, senaġi ma bitama doġaria.’”

### Vetuġunaġi tarimana ġena tuġamaġi-iobuka

**16** Iesu na ġena mero evaġa-guruġarito, ekirato, “Farefare e moni vovoka tarimana ta etanuto-ġoi. Benamo tarima kotari na farefare vovoka tarimana ġekira-varaiato, ġia ġena farefare ġitaġauna tarimana na ġena farefare eġere-iaġirini. <sup>2</sup> Moġa lorinai taġa tarimana na ekea-toġaiato, benamo ekirato, ‘Goi varimu baseġaġia moġoni ba? Au ġegu ġauvei oġwa-ragaiato nai, novevarifiu-iaġia, korana initoma ġoi tu dia au ġegu farefare narinarina tarimana.’ <sup>3</sup> Benamo mo farefare ġitaġauna tarimana etuġamaġito, ekirato, ‘Au ġegu baregona na toma evaġa-dokoguni ġegu ġauvei na. Kara baveini? Au tu asi gwadagu baiaraġani ema noġinoġi au ġegu ai tu maiaka dagarana.’ <sup>4</sup> Etuġamaġito-ġoi nuġanai, ekirato, ‘Mai bama riba kara baveiani! Benamo bevaġa-dokoguni nai, ġatagu namori ġutuma na beġe ġabi-raġeguni ġeri numai.’

<sup>5</sup> Moġa lorinai ġena baregona ġenai ġeġabi-toreto tarimari mabarari ekeavegorito. Benamo ta edanaġiato, ekirato, ‘Goi ġemu ġabitore tu vira?’ <sup>6</sup> Evaġa-veseto, ekirato, ‘Olive diġana kavaburi sinau imaima toitoi (800).’ Benamo farefare ġitaġauna tarimana na ekiraiato, ‘Ġemu ġabitore fefana maiġa, noraga-tanuntari, benamo sinau vasivasi (400) notorea.’ <sup>7</sup> Benamo ta ma edanaġiato, ekirato, ‘Goi ġemu ġabitore tu vira?’ Ġia ekirato, ‘Widi fuseri mabarari 1,000.’ Benamo farefare ġitaġauna tarimana na ekiraiato, ‘Ġemu ġabitore fefana maiġa, noġabia, benamo sinau imaima toitoi (800) notorea.’

<sup>8</sup> Dokonai mo farefare narinarina tarimana rakavana ġena baregona na evaġaraġeato, korana ġena tuġamaġi-iobuka dainai. Korana tanobara tarimari tu ġeiaunega-lelevaġito ġeri tanu-vegogo ai, a mamai ġetanuni tarimari tu asiġina.

<sup>9</sup> Au na akiramini, mai tanobara farefareri e moniri rakavari ġerina tarimarima tu ġomi ġatami ai boġono vaġa-iaġori, korana ġemi moni bea korini nai, ġomi tu beġe tanu-vanaġi vanaġini numari ai beġene ġabi-raġemi gubai.

<sup>10</sup> Deikara dagara misina ġauvei-iaġina ma ribana nai, dagara baregona maki ġauvei-iaġina ma ribana; ema deikara dagara keinai beġofaġofani nai, dagara baregonai maki beġofaġofani. <sup>11</sup> Bema ġomi tanobara farefareri e moniri ġauvei-iaġiri asi ribami nai, Barau na kamasi farefare korikoriri gubai bevinimini boġo ġauvei-

iaġirini? <sup>12</sup> Ema bema ġomi tarima ta ġena farefare asi boġo ġitaġau-ginikaurini nai, Barau na ġomi ġemi farefare maki asi bevinimini?

<sup>13</sup> Vetuġunaġi tarimana na baregona ruarua vetuġunaġiri asi beiaġo-vinirini riba. Korana ġia na ta tu asi beura-viniani, a ta tu beura-viniani; ta bevaġa-moġoniani, a ta tu beġofaġofa-iaġiani. Ġomi maki Barau ema moni nega sebonai vetuġunaġiri asi boġo iaġo-vinirini, asiġina-ġinavaġi.”

### Iesu ġena guruġa kota

<sup>14</sup> Farisea tarimari tu moni ġeuravini-baregorito-ġoi. Iesu ġena guruġa mabarana ġeseġaġiato nai, ġerikiriki-iaġiato. <sup>15</sup> Iesu na evaġa-guruġarito, ekirato, “Ġomi tu tarimarima ġoirari ai ġovekirraġini, senaġi Barau tu nuġami ribana. Tarimarima na ġevaġa-raġerini dagarari Barau na tu asi eura-vinirini, etuġamaġi-fitoġarini.

<sup>16</sup> Mose ġena taravatu ema peroveta tarimari ġeri guruġa ġetanuto-ġoi eiaġomato mo, Ioane Babatiso ġena negai. Monana Barau ġena Basileia varina ġeġobata-iaġiani nai, tarimarima mabarari ġevebibi-toġani beġene raka-toġa ġana. <sup>17</sup> Guba ema tano-bara beġe rekwa-rekwani tu ma dabarana, senaġi taravatu ġena toutou ta maki asi berekwa-rekwani.

<sup>18</sup> Tau ta na ġaraġona belaiiani, benamo vavine ta ma beġaraġoani nai, ġia mo tu veġura-vanaġi veġana beveiani; ma tarima boruna ta na mo tau na elaiato vavinena moġa ma beġaraġoani nai, ġia maki beveġura-vanaġini.”

### Farefare e moni vovoka tarimana ema Lasaro

<sup>19</sup> “Farefare e moni vovoka tarimana ta etanuto-ġoi. Ġia tu dabuġa namori moġo eveito-ġoi e ġaro mabarari ai everereto-ġoi ema ġaniġani namona moġo eġanito-ġoi. <sup>20</sup> Ġena numa ġatama bokanai tarima ta asi-ġena ema asi-ġana arana Lasaro egena-taġoto-ġoi. Ġia tu kefina mabarana lakufodo. <sup>21</sup> Eura-baregoto-ġoi taġa tarimana ġana ġaniġani momori bene ġani. Kwaiva maki ġeiaġoto, ġia manuġana ġeiamuserito-ġoi.

<sup>22</sup> Asi ġena-ġana tarimana emaseto, benamo aneru na Aberahamo sevina ġana ġeġwa-iaġoato. Farefare vovoka tarimana ma emaseto, benamo ġeguriato. <sup>23</sup> Mase gabunai (o Hades) midigu eġanito-ġoi nai, eboġe-raġeto, manaġai Aberahamo eġi-taiato, ema Lasaro maki ġia ġesi. <sup>24</sup> Benamo ekeato, ekirato, ‘Aberahamo, tamagu o, novetuġagu, mani Lasaro notuġua, ġimana didina nanu ai nea duġi-reia, be meagu moġo nama vaġa-ġavea, korana tu au mai karava morenai midigu vovoka aġanini.’

<sup>25</sup> Senaġi Aberahamo ekirato, ‘Natugu o, notuġamaġia, ġoi omaġurito-ġoi ġarori ai dagara namori oġabito-ġoi, a Lasaro tu dagara rakavari eġabito-ġoi. Senaġi toma ġia tu everereni, a ġoi tu midigu oġanini. <sup>26</sup> Ġita fakarai maki koufa bara ta etanuni, moġa lorinai maina na tarima ta maniġana asi beiaġosini, ema manina na maki ta maiġana asi beiaġomani.’

<sup>27</sup> Benamo farefare vovoka tarimana ekirato, ‘Tamagu o, anoġimuni, Lasaro notuġua tamagu ġena numa ġana. <sup>28</sup> Au tarigu merori tu imaima. Ġia na bene vaġa-guruġari, mai midigu ġani gabuna ġana beġe iaġomani garina.’ <sup>29</sup> Senaġi Aberahamo ekirato, ‘Mose ema peroveta tarimari tu ġia ġesi, be garori neġi beġene seġaġiri.’ <sup>30</sup> Taġa tarimana ekirato, ‘Asiġi, tamagu! Senaġi bema emaseto tarimana ta beiaġoni nai, ġia tu ġeri rakava ġerina beġe vetuġamaġi-kureni.’

<sup>31</sup> Aberahamo ekirato, ‘Bema Mose ġena taravatu ema peroveta tarimari ġeri ġuruġa asi beġe seġaġirini nai, mase na tarima ta bere varigġisi-ġenoġoi maki asi ġere seġaġi-vinia.’”

### Vei-rakava ema rakava tuġamaġi-fitoġari

**17** Iesu na ġena mero evaġa-guruġarito, ekirato, “Tarimarima vaġa-ketori dargarari roġo beġe ġorani, senaġi bevaġa-ġorarini tarimana tu vetuġana kekei. <sup>2</sup> Ġia tu bere namo fore baregona ta ġaiġonai ġere baru-kaua, benamo davarai ġere fiu-reia, korana mai misimisiri ta rakavai beġofa-toġaiani garina.

<sup>3</sup> Moġesi nai lorimi boġono vetore! Bema ġoi tarikakamu veġa rakavari eveini nai, bono kira-ġoia, ema ġena rakava ġerina bevetuġamaġi-kurenai nai, ġena rakava bono tuġamaġi-fitoġari. <sup>4</sup> Bema ġia na ġaro ta vaġa-imaima ruarua (7) bevaġa-rakavamuni, ema vaġa-imaima ruarua (7) beġenoġoini ġemu ai, bekirani, ‘Bavetuġamaġi-kure,’ betoni nai, ġoi na ġena rakava bono tuġamaġi-fitoġari.”

### Veġabidadama

<sup>5</sup> Iesu ġena apostolo na Vereġauka ġevaġa-guruġaiato, ġekirato, “Ġema veġabidadama novaġa-baregori!” <sup>6</sup> Vereġauka na evaġa-veserito, ekirato, “Bema ġomi ġemi veġabidadama tu mastadi ġauna ġutuna ġena barego kavana, misina korokoro moġo, senaġi ġomi na mai ġau baregona o malberi ġauna boġo kiraiani, ‘Noveraġa-vaġi, be davarai noa vevaro!’ boġo toni, benamo garomi tu beseġaġiani.”

### Vetuġunaġi tarimana ġena ġauvei

<sup>7</sup> “Bema ġomi ta ġemu vetuġunaġi tarimana tano befokani o mamoe beġita-ġaurini murinai, ġauvei gabuna na numa ġana beiaġomani nai, ġoi na bokiraiani, ‘Noraka-ġariġari, be noma ġaniġani,’ botoni ba? <sup>8</sup> Asiġina, senaġi ġoi bokirani, ‘Ġagu ġaniġani novei, ema bono vedabuġa, be bonoma nari-ġaugu; au bana ġaniġani ema bana niuniu-ġosi murinai vau, ġoi ma bono ġaniġani ema bono niuniu.’ <sup>9</sup> Ba vetuġunaġi tarimana ġena seġaġi ai dainai bevaġa-namoani? Asiġina. <sup>10</sup> Ġomi maki moġesi; bema Barau na bekiramini ġauveiri mabarari boġo veirini nai, boġo kirani, ‘Ġita vetuġunaġi tarimara ġera ġauvei.’”

### Iesu na lepera tarimari gabanana (10) evaġa-namorito

<sup>11</sup> Iesu Ierusalemia eiaġo-viniato-ġoi nai, Samaria ema Galilea tanori vefakari na eraka-vanaġito. <sup>12</sup> Vanuġa tai eraka-toġato, benamo lepera tarimari gabanana (10) ġesi ġevedoġarito. Roġo manaġai ġeruġa-tarito, <sup>13</sup> ġia ġekeato, ġekirato, “Iesu! Ġema Vereġauka! Novetuġama!”

<sup>14</sup> Iesu na eġitarito, benamo evaġa-guruġarito, ekirato, “Rubu Veaġa vereri ġeri ai ġoiaġo, be beġenea ġitami.” Benamo ġeiaġoto-ġoi nuġanai, tauġaniri ġeveiarevato, ġenamoto. <sup>15</sup> Tarima sebona moġo ġia fakari ai kefina eġitaiato enamoto, benamo eġenoġoi-iaġoto, Barau evonevone-raġe viniato. <sup>16</sup> Benamo Iesu kwakuna korana evetui-tarito, evaġa-namoato. Ġia tu Samaria tarimana. <sup>17</sup> Iesu ekirato, “Tarima mabarari tu gabanana (10) beġe namo. Imaima vasivasi (9) tu aiġeri? <sup>18</sup> Kara dainai mai irau gabu tarimana ġereġana moġo beġenoġoi-iaġoma, Barau bema vaġa-raġea?” <sup>19</sup> Benamo Iesu na ekiraiato, ekirato, “Novariġisi, noiaġo, ġemu veġabi-dadama na bevaġa-maġurimu.”

## Barau ġena Basileia beiaġomani guruġari

*Mataio 24:23-28; 24:37-41*

<sup>20</sup> Farisea tarimari kota na Iesu ġedanaġiato, Barau ġena Basileia tu aitoma beiaġomani. Ġia na evaġa-veserito, ekirato, “Barau ġena Basileia beiaġomani tu asi boġo ġitaiani dagarana. <sup>21</sup> Tarima ta asi bekirani, ‘Noġitaia, iniġa!’ o ‘Iomoġa!’; korana Barau ġena Basileia tu ġomi fakami ai maniġa.”

<sup>22</sup> Benamo ġia na ġena mero evaġa-guruġarito, ekirato, “Ġaro ta beraġasini nai, ġomi ġemi ura baregona tu Tarimarima Natuna ġena ġaro sebna ta moġo boġono ġitaia, senaġi asi boġo ġitaiani. <sup>23</sup> Kotari na beġe kiramini, ‘Tarimana iomoġa!’ o ‘Tarimana maiġa!’ beġe toni. Senaġi asi boġono iaġo, murinai asi boġono raka. <sup>24</sup> Korana kiriku eragani nai, morena gubai reketa-reketa ġana eiaġoni kavana, Tarimarima Natuna ġena ġaro nuġanai maki moġesi beveini. <sup>25</sup> Senaġi ġia midigumidigu vovoka roġo beġani-guineni, ema toma ġuru tarimari na roġo beġe kira-fitoġaiani.

<sup>26</sup> Tarimarima Natuna beiaġomani ġaronai tu Noa ġena negai kavana. <sup>27</sup> Tarimarima mabarari ġeġaniġanito-ġoi, ġeniuniuto-ġoi, tau e vavine ġeveġaraġoto-ġoi, eiaġomato mo, Noa ġena lagatoi ai eraka-toġato ġaronai, benamo ġutuġutu na mabarari eġutu-maserito. <sup>28</sup> Lota ġena negai maki moġesi moġo. Ġeġaniġanito-ġoi, ġeniuniuto-ġoi, ġevoivoito-ġoi, ġevaro-varoto-ġoi, numa ġeragato-ġoi. <sup>29</sup> Senaġi Lota Sodoma eraga-kwaneato ġaronai, karava ma salfa o fore seġukari ġesi guba na ġeketo-firiġoto, mabarari evaġi-masemaserito. <sup>30</sup> Tarimarima Natuna beforini nai, maki moġesina beġorani.

<sup>31</sup> Mo ġaro ai, bema tarima ta tu numa tuġunai etanu-taġoni, numai asi ma bene raka-toġa ġena farefare bene ġabiri. Ema bema tarima ta tu vamokai nai, ġia ġena numa ġana asi ma bene ġenoġoi ġena farefare ġabiġabiri. <sup>32</sup> Lota ġaraġona boġono tuġamaġia! <sup>33</sup> Deikara tauġena moġo ġena maġuri lorina etoreani tarimana, ġena maġuri beleaiani; a ġena maġuri eleaiani tarimana na maġuri bedoġariani.

<sup>34</sup> Akiramini, mo boġi ai tarima ruarua gEDA sebonai beġe genani nuġanai, ta tu Barau na beġabi-vaġiani, (korana beġabi-raġeani nai), a ta tu betanuni, (korana bekira-fitoġaiani nai). <sup>35</sup> Vavine ruarua widi giro dagarana beġe giro-vegogoani nai, ta tu beġabi-vaġiani, a ta tu betanuni. [<sup>36</sup> Tarima ruarua vamokai beġe ġauveini nai, ta tu beġabi-vaġiani, a ta tu betanuni.]”

<sup>37</sup> Iesu ġena mero na ġedanaġiato, ġekirato, “Vereġauka o, ainai beġorani?” Iesu evaġa-veseto, ekirato, “Mase tauġanina etanuni gabunai, ġaio maki monai beġe vegogoni, (be ġia na beġe vaġa-foforiani).”

## Barabore - Vabu ema Kota eseġaġini tarimana

**18** Benamo Iesu na ġena mero ġeri barabore ta ekiraġiato. Mo barabore na bene vaġa-ribari, be vanaġivanaġi beġene ġauġau ema asi beġene moiramoira ġana. <sup>2</sup> Maiġesi ekirato, “Vanuġa tai Kota eseġaġini tarimana ta etanuto-ġoi. Ġia tu Barau garina asi eveito-ġoi, ema tarimarima maki asi egubakaurito-ġoi. <sup>3</sup> Mo vanuġa vabuna ta mai Kota eseġaġini tarimana ġenai eiaġo-ġenoġoi ġenoġoito-ġoi, ġena maoro evevaġa-doġe-gani viniato-ġoi ema ekirato-ġoi, ‘Novaġa-kavagu, be ġevaġa-rakavaguni tarimari davari noviniri!’ <sup>4</sup> Nega emanaġato nuġanai, Kota eseġaġini tarimana na vabu ġena ura veiġana asi eveiato. Senaġi ġaro ta ġia tauġena evetuġa-maġito, ekirato, ‘Au tu Barau garina asi aveini ema tarimarima maki asi agubakau-



rini, <sup>5</sup> senaġi dagara sebna tu, mai vabu na au evaġa-doġe-ganiguni nai, ġena ura veġana naveia, korana vanaġivanaġi beiaġomani, benamo au bevaġa-doġe-gani iaġoguni ġesi.”

<sup>6</sup> Vereġauka ma ekirato, “Mo Kota eseġaġini tarimana kara etato, ġoseġaġia. <sup>7</sup> Be kamasi? Barau na eviriġirito tarimari, ġia ġenai boġi ema laġani mabarari ai ġe-taġitaġini ema ġenoġinoġi-viniani tarimari, vevaġa-maoro nuġanai tu asi bevaġa-kavarini? Nevaġa-kavari ġana nai tu bekwaiboni? <sup>8</sup> Au na akiramini, ġeri maoro ai ġia na bevaġa-kava ġariġaririni. Senaġi Tarimarima Natuna ma beiaġomani nai, ġia veġabi-dadama tanobarai bedoġariani ba asiġina?”

### **Farisea tarimana ema takesi gogo tarimana**

<sup>9</sup> Tarima kotari ġeri tuġamaġi ġia tu vei-iobukaiobuka, a tarimarima mabarari tu vei-rakava tarimari. Iesu na mai tarima ġeri barabore ekiraġiato, ekirato, <sup>10</sup> “Tarima ruarua Rubu Veaġa ġana ġeiaġoto, ġea ġuriġurito; ta tu Farisea tarimana, a ta tu takesi gogo tarimana. <sup>11</sup> Farisea tarimana ġereġana reke tai eruġato, benamo eġauġauto, ekirato, ‘Barau o, avaġa-namomuni, korana au tu dia tarima mabarari kavana, be seġafore tarimari, vei ġeġeva-ġeġeva tarimari, veġura-vanaġi tarimari. Avaġa-namomuni, korana au tu dia iomo takesi gogo tarimana kavana. <sup>12</sup> Fura o wiki ta nuġanai au tu ġaro ruarua aġani-veaġani, ema adoġarini dagarari karava gabanana (10) aveirini, benamo karava sebna tu ġoi avinimuni.’

<sup>13</sup> Senaġi takesi gogo tarimana tu manaġai eruġato, asi eboġe-raġeto gubai, kobana ebotaiaito, ekirato, ‘Barau o, au tu rakava tarimagu, noma vetuġagu!’

<sup>14</sup> Au na akiramini, takesi gogo tarimana tu Barau na evaġa-moġoniato, ma vei-iobukaiobukana ġesi vanuġa ġana eġenoġoito, a Farisea tarimana tu asiġina. Korana tauġena moġo eveġabi-vaġaġeni tarimana tu, Barau na bevaġa-variġoani, a tauġena evevaġa-variġoni tarimana tu, bevaġa-vaġaġeni.”

### **Iesu na mero misiri evaġa-namorito**

*Mataio 19:13-15; Mareko 10:13-16*

<sup>15</sup> Tarima kotari mero misimisiri Iesu ġenai ġeġwa-iaġorito, ġimana iatari ai bene toteri ġana. Ĥena mero na ġeġitarito, benamo ġekira-ġoirito. <sup>16</sup> Senaġi Iesu na mero misiri ekea-iaġomarito, ġena mero ekirarito, ekirato, “Mani mero misiri au ġegu ai ġeiaġoma, asi ġolairi, korana maniġesina kavana tu Barau ġena Basileia tarimari. <sup>17</sup> Moġoni au na ġomi akiramini, dei na Barau ġena Basileia asi beġabi-raġeani mero misina kavana, Basileiai asi beraka-toġani.”

### **Farefare vovoka tarimana**

*Mataio 19:16-30; Mareko 10:17-31*

<sup>18</sup> Iuda tarimari ġeri vere tauna ta na Iesu edanaġiato, ekirato, “Vevaġa-riba taumu namona, au kara baveini vau, maġuri vanaġivanaġi badoġariani?” <sup>19</sup> Iesu na evaġa-veŋeato, ekirato, “Ĥoi karase nai au namogu okiraġini? Tarima ta asi namo, Barau moġo ġereġana. <sup>20</sup> Taravatu ma ribamu, ‘Asi bono veġura-vanaġi, asi bono vaġivaġi, asi bono lema, asi bono vevaġa-daġa ġofaġofa, tamamu sinamu bono gubakauri.’” <sup>21</sup> Mo tarima ekirato, “Au keġu na beiaġoma toma mani taravatu mabarari akorana-iaġirini.” <sup>22</sup> Iesu na mo guruġa eseġaġiato, benamo ekiraiato, “Ĥoi tu dagara sebonai moġo orabuni. Ĥemu farefare mabarari novoivoi-iaġiri, moniri tu asi-ġeri ema asi-

ġari tarimari bono viniri, benamo gubai ġoi ġemu farefare bodoġaririni. Moġesi boveini vau, au murigu ai bonoma raka.”<sup>23</sup> Mo guruġa eseġaġiato nai, nuġana emeto-rakavato, korana ġia tu farefare ġutuma tarimana.

<sup>24</sup> Iesu na eġitaiato, benamo ekiraiato, ekirato, “Farefare vovoka tarimari Barau ġena Basileia ġeri rakatoġa tu gwaġiġi rakava!”<sup>25</sup> Kamela nila kadarena na ġena rakatoġa tu kotuna gwaġiġi, a farefare vovoka tarimana Barau ġena Basileia rakatoġana ġia ġenai tu gwaġiġi rakava.”<sup>26</sup> Tarimarima na mai guruġa ġeseġaġiato, benamo Iesu ġedanaġiato, ġekirato, “Be, deikarari vau maġuri beġe doġariani?”<sup>27</sup> Iesu evaġa-veseto, ekirato, “Tarimarima na asi beġe veirini riba dagarari tu Barau na beveirini riba.”

<sup>28</sup> Petero na ekiraiato, ekirato, “Ġoi ribamu, ġai tu ġema dagara mabarari ġaraga-kwanerito, murimu ai ġarakani.”<sup>29</sup> Iesu na ekirarito, “Moġoni akiramini, tarima ta ġena numa eraga-kwaneato, o ġaraġona, kakana, tarina, tamana, sinana, natuna Barau ġena Basileia uranai,<sup>30</sup> ġia na mai maġuri nuġanai dagara ġutuma beġoitaġoni, ema mo negai vau maġuri vanaġivanaġi bedoġariani.”

### Iesu na ġena mase ma ekiraġi-foforiato

*Mataio 20:17-19; Mareko 10:32-34*

<sup>31</sup> Iesu na ġena mero gabanana ruarua (12) eġori-veġitarito, benamo ekirarito, ekirato, “Ġoseġaġi! Ġita tu Ierusema ġana tavaraġeni. Monai peroveta tauri na Tarimarima Natuna varina ġetore-guineto guruġari aniri mabarari beġe moġonini.<sup>32</sup> Irau bese (o Roma) tarimari ġimari ai beġe toreani. Ġia na beġe vaseva vaseva-iaġiani, beġe rikiriki-iaġiani e beġe kanunu-kanunuani.<sup>33</sup> Beġe botaiani e beġe vaġi-maseani, senaġi ġaro vaġa-toitoinai vau ma bevariġisi-ġenoġoini.”

<sup>34</sup> Iesu ġena mero mo guruġa tauna asi ġeġoitaġoato. Guruġa anina ġia ġeri ai tu vekuretoġa. Ġia asi ribari Iesu na kara ekiraġiato.

### Iesu na mata-bubu tauna evaġa-namoato

*Mataio 20:29-34; Mareko 10:46-52*

<sup>35</sup> Iesu tu Ieriko ekavinaġiato nai, mata-bubu tauna ta dabara rikinai etanu-taġoto-ġoi, enoġinoġito-ġoi.<sup>36</sup> Tarimarima ġutuma dabarai ġeraka-vanaġito eseġaġito, benamo evedanaġito, “Mai guru anina tu kara?”<sup>37</sup> Ġekirato, “Iesu, Nasareta tauna, eraka-vanaġini.”<sup>38</sup> Benamo ekea-fouto, ekirato, “Iesu o, Davida natuna, au novetuġagu!”<sup>39</sup> Ġoirai ġerakato tarimari na ġekira-ġoiato, senaġi ġia ekea-ġiġiraġe ġiġiraġeto-ġoi, “Davida Natuna o, au novetuġagu!”

<sup>40</sup> Iesu eruġa-tarito, benamo ekirato, “Ġoġori-iaġomaia!” Ġia eiaġomato, benamo Iesu na edanaġiato, ekirato,<sup>41</sup> “Kara ourani ġemu ai naveia otoni?” Ġia evaġa-veseto, ekirato, “Vereġauka o, matagu noma vaġa-iaġaia.”<sup>42</sup> Iesu ekirato, “Be, matamu nenamo, ġemu veġabidadama na bevaġa-namomu.”<sup>43</sup> Vaġa-sebo matana enamoto, eboġeboġe-ginikauto, Iesu murinai erakato, Barau evaġa-raġeato. Mo veġa ġeġitaiato tarimari mabarari na maki Barau ġevaġa-raġeato.

### Iesu ema Sagaio

**19** Iesu Ieriko ai eraġasito, benamo vanuġa nuġana na eraka-iaġoto-ġoi.<sup>2</sup> Monai tu takesi gogo tarimari ġeri vere ta arana Sagaio; ġia tu moni ema farefare vovoka tarimana.<sup>3</sup> Ġia ġena ura tu Iesu neġita-vetoġaia ġia tu dei, senaġi tarimarima

g̃utuma ema g̃ia tu tau kubina nai, neḡitaia g̃ana egera-kavato. <sup>4</sup> Moḡa lorina i eraga-guine-iaḡoto, sikamoa g̃auna tai eraḡeto, Iesu monana beraka-vanaḡini nai, bene ḡitaia g̃ana.

<sup>5</sup> Iesu mo gabu ai eraḡasito, eboḡe-raḡeto, eḡitaiato, benamo ekiraiato, “Sagaio, norakariḡo-ragaraga, korana au toma tu ḡoi ḡemu numai batanuni bene.” <sup>6</sup> Benamo Sagaio eraga-rakariḡoto, ma iakuna ḡesi Iesu eḡori-iaḡoato ḡena numa g̃ana. <sup>7</sup> Ḣeḡitaiato tarimari mabarari ḡemugumuguto, ḡekirato, “Mai tau tu rakava tarimana, ḡena numai ea tanuni.”

<sup>8</sup> Sagaio eruḡa-vaisito, Vereḡauka evaḡa-guruḡaiato, ekirato, “Vereḡauka, noseḡaḡi! Ḣegu farefare reke-ta tu gara veḡubu tarimari bavirinini, ema ḡena farefare aḡabi-kavaiato tarimana tu, nega vaḡa-vasivasi bavini-ḡenoḡoiani.” <sup>9</sup> Iesu na ekiraiato, ekirato, “Toma vevaḡa-maḡuri tu mai numai bema raḡasi, korana mai tarima maki Aberahamo natuna. <sup>10</sup> Korana Tarimarima Natuna tu rekwarekwa tarimari vetauvetauri ema bene vaḡa-maḡuriri ḡana eiaḡomato.”

### Barabore - Vetuḡunaḡi tarimari moni ḡenarito

*Mataio 25:14-30*

<sup>11</sup> Mabarari ḡeseḡaḡito-ḡoi nuḡanai, Iesu na ḡeri barabore ta ekiraḡiato. Korana ḡia tu Ieruselema ekavi-naḡiato nai, ḡia maboru ḡekirato, Barau ḡena Basileia tu mo negai beforinini. <sup>12</sup> Benamo ḡia ekirato, “Dagi baregona tarimana ta gabu manaḡana ḡana eiaḡoto, kini o vere dagina bene ḡabia vau, ma bene ḡenoḡoi ḡana. <sup>13</sup> Roḡosi bere raka nai, ḡena vetuḡunaḡi tarimari gabanana (10) ekea-iaḡomarito, golo moniri ḡia tata sebori-sebori evinirito, benamo ekirarito, ekirato, ‘Au murigu ai boḡono ḡauvei-iaḡiri, be moni boruri tari ma boḡono doḡari.’

<sup>14</sup> Senaḡi ḡena tanobara tarimari na asi ḡeura-viniato-ḡoi nai, murina na guruḡa ḡetuḡuto, ḡekirato, ‘Ḣai asi ḡaurani mai tarima ḡai ḡema vere ai bene iaḡo.’ <sup>15</sup> Senaḡi mo tarima na kini dagina ḡeviniato murinai, eḡenoḡoi-iaḡomato. Benamo ḡena vetuḡunaḡi tarimari ekea-iaḡomarito, beḡene vaḡa-ribaia, moni boruri vira ḡia tata ḡedoḡarito.

<sup>16</sup> Tarima giniguinena eiaḡomato, benamo ekirato, ‘Vereḡauka, golo monina sebona oviniguto nuḡanai, au na tu moni gabanana (10) ma adoḡaririto.’ <sup>17</sup> Ḣia na evaḡa-namoato, ekirato, ‘Ḣoi tu vetuḡunaḡi taumu namona! Dagara misiri oḡauvei-iaḡi ginikaurini nai, au na vanuḡa mabarari gabanana (10) avinimuni, ḡoi na boḡita-ḡaurini.’ <sup>18</sup> Vaḡa-ruaruana eiaḡomato, benamo ekirato, ‘Vereḡauka, sebona oviniguto nuḡanai, au na moni imaima ma adoḡaririto.’ <sup>19</sup> Ḣena vere na ekiraiato, ‘Ḣoi tu vanuḡa imaima boḡita-ḡaurini.’

<sup>20</sup> Vetuḡunaḡi tarimana ta ma eiaḡomato, benamo ekirato, ‘Vereḡauka o, ḡoi ḡemu moni sebona tu iniḡa, au na muko ai akumuato, akure-toḡaiato. <sup>21</sup> Au tu ḡoi garimu aveito, korana ḡoi tu asi vegubakau taumu. Tarima ḡeri dagara oḡabirinini, ema dia ḡoi na ovarorito dagarari obasirinini e okwarini.’ <sup>22</sup> Ḣena vere na ekiraiato, ‘Ḣoi tu vetuḡunaḡi tarimana rakavana! Tauḡemu ḡemu guruḡa na bavevaḡa-maoro vinimuni. Ḣoi ribamu au tu asi vegubakau taugu, dia au ḡegu dagarari aḡabirinini, ema dia avaroto dagarari abasirinini. <sup>23</sup> Be, karase nai ḡegu moni tu banikai asi otoreato? Benamo au bara ḡenoḡoi nai tu, ma torekauna o interestina ḡesi bara doḡaria.’

<sup>24</sup> Benamo monai ḡeruḡa-taḡoto-ḡoi tarimari ekirarito, ekirato, ‘Mani moni sebona ḡenai maniḡa ḡoḡabia, moni gabanana (10) tarimana ḡovinia.’ <sup>25</sup> Senaḡi ḡia na ḡeki-

raiato, 'Veregauka, ġia ġena moni tu varau 10 beġabia.' <sup>26</sup> Ġia evaġa-veseto, ekirato, 'Au na akiramini, ma ġena-ġana tarimana tu ġutumari ma baviniani, a asi ġena-ġana tarimana tu, ġenai misina maki baġabi-vaġiani.

<sup>27</sup> Senaġi au ġebaru-viniguni tarimari, asi ġeurato au ġia bana guine-iaġiri ġetato tarimari, ġoġori-iaġomari, au ġoiragu ai ġoma vaġi-maseri!"

### Iesu ġena rakatoġa Ierusalemaj ġevonevone-raġe viniato

*Mataio 21:1-11; Mareko 11:1-11; Ioane 12:12-19*

<sup>28</sup> Eguruġa-ġosito vau, Iesu eraka-guineto, Ieruselema ġana evaraġeto. <sup>29</sup> Betefage e Betania ekavinaġirito-ġoi nai, Olive Ġorona rekenai, benamo Iesu na ġena mero ruarua etuġu-guinerito, ekirato, <sup>30</sup> "Ġoira vanuġana ġana ġoiāġo. Boġo raġasini nai, doniki natuna ta barutari boġo ġitaiiani, iatanai tarima ta roġosi bene raġe. Boġono ruġaia, benamo boġono ġori-iaġomaia. <sup>31</sup> Bema tarima ta na bedanaġi-mini, bekirani, 'Karase nai ġoruġaiani?' betoni nai, ġomi boġono kira, 'Veregauka na eura-viniani.'"

<sup>32</sup> Benamo tauri ruarua ġeiāġoto, Iesu na ekira-vararito ilailanai ġedoġariato. <sup>33</sup> Doniki natuna ġeruġaiato-ġoi nuġanai, doniki biaguri na ġedanaġirito, "Ġomi tu karase mani doniki ġoruġaiani?" <sup>34</sup> Ġevaġa-veseto, ġekirato, "Veregauka na eura-viniani."

<sup>35</sup> Benamo Iesu ġenai ġeġori-iaġoato. Ġeri dabuġa barari doniki doġenai ġeiavarito vau, Iesu ġevaġa-tanu-kauato. <sup>36</sup> Iesu eiaġoto-ġoi nai, tarimarima ġeri dabuġa barari dabarai ġeiavarito.

<sup>37</sup> Ieruselema varau ekavinaġiato, Olive Ġorona na evariġoto-ġoi, benamo Iesu ġena mero ġutuma lelevaġi ġeikuto, Barau ġevonevone-raġe viniato, korana nuġa-farevaġi veġari ġeġitarito nai. <sup>38</sup> Ġekirato,

"Ġera Vere baregona,  
Veregauka aranai eiaġomani Kinina,  
sivaġa-namoa!

Maino gubai bene barego ema vevaġa-raġe tu guba tuġunai!"

<sup>39</sup> Benamo Farisea tarimari kota na tarimarima ġutuma nuġari na Iesu ġekirato, ekirato, "Vevaġa-riba taumu, ġoi ġemu mero nokira-ġoiri!" <sup>40</sup> Iesu na evaġa-veserito, ekirato, "Au na akiramini, bema ġia asi beġe koġoni nai, mai fore beġe koġoni."

### Iesu Ieruselema taġina eveito

<sup>41</sup> Iesu vanuġa barana Ieruselema ġana eraka-kavinaġito, eġitaiato, benamo taġina eveito, <sup>42</sup> ekirato, "Toma ġaro ai ġemu maino korana boro ribaia bere namo! Senaġi toma, ġoi na asi oġitaiiani. <sup>43</sup> Ġarona beraġasini nai, ġebaru-vinimuni tarimari na tano beġe ragaiani, beġe kobe-ġeġeraġimuni, asi ġemu rakarosi dabarana. <sup>44</sup> Benamo ġoi ema nuġamu ai ġetanuni tarimari beġe fuki-bubu-riġomini tano ai; fore maki ta iatanai asi beġe iaġuiani, korana Barau ġena vevaġa-kava emariġoto asi oribaiani nai."

### Iesu na Rubu Veāga eiarevaiato

*Mataio 21:12-17; Mareko 11:15-19; Ioane 2:13-22*

<sup>45</sup> Iesu Rubu Veāga nuānani eraka-toāto, voivoi tarimari elai-rosirito, <sup>46</sup> ekirarito, ekirato, “Buka Veāga nuānani tu maiāgesi ekirani, ‘Gegu numa tu ġuriġuri numana beġe kiraġiani,’ senaġi ġomi na tu lema tarimari ġeri gumu gabunai boġo vaā-iaġoa.”

<sup>47</sup> Iesu tu ġaro mabarari ai Rubu Veāga nuānani evevaā-ribato-ġoi. Rubu Veāga vereri baregori, e taravatu ġevevaā-riba iaġiato-ġoi tarimari, ema Iuda vereri na ġia beġene vaāia dabarana ġevetauato-ġoi. <sup>48</sup> Senaġi asi ġeri dabara, korana tu tarimarima mabarari ġeurato-ġoi, Iesu ġena guruā ta maki asi beġene vei-ketoa.

### Ieruselema vereri na Iesu ġena seġuka korana ġevedanaġi-iaġiato

**20** Ġaro tai Iesu tu Rubu Veāga nuānani evevaā-ribato-ġoi, Vari Namona tarimarima eġobata-vinirito-ġoi. Benamo Rubu Veāga vereri baregori, e taravatu ġevevaā-riba iaġiato-ġoi tarimari, ema Iuda vereri Iesu ġenai ġeiaġoto, <sup>2</sup> ġedanaġiato, ġekirato, “Kamara seġukai ġoi na mai dagara oveirini? Dei na mai seġuka evinimuto?”

<sup>3</sup> Iesu na evaā-veserito, ekirato, “Au na maki vedanaġi ta avinimini. Ġokiravaragu, <sup>4</sup> Ioane ġena babatiso veiāana tu Barau ġenana eiaġomato, ba tarimarima ġerina?”

<sup>5</sup> Ġia fakari ai ġeverorito, ġekirato, “Bema ġita bita kirani, ‘Barau ġenana,’ bita toni nai, ġia bekirani, ‘Karase nai Ioane asi ġovaā-moġoniato?’ betoni. <sup>6</sup> Senaġi bema ġita bita kirani, ‘Tarimarima ġerina,’ bita toni nai, tarimarima mabarari na fore na beġe taki-maserani, korana ġia ġekirani, Ioane tu peroveta tarimana, ġetoni.” <sup>7</sup> Iesu ġevaā-veseato, ġekirato, “Ġai asi ribama,” ġetato.

<sup>8</sup> Benamo Iesu na ġia maki ekirarito, ekirato, “Au na maki kamara seġukai mai dagara aveirini asi bakira-varamini.”

### Barabore - Tavoā ġitaāuna tarimari rakavari

*Mataio 21:33-46; Mareko 12:1-12*

<sup>9</sup> Benamo Iesu na tarimarima mai barabore ekira-vararito, ekirato, “Tarima ta vine tavoāana evaroato vau, tavoā ġitaāuna tarimari ġeri ai eraga-kwaneato. Benamo erakato gabu ta āana. Monai ġaro ġutuma ea tanuto. <sup>10</sup> Vine ġwari (o grapes) ġemaġeto, benamo ġia na ġena vetuānaġi tauna ta etuāuato tavoā narinarina tarimari ġeri ai, vine ġwari kota benea ġabi āana. Senaġi tavoā ġitaāuna tarimari na ġekwariato vau, ġimana kori ġetuā-ġenoāio. <sup>11</sup> Benamo vetuānaġi tauna ta ma etuāuato, senaġi ġia maki ġevaā-vevaāio, ġevei-maiaka maiakaiato, ġimana kori ġetuā-ġenoāio. <sup>12</sup> Vetuānaġi tauna vaā-toitoina maki etuāuato, senaġi ġevaā-vevaāi rakavaiato, kefina maki ma fauri vau ġelai-rosiato. <sup>13</sup> Benamo tavoā biaguna ekirato, ‘Au tu kara ma baveini? Au natugu, auravini-baregoani merona, na-tuāua, atuāmaāini ġia beġe gubakauani!’ <sup>14</sup> Senaġi tavoā narinarina tarimari na ġeġitaiato nai, tauġeri ġevoguruā-vevinito, ġekirato, ‘Mani tu tavoā biaguna natuna, be sivaāia, benamo tavoā tu ġita āera.’ <sup>15</sup> Benamo tavoā murikanai ġeinurosiato, ġevaāi-maseato.

Iesu evedanaġito, ekirato, “Tavoġa biaguna tu kara beveiiani ġia ġeri ai? <sup>16</sup> Ġia beiaġomani, tavoġa ġitaġauna tarimari bevaġi-ġosirini, benamo tavoġa tu tarima irauri ma bevinirini.” Tarimarima na mai guruġa ġeseġaġiato nai, ġekirato, “Asiġi, maiġesi asi bene vetore!”

<sup>17</sup> Iesu na eġitarito, benamo edanaġirito, ekirato, “Be, mai guruġa Buka Veaġa nuġanai anina tu kara? Maiġesi ekirato, ‘Fore numari ġeragarini tarimari na asi ġeura-viniato ma ġefitoġaiato forena tu duġu forenai eiaġoto.’

<sup>18</sup> Deikara mo fore iatanai beketokauni tarimana beġwa-kirakiraiani; ema mai fore tarima ta iatanai beketokauni nai, belau-fatafataiani.”

### **Kaisara, Roma ġeri vere, ġena takesi moniri**

*Mataio 22:15-22; Mareko 12:13-17*

<sup>19</sup> Taravatu ġevevaġa-riba iaġiato-ġoi tarimari e Rubu Veaġa vereri baregori na Iesu inimoġo beġene ġabia dabarana ġevetauato-ġoi, korana ġia ribari, Iesu na mai barabore tu ġia iatari ai ekiraġirito-ġoi nai. Senaġi tarimarima ġutuma vegogo-taġo naima ġegarito. <sup>20</sup> Moġa lorinai ġeġita-taġoato moġo. Gabivau ġofaġofa tarimari ġe-tuġurito, ġia na beġene danaġia noġa vei-iobukaiobuka tarimari kavana; beġene danaġia, bema Iesu ġena guruġa beiaġo-irauni nai, Iesu beġene ġabia, Roma gavanana ġimana seġukanai beġene torea. <sup>21</sup> Mo ġofaġofa tarimari na Iesu ġedanaġiato, ġekirato, “Vevaġa-riba taumu o, ġai ribama, ġemu guruġa e ġemu vevaġa-riba tu maoromaoro. Tarimarima ġeri dagi asi otuġamaġirini, senaġi ġoi na Barau ġena dabara ovevaġa-riba-iaġi ġitakauani ma moġonimu ġesi. <sup>22</sup> Nokirama, Kaisara, Roma ġeri vere, takesi moniri bitana vinia tu namo ba asiġi?” <sup>23</sup> Iesu na ġeri ġofaġofa varau eġitaiato, benamo ekirarito, ekirato, <sup>24</sup> “Silva monina ta ġovaġa-ġitagu! Mai tu dei iouiouna e dei arana?” Ġia ġevaġa-veseto, ġekirato, “Mai tu Kaisara laulauna e arana,” ġetato. <sup>25</sup> Benamo Iesu na ekirarito, “Kaisara ġena, Kaisara boġono vinia, Barau ġena, Barau boġono vinia.”

<sup>26</sup> Iesu ġena guruġa tarimarima ġoirari ai tu maoro nai, asi ġeri dabara ġia beġe ġofa-darereani, senaġi ġena vevaġa-vese na nuġari ġefarevaġito, asi ma ġeguruġato.

### **Variġisi-ġenoġoi guruġari**

*Mataio 22:23-33; Mareko 12:18-27*

<sup>27</sup> Sadukea tarimari kota Iesu ġenai ġeiaġoto. Ġeri tuġamaġi tu, mase tarimari asi ma beġe variġisi-ġenoġoini. Iesu ġedanaġiato, ġekirato, <sup>28</sup> “Vevaġa-riba taumu o, Mose na taravatu ġai ġema maiġesi etoreato, ‘Bema tau ta kakana bemaseni, ma vabuna tu roġo maġuri, senaġi asi naturi nai tu, mo tau na kakana vabuna bene ġaraġoa. Korana tu ġia na naturi tari beġene vaġa-maġuriri mo mase tauna ġena.’ <sup>29</sup> Tarikaka tau moġo korina mabarari tu imaima ruarua (7). Tau guinena na vavine ta eġaraġoato, ma emaseto, natuna ta asi evaġa-ġoraiato. <sup>30</sup> Tau vaġa-ruarua na vabu ma eġaraġoato, <sup>31</sup> tau vaġa-toitoina maki moġesina moġo. Moġa nuġanai ġia mabarari tu imaima ruarua (7), senaġi mabarari ġemaseto, naturi ta asi ġevaġa-ġoraiato. <sup>32</sup> Dokonai mo vavine maki emaseto. <sup>33</sup> Variġisi-ġenoġoi ġaronai

mo vavine tu dei ġaraġona, korana ġia tu tau imaima ruarua (7) na ġeġaraġoato nai?”

<sup>34</sup> Iesu na evaġa-veserito, ekirato, “Mai tanobarai tau e vavine ġeveġaraġoni, <sup>35</sup> senaġi roġo beiaġomani Basileianai, vei-iobukaiobuka tarimari beġe variġisi-ġenoġoini. Ġia tu asi beġe veġaraġoni. <sup>36</sup> Ġia asi beġe maseni maki, senaġi aneru kavana beġe tanuni. Barau natunai beġe iaġoni, korana ġia tu variġisi-ġenoġoi tarimari. <sup>37</sup> Mose na evaġa-moġoniato, mase na ma beġe variġisi-ġenoġoini. Ġau eġaraiato-ġoi varina nuġanai, Mose na Vereġauka tu ‘Aberahamo ġena Barau, Isako ġena Barau, Iakobo ġena Barau’ ekiraġiato. <sup>38</sup> Moġoni, ġia tu maġuri tarimari ġeri Barau, dia mase tarimari ġeri Barau. Korana Barau ġenai tu, tarimarima mabarari tu maġuri.”

<sup>39</sup> Taravatu ġevevaġa-riba iaġiato-ġoi tarimari kota ġekirato, “Vevaġa-riba taumu o, vevaġa-vese namona tu maniġa.” <sup>40</sup> Benamo moġa murina na asi ma ġedanaġi-ġenoġoiato, ġegarito nai.

### **Keriso tu Davida natuna ba Davida ġena Vereġauka?**

*Mataio 22:41-46; Mareko 12:35-37*

<sup>41</sup> Iesu na ekirarito, ekirato, “Ġia tu kamasi nai Keriso tu Davida natuna ġetoni?

<sup>42</sup> Davida tu Salamo nuġanai ekirato,

‘Barau na ġegu Vereġauka ekiraiato:

Au ġimagu aroribana rekenai bono tanu,

<sup>43</sup> bene iaġo mo, ġoi ġebaru-vinimuni tarimari ġoi kwakumu gaburenai batorerini.’

<sup>44</sup> Davida na Keriso tu ‘Vereġauka’ etato. Kamasi nai Keriso tu Davida natuna?”

### **Taravatu ġevevaġa-riba iaġiato-ġoi tarimari ġeri ġofaġofa**

*Mataio 23:1-36; Mareko 12:38-40; Luka 11:37-54*

<sup>45</sup> Tarimarima mabarari ġoirari ai Iesu na ġena mero ekirarito, ekirato, <sup>46</sup> “Tara-vatu ġevevaġa-riba iaġiani tarimari ġerina lorimi boġono vetore. Ġia ġeurani dabuġa maukari beġene riġo, maketi gaburi ai beġene rakaorakao, tarimarima na beġene vaġa-namori urari ai. Rubu nuġari ai ema ġani-vegogo gaburi ai ġeri ura tanutunu namori ai beġene tanu. <sup>47</sup> Ġia na vabu ġeri numa ma farefare ġevaġa-koririni. Ġeri ġauġau tu mauka kenene, senaġi ġeġofaġofani. Moġesi ġeveini tarimari meto barego vedaurea beġe ġabini.”

### **Vabu ġena boubou monina**

**21** Iesu eboġe-vaisito nai, moni vovoka tarimari ġeri boubou moni mauġai ġeġurato-ġoi eġitarito. <sup>2</sup> Asi-ġena ema asi-ġana vabuna ta eiāġomato, eġita-iato, ġena moni misiri ruarua moġo eġura-riġorito, (mai tu noġa moġo toea sebona kavana). <sup>3</sup> Benamo Iesu ekirato, “Moġoni, au na akiramini, mai vabu na beġuraia monina tu mabarari ġeri vini bevanaġiri. <sup>4</sup> Korana mabarari ġeri moni vovoka ġerina koturi moġo beġe vini, senaġi mai vabu tu ġena moni misina ġenana moġo, ġena maġuri ai bere vevaġa-kava-iaġiri dagarari mabarari beġurari.”

## Iesu na vau beġea ġorani dagarari ekiraġirito

*Mataio 24:1-14; Mareko 13:1-13*

<sup>5</sup> Iesu ġena mero kota na Rubu Veaġa ġeguruġa-iaġiato, ġitaġitana ma marevana, ma ġena fore namori ġesi ema Barau ġevarevare-viniato varevare dagarari namori na ġevaġa-veraiato, ġetato. Senaġi Iesu ekirato, <sup>6</sup> “Ġarona beraġasini, mainai ġoġitarini dagarari mabarari tarima tari na beġe vare bubu-riġorini, fore ta fore ta iatanai asi beġe tanuni.”

<sup>7</sup> Benamo Iesu ġedanaġiato, ġekirato, “Vevaġa-riba taumu, aitoma beġorani? Ema beġorani nai, kamara vetoġa na bevaġa-moġoniani?” <sup>8</sup> Iesu evaġa-veseto, ekirato, “Ġomi lorimi boġono vetore, beġe ġofamini ġesi. Korana tu tarimarima ġutuma au aragu ai beġe iaġomani, beġe kirani, ‘Tarimana tu au maiġegu!’ ema, ‘Ġarona beraġasi!’ beġe toni. Senaġi ġia muriri ai asi boġono raka. <sup>9</sup> Bema ġomi na vetari o tuari gururi e gururaġe boġo seġaġirini nai, nuġami asi beġene raġe. Mai dagara beġe ġora-guineni, senaġi dokona asi roġo beraġasini.”

<sup>10</sup> Iesu ma ekirato, “Tanobara ta tanobara ta ġesi beġe vevaġini, gavamani ta gavamani ta ġesi beġe vetarini. <sup>11</sup> Gabu ġutuma nuġari ai tano beġe iaġaiagani, doġe beġe ġorani, ema tarimarima ġutuma keve beġe doġarini ta ġenana bevanaġini ta ġenai. Vevaġa-gari vetoġari baregori guba na beġe foforini.

<sup>12</sup> Senaġi mo dagara roġosi beġene ġora nai, ġia na ġomi beġe ġabimini, beġe vaġa-midigumini. Rubu ai beġe vaġa-kotamini, dibura numari ai beġe tore-toġamini. Kini e gavana ġoirari ai beġe ġori-iaġomini, korana au ġoġabi-raġeguni nai. <sup>13</sup> Mai tu ġomi ġemi nega namona au vaġa-moġonigu ai boġo iaġoni. <sup>14</sup> Boġono vetuġa-maġi, ġemi vevaġa-vese guruġari asi boġono tuġamaġi-guine guineri, <sup>15</sup> korana tu au na guruġa e iaunega bavinimini, beġe baru-vinimini tarimari na beġe kira-ġoimini, senaġi asi beġe kokoreni.

<sup>16</sup> Tamami, sinami, kakami, tarimi, garagarami, e ġatami na tarimarima ġimari ai beġe revamini. Ġomi kota maki beġe vaġi-masemini. <sup>17</sup> Tarimarima mabarari na beġe iau-rakavamini, korana au ġoġabi-raġeguni nai. <sup>18</sup> Senaġi debami ġuiri sebona maki asi berekwa-rekwani. <sup>19</sup> Boġo vevaġa-gwaġiġini nai tu, boġo maġurini.”

## Ierusalem beġe vaġa-rakavaiani

*Mataio 24:15-21; Mareko 13:14-19*

<sup>20</sup> “Vetari o tuari doġorori na Ierusalem beġe tanu-ġeġeraġiani boġo ġitaiani, benamo boġo ribani, Ierusalem dori ġevaġa-rakavaiani. <sup>21</sup> Mo negai Iudeai ġetanuni tarimari tu ġoro ġana beġene raga-iaġo. Vanuġa barana Ierusalem nuġanai ġetanuni tarimari tu, vanuġa beġene raga-kwanea, ema gunikai ġetanuni tarimari tu vanuġa barana nuġanai asi beġene raka-toġa. <sup>22</sup> Korana mo negai tu Barau na tarimarima ġeri rakava voiri bevinirini Buka Veaġai ġetore-guineato vaġa-moġoniri. <sup>23</sup> Vavine ma baniri e ġabi-variġu vavineri kika ma vetuġari! Midigu barego mai tano ai beġe raġasini, ema Barau na ġena bese tarimari bevaġa-maoro vinirini. <sup>24</sup> Tarima kota tu vetari baġari na beġe vaġi-maserini, kota tu beġe ġabi-maġuririni, tanobara mabarari ġana beġe ġori-iaġorini, beġea diburarini; ema irau bese tarimari na Ierusalem beġe fana-tariani, beiaġoni mo, ġeri ġaro bea korini.”



### Tarimarima Natuna ġena iaġoma

*Mataio 24:29-31; Mareko 13:24-27*

<sup>25</sup> “Ġaro, ġue, ema visiġu nuġari ai vetoġa beġe ġorani. Tanobara beseri davara ema ureure gururi ai beġe gari-rakavani. <sup>26</sup> Tarimarima beġe keto-founi gari dainai, ġeri tuġamaġi maki roġo beġe korini mo beġe ġorani dagarari dairi ai; korana tu guba seġukari beġe iaġaiagani. <sup>27</sup> Mo negai Tarimarima Natuna beġe ġitaiani, magube nuġana na beiaġomani ma seġukana e ma mamana baregona ġesi. <sup>28</sup> Mo dagara beġe ġorani nai, boġono variġisi, boġono boġe-vaishi, korana vaġa-maġurimi tu varau bekavinaġi.”

### Barabore - Vevaġa-riba fiġi ġauna ġenana

*Mataio 24:32-35; Mareko 13:28-31*

<sup>29</sup> Iesu na ġeri barabore ta ekiraġiato, ekirato, “Fiġi ġauna ema ġau mabarari ġoġi-tari. <sup>30</sup> Lauri variġuri ġefafani ġoġitarini, ġomi ġoribani, ġaro ġena tora taimina varau bekavinaġi. <sup>31</sup> Moġa ilailanai, ġomi maki bema boġo ġitarini, mai dagara beġe ġorani nai, boġo ribani, Barau ġena Basileia tu bekavinaġi.

<sup>32</sup> Moġoni akiramini, mai ġuru asi bekorini, beiaġoni mo, mai dagara mabarari beġe ġorani. <sup>33</sup> Guba e tanobara beġe rekwa-rekwani, senaġi au ġegu guruġa tu asi beġe rekwarekwani, beġe tanu-vanaġi vanaġini.”

### Boġono venari

<sup>34</sup> “Lorimi boġono vetore, ġaniġani e niuniu ġutuma, ema tanobara ġena tuġamaġi dagarari na ġomi nuġami beġe vaġa-metorini ġesi. Benamo mo ġaro na nuġami bevaġa-farevaġirini. <sup>35</sup> Korana mo ġaro tu tanobarai ġetanuni tarimari mabarari ġeri ai beraġasini. <sup>36</sup> Moġa lorinai boġono venari, boġono ġauġau ġaro mabarari ai, beġe ġorani dagarari mabarari ġerina boġono raga-maġuri ġana, korana Tarimarima Natuna ġoiranai roġo boġo ruġani.”

<sup>37</sup> Ġaro mabarari ai Iesu tu Rubu Veaġai evevaġa-ribato-ġoi, a lavilavi ai tu erakarisito-ġoi, Olive Ġorona tuġunai ea genato-ġoi. <sup>38</sup> Boġiboġi iamoiamonai tarimarima mabarari Rubu Veaġai ġevegogoto-ġoi ġia ġena guruġa beġene seġaġia ġana.

### Iesu beġene vaġia dabarana ġevetauato

**22** Asi etubuni faraona verekona arana Pasova varau ekavi-naġito. (Mo tu Iuda tarimari mase aneruna na evanaġirito moġo, asi evaġirito verekona). <sup>2</sup> Rubu Veaġa vereri baregori ema taravatu ġevevaġa-riba iaġiato-ġoi tarimari na Iesu beġene ġabia, benamo beġene vaġi-ġairia dabarana ġevetauato, korana tarimarima gariri ġeveito.

### Iudas na Iesu erevaiato

*Mataio 26:14-16; Mareko 14:10-11*

<sup>3</sup> Mo negai Satani na Iudas Isakariota, tarima ta gabanana ruarua (12) fakari ai, eboroġiato. <sup>4</sup> Benamo Iudas eiaġoto Rubu Veaġa vereri baregori ema Rubu Veaġa narinarina tarimari ġeri vere ġeri ai, Iesu tu ġia ġimari ai kamasi bene tore-kaua dabarana ġeboioġa-vegogoato. <sup>5</sup> Ġia ġeiaku-rakavato, ġekira-toreato, moni beġe

viniani, ġetato. <sup>6</sup>Iudas na eġabi-raġeato, benamo Iesu ġia ġimari ai vekuretoġai betore-kauani dabarana evetauato-ġoi.

### **Ginitaġo mamoena ġerovina-toreato**

*Mataio 26:17-25; Mareko 14:12-21*

<sup>7</sup>Ginitaġo mamoeri beġe vaġirini ġarona varau eraġasito. <sup>8</sup>Benamo Iesu na Petero ma Ioane etuġurito, ekirato, “Goiġo, Pasova verekona boġono dabaraia, bitana ġania.” <sup>9</sup>Ġevaġa-veseto, ġekirato, “Gai tu ainai baġana dabara-torea?” <sup>10</sup>Benamo Iesu na ekirarito, ekirato, “Vanuġa baregonai boġo raka-toġani nai, tarima ta nanu wġaġutuna befaġaiani boġo ġoitagoani. Murina na boġono iaġo, ġia beraġekauni numanai boġono raġekau. <sup>11</sup>Benamo numa tarimana boġono vaġa-guruġaia, boġono kira, “Vevaġa-riba tauna ekirani, ‘Varivari daiġutuna tu aiġa, au ema ġegu mero ġesi monai ginitaġo mamoena baġana ġania?’ <sup>12</sup>Benamo ġia na daiġutu baregona ta numa tuġunai bevaġa-ġitamini, ġeiareva-toreato. Monai boġono dabara-torea.” <sup>13</sup>Benamo ġeiaġoto, Iesu na ekiraġirito kavana ġedoġaririto. Monai vereko ġedabaraiato.

### **Ġani-vegogo veaġana**

*Mataio 16:26-30; Mareko 14:22-26; 1 Korinto 11:23-25*

<sup>14</sup>Ginitaġo mamoena beġe ġaniani aoana eraġasito. Iesu tu ġena apostolo tarimari ġesi ġaniġani gabunai ġetanu-tarito. <sup>15</sup>Benamo Iesu na evaġa-guruġarito, ekirato, “Au ġegu ura baregona mai ginitaġo mamoena ġomi ġesi bitana ġani-vegogo-guinea vau, midigu bana ġani. <sup>16</sup>Korana tu akiramini, ginitaġo mamoena asi ma baġaniani, beiaġoni mo, ginitaġo anina korikorina bea foforini Barau ġena Basileia nuġanai.”

<sup>17</sup>Benamo Iesu na kapusi ta eġabiato, evaġa-namoato, ekirato, “Maiġa tu ġoġabia, mabarami boġono niua. <sup>18</sup>Korana tu akiramini, vine nanuna asi ma banu-ġenoġoiani, beiaġoni mo, Barau ġena Basileia beiaġomani vau.”

<sup>19</sup>Benamo Iesu na beredi eġabiato, evaġa-namoato, ebuki-ġutuato, evinirito, ekirato, “Mai tu au tauġanigu, ġomi avinimini; maiġa boġono veia, au vetuġamaġia-iaġigu ġana.”

<sup>20</sup>Ġeġani-ġosito vau, kapusi ma eġabiato, ekirato, “Mai kapusi tu Ginitaġo Var-ġuna, au raragu na bevaġa-moġoniani, bebebubuni ġomi vaġa-maġurimi ġana. <sup>21</sup>Senaġi au berevaguni tarimana tu mainai au ġesi taġani-vegogoni! <sup>22</sup>Moġoni, Tarimarima Natuna bemaseni, Barau na ekiraġi-guineato ilailanai, senaġi berevaiani tarimana vetuġana kekei!” <sup>23</sup>Benamo tauġeri ġevedanaġi-vedanaġito, ġia deikara na moġesi beveiani.

### **Deikara tu barego vedaurea**

*Mataio 20:25-28; Mareko 10:42-45*

<sup>24</sup>Benamo Iesu ġena mero tauġeri ġeveġare-veġareto, deikara ġia fakari ai barego lelevaġi. <sup>25</sup>Iesu na evaġa-guruġarito, ekirato, “Irau bese tarimari ġeri vere na tarimarima ġedori-naġinaġirini, ema veġuine-iaġi tarimari baregori na ġeri maoro seġukari na ġelaunaġi-naġirini, ema tarimarima na beġene vevato-iaġiri ġetoni. <sup>26</sup>Senaġi ġomi tu dia moġesina. Ġomi fakami ai tau guinena tu tau muriseinai bene iaġo, ema vere tauna tu vetuġunaġi taunai bene iaġo. <sup>27</sup>Dei tu barego, ġaniġani

gabunai etanu-taḡoni tarimana ba vetuḡunaḡi tarimana? Ḡaniḡani gabunai etanu-taḡoni tarimana, ene? Senaḡi au tu ḡomi fakami ai vetuḡunaḡi tarimana noḡa.

<sup>28</sup> Ḡomi tu au ḡeribaḡaniguto-ḡoi nai, ḡotanu-gwaḡiḡito-ḡoi tarimami. <sup>29</sup> Moḡa lorinai au Tamagu na maoro eviniguto, Basileia ta au ḡegu ekiraḡiato ilailanai, au maki Basileia ta ḡomi ḡemi akiraḡiani. <sup>30</sup> Benamo ḡomi maki au ḡegu Basileiai bita ḡaniḡani-vegogoni e bita niuniu-vegogoni, ema ḡomi teronai o vere seari ai boḡo tanuni, Isaraela beseri gabanana ruarua (12) boḡo vaḡa-maoro vinirini.”

### Iesu na Petero ḡena vekira-ḡuniḡau ekiraḡi-toreato

*Mataio 26:31-35; Mareko 14:27-31; Ioane 13:36-38*

<sup>31</sup> “Simona, Simona o, noseḡaḡi! Au na akiramini, Barau na Satani maoro eviniato, ḡomi bene ribaḡanimi, namo e rakava bene tore-kirari ḡana, noḡa iaraḡa tarimana na widi ema momo etore-kirarini kavana. <sup>32</sup> Senaḡi au na ḡemu varau aḡuriḡurito, ḡemu veḡabidadama asi bene keto ḡana. Benamo ma bovetuḡamaḡi-ḡenoḡoini au ḡegu ai nai, tarikakamu bono vaḡa-kokoreri.”

<sup>33</sup> Petero evaḡa-veseto, ekirato, “Vereḡauka, au tu ḡoi ḡesi dibura numai beḡe totererani ema bita mase-vegogoni!” <sup>34</sup> Iesu ekirato, “Petero, au na akiramuni, toma kokoroku asi begoḡini, beiaḡoni mo, ḡoi na au vaḡa-toitoto bokira-ḡuniḡauguni, bokirani, ‘Au tu asi ribagu ḡia,’ botoni.”

### Nega rakavana

<sup>35</sup> Iesu na ḡena mero evaḡa-guruḡarito, ekirato, “Au na ḡomi atuḡumito nai, asi ḡemi fusefuse, dura, o tamaka. Ḡomi dagara tai ḡorabuto ba? Ḡia ḡevaḡa-veseto, ḡekirato, “Asiḡina!”

<sup>36</sup> Iesu na ma evaḡa-guruḡarito, ekirato, “Senaḡi toma ḡomi deikara ma ḡena fusefuse ema dura, bene ḡabiri; ema deikara asi ḡena vetari baḡana, ḡena koudi bene voivoi-iaḡia, benamo ta ma bene voia. <sup>37</sup> Korana au na akiramini, Buka Veaḡa nuḡanai ekirani, ‘Seḡafore tarimari ḡesi beḡe iavi-vegogoani.’ Mo guruḡa au ḡegu ai bemoḡonini.” <sup>38</sup> Iesu ḡena mero ḡevaḡa-veseto, ḡekirato, “Noḡitaia, Vereḡauka, vetari baḡari ruarua maḡeri.” Iesu evaḡa-veseto, ekirato, “Benamo!”

### Iesu eḡuriḡurito Getesemane ai

*Mataio 26:36-46; Mareko 14:32-42*

<sup>39</sup> Benamo Iesu tu vanuḡa barana eraga-kwaneato, Olive Ḡorona ḡana eiaḡoto eveito-ḡoi kavana. Ḡena mero ḡia murinai ḡerakato. <sup>40</sup> Monai ḡeraḡasito, benamo Iesu na evaḡa-guruḡarito, ekirato, “Boḡono ḡauḡau, be veribaḡani ai asi boḡono moira.” <sup>41</sup> Benamo ḡereḡana eraka-ḡerevaḡito, fore tafiurini ḡea keto-tarini ḡena manaḡa ilailanai, benamo evetui-tarito, eḡuriḡurito. <sup>42</sup> Ekirato, “Tamagu o, bema nuḡamu ilaila nai, mai midigu bedina au ḡeguna noma ḡabi-vaḡia; senaḡi dia au ḡegu ura, ḡoi ḡemu ura moḡo.”

[<sup>43</sup> Benamo aneru ta guba na emariḡoto, Iesu kokore eviniato. <sup>44</sup> Midigu barana na ḡia nuḡana evaḡa-vonuato, benamo eḡauḡauto ma nuḡana mabarana ḡesi, eiaḡoto mo, seḡurina tano ai eriḡoto rara kabudona noḡa.] <sup>45</sup> Eḡauḡau-ḡosito vau, evar-iḡisito, ḡena mero ḡeri ai eḡenoḡoi-iaḡoto, genari ai eḡoitaḡorito, dabarari ḡedokoto nai. <sup>46</sup> Benamo ḡia na evaḡa-guruḡarito, ekirato, “Karase nai ḡomi ḡogenani? Ḡovar-iḡisi, ḡoḡuriḡuri, be veribaḡani ai asi boḡono moira.”

### Iesu tuari tarimari na ġeġabi-tariato

*Mataio 26:47-56; Mareko 14:43-50; Ioane 18:3-11*

<sup>47</sup> Iesu roġo mo eguruġato-ġoi nuġanai, tarimarima ġutuma ġeraġasito, Iudas, mero ta gabanana ruarua (12) fakari ai, ġia na eġori-kaurito. Iesu eiaġo-viniato bene veraua ġana. <sup>48</sup> Senaġi Iesu na ekiraiato, ekirato, “Iudas o, Tarimarima Natuna verau na borevaiani ba?”

<sup>49</sup> Iesu sevinai ġeruġa-taġoto merori na ġeġitaiato kara beġorani, benamo ġedanaġiato, ġekirato, “Vetari baġana na baġana basiri ba?” <sup>50</sup> Benamo ġia ta na Rubu Veaġa verena baregona ġena vetuġunaġi tarimana vetari baġana na eiaġo-viniato, benamo seġana aroribana ebasi-vaġiato. <sup>51</sup> Senaġi Iesu ekirato, “Benamo, ġovaġa-dokoa!” Mo tarima seġana eġabi-karaiato, evaġa-namoato.

<sup>52</sup> Benamo Iesu ġabiġabina ġeiaġomato tarimari, Rubu Veaġa vereri baregori e Rubu Veaġa ġitaġauna tarimari ġeri baregona ema Iuda vereri ġia na evaġa-guruġarito, ekirato, “Ġomi boġo iaġoma ma ġemi vetari baġari e ma ġemi fato ġesi, noġa moġo seġafore tarimana ta ġabiġabina ġoro iaġoma kavana? <sup>53</sup> Ġaro mabarari ai au tu ġomi sevim i ai Rubu Veaġa nuġanai, senaġi asi ġoġabi-tariguto. Mai tu ġomi ġemi nega, mukuna (o Satani) ġena seġuka negana.”

### Petero na Iesu ekira-ġuniġauato

*Mataio 26:57-58; 26:69-75; Mareko 14:53-54; 14:66-72; Ioane 18:12-18; 18:25-27*

<sup>54</sup> Benamo ġia na Iesu ġeġabi-tariato, Rubu Veaġa verena baregona ġena numa ġana ġeġori-iaġoato. Petero maki ġia murinai erakato, senaġi ma fakana. <sup>55</sup> Numa maġuna nuġanai tarima kota na karava ġevaġa-ġaraiato, benamo ġetanu-ġeġeraġiato. Petero maki ġia seviri ai etanu-tarito. <sup>56</sup> Benamo vetuġunaġi ġuitona ta na karava mamanai eġitaiato, eġita-karakaraiato, ekirarito, ekirato, “Mai tarima maki Iesu ekavaiato-ġoi!” <sup>57</sup> Senaġi ġia evekira-ġuniġauto, ekirato, “Ġoi vavine, au tu asi ribagu ġia!”

<sup>58</sup> Nega kotuna evanaġito nuġanai, tarima ta na Petero eġitaiato, ekiraiato, “Ġoi maki ġia karori ta!” Senaġi Petero evaġa-veseto, ekirato, “Ġoi tau, au tu asiġi!” <sup>59</sup> Aoa ta evanaġito vau, tarima ta ma eguruġato ma nuġana mabarana ġesi, ekirato, “Moġoni, ġia maki Iesu ġesi tarimana ta, korana ġia maki Galilea tauna!” <sup>60</sup> Senaġi Petero evaġa-veseto, ekirato, “Ġoi tau, au asi ribagu ġoi kara okiraġiani!” Ġia roġo mo eguruġato-ġoi nuġanai, kokoroku egoġito.

<sup>61</sup> Benamo Vereġauka eruġa-kureto, ġia na Petero eġitaiato nai, Vereġauka ġena guruġa etuġamaġi-doġariato, ekiraiato, “Toma kokoroku asi begoġini, beiaġoni mo, ġoi na au vaġa-toitoi bokira-ġuniġauguni.” <sup>62</sup> Benamo Petero eraka-rosito, etaġi-rakava rakavato.

### Iesu ġevaseva-vaseva iaġiato

*Mataio 26:67-68; Mareko 14:65*

<sup>63</sup> Iesu ġenariġauato tarimari na ġevaseva vaseva-iaġiato e ġekwariato. <sup>64</sup> Matana ġekumu-ġauato, ġekiraiato, ġekirato, “Ġoi tu peroveta tarimana, be nokiraġia, dei na bekwarimu?” <sup>65</sup> Guruġa rakavari ġutuma ġia ġeviniato.

### Iesu kanisoro tarimari ġoirari ai

*Mataio 26:59-66; Mareko 14:55-64; Ioane 18:19-24*

<sup>66</sup> Elaġanito, Iuda vereri, e Rubu Veaġa vereri baregori, ema taravatu ġevevaġa-riba iaġiato-ġoi tarimari ġeraka-vegogoto. Iesu ġeġori-iaġoato Iuda kanisoro tarimari ġoirari ai. <sup>67</sup> Benamo ġekiraiato, ġekirato, “Nokira-varama, ġoi tu Keriso, (Barau na ekiraġi-toreato vevaġa-maġuri tauna), ba?” Iesu na evaġa-veserito, ekirato, “Bema au na bakiramini, ġomi na asi boġo vaġa-moġoniguni, <sup>68</sup> ema bema vedanaġi ta bavinimini, asi boġo vaġa-veseguni. <sup>69</sup> Senaġi toma beiaġoni mo ġoira laġaniri ai, Tarimarima Natuna tu Seġuka Barauna ġimana aroribanai betanu-taġoni.”

<sup>70</sup> Benamo mabarari ġekirato, “Be, ġoi tu Barau Natuna otoni?” Ġia evaġa-veseto, ekirato, “Ġomi na ġokiraġiani maniġa.” <sup>71</sup> Ġia ġekirato, “Karase vevaġa-moġoni tarimari tari roġo tavetaurini? Ġia tauġena muruna na bekiraġia bita seġaġia.”

### Iesu Pilato ġoiranai

*Mareko 15:1-5; Ioane 18:28-38*

**23** Benamo vegogo tarimari mabarari ġevarigisito, Iesu ġeġori-iaġoato gavana Pilato ġenai. <sup>2</sup> Monai ġeġofaġofa-iaġiato, ġekirato, “Mai tarima maiġa baġa doġaria, ġai ġema bese tarimari eġorikau-kerererini, ekirani, Kaisara, Roma ġeri vere, ġena takesi moniri asi beġene vinia etoni, ema tauġena evekiraġini, ġia tu Keriso, Barau na ekiraġi-toreato verena o kinina.”

<sup>3</sup> Benamo Pilato na edanaġiato, ekirato, “Ġoi tu Iuda tarimari ġeri vere ba?” Iesu evaġa-veseto, ekirato, “Oi, okiraġiani maniġa.” <sup>4</sup> Benamo Pilato na Rubu Veaġa vereri baregori e tarimarima ġutuma ekirarito, ekirato, “Kerere ta asi badoġaria mai tarima ġenai.” <sup>5</sup> Senaġi mo tarimarima roġo ġeġiġiraġeto, ġekirato, “Ġia ġena vevaġa-riba guruġari na Iudea tarimari mabarari nuġari evei-veġonurini. Galileai esinaiato mo beiaġoma mai gabu ai.”

### Iesu Heroda ġoiranai

<sup>6</sup> Mo guruġa eseġaġiato nai, Pilato evedanaġito, ekirato, “Mai tarima tu Galilea tarimana ba?” <sup>7</sup> Benamo Pilato eribato, Iesu tu Heroda ġena seġuka gaburenai nai, Iesu Heroda ġenai ġetuġu-iaġoato. Ġia maki Ierusalemaj mo ġaro ai. <sup>8</sup> Heroda eiaku-rakavato Iesu eġitaiato nai, korana Heroda na Iesu varina eseġaġiato, ema kai-veġata evaġa-nogato Iesu bene ġitaia ġana. Ġia eurato Iesu na nuġa-farevaġi veiġari kota bene veiri bene ġitari. <sup>9</sup> Moġa lorinai vedanaġi ġutuma Iesu edanaġiato, senaġi ġia asi evaġa-veseto. <sup>10</sup> Rubu Veaġa vereri baregori ema taravatu ġevevaġa-riba iaġiato-ġoi tarimari monai ġeruġa-taġoto-ġoi, Iesu ġeġofaġofa-iaġi lelevaġiato-ġoi. <sup>11</sup> Heroda ema ġena vetari tarimari o soldia na Iesu ġerikiriki-iaġiato-ġoi, ġevei-veġare veġareato, ema dabuġa namona ta ġevaġa-dabuġa-iaġiato, benamo ma ġetuġu-ġenoġoiato Pilato ġenai. <sup>12</sup> Pilato ema Heroda ġevebaru-vevinito-ġoi, senaġi mo ġaro ai ġeveġata-ġenoġoito.

### Iesu vaġa-ruaruana Pilato ġoiranai

*Mataio 27:15-26; Mareko 15:6-15; Ioane 18:38-19:16*

<sup>13</sup> Pilato na Rubu Veaġa vereri baregori, e Iuda vereri, ema tarimarima mabarari ekea-vegogorito, <sup>14</sup> ekirarito, ekirato, “Ġomi na mai tarima boġo ġori-iaġomaia au

gēgu ai, gōkirani, gīa na tarimarima egorikau-kerererini gōtoni. Toma au na gōmi gōirami ai gēmi guruḡa bavetauri, senaḡi kerere ta asi badoḡaria. <sup>15</sup> Heroda maki kerere ta asi edoḡariato gīa gēnai nai, ma betuḡu-gēnoḡoi iaḡomaia gīta gērai. Gōmi na gōḡitaiani, gīa tu rakava ta asi eveiato bene mase gāna. <sup>16</sup> Moḡa lorinai au na mai akwariani vau baruḡaiani.” [<sup>17</sup> Vanaḡivanaḡi eveini kavana Pilato na Pasova verekona ḡaronai dibura numai etanuni tarimana ta beruḡaiani.]

<sup>18</sup> Senaḡi tarimarima mabarari gēkoḡo-vegogoto, gēkirato, “Bono vaḡia! Barabas noruḡaia, novinima!” <sup>19</sup> Barabas tu dibura numai gēkou-ḡauato, korana vanuḡa barana nuḡanai ḡevevaḡito ema tarima ta ḡevaḡi-maseato nai.

<sup>20</sup> Pilato enuḡa-vekvaraḡito Iesu bene ruḡaia, moḡa lorinai tarimarima ma evaḡa-guruḡa gēnoḡoirito, <sup>21</sup> senaḡi gīa ma gēkoḡo-gēnoḡoi gēnoḡoito-gōi, gēkirato, “Novaḡa-satauroa, novaḡa-satauroa!”

<sup>22</sup> Nega vaḡa-toitoina evaḡa-guruḡarito, ekirato, “Karase nai, kamara rakava mai tarima na eveiato? Au na rakava ta asi aḡoitaḡoani eveiato bene mase gāna. Moḡa lorinai au na mai akwariani vau baruḡaiani.”

<sup>23</sup> Senaḡi gīa gēkoḡoto ma nuḡari mabarari gēsi, gēkirato, novaḡa-satauroa; benamo dokonai gīa ḡeri ura ekwalimuto. <sup>24</sup> Benamo Pilato na gīa ḡeri ura eḡabi-raḡeato. <sup>25</sup> Mo vevaḡi ema vaḡivaḡi dainai dibura numanai etanuto tarimana, eruḡa-fitoḡaiato ḡeri noḡinoḡi ilailanai, a Iesu tu evinirito ḡeri ura veigāna beḡene veia.

### Iesu ḡevaḡa-satauroato

*Mataio 27:32-44; Mareko 15:21-32; Ioane 19:17-27*

<sup>26</sup> Vetari tarimari na Iesu gēḡori-rosiato, benamo gēḡori-iaḡoato-gōi nai, tarima ta gēsi ḡevedoḡarito, Simona, Kurene tarimana, gīa tu gunika na ema raka-rosito vanuḡa barana gāna eiaḡoto-gōi nai, tuari tarimari na gēḡabi-tariato, satauro gīa faḡanai ḡetore-kauato. Gīa na satauro efaḡaiato, benamo Iesu murina na eiaḡoto-gōi.

<sup>27</sup> Tarimarima ḡutuma tu Iesu murinai ḡerakato. Gīa vefakari ai tari tu vavine, gīa tu Iesu taḡina ḡeveito-gōi ema ḡetaḡi-guruḡa guruḡato-gōi. <sup>28</sup> Benamo Iesu eruḡa-kureto, evaḡa-guruḡarito, ekirato, “Ierusalem vavinemi! Au taḡigu asi ḡotaḡi, senaḡi tauḡemi taḡimi ema natumi taḡiri ḡovei. <sup>29</sup> Korana ḡaro rakavari beḡe iaḡomani, tarimarima maiḡesi beḡe kirani, ‘Sinaḡe gabani vavineri ema ratari asi ḡerururini vavineri beḡene iaku!’ <sup>30</sup> Benamo ḡoro baregori beḡe vaḡa-guruḡarini, beḡe kirani, ‘Gai iatamai ḡoketokau!’ ema ḡoro keiri beḡe kirarini, ‘Gai ḡolautarima!’ <sup>31</sup> Bema au, ḡau maḡurigu, na maiḡesi beḡe veiguni nai tu, gōmi, ḡau matuḡumi, kamasi beḡe veimini?”

<sup>32</sup> Seḡafore tarimari ruarua maki Iesu gēsi gēḡori-rosirito gīa gēsi beḡene vaḡa-sataurori gāna. <sup>33</sup> Gabu ta arana “Deba Gavana” ai ḡeraḡasito. Monai seḡafore tarimari gēsi ḡevaḡa-satauroato, ta aroribana rekenai, ma ta kaurina rekenai. <sup>34</sup> Iesu ekirato, “Tamagu o, ḡeri rakava bono tuḡamaḡi-fitoḡari, korana kara ḡeveiani gīa asi ribari.” Benamo laki ḡerena ta ḡeveiato vau, ḡena dabuḡa ḡevarerito.

<sup>35</sup> Tarimarima ḡeruḡa-tarito, ḡe-marereto-gōi, ema Iuda tarima baregori na ḡerikiriki-iaḡiato-gōi, gēkirato, “Gīa na tarima tari evaḡa-maḡuririto, a gīa tauḡena tu asi bevevaḡa-maḡurini bema gīa Keriso, Barau na eḡabi-viriḡiato vevaḡa-maḡuri tauna.” <sup>36</sup> Vetari tarimari na maki ḡevaseva-vaseva-iaḡiato, gīa gēnai ḡeiaḡoto, vine nanuna mamakina ḡeduḡi-viniato, <sup>37</sup> benamo gēkirato, “Bema ḡoi Iuda tarimari ḡeri

vere otoni, ġoi tauġemu novevaġa-maġuri.”<sup>38</sup> Toretore ta maki ġia iatanai ġetoreato, ekirato: “MAI TU IUDA TARIMARI ĠERI VERE.”

<sup>39</sup> Seġafore tarimana ta, ġia ġesi ġevaġa-satauro vegogoato tarimana, na evaneato, ekirato, “Ġoi tu dia Keriso, (Barau na ekiraġi-toreato vevaġa-maġuri tauna)? Ġoi tauġemu novevaġa-maġuri, ġai maki novaġa-maġurima!”<sup>40</sup> Ġia karon na ekira-ġoiato, ekirato, “Ġoi Barau garina asi ogarini? Ġoi maki bomaseni ġia ilailanai.<sup>41</sup> Dagara sebona, ġita taura ruarua tamaseni ġera rakava voiri dainai, senaġi mai tarima tu asi ġena vei-rakava.”<sup>42</sup> Benamo ġia na Iesu enoġiato, ekirato, “Iesu, ġemu Basileia boġabiani nai, au maki bono tuġamaġigu.”<sup>43</sup> Iesu na evaġa-veseato, ekirato, “Moġoni akiramuni, toma ġaro ai ġoi tu au ġesi paradaiso ai.”

### Iesu ġena mase

*Mataio 27:45-56; Mareko 15:33-41; Ioane 19:28-30*

<sup>44</sup> Ġarogota, horaġauna 12 koloko varau eġabiato, ġaro ġena seġuka ekorito, tano-bara mabarana mukuna na eġabi-ġauato, eiaġoto mo, horaġauna 3 koloko.<sup>45</sup> Benamo Rubu Veaġa nuġanai veaġa lelevaġi daiġutuna kouġana dabuġana o ketin evedare-kikimato.

<sup>46</sup> Iesu ekoġoto, ekirato, “Tamaġu o, iaukagu tu ġoi ġimamu ai atoreani!” Eguruġa-ġosito vau emaseto.

<sup>47</sup> Vetari verena na mo veġa eġitaiato, benamo Barau evaġa-raġeato, ekirato, “Moġoni veġata, mai tarima tu vei-iobukaiobuka tarimana!”

<sup>48</sup> Marere tarimari ġutuma na mo veġa eġorato dagarana ġeġitaiato, benamo kobaru ġeifarito, ġevetuġamaġi-rakavato, ġeri numa ġana ġeġenoġoito.

<sup>49</sup> Senaġi Iesu ġeribaiato tarimari mabarari, Galilea na ġia murina na ġeiaġomato vavineri maki, manaġai ġeruġato, ġeġorato dagarari ġeġitarito.

### Iesu ġeguriato

*Mataio 27:57-61; Mareko 15:42-47; Ioane 19:38-42*

<sup>50-51</sup> Tarima ta arana Iosefa etanuto-ġoi Iudea vanuġana Arimatea nuġanai. Ġia tu varina namo tarimana ta, Barau ġena Basileia evaġa-nogaiato-ġoi. Ġia maki Iuda kanisoro tarimana, senaġi ġevekira-toreto veġana asi eġabi-raġeato.<sup>52</sup> Benamo Pilato ġenai eiaġoto, Iesu tauġanina bene ġabi-riġoa etato.<sup>53</sup> Moġa murinai Iesu tauġanina eġabi-riġoato, dabuġa kurokuronsa namona na ekumuato, gara gabuna fore ġebasiato kouġanai etore-toġaiato. Mo gara tu variguna, nuġanai mase ta roġosi beġere torea.<sup>54</sup> Mo veġa tu Fraidei lavilavi ai eġorato, Sabadi ġana ġevei-toreato-ġoi ġarona, Sabadi dori eraġasito nai.

<sup>55</sup> Galilea na Iesu ġesi ġeiaġomato vavineri, Iosefa murina na ġeiaġoto, gara kouġana ema Iesu tauġanina aiġesi etore-toġaiato ġeġitaiato.<sup>56</sup> Benamo ġeġenoġoito Ierusalemata sitina ġana, muramura ma bonari ema daudau muramurari ġeġabi-torerito.

Sabadi ai ġeiaġaraġito taravatu ekirani lorinai.

### Iesu evariġisi-ġenoġoito

*Ioane 20:1-10*

**24** Fura ġarona giniguenai o Sandei ai, vavine tu boġiboġi iamoiamonai gara ġana ġeiaġoto, muramura bonari namori ġerovina-torerito dagarari ġeġwa-

iaġorito. <sup>2</sup>Gara kouġana forena tu kure-veġita, irau ai vetore ġeġitaiato. <sup>3</sup>Gara kouġana na ġeraka-toġato, senaġi Iesu Vereġauka tauġanina tu asi ġedoġariato. <sup>4</sup>Ġia roġo mo ġedaradarato-ġoi nuġanai, tau ruarua ġia seviri ai ġeruġa-tarito, ġeri dabuġa tu kuro-ġaroġarori. <sup>5</sup>Vavine tu ġegari-rakavato, tano ai ġetutuġu-tarito, benamo mo tarima na ġevaġa-guruġarito, ġekirato, “Karase nai maġuri tarimana mase gabunai ġovetauani? <sup>6</sup>Ġia tu dia mainai; mase na ma bevariġisi-ġenoġoi. Galileai etanuto-ġoi nai, evaġa-guruġamito guruġana boġono tuġamaġia, <sup>7</sup>ekirato, ‘Tari-marima Natuna tu rakava tarimari ġeri ai beġe revaiani, beġe vaġa-satauroani, ġaro vaġa-toitoinai vau ma bevariġisi-ġenoġoini.’”

<sup>8</sup>Benamo vavine na mo guruġa ġetuġamaġi-doġariato. <sup>9</sup>Gara ġeraga-kwaneato, ġeġenoġoito, mo dagara eġorato dagarana varina mabarana Iesu ġena mero gabanana sebona (11) ma karori ġesi ġekira-vararito. <sup>10</sup>Vavineri tu maiġeri: Maria, Magadala vavinena, e Ioana, e Maria, Iakobo (o Iames) sinana, ema karori tari maki. Ġia na mai vari Iesu ġena apostolo tarimari ġeri ġekiraġito. <sup>11</sup>Senaġi vavine ġeri guruġa asi ġevaġa-moġonirito, korana apostolo ġetuġamaġito, ġia noġa ġeguruġa-babobaboto-ġoi. <sup>12</sup>Senaġi Petero tu evariġisito, eraga-iaġoto, gara kouġanai ea boġe-toġato, senaġi Iesu ġekumuato dabuġari moġo eġitarito. Benamo numa ġana eġenoġoi-iaġoto nuġanai, ġeġorato dagarari etuġamaġirito nai, eġaba-rakavato.

### Iesu Emausa dabaranai eforito

#### *Mareko 16:12-13*

<sup>13</sup>Mo ġaro sebonai Iesu ġena mero ruarua tu Emausa vanuġana ġana ġeiaġoto; mo gabu ġena manaġa Ierusalemna na tu 11 kilomita kavana. <sup>14</sup>Ġerakato-ġoi nuġanai, ġeġorato dagarari ġeguruġa-guruġa iaġirito-ġoi. <sup>15</sup>Ġeri raka guruġa-guruġai Iesu maki eraka-kavi-iaġoto, ġia ġesi ġeraka-iaġoto-ġoi. <sup>16</sup>Senaġi tauri ruarua asi ġeribato ġia tu dei.

<sup>17</sup>Iesu na edanaġirito, ekirato, “Ġomi tu kara mai dabarai ġoraka-guruġa guruġa-iaġiani?” Benamo tauri ruarua ġeruġa-tarito, ġeboġe-vetuġato. <sup>18</sup>Benamo ġia ta, arana Kleopa, na evaġa-veŋeato, ekirato, “Ierusalemna ġana ġeiaġomato tarimari fakari ai betaġu ġoi moġo ġereġamu mainai beġe ġora dagarari asi ribamu?” <sup>19</sup>Iesu evedanaġito, ekirato, “Kamara dagara?” Ġia ġevaġa-veseto, ġekirato, “Iesu, Nasareta tarimana, ġenai ġeġorato dagarari. Ġia tu peroveta tarimana, Barau ġoiranai e tari-marima mabarari ġoirari ai ġena veġa ema ġena guruġa maki ma seġukari. <sup>20</sup>Ġita ġera Rubu Veaġa vereri baregori ema ġera veġorikau tarimari na ġerevaiato bene mase ġana, ġevaġa-satauroato. <sup>21</sup>Senaġi ġai ġatuġamaġito, ġia na Isaraela tarimari bevaġa-maġuririni.

Mai dagara eġorato beiaġoma toma tu varau ġaro toitoi beġe iaġo. <sup>22</sup>Moġa iatanai, ġema vavine tari na ġai nuġama beġe vaġa-farevaġiri. Ġia tu boġiboġi iamoiamonai gara ġana beġe iaġo. <sup>23</sup>Senaġi tauġanina asi beġe doġaria. Benamo beġe ġenoġoi-iaġoma, beġe kira tu, aneru beġe ġitari, mo aneru na beġe kirari, ‘Ġia tu varau bemaġuri-ġenoġoi,’ beġesi. <sup>24</sup>Ġai karoma tari maki gara ġana beġe iaġo, vavine na beġe kiraġia kavana beġe doġaria, senaġi Iesu asi beġe ġitaia.”

<sup>25</sup>Benamo Iesu na ekirarito, ekirato, “Ġomi tu babo, peroveta tarimari ġeri guruġa vaġa-moġoniri ai maki kwaibo rakava! <sup>26</sup>Keriso tu moġesi bene midigu-midigu murinai vau, mareva namonai bene raka-toġa, ene?” <sup>27</sup>Benamo ġia varina Mose e



peroveta tarimari ġeri bukai ema Buka Veāġa mabarana maki ġetorerito guruġari aniri evaġa-ribarito.

<sup>28</sup> Ġeiaġo-viniato-ġoi vanuġana Emausa ġekavinaġiato, benamo ġia tu bene raka-vanaġi etato. <sup>29</sup> Senaġi ġekira-ġoiato, ġekirato, “Ġai ġesi notanu, korana belavilavi ema ġaro maki mai emukunani bene.” Benamo ġia ġesi ġeraka-toġato, ġetanuto. <sup>30</sup> Ġaniġani gabunai ġetanu-taġoto-ġoi nai, Iesu na beredi eġabiato, evaġa-namoato, edudu-ġutuato, tauri ruarua evinirito. <sup>31</sup> Benamo matari ġevekeoto, ġeribato mo tu ġia. Senaġi ġia tu ġoirari ai erekwa-rekwato.

<sup>32</sup> Benamo tauri ruarua ġeveguruġa-vevinito, ġekirato, “Dabarai evaġa-guruġarani-ġoi nai, ema Buka Veāġi ġetorerito guruġari aniri ġera ekiraġi-maġatarini-ġoi nai, ġita nuġara tu ġeseġuseġuni-ġoi, noġa moġo karava na ġeġararini-ġoi, ene?”

<sup>33</sup> Benamo maoromaoro ġevariġisito, Ierusalemā ġana ma ġeġenoġoi-iaġoto, Iesu ġena mero gabanana sebna (11) ma karori ġesi vegogo-taġori ai ġedoġaririto. <sup>34</sup> Ġia na tauri ruarua ġevaġa-guruġarito, ġekirato, “Moġoni veġata, Vereġauka tu bevariġisi-ġenoġoi ema Simona ġenai maki eforito.” <sup>35</sup> Benamo tauri ruarua na dabarai eġorato dagarana ema kamasi Iesu na beredi edudu-ġutuato vauro, Iesu ġia na ġeġita-leaiato ġeri ġekiraġito.

### Iesu tu ġena mero ġeri ai eforito

*Mataio 28:16-20; Mareko 16:14-18; Ioane 20:19-23*

<sup>36</sup> Mo tarima ruarua roġo ġeguruġato-ġoi nuġanai, Vereġauka ġia fakari ai eruġa-rosito, benamo ekirarito, ekirato, “Maino ġemi ai bene tanu.” <sup>37</sup> Ġia tu nuġari maki ġefarevaġi-rakavato ema ġegarito, ġia matoru ġekirato, murava ta ġeġitaiao. <sup>38</sup> Senaġi ġia ekirato, “Karase nai nuġami beġe vekwaraġi-rakava? Kara dainai ġo-daradarani?” <sup>39</sup> Ġimagu ema kwakugu ġoma ġitari, benamo boġono riba mai tu au. Ġoma ġabi-karagu, benamo boġono riba, korana murava tu asi viriġona ema asi turiġana, ġoġitaguni au tu ma viriġogu e ma turiġagu.” <sup>40</sup> Moġesi ekirato, benamo ġimana ema kwakuna evaġa-ġitarito. <sup>41</sup> Senaġi ġia tu roġo ġedaradarato-ġoi ġeri iaku ema ġeri nuġa-farevaġi dainai; benamo Iesu na edanaġirito, ekirato, “Ġaniġani tari maniġeri ba?” <sup>42</sup> Ġia na maġani-kone gabugabuna ta ġeviniato. <sup>43</sup> Benamo Iesu na eġabiato, ġoirari ai eġaniato.

<sup>44</sup> Benamo evaġa-guruġarito, ekirato, “Au tu roġo ġomi ġesi tatanu-vegogoto-ġoi nai, akiramito-ġoi: Mose ġena taravatu e peroveta tarimari ġeri guruġa ema Salamo ai au varigu ġetorerito guruġari mabarari beġe moġonini.” <sup>45</sup> Benamo Iesu na nuġari ekeorito, Buka Veāġa guruġari aniri beġene tuġamaġi-fakari ġana. <sup>46</sup> Ma ekirarito, ekirato, “Maġesi ġetoreato: Keriso tu moġesi roġo bemidigu-midiguni, ema ġaro vaġa-toitoinai mase na ma bevariġisi-ġenoġoini. <sup>47</sup> Ema ġia aranai vetuġamaġi-kure ema rakava tuġamaġi-fitoġari beġene ġobata-iaġi-rovorovori tanobara mabarari ai, Ierusalemā na bene vematama. <sup>48</sup> Mai dagara vaġa-moġoniri tarimami tu ġomi. <sup>49</sup> Au tauġegu na tu Tamagu na ekiraġi-toreato Iaukana batuġuani, iatami ai beforini. Ġomi tu Ierusalemā boġono tanu, bene iaġo mo, guba na bemariġoni seġukana boġo ġabiani.”

**Iesu Barau na eḡabi-varaḡeato guba ḡana***Mareko 16:19-20; Apostolo 1:9-12*

<sup>50</sup> Moḡa murinai Iesu na Ierusalemā na eḡori-rosirito, ḡeiaḡoto mo, Betania ḡana, benamo ḡimana eḡabi-vaisirito, evaḡa-namorito. <sup>51</sup> Evaḡa-namorito-ḡoi nuḡanai, Iesu tu ḡia ḡerina eveḡitato, Barau na eḡabi-varaḡeato guba ḡana. <sup>52</sup> Ḗia na ḡetoma-rakarigo viniato murinai, ma iakuri e ma verereri ḡesi Ierusalemā ḡana ma ḡeḡenoḡoi-iaḡoto. <sup>53</sup> Benamo Rubu Veaḡai ḡetanuto-ḡoi, Barau ḡevaḡa-raḡeato-ḡoi.

## VARI NAMONA IOANE NA ETOREATO

Ioane vaġa-foforina guruġari

Ioane tu Iesu ġena apostolo tarimari gabanana ruarua (12) nuġari ai tarimana ta. Ġia tamana tu Sebedaio, ma ġia tu kone ai maina tarimari.

Ioane ġena mai Vari Namona tu laġani 85 beiaġo 95 fakari ai ta etoreato, mo tu Iesu emaseto murinai. Ġia na mai Vari Namona tu tanobara tarimari mabarari, ġemaġuri-ġenoġoito ema asi ġemaġuri-ġenoġoito, ġeri etoreato.

Ġia ġena ura baregona tanobara tarimari mabarari bene vaġa-ribari, Iesu Nasareta tarimana tu moġoni Barau Natuna, e Iesu tu moġoni Barau na tanobara ġana etuġumariġoato, tanobara tarimari ġia ġenana maġuri beġene ġabia uranai, ema Barau vetoġana korikorina tu ġia ġenana ema vevaġa-foforiato tarimarima ġeri ai. Siri baregona Ioane ġena Vari Namona bukana nuġanai tu karoa 20:31, “Maiġeri guruġa atorerito, korana tu ġomi na Iesu boġono vaġa-moġonia, ġia tu moġoni Keriso, Barau Natuna. Ma bema ġomi na ġia boġo vaġa-moġoniani nai tu, ġia aranai maġuri vanaġivanaġi boġo ġabiani.”

Ioane ġena toretore tu maiġesina eboioġaiato:

1. Barau Natuna - karoa 1:1-18
2. Barau ġena vetuġunaġi Iuda tarimari fakari ai ema iaġo-vinito - karoa 1:19-12:50
3. Barau ġena vetuġunaġi Iesu tauġena ġena mero fakari ai ema iaġo-vinito - karoa 13-17
4. Barau vetuġunaġina ema iaġo-vinito tanobara vaġa-maġurina ġana - karoa 18-21

### Maġuri guruġana

**1** Tovotovonai veġata Guruġa etanuto-ġoi. Mo Guruġa tu Barau ġesi ġetanuto-ġoi, ema mo Guruġa tu Barau. <sup>2</sup>Ġia tu tovotovona na veġata Barau ġesi ġetanuto-ġoi. <sup>3</sup>Dagara mabarari tu Barau na ġia ġenana eveirito. Ma Barau na dagara sebona kwariġutu ta maki dabara borunai ta maki asi eveiato, asiġina ġinavaġi. <sup>4</sup>Maġuri tu ġia nuġanai etanuni; mo maġuri tu tarimarima ġeri mama. <sup>5</sup>Mama tu mukuna nuġanai emamani, senaġi mukuna na asi etuġamaġi-fakaiato e asi eġita-leaiato.

<sup>6</sup>Barau na tarima ta etuġuato, arana tu Ioane. <sup>7</sup>Ġia tu guruġa moġonina kiraġi-kiraġina ema mama vaġa-foforina ġana eiaġomato. Be ġia ġenana tarimarima mabarari na vari beġene seġaġia e beġene vaġa-moġonia ġana. <sup>8</sup>Ġia tauġena tu dia mo mama, senaġi ġia eiaġomato tu, mama benema kiraġia ġana. <sup>9</sup>Mo mama tu mama korikorina, tanobara ġana eiaġomato, tarimarima mabarari mama benema viniri ġana.

<sup>10</sup>Guruġa tu tanobarai etanuto-ġoi, ema mo guruġa ġenana Barau na tanobara eveiato, senaġi tanobara na tu asi eribaiato. <sup>11</sup>Ġia tu ġena tanobara ġana eiaġomato, senaġi ġena tarimarima na asi ġeġabi-raġeato. <sup>12</sup>A tarimarima kotari na ġeġabi-raġeato e ġevaġa-moġoniato nai, ġia na maoro evinirito, Barau natunai beġene iaġo. <sup>13</sup>Ġia Barau natunai ġeiaġoto tu dia tauġanina ġenana. Mo tu dia sina tama rarari na o tauġani ġena urai o sina tama ġeri urai. Asiġi, tarimarima tu Barau tauġena ġereġana na moġo ġia natunai evaġa-iaġorini.

<sup>14</sup>Mo Guruġa tu tarimarima tauġaninai eiaġoto, benamo ġai fakamai ema tanuto. Ġia marevana e seġukana baregona ġaġitaiato. Moġa tu Barau na Natuna sebona

kwariġutu eviniato marevana e seġukana. Varevare-bara ema guruġa e maġuri moġonina na evonuvonu-raġeto.

<sup>15</sup> Ioane na ġia guruġana ekiraġi-foforiato, ekeato, ekirato, “Au na akiraġiato tarimana tu maiġa, akirato, ‘Au murigu na beiaġomani tarimana na au evanaġiguto. Korana tu au maki roġosi roġo bana maġuri nuġanai veġata, ġia tu etanuto-ġoi.’”

<sup>16</sup> Ġia tu varevare-bara na evonuvonu-raġeto. Mo ġena varevare-bara lorinai ġita mabarara vevaġa-namo iatai-iatai maki evinirani. <sup>17</sup> Korana Barau na Mose ġenana taravatu evinirato, a varevare-bara ema guruġa e maġuri moġonina tu Iesu Keriso na eġwa-iaġomarito. <sup>18</sup> Tovotovona na veġata beiaġoma maitoma tarima ta na Barau asi eġitaiato. Natuna ġora ġereġa, Tamana sevinai etanuni tarimana, ġia na Barau ema vaġa-foforiato.

### **Ioane Babatise ġena guruġa-fofori**

*Mataio 3:1-12; Mareko 1:7-8; Luka 3:15-17*

<sup>19</sup> Ioane ġena guruġa-fofori tu maiġa. Iuda tarimari na Rubu Veaġa vereri e Levi doġorona tarimari, (mai tu Rubu Veaġai vetuġunaġi tarimari), kotari Ierusema na Ioane ġenai ġetuġu-iaġorito, beġene danaġia ġana, beġene kira, “Ġia tu deikara?”

<sup>20</sup> Benamo Ioane asi evekira-ġuniġauto, senaġi ġoirari ai eguruġa-foforito, ekirato, “Au tu dia Keriso, (Barau na ekiraġi-toreato vevaġa-maġuri tauna).” <sup>21</sup> Ma ġedanaġi-ato, ġekirato, “Ba ġoi tu deikara? Ġoi tu Elia ba?” Ġia ekirato, “Au tu dia Elia.” Ma ġekirato, “Ġai na peroveta tarimana ġanariani tarimana tu ġoi ba?” Ġia evaġa-veseto, ekirato, “Asiġina!” <sup>22</sup> Benamo ġia na ma ġedanaġi-ġenoġoiato, ġekirato, “Ba ġoi tu deikara? Ġemu vevaġa-vese novini-ginikauma, be beġe tuġuma tarimari ġeri ai baġana iaġo, baġana vaġa-ribari. Ġoi tauġemu varimu tu aiġesi?” <sup>23</sup> Benamo Ioane tauġena evevari-fiuto, ekirato, “Au tu garo ta tano fakanai ekea-koġokoġoni, ekirani, ‘Vereġauka ġena dabara boġono iareva-toretorea.’” Isaia peroveta tarimana na ekiraġi-guineato ilailana.

<sup>24</sup> Mo vetuġu ġeiaġo-viniato tarimari tu Farisea tarimari. <sup>25</sup> Benamo Ioane ġedanaġi-ato, ġekirato, “Bema ġoi tu dia Keriso, e dia Elia, e dia mo peroveta tarimana, karase nai ġoi tu ovevaġa-babatisoni?” <sup>26</sup> Ioane evaġa-veseto, ekirato, “Au tu nanu na moġo ababatisoni, senaġina tarima ta tu ġomi fakami ai eruġa-taġoni, ma ġomi tu asi ribami ġia. <sup>27</sup> Ġia tu au murigu na eiaġomani, ema au tu asi ilaila, ġia ġena tamaka varori baruġarini.” <sup>28</sup> Mai dagara mabarari tu Betania, Ioridana ġarukana mo rekenai, ġeġorato, Ioane ebabatisoto-ġoi gabunai.

### **Barau ġena ginitaġo mamoea**

<sup>29</sup> Ma elaġanito nuġanai, Ioane na Iesu eġitaiato, ġia ġenai eiaġomato-ġoi, benamo ekirato, “Ġoboġe, mani tu Barau ġena Mamoe Natuna, ġia na tanobara ġena rakava beġabi-vaġiani. <sup>30</sup> Au na tu ġia akiraġiato, akirato, ‘Au murigu na eiaġomani tarimana na evanaġiguto, korana tu au roġosi roġo bara maġuri nuġanai veġata, ġia tu etanuto-ġoi.’” <sup>31</sup> Tovo-tovonai au tu asi ribagu ġia, senaġi au aiaġomato nanu na ababatisoni, korana tu Isaraela tarimari na Iesu beġene ribaia ġana.”

<sup>32</sup> Benamo Ioane ma eguruġa-foforito, ekirato, “Iauka aġitaiato, guba na emar-iġoto pune noġa, ġia iatanai etanukauto. <sup>33</sup> Tovotovonai au tu asi ribagu ġia, senaġi Barau na etuġuguto, bana iaġoma tu, tarimarima nanu na bana babatisori ġana. Ġia na evaġa-guruġaguto, ekirato, ‘Ġoi na tarima ta boġitaiani, Iauka bemar-

iġoni, iatanai betanu-kauni. Mo tau tu tarimarima Iauka Veāġa na bebabatorini.”  
<sup>34</sup>Ioane ekirato, “Au na aġitaiato naima akiraġi-foforiani, ġia tu Barau Natuna.”

### Iesu ġena mero giniguineri

<sup>35</sup>Ma elaġanito nai tu, Ioane e ġena mero ruarua ġesi monai ma ġeruġa-taġoto-ġoi. <sup>36</sup>Ġeruġa-taġoto-ġoi nuġanai tu, Iesu eraka-vanaġito, eġitaiato, benamo ekirato, “Ġoboġe, Barauna Mamoe Natuna, (ġena ginitaġo mamoe), ġoġitaia.” <sup>37</sup>Ma Ioane ġena mero ruarua na mo guruġa ġeseġaġiato, benamo Iesu murina na ġeiaġoto. <sup>38</sup>Iesu eruġa-kureto, ma murinai ġerakakauto tarimari ruarua eġitarito, benamo edanaġirito, ekirato, “Ġomi tu kara ġourani?” Ġia ġevaġa-veseto, ġekirato, “Rabi, ġoi tu ainai otanuni?” Rabi anina tu vevaġa-riba tarimana. <sup>39</sup>Ġia evaġa-veseto, ekirato, “Ġoiaġoma, ġoma ġitaia.” Benamo ġia ġesi ġeiaġoto, ma ġena tanu gabuna ġea ġitaiato, mo ġaro vinubana tu ġia ġesi ġebukato. Mo tu horaġauna 4 koloko lavilavi rekenai.

<sup>40</sup>Ioane ġena guruġa ġeseġaġiato, benamo Iesu murinai ġerakato tarimana ta tu Anduru, Simona Petero tarina. <sup>41</sup>Anduru na Iesu eraga-kwaneato. Asikauna kakana Simona edoġariato, benamo ekiraiato, ekirato, “Ġai na Mesia baġa doġaria.” Mesia anina tu Keriso, (Barau na ekiraġi-toreato vevaġa-maġuri tarimana). <sup>42</sup>Benamo ġia na Simona Iesu ġenai eġori-iaġoato. Iesu na eġitaiato, benamo ekirato, “Ġoi aramu tu Simona, Ioane natuna, senaġi ġoi toma aramu beġe kiraġiani tu Kefas beġe toni.” Mai ara “Kefas” ema “Petero” aniri tu sebona, garo ai anina tu “Fore”.

### Iesu na Filipino e Natanaela ekearito

<sup>43</sup>Ma elaġanito nai tu, Iesu tu Galilea tanona ġana neiaġo etato. Ġia na Filipino edoġariato, benamo ekiraiato, ekirato, “Murigu ai noma raka.” <sup>44</sup>Filipo tu Betesaida tarimana, Anduru e Petero ġesi vanuġa sebona. <sup>45</sup>Filipo na Natanaela edoġariato, benamo ekiraiato, ekirato, “Mose ġena taravatu ai ema peroveta tarimari ġeri bukai varina ġetoreato tarimana tu baġa doġaria; ġia tu Iesu, Nasareta tarimana, Iosefa natuna.” <sup>46</sup>Natanaela evedanaġito, ekirato, “Nasareta na dagara namona ta beiaġo-mani?” Filipino ekirato, “Noiaġoma, noma ġitaia.”

<sup>47</sup>Iesu na Natanaela eġitaiato, eiaġomato-ġoi, benamo ġia ekiraġiato, ekirato, “Ġoboġe, mani tarima tu Isaraela tarimana korikorina, ġia ġenai ġofaġofa ta tu asi etanuni.” <sup>48</sup>Natanaela na edanaġiato, ekirato, “Kamasī boribagu?” Iesu na evaġa-veseato, ekirato, “Filipo tu vau bekeamu. Au na ġoi tu baġita-guinemu figi ġauna gaburenai roġo otanuto-ġoi nai.” <sup>49</sup>Benamo Natanaela na evaġa-veseato, ekirato, “Vevaġa-riba tarimamu, ġoi tu Barau Natuna; ġoi tu Isaraela Verena.” <sup>50</sup>Iesu na ma evaġa-veseato, ekirato, “Ġoi na au ovaġa-moġoniguni, korana au na bakiravaramu, ġoi tu figi ġauna gaburenai baġita-guinemu, nene? Veġa tari vau boġitarini, mai veġa maiġa maki beġe vanaġiani.” <sup>51</sup>Benamo ma ekirarito, ekirato, “Moġoni veġata, au na ġomi akiramini, guba bevekeo-fakani boġo ġitaiiani, ema Barau ġena aneru beġe varaġeni e beġe mariġoni boġo ġitarini Tarimarima Natuna ġenai.”

### Veġaraġo verekona Kana vanuġanai

**2** Ġaro ruarua ġekorito murinai, Kana vanuġana nuġanai veġaraġo verekona ta ġeveiato. Kana vanuġana tu Galilea tanona nuġanai. Mo veġaraġo verekona nuġanai tu Iesu sinana maki monai. <sup>2</sup>Ema Iesu ma ġena mero ġesi maki ġeura-

mağirito, be mo veğarağō verekona nuğanai ġeraka-toğato. <sup>3</sup>Vine nanuna o wain ekorito, benamo Iesu sinana na Iesu evağa-guruğaiato, ekirato, “Ġia tu asi ġari vine nanuna.” <sup>4</sup>Iesu na evağa-veseato, ekirato, “Vavine, karase nai au oma kira-varaguni? Mani tu ġomi ġemi ġauvei. Au ġegu ġaro tu roğosi bene votu. <sup>5</sup>Benamo sinana na vetuğunaġi tarimari evağa-guruğarito, ekirato, “Kara bekira-varamini veiğana boğono veia.”

<sup>6</sup>Monai tu fore gwağuturi imaima sebona (6) vağa-ruğa, Iuda tarimari ġeri veiareva veiğari ġari ġeğauvei-iağirito-ğoi. Mo fore gwağuturi tata nuğari tauri galon gabana ruarua (20) o gabana toitoi (30) kavari. <sup>7</sup>Iesu na vetuğunaġi tarimari ekirarito, ekirato, “Mani gwağutu nanu na ġovağa-vonuri!” Benamo ġevağa-vonu fokafokarito. <sup>8</sup>Moğa murinai ma ekirarito, ekirato, “Kota ġoğutu-vağia, ġoğwa-iağoa vereko ġorikauna tarimana ġenai.” Ġeğutu-vağito, benamo ġeğwa-iağoato, <sup>9</sup>vereko ġorikauna tarimana na mo nanu, vine nanunai evağa-iağoato moğa, eniutovoato. Ġia tu asi ribana mo vine nanuna tu ainana eiağomato; a nanu ġesisiato merori ġereğari moğō ma ribari. Benamo vereko ġorikauna tarimana na veğarağō variğū tauna ekea-iağomaiato, benamo evağa-guruğaiato, ekirato, <sup>10</sup>“Tarimarima mabarari na vine nanuna namo vedaureana tu ġetore-rosi guineani, benamo vereko tarimari ġeniu-maseni murinai vau, vine nanuna kota namo rağina ma ġetore-rosiani. Senağina ġoi na tu vine nanuna namo vedaureana tu boğabi-taria mo maitoma.”

<sup>11</sup>Mai tu Iesu ġena vetoğa boruna giniguinena evağa-foforiato Kana vanuğanai, Galilea tanona nuğanai. Monana ġia marevana e seğukana baregona evağa-foforiato, ema ġena mero na ġevağa-moğoniato.

<sup>12</sup>Moğa murinai Iesu ma sinana e tarina merori, ema ġena mero ġesi ġevariğoto Kaperanauma ġana. Ma monai ġaro viravira ta ġetanuto.

### Iesu na Rubu Veağa eiarevaiato

*Mataio 21:12-13; Mareko 11:15-17; Luka 19:45-46*

<sup>13</sup>Iuda tarimari ġeri Pasova o Iuda tarimari mase aneruna na evanağirito moğō verekona ġoirai ekavinağito naima, Iesu tu Ierusalemna ġana evarağeto. <sup>14</sup>Rubu Veağa nuğanai tarimarima na boromakau, e mamoe, ema pune ġevoivoi-iağirito-ğoi, ema tarima kotari teibolo ai ġetanuto ma moni ġesenisito-ğoi edoğaririto. <sup>15</sup>Benamo varo kwarina ta evatoato. Monana Rubu Veağa na mamoe e boromakau mabarari ema lailai-rosirito. Moni ġesenisirito-ğoi tarimari ġeri fata eğuke-vebuburito, ġeri moni ebubu-lautilusirito. <sup>16</sup>Benamo pune ġevoito-ğoi tarimari ekira-ğoirito, ekirato, “Maiğeri dagara mainana ġoğabi-rosiri! Au Tamagu ġena numa tu voivoi numanai asi ġovağa-iağoa!” <sup>17</sup>Benamo ġena mero na Buka Veağai evetoreto guruğana ġetuğamaġi-doğariato, ekirani, “Ġoi ġemu numa uravinina nuğagu ai tu karava noğa eğarani.”

<sup>18</sup>Moğa murinai Iuda tarimari na ġevağa-guruğaiato, ġekirato, “Maiğesi oveini anina tu kara? Kamara vetoğa na bevağa-foforimuni ġai ġemai, ġoi tu ma ġemu maoro maiğeri boveirini?” <sup>19</sup>Iesu evağa-veseto, ekirato, “Mai Rubu Veağa ġorovoa, benamo ġaro toitoi nuğanai au na ma bana vağa-ruğa-vaishi ġenoğōia.” <sup>20</sup>Ġia na ġekiraiato, ġekirato, “Mai Rubu Veağa tu lağani gabana vasivasi ma imaima sebona (46) nuğari ai ġeragaiato. A ġoi na tu ġaro toitoi nuğanai ma boraga-ğenoğoianni otoni?”

<sup>21</sup> Senaġi Iesu na tu ġia tauġanina Rubu Veaġai evaġa-ilailaiato. <sup>22</sup> Iesu mase na evaisi-raġeto murinai, ġena mero na mo guruġa ġetuġamaġi-doġariato, benamo ġia na Buka Veaġa ema Iesu na evaġa-ribarito guruġari ġevaġa-moġonirito.

### Iesu ribana tarimarima ġeri veiġa

<sup>23</sup> Iesu Pasova o Iuda tarimari mase aneruna na evanaġirito moġo verekona ġarori ai Ierusalemaj etanuto-ġoi nai, tarima vovoka na ġevaġa-moġoniato, korana tu vetoġa boruri ġutuma eveirito ġeġitarito nai. <sup>24</sup> Senaġi Iesu na ġia asi evaġa-moġonirito, korana tarimarima mabarari ġia tu ma ribana ginikau. <sup>25</sup> Ema tarima ta tu asi ilaila ġia tarimarima ġeri maġuri dabarari bekira-varaiani, korana tarimarima mabarari nuġari tu ġia ma ribana.

### Iesu e Nikodemo

**3** Farisea tarimana ta etanuto-ġoi arana Nikodemo; ġia tu Iuda tarimari ġeri veġorikau tauna ta. <sup>2</sup> Nega ta boġi ai Iesu ġenai eiaġoto, benamo ekirato, “Rabi, ġai ribama, ġoi tu vevaġa-riba tarimamu, Barau ġenana oiaġomato, korana tu vetoġa boruri oveirini maiġeri tu Barau na asi evaġa-kavaiani tarimana na tu asiġina ġinavaġi beveirini riba.”

<sup>3</sup> Iesu na evaġa-veseato, ekirato, “Moġoni veġata akiramuni, asi beġora-ġenoġoini tarimana na Barau ġena Basileia tu asiġina ġinavaġi beġitaiani.” <sup>4</sup> Benamo Nikodemo na edanaġiato, ekirato, “Tarima baregona ta tu kamasi ma beġora-ġenoġoini? Sinana nuġanai ma beraka-toġani, benamo ma beġora-ġenoġoini?”

<sup>5</sup> Iesu ma evaġa-veseto, ekirato, “Au na akira-korikorimuni, tarima ta Barau ġena Basileia nuġanai asi berakatoġa-kavani, senaġina nanu ġenana beġorani ema Iauka ġenana maki beġorani tarimana vau beraka-toġani. <sup>6</sup> Tarimarima tauġanina ġenana eġorani tu tauġani, ma Barau Iaukana ġenana eġorani tu Iauka. <sup>7</sup> Ġoi nuġamu asi bene farevaġi maiġesi akiramuni nai, korana au bakira, ‘Ġomi mabarami boġono ġora-ġenoġoi.’ <sup>8</sup> Iavara etoġani tu, eurani gaburi ġana eġau-iaġoni. Guruna tu ġoseġaġiani, senaġi ainana eiaġomani, ma aiġana eiaġoni tu asi ġoribaiani. Barau Iaukana ġenana ġeġorani tarimari mabarari maki moġesina, asi ġoribani kamasi ġeġorani.”

<sup>9</sup> Nikodemo ma evedanaġito, ekirato, “Mai dagara tu kamasi beġe ġorani?” <sup>10</sup> Iesu ma evaġa-veseto, ekirato, “Ġoi tu Isaraela ġeri vevaġa-riba tarimamu, senaġi maiġeri dagara ġoi tu asi ribamu? <sup>11</sup> Au na akira-korikorimuni, ġai tu ribama dagarari ġaguruġa-iaġirini, ema ġaġitarito dagarari ġakiraġi-foforirini, senaġina ġema guruġa tu asi ġoġabi-raġerini. <sup>12</sup> Au na ġomi ġemi tu tanobara dagarari akiraġirini, senaġi asi ġovaġa-moġoniguni, a guba dagarari bakira-varamini nai tu, kamasi boġo vaġa-moġoniguni? <sup>13</sup> Tarima ta guba ġana asiġina ġinavaġi evaraġeto, senaġina guba na emariġoto tarimana ġereġana moġo, mo tu Tarimarima Natuna. <sup>14</sup> Mose na tano fakanai mota eġabi-vaishiato ilailanai, Tarimarima Natuna maki moġesi beġe ġabi-vaishiani. <sup>15</sup> Monana vau ġia ġenai beġe veġabidadamani tarimari mabarari na maġuri vanaġivanaġi beġe ġabiani.

<sup>16</sup> Korana Barau na tanobara euravini-baregoato nai, Natuna ġora ġereġa evinirato, be ġia beġe ġabidadama-viniani tarimari mabarari tu asi beġe maseni, a maġuri vanaġivanaġi beġe ġabiani. <sup>17</sup> Korana Barau na Natuna etuġu-mariġoato tanobara ġana tu, dia tanobara bene vaġa-kotaia ġana, senaġi tanobara ġia baku-

nai bene maḡuri ḡana. <sup>18</sup> Ĝia ḡenai eveḡabidadamani tarimana tu meto asi bevini-ani, senaḡi asi eveḡabidadamani tarimana tu varau meto eḡwa-taḡoani, korana ḡia na tu Barau Natuna ḡora ḡereḡa asi eḡabidadama-viniani nai. <sup>19</sup> Mo meto korana tu maiḡesi: Mama tu tanobarai varau ema foforito, senaḡi tarimarima na mukuna ḡeuravini-baregoato, korana ḡeri veḡa tu rakava nai. <sup>20</sup> Veḡa rakavari ḡeveini tarimari mabarari na tu mama ḡeruḡaiani, mama asi ḡeiaḡo-viniani. Ĝia tu ḡegarini, korana ḡeri veḡa rakavari beḡe foforini mamai garina. <sup>21</sup> Senaḡi deikara dabara moḡonina ekorana-iaḡiani tarimana na mama eiaḡo-viniani, benamo tarimarima na beḡe ḡita-ginikauani, ḡena veḡa namori eveirito tu Barau ḡenana eveirito.

### Iesu ema Ioane

<sup>22</sup> Moḡa murinai Iesu ma ḡena mero ḡesi Iudea tanona rekena ḡana ḡeiaḡoto. Monai Iesu tu ḡena mero ḡesi ḡetanuto-ḡoi e ebatisoto-ḡoi. <sup>23</sup> Ioane maki Aenon ai, Salim rekenai, ebatisoto-ḡoi, korana nanu tu barego monai. Tarimarima mo ḡana ḡeiaḡoto-ḡoi, ea babatisorito-ḡoi. <sup>24</sup> Mo tu Ioane dibura numanai roḡosi ḡere kou-ḡaua nuḡanai.

<sup>25</sup> Moḡa ḡaronai Ioane ḡena mero Iuda tarimana ta ḡesi ḡeveḡare-veḡareto. Ĝia ḡeri guruḡa tu, kamara veḡuriḡi veḡanai tu tarimarima benamo-vedaureani. <sup>26</sup> Ioane ḡena mero Ioane ḡenai ḡeiaḡoto, benamo ḡekirato, “Vevaḡa-riba tarimamu, Ioridana ḡarukana mo rekenai ḡoi ḡesi ḡotanuto-ḡoi e ḡoi na oguruḡa-iaḡiato tarimana tu ebatisoni, ema tarimarima vovoka ḡia ḡenai ḡeiaḡoni.”

<sup>27</sup> Ioane evaḡa-veseto, ekirato, “Tarima ta na dagara ta asi beḡoitaḡo-kavaiani, senaḡi Barau na guba na bevini-riḡoani vau beḡoitaḡoni. <sup>28</sup> Ĝomi tauḡemi na ḡoseḡaḡiguto, be ma ribami au akirato, ‘Au tu dia Keriso, (Barau na ekiraḡi-toreato vevaḡa-maḡuri tauna), senaḡi au tu etuḡu-guineguto ḡia ḡoirana ḡana.’ <sup>29</sup> Beveḡaraḡoni ḡuiatona tu beḡaraḡoani futuana na beḡaraḡoani. A beveḡaraḡoni futuana ḡatana tu eruḡa-taḡoni moḡo, (mai tu au, Ioane), ema ḡatana eseḡaḡi-ḡauni, ma ḡatana beveḡaraḡoni futuana garona beseḡaḡiani nai tu, beiakuni. Moḡesi naima au tu iaku na bama vonuvonu-raḡe. <sup>30</sup> Ĝia tu bene barego, a au tu bana kei.”

### Iesu tu guba na eiaḡomato

<sup>31</sup> “Tuḡuna na emariḡoto tarimana tu dagara mabarari iatari ai; tano na eiaḡomato tarimana tu tanobara tarimana ema tanobara guruḡari moḡo bekiraḡini. Guba na eiaḡomato tarimana dagara mabarari iatari ai. <sup>32</sup> Ĝia tu monai eḡitato e eseḡaḡito dagarari ekiraḡi-foforirini, senaḡi tarima ta na ḡena guruḡa asi eḡabiraḡeani. <sup>33</sup> Deikara na ḡia ḡena guruḡa eḡabiraḡeani tarimana na evaḡa-moḡoni korikoriani, Barau tu moḡoni veḡata. <sup>34</sup> Korana tu Barau na etuḡuato tarimana na Barau ḡena guruḡa bekiraḡiani, korana tu Barau na ḡena Iauka Veaḡa evinimoto ema evaḡa-vonuvonu-raḡeani. <sup>35</sup> Tamana na Natuna eura-viniani, ema dagara mabarari ḡia ḡimanai etore-kaurito. <sup>36</sup> Deikara na Natuna evaḡa-moḡoniani tarimana na maḡuri vanaḡivanaḡi beḡabiani. A Natuna asi evaḡa-moḡoniani tarimana na maḡuri asi beḡabiani, senaḡi Barau ḡena baru tu ḡia iatanai betanuni.”

### Iesu ema Samaria vavinena

**4** Farisea tarimari tu varau ḡeseḡaḡito, Iesu na tarima vovoka eḡabirito, ḡena mero ai evaḡa-iaḡorito e ebatisorito, ma Ioane na tu asi vovoka eḡabir-



ito. <sup>2</sup>Senaġina Iesu tauġena na ta tu asi ebatisoato; mo tu ġena mero moġo ġebabatisoto-ġoi. <sup>3</sup>Iesu eribato ġia varina Farisea tarimari na eseġaġiato, benamo Iudea eiaġuiato, Galilea ġana ma eġenoġoi-iaġoto. <sup>4</sup>Ġalilea ġana tu Samaria tanona na eraka-vanaġito.

<sup>5</sup>Samaria vanuġana tai eraġasito. Mo vanuġa arana tu Sika. Mo vanuġa tu Iakobo na natuna Iosefa eviniato tanona sevinai. <sup>6</sup>Iakobo ġena nanu gurina maki monai. Iesu tu eraka-iaġomato, be egaugau-raġeto, benamo mo nanu gurina sevinai etanutarito. Mo tu horaġauna 12 koloko nuġanai ġaroġotai.

<sup>7</sup>Etanu-taġoto-ġoi nuġanai, Samaria vavinenata na nanu ġutu eiaġoto, benamo Iesu na enoġiato, ekirato, “Nanu kota noma vinigu, be nama niu.” <sup>8</sup>Ġena mero tu vanuġa ġana, ġaniġani voi ġeiaġoto. <sup>9</sup>Samaria vavinenata evaġa-veseto, ekirato, “Ġoi tu Iuda taumu, ma au tu Samaria vavinegu, karase nai au ġegu ai nanu onoġini?” Moġesi ekirato, korana Iuda tarimari tu Samaria tarimari ġesi asi ġevegara-garato-ġoi. <sup>10</sup>Benamo Iesu na evaġa-veseato, ekirato, “Bema Barau ġena varevare dagarana boro riba, ema boro riba maki, nanu kota ġemu ai enoġiani tarimana tu deikara nai tu, ġia boro noġia, benamo ġia na maġuri nanuna bere vinimu.” <sup>11</sup>Vavine ekirato, “Vereġauka, ġoi tu asi ġemu tuġu-riġo dagarana e guri maki variġo. Mani maġuri nanuna tu ainana boġabiani? <sup>12</sup>Ġoi tu varaġe lelevaġi, ma ġai senema Iakobo tu kei, ei? Mai nanu gurina tu ġia na evinimato, ema ġia tauġena na eniuato-ġoi, natuna mabarari na ema ġena boromakau e mamoe seriri na maki ġeniuato-ġoi.” <sup>13</sup>Iesu na ma evaġa-veseato, ekirato, “Mai nanu beġe niuani tarimari mabarari bokari ma beġe koke-ġenoġoini. <sup>14</sup>A au na baviniiani nanuna beniuani tarimana tu, bokana asi ma bekoke-ġenoġoini. Korana au na baviniiani nanuna tu ġia nuġanai nanu gurinai beiaġoni, bevoneġoi-voneġoini ema maġuri vanaġivanaġi beviniani.” <sup>15</sup>Mo vavine na enoġiato, ekirato, “Vereġauka, mani nanu novinigu, be bokagu asi ma bene koke-ġenoġoi, ema maiġana nanu-ġutu asi ma bana iaġoma.”

<sup>16</sup>Benamo Iesu na evaġa-guruġaiato, ekirato, “Noiaġo, ġaraġomu noa keaia, benamo taumi ruarua boġono iaġoma.” <sup>17</sup>Mo vavine evaġa-veseto, ekirato, “Au tu asi ġaraġogu.” Iesu ekirato, “Mani tu moġoni okirani, ‘Au tu asi ġaraġogu’ otoni tuna. <sup>18</sup>Ġemu guruġa tu moġoni, korana ġoi tu vaġa-imaima veġata oveġaraġoto, ema mani oġabiato tarimana maniġa tu dia ġoi ġaraġomu. <sup>19</sup>Mo vavine ekirato, “Vereġauka, au toma bama riba, ġoi tu peroveta tarimamu. <sup>20</sup>Ġai tubuma ġatama na tu mai ġoro ai Barau ġetoma-rakarigo viniato-ġoi, a ġomi Iuda tarimami ġokirani, toma-rakarigo gabuna tu Ierusalemia moġa, be tarimarima tu monai beġene toma-rakarigo.”

<sup>21</sup>Iesu ekirato, “Vavine, ġegu guruġa bono vaġa-moġonia, ġaro ta eiaġomani, mai ġoro ai e Ierusalemia maki Tamara asi boġo toma-rakarigo viniani. <sup>22</sup>Ġomi Samaria tarimami na ġotoma-rakarigo viniani Barauna tu asi ribami; a ġai na ġatoma-rakarigo viniani Barauna tu ribama, korana vevaġa-maġuri tu ġai Iuda tarimama ġemana eiaġomani. <sup>23</sup>Senaġi ġarona eiaġomani ema varau beraġasi maiġa, toma-rakarigo tarimari moġoniri na Tamara Barau tu iaukai e moġoni ai beġe toma-rakarigo viniani. Korana Tamara na tu moġesi beġe toma-rakarigo viniani tarimari evetaurini. <sup>24</sup>Barau tu Iauka, ma beġe toma-rakarigo viniani tarimari na tu iaukai ema moġoni ai beġene toma-rakarigo vinia.” <sup>25</sup>Mo vavine na ekiraiato, ekirato, “Au ribagu, Mesia, ġekiraġiani Keriso ġetoni, tu beiaġomani. Ġia beiaġomani ġaronai, ġia

na dagara mabarari bekiraġi-foforirini.”<sup>26</sup> Benamo Iesu na evaġa-veseato, ekirato, “Tarimana tu au maiġegu, ġoi аваġa-guruġamuni.”

### Iesu ġena mero ġeġenoġoito

<sup>27</sup> Iesu moġesi eguruġato-ġoi nuġanai, ġena mero ġeraġasito. Ġia mabarari nuġari ġefarevaġito, korana Iesu tu vavine ta ġesi ġeguruġa guruġato-ġoi, senaġi tarima ta asi ekirato, “Ġoi tu kara ourani?” O “Karase nai mai vavine ġesi ġoguruġa-guruġani?”<sup>28</sup> Benamo mo vavine na ġena nanu gwaġutuna eraga-kwaneato, eġenoġoi-iaġoto vanuġa ġana, benamo vanuġa tarimari ea kirarito.<sup>29</sup> Ekirato, “Ġoiaġoma, tarima ta ġoma ġitaia. Ġia na au ġegu veġa aveirito dagarari mabarabarari bekiraġi-fofori foririri. Betaġu ġia tu Keriso, (Barau na ekiraġi-toreato vevaġa-maġuri tauna), banaġu?”<sup>30</sup> Benamo tarimarima na vanuġa ġeiaġuiato, ma Iesu ġenai ġeiaġoto.

<sup>31</sup> Mo faka nuġanai ġena mero na Iesu ġekiraiato, ġekirato, “Vevaġa-riba tari-mamu, noġaniġani.”<sup>32</sup> Senaġi ġia evaġa-veseto, ekirato, “Au tu ma ġagu ġaniġani, ġomi asi ribami ġaniġanina.”<sup>33</sup> Moġesina naima ġena mero tauġeri ġevedanaġito, ġekirato, “Tarima ta na ġana ġaniġani beġwa-iaġoma ba?”<sup>34</sup> Iesu na ekirarito, ekirato, “Au ġagu ġaniġani tu etuġuguto Barauna ġena ura bana veia, ema eviniguto ġauveina bana vaġa-koria.

<sup>35</sup> Ġomi ma ġemi sisiba guruġana, ġokirani, ‘Ġue vasivasi murinai vau kwakwa ġarona beiaġomani.’ A au na akiramini, matami ġokeori, benamo vamoka ġoġita-ġinikauri, tauri tu varau beġe gwaġiġi, kwakwa ġarona tu beraġasi.<sup>36</sup> Kwakwa tarimana ġena ġauvei voina tu beġabiani, ema vamoka ġaniġanina bevaġa-vegogoani tu, maġuri vanaġivanaġi ġana. Tauna moġa, varovarona tarimana e kwakwa tarimana beġe iaku-vegogoni.<sup>37</sup> Korana moġesi bevetoreni nai tu, iniġesina ġekiraġiani guruġana tu moġoni, ‘Tarima ta na tu evaroani, ma ta na tu ekwaiani.’<sup>38</sup> Au na ġomi atuġumito tu, asi ġovaro-vekwaraġito dagarari kwakwari. Varovarori vekwaraġiri tu tarima tari ġevewwaraġito, a ġomi na tu ġia ġeri vekwaraġi dagarari kwakwari boġo raka-toġa.”

### Samaria tarimari ġutuma na Iesu ġevaġa-moġoniato

<sup>39</sup> Benamo Samaria tarimari vovoka mo vanuġa nuġanai Iesu ġevaġa-moġoniato, korana tu mo vavine ġena vevarifiu guruġana ġenana naima, ġia ekirato, “Au ġegu veġa rakavari aveirito dagarari mabarabarari bekiraġi-fofori foririri.”<sup>40</sup> Moġesina naima Samaria tarimari Iesu ġenai ġeiaġomato nai tu, ġenoġiato, ġia ġesi roġo beġene tanu. Moġa lorinai Iesu mo vanuġai ġaro ruarua ma etanuto.<sup>41</sup> Ma tarimarima vovoka na Iesu ġevaġa-moġoniato, korana ġena vevarifiu guruġari na.<sup>42</sup> Benamo ġia na mo vavine ġekiraiato, ġekirato, “Ġai na maitoma Iesu ġavaġa-moġoniani, dia ġoi ġemu guruġa lorinai, senaġi ġai tauġema na ġia baġa seġaġia, ma baġama riba-ġinikau, ġia tu moġoni Keriso, tanobara Vaġa-maġurina Tarimana.”

### Vere ta natuna merona Iesu na keve na evaġa-maġuriato

<sup>43</sup> Iesu monai ġaro ruarua etanuto murinai, Galilea ġana ma eiaġoto.<sup>44</sup> Iesu tauġena na ekiraġi-foforiato, ekirato, “Peroveta tarimana tu ġena vanuġa korikorina tarimari na asi beġe gubakauani.”<sup>45</sup> Benamo Galileai ea votuto nai tu, Galilea tarimari na ġeġabi-raġeato. Iesu ġeġabi-raġeato korana Ierusalemaj Pasova verekona

nuḡanai tu ḡia maki monai, be Iesu na kara eveirito dagarari mabarari tu, matari na ḡeḡitarito.

<sup>46</sup> Benamo Iesu ma eḡenoḡoito Galilea vanuḡana ta arana Kana ḡana. Kana tu Iesu na nanu wain ai evaḡa-iaḡoato vanuḡana. Monai kini ḡena vere ta Kaperanaumai etanuto-ḡoi, ma ḡia natuna merona tu ekeve-rakavato. <sup>47</sup> Mo vere eseḡaḡito, Iesu tu Iudea na eiaḡomato Galilea ḡana, benamo eiaḡoto ḡia ḡenai, benamo enoḡiato, Kaperanauma ḡana nevariḡo, be ḡia natuna merona nea vaḡa-maḡuria, korana ḡia natuna merona tu dori emaseto-ḡoi.

<sup>48</sup> Iesu na ekiraiato, ekirato, “Ḡomi tu vetoḡa boruri e nuḡa-farevaḡi veiḡari asi boḡo ḡitarini tu, asi boḡo vaḡa-moḡoniguni.” <sup>49</sup> Mo vere ekirato, “Vereḡauka, si-iaḡo, natugu bemaseni ḡesi.” <sup>50</sup> Iesu na ekiraiato, ekirato, “Noiaḡo, natumu merona tu bemaḡuri bene.” Mo tarima na Iesu ḡena guruḡa evaḡa-moḡoniato, benamo eiaḡoto.

<sup>51</sup> Dabara na eḡenoḡoi-iaḡoto-ḡoi nuḡanai, ḡena vetuḡunaḡi tarimari ḡesi ḡevedoḡarito, benamo ḡekira-varaiato, ḡekirato, “Ḡoi natumu merona tu bemaḡuri.”

<sup>52</sup> Benamo ḡia na edanaḡirito, kamara horai natuna merona enamoto. Ḡia ḡevaḡa-veseto, ḡekirato, “Ḡoraḡani horaḡauna 1 koloko lavilavi rekenai ḡia mo keve na eraga-kwaneato.” <sup>53</sup> Benamo tamana eriba-maoroto, mo aoa korikorinai enamoto, Iesu na ḡia evaḡa-guruḡaiato, ekirato, “Ḡoi natumu tu bemaḡuri.” Benamo ḡia e ḡena numa tarimari mabarari ḡesi Iesu ḡevaḡa-moḡoniato. <sup>54</sup> Mai tu vetoḡa boruna vaḡa-ruaruana Iesu na eveiato, Iudea na Galilea ḡana eiaḡoto murinai.

### Kou ai Iesu na tarima ta evaḡa-namoato

**5** Mai veiḡa murinai Iesu tu Ierusalemā ḡana ma evaraḡeto, korana Iuda tarimari tu ḡeri vereko ta ḡeveiato-ḡoi.

<sup>2</sup> Ierusalemāi kou ta tu ḡatama-boka baregona arana Mamoe Ḡatama-bokana sevina. Mo kou arana Heberu garo ai tu Betesda, ma ḡia sevina tu iaḡaraḡi foutari imaima (5). <sup>3</sup> Ḡaro mabarari ai kevekeve tarimari vovoka monai ḡegenā-taḡoto-ḡoi, mata-bubu, kwaku rakava, ema tauḡaniri ḡemaseto tarimari, [nanu ḡena ḡareva-ḡareva ḡevaḡa-nogaiato-ḡoi. <sup>4</sup> Korana aneru ta guba na emariḡoto-ḡoi, mo nanu evaḡa-ḡareva ḡarevaiato-ḡoi. Mo nanu eḡarevato-ḡoi nuḡanai, eturu-ferei guineto-ḡoi tarimana tu ḡena keve enamoto-ḡoi.]

<sup>5</sup> Monai tarima ta egena-taḡoto-ḡoi, ḡena keve laḡaniri tu gabana toitoi ma imaima toitoi (38). <sup>6</sup> Iesu na monai genataḡonai eḡitaiato, ma eribato, ḡia tu ḡaro vovoka veḡata ekeve-iaḡiato. Benamo Iesu na edanaḡiato, ekirato, “Ḡoi ourani nonamo ba?”

<sup>7</sup> Keve tarimana na evaḡa-veseato, ekirato, “Vereḡauka, nanu eḡareva-ḡarevanai, au kou ai tu asi tau raga tore-reigu tarimana ta. Mainana tauḡegu kou aiaḡoviniani nai tu, ta eraka-rei-guineni. <sup>8</sup> Iesu na ekiraiato, ekirato, “Novariḡisi, ḡemu geda noḡabi-vaizia, be noraka.” <sup>9</sup> Benamo mo tarima ḡena keve asikau enamoto, ma ḡena geda eḡabi-vaiziato, benamo eruḡa-vaizito, erakato.

Mo veiḡa tu Sabadi ai eḡorato. <sup>10</sup> Moḡa lorinai Iuda tarimari na mo keve na enamoto tarimana ḡekiraiato, ḡekirato, “Toma tu Sabadi, ḡemu geda asi bono ḡwa-rakao rakaoa, taravatu.” <sup>11</sup> Ḡia na evaḡa-veserito, ekirato, “Au bevaḡa-namogu tarimana na bekiragu, bekira, ‘Ḡemu geda noḡabi-vaizia, be noraka,’ besi.” <sup>12</sup> Benamo ḡia na ḡedanaḡiato, ḡekirato, “Mo tu kamara tarima na bekiramu, ‘Ḡemu geda noḡabi-vaizia, be noraka,’ besi?” <sup>13</sup> Senaḡi mo Iesu na evaḡa-namoato tarimana tu asi rib-

ana, dei na evaġa-namoato, korana Iesu tu eraka-veġitato, tarima ġutuma mo gabu ai vekaravari na.

<sup>14</sup> Gabivau Iesu na mo tarima Rubu Veaġa nuġanai edoġariato, benamo ekiraiato, ekirato, “Noseġaġi, maitoma ġoi tu bonamo. Veġa rakavana ta asi ma bono vei-ġenoġoia, rakava barego vedaureana ta na beġabimuni ġesi.” <sup>15</sup> Benamo mo tarima erakato, eiaġoto, Iuda tarimari ea kira-vararito, ġia tu Iesu na evaġa-namoato.

<sup>16</sup> Monana vau Iuda tarimari na Iesu ġevaġa-rakavaiato-ġoi, korana Sabadi ai mo vevaġa-maġuri veiġana eveiato nai. <sup>17</sup> Benamo Iesu na evaġa-veserito, ekirato, “Au Tamagu tu vanaġivanaġi eġauveini naima, au maki aġauveini.” <sup>18</sup> Moġesi ma ekirato nai, Iuda tarimari ġeri ura tu dabara ta veġata beġene ġoitaġoa, be Iesu tu beġene vaġi-masea ġetato. Dia mo Sabadi asi ekorana-iaġiato moġo dainai, senaġina ekirato, Barau tu ġia Tamana ma etato. Korana mo dabarai ġia tu Barau ġesi ilaila etato.

### Barau Natuna ġena seġuka

<sup>19</sup> Benamo Iesu na evaġa-veserito, ekirato, “Moġoni, au na akira-korikorimini, Natuna ġereġana na kara ta asi beveiani, senaġi Tamana ġena veġa beġitarini veiġari moġo ġia na beveirini. Tamana kara eveini dagarari mabarabarari Natuna na maki beveirini. <sup>20</sup> Korana tu Tamana na Natuna eura-viniani, ema ġia na eveirini dagarari mabarari maki evaġa-ġitaiani. Oba, dagara barego lelevaġiri maki ġenai bevaġa-foforiani, maiġeri dagara maki beġe vanaġirini, ġomi nuġami beġene farevaġi ġana. <sup>21</sup> Vaġa-ilailana Tamana na mase tarimari evaġa-vaisi-raġerini, benamo maġuri evinirini kavana, Natuna na maki ġena ura tarimari maġuri evinirini. <sup>22</sup> Tamana na tu tarima ta asi evaġa-kotaiiani, korana vevaġa-kota seġukana mabarana tu Natuna eviniato. <sup>23</sup> Moġa tauna tu, tarimarima mabarari na Natuna beġene gubakaua, Tamana ġeguba-kauani kavana. Natuna asi eguba-kauani tarimana na tu Tamana maki asi egubakauani, korana Tamana na tu Natuna etuġuato.

<sup>24</sup> Moġoni au na akiramini, au ġegu guruġa eseġaġiani ema etuġuguto Barauna evaġa-moġoniani tarimana na maġuri vanaġivanaġi varau beġabia. Ġia tu Barau ġena Kota nuġanai asi beraka-toġani. Asiġina. Mase varau beraga-kwaneana, maġuri nuġanai varau beraka-toġa.

<sup>25</sup> Moġoni akiramini, ġarona roġo beiaġomani, ma varau bevotu, mase tarimari na Barau Natuna garona beġe seġaġiani, ma beġe seġaġiani tarimari tu beġe maġurini. <sup>26</sup> Korana tu Tamana tauġena ġenai maġuri etanuni ilailanai, Natuna maki moġesi eviniato, maġuri ġenai etanuni. <sup>27</sup> Ema ġia Natuna maoro eviniato, bene vevaġa-kota ġana, korana ġia tu Tarimarima Natuna. <sup>28</sup> Nuġami asi beġene farevaġi! Ġarona mani eiaġomani, mase tarimari mabarari roġo gara nuġari ai na Barau Natuna garona beġe seġaġiani. <sup>29</sup> Benamo beġema raka-rosini: Vei-namo tarimari beġe vaisi-raġeni, maġuri beġene ġabia ġana, a vei-rakava tarimari beġe vaisi-raġeni, rakava voina metona beġene ġabia ġana.”

### Iesu beġe kiraġi-foforiani

<sup>30</sup> “Au tu ġereġagu na dagara ta asi baveiani riba. Avevaġa-kotani maki Barau na ekiraguni aseġaġirini ilailari ai aveirini, moġa lorinai ġegu vevaġa-kota tu roroġoto, korana dia au tauġegu ġegu ura ta akorana-iaġiani, senaġi au etuġuguto Barauna ġena ura moġo aveiani.

<sup>31</sup> Bema au tauḡegu moḡo bara vekiraḡi-fofori nai tu, au ḡegu guruḡa tu asi tau vaḡa-moḡonina. <sup>32</sup> Senaḡi tarima ta na maki au evaḡa-moḡoniguni, ma au ribagu, ḡia na au ekiraḡi-foforiguni guruḡana tu moḡoni.

<sup>33</sup> Ḡomi na tarima kotari ḡotuḡu-iaḡorito Ioane ḡenai, benamo ḡia na guruḡa moḡonina ekiraḡiato. <sup>34</sup> Au vaḡa-moḡonigu guruḡari tu dia tarimarima ḡerina eiaḡo-mani, a Ioane bakiraḡia korana tu, ḡomi maḡuri boḡono doḡaria uranai. <sup>35</sup> Ioane tu noḡa moḡo lamefa eḡarato-ḡoi ema emore-taḡoto-ḡoi, benamo ḡomi mo faka kotu-nai ḡemi ura tu, ḡia ḡena mamai boḡono iaku-tanu moḡo ḡotato-ḡoi.

<sup>36</sup> Senaḡi au ḡevaḡa-moḡoniguni veiḡari na, Ioane na evaḡa-moḡoniguni guruḡari, moḡeri tu ḡevanaḡirini. Korana tu Tamagu na eviniguto ḡauveina maitoma aveiani, mainana au evaḡa-moḡoniguni, au tu Tamagu na etuḡuguto. <sup>37</sup> Au tu Tamagu na etuḡuguto, ma ḡia tauḡena na maki au ekiraḡi-foforiguni. Ḡomi na ḡia garona tu roḡosi ḡoro seḡaḡia, ema vetoḡana maki roḡosi ḡoro ḡitaia. <sup>38</sup> Ema ḡena guruḡa ḡomi nuḡami ai tu asi etanuni, korana ḡia na etuḡuato tarimana tu asi ḡovaḡa-moḡoniani.

<sup>39</sup> Ḡomi na Buka Veaḡa guruḡari ḡovetau-ginikaurini, korana ḡomi ḡotuḡamaḡini tu, moḡeri guruḡa nuḡari ai maḡuri vanaḡivanaḡi boḡo doḡariani. Moḡeri guruḡa na tu au ḡekiraḡiguni. <sup>40</sup> Senaḡina ḡomi maḡuri ḡabiḡabina uranai au ḡegu ai iaḡoma tu asi ḡourani.

<sup>41</sup> Au tu tarimarima ḡerina vevaḡa-raḡe tu asi avetauani. <sup>42</sup> Senaḡi ḡomi aiḡesi, au tu ma ribagu. Au ma ribagu ḡomi nuḡami o lorumi ḡuturi ai Barau uravinina tu asi etanuni. <sup>43</sup> Au aiaḡomato tu Tamagu aranai, ma asi ḡoḡabi-raḡeguni. Senaḡi tarima boruna ma beiaḡomani tauḡena aranai nai tu, boḡo ḡabi-raḡeani. <sup>44</sup> Ḡomi tu tauḡemi fakami ai moḡo ḡovevaḡa-raḡeni tu ḡoḡabi-raḡerini. Senaḡi mo vevaḡa-raḡe tu Barau ḡereḡana na moḡo beveiani. Ma Barau ḡenana eiaḡomani mo vevaḡa-raḡe, ḡomi na tu asi ḡourani boḡono ḡabia. Bema ḡomi maniḡesi tauḡemi fakami ai moḡo ḡovevaḡa-raḡeni nai tu, kamasi au boḡo vaḡa-moḡoniguni?

<sup>45</sup> Asi boḡono tuḡamaḡi, au na Tamagu ḡoiranai bavaḡa-daḡamini, asiḡina. Vaḡa-daḡa tarimana tu ḡoḡabi-raḡeani tarimana, Mose, ḡia na ḡomi bevaḡa-daḡamini.

<sup>46</sup> Bema ḡomi na Mose moḡoni boḡoro vaḡa-moḡonia nai tu, au maki boḡoro vaḡa-moḡonigu, korana ḡia na tu au varigu etoreato. <sup>47</sup> Senaḡina bema ḡia na etoreato guruḡana asi boḡo vaḡa-moḡoniani nai, au ḡegu guruḡa tu kamasi boḡo vaḡa-moḡoniani?"

### Iesu na daḡara imaima (5,000) eḡuburito

*Luka 9:10-17*

**6** Moḡa murinai Iesu Galilea kouna na evanaḡi-iaḡoto tavi ta reke ḡana. Mo kou arana ta tu Tiberia. <sup>2</sup> Benamo tarimarima vovoka tabutabu ḡia murina na ḡeiaḡoto, korana vetoḡa boruri eveito keve tarimari ḡeri ai ḡeḡitarito nai. <sup>3</sup> Moḡa murinai Iesu ḡoro ḡana evaraḡeto, benamo monai ḡena mero ḡesi ḡetanu-tarito. <sup>4</sup> Iuda tarimari ḡeri vereko arana Pasova ekavinaḡito-ḡoi ḡoirai. (Mai tu Iuda tarimari mase aneruna na evanaḡirito moḡo, asi evaḡirito, verekona).

<sup>5</sup> Iesu eboḡe-vaisito, tarimarima asisebo ḡia ḡenai ḡeiaḡomato-ḡoi, benamo ḡia na Filipino ekiraiato, ekirato, "Ḡita ḡaniḡani tu ainai toma tavoini, maḡeri tarimarima mabarari taḡubu-iaḡirini?" <sup>6</sup> Iesu moḡesi ekirato, korana Filipino nuḡana bene ribaia ḡana. A ḡia tu ma ribana kara beveiani.

<sup>7</sup> Filipino na evaġa-veaseato, ekirato, “Silva moniri sinau ruarua (200) na ġaniġani dagarari bita voini, senaġi asi beġe ilailani, mai tu koturi koturi moġo maki asi veġata mabarari beġe ġanini.” (Silva moniri sinau ruarua (200) tu tarima ta davana ġue imaima toitoi (8) nuġanai beġabini kavana).

<sup>8</sup> Ġena mero ta arana Anduru, Simona Petero tarina, ġia na ma evaġa-veaseato, ekirato, <sup>9</sup> “Mero misina ta maġa, ġia tu ma ġana beredi imaima (5) e maġani-kone ruarua (2). Senaġi asi beġe ilailani mai tarimarima mabarari ġeri ai tu-na.”

<sup>10</sup> Iesu na ekirarito, ekirato, “Tarimarima ġokirari, ġetanutanu-tari.” Mo gabu moġa ġauġana tu vovoka. Benamo tarimarima mabarari ġetanutanu-tarito. Tau ġereġari moġo mabarari tu 5,000 kavana. <sup>11</sup> Benamo Iesu na mo beredi eġabirito, Barau evaġa-namoato, benamo ġetanutanu-tarito tarimari mabarari ġevini-vaġa-ġaurito. Maġani-kone maki moġesi eveirito, mabarari ġeġabito ġeri ura ilailari ai. <sup>12</sup> Ġia mabarari ġeġani-maseto, benamo Iesu na ġena mero ekirarito, ekirato, “Beredi kwari mabarari ġovaġa-vegogori, misina ta maki asi bene rekwa-rekwa.” <sup>13</sup> Benamo mo beredi ġeġanirito kwakwari moġeri mabarari ġevaġa-vegogorito, boseġa gabanana ruarua (12) ġevaġa-vonurito.

<sup>14</sup> Tarimarima na Iesu na mai vetoġa boruna eveiato ġeġitaiato nai, ġekirato, “Moġoni, mai tu peroveta tarimana tanobara ġana beiaġomani ġetato tarimana.”

<sup>15</sup> Iesu eribato, tarimarima tu beġe iaġomani, ġia beġema ġabi-tariani ġeri kini ai beġene vaġa-iaġoa ġana. Moġesina naima ġereġana ġoro ġana ma eiaġo-ġenoġoito.

### Iesu nanu iatanai erakato

*Mataio 14:22-33; Mareko 6:45-52*

<sup>16</sup> Elaviboġi-iaġoto nai, Iesu ġena mero kou ġana ġevariġoto. <sup>17</sup> Monai ġasi tai ġeraġeto, benamo kou na ġevanaġito, Kaperanauma ġana ġeiaġoto. Mo tu varau eboġito, ma Iesu tu roġosi bere rakakau ġia ġeri ai. <sup>18</sup> A iavara baregona tu eragato-ġoi, be mo kou ureurena maki ebaregato. <sup>19</sup> Iesu ġena mero kilomita imaima (5) o imaima sebna (6) kavana ġasi ġelevaiato nuġanai, ġia na Iesu ġeġitaiato, nanu iatana na eraka-iaġomato-ġoi, ġasi eiaġoma-viniato-ġoi, benamo ġia tu ġegarito. <sup>20</sup> Iesu na ekirarito, ekirato, “Asi ġogari, mai tu au.” <sup>21</sup> Benamo ġia ġeġabi-raġeato, ġasi ai eraġekauto, ma asikauna tu ġeiaġo-viniato-ġoi gabunai ġevotuto.

### Tarimarima na Iesu ġevetauato

<sup>22</sup> Elaġanito boġiboġinai, tarimarima vovoka Iesu ġena mero ġasi ai ġeraġeto gabunai ġeruġa-taġoto-ġoi. Ġia ġeribato, tovtovonai monai ġasi tu sebna moġo mo kou rikinai. Ema ma ribari maki, Iesu tu ġena mero ġesi mo ġasi ai asi eraġeto, ġena mero tu ġereġari moġo ġeraġeto ema ġevanaġi-iaġoto. <sup>23</sup> Ġasi kotari Tiberia na ma ġeiaġomato, kou rikinai ġema darokauto. Ġia ġedarokauto gabuna moġa tu, Vereġauka na beredi Barau evaġa-namoato murinai, tarimarima evinirito, ġeġanirito gabuna sevinai. <sup>24</sup> Mo tarimarima ġeriba-maoroto, Iesu ma ġena mero ġesi monai tu asiġina, benamo mo ġasi ai ma ġeraġekauto, Kaperanauma ġana ġevanaġi-iaġoto, Iesu ġea vetuato.

### Iesu tu maġuri ġaniġanina

<sup>25</sup> Tarimarima na Iesu kou tavi ta kefonai ġedoġariato, benamo ġekiraiato, ġekirato, “Vevaġa-riba tarimamu, ġoi tu aitoma mainai boma votu?” <sup>26</sup> Iesu na evaġa-

veserito, ekirato, “Au na moĝoni akiramini, ĝomi na au ĝovetauguni korana tu mo beredi ĝoĝanito, benamo ĝoĝani-maseto, a dia mo vetoĝa boruri ĝoĝitarito nai, ĝovetauguni. <sup>27</sup> Ma beĝe rakavani ĝaniĝaniri ĝauveiri asi boĝono vei, senaĝi ĝaniĝani roĝo betanu-iaĝoni, beiaĝoni mo, maĝuri vanaĝivanaĝi, ĝauveina boĝono vei. Mo ĝaniĝani tu Tarimarima Natuna na bevinimini, korana Tamana Barau na ĝia ĝenai vetoĝa ta eveiata, mo tu ĝia evaĝa-moĝoniato vetoĝana.”

<sup>28</sup> Benamo ĝedanaĝiato, ĝekirato, “Ĝai Barau ĝena ura ĝauveiri ĝaveini baĝa toni tu kara baĝana veia?” <sup>29</sup> Iesu na evaĝa-veserito, ekirato, “Barau ĝena ĝauvei ĝomi na boĝono veia etoni ĝauveina tu maiĝa moĝo: Etuĝuato tarimana boĝono vaĝa-moĝonia.” <sup>30</sup> Ĝia na ma ĝedanaĝiato, ĝekirato, “Ĝoi na ĝai ĝema tu kamara vetoĝa boruna boveiani baĝa ĝitaiani, benamo ĝoi baĝa vaĝa-moĝonimuni? Ĝoi na kara boveiani? <sup>31</sup> Ĝai senema na tu mana ĝeĝaniato tano fakanai, Buka Veaĝa nuĝanai ekirani kavana, maiĝesi ekirani, ‘Ĝia na beredi guba na evini-riĝorito ĝeĝanito.’”

<sup>32</sup> Iesu na evaĝa-veserito, ekirato, “Moĝoni veĝata akiramini, dia Mose na mo beredi guba na evinimito. Asiĝi. Au Tamagu na tu moĝoni beredi korikorina guba na evinimini. <sup>33</sup> Korana Barau ĝena beredi tu guba na emariĝoto tarimana. Ĝia na tanobarai ĝetanuni tarimari maĝuri evinirini.” <sup>34</sup> Benamo ĝia na ĝekiraiato, ĝekirato, “Vereĝauka, mani beredi ĝaro mabarari ai bono vinima.”

<sup>35</sup> Iesu na ekirarito, ekirato, “Maĝuri beredina tu au maiĝegu. Au ĝegu ai beiaĝo-mani tarimana tu asi ma bevitoani, ema au bevaĝa-moĝoniguni tarimana tu, bokana asi ma bekokeni. <sup>36</sup> Senaĝi au na ĝomi tu varau akiramito, ĝoĝitaguni, senaĝi asi ĝovaĝa-moĝoniguni. <sup>37</sup> Tamagu na au eviniguto tarimari mabarari tu, au ĝegu ai beĝe iaĝomani, ema deikara au ĝegu ai beĝe iaĝomani tarimari, au na asi balai-ĝenoĝoirini. <sup>38</sup> Korana au guba na amariĝoto tu, dia au ĝegu ura bana veia ĝana, senaĝina au etuĝuguto Barauna ĝena ura bana veia ĝana. <sup>39</sup> Ema au etuĝuguto Barauna ĝena ura tu, au eviniguto tarimari mabarari ta asi bana vei-rekwa rekwaia, a mabarabarari mase na ma bana vaĝa-variĝisi ĝenoĝoiri ĝaro magonai. <sup>40</sup> Korana au Tamagu ĝena ura tu, Natuna beĝe ĝitaiani ema beĝe vaĝa-moĝoniani tarimari mabarari na maĝuri vanaĝivanaĝi beĝe ĝabiani, ma ĝaro dokonai ma bavaĝa-variĝisi ĝenoĝoirini.”

<sup>41</sup> Benamo Iuda tarimari ĝemugu-muguto, korana ĝia ekirato, “Au tu guba na amariĝoto beredina.” <sup>42</sup> Benamo ĝekirato, “Mai tarima tu Iesu, Iosefa natuna, nene? Ĝia tamana e sinana tu ĝita ribara. Ma kamara dabarai ĝia tu ekirani, ‘Au tu guba na amariĝoto?’”

<sup>43</sup> Iesu na evaĝa-veserito, ekirato, “Ĝomi tauĝemi fakami ai mugumugu ĝovaĝa-dooka. <sup>44</sup> Au ĝegu ai ta asi beiaĝoma-kavani, senaĝina Tamagu, au etuĝuguto Barauna, ĝia na deikara au ĝegu ai beinu-kaviani tarimana moĝo. Ema au ĝegu ai beiaĝomani tarimana tu, au na ĝaro dokonai mase na bavaĝa-variĝisi ĝenoĝoiani. <sup>45</sup> Peroveta tarimari na maiĝesi ĝetoreato, ‘Ĝia mabarari Barau na bevaĝa-ribarini.’ Tamagu ĝeseĝaĝi-viniani ema ĝenana riba ĝeĝabini tarimari mabarari tu, au ĝegu ai beĝe iaĝomani. <sup>46</sup> Au tu asi akirani, tarima ta na Tamagu eĝitaiato atoni, senaĝi Barau ĝenana eiaĝomato tarimana ĝereĝana na moĝo Tamagu eĝitaiato. <sup>47</sup> Moĝoni akiramini, au evaĝa-moĝoniguni tarimana na maĝuri vanaĝivanaĝi beĝabiani. <sup>48</sup> Maĝuri beredina tu au maiĝegu. <sup>49</sup> Ĝomi senemi na tano fakanai mana ĝeĝanito-ĝoi, senaĝi ma ĝemaseto. <sup>50</sup> A guba na emariĝoni beredina tu maiĝea, ĝia beĝaniani tarimana tu asi bemaseni. <sup>51</sup> Au tu maĝuri beredina guba na amariĝoto. Tarima ta na

mai beredi beġaniani, ġia tu bemaġuri-vanaġi vanaġini. Mai beredi au na baviniiani tu au viriġogu. Au viriġogu bavini-fitoġaiiani korana tu, tanobarai ġetanuni tarimari na maġuri beġene ġabia ġana.”

<sup>52</sup> Mainana Iuda tarimari tauġeri fakari ai veġare-veġare baregona eġorato, ġia ġekirato, “Mai tarima na tu kamara dabarai ġia viriġona bevinirani bita ġaniani?”

<sup>53</sup> Iesu na ekirarito, ekirato, “Moġoni akiramini, bema ġomi na Tarimarima Natuna viriġona asi boġo ġaniani ema rarana asi boġo niuani nai, ġomi nuġami ai maġuri asi betanuni. <sup>54</sup> Deikara na au viriġogu beġaniani ema raragu beniuani tarimana tu, maġuri vanaġivanaġi beġabiani, ema au na ġaro dokonai mase na bavaġa-variġisi ġenoġoiani. <sup>55</sup> Korana au viriġogu tu ġaniġani korikorina, ema au raragu maki niuniu dagarana korikorina. <sup>56</sup> Deikara au viriġogu beġaniani e raragu beniuani tarimana tu, au nuġagu ai betanuni, ema au maki ġia nuġanai batanuni. <sup>57</sup> Tamagu maġurina na etuġuguto ema au tu ġia koranai amaġurini. Moġa ilailanai au viriġogu beġaniani tarimana maki bemaġurini, korana au amaġurini. <sup>58</sup> Au tu guba na emariġoto beredina maiġegu. Ġomi senemi tu mana ġeġanito ma ġemaseto. Senaġi mai beredi beġaniani tarimana tu bemaġuri-vanaġi vanaġini.” <sup>59</sup> Iesu na maiġeri guruġa Iuda tarimari rubu ai ekiraġirito, Kaperanaumai evevaġa-ribato-ġoi nuġanai.

### Maġuri vanaġivanaġi guruġari

<sup>60</sup> Iesu ġena mero ġutuma na mai guruġa ġeseġaġiato nai tu, ġekirato, “Mai vevaġa-riba guruġana tu gwaġiġi rakava, dei na beġabi-raġeani.” <sup>61</sup> Iesu ribana ġena mero na mo guruġa ġemugumugu-iaġiato-ġoi, benamo ekirarito, ekirato, “Mai guruġa na bevaġa-daġa-raġemi? <sup>62</sup> Bema ġomi na Tarimarima Natuna boġo ġitaiiani, beġenoġoi-varaġeni, etanu-iaġiato gabuna ġana tu kamasi? <sup>63</sup> Barau laukana na maġuri evinirani; tauġani na asi bevaġa-kavarani. Au na avaġa-guruġamini guruġari tu lauka, ema ġia nuġari ai tu maġuri etanuni. <sup>64</sup> Senaġi ġomi kotari na tu asi ġovaġa-moġoniguni.” Iesu ribana tovtovona na veġata, deikara ta na tu asi evaġa-moġoniato-ġoi ema deikara na maki ġia berevaiani. <sup>65</sup> Ma ekirato, “Moġesina naima au na akiramito, ta au ġegu ai asi beiaġoma-kavani, senaġi Tamagu na bevaġa-moġoniani tarimana vau beiaġomani.”

<sup>66</sup> Mo guruġa ġeseġaġiato, monana Iesu ġena mero ġutuma ġia ġenana ġerakaveġitato, ema ġia ġesi asi ma ġerakao-vegogoto-ġoi. <sup>67</sup> Benamo Iesu na ġena mero gabanana ruarua (12) edanaġirito, ekirato, “Ġomi maki ġourani boġono raka-veġita ba?”

<sup>68</sup> Simona Petero na evaġa-veseato, ekirato, “Vereġauka, ġai tu deikara ġenai ma baġa iaġoni? Maġuri vanaġivanaġi guruġari tu ġoi ġemu ai. <sup>69</sup> Ġai na ġavaġa-moġonimuni ema ġariba-korikorini, ġoi tu Barau ġena Veaġa Tarimana.”

<sup>70</sup> Iesu evaġa-veseto, ekirato, “Au na ġomi gabanana ruarua (12) aġabi-viriġimito nene? Senaġi sebomu ta tu bodiablo.” <sup>71</sup> Ġia na tu Iudas, Simona Isakariota natuna, ekiraġiato. Iudas maki mo mero gabanana ruarua (12) fakari merona ta, senaġi ġia na Iesu vau berevaiani.

### Iesu ma tarina merori ġesi

**7** Moġa murinai Iesu tu Galileai erakaoto-ġoi. Ġia asi eurato, Iudea ġana bene iaġo, korana Iuda tarimari monai ġeri ura tu, ġia beġene vaġia. <sup>2</sup> Iuda tarimari ġeri Fouta Verekona ġarona ekavinaġito. (Mai fouta verekona ġeveiato-ġoi nai tu,



fouta ġeragato-ġoi, benamo nuġari ai ġetanuto-ġoi, korana seneri tano fakanai fouta nuġari ai ġetanuto-ġoi, moġa beġene tuġamaġi-iaġia ġana). <sup>3</sup>Benamo Iesu tarina merori na ġekiraiato, ġekirato, “Mai gabu noraga-kwanea, Iudea ġana bono iaġo, benamo oveirini dagarari ġemu mero na beġene ġitari. <sup>4</sup>Korana deikara tauġena bene vevaġa-fofori etoni tarimana, beġene ribaia uranai tu, kara ta asi bevei-vekuretoġaiani. Ma ġoi tu maiġeri veġa oveirini, be tanobara mabarari ai novevaġa-fofori!” <sup>5</sup>Korana Iesu tarina mabarari na maki ġia tu asi ġevaġa-moġoniato-ġoi.

<sup>6</sup>Moġa lorinai Iesu na ekirarito, ekirato, “Au ġegu ġaro tu roġosi bene raġasi. A ġomi ġemi ai ġaro mabarari tu loriri ai moġo. <sup>7</sup>Tanobara na ġomi tu asi ebaru-vinimini, senaġi au tu ebaru-viniguni, korana au tu veġa rakavari eveirini dagarari akiraġi-foforirini. <sup>8</sup>Ġomi boġono iaġo mo vereko ġana. A au tu asi baiaġoni, korana au ġegu ġaro korikori tu roġosi roġo bene raġasi.” <sup>9</sup>Iesu moġesi ekirato, benamo Galileai etanuto.

### Iesu Ierusalem a i

<sup>10</sup>Iesu tarina merori ġeiaġoto mo vereko ġana, muriri ai Iesu maki ma eiaġoto. Senaġi asi eraka-foforito, a vekuretoġai eiaġoto. <sup>11</sup>Mo vereko gabuna Iuda tari-mari na tu mo vereko nuġanai ġevetauato-ġoi, ġevedanaġi-vedanaġito-ġoi, ġekirato-ġoi, “Ġia tu ainai?” <sup>12</sup>Mo ġutuma-bara nuġanai Iesu kiraġi-ġairiġairina tu ebarego-rakavato. Tarima kotari ġekirato-ġoi, “Ġia tu tarima namona” ġetato. Ma kotari tu ġekirato-ġoi, “Asiġi, ġia na tarimarima eġorikau-darere darererini.” <sup>13</sup>Senaġi tarima ta na asi eguruġa-iaġi foforiato, korana ġia mabarari Iuda vereri gariri ġeveito-ġoi.

<sup>14</sup>Vereko ġarori kotari ġekorito, kotari roġo moġeri nuġanai vau, Iesu Rubu Veaġai eraka-toġato, benamo evevaġa-ribato. <sup>15</sup>Benamo Iuda tarimari ġeġaba-vedaureato, ġekirato, “Mai tarima vevaġa-riba guruġari tu kamasi eribato, ġia vevaġa-riba gabuna ta ġana riba-vetau tu asi eiaġoto.” <sup>16</sup>Iesu evaġa-veseto, ekirato, “Kara au avevaġa-riba iaġini tu dia au ġegu vevaġa-riba, senaġi au etuġuguto Barauna ġenana ġeiaġomani. <sup>17</sup>Bema tarima ta eurani Barau ġena ura bene veiri etoni tarimana na, au ġegu vevaġa-riba guruġari beribarini. Beribani, au ġegu vevaġa-riba guruġari Barau ġenana ġeiaġomani, o au tauġegu ġeguna moġo. <sup>18</sup>Tarima ta deikara ġena ura guruġari ekiraġini tu, tauġena arana vaġa-raġena dabarana eve-tauani. Senaġi au etuġuguto Barauna vaġa-raġena dabarana eveiani tarimana ġenai tu, guruġa moġonina etanuni, a ġia ġenai ġofaġofa ta tu asi etanuni. <sup>19</sup>Mose na ġomi taravatu tu evinimito, ene? Senaġi ġomi ta na mo taravatu tu asi ġokorana-iaġiani. Ma karase nai ġomi na au tu ġovaġigu ġotoni?”

<sup>20</sup>Mo tarimarima ġutuma ġevaġa-veseto, ġekirato, “Ġoi tu iauka rakavana ta na eboroġimuto. Deikara na nevaġimu otoni?” <sup>21</sup>Iesu na evaġa-veserito, ekirato, “Au na mainai Ierusalem ai veġa boruna sebona aveiato nai, ġomi mabarabarami nuġami ġefarevaġini. <sup>22</sup>Mose na mero tauġaniri kefi-lamavaġi veġana evinimito, moġa lorinai ġomi na mero keiri Sabadi ai maki kefiri ġolama-vaġirini. Mo kefi-lamavaġi veġana tu dia Mose na esinaiato, senaġi ġomi senemi na ġesinaiato. <sup>23</sup>Bema mero tauġaniri kefiri Sabadi ai ġolama-vaġirini Mose ġena taravatu boġo vanaġiani ġesi, kara dainai au tu ġobaru-viniguni, Sabadi ai tarima ta bavaġa-namo ginikaua nai, ei? <sup>24</sup>Ġomi na dagara tu murikari vetoġari ai asi boġono ġita-viriġiri, senaġi dagara mabarari veġa roroġotori ai boġono ġita-viriġiri.”

### Mai tarima tu Keriso ba?

<sup>25</sup> Benamo Ierusalemata tarimari kotari ġekirato, “Mai beġene vaġia ġetoni tarimana tu maiġa. <sup>26</sup> Ġoġitaia, ġia tu ma guguraġina ġesi eguruġani, ma ta na ġenai guruġa ta asi ekiraġiani. Ba betaġu kanisoro tarimari beġe riba, Keriso korikorina tu maiġa. <sup>27</sup> Senaġi Keriso, (Barau na ekiraġi-toreato vevaġa-maġuri tauna), beiaġomani nai, ta asi beribani ġia tu ainana beiaġomani. A mai tarima ainana eiaġomato ġita tu mabarara ma ribara.”

<sup>28</sup> Iesu roġo Rubu Veaġai evevaġa-ribato-ġoi nuġanai, eguruġa-baregato, ekirato, “Moġoni, ġomi ma ribami au tu deikara e ainana aiaġomato. Senaġi au tu dia tauġegu ġegu urai moġo aiaġomato. Au etuġuguto Barauna tu moġoni. Ma ġomi tu asi ribami ġia. <sup>29</sup> Senaġi au ġia tu ma ribaġu, korana au tu ġia ġenana aiaġomato e ġia na etuġuguto.”

<sup>30</sup> Benamo ġeġabi-taria ġetato, senaġi tarima ta ġimana ġia ġenai asi even-abakauto, korana ġena ġaro korikori tu roġosi bere votu bene. <sup>31</sup> Senaġi tarimarima vovoka mai ġutuma nuġanai ġia ġevaġa-moġoniato, ġekirato, “Keriso beiaġomani nai, vetoġa boruri veiveiri ai mai tarima bevanaġiani ba?”

### Nariġau tarimari ġetuġurito Iesu beġene ġabia ġana

<sup>32</sup> Farisea tarimari ġeseġaġito, tarimarima ġutuma na mo guruġa Iesu ġenai ġekiraġi-ġairiġairito-ġoi. Moġa ġaramanai Farisea tarimari e Rubu Veaġa vereri baregori na Rubu Veaġa ġitaġauna tarimari kota ġetuġurito, Iesu beġene ġabia ġana.

<sup>33</sup> Iesu ekirato, “Au tu ġaro viravira moġo ġomi ġesi bita tanuni, moġa murinai ma baraka-veġitani, etuġuguto Barauna ġenai baiaġoni. <sup>34</sup> Ġomi na boġo vetauguni, senaġi asi boġo doġariguni; ema au batanuni gabuna ġana, ġomi tu asi boġo iaġoni riba.”

<sup>35</sup> Benamo Iuda tarimari tauġeri ġevedanaġito, ġekirato, “Ġia tu aiġana beiaġoni, be ġita na asi bita doġariani riba etoni? Betaġu ġia tu beiaġoni irau bese tarimari ġeri tanobara ġana, Iuda tarimari ġutuma maki ġia fakari ai ġetanuni gaburi, monai irau bese tarimari bea vaġa-ribarini. <sup>36</sup> Mai tu kamara guruġa ġia na ekiraġiani, ekirani, ‘Boġo vetauguni, senaġi asi boġo doġariguni,’ ema, ‘Au batanuni gabuna ġana ġomi tu asi boġo iaġoni riba?’”

### Maġuri eviniani nanuna

<sup>37</sup> Vereko magona ġarona, mo tu ġaro barego lelevaġina, Iesu eruġa-vaesito, benamo eguruġa-fouto, ekirato, “Deikara nanu na bokana bekokeni tu, au ġegu ai bene iaġoma, nanu benema niu. <sup>38</sup> Buka Veaġa nuġanai ekirani ilailanai, ekirani, ‘Au bevaġa-moġoniguni tarimana nuġana na tu maġuri nanuna beġaru-rosini.’” <sup>39</sup> Iesu na Iauka moġesi ekiraġiato-ġoi, kamara tarima Iesu ġevaġa-moġoniani tarimari na vau beġe ġabiani. Mo ġaro ai Iauka Veaġa tu Barau na roġosi bere viniri, korana Iesu na Barau ġena mareva baregona maki roġosi bere ġabia nai.

### Tarimarima tauġeri ġevetavito

<sup>40</sup> Tarima kota mo ġutuma nuġari ai mo guruġa ġeseġaġiato, benamo ġekirato, “Moġoni, ġita na peroveta tarimana tanariani tarimana tu maiġea.” <sup>41</sup> Tarima kotari ġekirato, “Mai tu Keriso.” Senaġi kotari ġekirato, “Asiġi, Keriso tu Galilea na asi

beiaĝomani. <sup>42</sup> Buka Veāga nuĝanai ekirani, Keriso tu Davida besena na beiaĝomani, ema Betelehemai, Davida etanuto-ĝoi vanuĝanai, bemaĝurini.” <sup>43</sup> Moĝesina naima tarima tauĝeri fakari ai moĝo ĝevetore-kirato, korana Iesu ĝaramanai. <sup>44</sup> Tarima kota ĝeurato beĝene ĝabia, senaĝina ta ĝimana ĝia ĝenai asi evenabakauto.

### Iuda vereri na Iesu asi ĝevaĝa-moĝoniato

<sup>45</sup> Rubu Veāga ĝitaĝauna tarimari ĝeĝenoĝoito, benamo Rubu Veāga vereri baregori ema Farisea tarimari na ĝedanaĝirito, ĝekirato, “Karase nai ĝia tu asi boĝo ĝori-iaĝomaia?” <sup>46</sup> Rubu Veāga ĝitaĝauna tarimari ĝevaĝa-veseto, ĝekirato, “Mai tarima eguruĝani kavana, ta roĝosi bene guruĝa.” <sup>47</sup> Benamo Farisea tarimari na ĝekirarito, ĝekirato, “Be, ĝomi maki ĝia na beĝofami? <sup>48</sup> Veĝorikau tarimana ta o Farisea tarimana ta na ĝia evaĝa-moĝoniani ba? Asiĝina! <sup>49</sup> A mai tarimarima na ĝevaĝa-moĝoniani, ĝia tu Mose ĝena taravatu asi ribari tarimari. Barau na ĝeri rakava voiri bevinirini.”

<sup>50</sup> Farisea tarimana ta monai arana Nikodemo. Ĝia tu boĝi ta eiaĝoto Iesu ea ĝi-taiato tarimana. Ĝia na ekirarito, ekirato, <sup>51</sup> “Ĝita ĝera taravatu ekirani, tarima tu ĝena guruĝa ĝeseĝaĝi-guineani roĝo, moĝa murinai vau ĝena rakava voina metona beĝe viniani.” <sup>52</sup> Ĝia na ĝevaĝa-veseato, ĝekirato, “Ĝoi maki Galilea tarimamu ba? Buka Veāga nuĝana bono vetaua, monana boribani, peroveta tarimana ta Galilea na tu asi beiaĝomani.”

[<sup>53</sup> Benamo tarimarima mabarari ĝeri numa ĝana ĝeiaĝoto.

### Veĝura-vanaĝi vavinena

**8** Senaĝi Iesu tu Olive Ĝorona ĝana eiaĝoto. <sup>2</sup> Ma elaĝanito boĝiboĝi iamoiamo tu ĝia ma eĝenoĝoito Rubu Veāga ĝana. Monai tarimarima mabarari ĝeiaĝomato ĝenai, ĝetanu-ĝeĝeraĝiato, benamo etanu-tarito, evaĝa-ribarito. <sup>3</sup> Benamo taravatu ĝevevaĝa-riba iaĝirito-ĝoi tarimari e Farisea tarimari na vavine ta Iesu ĝenai ĝeĝori-iaĝoato. Mo vavine tu eveĝura-vanaĝito-ĝoi nuĝanai ĝedoĝariato, benamo ĝeĝori-iaĝoato mo, Iesu ĝesi ĝetanu-taĝoto-ĝoi tarimari mabarari ĝoirari ai ĝea vaĝa-ritoĝoato. <sup>4</sup> Iesu ĝekiraiato, ĝekirato, “Vevaĝa-riba tarimamu, mai vavine tu eveĝura-vanaĝini-ĝoi nuĝanai beĝe ĝoitaĝoa. <sup>5</sup> Ma Mose ĝena taravatu ekirani, moĝesi beĝe veini vavineri tu, fore na baĝana taki-maseri. Ĝoi tu kara mani otoni?” <sup>6</sup> Moĝesi ĝekirato tu, Iesu ĝeriba-ĝaniato, beĝene vaĝa-daĝaia ĝana. Senaĝi Iesu etutuĝu-tarito, tano ai didina ta na etoretoreto. <sup>7</sup> Ĝia na roĝo Iesu ĝedanaĝiato-ĝoi nai, eruĝa-vaisito, benamo ekirarito, ekirato, “Deikara ĝomi fakami ai roĝosi roĝo bene vei-rakava nai tu, ĝia na fore bene ĝabia, mai vavine bene ĝidara-guinea.” <sup>8</sup> Benamo Iesu ma etoĝa-tarito, tano ai ma etoretoreto. <sup>9</sup> Ĝia na mo guruĝa ĝeseĝaĝiato nai, ĝia tata nuĝari ai ĝeribato ma ĝeri vei-rakava, benamo irau sebori-sebori ĝerakaraka-veĝitato; tau ĝaukari ĝeraka-guineto murinai vau ĝuru-gabi ma ĝerakato. Iesu ĝereĝana moĝo etanuto, monai roĝo eruĝa-taĝoto-ĝoi vavinena ĝesi.

<sup>10</sup> Ĝia eruĝa-vaisito nai tu, tarima ta asi eĝitaiato, mo vavine moĝo, benamo edanaĝiato, ekirato, “Ĝoi beĝe vaĝa-daĝamu tarimari tu aiĝeri? Ta na ĝemu rakava voina metona asi bevinimu?” <sup>11</sup> Mo vavine evaĝa-veseto, ekirato, “Vereĝauka, sebona ta maki asiĝina.” Benamo Iesu ekirato, “Au na maki ĝemu rakava voina metona asi bavinimuni. Noiaĝo, senaĝi asi ma bono vei-rakava ĝenoĝoi.”]

### Iesu tanobara mamana

<sup>12</sup> Benamo Iesu na tarimarima ma eḡobata-vinirito, ekirato, “Au tu tanobara mamana. Deikara au murigu ai berakani tarimana tu, mukunai asi berakani, senaḡi maḡuri mamana beḡabiani.”

<sup>13</sup> Farisea tarimari na ḡekiraiato, ḡekirato, “Ḡoi tu tauḡemu ovekiraḡini; be ḡoi ḡemu vekiraḡi tu asi moḡoni.” <sup>14</sup> Iesu evaḡa-veseto, ekirato, “Asiḡi, au tauḡegu avekiraḡini, senaḡina au na kara akiraḡiani tu moḡoni. Korana au ribagu ainana aiaḡomato ema aiḡana ma baiaḡoni. A ḡomi tu asi ribami au ainana aiaḡomato ema aiḡana ma aiḡoni. <sup>15</sup> Ḡomi tu tarimarima ḡeri vevaḡa-maoro dabaranai ḡovevaḡa-maoroni. Au na ta tu asi avavaḡa-maoroani. <sup>16</sup> Senaḡi bema au bavevaḡa-maoroni nai, ḡegu vevaḡa-maoro tu moḡoni. Korana au tu dia ḡereḡagu moḡo avevaḡa-maoroni, senaḡina Tamagu, au etuḡuguto Barauna, au ḡesi baḡa vevaḡa-maoroni. <sup>17</sup> Ḡomi ḡemi taravatu ai maki maiḡesi ekirani, tarima ruarua na guruḡa sebona moḡo ḡekiraḡiani nai tu moḡoni. <sup>18</sup> Au tu tauḡegu avekiraḡini; ema Tamagu, etuḡuguto Barauna, na maki au ekiraḡiguni. <sup>19</sup> Benamo ḡia na ḡedanaḡiato, ḡekirato, “Ḡoi tamamu tu ainai?” Iesu evaḡa-veseto, ekirato, “Ḡomi tu asi ribami au, ma Tamagu maki asi ribami. Bema au boḡoro ribagu tu, Tamagu maki ḡoro ribaia.”

<sup>20</sup> Iesu na mai ḡena guruḡa tu Rubu Veaḡai evevaḡa-ribato-ḡoi, moni ḡevaḡa-vegogoto-ḡoi mauḡana gabunai. Tarima ta asi evenabakauto ḡenai, korana ḡia ḡena ḡaro roḡosi bere votu.

### Au baiaḡoni gabuna ḡana ḡomi tu asi boḡo iaḡoni riba

<sup>21</sup> Iesu na ma evaḡa-guruḡa ḡenoḡoirito, ekirato, “Au tu araka-veḡitani. Ma ḡomi na boḡo vetauguni, senaḡi ḡemi vei-rakava nuḡanai boḡo maseni. Au baiaḡoni gabuna ḡana, ḡomi tu asi boḡo iaḡoni riba.” <sup>22</sup> Benamo Iuda tarimari ḡekirato, “Ḡia bekira, ḡia beiaḡoni gabuna ḡana ḡita tu asi bita iaḡoni. Moḡa tauna ḡia tu tauḡena bevevaḡini ba?” <sup>23</sup> Iesu evaḡa-veseto, ekirato, “Ḡomi tu mai tanobara maiḡa mainana eveimito, senaḡi au tu tuḡuna na amariḡoto. Gomi tu mai tanobara tarimari, senaḡi au tu dia mai tanobara tarimagu. <sup>24</sup> Moḡa lorinai au na ḡomi bakirami, ḡemi rakavai boḡo maseni. Korana bema au, Keriso, asi boḡo vaḡa-moḡoniguni nai tu, ḡemi rakavai boḡo maseni.”

<sup>25</sup> Benamo ḡia na ḡedanaḡiato, ḡekirato, “Ḡoi tu deikara?” Iesu na ma evaḡa-veserito, ekirato, “Tovotovonai veḡata ḡemi akiraḡito-ḡoi kavana. <sup>26</sup> Guruḡa vovoka bara kiraḡiri ema bara vevaḡa-maoro vinimi, korana ḡemi veiḡa lorinai. Senaḡina sebona moḡo, au etuḡuguto Barauna tu moḡoni, ma ḡia ḡenana aseḡaḡito guruḡari tanobarai ḡetanuni tarimari akira-vararini.”

<sup>27</sup> Ḡia tu asi ḡetuḡamaḡi-fakato Iesu na mo tu Tamana ekiraḡiato-ḡoi. <sup>28</sup> Benamo ma ekirarito, ekirato, “Ḡomi na Tarimarima Natuna ḡau ḡesi boḡo ḡabi-vaisiani murinai vau, boḡo ribani au tu Keriso. Benamo boḡo ribani, au ḡereḡagu na kara ta ḡegu urai moḡo asi aveiani, senaḡi Tamagu na au kara evaḡa-ribaguni guruḡari moḡo, au na ḡomi akira-varamini. <sup>29</sup> Ema au etuḡuguto Barauna tu au ḡesi, au asi eraga-kwaneguni; korana au na vanaḡi-vanaḡi tu ḡia na eiaku-iaḡirini veiḡari moḡo aveirini.” <sup>30</sup> Tarima vovoka na Iesu ḡevaḡa-moḡoniato, maiḡeri guruḡa ekiraḡirito-ḡoi nai.

### Aberhamo natuna

<sup>31</sup> Benamo Iesu na mo Iuda tarimari, ġia ġevaġa-moġoniato tarimari, ekirarito, ekirato, “Bema ġomi na au ġegu vevaġa-riba guruġari boġo korana-iaġirini nai, ġomi tu moġoni au ġegu mero korikori. <sup>32</sup> Benamo guruġa moġonina boġo ribaiani, ma mo guruġa moġonina na beruġa-vaġimini, dagara ta na asi ma bebarubarumini.”

<sup>33</sup> Ġia ġevaġa-veseto, ġekirato, “Ġai tu Aberhamo garakana ema ġai tu tarima ta ġena tuġu-rakaorakao tarimanai tu asi ġaiaġoto. Ma ġoi kamasi nai tu okirani, ‘Guruġa moġonina na beruġa-vaġimini?’”

<sup>34</sup> Iesu na evaġa-guruġarito, ekirato, “Akira-korikorimini, deikara rakava eveini, ġia tu vei-rakava ġena tuġu-rakaorakao tarimana. <sup>35</sup> Tuġu-rakaorakao tarimana tu numai asi betanu-vanaġi vanaġini, senaġi numa tarimana natuna tu numai betanu-vanaġi vanaġini. <sup>36</sup> Moġa lorinai bema Barau Natuna na beruġa-vaġimini nai, ġomi tu boġo raka-vaġi korikorini, dagara ta na asi ma bebarubarumini.

<sup>37</sup> Au ribagu ġomi tu Aberhamo garakana, senaġi ġomi ġourani, au tu boġono vaġigu, korana ġomi na ġegu vevaġa-riba guruġari tu, asiġina ġinavaġi moġo ġoġabiraġerini. <sup>38</sup> Au na tu kara Tamagu ġenai aġitarito dagarari ġomi akira-varamini, a ġomi tu tamam ġenana ġoseġaġito dagarari ġomi na ġoveirini.”

<sup>39</sup> Ġia na Iesu ma ġevaġa-veseato, ġekirato, “Ġai tamama tu Aberhamo.” Iesu na evaġa-veserito, ekirato, “Bema ġomi moġoni Aberhamo natuna nai, ġia na eveirito veiġari ġomi na maki ġoro veiri. <sup>40</sup> Au tu Barau ġenana aseġaġirito guruġari moġoniri mabarari ġomi akira-varamini, senaġi ġomi ġourani tu, au ġovaġigu ġotoni. Aberhamo moġesi asi eveito. <sup>41</sup> Ġomi tu tauġemi tamam, (Diabolo), na kara eveini veiġana ġoveiani.” Ġia ġevaġa-veseto, ġekirato, “Ġai tu dia kuġa-gara tarimama. Ġai Tamama tu Barau moġo ġereġana.”

### Diabolo natuna

<sup>42</sup> Iesu na ekirarito, ekirato, “Bema Barau moġoni ġomi Tamami nai tu, au ġoro ura-vinigu. Korana au tu Barau sevina na aiaġomato. Au ġegu urai asi aiaġomato, senaġi ġia na etuġuguto. <sup>43</sup> Karase nai au na kara akiraġiani guruġana asi ġotuġa-maġi-fakani? Korana au ġegu guruġa tu asi ilaila boġo seġaġirini. <sup>44</sup> Ġomi tu tamam Diabolo ġena tarimarima, be ġomi ġourani tu tamam na euravini-rakavarini veiġari boġono veiri. Tovotovona na veġata ġia tu vevaġi-deba tarimana ema guruġa moġonina tu asi ekorana-iaġiani, korana ġia nuġanai guruġa moġonina ta tu asi etanuni. Ġia eġofaġofani, moġa tu ġia ġena maġuri korikori. Korana ġia tu ġofaġofa tarimana, ema ġofaġofa mabarari tamari. <sup>45</sup> Senaġi au na ġomi tu guruġa moġonina akira-varamini, nuġanai ġomi na au tu asi ġovaġa-moġoniguni. <sup>46</sup> Ġomi ta na au ġegu ai vei-rakava ta bodoġaria ba? A bema au na guruġa moġonina akiraġiani nai, kara dainai au tu asi ġovaġa-moġoniguni, ei? <sup>47</sup> Barau natuna na Barau ġena guruġa beġeġaġiani. A ġomi tu dia Barau natuna, moġa lorinai asi ġoseġaġini.”

### Iesu ema Aberhamo

<sup>48</sup> Benamo Iuda tarimari na Iesu ġekiraiato, ġekirato, “Ġai tu moġoni ġamaoroni. Ġoi tu Samaria tarimamu ema iauka rakavana na beboroġimu.” <sup>49</sup> Iesu evaġa-veseto, ekirato, “Au tu iauka rakavana na asi beboroġigu. Au tu Tamagu agubakauani, senaġi ġomi na au tu asi ġogubakauguni. <sup>50</sup> Au tauġegu aragu vaġa-raġena dabarana

asi avetauani; senaġi tarima ta na evetauani, ma ġia tu Kota eseġaġini tarimana. <sup>51</sup> Moġoni veġata, akiramini, au ġegu guruġa bekorana-iaġirini tarimana tu asi bemaseni.”

<sup>52</sup> Iuda tarimari ġekirato, “Ġai toma baġa riba-ginikau, ġoi tu iauka rakavana na eboroġimuto. Aberahamo emaseto, peroveta tarimari maki ġemaseto, a ġoi okirani, deikara na ġoi ġemu guruġa bekorana-iaġirini tarimana tu asi bemaseni. <sup>53</sup> Ġai tamama Aberahamo emaseto. Ġoi na ġia, tamama Aberahamo, ovanaġiato, ei? Ġia emaseto ema peroveta tarimari maki ġemase-ġosito. Ġoi otuġamaġini, ġoi tu deikara?”

<sup>54</sup> Iesu evaġa-veseto, ekirato, “Bema au tauġegu bara vevaġa-raġe, ġegu vevaġa-raġe tu asi tauna. Senaġina au tu Tamagu na evaġa-raġeguni. Ma ġia tu ġomi na ġokiraġiani, ġokirani, ġomi ġemi Barau ġotoni. <sup>55</sup> Ġomi tu asi ribami ġia, senaġi au tu ma ribagu ġia. Bema au bara kira, au asi ribagu ġia, au tu ġofaġofa tarimagu ġomi kavana, senaġi au ma ribagu ġia ema ġena guruġa akorana-iaġirini. <sup>56</sup> Ġomi tamami Aberahamo etuġa-maġito, au ġegu iaġoma ġarona beġitaiani etato, benamo eiaġuto. Eġitaiato, benamo iauna enamoto.”

<sup>57</sup> Iuda tarimari na Iesu ġekiraiato, ġekirato, “Ġoi ġemu maġuri laġaniri tu gabana imaima (50) maki roġosi bene doġaria, ma kamasi tu Aberahamo oġitaiato otoni?” <sup>58</sup> Iesu na evaġa-veserito, ekirato, “Moġoni akiramini, Aberahamo roġosi roġo bere ġora veġata, au tu atanuto-ġoi.” <sup>59</sup> Benamo fore ġeġabitto, ġetakia ġetato, senaġi Iesu egumuto, benamo veġaravari na Rubu Veaġa na eraka-rosito.

### Iesu na mata-bubu tarimana evaġa-namoato

**9** Iesu eraka-vanaġito-ġoi nuġanai, tarima ta eġitaiato. Mo tarima tu mata-bubu emaġurito. <sup>2</sup> Ġena mero na Iesu ġedanaġiato, ġekirato, “Vevaġa-riba tarimamu, deikara evei-rakavato, benamo mai tarima matana bubu emaġurito? Ġia ba tamana sinana?” <sup>3</sup> Iesu evaġa-veseto, ekirato, “Dia ġia ġena rakava o dia tamana sinana ġeri rakava dainai, senaġi maiġesi evetoreto korana tu, Barau ġena seġuka ġia ġenana bene fofori ġana. <sup>4</sup> Au etuġuguto Barauna ġena ġauvei tu laġani nuġanai bisini veiri. Boġi mani eiaġomani, ma ta asi beġauveini riba. <sup>5</sup> Au roġo tanobarai atanuni nuġanai, au tu tanobara mamana.”

<sup>6</sup> Mai guruġa ekiraġiato murinai, Iesu tano ai ekanunuto. Kanununa na nigo emoġeato, benamo mo nigo na mata-bubu tarimana matana eianaiato. <sup>7</sup> Ma ekiraiato, ekirato, “Noiaġo, ġoiramu Siloam kounai noa ġuriġia.” Siloam anina tu “Barau na etuġuato tarimana.” Benamo eiaġoto, ġoirana ea ġuriġiato, ma eġenoġoito nai, matana tu varau eiaġaiao.

<sup>8</sup> Ġia sevina tarimari e vanaġi-vanaġi enoġinoġito-ġoi gabunai ġeġitaiao-ġoi tarimari ġevedanaġito, ġekirato, “Mai tarima tu noġinoġi gabunai etanu-taġoto-ġoi tarimana ene?” <sup>9</sup> Kota ġekirato, “Tarimana tu maniġa.” Senaġi kota ġekirato, “Asiġina, mani tu tarima boruna ta, senaġina ġitaġitana moġo ġia kavana.” Benamo ġia tauġena ekirato, “Tarimana tu au maiġegu.” <sup>10</sup> Tarimarima ġekirato, “Be ġoi matamu tu kamasi boiaġaia?” <sup>11</sup> Ġia evaġa-veseto, ekirato, “Mo tarima arana Iesu, ġia na nigo bemoġea, ma au matagu ai beianaia, benamo bekiragu, ‘Siloam kounai noa ġuriġia.’ Baiġo, baġuriġia, benamo matagu baiġaia.” <sup>12</sup> Ma ġedanaġiato, ġekirato, “Tarimana tu aiġa?” Ġia evaġa-veseto, ekirato, “Au asi ribagu.”

### Farisea tarimari na mo enamoto tarimana ġevdanaġi-iaġiato

<sup>13</sup> Benamo matana enamoto tarimana Farisea tarimari ġeri ai ġeġori-iaġoato. <sup>14</sup> Mo ġaro Iesu na nigo emoġeato, ma mata-bubu tarimana matana evaġa-namoato tu Sabadi ġarona. <sup>15</sup> Moġa lorinai Farisea tarimari na ma ġedanaġi-ġenoġoiato, kamasi matana eiaġaiato. Ġia na ekirarito, ekirato, “Mo tarima na matagu nigo na eianaiato, benamo ġoiragu aġuriġiato, ma toma tu aboġeboġeni.” <sup>16</sup> Farisea tarimari kotari ġekirato, “Mai tarima tu dia Barau ġenana eiaġomato, korana ġia na Sabadi asi ekorana-iaġiani.” Ma kotari ġekirato, “Vei-rakava tarimari na moġesina veiġari tu kamasi beġe veirini?” Monana ġia tauġeri fakari ai ġevetavi-kirato.

<sup>17</sup> Benamo Farisea tarimari na mo tarima ma ġedanaġiato, ġekirato, “Ġoi okirani ġia na matamu bevaġa-iaġaia otoni? Ġoi na ġia tu kamasi oġitaiani?” Ġia evaġaveseto, ekirato, “Ġia tu peroveta tarimana.” <sup>18</sup> Iuda tarimari na mai tarima ġena guruġa asi ġevaġa-moġoniato, korana ekirato, “Tovotovonai au matagu tu bubu, a mai vau aboġeboġe-ġinikauni.” Moġa lorinai tamana e sinana ġekea-iaġomarito. <sup>19</sup> Benamo ġia na ġedanaġirito, ġekirato, “Mai tu ġomi natumi ba? Ma moġoni ġia tu mata-bubu emaġurito ġotoni? Ma kamasi nai tu vau mai ma eboġe-boġeni?” <sup>20</sup> Benamo tamana e sinana ġevaġa-veseto, ġekirato, “Ġai ribama, ġia tu ġai natuma, ema ġai ribama maki, ġia tu mata-bubu emaġurito. <sup>21</sup> Senaġi ġai tu asi ribama, maitoma tu kamara dabarai eboġeboġeni. Ġai maki asi ribama, dei na matana bevaġa-namoa. Ġodanaġia, ġia tu mero barego, be tauġena bevaġa-veseni.” <sup>22</sup> Tamana e sinana moġesi ġekirato, korana Iuda tarimari gariri ġeveito nai. Korana Iuda tarimari na ġevaġa-moġoniato, tarima ta na Iesu bekiraġiani Keriso betoni tarimana tu, rubu na beġe tore-veġitaiani. <sup>23</sup> Moġesi naima tamana e sinana ġekirato, “Ġia mero barego, be ġodanaġia,” ġetato.

<sup>24</sup> Matana enamoto tarimana ma ġekea-ġenoġoiato, benamo ġekiraiato, ġekirato, “Barau novaġa-raġea, be noguruġa-korikori. Ġai ribama, ġoi matamu bevaġa-namoa tarimana tu vei-rakava tarimana.” <sup>25</sup> Matana enamoto tarimana evaġa-veseto, ekirato, “Au asi ribagu, ġia tu vei-rakava tarimana ba asiġi. Dagara sebna moġo ma ribagu: Au matagu tu bubu, senaġi toma tu aboġeboġeni.”

<sup>26</sup> Ġia na ġekiraiato, ġekirato, “Mo tarima tu kara eveiato ġoi ġemu ai? Ġoi matamu bubu na tu kamasi evaġa-fafaiato?” <sup>27</sup> Ġia evaġa-veseto, ekirato, “Au na ġomi tu varau bakira-varami, senaġi ġomi asi ġoseġaġini. Karase nai ġourani ma ġoseġaġi-ġenoġoi ġotoni? Ġomi maki ġia ġena mero ai boġono iaġo ġotoni ba?”

<sup>28</sup> Benamo ġia na ġeguruġa-gwaġiġi viniato, ġekirato, “Ġoi neġi ġia ġena mero, ġai tu Mose ġena mero. <sup>29</sup> Ġai ribama Barau na Mose evaġa-guruġaiato. A mani tarima, ġai asi ribama ġia tu ainana eiaġomato!” <sup>30</sup> Matana enamoto tarimana evaġa-veseto, ekirato, “Ia, ġomi tu kamasi ma ġoguruġani, ma ġokirani ġomi tu asi ribami ġia tu ainana eiaġomato ġotoni? Senaġina ġoġitaia, ġia na tu au matagu bevaġa-namoa. <sup>31</sup> Ġita ma ribara, Barau na vei-rakava tarimari tu asi eseġaġi-vinirini, a deikara na ġia ġekorana-iaġiani e ġena ura veiġari ġevairini tarimari, ġia na tu eseġaġi-vinirini. <sup>32</sup> Tanobara evesinato na veġata tarima ta roġosi tara seġaġi, tarima ta mata-bubu eġorato tarimana matana evaġa-iaġaiato. <sup>33</sup> Bema mai tarima Barau ġenana asi bere iaġoma, ġia na dagara ta asi bere veia riba.” <sup>34</sup> Ġia ġevaġa-veseto, ġekirato, “Ġoi tu omaġurito veġata na rakava tarimamu, ma kamasi tu ġai novaġa-ribama otoni?” Benamo rubu nuġana na ġelai-rosiato.

### Farisea tarimari ġeri mata-bubu

<sup>35</sup> Iesu eseġaġito, matana enamoto tarimana tu ġelai-rosiato, benamo tarimana edoġariato nai tu, ekiraiato, ekirato, “Tarimarima Natuna ovaġa-moġoniani ba, ei?”  
<sup>36</sup> Mo tarima evaġa-veseto, ekirato, “Vereġauka, ġia tu dei? Nokira-varagu, be bana vaġa-moġonia.”  
<sup>37</sup> Iesu na ekiraiato, ekirato, “Tarimana tu varau oġitaiiani maiġa, ġoi initoma ġia ġesi ġoguruġa-guruġani.”  
<sup>38</sup> Benamo matana enamoto tarimana ekirato, “Vereġauka, avaġa-moġonimuni.” Benamo evetui-tarito, Iesu etoma-rakariġo viniato.

<sup>39</sup> Iesu ekirato, “Au tu vevaġa-kota uranai mai tanobara ġana aiaġomato, mata-bubu tarimari beġene boġeboġe ġana, ema ġeboġeboġeni tarimari matari beġene bubu ġana.”  
<sup>40</sup> Farisea tarimari kota monai ġia ġesi, mai guruġa ġeseġaġiato, benamo ġekiraiato, ġekirato, “Ġoi okirani, ġai tu mata-bubu otoni?”  
<sup>41</sup> Iesu evaġa-veseto, ekirato, “Bema ġomi mata-bubu nai tu, ġomi asi ġemi rakava ġoro tanu, senaġi ġomi ġokirani ‘Ġai matama tu iaġataġo’ ġotoni, naima ġomi ġemi rakava tu roġo iatami ai.”

### Mamoe narinariri tarimana

**10** Iesu ekirato, “Moġoni, au na ġomi akira-korikorimini, mamoe maġuna ġatama bokana na asi beraka-toġani, senaġi dabara ta na befaġa-seġini tarimana tu lema e verari-verari tarimana. <sup>2</sup> A mamoe ġitaġauri tarimana tu ġatama-boka na beraka-toġani. <sup>3</sup> Ġatama-boka narinarina tarimana na ġena ġatama-boka bekeoani, benamo mamoe na ġia garona ġeseġaġiani. Ġia na ġena mamoe arari evatorini, benamo eġori-rosirini. <sup>4</sup> Ġena mamoe mabarari eġori-rosirini, benamo ġia ġoirari ai erakani, ma ġena mamoe ġia murinai ġerakakauni, korana mamoe ma ribari ġia garona. <sup>5</sup> A tarima boruna ta murina na tu asi beġe iaġoni, asiġina ġinavaġi; tarima boruna ġenana tu beġe raga-kwareġani, korana ġia garona mamoe tu asi ribari.”  
<sup>6</sup> Iesu na mo barabore ekira-vararito, senaġi ġia tu asi ġetuġamaġi-fakato.

### Iesu tu mamoe ġitaġauri tarimana namona

<sup>7</sup> Benamo Iesu na ma ekirarito, ekirato, “Au na moġoni akiramini. Au tu mamoe ġeri ġatama-boka. <sup>8</sup> Ġeiaġoma-guineto tarimari mabarari tu lema e verari-verari tarimari. A mamoe na garori asi ġeseġaġirito. <sup>9</sup> Au tu ġatama-boka. Deikara au ġeguna beraka-toġani tarimana tu bemaġurini. Beraka-toġani, beraka-rosini, ema ġaniġani beġoitaġoni. <sup>10</sup> Lema tarimana tu asi beiaġoma-kavani. Senaġi ġia tu lema beiaġomani, vaġivaġi beiaġomani, vevaġa-rakava kwaikwai beiaġomani. A au aiaġomato tu, maġuri beġene ġabia, ema maġuri na beġene vonuvonu-raġe ġana.

<sup>11</sup> Au tu mamoe ġitaġauri tarimagu namona. Mamoe narinariri tarimana namona tu ġena maġuri etore-tariani mamoe urari ai. <sup>12</sup> Ġauvei tarimana ġeivoiani vau mamoe eġitaġauni tarimana, ġia tu dia mamoe ġitaġauri tarimana korikori, ema ġia tu dia mamoe biagunari. Moġa lorinai boġa kwaivana rakavana eiaġomani beġitaiiani nai, mamoe beiaġuirini ma beraga-kwareġani. Benamo boġa kwaivana rakavana na beġabi-taririni, benamo bevaġa-gari lausirini. <sup>13</sup> Ma voina tarimana eraga-kwareġani, korana ġia tu vetuġunaġi tarimana ma voina, ema mamoe maki asi etuġamaġi-kaurini.



<sup>14</sup> Au tu mamoe narinariri tarimagu namona. Ġegu mamoe ribagu e ġegu mamoe maki ma ribari au. <sup>15</sup> Vaġa-ilailana Tamagu ribana au e au maki ribagu Tamagu kavana. Ema ġegu maġuri maki atore-tariani ġia urari ai. <sup>16</sup> Au ma ġegu mamoe irauri kotari ġetanuni. Senaġi ġia mai seri nuġanai tu asi tauri roġo. Au na ġia maki baġori-iaġomarini. Ġia na au garogu beġe seġaġiani, ema ġia maki mai seri sebonai beġe iaġoni e ġitaġauri tarimana maki sebona. <sup>17</sup> Tamagu na eura-viniguni, korana ġegu maġuri tu atore-tariani, ema ma baġabi-ġenoġoiani. <sup>18</sup> Tarima ta na au ġegu maġuri asi beġabi-vaġiani au ġeguna. Au tauġegu ġegu urai atore-tariani. Au tu ma ġegu seġuka batore-tariani, ema ma ġegu seġuka baġabi-ġenoġoiani. Moġa tu au Tamagu na ekiraguto bana veia.”

<sup>19</sup> Mai guruġa ġaramanai Iuda tarimari tauġeri vekaravari ai moġo ma ġevvarekira-ġenoġoito. <sup>20</sup> Tarima vovoka ġekirato, “Ġia tu iauka rakavana na beboroġia, be bebabo. Karase nai ġia ġoseġaġi-viniani?” <sup>21</sup> Senaġi tarima kotari ġekirato, “Tarima ta iauka rakavana na beboroġiani nai tu, maiġesi asi beguruġani. Iauka rakavana na mata-bubu tarimari matari tu kamasi bevaġa-fafarini?”

### Iuda tarimari na Iesu ġebaru-viniato

<sup>22</sup> Monai Rubu Veaġa Vaġa-veaġana Verekona Ierusalemaj ġarona eġabiato. Mo tu faraka ġueri nuġanai. <sup>23</sup> Ma Iesu tu Rubu Veaġai Solomona ġena touraġe na eraka-iaġoto-ġoi. <sup>24</sup> Benamo Iuda tarimari na ġeruġa-ġeġeraġiato, benamo ġedanaġiato, ġekirato, “Ġai tu roġo ġadaradarani. Aitoma vau bokira-varamani, ġoi tu deikara? Bema ġoi moġoni Keriso, (Barau na ekiraġi-toreato vevaġa-maġuri tauna), nai tu, ġemai novekiraġi-fofori ginikau.”

<sup>25</sup> Iesu na evaġa-veserito, ekirato, “Au na tu varau akiramito, senaġina asi ġovaġa-moġoniguni. Au Tamagu aranai aveirini veġari na tu au ġevaġa-foforiguni. <sup>26</sup> Senaġi ġomi na asi ġovaġa-moġoniguni, korana ġomi tu dia au ġegu mamoe. <sup>27</sup> Au ġegu mamoe na tu au garogu ġeseġaġiani. Ema au ribagu ġia, ema ġia tu au murigu ai ġerakani. <sup>28</sup> Benamo au na maġuri vanaġivanaġi avinirini, ema ġia tu asiġina ġinavaġi beġe maseni; ema ta na au ġeguna asi beġabi-ġerevaġirini. <sup>29</sup> Ġia tu au Tamagu na au eviniguto, e au Tamagu tu iaru-korokoro, ta na asi bevanaġiani. Ema ta na maki asi ilaila ġia ġena veġitaġau seġukana ġenana beġabi-ġerevaġirini. <sup>30</sup> Au ema au Tamagu tu sebona moġo.”

<sup>31</sup> Benamo Iuda tarimari fore ma ġeġabito, ġetakia ġetato. <sup>32</sup> Iesu na ekirarito, ekirato, “Veġa namori vovoka ġomi ġoirami ai aveirito. Mo veġa mabarari tu au Tamagu na eviniguto bana veiri etato. Moġeri veġa mabarari fakari ai tu, kamara veġa ġaramanai ġourani au ġotakigu ġotoni?”

<sup>33</sup> Iuda tarimari ġekirato, “Veġa namona ta ġaramanai ġoi tu asi ġatakimuni, senaġi ġoi na Barau okira-fitoġaiani nai. Ġoi tu tarimarima moġo, senaġi tauġemu Barau ai ovevaġa-iaġoni.”

<sup>34</sup> Iesu na evaġa-veserito, ekirato, “Ġomi ġemi taravatu nuġanai guruġa ta tu maiġesi ekirani, ‘Au akirato, ġomi tu barau.’ <sup>35</sup> Ġita ma ribara, kara Buka Veaġai ekiraġiani guruġana tu etanu-vanaġi vanaġini. Barau na mo tarimarima ekiraġirito ‘barau’, ma Barau na ġena guruġa evinirito tarimari tu ġia. <sup>36</sup> A au tu Tamagu na eġabi-viriġiguto, ema etuġuguto tanobara ġana; ma kamasi nai tu ġokiraguni, ġokirani, au na Barau akira-fitoġaiani, korana au akirani, ‘Au tu Barau Natuna’ atoni ei? <sup>37</sup> Bema au Tamagu ġena veġa asi aveirini nai, asi boġono vaġa-moġonigu. <sup>38</sup> Senaġi

ġena veiġa aveirini nai, mo veiġa boġono vaġa-moġoniri, bema au asi boġono vaġa-moġonigu ġotoni tu. Boġono riba ema boġono vaġa-moġonia, Tamagu tu au nuġagu ai etanuni, ema au maki Tamagu nuġanai atanuni.”

<sup>39</sup> Mo guruġa ġaramanai ġeurato, Iesu ma ġeġabi-taria ġetato, senaġina ġimari na moġo ma eveġabi-vaġito, erakato. <sup>40</sup> Benamo monana Iesu ma eġenoġoito. Erakia-iaġoto, Ioridana ġarukana eraka-vanaġito, eiaġoto reke ta kefo, guinenai Ioane ebabatisoto-ġoi gabuna ġana; monai ea tanuto. <sup>41</sup> Tarima vovoka ġia ġenai ġeiaġoto, benamo ġekirato, “Ioane na vetoġa boruna ta asi eveiato, senaġi mai tarima guruġana ekiraġirito guruġari mabarari tu moġoni veġata.” <sup>42</sup> Monai tarima vovoka Iesu ġevaġa-moġoniato.

### Lasaro ġena mase

**11** Betania tarimana ta arana Lasaro ekevento. Betania tu Maria ma tobana ġuia-tona Mareta ġeri vanuġa. <sup>2</sup> Mai Maria maiġa mainana Vereġauka muramura bonana namo vedaureana na edioroato, ema Vereġauka kwakuna maki ġuina na edau-kaukauato ġuiatona. Lasaro tu Maria tobana futuana. <sup>3</sup> Benamo mai ġuiato ruarua na Iesu ġena guruġa ġetuġuto, ġekirato, “Vereġauka, ġoi na oura-viniani tarimana tu bekeve.” <sup>4</sup> Iesu na mo vari eseġaġiato nai tu, ekirato, “Mani keve na tu asi bevei-maseani. Mani tu Barau ġena seġuka e mareva baregona bene fofori ġana. Ema maniġa ġenana Barau Natuna beġene vaġa-raġea.”

<sup>5</sup> Iesu na Mareta ma tarina ġuiatona Maria ema Lasaro tu eura-vinirito-ġoi. <sup>6</sup> Senaġi Lasaro ġena keve varina eseġaġiato tu, ġaro ruarua roġo ma etanuto, mo etanuto-ġoi gabunai. <sup>7</sup> Mo ġaro ruarua muriri ai ġena mero evaġa-guruġarito, ekirato, “Ġita tu ma siġenoġoi-iaġo Iudea ġana.” <sup>8</sup> Ġena mero na ġekiraiato, ġekirato, “Vevaġa-riba tarimamu, ini ġoraġani Iuda tarimari na tu fore na ġetakimu ġetato, a toma tu siġenoġoi-iaġo ma otoni.” <sup>9</sup> Iesu na evaġa-veserito, ekirato, “Ġaro ta nuġanai horaġauna mabarana tu 12 ene? Bema tarima ta laġani mamanai erakani nai tu, asi bevefutu-naġini, korana ġia tu mai tanobara laġani mamanai eboġeboġeni. <sup>10</sup> Senaġi mukunai erakani tarimana tu evekaġe-kaġekauni, korana ġia nuġanai mama tu asi etanuni.”

<sup>11</sup> Iesu maiġesi evaġa-guruġa-ġosirito murinai, ma ekirarito, ekirato, “Ġita ġatara Lasaro tu egenani, senaġi au tu aiaġoni, gena na navaġo-tataġaia ġana.” <sup>12</sup> Benamo ġena mero ġekirato, “Vereġauka, bema egenani nai tu, vau ma benamoni.” <sup>13</sup> Senaġina Iesu na mo tu emaseto ekiraġiato-ġoi. A ġena mero mataboru ġekirato-ġoi tu, eiaġaraġini nai egena-maseto ekiraġiani, ġetato-ġoi. <sup>14</sup> Benamo Iesu na ekiravara-ġinikaurito, ekirato, “Lasaro tu bemase. <sup>15</sup> Senaġi ġomi ġemi namo atuġa-maġiani nai aiakuni, mo ġaro ai au ġia ġesi tu asiġi, korana maiġa ġenana au boġo vaġa-moġoniguni. Be si-iaġo ġenai.”

<sup>16</sup> Benamo Tomasi, arana ta tu Didimo o Kafa ġetato-ġoi, na Iesu ġena mero kotari ekirarito, ekirato, “Ġita maki ġia ġesi si-iaġo, be ġia ġesi bisini mase-sebona.”

### Iesu tu maġuri korana

<sup>17</sup> Iesu ma eraġasito nai eribato, Lasaro tauġanina tu ġaro vasivasi (4) guri ai varau beġena. <sup>18</sup> Betania e Ierusalemata vefakari tu kilomita toitoi (3) kavana. <sup>19</sup> Ema Iudea tarimari vovoka Mareta e Maria ġeri ai ġeiaġoto, tauri beġene vaġa-gwaġiġiri ġana, korana tobari emaseto bene.

<sup>20</sup> Mareta eseḡaḡito, Iesu tu eiaḡomato-ḡoi nai, eraga-raka toreḡau-iaḡoto Iesu ḡesi ḡea vedoḡarito. A Maria tu numai etanu-gwaḡiḡito. <sup>21</sup> Benamo Mareta na Iesu ekiraiato, ekirato, “Vereḡauka, ḡoi bere mainai kavana tu, au tobagu asi bere mase. <sup>22</sup> Senaḡi au ribagu, initoma maki kara dagara Barau bonoḡiani tu, Barau na bevinimuni.”

<sup>23</sup> Iesu na ekiraiato, ekirato, “Ḡoi tobamu tu bevariḡisi-ḡenoḡoini.” <sup>24</sup> Mareta na Iesu evaḡa-veseato, ekirato, “Au ribagu, ḡaro magonai variḡisi-ḡenoḡoi ḡaronai ḡia tu ma bevariḡisi-ḡenoḡoini.” <sup>25</sup> Iesu na Maria ekiraiato, ekirato, “Au tu variḡisi-ḡenoḡoi ema maḡuri. Au bevaḡa-moḡoniguni tarimana tu bemaseni, senaḡina roḡo maḡuri betanuni. <sup>26</sup> Ema deikara maḡuri etanuni nuḡanai, au evaḡa-moḡoniguni tu asiḡina ḡinavaḡi bemaseni. Mai guḡuḡa ovaḡa-moḡoniani ba?”

<sup>27</sup> Mareta na ekiraiato, ekirato, “Oi Vereḡauka, au na avaḡa-moḡoni korikorimuni, ḡoi tu moḡoni Keriso, Barau Natuna, tanobara ḡana boiaḡomani tarimamu.”

### Iesu etaḡito

<sup>28</sup> Mareta moḡesi ekirato murinai eḡenoḡoi-iaḡoto, benamo tarina Maria vekure-toḡai ea kea-ḡairiato, ekirato, “Vevaḡa-riba tarimana tu beiaḡoma ema ḡoi ekeamuni.” <sup>29</sup> Maria na mo guruḡa eseḡaḡiato nai, asikauna evariḡisito, benamo Iesu ḡenai eiaḡoto. <sup>30</sup> Mo horai Iesu tu vanuḡai roḡosi roḡo bere raka-toḡa, ḡia roḡo Mareta na mo edoḡariato gabunai roḡo. <sup>31</sup> Iuda tarimari, Maria ḡetanu-dukudukuato-ḡoi tarimari, na Maria ḡeḡitaiato, eraga-variḡisito ma eraka-rosito nai tu, murina na ḡerakato. Ḡia mataboru ḡekirato, Maria tu gara ḡana eiaḡoni, mase tarimana nea taḡi-vinia ḡana.

<sup>32</sup> Maria eiaḡoto, Iesu sevinai eraḡasito, ma Iesu eḡitaiato nai tu, kwakuna koranai evetui-tarito, benamo evaḡa-guruḡaiato, ekirato, “Vereḡauka, ḡoi bere mainai kavana tu, au tobagu asi bere mase.”

<sup>33</sup> Iesu na Maria eḡitaiato etaḡito-ḡoi, ema mo Iuda tarimari, ḡia ḡesi ḡeiaḡomato tarimari, maki ḡetaḡito-ḡoi nai tu, ḡia nuḡana maki tuḡamaḡina eḡabirakavaiato, dori etaḡito. <sup>34</sup> Benamo Iesu na edanaḡirito, ekirato, “Ainai ḡotoreato?” Ḡia na ḡevaḡa-veseato, ḡekirato, “Vereḡauka, noiaḡoma, be noma ḡitaia.” <sup>35</sup> Iesu etaḡito. <sup>36</sup> Benamo Iuda tarimari ḡekirato, “Ḡoḡitaia, Lasaro tu euravini-rakavaiani.” <sup>37</sup> Senaḡi Iuda tarimari kotari ḡekirato, “Mai tarima na mata-bubu tarimana matana evaḡa-iaḡaiato, be Lasaro maki asi veḡata bere vaḡa-masea, ene?”

### Iesu na Lasaro mase na evaḡa-variḡisi ḡenoḡoiato

<sup>38</sup> Monana Iesu nuḡana ma evaḡa-vekwaraḡi lelevaḡiato, benamo gara gabuna ḡana eiaḡoto. Mo gara forena kouḡana tu fore ta na ḡetabe-ḡauato. <sup>39</sup> Iesu ekirato, “Fore ḡoḡabi-veḡitaia.” Ma Mareta, mo mase tarimana tobana, na Iesu ekiraiato, ekirato, “Vereḡauka, ḡia emaseto ḡarona na beiaḡoma toma tu ḡaro vaḡa-vasivasina (4), be bonana tu rakava kwaikwai banaḡu.” <sup>40</sup> Iesu na Mareta ekiraiato, ekirato, “Au na ḡoi tu bakiramu, bema bovaḡa-moḡoniguni nai, Barau marevana baregona boḡitaiani basi, ene?” <sup>41</sup> Benamo mase tarimana ḡetoreato gabuna na fore ḡeḡabi-veḡitaiato. Moḡa murinai Iesu eboḡe-vaisito, benamo ekirato, “Tamagu o, au na ḡoi atanikiumuni, korana ḡoi na varau boseḡaḡigu. <sup>42</sup> Au ribagu, ḡoi na vanaḡivanaḡi oseḡaḡiguni. Senaḡi maiḡesi akirani korana tu mai tarimarima ḡeruḡa-taḡoni maiḡeri urari ai. Be ḡia na beḡene vaḡa-moḡonia, au tu ḡoi na otuḡuguto.”

<sup>43</sup> Moġesi eguruġato murinai ekea-fararato, ekirato, “Lasaro, noma rakarosi!”  
<sup>44</sup> Benamo mo emaseto tarimana mase dabuġari na ġimana kwakuna viriviri-tari e ġoirana ekumu-iaġiato dabuġana ġesi ema raka-rosito. Iesu na ekirarito, ekirato, “Ġoruġaia, be neraka.”

### Iesu vaġivaġina dabarana ġevetauato

*Mataio 26:1-5; Mareko 14:1-2; Luka 22:1-2*

<sup>45</sup> Benamo mo Iuda tarimari vovoka, Maria ġenai ġeiaġoto moġeri, Iesu na mo veiġa eveirito ġeġitarito nai, vovoka tu Iesu ġevaġa-moġoniato. <sup>46</sup> Senaġi kotari tu ġeġenoġoi-iaġoto Farisea tarimari ġeri ai, benamo Iesu na kara eveirito dagarari ġea kira-vararito. <sup>47</sup> Benamo Rubu Veaġa vereri baregori ema Farisea tarimari na kanisoro tarimari ġekea-vegogorito, benamo ġekirato, “Ġita tu kara toma taveiani? Mai tarima na vetoġa boruri vovoka eveirini. <sup>48</sup> Bema ġia maiġesi ġita na bita ġita-ġuirāġiani moġo nai tu, tarimarima mabarari na ġia beġe vaġa-moġoniani. Benamo Roma tarimari beġe iaġomani, ġita ġera gabu (o Rubu Veaġa) ema ġera tanobara ġita ġerana beġema ġabi-vaġiani.”

<sup>49</sup> Benamo ġia fakari ai tarima ta arana Kaiafas, ġia mo laġani ai tu Rubu Veaġa verena baregona, ġia na ekirarito, ekirato, “Ġomi dagara ta tu asi ribami! <sup>50</sup> Ġomi asi ġotuġamaġi-fakani, namona tu tarima sebona moġo tarimarima mabarari urari ai bene mase, a mai tanobara mabarana beġe vaġa-rakava ġosiġosiani tu asi namo.”  
<sup>51</sup> Ġia moġesi ekirato tu, dia ġia tauġena nuġana siga moġo eguruġato; senaġi ġia mo laġani ai tu Rubu Veaġa verena baregona, moġa lorinai ġia mo tu eperovetato, Iesu tu bene mase Iuda tarimari mabarari urari ai. <sup>52</sup> Ema Iesu tu dia Iuda tarimari moġo urari ai bemaseni. Senaġi Barau natuna gabu iraurau ai ġetanu-lausilausini tarimari mabarari bene ġabi-vegogori, doġoro sebonai bene vaġa-iaġori ġana.

<sup>53</sup> Moġa lorinai mo ġaro na evesinato eiaġoto tu, Iuda tarimari baregori na Iesu kamasi beġe vaġi-maseani dabarana ġevetauato. <sup>54</sup> Moġesina naima Iuda tarimari ġoirari ai Iesu asi eraka-foforito-ġoi. Mo gabu na eraka-veġitato, eiaġoto tano fakana asi tarimarimana gabuna sevinai, vanuġa ta arana Efraim ġana. Gena mero ġesi monai ġea tanuto-ġoi.

<sup>55</sup> Iuda tarimari ġeri Pasova verekona tu ekavinaġito. (Moġa tu Iuda tarimari mase aneruna na evanaġirito moġo, asi evaġirito verekona). Ma Iuda tarimari vovoka mo tanobarai ġetanuto Ierusalemāi ġema raka-vegogoto. Ġia ġema raka-vegogoto tauna korikori, Barau ġoiranai beġene veiareva vauro, Pasova verekona bene vesina. <sup>56</sup> Ġia na Iesu ġeġita-vetauato-ġoi, ma Rubu Veaġa nuġanai ġeruġa-vegogoto nai tu, tauġeri fakari ai moġo ġevedanaġi-vedanaġito, ġekirato, “Ġomi tu kamasi mani ġotuġamaġini? Mai vereko ai toma ema ġoira-refoni ba?” <sup>57</sup> Rubu Veaġa vereri baregori ema Farisea tarimari na vevaġa-naġi guruġana tu varau Iuda tarimari ġevinirito, ġekirarito, bema ta beseġaġini Iesu tu ainai, ġia tu maoromaoro bene iaġo, Iuda vereri benea kira-varari, be beġene ġabia.

### Maria na Iesu ediġaiato Betania ai

**12** Pasova o Iuda tarimari mase aneruna na evanaġirito moġo verekona tu ġaro imaima sebona (6) roġo ġoirai nuġanai, Iesu Betania ġana eiaġoto. Lasaro tu Betaniai etanuto-ġoi, ema monai emaseto, ma Iesu na mase na evaġa-variġisiato. <sup>2</sup> Monai Iesu ġabiraġena ġaniġanina ġeveiato. Mareta na ġari ġaniġani edabaraiato,

ma Lasaro maki monai ġaniġani gabunai ġetanu-vegogoto tarimari ġesi ġetanu-vegogoto, ġeġaniġanito. <sup>3</sup>Benamo Maria na muramura bonana namo vedaureana lita kwana kavana eġabiato, benamo Iesu kwakuna fanafanana ediġa-iaġiato, ema ġuina na Iesu kwakuna fanafanana ma edau-kaukauato. Ma numa mabarana tu mo muramura bonana na evaiato. Mo muramura tu ġauġa arana nad ġokana na ġeveito-ġoi, ema voina tu varaġe rakava. <sup>4</sup>Senaġi Iesu ġena mero ta arana Iudas Isakariota, mai tu Iesu vau ma bea revaiani tarimana, ekirato, <sup>5</sup>“Karase mai muramura mabarana tu silva moniri sinau toitoi (300) ai asi bevoivoi-iaġia? (Mai tu tarima ta davana laġani ta nuġanai kavana). Bere voivoi-iaġia, be voina monina bere ġabia tu, asi ġeri-ġari tarimari bere viniri.” <sup>6</sup>Ġia moġesina eguruġato tu, dia asi ġeri-ġari tarimari etvetuġa-ġwarito-ġoi lorinai, senaġi korana ġia tu lema tarimana naima. Ġia na tu moni fusena eġwa-rakao rakaoato-ġoi, ma mo fuse ai moni elemarito-ġoi, benamo ġena ura dagarari evoi-iaġirito-ġoi.

<sup>7</sup>Benamo Iesu ekiraiato, ekirato, “Ġoraga-kwaneana, mai vavinena tu kara bere veia dagarana beveia, ġia na au tauġanigu muramura na bedau-guinea, gurigurigu ġana. <sup>8</sup>Asi ġeri-ġari tarimari tu vanaġivanaġi ġomi ġesi boġo tanuni, a au tu vanaġivanaġi ġomi ġesi asi batanuni.”

### **Rubu Veaġa vereri baregori na Lasaro beġene vaġia ġetato**

<sup>9</sup>Iuda tarimari vovoka tabutabu ġeseġaġito Iesu tu Betania ai. Benamo moġana ġeiaġoto, dia Iesu moġo uranai, senaġi Lasaro maki beġene ġitaia ġana. Lasaro tu mase na Iesu na evaġa-variġisi ġenoġoiato. <sup>10</sup>Moġesi naima Rubu Veaġa vereri baregori tu ġeboioġato, Lasaro maki beġene vaġi-masea ġetato. <sup>11</sup>Korana tu ġia dainai Iuda tarimari vovoka ġia ġerina ġeraka-veġitato, benamo Iesu ġevaġa-moġoniato.

### **Iesu ġena rakatoġa Ierusalemaj ġevonevone-raġe viniato**

*Mataio 21:1-11; Mareko 11:1-11; Luka 19:28-40*

<sup>12</sup>Ma elaġanito nai, vereko uranai ġeiaġomato tarimari vovoka ġeseġaġito, Iesu tu Ieruselema ġana varau eraka-iaġomato-ġoi. <sup>13</sup>Galamo lauri noġa dagarari ġeġabito, benamo Iesu ġenai ġeiaġoto, ġeġabato, ġekirato, “Hosana!

Isaraela ġeri Kini sivaġa-namoa,  
Vereġauka aranai eiaġomani  
tarimana sivaġa-namoa!”

<sup>14</sup>Ma Iesu na doniki natuna ta edoġariato, benamo iatanai etanukauto, Buka Veaġa nuġanai ekirani ilailanai,

<sup>15</sup>“Siona natuna,  
(Ieruselema tarimami), asi ġogari,  
ġoboġe, ġemi Vere eiaġomani,  
ġia tu doniki natuna iatanai betanukau.”

<sup>16</sup>Mo ġaro ai ġena mero na maiġeri tu asi ġetuġamaġi-fakarito. Senaġi Barau na Iesu evaġa-raġeato e mareva baregona eviniato murinai vau, ġia ġeriba-maoroto, maiġeri mabarari ġetorerito tu, ġia ġekiraġiato. Ema ġeribato, mo veiġa mabarari tu ġia ġenai ġeveirito.

<sup>17</sup>Iesu na Lasaro gara forena kouġana na ekea-rosiato, ema mase na evaġa-variġisiato ġaronai, tarimarima tu ġutuma-bara ġia ġesi. Benamo moġeri tarima na

mo veīga gēgītaiato varina tu rogo gēvari-fiuato-ḡoi. <sup>18</sup> Tarima ḡutuma gēiaḡoto Iesu ḡesi vedoḡari, korana gēseḡaḡito, Iesu na mo vetoḡa boruna eveiato dainai. <sup>19</sup> Moḡesina nai Farisea tarimari tauḡeri fakari ai ḡevedare-mutukato, ḡekirato, “Ḡoḡitaiani, ḡomi tu asi ḡokokoreni. Ḡoboḡe, mai tanobara tarimana mabarana tu ḡia murinai ḡerakani.”

### Grik tarimari kotari na Iesu ḡevetauato

<sup>20</sup> Vereko ḡaronai toma-rakariḡo uranai Ierusalemā ḡana ḡevaraḡeto tarimari fakari ai tu, Grik o Helene tarimari kotari maki ḡerakakauto. <sup>21</sup> Ḡia ḡeiaḡoto Filipo ḡenai, benamo ḡekiraiato, ḡekirato, “Verebara, ḡai ḡaurani tu Iesu ḡaḡitaia ḡatoni.” Filipo tu Galilea tanonai vanuḡa arana Betesaida tarimana. <sup>22</sup> Filipo eiaḡoto Anduru ea kiraiato, benamo tauri ruarua ḡeiaḡoto, Iesu ḡekiraiato. <sup>23</sup> Iesu na evaḡa-veserito, ekirato, “Ḡarona varau bema-raḡasi, Tarimarima Natuna mareva baregona beḡabiani. <sup>24</sup> Moḡoni korikori akiramini, widi ḡuena tano nuḡanai beketo-ḡurani ema bemaseni vau, vovokari ḡia ḡenana beḡe ḡorani. A widi ḡuena tano ai asi beketoni ema asi maki bemaseni nai, ḡereḡana moḡo betanuni. <sup>25</sup> Ḡena maḡuri eura-viniani tarimana na maḡuri vanaḡivanaḡi tu asi beḡabiani, beleaiiani. A mai tanobarai ḡena maḡuri etuḡamaḡi-fitoḡaiani tarimana na, ḡena maḡuri tu etore-taḡoani maḡuri vanaḡivanaḡi ḡana. <sup>26</sup> Au vetuḡunaḡigu eiaḡo-vinini tarimana tu au murigu na bene raka; be au ainai, au vetuḡunaḡigu eiaḡo-vinini tarimana maki monai au ḡesi. Au vetuḡunaḡigu eiaḡo-vinini tarimana tu, au Tamagu na ḡia maki bevaḡa-namoani.”

### Iesu ḡena mase eguruḡa-iaḡiato

<sup>27</sup> “Maitoma au nuḡagu tu evekwarāḡini, e ḡegu tuḡamaḡi bebarego. Be kara batoni? Nakira, ‘Tama, mai hora na noma vaḡa-maḡurigu’ nasi? Asiḡina, au ḡegu iaḡoma tauna korikori aoanai tu mai bama raḡasi maīḡea. <sup>28</sup> Tamagu, ḡoi aramu novaḡa-raḡea.” Benamo garo ta guba na emariḡoto, ekirato, “Au na aragu tu varau bavaḡa-raḡea, ema mai maki ma bavaḡa-raḡe ḡenoḡoiani.”

<sup>29</sup> Tarima ḡutuma monai ruḡa-vegogo na mo garo gēseḡaḡiato, benamo ḡekirato, “Guba begurua.” Ma kotari ḡekirato, “Aneru ta na bevaḡa-guruḡaia.” <sup>30</sup> Iesu na evaḡa-veserito, ekirato, “Mani garo tu dia au uragu ai nai beiaḡoma, senaḡi ḡomi urami ai nai beiaḡoma. <sup>31</sup> Maitoma tu tanobarai Barau na vevaḡa-maoro eveiani. Maitoma Barau na mai tanobara verena, Satani, evaḡa-darereani. <sup>32</sup> Benamo au tano iatana na beḡe ḡabi-vaisiguni, monana tarimarima mabarari au ḡegu ai bainukavirini.” <sup>33</sup> Ḡia maīḡesi eguruḡato tu, ḡia ḡena mase ai tu aiḡesi bemaseni moḡa ekiraḡi-rosiato.

<sup>34</sup> Tarimarima ḡevaḡa-veseto, ḡekirato, “Ḡai taravatu guruḡari na ḡaseḡaḡito, Keriso tu betanu-vanaḡi vanaḡini, ma ḡoi kamasi nai tu okirani, Tarimarima Natuna tu beḡe ḡabi-vaisiani? Tarimarima Natuna tu deikara ei?” <sup>35</sup> Benamo Iesu na ekirarito, ekirato, “Mama ḡomi ḡesi tu asi betanu-maukani. Mama rogo ḡomi ḡesi nuḡanai, mamai ḡoraka, mukuna na beḡabimini garina. Mukuna nuḡanai erakani tarimana tu asi ribana, ḡia tu aiḡana eiaḡoni. <sup>36</sup> Mama rogo ḡomi ḡesi nuḡanai, mama boḡono vaḡa-moḡonia, be mama natunai boḡono iaḡo.”

Maīḡeri guruḡa ekiraḡi-ḡosirito murinai eraga-kwanerito, benamo eiaḡoto, asi beḡe ḡoitaḡoani gabunai etanuto-ḡoi.

### Iuda tarimari na Iesu roĝo asi ĝevaĝa-moĝoniato-ĝoi

<sup>37</sup> Iesu na Iuda tarimari ĝoirari ai vetoĝa boruri vovoka eveirito, senaĝi roĝo mo asi ĝevaĝa-moĝoniato-ĝoi. <sup>38</sup> Monana peroveta tarimana arana Isaia ĝena guruĝa emoĝonito, Isaia maiĝesi ekirato,

“Vereĝauka, deikara na ĝai ĝema guruĝa bevaĝa-moĝonirini?  
Deikara ĝenai Vereĝauka ĝena seĝuka befororini?”

<sup>39</sup> Ĝia na Iesu asi ĝevaĝa-moĝoniato anina tu, Isaia gabu tai ĝena toretore ai ma ekirato,

<sup>40</sup> “Barau na matari evaĝa-tufarito,  
ema nuĝari evei-mukunarito,  
korana matari na asi beĝene boĝeboĝe,  
ema nuĝari ai asi beĝene tuĝamaĝi-faka ĝana.  
Au ĝegu ai beĝe ĝenoĝoini,  
benamo bavaĝa-namorini garina.”

<sup>41</sup> Isaia moĝesi ekirato, korana ĝia na Iesu marevana e seĝukana baregona eĝita-guineato nai, benamo ĝia eguruĝa-iaĝiato.

<sup>42</sup> Iuda ĝorikauna vereri vovoka na maki Iesu ĝevaĝa-moĝoniato, senaĝi Farisea tarimari gariri ĝeveito-ĝoi, be Iesu asi ĝekiraĝi-foforiato-ĝoi. Korana bema beĝe kiraĝi-foforiani nai tu, Farisea tarimari na rubu na beĝe tuĝu-vaĝirini garina. <sup>43</sup> Korana mo Iuda vereri ĝeri ura baregona tu, tarimarima na beĝene vaĝa-raĝeri, a Barau na bene vaĝa-raĝeri tuĝamaĝina tu asi ĝeveiato-ĝoi.

### Iesu ĝena guruĝa na tarimarima bekota-vinirini

<sup>44</sup> Iesu efararato, ekirato, “Au bevaĝa-moĝoniguni tarimana tu dia au evaĝa-moĝoniguni, senaĝi au etuĝuguto Barauna evaĝa-moĝoniani. <sup>45</sup> Ema au eĝitaguni tarimana na tu au etuĝuguto Barauna eĝitaiani. <sup>46</sup> Au tu mama, mai tanobara ĝana aiaĝomato, be au bevaĝa-moĝoniguni tarimana tu mukuna nuĝanai asi betanuni.

<sup>47</sup> Ma bema tarima ta na au ĝegu guruĝa eseĝaĝiani, senaĝi asi evaĝa-moĝoniani, au na mo tarima tu asi bakota-viniani. Korana au tu dia tanobara kota-vinina ĝana aiaĝomato. Asiĝina. Au tu tanobara vaĝa-maĝurina ĝana aiaĝomato. <sup>48</sup> Au eruĝaguni ema au ĝegu guruĝa asi eĝabi-raĝerini tarimana, kota-vinina tarimana ta etanuni. Au na akiraĝirito guruĝari, moĝeri guruĝa na ĝia beĝea kota-viniani mo ĝaro magonai.

<sup>49</sup> Korana au tu dia tauĝegu ĝegu maoro ai aguruĝani. Senaĝi Tamagu, au etuĝuguto Barauna, na evaĝa-naĝiguto au na kara guruĝana bana kiraĝia ema kamasi bana kiraĝia. <sup>50</sup> Au ribagu, Tamagu ĝena guruĝa na tarimarima maĝuri vanaĝivanaĝi beĝe ĝabini. Moĝa lorinai au na kara akiraĝirini guruĝari tu, kara dagara Tamagu na ekiraguni bana kiraĝiri etoni guruĝari moĝo.”

### Iesu na ĝena mero kwakuri eĝuriĝirito

**13** Pasova o Iuda tarimari mase aneruna na evanaĝirito moĝo verekona tu dori eĝabiato-ĝoi, benamo Iesu eribato, mai tanobara beiaĝuiani ma Tamana ĝenai bevaraĝeni ĝarona tu varau beraĝasi. Mai tanobarai ĝena tarimarima ĝetanuto euravini-rakavarito, ma ĝena veuravini ĝeri ai tu asi edokoto, eiaĝoto mo magona.

<sup>2</sup> Iesu ma ĝena mero ĝesi lavilavi ĝaniĝanina ĝeĝaniato-ĝoi nuĝanai, Diabolo na Iudas Isakariota, Simona natuna, nuĝana eĝaniato, Iesu bene revaia ĝana. <sup>3</sup> Iesu

ribana, Tamana na dagara mabarari tu ġia ġena seġuka gaburenai etorerito. Ema ribana maki, ġia tu Barau ġenana eiaġomato, ema ma beġenoġoini Barau ġenai; <sup>4</sup>benamo ġaniġani gabuna na evariġisito, ġena koudi ekoki-vaġiato, benamo tauġela eriġoato. <sup>5</sup>Benamo naġu ai nanu ebubuto, benamo ġena mero kwakuri eġuriġirito, ma eriġoato tauġelana na tu edau-kaukaurito.

<sup>6</sup>Kwakuri eġuriġi-iaġomato mo, Simona Petero ġenai eraġasito, benamo Petero na ekiraiato, ekirato, “Vereġauka, ġoi tu au kwakugu noġuriġia otoni?” <sup>7</sup>Iesu na evaġa-veaseato, ekirato, “Maitoma au na kara aveiani veiġana tu asi otuġamaġi-fakaiani, senaġi gabivau boribani.” <sup>8</sup>Petero na ekiraiato, ekirato, “Asiġi, au kwakugu ġoi na tu asiġina ġinavaġi boġuriġiani.” Iesu na evaġa-veaseato, ekirato, “Bema au na ġoi kwakumu asi baġuriġiani nai, ġoi tu dia au ġegu mero.” <sup>9</sup>Simona Petero ekirato, “Vereġauka, dia kwakugu moġo, senaġi ġimagu ema debagu maki.” <sup>10</sup>Iesu na ekiraiato, ekirato, “Efouni tarimana tauġanina mabarana tu veiareva, be ġia tu kwakuna moġo beġuriġiani. Ġomi mabarami tu veiareva, senaġi sebona ta moġo asi veiareva.” <sup>11</sup>Iesu ma ribana deikara na ġia berevaiani; moġesina nai ekirato, “Dia mabarami veiareva.”

<sup>12</sup>Kwakuri eġuriġi-ġosito murinai, ġena dabuġa baregona ma eveiato, ema eiaġoto ġena tanutanu gabunai ea tanu-tarito, benamo ekirarito, ekirato, “Au na ġomi ġemi ai kara baveia veiġana tauna korikori boġo tuġamaġi-fakaia ba?” <sup>13</sup>Ġomi na au ġokiraġiġuni, ġokirani ‘Vevaġa-riba Tarimana’ ema ‘Vereġauka’, mo tu moġoni ġokiraġiġuni, korana au tu moġoni Vevaġa-riba Tarimagu ema Vereġauka. <sup>14</sup>Bema au ġomi ġemi Vereġauka ema Vevaġa-riba tarimagu na ġomi kwakumi baġuriġiri nai, ġomi maki tauġemi fakami ai moġo karomi tari kwakuri boġono ġuriġiri. <sup>15</sup>Korana au na bavaġa-ġitami, be au na kara ġomi ġemi ai baveia veiġana, ġomi na maki boġono veia. <sup>16</sup>Au na ġomi moġoni akiramini, ġauvei merona na ġena vere asi bevanaġiani, e vetuġunaġi merona na betuġua tarimana asi bevanaġiani. <sup>17</sup>Toma maiġeri dagara mabarari ġomi na boġo ribari, bema boġo veirini nai tu boġo iakuni.

### Iesu ġena mase ekiraġi-foforiato

<sup>18</sup>Au na ġomi mabarami asi akiraġimini, au na aġabi-viriġirito tarimari tu au ribagu. Senaġi mai tu Buka Veaġa nuġanai ġetorerito guruġari beġene moġoni ġana: ‘Deikara au ġesi beredi baġa ġani-vegogoani tarimana tu, kwakuna gwadirina beġabi-vaisiani au ġegu ai.’ (Moġa anina tu, Iesu ma bekira-fitoġaiani, benamo vaġi-masena dabarana beveiani). <sup>19</sup>Toma au na ġoirai beġe ġorani dagarari akiravaramini, be beġe ġorani nai tu boġono riba-maoro, (Barau na etuġuato) Tarimana tu Au. <sup>20</sup>Moġoni akiramini, au na atuġuani tarimana eġabi-raġeani tarimana na tu au eġabi-raġeguni. Ma au eġabi-raġeguni tarimana na au etuġuguto tarimana, Barau, eġabi-raġeani.”

### Iesu Iudas Isakariota na berevaiani ekiraġiato

*Mataio 26:20-25; Mareko 14:17-21; Luka 22:21-23*

<sup>21</sup>Iesu na maiġeri guruġa ekiraġirito murinai, nuġana evekwaġi-baregato, benamo eguruġa-foforito, ekirato, “Akira-korikorimini, ġomi ta na tu au borevaguni.” <sup>22</sup>Benamo ġena mero ġeveġita-veġitato, asi ribari deikara ekiraġiato. <sup>23</sup>Ġena mero vekaravari ai Iesu na eura-viniato-ġoi merona tu ġia ġenai evetabekauto. <sup>24</sup>Ma Simona Petero na vetoġai moġo Ioane evaġa-guruġaiato, eurato, Iesu nedanaġia



deikara ekiraġiani. <sup>25</sup> Benamo (Iesu na eura-viniato-ġoi merona) Iesu ġenai ma evetabekauto, benamo edanaġiato ekirato, “Vereġauka, mo tu deikara, ei?” <sup>26</sup> Iesu evaġa-veseto, ekirato, “Au na beredi bafereiani, benamo ġia baviniani tarimana tu moġea.” Benamo Iesu na beredi efereiato, ma Simona natuna, Iudas Isakariota, eviniato.

<sup>27</sup> Iudas na mo beredi eġabiato, benamo Satani nuġanai eraka-ġurato. Benamo Iesu na ekiraiato, ekirato, “Kara ourani noveia tu novei-ġarimoġia.” <sup>28</sup> Senaġi mo ġeġaniġani-vegogoto tarimari tu sebona ta maki asi eribato, karase nai Iesu na moġesi ekiraiato. <sup>29</sup> Moġa nuġanai Iudas tu moni mauġa-mauġana eġita-ġauato-ġoi. Moġesina naima ġia kotari ġetuġamaġito, Iesu na tu bekiraia, vereko ai karakara ġeura-vinirini dagarari nea voiri, o asi ġeri-ġari tarimari dagara tari nea viniri ġe-tato. <sup>30</sup> Iudas na mo beredi eġabi-raġeato murinai tu, asikauna mo numa na erakarosito. Mo tu varau eboġito.

### Iesu Petero na bekira-ġuniġauani ekiraġiato

<sup>31</sup> Iudas eraka-rosito murinai, Iesu ekirato, “Maitoma Tarimarima Natuna beġe vaġa-raġeani, ema Barau maki Natuna ġenana beġe vaġa-raġeani. <sup>32</sup> Bema Barau na Iesu bakunai vevaġa-raġe e mareva baregona beġabiani nai tu, Barau tauġena na maki tauġena ġena mareva baregona Tarimarima Natuna beviniani. Ma Barau na asikauna beviniani. <sup>33</sup> Natugu, au ġomi ġesi tu asi bita tanu-maukani. Benamo ġomi na au ma boġo ġita-vetauguni. Au na Iuda tarimari avaġa-guruġarito ilailanai, ġomi maki mo guruġa sebona avinimini: Au aiaġoni gabuna ġana, ġomi tu asi boġo iaġoni riba. <sup>34</sup> Taravatu guruġana variġuna avinimini. Tarikakami ġesi boġono veuravini. Au na ġomi aura-vinimini ilailanai, ġomi maki tarikakami ġesi boġono veuravini. <sup>35</sup> Bema ġomi tarikakami ġesi boġo veura-vinini nai, tarimarima mabarari beġe ribani, ġomi tu au ġegu mero.”

<sup>36</sup> Simona Petero na Iesu edanaġiato, ekirato, “Vereġauka, ġoi tu aiġana oiaġoni?” Iesu evaġa-veseto, ekirato, “Au aiġana iaġoni gabuna ġana, maitoma au murigu na tu asi boġo iaġomani, senaġi gabivau boġo iaġomani murigu na.” <sup>37</sup> Petero na Iesu ekiraiato, ekirato, “Vereġauka, kara dainai toma au ġoi murimu na tu asi baiaġosini riba? Au tu ġoi uramu ai ġegu maġuri batore-tariani, bamaseni.”

<sup>38</sup> Iesu na Petero evaġa-veveto, ekirato, “Ġoi ġemu maġuri tu au uragu ai botoretariani otoni? Akira-korikorimuni, kokoroku roġosi roġo bene goġi nuġanai, ġoi na au tu vaġa-toitito bokira-ġuniġauuni.”

### Iesu tu dabara

**14** “Nuġami asi beġene raġe, ema asi boġono tuġamaġi-ġutuma. Barau boġono vaġa-moġonia, ema au maki boġono vaġa-moġonigu. <sup>2</sup> Au Tamagu ġena numai daiġutu tu asisebo; bema asiġi nai tu, mai guruġa ġomi asi bara kira-varami: Au aiaġoni tu, ġomi ġemi gabu ta arovina-toreani. <sup>3</sup> Benamo aiaġoni, ġomi ġemi gabu barovina-toreani. Barovinatore-ġosiani vau, ma baġenoġoi-iaġomani, benamo ġomi baġori-iaġomini au ġesi bita tanuni. Be au ainai batanuni gabunai, ġomi maki monai au ġesi bita tanuni. <sup>4</sup> Au baiaġoni gabuna dabarana tu ġomi ma ribami.”

<sup>5</sup> Tomasi na ekiraiato, ekirato, “Vereġauka, ġai tu asi ribama ġoi aiġana oiaġoni, ma dabara tu kamasi baġa ribaian?” <sup>6</sup> Iesu na ekiraiato, ekirato, “Dabara tu au, e moġonina maki au, ema maġuri maki au. Tarima ta Tamagu ġenai dabara boruna

na ta asi beiaḡoni. Asiḡina ḡinavaḡi. Au ḡeguna moḡo. <sup>7</sup>Bema moḡoni au ḡomi na ḡoribaguto tu, au Tamagu maki ḡoro ribaia. Ma toma vau ḡoribaiani ema varau boḡo ḡitaia.”

<sup>8</sup>Filipo na Iesu ekiraiato, ekirato, “Vereḡauka, Tamara novaḡa-ribama, be nuḡama beḡene genatari.” <sup>9</sup>Iesu na ekiraiato, ekirato, “Filipo, au ḡoi ḡesi tu kai-veḡata atanuto, ma ḡoi na au tu roḡosi roḡo boro ribagu? Au eḡitaguni tarimana na Tamagu eḡitaiani. Ma ḡoi tu kamasi nai okirani, ‘Tamara novaḡa-ribama otoni?’” <sup>10</sup>Goi na asi ovaḡa-moḡoniani, au tu Tamagu nuḡanai, ma Tamagu tu au nuḡagu ai, ei? Au na ḡomi avaḡa-guruḡamini guruḡari tu dia au tauḡegu ḡegu maoro ai avaḡa-guruḡamini. Asiḡina. Mai tu Tamagu, ḡia tu nuḡagu ai etanuni, ḡia na ḡena ḡauvei eveirini. <sup>11</sup>Au akirani, au tu Tamagu nuḡanai atanuni ema Tamagu tu au nuḡagu ai etanuni atoni nai tu boḡono vaḡa-moḡonigu. Bema asiḡina nai, mai veiḡa aveirini ḡoḡitarini nai boḡono vaḡa-moḡonigu.

<sup>12</sup>Moḡoni akiramini, au evaḡa-moḡoniguni tarimana tu, au na aveirini veiḡari, ḡia na maki beveirini. Ema ḡia na tu veiḡa barego lelevaḡiri beveirini, au na aveirini veiḡari tu bevanaḡirini. Korana au tu Tamagu ḡenai ma aiaḡoni. <sup>13</sup>Ema au aragu ai karakara boḡo noḡirini tu, au na baveirini. Monana Tamagu beḡe vaḡa-raḡeani Natuna bakunai. <sup>14</sup>Au aragu ai kara boḡo noḡi-raḡerini dagarari mabarari tu, veiḡari au na baveirini.”

### Iesu na Iauka Veaḡa ekiraḡi-toreato

<sup>15</sup>“Bema ḡomi na au ḡoura-viniguni nai tu, au ḡegu taravatu guruḡari boḡo korana-iaḡirini. <sup>16</sup>Benamo au na Tamagu banoḡiani, bena ḡia na vevaḡa-kava tarimana ta ma bevinimini. Mo vevaḡa-kava tarimana tu ḡomi ḡesi betanu-vanaḡi vanaḡini. <sup>17</sup>Ḗia tu guruḡa moḡonina evaḡa-foforiani Iaukana. Ḗia tu tanobara maḡurinai ḡetanuni tarimari na asi beḡe ḡabi-raḡeani riba, korana asi ḡeḡitaiani ema asi ḡeribaiani. Senaḡi ḡia ḡomi tu ma ribami, korana ḡia tu ḡomi ḡesi ḡotanuni ema ḡomi nuḡami ai betanuni.

<sup>18</sup>Au na ḡomi ḡereḡami gara noḡa asi baiaḡuimini. Au ma baḡenoḡoi-iaḡomani ḡomi ḡemi ai. <sup>19</sup>Tanobara tarimari na asi ma beḡe ḡitaguni ḡarona tu asi manaḡa, senaḡi ḡomi na tu boḡo ḡitaguni. Ḗomi tu au amaḡuri-taḡoni bakunai, be boḡo maḡuri-taḡoni. <sup>20</sup>Mo ḡaro ai ḡomi boḡo ribani, au tu Tamagu nuḡanai atanuni, ema ḡomi au nuḡagu ai ḡotanuni, ema au ḡomi nuḡami ai atanuni. <sup>21</sup>Au ḡegu taravatu guruḡari eḡabi-raḡerini ema ekorana-iaḡirini tarimana na tu au eura-viniguni. Ema au eura-viniguni tarimana tu au Tamagu na maki beura-viniani. Au na maki bauraviniiani ema au tauḡegu ḡia ḡenai bavevaḡa-foforini.”

<sup>22</sup>Iudas, dia Iudas Isakariota, na ekiraiato, ekirato, “Vereḡauka, kamasi nai ḡoi tauḡemu ḡai ḡemai tu bovevaḡa-foforini, senaḡi tanobara ḡenai tu asiḡina?” <sup>23</sup>Iesu na evaḡa-veseato, ekirato, “Au eura-viniguni tarimana na au ḡegu vevaḡa-riba bekorana-iaḡiani. Benamo au Tamagu na mo tarima beura-viniani. Benamo tauma ruarua baḡa iaḡoni ḡia ḡenai, bena ḡia ḡesi baḡa tanu-vanaḡi vanaḡini. <sup>24</sup>Au asi eura-viniguni tarimana tu, au ḡegu guruḡa asi ekorana-iaḡirini. Mai guruḡa ḡoseḡaḡirini tu dia au ḡegu, senaḡi Tamagu ḡena; au tu ḡia na etuḡuguto.

<sup>25</sup>Ḗomi ḡesi roḡo atanuni nuḡanai, maiḡeri guruḡa ḡomi akira-varamini. <sup>26</sup>A ḡomi vaḡa-kavami tarimana tu Iauka Veaḡa. Ḗia tu au aragu ai Tamagu na betuḡu-iaḡomaiiani. Ḗia na dagara mabarari bevaḡa-ribamini, ema au na kara akiraḡirito

dagarari, ġemi tuġamaġi ai ma bevaġa-fofori ġenoġoirini. <sup>27</sup> Maino ġomi ġesi mai aiaġuiani. Mai tu au ġegu maino ġomi avinimini. Ema mai maino au na ġomi avinimini tu, dia tanobara tarimari na ġomi ġevinimini kavana avinimini. Nuġami asi beġene raġe e asi boġono tuġamaġi-ġutuma ema asi boġono gari. <sup>28</sup> Au baguruġa boġo seġaġia, au bakira, ‘Au tu araka-ġerevaġini, senaġi ma baġenoġoi-iaġomani ġomi ġemi ai.’ Bema au boġoro ura-vinigu nai tu, Tamagu ġenai aiaġoni, be ġoro iaku, korana au Tamagu tu iaru-korokoro, au iata-raġegu ai. <sup>29</sup> Mai veiġa tu roġosi roġo bere ġora nuġanai akira-varamini. Be mai veiġa befoforini nai, boġono vaġa-moġonigu. <sup>30</sup> Au ġomi ġesi asi bita guruġa-guruġa maukani, korana mai tanobara eġori-kauani verena, Satani, tu dori eraġasini. Ġia tu asi kokorena, be au ġegu ai kara ta asi beveiani. <sup>31</sup> Senaġi mai tanobara tarimari beġene riba, au na Tamagu aura-viniani. Ema au tu Tamagu na ekiraġiato ilailanai aveini.

Be ġovariġisi, mai gabu na siraka-veġita.”

### Vine ema legana

**15** “Au tu vine ġauna korikori, ma au Tamagu tu vine tavoġana ġauvei-iaġina tarimana. <sup>2</sup> Vine legari au ġegu ai kafakau dagarari, asi ġeġwani legari tu, ġia na ebaasi-vaġirini; ma lega mabarari ma ġwari tu, ġia na eiarevarini, beġene ġwawovoka uranai. <sup>3</sup> Ġomi tu varau boġo iareva-ġosi. Mo guruġa avinimito moġeri na beġe iarevami. <sup>4</sup> Au ġegu ai boġono kafakau, be au maki ġomi ġemi ai kafakau-taġo bana tanu. A vine legana ta ġereġana moġo nai tu asi beġwani, senaġi vine ġauna ġenai bekafakau-taġoni vau beġwani. Ġomi maki moġesi, bema au ġesi asi boġo sebonani nai, ġwaġwami ta asi bevetoreni.

<sup>5</sup> Au tu vine, a ġomi tu lega. Au ġegu ai bekafakauni, au ġia ġenai bakafakauni kavana, tarimana tu ġwaġwana asisebo bevetoreni. Bema au boġo iaġuiguni nai, dagara ta asi boġo veiani. <sup>6</sup> Au ġegu ai asi ekafakauni tarimana tu, vine ġauna legana noġa beġe ġabiani, ma beġe fitoġaiiani, benamo bea kaukauni. Mo ġau legari kakorori tu ġeġabi-vegogorini, benamo karavai ġefiu-raġerini, benamo ġegaburini. <sup>7</sup> Bema ġomi au ġegu ai boġo kafakauni o au ġesi boġo sebonani, ma au ġegu guruġa ġomi ġemi ai betanuni nai tu, kara ġoura-vinirini dagarari boġo noġini tu, ġemi noġinoġi dagarari boġo ġoitaġorini. <sup>8</sup> Bema ġwaġwami asisebo asisebo beġe vetoreni nai tu, tarimarima na au Tamagu ġevaġa-raġeani, ema ġomi maki au ġegu mero korikori ai boġo iaġoni.

<sup>9</sup> Tamagu na au eura-viniguni ilailanai, au na ġomi maki aura-vinimini. Vanaġi-vanaġi au ġegu veuravini nuġanai boġono tanu. <sup>10</sup> Bema au ġegu taravatu guruġari boġo korana-iaġirini nai, ġomi tu au ġegu veuravini nuġanai boġo tanuni, ilailana au Tamagu ġena taravatu guruġari akorana-iaġirini, benamo ġia ġena veuravini nuġanai atanuni kavana. <sup>11</sup> Au na maiġeri guruġa ġomi bavinimi anina tu, au ġegu iaku ġomi nuġami ai bene tanu, be ġomi maki nuġami iaku na beġene vonuvonuraġe. <sup>12</sup> Au ġegu taravatu guruġana tu maiġa, tauġemi fakami ai karomi ġesi boġono veuravini, au na ġomi aura-vinimini kavana. <sup>13</sup> Ma ġena veuravini barego lelevaġina tarimana tu, karona urari ai ġena maġuri gwaina asi eġabiani, etore-tariani. Ma ġena veuravini barego tarimana korikori tu moġa, ma boruna ta tu asiġina maia. <sup>14</sup> Bema au na kara akiramini veiġari boġo veirini nai, ġomi tu au ġatagu. <sup>15</sup> Au na ġomi tu vetuġunaġi-iaġovini tarimami asi ma bakiraġimini, korana vetuġunaġi-iaġovini tarimana na ġena vere na kara eveiani, ġia tu asi ribana. A ġomi tu ġata batoni,

korana au Tamagu ġenana kara aseġaġirito dagarari mabarari tu, ġomi varau avaġa-ribamito. <sup>16</sup> Ġomi na au asi ġoġabi-viriġiguto, senaġi au na ġomi aġabi-hidimito, ema avaġa-ruġamito boġono iaġo, ġwaġwami boġono vaġa-ġorari, ma moġeri tu namo moġo beġene tanu-vanaġi vanaġi. Moġesina tu karakara ġoura-vinirini dagarari au aragu ai Tamagu boġo noġiani tu, Tamagu na bevinimini. <sup>17</sup> Au ġegu taravatu gu-ruġana ġomi avinimini tu maiġa, karomi ġesi boġono veuravini.”

### Tanobara tarimari na Iesu ġena mero ġeiau-rakava vinirito

<sup>18</sup> “Bema tanobara tarimari na beġe iau-rakava vinimini nai, boġono riba, au tu ġeiau-rakava vini-guineguto. <sup>19</sup> Bema ġomi tanobara ġena tarimarima roġo ġoro tanu tu, tanobara tarimari na beġere ura-vinimi, korana ġomi tu ġia ġeri tarimarima bene. Senaġi ġomi tu dia tanobara ġena tarimarima. Asiġina. Ġomi tu varau aġabi-viriġimito, ma tanobara maġurina nuġana na aġabi-vaġimito. Moġa lorinai tanobara tarimari na ġeiau-rakavamini. <sup>20</sup> Akiramito guruġana boġono tuġamaġi-taġoa: ‘Vetuġunaġi merona na etuġu-naġiani tarimana asi bevanaġiani.’ Bema au ġevaġa-midigu midiguguto, ġomi maki beġe vaġa-midigu midigumini. Bema au ġegu guruġa ġekorana-iaġirito, ġomi ġemi guruġa maki beġe korana-iaġirini. <sup>21</sup> Ġia na maiġeri veiġa asi namori mabarari ġomi ġemi ai beġe veirini tauna korikori tu, ġomi na au aragu ġokorana-iaġiani nai; korana au etuġuguto Barauna ġia tu asi ribari. <sup>22</sup> Bere au asi bara iaġoma, ma asi bara guruġa-viniri, ġia tu asi ġeri rakava. Senaġi ġia maitoma ġeri rakava na tu asi ġeri raga-maġuri dabarana. <sup>23</sup> Au eiau-rakavaguni tarimana na au Tamagu maki eiau-rakavaiani. <sup>24</sup> Bere au na nuġa-farevaġi veiġari, tarima tari na roġosi roġo beġene veiri dagarari, ġia vefakari ai asi bara veiri, ġia tu asi ġeri vei-rakava. Senaġi maitoma ġia na moġeri nuġa-farevaġi veiġari tu beġe ġitari, ma nuġanaġi ġia na au ma Tamagu ġesi tauma ruarua tu ġeiau-rakavamani. <sup>25</sup> Senaġi maiġeri veiġa ġeġorani korana tu, taravatu nuġanaġi ġetoreato guruġana bene moġoni ġana. Mo guruġa tu iniġesi ekirani: ‘Au tu ġeiau-rakava-kavaguto moġo, asi korana tai.’

<sup>26</sup> Vevaġa-kava Iaukana tu beiaġomani. Ġia tu guruġa moġoniri kiraġi-kiraġiri Iaukana, Tamagu ġenana beiaġomani. Au na ġomi ġemi ai batuġuani, Tamagu sev-inai batanuni nai tu. Ġia na au bema kiraġi-foforiguni. <sup>27</sup> Ġomi na maki au roġo boġono kiraġi-foforigu, korana ġomi tu au ġesi tatanuni tovotovona na veġata bene.”

**16** “Au na maiġeri guruġa akira-varamini, korana asi aurani ġemi veġabidadama na boġono raka-veġita. <sup>2</sup> Iuda tarimari ġeri rubu na beġe tore-veġitamini. Aba, ġarona mani eiaġomani, tau ta na bevaġi-masemini nai tu, ġia mataboru bekirani, ġia tu Barau vetuġunaġina eiaġo-viniani. <sup>3</sup> Maiġeri veiġa ġomi ġemi ai beġe veirini korana tu ġia na au Tamagu asi ġeribaiao, ema au maki asi ġeribaguto. <sup>4</sup> Senaġi au na maiġeri guruġa tu nakiravara-guinemi. Be ġoirai vau tarimarima na veiġari ġemi ai beġea veirini nai, maiġeri guruġa bakira-varami boġono tuġamaġiri.

### Iauka Vevaġa ġena ġauvei

Tovotovonai au tu roġo ġomi ġesi tatanuto-ġoi naima, maiġeri guruġa ġemi asi akiraġirito. <sup>5</sup> Senaġi toma tu etuġu-mariġoguto Barauna ġenai ma aġenoġoi-iaġoni, ma ta na tu asi odanaġiguni, ‘Ġoi tu aiġana oiaġoni?’ asi otoni. <sup>6</sup> Ġomi tu maiġeri guruġa bakira-varami nai, nuġami ġevewaraġini e ġetaġitaġini. <sup>7</sup> Senaġi moġoni akiramini, mai tu ġomi ġemi namo uranai ġomi vekaravami na araka-ġerevaġini,

arakani. Korana tu bema au asi barakani nai, vevaġa-kava Iaukana ġemi ai asi beiaġomani. Senaġi bema au baiaġoni nai tu, ġemi ai batuġu-iaġomaiiani. <sup>8</sup>Ma ġia beiaġomani nai, mai tanobara tarimari ġeri vei-rakava ma Barau ġena vei-iobukaiobuka ema Barau na tanobara tarimari bekota-vinirini aniri bevaġa-fofori ginikaurini. <sup>9</sup>Ġeri vei-rakava tauna korikori tu, au asi ġevaġa-moġoniguni. <sup>10</sup>Barau ġena vei-iobukaiobuka tauna korikori tu maiġa, au tu Tamagu ġenai aiaġoni, be asi ma boġo ġita-ġenoġoiguni. <sup>11</sup>Ema Barau na tanobara verena tu varau ekota-viniato.

<sup>12</sup>Dagara vovoka roġo aurani nakira-varami, senaġi mabarari maitoma tu asi ilaila boġo tuġamaġi-fakarini e asi boġo ġabi-raġerini. <sup>13</sup>Senaġi guruġa moġoni Iaukana beiaġomani, ġia na vau ġomi beġori-kaumini, benamo guruġa moġoniri boġo rib-arini. Korana ġia tu dia tauġena ġena tuġamaġi guruġari bekiraġirini. Asiġina. Ġia tu au ġeguna beseġaġini guruġari moġo bekiraġirini. Ema gabivau beġe ġorani dagarari bekiravara-guinemini. <sup>14</sup>Ġia na au bevaġa-raġeguni, korana au ġeguna beġabirini guruġari ġomi bekira-varamini. <sup>15</sup>Au Tamagu ġena dagara mabarari tu au ġegu. Moġesi naima au bakira, ‘Ġia na au ġeguna beġabirini guruġari ġomi bekira-varamini.’”

### **“Ġemi nuġa-midigumidigu tu iaku verere ai beġe iaġoni”**

<sup>16</sup>“Ġaro asi manaġa nuġanai, ġomi na au asi ma boġo ġitaguni, ma ġaro asi manaġa murinai tu, ma boġo ġitaguni. [Korana au tu Tamagu ġenai aiaġoni.]” <sup>17</sup>Benamo ġena mero kotari tauġeri vefakari ai moġo ġeguruġa-guruġato, ġekirato, “Mai ġia na tu kara ekiraġiani, ekirani, ‘Ġaro asi manaġa nuġanai au asi ma boġo ġitaguni, ma ġaro asi manaġa murinai tu ma boġo ġitaguni,’ e ma ekirani, ‘Korana au tu Tamagu ġenai aiaġoni?’” <sup>18</sup>Moġesina naima ġekirato, “Mai ġia na tu kara ekiraġiani, ekirani, ‘Ġaro asi manaġa’ etoni? Ġita asi taribani ġia na tu kara ekiraġiani!”

<sup>19</sup>Iesu eribato, ġena mero ġeri ura tu ġedanaġia ġetato-ġoi, naima ġia na evaġa-guruġarito, ekirato, “Ġomi tu tauġemi ġereġami au na kara bakiraġia vedare-mutukana ġoveini ei? Au bakira, ‘Ġaro asi manaġa nuġanai asi ma boġo ġitaguni, ma ġaro asi manaġa murinai tu ma boġo ġitaguni,’ basi anina ġovetauani?” <sup>20</sup>Moġoni akiramini, ġomi tu boġo taġini e boġo taġi-vanoro vanoroni, senaġi tanobara tarimari tu beġe iakuni, beġe verereni. Ġomi tu boġo nuġa-midigu midiguni, senaġi ġemi nuġa-midigumidigu tu iaku verere ai beġe iaġoni. <sup>21</sup>Vavine ta mero nevaġa-maġuria ġana tu, emidigumidiguni, korana ġena ġabi aoana eraġasini. Senaġi mero emaġurini nai, ġenai mo midigumidigu tu etuġa-rekwaiani, korana mero ta tanobarai varau bevaġa-maġuria iakunai. <sup>22</sup>Ġomi maki moġesina: Toma tu ġonuġa-midigu midiguni, senaġi au na ma baġita-ġenoġoimini, be ma boġo iakuni. Ma tarima ta na ġomi ġemi mo iaku tu asi ilaila ġemina ma beġabi-veġitaiani.

<sup>23</sup>Ma mo ġaro ai ġomi na au dagara ta asi ma boġo noġiguni. Moġoni akiramini, au aragu ai karakara boġo noġirini dagarari mabarari, au Tamagu na bevinimini. <sup>24</sup>Beiaġoma mo initoma, ġomi na au aragu ai dagara ta roġosi roġo boġoro noġia. Au aragu ai boġono noġi-raġe, be boġono doġari; benamo nuġami iaku na beġene vonuvonu-raġe.”

### Iesu na tanobara ġena seġuka evaġa-ketoato

<sup>25</sup> “Maiġeri guruġa au na ġomi ġemi tu barabore ai akiraġirini, senaġi ġaro ġoirai tu barabore ai asi ma bavaġa-guruġamini. Ġoirai vau au Tamagu varina tu ġemi bakiraġi-fofori ginikauani. <sup>26</sup> Mo ġaro beraġasini nai, ġomi tu au aragu ai boġo noġi-noġini. A au tu asi akirani, au na ġomi urami ai Tamagu banoġiani; <sup>27</sup> korana Tamagu tauġena na ġomi eura-vinimini. Ġomi eura-vinimini, korana ġomi na au ġouraviniġuni, ema ġovaġa-moġoniguni, au tu Barau ġenana aiaġomato. <sup>28</sup> Au tu Tamagu sevina na mai tanobara ġana amariġoto. Ma toma tu mai tanobara aiaġuiani, Tamagu ġenai ma aġenoġoi-iaġoni.”

<sup>29</sup> Ġena mero na ġevaġa-guruġaiato, ġekirato, “Oġitaiani, toma ġoi tu oguruġa-fofori ginikauni, asi oguruġa-baraboreni. <sup>30</sup> Toma ġai ġama riba-korikorini, ġoi tu dagara mabarari ma ribamu. Tarima ta na nedanaġimu betoni vedanaġina maki, ġoi na tu boriba-guineani. Moġa lorinaġi ġavaġa-moġonimuni, ġoi tu moġoni Barau ġenana oiaġomato.”

<sup>31</sup> Iesu na evaġa-veserito, ekirato, “Mai vau ġovaġa-moġoniguni, ei? <sup>32</sup> Moġoni, ġarona mani eiaġomani, varau beraġasi, ġomi tu boġo raga-rovorovoni, tata ġemi ura ragana boveini, benamo au tu ġereġagu boġo iaġui-momoraġiguni. Senaġi au tu dia ġereġagu, korana Tamagu tu au sevigu ai. <sup>33</sup> Au aurani, au ġegu ai boġono kafakau, be au ġegu ai maino boġono ġabi uranai, au na maiġeri guruġa ġomi bakiravarami. Mai tanobarai ġotanuni nai, midigumidigu boġo ġoitaġoani. Senaġi boġono kokore! Au na tanobara ġena seġuka avaġa-ketoato.”

### Iesu ġena ġuriġuri

**17** Iesu moġesi eguruġa-ġosito murinai, egaga-raġeto, guba eġitaiato, benamo ekirato, “Tamagu, horana tu maiġa. Natumu marevana baregona novaġa-foforia, be Natumu na ġoi marevamu baregona maki bene vaġa-foforia. <sup>2</sup> Korana ġoi na maoro ġia oviniato, tarimarima mabarari ġia ġena veġitaġau gaburenai beġene tanu. Be ġoi na ġia oviniato tarimari mabarari maġuri vanaġivanaġi bene viniri. <sup>3</sup> Maġuri vanaġivanaġi tu maiġa: Maġuri vanaġivanaġi beġe ġabiani tarimari mabarari beġene riba, Barau moġonimu tu ġoi sebomu kwariġutu moġo, ema Iesu Keriso beġene ribaia. Iesu Keriso tu ġoi na otuġuato tanobara ġana. <sup>4</sup> Au na ġoi tanobarai bavaġa-raġemu. Ġoi na oviniguto bana veia otato ġauveina varau bavaġa-koria. <sup>5</sup> Tama, tanobara roġosi bere vesina ema au maki roġo ġoi ġesi atanuto-ġoi nuġanaġi, au ġegu ai tu mareva baregona etanuto-ġoi. Toma aurani, mo mareva ġoi tauġemu ġoiramu ai ġegu ai novaġa-foforia.”

### Iesu ġena mero ġeri eġauġauto

<sup>6</sup> “Tanobara maġurina nuġana na oġabi-vaġirito, benamo oviniguto tarimari ġeri ai ġoi tu avaġa-foforimuto. Moġeri tu ġoi ġemu tarimarima, ġoi na au oviniguto. Ma ġia na ġoi ġemu guruġa ġekorana-iaġiato. <sup>7</sup> Toma ġia beġe riba, ġoi na oviniguto dagarari mabarari tu ġoi ġemuna moġo ġeiaġomato. <sup>8</sup> Korana ġoi na oviniguto guruġari mabarari akira-vararito. Ġia na mo guruġa mabarari ġeġabi-raġerito, ma ġeribamaoroto, au tu ġoi sevimu na aiaġomato. Ema ġevaġa-moġoniani, au ġoi na otuġu-iaġomaguto.

<sup>9</sup> Au tu ġia ġeri aġuriġurini. Au tu dia mai tanobara maġurinaġi ġetanuni tarimari ġeri aġauġauni. Senaġi au oviniguto tarimari ġeri aġauġauni, korana ġia tu ġoi ġemu tarimarima. <sup>10</sup> Au ġegu tarimarima mabarari tu ġoi ġemu tarimarima. Ema ġoi ġemu tarimarima mabarari tu au ġegu tarimarima. Ema ġia ġerina au aragu evaraġeni, korana au ġegu mareva baregona ġevaġa-foforiani. <sup>11</sup> Au tu ġoi ġemu ai aiaġosini, mai tanobarai asi batanu-rovaġini. Senaġi ġia tu tanobarai roġo beġe tanuni. Tamagu Veaġamu, ġoi na au oviniguto tarimari ġoi aramu seġukana na bono ġitaġauri. Be ġia mabarari beġene sebona, ġita taura ruarua kavana. <sup>12</sup> Au tanobarai roġo ġia ġesi atanuto-ġoi nuġanai, ġoi aramu seġukana na ġia anariġaurito-ġoi. Ġoi na au oviniguto tarimari tu aġitaġau-ginikaurito, be ta asi erekwarekwato; bene rekwarekwa tauna moġo, moġoni erekwarekwato, Buka Veaġai ġetoreato guruġana vaġa-moġonina ġana.

<sup>13</sup> Senaġi toma au tu ġoi ġemu ai aiaġosini. Au tu roġo tanobarai maiġegu nuġanai, maiġeri guruġa bakiraġiri, au ġegu iaku e verere na ġia nuġari bene vaġa-vonuvonu raġeri ġana. <sup>14</sup> Ġoi ġemu guruġa au na ġia varau avinirito. Ma tanobara maġurinaġi ġetanuni tarimari na ġeiaiu-rakavarini, korana ġia toma tu dia mai tanobara tarimari, au kavana, au tu dia mai tanobara tarimagu. <sup>15</sup> Au tu dia ġia mai tanobara na bono ġabi-vaġiri ġuriġurina aveini. Senaġi anoġimuni, bono nariġauri, be Tarima Raka-vana, Satani, na asi bene ġabiri atoni. <sup>16</sup> Ġia tu dia mai tanobara tarimari, au kavana, au tu dia mai tanobara tarimagu. <sup>17</sup> Ġoi ġemu guruġa moġonina na novaġa-veaġari; ġoi ġemu guruġa tu moġoni. <sup>18</sup> Ġoi na tanobara maġurinaġi ġetanuni tarimari fakari ai au otuġu-toġaguto ilailanai, au na ġia maki tanobara maġurinaġi roġo ġetanuni tarimari vekaravari ai batuġu-toġari. <sup>19</sup> Ġia urari ai au tauġegu avevaġa-veaġani, be ġia maki beġene veaġa-korikori.”

### Iesu eġuriġurito veġabidadama tarimari mabarari ġeri

<sup>20</sup> “Au tu dia ġia ġena mero ġereġari ġeri moġo aġauġauni. Asiġi. Au tu ġia na vari beġe fiuani nai, au beġe vaġa-moġoniguni tarimari mabarari maki ġeri aġuriġurini. <sup>21</sup> Be ġia mabarari sebonai beġene iaġo, Tama, ġoi au nuġagu ai otanuni ema au ġoi nuġamu ai atanuni ilailana. Moġesi kavana au aurani, ġia maki beġene sebona moġo, ma ġita nuġarai beġene tanu, be tanobara maġurinaġi roġo ġetanuni tarimari beġene riba, au tu ġoi na otuġu-mariġoguto. <sup>22</sup> Ġoi na au mareva baregona oviniguto dagarana ġia avinirito, ġia sebonai beġene iaġo uranai, be ġita taura ruarua sebona kavana, ġia maki beġene sebona. <sup>23</sup> Au ġia nuġari ai, ma ġoi au nuġagu ai, be ġia maki beġene sebona-kwariġuto korikori. Benamo monana tanobara maġurinaġi roġo ġetanuni tarimari beġene riba, au tu ġoi na otuġu-iaġomaguto, ema beġene riba maki, ġoi na ġia oura-vinirini au oura-viniguni kavana.

<sup>24</sup> Tama, au ġegu ura baregona tu, au ainai batanuni, au oviniguto tarimari maki au ġesi, be monai baġana tanu, be au mareva baregona oviniguto marevana beġene ġitaia. Mo mareva oviniguto, korana au ġoi na tu tanobara roġosi roġo boro veia nuġanai veġata oura-viniguto. <sup>25</sup> Tamagu o, ġoi tu vei-iobukaiobuka Baraumu, tanobara maġurinaġi ġetanuni tarimari na ġoi asi ġeribamuto. A au na tu ġoi aribamuto, ema au ġegu mero maiġeri tu beġe riba, au tu ġoi na otuġu-mariġoguto. <sup>26</sup> Ġoi aramu ġia akira-vararito, e roġo bakiraġi-foforiani. Korana monana au oura-viniguni veu-ravinina ġia nuġari ai betanuni, ema au maki ġia nuġari ai batanuni.”

### Iesu tuari tarimari na ġeġabiato

**18** Iesu na mo ġauġau ekiraġi-ġosiato murinai, ġena mero ġesi ġerakato. Ġeiaġoto, Kidron ġarukana na ġeraka-vanaġito, reke ta ġana. Monai tu vamoka ta, ma ġena mero ġesi mo vamoka nuġana na ġeraka-toġato. <sup>2</sup> Iudas, Iesu erevaiato tarimana, maki mo gabu tu ma ribana, korana Iesu ma ġena mero ġesi monai ġaro vovoka ġetanu-vegogoto-ġoi. <sup>3</sup> Moġesina naima Iudas na Roma vetari tarimari e Rubu Veaġa ġitaġauna tarimari tari eġoririto. Mo Rubu Veaġa ġitaġauna tarimari tu Rubu Veaġa vereri baregori e Farisea tarimari na ġetuġurito. Benamo mo vamoka ġana ġeiaġoto, ma tosiri, ma lamefari, ema ma ġeri vetari farefareri. <sup>4</sup> Iesu tu ribana guine, ġia ġenai kara beġe ġorani dagarari mabarari, naima eiaġoto seviri ġana, benamo edanaġirito, ekirato, “Ġomi na tu deikara ġovetauani?”

<sup>5</sup> Ġia ġevaġa-veseto, ġekirato, “Iesu, Nasareta tarimana.” Iesu na ekirarito, ekirato, “Tarimana tu au.” Ma Iudas, Iesu erevaiato tarimana, maki ġia ġesi monai ruġataġo. <sup>6</sup> Iesu na ekirarito, ekirato, “Tarimana tu au,” etato nai, ġia mabarari ġeruġa-ġenoġoito, benamo tano ai ġeketo-tarito. <sup>7</sup> Iesu na ma edanaġi-ġenoġoirito, ekirato, “Ġomi na tu deikara ġovetauani?” Benamo ġia ġekirato, “Iesu, Nasareta Tarimana.” <sup>8</sup> Iesu evaġa-veseto, ekirato, “Au na bakirami, tarimana tu au. Bema ġomi tu au moġo ġovetauguni nai, maiġeri tarima ġotuġuri, ġeraka.” <sup>9</sup> Moġesi ekirato, korana ġia ġena guruġa tovtovonai ekiraġiatio guruġana bene moġoni ġana, ekirato, “Au oviniguto tarimari tu sebona ta maki asi avei-rekwa-rekwaiato.”

<sup>10</sup> Ma nuġanai Simona Petero ġimanai tu vetari baġana ta. Mo vetari baġana einuvaġiatio, edaveato, benamo Rubu Veaġa verena baregona ġena vetuġunaġi-iaġovini tarimana seġana aroribana ebasi-vaġiatio. Mo vetuġunaġi-iaġovini tarimana arana tu Malko. <sup>11</sup> Benamo Iesu na Petero ekiraiatio, ekirato, “Ġoi na mani vetari baġana faosinai noġura-toġaia! Au Tamagu na bevinigu midigumidigu bedina tu asi bana niua, ei?”

### Iesu Anas ġenai ġeġori-iaġoato

<sup>12</sup> Benamo vetari tarimari ma ġorikauri tarimana ema Iuda tarimari ġeri Rubu Veaġa ġitaġauna tarimari na Iesu ġeġabiato, benamo ġebarubaruato, <sup>13</sup> benamo Anas ġenai ġeġori-iaġo guineato, korana Anas tu Kaiafas ġena taġama. Kaiafas na Anas natuna vavinena eġaraġoato. Kaiafas tu Rubu Veaġa verena baregona mo laġani ai. <sup>14</sup> Kaiafas na Iuda tarimari esisiba-vinirito, ekirato, “Namona tu tarima sebona ta moġo tarimarima mabarari urari ai bene mase.”

### Petero na Iesu ekira-ġuniġauato

*Mataio 26:69-70; Mareko 14:66-68; Luka 22:55-57*

<sup>15</sup> Simona Petero e Iesu ġena mero ta na tu Iesu ġeraka-ġiatio. Rubu Veaġa verena baregona tu ma ribana, mo Iesu ġena mero moġa. Moġesi nai ġia maki Iesu ġesi evaġa-rakatoġa sebonaiatio, Rubu Veaġa verena baregona ġena numa maġuna nuġanai Kota gabunai. <sup>16</sup> Senaġi Petero tu ġatama-boka murikanai moġo eruġato. Ma mo Iesu ġena mero, Rubu Veaġa verena baregona na eribaiatio merona, ma eġenoġoito, benamo ġatama-boka eġita-ġauato ġuiatona ea vaġa-guruġaiatio, ma Petero eġori-toġaiatio. <sup>17</sup> Benamo ġatama-boka eġita-ġauato ġuiatona na Petero ekiraiatio, ekirato, “Ġoi maki mai tarima ġena mero ta, ene?” Petero evaġa-veseto, ekirato,



“Asiġina, au tu asiġi.” <sup>18</sup> Mo gabu faraka na eġabiato, be vetuġunaġi-iaġovini tari-mari ema Rubu Veaġa ġitaġauna tarimari na tu karava ta ġetutuato. Benamo mo karava ġeruġa-ġeġeraġiato, ġevetunuto-ġoi. Petero maki ġia seviri ai eruġato ma evetunuto-ġoi.

### **Rubu Veaġa verena baregona na Iesu edanaġiato**

*Mataio 26:59-66; Mareko 14:55-64; Luka 22:66-71*

<sup>19</sup> Mo horai tu Rubu Veaġa verena baregona na Iesu edanaġiato, Iesu ġena mero e ġena vevaġa-riba evedanaġi-iaġirito. <sup>20</sup> Iesu na evaġa-veaseato, ekirato, “Au tu tari-marima ġutumama-bara ġoirari ai aguruġa-foforito. Au tu vanaġivanaġi Iuda tarimari ġeri rubu ai ema Rubu Veaġa nuġari ai avevaġa-ribato-ġoi, ma Iuda tarimari ġemara-vegogoni gaburi ai, au asi aguruġa-vekuretoġato. <sup>21</sup> Kara dainai au odanaġi-guni? Mo au aguruġato ġeseġaġiguto tarimari noa danaġiri, ġia ma ribari au na kara akiravara-vinirito.”

<sup>22</sup> Iesu moġesi eguruġato nai, Rubu Veaġa ġitaġauna tarimana ta ġia sevinai eruġa-taġoto-ġoi, monana Iesu ġoirana eforo-bubuġauato. Benamo Iesu ekiraiato, ekirato, “Ġoi mai Rubu Veaġa verena baregona tu maniġesi ovaġa-guruġaiiani?” <sup>23</sup> Iesu na evaġa-veaseato, ekirato, “Bema au na guruġa rakavana ta bakiraġia nai, noki-raġia, kamara guruġa rakavana! Senaġi bema au tu baguruġa-korikori, kara dainai boforogu.”

<sup>24</sup> Benamo Anas na Iesu roġo varo na barubaru Rubu Veaġa verena baregona Kaiafas ġenai etuġu-iaġoato.

### **Petero na Iesu ma ekira-ġuniġau ġenoġiato**

*Mataio 26:71-75; Mareko 14:69-72; Luka 22:58-62*

<sup>25</sup> Simona Petero tu roġo ruġataġo karavai evetunuto-ġoi. Benamo karava sevinai ġeruġa-vegogoto tarimari na ġedanaġiato, ġekirato, “Ġoi maki ġia ġena mero ta, ene?” Petero evekira-ġuniġauto, ekirato, “Asiġina, au tu asiġi.”

<sup>26</sup> Rubu Veaġa verena baregona ġena vetuġunaġi-iaġovini tarimana ta tu mo Petero na seġana ebase-vaġiato tarimana garagarana ta, ġia ekirato, “Au atuġamaġini tu, ġoi maki ġia ġesi mo vamoka nuġanai aġitamuto banaġu, ene?” <sup>27</sup> Petero ma evekira-ġuniġau ġenoġoito, ma nuġanai asikauna tu kokoroku egoġito.

### **Iesu Pilato ġoiranai**

*Mataio 27:1-2 ema 27:11-14; Mareko 15:1-5; Luka 23:1-5*

<sup>28</sup> Benamo Iuda tarimari na Iesu Kaiafas sevinai na ġeġori-iaġoato Roma ġeri gavana ġena numa barana ġana. Mo tu varau ekini-mama mamato-ġoi. Ma Iuda tarimari tu asi ġeurato, Roma ġeri gavana ġena numai beġene raka-toġa, korana ġekirato, veiareva, asi rakavari, beġene tanu. Ġia ġeri ura tu Pasova o mase aneruna na Isaraela tarimari evanaġirito moġo asi evaġirito verekona beġene ġania veġata. <sup>29</sup> Benamo Pilato ġeri ai eraka-rosito, benamo ekirato, “Mai tarima boġo ġabi-iaġomaia ġena kerere korana tu kara?” <sup>30</sup> Ġia na ġevaġa-veaseato, ġekirato, “Bema ġia veiġa rakavari asi bere vei nai tu, ġoi ġemu ai asi baġara ġabi-iaġomaia.” <sup>31</sup> Benamo Pilato na ekirarito, ekirato, “Ġoġabia, ma ġoġori-iaġoa, benamo ġemi taravatu ekirani ilailanai ġoa vaġa-kotaia.” Moġesi naima Iuda tarimari na Pilato ġekiraiato, ġekirato, “Ġai ġema taravatu na tu maoro asi evinimani, tarima ta baġana

vaġi-masea.”<sup>32</sup> Maiġa eġorato anina tu, Iesu na ġia aiġesina bemaseni ekiraġiato guruġana bene moġoni ġana.

<sup>33</sup> Benamo Pilato numa barana ġana ma erakatoġa-ġenoġoito, bena Iesu ekeaiato, ma edanaġiato, “Goi tu Iuda tarimari ġeri vere ba?”<sup>34</sup> Iesu na evaġa-veseato, ekirato, “Goi maniġesi au okiraġini tu tauġemu nuġamu siga moġo oguruġani ba tarima tari na beġe kira-varamu guruġana.”<sup>35</sup> Pilato evaġa-veseto, ekirato, “Be, au tu Iuda tarimagu, ei? Goi tu ġemu tanobara tarimari na ema Rubu Veaġa vereri na beġe ġabi-iaġomamu, au beġema vinigu. Goi tu kara kererena oveiato?”<sup>36</sup> Iesu na evaġa-veseato, ekirato, “Au ġegu Basileia tu dia mai tanobara dagarana. Bere au ġegu Basileia mai tanobara nuġanai bere vetore e bere ruġa nai tu, au ġegu vetuġunaġi-iaġovini tarimari ġere variġisi, Iuda tarimari ġesi ġere vevaġi, ma tarima ta maki asi bere ilaila, Iuda tarimari ġimari ai bere toregu. Senaġi au ġegu Basileia tu dia mai tanobara nuġanai eruġani.”<sup>37</sup> Pilato na moġesina naima Iesu edanaġiato, ekirato, “Be ġoi tu vere ba?” Iesu evaġa-veseto, ekirato, “Ġoi okirani au vere otoni tu moġoni oguruġani. Au tanobarai ama maġurito tauna korikori, guruġa moġonina bana vaġa-foforia ġana. Guruġa moġonina ġetanuni tarimari mabarari na au garogu tu ġeseġaġiani.”<sup>38</sup> Pilato ekirato, “Guruġa moġonina tu kara?”

### Iesu bene mase guruġana

*Mataio 27:15-31; Mareko 15:6-20; Luka 23:13-25*

Moġesi eguruġato murinai, ma eraka-rosito Iuda tarimari ġeri ai, benamo ekirarito, ekirato, “Au na mai tarima ġenai rakava ta tu asi badoġaria.”<sup>39</sup> Senaġi ġomi ġemi veiġa ta tu iniġesi, Pasova verekona ġaronai, dibura tarimana ta bana tuġu-vaġia. Be ġomi ġourani tu, ġemi Iuda tarimari ġeri vere natuġu-vaġia, ba?”<sup>40</sup> Benamo ġia mabarari ġekoġoto, ġekirato, “Asiġina! Ġia tu asiġi! Senaġi Barabas.” A Barabas tu elemato-ġoi e evevaġito-ġoi naima ġediburaiato.

**19** Moġesi naima Pilato na Iesu eġabiato, vetari tarimari o soldia evinirito, benamo ġekwariato.<sup>2</sup> Ema soldia na varovaro ma giniri dagarana ġebito-ġeġeraġiato, korona noġa ġeveiato, benamo Iesu debanai ġetore-kauato. Ema dabuġa maukana kakakakana na ġevaġa-dabuġaiato.<sup>3</sup> Benamo ġoirana ġana ġerakakavito, benamo ġekiraiato, ġekirato, “Iuda tarimari ġeri Vere, ġaro namona!” Benamo ġoirana ma ġeforoato.

<sup>4</sup> Pilato ma eraka-rosito Iuda tarimari ġeri ai, benamo ekirarito, ekirato, “Ġoġitaia, au na ġia ġomi ġoirami ai ama ġori-rosiani anina tu nama vaġa-ribami, au na ġia ġenai rakava ta tu asi badoġaria.”<sup>5</sup> Benamo Iesu ema raka-rosito, debana tu ma koronana, ġau ma giniginina ġevatoato dagarana, ema dabuġa kakakakana maki roġo etoġi-taġoato-ġoi. Benamo Pilato na Iuda tarimari ekirarito, ekirato, “Ġoġitaia, tarimana tu maiġa.”

<sup>6</sup> Moġesi Rubu Veaġa vereri baregori ma ġeri vetuġunaġi-iaġovini tauri na ġeġitaia to, ġefararato, ġekirato, “Ġovaġa-satauroa! Ġovaġa-satauroa!” Benamo Pilato na ekirarito, ekirato, “Ġomi tauġemi na ġoġabi-iaġoa, ma ġoa vaġa-satauroa, korana au na ġia ġenai kerere ta asi badoġaria.”<sup>7</sup> Ma Iuda tarimari na ġevaġa-veseato, ġekirato, “Ġai tu ma ġema taravatu, ma ġai ġema taravatu ekirani, ġia tu bene mase veġata, korana ġia tu tauġena moġo Barau Natunai bevevaġa-iaġo.”

<sup>8</sup> Pilato na mo guruġa eseġaġiato nai, egari-rakava rakavato.<sup>9</sup> Benamo numa baregonai ma eraka-toġato, benamo Iesu ekiraiato, ekirato, “Ġoi tu ainana oiaġo-

mato, ei?” Senaĝi Iesu na asi evaĝa-veseato. <sup>10</sup> Benamo Pilato na ekiraiato, ekirato, “Ĝoi tu asi ourani au vaĝa-vesegu ei? Ĝoi asi ribamu au tu ma ĝegu seĝuka ĝoi bavaĝa-satauromuni, e ma ĝegu seĝuka ĝoi batuĝu-vaĝimuni?” <sup>11</sup> Iesu evaĝa-veseto ekirato, “Bere Barau na guba na ĝoi seĝuka asi bere vinimu nai tu, toma au ĝoi ĝemu seĝuka gaburenai asi bara ritoĝo. Moĝa lorinai, au eĝabiguto ma ĝoi ĝimamu ai etoreguto tarimana, ĝena rakava tu barego lelevaĝi”. <sup>12</sup> Pilato na mo guruĝa eseĝaĝiati, benamo dabara evetauto-ĝoi, ĝena ura Iesu bene tuĝu-vaĝia. Senaĝi Iuda tarimari roĝo ĝekoĝoto-ĝoi, ĝekirato-ĝoi, “Bema ĝoi na mai tarima botuĝu-vaĝiani nai, ĝoi tu dia Kaisara ĝatana. Kamara tarima tauĝena evekiraĝini vere etoni, ĝia na tu Kaisara, Roma ĝeri vere, ekira-fitogaiani.”

<sup>13</sup> Pilato na mo guruĝa eseĝaĝiati, benamo Iesu ema ĝori-rosiati, benamo eiaĝoto, Kota eseĝaĝini tarimana ĝena sea ai ea tanukauto. Mo gabu tu “Fore Touraĝena” ĝetato-ĝoi. Ma Heberu garonai tu “Gabata.” <sup>14</sup> Mo ĝaro tu Pasova o Iuda tarimari mase aneruna na evanaĝirito moĝo verekona ĝana rovinatore ĝarona, ma horaĝauna 12 koloko tu varau eĝabiato. Benamo Pilato na Iuda tarimari ekirarito, ekirato, “Ĝoboge, ĝemi vere iomaiĝa!” <sup>15</sup> Senaĝi ĝia tu ĝefararato, ĝekirato, “Ĝoĝabi-veĝitaia! Ĝoĝabi-veĝitaia! Ĝoa vaĝa-satauroa!” Pilato na ma edanaĝirito, ekirato, “Ĝomi ĝemi vere tu navaĝa-satauroa, ei?” Rubu Veaĝa vereri baregori ĝevaĝa-veseto, ĝekirato, “Kaisara ĝereĝana moĝo ĝai ĝema vere, ma vere boruna ta tu asiĝina.” <sup>16</sup> Benamo Pilato na Iesu ĝia ĝimari ai etore-kauato beĝene vaĝa-satauroa ĝana.

### Iesu ĝevaĝa-satauroato

*Mataio 27:32-44; Mareko 15:21-32; Luka 23:26-43*

Benamo vetari tarimari o soldia na Iesu ĝeĝabiato, ĝeĝori-iaĝoato. <sup>17</sup> Ma Iesu na ĝena satauro efaĝa-vaيسيato, eraka-rosito, eiaĝoto gabu arana “Deba Ĝavana Gabuna” ĝana. Heberu garonai mo gabu arana tu “Golgota”. <sup>18</sup> Mo gabu ai ĝia na Iesu ĝevaĝa-satauroato tarima ruarua ĝesi; ta tavi tai, ta tavi tai, ma Iesu tu nuĝanai. <sup>19</sup> Ma Pilato na guruĝa tari ĝau lefalefa tai etorerito, benamo satauro tuĝunai ĝeikoko-kafakauato. Etorerito guruĝari tu maiĝeri, “IESU, NASARETA TAUNA, IUDA TARIMARI ĜERI VERE.” <sup>20</sup> Mo guruĝa tu Heberu garo ai, e Roma garo ai, ema Grik garo ai etorerito. Iesu ĝevaĝa-satauroato gabuna tu vanuĝa baregona sevinai, be Iuda tarimari vovoka na mo guruĝa debana ĝeiaviato. <sup>21</sup> Benamo Rubu Veaĝa vereri baregori na Pilato ĝekiraiato, ĝekirato, “‘Iuda tarimari ĝeri Vere’ tu asi notorea, senaĝi iniĝesi notorea, ‘Ĝia ekirato, au tu Iuda tarimari ĝeri Vere.’”

<sup>22</sup> Ma Pilato na evaĝa-veserito, ekirato, “Kara au na batorea guruĝana tu batorea veĝata.”

<sup>23</sup> Vetari tarimari na Iesu ĝevaĝa-satauroato murinai, ĝena dabuĝa ĝeĝabirito, ma karava vasivasi ĝeveirito, benamo vetari tarimari na ĝeri sebori sebori ĝeĝabito, ma vei-gabigabi dabuĝana tu ĝeiaĝuiato. Korana vei-gabigabi dabuĝana tu dabuĝa sebona na moĝo ĝeturiato. A ĝia tu dia dabuĝa vesavesari vovoka ĝeturi-kavikavito vau ĝeveiato dabuĝana. <sup>24</sup> Moĝesina naima tauĝeri fakari ai ĝeguruĝa-vegogoto, ĝekirato, “Asi sidarea, senaĝi laki ĝerena ta siveia, bewinini tarimana na mo dabuĝa bene ĝabia uranai.” Mai veĝa ĝeveiato tauna korikori tu, Buka Veaĝai ĝetorerito guruĝari beĝene moĝoni ĝana, maiĝesi ekirani, “Au ĝegu dabuĝa ĝia fakari ai ĝekar-

avarito, ema au ġegu dabuġa uranai laki ġerena ta ġeveiato.” Moġesi naima vetari tarimari na maiġeri veiġa ġeveirito.

<sup>25</sup> Iesu ġena satauro koranai tu vavine vasivasi (4) ġeruġa-taġoto-ġoi: Iesu sinana, e Iesu sinana tarina vavinena, e Maria, Klopa ġaraġona, ema Maria, Magadala vanuġana vavinena. <sup>26</sup> Iesu na sinana e Iesu na eura-viniato-ġoi merona monai ruġataġo eġitarito, benamo Iesu na sinana ekiraiato, ekirato, “Natumu merona maniġa.” <sup>27</sup> Ema ġena mero ekiraiato, ekirato, “Sinamu maniġa.” Mo ġaro na evesinato, Iesu ġena mai mero na Iesu sinana ġena numa ġana eġori-iaġoato, benamo enariato-ġoi.

### Iesu ġena mase

*Mataio 27:45-56; Mareko 15:33-41; Luka 23:44-49*

<sup>28</sup> Moġa murinai Iesu eribato, ġena ġauvei mabarari tu varau bevaġa-koriri. Ma Buka Veaġai ġetoreato guruġana bene moġoni uranai ekirato, “Au bokagu bekoke.” <sup>29</sup> A gwaġutu ta nuġanai tu vine nanuna mamakina monai toretaġo. Nanu erimaini dagarana mo vine nanuna mamakinai ġeduġi-ferieiato. Ma vine nanuna mamakina na evonuto, benamo isopo legana dudunai ġetore-kauato, benamo ġeduġi-varaġeato, Iesu bokanai ġetore-kauato. <sup>30</sup> Iesu na mo vine nanuna mamakina eniuato, benamo ekirato, “Bema-kori.” Ma debana eġero-riġoto, benamo tauġanina na ġia iaukana eraka-vaġito, emaseto.

### Soldia ta na Iesu sebina egwanuato

<sup>31</sup> Mo ġaro moġa tu rovinatore ġarona, korana beboġini ma belaġanini tu Sabadi veaġana baregona ta mo Pasova o Iuda tarimari mase aneruna na evanaġirito moġo verekona ġarori nuġari ai. Moġa lorinai Iuda tarimari asi ġeurato, mo Sabadi veaġana baregonai mase tarimari tauġaniri satauro tuġunai beġene tanu. Moġesi naima Pilato ġenogiato, Iesu ema mo tarima ruarua kwakuri beġene kwari-koruri, benamo satauro tuġuna na beġene ġabi-riġori. <sup>32</sup> Moġa lorinai vetari tarimari ġeiaġomato, benamo ġevaġa-satauro debaiato tarimana kwakuna ġekwari-koruato, ma tarima vaġa-ruaruana Iesu ġesi ġevaġa-satauroato moġa maki moġesi ġeveiato. <sup>33</sup> Senaġi Iesu ġenai ġeiaġomato nai, Iesu tu varau emaseto ġeġitaiato, be kwakuna asi ġekwari-koruato. <sup>34</sup> A vetari tarimana ta na moġo Iesu sebina garaġota na egwanuato. Benamo asikauna mo egwanuato gabuna na rara e nanu ġevebubu-rosito.

<sup>35</sup> Maiġa eġitaiato tarimana na evari-fiuato, ma ġia ġena vevarifiu tu moġoni. Ġia ma ribana, ġia tu eguruġa-korikorini, ma ġia na ekiraġi-foforiani anina tu, ġomi na maki boġono vaġa-moġonia ġana. <sup>36</sup> Maiġeri veiġa ġeveirito korana tu, Buka Veaġai ġetorerito guruġari beġene moġoni, ekirani, “Ġia tu turiġana sebna ta maki asi beġe lau-koruani.” <sup>37</sup> Ma Buka Veaġai etoreato guruġana ta tu maiġesi ekirani, “Sebina ġegwanuato tarimana ġenai ma beġe boġe-raġeni.”

### Iesu ġeguriato

*Mataio 27:57-61; Mareko 15; 42-47; Luka 23:50-56*

<sup>38</sup> Maiġa murinai Iosefa, Arimatea tarimana, na Pilato enoġiato, Iesu tauġanina bene ġabia ġana. Pilato na maoro eviniato, benamo eiaġoto, Iesu tauġanina ea ġabiato. Iosefa tu Iesu ġena mero ta, senaġi Iuda tarimari gariri eveito-ġoi, be erakavekuretoġato-ġoi, ġena veġabidadama asi evaġa-foforito-ġoi. <sup>39</sup> Nikodemo, tovo-

tovonai Iesu ġenai boġi eiaġoto tarimana, maki eiaġoto. Ġia na tu muro e aloe ġegiro-sebonarito muramurana kilogram gabana toitoi (30) maki eġabi-kauato. (Mo vedau muramurana bonana tu namo vedaurea). <sup>40</sup> Benamo Iesu tauġanina ġeġabiato, ma tauri ruarua na dabuġa kurokurona namona mamuramurana dagarana na ġekumuato, Iuda seneri na mase tarimari ġeveirito-ġoi ilailanai.

<sup>41</sup> Iesu ġevaġa-satauroato gabuna tu ma vamokana. Mo vamoka nuġanai tu gara kouġana ta fore na ġeveiato, ma nuġanai tarima ta tu roġosi beġere tore-toġaia. <sup>42</sup> Mo ġaro moġa tu Iuda tarimari ġeri rovinatore ġarona, ema mo gara kouġana maki kavinaġi, be Iesu ġeġabiato, monai ġea tore-toġaiato.

### Gara kouġana tu korina

*Luka 24:1-12*

**20** Sabadi ġarona murinai, Sandei boġiboġi iamoiamo, roġo mukunamukunai, Maria, Magadala vavinena, gara ġana eiaġoto. Benamo eboġeto, gara ġatama bokana ġetabe-ġauato forena tu ġeġabi-veġitaiato, be irau ai vetore eġitaiato. <sup>2</sup> Benamo eraga-ġenoġoi-iaġomato, Simona Petero e Iesu ġena mero ta, Iesu na eura-viniato-ġoi merona, ġeri ai, benamo ekirarito, ekirato, “Vereġauka tu gara na beġe ġabi-rakaia, ma ġita asi ribara ainai beġe torea.”

<sup>3</sup> Benamo Petero ema Iesu ġena mo mero ta moġa ġeraka-rosito, benamo gara ġana ġeiaġoto. <sup>4</sup> Ma tauri ruarua ġeraga-vegogo-iaġoto, senaġi Iesu ġena mo mero ta na Petero eraga-kwaneato, ma gara forenai ea raġasi-guinetu. <sup>5</sup> Etoġa-tarito, benamo eboġe-toġato, Iesu ġekumuato mo dabuġa kurokurona eġitaiato monai toretari. Ġia tu eboġe-toġato moġo, asi eraka-toġato. <sup>6</sup> Benamo Simona Petero eraġasito, benamo eraka-toġato gara kouġana nuġanai, ma Iesu ġekumuato dabuġa kurokurona eġitaiato monai toretari, <sup>7</sup> ema Iesu debana mabarana ġebaru-ġauato mukona eġitaiato, Iesu tauġanina ġekumu-ġauato mo dabuġa kurokurona ġesi tu asi tore-sebona. Senaġi mo muko tu ġereġana iokuioku, be irau ai. <sup>8</sup> Benamo Iesu ġena mo mero ema raġasi-guinetu, moġa maki eraka-toġato. Moġeri dagara eġitarito, benamo evaġa-moġoniato. <sup>9</sup> Korana ġia na Buka Veaġai evetoreto guruġana tu roġosi roġo beġene riba-korikoria, guruġana tu maiġa: Iesu tu mase na ma bevariġisi-ġenoġoini. <sup>10</sup> Benamo Iesu ġena mero ruarua ma ġeġenoġoito ġeri numa ġana.

### Iesu tu Maria, Magadala vavinena, ġenai eforrito

<sup>11</sup> Senaġi Maria tu gara kouġana murikanai eruġato vau etaġito-ġoi. Ma etaġito-ġoi nuġanai etoġa-tarito, benamo eboġe-toġato fore kouġana nuġana ġana. <sup>12</sup> Benamo aneru ruarua eġitarito, dabuġa kurokuro ġetogito, Iesu ġevaġa-genaiato gabunai tanutaġo. Ta tu debakanai etanuto, ma ta tu gabikanai etanuto. <sup>13</sup> Benamo mo aneru ruarua na ġekiraiato, ġekirato, “Vavine, ġoi tu karase nai otaġini?” Maria na evaġa-veserito, ekirato, “Korana au ġegu Vereġauka tu beġe ġabi-rakaia, ma au asi ribagu ainai ma beġea torea.”

<sup>14</sup> Maiġesi eguruġa-ġosito murinai, eboġe-ġeġeraġito tu, Iesu monai ruġataġo eġitaiato. Senaġi Maria tu asi eriba-maoroto, mo tu Iesu eruġa-taġoto-ġoi. <sup>15</sup> Iesu na ekiraiato, ekirato, “Vavine, ġoi tu kara dainai otaġini?” Ġoi tu deikara ovetauani?” Maria etuġamaġito, Iesu tu mo vamokai eġaukarani tarimana, be ekiraiato, ekirato, “Verebara, bema ġoi na boġabi-rakaia nai tu, ainai botorea gabuna nokira-varagu, be naġabia.” <sup>16</sup> Iesu na ekiraiato, ekirato, “Maria!” Maria eruġa-kureto, benamo eki-

raiato Heberu garo ai, ekirato, “Raboni!” Mai guruḡa tauna tu, “Vevaḡa-riba Tauna.”<sup>17</sup> Iesu na ekiraiato, ekirato, “Au asi noḡabi-tarigu, korana au tu Tamagu ḡenai roḡosi roḡo bara varaḡe. Senaḡi noiaḡo au tarikakagu ḡeri ai, benamo bono kirari, ‘Au tu au Tamagu e ḡomi Tamami, ema au ḡegu Barau e ḡomi ḡemi Barau ḡenai avaraḡeni.’”<sup>18</sup> Maria, Magadala vavinena, Iesu ḡena mero ḡeri ai eiaḡoto, benamo ekirarito, ekirato, “Au na Vereḡauka tu baḡitaia.” Benamo Vereḡauka na evaḡa-guruḡaiato guruḡari mabarari maki ma ekira-vararito.

### Iesu ḡena mero ḡeri ai efororito

*Mataio 28:16-20; Mareko 16:14-18; Luka 24:36-49*

<sup>19</sup> Mo Sandei boḡi ai, mo tu ḡaro giniguinena fura ta nuḡanai, Iesu ḡena mero tu numa tai ḡevegogoto. ḡia tu Iuda tarimari gariri ai, be ḡeri numa ḡatama bokana tu ḡebiri-ḡauato. Ma Iesu eiaḡomato, ḡia fakari ai eruḡa-tarito, benamo ekirato, “Asi ḡogari, nuḡami ai maino netanu.”<sup>20</sup> Moḡesi eguruḡa-ḡosito murinai, ḡimana ḡeikokorito e sebina ḡegwanuato moḡeri evaḡa-ḡitarito. Vereḡauka ḡeḡitaiato nai, ḡeiatu-rakavato.<sup>21</sup> Benamo Iesu na ḡia ma ekirato, “Asi ḡogari, nuḡami ai maino netanu! Tamagu na au etuḡuguto kavana, au na maki ḡomi atuḡumini.”<sup>22</sup> Moḡesina evaḡa-guruḡa ḡosirito murinai, iaḡana efururu-iaḡoato ḡeri ai, benamo ekirarito, ekirato, “Iauka Vevaḡa ḡoḡabia.”<sup>23</sup> Ḗomi na ḡena rakava boḡo tuḡamaḡi-fitoḡaiiani tarimana, ḡena rakava tu Barau na maki betuḡamaḡi-fitoḡaiiani. A ḡena rakava asi boḡo tuḡamaḡi-fitoḡaiiani tarimana tu, ḡena rakava Barau na maki asi betuḡamaḡi-fitoḡaiiani.”

### Iesu Tomasi ḡenai efororito

<sup>24</sup> Senaḡi Tomasi tu Iesu ḡena mero ḡeri ai eiaḡoto ḡaronai ḡia tu asiḡina. Tomasi arana ta tu Didimo o Kafa, ema ḡia maki Iesu ḡena mero ta mo mero gabanana ruarua (12) nuḡanai.<sup>25</sup> Moḡesina nai Iesu ḡena mero na ḡekira-varaiato, ḡekirato, “Vereḡauka tu ḡai na baḡa ḡitaia.” A Tomasi tu ekirato, “Au tu ḡimana ḡeikokorito gaburi baḡitarini, ema didigu ikoko ḡeraka-toḡato gaburi na baduḡi-toḡaiiani, e sebina ḡegwanuato, monana didigu baduḡi-toḡaiiani vau, bavaḡa-moḡoniani.”

<sup>26</sup> Ḗaro imaima toitoi (8) ḡekorito murinai, Iesu ḡena mero tu numa nuḡanai maia, ma mo ḡaro ai tu Tomasi maki ḡia ḡesi. Mo numa ḡatama bokana tu biribiri, senaḡi Iesu tu eiaḡomato, fakari ai eruḡa-tarito, benamo ekirato, “Asi ḡogari, nuḡami ai maino netanu.”<sup>27</sup> Benamo Tomasi ekiraiato ekirato, “Tomasi, ḡimamu noḡitari, didimu mai ikoko gaburi ai noma duḡi-toḡaia. E ḡimamu notuḡu-iaḡomaia, be didimu au sebigu ḡegwanuato mainai noma duḡi-toḡaia. Ḗemu daradara novaḡa-dokoa, ma novaḡa-moḡonigu.”<sup>28</sup> Benamo Tomasi na Iesu evaḡa-veseato, ekirato, “Au ḡegu Vereḡauka ema ḡegu Barau.”<sup>29</sup> Iesu na ekiraiato, ekirato, “Tomasi, ḡoi tu ovaḡa-moḡoniguni, korana boḡitagu nai. A asi ḡeḡitaguni, senaḡi ḡevaḡa-moḡoniguni tarimari tu beḡene iaku.”

### Mai buka Ioane na etoreato anina tu kara

<sup>30</sup> Iesu na vetoḡa boruri ḡutuma ḡena mero ḡoirari ai eveirito. Senaḡi moḡeri mai bukai tu asi atorerito.<sup>31</sup> A maiḡeri atorerito korana tu, ḡomi na Iesu boḡono vaḡa-moḡonia, ḡia tu moḡoni Keriso, Barau Natuna. Ma bema ḡomi na ḡia boḡo vaḡa-moḡoniani nai, ḡia aranai maḡuri vanaḡivanaḡi boḡo ḡabiani.

### Iesu mero imaima ruarua (7) ġeri ai efororito

**21** Moġa murinai Tiberia kouna rikinai Iesu ġena mero ġeri ai ma efororito. Monai tu maiġesi efororito: <sup>2</sup> Simona Petero; Tomasi, arana ta tu Didimo o Kafa; Natanaela, Kana vanuġa tarimana, Kana tu Galilea tanonai; Sebedaio natuna ruarua; ema Iesu ġena mero ruarua; mabarari monai ġetanu-vegogoto-ġoi. <sup>3</sup> Benamo Simona Petero na ekirarito, ekirato, “Au tu kou ġana maina aiāġoni.” Ma mo kotari ġekirato, “Gai maki ġoi ġesi taiāġoni.” Benamo tauri imaima ruarua (7) ġeraka-rosito, ġeiaġoto, ġasi ai ġea raġekauto, benamo ġea mainato. Senaġi mo boġi barabara nuġanai tu maġani-kone ta maki asi ġeġoitaġoato.

<sup>4</sup> Boġiboġi iamoiamo Iesu tu kou rikinai eruġa-taġoto-ġoi; senaġi ġena mo mero tu asi ġeriba-maoroto, mo tu Iesu eruġa-taġoto-ġoi. <sup>5</sup> Benamo Iesu na ekirarito ekirato, “Natugu, ġomi ġemi ai maġani-kone tari maniġeri, ba?” Ġia na ġevaġa-veseato, ġekirato, “Asiġina.” <sup>6</sup> Benamo Iesu na ekirarito, ekirato, “Reke ġasi aroribana rekana na ġofiu-riġoa, maninai tu maġani-kone tari boġo ġoitaġoni.” Reke ġefiu-riġoato, benamo ma ġeinu-raġea ġetato nai tu ġeinu-kavaiato meto fanifani, korana tu maġani-kone vovoka tabutabu ġevaġa-toġarito bene.

<sup>7</sup> Iesu ġena mero ta tu Iesu na eura-viniato-ġoi merona. Mai mero na Petero ekiraiato, ekirato, “Vereġauka tu iomoġa.” Simona Petero na mo guruġa eseġaġiato, “Vereġauka tu iomoġa” nai, asikauna ġena dabuġa eraga-veiato, benamo kou ai ebaba-reito. Mo dabuġa tu, eġauveito-ġoi be ekokiato. <sup>8</sup> Senaġi Iesu ġena mero kota tu mo bouti na vau ġeleva-iaġoto. Mo reke ma maġani-konena maki ġeinukau-iaġo sebonaiato. Korana ġia na mo reke ġefiu-riġoato gabuna ema fenu fakari tu asi man-aġa, mita sinau sebona (100) kavana moġo.

<sup>9</sup> Fenu ai ġea darokauto nai, ġeboġeto tu karava vaġa-ġara ġeġitaiato, e maġani-kone karava torekau ġeġitarito, ema beredi tari maki monai toretaġo. <sup>10</sup> Ma Iesu na ekirarito, ekirato, “Gomi na reke ai boġo vaġa-toġari maġani-koneri tari ġoġabi-iaġomari.” <sup>11</sup> Simona Petero ġasi ai eraġekauto, benamo reke fenu ai einu-raġeato. Mo reke tu maġani-kone baregori na evonuto, mo maġani-kone baregori tu mabarari sinau sebona gabana imaima ma toitoi (153), ġutumma lelevaġi, senaġi reke tu asi evedareto.

<sup>12</sup> Iesu na ekirarito, ekirato, “Ġoiaġoma, ġoma ġaniġani.” Iesu ġena mo mero moġeri ta na Iesu tu iniġesi asi ma ġedanaġiato, “Ġoi tu dei, ei?” Korana ġia ribari, mo tu Vereġauka. <sup>13</sup> Iesu eiaġomato, beredi eġabiato, benamo evinirito, ma maġani-kone maki moġesi eveirito.

<sup>14</sup> Mai tu nega vaġa-toitoina ġena mero ġeri ai efororito, Barau na mase na evaga-variġisi ġenoġoiato murinai.

### Iesu na Petero elaunaġiato

<sup>15</sup> Ġeġaniġani-ġosito murinai, Iesu na Petero ekiraiato, ekirato, “Simona, Ioane natuna, ġoi na au oura-viniguni veuravinina na maiġeri ġeri veuravini au ġegu ai ġetoreani maki evanaġiani, ei?” Petero ekirato, “Oi Vereġauka, ġoi ma ribamu, au na ġoi tu aura-vinimuni.” Iesu na ekiraiato, ekirato, “Au ġegu mamoe naturi bono ġuburi.”

<sup>16</sup> Iesu na ma edanaḡi-ḡenoḡoiato, ekirato, “Simona, Ioane natuna, au oura-viniguni, ei?” Petero evaḡa-veseto, ekirato, “Oi Vereḡauka, ḡoi ma ribamu, au na ḡoi tu aura-vinimuni.” Iesu ekirato, “Au ḡegu mamoe bono nari-ginikauri.”

<sup>17</sup> Iesu na Petero vaḡa-toitoina ma edanaḡiato, ekirato, “Simona, Ioane natuna, ḡoi na au oura-viniguni, ei?” Petero enuḡa-metoto, korana Iesu na mo tu vaḡa-toitoina edanaḡiato, “Ḡoi au tu oura-viniguni, ei?” Petero ekirato, “Vereḡauka, ḡoi tu dagara mabarari ma ribamu, e ḡoi ma ribamu, au na ḡoi tu aura-vinimuni.” Iesu ekirato, “Au ḡegu mamoe bono ḡuburi.

<sup>18</sup> Akira-korikorimuni, ḡoi variḡumu ai tu, tauḡemu na gabakamu gabaḡau na obaruato-ḡoi, benamo oura-vinirito-ḡoi gaburi ḡana oiaḡoto-ḡoi. Senaḡi ḡoi boḡaukani nai tu, ḡimamu botuḡu-roroḡotoani, benamo tarima ta na ḡimamu bebaruani, benamo beḡori-kaumuni, ma asi oura-viniani gabuna ḡana beḡori-iaḡomuni.” <sup>19</sup> Iesu na mai guruḡa ekiraḡiato tu, Petero bemaseni dabarana ema ḡena mase na kamasī Barau bevaḡa-raḡe baregoani, etore-rosiato. Benamo Petero ekira-iato, ekirato, “Au murigu ai noma raka.”

### Iesu ma ḡena mero ta

<sup>20</sup> Petero eruḡa-kureto tu, Iesu na eura-viniato-ḡoi merona eḡitaiato, muriri na eraka-iaḡoto-ḡoi. Mai mero tu, mo Iesu ḡeḡaniḡani-vegogoto lavilavinai Iesu ḡenai evetabekauto, benamo edanaḡiato, ekirato, “Vereḡauka, ḡoi berevamuni tarimana tu dei, ei?” <sup>21</sup> Petero na mo mero (o Ioane) eḡitaiato, benamo Iesu ekiraiato, ekirato, “Senaḡi Vereḡauka, ḡia maḡurina tu aiḡesi ei?” <sup>22</sup> Iesu na evaḡa-veseato, ekirato, “Bema au baurani, ḡia tu maḡuri bene tanu mo, au ma baḡenoḡoini, ḡoi tu asi ḡemu ḡauvei ta maniḡa ovedanaḡi-iaḡiani. Ḡoi tu au murigu ai noma raka.” <sup>23</sup> Mai guruḡa dainai, tarikaka veḡabidadama nuḡanai fakari guruḡa leileiri ḡekiraḡirito-ḡoi, ḡekirato, “Iesu ḡena mai mero maḡa tu asi bemaseni.” Senaḡi Iesu tu asi ekirato, mo mero tu asi bemaseni. Iesu maḡesi moḡo ekirato, “Bema au baurani, ḡia tu maḡuri bene tanu mo, au ma baḡenoḡoini, ḡoi tu asi ḡemu ḡauvei ta maniḡa ovedanaḡi-iaḡiani.”

<sup>24</sup> Mo Iesu ḡena mero dagarana tu maḡa, maḡeri guruḡa evari-fiurini ema etorerini maḡa. Ḡita ribara, ḡia ḡena vevarifū guruḡari tu moḡoni.

<sup>25</sup> Iesu na dagara tu vovoka eveirito. Bere mabarari ḡere toreri nai tu, au atuḡa-maḡini, mai tanobara gabuna mabarana tu bere kei, asi veḡata bere ilaila, moḡeri buka mabarari ḡetore-vegogori ḡana uranai tu-na.



## APOSTOLO ĜERI VEĜA E ĜAUVEI

Apostolo ĝeri ĝauvei e veĝa vaĝa-foforiri guruĝari

Mai apostolo ĝeri ĝauvei e veĝa bukana anina baregona tu Iauka Veaĝa Barau ĝenana emariĝoto ema apostolo ĝerina ema ĝauveito variri.

Mai buka maki Luka na Teofilo ĝena ma etoreato. Etoreato laĝanina tu laĝani 63 beiaĝo 68 fakari ai ta kavana, mo tu Iesu emaseto murinai.

Guruĝa baregori Luka na Teofilo mai fefai evaĝa-ribaĭato tu maiĝeri: 1) Kamasi ekalesia doĝorori ĝevesinato; 2) ma kamasi tanobara mabarana ekalesia doĝorori na evaiato; 3) kamasi Keriso guba na Iauka Veaĝa ĝenana mai tanobarai ĝena ekalesia doĝorona eragaiani; 4) ekalesia mabarari Iauka Veaĝa na bene vaĝa-vonuri, korana ĝia ĝenana vauro ĝia ĝeri vetuĝunaĝi ĝauveina bevaĝa-tubuanĭ e bevaĝa-taunaiani, ema bevaĝa-kokoreani ema bevaĝa-seĝukaiani (Apostolo 1:8; Sekaraia 4:6).

Luka ĝena toretore tu maiĝesina eboiĝaiato:

1. Petero ĝena ĝauvei Iuda tarimari fakari ai - karoa 1-12

2. Paulo ĝena ĝauvei irau bese tarimari fakari ai - karoa 13-28

**1** Teofilo, ĝoi atore-vinimuni. Ĝegu toretore giniguinena nuĝanai, Iesu ĝena ĝauvei e ĝena vevaĝa-riba guruĝari mabarari atore-foforirito, ĝena ĝauvei esinaĭato veĝata, <sup>2</sup> eiaĝoto mo, Barau na guba ĝana eĝabi-varaĝeato. Roĝosi roĝo bere ĝabi-varaĝea nuĝanai, Iauka Veaĝa ĝenana eĝabi-viriĝirito apostolori evaĝa-ribarito. <sup>3</sup> Ĝena midigumidigu e mase murinai ĝia mai apostolo ĝeri ai efororito ema vetoĝa moĝoniri vovokari ai ĝia tauĝena evevaĝa-moĝonito ĝia tu maĝuri etanuni. Ĝia tu ĝaro gabana vasivasi (40) nuĝanai apostolo ĝeri ai dabara vovokai efororito-ĝoi, ĝeĝitaiato-ĝoi, ema Barau ĝena Basileia, (ĝena veĝitaĝau seĝukana evaĝa-ruĝaiani maiĝa), varina ĝeri ekiraĝiato-ĝoi. <sup>4</sup> Ma Iesu ĝesi ĝeraka-vegogoto nai, Iesu na ekirarito, ekirato, “Ierusalemia asi boĝono iaĝuia, senaĝi au na akira-varamito varevarena roĝo boĝono vaĝa-nogaia, mo tu au Tamagu na ekiraĝi-toreato varevarena. <sup>5</sup> Korana Ioane tu moĝoni nanu na ebabatisoto-ĝoi, senaĝina ĝomi tu ĝaro viravira beĝe korini murinai tu, Iauka Veaĝa na bebabatisomini.”

### Barau na Iesu guba ĝana eĝabi-varaĝeato

<sup>6</sup> Apostolo Iesu ĝesi ĝevevogoto nai, Iesu ĝedanaĝiato, ĝekirato, “Vereĝauka, ĝoi na toma mai negai Isaraela tarimama, Roma ĝeri veĝitaĝau na bovaĝa-maĝurimani, benamo Isaraela ĝema veĝitaĝau o basileia ma bovini-ĝenoĝoimani ba?” <sup>7</sup> Iesu evaĝa-veseto, ekirato, “Mani tu au Tamagu ĝereĝana ĝena seĝukai ĝarori e negari etorerito, ĝomi na tu asi boĝo ribarini. <sup>8</sup> Senaĝi ĝomi tu Iauka Veaĝa iatami ai beraka-riĝoni, benamo seĝuka boĝo ĝabiani, ema au kiraĝi-foforigu tarimami ai boĝo iaĝoni, Ierusalemia ai, Iudea ai e Samaria gaburi mabarari ai, beiaĝoni mo, tanobara gaburi mabarari ai.”

<sup>9</sup> Eguruĝa-ĝosito murinai, matari ĝutuĝuturi ai Barau na guba ĝana eĝabi-varaĝeato. Ĝeĝita-ĝauato mo, magube na ekou-ĝauato, benamo asi ma ĝeĝitaiato. <sup>10</sup> Apostolo na Iesu guba ĝana evaraĝeto-ĝoi roĝo ĝeĝita-raĝeato-ĝoi nuĝanai, tau ruaruu dabuĝa kurokurori na ĝevedabuĝato, asikauna ĝia seviri ai ĝema ruĝa-tarito. <sup>11</sup> Benamo ĝekirato, “Galilea tarimami, karase maninai boĝo ruĝa vau guba ĝoĝita-taĝoani? Mai Iesu, ĝomi ĝemina guba ĝana beĝabi-varaĝea tarimana, tu ma

beĝenoĝoi-iaĝomani. Ĝia tu guba ĝana bevaraĝe boĝo ĝitaia kavana, guba na ma bemariĝoni.”

### Apostolo tu Ierusalemaj ai ĝevegogoto

<sup>12</sup> Benamo apostolo Olive Ĝorona na Ierusalemaj ĝana ma ĝeĝenoĝoi-iaĝoto. Mo gabu ruarua fakari tu kilomita sebona kavana. <sup>13</sup> Ierusalemaj ĝeraĝasito, benamo ĝetanuto-ĝoi numana tuĝuna daiĝutuna ĝana ĝeraĝekauto. Mo daiĝutu ai apostolo ĝevegogoto, arari tu Petero; Ioane; Iakobo (o Iames) e Anduru; Filipino e Tomasi; Batolomeo; Mataio; Iakobo Alfeo; Simona, Selote tauna; ema Iudas, Iakobo natuna. <sup>14</sup> Ĝia mabarari ma nuĝari sebona ĝesi ĝeĝurigi-vegogoto-ĝoi, vavine tari maki e Maria, Iesu sinana, ema Iesu tarina doĝoro.

### Iudas gabuna eĝabiato tauna

<sup>15</sup> Moĝeri ĝaro ai Iesu ĝevaĝa-moĝoniato-ĝoi tarimari mabarari tu sinau sebona ma gabana ruarua (120) ĝevegogoto-ĝoi. Ĝia fakari na Petero eruĝa-vaesito, benamo ekirato. <sup>16</sup> “Tarikakagu mabarami, toretore veaĝana tu bema moĝoni, mo tu Iauka Veaĝa Davida muruna na kai-veĝata ekirato, Iudas na Iesu ĝabitarina tarimari beĝori-kaurini guruĝana. <sup>17</sup> Iudas tu ĝai karoma ta, ema ĝia maki apostolo ĝauveina tarimana, ĝai kavana.”

<sup>18</sup> Ĝena vei-rakava voina monina na tano ta evoiato. Monai ĝia eketoto, benamo emaseto, ma nuĝana eĝwa-fakaiato, benamo sinaĝena evebubu-rosito. <sup>19</sup> Ierusalemaj tarimari mabarari na varina ĝeseĝaĝiato, benamo mo tano arana ĝeri garo ai ĝekiraĝiato “Akeledama” anina tu “Rara Tanona.” <sup>20</sup> Korana Salamo bukanai varau ĝetoreato, ekirani,

‘Ĝena numa bene karovo,  
tarima ta asi bene tanu.’

Ma guruĝa ta Salamo nuĝanai ekirani,

‘Ĝena veĝitataĝo ĝauveina maki  
ta na bene ĝabia.’

<sup>21</sup> Moĝa lorinai namona tu tau ta siĝabi-viriĝia. Mo tau tu ĝita ĝesi vanaĝivanagi tarakao-vegogoto-ĝoi, Iesu Vereĝauka ĝita fakarai taraka-toĝato-ĝoi e taraka-rosito-ĝoi nai, <sup>22</sup> ema Ioane na tarima ebatatorito negana na, beiaĝoma mo, Iesu ĝai ĝemana guba ĝana eĝabi-varaĝeato ĝarona tarimana ta. Korana tu ĝia maki ĝai ĝesi Iesu ĝena variĝisi-ĝenoĝoi bene kiraĝi-foforia.

<sup>23</sup> Moĝa lorinai ĝia na tau ruarua ĝeĝabirito, Iosefa, arana tu Barasaba ĝetato-ĝoi, arana ta maki Iusto; ema Matias. <sup>24</sup> Benamo ĝeĝauĝauto, ĝekirato, “Vereĝauka o, tarimarima mabarari nuĝari ĝoi na tu oribarini, moĝa lorinai novaĝa-ĝitama, dei tu ĝoi na boĝabi-hidia, <sup>25</sup> apostolo ĝauveina bene veia Iudas gabunai; a Iudas tu eiaĝoto ĝena gabu korikorina ĝana.” <sup>26</sup> Benamo fore ĝerena ĝeveiato nuĝanai, fore tu Matias aranai eketoto, benamo Matias apostolo gabanana sebona (11) ĝesi ĝeivi-sebonaiato.

### Iauka Veaĝa eraka-riĝoto

**2** Pentekoste ĝaronai, Iesu ĝevaĝa-moĝoniato-ĝoi tarimari mabarari gabu sebonai ĝevegogoto. Pentekoste anina tu gabana imaima (50), mo tu Pasova verekona ĝarona na beiaĝoma mo, mai ĝaro maĝa. <sup>2</sup> Benamo asikauna iavara baregona

ta guruna noġa guba na emariġoto, ġetanu-vegogoto numana nuġana mabarana evaġa-vonuato. <sup>3</sup>Benamo noġa moġo karava meari kavana ġemariġoto-ġoi ġeġitar-ito. Mo karava meari ġemariġoto, benamo ġia tata tubuari ai ġemoreto. <sup>4</sup>Benamo ġia mabarari Iauka Veaġa na evaġa-vonurito, benamo garo irauirauri ai ġeguruġato, Iauka Veaġa na evinirito ilailanai.

<sup>5</sup>Moġa ġaronai tu Iuda tarimari, Barau garina ġeveito-ġoi tarimari, tu tanobara gaburi mabarari na ġeiaġomato, benamo Ierusalemaj ġetanuto-ġoi. <sup>6</sup>Mo guru ġe-seġaġiato nai, tarimarima ġutuma ġeġaru-vegogoto. Nuġari ġefarevaġito, korana ġia tata na Iesu ġevaġa-moġoniato-ġoi tarimari ġeseġaġirito tu mo ġeraka-vegogoto tarimari ġeri garo ai ġeguruġato-ġoi. <sup>7</sup>Ġia ġeġaba-rakavato e ġedaradarato, ġekirato, “Mai ġeguruġani tarimari tu Galilea tarimari, ene?” <sup>8</sup>Kamara dabarai tu ġita tata ġera garo ai ġeguruġani taseġaġirini? <sup>9</sup>Ġita tari tu Patia tarimara, tari tu Media tarimara e Elam tarimara. Tari tu Mesopotamia, Iudea e Kapadokia na, ema tari tu Ponto na e Asia na, <sup>10</sup>Frigia e Pamfilia na, Aigupito e Kurene sevina Libia tanori na, ema tari tu Roma na taiaġomato, <sup>11</sup>Iuda tarimara, e irau bese tarimari Iuda ġera toma-rakariġo ġeġabi-raġeato tarimari; ema ġita tari tu Krete e Arabia tarimara. Senaġi ġita mabarara na taseġaġirini ġita tata ġera garo ai Barau na veġa baregori boruri eveirito-ġoi ġekiraġi-foforirini.” <sup>12</sup>Mabarari ma nuġa-farevaġiri e ma daradarari ġesi tauġeri ġevedanaġi-vedanaġito, ġekirato, “Mai veġa anina tu kara?” <sup>13</sup>Senaġina tarima tari na tu ġevaseva-vaseva-iaġirito, ġekirato, “Maiġeri tarima tu beġe niu-rakava.”

### Petero ġena vevarifiu

<sup>14</sup>Benamo Petero ma apostolo gabanana sebona (11) ġesi ġeruġa-vaisito, ma garona evaġa-baregoato, benamo vegogo tarimari eġobata-vinirito, ekirato, “Iuda tarimami e Ierusalemaj ġotanuni tarimami mabarami, boġono seġaġi-ginikau, mai veġa tauna ġemi nakiraġi-maġataia. <sup>15</sup>Maiġeri tarima tu asi beġe niu-rakava, ġomi ġotuġamaġini kavana. Mai tu roġo boġiboġi horaġauna 9 koloko. <sup>16</sup>Senaġi maitoma tu Ioel, peroveta tarimana, na ekiraġi-guineato kavana efoforini, ekirato, <sup>17</sup>‘Barau ekirani:

Ġaro dokori ai au Iaukagu babubu-riġoani tarimarima mabarari iatari ai. Benamo natumi merori e ġuiatori beġe perovetani, ġemi maraġa variġu beġe mata-vanaġini, ema ġemi tau ġaukari beġe nuvini.

<sup>18</sup>Oi, moġeri ġaro ai au ġegu vetuġunaġi tauri e vavineri iatari ai au Iaukagu babubu-riġoani, benamo beġe perovetani.

<sup>19</sup>Benamo nuġa-farevaġi veġari guba tuġunai bavaġa-foforirini, ema vetoġa dagarari tanobarai; rara, e karava, ema goġu barukari.

<sup>20</sup>Ġaro ma bevetore-kureni bemukunani, e ġue tu bekakakakani, rara kavanai beiaġoni,

Vereġauka ġena iaġoma ġarona baregona e irau vedaureana bekavinaġini nai.

<sup>21</sup>Benamo deikara Vereġauka aranai ekea-raġeni tarimana tu maġuri beġabiani.’

<sup>22</sup>Isaraela tarimami, mai guruġa boġono seġaġiri: Iesu, Nasareta tarimana, Barau na eviniato ġauveina tu ġomi ġemi ai evaġa-fofori ginikauato. Ġia ġenana Barau

ġena seġuka veiġari e nuġa-farevaġi veiġari ema vetoġa tari eveirito ġomi vefakami ai, be ġomi tu ma ribami. <sup>23</sup> Barau ġena urai e ribai varau eboioġa-guineato ilailanai, Iesu ġomi ġimami ai etore-kauato, benamo rakava tarimari na ġevaġa-kavamito, benamo Iesu satauro ai ġoikoko-kauato nai ġovaġi-maseato. <sup>24</sup> Senaġina Barau na ġia mase na evaġa-variġisi ġenoġoiato, ema mase midiguna na eġabi-vaġiato, korana mase na ġia tu asi ilaila beġabi-tariani riba. <sup>25</sup> Davida na ġia ekiraġiato, ekirato, 'Vereġauka tu ġaro mabarari ai ġoiragu ai aġitaiani.

Ġia tu au aroribagu ai,

be dagara ta na asi bevaġa-ġarevaguni.

<sup>26</sup> Moġa lorinai nuġagu iaku na bevonu, ema ġegu guruġa tu iaku na beġe vonu.

Mase garina maki asi aveini,

<sup>27</sup> korana au tu mase tarimari ġeri gabu ai asi boraga-kwaneguni, ema ġemu Tarima Veaġana tu asi beborāġani.

<sup>28</sup> Maġuri dabarari tu varau ovaġa-ribaguto;

ġoi sevimu ai batanuni,

benamo iaku na bovaġa-vonuguni.'

<sup>29</sup> Tarikakagu mabarami, initoma au tu nuġagu ma kokorena ġesi bakirani, ġita senera baregona Davida tu emaseto ema ġeguriato, maitoma ġia gurina tu ġita ġesi maiġea. <sup>30</sup> Senaġi ġia tu peroveta tarimana, ema ma ribana Barau na tu varau ekiraġi-toreato, ekirato: Davida besena ta tu ġia ġena teronai betanukauni veġata.

<sup>31</sup> Davida na eriba-guineato, Barau na kara ġoirai beveiani eġitaato. Benamo Keriso ġena variġisi-ġenoġoi guruġana ekiraġiato, ekirato, 'Ġia tu mase tarimari ġeri gabu ai asi eraga-kwaneato, ema tauġanina asi beborāġani.'

<sup>32</sup> Barau na mai Iesu, mase na evaġa-variġisi ġenoġoiato, ġai mabarama ribama. <sup>33</sup> Barau na eġabi-vaisiato, ġi-mana aroribanai etoreato, benamo Barau na ekiraġi-toreato, Iauka Veaġa na Tamana ġenana eġabiato. Benamo ġia na mo Iauka Veaġa toma bebubu-riġoa, ġomi na ġoġi-taiani ema ġoseġaġiani. <sup>34</sup> Korana Davida guba ġana tu asi evarāġeto, senaġi ekirato, 'Barau na au ġegu Vereġauka ekiraiato, ekirato:

Au aroribagu ai noma-tanu,

<sup>35</sup> bene iaġo mo, ġevetari-vinimuni tarimari bana tore-riġori,

kwakumu vaġa-ruġa tarina dagaranai bana vaġa-iaġori.'

<sup>36</sup> Moġa lorinai Isaraela tarimari mabarari tu beġene riba-ginikau, mai Iesu, ġomi na ġovaġa-satauroato tu, Barau na Vereġauka e Keriso ai evaġa-iaġoato."

### **Tarimarima ġutuma ġevetuġamaġi-kureto ma ġeraka-kureto**

<sup>37</sup> Mai guruġa ġeseġaġiato nai, nuġari ġeraġeto, benamo Petero e mo apostolo tari ġedanaġirito, ġekirato, "Tarikaka, ġai tu kamasi toma ġaveini?" <sup>38</sup> Petero na ekirar-ito, ekirato, "Ġomi tata ġemi rakava ġerina boġono vetuġamaġi-kure ma boġono raka-kure, ema Iesu Keriso aranai babatise boġono ġabia, be ġemi rakava bene tuġamaġi-fitoġari; ema ġena varevare, Iauka Veaġa, boġono ġabia. <sup>39</sup> Korana Barau ġena kiraġitore eveiato tu ġomi ġemi e ġomi natumi ġeri, ema manaġai ġetanuni tarimari ġeri. Aba, Vereġauka ġera Barau na ekiraġi-toreato Iauka Veaġana tu bekearini tarimari mabarari bevinirini."

<sup>40</sup> Petero na guruġa ġutuma ekiraġirito, esisiba-vinirito e elau-naġirito, ekirato, "Mai bese tarimari rakavari ġerina tauġemi boġono raga-maġuri." <sup>41</sup> Tarima ġu-

tuma na ġena guruġa ġeġabi-raġeato, benamo babatiso ġeġabiato. Mo ġaro sebonai tarimarima mabarana daġara toitoi (3,000) kavana ġia ġeri doġoro nuġanai ġebere-toġato. <sup>42</sup> Benamo vanaġivanaġi apostolo tarimari ġerina riba ġeġabito-ġoi, ġevegogoto-ġoi e ġevevaġa-kavato-ġoi, beredi ġetavi-kirato-ġoi o anibou ġeġanito-ġoi e ġeġauġau-vegogoto-ġoi.

### Iesu ġevaġa-moġoniato-ġoi tarimari ġeri maġuri

<sup>43</sup> Apostolo ġerina Barau na nuġa-farevaġi veiġari e vetoġa boruri ġutuma eveirito-ġoi, ema tarimarima mabarari ġegari-rakavato. <sup>44</sup> Iesu ġevaġa-moġoniato tarimari mabarari ġetanu-vegogoto-ġoi ema ġeri-ġari ġevevarevare-vevinito-ġoi. <sup>45</sup> Ġeri farefare e tano ġeivoivoi-iaġirito-ġoi, benamo moniri tu ġia mabarari vefakari ai ġevarerito-ġoi, tata ġena rabu ilailanai. <sup>46</sup> Ġaro vanaġivanaġi mabarari Rubu Veaġai ġevegogoto-ġoi. Ġeri numai anibou ġeġanito-ġoi e ġeġaniġani-vegogoto-ġoi ma iakuri e ma mainori ġesi. <sup>47</sup> Barau ġevaġa-raġeato-ġoi, ema tarimarima mabarari ġeri veiau-namo ġeverere-iaġiato-ġoi. Benamo ġaro mabarari ai Vereġauka na evaġa-maġuririto-ġoi tarimari ġia ġesi etore-vegogorito-ġoi.

### Kwaku rakava tarimana enamoto

**3** Ġaro ta lavilavi horaġauna 3 koloko ai ġauġau horanai, Petero e Ioane Rubu Veaġa ġana ġeiaġoto. <sup>2</sup> Monai tarima ta tu emaġurito kwakuna rakava ġeġoitaġoato. Ġaro mabarari ai ġeġwa-iaġoato-ġoi, Rubu Veaġa ġatama bokana arana “Namo Vedaurea” koranai ġevaġa-tanutariato-ġoi, benamo Rubu Veaġai ġeraka-toġato-ġoi tarimari ġeri ai moni enoġito-ġoi. <sup>3</sup> Ġia na Petero e Ioane ġerakatoġa ġana nuġanai eġitarito, benamo kara ta ġevinia uranai enoġirito. <sup>4</sup> Tauri ruarua na ġeġita-karakaraiato, benamo Petero na ekiraiato, ekirato, “Ġai noġitama!” <sup>5</sup> Mo guruġa eseġaġiato lorinai, tauri ruarua eġitarito, ġia mataboru ekirato tu, kara ta beġe viniani. <sup>6</sup> Senaġi Petero na ekiraiato, ekirato, “Au tu asi ġegu moni, senaġina ġegu ai kara etanuni dagarana avinimuni. Iesu Keriso, Nasareta tauna, aranai akiramuni, novariġisi, noraka!” <sup>7</sup> Benamo Petero na kwaku rakava tarimana ġimana aroribanai eġabito, evaġa-ruġa-vaisiato. Asikauna ġia kwakuna ema kwakuna komukomuri ġetubutubu-kauto. <sup>8</sup> Ġia eburi-vaisito, eruġa-tarito, eraka-iaġoto. Benamo Petero ema Ioane ġesi Rubu Veaġanai ġeraka-toġato, erakato e eburi-vaisito, Barau evaġa-raġeato. <sup>9</sup> Tarimarima mabarari na ġeġitaiato, erakato e Barau evaġa-raġeato-ġoi, <sup>10</sup> ema ġeġita-leaiato, ġia tu “Namo Vedaurea” ġatama-boka koranai etanuto-ġoi vau enoġinoġito-ġoi tarimana nai, ġia mabarari nuġari ġefarevaġito e ġeġaba-rakavato, mo veiġa ġia ġenai eġorato nai.

### Petero ġena ġobata Rubu Veaġai

<sup>11</sup> Mo tau roġo Petero e Ioane ġeri ai eveġabikau-taġoto-ġoi, touraġe baregona arana “Solomona Ġena Touraġe” ai, tarimarima mabarari ġeġaba-rakavato, benamo ġeraga-iaġoto ġeri ai. <sup>12</sup> Petero na mo tarimarima eġitarito, benamo evaġa-guruġarito, ekirato, “Isaraela tarimami, karase nai mai dagara tu ġoġaba-iaġiani? Karase nai ġai ġoġita-karakaramani? Ġomi ġotuġamaġini mai tu tauġema ġema seġukai e Barau korana-iaġinai naima, mai tarima baġa vaġa-rakaia ġotoni?” <sup>13</sup> Aberahamo, Isako, Iakobo ġeri Barau, ġita senera mabarari ġeri Barau, na ġena vetuġunaġi tarimana Iesu evaġa-raġeato, senaġi ġomi na Roma tarimari ġoviniato beġene

vaġia ġana, ma Pilato ġena ura bene tuġu-vaġia asi beġene vaġia etato nai, ġomi tu asi ġourato. <sup>14</sup> Ġia tu Veaġa e Vei-Iobukaiobuka tarimana, senaġi ġomi na tu asi ġoura-viniato, ema Pilato ġonoġiato, vaġivaġi tarimana tu bene tuġu-rosia ġotato. <sup>15</sup> Maġuri eġwa-iaġomaiato tarimana tu ġomi na ġovaġi-maseato. Senaġi Barau na mase na ma evaġa-variġisi ġenoġoiato. Ġai maiġa tu ribama e ġakiraġi-foforiani. <sup>16</sup> Ġai ġema veġabidadama Iesu aranai nai, mai tarima ġomi na ġoġitaiani e ribami bevaġa-namoa. Mai tu Iesu aranai ema veġabi-dadama ġia ġenana eiaġomani na, mai tarima bevaġa-namo korikoria, ġomi mabarami na ġoġitaiani maiġa.

<sup>17</sup> Tarikakagu mabarami, au toma aribani, kara ġemi veġorikau tarimari ġesi ġoveiato tu asi ribami dainai. <sup>18</sup> Senaġina Barau na guinenai ġena peroveta tarimari mabarari mururi na ekirato, ġia ġena Keriso tu midigu roġo beġanini etato. Mo guruġa tu ġomi ġemina ema moġonito. <sup>19</sup> Moġa lorinai ġovetuġamaġi-kure ma ġoraka-kure Barau ġenai, be ġia na ġemi rakava bene ġabi-vaġiri. <sup>20</sup> Bema moġesi boġo veini nai, lauka ġena kokore Vereġauka ġenana beiaġomani, ema ġia na Iesu Keriso betuġu-iaġomaiani. Ġia tu Barau na ġomi ġemi eġabitore-guineato. <sup>21</sup> Ġia tu gubai roġo betanuni, beiaġoni mo, Barau na dagara mabarari bevaġa-variġu ġenoġoirini. Ġia na ġena peroveta tarimari veaġari mururi na kai-veġata ekiraġiato ilailanai. <sup>22</sup> Korana Mose ekirato, 'Vereġauka ġemi Barau na ġomi ġemi tarimarima fakari na ġemi peroveta tarimana ta bevaġa-ruġaiiani au kavana. Ġia na bevaġa-guruġamini guruġari mabarari tu boġono seġaġiri. <sup>23</sup> Tarima ta na ġia ġena guruġa asi beseġaġi-viniani tarimana tu, Barau na ġena tarimarima fakari na beġabi-vaġiani, benamo bevaġi-maseani.'

<sup>24</sup> Moġoni, peroveta tarimari mabarari Samuela na beiaġoma mo toma, ema ġia murina na ġeiaġomato peroveta tarimari maki ġutuma varau ġeguruġato, maiġeri ġaro ġekiraġirito. <sup>25</sup> Ġomi tu peroveta tarimari naturi, ema Barau ġena kiraġitore ġomi senemi ġeri eveiato maki ġomi ġemi. Barau na Aberahamo evaġa-guruġaiato nai, ekirato, 'Goj natumu ġenana tanobara beseri mabarari namo beġe ġabiani.' <sup>26</sup> Moġa lorinai Barau na ġena vetuġunaġi tarimana Iesu evaġa-ruġaiato, benamo ġemi ai etuġu-iaġosi guineato, ġomi bene vaġa-namomi ġana. Mo namo anina tu, ġomi tata ġemi rakava ġerina beġori-kuremini.

### Petero e Ioane ġeġabi-taririto

**4** Petero e Ioane na tarima-rima roġo ġevaġa-guruġarito-ġoi nuġanai, Rubu Veaġa vereri, e Rubu Veaġa ġitaġauna tarimari ġeri vere, ema Sadukea tarimari ġeraġa-sito. <sup>2</sup> Ġia tu ġebaruto, korana mai apostolo ruarua na tu tarimarima ġevaġa-ribarito-ġoi e ġeri ġeġobatato-ġoi nai tu ġekirato-ġoi, Iesu tu mase na evariġisi-ġenoġoito; moġa lorinai mase tarimari maki beġe variġisi-ġenoġoini. <sup>3</sup> Benamo tauri ruarua ġeġabi-taririto, benamo dibura numai ġebiri-ġaurito; monai beġene gena mo boġi-boġi, korana tu ġaro maki ekofuto. <sup>4</sup> Senaġi Petero e Ioane ġeri ġobata tarima vovoka na ġeseġaġiato, benamo tarima ġutuma na ġevaġa-moġoniato, benamo tau numerana eiaġoto mabarana tu daġara imaima (5,000) kavana.

<sup>5</sup> Elaġanito nai tu, Iuda vereri, e vanuġa tarima baregori, ema taravatu ġevevaġa-riba iaġiato-ġoi tarimari Ierusalemaj ġevevogoto. <sup>6</sup> Anas, Rubu Veaġa verena baregona, e Kaiafas, e Ioane, e Alesanda, ema Rubu Veaġa verena baregona ġena bese maki monai. <sup>7</sup> Benamo tauri ruarua ġeġori-iaġorito, benamo ġoirari ai ġea vaġa-

ritoḡorito vau ḡedanaḡirito, ḡekirato, “Kamara seḡukai o deikara aranai mai veiḡa ḡoveiato?”

<sup>8</sup> Benamo Petero, Iauka Veāḡa na evonuto, evaḡa-veseto, ekirato, “Isaraela veremi e veḡitaḡau tarimami! <sup>9</sup> Bema ḡai toma boḡo kea-iaḡomama tu, ḡourani ḡai na ḡakira-varami, mai kwaku rakava tarimana ḡenai veiḡa namona baḡa veia ema kamara dabarai ḡia be-namo nai tu, <sup>10</sup> ḡomi mabarami e Isaraela nuḡanai tarimarima mabarami tu boḡono riba, Iesu Keriso, Nasareta tarimana, ḡomi na ḡovaḡa-satauroato, ma Barau na mase na evaḡa-variḡisi ḡenoḡoiato tarimana, aranai mai tarima benamo-ḡosiḡosi, ḡomi ḡoirami ai eruḡa-taḡoni. <sup>11</sup> Mo Iesu tu, ‘ḡomi, numa raga tarimami, na ḡoruḡaiato forena, ḡia tu duḡu barana forenai eiaḡoto.’

<sup>12</sup> Vevaḡa-maḡuri tu ḡia ḡereḡana ḡenana bita doḡarini; tanobara mabarana nuḡanai Barau na ara ta tu asi evinirato, ḡita bene vaḡa-maḡurira ḡana.”

<sup>13</sup> Kanisoro tarimari na Petero e Ioane ḡeḡitarito, asi ḡegarito-ḡoi ema ḡeribarito maki, ḡia tu vevaḡa-riba gabuna ta ḡana asi ḡeiaḡoto, ma tauri ruarua asi iaunegari. Moḡa ḡeḡitaiato nai, ḡeḡabato e nuḡari ḡevekeoto, benamo ḡeribato, ḡia tu Iesu ḡesi ḡerakao-vekakoto-ḡoi tarimari. <sup>14</sup> Ema mo tarima ḡeḡitaiato namo-ḡosiḡosi Petero e Ioane ḡesi ḡeruḡa-taḡoto-ḡoi, benamo asi ḡeri guruḡa dabarana. <sup>15</sup> Moḡa lorinai ḡekirarito, mo vegogo gabuna na ḡeraka-veḡita. Benamo ḡeraka-rosito murika ḡana, benamo ḡia ḡereḡari moḡo ḡevedanaḡi-vevinito, ḡekirato, <sup>16</sup> “Maiḡeri tarima ruarua tu kamasi toma taveirini? Ierusalemi ḡetanuni tarimari mabarari ma ribari, ḡia tu nuḡa-farevaḡi veḡana ta beḡe veia, ema ḡita na asi bita kira-ḡuniḡauani riba. <sup>17</sup> Senaḡi tarimarima na beḡe vari-fiuani garinai, maiḡeri tarima tu tana vaḡa-gariri e tana kira-ḡoiri, Iesu aranai tarima ta asi ma beḡene vaḡa-guruḡa ḡenoḡoia.” <sup>18</sup> Benamo ma ḡekea-toḡarito, benamo ḡekirarito, Iesu aranai asiḡina ḡinavaḡi ma beḡene ḡobata e beḡene vevaḡa-riba.

<sup>19</sup> Senaḡi Petero e Ioane na ḡevaḡa-veserito, ḡekirato, “Ḳomi tauḡemi ḡotuḡamaḡi-viriḡia, aiḡa tu roroḡoto Barau ḡoiranai? Gomi na kara ḡokiraḡiani baḡana veia, ba Barau na ekiraḡiani veḡana baḡana veia? <sup>20</sup> Korana ḡaḡitarito e ḡaseḡaḡirito dagarari tu ḡai na asi ilaila baḡa kira-ḡuniḡaurini e muruma maki moḡeri kiraḡi-kiraḡiri ai asi baḡa kourini riba.”

<sup>21</sup> Ma ḡevaḡa-guruḡa gwaḡiḡirito murinai, ḡetuḡu-rosirito. Vaḡa-rakavari dabarana ta asi ḡedoḡariato, korana tarima mabarari na Barau ḡevaḡa-raḡeato-ḡoi, mo nuḡa-farevaḡi veḡana lorinai. <sup>22</sup> Korana mo nuḡa-farevaḡi veḡana na enamoto tarimana ḡena maḡuri laḡaniri tu gabana vasivasi (40) maki evanaḡiato.

### Ekalesia ḡeḡuriḡurito

<sup>23</sup> Petero e Ioane ḡetuḡu-vaḡirito murinai, karori ḡeri ai ḡeḡenoḡoi-iaḡoto. Ma Rubu Veāḡa vereri baregori e Iuda vereri na kara ḡekiravara-vinirito dagarari mabarari karori ḡeri ḡekiraḡirito. <sup>24</sup> Benamo karori na moḡeri guruḡa ḡeseḡaḡirito nai, ḡia mabarari Barau ḡeḡuriḡuri-vini vegogoato, ḡekirato, “Vereḡauka o, guba, tanobara, daḡaru-bara, ema nuḡari ai ḡetanuni dagarari mabarari ḡoi na oveirito. <sup>25</sup> Iauka Veāḡa ḡenana, ḡai senema Davida, ḡoi ḡemu vetuḡunaḡi tarimana, muruna na oguruḡato nai ekirato,

‘Kara dainai irau bese tarimari tu ḡebaru-rakava rakavani?

Ema karase nai tarimarima na tu asi beḡe ḡauveini boioḡari ḡeveirini?

<sup>26</sup> Tanobara vereri ġeverovinato, ema veġitaġau tarimari baregori ġeġaru-vegogoto, Vereġauka ma ġena Keriso ġesi beġene vetari-viniri ġana.’

<sup>27</sup> Moġoni veġata, Heroda e Pontio Pilato, irau bese tarimari e Isaraela tarimari ġesi mai vanuġa baregonai ġevevogoto, ġoi ġemu vetuġunaġi tarimana veaġana Iesu, ġia tu ġoi na oviriġiato e Keriso ai ovaġa-iaġoato, ġana boioġa ġetogato. <sup>28</sup> Ġia na ġeveirito dagarari tu kara ġoi na ġemu seġukai e urai oboioġa-guinerito beġene vetore otato dagarari moġo. <sup>29</sup> Moġa lorinai, Vereġauka o, ġeri vevaġa-gari veġari noġitari, ema ġai ġoi ġemu vetuġunaġi tarimama kokore novinima, be ġemu vari baġana kiraġia ma kokorema ġesi. <sup>30</sup> Ġimamu notuġu-rosia, be keve tarimari bono vaġa-namori, ema vetoġa boruri e nuġa-farevaġi veġari bono veiri, Iesu, ġoi ġemu vetuġunaġi tarimana veaġana aranai.”

<sup>31</sup> Ġeġauġau-ġosito murinai, ġevevogoto numana eġareva-ġarevato. Benamo ġia mabarari Iauka Veaġa na ġevonuto, benamo Barau ġena vari ġekiraġiato ma kokoreri ġesi.

### Ekalesia guinena ġena maġuri

<sup>32</sup> Iesu ġevaġa-moġoniato-ġoi tarimari mabarari ġeri tuġamaġi e nuġari tu sebonai moġo. Ta ġena farefare ġia ġereġana ġena asi etato-ġoi, senaġi ġeri dagara mabarari ġia tata ġevevarevare-vevinito-ġoi. <sup>33</sup> Seġuka barego ġesi apostolo tarimari na Iesu Vereġauka ġena variġisi-ġenoġoi ġevari-fiuato-ġoi, ema Barau ġena namo e varevare-bara ġia mabarari iatari ai ebubu-riġoato. <sup>34</sup> Ġia fakari ai ta maki asi erabuto-ġoi. Korana ma ġeri tano o numa tarimari na, moġeri numa e tano ġevoivoi-iaġirito-ġoi, benamo davari moniri tu ġeġwa-iaġorito-ġoi, <sup>35</sup> Apostolo ġoirari ai ġetore-taririto-ġoi. Benamo mabarari ġevini-ilailarito-ġoi, tata ġena rabu ilailanai.

<sup>36</sup> Iosefa tu apostolo na arana ġevatoato Banabas, anina tu “Velaunaġi Tarimana”. Ġia tu Levi doġorona, Saipras motumotunai emaġurito. <sup>37</sup> Ġia ġena tano evoiato, benamo voina monina tu eġwa-iaġoato, apostolo kwakuri koranai ea tore-tariato.

### Anania e Safira

**5** A tau ta etanuto-ġoi arana Anania, ġaraġona arana tu Safira. Anania na ġeri tano ta ea voivoi-iaġiato, ġaraġona na maki eġabi-raġeato. <sup>2</sup> Senaġina mo tano monina kwana tu eġabi-tariato, ma kwana reke ta moġo eġwa-iaġoato apostolo ġoirari ai ea tore-tariato. Mo veġa eveiato ġaraġona tu ma ribana. <sup>3</sup> Benamo Petero na ekiraiato, ekirato, “Anania, karase nai Satani na beboroġimu, benamo Iauka Veaġa boġofaia, tano monina kwana tu ġoi ġemu boġabi-taria? <sup>4</sup> Roġosi boro voia nai tu, tano tu ġoi ġemu, ene? Ma beġe voia murinai maki moni tu ġoi ġemu. Kara botuġa-maġia nai, mai veġa bono veia bosì? Ġoi na tu dia tarimarima boġofari, senaġi Barau boġofaia.” <sup>5</sup> Anania na mo guruġa eseġaġiato nai, eketo-tarito, emaseto. Benamo mo veġa eġorato varina ġeseġaġiato tarimari mabarari ġegari-rakavato. <sup>6</sup> Benamo tarima variġuri ġevariġisito, Anania tauġanina dabuġa na ġeseġoato, ġeġwa-rosiato, benamo ġea guriato.

<sup>7</sup> Hora toitoi kavana murinai, ġaraġona ema raka-toġato, senaġi ġia kara eġorato tu asi ribana. <sup>8</sup> Petero na edanaġiato, ekirato, “Nokira-varagu, ġomi taumi ruarua na tano monina boġo ġabia tu maiġa moġo ba?” Ġia evaġa-veseto, ekirato, “Oi,



voina tu maniġa moġo.”<sup>9</sup> Benamo Petero na ekiraiato, ekirato, “Karase nai ġoi ma ġaraġomu ġesi nuġami ġovaġa-sebonarito, Vereġauka Iaukana ġoġofaiato? Noboġe, ġoi ġaraġomu beġe guria tarimari tu ġatama-bokai ġeruġa-taġoni, ġia na ġoi maki ma ġeġwa-rosimuni.”<sup>10</sup> Mo horai moġo ġia Petero kwakuna koranai eketo-tarito, emaseto. Benamo mo tarima variġuri ġeraka-toġato, ma ġeġitaiato mase, benamo tauġanina ġeġwa-rosiatio, ġaraġona sevinaġi ġea guriatio.<sup>11</sup> Ekalesia mabarana e varina ġeseġaġiatio tarimari mabarari gari baregona na eġabirito.

### Vetoġa e veiġa boruri

<sup>12</sup> Vetoġa e veiġa boruri ġutumata apostolo na tarimarima ġoirari ai ġeveirito-ġoi. Ma Iesu ġevaġa-moġoniatio-ġoi tarimari mabarari tu “Solomona Ġena Touraġe” ai ġevegogoto-ġoi.<sup>13</sup> Asi veġabidadama tarimari na ġevaġa-raġerito-ġoi, senaġi ġegarito-ġoi, be ġia ġesi asi ġea vegogoto-ġoi.<sup>14</sup> Senaġi tau e vavine tu ġutumata lelevaġi na Vereġauka ġevaġa-moġoniatio-ġoi. Mo ġevaġa-moġonito-ġoi tauri e vavineri tu mabarari apostolo ġeri doġoro ai ġerakaraka-toġato.<sup>15</sup> Apostolo na ġeveirito-ġoi veiġari tarimarima na ġeribarito, benamo keve tarimari ġeġwa-rosirito dabara ġana, benamo genagena fatari ai e gedai ġetorerito, Petero bene raka-vanaġi nai, iouiouna na bene iauka-tariri ġana.<sup>16</sup> Ema tarimarima ġutumata-bara Ierusalemata sevina vanuġari na keve tarimari e iauka rakavari na ġeboroġirito tarimari ġeġwa-iaġorito, benamo mabarari ġenamato.

### Apostolo tarimari ġevaġa-midigu midigurito

<sup>17</sup> Benamo Rubu Veaġa verena baregona ma karona Sadukea doġorona ġesi, apostolo tarimari ġeri ai ġemama-rakavato.<sup>18</sup> Ġia na apostolo tarimari ġeġabitaririto, benamo dibura numai ġebiri-ġaurito.<sup>19</sup> Senaġi mo boġi Vereġauka ġena aneru na dibura numa ġatama bokana erovoato, benamo apostolo eġori-rosirito, benamo evaġa-guruġarito, ekirato,<sup>20</sup> “Ġoiaġo, Rubu Veaġanai boġono ruġa, benamo mai maġuri variġuna mabarana tarimarima ġeri boġono kiraġia.”<sup>21</sup> Boġiboġi iamoi-iamonai Rubu Veaġai ġeraka-toġato, aneru na ġevaġa-guruġarito ilailanai tarimarima ġevaġa-ribarito.

Rubu Veaġa verena baregona ma karona ġesi ġeraġasito, benamo kanisoro tarimari e Isaraela vereri mabarari ġekea-vegogorito, benamo dibura numa ġana ġevetuġu-iaġoto, apostolo tarimari urari na.<sup>22</sup> Senaġi vetuġunaġi tauri dibura numai ġea raġasito nai tu, apostolo tarimari asi ġedoġaririto. Benamo ġeġenoġoito, ġea kira-vararito, ġekirato,<sup>23</sup> “Dibura numana ġatama bokana tu biribiri, ema ġitaġau tarimari maki ruġataġo; senaġi ġatama-boka baġa rovo-fakaia nai tu, apostolo ta tu asi baġa ġoitaġoa.”

<sup>24</sup> Rubu Veaġa ġitataġona tarimana baregona e Rubu Veaġa vereri baregori na mo guruġa ġeseġaġiatio nai tu, ġeiauvoiauvo-rakavato, asi ribari mo veiġa anina tu kara.<sup>25</sup> Ġedaradarato-ġoi nuġanai tu, tarima ta eraka-toġato, benamo ekirarito, ekirato, “Ġoseġaġi! Dibura numai ġobiri-ġaurito tarimari tu Rubu Veaġai ġeruġa-taġoni, ma tarimarima ġevaġa-ribarini.”<sup>26</sup> Benamo Rubu Veaġa ġitaġauna tarimana baregona ma ġena mero ġesi apostolo tarimari ġea ġori-ġenoġoirito. Asi ġevei-guguraġirito, korana tarimarima na fore na beġe ġidararini garina.

<sup>27</sup> Ġeġori-toġarito, kanisoro ġoiranai ġevaġa-ruġarito, benamo Rubu Veaġa verena baregona na edanaġirito, ekirato,<sup>28</sup> “Ġai na guruġa gwaġiġina ġavinimito, mai

tarima aranai asi boĝono vevaĝa-riba, senaĝi ĝoĝitaia, ĝomi na kara boĝo veia! Ĝomi ĝemi vevaĝa-riba boĝo vaĝa-rega rovorova, benamo Ierusalem mabarana varau beĝaua, ema ĝomi ĝourani ĝia ĝena mase tu ĝai baĝana daĝa.”

<sup>29</sup> Petero e apostolo kotari ĝevaĝa-veseto, ĝekirato, “Ĝai tu Barau ĝena ura baĝa korana-iaĝiani, dia tarimarima ĝeri ura. <sup>30</sup> Iesu tu ĝomi na satauro tuĝunai ĝoikokokauato nai, ĝovaĝi-maseato, senaĝi ĝita tamara ĝeri Barau na ma evaĝa-variĝisi ĝenoĝoiato. <sup>31</sup> Barau na eĝabi-vaishiato, ĝia aroribanai evaĝa-ruĝaiato, Veĝitaĝau Verena e Vevaĝa-maĝuri Tarimanai evaĝa-iaĝoato. Isaraela tarimari bene vaĝa-vetuĝamaĝi-kureri, ema ĝeri rakava bene tuĝamaĝi-fitoĝari ĝana. <sup>32</sup> Ĝai tu mai dagara kiraĝi-foforiri tarimama. Iauka Veaĝa na maki maiĝeri dagara ekiraĝi-foforirini. Mo Iauka Veaĝa tu Barau na ĝia ĝeseĝaĝi-viniani tarimari mabarari evinirito.”

<sup>33</sup> Kanisoro tarimari na mai guruĝa ĝeseĝaĝiato nai tu ĝebaru-rakavato, ma ĝeri ura mo apostolo tarimari tu ĝevaĝi-maseri moĝo. <sup>34</sup> Senaĝi ĝia fakari ai Farisea tarimana arana Gamaliel, taravatu evevaĝa-riba iaĝiato-ĝoi, ema tarimarima mabarari na ĝegubakauato-ĝoi tarimana, kanisoro nuĝari na eruĝa-vaishito. Benamo ekirato, moĝeri apostolo tarimari ĝeĝori-rosiri roĝo. <sup>35</sup> Benamo ĝia na kanisoro vegogona ekiraiato, ekirato, “Isaraela tarimami, maiĝeri tarima kamasi ĝoveiri ĝotoni ĝenai boĝono tuĝamaĝi-ginikau. <sup>36</sup> Ĝaro kotari varau beĝe iaĝo, Teuda eruĝa-vaishito, evekiraĝito, ĝia tu tarima baregona ta, benamo tarima sinau vasivasi (400) kavana ĝia ĝesi ĝekauto. Senaĝi ĝia ĝevaĝi-maseato nai tu, ĝena tarimarima mabarari ĝeraga-rovorovoto; mo doĝoro toma tu asiĝina maia. <sup>37</sup> Moĝa murinai tu Iudas, Galilea tauna, tarimarima arari toretoreri o sensisi ĝabiĝabina ĝarori ai efoforito, ĝia maki ĝutuma-bara eĝori-kaurito, senaĝina ĝia maki ĝevaĝiato nai, ĝena tarimarima tu ĝeraga-rovorovoto. <sup>38</sup> Moĝa lorinai initoma veĝanai, au na akiramini, mai tarima ĝoraga-kwaneri, ema ĝeri ai kara ta asi boĝono veia. Korana bema ĝeri boioĝa e ĝauvei maiĝeri tarimarima ĝerina eiaĝomani nai tu berekwa-rekwani. <sup>39</sup> Senaĝi bema mai tu Barau ĝenana eiaĝomani nai tu, ĝomi na maiĝeri tarima tu asi ilaila boĝo kourini bene. Asi namo Barau boĝo vetari-viniani!”

Kanisoro na Gamaliel ĝeseĝaĝi-viniato. <sup>40</sup> Benamo apostolo ma ĝekea-toĝarito, ĝekwaririto, benamo ĝekirarito, Iesu aranai asiĝina ĝinavaĝi ma beĝene vevaĝa-riba ĝenoĝoi; benamo ĝetuĝu-rakarito. <sup>41</sup> Apostolo na kanisoro vegogona ĝeragakwaneato ma iakuri ĝesi, korana Barau na eĝabi-hidirito, ĝia tu ilaila Iesu aranai maiaka beĝe ĝabiani bene. <sup>42</sup> Benamo ĝaro vanaĝivanaĝi ai Rubu Veaĝi e tarimarima ĝeri numa nuĝari ai Vari Namona ĝevevaĝa-ribato-ĝoi e ĝeĝobata-iaĝiato-ĝoi, ĝekirato-ĝoi, Iesu tu Keriso.

### Vevaĝa-kava tarimari imaima ruarua (7)

**6** Moĝeri ĝaro ai Iesu ĝekorana-iaĝiato-ĝoi tarimari tu ĝeĝutuma-iaĝoto-ĝoi. Ma Iuda tarimari, Grik garo ai ĝeguruĝato-ĝoi tarimari, e Heberu garo ai ĝeguruĝato-ĝoi tarimari fakari ai veĝareveĝare eĝorato. Grik garo ai ĝeguruĝato-ĝoi tarimari ĝekirato, ĝia ĝeri vabu tu ĝaro tata ĝaniĝani ĝevareto-ĝoi nai tu ĝevaĝaraburito-ĝoi. <sup>2</sup> Moĝa lorinai apostolo gabanana ruarua (12) na Iesu ĝekorana-iaĝiato-ĝoi tarimari mabarari ĝekea-vegogorito, benamo ĝekirato, “Ĝai na ĝaniĝani varevarena uranai, Barau ĝena guruĝa asi baĝa vari-fiuani tu asi maoro. <sup>3</sup> Moĝa lorinai, tarikakagu mabarami, ĝomi vefakami ai tau imaima ruarua (7) ĝoĝabi-viriĝiri, variri

namo tarimari, Iauka Veāga na e iaunega na ġevonuto tarimari; benamo mai ġauvei ġia baġana vini-vanaġiri. <sup>4</sup>A ġai tauġema ġema taimi mabarani tu ġauġau e ġobatai baġana torea.”

<sup>5</sup>Apostolo tarimari ġeri boioġa ġia mabarari na ġeikaku-iaġiato. Benamo ġia na mai tau maiġeri ġeġabirito: Stefano, veġabidadama na e Iauka Veāga na evonuto tarimana; e Filipino; Prokoro; Nikanoro; Timon; Pamena; e Nikolas, Antioka tarimana senaġi Iuda tarimari ġeri toma-rakariġo ekorana-iaġiato-ġoi. <sup>6</sup>Ġia na mai tau maiġeri apostolo ġoirari ai ġevaġa-ruġarito, benamo apostolo na ġia iatari ai ġeġurigurito ema apostolo ġimari ġia iatari ai ġetore-kaurito.

<sup>7</sup>Benamo Barau ġena guruġa eraga-rovorovoto. Ema Iesu korana-iaġina tarimari Ierusalemāi ġevovoka-ġarimoġito, ema Rubu Veāga vereri ġutuma gorogoro na maki Barau ġena guruġa ġeġabi-raġeato, benamo ġeġabidadamato.

### Stefano ġeġabi-tariato

<sup>8</sup>Stefano tu Barau ġena varevare-bara e seġuka na evonuto tarimana, ġia na nuġa-farevaġi veiġari boruri baregori tarimarima ġoirari ai eveirito-ġoi. <sup>9</sup>Senaġi vekira-fitoġa barego evariġisito. Iuda tarimari ġeri rubu doġorona ta ġekiraġirito-ġoi “Ruġavaġi tarimari”. Ġia ema Iuda tarimari, Kurene e Alesandria na ema Kilikia e Asia tanobara na ġeiaġomato tarimari, Stefano ġesi ġeveġare-veġareto. <sup>10</sup>Senaġi Stefano ġena guruġa tu asi ġelautariato-ġoi, korana ġia tu Iauka Veāga na eviniato-ġoi iauneganai eguruġato-ġoi. <sup>11</sup>Benamo ġia na tarima kotari nuġari ġeġanirito beġene kira, “Ġai na Stefano ġaseġaġiato, ġia na Mose e Barau ekira-fitoġarito.” <sup>12</sup>Mo dabarai ġia na tarimarima, e Iuda vereri, ema taravatu ġevevaġa-riba iaġiato-ġoi tarimari ġekira-vaisivaisirito. Ġia Stefano ġenai ġeiaġoto, ġea ġabi-tariato, benamo Iuda ġeri kanisoro ġoirana ġana ġeġori-iaġoato. <sup>13</sup>Monai beġene ġofaġofa ġana vevaġa-bade tarimari kotari ġeġori-toġarito, benamo ġekirato, “Mai tarima na tu ġaro mabarari ai ġita ġera Rubu Veāgana e Mose ġena taravatu ekira-fitoġarini. <sup>14</sup>Ġai na ġaseġaġiato, ekirato, ‘Iesu, Nasareta tarimana, na mai Rubu Veāgana bevaġa-rakavaiani, ema Mose na evinirato veiġari mabarari bevaġa-iraurini.”

<sup>15</sup>Kanisoro ai ġevegogo-taġoto-ġoi tarimari mabarari na Stefano ġeġita-karakaraiato, ema ġoirana ġeġitaiato tu noġa moġo aneru ta ġoirana.

### Stefano ġena ġobata

**7** Benamo Rubu Veāga verena baregona na Stefano edanaġiato, ekirato, “Maiġeri guruġa tu moġoni ba?” <sup>2</sup>Stefano na evaġa-veserito, ekirato, “Tarikakagu e tamagu mabarami, au ġoseġaġigu! Ġita senera Aberahamo Haran vanuġanai roġosi roġo berea tanu nai, mareva barego Barauna ġia ġenai eforito Mesopotamia ai, <sup>3</sup>benamo ġia ekiraiato, ekirato, ‘Ġemu bese e tanobara noiaġuia, benamo au na bavaġa-ġitamuni tanobarana ġana bono iaġo.’ <sup>4</sup>Benamo ġia na Kaldea tanobarana eraga-kwaneato, benamo Haran ai ea vanuġato. Ma tamana emaseto murinai, Barau na etuġu-iaġomaiato initoma ġotan-iaġiani tanobarana ġana. <sup>5</sup>A Barau na Aberahamo tu ġena tano misina kota maki asi eviniato. Kwaku vaġa-ruġatarina gabuna ilailanai misina kota maki asi eviniato. Senaġi Barau eguruġa-toreto ġia na tano ta bevini-ani, ġia e ġia murina na beġe ġorani tarimari na tano ta beġe ġaunaiani ġia ġeri. Mo ġaro ai Aberahamo tu asi natuna. <sup>6</sup>Barau na ma evaġa-guruġaiato, ekirato, ‘Ġoi ġemuna beġe ġorani beseri tu tano boruna tai beġe tanuni. Ma laġani sinau vasivasi

(400) mo gabu tarimari ġeri vetuġunaġi tarimari ai beġe vaġa-iaġorini e beġe vaġa-midigu midigurini.' <sup>7</sup> Barau ma ekirato, 'Isaraela tarimari na vetuġunaġiri ġeiaġo-vinini beseri tu au na bavevaġa-maoro vinirini, moġa murinai ġia tu mo tano na beġe raka-rosini, mai gabu ai au beġema toma-rakariġo viniguni.' <sup>8</sup> Benamo Barau na Aberahamo kefi-lamavaġi veiġana eviniato, mo tu ġia ġena kiraġitore vetoġana. Benamo Aberahamo na Isako evaġa-ġoraiato, ma ġaro vaġa-imaima toitoina (8) murinai tauġanina kefina elama-vaġiato. Moġa murinai Isako na Iakobo evaġa-ġoraiato, ma Iakobo na ġera doġoro ġedebarinu tarimari gabanana ruarua (12) evaġa-ġorarito.

<sup>9</sup> Doġoro debari tarimari Iosefa ġenai ġemamato, benamo Aigupito tarimari ġeri ai ġevoivoi-iaġiato. Senaġina Barau tu Iosefa ġesi, <sup>10</sup> ema ġena dabara doko mabarari ġerina evaġa-maġuriato. Barau na Iosefa iaunega eviniato, ema Pharao, Aigupito verena, nuġana evaġa-namoato Iosefa ġenai, benamo Pharao na eura-viniato ema seġuka eviniato, Aigupito tanona ema ġia ġena numa tarimari e farefareri bene ġita-ġauri.

<sup>11</sup> Benamo Aigupito tanona mabarana ema Kanana tanona mabaranai doġe ġeġorato, monana vito e nanu mase baregona evaġa-ġoraiato, benamo ġita senera tu asi ġeri ġaniġani doġari dabarana. <sup>12</sup> Senaġina Iakobo eseġaġito Aigupito tu ma widina, benamo ġia na ġita senera etuġu-iaġorito, mo tu ġia ġeri iaġoiġo ġiniguinena. <sup>13</sup> Ma ġeri iaġoiġo vaġa-ruaruanai Iosefa tauġena kakana e tarina ekira-vararito ġia tu deikara, benamo Pharao na Iosefa ġena bese eribaiato. <sup>14</sup> Moġa murinai Iosefa evetuġuto, tamana Iakobo ma ġena bese ġeri ai Aigupito ġana beġene iaġoma ġana. Iakobo besena Kanana tu mabarana gabana imaima ma gabana ruarua imaima (75). <sup>15</sup> Benamo Iakobo Aigupito ġana evariġoto, monai ġia e ġita senera ġemaseto. <sup>16</sup> Ġia tauġaniri tu Sekem ġana ġeġwa-ġenoġoi iaġorito, benamo monai ġea guririto. Mo gara gabuna tu Aberahamo na Hamora naturi ġerina moni na evoiato.

<sup>17</sup> Barau na ġena kiraġitore Aberahamo ġenai bevaġa-moġoniani ġarona ekavinaġito-ġoi nai tu, ġita ġera tarimarima Aigupito ai ġeġutuma-gorogoroto. <sup>18</sup> Ma moġa murinai tu vere ta na Aigupito eġita-ġauato. Mo vere moġa tu asi ribana Iosefa. <sup>19</sup> Ġia na ġita senera eġofarito-ġoi e evaġa-midigu midigurito-ġoi, ema ekirarito-ġoi, naturi raraka-rarakari ġeri numa na beġene tore-rosiri, beġene mase ġana. <sup>20</sup> Mo negai Mose emaġurito. Ma Mose eġorato nai, marevana tu namo vedaurea. Ma ġia tu ġue toitoi tamana ġena numai ġenariato, <sup>21</sup> benamo numa na ġetore-rosiato nai tu, Pharao natuna ġuiatona na eġabiato, benamo natunai evaġa-iaġoato. <sup>22</sup> Mose tu Aigupito ġeri riba e iaunega mabarana ġevaġa-ribaiato, ema ġena guruġa e veiġa ma seġukari tarimanai eiġoto.

<sup>23</sup> Ma ġena maġuri laġanina gabana vasivasi (40) eġabiato, benamo karonna Isaraela tarimari nea raka-ġitari etato. <sup>24</sup> Ġia na Aigupito tarimana ta eġitaiato, Isaraela tarimana ekwariato-ġoi, benamo ġia eiġoto gogobana eragato, benamo mo Aigupito tarimana evaġi-maseato. <sup>25</sup> Mose mataboru ekirato tu ġena tarimarima beġe tuġamaġi-fakani, ġia ġenana Barau na Isaraela tarimari bevaġa-maġuririni, senaġi moġa Isaraela tarimari na tu asi ġeriba-maoroato. <sup>26</sup> Ma elaġanito nai, ġia na Isaraela tarimari ruarua eġitarito ġevevaġito-ġoi, benamo nevaġa-mainori ġana ekirarito, ekirato, 'Ġomi tau ruarua, ġoseġaġi, ġomi tu tarikaka moġo ruarua, ma kara dainai tu taumi ruarua ġovevaġini?' <sup>27</sup> Senaġi vevaġi ekoraiato tarimana na Mose edori-veġitaiato, benamo ekirato, 'Ġoi tu deikara na ġai ġema vere ema toto-iobukaiobuka tarimanai evaġa-iaġomuto?' <sup>28</sup> Ġoi ourani tu ġoraġani Aigupito tari-

mana ovaḡi-maseato kavana au novaḡi-masegu otoni?’ <sup>29</sup> Mose na mo guruḡa es-eḡaḡiatio, benamo eraga-kwareḡato, Midian ḡana egari-rakato. Monai etanuto-ḡoi nuḡanai natuna ruarua ḡemaḡurito.

<sup>30</sup> Laḡani gabana vasivasi (40) ḡekorito murinai, aneru ta tano fakanai Sinai ḡorona sevinau Mose ḡenai efororito. Mo aneru tu ḡau ruguruguna ḡenai karava morenai eiaḡoto, benamo Mose ḡenai efororito. <sup>31</sup> Mose na moḡa eḡitaiatio nai, eḡabato; benamo nea ḡita-ginikaua ḡana eraka-kavinaḡi iaḡoto-ḡoi nuḡanai, Vereḡauka garona eseḡaḡiatio, maiḡesi ekiratio, <sup>32</sup> ‘Au tu ḡoi senemu Aberahamo, Isako, e Iakobo ḡeri Barau.’ Mose egari-rakavato, benamo asi eurato ma bene boḡe-iaḡo ḡenoḡoi. <sup>33</sup> Barau na evaḡa-guruḡaiatio, ekiratio, ‘ḡemu tamaka kwakumu na novei-vaḡiri, korana mani oruḡa-taḡoni gabuna tu tano veaḡana. <sup>34</sup> Moḡoni, au ḡegu tarimarima Aigupito ai ḡevaḡa-midigu midigurini tu baḡitari ema ḡeri midigumidigu ḡabana guruna baseḡaḡiri nai, au bamariḡo tu navaḡa-maḡuriri ḡana. Toma noiaḡoma, au na ḡoi tu Aigupito ḡana atuḡu-ḡenoḡoimuni.’

<sup>35</sup> Mai Mose tu Isaraela tarimari na ḡeruḡaiatio tarimana. Maiḡesi ḡekiratio, ‘ḡoi tu deikara na ḡai ḡema vere e toto-iobukaiobuka tarimanai evaḡa-iaḡomuto?’ Mai tarima sebona moḡo tu Barau na etuḡuato bene vere e bene vevaḡa-maḡuri. Ema ḡia na maki ḡau rugurugunai karava moreri ai efororito aneruna ḡenana evaḡa-kavaiatio. <sup>36</sup> ḡia na Isaraela tarimari Aigupito na eḡori-rosirito nai, nuḡa-farevaḡi veḡari e vetoḡa boruri eveirito-ḡoi, Aigupito nuḡanai e Davara Kakakakanai ema tanobara fakanai laḡani gabana vasivasi (40). <sup>37</sup> Mai Mose sebona na Isaraela tarimari ekirar-ito, ekiratio, ‘Barau na ḡemi peroveta tarimana ta betuḡuani, au etuḡuguto kavana. Mo peroveta tu ḡomi ḡemi tarimarima ta.’ <sup>38</sup> ḡia tu Isaraela tarimari ḡeri vegogo nuḡanai tano fakanai ḡita senera ema Sinai ḡoronai evaḡa-guruḡaiatio aneruna ḡesi monai. ḡia na Barau ḡena maḡuri guruḡana Barau ḡenana eḡabiatio, ḡita ma bene vaḡa-ribara ḡana.

<sup>39</sup> Senaḡina ḡita senera asi ḡeuratio ḡena guruḡa beḡene ḡabi-raḡea, ema ḡia ḡekira-fitoḡaiatio ema nuḡari ai ḡeri ura tu Aigupito ḡana ma ḡeḡenoḡoi. <sup>40</sup> ḡia na Arona ḡekiraiatio, ḡekiratio, ‘ḡita ḡera barau tari noveiri, ḡita ḡoirarai beḡene raka ḡana. Korana mai Mose ḡita Aigupito na eḡori-rosiratio tarimana tu ḡita asi ribara kamasi ta bevei bene.’ <sup>41</sup> Mo ḡaro ai ḡia na boromakau natuna kavana kwaivakukuna ḡeveiatio. Benamo mo kwaivakuku ḡoiranai ginitaḡo dagarari ḡea toreto ema ḡeḡani-verekoto. Tauḡeri ḡimari na ḡeveiatio dagarana ḡeverere-viniatio. <sup>42</sup> Benamo Barau eraka-veḡitatio, ma Isaraela tarimari evini-iaḡorito, guba visiḡuri beḡene tomarakariḡo viniri ḡana. Mo tu peroveta tarimari ḡeri bukai ḡetoreatio ilailanai, ekirani, ‘Isaraela tarimami! Laḡani gabana vasivasi (40) tano fakanai ḡovaḡirito-ḡoi mamoreri, boromakauri, e ginitaḡo dagarari tu dia au ḡegu.

<sup>43</sup> Mo tu kwaivakuku barauna Molok ḡena farai rubuna, ema ḡemi barau Refan ḡena visiḡu iouiouna ḡoḡwaiatio-ḡoi; moḡeri kwaivakuku tu ḡomi na ḡoveirito, boḡono toma-rakariḡo viniri ḡana.

Moḡa lorinai au na ḡomi batuḡu-rakamini Babulona mo rekena ḡana.’

<sup>44</sup> ḡita senera tanobara fakanai ḡetanuto-ḡoi nai tu, farai rubuna maki ḡia ḡesi. Mo farai rubuna Barau na ḡena guruḡa moḡoniri evaḡa-foforirito-ḡoi. Mo farai rubuna ḡeragaiatio tu Barau na Mose ekira-varaiatio lorinai, ema Mose na farai rubuna ve-toḡana eḡitaiatio ilailanai moḡo ḡeveiatio. <sup>45</sup> Moḡa murinai ḡita senera na mo farai

rubuna tamari ġerina ġeġabiato, benamo Iosefa ġena veġorikau neganai ġeġwakau-iaġoato irau bese tarimari tu ġita senera ġoirari ai Barau na ġeri tano na elai-veġitarito. Mo farai rubuna monai etanuto mo, Davida ġena nega. <sup>46</sup> Davida na Barau ġena vevaġa-namo eġabiato, ema enoġinoġito, monai Iakobo ġena Barau ġena tanu numana bene ragaia etato. <sup>47</sup> Senaġina Solomona na vau ġena numa eragaiato.

<sup>48</sup> Senaġi Iaru-korokoro Barauna tu tarimarima ġimari na ġeragarini numari ai tu asi etanuni, peroveta tarimana ekirani kavana,

<sup>49</sup> ‘Vereġauka ekirani,

“Guba tu au ġegu terona,

ema tanobara tu au kwakugu vaġa-ruġatarina gabuna.

Be, au ġegu numa tu kamasi-kamasi na boġo ragaiani?

Au ġegu iaġaraġi gabuna tu aiġa?

<sup>50</sup> Maiġeri dagara mabarari

au ġimagu na asi aveirito, ei?”

<sup>51</sup> Stefano ma eguruġato, ekirato, “Kira-ġuirraġi tarimami! Ġomi nuġami e seġami tu Barau asi ġeura-viniani tarimari kavari. Ġomi tu senemi ġeveito-ġoi kavari ġoveini, vanaġivanaġi Iauka Veaġa ġolai-veġitaiani! <sup>52</sup> Kamara peroveta tu ġomi senemi na asi ġevaġa-midigu midiguato? Ġia na tu Vei-iobukaiobuka Tarimana ġena iaġoma ġekiraġi-fofori guineato tarimari tu ġevaġi-maserito. Ma toma ġomi na tu Iesu boġo revaia e boġo vaġi-debaia. <sup>53</sup> Barau ġena taravatu aneru na ġeġwamariġoato tu ġomi na ġoġabiato, senaġina asi ġokorana-iaġiato.”

### Stefano forena ġeġidara-maseto

<sup>54</sup> Ġia na mo guruġa ġeseġaġiato nai, ġebaru-rakavato, gadikari maki ġeġarataririto Stefano ġenai. <sup>55</sup> Senaġi Stefano tu Iauka Veaġa na evaġa-vonuato, egagararġeto guba ġana, benamo gubai Barau marevana baregona eġitaiao, ema Iesu eġitaiao Barau aroribanai ruġataġo. <sup>56</sup> Benamo ekirato, “Goboġe! Guba bevekeo-faka aġitaiani, ema Tarimarima Natuna tu Barau aroribanai eruġa-taġoni!”

<sup>57</sup> Mo guruġa ġeseġaġiato nai tu, ġimari na seġari ġekou-ġaurito vau ġefararato. Benamo mabarari vaġa-sebo ġia ġeraga-viniato, <sup>58</sup> ġeġabiato, benamo siti murina ġana ġeinu-rosiato, benamo fore na ġeġidaraiato. Ma vaġa-moġoni tarimari ġeri dabuġa tu futua ta arana Saulo, ġia kwakuna koranai ġetorerito. <sup>59</sup> Ġeġidaraiato-ġoi nuġanai, Stefano eġuriġurito, ekirato, “Iesu Vereġauka o, au iaukagu noġabi-raġea.” <sup>60</sup> Evetui-tarito, benamo ma taġina ġesi ekea-raġeto, ekirato, “Vereġauka o, ġeri veġa rakavana maiġa voina asi bono viniri.” Moġesi eguruġato, benamo emaseto.

## 8

Saulo na Stefano vaġimasena tu eġabi-raġeato.

### Ekalesia vaġa-midigumidiguna e lai-lautilusina evesinato

Mo ġaro ai Ierusema nuġanai ekalesia vaġa-midigumidiguna e lai-lautilusina baregona evesinato. Veġabidadama tarimari mabarari ġeragarovorovoto, Iudea e Samaria tanori mabarari ġana ġeiaġoto, senaġi apostolo tarimari ġereġari moġo ġeraga-kwanerito. <sup>2</sup> Barau korana-iaġina tarimari kotari na Stefano taġina ġevei-rakavato e ma taġiri ġesi ġekeuato, benamo ġea guriato. <sup>3</sup> Senaġina Saulo na tu ekalesia nevaġa-rakava korikorria etato. Numa tata nuġari ai eraka-

toġato-ġoi, benamo veġabidadama tauri e vavineri einu-rosirito-ġoi, ma eġabi-iaġorito-ġoi dibura numai ea biri-ġaurito.

### Filipo Samaria ai eġobatato

<sup>4</sup> Ġevaġa-karovorito tarimari tu ġeiaġoto gaburi ai Barau ġena guruġa ġea ġobata-iaġiato. <sup>5</sup> Filipo tu Samaria vanuġana baregona ġana eiaġoto, monai Keriso varina ea fiuato. <sup>6</sup> Ġutuma na Filipo ġena guruġa ġeseġaġiato ema nuġa-farevaġi veiġari eveirito ġeġitarito nai, ġia mabarari na ġeseġaġi-vini magomagoato. <sup>7</sup> Iauka rakavari tarimarima ġutuma ġerina ma ġabari ġesi ġeraka-vaġito, ema tauġaniri tavi tari ġemaseto tarimari e kwaku rakava tarimari ġutuma ġenamoto. <sup>8</sup> Moġa lorinai mo Samaria vanuġana nuġanai iaku baregona eġorato.

<sup>9</sup> Mo vanuġai tarima ta etanuto-ġoi arana tu Simona. Guinenai ġena meġameġa e ġora veiġari na Samaria tarimari evaġa-ġaba rakavarito-ġoi. Tauġena evekiraġito-ġoi, ġia tu varaġe rakava, <sup>10</sup> ema tarimarima mabarari mo vanuġa nuġanai misina na beiaġo mo baregona na ġeseġaġi-viniato-ġoi, ema ġekirato-ġoi, “Mai tarima tu mo Barau ġenana eiaġomato seġukana ġekiraġiani ‘Seġuka Baregona’.” <sup>11</sup> Ġia ġeseġaġi-viniato, korana ġaro barego vedaurea ġia ġena meġameġa veiġari na evaġa-ġabarito. <sup>12</sup> Senaġi Filipo na Barau ġena Basileia, (ġena veġitaġau seġukana evaġa-ruġaiiani maiġa), Varina Namona e Iesu Keriso arana varina eġobata-vinirito nai, tau e vavine na ġevaġa-moġoniato, benamo ebabatorito. <sup>13</sup> Simona na maki evaġa-moġoniato, benamo babatiso eġabiato. Moġa murinai Simona na Filipo ekaferi-kaferiato, ma Filipo na seġuka veiġari baregori e vetoġa boruri eveirito-ġoi nai, eġaba-rakavato.

<sup>14</sup> Apostolo tarimari Ierusalemaj ġetanuto-ġoi ġeseġaġito, Samaria tarimari na tu varau Barau ġena guruġa ġeġabi-raġeato, benamo Petero e Ioane ġetuġu-iaġorito Samaria ġana. <sup>15</sup> Tauri ruarua ġeraġasito nai tu, veġabidadama tarimari iatari ai ġeġauġauto, Iauka Veaġa beġene ġabia ġana. <sup>16</sup> Korana Iauka Veaġa ġia ta iatari ai tu roġosi roġo bere raka-riġo. Ġia tu Iesu Vereġauka aranai moġo babatiso ġeġabiato. <sup>17</sup> Petero e Ioane ġimari ġia iatari ai ġeveġabikauto, benamo ġia na Iauka Veaġa ġeġabiato.

<sup>18</sup> Simona na apostolo tarimari eġitarito, ġimari ġetore-kaurito vau Iauka Veaġa ġeġabiato, benamo ġia na moni Petero e Ioane eduġi-vinirito, ekirato, <sup>19</sup> “Au maki mani seġuka ġovinigu, be ġimagu ta iatanai bana tore-kaua nai, Iauka Veaġa bene ġabia.”

<sup>20</sup> Senaġi Petero na ekiraiato, ekirato, “Ġoi ma ġemu moni ġesi karava gabuna ġana ġoiaġo, korana otuġamaġini Barau ġena varevare tu moni na bovoiani! <sup>21</sup> Mai ġauvei ai ġoi tu asi ġemu gabu, korana nuġamu tu asi roroġoto Barau ġoiranai. <sup>22</sup> Mai ġemu ura rakavana ġenana novetuġamaġi-kure, benamo Vereġauka nonoġia, betaġu ġia na maniġesi tuġamaġi ġeġevana oġabiani nuġamu ai maniġa betuġamaġi-fitoġaiiani. <sup>23</sup> Korana aġitamuni, ġoi tu nuġa-ġirimaġirima na ovonuto, ema rakava na ebaru-bubuġaumuto.” <sup>24</sup> Benamo Simona na Petero evaġa-veseato, ekirato, “Mani ġemi veiġa, au iatagu ai Vereġauka nonoġia, be mani bokiraġiri dagarari ta au ġegu ai asi bene ġora.”

<sup>25</sup> Petero e Ioane na Vereġauka ġena guruġa ġekiraġi-foforiato e ġevari-fiuato murinai, Ieruselema ġana ġeġenoġoito. Ġeri ġenoġoi ai Samaria vanuġari vovokari Vari Namona ġeġobata-iaġiato.

### Filipo e Itiopia tarimana baregona

<sup>26</sup> Veregāuka gēna aneru ta na Filipo evaḡa-guruḡaiato, ekirato, “Novariḡisi, gabina (o south) rekena gāna noiaḡo, bono iaḡo mo, Ierusalemā na Gasā gāna ḡeiaḡoni dabarana gāna. Mo tu tano fakana dabarana, tarima ta asi etanuni.” <sup>27</sup> Benamo evariḡisito, eiaḡoto. Eiaḡoto-ḡoi nuḡanai, Itiopia tarimana ta, dagi baregona tarimana, tu gēna vanuḡa gāna eḡenoḡoito-ḡoi. Ġia tu Itiopia ḡitaḡauna vavinenā baregona gēna farefare eḡitaḡaurito-ḡoi tarimana baregona. Ġia tu eunuko, (seuri ḡefararito tarimana). Ġia Ierusalemā gāna eiaḡoto tu, Barau benea tomarakariḡo vinia gāna. <sup>28</sup> Ġēna ḡenoḡoi ai kariota iatanai etanukauto vau, Isaia peroveta tarimana gēna buka eiavi-iaḡoato-ḡoi. <sup>29</sup> Benamo Iauka Veḡa na Filipo evaḡa-guruḡaiato, ekirato, “Noiaḡo, mo kariota sevinai bonoa raka.” <sup>30</sup> Benamo Filipo kariota sevinā gāna eraga-iaḡoto, benamo mo tarima eseḡaḡiato, Isaia peroveta tarimana gēna buka eiaviato-ḡoi. Benamo ekirato, “Mani guruḡa oiaviani anina ma ribamu ba?” <sup>31</sup> Ġia evaḡa-veseto, ekirato, “Au tu kamasi baribani. Mai tu tarima ta na bekira-varaḡuni vau bariba-maoroni.” Benamo Filipo ekiraiato, ekirato, “Kariotai noma raḡekau, be sevigū ai noma tanu.”

<sup>32</sup> Ġia na buka nuḡanai eiaviato-ḡoi toretorena tu maḡa, “Ġia tu mamoe kavana ḡeḡori-iaḡoato, beḡene vaḡi-masea gāna; ema ḡia tu mamoe natuna kavana ḡuiri ḡefakosi-vaḡirini nai tu, mururi asi ḡekehrini, moḡesina kavana ḡia maki muruna asi ekeoato.

<sup>33</sup> Ġetore-riḡoato e gēna Kota dabarana ḡekouato.

Ġena bese tarimari tu dei na bekiraḡirini?

Korana gēna maḡuri tanobarai tu bema kori.”

<sup>34</sup> Eunuko tauna na Filipo enoḡiato, ekirato, “Nokira-varaḡu, mai peroveta tarimana na tu deikara moḡesi ekiraḡiato? Ġia tauḡena evekiraḡito ba ta ekiraḡiato?”

<sup>35</sup> Benamo Filipo na mo toretore ḡenana gēna guruḡa esinaiato, ema Iesu Varina Namona evaḡa-ribaiato.

<sup>36</sup> Mo dabara na ḡeiaḡoto nuḡanai, nanu gabuna tai ḡeraḡasito. Benamo mo eunuko tauna na Filipo ekiraiato, ekirato, “Noboḡe, nanu tu maḡa, kara na au babatisogu elau-ḡauani?” [<sup>37</sup> Benamo Filipo ekirato, “Bema nuḡamu mabarana ḡesi ovaḡa-moḡoniani nai tu ba-babatisomuni.” Ġia evaḡa-veseto, ekirato, “Oi, nuḡaḡu mabarana ḡesi avaḡa-moḡoniani Iesu Keriso tu Barau Natuna.”]

<sup>38</sup> Benamo gēna draiva ekiraiato, kariota nevaḡa-ruḡataria, benamo kariota eruḡatarito. Filipo e eunuko tauri ruarua nanu ai ḡeraka-riḡoto, benamo Filipo na eunuko tarimana ebabatisoato. <sup>39</sup> Tauri ruarua nanu na ḡeraḡekauto-ḡoi nai, Veregāuka Iaukana na Filipo tu eḡabi-veḡitaiato. Eunuko tarimana na asi ma eḡitaiato, senaḡi gēna iaḡoiaḡo dabara na eiaḡoto-ḡoi roḡo ma iakuna ḡesi. <sup>40</sup> Filipo tu Asoto ai ma ea foforito. Monai vanuḡa mabarari ḡari eiaḡoto, Vari Namona ea ḡobata-iaḡiato-ḡoi, eiaḡoto mo Kaisarea ai eraḡasito.

### Saulo evetuḡamaḡi-kureto

**9** Saulo roḡo Veregāuka ḡekorana-iaḡiato-ḡoi tarimari vaḡa-rakavari e vaḡi-maseri guruḡari evei-gwadato-ḡoi ma baruna ḡesi. Benamo eiaḡoto Rubu Veḡa verena baregona ḡenai, <sup>2</sup> enoḡiato, vevaḡa-riba fefana bene torea, Damaseko ai Iuda tari-



mari ġeri rubu bene viniri ġana. Be, Iesu ġekorana-iaġiani tauri e vavineri monai bene doġariri nai tu bene barubaruri, benamo Ierusalemā ġana bene ġori-ġenoġoi iaġomari.

<sup>3</sup> Benamo Saulo na Ierusalemā eiaġuiato ma Damaseko ġana eiaġoto. Damaseko vanuġa ekavinaġiato nuġanai, asikauna mama ta guba na emoreto, ġia enanagitariato. <sup>4</sup> Benamo ġia tano ai eketo-tarito, ma garo ta eseġaġiato, ekirato, “Saulo, Saulo! Kara dainai au ovaġa-midigu midiguguni e olaiguni?” <sup>5</sup> Ġia evedanaġito, ekirato, “Vereġauka, ġoi tu deikara ei?”

Mo garo evaġa-veseto, ekirato, “Au tu Iesu, ġoi na au ovaġa-rakavaguni tarimagu. <sup>6</sup> Senaġi novariġisi, vanuġa baregonai noa raka-toġa, monai vau tarima ta na beki-ramuni kara ma bono vei.”

<sup>7</sup> Ġia ġekavaiato tarimari mabarari ġeruġa-tarito, asi ġeguruġato, korana garo tu ġeseġaġiato, a tarimana tu asi ġeġitaiao. <sup>8</sup> Saulo tano na evariġisito, matana eiaġaiao nai tu, dagara ta asi eġitaiao. Benamo karona na ġimānai ġeġabito, Damaseko ġana ġeġori-iaġoato. <sup>9</sup> Ġaro toitoi veġata matana ebubuto asi ebogeboġeto, ema asi eġaniġanito e nanu o dagara ta asi eniuato.

<sup>10</sup> Damaseko ai Iesu ekorana-iaġiato-ġoi tarimana ta arana Anania, mata-vanaġi ai Vereġauka na evaġa-guruġaiato, ekirato, “Anania!” Ġia evaġa-veseto, ekirato, “Ou! Vereġauka, au maiġegu.” <sup>11</sup> Vereġauka na evaġa-guruġaiato, ekirato, “Novariġisi, be dabara ta arana Roroġoto Dabarana na noiaġo. Bono iaġo Iudas ġena numa nuġanai, Taso tarimana ta arana Saulo bonoa vedanaġi-iaġia, korana ġia tu monai moġa eġuri-ġurini. <sup>12</sup> Ġia na mata-vanaġi ai tarima ta arana Anania beġitaia, beraka-toġa, ġimana ġia iatanai betore-kauri, matana bene fafa ġana.”

<sup>13</sup> Anania evaġa-veseto, ekirato, “Vereġauka, tarima ġutuma na ġegu ġekiraġito, mai tau na Ierusalemā ġoi ġemu tarimarima veaġari tu veġa rakava kwaikwairi evei-vinirini. <sup>14</sup> Ema Damaseko ġana beiaġoma tu Rubu Veaġa vereri baregori na maoro ġeviniato, ġoi aramu ġevaġa-raġeani tarimari mabarari bene barubaruri e dibura numai bene toreri ġana.” <sup>15</sup> Senaġina Vereġauka na ekiraiato, ekirato, “Noiaġo, korana mai tau tu au na varau aġabi-viriġiato, bese iraurau tarimari e tanobara vereri baregori ema Isaraela tarimari ġoirari ai au aragu bene kiraġia ġana. <sup>16</sup> Ema au na bavaġa-ġitaiani, ġia au aragu bakunai tu midigumidigu vovoka roġo beġabini.”

<sup>17</sup> Benamo Anania eiaġoto, numai eraka-toġato, ema ġimana Saulo iatanai etorekauato. Benamo ekirato, “Saulo tarikakagu, Vereġauka Iesu, ġia tu maiġana oiaġomato-ġoi nai dabara tumanai ġemu ai eforito tarimana. Ġia na betuġugu, korana matamu ma bene fafa ema lauka Veaġa na ġoi bene vaġa-vonumu ġana.”

<sup>18</sup> Asikauna dagara ta maġani-kone ġunari noġa matana na eketo-vaġito, benamo ma ebogeboġe-ġenoġoito. Moġa murinai evaisi-raġeto, benamo babatiso eġabiato. <sup>19</sup> Eġaniġanito murinai, tauna ma ekokore-ġenoġoito.

### Saulo Damaseko ai eġobatato

Ma Saulo Damaseko ai tu ġaro kotari roġo ma etanuto, Iesu ġekorana-iaġiato-ġoi tarimari ġesi. <sup>20</sup> Ġia asikauna rubu ġana eiaġoto, Iesu ea ġobata-iaġiato, ekirato, “Iesu tu Barau Natuna.” <sup>21</sup> Saulo ġeseġaġiato tarimari mabarari nuġari ġefarevaġito, benamo ġekirato, “Mai tarima tu Iesu arana ġekiraġiani tarimari Ierusalemā

evaḡirini tarimana ene? Ema maiḡana beiaḡoma tu mai veḡa sebona uranai bene ḡabiri, be Rubu Veaḡa vereri ḡeri ai bene ḡori-ḡenoḡoi-iaḡori ḡana ene?”

<sup>22</sup> Senaḡi Saulo ḡena ḡobata seḡukana tu ebaregoto-ḡoi. Ḡena guruḡai Iesu evaḡa-moḡoniato-ḡoi, moḡoni Iesu tu Keriso, (Barau na ekiraḡi-toreato vevaḡa-maḡuri tauna). Mo guruḡa Iuda tarimari Damaseko ai ḡetanuto-ḡoi tarimari tu asi ḡeri vaḡa-vese dabarana.

<sup>23</sup> Garo ḡutuma ḡekorito murinai, Iuda tarimari ḡevegogoto, Saulo vaḡi-masena dabarana ḡeboioḡaiato; <sup>24</sup> senaḡi kara ḡeboioḡaiato dagarana tu tarima tari na Saulo ḡekira-varaiato, be eribaiato. Boḡi-laḡani vanuḡa barana ḡatama bokari ḡeḡita-ḡaurito-ḡoi, ḡia beḡene vaḡia uranai. <sup>25</sup> Senaḡi boḡi ta Iesu ḡekorana-iaḡiato-ḡoi tarimari na ḡeḡabiato, boseḡai ḡeḡuraiato, benamo vanuḡa maḡuna murikana na ḡetuḡu-riḡoato.

### Saulo Ieruselema ai

<sup>26</sup> Saulo Ierusalem ai ea votuto nai tu, ḡena ura Iesu ḡekorana-iaḡiato-ḡoi tarimari ḡesi beḡene tanu-vegogo, senaḡi ḡia mabarari na ḡegari-viniato, korana asi ḡevaḡa-moḡoniato-ḡoi, ḡia tu moḡoni korikori Iesu ḡena mero. <sup>27</sup> Senaḡi Banabas na ea ḡoriato, apostolo tarimari ḡeri ai eḡori-iaḡoato. Ḡia na vau ḡeri ekiraḡito, Saulo na Vereḡauka dabarai kamasi eḡitaiato, ema Vereḡauka na eguruḡa-viniato. Ema ekiravararito, kamasi Saulo tu Damaseko ai ma kokorena ḡesi, asi egarito, Iesu aranai eḡobatatato nai. <sup>28</sup> Moḡa lorinai Saulo ḡia ḡesi ḡetanuto-ḡoi ema Ieruselema mabararai eḡobatatato-ḡoi Vereḡauka aranai ma kokorena ḡesi. <sup>29</sup> Grik garo ai ḡeguruḡato-ḡoi Iuda tarimari ḡesi ḡeguruḡato-ḡoi e ḡeveḡare veḡareto-ḡoi, senaḡi ḡia na tu beḡene vaḡi-masea dabarana ḡevetauato-ḡoi. <sup>30</sup> Tarikaka na mai boioḡa ḡeribaiato nai tu, Saulo Kaisarea ḡana ḡeḡori-variḡoato, ma monana Taso ḡana ḡetuḡu-rakaiato.

<sup>31</sup> Moḡa lorinai ekalesia mabarana Iudea, Galilea, e Samaria tanori ai maino eḡorato. Ekalesia ḡena kokore ebaregoto e Vereḡauka garina ḡeveito-ḡoi ema Iauka Veaḡa na evaḡa-kavarito.

### Petero Lida e Iopa ai

<sup>32</sup> Petero gabu mabarari ḡari eiaḡoto, nuḡanai tu Lida ḡana maki evariḡoto, Barau ḡena tarimarima veaḡari rakaḡitari. <sup>33</sup> Monai tarima ta arana Aenea edoḡariato. Ḡia kwakuna tu mase ema laḡani imaima toitoi (8) veḡata ḡena genagena bedina na asi evariḡisito. <sup>34</sup> Benamo Petero na evaḡa-guruḡaiato, ekirato, “Aenea, Iesu Keriso na evaḡa-namomuni. Novariḡisi, ḡemu genagena noiokua.” Asikauna Aenea evariḡisito. <sup>35</sup> Monai ḡetanuto-ḡoi Lida e Saron tarimari mabarari na ḡeḡitaiato, benamo Vereḡauka ḡenai ḡeraka-kureto.

<sup>36</sup> Iopai Iesu ekorana-iaḡiato-ḡoi vavinena ta arana Tabita etanuto-ḡoi. Grik garo ai arana tu Doreka, anina tu “deer”. Ḡia tu veḡa namori ḡutuma eveito-ḡoi, ema asi ḡeri-ḡari tarimari evaḡa-kavarito-ḡoi. <sup>37</sup> Mo negai ḡia tu ekeveto, benamo emaseto. Tauḡanina ḡeguriato, benamo numa tuḡunai daiḡutu tai ḡea toreato. <sup>38</sup> Iopa e Lida fakari tu asi manaḡa. Be Iesu ḡekorana-iaḡiato-ḡoi tarimari Iopai ḡeseḡaḡito Petero tu Lidai nai, tarima ruarua ḡetuḡu-iaḡorito ḡia ḡenai, beḡene noḡia, beḡene kira, “Ḡai ḡesi si-iaḡo, asi nokwaibo!” <sup>39</sup> Moḡa lorinai Petero evariḡisito, benamo ḡia ḡesi ḡeiaḡoto. Eraḡasito nai tu, tuḡuna daiḡutuna ḡana ḡeḡori-varaḡeato. Monai vabu mabarari na ḡeruḡa-ḡeḡeraḡiato, benamo koudi e dabuḡa kotari, Doreka na maḡuri-

nai eturirito-ḡoi dagarari, ḡia ḡevaḡa-ḡita-iaḡiato ma taḡiri ḡesi. <sup>40</sup>Petero na ḡia mabarari daiḡutu na etuḡu-rosirito, benamo evetui-tarito, eḡuri-ḡurito. Moḡa murinai eboḡe-tarito, mase vavinena eḡitaiato, benamo ekirato, “Tabita, novariḡisi!” Tabita na matana eiaḡarito, ma Petero eḡitaiato, benamo etanu-vaisito. <sup>41</sup>Petero na ḡimanai eḡabito, evaḡa-ruḡa-vaisiato. Benamo veḡabidadama tarimari e vabu ekea-toḡarito. ḡia ḡema raka-toḡato nuḡanai, Tabita tu maḡuri eruḡa-taḡoto-ḡoi. Benamo Petero na ḡeri ai etuḡu-iaḡoato. <sup>42</sup>Mai veiḡa varina Iopa mabaranoi eragarovorovoto, benamo tarima ḡutuma na Vereḡauka ḡevaḡa-moḡoniato. <sup>43</sup>Petero ḡaro vovoka Iopai etanuto, boromakau kefiri eḡauvei-iaḡirito-ḡoi tarimana arana Simona ḡesi.

### Petero e Korenelio

**10** Tarima ta arana Korenelio, ḡia tu Kaisarea vanuḡanai etanuto-ḡoi. Ma ḡia tu Roma ḡeri vetari tarimari sinau sebona (100) eḡorikaurito-ḡoi tarimana. ḡia na vetari doḡorona arana ḡekiraḡiato-ḡoi tu “Itali ḡeri Vetari Doḡorona” eḡita-ḡaurito-ḡoi. <sup>2</sup>ḡia e ḡena numa tarimari mabarari ḡesi tu Barau ḡekorana-iaḡiato-ḡoi ema Barau garina ḡeveito-ḡoi. ḡia na asi ḡeri-ḡari Iuda tarimari evaḡa-kava baregorito-ḡoi, ema vanaḡivanaḡi eḡauḡauto-ḡoi Barau ḡenai. <sup>3</sup>Lavilavi ta, horaḡauna 3 koloko rekenai ḡia emata-vanaḡito, Barau ḡena aneru ta eḡita-korikoriatu, ema raka-toḡato, benamo ḡia evaḡa-guruḡaiato, ekirato, “Korenelio!” <sup>4</sup>Benamo ma garina ḡesi Korenelio na mo aneru eḡita-karakaraiato, benamo ekirato, “Vereḡauka, kara?”

Aneru na evaḡa-veseato, ekirato, “ḡemu ḡuririḡuri e ḡemu vevaḡa-kava asi ḡeri-ḡari tarimari ḡeri ai tu Barau na eḡabi-raḡerito, ema ḡia na etuḡamaḡirini. <sup>5</sup>Toma, tau kotari Iopa ḡana notuḡu-iaḡori, be tau ta arana Simona, ḡia arana ta tu Petero, beḡenea ḡoria. <sup>6</sup>ḡia tu Simona, boromakau kefiri eḡauvei-iaḡirini tarimana ḡesi etanuni; ḡena numa tu kone rikinai.”

<sup>7</sup>Mo evaḡa-guruḡaiato aneruna na eraga-kwaneato, benamo Korenelio na ḡena vetuḡunaḡi tarimari ruarua ema ḡena vetari tarimana ta ekea-iaḡomarito. ḡena vetari tarimana moḡa tu Barau ekorana-iaḡiato-ḡoi tarimana e ḡia tu vanaḡivanaḡi Korenelio sevinai ḡia vetuḡunaḡina ḡeiaḡo-viniato-ḡoi tarimana ta. <sup>8</sup>Kara eḡorato dagarari mabarari Korenelio na ekira-vararito, benamo Iopa ḡana etuḡu-iaḡorito.

### Petero ḡena mata-vanaḡi

<sup>9</sup>Ma elānito, ḡia tu dabara na roḡo ḡeiaḡoto-ḡoi, Iopa ḡekavi-naḡiato, ḡaroḡotai Petero tu numa tuḡunai eraḡekauto, nea ḡuririḡuri ḡana. <sup>10</sup>ḡia varau evitoato, benamo ḡena ura tu neḡaniḡani. Ma ḡaniḡani tu roḡo ḡerovinarito-ḡoi nuḡanai, ḡia emata-vanaḡito. <sup>11</sup>ḡia na guba evekeoto eḡitaiato, ema dagara ta dabuḡa baregona kavana, daigunina vasivasi emariḡoto-ḡoi ḡia ḡenai, noḡa moḡo ḡetuḡumariḡoato-ḡoi tanobara ḡana. <sup>12</sup>ḡia emariḡoto-ḡoi nuḡanai tu maḡuri dagarari iraurau mabarari, kwakuri vasivasi ḡerakani dagarari, e ḡedarani dagarari, ema guba na ḡerovoni manuri. <sup>13</sup>Benamo garo ta na ekiraiato, ekirato “Petero, novariḡisi, be novaḡiri, noḡaniri!” <sup>14</sup>Senaḡi Petero evaḡa-veseto, ekirato, “Vereḡauka, asiḡina ḡinavaḡi! Rakava e asi veiareva dagarari ta au na roḡosi roḡo bara ḡania.” <sup>15</sup>Mo garo na ma evaḡa-guruḡa ḡenoḡoiato ekirato, “Barau na eiarevarito dagarari

ta rakavana asi bono kiraĝi.”<sup>16</sup> Vaĝa-toitoido moĝesi eĝorato, benamo mo dabuĝa asikauna tu guba ĝana ma eĝabi-varaĝeato.

<sup>17</sup> Petero na mo ĝena mata-vanaĝi ai eĝitarito dagarari anina roĝo etuĝamaĝi-vetaurito-ĝoi nuĝanai, Korenelio ĝena vetuĝunaĝi tarimari tu ĝevotuto, ma ĝeribato Simona ĝena numa tu ainai. Benamo ĝeiaĝoto mo numa ĝatama bokana korana ĝoiranai ĝea ritoĝo-tarito. <sup>18</sup> Benamo ĝekeato e ĝevedanaĝito, ĝekirato, “Simona, arana ta ĝekiraĝiani Petero, tu mainai etanuni ba?” <sup>19</sup> Petero na tu roĝo mo mata-vanaĝi anina etuĝamaĝi-vetaurito-ĝoi nuĝanai, lauka Veaĝa na evaĝa-guruĝaiato, ekirato, “Noseĝaĝi, ĝoi tu tarima toitoido na ĝevetaumuni. <sup>20</sup> Be novariĝisi, norakariĝo, ĝia ĝesi boĝono iaĝo. Asi bono ĝoiaĝi, korana au na atuĝurito bene.”

<sup>21</sup> Petero eraka-riĝoto mo tarima ĝeri ai, benamo ekirato, “Ĝovetauani tauna tu au maĝegu. Kara dainai boĝo iaĝoma?” <sup>22</sup> Ĝia ĝevaĝa-veseto, ĝekirato, “Ĝai tu vetari tarimari sinau sebona (100) eĝori-kaurini tarimana arana Korenelio na betuĝuma. Ĝia tu vei-iobukaiobuka e Barau garina eveini tarimana, ema Iuda tarimari mabarari na maki ĝegubakau-baregoani. Ĝia tu Barau ĝena aneru ta na ekiraiato, ĝoi bene keakaumu, ĝena numa ĝana bono iaĝo, ema ĝoi na kara bokiraĝirini bene seĝaĝiri.”

<sup>23</sup> Benamo Petero na mo tarima eĝabi-raĝerito ĝena numai, monai ĝegenato.

### Petero tu Korenelio ĝena numa ĝana eiaĝoto

Boĝiboĝi ai ĝevariĝisito, benamo Petero ĝia ĝesi ĝeiaĝoto, ema tarikaka kotari Iopa na maki ĝia ĝesi ĝeiaĝo-sebonato. <sup>24</sup> Ĝia ĝeiaĝoto, dabara tumanai ĝea genato, ma elaĝanito vau Kaisareai ĝevotuto. Korenelio na tu ĝia enari-taĝorito-ĝoi, garga-rana e ĝatana maki ekea-vegogorito ĝena numai. <sup>25</sup> Petero eraka-toĝato nuĝanai, Korenelio na edoĝariato, benamo kwakuna koranai evetui-tarito ma etutuĝutari-viniato. <sup>26</sup> Senaĝi Petero na evaĝa-ruĝa-vaĝiato, ekirato, “Novariĝisi, au maki tarimarima moĝo.” <sup>27</sup> Numa nuĝanai ĝeraka-toĝato-ĝoi nai, Petero na Korenelio evaĝa-guruĝaiato-ĝoi. Ma numa nuĝanai tu tarimarima ĝutuma vegogotaĝo edoĝaririto. <sup>28</sup> Benamo ĝia na evaĝa-guruĝarito, ekirato, “Ĝomi tauĝemi maki ma ribami ginikau, ĝai ĝema taravatu ekirani, Iuda tarimana ta irau bese tarimana ta ĝesi asi bene tanu-vegogo o asi bene raka-ĝitaia maki, taravatu. Senaĝi Barau na bevaĝa-ĝitagu, au na tarima ta asi bana kiraĝia ĝia tu rakava o asi veiareva. <sup>29</sup> Moĝa lorinai boĝo keakaugu nai, baiaĝoma moĝo, asi bakira-sirivaĝi. Be nadanaĝimi, au tu kara dainai boĝo keakaugu?”

<sup>30</sup> Korenelio ekirato, “Ĝaro vasivasi varau beĝe iaĝo, au tu ĝegu numai aĝauĝauto-ĝoi horaĝauna 3 koloko lavilavi rekenai, maitoma horaĝauna kavana. Benamo asikauna dabuĝa kurokuro lelevaĝina na evedabuĝato tarimana ta ĝoiragu ai eruĝa-tarito, <sup>31</sup> benamo ekirato, ‘Korenelio! Barau na ĝemu ĝauĝau beseĝaĝia e vevaĝa-kava veiĝari asi ĝeri-ĝari tarimari ĝeri ai etuĝa-maĝirito. <sup>32</sup> Iopa ĝana novetuĝu-iaĝo, Simona, ĝia arana ĝekiraĝiani Petero ĝetoni, beĝenea kiraia, be bene iaĝoma. Ĝia tu Simona, boromakau kefiri eĝauvei-iaĝirini tarimana ĝena numai etanuni kone rikinai.’ <sup>33</sup> Moĝa lorinai asikauna vetuĝumu araga-veito, ema bovei-nauĝa, veiĝa namo taumu, korana boiaĝoma bene. Toma ĝai mabarama tu Barau ĝoiranai maĝema, ma Vereĝauka na bevaĝa-naĝimu guruĝari mabarari baĝana seĝaĝiri ĝana.”

### Petero ġena ġobata

<sup>34</sup> Benamo Petero ġena guruġa esinaiato, ekirato, “Au toma bama riba-maoro, Barau na tarimarima mabarari tu eġabiraġe-ilailarini. <sup>35</sup> Bese mabarari nuġari ai tu deikara na ġia garina eveini, ema veiġa iobukari eveini tarimana moġo ġia na eġabi-raġeani. <sup>36</sup> Barau na Isaraela tarimari ġeri ai etuġu-iaġomaiato varina tu maiġa, mo tu maino varina Iesu Keriso ġenana maino varina namona efiuato-ġoi. Iesu Keriso tu tarima mabarari ġeri Vereġauka. <sup>37</sup> Gomi ma ribami Iudea nuġanai kara eġorato, Galilea na evesinato. Mo tu Ioane na babatiso eġobata-iaġiato murinai. <sup>38</sup> Iesu, Nasareta tarimana varina, ġomi ma ribami, kamasi Barau na Iauka Veaġa e seġuka ġia iatanai ebubu-riġoato. Ġia tu gabu mabarari ġari eiaġoto, veiġa namori eveirito-ġoi, ema Diabolo ġena seġuka na eġabirito tarimari mabarari evaġa-maġuririto-ġoi, korana Barau tu ġia ġesi. <sup>39</sup> Ġai tu ġia na Iuda e Ierusalemata tanori ai eveirito-ġoi dagarari mabarari ġavaġa-moġonirini tarimama. Ġia tu satauro ai ġeikoko-kauato nai ġevaġa-maseato. <sup>40</sup> Senaġina Barau na ġaro vaġa-toitoinai (3) evaġa-variġisi ġenoġoiato ema evaġa-foforiato beġene ġitaia ġana. <sup>41</sup> Ġia tu tarimarima mabarari na asi ġeġitaiato, senaġi ġevaġa-moġoniani tarimari, mo tu Barau na eviriġi-guinerito tarimari na moġo ġeġitaiato. Ma moġeri tarimari tu ġai maiġema. Ġia evariġisi-ġenoġoito murinai, ġai tu ġia ġesi ġaġaniġani-vegogoto e ġaniuniu-vegogoto. <sup>42</sup> Ġia na evaġa-naġimato, tarimarima ġeri baġana ġobata e baġana kiraġi-foforia, ġia tu Barau na eġabi-hidiato, maġuri tarimari e mase tarimari ġeri vevaġa-maoro tarimanai evaġa-iaġoato. <sup>43</sup> Peroveta tarimari mabarari na ġia ġekiraġi-foforiato-ġoi, ġekirato-ġoi, ġia beġe vaġa-moġoniani tarimari mabarari tu ġia arana seġukanai Barau na ġeri rakava betuġamaġi-fitoġarini.”

### Irau bese tarimari Iauka Veaġa ġeġabiato

<sup>44</sup> Petero roġo eguruġato-ġoi nuġanai, Barau ġena guruġa ġeseġaġiato-ġoi tarimari mabarari iatari ai Iauka Veaġa eraka-riġoto. <sup>45</sup> Iuda tarimari Iesu ġevaġa-moġoniato-ġoi ema Petero ġesi Iopa na ġeiaġomato tarimari tu ġeġaba-rakavato, korana Barau na Iauka Veaġa irau bese tarimari maki evinirito iatari ai ebubu-riġoato. <sup>46</sup> Korana ġeseġaġirito garo irauri ai ġeguruġato-ġoi, ema Barau ġevaġa-raġeato. Benamo Petero ekirato, <sup>47</sup> mai tarimarima na tu Iauka Veaġa varau beġe ġabia, ġita na taġabiato kavana. Be, nanu nuġanai babatiso beġene ġabia ġana tu deikara na bekira-ġoiani? <sup>48</sup> Moġa lorinai ġia na ekirarito, Iesu Keriso aranai beġene babatisori. Benamo ġia na Petero ġenoġiato, ġaro kotari ġia ġesi roġo ma beġene tanu.

### Petero ġena guruġa-fofori Ierusalemata ai

**11** Apostolo e tarikaka Iudea tanonai mabarari ġeseġaġito, irau bese tarimari na maki Barau ġena guruġa varau ġeġabi-raġeato. <sup>2</sup> Benamo Petero Ierusalemata ġana evaraġeto nai tu, Iesu ġevaġa-moġoniato-ġoi tarimari, senaġi tauġaniri kefiri tu ġelama-vaġirito, moġeri na ġeġau-fitoġaiato, <sup>3</sup> ġekirato, “Ġoi tu kefiri asi ġelama-vaġirini irau bese tarimari ġeri numai oa raka-toġato, ema ġia ġesi oa ġaniġani-vegogoto!”

<sup>4</sup> Benamo Petero na vari mabarana ġeri ekiraġito, kamasi evesinato mo magona. Ekirato, <sup>5</sup> “Au tu Iopa vanuġana baregonai aġuririto-ġoi, nuġanai amata-vaġito. Aboġeto, dagara ta dabuġa baregona kavana, daigunina tu vasivasi (4),

guba na emariġoto-ġoi, noġa moġo ġetuġu-mariġoato-ġoi, ġoiragu ai ema vetoretarito. <sup>6</sup> Aboġe-ġurato nai tu, maġuri dagarari irauirau, tanobarai kwakuri vasivasi na ġerakani bureġari, e boġai ġetanuni bureġari, e ġedarani dagarari, ema guba na ġerovoni manuri aġitarito. <sup>7</sup> Benamo garo ta aseġaġiato, ekirato, ‘Petero, novariġisi, be novaġiri e noġaniri!’ <sup>8</sup> Senaġi au akirato, ‘Vereġauka, asiġina ġinavaġi, rakava e asi veiareva dagarari ta au murugu na roġosi beġere raka-toġa.’ <sup>9</sup> Mo garo guba na ma eguruġa-ġenoġoito, ekirato, ‘Barau na eiarevarito dagarari tu rakavari asi bono kiraġiri.’ <sup>10</sup> Vaġa-toitoina moġesi eġorato, benamo dagara mabarari guba ġana ma eġabi-varaġerito.

<sup>11</sup> Mo horaġauna sebonai tarima toitoi au atanuto-ġoi numanai ġeraġasito. Ġia tu Kaisarea na ġetuġurito au ġegu ai. <sup>12</sup> Benamo Iauka Veaġa na ekiraguto, ġia ġesi bana iaġo, asi bana ġoiaġi. Mai tarikaka imaima sebona (6) maki au ġesi Kaisarea ġana ġaiaġoto, ema mabarama Korenelio ġena numai ġaraka-toġato. <sup>13</sup> Ġia na ġema ekiraġiato, kaması aneru ta, ġia ġena numai eforito eġitaıato, ema ekiraıato, ekirato, ‘Iopa ġana novetuġu-iaġo, Simona, ġia arana ta tu Petero, beġenea kiraia, bene iaġoma. <sup>14</sup> Ġia na guruġa tari ġemu bekiraġirini, benamo mo guruġa ġerina Barau na ġoi ema ġemu numa tarimari mabarari bevaġa-maġurimini.’ <sup>15</sup> Au na guruġa vau asinaıato nuġanai, Iauka Veaġa emariġoto ġia iatari ai, Pentekoste ġaronai ġita iatarai emariġoto kavana. <sup>16</sup> Benamo Vereġauka na kara ekiraġiato dagarana atuġamaġi-doġariato, ekirato, ‘Ioane tu nanu na ebatisoto-ġoi, senaġina ġomi tu Iauka Veaġa na bebatisomini.’ <sup>17</sup> Bema Barau na mo varevare sebona moġo, ġita Vereġauka Iesu Keriso tavaġa-moġoniato nai evinirato varevarena, irau bese tarimari maki evinirito nai tu, au tu deikara, be au na Barau bakira-ġoiani?”

<sup>18</sup> Ġia na mo guruġa ġeseġaġiato nai, ġeri guruġa barubaru ġevaġa-magoato, benamo Barau ġevaġa-raġeato, ġekirato, “O kato, irau bese tarimari maki Barau na vetuġamaġi-kure dabarana bevaġa-ġitari, maġuri beġene ġabia ġana.”

### Ekalesia evesinato Antioka ai

<sup>19</sup> Stefano emaseto nai, ekalesia vaġa-midigumidiguna e lai-lautilausina eġorato, benamo veġabidadama tarimari ġevaġa-raġa rovorovorito. Ġia kotari ġeiaġoto mo Foenikia, Saıpras e Antioka ai ġea raġasito. Monai Iuda tarimari ġeri ai moġo Iesu varina ġeġobata-iaġiato-ġoi. <sup>20</sup> Senaġi veġabidadama tarimari kotari, Saıpras e Kurene tarimari tu Antioka ġana ġeiaġoto, Grik tarimari ġeri ai maki vari ġea fiuato, Iesu Vereġauka Varina Namona ġeġobata-iaġiato-ġoi. <sup>21</sup> Vereġauka seġukana tu ġia ġesi, be tarimarima ġutuma-bara Vereġauka ġevaġa-moġoniato ema ġevetuġamaġi-kureto.

<sup>22</sup> Ierusalemna ekalesiari na mai vari ġeseġaġiato, benamo ġia na Banabas Antioka ġana ġetuġu-iaġoato. <sup>23</sup> Ġia Antiokai eraġasito, benamo Barau ġena varevare-bara tarimarima ġeri ai eġitaıato nai, eiaku-rakavato. Ma mabarari elaunaġirito, moġoni ai Vereġauka beġene korana-iaġia ma nuġari mabarari ġesi. <sup>24</sup> Banabas tu tarima namona, Iauka Veaġa e veġabidadama na evonuto. Ema tarimarima ġutuma-bara Vereġauka ġena tarimarimai ġeiaġoto.

<sup>25</sup> Benamo Banabas Taso ġana eiaġoto, Saulo vetau-vetauna. <sup>26</sup> Edoġariato, benamo Antioka ġana eġori-iaġoato. Monai mo laġani sebona, tauri ruarua ekalesia ġesi ġevegogoto-ġoi e tarimarima ġutuma-bara ġevaġa-ribarito-ġoi. Iesu ġekorana-iaġiato-ġoi tarimari tu Antioka vanuġanai vau ġekiraġirito “Christian”.

<sup>27</sup> Mo ġaro ai peroveta tarimari kotari Ierusalemna na Antioka ġana ġevariġoto. <sup>28</sup> Ta ġia fakari ai arana tu Agabo. Agabo evariġisito, Iauka na evaġa-ribaiato ilailani tanobara mabaranai doġe baregona beġorani varina efiu-guineato. Mo doġe baregona tu Klaudio ġena veġitaġau ġarori ai eġorato. <sup>29</sup> Iesu ġekorana-iaġiato-ġoi tarimari na ġeura-iaġiato, ġia tata ġeri doġari ilailari ai tarikakari Iudeai ġeri ai ġeri varevare dagarari kotari beġene tuġu-iaġo, beġene vaġa-kavari ġana. <sup>30</sup> Mo veġa tu ġeveiato, Banabas e Saulo ġeri ai ġeri moni ġetuġukauto, rubu ġitataġona tarimari beġene viniri ġana.

### Ekalesia vaġa-midigumidiguna e lai-laussilausina ebaregato-ġoi

**12** Moġeri ġaro ai Kini Heroda na ekalesia tarimari kotari eġabi-taririto, bene vaġa-midigu midiguri ġana. <sup>2</sup> Iakobo (o Iames), Ioane kakana, tu baġa na debana ebasi-ġutuato. <sup>3</sup> Heroda na Iuda tarimari eġitarito, mo veġa ġeiaku-iaġiato nai tu, Petero maki ma ea ġabi-tariato. Mo tu asi etubuni faraona verekona ġarori ai eġorato. <sup>4</sup> Petero eġabi-tariato, benamo dibura numai etoreato. Monai vetari tarimari gabanana imaima sebona (16) etorerito, vasiri vasiri ai evaġa-ruġarito vauro, Petero ġeġita-ġauato. Heroda ġena ura tu Pasova murinai vauro, tarimarima ġoirari ai bene ġori-rosia ema bene vaġa-kotaia. <sup>5</sup> Moġa lorinai Petero tu dibura numai ġeġita-ġauato-ġoi, a ekalesia tu Barau ġenai ġeġauġau-kokore kokoreto-ġoi Petero ġena.

### Aneru na Petero evaġa-maġuriato

<sup>6</sup> Boġi, ma belaġanini tu Heroda na tarimarima ġoirari ai Petero beġori-rosiani, Petero tu seini na ġebarubaruato, benamo vetari tarimari ruarua vekaravari ai egenato, ema ġatama-boka ġitaġauna vetari tarimari na maki ġatama-boka ġenari-taġoato-ġoi. <sup>7</sup> Benamo Vereġauka ġena aneru ta efoforito, Petero sevinai eruġa-tarito, ema mama ta dibura numa nuġanai enanagi-tariato. Mo aneru na Petero ġabana ebota-karaiato, benamo evaġo-tataġaiato, ma ekiraiato, ekirato, “Ragavei, novariġisi!” Benamo seini Petero ġimana na ġeketo-vaġito. <sup>8</sup> Benamo aneru na evaġa-guruġaiato, ekirato, “Ġemu gabaġau nobaru-taria, ema ġemu tamaka noveiri.” Benamo Petero na eveirito. Aneru ma ekirato, “Ġemu koudi na noveseġo, be au murigu na noiaġoma.” <sup>9</sup> Petero ġia murinai erakato mo, dibura numa na eraka-rosito. Senaġi ġia tu asi ribana, mo aneru na kara eveiato-ġoi tu moġoni. Ġia mataboru ekirato tu, emata-vanaġini etato-ġoi. <sup>10</sup> Ġatama-boka ġitaġauna tarimari ġeruġato gabuna ta ġeraka-vanaġiato, ma vaġa-ruaruana ma ġeraka-vanaġiato, ġeiaġoto mo, auri ġatama-bokanai ġea raġasito. Moġa tu vanuġa barana rakarosina ġatama-bokana. Mo ġatama-boka tu tauġena moġo ġia ġeri evekeoto, benamo ġeraka-rosito. Dabara na ġeraka-variġoto-ġoi nuġanai, asikauna aneru na Petero eraga-kwaneato.

<sup>11</sup> Monai vau Petero eribato ġia ġenai kara eġorato, benamo ekirato, “Au toma moġoni bama riba, Vereġauka na ġena aneru betuġua tu, Heroda ġimana na, ema Iuda tarimari na au ġegu ai kara ta beġene veia ġetato-ġoi ġenana bema vaġa-maġurigu.

<sup>12</sup> Mo veġa etuġamaġi-fakaiato, benamo Maria ġena numa ġana eiaġoto. Maria tu Ioane Mareko sinana. Monai numa nuġanai tu tarimarima ġutuma ġevevogoto, ġeġauġauto-ġoi. <sup>13</sup> Petero numa murikana ġatama bokanai esekeseketo, benamo vetuġunaġi ġuiatona ta arana Roda eiaġoto, nea ġitaia ġana. <sup>14</sup> Senaġi ġia na Petero

garona eseḡaḡi-leaiato, benamo iaku na evaḡa-vonuato, benamo ḡatama-boka tu asi ekeo-fakaiato, a ḡia tu eraga-ḡenoḡoito, ea kirarito, Petero tu murikai eruḡa-taḡoni. <sup>15</sup> Ḡia na ḡekiraiato, ḡekirato, “Ḡoi tu bebabomu ba!” Senaḡi ḡia eḡiḡiraḡeto-ḡoi, ekirato, “Moḡoni, Petero tu murikai eruḡa-taḡoni.” Benamo ḡekirato, “Mani tu ḡia ḡena aneru!”

<sup>16</sup> Senaḡina Petero tu roḡo esekeseke-ḡiḡiraḡeto-ḡoi. Benamo ḡeiaḡoto, ḡatama-boka ḡea keo-fakaiato nai tu, Petero ḡeḡitaiato, ḡeḡaba-rakavato. <sup>17</sup> Petero ḡimana na ekira-ḡoirito asi beḡene guruḡa, benamo Vereḡauka na kamasi dibura numa na eḡori-rosiato ḡeri ekiraḡito. Ḡia na evaḡa-guruḡarito, ekirato, “Iakobo (o Iames) e tarikaka mabarari ḡeri mai vari boḡono kiraḡia.” Benamo ḡia tu erakato, gabu ta ḡana ma eiaḡoto.

<sup>18</sup> Boḡiboḡi, vetari tarimari fakari ai tu daradara baregona eḡorato; ḡevedanaḡi-vedanaḡito, ḡekirato, “Petero tu kamasi bevei?” <sup>19</sup> Heroda na gabu mabarana evetau-ḡinikauato, senaḡi Petero asi eḡoitaḡoato. Benamo Petero ḡeḡita-ḡauato tarimari evaḡa-kotarito murinai, ḡena vetari tarimari o soldia ekirarito beḡenea vaḡi-maseri. Moḡa murinai Heroda na Iudea eraga-kwaneato, ma Kaisareai ḡaro tari ea tanuto.

### Heroda emaseto

<sup>20</sup> Heroda tu Taia e Sidono tarimari ebaruvini-rakavarito; moḡa lorinai Taia e Sidono tarimari ḡeveḡabi-vegogoto, ma Heroda ḡea ḡitaiato. Senaḡi guine, Blasto, Heroda ḡena gena-daiḡutuna ḡitataḡona tarimana ḡesi roḡo ḡeveḡatato, ḡevaḡa-maranaiato, ema ḡia rekeri ai roḡo ekauto. Moḡa murinai vauro ḡeiaḡoto, Heroda ḡenai maino ḡea noḡiato, korana ḡia ḡeri tanobara ḡaniḡanina tu Heroda ḡena tano-barai ḡeḡabito-ḡoi.

<sup>21</sup> Benamo ekiraḡi-toreato ḡaronai, Heroda na ḡena vere dabuḡana eveiato, benamo ḡena teronai ea tanukauto vau, tarimarima eguruḡa-vinirito. <sup>22</sup> Benamo tarimarima ḡeḡabato, ḡekirato, “Mai tu barau ta garona, dia tarimarima garona.” <sup>23</sup> Mo horai Vereḡauka ḡena aneru ta na Heroda ekwariato, korana ḡia na mo guruḡa eseḡaḡiato nai, Barau tu asi evaḡa-raḡeato. Ḡia tu ḡuiḡoḡiuo na ḡeḡaniato, emaseto.

<sup>24</sup> Senaḡi Barau ḡena guruḡa tu ebaregoto e eraga-rovorovoto.

<sup>25</sup> Banabas e Saulo tu ḡeri ḡauvei ḡevaḡa-koriato, benamo Ieruselema na ḡeḡenoḡoito; Ioane Mareko maki ḡeḡori-kauato.

### Banabas e Saulo ḡeḡabi-viriḡirito e ḡetuḡurito

**13** Antioka ekalesiana nuḡanai tu peroveta e vevaḡa-riba tarimari kotari. Arari tu Banabas; Simeona, arana ta tu Niga; Lukio, Kurene tarimana; Manaen, ḡia tu Gavana Heroda ḡesi ḡevaḡa-baregorito; e Saulo. <sup>2</sup> Ḡia na Vereḡauka ḡetomarakariḡo viniato-ḡoi e ḡeḡani-veaḡato-ḡoi nuḡanai, Iauka Veaḡa na ekirarito, ekirato, “Banabas e Saulo tu au ḡegu boḡono ḡabi-ḡerevaḡiri, korana au na bakeari, ḡegu ḡauvei ta beḡene veia ḡana.” <sup>3</sup> Benamo ḡia ḡeḡani-veaḡato e ḡeḡuriḡurito murinai, ḡimari ḡia iatari ai ḡetore-kaurito, benamo ḡetuḡu-rakarito.

### Saipras ai

<sup>4</sup> Iauka Veaḡa na Banabas e Saulo etuḡurito, benamo tauri ruarua kone vanuḡana Seleukia ḡana ḡevariḡoto. Seleukia na tauri ruarua bouti ai ḡeraḡeto, benamo



Saipras motumotu ġana ġevanaġito. <sup>5</sup> Banabas ma Saulo Salami ai ġevotuto nai, Barau ġena guruġa Iuda tarimari ġeri rubu tari ai ġea ġobata-iaġiato. Ioane Mareko maki ġia ġesi, ġia tauri ruarua evaġa-kavarito-ġoi.

<sup>6</sup> Tauri ruarua na Saipras motumotu mabarana ġeraka-vanaġiato, ġeiaġoto Pafu vanuġanai ġea raġasito. Monai Iuda ġeri ġora e peroveta ġofaġofa tarimana ta arana Bar-Iesu ġea doġariato. <sup>7</sup> Ma Bar-Iesu tu motumotu verena, ma iaunega rakavarakava tarimana arana Seregio Paulo ġatana. Mo vere na Banabas e Saulo ekea-iaġorito ġia ġoirana ġana, korana ġena ura tu Barau ġena guruġa bene seġaġia. <sup>8</sup> Senaġi mo ġora tarimana Elima, (Bar-Iesu arana ta tu Elima), na ġeri guruġa ekira-fitoġarito, ġena ura vere na Iesu asi bene vaġa-moġonia. <sup>9</sup> Benamo Saulo, arana ta tu Paulo, lauka Veaġa na evaġa-vonuato, benamo Elima eġita-karakaraiato. <sup>10</sup> Benamo ekirato, “Ġoi tu Diabolo natuna, ema veiġa iobukaiobukari mabarari tu ġoi na ovetari-vinirini! Ġoi tu ġofaġofa e rakava mabarari na ovonuto. Vereġauka ġena veiġa iobukaiobukari ġofaġofai bono vaġa-iaġori uranai ovededegwani. Mo veiġa tu aitoma vau bovaġa-dokoani? <sup>11</sup> Noseġaġi! Toma Vereġauka ġena seġuka ġoi ġemu ai befoforini, matamu bebubuni, ma laġani mamana asi boġitaiani, beiaġoni mo, ġaro ta.”

Asikauna Elima tu mukuna na matana eġabi-ġauato, benamo eraka-ġeġeraġi ġeġeraġito, ġena ura ta na ġimanai bene ġabi, ma bene ġori-kaua. <sup>12</sup> Mo vere na kara eġorato dagarana eġitaiato nai, Vereġauka evaġa-moġoniato. Ema eġaba-rakavato Vereġauka ġena vevaġa-riba guruġari ai.

### Antioka vanuġana Pisidia ai

<sup>13</sup> Paulo ma karona ġesi Pafu ġeraga-kwaneato, bouti na Pega ġana ġeiaġoto. Pega tu Pamfilia nuġanai. Pegai benamo Ioane Mareko na Paulo e Banabas eraga-kwanerito, ġia tu Ieruselema ġana ma eġenoġoi-iaġoto. <sup>14</sup> Pega na kwakuri na Antioka ġana ġeiaġoto. Antioka tu Pisidia tanonai. Sabadi ai tu Iuda tarimari ġeri rubu ai ġeraka-toġato, bona ġetanu-tarito. <sup>15</sup> Mose ġena taravatu e peroveta tarimari ġeri toretore ġeivirito murinai, rubu ġitaġauna tarimari na noġinoġi ġetuġu-iaġoato ġia tauri ruarua ġeri ai, ġekirato, “Tarikaka, bema ma ġemi vevaġa-gwaġiġi guruġari mai tarimarima ġeri ai nai tu, ġai ġaurani, ġeri ġokiraġi.”

<sup>16</sup> Paulo evarigisito, ġimana na eiave-taririto, benamo ekirato, “Isaraela taumi e irau bese tarimari fakari ai Barau garina ġoveini tarimami, ġoseġaġi! <sup>17</sup> Mai Isaraela tarimari ġeri Barau na ġai senema eġabi-viriġirito, ema ġia na evaġa-ġutumarito, Aigupito tanonai ġetanuto-ġoi nai. Ma Barau ġena seġuka baregona na Aigupito tanona na eġori-rosirito, <sup>18</sup> ema laġani ġabana vasivasi (40) kavana tano fakanai ġia ġeri ai evevaġa-gwaġiġito. <sup>19</sup> Ġia na Kanana tanonai bese imaima ruarua (7) tarimarimari evaġa-mou-taririto. Ma ġeri tano tu eġabiato, Isaraela tarimari evinirito e ġeri tanobarai evaġa-iaġoato. <sup>20</sup> Mo dagara mabarari tu laġani sinau vasivasi ma ġabana imaima (450) kavana nuġanai ġeġorato. Moġa murinai ġia na vevaġa-roroġoto tarimari evinirito, eiaġoto mo peroveta tarimana Samuela ġena veġitaġau laġanina. <sup>21</sup> Ma ġeri vere o kini ta beġene ġabia noġinoġina ġeveito nai, Barau na Saulo evinirito. Ġia tu Kisa natuna, mo tu Beniamina ġena doġoro tarimana. Saulo na laġani ġabana vasivasi (40) eġita-ġaurito. <sup>22</sup> Saulo kini dagina na eġabi-vaġiato murinai, Barau na Davida eġabiato, Isaraela ġeri kini ai evaġa-iaġoato. Barau na Davida tu maiġesina ekiraġi-foforiato, ekirato, ‘Au na Davida, Iese natuna, badoġaria, ġia tu

au nuḡagu na euravini-rakavaiani tarimana. Ġia na au ḡegu ura veiḡari mabarari beveirini.’<sup>23</sup> Barau na ḡena guruḡatore ilailanai, Davida besena na, Isaraela tari-mari ḡeri vevaḡa-maḡuri tarimana etuḡu-mariḡoato. Mo vevaḡa-maḡuri tarimana tu Iesu.

<sup>24</sup> Iesu roḡosi roḡo bere ḡauvei nuḡanai, Ioane na Isaraela tarimari mabarari eḡobata-vinirito, ekirarito, ḡeri rakava ḡerina beḡene vetuḡamaḡi-kure, benamo babatiso beḡene ḡabia. <sup>25</sup> Ioane na ḡena ḡauvei dori evaḡa-koriato nuḡanai, tari-marima ekirarito, ekirato, ‘Ḡomi ḡotuḡa-maḡini au tu dei? Au tu dia ḡomi na ḡovaḡa-nogaiani tarimana. Senaḡi ḡoboḡe! Ġia tu au murigu na mani eiaḡomani, ma au tu asi ilaila ḡia kwakuna tamakari bakoki-vaḡirini.’

<sup>26</sup> Tarikakagu, Aberahamo besena, ema ḡomi irau bese fakari ai Barau garina ḡoveini tarimami: Mai vevaḡa-maḡuri guruḡana tu ḡita ḡera etuḡu-iaḡomaiato. <sup>27</sup> Ierusalemata tarimari ma ḡeri vere ḡesi Iesu asi ḡeḡita-leaiato, ema Iesu, peroveta tarimari ḡeri guruḡa Sabadi mabarari ai ḡeivirito-ḡoi, tu asi ḡetuḡamaḡi-fakarito. Moḡesina naima ḡia na Iesu vaḡi-masena guruḡana ḡekiraḡito nai, peroveta tarimari ḡeri guruḡa ḡevaḡa-moḡonirito. <sup>28</sup> Oba, vaḡi-masena korana ta tu asi ḡedoḡariato, senaḡina Pilato ḡenoḡiatio, bene vaḡi-masea ḡetato. <sup>29</sup> Buka Veaḡai ḡia ḡekiraḡiatio guruḡari mabarari ḡeveirito murinai, satauro tuḡuna na ḡeḡabi-riḡoato, benamo fore ḡekwaiatio kouḡana garanai ḡea toreato. <sup>30</sup> Senaḡi Barau na mase na ma evaḡa-variḡisi ḡenoḡiatio, <sup>31</sup> ḡia ḡesi Galilea na Ierusalemata ḡana ḡeiaḡoto-ḡoi tarimari na ḡaro vovoka ḡeḡitaiatio. Ma ḡia toma tu Isaraela tarimari ḡeri ai Iesu ḡekiraḡi-foforiani.

<sup>32</sup> Ema Barau na ḡita senera kara ekiraḡitore-vinirito Varina Namona ḡomi ḡakira-varamini. <sup>33</sup> Mo kiraḡitore tu Barau na ḡita, ḡia tuburi, ḡera evaḡa-moḡoniatio, mo tu ḡia na Iesu mase na ma evaḡa-variḡisi ḡenoḡiatio nai. Salamo vaḡa-ruaruanai etoreato ilailana, ekirani,

‘Ḡoi tu au Natugu;

toma au tu ḡoi Tamamu ai baiaḡo.’

<sup>34</sup> Barau na moḡoni mase na evaḡa-variḡisi ḡenoḡiatio e asi ma beḡenoḡoini gara ḡana, benamo beborāḡani. Barau na tu maiḡesi ekiraḡiatio, ekirato,

‘Davida ḡena akiraḡi-torerito,

vevaḡa-namo veaḡari e moḡoniri tu ḡomi baviniḡini.’

<sup>35</sup> Ema Salamo ta nuḡanai ma ekirani,

‘Ḡoi ḡemu tarima veaḡana tu

asi beborāḡani,

korana tu asi bene ḡora otato.’

<sup>36</sup> Davida ḡena ḡuru ai Barau ḡena vetuḡunaḡi eiaḡo-vinito-ḡoi nai emaseto, benamo senena seviri ai ḡeguriatio, ma tauḡanina tu eborāḡato. <sup>37</sup> Senaḡi Iesu, Barau na mase na evaḡa-variḡisi ḡenoḡiatio tarimana, tu tauḡanina asi eborāḡato. <sup>38</sup> Moḡa lorinai, tarikakagu mabarami, au aurani boḡono riba, ḡai tu Iesu bakunai rakava tuḡamaḡi-fitoḡari varina ḡomi ḡemi ḡavari-fiuani. <sup>39</sup> Mose ḡena taravatu na ḡomi ḡemi rakava tu asi beruḡa-vaḡirini riba, a Iesu na ḡia ḡevaḡa-moḡoniani tarimari mabarari ḡeri rakava tu eruḡa-vaḡirini, vei-iobukaiobuka tarimari ai evaḡa-iaḡorini. <sup>40</sup> Rorimi boḡono vetore, be peroveta tarimari na ḡekiraḡirito dagarari, ḡemi ai asi beḡene ḡora; ḡekirato,

<sup>41</sup> ‘Ḡomi veḡabi-varaḡevaraḡe

tarimami ġoboġeboġe!  
 Nuġami ġefarevaġi, benamo ġomase!  
 Korana ġemi maġuri ġarori ai  
 au na veġa ta baveiani,  
 enabe ta na ġemi bekiraġi-ġinikauani,  
 senaġi asi boġo vaġa-moġoniani!”

<sup>42</sup> Paulo e Banabas rubu na ġeraka-riġoto-ġoi nuġanai, tarimarima na ġenoġirito, ġoira Sabadi ai ma beġene ġenoġoi, be mo guruġa kotari ma ġeri beġene kiraġi. <sup>43</sup> Tarimarima vegogo na ġeġwa-lausiato murinai, Iuda tarimari ġutuma, ema irau bese tarimari, Barau ġekorana-iaġiato-ġoi tarimari, ġutuma maki Paulo e Banabas muriri na ġeiaġoto. Tauri ruarua na ġevaġa-guruġarito e ġelaunaġirito, Barau ġena varevare-bara nuġanai beġene ruġa-gwaġiġi.

<sup>44</sup> Sabadi vaġa-ruaruanai, dori moġo mo vanuġa baregona tarimari mabarari na Vereġauka ġena guruġa seġaġi-seġaġina ġeraka-vegogoto. <sup>45</sup> Iuda tarimari na mo ġutuma ġeġitarito nai, ġemama-rakavato; benamo Paulo na kara ekiraġirito-ġoi guruġari, ġia na ġekira-fitoġarito e ġevei-veġare veġareato. <sup>46</sup> Senaġi Paulo e Banabas tu ma kokoreri ġesi ġevaġa-veserito, ġekirato, “Barau ġena ura lorinai tu ġia ġena guruġa ġai na ġomi baġana kiravara-guinemi. Senaġi ġomi na asi ġoġabi-raġeani, monana tu ġomi tauġemi na ġovaġa-moġoniani, ġomi tu asi ilaila maġuri vanaġivanaġi boġo ġabiani. Moġa lorinai, ġai na ġomi ġaraga-kwanemini, ma irau bese tarimari ġeri ai ġaiaġoni. <sup>47</sup> Korana Vereġauka na tu maiġesi evaġa-naġimato, ekirato, ‘Au na ġomi atoremato tu, irau bese tarimari ġeri mamai boġono iaġo, be vevaġa-maġuri boġono ġabi-roisia tanobarai ġetanuni tarimari mabarari ġeri ai.’”

<sup>48</sup> Irau bese tarimari na mo guruġa ġeseġaġiato nai, ġeikuto e Vereġauka ġena guruġa ġevaġa-raġeato; ema Barau na eġabi-viriġirito maġuri vanaġivanaġi beġe ġabiani tarimari mabarari ġeveġabidadamato. <sup>49</sup> Vereġauka ġena guruġa mo gabu mabarana nuġanai eraga-rovorovoto. <sup>50</sup> Senaġi Iuda tarimari na irau bese vavineri, dagi baregori ġeġabi-taġorito-ġoi ma Barau ġekorana-iaġiato-ġoi vavineri, e vanuġa baregonai veġitaġau tauri, nuġari ġeġanirito. Benamo ġia na vevaġa-midigumidigu ġevaġa-ġoraiato Paulo e Banabas ġeri ai, ema ġeri gabu na ġelai-rosirito. <sup>51</sup> Tauri ruarua na kwakuri kauri ġekwari-ketoketorito, ġia ġeri kira-sirivaġi vaġa-moġoniri ġana, benamo Ikonja ġana ġeiaġoto. <sup>52</sup> Iesu ġekorana-iaġiato-ġoi tarimari Antiokai tu iaku e Iauka Veaġa na ġevonuvonu-raġeto.

### Ikonja ai

**14** Ikonjai Paulo e Banabas tauri ruarua Iuda tarimari ġeri rubu ai ġeveito-ġoi kavana ġeraka-toġato, benamo ġeġobatato. Ġeri ġobata na Iuda e Grik tarimari ġutuma lelevaġi ġeveġabidadamato. <sup>2</sup> Senaġi Iuda tarimari asi ġeurato Iesu beġene vaġa-moġonia, tarima kotari na irau bese tarimari ġelaunaġi-naġirito, benamo tarikaka veġabidadama nuġanai tarimari ġeiaur-rakava vinirito. <sup>3</sup> Paulo e Banabas monai ġetanu-maukato. Ma kokoreri ġesi Vereġauka ġena varevare-bara guruġana ġekiraġiato-ġoi. Vereġauka na ġeri guruġa evaġa-moġonirito tu seġuka evinirito, vetoġa boruri e nuġa-farevaġi veġari ġeveito. <sup>4</sup> Senaġi mo vanuġa baregona tarimari tu ġevevare-kirato, reke-ta Iuda tarimari ġesi ġekauto, reke-ta tu apos-

tolo tarimari ġesi. <sup>5</sup> Benamo irau bese tarimari e Iuda tarimari ma ġeri veguine-iaġi tauri ġesi ġeverori-vegogoto, ġeurato apostolo beġene vaġa-midigu midiguri e fore na beġene ġidara-maseri. <sup>6</sup> Senaġi Paulo e Banabas na mo boioġa ġeribaiato, benamo Likaonia tanonai vanuġa baregori ruarua Listera e Derebe, ema seviri tanori ġana ġegari-iaġoto e seviri vanuġari tari ġari. <sup>7</sup> Monai Vari Namona ġeġobata-iaġiato-ġoi.

### Listera e Derebe ai

<sup>8</sup> Listerai tarima ta etanuto-ġoi; ġia tu kwakuna rakava emaġurito, be asi erakato-ġoi. <sup>9</sup> Mo tarima tu eseġaġi-taġoto-ġoi Paulo eġobatato-ġoi nuġanai. Paulo na eġita-karakaraiato, benamo eribato ġia tu ġena veġabidadama na bevaġa-namoani riba, <sup>10</sup> benamo eguruġa-fararato, ekirato, “Novariġisi, noruġa-tari. Benamo eburi-vaisito, erakato.

<sup>11</sup> Tarimarima ġutuma na kara Paulo na eveiato ġeġitaiato nai, ġeri Likaonia garonai ġekoġoto, ġekirato, “Barau tu tarimarimai beġe iaġo, beġe raka-riġo ġita ġerai!” <sup>12</sup> Ġia na Banabas arana tu Dios ġetato, ema Paulo arana tu Hemes ġetato, korana Paulo tu eguruġa-vovokato-ġoi. <sup>13</sup> Dios ġena Rubu Veaġa verena ġena rubu tu vanuġa barana murikanai. Ġia na boromakau e veravera vanuġa maġuna ġatama bokana ġana eġwa-iaġorito, korana tarimarima ġutuma ġesi ġeurato, apostolo ġeri ai ginitaġo veiġari beġene vei ġana.

<sup>14</sup> Senaġina apostolo ruarua Banabas e Paulo na ġeseġaġirito, kara ġeveia ġetato nai, ġeri dabuġa ġedarerito, benamo ġutuma nuġari ai ġeraga-ġabaġaba-toġato. <sup>15</sup> Ġekirato, “Karase ġomi tau tu maiġesi ġoveini? Ġai maki tarimarima moġo ġomi kavana! Ġai na tu Vari Namona ġomi ġemi ai ġaġabi-iaġomaiani, ġomi ġakiramini, mai asi tauri dagarari boġono raga-kwaneri, benamo Barau maġurina ġenai boġono raka-ġenoġoi ġatoni. Ġia na guba, tanobara, daġaru-bara, e ġetanu-iaġirini dagarari mabarari eveirito. <sup>16</sup> Guinenai ġia na bese mabarari etao-fitoġarito, tauġeri ġeri ura dabarari ai beġene raka ġana. <sup>17</sup> Senaġi dagara namori eveirini ġerina, ġia tauġena vanaġivanaġi evevaġa-moġonini: Ġia na ġura guba na evinimini e varovaro dagarari ġeri ġaro korikoriri ai evinimini. Ġia na ġaniġani asisebo evinimini e nuġami iaku na evaġa-vonurini.” <sup>18</sup> Moġesi ġevaġa-guruġarito, senaġina mo tarimarima ġutumabara tu ġia tauri ruarua ġeri ai ginitaġo ġauveina ġeveia roġo ġetato-ġoi, kiraġoiri tu tauri ruarua ġeri ai tu egwaġiġito.

<sup>19</sup> A Iuda tarimari kotari Antioka e Ikonja na ġeiaġomato, ma moġeri tarimari ġia rekeri ai ġeġabi-vanaġirito. Benamo Paulo fore na ġeġidaraiato ma ġeinurosiato vanuġa murina ġana. Ġia ġetuġamaġito tu varau emaseto. <sup>20</sup> Senaġi Iesu ġekorana-iaġiato-ġoi tarimari na ġeruġa-ġeġeraġiato nai tu eruġa-vaisito, benamo vanuġa barana ġana ma erakatoġa-ġenoġoito. Boġiboġi tu Banabas ġesi Derebe ġana ġeiaġoto.

### Siria Antiokana ġana ġeġenoġoito

<sup>21</sup> Paulo e Banabas na Derebe ai Vari Namona ġeġobata-iaġiato, benamo tarimarima ġutuma Iesu korana-iaġina tarimari ai ġeġabi-toġarito. Benamo ma ġeġenoġoi-iaġoto Listera, e Ikonja, ema Pisidia Antiokana ġana. <sup>22</sup> Ġia na Iesu ġekorana-iaġiato-ġoi tarimari ġevaġa-kokorerito e ġelaunaġirito, ġeri veġabidadama beġene ġabi-gigitariri. Ema ġekirato, “Ġita tu midigumidigu vovoka bita ġabirini vau Barau ġena Basileiai bita raka-toġani.” <sup>23</sup> Tauri ruarua na rubu tatai veġorikau

tarimari ġevaġa-ruġarito. Ma tauri ruarua ġeġani-veaġato e ġeġauġauto murinai, Vereġauka ġimanai ġetore-kaurito. Mo tu ġia na ġeġabidadama-viniato-ġoi Vereġaukana ġenai.

<sup>24</sup> Pisidia tanona na ġeraka-vanaġito murinai tu, Pamfilia tanonai ġeraġasito. <sup>25</sup> Pega vanuġanai Vereġauka ġena guruġa ġeġobata-iaġiato murinai tu, Atalia vanuġana ġana ġeiaġoto. <sup>26</sup> Atalia na tu bouti na ġeġenoġoi-iaġoto Antioka ġana. Monai tu, ġeri evanelia iaġoiġona roġosi roġo beġene sinaia nai, tarikaka na Barau ġena namo e varevare-bara nuġanai ġetore-kaurito, mai ġauvei beġene veia ġana. Gauveina tu toma beġe vaġa-koria.

<sup>27</sup> Antiokai ġeraġasito nai tu, ekalesia tarimari ġevaġa-vegogorito, benamo Barau na ġia ġerina kara eveirito dagarari mabarari, e kamasi ġia na irau bese tarimari ġeri veġabidadama ġatama bokana ekeoato variri, ġeri ekiraġito. <sup>28</sup> Monai Iesu ġekorana-iaġiato-ġoi tarimari ġesi tauri ruarua ġetanu-maukato.

### Ekalesia vegogona baregona Ierusalemaj

**15** Tau kotari Iudea na Antioka ġana ġevariġoto, benamo tarikaka veġabidadama nuġanai tarimari ġevaġa-ribarito, ġekirato, “Ġomi tu vevaġa-maġuri asi ilaila boġo ġabiani riba, bema mero tauġaniri kefi-lamavaġi veiġana Mose ġena taravatu ai ekiraġiani dagarana asi boġo korana-iaġiani nai.” <sup>2</sup> Mo guruġa ġaramanai, Paulo e Banabas ġia ġesi veġare-veġare baregona ġeveiato. Moġa lorinai Paulo e Banabas ema Antioka ekalesia tarimari kotari ġeviriġirito, Ieruselema ġana beġene varaġe, be apostolo e ekalesia ġeġori-kauato-ġoi tarimari ġeri ai mo guruġa beġenea vedanaġi-iaġia.

<sup>3</sup> Ġia tu rubu na ġetuġu-iaġorito. Ma Foenikia e Samaria tanori nuġari na ġeraka-vanaġito nai tu, monai tarikaka ġeri ġekiraġito, kamasi irau bese tarimari Barau ġenai ġevetuġamaġi-kureto. Tarikaka mabarari na mo vari ġeseġaġiato nai, mabarari ġeiku-rakavato. <sup>4</sup> Ierusalemaj ġeraġasito nai, ekalesia tarimari, e apostolo tauri, ema ekalesia ġeġita-taġoato-ġoi tarimari na ġeġabi-raġerito. Benamo Barau na ġia ġerina kara eveito dagarari mabarari ġeri ġekiraġito. <sup>5</sup> Senaġi Farisea doġoro na Iesu ġeġabidadama-viniato-ġoi tarimari kotari ġeruġa-vaisito, benamo ġekirato, “Irau bese tarimari maki tauġaniri kefirri beġene lama-vaġiri, ema boġono kirari, Mose ġena taravatu beġene korana-iaġia.”

<sup>6</sup> Benamo apostolo e ekalesia ġeġita-taġoato-ġoi tarimari ġetanu-vegogoto, ma mo vedanaġi ġetuġa-maġiato. <sup>7</sup> Ġeguruġa-iaġi maukaiato murinai, Petero evariġisito, benamo ekirato, “Tarikakagu mabarami, ġomi ma ribami, kai-veġata ġomi vefakami ai Barau na au eġabi-hidiguto, irau bese tarimari ġeri Vari Namona bana kiraġia, be ġia maki beġene seġaġi e beġene veġabidadama. <sup>8</sup> Ema tarimarima nuġari eribirini Barauna na irau bese tarimari Iauka Veġa evinirito, ġita evinirato kavana. Mo veiġa ġenana evaġa-ġitarani, ġia maki eġabi-raġerito. <sup>9</sup> Ġita e ġia fakarai vaġa-iraura vetoġana ta tu asi eveiato, korana tu ġeri veġabidadama lorinai, Barau na nuġari eiarevarito. <sup>10</sup> Ma toma tu kara dainai Barau ġotovo-naġiani, Iesu ġekorana-iaġiani tarimari iatari ai meto ġotorerini. Mo tu ġita tauġera na e ġita senera na maki mo maruna ġwaġwana asi ġeilailato dagarana. <sup>11</sup> Asiġina! Ġita taribani, ġita tu Iesu Vereġauka ġena namo e varevare-bara lorinai, Barau na evaġa-maġurirani, ġia maki moġesina.”

<sup>12</sup> Petero moĝesi ekirato nai, vegogo tarimari mabarari asi ĝeguruĝato. Benamo Banabas e Paulo ĝeseĝaĝi-vinirito, Barau ĝia ĝerina vetoĝa boruri e nuĝa-farevaĝi veigari, Grik tarimari fakari ai eveirito dagarari, mabarari ĝekiraĝirito.

<sup>13</sup> Ĝia ĝeguruĝa-ĝosito vau, Iakobo (o Iames) eguruĝato, ekirato, “Tarikakagu mabarami, ĝoseĝaĝigu! <sup>14</sup> Simona na inivau bekiraĝi-ginikaua, kamasi tovtovonai Barau na irau bese tarimari etuĝamaĝirito, benamo ĝia fakari na bese ta eĝabi-viriĝiato, ĝia arana beĝene ĝabia ĝana. <sup>15</sup> Mai tu peroveta tarimari ĝeri guruĝa ĝesi beĝe ilaila-ginikau, korana maiĝesi ĝetoreato,

<sup>16</sup> ‘Vereĝauka ekirani:

Maiĝa murinai au ma baĝenoĝoi-iaĝomani,  
benamo Davida ĝena numa,  
eĝwa-kafuato dagarana,  
ma baraga-ĝenoĝoiani.  
Ĝefuki-rovorovoato dagarana,  
au na ma baraga-ĝenoĝoiani,  
ema bavaĝa-ruĝavaisi-ĝenoĝoiani.

<sup>17</sup> Korana tu tarimarima kotari maki mabarari na,  
ema au aragu ĝeĝabi-rakaoani tarimari irau bese tarimari mabarari na,  
au, Vereĝauka, beĝene vetaugu ĝana.

<sup>18</sup> Vereĝauka na maiĝeri dagara mabarari bevaĝa-ĝorarini.

Ma irau laĝani ai veĝata maiĝeri veigari evaĝa-foforirito.’

<sup>19</sup> Moĝa lorinai au atuĝamaĝini, irau bese tarimari ĝevetuĝamaĝi-kureni Barau ĝenai nai tu, ĝeri ai asi bitana vaĝa-gwaĝiĝia. <sup>20</sup> Senaĝi fefa ta bitana torea, bitana kirari, kwaivakuku ĝevarevare-vinirini ĝaniĝaniri tu asi beĝene ĝaniri, korana mo tu ĝofaĝofa barauri ĝevinirini dagarari; mata-boraĝa veigari asi beĝene veiri, ema ĝaiĝori na ĝebito-maserini bureĝari asi beĝene ĝaniri e rara asi beĝene ĝani.

<sup>21</sup> Korana Mose ĝena taravatu tu kai-veĝata vanuĝa baregori mabarari ai ĝeĝobata-iaĝirini ema Sabadi ĝarori mabarari ai Iuda tarimari ĝeri rubu ai ĝeiavirini.”

### Irau bese veĝabidadama tarimari ĝeri fefa

<sup>22</sup> Benamo apostolo e ekalesia ĝeĝori-kauato-ĝoi tarimari ema ekalesia mabarari ĝeurato, ĝia fakari na tau kotari beĝene ĝabi-viriĝiri, benamo Paulo e Banabas ĝesi Antioka ĝana beĝene tuĝu-iaĝori. Ĝia na Iudas, arana ta tu Barasaba ĝetato-ĝoi, e Silas ĝeĝabi-viriĝirito. Ĝia tu tarikaka na ĝegubakau-baregorito-ĝoi tarimari. <sup>23</sup> Mai fefa tu ĝia ĝesi ĝetuĝu-iaĝoato:

“Ĝai ĝomi tarikakami veĝabidadama nuĝanai, apostolo tarimama e ekalesia ĝeĝita-taĝoani tarimama na ĝema vevaĝa-namo ĝatuĝu-iaĝosiani, ĝomi tarikaka veĝabidadama nuĝanai irau bese tarimami, Antioka ai, Siria ai, e Kilikia ai ĝotanuni tarimami mabarami ĝemi ai. <sup>24</sup> Ĝai baĝama seĝaĝi, mainana tau kotari ĝeiaĝosito, benamo ĝeri guruĝa na ĝemi tuĝamaĝi ĝevaĝa-veĝonurito e ĝevaĝa-daradaramito. Korana tu ĝekiramito, tauĝaniami kefiru boĝono lama-vaĝiri ema taravatu boĝono korana-iaĝia. Senaĝi mani tu dia ĝai ĝemana ĝeĝabito guruĝari. <sup>25</sup> Moĝa lorinai, ĝema vegogo ai ĝai mabarama na ĝavaĝa-moĝoniato, tau kotari baĝana ĝabi-hidiri, be baĝana tuĝu-iaĝosiri, ĝema tuĝamaĝikau tarimari Banabas e Paulo ĝesi beĝene iaĝosi. <sup>26</sup> Ĝia tu ĝeri maĝuri gwairi asi ĝeĝabirito, ĝetore-taririto, ĝera Vereĝauka Iesu Keriso arana dainai. <sup>27</sup> Moĝa lorinai, Iudas e Silas baĝa tuĝuri, kara baĝa toreri

dagarari ġia tauġeri mururi na guruġai ġomi ġemi ai beġene vaġa-moġoniri ġana. <sup>28</sup>Iauka Veaġa e ġai ġakirato, namona tu ġomi iatami ai meto ta asi baġana tore-kaua. Senaġina maiġesi veiġari moġo boġono korana-iaġiri: <sup>29</sup>Ġofaġofa barauri o kwaivakuku ġevinirini ġaniġaniri asi boġono ġani; rara asi boġono ġani; ġaiġori na ġebito-maserini bureġari asi boġono ġaniri; e mata-boraġa veiġari asi boġono veiri. Mo dagara ġerina boġo raka-veġitani nai, ġomi tu boġo iaġo-ġinikauni. Boġono gena.”

<sup>30</sup>Geviriġirito tarimari ġetuġurito, benamo Antioka ġana ġevariġoto. Monai veġabidadama tarimari mabarari ġevaġa-veġogorito vau, ġeri fefa ġevinirito. <sup>31</sup>Ġia na mo fefa ġeiviatu nai, ġeikaku-rakavato, korana vevaġa-kava guruġana ġeseġaġi-ato nai. <sup>32</sup>Iudas e Silas, ġia tauġeri tu peroveta tarimari. Ġia tauri ruarua na tarikaka ġeri guruġa ġutuma ġekiraġirito, ġelaunaġirito e ġevaġa-gwaġiġirito. <sup>33</sup>Ġaro kotari monai ġetanuto murinai, ma mainori ġesi tarikaka na ġetuġu-ġenoġoirito, ġetuġurito tarimari ġeri ai. [<sup>34</sup>Senaġi Silas tu eurato Antiokai roġo bene tanu.] <sup>35</sup>Paulo e Banabas tu Antiokai ġetanu-maukato, ma tarima ġutuma ġesi Vereġauka ġena guruġa ġevevaġa-riba iaġiato-ġoi, e ġeġobata-iaġiato-ġoi.

### Paulo e Banabas ġeveraġa-kwaneto

<sup>36</sup>Ġaro kotari ġevanaġito murinai, Paulo na Banabas evaġa-guruġaiato, ekirato, “Taura ruarua ma siġenoġoi-iaġo, Vereġauka ġena guruġa taġobata-iaġiato-ġoi vanuġari mabarari ġari, tarikakara bitana ġitari, ġeri veġabidadama maġurina tu aiġesina.” <sup>37</sup>Banabas ġena ura tu Ioane Mareko maki neġori-kaua, be ġia ġesi beġene iaġo. <sup>38</sup>Senaġi Paulo asi ġena ura ġia beġene ġori-kaua, korana ġia na Pamfilia ai tu eraga-kwanerito, ema ġia ġesi asi ġeġauveito mo ġeri ġauvei magona. <sup>39</sup>Moġa ġaramanai ġia tauri ruarua veġareveġare baregona ġeveiato. Benamo tauri ruarua ġeveraġa-kwaneto. Banabas na Mareko eġoriatu, bouti ai ġeraġeto, benamo Saipras ġana ġeiaġoto. <sup>40</sup>A Paulo na tu Silas eġabi-viriġiato. Tarikaka na Vereġauka ġena varevare-bara vevaġa-namona ġevinirito murinai ġerakato. <sup>41</sup>Siria e Kilikia tanori na ġeraka-vanaġito, benamo ekalesia doġorori monai ġevaġa-gwaġiġirito-ġoi.

### Timoteo tu Paulo e Silas ġesi ġeiaġoto

**16** Paulo monana evanaġi-iaġoto Derebe ai ea votuto, ma monana tu eiaġoto Listera ai ea raġasito. Listera tu Iesu ekorana-iaġiato-ġoi tarimana ta etanuto-ġoi, arana tu Timoteo. Timoteo sinana tu Iuda vavinena, ġia maki eveġabidadamato-ġoi vavinena, senaġi tamana tu Grik tarimana. <sup>2</sup>Tarikaka mabarari Listera e Ikonai na Timoteo tu tarima namonai ġekiraġiato-ġoi. <sup>3</sup>Paulo eurato Timoteo tu bene ġori-kaua, be ġia ġesi beġene iaġo, moġa lorinai, ġia tauġanina kefina elama-vaġiato. Moġesi ġeveiato, korana monai ġetanuto-ġoi Iuda tarimari mabarari ribari, Timoteo tamana tu Grik tarimana.

<sup>4</sup>Vanuġa loriri na ġevanaġi-iaġoto-ġoi nai tu, Ierusalem ai ġetanuni apostolori e ekalesia ġorikauri tarimari na ġevaġa-moġonirito guruġari veġabidadama tarimari ġeri ġekiraġito-ġoi, ġia na beġene korana-iaġiri ġana. <sup>5</sup>Benamo ekalesia tarimari ġeri veġabidadama ġevaġa-kokorerito, e ġaro mabarari ai ekalesia ġeġutumato-ġoi.

### Troas ai - Paulo ġena mata-vanaġi

<sup>6</sup> Paulo ma karona ġesi Frigia e Galatia tanori nuġari na ġeraka-vanaġito moġo, korana Iauka Veaġa na ekira-ġoirito, Asia tanori ai Barau ġena guruġa asi beġene vari-fiua. <sup>7</sup> Misia tano vetoġanai ġeraġasito, benamo Bitinia tanonai ġeraka-toġa ġe-tato, senaġi Iesu Iaukana asi eurato ġia mo ġana beġene iaġo. <sup>8</sup> Moġa lorinai Misia na ġevanaġito, Troas vanuġanai ġea votuto. <sup>9</sup> Mo boġi Paulo emata-vanaġito. Ġia na Makedonia tarimana ta ruġataġo eġitaiato, ġia enoġiato-ġoi, ekirato, “Makedonia ġana noiaġoma, noma vaġa-kavama.” <sup>10</sup> Paulo na mo mata-vanaġi eġitaiato murinai, ġaraga-ġabikavito, Makedonia ġana baġana iaġo ġana. Korana ġaribato, mo tu Barau na ekeamato, mo tarimarima ġeri ai Vari Namona baġana fiua ġana.

### Filipi ai - Lidia ġena vetuġamaġi-kure

<sup>11</sup> Moġa lorinai Troas ai bouti ai ġaraġeto, benamo maoromaoro Samotrake motu-motu ġana ġaiaġoto. Monai ġagenato, elaġanito vau Neapoli ġana ġaiaġoto. <sup>12</sup> Monana gunika ġana ġaiaġoto mo, Filipi ai ġaraġasito. Filipi tu Makedonia tanonai vanuġa baregona eruġa-guineto vanuġana, e Roma ġeri gabu. Monai ġaro kotari ġatanuto. <sup>13</sup> Sabadi ai, vanuġa maġuna ġatama bokana na ġaraka-rosito, ġaruka rekena ġana ġaiaġoto, ġai ġatuġamaġito, Iuda tarimari ġeri ġauġau gabuna ta tu monai. Ġai ġatanu-tarito, benamo mo ġaruka rikinai ġevegogoto vavineri ġavaġa-guruġarito. <sup>14</sup> Monai eseġaġimato-ġoi vavinena ta arana Lidia, Taiatira vavinena. Ġia tu voiri barego dabuġari evoivoi-iaġirito-ġoi. Ġia tu Barau etoma-rakariġo viniato-ġoi vavinena. Ġia Vereġauka na nuġana ekeoato, benamo Paulo na kara ekiraġiato-ġoi eseġaġiato ma eġabi-raġeato. <sup>15</sup> Ġia ma ġena numa tarimari ġesi batabiso ġeġabiato murinai, ġia na enoġimato, ekirato, “Bema ġovetuġamaġini au tu Vereġauka ġenai moġoni aveġabidadamani nai tu, si-iaġo, be au ġegu numai bitana tanu.” Benamo ġia na nuġama eġanirito, benamo ġia ġesi ġaiaġoto.

### Filipi dibura numanai

<sup>16</sup> Ġaro ta ġauġau gabuna ġana ġaiaġoto-ġoi nuġanai, vetuġunaġi ġuiatona ta na edoġarimato. Ġia tu iauka rakavana ta na eboroġiato, ma ġoirai kara beġe ġorani dagarari ekiraġi-foforirito-ġoi. Ġoirai beġe ġorani dagarari ekiraġi-foforirito-ġoi nai tu, ġitaġauna tarimari ġeri moni ġutumma evaġa-ġorarito-ġoi. <sup>17</sup> Mo ġuiato na Paulo e ġai mabarama murima na eiaġomato, ekoġoto-ġoi, maiġesi ekirato-ġoi, “Maiġeri tarima tu Iaru-korokoro Barauna ġena vetuġunaġi tarimari! Vevaġa-maġuri kamasi boġo ġabiani dabarana varina ġefiuani.” <sup>18</sup> Ġaro vovoka moġesi eveito-ġoi, eiaġoto mo, Paulo ebaruto, benamo eruġa-kureto, mo iauka rakavana ekiraiato, ekirato, “Iesu Keriso aranai au na akiramuni, mani kekeni ġenana noraka-vaġi!” Benamo mo horai moġo iauka rakavana mo ġuiato ġenana eraka-vaġito.

<sup>19</sup> Mo ġuiato ġitaġauna tarimari ġeribato, ġia ġeri moni doġari dabarana ekorito, benamo ġia na Paulo e Silas ġeġabi-taririto, taravatu tauri ġeri ai maketi gabuna ġana ġeinu-iaġorito. <sup>20</sup> Kota ġeseġaġini tarimari ġoirari ai ġevaġa-ruġarito vau ġekirato, “Mai tu Iuda tarimari. Ġia na ġita ġera vanuġa baregonai rakava ġevaġa-ġoraiani. <sup>21</sup> Ema ġia na ġevevaġa-riba iaġirini veiġari ġita ġera taravatu na tu asi eġabi-raġerini. Ġita tu Roma tarimara, ġia ġeri veiġa tu asi bita ġabi-raġerini e asi bita veirini riba.”



<sup>22</sup> Tarimarima ġutuma-bara ġia ġesi ġekauto, Paulo e Silas ġeguru-vinirito. Benamo Kota ġeseġaġini tarimari na Paulo e Silas ġeri dabuġa ġedarerito, benamo mo ġutuma-bara ġekirarito, beġene kwariri. <sup>23</sup> Ġekwari-biruġa biruġarito murinai, dibura numai ġefiu-toġarito, ema dibura numa ġitaġauna tarimana ġekiraiato, bene ġitaġau-ginikauri. <sup>24</sup> Ġia na mo vevaġa-naġi guruġana eseġaġiato, benamo dibura numana nuġana buroburonai efiu-toġarito. Kwakuri tu ġau duduri baregori ma metori vekaravari ai ebaru-taririto.

<sup>25</sup> Boġi nuġanai Paulo e Silas tu ġeġuriġurito-ġoi e Barau vaġa-raġena mariri ġeġabirito-ġoi, ma dibura numa tarimari kotari na tu ġeseġaġi-taġorito-ġoi. <sup>26</sup> Asikauna tano-iaga baregona eraġasito, dibura numana korana duġuri maki eġareva-ġareva vinubato. Vaġa-sebo ġatama-boka mabarari ġevekeoto, e dibura tarimari ġebarurito seiniri mabarari ġeketoketo-vaġito. <sup>27</sup> Dibura numana ġitaġauna tarimana etataġato, mo ġatama-boka mabarari eġitarito tu vekeo. Ġena tuġamaġi dibura tarimari mabarari tu ġeraga-lemato etato, benamo ġena vetari baġana einu-vaġiato, ma tauġena nevevaġi-mase etato. <sup>28</sup> Senaġi Paulo na eġaba-viniato, ekirato, “Tauġemu asi novevaġa-rakava! Ġai mabarama tu maiġema!” <sup>29</sup> Dibura numa ġitaġauna tarimana kere keari eveito, eraga-toġato, benamo ma ġoġo-ġoġona ġesi Paulo e Silas kwakuri korari ai ea keto-tarito. <sup>30</sup> Benamo monana eġori-rosirito ma edanaġirito, ekirato, “Vere tarimami, au tu kamasi baveini vau maġuri badoġariani?”

<sup>31</sup> Ġia na ġevaġa-veaseato, ġekirato, “Iesu Vereġauka bono ġabidadama-vinia, benamo maġuri boġabiani, ġoi e ġemu numa tarimari mabarari.” <sup>32</sup> Benamo ġia na Vereġauka ġena guruġa, ġia ma ġena numa tarimari mabarari ġesi, ġeri ġekiraġito. <sup>33</sup> Mo boġi horanai moġo, dibura numa ġitaġauna tarimana na tauri ruarua eġori-iaġorito, manuġari ea ġuriġirito, ema ġia ma ġena numa tarimari mabarari ġesi mo boġi sebonai ġebabatisorito. <sup>34</sup> Moġa murinai ġia na Paulo e Silas ġena numa nuġanai eġori-toġarito, benamo ġaniġani evinirito, ġeġanito. Ma ġia ma ġena numa tarimari ġesi tu iaku na ġevonuto, korana ġia toma tu Barau ġenai ġeveġabidadamani.

<sup>35</sup> Bogiboġi, Kota ġeseġaġini tarimari na vetuġunaġi-iaġovini tarimari ġetuġurito, ġekirato, “Mani dibura numai tarimari ruarua ġoa tuġu-vaġiri.” <sup>36</sup> Benamo dibura numa ġitaġauna tauna na Paulo ekira-varaiato, ekirato, “Kota ġeseġaġini tarimari na guruġa beġe tuġua, ġoi e Silas tu baġana tuġu-rosimi beġesi. Moġa lorinai ġorakarsi ma mainomi ġesi.” <sup>37</sup> Senaġi Paulo na vetuġunaġi-iaġovini tarimari ekirarito, ekirato, “Ġai tu Roma tarimama, senaġi ġia na tarimarima ġutuma-bara ġoirari ai ġai ġekwari-kavamato moġo, a ġema rakava tu asi ġevetauato, senaġi dibura numai ġefiu-toġamato. Ma initoma tu vekuretoġai ma ġetuġu-rosima ġetoni? Asiġina ġinavaġi! Ġia tauġeri maiġana beġene iaġoma, benamo ġai beġenema ġori-rosima.”

<sup>38</sup> Benamo vetuġunaġi-iaġovini tarimari na mo guruġa Kota ġeseġaġini tarimari ġekira-vararito. Ġia ġeseġaġito Paulo e Silas tu Roma tarimari ai ġeiaġoto nai tu ġegarito. <sup>39</sup> Benamo ġeiaġoto, Paulo e Silas ġenoġirito, ġeri rakava beġene tuġamaġi-fittoġari. Benamo ġia tauri ruarua dibura numa na ġetuġu-rosirito, e ġenoġirito, mo vanuġa barana beġene raga-kwanea. <sup>40</sup> Paulo e Silas na dibura numana ġeragakwaneato, Lidia ġena numa ġana ġeiaġoto. Monai tarikaka ġesi ġevedoġarito, benamo vevaġa-gwaġiġi guruġari na ġevaġa-kokorerito, benamo ġerakato.

### Tesalonika ai

**17** Paulo e Silas na Amfipoli e Apolonia ġeraka-vanaġiato, ġeiaġoto mo Tesalonikai ġeraġasito. Iuda tarimari ġeri rubu ta tu monai. <sup>2</sup> Paulo tu eveito-ġoi kavana rubu ai eraka-toġato. Ema Sabadi ġarori toitoi nuġari ai, ġia tu tarimarima ġesi Buka Veaġa guruġari ġeguruġa-guruġa-iaġirito. <sup>3</sup> Ġia ġeri ekiraġi-ginikauto-ġoi, e evaġa-moġoniato-ġoi, Keriso tu bemidigu-midiguni e mase na ma bevariġisi-ġenoġoini. Ema ekirato, “Mai Iesu, varina ġomi ġemi afiunari tarimana, tu Keriso, (Barau na ekiraġi-toreato vevaġa-maġuri tauna).” <sup>4</sup> Iuda tarimari kotari na mo guruġa ġevaġa-moġoniato, benamo Paulo e Silas ġesi ġesebonato. Ema Barau ġetomarakariġo viniato-ġoi Grik tarimari ġutuma lelevaġi e vanuġai ġeri dagi barego vavineri ġutuma maki ġia ġesi ġesebonato.

<sup>5</sup> Senaġi Iuda tarimari tu ġemamato, benamo voivoi gabunai seġafore lelevaġi tarimari kotari ġeġabi-vegogorito, seġafore doġorona ta ġesinaiato. Benamo ġia na gururaġe e vevaġi baregona vanuġa barana nuġanai ġeveiato. Ma Iason ġena numa ġeraġeato, Paulo e Silas beġene doġariri, be tarimarima ġoirari ai beġene ġorirosiri ġana. <sup>6</sup> Senaġi asi ġedoġaririto, benamo Iason e tarikaka kotari ġeinu-iaġorito, vanuġa ġitaġauna tauri ġoirari ġana, ma koġori ġesi ġekirato, “Tanobara mabarari ai mai tarima na rakava ġevaġa-ġoraiani, ma toma tu mai ġana beġe iaġoma, <sup>7</sup> benamo Iason na ġena numai eġita-ġaurini. Ġia na Kaisara ġena taravatu ġekiraġi-fitoġaiani, korana tu ġekirani, vere barana ta ma ġetoni. Ġekirani, mo vere arana tu Iesu.” <sup>8</sup> Vanuġa tarimari e ġitataġona tarimari na mo guruġa ġeseġaġiato nai, ġeri daradara ebaregato. <sup>9</sup> Benamo ġia na Iason ma karona ġesi ġevaġa-fainirito moġo, benamo ġetuġu-rakarito.

### Berea ai

<sup>10</sup> Eboġito nai tu asikauna tarikaka na Paulo e Silas Berea ġana ġeraga-tuġu-rakarito. Bereai ġea raġasito nai tu ġeiaġoto, Iuda tarimari ġeri rubu ġana. <sup>11</sup> Bereai tarimarima tu tarima namori, dia Tesalonika tarimari kavari. Ġia na Barau ġena guruġa ġeseġaġiato-ġoi nai, ġeura-iaġi baregoato-ġoi. Ema ġaro mabarari ai Buka Veaġa nuġanai kara Paulo na ekiraġiato-ġoi ġevetauato-ġoi. Korana tu ġeurato-ġoi beġene riba, Paulo na kara ekiraġiato-ġoi guruġari tu moġoni ba, beġene vaġa-moġoniri ġana. <sup>12</sup> Iuda tarimari ġutuma Iesu Keriso ġevaġa-moġoniato; ema Grik vavineri barego-baregori kotari na e Grik tauri ġutuma maki Iesu Keriso ġevaġa-moġoniato.

<sup>13</sup> Senaġi Iuda tarimari Tesalonikai ġeseġaġito, Paulo tu Bereai Barau ġena guruġa eġobata-iaġiato-ġoi. Benamo ġeiaġoto, vanuġa tarimari nuġari ġea ġanirito e ġekiravaisi vaisirito. <sup>14</sup> Benamo Paulo tu asikauna tarikaka na kone ġana ġetuġu-rakaiato; a Silas ema Timoteo tu Bereai ġetanuto. <sup>15</sup> Paulo ġekava-iaġoato tauri na ġeġori-iaġoato mo Atena. Monana ma ġeġenoġoito Berea ġana. Ġia ġeġenoġoito nai tu, Paulo ġena keakau guruġana ta maki ġeġwaiato, ekirato, Silas e Timoteo ġia ġenai beġene iaġo-ġarimoġi etato.

### Atena ai

<sup>16</sup> Atenai, Paulo na Silas e Timoteo evaġa-nogarito-ġoi nuġanai, mo vanuġa baregona eġitaiato tu kwaivakuku na ġevaġa-vonuato. Benamo ġia nuġana emeto-

rakavato. <sup>17</sup> Moġa lorinai eiaġoto Iuda tarimari ġeri rubu ġana, Iuda tarimari e irau bese tarimari Barau ġetoma-rakariġo viniato-ġoi tarimari ġesi ġeguruġa-guruġato. Ema ġaro mabarari ai maketi ai ġeraka-refoto-ġoi tarimari evaġa-guruġarito-ġoi. <sup>18</sup> Vevaġa-riba tauri irauri, ġeri orea ġekiraġirito-ġoi tu Epikurea ema Stoiki, na Paulo ġeġoitaġoato, benamo ġevaġa-veġare veġareato. Ġia kotari ġevedanaġito, ġekirato, “Mai muru-babo tu kara ekiraġiani?” Ma kotari ġevaġa-veseto, ġekirato, “Ġia mai tu noġa moġo barau irauri ekiraġirini.” Ġia moġesi ġekirato, korana Paulo tu Iesu e ġena variġisi-ġenoġoi varina eġobata-iaġiato-ġoi. <sup>19</sup> Benamo ġia na Paulo ġeġabiato, Areopago ġorona ġana ġeġori-iaġoato, kanisoro ġevegogoto-ġoi gabuna ġana. Benamo monai ġekiraiato, ġekirato, “Ġai ġaurani tu ġariba, mai vevaġa-riba variġuna oveiani tu kara okiraġiani? <sup>20</sup> Ġoi na guruġa tari okiraġirini tu ġai na asi ġaseġaġirini dagarari, naima ġai ġaurani tu aniri baġana ribari.” <sup>21</sup> Korana Atena tarimari mabarari e irau gabu tarimari monai ġetanuni tu, ġauvei ta asi ġeveiato-ġoi, senaġi ġia ġeri veiġa sebona tu ġaro mabarari ai mo guruġa variġuri moġo ġekiraġi-taġorito-ġoi e ġeseġaġi-taġorito-ġoi.

<sup>22</sup> Benamo Paulo tu Areopago vegogona nuġana na eruġa-vaisito, benamo eki-rato, “Atena tarimami! Au na ġomi aġitamini, ġomi tu ġemi barau ġeri ai ġovetuġamaġikau-barego korikorini. <sup>23</sup> Korana ġemi vanuġai arakaorakaoni e ġemi toma-rakariġo gaburi aġitarito nai tu, au na fata veaġana ta aġitaiato, iatanai tu mai guruġa ġetoreato, ‘ASI RIBAMA BARAUNA ĠENA.’ Moġa lorinai mo asi ribami Barauna, ġomi na ġotoma-rakariġo viniani tu, toma au na akira-varamini.

<sup>24</sup> Tanobara e tanobara nuġanai ġetanuni dagarari mabarari eveirito Barauna tu guba e tanobara verena. Ġia tu tarimarima ġimari na ġeragarito rubu veaġari ai tu asi etanuni. <sup>25</sup> Ġia tu dagara tai asi erabuto, be tarimarima ġimari na ġia ġena tu asi beġe veiani riba. Ġia tauġena na tarimarima mabarari maġuri evinirini, iaġari ema da-gara mabarari evinirini. <sup>26</sup> Tarima sebona ġenana ġia na tarimarima beseri mabarari evaġa-ġorarito, ema tanobara mabarana beġene tanu-iaġia etato. Ġia tauġena na ġeri maġuri laġaniri ema ġeri tanu gaburi korikori eboioġa-guinerito. <sup>27</sup> Barau na moġesi eveiato, korana ġia beġene ġita-vetaua ġana; ema beġene vetau-kokore kokore, benamo beġene doġaria. Oba, Barau e ġita tata vefakara tu asi manaġa. <sup>28</sup> ‘Korana ġita tu, ġia koranai tamaġurini, taġareva-ġarevani e roġo tamaġuri-taġoni.’ Ġemi mari ġegarani e ġesisiba-iaġirini tauri na ġekiraġiato kavana, ġekirato, ‘Ġita maki ġia natuna.’

<sup>29</sup> Ġita tu Barau natuna lorinai, asi bitana tuġamaġi, Barau tu golo, silva, o fore, tarimarima ġena boioġai ema ribai ekororito dagarari kavana. <sup>30</sup> Guinenai tarimarima tu asi ġeri ribamaoro nai, Barau na moġeri tu eġita-ragakwanerito. Senaġi toma tu, ġia na tarimarima mabarari gabu mabarari ai ekirarin, beġene vetuġamaġi-kure. <sup>31</sup> Korana ġia na ġaro ta ekiraġi-toreato, mo ġaro ai ġena ġabiviriġi tari-mana na tanobarai vevaġa-maoro beveiani ma iobukaiobukana ġesi. Barau na mo tau evaġa-moġoniato tarimarima mabarari ġoirari ai, vetoġana tu mase na evaġa-variġisi ġenoġoiato.”

<sup>32</sup> Mase na variġisi-ġenoġoina guruġana ġeseġaġito nai, kotari na tu Paulo ġerikiriki-iaġiato. Ma kotari tu ġekirato, “Ġai ġaurani tu, mo vari ġema ma nokiraġi-ġenoġoia.” <sup>33</sup> Benamo Paulo na mo vegogo eraga-kwaneato. <sup>34</sup> Senaġi tau lakouna tu ġia ġesi ġerakakauto e Barau ġenai ġeveġabidadamato. Ġia fakari ai tu Dionisio,

ġia tu Areopago ġoro ai ġevevogoto-ġoi tarimana ta, e vavine ta arana Damari, ema tarima kotari maki.

### Korinto ai

**18** Moġa murinai Paulo na Atena eraga-kwaneato, Korinto ġana eiaġoto. <sup>2</sup> Monai ġia na Iuda tarimana arana Akwila eġoitaġoato. Akwila tu Ponto ai emaġurito. Ġia tu ġaraġona Priskila ġesi Itali na vau ġeraġasito. Ġia Itali na ġeiaġomato, korana tu Klaudio na Iuda tarimari mabarari ekirarito, Roma beġene raga-kwanea. Paulo eiaġoto ġia ġeri ai, ea ġitarito. <sup>3</sup> Ġia maki Akwila ma ġaraġona ġesi kavana farai numari eturito-ġoi. Moġa lorinai Paulo monai tu ġia tauri ruarua ġesi etanuto-ġoi ema ġeġauvei-vegogoto-ġoi. <sup>4</sup> Sabadi mabarari ai tu Iuda tarimari ġeri rubu ai eġobatato-ġoi, Iuda e Grik tarimari nuġari neġabiri uranai.

### Silas e Timoteo ġeraġasito

<sup>5</sup> Silas e Timoteo Makedonia na ġeraġasito nai, Paulo tu Barau ġena guruġa eġobata-iaġiato-ġoi ġaro mabaranai, Iuda tarimari ġeri ai ekiraġi-foforiato-ġoi, Iesu tu moġoni Keriso, (Barau na ekiraġi-toreato vevaġa-maġuri tauna). <sup>6</sup> Senaġi Iuda tarimari na Paulo ġena guruġa ġevaġa-ġenoġoiato, e guruġa asi namori ġenai ġekiraveġare veġareato nai, Paulo na ġena dabuġa ekorakoraiato ġia ġoirari ai vauro evaġa-guruġa gwaġiġi-vinirito, ekirato, “Ġomi rarami verebana tu tauġemi iatami ai! Au ġegu ai vereba ta asiġina. Toma au tu aiaġoni irau bese tarimari ġeri ai.”

<sup>7</sup> Benamo mo rubu na eraka-rosito, eiaġoto, irau bese tarimana arana Titio Iusto ġena numa ġana. Titio tu Barau etoma-rakarigo viniato-ġoi tarimana, ma ġena numa tu rubu sebinai moġo. <sup>8</sup> Krispo, rubu ġorikauna tarimana e ġena numa tarimari mabarari ġesi tu Vereġauka ġeġabadadama-viniato-ġoi. Ema Korinto tarimari ġutuma na maki vari ġeseġaġiato, benamo ġevaġa-moġoniato ema babatiso ġeġabito.

<sup>9</sup> Boġi tai Vereġauka na Paulo mata-vanaġi ai evaġa-guruġaiato, ekirato, “Asi bono gari, murumu asi bene kafu, bono guruġa! <sup>10</sup> Korana au tu ġoi ġesi bene; ta na asi beiaġo-vinimuni e asi bevaġa-rakavamuni riba, korana au ġegu tarimarima tu ġutuma mai vanuġa baregonai.” <sup>11</sup> Moġa lorinai Paulo monai etanuto laġani ta e ġue imaima sebna (6); Barau ġena guruġa tarimarima evaġa-riba iaġirito-ġoi.

<sup>12</sup> Galio tu Akaia tanona ġeri gavana ġauveina eveito-ġoi nuġanai, Iuda tarimari ġeġaru-vegogoto, Paulo ġeġabi-tariato, Kota gabuna ġana ġeġori-iaġoato. <sup>13</sup> Ġekirato, “Mai tarima na tarimarima nuġari eġanirini, ma taravatu na asi ekiraġiani maġurinai Barau beġene toma-rakarigo vinia etoni.” <sup>14</sup> Paulo neguruġa etato nuġanai, Galio na Iuda tarimari ekirarito, ekirato, “Ġomi Iuda tarimami, bema veiġa rakavana tai o kerere baregona tai boġoro samani nai tu, bara seġaġi-vinimi riba. <sup>15</sup> Senaġi mani veġareveġare tu vevaġa-riba, e ara, ema tauġemi ġemi taravatu veġareveġareri, naima tauġemi na boġono vei-roroġotori. Au na maniġesina daġarari Kotai tu asi baseġaġirini!” <sup>16</sup> Benamo ġia na Kota gabuna na elai-rosirito. <sup>17</sup> Ġia mabarari na rubu ġorikauna tarimana, Sostene, ġeġabi-tariato, Kota gabuna ġoiranai benamo ġekwari-korukoruato. Ma Galio tu eġitarito senaġi eboġe-ġuiraiġito moġo.

### Paulo Antioka ġana eġenoġoito

<sup>18</sup> Paulo Korinto ai tarikaka veġabidadama nuġanai tarimari ġesi tu ġaro kota vovoka roġo ma ġetanuto. Moġa murinai eraga-kwanerito, benamo Priskila e Akwila ġesi bouti ta Siria ġana ġeiaġoto. Kenkrea na roġosi beġere raka nuġanai, ġia tu debana ġeraroato, korana ġena kiraġitore gwaġiġina ta Barau ġenai eveiato nai. <sup>19</sup> Efeso ai ġeraġasito, benamo Paulo na Priskila e Akwila monai eraga-kwanerito. Ġia tu Iuda tarimari ġeri rubu ai eraka-toġato benamo Iuda tarimari ġesi ġea guruġa-guruġato. <sup>20</sup> Ġia na ġenoġiato, monai Iuda tarimari ġesi roġo bene tanu, senaġi ġeri noġinoġi asi eġabi-raġeato. <sup>21</sup> Senaġi ġena rakai tu iniġesi evaġa-guruġarito, ekirato, “Bema Barau beurani nai, ġomi ġemi ai ma baġenoġoi-iaġomani.” Benamo bouti ai ea raġekauto, ma Efeso eraga-kwaneato.

<sup>22</sup> Kaisareai eraġasito nai, kwakuna na Ierusalemna ġana evaraġeto, ekalesia ġesi ġea veġoitaġoto vauro, Antioka ġana evariġo-iaġoto. <sup>23</sup> Ġaro kotari monai etanuto murinai, Galatia e Frigia tanori ġana eiaġoto, Iesu ġekorana-iaġiato-ġoi tarimari mabarari gabu tatai ġetanuto-ġoi tarimari ea vaġa-kokorerito.

<sup>24</sup> Mo horai Iuda tarimana ta arana Apolos, Alesandria ai emaġurito tarimana, Efeso ġana eiaġoto. Ġia ġena riba tu varaġe lelevaġi, guruġai namo vedaurea e Buka Veaġa maki eriba-ginikau-raġeato. <sup>25</sup> Ġia tu Vereġauka ġena dabara ġevaġa-ribaiato, benamo nuġana mabarana ġesi Iesu varina efiuato, e evaġa-riba-iaġi ginikauato. Dagara sebona, ġia tu Ioane ġena babatiso moġo eribaiato. <sup>26</sup> Rubu nuġanai eġobatato-ġoi ma kokorena ġesi. Monai Priskila e Akwila na ġeseġaġiato, benamo ġeġori-kauato, ġia ġetanuni numana ġana ġeġori-iaġoato, monai vauro Barau ġena dabara moġonina ġevaġa-riba ginikauato. <sup>27</sup> Benamo Apolos eurato, Akaia ġana bene iaġo. Moġa lorinai tarikaka Efeso ai ġetanuni na ġevaġa-kavaiato, e fefa ta ġetoreato Akaiai Iesu ġekorana-iaġiato-ġoi tarimari ġeri, ġenoġirito, Apolos eiaġoni nai beġene ġabi-raġea. Apolos ea raġasito nai tu, Barau ġena varevare-bara ġenana Barau ġevaġa-moġoniato tarimari tu vevaġa-kava barego Apolos ġenana ġedoġariato. <sup>28</sup> Korana ġena guruġa kokoreri ġerina Iuda tarimari evaġa-ketorito tarimarima ġutuma ġoirari ai, Apolos na Buka Veaġa na ġeri evaġa-moġoniato-ġoi Iesu tu Keriso, (Barau na ekiraġi-toreato vevaġa-maġuri tauna).

### Paulo Efeso ai

**19** Apolos tu Korinto ai etanuto-ġoi nai, Paulo gunika rekena na eiaġoto mo Efeso ai ea raġasito. Monai Iesu ġekorana-iaġiato-ġoi tarimari tari edoġaririto, <sup>2</sup> benamo edanaġirito, ekirato, “Iesu ġenai ġoveġabidadamato nai, Iauka Veaġa ġoġabiato ba?” Ġia ġevaġa-veseto, ġekirato, “Asiġina, ġai tu Iauka Veaġa maki etanuni guruġana ta tu roġosi maki baġana seġaġia.” <sup>3</sup> Benamo Paulo na ma edanaġirito, ekirato, “Be ġomi na tu kamara babatiso ġoġabiato?” Ġia ġevaġa-veseto, ġekirato, “Ioane ġena babatiso.”

<sup>4</sup> Benamo Paulo ekirato, “Ioane tu rakava ġerina ġevetuġamaġi-kureto tarimari ebatisorito, ema Isaraela tarimari ekirarito, ġia murina na beiaġomani tarimana beġene ġabidadama-vinia, mo tu Iesu.” <sup>5</sup> Mo guruġa ġeseġaiato nai, Vereġauka Iesu aranai babatiso ġeġabiato. <sup>6</sup> Paulo ġimana ġia iatari ai etore-kaurito nai tu, Iauka Veaġa emariġoto ġia iatari ai. Benamo garo irauirau ai ġeguruġato, e Barau na ġia

geri ai evaġa-foforirito guruġari ġevari-fiurito. <sup>7</sup> Tauri mabarari tu gabanana ruarua (12) kavana.

<sup>8</sup> Paulo monai ġue toitoi etanuto. Ma vanaġivanaġi rubu ai eraka-toġato-ġoi, Barau ġena Basileia, (ġena veġitaġau seġukana evaġa-ruġaiiani maiġa), eġobata-iaġiato-ġoi ma kokorena ġesi, ema tarimarima ġesi ġeguruġa-iaġiato-ġoi e nuġari eġanirito-ġoi. <sup>9</sup> Senaġi tari nuġari tu bubu, be asi ġeseġaġi-viniato, ema tarimarima ġutuma ġoirari ai Vereġauka ġena dabara iatanai guruġa tu rakavari ġekiraġito. Moġa lorinai Paulo na eraga-kwanerito, Iesu ġekorana-iaġiato-ġoi tarimari moġo eġori-kaurito, benamo ġaro mabarari ai Tirano ġena vevaġa-riba numanai evaġa-ribarito-ġoi. <sup>10</sup> Laġani ruarua moġesina eveito, moġesina naima Asia tanonai ġetanuto-ġoi Iuda tarimari e Grik tarimari mabarari na Barau ġena guruġa ġeseġaġiato.

### Skeva natuna

<sup>11</sup> Barau na Paulo ġenana veġa boruri irauri eveirito. <sup>12</sup> Ġia na eġauvei-iaġirito-ġoi mukori e eriġorito-ġoi dabuġari keve tarimari ġeri ai ġeġabi-iaġorito-ġoi nai tu, ġeri keve ġenamoto-ġoi, e iauka rakavari ġia ġerina ġeraka-vaġito-ġoi.

<sup>13</sup> Iuda tarimari kotari monai ġerakaoto-ġoi ma iauka rakavari ġelai-vaġirito-ġoi tauri na maki Vereġauka Iesu arana ġevatoato iauka rakavari na ġeboroġirito tarimari iatari ai. Iauka rakavari ġekirarito, ġekirato-ġoi, “Paulo na eġobata-iaġiani tarimana Iesu aranai akiramini, ġoraka-vaġi.” <sup>14</sup> Skeva, Iuda ġeri Rubu Veaġa verena baregona ta, natuna merori imaima ruarua (7) tu moġesina ġeveito-ġoi. <sup>15</sup> Benamo ġaro ta iauka rakavana na ekirarito, ekirato, “Iesu tu au ribagu, ema Paulo maki ma ribagu, a ġomi tu deikara?” <sup>16</sup> Benamo iauka rakavana na eboroġiato tarimana na tauri imaima ruarua (7) na eguru-vinirito, ebota-korukorurito. Evaġa-vevaġi rakavarito, be mo numa na ġema raga-rosito tu kefiru kori e ma rarari.

<sup>17</sup> Efeso ai ġetanuto-ġoi tarimari, Iuda e Grik tarimari mabarari, na mo vari ġeseġaġiato nai, ġegari-rakava rakavato, ema Iesu Vereġauka arana ġevaġa-raġe baregoato. <sup>18</sup> Iesu ġevaġa-moġoniato tarimari vovoka ġeiaġomato, benamo ġutuma ġoirari ai ġeri veġa rakavari ġekiraġi-foforirito. <sup>19</sup> Meġameġa tarimari ġutuma ġeri meġa bukari ġeġwa-vegogorito, benamo tarimarima mabarari ġoirari ai ġegaburito. Mo buka voiri ġevaġa-vegogorito tu silva moniri 50,000. <sup>20</sup> Mai veġa seġukari ġeġorato ġerina Vereġauka ġena guruġa eraga-rovorovoto, e ebaregoto ma seġukana ġesi.

### Efeso ai gururaġe baregona eġorato

<sup>21</sup> Moġeri muriri ai Paulo nuġanai etuġamaġito, Makedonia e Akaia tanori na bene vanaġi-iaġo Ieruselema ġana. Ekirato, “Mo ġana bana iaġo murinai, Roma maki bana ġitaia.” <sup>22</sup> Benamo Timoteo e Erasto, ġia ġevaġa-kavaiato-ġoi tarimari ruarua, Makedonia ġana etuġu-iaġorito, a ġia tu Asia tanonai kota roġo etanu-maukato.

<sup>23</sup> Mo ġaro sebonai Efeso ai gururaġe baregona eġorato, korana Vereġauka ġena Dabara dainai. <sup>24</sup> Monai silva eġauvei-iaġirito-ġoi tarimana ta arana Demetrio, ġia na barau vavinena arana Diana ġena rubu baregona ġitaġitana ilailanai rubu misimisiri silva na eveirito-ġoi. Monana ġena ġauvei tarimari moni boruri barego vedaurea ġedoġarito. <sup>25</sup> Benamo Demetrio na ġia mabarari, e ġia ġeri ġauvei kavana tarimari ekea-vegogorito, ma ekirarito, ekirato, “Tau, ġomi tau mabarami ribami ġita ġera moni tu mai ġauvei na eiaġomani. <sup>26</sup> Toma ġomi tauġemi na ġoġitaiani e ġoseġaġiani, mai tarima Paulo na kara eveiani. Ġia ekirani, tarimarima ġimari na

geveirini barauri tu dia barau, ema ġia na tarimarima ġutuma-bara nuġari eġanirini, e eġori-veġitarini, dia Efeso ai moġo, senaġi Asia tanona mabarana maki. <sup>27</sup> Mai tu dia ġita ġera ġauvei namona arana moġo evaġa-rakavaiani, senaġi barau vavinenena baregona, Diana, ġena rubu maki asi aninai beġe vaġa-iaġoani, e Diana iaru-korokorona asi ma beġe vevato-iaġiani; aba, mai barau vavinenena tu Asia tarimari mabarari e tanobara mabarana na ġetoma-rakariġo viniani.”

<sup>28</sup> Mo guruġa ġeseġaġiato nai, ġebaru-rakava rakavato, e ġekoġoto, ġekirato, “Efeso barauna Diana tu iaru-korokoro!” <sup>29</sup> Benamo mo guru baregona eraġeto na mo vanuġa barana mabarana tu iauvoiauvo e daradara na eġauato. Ma Paulo ġesi ġerakao-vegogoto-ġoi Makedonia tarimari ruarua, Gaius e Aristako, tu ġeġabitarririto, benamo marere gabuna ġana ġeġori-ragaraga-iaġorito. <sup>30</sup> Paulo ġena ura tu tarimarima ġutuma-bara ġoirari ai bene raka-rosi, senaġi Iesu ġekorana-iaġiato-ġoi tarimari asi ġeurato, ma ġeruġa-ġauato. <sup>31</sup> Asia vereri kotari Paulo ġatana. Ġia na maki ġena guruġa ġetuġuto, ġenoġiato, marere gabunai asi bene fofori.

<sup>32</sup> Mo vegogo nuġanai daradara asikeikeina eġorato, korana tarimarima mabarari irau ġabaġabana keakeana ġeiaġoto. Ġeġabato-ġoi e ġekeato-ġoi nai, tari tu guruġa ta ġekiraġiato-ġoi, ma kotari tu guruġa boruri tari ġekiraġirito-ġoi, korana tarima ġutuma tu asi ribari kara dainai ġea ġaru-vegogoto. <sup>33</sup> Iuda tarimari na Alesanda mo ġutuma-bara nuġana na ġetuġu-rosiato, tarimarima ġoirari ai ea ruġato, Iuda tarimari iatari ai bene guruġa ġana. Benamo Alesanda ġimana na tarimarima elautaririto asi beġene gururaġe ġana. <sup>34</sup> Senaġi ġeġita-leaiato, ġia tu Iuda tarimana nai, mabarari vaġa-sebo mai guruġa sebona moġo ġekoġo-iaġi ġenoġoi-ġenoġoiato-ġoi, ġekirato-ġoi, “Efeso barauna, Diana, tu iaru-korokoro!”

<sup>35</sup> Vanuġa ġena toretore tauna o klak mo tarimarima ġutuma evaġa-magorito, benamo ekirato, “Efeso tarimami, tarimarima mabarari ma ribari, Efeso tu Diana barau vavinenena baregona ġena rubu ġitaġauna vanuġana, e guba na fore veaġana Diana ilailanai dagarana eketo-firiġoto ġitaġauna vanuġana maki. <sup>36</sup> Tarima ta na maiġeri dagara asi bekira-ġuniġaurini riba. Moġa lorinai asi ġoguru-raġe, asi ġoveitaġuitaġui. <sup>37</sup> Mai tarimarima na rubu dagarana ta tu asi beġe lemaia, e ġera barau vavinenena ġenai maki guruġa rakavana ta asi beġe kiraġi, senaġi ġomi na maiġana boġo ġori-iaġoma-kavari. <sup>38</sup> Bema Demetrio ma ġena ġauvei tauri ġesi ma ġeri baru tarima ta ġenai nai tu, ġita tu ma ġera gavana, ġera Kota ġarori tu vekeo. Monai vauro beġene vei-roroġotori. <sup>39</sup> Bema ġourani dagara ta ma boġono kiraġia nai tu, taravatu na evaġa-moġoniato vegogonai vauro beġene guruġa-iaġia. <sup>40</sup> Toma kara beġora korana beġe danaġirani nai, ġita tu bita kerereni. Korana mai gururaġe baregona bita veia tu asi tauna ta, e ġera ġaru-vegogo kava anina tu asi bita kiraġiani riba.” <sup>41</sup> Eguruġa-ġosito murinai, ġevevegoto tarimari etuġu-rovorovorito.

### Paulo tu Makedonia e Grik ġana eiaġoto

**20** Mo daradara nuġanai ġekoġoto-ġoi, ġeġabato-ġoi, moġa emeġomeġo-tarito murinai, Paulo na Iesu ġekorana-iaġiato-ġoi tarimari ekea-vegogorito; benamo elaunaġirito murinai, eġabi-tuġurito. Benamo ġia tu ma erakato Makedonia ġana. <sup>2</sup> Mo gabu nuġari na eraka-vanaġito-ġoi nai, guruġa ġutuma ekiraġito, tarimarima evaġa-kokorerito-ġoi. Monana eiaġoto mo, Grik ai evotuto. <sup>3</sup> Monai ġue toitoi etanuto. Bouti na Siria ġana bene iaġo ġana eġabi-kavito-ġoi nuġanai tu es-eġaġito, Iuda tarimari na tu ġia beġene vaġia boioġana ġetogaiato-ġoi. Moġa lorinai

Makedonia na dabarai bene ġenoġoi-vanaġi etato. <sup>4</sup> Tarima kotari na ġia ġekavaiato, tarimari tu maiġeri: Sopata Piro, Berea tarimana; Aristako e Sekundo, Tesalonika tauri; Gaius, Derebe tarimana; Tikiko e Trofimo, Asia tauri; e Timoteo. Moġeri na ġekavaiato, Asia ġana ġeiaġoto. <sup>5</sup> Ġia tu ġeraka-guineto, Troas ai vau ġai ġea vaġa-nogamato. <sup>6</sup> Senaġi ġai tu Asi Etubuni Faraona Verekona ekorito murinai vau, Filipi ġaraga-kwaneato. Ġaro imaima (5) ġekorito vau, ġia ġeri ai Troas ai ġavotuto, ġave-doġarito. Monai tu ġaro imaima ruarua (7) ġatanuto.

### Paulo ġena iaġoiaġo magona Troas ai

<sup>7</sup> Fura sebona ġena ġaro giniguenenai o Sandei ai ġaraka-vegogoto anibou baġana ġani ġana. Benamo Paulo na mo lavilavi tu tarimarima eġobata-vinirito, eiaġoto mo, boġi nuġana, korana belaġanini ġia tu berakani nai. <sup>8</sup> Mo numa tuġuna daiġutunai ġai ġavegogoto, moġa lamefa na tu asisebo ġevaġa-ġararito. <sup>9</sup> Mero futuana ta arana Eutiko tu windoa nuġanai etanuto. Paulo ġena guruġa emauka-iaġoto-ġoi nuġanai, Eutiko matana tu egenagenato-ġoi mo ea ġena-vetuġa-rekwato. Benamo mo numa tuġuna na stori vaġa-toitoina (o third story) na ea keto-firiġoto mo tano ai. Ġea ġabi-vaisiatio nai tu mase. <sup>10</sup> Senaġi Paulo eraka-riġoto, Eutiko iatanai evefiukauto, eregoato, benamo ekirato, “Nuġami asi ġeraġe, ġia tu maġuri!” <sup>11</sup> Moġa murinai numa tuġuna ġana ma evaraġeto, ma farao ebuki-ġutuato, ġeġanito. Ġena guruġa ma esiriġuato, eiaġoto mo elaġanito, benamo erakato. <sup>12</sup> Vegogo tarimari na mo futua ġeġoriatu, benamo ma verereri ġesi ġerakato.

### Paulo Troas na eiaġoto mo Mileto

<sup>13</sup> Ġai tu bouti na Aso ġana ġaiaġo-guineto, a Paulo tu monai vau ma baġa ġura-kauani. Paulo na tu moġesina ekiramato, korana ġia tu kwakuna na beraka-vanaġini etato. <sup>14</sup> Aso ai ema doġarimato, benamo ġaġura-kauato, Mitilene ġana ġaiaġoto. <sup>15</sup> Monana bouti na ma ġaiaġoto mo elaġanito vau, Kioso iata-raġenai ġadarokauto. Mo ġaro murinai tu Samo ai ma ġavotuto, ma ġaro ta ma evanaġiatio vau, Mileto ai ġaraġasito. <sup>16</sup> Paulo eurato, Efeso tu beġene raga-vanaġia, Asia tanonai ġaro kotari beġe vaġa-koririni garina, korana ġia nuġana eġariġarito-ġoi. Ġena ura bema ma dabarana nai tu, Ierusalemaj beġene votu vau, Pentekoste ġarona bene raġasi, mo tu Pasova ġaro gabana imaima (50) murinai.

### Paulo ġena veġabituġu guruġari Efeso ekalesiana ġorikauna tauri ġeri ai

<sup>17</sup> Paulo tu Mileto vanuġana na Efeso ekalesia ġorikauna tauri ġeri guruġa etuġu-iaġoto, ekirarito, beġene iaġoma, ġia ġesi beġenema vedoġari. <sup>18</sup> Ġia ġema votuto nai, evaġa-guruġarito, ekirato, “Ġomi ma ribami au ġaro mabarari ai ġomi ġesi tatanuto-ġoi nai, aiġesina atanuto, ġaro tovotovona na Asia tanonai ama raġasito veġata. <sup>19</sup> Ġaro vovoka Iuda tarimari ġeurato-ġoi au beġene kougu, veġa rakavari ġutuma au ġegu ai ġeveirito-ġoi. Senaġi nuġagu ma maranana ġesi moġo e ma taġigu ġesi Vereġauka vetuġunaġina aiaġo-vinito-ġoi. <sup>20</sup> Ġomi ribami, vaġa-kava-iaġimi guruġari mabarari avaġa-ribamito, ta asi akure-toġaiatio, ġemi numai e ġutuma ġoirari ai avevaġa-ribato-ġoi nai. <sup>21</sup> Iuda tarimari e Grik tarimari ġoirari ai aguruġa-foforito-ġoi, ġeri rakava ġerina beġene vetuġamaġi-kure, Barau ġenai beġene ġenoġoi, ema ġera Vereġauka Iesu Keriso beġene ġabidadama-vinia. <sup>22</sup> Au toma tu Ierusalemaj ġana aiaġoni, korana Iauka Veaġa na evaġa-naġiguni nai, ma asi ribagu monai



tu kara ġegu ai beġorani. <sup>23</sup> Dagara sebona moġo au ribagu tu Iauka Veaġa na vanuġa baregori mabarari ai evaġa-ribaguni, au ġoiragu ai tu dibura numa e midigu-midigu evaġa-noga taġoguni. <sup>24</sup> Senaġi au ġegu ai, au ġegu maġuri tu asi atuġamaġi-baregoani, kara ġana atoni, ġegu ura sebona tu ġegu raga-iruiru moġo bana vaġa-ġuġuru, ema mo ġauvei Vereġauka Iesu na eviniguto, bana veia etato ġauveina, bana vaġa-koria. Mo ġauvei tu: Barau ġena varevare-bara Varina Namona bana kiraġi-foforia.

<sup>25</sup> Au tu ġomi mabarami fakami ai arakao-rakaoto, Barau ġena Basileia, (ġena veġitaġau seġukana evaġa-ruġaiiani maġa), ġemi aġobata-iaġiato. A toma au ribagu, ta na asi ma boġita-ġenoġoiguni. <sup>26</sup> Moġa lorinai toma ġaro ġomi ġoirami ai au aguruġa-foforini, bema ġomi ta Barau ġenana beraka-rekwarekwani nai, verebana tu dia au ġegu ai. <sup>27</sup> Korana Barau ġena ura mabarana avaġa-ribamito, misina ta maki asi akira-ġuniġauato. <sup>28</sup> Tauġemi lorimi boġono vetore, ema mamoe serina lorina boġono toreri. Mani mamoe serina tu Iauka Veaġa na evinimito boġono ġi-taġauri ġana. Barau ġena ekalesia boġono ġita-ġaua e boġono ġori-kaua. Mani tu ġia Natuna rarana na evoiato. <sup>29</sup> Au ribagu, au barakani murigu ai tu boġa kwaivari rakavari ġomi fakami ai beġe raka-toġani, benamo mani mamoe serina beġe vaġa-rakavaiani. <sup>30</sup> Ġomi tauġemi fakami na maki tau kotari beġe variġisini, benamo ġo-faġofa guruġari beġe kiraġini, Iesu ġekorana-iaġiani tarimari ġia na beġene ġori-ġerevaġiri ġana. <sup>31</sup> Moġa lorinai lorimi boġono vetore! Boġono vetuġamaġi-taġo, au na tu laġani toitoi veġata matagu ma taġina ġesi, ġomi asisiba-vini boġimito-ġoi e asisiba-vini laġanimito-ġoi.

<sup>32</sup> Toma Barau ġimanai e ġena varevare-bara guruġana nuġanai atoremimi, ġia na tu bevaġa-ruġa-iobukamini ilaila, ema voimi bevinimimi evaġa-veaġarito tarimari mabarari ġesi. <sup>33</sup> Au na ta ġena silva, o golo, o dabuġa urana asi aveito. <sup>34</sup> Ġomi tauġemi ma ribami, au ġegu rabu e karogu ġeri rabu dagarari mabarari tu, mai ġimagu ruarua ġeri ġauvei ġerina aġabito-ġoi. <sup>35</sup> Dagara mabarari nuġari ai au na avaġa-ġita iaġimito-ġoi, au moġesi ġauvei kokorekokore ġerina vauro moira-moira tarimari bitana vaġa-kavari. Iesu Vereġauka ġena guruġa boġono tuġamaġi-taġo, ekirato, 'Varevare iakuna tu barego, a ġevinirani nai taġoitaġoni iakuna tu kei.'

<sup>36</sup> Paulo eguruġa-ġosito vau, ġia ġesi ġevetui-tarito, benamo mabarari ġesi ġeġurigurito. <sup>37</sup> Ġia mabarari ġetaġi-rakavato, ġevafaġato, ma ġeverauato. <sup>38</sup> Ġia nuġari ġevekwaraġi-rakavato tu maiġesina evaġa-guruġarito nai, ekirato, ġia na ġoirana asi ma beġe ġita-ġenoġoiani. Benamo bouti ġana ġeġori-iaġoato.

### Paulo Ierusalemia ġana eiaġoto

**21** Ġia ġesi ġaveġabi-tuġuto, benamo ġarakato. Davara na ġiaiaġoto, maoro maoro mo Koso ai ġavotuto; ma elaġanito vau Rodes ġana ġiaiaġoto, monana ma ġiaiaġoto Patara. <sup>2</sup> Foenikia ġana beiaġoni boutina monai ġadoġariato, ma ġaraġeto, benamo ġaragato. <sup>3</sup> Ġaboġe-iaġoto Saipras ġaġitaiato, benamo gabina (o south) rekena na ġavanaġito, ġiaiaġoto mo Siria ai ġaraġasito. Taia vafuna na vau ġaraka-riġoto, korana mo bouti farefarena tu monai beġe tore-riġorini nai. <sup>4</sup> Iesu ġekorana-iaġiato-ġoi tarimari kotari monai ġadoġaririto, ġia ġesi fura o wiki sebona ġatanuto. Iauka seġukana ġenana ġia na Paulo ġekiraiato, Ierusalemia ġana asi bene iaġo. <sup>5</sup> Senaġi ġema raka ġarona eġabiato, benamo ġarakato. Ġia mabarari ma ġaraġori e ma naturi ġesi vanuġa baregona na ġeġori-rosimato kone ai. Benamo ġai

mabarama g̃avetuitui-tarito, g̃aḡuriḡurito. <sup>6</sup> Ĝia tata ḡesi g̃aveḡabi-tuḡuto, benamo ḡai tu bouti baregonai ḡaraḡeto, a ḡia tu monana ḡeḡenoḡoito ḡeri numa ḡari.

<sup>7</sup> Taia na ḡaiaḡoto Tolemais. Ĝema davara iaḡoiaḡona dokona moḡa. Monai tarikaka tari ḡesi ḡavedoḡarito, ma ḡavaḡa-namorito, ḡia ḡesi ḡaro sebona ḡatanuto.

<sup>8</sup> Elaḡanito, benamo kwakuma na ḡarakato, ḡaiaḡoto, Kaisarea ai ḡaraḡasito. Monai evanelia tarimana arana Filipino ḡena numa ḡana ḡaiaḡoto, ḡia ḡesi ḡatanuto. Ĝia tu Ierusalemāi tarima imaima ruarua (7) ḡeḡabi-viriḡirito tarimana ta. <sup>9</sup> Ĝia natuna ḡuiatori vasivasi tu Barau na peroveta varevarena evinirito.

<sup>10</sup> Ĝaro vovoka monai ḡatanuto murinai, peroveta tarimana ta arana Agabo, Iudea na ema raḡasito. <sup>11</sup> Ĝia tu ḡai ḡemai eiaḡomato, ma Paulo ḡena gabaḡau eḡabi-vaiaiatu, benamo ḡia tauḡena kwakuna e ḡimana ebarubarurito, benamo ekirato, “Iauka Veaḡa tu maiḡesi ekirani, ‘Mai gabaḡau tarimana tu Iuda tarimari na Ierusalemāi maiḡesina beḡe barubaruani, benamo irau bese tarimari ḡimari ai beḡe tore-kauani.’”

<sup>12</sup> Mai guruḡa ḡaseḡaḡiato nai, ḡai ema monai tarima kotari ḡesi Paulo ḡanoḡi-ato, Ierusalemāi ḡana asi bene iaḡo. <sup>13</sup> Senaḡi ḡia evaḡa-veseto, ekirato, “Kara taḡina ḡoveini e au nuḡagu ḡovaḡa-moiraiani? Au tu rovinatore, dia Ierusalemāi beḡe barubaruguni moḡo, senaḡi Vereḡauka Iesu arana bakunai bamaseni maki.” <sup>14</sup> Ĝai tu asi ilaila ḡia nuḡana baḡa ḡaniani nai, ma ḡia noḡinoḡina ḡavaḡa-dokoato, benamo ḡakirato, “Vereḡauka ḡena ura moḡo bene vetore.”

<sup>15</sup> Ĝaro kotari ḡekorito murinai, ḡema farefare ḡaḡabi-kavirito, benamo Ierusalemāi ḡana ḡaiaḡoto. <sup>16</sup> Kaisarea ai ḡetanuto-ḡoi Iesu ḡekorana-iaḡiato-ḡoi tarimari kotari maki ḡai ḡesi ḡaiaḡoto. Ĝia na ḡeḡori-iaḡomato, Nason, Saipras tarimana, ḡena numa ḡana. Nason tu kai-veḡata na Iesu ekorana-iaḡiato-ḡoi tarimana.

### Paulo na Iakobo (o Iames) eraka-ḡitaiato

<sup>17</sup> Ierusalemāi ḡaraḡasito nai tu, tarikaka na ma iakuri ḡesi ḡeḡabi-raḡemato. <sup>18</sup> Elaḡanito, benamo Paulo tu ḡai ḡesi ḡaiaḡoto Iakobo ḡitaḡitana; ma rubu ḡorikauna tarimari mabarari tu monai vegogotaḡo. <sup>19</sup> Paulo na evaḡa-namorito murinai, ḡia ḡena ḡauvei ḡenana Barau na irau bese tarimari kamasi eveirito-ḡoi variri mabarari ḡeri ekiraḡito.

<sup>20</sup> Ĝia na ḡeseḡaḡiato nai, mabarari na Barau ḡevaḡa-raḡeato. Benamo ḡia na Paulo ḡekiraiato, ḡekirato, “Tarikakama, oḡitaiani Iuda tarimari vira-tausen varau Iesu ḡeḡabidadama-viniani, ema taravatu maki ḡekorana-iaḡi ḡigitariani. <sup>21</sup> Ĝoi varimu tu ḡia ḡekira-vararito. Ĝekirarito, ḡoi na irau tano ai ḡetanuni Iuda tarimari mabarari ovaḡa-ribarini, okirani, Mose ḡena taravatu beḡene raga-kwanea, naturi merori tauḡaniri kefiru asi beḡene lama-vaḡiri, ema Iuda seneri ḡeri veiḡa asi beḡene korana-iaḡiri. <sup>22</sup> Be, ḡai tu kamasi toma ḡaveini? Ĝoi boma raḡasi varina tu beḡe seḡaḡiani veḡata. <sup>23</sup> Moḡa lorinai kara baḡa kiravara-vinimuni veiḡana bono veia. Tauri vasivasi (4) maiḡeri, ḡia tu kiraḡitore gwaḡiḡina ta ḡeveiato Barau ḡenai. <sup>24</sup> Ĝia ḡesi boḡono iaḡo, e ḡoi maki ḡia ḡesi boḡono veiareva, ema beḡe ḡwa-iaḡoni dagarari voiri bono vei, be ḡia debari beḡe rarorini. Maiḡesi boveini vau, tarimarima mabarari beḡe ribani, ḡoi iatamu ai ḡekiraḡirito-ḡoi guruḡari mabarari tu asi moḡoni, a ḡoi tauḡemu maki Mose ḡena taravatu ilailanai otanuni. <sup>25</sup> Irau bese ḡeveḡabidadamani tarimari tu ḡeri fefa varau ḡatuḡuto, ḡakirarito, kwaivakuku

ġevinirito ġaniġaniri tu asi beġene ġaniri, rara e ġaiġori na ġebora-maserini bureġari viriġori tu asi beġene ġani, ema asi beġene mata-boraġa.”

<sup>26</sup> Benamo Paulo na mo tarima vasivasi evaġa-ġabirito, benamo elaġanito nai, mabarari veiareva ġauveina ġea veiato. Moġa murinai Rubu Veaġai eraka-toġato, ma aitoma veiareva bemagoni ġarona, ema aitoma varevare dagarari ġia tata arari ai betoreni ekiraġi-foforirito.

### Iuda tarimari na Paulo Rubu Veaġai ġeġabi-tariato

<sup>27</sup> Ġeri veiareva ġauveina tu ġaro imaima ruarua (7); dori ġekorito nuġanai, Iuda tarimari kotari Asia tanona na ġeiaġomato, ġia na Paulo Rubu Veaġai ġeġi-taiato. Ġia na tarimarima mabarari nuġari ġeġanirito, benamo Paulo ġeġabi-tariato, <sup>28</sup> ġekoġoto, ġekirato, “Isaraela taumi, ġai ġovaġa-kavama! Mai tarima maiġa tu ġabu mabarari ġari eiaġoni, tarimarima mabarari evaġa-ribarini; Isaraela tarimari, e Mose ġena taravatu, ema mai Rubu Veaġa asi beġene korana-iaġia etoni. Toma maki, ġia na Grik tarimari mai Rubu Veaġa nuġanai beġori-toġari, mai ġabu veaġana bevaġa-rakavaia.” <sup>29</sup> Moġesina ġekirato, korana ġia na Efeso tarimana arana Trofimo, Paulo ġesi mo vanuġa baregonai ġeġitarito, ema ġetuġamaġito, ġia tu Paulo na Rubu Veaġai eġori-toġaiato. <sup>30</sup> Vanuġa mabarana iauvoiauvo e daradara na eġabiato, ema tarimarima mabarari monai ġema ġaru-vegogoto, benamo Paulo ġeġabi-tariato, Rubu Veaġa na ġeinu-rosiato. Asikauna Rubu Veaġa ġatama-bokari ġebiririto.

<sup>31</sup> Ġia na Paulo ġevaġi-masea ġetato-ġoi nuġanai, tarima ta eraga-varaġeto, Roma vetari verena baregona ea kira-varaiato, Ieruselema mabarana tu gururaġe baregona ġeveiani. <sup>32</sup> Ġia tu asikauna ġena vetari ġitaġauna tarimari e vetari tarimari eġoririto, benamo ġeraga-riġoto mo ġutuma-bara ġeri ai. Tarimarima na vetari verena baregona ma ġena vetari tauri o soldia ġesi ġeġitarito nai, ġia na Paulo kwarikwarina ġevaġa-dokoato. <sup>33</sup> Benamo vetari verena baregona Paulo ġenai eiaġoto, eġabiato, ġena mero ekirarito, seini ruarua na beġene baru-taria. Benamo evedanaġito, ekirato, “Mai tu kamara tau, e ġia tu kara beveia?” <sup>34</sup> Mo ġutuma-bara nuġanai tari ġefararato-ġoi; guruġa ta ġekiraġiato-ġoi, ma kotari na tu guruġa ta, be vetari verena baregona na maki guruġa roroġotona ta asi eġabiato. Moġa lorinai ġena mero ekirarito, Paulo tu vetari tarimari ġeri ġabu ġana beġene ġori-iaġoa. <sup>35</sup> Raġekau ai ġeġori-votuato nai tu, vetari tarimari na ġefaġa-vaisiato, ġeġwaraġeato, korana mo tarimarima mabarari tu ġeniara-lelevaġito nai. <sup>36</sup> Mo tarimarima mabarari ġia murina na ġeraka-iaġoto tu, ġefararato-ġoi, ġekirato, “Ġovaġi-masea!”

### Paulo tauġena evelauġau-tovoto

<sup>37</sup> Dori moġo vetari tarimari ġeri numai ġeġori-toġaiato nuġanai, Paulo na vetari verena baregona evaġa-guruġaiato, ekirato, “Bavaġa-guruġamuni lorinai ba?” Ġia na evaġa-veaseato, ekirato, “Ġoi Grik ġeri ġaro ma ribamu? <sup>38</sup> Be ġoi tu dia mo Aigupito tarimana, ġaro kotari varau beġe iaġo, ġia na gavamani vevaġi-vinina esinaiato, ema vaġideba tarimari daġara vasivasi (4,000), ma ġeri vevaġi farefareri ġesi, tano fakana ġana eġori-iaġorito tarimamu?” <sup>39</sup> Paulo na evaġa-veaseato, ekirato, “Au tu Iuda tarimagu, amaġurito vanuġana baregona arana tu Taso, ma arana vanuġana, ġia Kilikia tanonai. Anoġimuni, mani ġemu veġa, mai tarimarima navaġa-guruġari.” <sup>40</sup> Vetari verena baregona na maoro eviniato, benamo Paulo

raḡekau ai eruḡato, ḡimana na tarimarima elau-taririto. Gururaḡe emagoto, benamo Paulo na Heberu garo ai evaḡa-guruḡarito.

**22** “Tarikakagu e tamagu mabarami, ḡoirami ai navekiraḡi-faka, be boḡono seḡaḡi.” <sup>2</sup> Ḡia ḡeseḡaḡiato, Heberu garo ai evaḡa-guruḡarito nai, asi gurugu-ruri ai ḡeiaḡoto, mabarari ḡeseḡaḡi-magomagoto; benamo Paulo ekirato:

<sup>3</sup> “Au tu Iuda tarimagu, Taso vanuḡanai Kilikia tanona nuḡanai amaḡurito, senaḡi mai Ieruselema vanuḡa baranai abaregoto. Gamaliel ḡena vevaḡa-riba nuḡanai atanuto-ḡoi, ḡia na ḡita senera ḡeri taravatu veḡari gwaḡiḡiri evaḡa-ribaguto-ḡoi, ema Barau ḡena ḡauvei aveiato-ḡoi ma kokoregu ḡesi, toma ḡomi na ḡokokore-iaḡiani ilailanai. <sup>4</sup> Au na mai dabara ḡekorana-iaḡiato-ḡoi tarimari tu avaḡa-midigu midigurito-ḡoi mo ḡea maseto-ḡoi. Tau e vavine aḡabirito-ḡoi, dibura numari ai abubu-toḡarito-ḡoi. <sup>5</sup> Rubu Veaḡa verena baregona e kanisoro tarimari mabarari na maki beḡe vaḡa-moḡoniguni, au tu moḡoni akirani. Au tu ḡia na maki fefa ḡeviniguto, tarikaka Iuda tarimari Damaseko ai ḡeri bana viniri ḡana. Benamo au mo ḡana aiaḡoto, mai tarimarima bana ḡabiri, seini na bana barubaruri ma Ieruselema ḡana bana ḡori-iaḡori, ḡeri rakava voiri beḡene ḡabiri ḡana.”

### Paulo ḡena vetuḡamaḡi-kure ekiraḡiato

<sup>6</sup> “Au roḡo dabara na aiaḡoto-ḡoi, ma Damaseko akavinaḡiato, ḡaro tu tubuagu ai mama baregona ta guba na emariḡoto, asikauna ema nanagi-tariguto. <sup>7</sup> Au tano ai aketo-tarito, ema garo ta aseḡaḡiato, au evaḡa-guruḡaguto, ekirato, ‘Saulo! Saulo! Karase nai au ovaḡa-rakavaguni?’ <sup>8</sup> Benamo au avedanaḡito, akirato, ‘Vereḡauka, ḡoi tu deikara?’ Ḡia evaḡa-veseto, ekirato, ‘Au tu Iesu, Nasareta tarimagu, ḡoi na ovaḡa-rakavaguni tarimagu.’ <sup>9</sup> Au karogu maki na mama ḡeḡitaiato, benamo ḡegar-ito, senaḡi au eguruḡa-viniguto garona tu asi ḡeseḡaḡiato.

<sup>10</sup> Benamo avedanaḡito, akirato, ‘Vereḡauka, au tu kara toma aveiani?’ Vereḡauka evaḡa-veseto, ekirato, ‘Novariḡisi, Damaseko ai noa raka-toḡa, monai vau ta na bevaḡa-ribamuni, ḡoi tu kara boveini.’ <sup>11</sup> Mo mama baregona na matagu evei-bubuato, benamo karogu na ḡimagu ai ḡeḡabito, Damaseko ḡana ḡeḡori-iaḡogoto.

<sup>12</sup> Monai tau ta arana Anania, ḡia tu Barau garina eveito-ḡoi e taravatu ekorana-iaḡiato-ḡoi tarimana, ema Iuda tarimari mabarari Damaseko ai ḡetanuto-ḡoi na ḡegubakau-baregoato-ḡoi. <sup>13</sup> Ḡia eiaḡomato sevigu ai ema ruḡa-tarito, benamo ekirato, ‘Saulo tarikakagu, matamu ma nefafa.’ Asikauna moḡo matagu ḡefafato, ḡia aḡitaiato. <sup>14</sup> Moḡa murinai Anania na ekiraguto, ekirato, ‘Ḡita senera ḡeri Barau na varau beḡabi-viriḡimu, ḡia ḡena ura kara bono veia, bono ribaia. Ema vei iobukaiobuka tarimana bono ḡitaia, e ḡia tauḡena muruna na beguruḡani garona bono seḡaḡia. <sup>15</sup> Korana ḡoi tu ḡia bovaḡa-moḡoniani tarimamu, kara boḡita e boseḡaḡi maiḡeri, tarima mabarari bokira-vararini. <sup>16</sup> Kara ma ovaḡa-nogaiani? Novariḡisi, babatiso noḡabia. Ḡia arana nokea-raḡea, benamo ḡemu rakava neḡuriḡi-vaḡiri.”

### Paulo ḡena kea irau bese tarimari bene ḡobata-viniri ḡana

<sup>17</sup> “Monana Ieruselema ḡana aḡenoḡoito, benamo Rubu Veaḡai aḡuriḡurito-ḡoi nuḡanai, amata-vanaḡito. <sup>18</sup> Monai au na Vereḡauka aḡitaiato, au evaḡa-guruḡaguto, ekirato, ‘Noraga-vei, Ieruselema noragakwane-ḡarimoḡia, korana mainai au varigu bokiraḡiani, senaḡi mai tarimarima na asi beḡe vaḡa-moḡonimuni.’ <sup>19</sup> Au na avaga-

veseato, akirato, 'Veregāuka, ġia tu ma ribari ginikau, au rubu mabarari ġana aiaġoto-ġoi, ġevaġa-moġonimuni tarimari aġabirito-ġoi, dibura numanai abiri-ġaurito-ġoi e akwaririto-ġoi. <sup>20</sup> Ema ġoi evaġa-moġonimuto-ġoi tarimana Stefano rarana ġevaġa-riġoato ġaronai au tu monai, ġevaġi-maseato avaġa-moġoniato, ema ġevaġiato-ġoi tarimari ġeri dabuġa anaririto.' <sup>21</sup> Senaġi Veregāuka na ekiraguto, ekirato, 'Noiaġo, korana au na batuġumuni, irau bese tarimari gabu manaġai ġetanuni tarimari ġeri ai.'"

<sup>22</sup> Tarimarina na Paulo ġeseġaġi-taġoato-ġoi, eiaġoto mo, ġia moġesi eguruġato. Benamo ġefararato, ġekirato, "Goġabi-fitoġaia! Ġovaġi-masea! Ġia tu asi ġena namo ta emaġuri-taġoni mai tanobarai." <sup>23</sup> Ġeġabato-ġoi, ġeri dabuġa ġeiave-iaverito-ġoi, e forara ġefiu-vaisito-ġoi. <sup>24</sup> Roma ġeri vetari verena baregona na ġena mero ekirarito, Paulo beġene ġori-iaġoa, vetari tarimari ġeri tanu gabuna ġana. Ema ekirarito beġene kwaria, e beġene danaġia kara ġaramanai ġia moġesi ġeġabaġaba-viniani, bene kira-varari. <sup>25</sup> Senaġi ġebarubaruato-ġoi beġene kwaria ġana nuġanai Paulo na vetari ġitaġauna tarimana ekiraiato, ekirato, "Mai moġoni taravatu nuġanai ekiraġiani, ġoi na Roma tarimana bokwari-guinea; a ġia na kara bevei-leaia Kota na tu roġosi bere kira-varaia, senaġi?"

<sup>26</sup> Mo vetari ġitaġauna tarimana na mo guruġa eseġaġiato, benamo eraga-iaġoto vetari verena baregona ġenai, ekiraiato, ekirato, "Ġoi tu kara toma oveiani? Mo tarima tu Roma tarimana!" <sup>27</sup> Moġa lorinai vetari verena baregona eiaġoto Paulo ġenai, benamo ea danaġiato, ekirato, "Nokira-varagu, ġoi tu Roma tarimamu ba?" Paulo evaġa-veseto, ekirato, "Oi." <sup>28</sup> Benamo vetari verena baregona ekirato, "Au Roma tarimagu ai aiaġoto tu moni baregona gavamani avinirito." Paulo evaġa-veseto, ekirato, "Senaġi au tu Roma beseri ġerina aġorato Roma tarimagu." <sup>29</sup> Asikauna Paulo beġe danaġiani tarimari ġeruġa-ġenoġoito, ema vetari verena baregona maki egarito, korana eriba-maoroto, Paulo tu Roma tarimana, ġia na ebarubaruato ġekwaria ġana.

### Paulo kanisoro ġoiranai

<sup>30</sup> Ma elaġanito, vetari verena baregona ġena ura bene riba-maoro, kara dainai Iuda tarimari na Paulo ġevaġa-daġaiato. Moġa lorinai ġia na Paulo ġebaruato varori ġeruġarito, benamo Rubu Veaġa vereri baregori e kanisoro mabarana ekirarito beġene vegogo. Benamo ġia na Paulo eġori-iaġoato, ġia ġoirari ai ea vaġa-ruġaiato.

### Paulo Iuda ġeri kanisoro tarimari ġoirari ai

**23** Paulo na kanisoro tarimari eġita-karakararito, benamo ekirato, "Tarikakagu mabarami! Au tu ma nuġa iobukaiobukagu ġesi Barau ġoiranai atanuni, beiaġoma mo initoma." <sup>2</sup> Paulo moġesina eguruġato nai tu, Rubu Veaġa verena baregona Anania na Paulo sevinaġi ġeruġa-taġoto-ġoi tauri ekirarito, Paulo bokana beġene foro-ġāua. <sup>3</sup> Benamo Paulo na ekiraiato, ekirato, "Ġoi tu Barau na beforomuni, ġoi kobe ġevaġa-kurokuroato kavana, rakava asi beġene ġitaia ġana, ġofaġofa tarimamu! Ġoi maninai botanu tu taravatu ilailanai au okota-viniguni, senaġi ġoi tauġemu na taravatu boleaia, tarima bokirari, au ġeforogu bos!" <sup>4</sup> Paulo sevina tauri na ġekiraiato, ġekirato, "Ġoi tu Barau ġena Rubu Veaġa verena baregona ġenai guruġa rakavari okiraġini!" <sup>5</sup> Paulo evaġa-veseto, ekirato, "Tarikakagu, au tu asi

bariba-maoro ġia tu Rubu Veaġa verena baregona. Korana ribagu Buka Veaġai tu ekirani, “Ġomi ġemi vere tu asi boġono guruġa-rakava vinia.”

<sup>6</sup> Paulo na ġia tari eġitarito tu Sadukea tarimari, ma kotari tu Farisea tarimari, benamo kanisoro ġoiranai ekoġoto, ekirato, “Tari-kakagu, Isaraela tarimami, au tu Farisea tarimagu, Farisea tarimana natuna. Au tu vevaġa-kota gabunai maiġegu, korana au ġegu tuġamaġikau, mase tarimari tu ma beġe variġisi-ġenoġoini!”

<sup>7</sup> Moġesi ekirato, benamo Farisea tarimari ema Sadukea tarimari ġeveġare-veġareto, ema ġeri vegogo maki evetavi-kirato. <sup>8</sup> Korana Sadukea tarimari ġekirani, tarimarima mase na tu asi ma beġe variġisi-ġenoġoini, ema aneru e iauka tu asi ġetanuni; a Farisea tarimari na moġeri mabarari tu ġevaġa-moġonirini. <sup>9</sup> Moġesina naima fararafarara guruna ebaregato-ġoi, nuġanai taravatu ġevevaġa-riba iaġiato-ġoi Farisea tarimari ġeruġa-vaisito, ma kokoreri ġesi ġeguruġato, ġekirato, “Mai tarima ġenai rakava ta tu asi bita doġaria! Bema ġia tu iauka na o aneru ta na moġoni bevaġa-guruġaia nai tu, Barau asi sivaġa-vevaġia!” <sup>10</sup> Veġareveġare eseġuka-ġaraġarato nai, vetari ġitaġauna tarimana baregona egarito, Paulo beġe inu-vedare vedareani garina. Moġa lorinai ġena vetari tauri ekirarito, beġene rakariġo-iaġo, Paulo beġene ġabi-veġitaia Iuda tarimari fakari na, benamo vetari tauri ġeri numa ġana beġene ġori-iaġoa.

<sup>11</sup> Ma elaġanito boġinai, Vereġauka Paulo sevinai ema ruġa-tarito, benamo ekirato, “Ġoi na mai Ierusalemaj au okiraġi-foforiguto ilailanai, Romaj maki moġesi bonoa kiraġi-foforigu.”

### Paulo vaġivaġina boioġana ġetogato

<sup>12</sup> Ma elaġanito boġiboġinai, Iuda tarimari kotari ġevevogoto, ma boioġa ta ġetogaiato. Ġia na kiraġitore guruġana gwaġiġina ġekiraġiato, ġekirato kara ta asi beġe ġaniani e asi beġe niuani, beiaġoni mo, Paulo beġe vaġiani. <sup>13</sup> Mo boioġa ġetoga-vegogoto tauri mabarari tu gabana vasivasi (40) maki evanaġiato. <sup>14</sup> Benamo ġeiaġoto Rubu Veaġa vereri baregori e Iuda vereri ġeri ai, ma ġea kirato, ġekirato “Ġai tu kiraġitore guruġana gwaġiġina baġa kiraġia, asi baġa ġaniġanini, beiaġoni mo, Paulo baġa vaġi-maseani. <sup>15</sup> Maitoma ġoi ma kanisoro ġesi noġinoġi guruġana ġotuġu-iaġoa, Roma ġeri vetari verena baregona ġenai, be Paulo ġomi ġemi ai bene tuġu-mariġoa, boġono ġofa-ġaua, boġono kira, ġomi na Paulo ġouravini, korana ġia ġenana guruġa iobukana boġono ġabia ġana. Senaġi ġai tu baġa vaġa-noga-taġoni, mainai roġosi berema raġasi, a ġai na tu baġa vaġi-maseani.”

<sup>16</sup> Senaġi Paulo tobana natuna merona na mo boioġa eseġaġi-kauato, benamo eiaġoto, vetari tauri ġeri numai eraka-toġato, ma Paulo ekira-varaiato. <sup>17</sup> Benamo Paulo na vetari ġorikauna tarimana ta ekeaiato, benamo ekiraiato, ekirato, “Mai mero variġuna vetari verena baregona ġenai noġori-iaġoa. Korana ġia na ġena guruġa ta beġwa-iaġomaia, bene kira-varaia.” <sup>18</sup> Ma vetari ġorikauna tarimana na eġori-iaġoato vetari verena baregona ġenai, ekirato, “Dibura numanai tarimana, Paulo na bekeagu e benoġigu, mai mero variġuna ġoi ġemu ai bana ġori-iaġomaia, korana ġia na ġemu guruġa ta beġwa-iaġomaia, bene kira-varamu ġana.”

<sup>19</sup> Vetari verena baregona na ġimanai eġabito, eġori-ġerevaġiato vauro, edanaġiato, ekirato, “Kara ourani ġegu nokiraġia?” <sup>20</sup> Ġia ekirato, “Iuda tarimari na guruġa ta beġe vaġa-moġonia, boinani beġene vei-ġofakau, benamo ġoi beġene noġimu, be Paulo bono tuġu-variġoa kanisoro ġoirana ġana. Ġeri veġofaġau guruġana ġoi

beĝene kiramu tu, ĝia ĝeri ura Paulo varina korikori kotari ma beĝene ĝabi. <sup>21</sup> Senaĝi asi bono seĝaĝi-viniri, korana tau mabarari gabana vasivasi (40) bevanaĝia tu beĝe gumuni, ĝia beĝe vaĝa-nogaiani. Ĝia tu kiraĝitore guruĝana gwaĝiĝina ĝekiraĝi-ato, asi beĝe ĝaniĝanini e dagara ta asi beĝe niuani, beiaĝoni mo, Paulo beĝe vaĝi-maseani. Mo veĝa beĝene veia ĝana, ĝia toma tu beĝe veikavi, ĝoi ĝemu vaĝa-vese moĝo ĝevaĝa-noga taĝoani.” <sup>22</sup> Vetari verena baregona na ekiraiato, ekirato, “Au ĝegu bokiraĝi guruĝana maiĝa, tarima ta asi ma bonoa kira-varaia.” Benamo ĝia na mero variĝuna etuĝu-rakaiato.

### Paulo Gavana Feliki ĝenai etuĝu-iaĝoato

<sup>23</sup> Benamo vetari verena baregona na ĝena vetari ĝorikauna tauri ruarua ma ekear-ito, benamo ekirarito, ekirato, “Vetari tauri sinau ruarua (200), e hosi ai raĝe tarimari gabana imaima ma gabana ruarua (70), ema auri fiu tauri sinau ruarua (200) boĝono ĝabi-toreri, toma boĝi horaĝauna 9 koloko Kaisarea ĝana boĝono iaĝo ĝana. <sup>24</sup> Paulo bene raĝe hosiri tari maki boĝono rovina-toreri, be Gavana Feliki ĝenai maĝuri boĝono ĝori-iaĝoa ĝana.” <sup>25</sup> Benamo vetari verena baregona na fefa ta maiĝesina etoreato:

<sup>26</sup> “Au Klaudia Lisia na ĝoi Feliki, gavana tarimamu namo vedaureamu, atorevinimuni: Avaĝa-namomuni! <sup>27</sup> Iuda tarimari na mai tau ĝeĝabiato, ma dori moĝo ĝevaĝi-maseato. Senaĝi au aribato, ĝia tu Roma tarimana naima ĝegu vetari tauri ĝesi ĝaiaĝoto, ĝavaĝa-maĝuriato. <sup>28</sup> Au aurato tu bana riba, kara koranai ĝevaĝa-daĝaiato-ĝoi, moĝa lorinai aĝori-variĝoato, ĝeri kanisoro ĝoirana ĝana. <sup>29</sup> Au na adoĝariato tu ĝia ĝeri taravatu ĝaramanai ĝevaĝa-daĝaiani, senaĝi ĝia beĝene vaĝi-masea o dibura numanai beĝene torea korana ta tu asi adoĝariato. <sup>30</sup> Iuda tauri na beĝene vaĝi-masea ĝana, boioĝana ĝetogato varina ĝegu ĝekiraĝito nai, atuĝa-maĝito, ĝoi ĝemu ai bana tuĝu-iaĝosia. Ĝia ĝevaĝa-daĝaiani tarimari maki akirarito, ĝoi ĝoiramu ai ĝeri vevaĝa-daĝa guruĝari beĝene kiraĝiri.”

<sup>31</sup> Vetari tauri na ĝekirarito veĝana ĝeveiato. Mo boĝi, ĝia na Paulo ĝeĝabi-iaĝoato mo Antipatri. <sup>32</sup> Elaĝanito vau, vetari tauri kwakuri na ĝerakani tauri ĝeri tanu gabuna ĝana ĝeĝenoĝoito. Hosi tauri moĝo Paulo ĝesi ĝeiaĝoto. <sup>33</sup> Kaisareai ĝea raĝasito, benamo fefa ĝeĝabiato, gavana ĝeviniato, ema Paulo maki ĝevini-vanaĝiato. <sup>34</sup> Gavana na fefa eiaviato, benamo Paulo edanaĝiato, ĝia tu kamara gabu tarimana. Ĝia eribato Paulo tu Kilikia tarimana nai, <sup>35</sup> ekirato, “Ĝevaĝa-daĝamuni tarimari beĝema raĝasini vauro, kara ovei-leaiato guruĝana au na baseĝaĝimuni.” Benamo gavana ekirato, Paulo beĝene ĝabi-iaĝoa, Kota numanai beĝenea ĝita-ĝaua. Mo Kota numana tu Heroda na maĝurinai eragaiato.

### Iuda tarimari na Paulo ĝevaĝa-daĝaiato

**24** Ĝaro imaima ĝekorito murinai, Rubu Veaĝa verena baregona, Anania, Kaisarea ĝana evariĝoto, Iuda vereri kotari e taravatu ma ribana tarimana ta arana Teretulo ĝesi. Mabarari ĝevariĝoto, Gavana Feliki ĝoiranai vauro Paulo ĝevaĝa-daĝaiato guruĝana ĝea kiraĝiato. <sup>2</sup> Paulo ekea-toĝaiato, benamo Teretulo na Paulo ĝevaĝa-daĝaiato guruĝana ĝoiranai ekiraĝirito, ekirato, “Namo vedaurea veremu Feliki! Ĝoi ĝemu veĝitaĝau gaburenai tu maino ai baĝa tanu-mauka kenene, e ĝema bese bene namo ĝana, dagara namori vovoka bovaĝa-variĝu ĝenoĝoiri. <sup>3</sup> Mai tu gabu mabarari ai e ĝaro mabarari ai ĝai na ĝaĝabi-raĝeani, moĝa lorinai

gōi tu g̃avaḡa-namo baregomuni. <sup>4</sup> Au asi aurani, gōi g̃emu taimi bana vaḡa-korikavaia, senaḡi anoḡimuni, novetuḡa-g̃wama, asi bono baru, be g̃ema guruḡa kubina tu noseḡaḡia. <sup>5</sup> Gai na mai tau ḡadoḡariato tu, rakava vaḡa-ḡorana tarimana, ḡia na gururaḡe barego evaḡa-ḡorarini, Iuda tarimari tano mabarari ai ḡetanuni fakari ai. ḡia tu Nasareta doḡorona ḡeri veḡorikau tarimana ta. <sup>6</sup> ḡia na tu Rubu Veaḡa maki nevaḡa-rakavaia etato, senaḡi ḡai na ḡaḡabi-tariato, [ḡema taravatu ilailanai baḡana vaḡa-kotaia ḡatato. <sup>7</sup> Senaḡi vetari verena baregona, Lisia, ema raka-toḡato, benamo ma ḡaramana ḡesi Paulo ḡai ḡimama na ema ḡabi-veḡitaiato. <sup>8</sup> Benamo Lisia ḡena guruḡa ilailanai, ḡia vaḡa-daḡana tarimari tu ḡoi ḡoiramu ḡana beḡe iaḡoma.] Goi tauḡemu na ḡia bodanaḡi-ginikauani vauro, ḡia ḡavaḡa-daḡaiani dagarari mabarari tauḡena na bekira-varamuni.” <sup>9</sup> Iuda tarimari maki ḡia ḡesi ḡekauto, ḡekirato mai bekiraḡiri dagarari mabarari tu moḡoni.

### Paulo ḡena vetoreḡau guruḡana Feliki ḡoiranai

<sup>10</sup> Gavana na Paulo vetoḡa ta evei-viniato Paulo ma bene guruḡa ḡana, benamo Paulo eguruḡato, ekirato, “Au ribagu, laḡani ḡutuma varau beḡe iaḡo, gōi tu mai bese tarimari ḡeri Kota ḡitaḡauna ḡauveina oveiani. Moḡa lorinai au tu ma iakugu ḡesi ḡegu vetoreḡau guruḡana gōi ḡoiramu ai akiraḡiani. <sup>11</sup> Gōi tauḡemu na maki asikauna boraga-doḡariani, ḡaro gabanana ruarua (12) maki roḡosi bene vanaḡia nuḡanai, au tu Ierusalemā ḡana toma-rakariḡo avaraḡeto. <sup>12</sup> Ma mai au ḡevaḡa-daḡaguni tarimari na ta ḡesi Rubu Veaḡai ḡaveḡare-veḡareto-gōi nuḡanai asi ḡedoḡariguto, ema asi ḡedoḡariguto tarimarima avaḡa-vegogorito rubu nuḡanai o gabu tai vanuḡa baregona nuḡanai. <sup>13</sup> Ema mai ḡevaḡa-daḡaguni dagarari maki gōi ḡoiramu ai asi beḡe vaḡa-moḡonirini riba.

<sup>14</sup> A mai tu moḡoni akirani, au na tu ḡai senema ḡeri Barau atoma-rakariḡo viniani e mo Dabara Variḡuna akorana-iaḡiani, ma mai dabara ḡia tauḡeri na tu dabara ḡofaḡofana ḡetoni. Mose ḡena taravatu ema peroveta tarimari na ḡetorerito guruḡari mabarari tu avaḡa-moḡonirini. <sup>15</sup> Au ḡegu tuḡamaḡikau Barau ḡenai e mai tau ḡeri tuḡamaḡikau tu sebona moḡo, moḡa tu maiḡesi: Vei-iobukaiobuka tarimari e veirakava tarimari mabarari mase na ma beḡe variḡisi-ḡenoḡoini. <sup>16</sup> Moḡa lorinai au tu vanaḡivanaḡi nuḡagu bene iobukaiobuka vededegwana aveini Barau ḡoiranai e tarimarima ḡoirari ai.

<sup>17</sup> Laḡani kota vovoka varau ḡeiaḡoto, au na Ierusalemā araga-kwaneato. Moḡa murinai au ma baḡenoḡoi-iaḡo ḡegu tarimarima ḡeri ai, asi ḡeri-ḡari tarimari ḡeri moni baḡabi-iaḡo e varevare dagarari Barau bana vinia ḡana. <sup>18</sup> Ma au tu taravatu na ekiraḡiani ilailanai veiareva veḡana avaḡa-koriatu nuḡanai, Asia tanona na ḡeiaḡomato Iuda tauri kotari na Rubu Veaḡa nuḡanai ḡedoḡariguto. Moḡa nuḡanai au sevigū ai tu ḡutuma-barana ta asiḡi, e ta ḡesi maki asi aveḡare-veḡareto-gōi. <sup>19</sup> Moḡeri Iuda tarimari Asia tanona na ḡeiaḡomato beḡere iaḡoma, be gōi ḡoiramu ai au beḡerema vaḡa-daḡagu, beḡere kira-varamu, au na tu kamara rakava aveiato. <sup>20</sup> A mai tarima maiḡeri na ḡekiraḡi-foforia, au kanisoro ḡoiranai aruḡato ḡaronai, au ḡegu ai tu kamara rakava ḡedoḡariato. <sup>21</sup> Senaḡi dagara sebona moḡo tu, ḡia ḡoirari ai aruḡato, afararato, akirato, ‘Mase tarimari ma beḡe variḡisi-ḡenoḡoini atoni naima, ḡomi na au toma ḡovaḡa-kotagu ḡotoni.’”

<sup>22</sup> Mo Dabara, (mai tu Iesu Keriso ḡabidadama-vinina dabarana), Feliki tu ma eriba-ginikauato. ḡia na Kota ma etuḡu-naḡiatio, ekirato, “Vetari verena baregona,



Lisia, beraġasini vau, au na ġomi ġemi guruġa bavei-roroġotoani.”<sup>23</sup> Benamo ġia na vetari ġitaġauna tarimana ekiraiato, Paulo dibura numanai beġene ġita-ġaua, senaġi ġitaġauna asi beġene vei-gwaġiġia. Ġatana kotari na ġevaġa-kavaia beġe toni nai tu beġene ġabi-raġeri.

### Paulo Feliki e Drusila ġoirari ai

<sup>24</sup> Ġaro kotari ġeiaġoto muriri ai, Feliki ma ġaraġona Drusila ġesi ġeraġasito. Drusila tu Iuda vavina. Feliki na Paulo vetuġuna eveito, benamo Paulo eiaġomato, Iesu Keriso ġabidadama-vinina guruġari ekiraġirito eseġaġiato. <sup>25</sup> Senaġi Paulo ġena sisibai tu vei-iobukaiobuka e vevaġa-gwaġiġi ema Barau ġena Kota baregona beiaġo-mani guruġari ekiraġirito nai, Feliki egarito, benamo ekirato, “Benamo, toma tu no-raka roġo, ġaro namona tai vauro ma bana kea-iaġomamu.” <sup>26</sup> Feliki ġena tuġamaġi ta maki, Paulo na moni kota bene vinia. Moġa lorinai ma ekea-ġenoġoi ġenoġoiato-ġoi, ġia ġesi beġene guruġa-guruġa ġana.

<sup>27</sup> Laġani ruarua murinai, Porokio Festo na Feliki ġena gavana ġauveina gabuna eġabiato. Senaġi Iuda tarimari na beġene ura-vinia ġana, Paulo tu dibura numanai eraga-kwaneato.

### Paulo Festo ġoiranai

**25** Festo beveġitaġauni tanonai eraġasito, ma ġaro toitoi ġekorito murinai, Kaisarea na Ieruselema ġana evaraġeto. <sup>2</sup> Monai Rubu Veaġa vereri baregori e Iuda ġitaġauna tauri na Paulo ġevaġa-daġaiato guruġari ġea kiraġirito, ma Festo ġenoġiato, <sup>3</sup> ġia bene vaġa-kavari, be Paulo Ieruselema ġana bene tuġu-iaġoa. Korana Paulo dabara tumanai beġene gana-torea ma beġene vaġi-masea boioġana tu varau ġetogaiato-ġoi. <sup>4</sup> A Festo evaġa-veseto, ekirato, “Paulo tu Kaisareai moġea, dibura numanai ġeġita-ġauani, ma au tu mo ġana dori ma aġenoġoi-iaġoni. <sup>5</sup> Be ġemi veġitaġau tarimari neġi au ġesi Kaisarea ġana baġana iaġo, be monai kara evei-leaiato beġene kiraġia, bema ġia na rakava ta eveiato nai tu.”

<sup>6</sup> Festo ġaro imaima toitoi (8) o gabanana (10) ġia ġesi monai ġetanuto vauro, Kaisarea ġana ma evariġoto. Elaġanito vau Kota gabunai ea tanu-tarito, benamo evetuġuto, Paulo ġoirana ġana beġene ġori-iaġomaia ġana. <sup>7</sup> Paulo ema raġasito nai tu, Ieruselema na ġeiaġomato Iuda tarimari na ġeruġa-ġeġeraġiato, benamo ġevaġa-daġaiato guruġari gwaġiġiri ġutuma ġekiraġirito, senaġina ġeri guruġa tu asi vaġa-moġoniri gaburi. <sup>8</sup> Benamo Paulo ma evaġa-veseto, ekirato, “Iuda tarimari ġeri taravatu, e Rubu Veaġa, ema Roma verena vaġa-rakavari ġana, veiġa rakavana ta asi aveiato.”

<sup>9</sup> Senaġi Festo na Iuda tarimari bene vaġa-iakuri ġana Paulo edanaġiato, ekirato, “Ġoi ourani Ieruselema ġana bono varaġe, be mai ġevaġa-daġamuni guruġari tu monai vau bana seġaġiri ba?” <sup>10</sup> Paulo evaġa-veseto, ekirato, “Au tu Kaisara, Roma ġeri vere, ġena Kota gabuna ġoiranai aruġani, be mainai Kota na vevaġa-iobuka veiġana au ġegu ai bene veia. Au na Iuda tarimari vaġa-rakavari veiġana ta tu asi aveiato, ġoi tauġemu maki ribamu ġinikau. <sup>11</sup> Bema taravatu asi akorana-iaġiato o mase veiġana rakavana ta aveiato, voina tu bana mase neganai, au tu asi akira-sirivaġini bana mase ġana tu-na. Senaġi bema mai Iuda tarimari ġeri vevaġa-daġa guruġari au iatagu ai ġekiraġirini tu asi moġoni nai, tarima ta asi ġena seġuka au bevini-vanaġiguni ġia ġeri ai. Au aurani tu Kaisara na bene seġaġigu!”

<sup>12</sup> Benamo Festo ma ġena kanisoro ġesi ġeguruġa-guruġato murinai, Paulo evaġa-veveato, ekirato, “Kaisara ġenai bonoġinoġi lorinai, Kaisara ġenai boiaġoni!”

### Paulo Agripa e Berenike ġoirari ai

<sup>13</sup> Ġaro kotari ġevanaġito murinai, vere Agripa e tobana Berenike, Festo rakaġi-tana e beġene vaġa-namoa ġana, Kaisarea ai ġeraġasito. <sup>14</sup> Monai ġaro kota vovoka ġetanuto murinai, Festo na Paulo guruġana vere ġena ekiraġi-ginikauto, ekirato, “Tarima ta tu mainai maiġa. Ġia tu Feliki na dibura numai eraga-kwaneato. <sup>15</sup> Au Ierusalemata ġana aiaġoto nai tu, Iuda ġeri Rubu Veġa vereri baregori e Iuda vereri na Paulo ġevaġa-daġaiato guruġari ġegu ai ġeġwa-iaġorito, e au ġenoġiguto, ġekirato, ġia ġenai vevaġa-iobuka veġana bana veia. <sup>16</sup> Senaġi au na avaġa-veserito, akirato, ‘Ġita Roma tarimara ġera maġuri nuġanai ġevaġa-daġaiani tarimana tu asi roġo bita vaġi-mase guineani. Ġia tu ġevaġa-daġaiani tauri ġesi beġe raka-vegogoni, ema ġevaġa-daġaiani tarimari ġoirari ai ġevaġa-daġaiani guruġari bevaġa-veve guinerini roġo.’ <sup>17</sup> Moġa lorinai ġia ema au mainai ġaraġasito nai tu, au tu asi ma avaġa-nogato. Senaġi elaġanito nai, Kota ġabunai atanu-tarito, benamo akirato, Paulo ġeġori-iaġomaia atato. <sup>18</sup> Vevaġa-daġa tauri ġeruġa-vaesito nai, au mataboru atuġa-maġito tu, veġa rakavari vevaġa-daġari beġe veini atato, senaġi asiġina. <sup>19</sup> Ġia ġeri ġuruġa mabarari tu, tauġeri ġeri toma-rakariġo dabarari veġare-veġareri kotari, ema tarima ta arana Iesu guruġana moġo. Iesu tu emaseto, senaġi Paulo ekirani, ġia tu maġuri. <sup>20</sup> Mo dagara dabarari vetauvetauri au ġegu ai tu egwaġiġito. Moġa lorinai au na Paulo adanaġiato, eurani Ierusalemata ġana bene iaġo ba, monai vau ġia ġevaġa-daġaiani guruġari bana vaġa-iobuka iobukari. <sup>21</sup> Senaġi Paulo enoġinoġito, dibura numanai moġo beġene ġita-ġaua, bene iaġo mo, Kaisara na vauro bene seġaġia. Moġa lorinai akirarito, dibura numanai beġene ġita-ġaua, bene iaġo mo, Kaisara ġenai bana tuġu-iaġoa.”

<sup>22</sup> Benamo Agripa na Festo ekiraiato, ekirato, “Au aurani mai tarima tauġegu na bana seġaġia.” Festo evaġa-veseto, ekirato, “Boinani vau boseġaġiani.”

<sup>23</sup> Elaġanito, benamo Agripa e Berenike tu ġeveġabi-raġeto, dabuġa marevari maki barego lelevaġiri ġeveirito, benamo ma marevari ġesi Kota numanai ġema raka-toġato, vetari ġorikauna tarimari baregori e vanuġa barana tarima baregori ġesi. Festo eguruġato, benamo Paulo ġema ġori-toġaiato. <sup>24</sup> Benamo Festo ekirato, “Kini Agripa e ġai ġesi boġoma fofori tarimami mabarami! Mai tau maiġa ġoġitaiani. Ġia tu Iuda tarimari Ierusalemata e mainai Kaisareai maiġeri na ġevaġa-daġaiato guruġana au ġegu ai ġeġwa-iaġoato. Ġia ġekoġoto, ġekirato, ġia tu asi ma bene maġuri-iaġo. <sup>25</sup> Senaġi ġia ġenai veġa ta asi adoġariato bene mase ġana. Ma ġia tauġena, Kaisara arana enoġinoġito. Moġa lorinai, ġia tu Kaisara ġenai bana tuġu-iaġoa atato. <sup>26</sup> Senaġi au tu asi ariba-ginikauni, ġita ġera vere barana ġenai fefa tu kamasi batoreani. Moġa lorinai ġomi ġoirami ġana baġori-iaġomaia, e namo barana tu, ġoi ġoiramu ġana, Kini Agripa. Be mainai sidanaġi-ginikaua, be mai vetauve-tauna kara bitana doġaria guruġana tu Kaisara ġena bana tore-iaġoa. <sup>27</sup> Korana au atuġamaġini tu asi roroġoto, mai dibura tarimana au na batuġu-iaġoani, a vaġa-daġana guruġana tauna korikori tu asi batuġu-kauani.”

### Paulo tauĝena vetoreĝau guruĝari ekiraĝirito Agripa ĝoiranai

**26** Agripa na Paulo ekiraiato, ekirato, “Maoro avinimuni, tauĝemu novevari-fiu.” Benamo Paulo ĝimana eĝabi-vaishiato, benamo ĝena vetoreĝau guruĝari esinaiato, ekirato: <sup>2</sup>“Kini Agripa! Au tu aiakuni, korana Iuda tarimari na ĝevaĝa-daĝaguni dagarari mabarari tu, toma ĝoi ĝoiramu ai avaĝa-veserini. <sup>3</sup>Korana tu Iuda seneri na veĝata ĝeri veĝa e veĝareveĝare mabarari ĝoi tu ma ribamu ginikau. Moĝa lorinai anoĝimuni, bono vevaĝa-gwaĝiĝi, be ĝegu guruĝa bono seĝaĝiri.

<sup>4</sup>Au aiĝesi atanuto, misigu na veĝata eiaĝomato mo toma, ĝegu tanobarai e Ierusalemaj, Iuda tarimari mabarari tu ma ribari. <sup>5</sup>Au tu tovtovona na veĝata ĝeribaguto, ĝeguruĝa-fofori bema ĝeurani nai tu. Ĝegu maĝuri evesinato na veĝata au tu Farisea doĝorona tarimagu. Toma-rakariĝo korana-iaĝina ĝevaĝa-gwaĝiĝiani doĝorona. <sup>6</sup>Ma toma au Kota gabunai bama ruĝa, korana tu Barau na ĝai sen-ema ekira-torerito guruĝana atuĝamaĝi-kauani nai. <sup>7</sup>Ĝai ĝema doĝoro gabanana ruarua (12) na mo guruĝa-tore ĝevaĝa-moĝoniani, ma ĝenari-taĝoani bemoĝonini naima, ĝia na Barau ĝetoma-rakariĝoani boĝi-laĝani ma kokoreri ĝesi. Vere o, au tu mo tuĝamaĝikau ĝaramanai Iuda tarimari na ĝevaĝa-daĝaguni. <sup>8</sup>Karase nai ĝomi Iuda tarimami tari tu ĝokirani, Barau na mase tarimana tu asi ilaila ma bevaĝa-variĝisiani?

<sup>9</sup>Au maki atuĝamaĝito, dagara ĝutuma gorogoro bana veiri, Iesu Nasareta tarimana arana bana lau-ĝaua ĝana. <sup>10</sup>Ierusalemaj au tu moĝesi aveito-ĝoi. Rubu Veaĝa vereri baregori na seĝuka ĝeviniguto, benamo Barau ĝena tarimarima veaĝari ĝutuma dibura numanai atorerito-ĝoi, ema beĝene vaĝi-maseri ĝetato-ĝoi nai tu, au maki beĝene mase guruĝana avaĝa-moĝoniato-ĝoi. <sup>11</sup>Ĝaro vovoka Iuda tarimari ĝeri rubu tatai araka-toĝato-ĝoi, benamo akwari-korukorurito-ĝoi, ema Iesu beĝene kiraĝi-rakavaia ĝana avaĝa-urarito-ĝoi. Au na abaruvini-rakava rakavarito-ĝoi, naima vanuĝa baregori boruri ĝari maki aiaĝoto-ĝoi, bana vaĝa-midigu midiguri e bana lai-lausilaisiri ĝana.”

### Paulo evetuĝamaĝi-kureto varina

<sup>12</sup>“Mo veĝa uranai Rubu Veaĝa vereri baregori na maoro ĝeviniguto ema ĝe-tuĝuguto, Damaseko ĝana aiaĝoto. <sup>13</sup>Benamo, Verebara, au tu dabara na roĝo aiaĝoto-ĝoi, a ĝaro tu tubuamaj, benamo ĝaro mamana maki evanaĝiato mamana, guba na emariĝoto, aĝitaiato, ma au ĝesi ĝaiaĝoto tarimari e au enanagitarimato. <sup>14</sup>Ĝai mabarama tano ai ĝaketo-tarito. Benamo au na garo ta aseĝaĝi-ato, Heberu garo ai au evaĝa-guruĝaguto, ekirato, ‘Saulo, Saulo! Karase nai au ovaĝa-rakavaguni. Mani ĝoi na tu ĝau masakona matana ofudiani, naima ĝemu ai tu gwaĝiĝi ema tauĝemu ovevaĝa-rakavani.’ <sup>15</sup>Benamo au akirato, ‘Vereĝauka, ĝoi tu deikara?’ Vereĝauka evaĝa-veseto, ekirato, ‘Au tu Iesu, ĝoi na ovaĝa-rakavaguni tarimagu. <sup>16</sup>Senaĝi novariĝisi, ema noruĝa-tari. Au ĝoi ĝemu ai bafofori korana tu navaĝa-ruĝamu, be au ĝegu vetuĝunaĝi tarimamu ai bono iaĝo ĝana. Ema toma kara boĝita dagarari e ĝoirai kara bavaĝa-ĝitamuni dagarari maki tarima tari ĝeri bonoa kiraĝi-foforiri ĝana. <sup>17</sup>Au na Isaraela tarimari e irau bese tarimari ĝerina bavaĝa-maĝurimuni. Ĝoi tu au na atuĝumuni, <sup>18</sup>matari bono vaĝa-fafari, ema mukuna na bono ĝori-kureri, be mamaj beĝene ruĝa, ema Satani ĝena seĝuka na bono ĝabi-vaĝiri, be Barau rekenaj beĝene ruĝa. Benamo Barau na ĝeri rakava bene tuĝamaĝi-

fitoĝari ema Barau na eĝabi-viriĝirito ma evaĝa-veaĝarito tarimari ĝesi gabu beĝene ĝauna, korana au ĝegu ai ĝeveĝabidadamani nai.’

### Paulo na ĝena ĝauvei ekiraĝiani

<sup>19</sup> Moĝa lorinai, Kini Agripa, au tu mo mata-vanaĝi guba na ema forofito dagarana ĝenai tu asi akira-sirivaĝito. <sup>20</sup> Guine tu Damaseko ai e Ierusalemaj aĝobatato, moĝa murinai Iudea tanona mabaranai e irau bese fakari ai maki. Au aĝobatato-ĝoi nai tu, akirarito-ĝoi, ĝeri rakava ĝerina beĝene vetuĝamaĝi-kure, Barau ĝenai beĝene iaĝo. Benamo ĝeri vetuĝamaĝi-kure tu ĝeri veiĝa na beĝene vaĝa-moĝoniri. <sup>21</sup> Mo tu moĝa ĝaramanai Iuda tarimari na Rubu Veaĝa nuĝanai ĝeĝabi-tariguto, ĝevaĝi-masegu ĝetato. <sup>22</sup> Senaĝi mo ĝaro na beiaĝoma mo maitoma, au tu Barau na evaĝa-kavaguni. Moĝa lorinai mai bama ruĝa-tari, tarima mabarari misina na beiaĝo baregona ĝoirari ai ama guruĝa-foforini. Au na kara boruna ta tu asi akiraĝiani, senaĝina peroveta tarimari na e Mose na kara ĝekiraĝiato beĝorani dagarana moĝo. <sup>23</sup> Dagarana maiĝa, Keriso tu bene midigumidigu, ma tau giniguinena mase na ma bene variĝisi-ĝenoĝoi, benamo Barau ĝena mama varina Iuda tarimari e irau bese tarimari ĝeri ai bene vari-fiua.”

<sup>24</sup> Paulo moĝesi evetoreĝauto nuĝanai tu, Festo na efarara-viniato, ekirato, “Paulo, ĝoi tu bobabo! Ĝemu riba baregona na evaĝa-babomuni.” <sup>25</sup> Paulo evaĝa-veseto, ekirato, “Verebara Festo, au tu asi bababo. Au na kara akiraĝirini guruĝari tu moĝoni e maĝata. <sup>26</sup> Kini Agripa! Au tu ma kokoregu ema asi garigu ĝesi ĝoi bavaĝa-guruĝamuni, korana mai dagara maiĝeri mabarari ĝoi tu ma ribamu. Au ribagu, mai bakiraĝiri dagarari mabarari ĝoi ĝemu ai ta tu asi bevekure-toĝa, korana maiĝeri dagara tu vekuretoĝa gabunai ta asi eĝorato. <sup>27</sup> Kini Agripa, ĝoi na mai peroveta tarimari ĝeri guruĝa ovaĝa-moĝonirini ba? Au ribagu ĝoi na ovaĝa-moĝonirini.”

<sup>28</sup> Agripa na Paulo ekiraiato, ekirato, “Mai horaĝauna kotunai, dori moĝo nuĝagu bovaĝa-moiraia, benamo dori moĝo Keriso bavaĝa-moĝonia.” <sup>29</sup> Paulo evaĝa-veseto, ekirato, “Horaĝauna kubinai ba maukanai, senaĝi au na Barau anoĝiani, ĝoi e initoma au ĝeseĝaĝi-taĝoguni tarimami mabarami au kavana boĝoro vei, senaĝina mai ĝebarubaruguto kavana moĝo asiĝi.”

<sup>30</sup> Paulo moĝesina eguruĝa-ĝosito, benamo kini, e gavana, e Berenike, ema ĝia ĝesi ĝetanuto tarimari mabarari ĝevariĝisito. <sup>31</sup> Ĝeraka-rosito murika ĝana, benamo ĝeguruĝa-guruĝato nai tu ĝekirato, “Mai tau tu veiĝa rakavana ta voina tu bere mase o dibura numai bere tanu veiĝana ta tu asi eveiato.” <sup>32</sup> Benamo Agripa na Festo ekiraiato, ekirato, “Bema asi bere kira, Kaisara na ĝena guruĝa benea seĝaĝia asi beresi nai, mai tau tu tara ruĝa-vaĝia.”

### Paulo Roma ĝana eiaĝoto

**27** Itali ĝana baĝana iaĝo guruĝana emoĝonito nai tu, Paulo e dibura tarimari kotari tu vetari ĝitaĝauna tarimana arana Iulio ĝimanai ĝetorerito. Ĝia tu Kaisara ĝena vetari doĝorona nuĝanai. <sup>2</sup> Ĝai tu Adramitio boutina tai ĝaraĝeto. Mo bouti tu Asia tanona koneri ĝari beiaĝoni boutinai. Benamo mo bouti na ĝadauto. Makedonia tarimana ta arana Aristako maki ĝai ĝesi ĝaiaĝoto. Ĝia tu Tesalonika na eiaĝomato.

<sup>3</sup> Ma eiaĝanito vau Sidono ai ĝaraĝasito. Iulio na Paulo evetuĝa-ĝwaiato, benamo maoro eviniato, karonu ĝeri ai bene iaĝo, be ĝena ura dagarari beĝene vinia.

<sup>4</sup> Mo gabu ġaraga-kwaneato nai, Saipras motumotu ravaravana rekena na ġaiaġoto, korana iavara tu ġoirama na eiaġomato-ġoi. <sup>5</sup> Kilikia e Pamfilia iatari na ġaragavanagito, ġaiaġoto, Mira ai ġadaro-kauto. Mira tu Likia tanonai. <sup>6</sup> Monai vetari ġitaġauna tarimana na Alesandria boutina, Itali ġana beiaġoni boutina, edoġariato, benamo monai evaġa-raġe vanaġimato.

<sup>7</sup> Ġaro vovoka tuġama tuġama moġo ġadau-iaġoto-ġoi, e ma vekwaraġima ġesi Kenido sevinaġi ġaraġasito. Monai iavara na eraga-ġaumato lorinai, Krete motumotu ravaravana rekena na ġaiaġoto. Mo tu Salmone duduna reke ta kefona na. <sup>8</sup> Ma vekwaraġima ġesi fenu rikiri na ġaiaġoto mo, gabu ta arana Darokau Gaburi Namori ai ġaraġasito. Mo gabu e Lasea vanuġana vefakari tu asi manaġa.

<sup>9-10</sup> Ġaro vovoka monai varau ġekorito, e bouti na monana rei-iaġo tu gwaġiġi e ma garina, korana ġaniveaġa ġarona maki varau ekorito. Moġa lorinai Paulo na ekira-toreġaurito, ekirato, “Tau mabarami, au aribani ġita ġera iaġoiiaġo tu berakavani. Ġera farefare mabarari beġe rekwarekwani ema bouti maki berakavamoġovaġini. Dia maiġeri dagara moġo, senaġi ġita ġera maġuri maki bita fitoġarini.”

<sup>11</sup> Senaġi vetari ġitaġauna tarimana na tu bouti taritarina tarimana baregona e bouti tarimana garori eseġaġirito, a Paulo ġena guruġa tu asi eġabi-raġeato. <sup>12</sup> Mo darokau gabuna faraka e iavara ġueri ai tu asi namo. Moġa lorinai ġutuma na tu ġeurato baġana dau-tovo, be Foeniki ai vau faraka e iavara ġueri baġana ġabiri. Foeniki tu Krete ai darokau gabuna ta. Reke ta tu iavaraġere (o south-west) eġoiraiiani, o reke ta tu buibara (o north-west) eġoiraiiani.

### Iavara na davara evaġa-rakavaġiato

<sup>13</sup> Iavaraġere evesinato, tuġana moġo eġauto-ġoi nai, ġia ġetuġa-maġito tu ġeri ġaro namona beġe doġaria. Moġa lorinai dogo ġeinu-raġeato, benamo Krete fenu rikiri na moġo ġedau-iaġoto. <sup>14</sup> Asikauna tu iavara baregona arana koiviru, motumotu iataragena na emariġoto. <sup>15</sup> Bouti ai ema kwari-kauato, benamo ġai tu asi ġema daunaġi dabarana. Goira ġana iaġo uradikana asi ġaveito, senaġi iavara ġena urai moġo ġadauto. <sup>16</sup> Motumotu misina arana Kauda gabigabina rekenaġi ġadau-toġato vau, ravaravana na ġadau-iaġoto. Monai vauro bouti misina ġobina ġatorea ġatato, vaġa-maġurina uranaġi ġavekwaraġi-rakavato. <sup>17</sup> Ġia na bouti misina ġeinu-raġeato bouti tuġuna ġana, benamo bouti ġesi ġebaru-kafaiato bene ġabi-taria ġana. Ema ġegarito, be bouti faraina maki ġeinu-riġoato, benamo ġareito moġo. Ġia ġeri gari korana tu iavara na bouti beġwa-iaġoani mo Sirtis ai Afrika rekenaġi davara sefana mirina tai bea tanukauni garina. <sup>18</sup> Mo iavara baregona ema ureure baregori ġesebonato nai, bouti maki dori moġo ġevei-buruato-ġoi. Moġa lorinai elaġanito nai tu, bouti ai ġeġurarito farefareri mabarari davaraġi ġebubu-reirito, bouti bene meraġa ġana. <sup>19</sup> Ġaro vaġa-toitoinali tauġeri ġimari na bouti farefarena ma ġefu-riġorito. <sup>20</sup> Ġaro ġutuma varau ġeiaġoto, ma ġaro e visiġu asi ġefofoforito, ema iavara maki ebarego-sirivaġito. Benamo ġema tuġamaġikau mabarari ġekorito, korana ġatuġa-maġito, ġai tu asi ġema maġuri dabarana.

<sup>21</sup> Ġaro ġutuma asi ġeġaniġanito murinai, Paulo ġoirari ai eruġato, benamo ekirato, “Ġomi tau, ġomi tu au garogu ġoro seġaġia, be Krete na asi tara dau-rosi; be mai farefare maiġesi asi tara bubu-fitoġari. <sup>22</sup> Senaġi toma au na alaunaġimini, akirani, boġono kokore! Korana tu ta asi bomaseni. Senaġi bouti ġereġana moġo moġoni berakava-moġovaġini. <sup>23</sup> Au tu Barau ġena tarima ta ema au tu ġia vetuġunaġina

aiāgo-vinini. Ġoraġani boġi, ġia ġena aneru ta sevigu ai ema ruġa-tarito, <sup>24</sup> benamo ekirato, ‘Paulo, asi bono gari. Ġoi tu Kaisara ġoiranai roġo boa ruġani, ema Barau ġena namo ġoi ġemu ai ġenana, ġoi ġesi boġo iaġoma tarimari mabarari maġuri beġe doġariani.’ <sup>25</sup> Moġa lorinai, ġomi tau, au na akiramini, boġono kokore. Korana au na Barau tu аваġa-moġoniani, kara aneru na bekira-varagu tu bekiraġiri ilailanai beġe ġorani. <sup>26</sup> Senaġi ġita tu iavara na motumotu tai bea kwari-kaurani.”

<sup>27</sup> Boġi vaġa-gabanana vasivasi (14) ġai tu Adria Davaranai iavara na ekwarirakao rakaomato-ġoi. Boġi nuġanai bouti ġwaragana tauri ġevemami-raġito, ġai tu tano varau ġakavinaġiato. <sup>28</sup> Moġa lorinai varo dudunai dagara metona ta ġebarukauato, benamo davarai ġefiu-reiato. Moġa nuġanai ġeribato, davara ġena varioġo tu 37 mita kavana. Asi luana ma ġeġitaiato, monai davara ġena varioġo tu 27 mita moġo. <sup>29</sup> Bouti fore ġeri ai beverarakauni garinai, bouti murina rekenai dogo vasivasi ġefiu-reirito. Benamo ġeġauġauto bene raga-laġani ġana. <sup>30</sup> Bouti ġwaragana tauri ġeri ura tu beġene raga-lemma. Moġesina naima ġia na bouti misina dobu ai ġetore-reiato, ġevei-ġofakauto bouti ġoiranai dogo kotari moġeri ġeiaġoto, ġea tore-riġori ġetato. <sup>31</sup> Senaġi Paulo na vetari ġitaġauna tarimana e vetari tauri ekirarito, ekirato, “Bema bouti ġwaragana tauri bouti ai asi beġe tanuni nai tu, ġomi maki asi boġo maġurini.” <sup>32</sup> Moġa lorinai vetari tauri na bouti misina varori ġekari-ġuturito, benamo ġevaġa-rei kwareġaiato.

<sup>33</sup> Dori elaġanito-ġoi nai, Paulo na ġia mabarari enoġirito, ġaniġani kota beġene ġani. Ġia ekirato, “Ġomi tu ġaro gabanana vasivasi (14) boġo vaġa-noga-iaġia, kara ta roġosi ġoro ġania. <sup>34</sup> Moġa lorinai boġono kokore e maġuri tuġamaġinai anoġimini, ġaniġani kota ġoġani. Korana ġomi debami ġuiri tu sebona ta maki asi berekwa-rekwani bene. <sup>35</sup> Moġesi ekirato murinai, ġia na beredi ta eġabiato, benamo ġia mabarari ġoirari ai Barau evaġa-namoato, ma edudu-ġutuato, benamo eġanito. <sup>36</sup> Ġia mabarari maki nuġari ġevaġa-gwaġiġirito, benamo ġeġaniġanito. <sup>37</sup> Bouti nuġanai ġai mabarama tu 276. <sup>38</sup> Ġia mabarari ġeġani-maseto, benamo bouti bene meraġa uranai, widi tu davarai ġefiu-reirito.

### Geta o ureure na bouti ebota-kirakiraiato

<sup>39</sup> Elaġanito nai, bouti ġwaragana tauri na tanobara vetoġana tu asi ġeġita-ġinikauato. Senaġi ġaruka tanobara na davara ġana eraka-rosini, ma fenuna koutoġana ġesi moġo ġeġita-iaġoato. Benamo ġetuġamaġito, bema ma dabara nai tu, monai bouti beġere vaġa-raga-raġea ġetato. <sup>40</sup> Benamo dogo varori ġekari-ġuturito, davarai ġeraga-kwanerito. Mo hora sebonai leva o bara ġebaru-taririto varori maki ġeruġarito. Benamo ġoira rekenai farai ġediuato, iavara na ġoira fenuna ġana bene kwari-iaġori uranai. <sup>41</sup> Senaġi bouti tu semure ġenai everarato, benamo etanukauto. Bouti ġoirana tu evedaġi-nunuto, a murina rekena tu ureure na ebota-kirakiraiato, e eveluki-rovorovoto. <sup>42</sup> Vetari tauri ġeboioġato, dibura tarimari tu beġene vaġi-maseri, korana beġe nau-rakani, benamo beġe raga-lemani garina. <sup>43</sup> Senaġi vetari ġitaġauna tarimana ġena ura tu Paulo bene vaġa-maġuria, moġa lorinai ġia na ekira-ġoirito, mo veiġa asi beġene veia. Benamo ma nau ribari tauri ekirarito, davarai ġeburi-rei, benamo beġene nau-guine-iaġo fenu ġana. <sup>44</sup> A tarima mabarari tu ġau tubiri o bouti taviri tari beġene ġabiri vau, ġia muriri na beġene rei-iaġo. Mo dabara mabarari tanobara ġea doġariato, ta asi erekwa-rekwato.

### Malta motumotunai

**28** Ta davarai kamasi ta asi eveito, mabarama namo moĝo kone ai ĝaraĝekauto. <sup>2</sup>Benamo monai vauro ĝaribato, mo motumotu arana tu Malta. <sup>3</sup>Mo motumotu tarimari na ĝai ĝemai tu veiĝa namo vedaureana ĝeveiato. Korana mo ĝura e nagure nuĝanai ĝema karava bara ta ĝegasiato ĝai bene tunu-seĝuseĝuma ĝana. <sup>4</sup>Paulo eiaĝoto lako degona ta ea ĝabiato, benamo karavai ema tore-raĝeato. Mota ta mo lako degonai karava gugurana na eĝabiato, benamo ema nene-rosito, ma Paulo ĝimanai ekafukauto. <sup>5</sup>Mo motumotu tauri na mo mota Paulo ĝimanai ĝerokautaĝo ĝeĝitaiato, benamo tauĝeri ĝevemugu-vinito, ĝekirato, “Asi ĝofaĝofa, mai tarima tu vevaĝideba tarimana. Korana davara na tu benau-maĝuri, senaĝina godio vavinena Dike tu asi veĝata eurani ĝia bene maĝuri.” <sup>6</sup>Senaĝi Paulo na mo mota tu karavai ekora-fiuraĝeato, ma Paulo tu rakava ta asi eĝoitaĝoato. <sup>7</sup>Tarima ĝetuĝamaĝito, Paulo tauĝanina tu toma egoba-vaisi-raĝeni, ba toma eketo-tarini, benamo emaseni. Ĝevaĝa-noga manaĝato, senaĝi Paulo ĝenai kara rakavana ta tu asi eĝorato. Benamo ĝia ma ĝevetuĝamaĝi-kureto, benamo ĝekirato, “Ĝia maki barau ta!”

<sup>8</sup>Mo gabu e motumotu tauna baregona arana Publio. Ĝia ĝena gabu tu asi manaĝa. Ĝia na eĝabi-raĝemato, e ĝaro toitoi veĝata ĝia ĝena varivari tarimamai evaĝa-iaĝomato. <sup>9</sup>Publio tamana tu keve e efurito-ĝoi, be genagenai egena-taĝoto-ĝoi. Paulo ĝenai eraka-toĝato, ma eĝuriĝurito, ema ĝimana iatanai etore-kaurito, benamo ĝena keve enamoto. <sup>10</sup>Mo veiĝa eĝorato, benamo mo motumotu ai keve tarimari mabarari Paulo ĝenai ĝeiaĝoto, benamo ĝia na ĝeri keve ĝerina evaĝa-namorito. <sup>11</sup>Ĝeri varevare dagarari vovoka ĝevinimato. Ma ĝadau ĝana bakunai tu ĝema iaĝoiaĝo ai baĝa ura-vinirini dagarari ma ĝevinimato.

### Romai ĝaraĝasito

<sup>12</sup>Ĝue toitoi murinai Alesandria boutina tai ĝaraĝeto. Mo bouti ai tu barau arana Dios natuna kafa merori ruarua vetoĝari o fikisari ĝeberarito. Mo bouti maki faraka e iavara ĝueri tu mo motumotu ai edoĝaririto. <sup>13</sup>Garagato mo Sirakuse ai ĝaraĝasito. Monai ĝaro toitoi ĝatanuto. <sup>14</sup>Monana ĝadau-ĝeĝeraĝi-iaĝoto mo Regio. Garo ta evanaĝiato murinai, gabina iavarana etoĝato, ma ĝaro vaĝa-ruaruanai vauro Puteoli ai ĝaraĝasito. <sup>15</sup>Monai tarikaka kotari ĝadoĝaririto. Ma ĝaro imaima ruarua (7) tu ĝia na monai ĝeĝabi-tarimato. Monana vau ĝaraka-iaĝoto Romai ĝaraĝasito. <sup>16</sup>Monai tarikaka kotari varima ĝeseĝaĝiato, benamo ĝai ĝemai ĝeiaĝomato mo, vanuĝa keiri arari Apia-Foru e Taven-Toi ĝana. Paulo na eĝitarito, benamo Barau evaĝa-namoato, e tauna egwaĝiĝito.

### Roma nuĝanai

<sup>17</sup>Romai ĝaraĝasito nai, Paulo tu maoro ĝeviniato, ĝereĝana bene tanu. Senaĝi vetari tauna ta na moĝo bene ĝita-ĝaua. <sup>18</sup>Ĝaro toitoi ĝevanaĝirito murinai, Paulo na Iuda ĝedebaiato-ĝoi tauri ekea-vegogorito. Ĝema raka-vegogoto, benamo ĝia na evaĝa-guruĝarito, ekirato, “Tarikakagu, au na ĝera tarima ta asi avaĝa-rakavaĝiato, ema senera ĝeri veiĝa maki asi avaĝa-rakavarito. Senaĝi au tu Ierusalemai ĝeĝabiguto dibura tarimana ta noĝa, benamo Roma ĝeri gavamani ĝimari ai ĝetore-kauguto. <sup>19</sup>Ĝia na ĝedanaĝiguto, ma ĝegu guruĝa ĝeseĝaĝiato nuĝanai tu ĝeriba-maoroto, au tu asi ĝegu vei-rakava ema beĝene vaĝi-masegu korana ta maki

asi ġedoġariato. Moġa lorinai ġeurato beġene tuġu-vaġigu. <sup>19</sup> Senaġi Iuda tarimari na mo ura tu asi ġeġabi-raġeato. Moġa lorinai au tu asi ġegu dabara ta, naima anoġi-noġito Kaisara na ġegu guruġa bene seġaġia. Dia au tu ġegu tarimarima navevaġa-maoro-viniri ġana atato. Asiġi. <sup>20</sup> Moġa lorinai bakea-iaġomami, au ġesi sima guruġaguruġa ġana. Korana Isaraela ġena tuġamaġikau lorinai au maiġesi ġebarubaruguto.”

<sup>21</sup> Ġia na ġevaġa-veseato, ġekirato, “Ġoi guruġamu fefana ta Iudea na asi ġadoġariato. Tarikakara monana ġeiaġomato tauri na maki varimu rakavana ta asi ġeki-raġiato, be asi ġaseġaġiato. <sup>22</sup> Senaġi ġai ġaurani tu ġoi ġemu tuġamaġi guruġana baġana seġaġia. Korana gabu mabarari ai tarimarima na ġoi na mai doġoro tu ġeroritoreani.”

<sup>23</sup> Moġa lorinai ġia na ġaro ta ġeġabi-viriġiato. Mo ġaro ai tarima-rima ġutumabara Paulo ġena tanu gabuna ġana ġeiaġoto. Boġiboġi na veġata evesinato eiaġoto mo lavilavi, Paulo na Barau ġena Basileia eġobata-iaġiato. Ema Mose ġena taravatu na e peroveta tauri ġeri buka na Iesu varina ġia ġeri ekiraġi-ġinikauto, Iesu beġene vaġa-moġonia uranai. <sup>24</sup> Tarima kotari na tu ġena guruġa ġeġabi-raġeato, a kotari na tu asi ġevaġa-moġoniato. <sup>25</sup> Ġia nuġari tu dia sebona, moġa lorinai ġerakarovorovoto. Senaġi roġosi roġo beġene raka nuġanai, Paulo na guruġa ta ekiraġiato, maiġesi ekirato, “Iauka Veaġa peroveta tarimana Isaia ġenana ġomi senemi tu guruġa moġonina ekira-vararito. <sup>26</sup> Korana iniġesi ekirato,

‘Noiaġo maiġeri tarima ġeri ai,  
benamo bono kira:

Seġaġi tu boġo seġaġini,  
senagi asi boġo riba-maoroni.  
Ġita tu boġo ġitani,  
senagi asi boġo ġita-fakani.

<sup>27</sup> Korana maiġeri tarima  
nuġari tu mukuna,  
seġari tu vekodobeġau,  
ema matari maki bubu.  
Irau matari na beġe ġitani  
e seġari na beġe seġaġini  
e beġe tuġamaġi-fakani,  
benamo beġe vetuġamaġi-kureni  
ema bavaġa-namorini garina.

(Barau tu moġesi ekirani).’

<sup>28</sup> Moġa lorinai au aurani ġomi boġono riba, Barau ġena vevaġa-maġuri varina tu irau bese tarimari ġeri ai etuġu-iaġoato, be ġia na beġe seġaġiani!” [<sup>29</sup> Paulo moġesi eguruġato murinai, Iuda tarimari ġerakato, ma tauġeri fakari ai moġo veġareveġare baregona ta ġeveiato.]

<sup>30</sup> Laġani ruarua tauġena na edavaiato-ġoi numanai etanuto. Ma ġia ġenai ġeiaġomato-ġoi tarimari mabarari eġabi-raġerito-ġoi. <sup>31</sup> Barau ġena Basileia, (ġena veġitaġau seġukana evaġa-ruġaiani maiġa), guruġana eġobata-iaġi vinirito-ġoi, ema Vereġauka Iesu Keriso varina evaġa-ribarito-ġoi ma kokorena ġesi. Ma tarima ta na tu asi ma ekiraġoiato-ġoi.



## PAULO ĜENA TORETORE ROMA EKALESIARI ĜERI

Roma vaĝa-foforina guruĝari

Paulo na mai fefa Roma ekalesiari ĝeri tu laĝani 56 ema 57 fakari nuĝari ta etoreato, mo tu Korinto ekalesiari vaĝa-toitoina ma evarivaririto nuĝanai etore-vinirito; mai tu Iesu emaseto murinai etoreato.

Paulo ĝena ura baregona Roma ĝana bene iaĝo, senaĝi Ierusalemema ĝana eiaĝoto roĝo (Apostolo 19:21). Monai Iuda tarimari tari na ĝeĝabi-tariato, ma ĝevaĝia ĝetato. Senaĝina Barau na enari-ĝaŭato, ma Roma ĝana bene iaĝo dabarana ekeoato. Moĝa lorinai Paulo tu Roma ĝana eiaĝoto laĝani 59 nuĝanai kavana.

Paulo Roma ĝana tu roĝosi bere iaĝo nuĝanai, mai fefa etore-vinirito. Paulo ĝena ura baregona tu, Barau ĝena Vari Namona ĝeri bene vaĝa-fofori ginikaua, ema Roma ekalesiari bene vaĝa-kokoreri ĝana (Roma 1:1 ema 11).

Roma bukana nuĝanai siri baregori tu karoa 1:16-17.

Mai fefa nuĝanai Paulo na Roma ekalesiari ĝeri dagara tari ekiraĝi-ginikaurito tu maiĝeri: 1) Iuda tarimari ema irau bese tarimari tu Keriso ĝena Vari Namona ĝenana vauro Barau ĝoiranai vei-iobukaiobuka tarimari beĝe ruĝa-tarini, a dia taravatu ĝenana. 2) Tanobara tarimari mabarari, Iuda tarimari ema irau bese tarimari, tu vei-rakava nuĝanai ĝetanuni (karoa 1-3). 3) Karoa 3-8 nuĝanai tu vevaĝa-roroĝoto varina e vevaĝa-veaĝa varina, ema Barau marevana mamana baregona befoforini varina. 4) Karoa 9-11 tu ĝabiviriĝi varina; Barau na Iuda tarimari asi beĝabi-raĝeri, Keriso asi ĝevaĝa-moĝoniani nai; ema Iuda tarimari Barau na ma beĝabiraĝe-ĝenoĝoirini, korana Keriso ĝenai ma beĝe veĝabidadamani. 5) Karoa 12-16 tu ekalesia doĝorona kamasi beĝene tanu Barau ĝoiranai.

### Paulo na apostolo ĝauveina eveiato, korana Barau na ekeaiato nai

**1** Au Paulo, Keriso Iesu ĝena vetuĝunaĝi taugu; ĝeguna mai fefa eiaĝosini. Au tu ekeaguto, ĝena apostolo tarimagu ai aiaĝoto, ema eviriĝiguto, Barau ĝena Vari Namona bana vari-fiua ĝana. <sup>2</sup>Mai Vari Namona tu guinenai Barau na peroveta tarimari mururi na ekiraĝi-toreato, benamo Buka Veaĝa nuĝanai ĝetoreato. <sup>3</sup>Mai tu Barau Natuna, ĝita ĝera Vereĝauka Iesu Keriso, varina. Ĝia tu tanobarai ema maĝurito, ema Kini Davida garakana. <sup>4</sup>Ĝia mase ĝenana evariĝisi-ĝenoĝoito, monana lauka Veaĝa na ma seĝukana ĝesi ĝita ĝerai evaĝa-foforiato ĝia tu Barau tuĝutuĝu Natuna. <sup>5</sup>Iesu ĝenana ema ĝia arana bakunai, ĝai varevare-bara e apostolo dagina ĝaĝabiato, bese iraurau tarimari baĝana vetauri, Barau beĝene vaĝa-moĝonia e beĝene seĝaĝi-vinia. <sup>6</sup>Ma ĝomi maki, Roma nuĝanai ĝotanuni tarimami, ĝia ĝesi Barau na ekea-sebonamito, Iesu Keriso ĝena tarimarimai boĝono iaĝo ĝana.

<sup>7</sup>Ĝomi Roma nuĝanai ĝotanuni tarimami mabarami, Barau na eura-vinimini e ekeamito, ĝena veaĝa tarimari ai ĝoiaĝoto, ĝomi avaĝa-namomini: Barau ĝita Tamara ema ĝera Vereĝauka Iesu Keriso ĝerina varevare-bara ema maino ĝemi ai bene tanu.

### Paulo ĝena ura baregona Romai bene varivari

<sup>8</sup>Ĝegu guruĝa giniguinena, au ĝegu Barau atanikiu-viniani Iesu Keriso aranai ĝomi mabarami iatami ai, korana ĝemi veĝabidadama variri tanobara mabarana

nuġanai ġekiraġi-foforirini. <sup>9</sup> Natuna Varina Namona aġobata-iaġiani, ma iaukagu mabarana ġesi vetuġunaġina aiaġo-vinini Barauna ġoiranai, ġomi tu ġegu ġuriġuri mabarari nuġari ai asi atuġa-rekwamini. <sup>10</sup> Ema maki ġegu ġuriġuri nuġari ai anoġinoġi-bukani, akirani, bema initoma Barau eurani nai, ġegu dabara ta bene vei-rorogotoa, be ġemi ai bana iaġosi. <sup>11</sup> Korana au ġegu ura baregona tu bara ġi-tami, be Iauka Veaġa varevareri kotari ma bara vinimi, boġono kokore ġana. <sup>12</sup> Mo tu ġomi e au tara velaunaġi-vevini ġera veġabidadama nuġanai.

<sup>13</sup> Tarikakagu mabarami, boġono riba-maoro, nega ġutuma aurato ġomi ġemi ai bana iaġosi atato, senaġi ġegu iaġosi lairi tu ġevetoutou-kauni beiaġoma mo toma. Ġegu ura, irau bese tari na ġegu ġauvei ġenana vevaġa-kava ġeġoitaġoato ema Iesu Keriso ġena doġoro tarimari ai ġeiaġoto kavana, ġomi maki fakami ai bana vevaġa-kava. <sup>14</sup> Barau na ġauvei eviniguto, Grik tarimari e asi Grik tarimari, iaunega tarimari e vei-babobabo tarimari bana vaġa-kavari ġana. <sup>15</sup> Moġa lorinai au ġegu ura baregona tu, mai Vari Namona ġomi Romai ġotanuni tarimami mabarami ġemi ai maki bana ġobata-iaġia.

### **Vari Namona tu ma ġena seġuka**

<sup>16</sup> Barau ġena Vari Namona maiakana asi aveini, korana mai Vari Namona nuġanai Barau seġukana eġauveini, ġia ġevaġa-moġoniani tarimari vaġa-maġuriri ġana: Iuda tarimari ġeri ai guine, gabi ai vau bese irauirau tarimari. <sup>17</sup> Korana Vari Namona nuġanai tu Barau na tarimarima kamasi vei-iobukaiobuka tarimari bekiraġirini efoforini. Vei-iobukaiobuka tu veġabidadama nuġanai moġo korana na beiaġo mo magona, Buka Veaġai ekirani kavana: “Barau beġabidadama-viniani tarimana tu Barau na vei-iobukaiobuka tarimanai bekiraġiani, benamo bemaġurini.”

### **Barau ġena baru tarimarima ġeri ai**

<sup>18</sup> Barau ġena baru guba na efoforini, korana tarimarima na Barau asi ġekorana-iaġiani e veiġa iobukaiobukari asi ġeveirini. Ma ġeri veiġa rakavari ġerina guruġa moġonina ġelaulau-ġauani. <sup>19</sup> Barau beġe ribaiani maġuriri mabarari ġia ġeri ai tu fofori, Barau tauġena na evaġa-fofori ginikaurito. <sup>20</sup> Barau asi taġitaiani, senaġi guba e tanobara eveirito, monana beiaġoma mo toma, Barau vetoġana vekuretoġana tu taġita-ginikaurini. Ġia tu moġoni Barau tuġutuġu ema ġena tanu-vanaġivanaġi seġukana tu ġimana ġauveiri dagarari na maki ġevaġa-foforiani, be taribaiani. Moġa lorinai tarimarima tu asi ġena vetoreġau laina.

<sup>21</sup> Oba, ġia moġoni ma ribari Barau, be ġere vaġa-raġea, senaġi asi ġevaġa-raġeani ema asi maki ġetanikiu-viniani. A ġeri tuġamaġi tu vei-taġuitaġui na moġo ġevaġa-vonurini. Moġa lorinai ġeri tuġamaġi babobabori na nuġari ġevaġa-mukunarini. <sup>22</sup> Ġia tauġeri ġekirani, ġia tu ma iaunegari ġetoni, senaġi ġia tu ġebaboto. <sup>23</sup> Be maġuri vanaġivanaġi Barauna beġere vaġa-raġea, senaġi ġima vevei dagarari vaġa-ilailana ma beġe maseni tarimari iouiouri o laulauri, e boġa bairi, man, ema tano ai ġedarani dagarari iouiouri ġevaġa-moġonirini.

<sup>24</sup> Moġa lorinai Barau na veiġa mirori beġene vei ġana etao-fitoġarito, be beġene mata-boraġa nuġari ai ġeverere-iaġirini ilailanai, e tauġeri fakari ai vevaġa-maiaka veiġari irauirauri na tauġaniri beġene vaġa-rakavari. <sup>25</sup> Ġia na Barau ġena guruġa moġoniri gaburi ai tu ġofaġofa veiġari ġeveirini, ema Barau na eveirito dagarari

ġetoma-rakariġo vinirini e vetuġunaġiri ġeiaġo-vinini, a moġeri eveirito Barauna tu asiġi. Ġia moġo ġereġana sivevato-iaġia, asi dokona, asi magona. Amen.

<sup>26</sup> Tarimarima moġesi ġeveito nai, Barau na etao-fitoġarito, maiaka veiġari beġene uravini-lelevaġiri ġana. Ġeri vavine maki veġaraġo maġuriri roroġotori ġeiaġuirini, ma karori ġesi ġevékima-vevinini. <sup>27</sup> Tauri maki ġia kavana, vavine ġesi kima maġuriri korikori tu ġeiaġuirini, ma tau karori ġemata-ġaniġani-iaġirini. Mo tu tau tauġeri karori ġesi moġo boru ġeravani. Maiġeri veiġa rakavari voiri metori tu ġia tauġeri na ġeġabirini.

<sup>28</sup> Ma iatanai, ġia tu asi ġeurato, Barau beġene riba-ġinikaua e tuġamaġi-faka ġia nuġari iaġasiri ai beġene tanu, naima etao-fitoġarito ġeri tuġamaġi babobabori ġeri ai, be asi beġere veiri veiġari beġene veiri ġana. <sup>29</sup> Ġia tu rakava mabarari na ġevonuvonu-raġeto, veiġa rakavari, mata-ġaniġani, tuġamaġi barubaru, mama, vaġideba, veġareveġare, veribaġani e tarimarima vaġa-ketori veiġari, veroritore, <sup>30</sup> guruġa vemuriġoi, Barau ġeiau-rakavaiani, seġafore rakavarakava, kira-sirivaġi, e veiavi; vekiraġi-varaġevaraġe, rakava vei dabarari variġuri ġevaġa-reforini, sinatama garori asi ġeseġaġirini; <sup>31</sup> asi ġetuġamaġi-fakani, asi tuġamaġi-kauri tarimari, veuravini asi ribari tarimari, vevetuġaġwa asi ribari tarimari. <sup>32</sup> Oba, ġia tu ma ribari, Barau ġena veġausina o sisiba tu ekirani, vei rakava tarimari tu beġe maseni. Senaġi ġia na tu ġeveirini, ma dia ġia na moġo ġeveini, senaġi tarimarima kotari na ġeveirini maki ġeiau-namorini e ġeġabi-raġerini.

### Barau ġena vevaġa-maoro

**2** A ġoi tarima tari ovaġa-maororini ma kerereri ai oragani tarimamu, ġoi tu asi ġemu vekira-ġuniġau laina. Ġoi na tarima ta ovaġa-maoroani, ma ġena veiġa rakavari okiraġirini nai tu, ġoi tauġemu moġo ovevaġa-metoni e ovevaġa-kotani. Korana tu tarima ta ġena veiġa rakavari okiraġirini veiġari tu, ġoi tauġemu na maki oveirini. <sup>2</sup> Ġita tu ribara, Barau na moġesi veiġa rakavari ġeveirini tarimari bevaġa-maoro vinirini, ma meto bevinirini tu roroġoto. <sup>3</sup> Kamasi ġotuġamaġini, ġomi, tarimarima kika moġo, na tarimarima kotari ġovevaġa-maoro vinirini, ma nuġanai tu ġomi tauġemi na maki mo veiġa rakavari tu ġoveirini. Ġomi ġotuġamaġini Barau ġena vevaġa-maoro ġenana tu boġo raga-maġurini? <sup>4</sup> Ba Barau ġena namo baregona, e nuġana eġabi-tariani, e vevaġa-gwaġiġi iatari ai tu asi tauri ġotoni? Ba asi ġoribani Barau ġena namo baregona anina tu, ġomi boġono vetuġamaġi-kure ma boġono raka-kure ġana? <sup>5</sup> Senaġina ġomi nuġami tu ġovaġa-gwaġiġirini, ma asi ġovetuġamaġi-kureni. Maiġesi ġoveini tu tauġemi iatami ai ġemi meto iatai-iatai ġolabulabu-kaurini. Ma Barau ġena Kota baranai ġena vevaġa-maoro roroġotona beveiani mo ġaro ai vau ġena baru bevaġa-foforiani, benamo ġemi veiġa metori boġo ġabirini. <sup>6</sup> Barau na “tata karakara ġoveito ilailari ai tauri ma bevinimini.” <sup>7</sup> Tarima kotari tu ġobiri ġevetoreni veiġa namori ġeveini, Barau marevana, e ġabi-raġena, ema asi bedokoni maġurina ġevetauani. Barau na ġia tu maġuri vanaġi-vanaġi bevinirini. <sup>8</sup> A tarima kotari tu tauġeri ġeri namo moġo ġevetaurini, ema guruġa e maġuri moġonina tu ġeruġarini, ma rakava veiġari ġekorana-iaġirini. Ġia tu Barau na beiau-rakavarini ma baruna ġesi. <sup>9</sup> Beġe vei-rakavani tarimari mabarari tu rakava metona baregona ema midigumidigu baregona beġe ġabiani. Mo tu Iuda tarimarima ġeri ai beġe ġora-guineni, ma murinai tu irau bese tarimari ġeri ai maki beġe ġorani. <sup>10</sup> Senaġi veiġa namori beġe veini tarimari mabarari ġeri tu, Barau na

mareva baregona e vemataurai barana ema maino bevinirini: Iuda tarimari ġeri ai guine, ma murinai tu irau bese tarimari ġeri ai maki. <sup>11</sup> Korana Barau na tarimarima mabarari maġuri sebonai moġo eġabi-raġerini, ġeri veiġa loriri ai voiri evinirini.

### **Barau na Iuda tarimari e irau bese tarimari bevevaġa-maoro vinirini**

<sup>12</sup> Irau bese tarimari tu Mose ġena taravatu asi ribari, nuġanai ġevei-rakavani, moġeri mabarari beġe mase-buġani, (Barau na bekota-vinirini), taravatu murikanai enabe asi ribari; ema Iuda tarimari tu taravatu ma ribari, senaġina ġevei-rakavani tarimari mabarari tu taravatu na bevaġa-maoro vinirini. <sup>13</sup> Korana taravatu ġe-seġaġiani moġo tarimari, Barau ġoiranai tu dia vei-iobukaiobuka tarimari, senaġi taravatu ġekorana-iaġiani tarimari vau, Barau na ekiraġirini vei-iobukaiobuka tarimari.

<sup>14</sup> Oba, irau bese tarimari tu asi ġeri taravatu, senaġi ġeri maġuri nuġari ai taravatu na ekiraġirini veiġari tu ġeveirini. Moġeri mabarari tu ġeri taravatu ai ġeiaġoni, a ġia tu asi ġeri taravatu senaġi. <sup>15</sup> Ġia ġeri veiġa na evaġa-foforiani, Barau ġena taravatu na eura-vinirini veiġari tu ġia loriri ġuturi ai etorerito. Maiġa tu nuġari iaġasiri na maki evaġa-moġonirini, korana tu ġaro tari ai ġeri tuġamaġi na evaġa-daġa-raġerini, ma ġaro tari ai tu gogobari eragani. <sup>16</sup> Au na Vari Namona aġobata-iaġiani tu, Barau na tarimarima ġena veiġa e tuġamaġi vekuretoġari Iesu Keriso ġenana bevevaġa-maoro vinirini ġaronai vau beġe foforini.

### **Iuda tarimari e taravatu**

<sup>17</sup> A ġoi Iuda tarimamu tu kamasi otuġamaġini? Oba, ġoi tu ovekiraġini Iuda tarimamu. Ma ġoi tu taravatu ġenai ovetabekauni, e oveiavini, okirani, ġoi tu Barau ġena bese tarimamu. <sup>18</sup> Ma okirani, Barau tu ma ribamu e ġena ura veiġa namo vedaureari e rakavari oġita-learini, korana taravatu na evaġa-ribamuni nai. <sup>19</sup> Ġoi okirani, moġoni ġoi na mata-bubu tarimari boġori-kaurini, ema ġoi tu mukunai ġetanuni tarimari ġeri kere mamana; <sup>20</sup> ema vei-babobabo tarimari kira-rogori tarimamu, e mero keikeiri ġeri vevaġa-riba tarimamu, korana tu taravatu nuġanai iaunega ema guruġa moġoniri ġetanuni dagarari tu ma ribamu. <sup>21</sup> Ġoi na karomu tu ovaġa-ribarini, a ġoi tauġemu tu asi ovevaġa-ribani. Tarimarima oġobata-vinirini nai tu okirani, “Asi boġono lema,” otoni, a ġoi tu olemani. <sup>22</sup> Tarimarima asi beġene veġura-vanaġi otorini, ma ġoi tu oveġura-vanaġini. Kwaivakuku oiaurakava-vinirini, senaġi ġeri rubu nuġari farefareri tu olemarini. <sup>23</sup> Taravatu ovaġa-raġe lelevaġirini nuġanai tu, Barau ġoi na tu asi ogubakauani, ġena taravatu tu oseġafore-vinirini. <sup>24</sup> Buka Veaġai tu iniġesi ekirani, “Barau arana irau bese tarimari na vekaravari ai ġekira-fitoġaiani, korana tu ġomi ġemi kira-sirivaġi lorinai.”

<sup>25</sup> Mero tauġani kefirri lamavaġi veiġana tu ma tauna, bema taravatu bokorana-iaġirini nai. Senaġi bema taravatu okira-sirivaġi vinirini nai, ġemu kefi-lamavaġi veiġana tu asi taunai beiaġoni, ema ġoi tu kefina asi ġelama-vaġiato tarimana kavanai. <sup>26</sup> Irau bese tarimari tu kefirri asi ġelama-vaġito. Senaġi bema taravatu maġuriri korikori ġeveini nai tu, Barau ġoiranai ġia tu kefirri ġelama-vaġirito tarimari kavana, ene? <sup>27</sup> Oba, taravatu bukana tu ġemu ai, ema kefirri tu ġelama-vaġiato. Senaġina bema ġoi na taravatu okira-sirivaġiani nai tu, taravatu ekorana-iaġiani tarimana, mai tu irau bese tarimana, Kota seanai betanuni, benamo ġoi bevaġa-kotamuni. Aba, tauġani rekenai tu kefina asi ġelama-vaġiato, senaġi. <sup>28</sup> Bema tarima

ta tu arana korina moĝo Iuda tarimana ema kefi-lamavaĝi maki murika ema tauĝani kefina vetoĝana korina moĝo nai tu, ĝia tu dia Iuda tarimana korikori. <sup>29</sup> Asiĝina ĝinavaĝi. Iuda tarimana o Barau ĝena bese tarimana korikorina tu deikara nuĝana iaĝasina na ema ĝena tuĝamaĝi na evaĝa-foforiani, ĝia tu Iuda tarimana. Ema kefi-lamavaĝi veigana maki tarimarima loruna ĝutunai bene fofori. Ĝia tu dia taravatu guruĝari ĝetorerito moĝeri korana-iaĝiri ai beĝorani. Asiĝina. Ĝia tu Barau Iaukana na tarimarima nuĝana iaĝasinai beveiani dagarana. Mo tarima moĝa tu dia tarimarima na bevaĝa-raĝeani, senaĝi Barau na bevaĝa-raĝeani.

**3** Iuda tarimari na irau bese tarimari ĝevanaĝirito? Mero tauĝaniri kefiri ĝelama-vaĝirini ĝenana tu kara namona ĝedoĝariato? <sup>2</sup> Aba, dagara namori ĝutuma ĝedoĝaririto! Tovotovonai tu Barau na ĝia muruna guruĝari korikori evaĝa-ĝauna-iaĝirito.

<sup>3</sup> Ma bema Iuda tarimari kotari Barau ĝenana ĝeraka-veĝitato, asi ĝeri veĝabidadama nai tu aiĝesi? Moĝoni, Iuda tarimari kotari tu asi ĝeri veĝabidadama; senaĝi ĝia asi ĝeri veĝabidadama lorinai, Barau ĝena kiraĝitore maki asi taunai beiaĝoni ba? <sup>4</sup> Asiĝina ĝinavaĝi! Barau tu moĝoni veĝata, ĝena kiraĝitore asi eke-toni, ma tarimarima tu ĝeĝofaĝofani. Buka Veaĝai ekirani kavana, “Barau, ĝoi boguruĝani nai tu, beĝe vaĝa-moĝonimuni, ema Kotai beĝe ĝofaĝofa-iaĝimuni nai maki bovaĝa-darererini.”

<sup>5</sup> Tarima kotari na ĝeri vefafauĝau guruĝari beĝe kiraĝirini, beĝe kirani: Bema ĝita ĝera veigā asi roroĝotori na tu Barau ĝena vei-iobukaiobuka etore-fofori ginikauani nai, ĝita tu kara bita toni? Bita kirani, Barau na ĝena baru veigari ĝita iatarai ema-torerini nai tu maoro ba? <sup>6</sup> Asiĝina, Barau ma ĝena maoro. Bema Barau tu asi roroĝoto nai tu, ĝia na tanobara mabarana tu kamasi bevevaĝa-maoro vini-ani? <sup>7</sup> Tarima ta ma bevefau-ĝauni, bekirani, “Bema au ĝegu ĝofaĝofa na Barau ĝena guruĝa moĝoniri evaĝa-fofori ginikaurini ema ĝia marevana evaĝa-baregoani nai tu, kara dainai au tu roĝo mo evaĝa-daĝaguni rakava tarimagu etoni?” <sup>8</sup> Mo guruĝa tu babo, noĝa moĝo ini guruĝa kavana, “Rakava sivei, be namo bene fofori.” Tarima kotari na ĝai ĝevaĝa-rakavamani, ĝeĝofaĝofa-iaĝimani, ĝekirani, ĝai tu maiĝesi ĝakirani ĝetoni. Maiĝesi ĝai ĝeĝofaĝofa-iaĝimani tarimari Barau na voiri metona bevinirini tu asi vetoukauna, korana ĝeri ĝofaĝofa lorinai.

### Tarima ta asi iobukaiobuka

<sup>9</sup> Benamo kara ma bita toni? Ĝita Iuda tarimara moĝo namo, a irau bese tarimari tu asiĝi? Asiĝina ĝinavaĝi! Varau bita kiraĝia, Iuda tarimari e irau bese tarimari vekaravari ai ta tu asi ĝena rakava asi bita toni. <sup>10</sup> Buka Veaĝai tu maiĝesi ĝetoreato: “Tarima ta asi iobukaiobuka,

sebona kwarikwari ta maki asiĝina;

<sup>11</sup> tarima ta asi etuĝamaĝi-roroĝotoni,

ta na maki Barau asi evetauani.

<sup>12</sup> Mabarari ĝeraka-doĝe-muriĝito,

ĝia mabarari veigā iobukaiobukana tu asi ĝeveiani,

mabarari asi ĝevei-roroĝotoni,

ta veigā namo asi ribana,

sebona kwarikwari ta maki asiĝi.

<sup>13</sup> Ġia godokari mase guriri kouġari kavana; meari na ġofaġofa rakavari ġekiraġirini. Ġeri guruġa na mase ġevaġa-ġorarini, noġa moġo mota foisiniri ġia bibiġari ai ġetanuni.

<sup>14</sup> Mururi ai tu vevane e vekira-barubaru na ġevonu-fokafokato.

<sup>15</sup> Ġia tu ġeġarimoġi-rakavani vevaġi ema vevaġideba veiġari ai;

<sup>16</sup> ġeri iaġoiaġo gaburi ai tu vei-rovorovo e rakava ġeiaġuini.

<sup>17</sup> Maino maġuriri tu asi ribari.

<sup>18</sup> Asi ġeri vegubakau ta Barau ġenai.”

<sup>19</sup> Ġita ribara, maiġeri taravatu guruġari na kara dagara ġekiraġiani tu, mo deikara taravatu gaburenai ġetanuni tarimari ekirarini. Moġa tauna tu, taravatu gaburenai ġetanuni tarimari ema tarimarima mabarari maki mururi na kara ta asi beġene kiraġia, ema mai tanobarai tarimarima mabarari Barau ġoironai beġene ruġa-tari ma ġeri vei-rakava. <sup>20</sup> Moġa lorinai taravatu korana-iaġina maġurinai tarima ta asiġina ġinavaġi Barau ġoironai Barau na bekiraġi-foforiani, ġia tu vei-iobukaiobuka tari-mana. Asiġina, taravatu ġenana ġita na vei-rakava taribaiani.

### Vei-iobukaiobuka tu veġabidadama ġenana eiaġomani

<sup>21</sup> Senaġi initoma kamara dabarai Barau na tarimarima ekiraġirini vei-iobukaiobuka tarimari etoni dabarana tu bema fofori-ginikau. Mo tu dia taravatu korana-iaġina maġurinai. Asiġina. Mai tu Mose ġena taravatu na ema peroveta tarimari ġeri guruġa-fofori ai ġekiraġiato dabarana na. <sup>22</sup> Mai vei-iobukaiobuka Barau ġenana eiaġomani tu Iesu Keriso beġe ġabidadama-viniani tarimari mabarari na beġe ġabiani. Ta tu asi irau. <sup>23</sup> Korana tarimarima mabarara tu rakava tarimara moġo, be mabarara Barau marevana namona ġenana taveġitato. <sup>24</sup> Senaġi Barau ġena varevare-bara nuġanai asi ġera kerere etorani, korana Keriso Iesu ġenana ġera rakava ġerina evaġa-maġurirato. <sup>25</sup> Barau na Iesu tu ginitaġo varevarenai evaġa-iaġoato, korana tarimarima ġia ġenana bene ġabi-raġeri ġana. Moġa maġurina tu iniġesi: Deikara ġia raranai beveġabi-dadamani tu, Barau na ġena rakava betuġamaġi-fitoġarini. Barau na mo maġuri eveiato anina tu, ġia ġena iobukaiobuka bene vaġa-foforia ġana. Guinenai rakava ġeveito-ġoi nai tu, eġita-daġaseġirito-ġoi, rakava voiri asi eveito-ġoi. <sup>26</sup> Ma maitoma Iesu tu ginitaġo varevarenai evaġa-iaġoato korana ġena vei-iobukaiobuka bene vevaġa-ġita-iaġiri initoma ġana, be ġia ġena iobukaiobuka bene fofori, e ġia na Iesu Keriso ġeġabidadama-viniani tarimari maorori bene kiraġiri.

<sup>27</sup> Be ġita tu kara bita veiavi-iaġiani? Vekokoroku tu asi ġena gabu ta. Kara dainai? Taravatu takorana-iaġiani nai? Asiġi, maġuri tu veġabidadama maġurinai moġo bita doġariani. <sup>28</sup> Korana bitana riba-maoro, tarimarima tu veġabidadama lorinai Barau na eġabi-raġerani, a dia taravatu bita korana-iaġiani nai.

<sup>29</sup> Be Barau tu Iuda tarimari moġo ġeri? Ġia tu dia irau bese tarimari maki ġeri Barau? Aba, ġia tu irau bese tarimari maki ġeri Barau, <sup>30</sup> korana Barau tu sebona moġo. Ġia na tauġaniri kefirri ġelama-vaġito tarimari veġabidadamai maorori bekiraġini, ema kefirri asi ġelama-vaġirito tarimari maki maorori bekiraġini mo veġabidadama sebona na. <sup>31</sup> Moġa nuġanai veġabidadama na taravatu seġukana tavaġiani? Asiġina ġinavaġi! Senaġi taravatu tavaġa-ruġa gigitariani.

### Aberahamo ġena veġabidadama

**4** Ġita tu kara ma bita kiraġiani, senera Aberahamo na mai maġuri maiġa ema ġoitaġoato iatanai? <sup>2</sup> Bere moġoni, Aberahamo ġena ġauvei e veiġa bakunai Barau ġoiranai vei-iobukaiobuka tarimanai bere iaġo tu, tauġena bere vekiraġi, ġia tu kwalimu-koru na bere vekiraġi. Senaġi ġia Barau ġoiranai tu asi ġena vekokoroku gabuna ta. <sup>3</sup> Buka Veaġa nuġanai tu kara etoni? Buka Veaġa nuġanai tu ekirani, “Aberahamo na Barau ġena guruġa evaġa-moġoniato nai, Barau ekirato, ġia tu vei-iobukaiobuka tarimana etato.” <sup>4</sup> Tarima ta eġauveini, benamo voina beġabiani. Ġia mo eġauveini nai, voina eġabiani moġa tu, ġevarevare-viniani dagarana asi bita toni. Asigina ġinavaġi. Mo tu ġia ġena ġauvei voina veġata. <sup>5</sup> Senaġi tarima ta, ġia tu ġauvei o veiġa ta asi eveiani, senaġi ġia tu Barau, rakava tarimari vei-iobukaiobuka tarimari ai evaġa-iaġorini Barauna, ġenai eveġabidadamani. Mai tarima maiġa tu ġena veġabidadama lorinai, Barau na ekiraġiani, ġia tu vei-iobukaiobuka tarimana etoni. <sup>6</sup> Davida na maki mo guruġa sebona ekiraġiato. Maiġesi tarimari tu ekirarito, beġe iakuni etato. Mo tu ġauvei o veiġa tari asi ġeveirini, senaġi Barau, rakava tarimari asi ġeri vei-rakava etorini Barauna, na ġia tu ekirarini, vei-iobukaiobuka tarimari etorini. Davida ekirato,

<sup>7</sup> “Ġeri kira-sirivaġi etuġamaġi-fitoġarini, e ġeri rakava eġabi-vaġirito tarimari tu beġe iakuni.

<sup>8</sup> Vereġauka na ġena rakava iatanai asi ma beiavi-kaurini tarimana tu beiakuni.”

<sup>9</sup> Vevaġa-namo ema iaku maiġesiri tu tauġaniri kefirri ġelama-vaġirito tauri moġo ġeri, ba tauġaniri kefirri asi ġelama-vaġirito tauri maki ġeri? Varau bita kira, Aberahamo tu ġena veġabidadama lorinai, Barau ekirato, ġia tu vei-iobukaiobuka tarimana etato. <sup>10</sup> Aitoma ġia vei-iobukaiobuka tarimanai eiaġoto? Tauġanina kefirra ġelama-vaġiato murinai, ba tauġanina kefirra roġosi roġo beġene lama-vaġia nuġanai. Ġia tu dia tauġanina kefirra ġelama-vaġiato murinai vauro Barau ekirato, ġia tu vei-iobukaiobuka tarimana etato. Asigina. Ġia tu tauġanina kefirra roġosi roġo beġene lama-vaġia nuġanai, vei-iobukaiobuka tarimanai eiaġoto. <sup>11</sup> Ġia tauġanina kefirra tu gabi vauro ġelama-vaġiato. Mo tauġanina vauro ma ġelama-vaġiato moġa tu, ġia tauġanina roġosi roġo beġere lama-vaġia nuġanai vei-iobukaiobuka tarimanai eiaġoto, moġa vetoġana moġo ma evaġa-moġoniato. Monana Aberahamo tu Barau ġevaġa-moġoniani tarimari tamari ai eiaġoto, enabe tauġaniri kefirri asi ġelama-vaġirito senaġi. Korana Barau ġevaġa-moġoniani tarimari tu, Barau na eġabiragerini vei-iobukaiobuka tarimari. <sup>12</sup> Ema ġia tu tauġaniri kefirri ġelama-vaġirito tarimari maki tamari. Au na dia tauġaniri kefirri ġelama-vaġi-kavarito tarimari akiraġirini. Asigina. Senaġi tamara Aberahamo tauġanina kefirra roġosi beġere lama-vaġia nuġanai, Barau eġabidadama-viniato kavana, ġia na maki Barau moġesina ġeġabi-dadama-viniani tarimari akiraġirini.

### Taravatu e veġabidadama

<sup>13</sup> Barau na Aberahamo ekira-toreato, ekirato, ġia ma garakana ġesi na mai tanobara beġe ġaunaiani. Mai kiraġitore guruġana Barau na ekiraġiato tu, dia Aberahamo na taravatu ekorana-iaġiato nai, senaġi Barau eġabidadama-viniato nai, benamo vei-iobukaiobuka tarimanai eiaġoto. <sup>14</sup> Bema taravatu ġekorana-iaġiani tarimari na tanobara beġere ġaunaia nai, veġabidadama tu asi ġena namo ta, ema ki-

raġitore guruġana maki guruġa korina moġo. <sup>15</sup> Aba, taravatu na tu Barau ġena baru baregona evaġa-ġoraiani. Senaġi bema taravatu asiġina tu, tarima ta na taravatu ta asi beleaiani.

<sup>16</sup> Moġa lorinai, guruġatore tu veġabidadama ġenana eiaġomani, be Barau ġena namo e varevare-bara nuġanai guruġatore tauri moġoniri Aberahamo ma garakana ġesi ġeri ai beġe ġorani. A dia taravatu gaburenai ġetanuni tarimari moġo ġeri ai, senaġi Aberahamo ġena veġabidadama nuġanai ġetanuni tauri maki ġeri. Aberahamo tu ġita mabarara tamara. <sup>17</sup> Buka Veaġai evetoreto kavana: “Au na ġoi tu tanobara ġutuma tamari ai avaġa-iaġomuto.” Mai Aberahamo na evaġa-moġoniato Barauna ġoiranai Aberahamo tu ġita tamara. Mai Barau na mase tarimari ma evaġa-maġuri ġenoġoirini ema tanobarai asi ġeġorato dagarari evaġa-ġorarini.

<sup>18</sup> Aberahamo ġena tuġamaġikau noġa asi vaġa-tubukauna dagarana ta, senaġi Barau ġena guruġai evetuġa-maġi-kauto, ma evaġa-moġoniato lorinai, tanobara ġutuma tamari ai eiaġoto. Barau na ekira-toreato ilailanai: “Ġoi garakamu tu beġe vovokani visiġu kavana.” <sup>19</sup> Aberahamo mo negai ġena laġani tu dori sinau sebona (100), ma tauġanina maki emoirato, ma mase tauġaniri ilailari ai varau eiaġoto, e Sara maki asi ilaila ġia mero ta beġabiani riba. Ġia na maiġeri tu eġitarito, senaġi maiġeri na ġia ġena veġabidadama asi veġata ġevaġa-moiraiato. <sup>20</sup> Moġa nuġanai ġia asi etuġamaġi-iauvoiauvoto, asi edaradarato, ema asi eġareva-ġarevato maki Barau ġena guruġatore iatanai. A ġia tu ġena veġabidadama moġo evaġa-gwaġiġiato, benamo Barau moġo evaġa-raġeato. <sup>21</sup> Korana ġia tu nuġana mabarana ġesi eribato, Barau ma seġukana, kara ekiraġi-toreato dagarana tu bevaġa-ġoraiani. <sup>22</sup> Moġesina naima Barau na ekiraiato, “Ġia tu vei-iobukaiobuka tarimana,” etato.

<sup>23</sup> Mai guruġa maiġeri, “Ġia tu vei-iobukaiobuka tarimana,” tu dia Aberahamo ġereġana ġena moġo ekiraġiato, <sup>24</sup> senaġi ġita ġerai maki ekiraġiato. Ġita ġera Vereġauka Iesu Keriso mase na evaġa-variġisi ġenoġoiato Barauna tavaġa-moġoniani tarimara maki Barau na bekirarani, vei-iobukaiobuka tarimara, betoni. <sup>25</sup> Barau na Iesu etuġu-iaġomaiato, tanobarai emaseto, ġita ġera rakava benema voi-vaġiri ġana. Ma ġita Barau na vei-iobukaiobuka tarimarai bene kiraġira ġana uranai, mase na ma evaġa-variġisi ġenoġoiato.

### Barau na ġita vei-iobukaiobuka tarimara etato

**5** Moġa lorinai ġita tu ġera veġabidadama lorinai, Barau ekirato, ġita tu vei-iobukaiobuka tarimara etato, ma ġera Vereġauka Iesu Keriso ġenana Barau ġesi maino taġabiato. <sup>2</sup> Ġita tu Iesu Keriso bakunai veġabidadama ġenana Barau ġena namo e varevare-bara nuġanai bita bere-toġa, benamo nuġanai taruġa-taġoni. Ema taiakuni, korana tavetuġamaġikauni, Barau na vau ġia marevana baregona bevini-rani. <sup>3</sup> Dia moġa moġo, senaġi ġera midigumidigu ai maki bitana verere, korana ma ribara, midigumidigu na vevaġa-gwaġiġi evaġa-ġoraiani <sup>4</sup> Vevaġa-gwaġiġi na veriba-ġani bita vaġa-darererini, ma veribaġani bita vaġa-darererini tu, Barau marevana baregona bita tuġamaġi-kauani. <sup>5</sup> Mai tuġamaġikau na tu asi bevaġa-dabara dokorani, korana tu Barau na Iauka Veaġa evinirato, maiġa ġenana ġita lorura ġuturi ai Barau na ġena veuravini ebuġu-ġuraiato.

<sup>6</sup> Ġoseġaġi, ġita tu roġo asi kokorera nuġanai, Barau na eġabi-toreato ġaronai varau Keriso emaseto, ġita, Barau tatuġamaġi-fitoġaiani tarimara, bene voi-ġenoġoira ġana. <sup>7</sup> Tarima namona uranai ta bemaseni ba? Gwaġiġi! Senaġi tarima namo



vedaureana uranai tu, betaġu ta bevetuġamaġi-kwalimuni, benamo bemaseni riba. <sup>8</sup> Senaġi toma mainai tu Barau ġena veuravini ema vaġa-foforiani: Ġita roġo rakava tarimara nuġanai, Iesu tu varau emaseto ġita dairai.

<sup>9</sup> Ribara, Iesu rarana na bema iarevara, benamo asi ġera rakava besi. Moġa lorinai ġia bakunai, Barau ġena baru baregona bevaġa-foforiani ġaronai bevaġa-maġurirani. <sup>10</sup> Ġita roġo Barau tavetari-viniato-ġoi nuġanai, Barau Natuna ġena mase na Barau ġesi ma evaġa-veġata ġenoġoirato. Toma ġita tu Barau ġatanai ma tiaiġo-ġenoġoito, moġa lorinai Iesu emaġuri-ġenoġoito ġenana, vevaġa-maġuri maki bita ġoitaġoani. <sup>11</sup> Dia moġa moġo, senaġi ġera Vereġauka Iesu Keriso bakunai Barau ġenai bitana verere, korana Iesu Keriso ġenana ġita Barau ġesi maino bitama ġabia ema bitama veġata.

### **Adamu tu mase evaġa-ġoraiato, Keriso na tu maġuri evaġa-ġoraiato**

<sup>12</sup> Ġita ribara, tarima sebona evei-rakavato, benamo ġia ġenana rakava tanobarai ema bere-toġato. Ma rakava na mase eġabi-iaġomaiato. Moġesina naima mase na tarimarima mabarari eguguvirito, korana tarimarima mabarari ġevei-rakavato.

<sup>13</sup> Moġa anina tu, vei-rakava tanobarai tu eġora-guineto, a Mose ġenana taravatu tu ġabi vauro eiaġomato. Senaġi bema taravatu asiġina nai, Barau na vei-rakava, o sikira taravatu ġedaġa-seġiani rakavana, tarima ta ġenai asi bekiraġiani. <sup>14</sup> Senaġi ribara, Adamu ġena nega na beiaġoma mo Mose ġena negai, tarimarima tu mase ġena seġuka gaburenai ġetanuto-ġoi. Oba, Barau ġena vevaġa-naġi guruġana ta tu asi ġekira-sirivaġi viniato Adamu na eveiato kavana, senaġina ġia mabarari maki mase ġena seġuka gaburenai ġetanuto-ġoi.

Adamu na ġoirai vau beiaġomani tarimana moġo ema vaġa-foforiato. (Mo tu Keriso). <sup>15</sup> Senaġi mai varevare dagarana asi voina maiġa tu irau, dia mo Adamu ġena vei-rakava ġesi ilaila. Mai tarima sebona ġena vei-rakava dainai, tarima ġutuma ġemaseto. Senaġi Barau ġena namo e varevare-bara ema varevare dagarana mo vei-rakava ġena seġuka evanaġiato: Barau ġena mai namo baregona ema varevare dagarana tu tarima sebona, Iesu Keriso, ġenana eiaġomato, ma tarimarima ġutuma ġeri ai evebubu-riġoto. <sup>16</sup> Barau ġena varevare dagarana tu irau, dia mo tarima sebona, Adamu, ġena vei-rakava kavana: Vei-rakava sebona moġo eġorato ġenana, Barau na tarimarima e tanobara mabarana ekota-viniato, ma rakava voina metona baregona iatarai etoreato. Senaġi Barau ġena varevare dagarana rakava vovoka muriri na ema bere-rosito, monana tarimarima tu vei-iobukaiobuka tarimari ai evaġa-iaġorito. <sup>17</sup> Moġoni, mo tarima sebona na mo vei-rakava eveiato, monana tanobara mabarana mase ġena seġuka gaburenai etanuni. Mase tu mai vei-rakava eveiato tarimana ġenana eiaġomato tanobara ġana. Senaġina tarima sebona, Iesu Keriso, ġia na eveiato dagarana na mo vei-rakava eveiato tarimana ġena veiġa seġukana na evanaġiato. Tarimarima mabarari, Barau ġena namo ma varevare-bara barego lelevaġina ema vei-iobukaiobuka varevarena beġe ġabiani tarimari tu, Iesu Keriso ġenana maġuri beġe ġabiani, benamo kini kavana beġe vereni.

<sup>18</sup> Mo Adamu ġena vei-rakava sebona dainai, Barau ekirato, tarimarima mabarari tu vei-rakava tarimari ema rakava voina beġe ġabiani etato. A Keriso ġena veiġa iobukaiobukana sebona ġenana, tarimarima mabarari vei-iobukaiobuka tarimari ai beġe iaġoni ma maġuri beġe ġabiani riba. <sup>19</sup> Ema tau sebona ġena kira-sirivaġi na

tarimarima vovoka vei-rakava tarimari ai ġeiaġoto. Moġa ilailana, tau sebona ġena seġaġi na tarima ġutuma iobukaiobuka tarimari ai bevaġa-iaġorini.

<sup>20</sup> Betaġu taravatu etore-kauato tu rakava bene barego ġana. (O sikira, taravatu ġenana tarimarima ġeri rakava mabarari beġene fofori-ġinikau). Senaġi vei-rakava ebaregoni gabunai tu, Barau ġena namo e varevare-bara maki ebarego-lelevaġini.

<sup>21</sup> Guinena tarimarima tu vei-rakava ġena veġitaġau seġukana gaburenai ġetanuto, monana mase eġorato. Moġesina kavana, Barau ġena namo e varevare-bara na tu vei-iobukaiobuka evaġa-foforiani, ma maġuri vanaġivanaġi ġera Vereġauka Iesu Keriso ġenana eġabi-iaġomaiani ġita ġerai.

### Rakava ġenai tamaseto, Keriso ġena maġuri nuġanai ġita tu maġuri

**6** Be kara bita toni? Ba sikira, rakava veiġari sivei-ġenoġoi ġenoġoiri, be Barau na ġena namo e varevare-bara ġerai bene vaġa-fofori barego-lelevaġiri?

<sup>2</sup> Asiġina ġinavaġi! Ġita veġabidadama tarimara tu varau tamaseto rakava ġenai, (mai tu rakava maġurina ġenana taveġitato); ma kamara dabarai tu rakava maġurina nuġanai roġo ma bita tanuni? <sup>3</sup> Ġita babatiso taġabiato anina tu maiġa: Ġita na mo babatiso taġabiato tu Keriso Iesu ġena maġuri nuġanai tabere-toġato, ma mo babatiso taġabiato nuġanai, ġita tu ġia ġesi tamase-sebonato. Ba ġomi maiġa tu asi ribami? <sup>4</sup> Babatiso taġabiato anina tu, ġita maki Keriso ġesi tamase-vegogoto, ma Barau na Keriso ġesi eġuri-sebonarato. Benamo Tamara marevana ema seġukana baregona na Keriso mase na ma evaġa-variġisi ġenoġoiato kavana, ġita maki maġuri variġu gerageranai bitana tanu.

<sup>5</sup> Bema ġita Keriso ġesi tasebonato, benamo ġia emaseto kavana ġita maki tamaseto nai, moġoni, ġia Barau na mase na evaġa-maġuri ġenoġoiato kavana, ġita maki moġesi Barau na bevaġa-maġuri ġenoġoirani veġata. <sup>6</sup> Korana ġita ribara, ġita ġerai tarima guinena moġa tu Keriso ġesi vaġa-sebo satauro ai ġeraġeto. Mo veiġa eġorato tauna tu, rakava eveito-ġoi tauġanina ma ġena ura rakavari ġita ġerana bene koki-fitoġa moġovaġia, be ġita veiġa rakavari ġeri tuġu-rakaorakao tarimarai asi ma bitana iaġo ġana. <sup>7</sup> Korana mase tarimana na veiġa rakavana ta asiġina ġinavaġi ma bevei-ġenoġoiani.

<sup>8</sup> Bema ġita Keriso ġesi tamase-vegogoto nai, moġoni veġata taribani, Keriso ġesi maki bita tanu-vegogoni. <sup>9</sup> Korana ma ribara, Keriso mase na tu varau evariġisi-ġenoġoiato, be asi ma bemase-ġenoġoini; mase asi seġukana ġia ġenai. <sup>10</sup> Keriso mo emaseto nai tu, rakava ġena seġuka evaġa-keto-moġovaġiatio. A toma mai maġuri ġia na etanu-iaġiani maiġa tu, Barau ġena moġo etanuni. <sup>11</sup> Mo dabara sebonai ġomi maki tauġemi iniġesi boġono vekiraġi: Ġomi tu veiġa rakavari ġeri ai tu varau ġomaseto, ma Keriso Iesu ġena maġuri nuġanai ġomi tu maġuri ġotanuni Barau ġena.

<sup>12</sup> Moġa lorinai rakava na mani ma berakavani tauġanina maniġa ġenana ġomi asiġina ġinavaġi bene ġori-kaumi. Korana bema mani ma berakavani tauġanina maniġa rakava na beġori-kauani nai, ġomi tu ġia ġena ura rakavari boġo korana-iaġirini. <sup>13</sup> Tauġanimi legana ta rakava asi boġono vinia, be veiġa rakavari veiveiri farefarenai asi bene vaġa-iaġoa. A ġomi tu mase na ma evaġa-maġuri ġenoġoimito lorinai, tauġanimi mabarari Barau boġono vinia. Tauġanimi legari mabarari maki Barau boġono vinia, veiġa maorori beġene vei ġana. <sup>14</sup> Be rakava na ġomi asi ma bene ġori-kaumi, korana ġomi tu dia taravatu ġena seġuka gaburenai ġotanuni. Asiġina. Ġomi tu Barau ġena namo ema varevare-bara nuġanai ġotanuni.

### Vei-iobukaiobuka ġena vetuġunaġi tarimara

<sup>15</sup> Be kara maia? Veiġa rakavari roġo bitana vei, korana ġita tu dia taravatu gaburenai tatanuni, ne Barau ġena namo e varevare-bara nuġanai tatanuni, be bisini vei-rakava ba? Asigina ġinavaġi! <sup>16</sup> Ġomi asi ribami, bema tauġemu tarima ta ġena tuġu-rakaorakao tarimamu ai ovevaġa-iaġoni, garona bono seġaġia otoni nai, ġoi tu mo tarima ġena tuġu-rakaorakao tarimamu ai varau oiaġoni. Mo tu rakava ġena vetuġunaġi tarimamu ai boiaġoni, benamo dokonai tu boa maseni. O Barau ġena guruġa bokorana-iaġiani, benamo vei-iobukaiobuka tarimamu ai boiaġoni. <sup>17</sup> Barau sitanikiu-vinia, korana ġomi tovotovonai tu rakava ġena tuġu-rakaorakao tarimami, senaġi toma tu Barau ġena guruġa moġonina ma nuġami mabarari ġesi ġokorana-iaġiani, ġevaġa-ribamito-ġoi ilailanai. <sup>18</sup> Benamo Barau na rakava ġenana eruġa-vaġimito, ma vei-iobukaiobuka ġena vetuġunaġi tarimami ai ġoiaġoto.

<sup>19</sup> Au na mai maġuri maiġeri tu tuġu-rakaorakao tarimari ġeri maġuri ai ama kiragirini boġono tuġamaġi-fakari ġana, korana ġomi tauġani rekenai tu roġo asi kokoremi. Ġomi guinenai mani tauġaniami legari maniġeri tu veiġa mirori ema veiġa rakava kwaikwairi ġeri tuġu-rakao-rakao dagarari ai ġovaġa-iaġorito. A initoma mani tauġaniami taviri maniġeri tu guinenai rakava ġenai ġoveirito ilailanai, vei-iobukaiobuka ġena vetuġunaġi dagarari ai boġono vaġa-iaġori, be beġene veaġatanu. <sup>20</sup> Ġomi rakava ġena tuġu-rakaorakao tarimami ai roġo ġotanuto-ġoi neganai, vei-iobukaiobuka tu asi ġena gabu ta ġomi ġemi maġuri nuġanai. <sup>21</sup> Ġomi mo veiġa ġoveirito moġeri ġerina tu kara namona ġoġoitaġoato, ei? Moġeri veiġa toma ġotuġamaġi-ġenoġoirini nai, ġemaiakamini. Moġeri veiġa magonai tu mase boġo ġoitaġoani.

<sup>22</sup> Senaġi ġomi toma tu rakava nuġana na eġabi-vaġimito, ma Barau ġena tuġu-rakaorakao tarimami ai ġoiaġoto. Barau ġena tuġu-rakaorakao tarimami ai boġo iaġoni, monana namo boġo doġariani dagarana na tu veaġa-bara tarimami ai boġo iaġoni. Benamo monana ġomi maġuri vanaġivanaġi boġo ġabiani. <sup>23</sup> Korana rakava voina tu mase, a Barau ġena varevare ġera Vereġauka Keriso Iesu ġenana bita ġabiani dagarana tu maġuri vanaġivanaġi.

### Ġita tu dia taravatu ġena seġuka gaburenai tatanuni

**7** Tarikaka-ġore, ġomi tu moġoni asi ġoriba-maoroni? Ġomi tu taravatu ma ribami tarimami au na avaġa-guruġamini. Ribami, tarima roġo maġuri etanuni nai, ġia tu taravatu ġena seġuka gaburenai etanuni, a emaseni nai, taravatu tu asi ġena seġuka ġia ġenai. <sup>2</sup> Vaġa-ilailana, veġaraġo vavinena, bema ġaraġona roġo maġuri etanuni nai, ġia tu veġaraġo taravatuna gaburenai roġo betanuni. A ġaraġona bemaseni murinai, mo veġaraġo taravatuna moġa, seġukana gaburenai asi ma betanuni, befakani. <sup>3</sup> Bema ġia ġaraġona roġo maġuri nuġanai, ma bere veġaraġo-sirivaġi nai, ġia tu veġura-vanaġi vavinenai bitara kiraġia. Senaġi bema ġaraġona bere mase, ġia veġaraġo taravatuna ġena seġuka na tu bere raka-vaġi lorinai, asi bere veġura-vanaġi. Aba, tau fakana ta ma bere ġaraġoa maki, mo tu asi bere veġura-vanaġi.

<sup>4</sup> Tarikakagu, ġomi maki moġesina, Keriso tauġanina emaseto, monai tu ġomi maki taravatu ġenai ġomaseto, (mai tu, ġomi tu dia taravatu ġena seġuka gaburenai ġotanuni). Mo veiġa eġorato anina tu, ġomi Keriso ġena tarimarimai boġono iaġo ġana. Ġomi Keriso ġena tarimarimai ġoiaġoto korana tu, ġita mabarara ġwaġwara

namori begene vetore Barau ġenai ġana. Mai Keriso maiġa tu Barau na mase na ma evaġa-variġisi ġenoġoiato tarimana.

<sup>5</sup> Ġita na tauġanira ġeri ura veiġari roġo takorana-iaġirito-ġoi neganai tu, taravatu na ura rakavari evaġa-bere rosirito-ġoi. Moġeri ura rakavari ġita tauġanirai ġeġauveito-ġoi lorinai, ġita na mase beġe vaġa-ġorarini veiġari taveirito-ġoi. <sup>6</sup> Senaġi ġita toma taravatu ġenana eġabi-vaġirato, korana mo ebaru-barurato-ġoi dagnarana ġenai varau tamaseto. Be ġita toma tu Iauka Veaġa ġena dabara variġunai Barau vetuġunaġina bita iaġo-vininini, a dia Buka Veaġai ġetorerito taravaturo koranaiaġi-gigitariri dabaranai.

### Taravatu ġenana tu kara namona bita ġabiani?

<sup>7</sup> Ini tu kara ma bita toni? Taravatu tu rakava dagnarana bita toni ba? Asiġina ġinavaġi! Moġoni, au vei-rakava tu asi bara ribaia, senaġi taravatu ġenana, naima aribaiato. Ilailana, au asi bara riba, tarima tari ġeri farefare mata-ġaniġaniri tu rakava veiġana, bere taravatu iniġesi asi bere kira, “Tarima tari ġeri farefare mata-ġaniġaniri asi bono vei.” <sup>8</sup> Senaġi vei-rakava na Barau ġena mo taravatu guruġana ġenai dabara ta eġita-doġariato, benamo mo dabara na eġauveito, benamo au nuġagu ai tarima tari ġeri farefare mata-ġaniġaniri tuġamaġiri e veiġari irauirauri ema vaġa-berebere rosirito. Korana bema taravatu asiġina nai, vei-rakava tu mase au ġegu ai, be asi ġena seġuka ta, (korana ġena seġuka nuġagu ai eġauveini moġa asi ribagu bene). <sup>9</sup> Taravatu roġosi roġo bara ribaia neganai, au tu maġuri atanuto-ġoi. Senaġi taravatu eiaġomato neganai, vei-rakava au ġegu ai eguru-variġisito, emaġurito. <sup>10</sup> Benamo au tu amaseto, korana vei-rakava ġegu ai maġuri bene. Monana au ama ribato, maġuri bere ġabi-iaġomaia taravatuna na tu mase moġo eġwa-iaġomaiato. <sup>11</sup> Korana vei-rakava na taravatu guruġana ġenai dabara ta eġita-doġariato, benamo mo dabara na eġauveito, benamo au eġofa-darereguto. Be vei-rakava na au tu taravatu ġenana evaġi-maseguto. <sup>12</sup> Moġa lorinai taravatu tu veaġa, taravatu guruġari maki veaġa, maoro ema namo.

<sup>13</sup> Be, au tu mo dagara namona na ema vaġi-maseguto? Asiġina! Au tu vei-rakava na evaġi-maseguto. Mo dagara namona eiaġomato anina tu, vei-rakava vetoġana korikori nema vaġa-bererosia, be bitana riba, vei-rakava tu rakava kwaikwai. Senaġi vei-rakava tu mo dagara namona ġenana eġauveito, benamo au evaġa-maseguto. Be Barau ġena taravatu guruġana evaġa-foforiani, vei-rakava tu dagara rakava kwaikwaina.

### Rakava na ġera maġuri eguine-iaġirini

<sup>14</sup> Ġita ribara, taravatu tu Barau Iaukana ġenana eiaġomato dagnarana, a au tu tarimarima moġo, tauġani ai atanuni. Ma au tu vei-rakava na evoiguto, benamo ġena tuġu-rakaorakao tarimagu ai evaġa-iaġoguto. <sup>15</sup> Au na kara aveiani tu asi maki atuġamaġi-fakaiani. Korana mo veiġa, aurani bana veiri veġata atoni veiġari, tu asi aveirini, senaġi asi aura-vinirini veiġari tu aveirini. <sup>16</sup> Bema asi aura-vinirini veiġari aveirini nai, taravatu tu ama vaġa-moġoniani, ġia tu moġoni namo. <sup>17</sup> Mo veiġa nuġanai, mo tu dia au tauġegu nuġagu sigai mo vei-rakava aveiani. Asiġina! Mo tu mo vei-rakava au ġegu ai etanuni monana eveiani. <sup>18</sup> Au ma ribagu, au ġegu ai mai tauġanina ma ġena veiġa e ura rakavari nuġanai namo ta asiġina-ġinavaġi etanuni. Moġoni, aura-baregoni namo veiġari bana veiri atoni, senaġi ġauvei-iaġiri

ġegu ai tu asi ilaila. <sup>19</sup>Ġegu ura tu veiġa namori bana veiri veġata atoni, senaġi asi akokoreni, veiġa rakavari moġo aveirini. Moġoni, asi veġata aurani veiġa rakavari bana veiri, senaġina roġo aveirini. <sup>20</sup>Moġa lorinai, bema au na kara aveiani tu asi veġata aurani bana veia atoni veiġana aveiani nai, mo tu dia au tauġegu nuġagu sigai aveiani. Asiġina! Mo tu vei-rakava au nuġagu ai etanuni, monana eveiani.

<sup>21</sup>Be au ġegu maġuri ai dagara ta noġa moġo taravatu ta kavana na eguine-iaġiguni, maġesi eġauveini ama ġoitaġoani: Au namo veiġari navei atoni nai, rakava tu moġa nuġagu ai eġauveini. <sup>22</sup>Au iaukagu ai Barau ġena taravatu tu aiaku-iaġiani. <sup>23</sup>Senaġi au na taravatu o seġuka ta maia ama ġitaiani au tauġanigu legari tari nuġari ai ġeġauveini, au ġegu tuġamaġi na evaġa-moġoniani taravatuna ġevetari-viniani. Mai taravatu ta tu vei-rakava ġena taravatu o seġuka, ġia au tauġanigu legari ai eġauveini, ma au eġabiguni, benamo vei-rakava ġena dibura tarimanai evaġa-iaġoguni. <sup>24</sup>Au tu moġoni rakava kwaikwai tarimagu! Deikara na au bevaġa-maġuriguni mai mase tauġanina nuġana na? <sup>25</sup>Barau sitanikiua, korana ġita ġera Vereġauka Iesu Keriso ġenana evaġa-maġuriguto.

Moġa lorinai au tauġegu ġegu tuġamaġi na tu Barau ġena taravatu vetuġunaġina aveini, senaġi tauġanigu na tu vei-rakava ġena taravatu o seġuka vetuġunaġina aiaġo-vinini.

### Barau Iaukana nuġanai bitana maġuri

**8** Tauna moġa, inította Keriso Iesu ġena maġuri nuġanai ġetanuni tarimari tu, Barau na vei-rakava tarimari asi bekiraġirini ema asi bekota-vinirini. <sup>2</sup>Korana au tu Keriso Iesu ġena maġuri nuġanai maġuri Iaukana ġena taravatu seġukana na vei-rakava ema mase ġeri taravatu seġukari na varau eruġa-vaġiguto. <sup>3</sup>Taravatu tu tauġani, ma ġena ura rakavari tauġanina, na varau evaġa-moiraiato, be asi ġena seġukai eiaġoto, asi ilaila bevaġa-kavarani. Moġa lorinai taravatu na asi ilaila beveiani ġauveina tu Barau na eveiato. Mo tu Barau tauġena na Natuna korikori vei-rakava tarimari ilailari ai etuġu-iaġomaiato, rakava benema vaġa-darerea ġana. Benamo Keriso ġenana Barau na vei-rakava ġena seġuka tauġani ġenai ekiraġi-fitoġaiato, kerere ma evaġi-maseato. <sup>4</sup>Barau na mo veiġa eveiato anina tu, taravatu na vei-iobukaiobuka veiġana, eura-viniani veiġana, ġita ġerai beġene fofori-ginikau ġana. Korana toma tu tauġani ġena urai asi tarakani, ne Iauka Veaġa ġena urai tarakani.

<sup>5</sup>Tauġani ġena ura lorinai ġetanuni tarimari tu, tauġani na eura-vinirini dagarari moġo ġetuġamaġi-taġorini; a Iauka Veaġa ġena ura loriri ai ġetanuni tarimari tu, Iauka Veaġa na eura-vinirini dagarari moġo ġetuġamaġi-taġorini. <sup>6</sup>Tarima ta tauġani ġena ura na eġori-kauani tarimana ġena tuġamaġi tu mase evaġa-ġoraiiani; a Iauka Veaġa ġena ura na eġori-kauani tarimana ġenai maġuri e maino etanuni. <sup>7</sup>Tauġani dagarari etuġamaġirini tarimana ġena tuġamaġi na tu Barau evetari-viniani. Korana ġia ġena mo tuġamaġi na tu Barau ġena taravatu asi ekorana-iaġiani, ema asiġina-ġinavaġi maki bea korana-iaġiani riba. <sup>8</sup>Moġesina naima tauġani ġena urai ġerakani tarimari na, Barau tu asiġina-ġinavaġi beġe vaġa-iakuani.

<sup>9</sup>Senaġi ġomi tu dia tauġanimi ġeri ura na ġeġori-kaumini tarimami. Ġomi tu Iauka Veaġa na ġemi maġuri eġori-kaurini, korana Barau Iaukana tu ġomi nuġami ai etanuni. Boġono riba, deikara ġenai Keriso Iaukana asi etanuni, ġia tu dia Keriso ġena tarima. <sup>10</sup>Bema Keriso ġomi tata nuġami ai etanuni nai tu, enabe tauġanimi

beḡe maseni vei-rakava dainai, senaḡina iaukama tu maḡuri ḡetanuni, korana vei-iobukaiobuka tarimami ai varau ḡoiaḡoto bene.<sup>11</sup> Iesu tu Barau Iaukana na mase na ma evaḡa-varigisi ḡenoḡoiato. Ma bema Barau Iaukana ḡomi nuḡami ai etanuni nai, mani Iauka ḡenana Barau na mani ma berakavani tauḡanina, ḡomi ḡemi ai maniḡa, maki maḡuri beviniani.

<sup>12</sup> Moḡa lorinai, tarikaka-ḡore, ḡita ḡera ḡauvei toma tu dia tauḡani rekenai bitana tanu, ma tauḡani ḡena rakava veiḡari ma bitana vei-tanu.<sup>13</sup> Korana bema tauḡani ḡena vei-rakava maḡurinai boḡo tanuni nai, boḡo maseni; senaḡi Iauka Veaḡa ḡena ura dabaranai boḡo tanuni nai, tauḡani ḡena veiḡa rakavari boḡo vaḡi-maserini, benamo ḡomi tu boḡo maḡurini.

<sup>14</sup> Barau Iaukana na eḡori-kaurini tarimari tu Barau natuna.<sup>15</sup> Korana ḡomi na Iauka Veaḡa ḡoḡabiato, maninana tu dia tuḡu-rakaorakao tarimami ai ma bevaḡa-iaḡomini, be ma boḡo garini maia. Asiḡina. Mani tu venatu-vanaḡi Iaukana ḡoḡabiato. Ḡita tu ḡia ḡenana tataḡi-ḡaba-raḡeni, takirani, “Tama, Tamagai o,” tatonii.<sup>16</sup> Iauka Veaḡa tauḡena ḡita iaukara ḡesi ḡeguruḡa-vegogoni, ḡekirani, ḡita tu Barau natuna.<sup>17</sup> Bema ḡita Barau natuna nai, ḡita maki ma bakura, be Barau na ekiraḡi-torerito dagarari bita ḡaunarini. Mai tu Keriso na varau eḡaunarito dagarari Keriso ḡesi bita ḡauna-sebonarini. Mo tu dabara sebonai moḡo: Keriso emidigu-midiguto moḡesi bita midigu-midiguni nai, ḡia na marevana baregona eḡabiato moḡa, ḡita na maki bita ḡabiani.

### Barau marevana baregona ḡoirai bita ḡabiani

<sup>18</sup> Ḡoirai Barau marevana baregona ḡita ḡerai bea foforini, monana, au atuḡa-maḡini, initoma mai tamidigumidiguni maiḡeri tu bea vanaḡirini.<sup>19</sup> Barau ḡimana veiveiri dagarari mabarari ḡevenari-taḡoni ma vetuḡa-maḡikauri ḡesi, Barau na ḡia natuna bevaḡa-foforirini ema ḡena mareva ma mamana baregona bevinirini ḡarona ḡetanu-vaḡa-nogaiani.<sup>20</sup> Korana tu Barau ḡimana veiveiri dagarari mabarari tu benamo asi ḡeri namo tai ḡeiaḡoto. Mai tu dia ḡia tauḡeri ḡeurato asi ḡeri namo ai beḡene iaḡo ḡetato nai. Asiḡina. Mai tu Barau tauḡena ḡena urai moḡesina eveirito. Senaḡina ḡoirai dagara namona ḡeri ai bevaḡa-ḡoraiani, moḡa ma ḡenari-taḡoani.<sup>21</sup> Korana Barau na eveirito dagarari mabarari mase ema boraḡa ḡena dibura nuḡanai ḡetanuni roḡo. Senaḡi ḡaro ta maiḡeri dagara mabarari Barau na mo mase ema boraḡa ḡena dibura na bea ḡabi-veḡitarini, benamo Barau natuna ḡeri gabu fakanai, ma mareva baregona gabunai, ma betorerini.

<sup>22</sup> Ḡita ma ribara, Barau ḡimana veiveiri dagarari mabarari tu, vavine ḡeḡabi ḡana nuḡari ḡemidiguni kavana, ḡia midigu ḡeḡanini. Mabarari ḡeloduni, ḡeḡabani, beiaḡoma mo toma.<sup>23</sup> Senaḡi mai tu dia ḡia moḡo ḡeloduni, ḡeḡabani. Asiḡi. Ḡita Iauka Veaḡa ḡwaḡwana guinena taḡabiato maiḡera maki nuḡarai taloduni, taḡabani, Barau na bene natu-vanaḡira ḡarona tanari-taḡoani nuḡanai. Mo tu ḡita tauḡanira bevaḡa-maḡuririni negana tanari-taḡoani.<sup>24</sup> Ḡita tu mai tuḡamaḡikau bakunai Barau na ḡita evaḡa-maḡurirato. Senaḡi tatuḡamaḡi-kauani dagarana taḡita-ḡoitaḡoani nai, asi ma bita tuḡamaḡi-kauani. Moḡa lorinai kamara deikara na varau eḡoitaḡoato dagarana roḡo etuḡamaḡi-kauani, ei?<sup>25</sup> A bema roḡosi roḡo bitara ḡabia dagarana tatuḡamaḡi-kauani nai tu, ma vevaḡa-ḡwaḡiḡira ḡesi bita nari vaḡa-noga taḡoani.

<sup>26</sup> Moḡa nuḡanai, Iauka Veaḡa na maki ḡita ḡera moira gaburi ai evaḡa-kavarani. Ma ḡita asi ribara kara bita ḡauḡau-iaḡirini, senaḡi Iauka Veaḡa tauḡena ḡita iatarai

eġauġauni. Ġia eġuriġurini nai tu, etaġi-ġabaraġeni. Mo etaġi-ġabaraġeni guruġari tu tarimarima na asi ilaila beġe kiraġirini guruġari. <sup>27</sup> Barau ma ribana ginikau ġita nuġara iaġasiri ai kara ġetanuni, ma Iauka Veaġa ġena tuġamaġi maki ġia tu ma ribana. Korana Iauka Veaġa tu Barau ġena ura loriri ai ġena doġoro tarimari veaġari iatari ai eġuriġurini.

<sup>28</sup> Ġita ribara, deikara Barau ġeura-viniani tarimari na ġeri ai karakara ġeġorani dagarari mabarari ġerina namo beġe ġoitaġorini. Korana moġeri tarima tu ġia na ġena ura lorinai ekearito, maġuri beġene ġabia ġana. <sup>29</sup> Barau na deideiri eriba-ġuinerito ġia ġeura-viniani tarimari tu ġia na eviriġirito, ġia Natuna ilailanai bene vaġa-iaġori ġana. Korana mo dabarai ġia Natuna tu maġuri guine meronai beiaġoni tarikaka ġutuma vefakari ai. <sup>30</sup> Mo eġabi-hidirito tarimari tu ġia na ekearito tarimari; ma mo ekearito tarimari tu ġia na vei-iobukaiobuka tarimari ai ekiraġirito; ma mai vei-maoromaoro tarimari ai ekiraġirito tarimari tu, ġia marevana baregona evinirito.

### Barau ġena veuravini tu barego vedaurea

<sup>31</sup> Be Barau na maiġeri veġa eveirito iatari ai ġita tu kara bita kiraġiani? Bema Barau ġita ġesi, ġita evaġa-kavarani nai, dei na ġita beiaġoma-vinirani? Ta asiġina, korana <sup>32</sup> Natuna korikori maki gwaina asi eġabiato, senaġi etao-fitoġaiato ġita bitana maġuri ġana. Ma kamara dabarai tu Iesu Keriso ġesi dagara mabarari asi bevarevarevini sebonarani? <sup>33</sup> Be, Barau na eviriġirito tarimari tu deikara na bevaġa-daġarini Barau ġoiranai? Ta asiġina, korana Barau tauġena na maorori ekiraġirini! <sup>34</sup> Ma deikara na rakava voina metona bevinirini, ei? Ta asiġina, korana Keriso Iesu tu emaseto, benamo Barau na ma evaġa-maġuri ġenoġoiato. Ġia toma tu Barau ġimana aroribanai etanu-taġoni, ma ġita iatarai eġuriġurini. <sup>35</sup> Ġita tu deikara na Keriso ġena veuravini nuġana na beġabi-ġerevaġirani? Meto ġerai ġeraġasini moġerina ba? Maġuri gwaġiġiri ġerai ġeraġasini moġerina ba? Ġevaġa-midigu midigurani e ġelairovo-rovorani moġerina ba? Vito nanu mase taġoitaġorini moġerina ba? Asi kefiru dabuġari tatanuni moġerina ba? Vevaġa-gari dagarari taġoirarini moġerina ba? Vetari baġari na beġe vaġirani monana, ei? Asiġina veġata! <sup>36</sup> Buka Veaġai ekirani kavana,

“Ġai tu ġoi daimu ai vanaġivanaġi ġevaġi-masema veġata ġetoni.

Ġai tu beġene vaġi-maseri ġetoni mamoeeri kavana ġeveimani.”

<sup>37</sup> Senaġi euravini-baregorani Kerisona ġenana maiġeri meto mabarari nuġari ai takokoreni veġata, be tavaġa-darererini. <sup>38</sup> Korana au ama riba-maoroni, ġita tu dagara ta na asi ilaila veġata Barau ġena veuravini ġenana beġabi-ġerevaġirani: Mase o maġuri, aneru o Iauka rakavari, initema taġitarini dagarari na o ġoirai vau mani beġe ġorani dagarari na, o seġuka kotari, <sup>39</sup> guba tuġunai dagara ta o tanobara gaburenai mase gabuna dagarana ta, o Barau ġimana veiveiri dagarana ta na asiġina-ġinavaġi Barau ġena veuravini na beġabi-veġitarani, mo veuravini tu Barau na ġita evinirato, korana ġita tu ġera Vereġauka Keriso Iesu nuġanai tatanuni.

### Isaraela, Barau na eġabi-hidiato besena

**9** Au tu Keriso ġena maġuri nuġanai atanuni, naima asi aġofaġofani, guruġa moġoniri akiraġirini, Iauka Veaġa na au nuġagu ai evaġa-fofori ginikauani, ma au nuġagu iaġasina na evaġa-moġoniani. <sup>2</sup> Au tu nuġagu taġitaġi asikei, ma ġegu

nuġa-vekwaraġi Isaraela tarimari iatari ai maki asi ekorini. <sup>3</sup>Ġegu ura baregona tu maiġa moġo: Bere namo, au tarikakagu ema ġegu doġoro korikoriri maġuri beġene ġabia uranai tu, Barau na au moġo iatagu ai rakava meto lelevaġina bere tore-kaua, ema Keriso ġenana bere tore-fitoġagu, be rekwarkwa tarimagu ai bara iaġo, a ġia tu au gabugu ai maġuri beġere ġabia. <sup>4</sup>Mai tu Isaraela tarimari akiraġirini. Ġia tu Barau na enatu-vanaġirito e Barau na marevana e mamana baregona evaġa-fofori vinirito; ema ġena kiraġitore guruġari baregori evinirito, taravatu maki evinirito; e Barau beġene toma-rakariġoa maġuriri ekira-vararito, ema guruġa-tore tu ġia ġeri ai eveirito. <sup>5</sup>Aberahamo, Isako, Iakobo tu ġia seseri doġori, ema tauġani rekenai bita ġitaiani nai, Keriso tu ġia ġeri bese tauna. Keriso tu Barau, ma dagara mabarari debari tu ġia. Ġia tu vanaġivanaġi bitana vaġa-raġea. Amen.

<sup>6</sup>Au asi akirani, Barau ġena guruġa (Isaraela tarimari ġeri ai) tu benamo asi tauri ai beġe iaġo atoni. Asiġina. Au akirani tu, (Barau ġena guruġa tu Isaraela besena mabarana ġeri senaġi) dia Isaraela besena mabarana tu Isaraela tarimari korikori. <sup>7</sup>Ema maiġesi maki asi bakirani: Ġia tu Aberahamo besena, be ġia mabarari Aberahamo natuna batoni. Asiġina. Korana Barau ekirato tu, “Ġoi besemu tu Isako ġenana moġo vau beġea maġurini.” <sup>8</sup>Moġa anina tu: Tauġani rekenai ġemaġurini tarimari tu dia Barau natuna. Asiġina. Ġia tu Barau ġena kiraġitore maġuriri korikoriri ai ġemaġurini tarimari moġo tu Aberahamo besena. <sup>9</sup>Korana Barau ġena kiraġitore guruġana tu iniġesi ekirani, “Au na baġabi-torea ġaronai ma baġenoġoi-iaġomani, benamo Sara na natumi merona ta beġabiani.”

<sup>10</sup>Dia moġa moġo, senaġi boġono ġitaia, Rebeka natuna kafa ruarua maki tamari tu sebona moġo, mo tu ġita tamara Isako. <sup>11-12</sup>Senaġi kafa roġosi beġere maġuri e veiġa namona ta o rakavana ta maki roġosi beġere vei-karaia nuġanai, Barau na Rebeka ekiraiato, ekirato, “Tau-guinena na tau-muriseina ġena vetuġunaġi beiaġo-vinini.” Tovotovonai veġata Barau moġesina eguruġato, korana ġia ġena boioġa ilailanai eġabi-hidiato merona tu gabunai betanuni veġata. Tarima Barau na tu dia ġeri ġauvei e veiġa namori bakuri ai ekearini, senaġi Barau tauġena ġena ribai moġo ekearini. <sup>13</sup>Buka Veaġai etoreato kavana, ekirani, “Iakobo tu au na aura-viniani, senaġi Esau tu aiau-rakavaiani.”

<sup>14</sup>Be kara bita toni? Sikira, Barau tu dia vei-iobukaiobuka Barauna sisi? Asiġina ġinavaġi veġata. <sup>15</sup>Korana Barau na Mose tu ekiraiato, ekirato, “Au na deikara bavetuġa-ġwaiiani tarimana, ġia tu bavetuġa-ġwaiiani, ema au na matari vetuġari baġwani tarimari tu, bavaġa-kavarini korana bavetuġa-ġwari kekei.” <sup>16</sup>Moġa lori-nai, dagara baregona tu dia tarimarima ġeri ura o vekwaraġi, senaġi Barau ġena vevetuġaġwa. <sup>17</sup>Korana Buka Veaġai ekirani, Barau na Pharao, Aigupito ġeri vere, tu maiġesina ekiraiato, ekirato, “Au na ġoi kini ai atoremuto korana tu maiġa, ġoi ġemu kira-sirivaġi ai au ġegu seġuka bana vaġa-rakarosia, be au aragu tanobara mabarana beġene kiraġi-foforia.” <sup>18</sup>Moġesina naima bema Barau eurani tarima ta nevetuġa-ġwaia etoni nai tu, evetuġa-ġwaiiani, ma eurani ta nuġana nevaġa-gwaġiġi foroforoa etoni nai, nuġana evaġa-gwaġiġi foroforoani, benamo Barau ekira-sirivaġi viniani.

<sup>19</sup>Ma ta na au bokiraguni, bokirani, “O kara dainai ġita Barau na tu roġo evaġa-dagaranai, ekirarani, ġita tu vei-rakava tarimara veġata etoni, ei? Be deikara tu ma kokorena Barau na neveia veġata betoni veiġana ġia na bekira-ġoiiani, ei? <sup>20</sup>Ġoi tauġemu novetuġamaġi, ġoi tu deikara, be Barau garona ġoi na oġareani? Be, ġi-



mana na ġeveiato dagnarana ta na eveiato tarimana bekiraiani, ‘Ġoi tu kara dainai au maiġesina oveiguto,’ betoni ba?”<sup>21</sup> Ribara, ġuro eveini tarimana tu ma ġena maoro veġata, mo tano tavi baregona sebona eġabiani, monana ġuro ruarua beveirini. Ġuro ta tu namo vedaurea beveiani, mo tu vereko baregona ġana, ma ġuro ta tu beveikavaiani moġo, vanaġivanaġi daridari ġana. Mai ġuro vei tarimana maiġa tu moġoni ma ġena maoro ba asiġina mo veiġa beveiani nai tu, ei?

<sup>22</sup> Barau maki moġoni moġesina eveito. Ġia eurato, ġia ġena baru baregona nevaġa-foforia, ema ġena seġuka nevaġa-bererosia, be tarimarima na beġene ribaia etato. Senaġi ebaruvini-rakava rakavarito ma bene vaġi-ġosiġosiri etato tarimari ġeri ai, nuġana eġabi-tariato e evevaġa-gwaġiġito.<sup>23</sup> Barau na mo veiġa eveiato korana tu ġia eurato, ġia marevana barego lelevaġina moġa beġene ribaia etato. Ġita tu ġia na evetuġa-ġwarato, ema ġita tu Barau na tovotovonai veġata erovina-torerato, ġia marevana baregona bitana ġabia ġana.<sup>24</sup> Ġita tu ġia na ekearato tarimara. Barau na tu dia Iuda tarimama moġo ekeamato, asiġina, irau bese tarimami maki ekeamito.<sup>25</sup> Hosea nuġanai eguruġato kavana, ekirato,

“Ġia tu dia au ġegu tarimarima,

senaġi ‘au ġegu tarimarimai’ bakiraġirini,

ema asi aura-vinirini doġorona bakiraġirini, bakirani, ‘ġegu uravini doġorona’ batoni,

<sup>26</sup> ema,

‘Ġomi tu dia au ġegu tarimarima’ atato gabunai,

mo gabu sebonai ġia bakiraġirini, ‘Maġuri Barauna natuna doġorori.’”

<sup>27</sup> Isaia na Isaraela tarimari ekiraġirini nai tu ekirato, “Mo tu moġoni, Isaraela tarimari asisebo kone-mirina noġa moġo, senaġi tarima viravira moġo beġe maġurini.

<sup>28</sup> Korana tu Vereġauka na tanobara tarimari ġeri rakava voiri tu beraga-vini-vaġirini, asi bekwaiboni.”<sup>29</sup> Mai tu Isaia tovotovonai eguruġato kavana, “Bere seġuka rakava-rakava Vereġaukana na ġita besera tari asi bere goru-tariri nai, ġita tu Sodoma e Gomora kavari bitara vei.”

### Isaraela tarimari asi ġeri veġabidadama

<sup>30</sup> Be ġita tu kara ma bita toni? Iniġesina sikira: Irau bese tarimari tu vei-iobukaiobuka tarimari ai beġene iaġo vekwaraġina tu asi ġeveito (Isaraela tarimari kavana), senaġi ġeri veġabidadama Iesu Keriso ġenai ġetoreani ġenana, vei-iobukaiobuka tarimari ai ġeiaġoto.<sup>31</sup> A Isaraela tarimari na tu taravatu ġekorana-iaġi ginikauato Barau na vei-iobukaiobuka tarimari bene kiraġiri ġana nuġanai tu, vei-iobukaiobuka tarimari ai asi ġeiaġoto.<sup>32</sup> Kara dainai? Korana ġia tu dia veġabidadama ġenana vei-iobukaiobuka tarimari ai beġe iaġoni ġetato. Asiġina.

Ġia ġekirato tu, ġeri ġauvei e veiġa ġerina vauro vei-iobukaiobuka tarimari ai beġe iaġoni ġetato. Moġa lorinai Keriso tu ġia ġeri vedaġaraġe forenai eiaġoto, benamo ġeketo-tarito.<sup>33</sup> Buka Veaġai etoreato ekirani kavana,

“Ġoġitaia, au na Sionai

(o Ierusalem) fore ta atoreato,

tarima bene vaġa-vedaġa-raġeri ġana,

ema mo fore barana atoreato,

bene vei-ketori uranai.

Senaġi ġia bevaġa-moġoniani tarimana tu, asiġina-ġinavaġi moġo bemaiaikaiani.”

**10** Tarikakagu mabarami, au nuḡagu ḡena ura baregona korikori, ma ḡegu noḡi-noḡi Barau ḡenai aveiani tu, Isaraela tarimari Barau na bene vaḡa-maḡuriri. <sup>2</sup>Korana au na maki ḡia аваḡa-moḡonirini, ḡia na Barau ḡena ura veḡari beḡene korana-iaḡi ginikauri veḡata, senaḡi dagara sebona tu, Barau uravinina maḡurina korikori ḡia tu asi ribari. <sup>3</sup>Korana Barau ḡenana vei-iobukaiobuka eiaḡomani, moḡa ḡia tu asi ribari, be ḡia tauḡeri na ḡeri vei-iobukaiobuka veḡari boruri ma ḡevaḡa-ruḡarini. Moḡesina naima Barau na tarimarima etore-roroḡotorini lairi korikori ḡia na tu asi ḡeḡabi-raḡerini. <sup>4</sup>Taravatu tu eiaḡomato mo Keriso ḡenai ema magoto. Toma tu Keriso beḡe vaḡa-moḡoniani tarimari mabarari tu vei-iobukaiobuka tarimari ai beḡe iaḡoni.

<sup>5</sup>Mose na taravatu korana-iaḡina ḡenana vau Barau ḡoiranai vei-iobukaiobuka tarimari ai beḡe iaḡoni lairi ekirarito nai, maiḡesina ekirato, “Mai taravatu maiḡeri beḡe korana-iaḡirini tarimari tu mai taravatu ḡenana maḡuri beḡe ḡabiani.” <sup>6</sup>Senaḡi veḡabidadama ḡenana vei-iobukaiobuka taḡoitaḡoani guruḡana Buka Veaḡai tu maiḡesina ekirani, “Nuḡamu ai asi bono kira, ‘Guba ḡana deikara bevaraḡeni?’” Be Keriso guba na bene ḡori-mariḡoa ḡana. <sup>7</sup>“Ema asi bono kira maki, ‘Deikara tano gaburena ḡana bevariḡoni?’” Be Keriso mase na bene ḡori-maraḡea ḡana. <sup>8</sup>A mai guruḡa korana korikori tu maiḡesi ekirani, “Guruḡa tu ḡoi sevisevimu ai maniḡa; ḡoi murumu ai ma ḡoi lorumu ḡutunai etanuni.” Ḡai na veḡabi-dadama guruḡana ḡomi ḡemi ai tu maiḡa ḡakiraḡiani. <sup>9</sup>Mo tu bema murumu na boguruḡa-foforini, bokirani, “Iesu tu Vereḡauka,” botoni, ma lorumu ḡutuna bovaḡa-moḡoniani, ḡia tu Barau na mase na ma evaḡa-variḡisi ḡenoḡoiato nai, Barau na bevaḡa-maḡurimuni. <sup>10</sup>Korana loruna ḡutuna na evaḡa-moḡoniani tarimana tu, Barau ḡoiranai vei-iobukaiobuka tarimanai eiaḡoni; ema muruna na eguruḡa-iaḡi fororini tu, maḡuri edoḡariani. <sup>11</sup>Korana Buka Veaḡai maiḡesina ekirani, “Ḡia evaḡa-moḡoniani tarimana tu asi bema-iakaiani.” <sup>12</sup>Anina tu, Iuda tarimari e irau bese tarimari fakari ai vetoḡa boruna ta asi betanuni, korana tu ḡita mabarara ḡera Vereḡauka tu sebona kwariḡutu, Barau ḡereḡana moḡo, ma ḡia ḡenai ḡekea-raḡeni tarimarimari mabarari tu ḡena vevaḡa-namo barego vedaureana evinirini. <sup>13</sup>Korana, “Barau arana beḡe vatoani tarimari mabarari tu Barau na bevaḡa-maḡuririni.”

<sup>14</sup>Senaḡina, kamara dabarai Barau asi ḡevaḡa-moḡoniani tarimari ḡia ḡenai beḡe kea-raḡeni? Ema kamara lai ai Barau varina asi ḡeseḡaḡiatio tauri na ḡia beḡe vaḡa-moḡoniani? Ema kamara dabarai ḡia varina beḡe seḡaḡiani, bema ta na asi beḡobata-vinirini nai? <sup>15</sup>E deikara na beḡobata-vinirini, bema Barau na ta asi betuḡuani nai? Buka Veaḡai ekirani kavana, “Vari Namona eḡwa-iaḡomaiani tarimana kwakuna tu namo vedaureana veḡata, (korana namo baregona evaḡa-foforiani).”

<sup>16</sup>Senaḡi dia tarimarima mabarari na Vari Namona ḡeḡabi-raḡeani, nai Isaia maiḡesi ekirani, “Vereḡauka, deikara na ḡaina guruḡa evaḡa-moḡoniani?” <sup>17</sup>Ḡita ribara, veḡabidadama tu Vari Namona ḡeḡobata-iaḡiani taseḡaḡiani, monana eiaḡomani; ema taseḡaḡiani varina tu Keriso ḡena guruḡa. <sup>18</sup>Senaḡi Isaraela tarimari tu kamasi? Barau ḡena guruḡa moḡoni ḡia na asi ḡeseḡaḡiatio? Asiḡina, ḡeseḡaḡiatio. Korana Buka Veaḡai ekirani,

“Tarima kotari na tanobara mabaranaḡi ḡea vari-fiuato, ema ḡeri guruḡa maki tanobara dokona-dokona ḡea ḡoitaḡoato.”

<sup>19</sup>Avedanaḡini: Isaraela tarimari na mo guruḡa tauna asi ḡedoḡariatio? Asiḡina, ḡia ma ribari. Korana Mose varau maiḡesi ekirato,

“Au na ġomi tu asi arana besena ta ġerina ġomi bavaġa-maiakamini.  
 Ema au na ġomi tu asi ġetuġamaġi-fakani besena ġenana bavaġa-barumini.”  
<sup>20</sup> Ema Isaia maki asi eguruġa-garito, ekirato,  
 “Au tu asi ġevetauguto tarimari na ġeġoitaġoguto,  
 ema asi ġevedanaġi-vetauguto tarimari ġeri ai avevaġa-foforito.”  
<sup>21</sup> Senaġi Isaraela tarimari tu ekirarito, ekirato,  
 “Boġiboġi na eiaġoni mo ea lavini,  
 au ġimagu tu seġafore ema kira-sirivaġi tarimari ġeri ai atuġu-rosiani.”

### Isaraela besena lakouna Barau na evetuġarito

**11** Moġa lorinai ma avedanaġini: Barau na ġena Isaraela tarimari tu eruġa-doġe-muriġirito ba? Asiġina ġinavaġi! Au maki Isaraela tarimagu, Aberahamo besena, Beniamina ġena doġoro tauġu. <sup>2</sup> Barau na ġena tarimarima, tovotovona na veġata eġabi-hidirito tarimari, kamasi beruġa-doġe-muriġirini? Ġomi Buka Veaġai Elia varina ġetoreato tu moġoni veġata asi ribami? Ġia Isaraela tarimari na beġe vaġi-maseani ġetato nai, Barau ġenai eġauġauto, maiġesi ekirato: <sup>3</sup> Vereġauka, ġemu peroveta tarimari tu beġe vaġi-ġosiri, ma ġoi ġevarevare-vinimuni dagarari ġetorekaurini e ġegaburini fata veaġari maki beġe rovoru. Mai tu au moġo ġereġagu roġo maiġegu nuġanai, au maki ġevaġi-masegu ġetoni. <sup>4</sup> Ma Barau na ġia tu kamasi evaġa-veveato, ei? Barau ekirato, “Au ġegu tarimarima mabarari daġara imaima ruarua (7,000) atore-ġerevaġirito, roġo maġuri maniġeri. Ġia na ġofaġofa barauna Bal asi ġetoma-rakariġo viniato.” <sup>5</sup> Maitoma maki, Barau na ġena namo e varevare-barai Isaraela tarimari lakouna eġabi-viriġirito. <sup>6</sup> Bema ġena vevetuġaġwa e varevare-barai eveġabi-hidito nai, dia kara ta ġeveiato bakunai eġabi-viriġirito. Korana bema ġeri ġauvei ta dainai Barau na bere ġabi-hidiri nai, ġena ġabihidi veiġana tu dia ġena vevetuġaġwa e varevare-bara dainai, vevetuġaġwa maki asi anina.

<sup>7</sup> Be kara bita kiraġiani? Isaraela tarimari na beġene ġabia ġana ġevetau-  
 gwadagwadaiato dagarana tu ġia na asi ġeġabiato, senaġi Barau na eġabi-hidirito  
 tarimari kotari na moġo ġeġabiato. A mabarari na tu Barau ġena keakea asi ġeseġaġi-  
 viniato. <sup>8</sup> Buka Veaġai ekirani kavana,

“Barau na ġia nuġari e ġeri tuġamaġi tu evei-veġonurito,  
 be tovotovona na veġata mo initoma ġia tu asi ġeboġe-fakani,  
 ema garo maki asi ġeseġaġini.”

<sup>9</sup> Davida ġena guruġa maki maiġesi ekirani,  
 “Bere namo ġari ġaniġani fatana maki ġeri konagi e ġeri ganai bene iaġo,  
 e ġeri vekakenaġi dagaranai bene iaġo,  
 ema ġeri vei-rakava voina ġabiġabina gabunai bene iaġo.

<sup>10</sup> Bere namo matari bene vei-mukunari,  
 be asi beġene boġeboġe, ma doġeri beġene ġeġeva,  
 be beġene raka-dorudoru vanaġivanaġi.”

### Barau na boġa oliveri legari vamoka oliveri legari ġeri ai ekafa-kaurito

<sup>11</sup> Ma avedanaġini, Isaraela tarimari ġevakakenaġito nai tu, beġene keto-  
 moġovaġi ġana ba? Asiġina, dia moġesina! Senaġi ġeri kira-sirivaġi dainai, vevaġa-  
 maġuri tu irau bese tarimari ġeri ai evotuto, korana Isaraela tarimari beġene lau-  
 naġiri, Barau ġena vevaġa-maġuri beġene vetaua ġana. <sup>12</sup> Situġamaġia, Isaraela ġeri

kira-sirivaḡi na vevaḡa-namo barego tanobarai ema raka-toḡato, ema iauka maḡuriri ai ḡerabu-iaḡirini gaburi ai irau bese tarimari ḡeri ai namo-bara ema foforini, a Isaraela tarimari mabarari beḡe ḡenoḡoini Barau ḡenai nai tu, Barau ḡena vevaḡa-namo tu ma barego lelevaḡina bebubu-riḡoani.

<sup>13</sup> Mai tu ḡomi irau bese tarimami, avaḡa-guruḡamini, korana au tu ḡomi irau bese tarimami ḡemi apostolo taugu. Au ḡegu iaku tu barego mai ḡauvei aveiani nai. <sup>14</sup> Korana au aurani ḡegu tarimarima korikori bana vaḡa-vetuḡamaḡi daradarari, be kotari na maḡuri beḡene doḡariri. <sup>15</sup> Korana Iuda tarimari Barau na eruḡarito nai tu, tanobara boruri tarimari eḡabi-kavirito, a Barau na Isaraela tarimari ma beḡabi-raḡerini tu, kamasi beḡea vetoreni? Namo baregona beḡorani! Mo tu mase na maḡuri-ḡenoḡoi bevaḡa-ḡoraiāni kavana.

<sup>16</sup> Bema ḡebaki-guineani beredina Barau ḡeviniani nai tu, mo beredi mabarana tu ḡia ḡena, ema bema ḡau ḡokana Barau ḡeviniani nai, legana maki ḡia ḡena. <sup>17</sup> Isaraela tu noḡa moḡo olive ḡauna namona ta. Barau na mo olive legana tari etau-korurito, ma ḡomi, boḡa olivena legari, eḡabimito, mo etau-korurito moḡeri gaburi ai evaḡa-kafakafa-kaumito, benamo toma tu mo olive namona ḡokana na ḡaniḡani namori ḡevaraḡeni, moḡeri ḡoḡanirini. <sup>18</sup> Moḡa lorinai asi boḡono veiavi ḡia vekaravari ai. Bema boḡo veiavini nai, boḡono riba: Dia ḡomi na ḡau ḡokana ḡovaḡa-kavaiani, asiḡina, ḡau ḡokana na ḡomi evaḡa-kavamini.

<sup>19</sup> Betaḡu boḡo kirani, “Olive legari tu etau-korurito, au ḡia gaburi ai bene vaḡa-kafakaugu ḡana.” <sup>20</sup> Oba, mani tu moḡoni. Senaḡi ḡia tu asi ḡeri veḡabidadama naima etau-korurito, ma ḡomi tu ḡemi veḡabidadama lorinai, ḡia gaburi ai ḡoruḡani. Moḡesina naima asi boḡono vetuḡamaḡi-varaḡe varaḡe, senaḡi boḡono gari moḡo. <sup>21</sup> Korana bema Barau na olive legana korikoriri maki gwairi asi eḡabirito senaḡi etau-korurito nai, ḡomi maki gwaimi asi beḡabirini.

<sup>22</sup> Moḡeri na Barau ḡena veiau-namo veiḡana namona ma ḡena veiau-rakava veiḡana metona boḡono ḡitaia. Barau ḡabidadamanai ḡeketoni tarimari tu eiaurakavarini, ma ḡeri ai veiḡa metona eveirini. Senaḡi ḡomi tu eiau-namomini. Barau na roḡo beiau-namo-iaḡomini, bema ḡia ḡena veiau-namo nuḡanai moḡo boḡo tanu-iaḡoni nai. Asiḡina nai tu, ḡomi maki bebasi-ḡutumini. <sup>23</sup> Iuda tarimari maki, bema Barau asi ḡevaḡa-moḡoniani veiḡari beḡe iaḡuirini, benamo Barau beḡe vaḡa-moḡoniani nai tu, Barau na ma bekafakau-ḡenoḡoirini. Korana Barau na ma bekafakau-ḡenoḡoirini riba. <sup>24</sup> Ḡomi tu boḡa olivena ḡauna legana, a dia varovaro olivena, senaḡi eḡabimito, ma vamoka olivena ḡaunai ekafa-kaumito. Bema ḡomi boḡa olivena legari moḡesina eveimito nai, vamoka olivena legana etau-koruato, moḡea maki etau-koruato olivena ḡaunai ma bekafa-kauani riba.

### **Isaraela tarimari mabarari Barau na bevaḡa-maḡuririni**

<sup>25</sup> Tarikakagu mabarami, au aurani mai guruḡa vekuretoḡana maiḡa boḡono ribaia, korana tauḡemi boḡo vekiraḡi-varaḡe varaḡeni garina: Isaraela tarimari nuḡari tu moḡesi gwaḡiḡi moḡo asi beḡe tanu-iaḡoni. Asiḡina. Ḡia nuḡari e ḡeri tuḡamaḡi moḡesi beḡe tanu-iaḡoni, beiaḡoni mo, irau bese tarimari mabarari, (Barau na eḡabihidirito tarimari), beḡema bere-toḡani Barau ḡena maḡuri nuḡanai. <sup>26</sup> Moḡa murinai vau Isaraela besena mabarari Barau na bevaḡa-maḡuririni. Buka Veḡai etoreato ilailanai, ekirato, “Siona (o Ieruselema) na

vevaġa-maġuri tauna beiaġomani,  
 ġia na Iakobo besena ġenana Barau asi ġetoma-rakarigoani maġurina betore-  
 veġitaiani.

<sup>27</sup> Benamo au na ġia ġeri rakava baġabi-veġitaiani nai,  
 au na ġia ġeri ai mai kiraġitore gwaġigina baveiani.”

<sup>28</sup> Iuda tarimari ġutuma na Vari Namona ġekira-fitoġaiani nai, Barau ġena vetari tarimari ai ġeiaġoto. Senaġi moġesi ġeveito dainai, ġemi maġuri dabarana evekeoto. A ġia tu Barau na eġabi-hidirito besena lorinai, seneri (Aberahamo, Isako, Iakobo) bakuri ai Barau na eura-vinirini. <sup>29</sup> Korana Barau ġena varevare ema ġena keakea tarimarima ġeri ai tu beġe tanu-vanaġi vanaġini, asi ma beġe vekoki-fitoġani dagarari. <sup>30</sup> Vaġa-ilailana ġomi tovotovonai tu Barau ġokira-sirivaġi viniato-ġoi, senaġi toma tu Barau ġena vetuġaġwa boġo ġoitagoa. Ġomi tu Isaraela tarimari ġeri kira-sirivaġi dainai, Barau ġena vetuġaġwa boġo ġabia. <sup>31</sup> Isaraela maki toma tu ġekira-sirivaġini, korana Barau na ġomi evetuġa-ġwamini dainai, ġia maki ma bene vetuġa-ġwari ġana. <sup>32</sup> Korana Barau na tarimarima mabarari kira-sirivaġi maġurinai etore-toġarito, korana ġia ġena vetuġaġwa ġia mabarari na beġene ġabia.

### Barau bitana vaġa-raġea

<sup>33</sup> Barau ġena iaunega ema riba tu barego, ma barego lelevaġi veġata! Ġia ġena vevaġa-maoro dabarana maki vetau-kavana beġorani! Ġena dabara maki deikara na betuġamaġi-doġariani? <sup>34</sup> Buka Veaġa ekirani kavana,  
 “Vereġauka ġena tuġamaġi tu dei na beribaiani?

O deikara na ġia besisiba-viniani?

<sup>35</sup> Dei na Barau evini-farefareato, be Barau na ġia ma bevini vaġa-voiani?”

<sup>36</sup> Korana dagara mabarari korari tu ġia, ema ġia ġenana ġeġorato e ġefoforito, ema ġia ġena moġo. Ġia moġo bitana vaġa-raġea mo vanaġivanaġi. Amen.

### Tauġanimu Barau ġena

**12** Tarikakagu mabarami, Barau ġena vetuġaġwa tu barego aġitaiani ġita iatarai. Tauna moġa au na ġomi alaunaġimini, akirani, tauġanimi mabarari varevare dagarari maġuriri e veaġari ai boġono vaġa-iaġori, ema Barau na beiakua-iaġi-baregorini tauġaniri Barau boġono vini-raġea, ginitaġo varevareri kavana. Moġesina boġo veini tu, Barau boġo toma-rakarigo vini-korikoriani. <sup>2</sup> Mai tanobara ġena maġuri ema veġa irairauri asi boġono ġabi-raġeri ema asi boġono veiri. A ġomi tu ġemi tuġamaġi boġono vaġa-variġuri, be ġemi maġuri beġene vekurevo. Monana vau Barau ġena ura korikori boġo riba-ginikaurini. Boġo ribani maki, aiġa tu namo vedaurea, Barau na eiaku-iaġiani dagarana.

<sup>3</sup> Barau na ġena namo e varevare-bara lorinai ekeaguto, ġena apostolo ġauveina eviniguto nai, au na ġomi mabarami avaġa-guruġamini: Tauġemi asi boġono vetuġamaġi, ġomi ġemi riba ema veġa tu varaġe lelevaġi. Asiġina. Namona tu boġono vetuġa-maġi-ginikau, Barau na veġabidadama aiġa baregona evinimito, moġa ilailanai moġo boġono tuġamaġi e guruġa. <sup>4</sup> Vaġa-ilailana ġita tauġanira tu sebona moġo, a legana tu ġutuma gorogoro, ma mai tauġanira legari ġeri ġauvei tu dia sebona. <sup>5</sup> Ġita ekalesia maki moġesi, ġita asisebo, senaġi Keriso ġena maġuri nuġanai ġita tu tauġani sebonai taiaġoto. Ma ġita tata tu karora tata ġeri, (dia mabarara tata ġera-ura ġera-urai bita rakani).

<sup>6</sup>Barau ġena namo ema varevare-barai evinirato ilailanai, varevare dagarari iraurirau ġerai ġetanuni. Bema ta peroveta varevarena o seġukana eviniato nai, bene peroveta ġena veġabidadama ilailanai. <sup>7</sup>Bema ekalesia vetuġunaġi iaġoviniri eviniato nai, bene vaġa-kavari. Bema vevaġa-riba varevarena eviniato nai, bene vevaġa-riba. <sup>8</sup>Bema kotari ġeri veġabidadama vaġa-kokoreri varevarena eviniato nai, bene vaġa-kokoreri; bema rabu tarimari vaġa-kavari varevarena eviniato nai, bene viniġnikauri; bema tarimarima ġorikauri varevarena eviniato nai, ma nuġana mabarana ġesi bene veġorikau; bema tarimarima vetuġaġwari varevarena eviniato nai, bene vetuġaġwari e bene vaġa-kavari ma iakuna ġesi.

### Veuravini

<sup>9</sup>Nuġami mabarari ema ma moġoniri ġesi boġono veuravini. Rakava veiġari asi boġono ura-viniri, a veiġa namori boġono ġabi-gigitariri. <sup>10</sup>Vetarikaka veuravinina boġono korana-iaġi gwadaia, karomi tata ġesi boġono vegubakau, a dia tata tauġemi arami boġono tore-varaġe varaġeri. <sup>11</sup>Boġono ġauvei-kokore kokore, asi beġene ġubulefimi; Iauka Veaġa na nuġami bene vaġa-variġisiri, Vereġauka vetuġunaġina boġono iaġo-vini. <sup>12</sup>Ġotuġamaġi-kauani dagarana bakunai boġono iaku; meto ġoġoitaġorini nuġari ai boġono vevaġa-gwaġiġi; ġauġau asi boġono vaġa-moiria. <sup>13</sup>Barau ġena tarimarima ġeri rabu ma vetau-vetau gaburi ai boġono vaġa-kavari. Tarimarima boruri ġemi ai beġe iaġosini nai, boġono ġabi-raġeri, ema boġono nari-ġinikauri.

<sup>14</sup>Ġevaġa-rakavamini tarimari boġono vaġa-namori, iatari ai boġono ġauġau, asi boġono vaġa-rakavari, asi boġono tovoġari. <sup>15</sup>Ġeverereni tarimari ġesi boġono verere-vegogo, ma ġemidigu-midiguni tarimari ġesi maki boġono midigu-midigu sebona. <sup>16</sup>Karomi ġesi nuġa sebonai boġono tanu, asi boġono vekokoroku, ne ma nuġami mabarari ġesi gaburemi tarimari ġesi boġono vetore-sebona. Tauġemi asi boġono vetore-varaġe varaġe, asi boġono kira, ġomi moġo ma iaunegami.

<sup>17</sup>Veġa rakavari evei-vinimini tarimana ġena veiġa rakavari voina tu veiġa rakavari na asi ma boġono vaġa-voia. Boġono ġauvei-ġitaġita, be tarimarima mabarari ġoirari ai veiġa iobukaiobukari moġo boġono veiri. <sup>18</sup>Maino tanutanuna tu ġomi mabarami ġimami ai moġo maniġea, be ma dabarana nai tu, tarimarima mabarari ġesi maino ai boġono tanu. <sup>19</sup>Garagaragu namomi, ġevaġa-rakavamini tarimari ġeri vei-rakava voiri asi boġono vei-viniri, a Barau faka boġono vinya, be ġena baru vauro iatari ai bene vaġa-foforia. Korana Buka Veaġai tu maiġesina ekirani, “Vereġauka ekirani, ‘Au na vauro bavaġa-voirini.’” <sup>20</sup>Senaġi, “Bema ebaruvinimuni tarimana evitoani nai, bono ġubua; bema bokana ekokeni nai, nanu bono vinya bene niu. Maiġesina boveini nai tu, karava memeġari ġia debanai bolabukaurini,” bemaikaiaini. <sup>21</sup>Rakava na ġoi asi bene vaġa-dareremu, ne ġoi na rakava veiġa namori na bono vaġa-darereri.

### Taravatu tauri garori bitana seġaġiri

**13** Tarimarima mabarari gavamani ġeri veġorikau maorona gaburenai beġene tanu ema beġene seġaġi-viniri. Korana gavamani boruna ta tu asi etanuni, senaġi Barau na evaġa-ruġarito ema maoro baregona evinirito gavamaniri moġo ġetanuni. <sup>2</sup>Moġesina naima gavamani ġeri guruġa eġarerini ma ekira-fitoġarini tarimana na tu Barau na evaġa-ruġarini tarimari eġarerini ma ekira-fitoġarini. Ma mo

veiġa beveiani tarimana tu tauġena moġo vei-rakava tarimanai evevaġa-iaġoni, ma evevaġa-metoni.

<sup>3</sup>Veġitaġau o gavamani tarimari na vei-iobukaiobuka tarimari tu asi ġevaġa-garirini, ne ġia tu veiġa ġeleaiani tarimari ġevaġa-garirini. Bema ġomi ġourani, boġono tanu-rakoreko moġo, gavamani tarimari gariri asi boġono vei ġotoni nai, veiġa iobukaiobukari moġo boġono vei. Moġesi boġo veirini tu, ġia na bevaġa-raġemini. <sup>4</sup>Gavamani tarimari tu Barau ġena vetuġunaġi ġeiaġo-vinini, ġomi namo boġono ġoitaġo ġana ġeġauveini. Senaġi bema ġomi na veiġa boġo leaiani nai tu, boġono gari korana ma ribami, gavamani ġimanai tu vevaġa-maoro baġana eġabi-taġoani. Barau na asi evini-kavaiato, senaġi ġia vetuġunaġina eiaġo-vinini, kerere tarimari ġeri rakava voiri bene viniri ġana. <sup>5</sup>Moġa lorinai gavamani ġeri veġitaġau gaburenai bitana tanu ema garori bitana seġaġiri. Dia kerere voiri beġe vinirani moġo gariri ai, senaġi nuġarai maki taribani, veiġa namori bitana veiri.

<sup>6</sup>Ġomi tu moġesina naima ġotakesini. Gavamani takesi ġoviniani, korana gavamani tu Barau ġena vetuġunaġi ġeiaġo-vinini tarimari. Ġia ġeri taimi mabarana tu veġitaġau ġauveina ġeveiani. <sup>7</sup>Ma ġemi ġabitore nai, voiri boġono vei. Bema takesi roġosi boġono vini nai, boġono vini, ma moni kotari roġosi boġono vini nai, boġono vini; vegubakau nai, boġono vegubakau; vemataurai nai, boġono vemataurai.

### **Boġono veuravini, korana ġaro bevotu**

<sup>8</sup>Karomi ta ġenai ġemi ġabitore ta asi bene tanu, senaġi ġabitore sebona moġo bene tanu tu maiġa: Karomi boġono uravini-vanaġi vanaġiri. Korana karona euravini tarimana na Barau ġena taravatu mabarana ekorana-iaġiani veiġana eveiani. <sup>9</sup>Mai taravatu maiġeri: Asi bono veġura-vanaġi; asi bono vevaġi-deba; asi bono lema; tarima tari ġeri dagara mata-ġaniġaniri asi bono vei; ma taravatu kotari maki, moġeri mabarari tu mai taravatu sebona na eġabi-vegogoani: “Sevimu tarimana bono ura-vinia, ġoi tauġemu oveura-vinini kavana.” <sup>10</sup>Veuravini na sevina tarimana asi evaġa-rakavaiani. Moġa lorinai dagara barego vedaureana Barau ġena taravatu nuġanai tu veuravini, korana taveura-vinini nai, taravatu mabarana takorana-iaġiani.

<sup>11</sup>Mai veiġa boġono veia, korana mai nega vetoġana tu ma ribami. Nega varau be-raġasi, be ġotataġa ġena na. Korana ġita vaġa-maġurira ġarona tu varau bekavinaġi-rakava, dia mo guinenai, Keriso taġabi-raġeato ġarona gabunai kavana. <sup>12</sup>Boġi tu dori ekorini, ġaro tu ġena raġe bakunai. Moġa lorinai mukuna veiġari sitoretariri, ma mama dabuġari siriġo-kauri, vetari tarimari na vetari dabuġari ġeriġo-kaurini kavana. <sup>13</sup>Veiġa namori moġo sivei, laġani erakani tarimana kavana. A asi sivereko-lauvaġi lauvaġi e niuniu moġo asi sivaġa-kokorea, kima mata-ġaniġaniri asi sivei e asi simata-boraġa, asi sivevaġi-vevaġi ema asi simama. <sup>14</sup>Senaġi ġita tu Vereġauka Iesu Keriso moġo siriġoa, dabuġa tariġo-kaurini ilailanai. Ma tauġani ġena ura veiġari rakavari veiveiri tuġamaġiri tu asi siġabi-raġeri.

### **Moiramoira ema kokore**

**14**Veġabidadamai emoiramoirani tarimana boġono ġabi-raġea, enabe ġena tuġamaġi tari ġomi ġemi tuġamaġi ġesi asi ilaila, senaġi asi boġono vaġa-veġareveġarea e asi boġono ġau-fitoġaia. <sup>2</sup>Tarima ta ġena veġabidadama kokore nai, eġani-taġuitaġuini, ma ta tu ġena veġabidadama moira lorinai, ġaniġani ko-

riri, asi buregari, moĝo eĝanini. <sup>3</sup>Eĝani-taĝuitaĝuini tarimana na vamoka ĝaniĝaniri moĝo eĝanini tarimana asi bene kira-fitoĝaia, ema vamoka ĝaniĝaniri moĝo eĝanini tarimana na maki dagara mabarari eĝani-taĝuitaĝuirini tarimana asi bene vaĝa-rakavaia, korana ĝia tu Barau na varau eĝabi-raĝeato. <sup>4</sup>Ĝoi tu dei, be tarima ta ĝena vetuĝunaĝi tauna bono vevaĝa-maoro vinia? Ĝia ĝena veĝabidadamai eruĝa-gigitarini o eketoni moĝa tu ĝena baregona na vauro bekiraĝiani. Senaĝi ĝia tu beruĝa-gigitarini, korana Vereĝauka na kokore beviniani bene.

<sup>5</sup>Tarima ta na tu ĝaro tari evaĝa-veaĝa baregorini, ma ta na tu ĝaro mabarari ilaila moĝo etoni. Namona tu, ĝia tata nuĝari e ĝeri tuĝamaĝi ai beĝene riba ĝeri tuĝamaĝi tu maoro. <sup>6</sup>Tarima ta na ĝaro ta eĝabi-hidiani, benamo ekirani, mai tu ĝaro veaĝana etoni nai, mo tarima na mo veiĝa tu Vereĝauka ĝenai eveiani. Eĝani-taĝuitaĝuini tarimana maki Vereĝauka etuĝamaĝiani vauro eĝaniĝanini, korana ĝia na Barau etanikiu-viniani. Ema asi ebureĝani tarimana maki Vereĝauka etuĝamaĝiani vauro eĝani-ĝanini. Ĝia maki Barau etanikiuani. <sup>7</sup>Korana ĝita tamaĝurini nuĝanai dia tauĝera ĝera maĝuri moĝo, ma bita maseni maki dia ĝita tauĝera ĝereĝara ĝera bita maseni moĝo. Asiĝina ĝinavaĝi. <sup>8</sup>Maĝuri tatanuni nai, Vereĝauka ĝena tamaĝurini, ema bita maseni maki, Vereĝauka ĝena moĝo bita maseni. Moĝa lorinai, tamaĝurini o bita maseni, ĝita tu Vereĝauka ĝena veĝata. <sup>9</sup>Keriso emaseto ma emaĝuri-ĝenoĝoito korana tu, mase tarimari ema ĝemaĝurini tarimari ĝeri Vere ai bene iaĝo ĝana. <sup>10</sup>Moĝa lorinai karase ĝoi tarikakamu ovevaĝa-maoro viniani? Ma kara dainai tarikakamu okira-fitoĝaiani? Bono tuĝamaĝi, ĝita mabarabarara tu Barau ĝena vevaĝa-maoro seana ĝoiranai bita ruĝa-tarini, vevaĝa-maoro bita ĝabini.

<sup>11</sup>Isaia na etoreato kavana, ekirani,

“Vereĝauka ekirani,

‘Moĝoni veĝata, amaĝuri-taĝoni dainai,

tui mabarabarari au ĝoiragu ai beĝe vetuitui-tarini,

mea mabarabarari na Barau beĝe kiraĝi-foforiani.”

<sup>12</sup>Moĝesi naima ĝita tata ĝera maĝuri Barau ĝoiranai bita kiraĝi-fofori foforirini.

### **Tarikakamu ĝena veĝabidadama asi bono vaĝa-rakavaia**

<sup>13</sup>Moĝa lorinai karora ĝesi tauĝera asi bitana vevaĝa-maoro vevini. A namona ĝita tu ĝera tuĝamaĝi sivaĝa-maorori, be tarikakara ĝoirari asi sifatafata-ĝauri, ĝeri veĝabidadama na beĝe ketoni garina. <sup>14</sup>Iesu Vereĝauka nuĝanai amaĝurini nai, ma nuĝagu mabarana ĝesi ariba-maoroni, ĝaniĝani dagarana ta tu asi rakava o ma mirona Barau ĝoiranai. Senaĝi bema tarima ta na ĝaniĝani dagarana ta etuĝamaĝi-rakavaiani nai, mo ĝaniĝani dagarana tu ĝia ĝereĝana ĝenai moĝo moĝoni rakava o ma mirona. <sup>15</sup>Bema tarikakamu asi eiakuni, ĝoi na ĝoiranai kara oĝaniani eĝitiani nai, bono riba, mo tu dia veuravini veiĝana ĝoi na oveiani. Ĝemu ĝaniĝani na tarikakamu ĝena maĝuri asi bono vaĝa-rakavaia. Keriso tu ĝia maki uranai emaseto. <sup>16</sup>Moĝa lorinai ĝemi veiĝa ĝobiri boĝono toreri, tarimarima maoro asi boĝono viniri, ĝemi veĝabidadama namori rakavari beĝene kiraĝiri. <sup>17</sup>Korana dagara baregona tu Barau ĝena Basileia, a dia ĝaniĝani o niuniu dagarari, senaĝina vei-iobukaiobuka, maino, ema iaku-verere lauka Veaĝa ĝena maĝuri nuĝanai. <sup>18</sup>Deikara maiĝeri veiĝa nuĝari ai Keriso vetuĝunaĝina beiaĝo-vinini tarimana tu, Barau na beiaku-iaĝiani, ema tarimarima na maki beĝe vaĝa-moĝoniani.



<sup>19</sup> Moġa lorinai mabarara sikokore, maino vaġa-ġorana ema ġera veġabidadama vaġa-tubuna ġauveiri siveiri. <sup>20</sup> Ġaniġani ġaramari ai Barau ġena ġauvei asi boġono vaġa-rakavaia. Moġoni, ġaniġani mabarari tu namo ema veiareva Barau ġoiranai, senaġi bema ġoi na ġaniġani ta oġaniani nai, tarima ta nuġana ovaġa-metoani, benamo ġena veġabidadama na beketoni, moġa neġi asi namo. <sup>21</sup> Moġa lorinai namona tu, asi bono bureġa, e vine nanuna asi bono niu, ema tarikakamu vaġa-daġaraġena veiġana ta tu asi bono veia. Korana tarikakamu ta bovaġa-daġaraġeani, benamo bevei-rakavani garina.

<sup>22</sup> Kara dagara ovaġa-moġoniani, maniġa tu ġoi ema Barau fakami ai moġo bene tanu. (Senaġi tarikaka tari asi bono launaġiri, ġoi na kara ovaġa-moġoniani dagarana beġene ġabi-raġea, korana) nuġanai kara eġabi-raġeani dagarana na nuġana asi evaġa-meto ġenoġoiani tarimana tu beiakuni. <sup>23</sup> Bema tarima ta tu mo kara eġabi-raġeani dagarana ma daradarana ġesi beġaniani nai, ġia tu tauġena bevevaġa-metoni, korana ġia tu asi veġabidadamana ġesi eġaniani. Ema asi veġabidadama ġenana ġeiaġomani dagarari mabarari tu vei-rakava dagarari moġo.

### Keriso ġena maġuri bitana tovotovo

**15** Ġita ma kokorera tarimara na moira tarimari ġeri keto ai bisini vaġa-kavari, a dia tauġera ġereġara moġo lorira bitana toreri. <sup>2</sup> Ġita tata karora loriri bisini toreri, be namo beġene ġabia, ema ġeri veġabidadama bitana vaġa-tuburi. <sup>3</sup> Korana Keriso maki tauġena lorina asi etoreato, senaġi Buka Veaġai etoreato ilailanai, ekirani, “Vanevane guruġari metori ġoi, Barau, iatamu ai ġekiraġirito tu, au iatagu ai beġema ketokau.” <sup>4</sup> Guinena guruġa mabarari Barau ġena Bukai ġetorerito moġeri tu, ġita beġene vaġa-riba-iaġira ġana ġetorerito. Korana ġita mo ġetorerito guruġari ġerina vevaġa-gwaġiġi ema vevaġa-naġi bisini ġabia, benamo ġoirarai Barau ġena Basileia moġa bisini tuġamaġi-kaua. <sup>5</sup> Vevaġa-gwaġiġi ema velaunaġi tu Barau evinini. Ġia na ġomi vekaravami ai nuġa-sebona bene vaġa-ġoraia Keriso Iesu ġotovotovoani nuġanai. <sup>6</sup> Be nuġa-sebonai ema garo sebonai ġera Vereġauka Iesu Keriso Tamana Barau boġono vevato-iaġia.

<sup>7</sup> Tata karomi ġesi boġono veiau-namo ema boġono veġabi-raġe, Keriso na eiaunamomito ema eġabi-raġemito kavana. Moġesina boġo veini tu, Barau boġo vaġa-raġe ġitakauani. <sup>8</sup> Boġono tuġamaġi: Keriso tu Iuda tarimari ġeri vetuġunaġi taunai eiaġoto, Barau ġena vetuġamaġikau vaġa-moġonina, ema Barau ġena kiraġitore guruġari, senera (Aberahamo, Isako, ema Iakobo) eguruġa-tore vinirito guruġari vaġa-taunari ġana. <sup>9</sup> Ema irau bese tarimari na maki Barau beġene vaġa-raġea ġena vevetuġaġwa bakunai. Buka Veaġa etoreato ilailanai,

“Moġa lorinai irau bese tarimari vekaravari ai au na ġoi bavaġa-raġemuni;

ġuriġuri mariri baġabini,

ġoi aramu bavaġa-namoani.”

<sup>10</sup> Ma ekirani,

“Irau bese tarimami o, ġia ġena bese tarimari ġesi ġoiaku-vegogo.”

<sup>11</sup> Ma ekirani,

“Ġomi irau bese tarimami,

Vereġauka ġovaġa-raġea,

ema ġomi tarimarima mabarabarami,

mari ai ġia ġovaġa-raġea.”

<sup>12</sup> Ema Isaia ma ekirani,  
 “Iese natuna ta betubu-vaisini,  
 ġena bese tarimana ta bevaisi-raġeni,  
 tanobara mabarana beġita-ġauani;  
 irau bese tarimari ġia ġenai beġe vetuġamaġikauni.”

<sup>13</sup> Vetuġamaġikau tu Barau ġenana eiaġomani. Ġia na iaku verere ema maino na bene vaġa-vonuvonu raġemi ġenai ġoveġabidadamani nuġanai. Be monana Iauka Veaġa ġena seġuka na ġemi vetuġamaġikau bene vaġa-barego lelevaġia.

### Paulo, irau bese tarimari ġeri haroro tauna

<sup>14</sup> Tarikakagu mabarami, au bama riba-maoro, ġomi maniġemi tu namo na ġovonuvonu-raġeto, ġoriba-ġinikauto, ema karomi tata ġesi boġo vevaġa-riba-vevinini maki ilaila. <sup>15</sup> Senaġi guruġa matari tari ġomi batore-vinimi nai, kota bakiraġi-metori, mo tu ġomi noġa ma bakiravara-ġenoġoimi maia. Moġesi aveini, korana Barau na ġena namo e varevare-bara dabaranai mai ġauvei eviniguto. <sup>16</sup> Ekeaguto, Keriso Iesu ġena vetuġunaġi tarimanai bana iaġo, ma irau bese tarimari vekaravari ai Rubu Veaġa vereri ġeri ġauvei bana veia, Barau ġena Vari Namona bana ġobata-iaġia. Benamo monana irau bese tarimari maki Barau na beġabi-raġerini varevare dagarari ai beġene iaġo. Ema Iauka Veaġa na bene vaġa-veaġari.

<sup>17</sup> Moġa lorinai Keriso Iesu ġena maġuri nuġanai aveiavini, Barau ġena vetuġunaġi aiaġo-vinini nuġanai. <sup>18</sup> Kara boruna ta guruġana au asi baveini, senaġi kara au na akiraġiato ema aveiato ġerina, kara Keriso na au ġeguna eveiato, benamo irau bese tarimari na Barau ġema-seġaġi-viniato, moġa moġo bakiraġiani. <sup>19</sup> Ġegu ġobata ema ġauvei tu Iauka Veaġa ġena seġuka na vetoġa boruri ema nuġa-farevaġi veiġari na evaġa-foforirito-ġoi. Moġesina nai Ieruselema na aġeġeraġito, aiaġoto mo Iliriko tanona, Keriso ġena Vari Namona mabarana akiraġi-fofori ġinikauato. <sup>20</sup> Au ġegu ura baregona vanaġivanaġi tu, Keriso roġosi roġo beġere ribaia gaburi ġana bana iaġo, Vari Namona bana ġobata-iaġia. Korana asi aurato, tarima ta na ġauvei evaġa-ruġaiato gabunai ma bana ġauvei-iaġo. <sup>21</sup> Senaġi ġegu ura tu, Buka Veaġai etoreato kavana bana vei, ekirani,

“Ġia varina asi ġekira-vararito tarimari na beġene ġitaia,  
 ema varina asi ġeseġaġiato tarimari na beġene ribaia.”

<sup>22</sup> Moġesi nai nega ġutuma niaġosi atoni, senaġi ama vedaġa-raġeni.

### Paulo na Roma benea ġitaia boioġana etogato

<sup>23</sup> Senaġi toma mainai au tu asi ġegu ġauvei gabuna ta maia, ema laġani ġutuma varau beġe iaġo nuġari ai, au ġegu ura baregona tu banasi raka-ġitamini, <sup>24</sup> nai atuġamaġini, Spein ġana baiaġoni nai tu, basi ġitamini roġo. Maninana bavanaġini nai, atuġamaġini, basi raka-ġitamini, ma ġomi ġesi bita tanu-kotunani roġo. Moġa murinai aurani, ġomi na boġono vaġa-kavaġu ġegu iaġoiaġo bana iaġo-vinia ġana. <sup>25</sup> Initoma tu roġo Ieruselema ġana aiaġoni, Barau ġena tarimarima veaġari navaġa-kavari ġana. <sup>26</sup> Korana Makedonia ema Akaia tanori ai tu nuġari ma verereri ġesi Ieruselemai asi ġeri-ġari tarimari Barau ġena tarimarima veaġari vekaravari ai ġetanuni moġeri ġeri moni ġevaġa-vegogoto. <sup>27</sup> Ġia tu ma iakuri ġesi ġeri moni ġevaġa-vegogoto, ma mo tu Iuda tarimari ġeri ġabitore ġia ġeri ai ġevaġa-voiani. Korana bema irau bese tarimari Iuda tarimari ġeri namo iauka rekenai dagarari

gēgābirini nai tu, ġia tauġaniri rekenai farefarena maki Iuda tarimari ġesi beġe vare-barabararini. Korana ma ġeri ġabitore Iuda tarimari ġeri ai dainai. <sup>28</sup> Be mai ġauvei maiġa bavaġa-koriani, ema bana riba-maoro mai moni tarimari korikori na beġene ġoitaġoa murinai vau, Spein ġana baiaġoni, ema ġomi maki basi raka-ġitamini ġegu iaġoiaġo nuġanai. <sup>29</sup> Au ma ribaġu ġomi ġemi ai baiaġosini nai, Keriso ġena vevaġa-namo barego lelevaġina baġabi-iaġosiani ġomi ġemi ai.

<sup>30</sup> Tarikaka-ġore, ġera Vereġauka Iesu Keriso aranai ema Iauka Veaġa ġena veuravini, ġita iatarai etoreani veuravinina, bakunai, au ġomi alaunaġimini: Au ġegu vekwaraġi ai boġono vaġa-kavagu, iatagu ai Barau ġenai boġono ġauġau. <sup>31</sup> Boġono ġuriġuri, be Barau na Iudea nuġanai Keriso asi ġevaġa-moġoniani tarimari ġimari na bene vaġa-maġurigu, ema mo vevare dagarana Ierusalemāi Barau ġena tarimarima veaġari na beġene ġabi-raġea ma iakuri ġesi. <sup>32</sup> Be Barau ġena ura ilailanai ġomi ġemi ai ma iakugu ġesi bana iaġosi, ema mabarara bisini vevaġa-kokore. <sup>33</sup> Maino Barauna ġomi mabarami sevimi ai bene tanu. Amen.

### Paulo ġena vevaġa-namo guruġari

**16** Avaġa-ribamini, ġita tobara Foibe tu beiaġosini. Ġia tu ekalesia ġena vetuġunaġi vavinena ta Kenkrea rubuna nuġanai. <sup>2</sup> Anoġimini, Vereġauka aranai boġono ġabi-raġea, ekalesia o veaġa tarimari ġoġabi-raġerini dabarari korikoriri ai. Ema ma ġena ura dagarari ġomi ġemi ai nai, boġono vinia. Korana ġia ġena vevaġa-kava maki barego lelevaġi tarimarima ġutuma ġeri ai. Au maki evaġa-kava barego-lelevaġiguto.

<sup>3</sup> Priskila ema Akwila au ġegu vevaġa-namo boġono viniri. Ġia tauri ruarua tu au ġesi ġauvei sebona moġo ġaveiani Keriso Iesu ġena ġauvei nuġanai. <sup>4</sup> Ġia tauri ruarua tu au uragu ai be dori ġevaġi-maserito. Au ema tanobara irauirau ai ġetanuni ekalesiari ġema iaku tu asikei ġia tauri ruarua ġeri ai. <sup>5</sup> Ġia ġeri numai ġerakevegogoni ekalesiana maki boġono vaġa-namori.

Au ġatagu namona Epeneto au ġegu vevaġa-namo boġono vinia. Ġia tu Keriso murinai eraka-guineto Asia tanobarana nuġanai.

<sup>6</sup> Maria au ġegu vevaġa-namo boġono vinia. Ġia tu ġomi urami ai evekwaraġi-baregato.

<sup>7</sup> Au garagaragu Androniko ema Iunia au ġegu vevaġa-namo boġono viniri. Ġia tu au ġesi dibura numai ġatanu-vegogoto. Apostolo mabarari vekaravari ai ġia tauri ruarua tu ġerevaġi, ema ġia tu Keriso ġena maġuri nuġanai ġeberetoġa-guineto, muriri ai vau au ama bere-toġato.

<sup>8</sup> Ampliato au ġegu vevaġa-namo boġono vinia. Vereġauka ġena maġuri nuġanai ġia tu au ġatagu korikori.

<sup>9</sup> Urebano au ġegu vevaġa-namo boġono vinia. Ġia tu ġita ġesi taġauvei-vegogoni tarimana Keriso ġena maġuri nuġanai. Au ġatagu namona Stakis au ġegu vevaġa-namo boġono vinia.

<sup>10</sup> Apele au ġegu vevaġa-namo boġono vinia. Ġia tu moġoni veġata Keriso ġena maġuri nuġanai eruġa-gwaġiġini.

Aristobulo ġena numa tarimari mabarari ġegu vevaġa-namo boġono viniri.

<sup>11</sup> Au garagaragu Herodion ġegu vevaġa-namo boġono vinia.

Narakiso ġena numa tarimari deidei Vereġauka ġena doġoro tarimari ġegu vevaġa-namo boġono viniri.

<sup>12</sup>Trifena ema Trifosa au ġegu vevaġa-namo boġono viniri. Maniġeri vavine Vereġauka ġena ġeġauvei-vekwaraġini.

Au tobagu namona Peresi ġegu vevaġa-namo boġono vinia. Mani vavine maki Vereġauka ġena eġauvei-vekwaraġini.

<sup>13</sup>Rufo ma sinana ġesi au ġegu vevaġa-namo boġono viniri. Rufo tu Vereġauka na eġabi-viriġiato ġena vetuġunaġi taunai bene iaġo, ma sinana tu au sinagu ai eiaġoto.

<sup>14</sup>Asinikrito, Flegon, Hemes, Patroba, Hemes ema tarikaka tari ġia ġesi ġetanuni maniġeri ġegu vevaġa-namo boġono viniri.

<sup>15</sup>Filologo, Iulia, Nereus ma tobana, e Olimpasi, ema Barau ġena tarima veaġari ġia ġesi ġetanuni mabarari ġegu vevaġa-namo boġono viniri.

<sup>16</sup>Karomi tata vetarikaka verauna na boġono vaġa-namori

Keriso ġena ekalesia mabarabarari na ġemi vevaġa-namo beġe tuġu.

### Velaunaġi tari

<sup>17</sup>Tarikakagu mabarami, alau-naġimini, boġono boġe-ġotoġoto, vetavi-kirakira veiġari ġeveirini tarimari ema ġomi ġemi veġabidadama ġefatafata-ġaurini, dia ġomi na ġoġabirito vevaġa-ribari na. Maniġeri tarima seviri ġana asi boġono raka-kavi. <sup>18</sup>Korana maniġeri tarima tu dia ġita ġera Vereġauka Keriso ġena vetuġunaġi ġeiaġo-viniani, a ġia tauġaniri ġeri ura veiġari ġeveirini. Ġia tu ġeri guruġa meriġa-meriġari na ema ġeri guruġa ginikau-ginikau na asi iaunegari tarimari ġeri tuġa-maġi ġeġofa-darererini. <sup>19</sup>Tarimarima ġutuma na ġomi ġemi seġaġi varina varau ġe-seġaġiato. Moġa lorinai au ġegu verere asikei ġomi ġemi ai. Senaġi au aurani, veiġa namori boġono riba-ginikauri, ma veiġa rakavari asiġina ġinavaġi boġono veiri. <sup>20</sup>Maino Barauna na nega kotuna moġo benamo Satani ġomi kwakumi fanafana na gaburenai befana-fatafataiani.

Ġita ġera Vereġauka Iesu ġena namo ema varevare-bara ġomi iatami ai bene tanu.

<sup>21</sup>Timoteo, au ġauvei karogu, ema au garagaragu Lukio, Iason ema Sosipata na ġemi vevaġa-namo guruġari beġe tuġu.

<sup>22</sup>Au, Teretio, Paulo ġena guruġa mai fefai batorea taugu, na maki Vereġauka aranai ġegu vevaġa-namo atuġu-iaġosiani.

<sup>23</sup>Gaius na ġemi vevaġa-namo guruġari betuġu. Au tu ġia na ġena numai enariguni, ema ekalesia tarimari mabarari tu mainai ġeraka-vegogoni.

Erasto, mai siti ġena moni eġita-ġauani tarimana, ema ġita tarikakara Kwatas na ġemi vevaġa-namo beġe tuġu.

[<sup>24</sup>Ġita ġera Vereġauka Iesu Keriso ġena namo ema varevare-bara ġomi iatami ai bene tanu.]

### Barau vaġa-raġena guruġari

<sup>25</sup>Barau sivaġa-namoa, korana ġia na ġomi ġemi veġabidadama bevaġa-kokore-iaġirini au ġegu Vari Namona, Iesu Keriso aġobata-iaġiani varina, ġenana. Mai vari tu guineri laġaniri na veġata vekuretoġa etanuto-ġoi dagarana bema fofori. <sup>26</sup>Mait-oma moġeri tu tanu-vanaġivanaġi Barauna ġena guruġa ilailanai peroveta tauri ġeri toretore na ġema vaġa-foforirini, ma tama ribarini. Mai veiġa ema vetoreto anina tu, tanobara mabarari na ġia beġene vaġa-moġonia ema beġene seġaġi-vinia ġana. <sup>27</sup>Iaunega Barauna sebna kwarikwari sivaġa-raġea Iesu Keriso bakunai. Ġia marevana baregona bene tanu vanaġivanaġi. Amen.

## PAULO ĜENA TORETORE GINIGUINENA KORINTO EKALESIARI ĜERI

1 Korinto vaĝa-foforina guruĝari

Korinto ekalesiana doĝorona tu Paulo ĝenana eĝorato (Apostolo 18). Ma mai fefa giniguinena Paulo na etoreato korana tu, Korinto ekalesiari fakari ai tu meto kota ĝeĝorato-ĝoi. Ma ĝia na Paulo ĝetore-viniato, ĝedanaĝiato, kamasi beĝene vei ĝetato. Moĝesi naima Paulo na mai fefai ĝeri vedanaĝi evaĝa-veŝeato (7:1; 8:1; 12:1; 16:1), ema mo deideiri ĝevei-rakavato-ĝoi moĝeri evaĝa-guruĝa-gwĝiĝirito ema ekalesia maĝurina korikorina tu aiĝesina ekira-vararito.

Paulo na mai fefa tu Efeso vanuĝa na etore-vinirito, mo tu Efeso ekalesiari vaĝa-toitoina evarivaririto taiminai. Mai fefa tu laĝani 53 ma 55 fakari nuĝanai ta etoreato, mo tu Iesu emaseto murinai.

Mai fefai siri baregori tu karao 1:30-31. Ma ĝena vevaĝa-riba guruĝari baregori ekiraĝirito tu maiĝeri: 1) Ekalesia doĝorona korikori vetoĝana boĝitaiani, ĝia tu Iesu Keriso ĝena vere o veĝitaĝau gaburenai ĝetanuni. 2) Barau ĝena ekalesia doĝorona korikori tu dia tarima o tanobara ĝena iaunegai ekalesia doĝorona beĝe ĝori-kauani, senaĝi Barau ĝena iaunegai ema seĝukai. 3) Ekalesia doĝorona korikori tu Barau na eboioĝaiato dabaranai moĝo beĝe tanuni. 4) Ekalesia doĝorona korikori tu Barau ĝena guruĝa beĝe korana-iaĝiani, ema Barau ĝena veuravini ai moĝo beĝe tanuni. Paulo na mai fefa tu maiĝesina eboioĝaiato:

1. Ekalesia nuĝanai vevare-kirakira eĝorato - karao 1-4
2. Veĝa rakavari ekalesia nuĝanai - karao 5-7
3. Kwaivakuku ĝevinirini bureĝari - karao 8-10
4. Tomaraka-riĝo dabarana - karao 11
5. Iauka Veaĝa ĝena varevare - karao 12-14
6. Variĝisi-ĝenoĝoi - karao 15
7. Guruĝa dokona - karao 16

**1** Au Paulo, Barau ĝena urai ekeaguto, Keriso Iesu ĝena apostolo tarimagu ai bana iaĝo, ema ĝita tarikakara Sostene ĝesi tauma ruarua ĝemana mai fefa eiaĝosini, <sup>2</sup>Barau ĝena ekalesia tarimami Korinto nuĝanai ĝotanuni ĝemi. Ĝomi tu Barau ĝena tarimarima, be Keriso Iesu nuĝanai varau evaĝa-veaĝamito, ma ĝomi Barau na ekeamito tu boĝono veaĝa uranai. Tarimarima mabarari gabu mabarari ai ĝetanuni ĝera Vereĝauka Iesu Keriso aranai ĝeĝauĝauni tarimari maki, Barau na ĝomi ĝesi ekea-sebonamito, boĝono veaĝa uranai. Iesu Vereĝauka tu ĝia e ĝita mabarara ĝera Vereĝauka.

<sup>3</sup>Ĝita Tamara Barau ema Vereĝauka Iesu Keriso ĝerina varevare-bara ema maino ĝemi ai bene tanu.

### Paulo na Barau etanikiu-viniato

<sup>4</sup>Au na ĝegu Barau vanaĝivanaĝi atanikiu-viniani ĝomi iatami ai, korana ĝia ĝena varevare-bara ĝomi Keriso Iesu nuĝanai ĝotanuni tarimami evinimito nai. <sup>5</sup>Iesu Keriso ĝesi ĝosebonani nai, Barau na ĝomi dagara mabarari ai varau bevaĝa-taĝami, guruĝa kiraĝikiraĝi iaunegari mabarana ema tuĝamaĝi-faka mabarana maki evinimito. <sup>6</sup>Keriso varina maki ĝomi nuĝami ai tu varau emoĝonito e ĝemi

veġabidadamai ġoruġa-gwaġiġini. <sup>7</sup> Moġesina naima ġita ġera Vereġauka Iesu Keriso ġena iaġoma roġo ġovaġa-noga-taġoani nuġanai tu, Iauka Veaġa ġena varevare tai tu asi ġorabuni. <sup>8</sup> E Barau na ġomi bevaġa-ruġa gwaġiġimini beiaġoni mo magona. Be ġera Vereġauka Iesu Keriso ġena vevaġa-kota ġaronai ġomi tu asi ġemi veirakava bene doġarimi. <sup>9</sup> Barau tu ma ġena vetuġamaġikau. Ġia na ġomi ekeamito, ġia Natuna Iesu Keriso ġita ġera Vereġauka ġesi boġono sebna moġo ġana.

### **Ekallesia nuġanai vevare-kirakira eġorato**

<sup>10</sup> Tarikakagu mabarami, au na ġita ġera Vereġauka Iesu Keriso aranai anoġimini, aurani mabarabarami tu dagara sebna moġo boġono kiragġia, be tauġemi fakami ai asi boġono vevare-kirakira. Ġomi mabarami ġemi tuġamaġi ema ura sebna moġo boġono tanu. <sup>11</sup> Korana tarikakagu, ġomi varimi tu Kloe ġena numa tarimari na ġema-kiravaraguto, ġekirato, ġomi tu tauġemi moġo ġoveġare-veġareni fakami ai. <sup>12</sup> Au na akiraġiani gabuna tu iniġa. Ta tu okirani, “Au tu Paulo murinai arakani.” Ta tu okirani, “Au tu Apolos murinai arakani.” Ma ta ma okirani, “Au tu Kefas, (mai tu Petero), murinai arakani.” Ma ta maki ma okirani, “Au tu Keriso murinai arakani.” <sup>13</sup> Keriso tu bevevare-kirakira, be doġoro ġutumai beiaġo ba? Mo tu Paulo ġomi urami ai ġevaġa-satauroato ba? O Paulo aranai ġomi ġebabatisomito? <sup>14</sup> Au na Barau atanikiu-viniani, korana au na ġomi ta asi ababatisomito, a Krispo ema Gaius moġo ababatorito. <sup>15</sup> Asi namo ġomi ta bokirani, “Ġai tu Paulo na eababatorito nai ġena mero ai ġaiaġoto,” botoni. <sup>16</sup> Moġoni, Stefanas ma ġena numa tarimari ġesi maki au na ababatorito. Ma asi aribani, au na tarima kotari maki ma ababatorito ba asiġina.

<sup>17</sup> Au Keriso na etuġuguto tu, dia bana babatiso ġana, senaġi Vari Namona bana ġobata-iaġia ġana. Ma dia iaunega lelevaġi tarimari ġeri guruġa maġurinai bana ġobata-iaġia, korana Keriso ġena satauro asi seġukanai beiaġoni garina.

### **Satauro Varina**

<sup>18</sup> Moġoni, satauro varina mase dabaranai ġerakani tarimari na tu asi ġevaġa-moġoniani, ġekirani tu vari babona ġetoni. Senaġi maġuri dabaranai tarakani tarimara ġerai tu Barau ġena seġuka satauro varina nuġanai efoforini. <sup>19</sup> Buka Veaġa nuġanai Barau tu maġesi ekirani,

“Au na iaunega lelevaġi tarimari ġeri iaunega tu asi tauri ai bavaġa-iaġorini, ema ġeriba-vanaġito tarimari ġeri riba lelevaġina bavaġa-rakavarini.”

<sup>20</sup> Be iaunega lelevaġi tarimari tu ainai? Vevaġa-riba e toretore tarimari tu ainai? Ribavanaġi tarimari guruġa ġevaġa-vevaġirini tauri tu ainai? Barau na evaġa-foforiato, mai tanobara ġena iaunega tu babo veġata.

<sup>21</sup> Moġoni, Barau ġena iaunega tu ofori, korana Barau na guba ema tanobara eveirito mabarari na ġena iaunega tu ġevaġa-foforiani, senaġina tarimarima tauġeri ġeri iaunega na Barau asi ġeribaiaato. Moġesina nai Barau ekirato, namona tu, satauro varina, tarimarima na ġekira-baboani varina, ġevaġa-moġoniani tarimari Barau na bene vaġa-maġuriri. <sup>22</sup> Iuda tarimari ġeri ura baregona tu vetoġa boruri beġene ġita, a Grik tarimari tu iaunega ġeġita-vetauni. <sup>23</sup> Senaġi ġai na tu Keriso, ġevaġa-satauroato tarimana, ġaġobata-iaġiani, ġia tu vevaġa-maġuri tauna. Ma mai vari Iuda tarimari ġeri ai tu guruġa rakavana e Grik tarimari ġeri ai tu vari babona. <sup>24</sup> Senaġi Barau na ekearito tarimari, Iuda tarimari e Grik tarimari, ġita mabarara

gerai Keriso tu Barau ġena seġuka ema Barau ġena iaunega. <sup>25</sup> Barau ġena veiġa tari-marima na ġekira-babobaborini, moġeri veiġa na tarima ġeri iaunega evanaġirini. Ema Barau ġena veiġa tarimarima na moira-moirai ġekiraġirini, moġeri na tarima ġeri kokore evanaġirini.

<sup>26</sup> Tarikakagu mabarami, ġovetuġamaġi-ġenoġoi, ġomi tu aiġesi tarimami Barau na ekeamito. Ġomi tanobara iaunegana ġesi bita vaġa-vetovomini nai, ġomi viravira moġo ma iaunegami, e ġomi viravira moġo ġoseġukato, ema ġomi viravira moġo ġemi bese tu vere. <sup>27</sup> Senaġi Barau na tu mai tanobarai babo tarimari eviriġirito, benamo ġia ġerina mai tanobara ġena iaunega tarimari evaġa-maiakarito. Ema Barau na mai tanobarai moira tarimari eviriġirito, benamo ġia ġerina tanobarai kwalimu tarimari evaġa-maiakarito. <sup>28</sup> Ema Barau na mai tanobarai tarima tari, asi ġeivirini, ġeġita-fitoġarini e ġekirani, namo ta asi beġe vaġa-ġoraiiani ġetoni tarimari, eviriġirito, benamo ġia ġerina tanobarai ġevaġa-raġerini tarimari asi tauri ai evaġa-iaġorito. <sup>29</sup> Mo veiġa eveiato korana tu, tarima ta ġia ġoiranai asi bene vetore-varaġevaraġe ġana. <sup>30</sup> Gomi ġemi maġuri tu Barau na Keriso Iesu ġesi evaġa-sebonaiato. Keriso Iesu tu Barau na eġabiato ġita ġera iaunegai evaġa-iaġoato. Keriso ġenana ġita tu Barau ġena vei-iobukaibuka tarimara e Barau ġena veaġa tarimara, ema Barau na rakava nuġana na evoi-vaġirato, ma rakava toma tu asi seġukana ġita ġerai. <sup>31</sup> Moġa lorinai Buka Veaġai ekirani ilailana bitana tanu, ekirani, “Tarima ta eurani bene veiavi nai tu, Vereġauka na kara ġita iatarai eveiato veiavina moġo bene veiavi-iaġia.”

**2** Tarikakagu mabarami, au ġomi ġemi ai aiaġosito, Barau ġena guruġa vekure-toġana ġemi aġobata-iaġiato tu, dia guruġa gwaġiġiri ai e ġegu iaunegai ġomi avaġa-guruġamito. <sup>2</sup> Au ġomi ġesi roġo tatanuto-ġoi nai, au ġegu ura baregona aveiato tu, dagara ta tu asi bana kiraġia, senaġi Iesu Keriso moġo, o sikira, Iesu Keriso, ġevaġa-satauroato tarimana moġo bana ġobata-iaġia. <sup>3</sup> Au ġomi ġesi tatanuto-ġoi tu asi kokoregu, ma garigu ġesi, ema tauġanigu maki eġoġo-ġoġoato-ġoi. <sup>4</sup> Ema au ġegu guruġa e ġobata maki dia tarimarima ġeri iaunega guruġari na, senaġi au ġegu guruġa ema ġobata tu lauka Veaġa seġukana avaġa-foforiato-ġoi. <sup>5</sup> Moġesi naima ġomi ġemi veġabidadama tu tarimarima ġeri iaunegai asi boġono vaġa-ruġari, senaġi Barau ġena seġukai boġono vaġa-ruġari.

### Iauka ġenana eiaġomani iaunegana

<sup>6</sup> Moġoni, iauka rekenai ġefakirato tarimari tu, guruġa iaunegari avinirini. A maiġeri guruġa iaunegari tu dia mai tanobara ġena iaunegai o mai tanobara ġorikauri tarimari ġeri iaunegai; ġia ġeri iaunega tu mai ekorini. <sup>7</sup> Au na aki-raġiani iaunegana tu Barau ġena iaunega vekuretoġana. Tarimarima ġerina tu ekure-toġaiato, senaġi ġia na mai tanobara roġosi roġo bere veia nuġanai, eġabi-toreato, ġita na mareva baregona bitana ġabia uranai. <sup>8</sup> Mai iaunega vekuretoġana tanobara ġeġori-kauani tarimari na ta maki asi ġeribaiato. Korana bema beġere ribaia nai tu, mareva baregona Vereġaukana tu asi ġere vaġa-satauroa. <sup>9</sup> Senaġi Buka Veaġai ekirani ilailanai,

“Ta matana na asi eġitaiato,  
ta seġana na asi eseġaġiato,  
ta ġena tuġamaġi asi etuġamaġi-fakaiato,  
moġa tu Barau na erovina-toreato,

ġia beġe ura-viniani tarimari ġeri.”

<sup>10</sup> Mai tu vekuretoġa dagarari, senaġi Barau na ġita ġerai tu evaġa-foforirito ġia Iaukana ġenana. Iauka tu dagara mabarari eragaġirini, Barau ġenai dagara dobumasemaseri maki eragaġirini. <sup>11</sup> Vaġa-ilailana tarima ta na tarima boruna ġena tuġamaġi asi eribaiani. Asiġina. Mo tarima tauġena iaukana na vau ġia nuġanai tuġamaġi vekuretoġari eribarini. Barau maki moġesina, tarima ta na ġia ġena tuġamaġi asi eribaiani, senaġi Barau Iaukana na moġo eribaiani. <sup>12</sup> Ġita na tu dia mai tanobara Iaukana taġabiato. Asiġina. Ġita tu Barau na etuġuato Iaukana taġabiato, Barau na vavareve evini-kavarato, dagarari bitana riba-maorori ġana.

<sup>13</sup> Maiġeri dagara tu dia tarimarima ġeri iaunegai ġevaġa-ribamani guruġari loriri ai ġakiraġirini. Senaġi mai tu Iauka Veaġa na evaġa-ribamani guruġari ilailari ai ġaguruġani. Iauka rekenai dagarari o guruġari tu Iauka Veaġa na evaġa-ribamani ilailanai ġakiraġirini. <sup>14</sup> Tanobara tarimana na Barau Iaukana ġenana dagara ta tu asi bedoġariani, korana ġia tanobara tarimana ġenai mo tu babo dagarari, ema asi maki beribarini, korana moġeri dagara mo tu Iauka Veaġa nuġanai ġetanuni tarimari na vau beġe ribarini. <sup>15</sup> Iauka Veaġa ġia nuġanai etanuni tarimana na, dagara mabarari beġita-ginikaurini e betuġamaġi-fakarini, senaġi ġia tauġena tu ta na asi beġita-ginikauani e asi beriba-maoroani. <sup>16</sup> Korana Buka Veaġa nuġanai maiġesi ekirani, “Deikara na Vereġauka nuġana eribaiani?

Deikara na ġia besisiba-viniani?

A Keriso ġena tuġamaġi tu ġita ġerai etanuni.”

### Barau ġena vetuġunaġi tarimari

**3** Tarikakagu mabarami, au na ġomi avaġa-guruġamito-ġoi tu dia Iauka Veaġa na eguine-iaġirini tarimari kavana. Senaġi au na ġomi tu tanobara maġurinai ġetanuni tarimari kavana avaġa-guruġamito-ġoi. Mo negai ġomi Keriso ġena veiġa e maġuri nuġanai tu roġo raraka-raraka. <sup>2</sup> Moġesi naima au na ġomi tu lata gorari ai aġubumito, a dia ġaniġani gwaġiġiri ai. Korana mo negai ġomi Iauka ġaniġaniri gwaġiġiri ġaniġaniri ġana tu roġosi roġo boġoro barego-ginikau. Aba, inította maki ġomi tu roġosi roġo boġoro barego-ginikau, roġo raraka-raraka Iaukai; <sup>3</sup> korana ġomi tu roġo tauġanimi ġeri ura rakavari na ġeguine-iaġimini. Ġomi fakami ai mama e vevane tu roġo ġetanuni, mainana moġo evaġa-moġoniani ġomi tu mai tanobara tarimari ġeri maġuri ai roġo ġotanuni. <sup>4</sup> Ġomi tu roġo tanobara maġurinai ġotanuni, korana ġomi ta okirani, “Au tu Paulo ġena,” ma ta tu ma okirani, “Au tu Apolos ġena.”

<sup>5</sup> Be Apolos tu dei? Ema Paulo tu dei? Ġia tauri ruarua tu vetuġunaġi tarimari koriri moġo, ġia ġerina ġomi Iesu ġovaġa-moġoniato. Ġai tauma ruarua tu Vereġauka na ġauvei tata evinimato. <sup>6</sup> Au tu avaroto, a Apolos na tu nanu na edairiato, senaġi Barau na tu evaġa-garaiato. <sup>7</sup> Moġesi naima evaroto tarimana e nanu na edairiato tarimana tauri ruarua tu asi arari, senaġi Barau ġereġana moġo, korana ġia na dagara evaġa-gararini. <sup>8</sup> Evaroni tarimana ema nanu na edairini tarimana tu ilaila moġo. Ġia tata ġeri ġauvei ilailari ai Barau na voiri bevinirini. <sup>9</sup> Ġai tu Barau ġesi ġaġauvei-sebonani tarimama, a ġomi tu Barau ġena vamoka; ġomi maki Barau ġena numa.



### Barau ġena ġauvei tu numa ragaragana kavana

<sup>10</sup> Barau na ġena namo e varevare-bara eviniguto ilailanai, au tu numa raga tarimagu namonai aiaġoto. Numa vaġa-ruġavaisina duġuna forena eragaiato (o kwakuri avaġa-ruġa ginikaurito), ma ta na tu iatanai numa eragaiani. Senaġi numa beġe ragaiani tarimari tata tu beġene venari, kamasì numa beġe ragaiani tu. <sup>11</sup> Barau na Iesu Keriso tu numa vaġa-ruġavaisina duġuna forenai evaġa-iaġoato. Ma ta na numa vaġa-ruġavaisina duġuna boruna ta tu asi ma beragaiani veġata. <sup>12</sup> Tarima tari na mai numa vaġa-ruġavaisina duġuna forena (o numa kwakuri) iatanai tu golo, silva o galasi foreri beġe ġauvei-iaġirini numa beġe ragani nai, a tarima tari na ġau, reġi o biri beġe ġauvei-iaġirini. <sup>13</sup> Ġia tata ġeri ġauvei vetoġari tu Vereġauka ġena Kota baregona ġaronai vau bevaġa-foforirini. Korana mo ġauvei tu karava na bevaġa-foforiani ema karava na tarima tata ġeri ġauvei betovo-naġirini, moġeri ġauvei tu namori ba rakavari. <sup>14</sup> Bema tarima ta na mo numa vaġa-ruġavaisina duġuna forenai eragaiato numana tu karava na asi beġaraiani nai, ġia tu voina namona beġabiani. <sup>15</sup> Bema ġena numa karava na beġaraiani tarimana tu, ġena ġauvei mabarari tu beġe rekwa-rekwani, ġia ġereġana moġo bemaġurini. Senaġi ġia tu noġa moġo karava na beraga-maġurini.

### Ġomi tu Barau ġena Rubu Veaġa

<sup>16</sup> Ġomi asi ribami, ġomi tu Barau ġena Rubu Veaġa ema Barau Iaukana tu ġomi nuġami ai etanuni, ei? <sup>17</sup> Bema tarima ta na Barau ġena Rubu Veaġa bevaġa-rakavaiani nai, ġia maki Barau na bevaġa-rakava kwaikwaiani, korana Barau ġena Rubu tu veaġa, ema ġomi tu ġia ġena Rubu Veaġa.

### Tarimarima asi boġono vaġa-veiaviri

<sup>18</sup> Tarima ta ġena tuġamaġi na asi bene ġofaia. Bema tarima ta ġomi fakami ai etuġamaġini, ġia tu ma iaunegana mai tanobarai, ġia tu babo tarimanai bene iaġo, be bene iaunega. <sup>19</sup> Korana mai tanobara iaunegana Barau ġoiranai tu iaunega babona. Buka Veaġai ekirani kavana, ekirani, “Barau na iaunega tarimari tauġeri ġeri iaunega rakavari nuġari ai eġabi-taririni.” <sup>20</sup> Ema Buka Veaġai maki ma ekirani, “Vereġauka ribana, iaunega tarimari ġeri tuġamaġi tu asi tauri, koriri moġo.”

<sup>21</sup> Moġesi naima, tarima ta na tarimarima tu asi bene vaġa-veiaviri. Korana dagara mabarari tu ġomi ġemi. <sup>22</sup> Paulo e Apolos ema Petero; mai tanobara mabarana tu ġomi ġemi, maġuri e mase, maitoma ġefoforini dagarari ema ġoirai vau beġe iaġomani dagarari; mabarari tu ġomi ġemi. <sup>23</sup> A ġomi tu Keriso ġena, ema Keriso tu Barau ġena.

### Vereġauka tauġena na ġena vetuġunaġi tarimari ġeri maġuri evetau-ginikaurini

**4** Moġesi naima ġomi na ġai boġono tuġamaġima, ġai tu Keriso ġena vetuġunaġi-iaġovinina tarimama, ema Barau ġena vekuretoġa dagarari ġitaġauri tarimama. <sup>2</sup> Farefare ġeviniani bene ġita-ġauri ġetoni tarimana ġena biaguna ġena ura baregona, ġia tu ma vetuġa-maġikauna ġesi farefare bene nariri. <sup>3</sup> Au tu kamasì ġotoni? Au tu asi atuġamaġini, ġomi na au boġo vetau-ginikauguni o tarimarima ġeri Kota maġurina beġe vetau-ginikauguni ba asiġina. Au tu tauġegu maki asi

avevaḡa-maoroni. <sup>4</sup>Au tauḡegu avetuḡamaḡini, ḡegu rakava ta asi atuḡamaḡi-doḡariani. Senaḡi asi akirani, au tu asi ḡegu vei-rakava. Vereḡauka na moḡo au eḡita-ginikauguni. <sup>5</sup>Moḡesina naima Vereḡauka roḡosi bene iaḡoma e ḡena vevaḡa-kota ḡarona roḡosi bene ḡabia nuḡanai, maitoma tu tarima ta asi boḡono vetau-vinia. Vereḡauka na mukuna furufuru ai vekuretoḡa dagarari mabarari mamai betore-rosirini, ema tarimarima ḡeri tuḡamaḡi loruri ḡutunai ḡetanu-vekuretoḡani maki bevaḡa-foforirini. Mo ḡaro ai Barau na tata bevaḡa-raḡerini ḡeri veḡa loriri ai.

<sup>6</sup>Tarikakagu mabarami, maiḡeri guruḡa au tauḡegu ema Apolos ḡema bavaḡa-vetovori, korana tu ḡomi namo boḡono doḡari uranai. Be, ḡai ḡemana maiḡa boḡono ribaia, “Buka Veḡaiḡi ḡetoreato guruḡana asi boḡono vanaḡia.” Monana tarima sebona ta moḡo asi boḡo vaḡa-veiaviani e ta asi boḡo kira-fitoḡaiiani. <sup>7</sup>A ḡoi tu deikara na tarima baregomu ai etoremuto tarimarima mabarari fakari ai? ḡoi ḡemu dagara mabarari tu dia Barau na evinimuto? Bema ḡoi na Barau ḡenana odoḡaririto nai tu, kara dainai ovekokorokuni, noḡa dia Barau ḡenana oḡoitaḡoato dagarana oveini?

<sup>8</sup>ḡomi tu ḡoura-vinirini dagarari na varau boḡo vonuvonu-raḡe. ḡomi tu varau boḡo taḡa-ḡosi. ḡai tu ḡomi na boḡo vanaḡima, korana ḡomi tu varau boḡo kini, be ḡoveḡitaḡauni. (ḡomi tu noḡa moḡo Keriso varau bere iaḡoma-ḡenoḡoi kavana ḡoveini). Au ḡegu ura barana sebona, ḡomi tu moḡoni boḡoro kini, be ḡai maki ḡomi ḡesi bitara kini-sebona. (Korana boḡono riba, Keriso ma beḡenoḡoi-iaḡomani nai, ḡai maki ḡomi ḡesi bita kinini). <sup>9</sup>Senaḡi au atuḡamaḡini tu maiḡesi: Barau na ḡai apostolo tu gabi tarimamai etoremato, mai tanobarai asi beḡene ḡita-leama e asi beḡene iavima gabunai etoremato. ḡai tu noḡa tarima kotari, Kota na evaḡa-moḡonirini beḡene vaḡi-maseri etoni, benamo ḡeḡabirini, ḡutuma-bara ḡoirari ai ḡevaḡa-ruḡa-rosirini, beḡene ḡitari vau beḡene vaḡiri ḡetoni kavana. ḡai maki Barau na mai tanobara mabarana nuḡanai etore-rosimato, aneru e tarimarima ḡoirari ai. <sup>10</sup>ḡai tu babo Keriso ḡaramanai bene, a Keriso nuḡanai ḡomi tu iaunega. ḡai tu asi kokorema, a ḡomi tu ma kokoremi. ḡomi tu ḡeguba-kaumini, a ḡai tu asi ḡegubakaumani. <sup>11</sup>ḡai ḡatanu-iaḡomani mo toma tu ḡavito-maseni e ḡananu-maseni; dabuḡa rakavari na ḡavedabuḡani; ḡekwarimani; ema asi ḡema tanutaḡo numari. <sup>12</sup>ḡai tu tauḡema ḡi-mama na ḡaḡauveini. Tarima na ḡekira-fitoḡamani nai, ḡai na tu ḡavaḡa-namorini; ḡevaḡa-midigu midigumani e ḡelai-lautilusimani, senaḡi ḡaruḡa-gwaḡiḡini moḡo, voiri asi ḡaveirini. <sup>13</sup>ḡai arama tu ḡevaḡa-rakavarini, a ḡai na tu ḡavaḡa-guruḡa ginikaurini. ḡai tu tanobara ḡena momo ai ḡaiaḡoto, e tanobara na eruḡamani asi eḡabi-raḡemani beiaḡoma mo toma.

<sup>14</sup>Au na maiḡeri mabarari atorerini tu, dia ḡomi navaḡa-maiakami ḡana, senaḡi ḡomi tu au natugu, aura-vinimini tarimami, naima akiravara-toreḡaumini. <sup>15</sup>Aba, Keriso nuḡanai ḡevaḡa-ribamini e ḡeḡori-kaumini tarimari tu betaḡu 10,000, senaḡi tama tu asi vovoka ḡomi fakami ai, sebona moḡo. Korana Vari Namona ḡenana au tu ḡomi tamami ai aiaḡoto Keriso Iesu nuḡanai. <sup>16</sup>Moḡesi naima au na ḡomi alaunaḡimini, au boḡono tovotovogu. <sup>17</sup>Moḡa lorinai maki au na Timoteo ḡomi ḡemi ai atuḡu-iaḡosiato. ḡia Vereḡauka nuḡanai tu au natugu e auravini-rakavaiani, ema ḡia tu Vereḡauka ḡena ḡauvei evei-ḡitakuani ma vetuḡamaḡikauna ḡesi. ḡia na au Keriso Iesu nuḡanai aiḡesi atanuni maḡurina ma bekira-varamini, gabu e rubu mabarari ai avevaḡa-riba iaḡirini ilailari ai.

<sup>18</sup>ḡomi tari tu ḡovekokorokuni, noḡa moḡo au ḡomi ḡemi ai tu asi baiḡosini noḡa ḡoveini. ḡomi garimi aveini ḡotoni. <sup>19</sup>Senaḡi bema Vereḡauka ḡena ura nai

tu, ġemi ai baiaġosi-ġarimoġini. Benamo au baiaġosini vauro, maniġeri tarima ġeri vekokoroku guruġari ema ġeri seġuka basi ribarini. <sup>20</sup> Korana ainai Barau na ġena Basileia o veġitaġau evaġa-ruġaiani, monai tu dia guruġa korina ġesi moġo efoforini. Asiġi. Barau ġena veġitaġau tu ma seġukana ġesi efoforini. <sup>21</sup> Ġomi na tu aiġa ġoura-viniani? Au ġomi ġemi ai tu ma kwarigu ġesi bana iaġosi, ba veuravini ai ema manau ai, ei?

### Veiġa rakavari Korinto ai

**5** Ma aseġaġini, ġekirani, ġomi fakami ai mata-boraġa maġurina eġorani. Mai mata-boraġa maġurina ġomi fakami ai eġorani tu Barau asi ribari beseri fakari ai maki asi eġorani veiġana. Au ġekiraguni, tau ta na sinana raġetaġona eġabiani, benamo ġaraġonai evaġa-iaġoani, eġena-viniani. <sup>2</sup> Ma nuġanai ġomi tu ġovekokorokuni. Ġomi tu nuġami taġi na beġere vonu, be moġesi eveini tarimana tu ġomi fakami na boġoro tuġu-veġitaia. <sup>3</sup> Aba, au tauġanigu ġomi vekaravami ai tu asiġina, senaġi iaukai au tu ġomi vekaravami ai maniġegu. Be mai veiġa eveiani tarimana tu au na varau bavaġa-maorua, au tauġani ai ġomi ġesi maninai mani ġegu bara vaġa-maorua ilailanai. <sup>4</sup> Ġomi ġera Vereġauka Iesu Keriso aranai ġoraka-vegogoni, ema au iaukagu maki ġomi vekaravami ai nuġanai, ġera Vereġauka Iesu Keriso ġena seġukai, <sup>5</sup> ġomi na maniġesi eveini tarimana tu Satani boġono vinia, tauġanina bene vaġa-rakavaia uranai bene. Moġesina boġono veia, be Iesu Vereġauka ġena ġenoġoi ġaronai ġia iaukana tu bene maġuri.

<sup>6</sup> Ġomi ġoveiavini tu asi namo. Ġomi asi ribami farao evaġa-tubuani muramurana misina na farao mabarana evaġa-tubuani? <sup>7</sup> Moġesina naima farao evaġa-tubuani muramurana guinena mabarana ġemina boġono tore-veġitaia, be ġomi tu beredi variġuna asi farao evaġa-tubuani muramurana beredinai boġono iaġo. Au ribagu, ġomi tu moġoni beredi variġuna, dia farao evaġa-tubuani muramurana ġesi ġevei-sebonamito beredina. Korana Keriso tu moġoni ġita ġera mamoe natuna ginitaġo ġana. Ġia tu ġita urarai ginitaġo ġana ġevaġiato. <sup>8</sup> Moġa lorinai Rubu Veaġa verekona bitana ġabi-gwaġiġia, senaġi dia farao evaġa-tubuani muramurana guinena ġesi. Mai veiġa tari ilailana tarima vaġa-rakavari tuġamaġiri e veiġa rakavari tu farao evaġa-tubuani muramurana kavana, be maiġeri maki bitana tore-veġitari Rubu Veaġa verekona bita ġabi-gwaġiġiani nai. Ġita na Rubu Veaġa verekona bita ġabi-gwaġiġiani nai tu, dia farao evaġa-tubuani muramurana ġesi ġevei-sebonaiani beredina ġesi. Moġa tauna tu, ma moġonira ġesi ema moġoni ai bitana ġabia.

<sup>9</sup> Fefa tai au na ġomi atore-vinimito nuġanai akiramito, mata-boraġa tarimari ġesi tu asi boġono vekako. <sup>10</sup> Moġesi atore-vinimito nai, au na tu dia ekalesia murikanai ġetanuni tarimari akiraġirito, au iniġesi tu asi akirato, ġekima-rakaoni, o ġemata-ġaniġanini, o ġofaġofa veiġari ai ġeverarini, o kwaivakuku ġetoma-rakariġo vinirini tarimari ġerina tu boġono rakaveġita-moġovaġi. Korana bema maiġeri tarima ġerina ġoveġita-moġovaġi boġo toni nai tu, mai tanobara boġo iaġuiani. <sup>11</sup> Senaġi toma au na atore-vinimini tu, akirani, deikara ekirani, ġia tu tarikaka veġabidadama nuġanai, senaġi ġia tu ekimani o emata-ġaniġanini, o babarau etoma-rakariġo vinirini, o tarimarima ġeri maġuri ekiraġi-rakava rakavarini, o niuniu tarimana, o ġofaġofa veiġari eveirini tarimana ġesi asi boġono vekako. Maiġesi tarimari ġesi tu asi maki boġono ġani-vegogo.

12-13 Au tu asi ġegu ġauvei ta ekalesia murikanai ġetanuni tarimari au na bavaġa-maororini. Barau na vau bekota-vinirini. Senaġi ġomi tu ma ġemi maoro ekalesia nuġanai ġetanuni tarimari boġo vaġa-maororini. Buka Veaġa ekirani ilailanai, “Veirakava tarimana ġomi fakami na boġono tore-veġitaia!”

### Vekotavini ekalesia karomi ġesi

**6** Bema ġomi ta ekalesia karomu ta ġesi ġoveġare-veġareni nai, kara dainai tu Barau asi ġekorana-iaġiani Kota seġaġi tarimari ġeri ai oa samaniani, ġia beġene vevaġa-maoro ġana, a Barau ġena tarimarima veaġari ġeri ai mo meto tu asi ġoġabi-iaġoani vei-maorona, ei? <sup>2</sup> Ġomi asi ribami, tanobara maġurinaġi ġetanuni tarimari tu Barau ġena tarimarima na beġe vaġa-maororini? Karase nai ġomi na mai dagara misiri tu asi ilaila tauġemi na ġemi vegogo ai boġo vaġa-maororini? <sup>3</sup> Ġomi asi ribami, ġita na tu aneru bita kota-vinirini? Bema moġesi bita veini nai tu, atuġamaġini, mai vanaġivanaġi tatanu-iaġiani maġurina dagarari maki bita vetau-ginikaurini riba. <sup>4</sup> Ġoġitaiani, bema mai vanaġivanaġi tatanu-iaġiani maġurina dagarari ġita na bita vetau-ginikaurini, karase nai tu Barau asi ġekorana-iaġiani Kota tarimari ġeri ai ġoiaġoni, ġemi beġene vevaġa-maoro ġotoni. <sup>5</sup> Maiġesi akirani tu ġomi beġene maiakami ġana. Moġoni korikori, ġomi fakami ai iaunega tarimana sebona ta maki asiġina ġinavaġi moġo, be ġia na tarikakana vekaravari ai mani meto misina asi bevaġa-maoroani, ei? <sup>6</sup> A ġomi tu ekalesia karona ta na karona ta eġori-kotaiani, ma tauri ruarua tu ġeiaġoni, Iesu asi ġevaġa-moġoniani tarimari ġoirari ai ġea ruġa-tarini, ġekota ġana.

<sup>7</sup> Moġoni, ġomi tauġemi moġo vekaravami ai ġoveġori-kotani tauna korikori tu, ġomi ġemi veġabidadama maġurina na tu moġoni boġo keto-korikori. Karase nai tarikakami tari na ġevaġa-rakavamini nai tu, asi moġo ġoġabi-raġerini? Kara dainai ġofaġofai ġemi farefare ġeverarimi ġetoni nai tu, asi moġo ġoġabi-ragerini, ei? <sup>8</sup> A ġomi tu tarikakami ġesi tauġemi moġo ġofaġofai ġoveverarini e ġovevaġa-rakavani.

<sup>9</sup> Ġomi asi ribami, veġa iobukaiobukari asi ġeveini tarimari na Barau ġena Basileia tu asi beġe ġaunaiani. Tauġemi nuġami na asi beġene ġofami. Korona tu ġekimani tarimari, kwaivakuku ġetoma-rakarigorini tarimari, veġura-vanaġi tarimari, tau tu tau karori ġesi ġekimani, ema ġeġiġiraġeni tauġeri karori ġesi maiaka veġari beġene vei ġetoni tarimari, <sup>10</sup> ġelemani tarimari, ġemata-ġaniġanini tarimari, niuniu tarimari, ġofaġofa veġari ai ġeveverarini tarimari, ema tarimarima ġeri maġuri ġekiraġi-rakava rakavarini tarimari na Barau ġena Basileia tu asi beġe ġaunaiani. <sup>11</sup> Ma ġomi kotari guinenai tu moġesi ġoveito-ġoi tarimami. Senaġi ġomi tu ġita ġera Barau Iaukana na Iesu Vereġauka aranai varau eġurigimito, evaġa-veaġamito, ema asi ġemi vei-rakava etato.

### Ġita tauġanira tu Iauka Veaġa ġena tanu numana

<sup>12</sup> Ta bekirani, “Dagara mabarari au ġegu ai tu asi taravatu,” betoni. Ġomaoroni, senaġi dia mo dagara mabarari ġerina ġomi namo boġo doġarini. Dagara mabarari au ġegu ai tu asi taravatu, senaġi asi namo au dagara ta na beġori-kauguni, benamo ġena tuġu-rakaorakao tarimanai baiaġoni. <sup>13</sup> Ma ta bekirani, “Ġaniġani tu sinaġe ai bene tanu ġana e sinaġe tu ġaniġani ġana.” Mai tu moġoni! Senaġi ġaniġani e sinaġe tu Barau na tauri ruarua bevaġa-rakavarini. Ġita tauġanira Barau na eveiato tu dia tarimarima na bitana kima-iaġia ġana. Asiġina. Barau na tauġani tu Vereġauka

ġena eveiato, ma Vereġauka maki tauġani ġena Vere. <sup>14</sup>Barau na Vereġauka mase na evaġa-variġisi ġenoġoiato, ema ġita maki mase na bevaġa-variġisi ġenoġoirani, Barau tauġena ġena seġuka na.

<sup>15</sup>Ġomi asi ribami, tata tauġanimi tu Keriso tauġanina koturikoturi, ei? Ma Keriso tauġanina koturikoturi moġeri tu naġabiri, be mata-boraġa tarimari tauġaniri ai navaġa-iaġori? Asiġina ġinavaġi! <sup>16</sup>Ba ġomi tu asi ribami, mata-boraġa vavinena ġesi evekafani tarimana tu mo mata-boraġa vavinena ġesi sebonai ġeiaġoni? Korana Buka Veaġa nuġanai Barau ekirato, “Mo tarima ruarua tu tauġani sebonai moġo beġe iaġoni.” <sup>17</sup>Senaġi Vereġauka ġenai bekafakauni tarimana tu Vereġauka ġesi iauka sebonai beġe iaġoni. <sup>18</sup>Mata-boraġa maġurina ġenana boġono raka-veġita. Veiġa rakava mabarari tarimarima na ġeveirini tu tauġani murikana moġo rakavana, senaġi ekimani tarimana tu tauġena tauġanina nuġanai evei-rakava viniani. <sup>19</sup>Ba ġomi tu asi ribami, ġomi tauġanimi tu Iauka Veaġa ġena Rubu Veaġa, ma Iauka Veaġa tu ġomi tauġanimi nuġanai etanuni, ei? Mani Iauka Veaġa tu Barau na evinimito, moġa lorinai ġomi tu dia tauġemi ġemi, senaġi ġomi tu Barau ġena. <sup>20</sup>Ġomi tu Barau na voimi varau eveirito, evoi-ġenoġoimito, be tauġanimi tu Barau ġena. Moġa lorinai tauġanimi na Barau boġono vaġa-raġea.

### Veġaraġo guruġari

**7** Maitoma tu ġemi fefai au ġotore-viniguto guruġari ma navaġa-voiri. Tau ta asi eveġaraġoni tu namo. <sup>2</sup>Senaġi kima veiġana eġorani lorinai, namona tu tau tata tauġeri ġaraġori sebori sebori beġene ġaraġo, e vavine tata maki tauġeri ġaraġori sebori sebori beġene ġaraġo. <sup>3</sup>Tau tauġanina tu ġaraġona ġena, be tauġanina ġaraġona ġenai asi bene koua, a ġaraġona ġena ura bene veiri. Vavine maki moġesi, tauġanina tu ġaraġona ġena, be tauġanina ġaraġona ġenai tu asi bene kouġaua, a ġaraġona ġena ura bene veiri. <sup>4</sup>Veġaraġo vavinena tu asi ġena maoro ġia tauġena tauġanina ġenai, a ġaraġona tauna moġo ma ġena maoro ġia tauġanina ġenai. Veġaraġo tauna maki moġesina, ġia tu asi ġena maoro ġia tauġena tauġanina ġenai, a ġaraġona vavinena moġo ma ġena maoro ġia tauġanina ġenai. <sup>5</sup>Goveġaraġoto tarimami tu ġaraġomi ġeri ai tauġanimi asi boġono kouri. Senaġi taumi ruarua nuġa sebonai boġo kirani, ġoġaniveaġa e ġoġauġau boġo toni, moġa uranai vauro mo negai boġono tanu-faka. Senaġi moġa bekorini murinai tu, ma boġono gena-vegogo maia. Moġesi boġono vei, be Satani na asi ġovevaġa-gwaġiġi-iaġiani gabunai asi bene riba-ġanimi. <sup>6</sup>Maiġesi aguruġani tu, ġomi navaġa-kavami ġana moġo, dia taravatu atoreani, akirani, boġono veia veġata atoni. <sup>7</sup>Korana au ġegu ura baregona ġomi tau mabarami tu au kavana boġoro vei, asi boġoro veġaraġo. Senaġi Barau na tau tata varevare eviniato, tau ta ġena varevare tu bene veġaraġo, ma ta ġena tu asi bene veġaraġo.

<sup>8</sup>Au na asi ġaraġori tarimari ema ġaraġori ġemaseto tarimari tu akirarini: Ġia tu gora, asi beġene veġaraġo, beġene tanu moġo au kavana. <sup>9</sup>Senaġi bema ġia asi ilaila beġe vevaġa-gwaġiġini nai tu, benamo beġene veġaraġo. Korana beġe veġaraġoni tu namo, a asi namo kima veiġari nuġari ai karava noġa beġene ġara.

<sup>10</sup>A Veġaraġo tarimami tu mai taravatu avinimimi. Senaġi mai tu asi au ġegu taravatu. Asiġina. Mai tu Iesu Vereġauka ġena taravatu ġomi ġemi: Veġaraġo vavinena na ġaraġona asiġina ġinavaġi bene dobi-kwanea. <sup>11</sup>Senaġi irau ġaraġona bedobikwaneani nai tu, bene tanu-gora moġo, a asiġina tu, ġaraġona ġesi ma beġene

veġaraġo-ġenoġoi. Ema veġaraġo tauna na maki ġaraġona asiġina ġinavaġi bene dobi-kwanea.

<sup>12</sup> Tarima kotari ġeri ai tu nakira, -mai tu au moġo ġegu guruġa dia Vereġauka ġena guruġa, -bema veġabidadama nuġanai tarikaka ta ġaraġona vavinena tu Iesu asi evaġa-moġoniani vavinena, senaġi ġena ura ġaraġona tauna ġesi beġene tanu-vegogo nai, mo tau na ġaraġona vavinena asi bene dobi-kwanea. <sup>13</sup> Ema bema vavine ta ġaraġona na Iesu tu asi evaġa-moġoniani, senaġi eurani ġaraġona vavinena ġesi beġene tanu-vegogo, mo vavine na ġaraġona asi bene dobi-kwanea. <sup>14</sup> Korana Iesu asi evaġa-moġoniani tauna tu ġaraġona vavinena ġenana moġo veiareva etanuni, ema Iesu asi evaġa-moġoniani vavinena tu ġaraġona tauna ġenana moġo veiareva etanuni. Bema asiġina nai tu, toma ġomi natumi Barau ġoiranai tu asi veiareva, senaġi ġia toma tu veaġa. <sup>15</sup> Senaġi bema Iesu asi evaġa-moġoniani tauna o vavinena ġaraġona ġenana bedobini nai tu, namo bene dobi, bene raka. Mo Iesu evaġa-moġoniani tauna o vavinena mai dabarai tu befakani, meto ta asi beġwaiani. Barau na ġomi ekeamito maino ai boġono tanu. <sup>16</sup> Ġoi veġabidadama vavinemu tu kamasi ġoi oribani, ġoi na ġaraġomu vei-rakava nuġana na bovaġa-maġuriani? O ġoi veġabidadama taumu tu kamasi ġoi oribani, ġoi na ġaraġomu vei-rakava nuġana na bovaġa-maġuriani?

### Barau na ekeamito ilailanai boġono tanu

<sup>17</sup> Ġomi tata Iesu Vereġauka na evinimito ilailari ai ema Barau na tata ekeamito ilailari ai moġo boġono tanu. Au na tu mai taravatau misina ekalesia mabarari avaġa-ribarini. <sup>18</sup> Bema tau ta tauġanina kefina ġelama-vaġiato murinai vau, Barau na ekeaiato nai tu, kefina asi ma bene inu-ġaua, benamo ġelamaiato fauna bene kure-toġaia. Ema bema tau tauġanina kefina roġosi beġene lama-vaġia nuġanai, Barau na ekeaiati nai tu, kefina asi beġene lama-vaġia maia. <sup>19</sup> Korana tu kefi-lamavaġi tu asi anina ta, ema kefi asi lamavaġi maki asi anina ta. Dagara baregona tu Barau ġena taravatau guruġari boġabi-gigitaririni.

<sup>20</sup> Tarimarima mabarari aiġesina ġetanuto-ġoi nuġanai, Barau na ekearito, moġesi moġo beġene tanu. <sup>21</sup> Ġoi Barau na ekeamuto neganai, ġoi tu tuġu-rakaorakao tarimamu asi voimu otanuto-ġoi, ei? Asi ġena rakava, namo moġo. Moġa tuġamaġi vekwaraġina asi bono vei, senaġi mani tuġu-rakaorakao maġurina beġe tuġu-vaġimuni nai tu, bono ġabi-raġea. <sup>22</sup> Korana tarima ta roġo tuġu-rakaorakao tarimana nuġanai, Barau na ekeaiato Vereġauka ġesi beġene sebona, ġia tu varau fakai etanuni, korana ġia tu Vereġauka ġena tarima. Aba, tauġani ai ġia tu roġo tuġu-rakaorakao tarimana senaġi. Moġa ilailanai, asi tuġu-rakaorakao tarimana o fakai etanuni tarimana Barau na ekeaiati tu Vereġauka ġena tuġu-rakaorakao tarimana. <sup>23</sup> Ġomi tu Barau na voimi varau eveito, evoi-ġenoġoimito. Be tarimarima ġeri tuġu-rakaorakao tarimami ai asi boġono iaġo.

<sup>24</sup> Tarikakagu mabarami, ġita tata aiġesi tatanuto-ġoi nuġanai, Barau na ekearato, bena moġesi moġo Barau ġesi bitana tanu.

### Sisiba guruġari gora ema vabu ġeri ai

<sup>25</sup> Ma roġosi beġene veġaraġo ġuiatori e futuari ġeri taravatu ta Vereġauka na au tu asi eviniguto. Senaġi au ġegu tuġamaġi ai aġitaiati guruġana nakiraġia, korana au tu Vereġauka ġena vevetuġaġwai moġo etoreguto, guruġa moġoniri moġo bana kiraġiri

ġana. <sup>26</sup> Mai nega rakavari maiġeri meto baregori ġeġorani dainai, au atuġamaġini, tau tu toma ġotanuni kavana moġo boġono tanu-iaġo. <sup>27</sup> Ġoi oveġaraġoto taumu tu, ġaraġomu dobi-kwanena tuġamaġina asi bono vei. A asi ġaraġomu meromu tu, ġuiato asi bono vetau, ta noġaraġoa uranai. <sup>28</sup> Senaġi bema ġoi boa veġaraġoni maki namo, ġoi na vei-rakava ta asi boveiani. Ma ġuiato beveġaraġoni maki namo, ġia na vei-rakava ta asi beveiani. Senaġi beġe veġaraġoni tarimari tu ġeri maġuri nuġanai meto vovoka beġe doġaririni. Ma au na tu mo meto ġerina navaġa-maġurimi atoni.

<sup>29</sup> Tarikakagu mabarami, au na kara akiraġiani tauna tu iniġa: Nega tu bekubi-rakava. Be, maitoma na besinaia beiaġoni tu, veġaraġo tauri tu asi ġaraġori noġa beġene tanu. <sup>30</sup> Ema ġetaġini tarimari noġa moġo asi ġetaġini tarimari kavana beġene tanu, e ġeverereni tarimari noġa moġo asi ġeverereni tarimari, e farefare ġevoini tarimari tu farefare ta asi ġeġaunaiani tarimari noġa moġo, <sup>31</sup> ema tarima na mai tanobara dagarari ġeġauvei-iaġirini nai, moġeri dagara tu asi beġene ġabiri dagara baregori ġia ġeri maġuri nuġari ai. Korana mai tanobara vetoġana korikori tu varau ekori-iaġoni.

<sup>32</sup> Au asi aurani, mai tanobara dagarari na ġemi tuġamaġi beġene vaġa-vonuri. Asi eveġaraġoto tarimana tu Vereġauka ġena dagara etuġamaġi-ġutumarini, aiġesi Vereġauka iauna bevaġa-namoani etoni. <sup>33</sup> Veġaraġo tauna tu mai tanobara dagarari etuġamaġi-ġutumarini, aiġesi ġaraġona iauna bevaġa-iakuani etoni. <sup>34</sup> Moġesina naima ġia tu egabi-daġadaġani, tavi ta tavi ta na ġeinuani. Veġaraġo vavinena ema asi kota maki ekima-karato ġuiatona tu ma ġeri irau. Asi ġaraġona vavinena tu Vereġauka ġena dagara betuġamaġi-ġutumarini. Ġia ġena ura tu tauġanina ema iaukana beġene veaġa Vereġauka ġena. Senaġi veġaraġo vavinena tu tanobara dagarari betuġamaġi-ġutumarini, aiġesi ġaraġona iauna bevaġa-iakuani etoni.

<sup>35</sup> Mai tu ġomi bana vaġa-kavami ġana maiġeri akiraġirini, dia ġomi akirakira-ġaumini. Senaġi mai tu au ġegu ura ġomi boġono tanu-ginikau moġo, e kara ta na asi bene kougou-ġaumi Vereġauka vetuġunaġina boġo iaġo-vinini nai.

<sup>36</sup> Bema tau ta etuġamaġini, kirakauna ġuiatona, asi kota maki ekima-karato ġuiatona, ġenai ġena veiġa tu asi roroġoto, ema ġena ura kirakauna ġenai ebarego-lelevaġini, ma eġitaiani asi ilaila bevevaġa-gwaġiġini nai tu, tauri ruarua beġene veġaraġo ġena ura lorinai. Mo tu vei-rakava asi beveini. <sup>37</sup> Senaġi bema tarima ta nuġana evaġa-gwaġiġiani, ma dagara ta na nuġana asi maki evaġa-ġariġariani, e tauġena tauġanina ġena ura etuġamaġi-fitoġaiani, e tauġena nuġanai ekirato kirakauna, asi kota maki ekimato ġuiatona, tu asi beġaraġoani, tarimana maki namo. Ġia na maki veiġa namona beveiani. <sup>38</sup> Moġesina naima tarima ta na kirakauna, asi kota maki ekima-karato ġuiatona, beġaraġoani tu, veiġa namona beveiani; senaġi kirakauna asi beġaraġoani tarimana na tu, veiġa namo lelevaġina beveiani.

<sup>39</sup> Veġaraġo vavinena ġaraġona roġo maġuri etanuni nai, ġia tu veġaraġo taravatuna na eġabiani, be ġaraġona ġesi moġo beġene tanu-vanaġi vanaġi. Ġia tu ġaraġona bemaseni, monai vauro ġia befakani. Be ġia beurani, tau ta ġesi ma ġeveġaraġo betoni nai, beġene veġaraġo asi taravatuna. Senaġi Vereġauka evaġa-moġoniani tauna moġo bene ġaraġoa. <sup>40</sup> Senaġi au ġegu tuġamaġi ai aġitaiani, ġia moġesi gora moġo betanuni asi ġaraġona nai tu beiaiku-lelevaġini. Ema au aribani, au na maki Barau iaukana aġabiato.

### Kwaivakuku ġevarevare-vinirini bureġari bitana ġaniri ba asiġina?

**8** Mai tu kwaivakuku ġevarevare-vinirini bureġari guruġari ma aveini. Ġomi kotari ġokirani, “Ġita mabarara tu ma ġera riba.” Oba, mai tu moġoni. Senaġi ġita ġera riba na tu vekokoroku evaġa-ġoraiani, a veuravini na tu tarimarima evaġa-kokoreani. <sup>2</sup> Bema tarima ta etuġamaġini, ġia na dagara ta eribaiato, mai tarima na kara bere ribaia dagarana korikorina tu roġosi roġo bere ribaia. <sup>3</sup> Senaġi Barau eura-viniani tarimana tu, Barau ma ribana ġia.

<sup>4</sup> Moġa lorinai kwaivakuku ġevarevare-vinirini bureġari ġeri ai, au ġegu guruġa tu maiġa: Ġita ribara, mai tanobara nuġanai kwaivakuku tu asi dagara ta e asi aniri. Ema Barau tu sebona kwariġutu moġo, ma ta tu asiġina maia. <sup>5</sup> Aba, mai ġekira-baraurini dagarari ġetanuni gubai o mai tanobarai, korana initoma maiġeri barau e vere tu asisebo, <sup>6</sup> senaġi ġita ġerai tu, Tamara Barau tu sebona kwariġutu moġo, dagara mabarari tu ġia na evaġa-ġorarito, ema ġita maki ġia ġena tatanuni. Ema Vereġauka Iesu Keriso maki sebona kwariġutu moġo, ġia ġenana dagara mabarari ġeġorato, ema ġita maki ġia na maġuri evinirani nai, tamaġuri-tanuni.

<sup>7</sup> Senaġi tarimarima mabarari maiġa tu asi ġeribaiani. Korana tarima kotari tu kwaivakuku ġemarana-iaġirito, be maitoma maki bureġa ġeġanirini nai, ġia tu roġo ġetuġa-maġini, mo bureġa tu kwaivakuku ġevarevare-vinirito bureġari. Moġa lorinai moġesi bureġari ġeġanirini nai, ġenuġa-vekwaraġini, ġetuġamaġini, veiġa raka-vana ġeveiani.

<sup>8</sup> Ġita dia ġaniġani na Barau sevina ġana beġabi-kavirani. Bema asi bita ġaniani nai tu, Barau ġoiranai rakava kwaikwai tarimara? Asiġina! O bema bita ġaniani nai tu, Barau ġoiranai tarimarima namora? Asiġina! <sup>9</sup> Senaġi boġono ġita-ginikaua, mo veiġa ġomi na maki boġo veiani riba, maninana ġeri veġabidadama moiramaira tarimari boġo vaġa-vedaġa-raġerini. <sup>10</sup> Korana bema nuġa moira tarimana na ġoi ma ġemu riba mai gabu ai beġitamuni, kwaivakuku rubunai oġaniġanini nai, ġia tu bolaunaġiani noġa, be beiaġoni, kwaivakuku ġevarevare-vinirito bureġari bea ġanirini. <sup>11</sup> Benamo mo veġabidadama moiramaira tarimana, mo tu ġoi tarikakamu veġabidadama nuġanai, ema Keriso tu ġia maki uranai emaseto, senaġi ġoi ġemu riba dainai mo tarima tu berekwa-rekwani. <sup>12</sup> Moġesina naima, mai maġuri ai tarikakamu bovei-rakava viniani, benamo ġia nuġa moira moġa bovaġa-rakavaiani nai, ġoi tu Keriso bovei-rakava viniani. <sup>13</sup> Moġa lorinai, bema au na kwaivakuku ġevarevare-vinirini bureġana ta baġaniani nuġanai, au tarikakagu ta rakava beveini tu, au bureġa asi ma baġani-ġenoġoini. Moġesi aveini anina tu, tarikakagu ta bavaġa-vedaġa-raġeani, benamo rakava beveini ġesi.

### Apostolo tarimari ġeri ġauvei voina ema ġeri maoro

**9** Au tu fakai atanuni tarimagu, dagara ta na asi ebarubaruguni. Au tu apostolo, ema ġita ġera Vereġauka Iesu maki aġitaiato. Ġomi tu au ġegu ġauvei Vereġauka nuġanai ġwaġwari. <sup>2</sup> Bema tarima boruri ġoirari ai au tu dia apostolo tarimagu, moġa tu asi kara ta, korana ġomi ma ribami, au tu apostolo. Ema ġomi mani ġemi tu vetoġa ta, au ġegu apostolo ġauveina vaġa-moġonina ġana, korana Vereġauka ġoġabi-raġeato nai.

<sup>3</sup> Au ġeriba-korikorigu ġetoni, ġedanaġiguni nai, au na tu maiġesi avaġa-veserini: <sup>4</sup> Ba ġai apostolo tu asi ġema maoro, ġama ġaniġani e niuniu dagarari baġa doġarini,



ei? <sup>5</sup>Ba ġai apostolo tu asi ġema maoro, ekalesia vavineri baġa ġaraġorini, benamo baġa ġori-rakao rakaorini ġema iaġoiaġo ai, apostolo kotari, e Vereġauka tarina merori, e Kefas, (mai tu Petero), ġeveini kavana, ei? <sup>6</sup>Ba mai tu au ema Banabas moġo tauma ruarua tauġema ġema ġauvei ġenana ġema-ġama baġana ġoitaġo? <sup>7</sup>Kamara vetari tarimana tu tauġena ġena kokore ai eveġubuto-ġoi vetari ġauveina eveiato-ġoi nuġanai tu, ei? Ma deikara na vine tavoġana tu eveiato moġo, ma vine ġeġwato nai tu, ġwaġwari asi eġanirito, ei? Ma dei tu mamoe serina enarito moġo, a ġia ġerina lata tu asi eġabito, eniuto, ei?

<sup>8</sup>Ġomi ġotuġamaġini, mai tu tarimarima moġo ġeri tuġamaġi guruġari akiraġirini, a Barau ġena taravatu maiġesi tu asi ekirani ġotoni, ei? <sup>9</sup>Mose ġena taravatu nuġanai tu iniġesi ekirani, “Boromakau muruna dagara ta na asi bono kou-ġaua, widi momori nekokiri uranai efanafana-taririni neganai.” Ġomi ġotuġamaġini, Barau na boromakau tu etuġamaġi-baregorini naima moġesi eguruġato? Asiġina! <sup>10</sup>Barau na mai tu ġita etuġamaġirato nai maiġesi eguruġato. Moġoni, Barau na mai guruġa tu ġita urarai ekiraġiato. Korana Barau eurato tu, tano efokaiani tarimana e widi tauri ekwari-vaġirini tarimana, tauri ruarua ġeġauvei-iaġiani dagarana ġenana eiaġomani ġaniġanina ġia maki beġene ġani. <sup>11</sup>Ġomi fakami ai iauka dagarari namori ġavaroto. Ma ġomi ġemina, ġai tauġanima vaġa-kavari ġana, farefare tu asi veġata baġana ġabi, ei? <sup>12</sup>Bema ġomi na apostolo kotari ġovaġa-kavarini tauġanina vaġa-kavari farefareri e moniri ai, au atuġamaġini, ġai ma ġema maoro ġomi ġemi na farefare e moni barego lelevaġi baġara doġari.

Senaġi ġai mo maoro moġa tu asi ġaġauvei-iaġiato. A ġai tu ġavito-maseto e ġananu-maseto moġo, korana asi ġaurato, Keriso varina namona bene raga-rovorovo dabarana baġana kougou-ġaua. <sup>13</sup>Ġomi asi ribami, Rubu Veaġai veaġa dagarari ġeġauvei-iaġirini tarimari tu Rubu Veaġa na ġari ġaniġani ġeġabirini? Ema fata veaġanai ġeġauveini tarimari tu, fata veaġanai varevare dagarari ġeġauvei-iaġirini kwari ġari ġeġabirini. <sup>14</sup>Moġa ilailanai, Vereġauka na taravatu etoreato, ekirato, deikara Vari Namona beġe ġobata-iaġiani tarimari tu, Vari Namona ġevari-fiuani voina beġene ġabia veġata.

<sup>15</sup>Senaġi au Vereġauka na mai maoro eviniguto, maiġa tu asi aġauvei-iaġiani. Ema au na maiġeri guruġa atore-vinimini tu akirani, maiġeri veġa au ġegu ai boġono veiri atoni? Asiġina! Initoma maki au tu maiġesi moġo bana tanu mo bana mase tu namo vedaurea, ġegu ġauvei voina ġomi ġemi ai asiġina ġinavaġi bana vetau. Maiġesi atanuni tu aiakuni e avekokorokuni, ma asi auranu au ġegu vekokoroku tu guruġa koriri moġo benesi. <sup>16</sup>A Vari Namona baġobata-iaġiani nai, au tu asi bavekokorokuni, korana Vereġauka ekirato, bana vari-fiua veġata etato. Bema Vari Namona asi bavari-fiuani nai, au tu vetuġagu kekei, asi ġegu namo ta moġo. <sup>17</sup>Bema au nuġagu siġa moġo baurani, mai ġauvei naveia veġata batoni nai tu, ma voigu. Senaġi bema dia au ġegu urai aveiani, moġa anina tu, Barau na eviniguto ġauveina, naima aġauvei-iaġiani. <sup>18</sup>Be, moġesina nai, au voigu tu kara baġabiani? Maiġa moġo: Mo tu Vari Namona avari-fiuani nai tu, bavarifiu-kavaiani asi voina. Au tu ma ġegu maoro ġegu-ġagu bana ġabia, senaġi ġegu maoro tu asi aġauvei-iaġiani.

### Paulo tu tarimarima mabarari ġeri vetuġunaġi tarimanai eiaġoto

<sup>19</sup> Aba, au fakai atanuni tarimagu, dia tarima ta ġena tuġu-rakaorakao tarimagu, senaġi au tauġegu moġo tarima mabarari ġeri vetuġunaġi tarimagu ai avevaġa-iaġoto. Korana mai maġuri ai tu tarima ġutuma baġabi-iaġomarini Keriso ġenai. <sup>20</sup> Iuda tarimari ġesi ġatanuni tu, Iuda tarimagu ai aiaġoni, korana Iuda tarimari bana ġabi-iaġori Keriso ġenai uranai. Au tauġegu tu dia Mose ġena taravatu gaburenai atanuni, senaġi taravatu gaburenai ġetanuni tarimari ġesi ġatanuni tu, au maki taravatu gaburenai atanuni, korana taravatu gaburenai ġetanuni tarimari bana ġabi-iaġori Keriso ġenai uranai. <sup>21</sup> A asi ġeri taravatu tarimari ġesi ġatanuni tu, ġia kavana dia taravatu gaburenai atanuni. Moġa anina tu, au Barau ġena taravatu ġenana aveġitato? Asiġina! Au monai tu Keriso ġena taravatau gaburenai atanuni. Moġesi aveini korana tu, asi ġeri taravatu tarimari Keriso ġenai bana ġabi-iaġori uranai. <sup>22</sup> Vegābidadamai moiramoira tarimari ġesi ġatanuni tu, ġia kavana atanuni. Vegābidadamai moiramoira atanuni korana tu, vegābidadamai moiramoira tarimari Keriso ġenai bana ġori-iaġori uranai. Au tu tarimarima mabarari ġeri maġuri irauirauri atovotovorini, bena ġia ġesi ġatanu-sebona sebonani. Korana aurani, dabara irauirauri mabarari bana ġauvei-iaġiri, be moġeri na tarima kotari bana vaġa-maġuriri. <sup>23</sup> Au maiġesi aveini tu, Vari Namona bene raga-rovorovo ġana. Korana aurani, Vari Namona ġena namo ġomi ġesi bana ġabi-vegogoa ġana.

### Raga-iruiru ai bono kokore

<sup>24</sup> Ġomi asi ribami, raga-iruiru ai tu raga-iruiru ai beġe ruġani tarimari mabarari beġe raga-vaġa-seboni, senaġi tarima sebona na moġo kokore voina beġabiani? Ġomi maki moġesi boġono raga-gwada, be kokore voina boġono ġabia. <sup>25</sup> Ġere nuġanai ġeraka-toġani tarimari mabarari tu tauġeri ġerovina-ginikauni tereinini ai. Ġia moġesina ġeveini tu, dia betanu-vanaġi vanaġini koronana beġene ġabia uranai. Senaġi ġita betanu-vanaġi vanaġini koronana bitana ġabia uranai taraga-iruiruni. <sup>26</sup> Moġesi naima, au tu eraga-taġuitaġuini tarimana kavana asi aragani. Senaġi au tu voigu bana ġabia uranai araga-gwadani. Ema au vefaisi ai evefaisi-ginikauni tarimana kavana aveini, ġegu fais iavara korinai moġo asi etubuni. <sup>27</sup> Asiġina, au tauġanigu tu afaisiani, au ġegu tuġu-rakaorakao dagaranai avaġa-iaġoani, ġena ura rakavari asi aveini. Korana asi namo, tarima kotari aġobata-vinirini, senaġi au tauġegu na voigu ġoirai asi baġabiani.

### Isaraela ġerina bisini matakani

**10** Tarikakagu mabarami, au aurani, ġita tubura ġeri ai kara eġorato moġa asi boġono tuġarekwaia. Ġita tubura tu, Barau na magube etuġuato dabara bene kira-varari ġana, moġa gaburenai ġerakato, ema ġia tu Davara Kakakakana nuġana na ġeraka-vanaġito. <sup>2</sup> Ġia mabarari tu magube ai ema daġaru-bara nuġanai Barau na ebatisorito, ma Mose ġena tarimarimai ġeiaġoto. <sup>3</sup> Ġia mabarari iauka ġaniġanina sebona ġeġaniato. <sup>4</sup> Ema mabarari iauka nanuna sebona ġeniuato. Korana ġia tu iauka forena, ġia muriri na erakato forena, ġenana nanu ġeniuto. Mo fore moġa tu Keriso. <sup>5</sup> Senaġi Barau nuġana tu asi eiakuto ġutuma ġeri ai, moġesi nai tano fakanai tauġaniri ġemase-fitari fitarito.

<sup>6</sup>Maīgeri dagara ġeġorato tu, ġita matara vaġa-kaniri ġana. Be ġita na moġeri bisini ġitari, benamo ġita dagara rakavari asi bitana mata-ġaniġani iaġiri, ġia ġemata-ġaniġanito kavana. <sup>7</sup>Ema kwaivakuku asi bisini toma-rakariġo viniri, ġia kotari ġeveito kavana. Buka Veaġai ekirani kavana, “Tarimarima ġetanu-tarito, ma ġeġani-verekoto, moġa murinai tu ġevariġisito, ġeġereto e ġebarato, (mata-boraġai ġedau-toġato).” <sup>8</sup>Ema ġita maki asi bisini kima e mataboraġa-taġuitaġui, korana ġia kotari tano fakanai ġekimato e ġemata-boraġato nai tu, tarimarima mabarari 23,000 veġata ġemaseto. <sup>9</sup>Vereġauka ġita na asi bisini tovo-naġia, korana ġia kotari na ġetovo-naġiato tarimari tu, mota na ġekafurito, benamo ġemaseto. <sup>10</sup>Asi bisini guruġa-vemuriġoi, korana ġia kotari ġeguruġa-vemuriġoito nai tu, mase aneruna na evaġi-mase maserito.

<sup>11</sup>Maīgeri veīġa ġeġorato anina tu, ġita na bisini ġitari, benamo matara beġene kani uranai, ġita maitoma tatanuni tarimara ġerai. Korana ini horai mai tano-bara tu magonar varau beraġasi. <sup>12</sup>Moġesi naima, bema ġomi ġotuġamaġini, ġemi veġabidadamai ġoruġa-giġitarini ġotoni nai tu, lorimi boġono vetore, boġo ketoni ġesi. <sup>13</sup>Mani veribaġani ġoġoitaġorini tu, dia veribaġani boruri. Asiġi. Mani tu tarima tata ġeri ai vanaġivanaġi eġorani dagarari. Barau tu vetuġamaġikau Barauna, be beġitamuni, asi bovaġa-darereani veribaġanina tu ġemu ai asi bevaġa-foforiani. A ġoi veribaġani boraka-ġoitaġoni nai, Barau na tu ġemu raga-maġuri dabarana ta maki betore-rosiani, korana mo veribaġani nuġanai bono ruġa-gwaġiġi ġana.

### **Barau e iauka rakavari asi boġono korana-iaġi sebonari**

<sup>14</sup>Moġa lorinai, tarikakagu, kwaivakuku toma-rakariġo viniri ġerina boġono veġita-moġovaġi. <sup>15</sup>Au na tu iaunega tarimami avaġa-guruġamini, be tauġemi na au kara akiraġirini maīgeri boġono tuġamaġi-ginikauri. <sup>16</sup>Anibou taġaniani neganai, vevaġa-namo kapusina taġabiani, ma Barau tavaġa-namoani, benamo taniuani. Mo tu Keriso rarana mabarara na taniu-sebonaiani, Keriso rarana ġesi ġia ema ġita tasebonani, ene? Ema beredi tatavi-kiraiani nai maki, mabarara Keriso tauġanina taġani-vegogoani, Keriso tauġanina ġesi ġia ema ġita tasebonani, ene? <sup>17</sup>Ġita tu vovoka, senaġi mabarara beredi sebonai ema tauġani sebonai taiaġoni. Tauna korikori, ġita tu mo beredi sebona moġo taġani-vegogoani.

<sup>18</sup>Isaraela tarimari situġamaġi-iaġori. Ginitaġo dagarari fata veaġanai ġeġaburito-ġoi, kwari ġeġanirito-ġoi tu, mo fata veaġana ġesi sebonai ġeiaġoto-ġoi. <sup>19</sup>Au na mai guruġa akiraġirini tauri tu kara? Au akirani, kwaivakuku ġevarevare-vinirini dagarari tu ma aniri atoni ba? O kwaivakuku tu dagara korikorina atoni ba? <sup>20</sup>Asiġi. Au tu iniġesi akirani: Barau asi ribari beseri ginitaġo dagarari ġevinini tu, iauka rakavari ġevarevare-vinirini, a dia Barau ġevarevare-viniani. Moġesi nai au tu asi aurani, ġomi iauka rakavari ġesi sebonai boġono iaġo. <sup>21</sup>Ġomi asiġina ġinavaġi Barau ġena kapusi e iauka rakavari ġeri kapusi boġo ġabi-vegogorini, benamo Barau ġena kapusi ai boġo niuni ema iauka rakavari ġeri kapusi ai maki boġo niuni. Asiġina. Ġomi asiġina ġinavaġi Barau ġena teibolo boġo ġaniġanini e vaġa-sebo iauka rakavari ġeri teibolo maki boġo ġaniġanini. <sup>22</sup>Ġita tu maīġesi sivei, be Barau sivaġa-uraia tatoni, ei? Be ġita ġera kokore tu Barau ġena kokore evanaġiato ba?

### Vanaġivanaġi Barau bisini vaġa-raġea

<sup>23</sup> Dagara mabarari tu asi taravaturi, senaġi dia dagara mabarari ġerina namo bita doġarini. Dagara mabarari tu asi taravaturi, senaġi dia dagara mabarari ġerina vevaġa-kava bita doġarini. <sup>24</sup> Tarima ta tauġena ġereġana ġena namo moġo asi bene vetaua, senaġi tarima tari ġeri namo beġene ġabia uranai bene ġauvei e bene tanu.

<sup>25</sup> Bureġa ġevoivoi-iaġirini gabunai bureġa ġetorerini, moġeri tu boġono ġaniri, mo tu asi taravaturi. Asi boġono vedanaġi-rakaorakao, nuġami boġo tore-metorini garina. <sup>26</sup> Korana, Buka Veaġai ekirani kavana, “Tanobara tu Barau ġena, ema tanobara nuġanai ġetanuni dagarari mabarari maki Barau ġena.”

<sup>27</sup> Bema Iesu asi evaġa-moġoniani tarimana na ta beġori-iaġomuni ġena numai ġaniġani, benamo ġoi bourani noiaġo botoni nai, kara ġoiramu ai etore-taririni tu bono ġaniri moġo. Asi bono vedanaġi, nuġamu botore-metoani garina. <sup>28</sup> Senaġi bema tarima ta na bekiramuni, bekirani, “Mai tu kwaivakuku ġevarevare-viniato bureġana,” betoni, moġa vauro asi bono ġania. Korana mo bekira-varamu tarimana uranai e nuġana bevekwarāġini garina. <sup>29</sup> Au na nuġa mainai akiraġirini tu, dia ġoi nuġamu akiraġiani, senaġi mo bekira-varamuni tarimana nuġana akiraġiani.

Betaġu ta ekirani: Kara dainai au, maġuri fakanai e namonai atanuni tarimagu, tarima ta na nuġanai au bekota-viniguni. <sup>30</sup> Bema au na Barau atanikiu-viniani vau aġaniġanini, kara dainai Barau batanikiuani ġaniġanina aġaniani nai tu, guruġa rakavari ġegu ai ekiraġini?

<sup>31</sup> Moġesi naima, ġoġaniġanini o ġoniuniuni o kara ġoveiani nai, dagara mabarari ai Barau boġono vaġa-raġea. <sup>32</sup> Tarima ta asi boġono vaġa-vedaġa-raġea. Iuda tarimana o irau bese tarimana o Barau ġena ekalesia asi boġono vaġa-daġa-raġeri, beġe ketoni garina. <sup>33</sup> Au maki avededegwani, tarimarima mabarari nuġari navaġa-namori ġana. A dia au tauġegu ġegu namo avetauani, senaġi tarima vovoka ġeri namo avetaurini, Barau na bene vaġa-maġuriri ġana.

**11** Au ġegu maġuri boġono tovtovoa, korana au Keriso ġena maġuri atovotovoani bene.

### Deba kumuġauna veiġana

<sup>2</sup> Au na ġomi tu avaġa-raġemini, korana dagara mabarari ai au ġotuġamaġiguni, ema vevaġa-riba guruġari aġabirito, ġemi avaġa-riba-iaġirito, moġeri ġokorana-iaġirini. <sup>3</sup> Senaġi au aurani toma ġomi boġono riba, tau mabarari ġeri deba tu Keriso, ema vavine ġeri deba tu tau; ema Keriso ġena deba tu Barau. <sup>4</sup> A tau mabarari debari beġe kumu-ġaurini vauro, beġe ġauġauni o beġe perovetani nai tu, ġeri deba tauna Keriso asi beġe gubakauani. <sup>5</sup> Ema vavine mabarari debari asi kumuġau beġe ġauġauni o beġe perovetani nai tu, ġeri deba, (mo tu ġia ġaraġori), asi beġe mataurairini. Korana moġa tu noġa debari ġerarorini kavana. <sup>6</sup> Bema vavine ta debana asi ekumu-ġauani nai tu, debana ġwina beġene fakosi-vaġiri, (mata-boraġa vavineri kavana). Ma bema vavine ta ġwina fakosi-vaġina o raro-vaġina bemaikaaiani nai tu, debana bene kumu-ġaua.

<sup>7</sup> A tau tu debana asi bene kumu-ġaua, korana ġia tu Barau ġitaġitana kavana, ema ġia na tu Barau marevana baregona evaġa-foforiani. A vavine tu tau marevana. <sup>8</sup> Korana dia tau o Adamu tu vavine ġenana eiaġomato, senaġi vavine o Eva tu tau ġenana eiaġomato. <sup>9</sup> Ema Barau na tau eveiato tu dia vavine ġena, senaġi vavine ġia

tu tau ġena eveiato. <sup>10</sup> Moġesi naima vavine na debari beġene kumu-ġauri, korana mo vetoġa na ġia bevaġa-foforiani, ġia tu ma ġeri maoro Barau ġena ġauvei beġe veiani, ema aneru na beġene ġita-vetoġari ġana. <sup>11</sup> Senaġi Vereġauka ġena maġuri dabaranai tau tu dia ġereġari moġo ġetanuni, ma vavine maki dia ġereġari moġo ġetanuni. Asiġina. Vavine tu tau ġesi beġe sebonani, ma tau tu vavine ġesi beġe sebonani. <sup>12</sup> Korana tu vavine tau ġenana eiaġomato kavana, tau maki vavine ġerina ġeġorani. Senaġi dagara mabarari tu Barau ġenana ġeiaġomani.

<sup>13</sup> Gomi tauġemi na ġotuġamaġi-ġinikaua. Vavine ta debana asi kumuġauna neganai, Barau ġenai beġuriġurini tu namo ba? <sup>14</sup> Mai tanobara mabarana nuġanai tau e vavine vetoġara marevari na evaġa-foforiani, tau ta ġwina bevaġa-gara maukaiani tu maiaka veiġana beveiani tauġena ġenai. <sup>15</sup> Senaġi bema vavine ġwina bevaġa-gara maukaiani nai, mo tu ġia marevana bevaġa-baregoani. Korana Barau na vavine ġwina eviniato tu debana bene kumu-ġaua ġana. <sup>16</sup> Bema tarima ta beurani, mai guruġa neġarea betoni nai, au tu asi ġegu guruġa ta maia. Senaġi ġegu guruġa sebona tu maiġa: Ġai ġemai ema Barau ġena ekalesia mabarabarari nuġari ai veiġa boruna ta tu asiġina maia.

### Vereġauka ġena anibou

<sup>17</sup> Mai tu veiġa tari ġomi na boġono korana-iaġiri veiġari ma nakira-varami. Senaġi au na ġomi tu asi avaġa-raġemini, ġomi ġemi raka-vegogo nuġari ai tu vevaġa-rakava tu barego ġoveiani, a namo ta tu asi ġovaġa-ġoraiiani. <sup>18</sup> Tovotovonai tu iniġesi nakirami. Au aseġaġini, ġomi ġemi ekalesia raka-vegogori nuġari ai tu dia nuġa sebonai ġoġabini, a ġomi tu ġovevare-kirakirani, benamo tauġemi ġoveġare-veġareni. Au na mai guruġa maiġa tu kota avaġa-moġoniani. <sup>19</sup> Aba, ġomi vefakami ai vevare-kirakira tu bene vetore veġata, be Barau na deidei evaġa-moġonimito tarimami tu boġono fofori.

<sup>20</sup> Ġomi ġoraka-vegogoni nai tu, dia Vereġauka ġena lavi ġaniġanina dokona o anibou ġoġani-vegogoani. Asiġina. <sup>21</sup> Ġomi ġoġaniġanini nai, dei eguineni, dei egabini ġotoni, ġoveraġa-veraġaiani, a karomi asi ġovaġa-nogarini. Ta tu vito etanuni, ma ta tu eniu-babobaboni. <sup>22</sup> Ġomi tu asi ġemi numa, be ġemi numai asi boġo ġanini e boġo niuni ġotoni, ei? Ma Barau ġena rubu tu dagara misina ġotoni, ġoġita-ġuiraiġiani, ema asi ġeri-ġari tarimari ġovaġa-maiakarini, ei? Au ġomi ġemi ai tu kara nakiraġia, navaġa-raġemi ba? Asiġina ġinavaġi, au na ġomi tu asi bavaġa-raġemini.

<sup>23</sup> Ġomi mai avinimini guruġana maiġa tu Vereġauka ġenana aġabiato guruġana: Iesu Vereġauka ġerevaiato boġinai beredi eġabi-vaishiato, <sup>24</sup> benamo Barau evaġa-namoato murinai, etavi-kiraiato, benamo ekirato, “Ġoġabia, ġoġania, mai tu au tauġanigu, ġomi urami ai ġinitaġo dagananai eiaġoto. Mai veiġa boġono veia-ġoi, au tuġamaġi-iaġigu ġana.” <sup>25</sup> Mo lavi ġaniġanina o anibou murinai, Iesu na beredi eveiato ilailanai kapusi ma eġabi-vaishiato, benamo ekirato, “Mai kapusi tu Barau ġena Ġinitaġo Variġuna, au raragu na bevaġa-moġoniani. Mai kapusi ai boġo niuani nai, au tuġamaġi-iaġigu ġana boġono niu.”

<sup>26</sup> Korana mai beredi boġo ġaniani e mai kapusi ai vine nanuna boġo niuani nai tu, vanaġivanaġi Vereġauka ġena mase boġo vari-fiuani mo, ġia ma beġenoġoini. <sup>27</sup> Moġesina naima deikara na Vereġauka asi begubakauani vau, mai beredi beġaniani e Vereġauka ġena kapusi ai beniuni nai, mo tarima na Vereġauka tauġanina ema Vereġauka rarana ġenai vei-rakava beveini. <sup>28</sup> Tarima ta ġia nuġana bene

ragaġi-guinea vauro, mo beredi bene ġania, ema mo kapusi vine nanuna bene niua. <sup>29</sup> Korana deikara na Vereġauka asi begubakauani vau beġanini ema beniuni nai, mo beredi beġaniani e mo kapusi ai vine nanuna beniuni nuġanai tu, ġia tauġena moġo bevekota-vinini e rakava metona ġenai betore-kauani. Korana ġia na Iesu tauġanina tu asi etuġamaġi-doġariani. <sup>30</sup> Moġesi naima ġomi fakami ai ġutuma tu tauġanimi ġemoirani e ġokeveni, kotari maki varau ġemaseto. <sup>31</sup> A bema ġita tauġera nuġara bita vetau-guinerini nai tu, Barau na ġita asi bekota-vinirani. <sup>32</sup> Senaġi Vereġauka na ġita ġera kerere bekiraġirini nai tu, ġia na bevaġa-matakanirani. Vereġauka ġita moġesina beveirani tarimara tu, tanobara maġurinai ġetanuni tarimari ġesi asi bene vaġa-rakava sebonara ġana.

<sup>33</sup> Moġesi naima, tarikakagu, anibou uranai boġo raka-vegogoni nai, asi boġono veiġari-veiġari, karomi tari maki boġono vaġa-nogari. <sup>34</sup> Bema ta bevitoani nai tu, ġena numai bene ġaniġani. Asi namo ġemi raka-vegogo na tu ġomi kota-vinimi dabarana maki bevaġa-ġoraiani. Guruġa kotari tu roġo bana iaġosì vauro, ma bana kira-varami.

### Iauka Veaġa ġena varevare

**12** Tarikakagu mabarami, toma tu aurani, Iauka Veaġa na ġomi tata evini-mini varevareri nakira-varami. Korana au aurani maiġeri varevare ġomi na boġono ribari. <sup>2</sup> Ġomi ma ribami, Barau roġosi roġo boġoro ribaia neganai, dagara kotari na asi ġeguruġani babarauri ġeri ai ġeġori-iaġomito-ġoi e ġeġori-taġuitaġuimito-ġoi. <sup>3</sup> Moġesi naima avaġa-ribamini, Barau Iaukana na eġori-kauani tarimana tu asi bekirani, “Iesu iatanai rakava barana bene tanu.” Ema tarima ta maki maiġesi asi bekira-kavani, “Iesu tu Vereġauka,” senaġi Iauka Veaġa na beboroġiani tarimana tu moġa.

<sup>4</sup> Iauka ġena varevare tu irauirauri, senaġi Iauka sebona moġo ġenana ġeiaġo-mani. <sup>5</sup> Vetuġunaġi-iaġovini dabarari tu irauirau, senaġi Vereġauka tu sebona moġo ġenana ġeiaġo-mani. <sup>6</sup> Gauvei veiveiri seġukari maki irauirau, senaġi Barau tu sebona na moġo ġena tarimarima mabarari nuġari ai evaġa-ġorarini. <sup>7</sup> Iauka Veaġa tu tarima tata ġeri ai efoforini, korana ekalesia mabarana vevaġa-kava beġene doġari uranai. <sup>8</sup> Tarima ta tu Iauka Veaġa na guruġa iaunegari eviniani, ma tarima ta tu mo Iauka Veaġa sebona na Barau ġena guruġa tauna korikori evaġa-ribaiani. <sup>9</sup> Ma mo Iauka Veaġa sebona na tarima ta tu veġabidadama eviniani, ma mo Iauka sebona na tarima ta tu keve tarimari vaġa-namori varevarena o seġukana eviniani. <sup>10</sup> Ma tarima ta tu nuġa-farevaġi veiġari boruri bene veiri varevarena o seġukana eviniani, ma tarima ta tu bene peroveta ġana seġuka eviniani, ma tarima ta tu Barau Iaukana o Iauka rakavari boruri bene ribari varevarena o ribana eviniani, ma tarima ta tu garo irauirauri ai bene guruġa varevarena o ribana eviniani, ema tarima ta tu garo irauirauri ai beġe guruġani nai, guruġa aniri bene vaġa-vanaġiri varevarena o ribana eviniani. <sup>11</sup> Maiġeri mabarari tu Iauka Veaġa sebona kwarigutu moġo ġena ġauvei. Ema mai Iauka Veaġa na ġena ura ilailanai varevare tarima tata evinirini.

### Tauġani tu sebona, ma legana ġutuma gorogoro

<sup>12</sup> Tarima tauġanina tu sebona moġo, senaġi legana tu ġutuma gorogoro; ma mo tauġani legana tu asisebo, senaġi ġia mabarari na tu tauġani sebona kwarigutu ai moġo ġeiaġoto. Keriso maki moġesina. <sup>13</sup> Ġita kotari tu Iuda tarimara e tari tu irau

bese tarimara, kotari tu tuḡu-rakaorakao tarimara e tari tu fakai tatanuni tarimara, senaḡi ḡita mabarara tu Iauka Veaḡa sebona na ebatisorato, benamo tauḡani sebonai tiaiḡoto. Ema Barau na ḡita mabarara ḡerai Iauka Veaḡa sebona evinirato, ḡia na bene vaḡa-vonura ḡana.

<sup>14</sup> Tauḡani maki dia legana sebona na moḡo eveiato, senaḡi lega ḡutuma gorogoro na. <sup>15</sup> Bema kwaku bere kira, “Au tu dia ḡima, be au tu dia tauḡani legana ta.” Asiḡina, ḡia tu roḡo tauḡani legana ta veḡata. <sup>16</sup> Ma seḡa ma bere kira, “Au tu dia mata, be au tu dia tauḡani legana ta.” Asiḡina, ḡia tu tauḡani legana ta veḡata. <sup>17</sup> Bema tauḡani mabarana tu bere mata moḡo nai tu, kamasi vau bere seḡaḡi. Ma bema tauḡani mabarana bere seḡa moḡo nai, dagara bonari tu kamasi vau bere noḡori. <sup>18</sup> Senaḡi Barau na lega tata tauḡani ai etorerito. Barau na ḡena ura gaburi tatai etorerito. <sup>19</sup> Bema tavi sebona moḡo tauḡani ai bere iaḡo nai tu, tauḡani mabarana tu kamasi? <sup>20</sup> Senaḡi tauḡani moḡesina tu asiḡina. Tauḡani legana tu ḡutuma, senaḡi tauḡani tu sebona moḡo.

<sup>21</sup> Moḡesi naima mata na ḡima maiḡesi asi bekiraiani, “Au na ḡoi asi auraviniḡuni,” o deba na kwaku asi bekiraiani, “Au na ḡoi asi auraviniḡuni.” <sup>22</sup> Ma tavi ta reke ai bita ḡitaiani tu, mo tauḡani legari tari taḡitarini asi kokoreri tatoni, senaḡi bema moḡeri lega asiḡina nai tu, tauḡani asi bere ḡauvei-ginikau. <sup>23</sup> Ema tauḡani legari tari tatuḡamaḡi-keirini, takirani, moḡeri lega gubakauri tu kei tatoni, senaḡi moḡeri ḡeri ai ḡita ḡera vegubakau tu barego tatoreani. Ma tauḡani legari kotari ḡitaḡitari tu asi marevari, senaḡi moḡeri ḡita na tu nuḡara mabarari ḡesi tanari-ginikaurini. <sup>24</sup> Ma tauḡani legari kotari ma marevari dagarari tu asi tatuḡamaḡi-baregorini. Senaḡi Barau na tu tauḡani legari irauirauri mabarari etore-sebonarito, benamo ḡia na asi ḡegubakaurini legari tu vegubakau barego iatari ai etore-kauato. <sup>25</sup> Barau na moḡesi eveiato korana tauḡani legari kotari moḡo asi bisini vaḡa-namori ḡana. Senaḡi tauḡani legari mabarari bisini ḡitaḡau-ilailari ḡana. <sup>26</sup> Bema lega sebona ta bemidigu-midiguni nai, lega mabarari ḡia ḡesi beḡe midigumidigu sebonani. Ema lega ta beḡe matauraiani nai tu, lega mabarari mo lega ḡesi beḡe iaku-vegogoni.

<sup>27</sup> Gomi tata maniḡemi tu Keriso tauḡanina legari tata ḡia tauḡanina nuḡanai. Ma ḡomi mabarari tu Keriso tauḡanina sebonai ḡoiaḡoto. <sup>28</sup> Benamo ekalesia nuḡanai Barau na mabarari ḡeri ḡauvei tata evinirito. Eto-re-guinerito tarimari tu apostolo tarimari, ḡia muriri ai vaḡa-ruaruana tu peroveta tarimari etorerito, ma ḡia muriri ai vaḡa-toitoina tu vevaḡa-riba tarimari etorerito. Ma muriri ai tu nuḡa-farevaḡi veiḡari beḡene vei tarimari, ma muriri ai tu keve tarimari beḡene vaḡa-namori varevarena o seḡukana ḡeḡabiato tarimari, e beḡene vevaḡa-kava tarimari, e ḡauvei tari beḡene ḡori-kauri tarimari, ema garo irauirau ai beḡene guruḡa tarimari. <sup>29</sup> Tarimarima mabarari tu apostolo tarimari moḡo ba? Tarimarima mabarari tu peroveta tarimari moḡo ba? Tarimarima mabarari tu vevaḡa-riba tarimari moḡo ba? Tarimarima mabarari tu nuḡa-farevaḡi veiḡari ḡevairini tarimari moḡo ba? <sup>30</sup> Tarimarima mabarari keve tarimari ḡevaḡa-namorini varevarena o seḡukana ḡeḡabiato tarimari ba? Tarimarima mabarari garo irauirau ai ḡeguruḡani ba? Tarimarima mabarari garo irauirau ai ḡeguruḡani guruḡari tauri ḡekiraḡi-foforirini tarimari ba? <sup>31</sup> Varevare baregona korikori boḡono ura-dikadika-iaḡia.

### Veuravini

Maitoma dabara namo vedaureana au na ḡomi ḡemi avaḡa-foforiani.

**13** Bema au tarimarima ġeri garo irauirauri ai bara guruġa ema aneru garori ai maki bara guruġa, senaġi au asi ġegu veuravini, au ġegu guruġa tu auri ġek-wariani o funu ruarua ġevaġa-vesekerini gururi ġeraġeni kavana. <sup>2</sup>Bema peroveta varevarena o seġukana ġegu ai bere tanu, ema riba mabarari e vekuretoġa dagarari mabarari bara ribari. Ema ġegu veġabidadama barego bere tanu, be ġoro baregori maki bara vaġa-veraġa-raġeri, ma gabu boruri ai ma beġerea ruġa. Senaġi au asi ġegu veuravini nai, au tu asi ġegu namo ta. <sup>3</sup>Ema ġegu farefare mabarari asi ġeri-ġari tarimari bara viniri, e tauġanigu tarimarima ġimari ai bara tore-kaua, benamo beġere gabua, senaġi au asi ġegu veuravini nai, au na dagara namona ta asi bara doġaria.

<sup>4</sup>Ma ġena veuravini tarimana tu evevaġa-gwaġiġini. Veuravini tu vevetuġaġwa e vevaġa-kava na evonuto. Veuravini nuġanai mama asi etanuni. Veuravini nuġanai veiavi e vekiraġi-varaġevaraġe asi etanuni. <sup>5</sup>Veuravini na tarimarima vaġa-rakavari veiġari asi eveirini, tauġena ġena namo moġo asi evetauani, asi ebaru-ġariġarini, ta ġena rakava asi etuġamaġi-taġorini. <sup>6</sup>Vei-rakava asi eiaku-iaġirini, senaġi Barau ġena guruġa ema maġuri moġoniri moġo eiaku-iaġirini. <sup>7</sup>Veuravini tu ma man-auna ġesi dagara mabarari nuġari ai eruġa-tarini, dagara mabarari nuġari ai Barau tu bevaġa-moġoniani, ema ġena vetuġamaġikau maki Barau ġenai roġo betoreani, meto mabarari ai bekokoreni.

<sup>8</sup>Veuravini tu asi veġata ekorini, beruġa-taġo vanaġi-vanaġini. Peroveta guruġari mabarari neġi beġea korini, garo irauirau mabarari maki beġea magoni, riba mabarari beġea korini. <sup>9</sup>Korana ġita ġera riba tu koturi moġo e ġera peroveta maki koturi koturi moġo. <sup>10</sup>Senaġi mo dagara namo vedaureana beiaġomani nai, mo kotuna moġo namo taribarito dagarari tu beġe rekwa-rekwani. <sup>11</sup>Au roġo mero misigu ai tu, mero misiri ġeri guruġa na aiaġoto-ġoi, mero misiri ġeri tuġamaġi na aiaġoto-ġoi, ema mero misiri ġeri tuġamaġi na atuġamaġito-ġoi. Senaġi au ama tau-doġadoġato nai tu, mero misimisiri ġeri tuġamaġi mabarari atore-veġitarito. <sup>12</sup>Toma Barau ġena dagara tu veġia ai noġa taġita-vaguna vagunarini. A Barau ġoirana ema ġita ġoirara bita veġita-veġita karakarani, monai vauro Barau ġena dagara vetoġari korikoriri bita ġita-ginikaurini. Toma au na tu koturi moġo aribarini. Senaġi mo ġaro ai vau bariba-ginikaurini, au Barau na eriba-ginikauguto kavana. <sup>13</sup>Mai dagara toitoi tu beġe tanu-vanaġi vanaġini: Veġabidadama, vetuġamaġikau, ema veuravini. Senaġi mai dagara toitoi vekaravari ai tu veuravini moġo barego lelevaġi.

### Iauka Veaġa ġena varevare dagarari tari ġauvei-iaġiri

**14** Veuravini maġurina boġono vetau-guinea! Ema Iauka Veaġa ġena varevare boġono uravini barego-iaġiri; a Iauka Veaġa ġena peroveta varevarena o seġukana tu boġono uravini barego-lelevaġia. <sup>2</sup>Korana garo boruri ai eguruġani tarimana tu dia tarimarima evaġa-guruġaiiani, senaġi ġia tu Barau moġo evaġa-guruġaiiani. Moġoni, tarimarima na ġia kara bekiraġiani tu asi beġe tuġamaġi-doġariani, korana ġia tu Barau Iaukana na vekuretoġa dagarari eki-raġirini. <sup>3</sup>A eperovetani tarimana tu tarimarima evaġa-guruġarini. Ma ġia ġena peroveta guruġari na tu tarimarima evaġa-kokorerini, elaunaġirini, ema tarimarima nuġari evaġa-gwaġiġirini. <sup>4</sup>Garu boruri ai eguruġani tarimana tu tauġena ġena veġabidadama moġo evaġa-tubuani, a eperovetani tarimana na tu ekalesia mabarari ġeri veġabidadama evaġa-kokorerini.



<sup>5</sup> Au ġegu ura tu ġomi mabarami garo boruri ai boġono guruġa. Senaġi au aura-baregoni ġomi tu Barau ġenana ġeiaġomani guruġari boġono peroveta-iaġiri. Korana Barau ġenana ġeiaġomani guruġari eperoveta-iaġirini tarimana na garo irauri ai eguruġani tarimana evanaġiani; senaġi garo irauri ai beguruġani tarimana beguruġani guruġari ma beġe vaġa-vanaġirini e beġe kiraġi-fakarini tu lorinai. Korana beġe vaġa-vanaġirini e beġe kiraġi-foforirini nai tu, ekalesia ġeri veġabidadamai kokore beġe ġabini.

<sup>6</sup> Tarikakagu mabarami, bema au baiaġosini ġomi ġemi ai ġaronai tu, garo boruri ai basi vaġa-guruġamini, senaġi guruġa tauri tu asi bakiraġi-foforirini; monana au ġeguna namo ta boġo ġabiani ba? Asiġina! Moġoni, Barau na au evaġa-ribaguni guruġari ġomi ġemi ai bakiraġi-foforirini o riba bavinimini, o baperovetani, o Barau ġena guruġa ġemi ai havevaġa-riba iaġiani, monai vauro au ġeguna namo boġo ġoitaguni. <sup>7</sup> Miusiki vaġa-ġereru dagarari boġono tuġamaġiri, ilailana ivirikou o hap (ġita kavana). Bema gururi asi beġe raġe-ġinikauni nai tu, kamasi tarima na kamara mari ġeġere-iaġiani bita seġaġi-leaiiani? Ġia tu mo ivirikou o hap gururi beġe raġe-ġinikauni vauro, kamara mari ġeġere-iaġiani bita ribaiiani. <sup>8</sup> Ema bema vetari kibina asi beġe fururu-ġinikauni nai tu, ta na tuari uranai asi berovina-toreni. <sup>9</sup> Ġomi maki moġesina kavana, bema garo boruri ai boġo guruġani nai, tarimarima tu kamara dabarai ġomi na kara ġokiraġiani beġe tuġamaġi-doġariani? Ġomi ġemi guruġa mo tu tano korinai boġo kiraġirini noġa iavara boġo vaġa-guruġaiiani. <sup>10</sup> Mai tanobarai garo irauri tu asisebo, ma ġia mabarari ma tauri moġo. <sup>11</sup> Senaġi bema garo ta anina asi ribagu, moġa tauna tu, au tu dia mo garo borunai eguruġani tarimana ġena vanuġa tarimagu, ema ġia maki moġesina, ġia tu dia au ġegu vanuġa tarimana. <sup>12</sup> Ġomi ġemi ai maki moġesina. Ġomi tu Iauka Veaġa ġena varevare ġouravini-barego iaġirini; ma toma tu ekalesia ġeri veġabidadama vaġa-kokorena varevarena ġabiġabina uranai boġono kokore, be mo varevare ai tu boġono tubu.

<sup>13</sup> Moġesi naima, garo boruri ai eguruġani tarimana tu, ġauġau ai Barau bene noġia, be kara bekiraġirini guruġari maki bene vaġa-vanaġiri e bene kiraġi-foforiri. <sup>14</sup> Korana bema au garo boruri ai aguruġani tu, au iaukagu moġo eġuriġurini, a au ġegu tuġamaġi ai tu asi atuġamaġi-doġarini au tu kara akiraġirini. <sup>15</sup> Be kara toma aveiani? Au tu iaukagu ġenana bana ġauġau, ema batuġamaġi-fakaiani garonai maki bana ġuriġuri. Au iaukagu ġenana bana mari, ema batuġamaġi-fakaiani garonai maki bana mari. <sup>16</sup> Bema ġoi iaukamu na Barau mari ai ovaġa-raġeani nai tu, kamara dabarai mo garo asi ribana tarimana “Amen” betoni, ġoi Barau ovaġa-namoani nuġanai, ei? Ġia tu “Amen” asi bekiraġiani, korana ġia asi beribani ġoi kara okiraġiani. <sup>17</sup> Moġoni, ġoi na Barau tu otanikiu-ġinikauni, senaġi mo sevimu tarimari ġeri veġabidadama tu asi ovaġa-kokorerini. <sup>18</sup> Au na Barau atanikiuani, korana au garo boruri ai tu aguruġa-iakuni, ġomi mabarami avanaġimini. <sup>19</sup> Senaġi ekalesia ġuriġuri ġeraka-vegogoni nai, namona tu beġe tuġamaġi-fakaiani garonai guruġa imaima moġo bana kiraġiri, tarimarima tari bana vaġa-ribari. Moġesina tu namo, a garo boruri ai guruġa 10,000 bakiraġirini tu asi ġena namo ta.

<sup>20</sup> Tarikakagu mabarami, mero misimisiri ġeri tuġamaġi kavana asi boġono tuġamaġi. A vei-rakava ġeri reke ai tu mero raraka-rarakari ilailari ai boġono iaġo. Senaġi tuġamaġi-fakai tu tau-doġadoġa kavana boġono vei. <sup>21</sup> Buka Veaġa nuġanai tu maiġesi etoreato, “Vereġauka ekirani,

“Tarima garori boruri na  
ema gabu boru tarimari mururi na  
au na maiġeri tarima bavaġa-guruġarini.

Senaġi moġesi maki asi veġata beġe seġaġi-viniguni.”

<sup>22</sup> Moġesi naima garo boruri ai ġeguruġani tu, Iesu asi ġevaġa-moġoniani tarimari moġo ġeri ai tu vetoġa ta, a dia Iesu ġevaġa-moġoniani tarimari ġeri vetoġa. Senaġi Barau ġena guruġa ġeperoveta-iaġirini tu, Iesu ġevaġa-moġoniani tarimari moġo ġeri, a dia Iesu asi ġevaġa-moġoniani tarimari ġeri. (Mai tu, garo boruri ai ġeguruġani tu, Iesu asi ġevaġa-moġoniani tarimari na vevaġa-kava ta asi beġe ġoitaġoani. Senaġi Barau ġena guruġa ġeperoveta-iaġirini tu, Iesu asi ġevaġa-moġoniani tarimari na vevaġa-kava beġe ġoitaġoani).

<sup>23</sup> Bema ekalesia mabarami gabu sebonai ġoraka-vegogoni, benamo mabarabarami garo boruri boġo guruġani, ma nuġanai tu ġomi fakami ai asi ribana tarimana ta o Iesu asi evaġa-moġoniani tarimana ta bema raka-toġani nai, bekirani, “Ġomi tu debami beġe rakava, boġo babo!” betoni. <sup>24</sup> Senaġi bema mabarami boġo perovetani nuġanai, ġomi fakami ai Keriso asi evaġa-moġoniani tarimana ta o asi etuġamaġi-fakani tarimana ta bema raka-toġani nai tu, ġomi mabarami na Barau ġena guruġa ġoperoveta-iaġiani guruġari na mai tarima loruna begwanuani, benamo beribani, ġia tu vei-rakava tarimana, ema mabarami na boġo ġita-viriġiani. <sup>25</sup> Mo tarima ġena tuġamaġi vekuretoġari mabarari boġo kiraġi-foforirini, benamo bevetui-tarini, Barau betoma-rakariġo viniani, bekirani, “Moġoni, Barau tu ġomi ġesi etanuni.”

### **Toma-rakariġo veiġari roroġotori**

<sup>26</sup> Moġesina naima, tarikakagu, ġuriġuri boġo raka-vegogoni nai, ġomi mabarami tata ma ġemi ġauvei. Tari tu mari beġe ġabini, tari tu beġe vevaġa-ribani, tari tu garo boruri ai beġe guruġani, tari tu Barau ġena guruġa beġe vaġa-foforirini tarimari, tari garo boruri ai beġe guruġani guruġari beġe vaġa-vanaġirini e beġe kiraġi-foforirini. Dagara mabarari tu ekalesia ġeri veġabidadama vaġa-tubuna ġana moġo boġono veiri. <sup>27</sup> Bema tarima ta garo boruri ai eguruġani nai, tarima ruarua o toitoi ma beġene guruġa. Namona tu tarima toitoi na beġene guruġa-karoa, senaġi tauri toitoi vaġa-sebo asi beġene guruġa. Ta bene guruġa-ġosi murinai vauro ta ma bene guruġa, ma ta maia. Benamo garo boruri ai beġe guruġa-ġosini murinai tu, ekalesia ta na moġesi guruġa bene vaġa-vanaġiri, bene kiraġi-foforiri. <sup>28</sup> Senaġi bema vaġa-vanaġi tarimana ta asiġina nai tu, mo garo boruri ai eguruġani tarimana tu rubu nuġanai asi bene guruġa. Ġereġana tauġena vau bene guruġa-vevini, ema Barau bene vaġa-guruġaia. <sup>29</sup> Barau ġena guruġa ġeperoveta-iaġirini tarimari ruarua o toitoi beġene peroveta, ma kotari na tu moġeri guruġa beġene vetau-ginikauri. <sup>30</sup> Bema Barau ġena guruġai etanu-tarini tarimana ġenai efoforini, bene kiraġi-foforia ġana nai, eguruġa-guineni tarimana ġena guruġa tu bene vaġa-magoa. <sup>31</sup> Namona tu ġomi sebomi sebomi boġono peroveta, be kara ġokiraġiani mabarari beġene riba ema mabarari beġene launaġiri. <sup>32</sup> Barau ġenana peroveta guruġari edoġaririni tarimana tu, moġeri guruġa ġena urai vau bekiriraġirini. <sup>33</sup> Barau tu dia vei-veġonu veġonu evaġa-ġoraiani Barauna, senaġi ġia na tu maino evaġa-ġoraiani Barauna.

Ekalesia doġorori mabarari ġeveini kavana, <sup>34</sup> ġomi ġemi vavine maki ekalesia vegogori ai asi beġene guruġa, korana ġia tu asi ġeri maoro ġia beġe guruġani.

Senaġi ġia tu Mose ġena taravatu na ekiraġiani ilailanai beġene tanu tau gabureri ai. <sup>35</sup> Bema dagara tari ġeribari beġe toni nai tu, ġaraġori numai vauro beġenea danaġiri. Korana vavine ekalesia vegogori ai beġe guruġani tu ma maiakana. <sup>36</sup> Ġomi na mai guruġa asi ġoġabi-raġeani? Barau ġena guruġa tu ġomi ġemina erefoto ba? Ba Barau ġena guruġa na tu ġomi moġo ema ġoitaġomito, ei?

<sup>37</sup> Bema tarima ta tauġena evetuġamaġini ġia tu peroveta ema ġia tu Iauka Veaġa na evonuvonu-raġeto etoni tarimana tu, ġomi mai atore-vinimini guruġari bene ġabi-raġeri, bene kira, mai tu moġoni Vereġauka ġena taravatu guruġari. <sup>38</sup> Bema tarima ta maiġeri guruġa betuġamaġi-fitoġarini, Barau na ġia maki betuġamaġi-fitoġaiani.

<sup>39</sup> Moġesi naima, tarikakagu, peroveta uradikadikana tu boġono vei, ma garo boruri ai guruġa-iaġiri ai tu asi boġono vekiraġoi. <sup>40</sup> Senaġi dagara mabarari boġono ġauvei-iaġi ginikauri, ema dabara korikoriri ai boġono veiri.

### Iesu ġena variġisi-ġenoġoi

**15** Tarikakagu mabarami, au aurani, mo Vari Namona, ġomi ġemi aġobata-iaġiato moġa, ġemi tuġamaġi ai ma navaġa-variġu ġenoġoia. Mai Vari Namona ġomi na tu ġoġabi-raġeato, ema ġomi tu mai Vari Namonai ġoruġa-gwaġiġini. <sup>2</sup> Bema au na mo aġobata-vinimito guruġana moġa roġo boġo ġabi-gwaġiġiani nai, ġomi tu mo Vari Namona ġenana Barau na bevaġa-maġurimini. A bema asiġina nai tu, ġomi na ġovaġa-moġoni-kavaiato.

<sup>3</sup> Vereġauka ġenana au na kara adoġariato guruġana tu, ġomi ma akira-varamito. Mo guruġa moġa tu guruġa giniginena e guruġa baregona. Mo guruġa tu Buka Veaġai ġetoreato guruġana ilailanai, ekirani: Keriso ġita ġera rakava bene ġabi-vaġiri uranai emaseto; <sup>4</sup> ma ġeguriato, ma ġaro vaġa-toitoinai mase na ma evariġisi-ġenoġoito, Buka Veaġai ġetoreato ilailanai. <sup>5</sup> Benamo Petero ġenai evevaġa-foforito, ma murinai tu ġena mero gabanana ruarua (12) ġeri ai maki. <sup>6</sup> Moġa murinai tu veġabi-dadama nuġanai tarikaka mabarari sinau imaima (500) ġevevogoto nuġanai ġeri ai efoforito; tari varau ġemaseto, a ġutuma tu roġo maġuri. <sup>7</sup> Ma murinai tu lakobo (o Iames) ġenai efoforito, ma murinai tu apostolo mabarari ġeri ai maki.

<sup>8</sup> Ma magona korikorinai tu, au, noġa moġo amaġuri-rakavato tarimagu, ġegu ai ema foforito. <sup>9</sup> Korana au tu apostolo mabarari ġeri dokona korikori tarimagu, ma au tu asi ġegu namo ta moġo, tarimarima na au apostolo tarimagu ai beġe kiraġiġuni. Korana au na Barau ġena ekalesia avaġa-midigu midigurito-ġoi, e alai-lautilausirito-ġoi. <sup>10</sup> Senaġi Barau ġena namo e varevare-barai, au tu mai ġegu apostolo tarimagu ai ama iaġoto. Ema Barau ġena namo e varevare-bara au ġegu ai tu asi etore-kavaiato. Moġoni, au na ġauvei tu barego lelevaġi aveiato, a apostolo kotari tu asiġina. Senaġi mo tu dia au tauġegu ġegu kokore ai moġeri ġauvei aveirito. Asiġina. Mo tu Barau ġena namo e varevare-barai kokore eviniguto, benamo mo ġauvei aveirito. <sup>11</sup> Moġesina naima au aġobatato o apostolo tari ġeġobatato, asi ġena irau ta, korana vari tu sebona moġo ġaġobata-iaġiato, ma ġomi na maki mo vari sebona, moġa moġo ġovaġa-moġoniato.

### Ġita ġera variġisi-ġenoġoi

<sup>12</sup> Senaġi bema Keriso ġaġobata-iaġiani nai, ġakirani, Keriso tu Barau na mase na ma evaġa-variġisi ġenoġoiato ġatoni, kamasi nai ġomi fakami ai ġomi kotari tu

gokirani, mase tarimari tu asi ma beĝe variĝisi-ĝenoĝoini? <sup>13</sup> Bema mase na variĝisi-ĝenoĝoi tu asiĝi, moĝa tauna tu, Keriso mase na tu asi ma evariĝisi-ĝenoĝoito. <sup>14</sup> Ema bema Keriso mase na asi evariĝisi-ĝenoĝoito, moĝa anina, ĝai ĝema ĝobata tu asi tauri, ema ĝomi ĝemi veĝabidadama maki asi tauri. <sup>15</sup> Moĝesi tu ĝai beĝere ribama, Barau na asi eveiato dagarana ĝai na tu ĝakiraĝi-moĝoni moĝonikavaiani, ĝaĝofaĝofani. Korana ĝai na Barau varina ĝafiuani, ĝakirani, Barau na Keriso mase na ma evaĝa-variĝisi ĝenoĝoiato ĝatoni nuĝanai, Barau na Keriso mase na tu asi evaĝa-variĝisi ĝenoĝoiato. Ma guruĝa moĝonina tu, mase tarimari mase na tu asi ma ĝevariĝisi-ĝenoĝoini. <sup>16</sup> Aba, bema mase tarimari mase na asi ma ĝevariĝisi-ĝenoĝoini, moĝa anina tu Barau na Keriso tu mase na asi ma evaĝa-variĝisi ĝenoĝoiato. <sup>17</sup> Ema bema Barau na Keriso mase na tu asi ma evaĝa-variĝisi ĝenoĝoiato, ĝomi ĝemi veĝabidadama tu asi aniri e ĝomi tu roĝo rakava nuĝanai ĝotanuni. <sup>18</sup> Ema mo deikara Keriso ĝevaĝa-moĝoniato tarimari ĝemaseto tu, rakava voina beĝe ĝabiani. <sup>19</sup> Ma bema mai tamaĝuri-taĝoni maĝurina ĝena namo moĝo uranai Keriso ĝenai tavetuĝamaĝikauni nai tu, tarimarima mabarabarari vefakari ai ĝita kika vetuĝara tu barego lelevaĝi.

<sup>20</sup> Senaĝi Keriso tu moĝoni mase na evariĝisi-ĝenoĝoito, ema ĝia tu ĝemaseto tarimari mabarari fakari ai ĝia tu evariĝisi-ĝenoĝoi guineto, ilailana ĝau ĝwaĝwari ĝeĝora-guineni kavana. <sup>21</sup> Mase tu tarima sebona, Adamu, ĝenana evesinato. Moĝa ilailanai variĝisi-ĝenoĝoi maki tarima sebona, Keriso, ĝenana evesinani. <sup>22</sup> Vaĝa-ilailana, tarimarima mabara-barari tu Adamu ĝenana ĝeiaĝomani, moĝa lorinai beĝe maseni veĝata; senaĝi Iesu Keriso ĝesi beĝe sebonani neganai, Barau na ma bevaĝa-maĝuri ĝenoĝoirini. <sup>23</sup> Senaĝi ĝita mabarara tata ĝera ĝaro korikori loriri ai bita variĝisi-ĝenoĝoini: Giniguine tu Keriso, ĝia tu evariĝisi-ĝenoĝoi guineto. Ma ĝia ma beiaĝomani ĝaronai tu, ĝia ĝena tarimarima mabarari ma beĝe variĝisi-ĝenoĝoini. <sup>24</sup> Maĝa murinai Keriso na Barau ĝevetari-viniani iaukari ĝeri veĝitaĝau e maoro ema seĝuka mabarari asi ĝeri kokore ai bevaĝa-iaĝorini e bevaĝa-rakavarini, benamo Barau ĝena Basileia o veĝitaĝau seĝukana Tamana Barau ĝimanai betorekauani. Benamo tanobara dokona beiaĝomani. <sup>25</sup> Korana Keriso tu roĝo bevereni, ĝena veĝitaĝau tu betanuni roĝo, beiaĝoni mo, ĝia ĝevetari-viniani iaukari e tarimari mabarari ĝia kwakuna fanafana gaburenai befana-taririni. <sup>26</sup> Keriso na evetari-viniani dagarana ta, magona korikori ai vauro bevaĝa-keto-moĝovaĝiani, tu mase. <sup>27</sup> Korana Buka Veaĝai tu iniĝesi ekirani, “Barau na dagara mabarari ĝia kwakuna gaburenai etorerito, mai tu ĝena veĝitaĝau gaburenai etorerito.” Senaĝi ekirato, “dagara mabarari ĝia kwakuna gaburenai etorerito,” etato nai, Barau tu asi eiavikauato, korana tu Barau na dagara mabarari Keriso kwakuna gaburenai etoretogarito. <sup>28</sup> Dagara mabarari Keriso ĝena veĝitaĝau gaburenai Barau na betorerini, moĝa murinai tu Barau Natuna tauĝena maia Barau ĝena veĝitaĝau gaburenai bevetore-toĝani. Moĝo tauna tu, Barau na dagara mabarabarari bedebbarini.

<sup>29</sup> Bema variĝisi-ĝenoĝoi asiĝina, mai tarima kotari ĝemase-guineto tarimari urari ai babatise ĝeĝabini tu kamasi beĝe veini, ei? Ĝia tu kara dainai ĝemase-guineto tarimari urari ai babatise ĝeĝabini? Betaĝu ĝia na variĝisi-ĝenoĝoi ĝevaĝa-moĝoniani nai, mo veiĝa ĝeveiani. <sup>30</sup> Ema ĝai maki, kara dainai tu hora mabarari ai dori moĝo ĝevaĝi-masemani senaĝi roĝo ĝaĝiĝiraĝeni, bema variĝisi-ĝenoĝoi asiĝina nai tu? <sup>31</sup> Tarikakagu mabarami, moĝoni, ĝaro vanaĝivanaĝi au ĝegu mase ĝekiraĝiani. Senaĝi maiĝa maki moĝoni, ĝomi na Iesu ĝoĝabi-raĝeato nai, ĝera Vereĝauka Keriso

Iesu ġoiranai au tu averere-baregoni. <sup>32</sup> Bema au vaġa-ilailana mai tarimarima ġeri tuġamaġi babobabori noġa moġo Efeso ai boġa bairi rakavari kavana bara vaġa-vevaġiri, au tu kara dagara namona ġegu ai bere ġora? Bema variġisi-ġenoġoi asiġina nai, au tu moġesi asi bara vei, asiġina ġinavaġi. Bema Barau na mase na asi ma bevaġa-variġisi ġenoġoirani nai tu, maiġesi tara kira, “Siġaniġani ema siniuniu, korana boinani tu bita maseni bene.”

<sup>33</sup> Tarima ta na asi bene ġofami! “Tarima rakavari bita kakorini nai tu, ġera maġuri namori beġe rakava-kwaikwaini.” <sup>34</sup> Ġotataġa, veiġa iobukaiobukari ġoveiri, vei-rakava ġovaġa-dokoa. Korana ġomi kotari Barau tu asi ribami roġo. Mai tu ġomi beġene maiakami ġana aguruġani.

### Variġisi-ġenoġoi tauġanina tu irauna

<sup>35</sup> Senaġi kotari tu beġe vedanaġini, beġe kirani, “Mase tarimari tu kamasi ma beġe variġisi-ġenoġoini? Ma beġe variġisini nai, tauġaniri tu aiġesina?” <sup>36</sup> Babo! Ġoi na kara tano ai ovaroani tu, asi roġo etubuni mo, ovaroani dagarana bemaseni vau. <sup>37</sup> Widi o dagara ta novaroa otoni nai tu, dia tauġani oġabiani, benamo ovaroani. Asiġina, ġoi na mo widi o kara novaroa otoni dagarana tu ġutuna ġuena oġabiani, ma ovaroani. <sup>38</sup> Ma Barau tauġena na ġena ura ilailanai mo widi o kara ġovaroani, moġeri tata tauġaniri korikori evinirini. <sup>39</sup> Tauġani mabarari viriġori tu irauirau. Tarimarima viriġori irau, kwakuri vasivasi ġemaġurini dagarari vaġa-ilailana bai, boromakau, mamoe, e kotari viriġori irau, maġani-kone viriġori irau ema manu maki viriġori irau. <sup>40</sup> Guba dagarari tauġaniri tu ta, ma tanobara ġetanuni tarimari e dagarari maki irau. Guba tauġanina marevana ta ema mai tanobara tauġanina marevana maki ta. <sup>41</sup> Ġaro marevana ta ema ġue marevana ta, ema visiġu marevari maki irauri. Visiġu tata maki marevari irauirau.

<sup>42</sup> Mase na variġisi-ġenoġoi maki moġesi. Beġe guriani tauġanina tu beborāġani, a Barau na ma bevaġa-variġisi ġenoġoiani tauġanina tu asi ma beborāġa-ġenoġoini. <sup>43</sup> Beġe guriani tauġanina tu vetoġana asi namo, ema tarimarima na asi beġe urani ġitaġitana, a Barau na ma bevaġa-variġisi ġenoġoiani tauġanina tu ma marevana. Beġe guriani nai tu, moiramoira asi kokorena, a Barau na mo tauġanina ma bevaġa-variġisi ġenoġoiani nai tu, ma seġukana. <sup>44</sup> Ġeguriani nai tu, tanobara tauġanina, a Barau na evaġa-variġisi ġenoġoiani nai tu, iauka tauġanina. Tanobara tauġanina tu ta etanuni, moġa lorinai iauka tauġanina maki ta etanuni. <sup>45</sup> Buka Veāġa nuġanai ekirani, “Tarima guinena, Adamu, Barau na eveiato tu maġuri tarimanai evaġa-iaġoato.” A Adamu magona, Keriso, tu maġuri bevinini Iaukanai evaġa-iaġoato. <sup>46</sup> Tanobara tauġanina tu eguineto, a dia iauka tauġanina. Tanobara tauġanina murina na vauro, iauka tauġanina eiaġomato. <sup>47</sup> Tarima guinena, Adamu, tu tanobara ġenana eiaġomato, Barau na tano kauna na eveiato, a tarima vaġa-ruaruana tu Keriso, guba na emariġoto tarimana. <sup>48</sup> Barau na tano kauna na eveirito tarimari tauġaniri tu Adamu tauġanina kavana, mo tu ma tano kauna na eveiato tarimana tauġanina kavana, ema guba tauġanina beġe ġabiani tarimari maki Keriso tauġanina kavana, mo tu guba na eiaġomato tarimana tauġanina kavana. <sup>49</sup> Initoma ġita tu Barau na mo tano kauna na eveiato tarimana vetoġana kavana. A gabi vau mai guba na eiaġomato tarimana vetoġana ilailanai bita iaġoni.

<sup>50</sup> Tarikakagu mabarami, au na kara akiraġiani tauna tu maiġa, tarimarima, mai tanobarai ġetanuni kavana, ma tauġaniri, ma viriġori, ema ma rarari tu, Barau ġena

Basileia nuġanai asi beġe raka-toġani. Ema ma beborāġani dagarana tu tanu-vanaġi vanaġi Basileiana nuġanai asi betanuni riba. <sup>51</sup> Ġoseġaġi, vekuretoġa guruġana ta akira-varamini: Ġita mabarara tu asi bita maseni, senaġi ġita mabarabarara tauġanira tu Barau na bekurevorini. <sup>52</sup> Mo tu asikauna moġo beġorani, noġa matara iaġataġo nunaġa ta vaġa-kafurina mo ma taraga-keorini kavana, asi kwaibona. Kibi dokona guruna beraġeni, benamo ġemaseto tarimari ma beġe variġisi-ġenoġoini, benamo tauġani asi ma beġe rakava-ġenoġoini. Ma ġita roġosi bitana mase tarimara maki tauġanira beġe vekurevoni, mo tu tauġani variġuri bita ġabirini. <sup>53</sup> Korana mai ma beborāġani tauġanina tu bene vekurevo, benamo asi ma beborāġani tauġanina bene vetore-fofori, ema mai ma bemaseni tauġanina tu bene vekurevo, benamo asi bemaseni tauġanina ma bene vetore-rosi. <sup>54</sup> Aba, mai ma beborāġani tauġanina tu bene vekurevo, benamo asi ma beborāġani tauġanina bene vetore-rosi, ema mai ma bemaseni tauġanina tu bene vekurevo, ma asi ma bemaseni tauġanina ma bene vetore-rosi. Mai dabarai Buka Veaġai evetoreto guruġana bemoġonini, “Mase tu Barau ġena kokore na varau evaġa-darereato.

<sup>55</sup> Mase o, ġoi ġemu kokore tu aiġea?

Mase o, ġoi na tarimarima ogwanurini garaġotana tu ainai?”

<sup>56</sup> Mase egwanurini garaġotana tu vei-rakava ema vei-rakava ġena seġuka tu tar-avatu ġenana eiaġomani. <sup>57</sup> Senaġi Barau tatanikiuani, korana ġia na ġita ġera Vereġauka Iesu Keriso ġenana kokore evinirani.

<sup>58</sup> Moġa lorinai, tarikakagu, au na aura-vinimini tarimami, ġemi veġabidadamai boġono ruġa-gigitari, tarima ta o dagara ta na asi bene vei-ġareva ġarevami, vanaġi-vanaġi Vereġauka ġena ġauvei boġono veia ma kokoremi ġesi. Korana boġono riba, ġomi ġemi ġauvei Vereġauka nuġanai tu asi ġovei-taġuiani, senaġi ma voimi.

### Ierusalemekalesia tarimari vaġa-kavari ġana moni vaġa-vegogo

**16** Maitoma tu Ierusalemekalesia tarimari vaġa-kavari uranai moni boġono vaġa-vegogo guruġari akiraġini. Mai guruġa tu Galatia ekalesia mabarari akirarito, beġene veia atato guruġana, ġomi akira-varamini. Au aurani tu ġomi maki mai veiġa boġono veia. <sup>2</sup> Fura ġarona giniguenenai o Sandei vanaġi-vanaġi ġomi tata tu ġemi doġari ilailari ai moni ta boġono tore-toġaia. Moġeri moni tu boġono tore-vegogo vegogori, be au baiāġosini ġaronai tu, moni mabarana bene rovinatore, asi ma bisini vaġa-vegogo. <sup>3</sup> Ema au basi votuni nai tu, ġomi na boġo vaġa-moġonirini tarimari bavinirini, benamo Ierusalemekalesia beġe ġabi-iaġorini. Beġe iaġoni nai tu, au na guruġa-fofori fefana ta maki batoreani, be beġe ġwaukani. <sup>4</sup> Bema baġitaiani au tauġegu baiāġoni tu namo nai tu, au ġesi baġa iaġoni.

### Paulo ġena ura Korinto ġana bene iaġo

<sup>5</sup> Au baiāġosini basi-ġitamini, Makedonia tanona na nuġana na baraka-vanaġini nai, korana au tu Makedonia tanona nuġana na baraka-vanaġini bene. (Makedonia ekalesiari bana raka-ġitari, senaġi monai asi batanuni, baraka-vanaġini moġo). <sup>6</sup> Au baiāġosini nai tu, atuġamaġini, ġomi ġesi kota roġo bita tanuni banaġu. Betaġu faraka e iavara ġueri maki maninai bita ġabiani ġomi ġesi. Bere namo, ġegu iaġoiaġo ai baura-vinirini dagarari tu ġomi na boġono vaġa-kavagu. <sup>7</sup> Au tu asi aurani taimi misina moġo ġomi ġesi bana tanu, benamo ma bana iaġuimi maia. Au ġegu tuġamaġi ai tu aurani, ġomi ġesi bitana tanu-mauka, senaġi mo tu bema Barau na maoro

beviniguni vauro. <sup>8</sup> A au tu Efeso ai batanuni mo Pentekoste ġarona, <sup>9</sup> korana Barau ġena ġauvei bana veia dabarana tu varau bekeoa, be toma ġegu ġauvei tu barego lelevaġi. Senaġi tarimarima vovoka na maki ġekouguni, ġauvei asi bana veia ġetoni.

<sup>10</sup> Bema Timoteo beiaġosini nai tu, boġono nari-ġinikaua, be ġomi ġesi betanuni nai, asi bene tanu-garigari. Ġia maki au kavana Vereġauka ġena ġauvei eveiani.

<sup>11</sup> Moġa lorinai tarima ta na asi bene ġita-ġuiragġia. Senaġi boġono vaġa-kavaia e maino ai boġono tuġua, au ġegu ai ma bene ġenoġoi-iaġoma. Korana au tu tarikaka kotari ġesi ġia ġanariani.

<sup>12</sup> Ma tarikakara Apolos tu au na alaunaġiato, tarikakara tari ġesi be ġomi ġemi ai bene iaġosi atato. Senaġi ekirato, maitoma tu asi ilaila beiaġosini, a ġaro namona tai vauro beiaġosini.

### Guruġa dokona

<sup>13</sup> Tauġemi boġono venari-ġinikau, ġemi veġabidadamai boġono ruġa-gwaġiġi, nuġami beġene gwaġiġi, boġono kokore. <sup>14</sup> Dagara mabarari boġo veirini nai tu, veuravini ai moġo boġono veiri.

<sup>15</sup> Tarikakagu mabarami, ġomi Stefanas ġena numa tarimari mabarari tu ma ribami. Ġomi ma ribami, ġia na Iesu Keriso ġeġabi-raġeato nai tu, ta maki roġosi roġo bere ekalesia Akaia nuġanai. Ma ġia tu veaġa o ekalesia tarimari ġeri ġauvei ai ġevekiraġikauto, ġevaġa-kavarito. Moġa lorinai anoġimini, <sup>16</sup> ġomi maki moġesi tarimari garori boġono seġaġi-viniri, ema ġai ġesi ġeġauveini e ġevekwaragġini tarimari mabarari maki.

<sup>17</sup> Aiakuni, korana Stefanas e Fotunato ema Akaiko au ġegu ai ġeiaġomato nai. Asi ilaila baiaġosini, ġomi ġesi bita tanuni nuġanai, mai tauri toitoi na ġomi gabumi ġeġabirito, moġesi nai au nuġagu egenatarito. <sup>18</sup> Ema ġia na au nuġagu ġevaġa-iaku ġenoġoiato, ema ġomi maki nuġami ġevaġa-iaku ġenoġoirito. Moġesi naima ġia tu boġono ġabi-raġeri.

<sup>19</sup> Asia ruburi na ġomi ġemi vevaġa-namo ġetuġuni. Akwila e Priskila na ema ekalesia ġia ġeri numai ġetanuni mabarari na nuġari mabarari ġesi ġevaġa-namomini Vereġauka aranai. <sup>20</sup> Tarikaka mabarari na ġevaġa-namomini. Gomi maki karomi tata vetarikaka verauna na boġono vaġa-namori.

<sup>21</sup> Au Paulo ġimagu na mai vevaġa-namo guruġari atornerini.

<sup>22</sup> Bema tarima ta na Vereġauka asi eura-viniani tu, ġia iatanai rakava baregona bene tanu mo vanaġivanaġi. Ġera Vereġauka o, noiaġoma.

<sup>23</sup> Ġera Vereġauka Iesu Keriso ġena namo e varevare-bara ġomi ġemi ai bene tanu.

<sup>24</sup> Au ġegu veuravini ġomi ġesi bene tanu. Keriso Iesu ġenana ġita tu doġoro sebona tarimara.

## PAULO ĜENA TORETORE VAĜA-RUARUANA KORINTO EKALESIARI ĜERI

2 Korinto vaĝa-foforina guruĝari

Mai fefa vaĝa-ruaruana tu vevaĝa-gwaĝiĝi fefana Paulo na etoreato. Paulo na mai fefa tu Makedonia na Korinto ekalesiari etore-vinirito. Mai fefa tu laĝani 55 ema 57 fakari ai etoreato, mo tu Iesu maki emaseto murinai vau.

Mai fefa nuĝanai siri baregori tu karao 1:3-4 ema 5:18.

Paulo na mai fefa etoreato korana tari tu maiĝeri: 1) Ĝofaĝofa tarimari na ĝia ĝena apostolo ĝauveina ĝevaĝa-rakavaia ĝetato-ĝoi moĝeri guruĝari eveito. 2) Ierusalem-mai Barau ĝena tarima veaĝari ĝetanuni moĝeri ĝeri moni tari beĝene tore-vegogo etato (9:1-5). 3) Mo ĝena fefa giniginena monai mo vei-rakava tarimana ma beĝene ĝabi-raĝea e beĝene ura-vinia etato (2:5-11).

Paulo na mai fefa tu maiĝesina eboioĝaiato:

1. Ma veĝabi-sebona ĝenoĝoi guruĝari - karao 1-7

2. Ieruselema ekalesiari vevare viniri guruĝari - karao 8-9

3. Korinto nuĝanai apostolo tarimari ĝofaĝofari na Paulo ĝena apostolo ĝauveina ĝekira-rakavaiaio nai, Paulo tauĝena evekiraĝi-maĝatato guruĝari - karao 10-13

**1** Au Paulo, Barau ĝena ura lorinai Keriso Iesu ĝena apostolo ai evaĝa-iaĝoguto, ema ĝita tarikakara veĝabidadama nuĝanai Timoteo ĝesi ĝemana mai fefa eiaĝosini.

Ĝomi Barau ĝena ekalesia Korinto nuĝanai, ema veaĝa tarimami mabarabarami, Akaia tanona mabarana nuĝanai ĝotanuni tarimami, ĝemi atore-vinimini.

<sup>2</sup>Barau ĝita Tamara ema Vereĝauka Iesu Keriso ĝerina vevare-bara ema maino ĝemi ai bene tanu.

### Paulo na Barau etanikiuato

<sup>3</sup>Barau sivaĝa-namoa, ĝia tu ĝita ĝera Vereĝauka Iesu Keriso Tamana. Ĝia tu vevetuĝaĝwa Tamana e vevaĝa-kava Barauna korikori. <sup>4</sup>Barau na ĝai ĝema midigu-midigu e dabara doko nuĝari ai evaĝa-kavamani. Moĝesi naima ĝai na maki tarima kotari ĝeri meto ai baĝa vaĝa-kavarini riba, Barau na ĝai evaĝa-kavamani ilailanai. <sup>5</sup>Moĝoni, Keriso na eĝabiato midiguna ĝai ĝemai tu barego-lelevaĝi; ma ĝai ĝema vevaĝa-kava Keriso ĝenana maki barego lelevaĝi. <sup>6</sup>Ĝai baĝa midigu-midiguni tu ĝomi vevaĝa-kava ema vevaĝa-maĝuri boĝono ĝabia ĝana. Ĝai Barau na evaĝa-kavamani tu ĝomi vevaĝa-kava boĝono ĝabi ĝana. Ma mai vevaĝa-kava boĝo ĝabi-ani mainana ĝomi nuĝami bevaĝa-gwaĝiĝirini, benamo ĝai ĝamidigu-midiguni kavana midigumidiguri boĝo ĝabirini nai tu, boĝo kokoreni. <sup>7</sup>Ĝai ĝema vetuĝa-maĝikau ĝomi ĝemi ai tu barego ĝatoreani, korana tu ĝaribani, ĝomi tu ĝai ĝesi tamidigumidigu-sebonani, ema vevaĝa-kava maki ĝai ĝesi taĝabi-sebonaiani.

<sup>8</sup>Tarikaka mabarami, ĝai Asia tanonai aiĝesi meto ĝaĝoitaĝoto maki ĝaurani baĝana vaĝa-ribami. Ĝai Asia ai tu meto barego lelevaĝi ĝadoĝariato, ĝema gwada e riba mabarari maki ĝekorito, be ĝema tuĝamaĝi tu benamo, asi baĝa maĝurini, baĝa maseni. <sup>9</sup>Moĝoni, ĝai ĝema vemamiraĝi tu, ĝai beĝene vaĝi-masema dabarana tu varau ĝevaĝa-moĝoniato. Senaĝi asiĝina. Ĝai ĝemai moĝeri veiĝa ĝeĝorato tauna tu, ĝai tauĝema ĝema kokore ai asi baĝana veĝabidadama, senaĝi mase na maki evaĝa-



vaisi-rađerini Barauna ġenai moġo baġana veġabidadama. <sup>10</sup> Ġia na mase nuġari na evaġa-maġurimato, ma roġo ma bevaġa-maġurimani. Ġai ġema vetuġamaġikau tu Barau ġenai ġatore-kauani, ġoirai maki ġia na ma bene vaġa-maġurima ġana. <sup>11</sup> Mo tu ġomi na maki ġauġau ai roġo boġo vaġa-kavamani nai. Benamo Barau na tarimarima vovoka ġemi ġauġau dainai, ġai bevaġa-kavamani. Mo vevaġa-kava tarimarima vovoka na beġe ġitaiani, benamo ġai na mo namo ġadoġariani bakunai, mabarari na Barau beġe tanikiuani.

### Paulo ġena boioġa ekefato

<sup>12</sup> Ġai ġema vekokoroku anina tu maiġa: Ġai nuġamai ġamamiraġiani, ġai ġema maġuri e veġa mai tanobarai, o sikira, ġema vegaragara ġomi ġesi tu dabara veaġanai ema moġoninai. Maiġeri veġa veaġari ema moġoniri tu Barau ġena varevare-bara ġenana ġeiaġomani, a dia tanobara tarimari ġeri iauneganai ġeveirito-ġoi. <sup>13</sup> Ġai na ġomi fefa ġatore-vinimini tu dia fefa gwaġiġiri ġatore-vinimini. Asiġina. Ġai ġema fefai kara ġakiraġirini guruġari tu ġomi na boġo iavirini ema fefa tauri maki boġo tuġamaġi-doġaririni fefari moġo. <sup>14</sup> Moġoni, kotuna varau ġotuġamaġi-doġarimato. Ema atuġa-maġini, gabi vau boġo tuġamaġi-doġari korikorimani. Benamo Iesu Vereġauka beġenoġoini ġaronai, ġomi na ġai boġo vaġa-raġemani, ġai na ġomi baġa vaġa-raġemini kavana.

<sup>15</sup> Au ariba-maoroto, ġai boġo riba-ginikaumani ema ġemai boġo tuġamaġikauni naima, au na boioġa aveiato tu banasi rakaġita-guinemi, be vaġa-ruarua ġomi bana vaġa-kavami. <sup>16</sup> Au ġegu boioġa guinena tu Makedonia ġana baiaġoni nai, banasi raka-ġitami ema Makedonia na ma baġenoġoini nuġanai maki, ma banasi raka-ġitami atato. Ma manina na vau Iudea ġana baiaġoni nai, au ġegu iaġoiaġo ai beġene vaġa-kavagu farefareri tari boġono vinigu vauro boġono tuġugu. <sup>17</sup> Ġomi ġotuġa-maġini, au tu dia nuġagu mabarana ġesi maiġesi aboioġato ei? Ba ġomi ġo-tuġamaġini, au tu mai tanobara maġurina roġo ġetanuni tarimari ġeri veġa na aiaġoni, be murugu na tu, “Oi, oi” atato, a nuġagu gabigabinai tu “Asiġina, asi baiaġoni,” atato. <sup>18</sup> Barau guruġa moġoninai moġo etanuni kavana, ġai maki moġesina; ġomi ġemi ai vari ġaġobata-iaġiani nai, dia murumai tu “Oi” ġatoni, ma nuġamai tu “Asiġi” ġatoni. <sup>19</sup> Korana Barau Natuna, Iesu Keriso, ġomi fakami ai au, e Silas, ema Timoteo, na ġaġobata-iaġiato-ġoi tu dia muruma na moġo ġakirato-ġoi, “Iesu varina tu Oi, moġoni,” ma nuġama gabigabiri na tu “Asiġi, ġofaġofa” ġatato-ġoi. Asiġina. Ġia ġena maġuri nuġanai tu “Oi, moġoni” moġo etanuni vanaġivanaġi. <sup>20</sup> Barau ġena kiraġitore mabarari eveirito tu “Oi moġoni” moġo, Keriso ġena maġuri nuġanai ġemoġonito. Moġesi nai ġai na Keriso ġenana Barau ġavaġa-raġe-baregoani, ġakirani, “Oi, mo tu moġoni” ġatoni. <sup>21</sup> Ġomi ema ġai tu Barau tauġena na evaġa-kokorerani e evaġa-ruġa gwaġiġirani Keriso ġena maġuri nuġanai. Ġia na eġabirato, evaġa-veaġarato, <sup>22</sup> ema evaġa-moġonirato, ġita tu ġia ġena tarimarima, ġena vetoġa o maka maki ġita ġerai etoreato, ema ġita lorura ġutunai ġia Iaukana etore-toġaiato, mo Iauka ġenana ġita evaġa-riba ginikaurato, ġia ġena vevaġa-namo mabarana maki vauro bita ġabiani veġata.

<sup>23</sup> Barau ma ribana mai kara akiraġirini tu mabarari moġoni, e au nuġagu o lorugu ġutuna maki ġia ma ribana; au mo Korinto ġana asi aiaġosito tauna korikori tu maiġa: Au asi aurato, ġomi ġemi vei-rakava banasi kiraġi-fofori forofori, benamo monana ġomi nuġami bana vaġa-metori. <sup>24</sup> Au tu dia ġomi ġemi vere, be ġomi ġemi

mani veġabidadama nuġanai tu ġai na kara baġa kiraġirini veiġari moġo boġono veiri. Asiġina. Mai tu ġomi ema ġai taġauvei-sebonani, ġomi boġono iaku tuġamaġi-nai. Korana ġomi mani tu tauġemi ġemi veġabidadamai lorinai ġoruġa-gigitarini.

**2** Moġesi naima nuġagu aroriato akirato, asi ma banasi raka-ġitami, korana bavaġa-guruġa gwaġiġimini, benamo nuġami beġe metoni garina. <sup>2</sup>Korana bema au ġegu guruġa na ġomi nuġami beġere vaġa-metori nai, au tu dei na ma beġere vaġa-iakugu? Korana au boġoro vaġa-iakugu tarimami tu varau nuġami bavaġa-metori. <sup>3</sup>Moġesi naima au na mo fefa gwaġiġina moġa atore-vinimito. Au asi aurato, au bana iaġosi tu, boġo vaġa-iakuguni tarimami na au boġono vaġa-nuġa midigumidigu, korana au ma ribagu au aiakuni gabunai tu ġomi maki au ġesi, be taiaku-sebonani. <sup>4</sup>Moġoni, au nuġagu tu ma metona ġesi ema ġegu vetuġamaġi maki ebarego-rakavato e ataġito maki, mo fefa ġomi ġemi atoreato-ġoi nai. Mo fefa gwaġiġina atore-vinimito tu dia ġomi nuġami bana vaġa-metori ġana. Asiġina. Au na mo fefa moġesina atore-vinimito anina tu, au aurato ġomi boġono riba, au na ġomi tu auravini-rakavamini.

### **Vei-rakava tarimana ġena rakava boġono tuġamaġi-fitoġaia**

<sup>5</sup>Bema ġomi ta na nuġa-midigumidigu evaġa-ġoraiiani nai, au mo gabu ai tu asi ġegu nuġameto. Aba, gabu tari tu asi aiaku-iaġirito, senaġi ġomi mabarami tu nuġameto barego evinimito, o sikira, ġomi ġutuma, korana au asi aurani, ġomi ġemi ai mo veiġa guruġana bana kiraġi-meto lelevaġia. <sup>6</sup>Ġomi ġutuma na mani tarima na mo veiġa eveiato voina metona baregona ġoviniato, ma mo tu ġenai ilaila be benamo, meto asi ma boġono vini-lelevaġia. <sup>7</sup>Ma toma tu ġena rakava boġono tuġamaġi-fitoġaia ema boġono launaġia kekei. Asi namo tuġamaġi midigumidiguna na mai tarima bevaġa-ketoani ġena veġabidadama ġenana. <sup>8</sup>Moġesina naima, au na ġomi anoġimini, mai tarima boġono kiravara-ginikaua, ġia tu moġoni ġoura-viniani. <sup>9</sup>Au na mo fefai atore-vinimito korana aurato, ġomi bana riba-ginikaumi, moġoni au na avaġa-ribamito dagarari mabarari ġokorana-iaġi korikoririni ba? <sup>10</sup>Bema ġomi na tarima ta ġena rakava ġotuġamaġi-fitoġaiani tu, au na mo tarima ġena vei-rakava maki atuġamaġi-fitoġaiani. Ma bema rakava ta au na atuġamaġiato, mo rakava tu Keriso ġoiranai au na varau atuġamaġi-fitoġaiano ġomi ġemi namo uranai. <sup>11</sup>Moġesi aveito anina tu, Satani na ġita beġofarani, benamo mo meto misina bevaġa-barego lelevaġiani garina. Korana Satani eġauveini dabarari ġita tu ma ribara.

### **Paulo ġena ura baregona Tito bene doġaria**

<sup>12</sup>Troas vanuġana ġana aiaġoto, Keriso Varina Namona bana vari-fiua ġana. Au Troas vanuġanai araġasito, benamo ariba-maoroto, Vereġauka na mo vanuġai Vari Namona bana fiua ġatama-bokana tu ġegu ekeoato. <sup>13</sup>Senaġi au nuġagu ai maino tu asi aġabiato-ġoi, nuġagu evekwarāġito-ġoi, korana au tariġu Tito Troas ai tu asi adoġariato. Moġesi naima Troas tarimari aġabi-tuġurito moġo, benamo Makedonia ġana ma aiaġoto.

### **Keriso ekokoreto lorinai ġita takokoreni**

<sup>14</sup>Barau atanikiu-viniani, korana vanaġivanāġi ġia na ġena seġuka kokorenai Iesu Keriso ġena maġuri nuġanai ġai eġori-kaumani. Benamo ġai ġemana Keriso varina tu noġamo muramura bonana namona na tanobara mabarana ġeġabiani, benamo

geribaiani. <sup>15</sup> Moġoni, Barau ġoiranai ġai tu Keriso varina bonana namona, Barau na rakava ġenana evaġa-maġuririto tarimari fakari na ema vei-rakava tarimari mase dabaranai ġerakani tarimari fakari ai. <sup>16</sup> Mase dabaranai ġerakani tarimari ġeri, ġai tu mase boraġari bonari, mase bevaġa-ġoraiani dagarana. A Barau na evaġa-maġuririto tarimari ġeri ai, ġai tu maġuri muramurana bonana namona, maġuri evaġa-ġoraiani dagarana. Senaġi dei na mai ġauvei baregona beveiani riba? <sup>17</sup> Ġai dia tarima tari kavana, be Barau ġena guruġa ġeġobata-iaġiani tu moni beġene doġari ġana; a ġai tu dia Barau ġena guruġa ġaġobata-iaġiani tu moni na beġene voima ġana. Asigina. Ġai tu Barau na etuġumato, mai ġauvei baġana veia etato. Ġai tu Keriso ġesi ġasebonato, ma Barau ġoiranai ġai tu nuġama maoro e moġoni ai Barau ġena guruġa ġakiraġiani.

### Taravatu e Iauka

**3** Ġai mai guruġa ġakiraġirini tu, ġai tauġema moġo ma ġavevaġa-raġe ġenoġoini, ġakirani, “Ġai tu moġoni vei-iobukaiobuka tarimama korikori,” ġatoni ba? Ba tarima kotari ġeveini kavana ġaurani tarimarima na ġema vevaġa-moġoni fefana ta ġomi ġemi beġene torea, beġene kira, “Ġai tu tarima namoma, be boġono ġabi-raġema.” O ġomi na ġai boġono ġabi-raġema uranai ġema vevaġa-moġoni fefana ta boġono torea ġatoni? <sup>2</sup> Ġomi maniġemi tu ġai ġema fefa, ġai vaġa-moġonima fefami, ġai lorumai Keriso na eberarito, ma tarimarima mabarari na ġeribamini ema ġeiavimini. <sup>3</sup> Ġomi ġemi maġuri na evaġa-fofori ginikauani, ġomi tu Keriso ġena fefa, ġai ġema ġauvei ġenana eberamini o etoremimi, (ma tarimarima na ġeiaviani). Ġomi tu Keriso ġena fefa, dia bairo na eberamito fefami, senaġi maġuri vanaġivanaġi Barauna Iaukana na eberamito fefami. Ma ġomi Keriso na tu dia fore lefalefari iatari ai ebera-kaumito, senaġi ġomi tu tarimarima loruri ai ebera-toġaiato.

<sup>4</sup> Ġai na maġeri guruġa ġakiraġirini, korana ġai tu Keriso ġenana ma ġema tuġa-maġikau Barau ġenai. (Korana ġia na evaġa-kavamani ġena ġauvei veiveinai). <sup>5</sup> Aba, ġai tauġema ġereġama na maġeri veiġa tu asi ilaila baġa veirini. Moġesi naima ġai na dagara ta ġavaġa-ġoraiato tu asi ġatoni. Asigina. Ġai tu Barau na ġereġana na moġo kokore ema riba ġai evinimani nai mai ġauvei ġaveirini. <sup>6</sup> Barau na kokore ema riba evinimani nai, ġia ġena kiraġitore o ginitaġo variġuna ġavarifiuani. Mo tu dia taravatu bukanai ġetorerito dagarari ġavari-fiurini, asiġina, ġai tu Iauka Veaġa na tarimarima ġeri maġuri ai kara eveiani ġavari-fiuani. Korana taravatu bukanai etorerito vevaġa-naġiri na tu tarima ġevaġi-maserini, bema asi ġekorana-iaġiani nai; senaġi Barau Iaukana na tu tarimarima maġuri evinirini.

### Barau ġena ginitaġo variġuna marevana baregona

<sup>7</sup> Ġoseġaġi, Mose na Barau ġena taravatu tu Isaraela tarimari evaġa-ribarito-ġoi, moġeri na tu mase maki ġevaġa-ġoraiato-ġoi. Mo taravatu moġeri tu Barau na fore iatanai eberarito, ma marevari mamari tu barego rakava. Moġeri taravatu Barau na fore ai eberarito dagarari Mose na eġabi-iaġomarito-ġoi nai, Mose tu ġoirana maki emamato-ġoi, be Isaraela tarimari Mose ġoiranai maki asi ġeboġekau-maukato-ġoi, korana mo mareva mamana na matari efai-fitoġarito-ġoi nai. Senaġina mo taravatu mamari marevana baregona moġa tu asikauna ma erekwarekwato-ġoi. <sup>8</sup> Bema taravatu mamana marevana baregona tu moġesi neganai, Barau Iaukana ġena ġauvei mamana marevana ema seġukana tu barego lelevaġi. <sup>9</sup> Bema mase maki evaġa-

goraiani g̃auveina mamana marevana tu barego, vei-iobukaiobuka evaḡa-g̃oraiani g̃auveina mamana marevana ema seḡukana tu barego lelevaḡi. <sup>10</sup> Toma taravatu mamana marevana baregona moḡa tu asi marevana, korana Barau Iaukana mamana marevana ema seḡukana tu barego lelevaḡi. <sup>11</sup> Ma bema Mose na mo asi betanumaukani taravatuna moḡa eḡabi-iaḡomaiato, mamana marevana tu barego nai tu, betanu-vanaḡi vanaḡini dabarana mamana marevana ema seḡukana tu barego lelevaḡi veḡata.

<sup>12</sup> Gai tu mai dabara variḡuna o ginitaḡo variḡuna ḡenai ḡavetuḡa-maḡikauni, naima asi ḡagarini, ma kokorema ḡesi ḡakiraḡiani. <sup>13</sup> Gai tu dia Mose kavana, be ḡoirama ḡakou-ḡaurini. Mose tu ḡoira kouḡau dabuḡana na ḡoirana ekou-ḡauato, korana Isaraela tarimari na ḡia ḡoirana na mo mama marevana erekwa-rekwatoḡoi moḡa asi beḡene ḡeḡitaia ḡana. <sup>14</sup> Senaḡi Isaraela tarimari nuḡari e ḡeri tuḡamaḡi Barau na evaḡa-mukunarito. Korana tu mo ḡaro na beiaḡoma mo maitoma, mo kouḡau dabuḡana ḡia nuḡari e ḡeri tuḡamaḡi evaḡa-mukunarito dabuḡana tu roḡo etanuni, be ginitaḡo guinena bukana ḡeiviani nai, asi ḡetuḡamaḡi-doḡariani. Mo ḡia nuḡari ema ḡeri tuḡamaḡi ekou-ḡaurini dabuḡana tu Keriso ḡesi beḡe sebonani vauro bevekeo-fakani. <sup>15</sup> Toma maki Mose ḡena taravatu guruḡari ḡeivirini nai, ḡia nuḡari tu kouḡau dabuḡana na ekou-ḡauani. <sup>16</sup> Senaḡi tarima ta betuḡamaḡi-kureni, benamo Vereḡauka ḡenai ma beiaḡoni tarimana ḡenana mo kouḡau dabuḡana tu bekokifitoḡaiiani. <sup>17</sup> Ma mai Vereḡauka tu Iauka Veaḡa ekiraḡiani. Be Vereḡauka Iaukana ainai eḡauveini gabuna, ḡeḡabi-raḡeani tarimari tu dagara ta na asi ebarubarurini. Asiḡina, ḡia tu fakai ḡetanuni. <sup>18</sup> Ma ḡita ḡoirara tu kouḡau dabuḡana na asi kouḡau, be Vereḡauka mamana e marevana baregona ḡita ḡerana veḡiana noḡa efororini, tarimarima na ḡeḡitaiani. Vereḡauka tu Iauka Veaḡa, ma ḡia ḡenai mo mama e marevana baregona eiaḡomani. Monana esenisirani Vereḡauka kavanai tiaiḡoni, ema ḡia mamana e marevana barego lelevaḡina ḡita maki evini-vanaḡi vanaḡirani.

### Iauka farefarena gwaḡutu nuḡanai

**4** Barau ḡena vevetuḡaḡwai moḡo mai ḡauvei ḡai evinimato. Moḡa lorinai ḡai tu asi ḡatuḡamaḡi-moirani mai ḡauvei veiveinai. <sup>2</sup> Gai tu maiaka veḡari vekuretoḡari, tarimarima na asi ḡeḡita-learini veḡari, tu ḡaiḡuirito. Ema ḡai tu asi ḡaḡo-faḡofani e Barau ḡena guruḡa anina maki ḡai na tu asi ḡakefoani. Asiḡina. Gai na Barau ḡena vari moḡonina tu tauna korikori moḡo ḡakiraḡi-fofori ginikauani. Monana tarimarima beḡene riba, ḡai tu ma moḡonima ḡesi Barau ḡena ḡauvei ḡaveiani ḡia ḡoiranai.

<sup>3</sup> Senaḡi bema ḡai na mai Vari Namona ḡavari-fiuani maiḡa vekuretoḡa nai tu, mai vari maiḡa tu mase koufanai ḡerakani tarimari moḡo ḡeri ai vekuretoḡa. <sup>4</sup> Maiḡeri tarima, Keriso asi ḡevaḡa-moḡoniani tarimari, tu mai tanobara barauna arana Satani na ḡeri tuḡamaḡi evei-mukunarito, naima mai Vari Namona mamana emamani tu asi ḡeḡitaiani. Mai Vari Namona mamana maiḡa tu Keriso mamana marevana baregona emamani. Ma mai Keriso maiḡa tu Barau vetoḡana korikori. <sup>5</sup> Gai tu dia ḡai tauḡema varima ḡafiurini. Asiḡina. Gai na tu Iesu Keriso ḡaḡobata-iaḡiani, ḡakirani, Keriso tu Vereḡauka korikori. Ma ḡai tu ḡomi ḡemi vetuḡunaḡi tarimamai ḡavevaḡa-iaḡoni Iesu ḡagubakauani lorinai. <sup>6</sup> Korana Barau tovotovonai ekirato, “Mukuna furufuru nuḡana na nemama-rovorovo,” etato. Ma mo Barau sebona na ḡai nuḡamai ema vaḡa-mama rovorovoato korana tu, Barau mamana baregona Iesu Keriso ḡoiranai

emamoto moġa bene vaġa-foforia, benamo baġana ribaia e baġana tuġamaġi-fakaia ġana.

<sup>7</sup> Senaġi mai farefare namo vedaureana tu ġai tauġanima nuġanai maiġea, mai tauġanima tu noġa tano na ġeveirini gwaġuturi, ma beġe korini, monana tarimarima mabarari na beġene ġitaia, ma beġene riba maki, mai seġuka barego lelevaġina ġai ġemai maiġa tu Barau ġenana eiaġomani, ma dia ġai ġemana. <sup>8</sup> Ġai tu reketa-reketa na ġeġaru-ġeġeraġimani, ġevaġa-midigu midigumani e meto maki barego ġevinimani, senaġi ġema kokore tu asi ekorini. Ġaro kotari tu ġadaradarani, asi ribama kara ma baġa veiani, korana maġuri tu gwaġiġi, senaġi ġema tuġamaġikau Barau ġenai tu asi emoirani veġata. <sup>9</sup> Tarimarima na asi ġeura-vinimani, ġevaġa-midigumidigu baregomani, senaġi Barau tu ġai sevisevimai moġo etanuni, asi eiaġumani; semo na ġekwari-ketomani, senaġi asi ġamaseni. <sup>10</sup> Iesu emaseto, mo mase moġa tu vanaġivanaġi ġai tauġanimai ġaġwarakao-rakaoani. Ġaribani, ġai maki, Iesu ġevaġi-maseato kavana, beġe vaġi-masemani. Moġesi eġorani korana tu, Iesu ġena maġuri maki vanaġivanaġi ġai tauġanima na bene fofori, be tarimarima na beġene ġitaia. <sup>11</sup> Ġai roġo maġuri ġatanuni apostoloma tu, vanaġivanaġi beġene vaġi-masema ġetoni, Iesu varina ġakiraġiani ġaramanai. Mai veiġa eġorani tauna korikori tu, Iesu ġena maġuri, (mo tu Iesu emaġuri-ġenoġoito mo maġuri moġa), seġukana ġai tauġanima na bene fofori, be tarimarima na beġene ġitaia ġana. <sup>12</sup> Moġesi naima mase ġena ġauvei tu ġai (apostolo) ġemai eveiani, senaġi maġuri tu ġomi ġemi maġuri nuġanai eġauveini.

<sup>13</sup> Buka Veaġai ekirani, “Au na Barau avaġa-moġoniato, moġesina naima aguruġato.” Ġai maki mo veġabidadama sebona moġa nuġanai naima ġakirani, Barau ġavaġa-moġoniani nai ġaguruġani. <sup>14</sup> Korana ġai ribama, Iesu Vereġauka mase na evaġa-variġisi ġenoġoiato Barauna na ġai maki ma bevaġa-variġisi ġenoġoimani Iesu kavana, benamo ġai ema ġomi, mabarara beġabi-iaġomarani ġia ġoiranai bea vaġaruġa-tarirani. <sup>15</sup> Ġai na midigumidigu e meto ġaġabirini tu, ġomi na namona boġono doġaria ġana, ema monana tarimarima ġutuma gorogoro na Barau ġena namo ema varevare-bara beġene doġaria. Benamo mai Barau ġena namo ema varevare-bara dainai, tarimarima ġutuma na Barau beġene tanikiu-vini-baregoa e ġia marevana e mamana baregona beġene vaġa-raġea.

### Veġabidadamai moġo bitana tanu

<sup>16</sup> Moġa lorinai ġai tu asi kota maki ġatuġamaġi-moirani. Aba, tauġanima tu eġaukani, bemoira-iaġoni, senaġi iaukama tu ġaro loriri ai evaġa-variġurini. <sup>17</sup> Ema maiġeri midigumidigu e meto misiri asikauna na beġe raga-korini dagarari voiri beġe foforini tu barego lelevaġi. Barau na maiġeri voiri tu marevana barego lelevaġina, betanu-vanaġi vanaġini dagarana, bevinimani. <sup>18</sup> Moġesi naima ġai matama na tu dia toma ġeġorani matara na taġitarini dagarari ġaġita-karakararini. Asiġina. Ġai matama na tu, toma matara na asi taġitarini dagarari, ġaġita-karakararini. Korana toma matara na taġitarini dagarari tu asikauna ma beġe korini, senaġi kara toma asi taġitaiani dagarana tu betanu-vanaġi vanaġini, asi bekorini dagarana.

### Guba tauġanina e mai tanobarai tatanuni tauġanina

**5** Ġai ribama, mai tanobarai ġatanu-iaġiani foutana o tauġanina berakavani mase ai nai, gubai asi ġima veiveina numana ta Barau ġenana baġa ġabiani, tanu-

vanaġivanaġi numana. <sup>2</sup>Mai tanobara tauġani numanai ġatanuni tu ġataġitaġini ġaġabaġabani, korana midigumidigu e meto barego ġaġoitaġoni dainai. Be ġai ġema ura baregona tu, Barau na guba na beiaġomani tauġanina na nevaġa-dabuġama. <sup>3</sup>Korana guba tauġanina na bedabuġa-ġaumani tarimarima kavana nai, ġai tu dia iauka moġo baġa rakao-rakaoni ġia ġoiranai gubai, senaġi ġai iaukama tu kouġau initiba kavana. <sup>4</sup>Korana ġai roġo mai tanobara tauġanina numanai ġatanuni tu, ġaġabaġabani e meto barego ġevinimani. Maġa tauna tu, asi ġaurani mai tanobara tauġanina maġa ġakoki-vaġia o ġamase ġatoni. Asiġina. Ġai ġema ura tu Barau na guba tauġanina numana variġuna na bene vaġa-dabuġa-ġauma, be maġuri tauġanina na ma beġe maseni tauġanima moġo gabuna bere borogia ġatoni. <sup>5</sup>Barau tauġena na ġita tu mai maġuri variġuna maġa bitana ġabia ġana erovina-torerato. Moġesi naima ġia na Iauka Veaġa tu evini-guinerato. Barau na mai Iauka Veaġa evini-guinerato anina tu, ġita bitana riba-ġinikau, tauġani variġuri maki bevinirani.

<sup>6</sup>Moġesi naima vanaġivanaġi ġai nuġama tu gwaġiġi, asi ġatuġamaġi-iauvoiauvoni. Ma ġai ribama, mai tanobara tauġanina numanai roġo ġatanuni nai tu, ġai Vereġauka ġesi vanuġa korikori gubai tu asi ġatanu-vegogoni. <sup>7</sup>Ġai veġabidadamai moġo ġatanuni, dia matama na ġaġitarini dagarari na ġeġorikaumani. <sup>8</sup>Au mo bakira kavana, ġai tu asi ġagarini, ma tuġamaġikauma ġesi ġaurani, mai tauġani ġenana baġana veġita, benamo Vereġauka ġesi baġana tanu, Vereġauka etanuni vanuġanai. <sup>9</sup>Moġesi naima ġai ġema ura barego sebona moġo ġoiramai ġatoreani tu, ġia iauna moġo baġana vaġa-namoa. Mo tu mai tanobara tauġanina nuġanai baġa tanuni, o mai tanobara tauġanina numana na baġa raka-vaġini, benamo Vereġauka ġesi gubai baġa tanuni, ġai ġema ura tu, ġia iauna moġo baġana vaġa-namoa. <sup>10</sup>Korana ġita mabarara Keriso ġena Kota seana ġoiranai tu bita ruġa-rosini veġata. Monai ġita mabarara tata mai tanobara tauġaninai tatanuni nai, veġa namori o rakavari taveirini, maġeri voiri ilailari bita ġabirini.

### **Keriso na Barau ġatanai evaġa-iaġorato**

<sup>11</sup>Ġai ma ribama, Vereġauka tu ma garina, korana tu ġoiranai bita ruġa-tarini. Moġesi naima ġai na tarimarima ġasisiba-vinirini, beġene tuġamaġi-vekefo ġana. Ġai nuġama e ġema tuġamaġi kaması tu Barau ma ribana ġinikau, ema au atuġamaġini, ġomi maki ġai nuġami ai ġoribamani. <sup>12</sup>Maġesi ġaguruġani tu, dia ġai tauġema ġomi ġoirami ai ġakirani, ġai tu moġoni vei-iobukaiobuka tarimama korikori. Asiġina. Maġeri guruġa ġakira-varamini tauna korikori tu, ġai boġono veiavi-iaġima, be tanobara iaunegari e ribari ġevokokoroku-iaġirini tarimari boġono vaġaveseri ġana. Maniġeri tarimarima tu matari na ġeġitarini dagarari ġevokokoroku-iaġirini, a tarimarima nuġari ai ġetanuni dagarari tu asi ġeġitarini. <sup>13</sup>Bema ġai tu ġababo-rakaoni ġotoni nai, mo tu Barau ġena ġauvei ġaveiani dainai; o bema ġema tuġamaġi maoro nai, mo tu ġomi namo boġono ġabia ġana.

<sup>14</sup>Ġai tu Keriso ġena veuravini na elaunaġi-naġimani, ema ġai moġoni ġaribaginikauni, Keriso tu tarimarima mabarara ġera vei-rakava dainai emaseto. Moġesi naima, tarimarima mabarara maki ġia ġena mase ai tamase-vegogoto. <sup>15</sup>Keriso tu ġita tarimarima mabarara ġera vei-rakava lorinai emaseto naima, ġita initiba tamaġuri-tanuni tarimara mabarara tu, dia ġita tata tauġera ġera ura loriri ai moġo bitana tanu. Asiġina. Ġita mabarara tu Keriso ġenai moġo bisini tanu, korana tu ġia ġita urarai emaseto, ma Barau na mase na ma evaġa-variġisi ġenoġoiato.

<sup>16</sup> Moġesina naima ġai na maitoma tarimarima tu dia tauġanina rekenai ġena maġuri ġaġitaiani. Aba, tovtovonai tu Keriso maki tauġanina rekenai ġatuġamaġiato-ġoi, senaġi toma moġesi tu asi ġatuġamaġiani. <sup>17</sup> Moġesi naima bema tarima ta Keriso ġena maġuri nuġanai etanuni, mo tarima tu tarimarima variġu geragerana. Mo maġuri guinena etanu-iaġiato-ġoi moġa tu ekorito, ġia tu maġuri variġu geragerana eġabiato, ma mai maġuri variġunai etanuni. <sup>18</sup> Maiġeri dagara mabarari tu Barau na ġita ġera evinirani. Barau tavetari-viniato-ġoi, senaġi Keriso ġena mase ġenana ġia na ma eġabiraġe-ġenoġoirani. Ema ġai maki Barau na mai ġauvei evinimato, mo tu tarimarima baġana kira-varari, Barau na maino ġabiġabina dabarana tu varau eveiato, be ġia ema Barau maino beġe ġabiani riba. <sup>19</sup> Mai guruġa anina tu: Barau na Keriso tanobara ġana etuġu-iaġomaiato, benamo ema maseto. Keriso ġena mase ġenana Barau tu tanobara tarimari mabarari ġesi maino ġeġabiato: Tarimarima ġeri rakava asi ma etuġamaġi-taġorini, senaġi etuġamaġi-fittoġarini. Barau na mai ġauvei ġai evinimato, maino guruġana maiġa baġana ġobata-iaġia.

<sup>20</sup> Moġesi naima ġai tu Keriso ġaruġa-boroġiani mai tanobarai. Ma Keriso ġena vari ġavari-fiuani nai tu, noġa Barau tauġena ġai ġemana tarimarima eura-maġirini, ġia ġesi maino beġene ġabia. Ġai na Keriso aranai ġomi ġanoġimini, “Barau ġesi maino boġono ġabia.” <sup>21</sup> Korana Keriso tu enabe asi ġena rakava, senaġi ġita ġera vei-rakava lorinai, Barau na ġia noġa moġo vei-rakava tarimanai evaġa-iaġoato. Barau na mo veiġa eveiato korana tu, Keriso ġesi bita sebonani ġenana, ġita mabarabarara tu vei-iobukaiobuka tarimari ai bitana iaġo ġana Barau ġoiranai.

**6** Ġai tu Barau ġesi ġaġauvei-vegogoni, moġesina naima ġalaunaġimini, Barau ġena namo e varevare baregona ġoġabi-raġeato maniġa tu boġono ġabi-gigitaria, asi boġono vaġa-rakavaia. <sup>2</sup> Korana Barau tu maiġesi ekirani ġena bukai, “Au na baiiau-namomini ma baġabi-raġemini ġarona beġabiani nai tu, ġemi noġinoġi baġabi-raġerini, ema vevaġa-maġuri ġaronai tu, au na bavaġa-kavamini.”

Au na avaġa-guruġamini, maitoma ġarona tu Barau na tarimarima beiau-namorini ema beġabi-raġerini. Ma maitoma ġarona tu Barau na tarimarima bevaġa-maġuririni ġarona!

<sup>3</sup> Ġai tu asi ġaurani, tarima ta na ġai ġema ġauvei nuġanai kerere ta bene ġoitaġoa ma beġene vaġa-daġama, moġa lorinai ġai na tarima ta vaġa-vedaġa-raġena veiġana ta asi ġaveiani. <sup>4</sup> Moġesi naima ġema veiġa e guruġa mabarari ai ġavevaġa-foforini, ġai tu moġoni Barau ġena vetuġunaġi-iaġovininna tarimama. Meto nuġari ai ġavevaġa-gwaġiġini; tarimarima na ġevaġa-midigu midigumani; ġema ġauvei nuġanai maġuri gwaġiġiri ġadoġaririni; tarimarima na ġevaġa-dabara dokomani; <sup>5</sup> ġekwarimani, ġediburamani, ġutuma-bara na ġeġaru-ġeġeraġimani ġefarara-farara vinimani; ġauvei ai ġavekwaraġi-rakavani, asi ġagenani, asi ġaġaniġanini. <sup>6</sup> Ġema maġuri e veiġa tarimarima e Barau ġoirari ai ġenamo-vedaureani; Barau ġena maġuri e ġena vari ġaribaiani; maġuri metori ġaġoitaġorini, senaġi ġatuġamaġi-gwaġiġini; ġevaġa-rakavamani tarimari asi ġabaru-vinirini, senaġi ġaiiau-namorini; Iauka Vevaġa na evaġa-kavamani dabara mabarari ai, ma nuġama mabarari ġesi tarimarima ġaura-vinirini. <sup>7</sup> Barau ġena guruġa moġonina moġo ġaġobata-iaġiani Barau ġena seġukai; vei-iobukaiobuka farefareri tu ġimama aroribamai ema ġimama kau-rimai ġerina ġavetarini.

<sup>8</sup> Ĝai tu ĝaruĝa-gwaĝiĝini, tarimarima na ĝevaĝa-raĝemani o ĝevaĝa-rakavamani nuĝari ai, varima ĝevaĝa-rakavarini o ĝevaĝa-namorini nuĝari ai; ĝekiramani, ĝai na tarimarima ĝaĝofa-taĝui-taĝuirini ĝetoni, senaĝi ĝai tu guruĝa moĝoniri moĝo ĝakiraĝirini. <sup>9</sup> Ĝekirani, ĝia tu asi ribari ĝai ĝetoni, senaĝi ĝai tu ĝeĝita-leamani, ĝia ma ribari ginikau ĝai tu dei. Ĝevaĝimani, be ĝamaseni, senaĝi roĝo ma ĝamaĝurini. Ĝebotamani, senaĝi asi ĝamaseni. <sup>10</sup> Ĝevaĝa-nuĝa midigu-midigumani, senaĝi vanaĝi-vanaĝi ĝaiakuni ĝavererani. Asi ĝema asi ĝama, senaĝi tarimarima vovoka ĝavaĝa-taĝarini. Dagara ta asi ĝaĝwa-tanuani, senaĝi Barau na ĝena tarimarima evinirito dagarari mabarari tu ĝai ĝema.

<sup>11</sup> Korinto tarimami, ĝai ĝomi ĝemi ai tu ĝaguruĝa-fiu-iaĝoni moĝo, asi ĝagarini, ema nuĝama maki ĝakeorini, ĝaura-vinimini nai. <sup>12</sup> Ĝai na ĝomi tu ĝaura-vinimini, senaĝi ĝomi na neĝi ĝai asi ĝoura-vinimani. <sup>13</sup> Au na ĝomi tu natugu kavana avaĝa-guruĝamini: Ĝomi nuĝami asi boĝono kouri, nuĝami boĝono keori, be ĝai na ĝomi ĝaura-vinimini kavana, ĝomi na maki ĝai moĝesi boĝono ura-vinima.

### **Keriso asi ĝevaĝa-moĝoniani tarimari ĝesi asi boĝono vekako**

<sup>14</sup> Keriso asi ĝevaĝa-moĝoniani tarimari ĝesi asiĝina ĝinavaĝi boĝono veĝata e asi boĝono vekako. Korana kamara dabarai vei-iobukaiobuka e vei-rakava veiĝari beĝe veĝatani ema beĝe sebonani, ei? Asi ilaila! Ema kamara dabarai mama ema mukuna furufuru beĝe veĝatani ema beĝe sebonani, ei? Asi ilaila! <sup>15</sup> Keriso ema Satani tu kamara dabarai beĝe nuĝa-sebonani, ei? Ema veĝabidadama tarimana ema asi eveĝabidadamani tarimana tu kamara dabarai ĝia tauri ruarua ĝeri tuĝa-maĝi beĝe sebonani? <sup>16</sup> O Barau ĝena Rubu Veaĝa e babarau ĝeri rubu tu kamara dabarai Rubu Veaĝa sebonai moĝo beĝe iaĝoni, ma Barau sebona moĝo beĝe toma-rakariĝoani? Ĝita mabarara tu Barau ĝena Rubu Veaĝa. Ma Barau ekirato,

“Au tu ĝia nuĝari ai batanuni,  
ma ĝia vekaravari ai barakaorakaoni.  
Au tu ĝia ĝeri Barau ai baiaĝoni,  
ma ĝia tu au ĝegu tarimari ai beĝe iaĝoni.”

<sup>17</sup> Moĝa lorinai Vereĝauka ma ekirato,

“Vei-rakava tarimari  
vekaravari na ĝoma-rakarosi,  
ma ĝia sevirni na ĝoraka-veĝita.  
Asi iareva dagarari asi boĝono ĝabi-karari,  
moĝesi tu baĝabi-raĝemini.”

<sup>18</sup> Iaru-korokoro Vereĝaukana tu maiĝesi ekirani,

“Au tu ĝomi Tamami ai baiaĝoni,  
ma ĝomi tu au natugu taumi  
ema vavinemi ai bavaĝa-iaĝomini.”

**7** Ĝatagu mabarami, ĝoseĝaĝi, Barau na mai guruĝatore maiĝeri tu ĝita ĝera ekiraĝirito. Moĝa lorinai tauĝanira ema iaukara ĝevaĝa-rakavarini dagarari mabarari ĝita ĝerana si-iareva-fitoĝari. Be Barau ĝenai ma vegubakaura ĝesi tata-nuni nuĝanai, ĝera maĝuri tu namo ema veaĝa korikori.



**Paulo ġena iaku tu asikei, korana Korinto tarimari ġevetuġamaġi-kureto**

<sup>2</sup> Nuġami ai ġai ġema faka kota boġono veia. Ġai tu tarima ta ġenai veiġa rakavana ta asi ġaveiato. Ġai na tarima ta ġena maġuri asi ġavaġa-rakavaiato. Ġai na tarima ta ġofaġofa dabaranai ġena dagara ta asi ġaġabiato. <sup>3</sup> Au maiġesi akirani tu, dia ġomi ġemi ai meto atore-kauani. Asiġina. Au varau baguruġa-guine, ġomi tu ġai loruma ġuturi ai ġotanuni, ġauravini-rakavamini. Be ġomi ġesi bita tanuni o bita maseni, ġai ġema veuravini ġomi ġemi ai tu asi bedokoni, roġo betanuni. <sup>4</sup> Au ġegu tuġamaġikau tu barego lelevaġi etanuni ġomi ġemi ai, korana ġemi veġabidadamai ġoruġa-gwaġiġini. Moġesi naima au na ġomi avaġa-veiavimini tarimarima ġoirari ai, ma au maki ġolaunaġi-baregoguni. Meto baregori ġaġoitaġorini mabarari nuġari ai maki, au ġegu iaku tu roġo etanuni, asi kota edokoni o ekeini.

<sup>5</sup> Makedonia tanobaranai ġaraka-toġato nai, ġai tauġanima tu asi kota maki ġeiaġaraġito meto e midigumidigu ġerina. Gabu mabarari ġana ġaiaġoto-ġoi tu, meto e midigumidigu ġaġoitaġoto-ġoi, tarimarima na ġevaġa-veġare veġaremato-ġoi e ġekoumato-ġoi. Ema nuġama ġeraġeto-ġoi. <sup>6</sup> Senaġina Barau na tu meto e midigumidigu na nuġari ġevaġa-moirarini tarimari evaġa-kavarini. Ġia na nuġama evaġa-gwaġiġirito, Tito etuġu-iaġomaiato nai. <sup>7</sup> Ma ġai tu dia ġia eiaġomato nai moġo, nuġama ġegwaġiġito. Senaġi ġomi na aiġesi ġovaġa-kavaiato moġeri variri ġema ema kiraġito, moġeri na maki ġelaunaġi-baregomato. Evaġa-ribaguto, ġomi ġemi ura baregona au boġonoasi ġitagau. Ema ġemi nuġa-midigumidigu e au ġouraviniġuni e ġourani au gogobagu boġono raga, ema au ġegu guruġa ġokorana-iaġirini variri mabarari ema kiraġirito. Moġa lorinai au ġegu iaku ebarego-lelevaġito.

<sup>8</sup> Ribagu, au na fefa atore-iaġoato, monana evaġa-nuġa midigumidigu-mito, senaġi au tu asi adaradarato. Aba, tovtovonai tu adaradarato, korana ariba-maoroto, au na fefa na nuġami evaġa-meteorito, senaġi mo tu ġemi nuġameto tu asi etanumaukato. <sup>9</sup> Ma inította au tu averereni, dia ġomi nuġami avaġa-meteorito nai, senaġi mo ġemi nuġa-midigumidigu ġenana ġovetuġamaġi-kureto, benamo Barau ġenai ġoġenoġoito. Ġai na ġomi ġemi ai rakava metona ta asi ġaveiato, senaġi Barau ġena ura veġata ġomi boġono nuġa-midigumidigu, korana ġemi veiġa ġekerereto nai. <sup>10</sup> Barau ġenana eiaġomani nuġa-midigumidiguna tu asi tuġamaġi vevaġa-ġwana. Korana tu mo nuġa-midigumidigu ema vetuġamaġina tu vetuġamaġi-kure evaġa-ġoraiani. Mai dabarai vetuġamaġi-kure eġorani vau Barau na tarimarima evaġamaġuririni. A mai tanobara maġurina ġenana eiaġomani nuġa-midigumidigu e vetuġamaġina na tu mase evaġa-ġoraiani. <sup>11</sup> Mai Barau ġenana eiaġomani nuġa-midigumidigu e vetuġamaġina na kara ġomi ġemi ai bevaġa-ġorari ġotuġamaġi-ġinikaua. Maniġa ġenana ġomi toma ġemi tuġamaġi beġe maoro, ma ġoura-rakavani veiġa namori moġo fakami ai boġono veiri. Ema ġemi ura baregona tauġemi boġono veiareva-faka meto tari ġerina. Ma mo kerere eveito tarimana ġenai asi ġoiakuto, ma au garigu ġoveito, ma ġemi ura baregona ġemi ai ma bana iaġosi, ma ġemi ura baregona maki mo kerere eveito tarimana ġena maġuri bene maoro veġata, ma ġemi ura ġia tu ġena veiġa rakavana voina metona bene ġabia veġata. Ġomi na maiġeri veiġa mabarari ġoveirini ġerina ġovevaġa-moġonini, ġomi tu mo veiġa rakavana ġenana boġo veġabi-vaġi, ma asi ġemi kerere ta.

<sup>12</sup> Au na mo fefa ġomi ġemi atoreato-ġoi nuġanai tu, dia mo kerere eveito tarimana ġena maġuri totomaorona tuġamaġina aveito-ġoi, o mai tarima na nuġari evaġa-

meteorito tarimari atuġamaġirito-ġoi. Asiġina. Au na mo fefa atore-iaġosiatu anina tu, Barau ġoiranai ġomi tauġemi boġono riba-maoro, ġomi na ġai tu moġoni nuġami mabarari ġesi ġai ġoġabi-raġemani e ġogubakaumani. <sup>13</sup> Ġai tu ġomi ġemi veiġa mai bakiraġiri veiġari na ġelaunaġi-baregomani.

Senaġi mo ġemi veiġa na ġelaunaġimato, ma kokore barego ġaġabiato-ġoi, moġa iakunai tu ma ġaiaku-rakavato maia, korana Tito ekirato, maninai ġomi na ġia tu ġoġabiraġe-ginikauato, ema nuġana egenagena-tarito. <sup>14</sup> Au na ġomi ġia ġoiranai tu аваġa-veiavimito, ma tauġemi ġemi veiġa na ġovevaġa-foforito ġoiranai, be eġita-mito, moġesi naima aiakuni, korana asi ġovaġa-maiakaguto. Ema mo ġemi veiġa na ġovevaġa-foforito, ġai na Tito ġoiranai ġomi ġavaġa-veiavimito guruġari tu moġoni veġata, asi ġofaġofa. <sup>15</sup> Ma Tito na ġomi ġemi seġaġi etuġamaġirini, ema ġomi na ġia ma nuġa-raġemi e nuġa-ġoġoġoġomi ġesi ġoġabi-raġeato, moġeri ma etuġamaġi-iaġosirini nai, ġia ġena veuravini ġomi ġemi ai tu ebarego-lelevaġini moġo. <sup>16</sup> Au tu averereni, korana moġoni ama ribani asi adaradarani, ġomi na tu veiġa namori ema iobukaiobukari moġo ġoveirini bene.

### Ekalesia na moni ġevaġa-vegogorito Ierusalemia ekalesiari ġeri

**8** Tarikaka mabarami, maitoma ġai ġema ura tu, Barau ġena namo e varevare-bara Makedonia ai ekalesia doġorori iatari ai etoreato boġono ribaia. <sup>2</sup> Ġia ġeri ai tu meto e midigumidigu barego eraġasito, senaġi ġia nuġari tu iaku e verere na ġevonuvonu-raġeto. Ġia tu moġoni ogoġami, asi ġeri-ġari, senaġi ġia ġeri varevare tu barego rakava ġeveiato. <sup>3</sup> Au na ġomi ġemi ai akiraġi-fofori korikoriani, ġia ġeri ġoitaġo tu kei, a ġeri vini tu barego-rakava tarikakari tari vaġa-kavari ai; ma ġia ġeri ai doġari-doġariri maki gwaġiġi, a farefareri e moniri maki benamo ġevini-fitoġarito moġo. Ma mo veiġa tauġeri ġeri urai moġo ġeveiato. <sup>4</sup> Ġia tauġeri na ġeri-ġari na ġai ġenoġi-ginikaumato, ġeurato, ġia maki ġai beġene ruġa-karoma, be mai ġauvei mainai tarima veaġari beġene vaġa-kavari. <sup>5</sup> Ġai ġema tuġamaġi, ġia ġeri varevare monina tu misina moġo beġe vinini. Senaġi ġia ġeri vini ġaġitaiato tu barego vedaurea, ġai na kara tovtovonai ġatuġamaġiato, moġa maki ġevanaġiato. Ġia tovtovonai tu tauġeri roġo Vereġauka ġenai ġevevinito, ma moġa murinai tu Barau ġena ura ġekorana-iaġiato, be ġai ġemai maki tauġeri ġevevinito.

<sup>6</sup> Moġesina naima ġai na Tito ġanoġiato, ġakirato, ġomi ġemi veuravini varevarena moniri egororito kwari, moġeri tu tauġena na bene gogo-vaġiri. Korana tovtovonai maninai moni-gogo ġauveina tu ġia na esinaiato. <sup>7</sup> Ġomi Korinto ekalesiana dagara mabarari ai ġomi tu moġoni ġoiaruto: Ġemi veġabidadama e ġemi guruġai, ġemi riba iauka maġurinai, ġemi ura barego lelevaġina Barau ġena ġauvei nuġanai boġono vevaġa-kava, ema ġemi veuravini ġai ġemai tu barego lelevaġi. Ġai ġema velaunaġi ġomi ġemi ai tu, mai veuravini varevareri vini maki boġono vaġa-baregoa.

<sup>8</sup> Mai veuravini varevareri boġono vini atoni maiġa tu, dia akirani, boġono veia veġata atoni. Senaġi maiġesi akiramini tauna tu maiġa: Tarikaka kotari tu ġeiaġo-ginikauni karori tari vaġa-kavari ai. Moġesi naima au na ġomi atovo-naġimini, ġomi ġemi veuravini tarikaka tari ġeri ai tu aiġesina naribaia atoni. <sup>9</sup> Ġita ġera Vereġauka Iesu Keriso ġena namo e varevare-bara ġomi tu ma ribami. Ġia tu taġa verena, senaġi ġomi urami ai asi ġena farefare tarimanai ema vevaġa-iaġoto. Iesu asi ġena farefare ai ema iaġoto anina tu, ġomi farefare vovoka tarimami ai boġono iaġo ġana.

<sup>10</sup> Ĝemi vini au na maki ĝomi na boĝono doĝaria ĝana, au ĝegu vevaĝa-gwada guruĝana tu maiĝa: Ĝoraĝani laĝaninai ĝomi na tu dia moni vaĝa-vegogo moĝo ĝosinaiato, senaĝi ĝomi tu ĝourato, mai veĝa maki boĝono veia veĝata. <sup>11</sup> Moĝesi naima ĝosinaiato ĝauveina boĝono vaĝa-kori ginikaua. Moĝesina tu mai boĝono veia veĝata ĝotato ĝauveina tu boĝo vaĝa-kori ginikauani, monana bevaĝa-moĝoni korikoriani. Boĝo vinini nai tu, ĝemi ai kara maniĝeri ilailari ai moĝo boĝono vini. <sup>12</sup> Bema nuĝami mabarari ĝesi ĝemi ai kara ĝetanuni maniĝeri ilailari ai boĝo vinini dagarari tu, Barau na beiaku-iaĝirini e beĝabi-raĝerini. A ĝemi ai asi ĝetanuni dagarari asi boĝo vinini, moĝeri Barau na tu asi benuĝameto-iaĝirini, ema ĝomi maki asi bebaru-vinimini. <sup>13</sup> Ĝai asi ĝaurani, tari ĝovaĝa-kavari uranai, ĝomi tauĝemi iatami ai meto baregona boĝono tore-kaua, asi ĝemi-ĝami ai boĝono vevaĝa-iaĝo. Asiĝina. Ĝai ĝaurani tu, ĝomi ema ĝovaĝa-kavarini tarimari boĝono ilaila moni e farefare rekenai ĝatoni. <sup>14</sup> Mai taimi ai tu ĝomi na ĝia ĝeri ura dagarari boĝo vinirini, korana ĝomi ĝemi-ĝami tu vovoka tabutabu. Be ĝomi na ĝia ĝeri rabu ai ĝovinirini kavana, ĝomi ĝemi rabu ai maki ma beĝe vinimini. Mo dabarai ta asi berabuni. <sup>15</sup> Buka Veaĝai ekirani kavana, “Ĝutuma egogo-vegogoto tarimana ĝana tu dia eĝutuma-lelevaĝito, ma kotuna moĝo egogo-vegogoato tarimana ĝana tu dia misina korokoro, senaĝi taunai.”

### Paulo na Tito Korinto ĝana etuĝuato

<sup>16</sup> Au na Barau atanikiu-viniani, korana tu au ĝegu nuĝa-vekvaraĝi ĝomi ĝemi ai etanuni, mai nuĝa-vekvaraĝi sebona maiĝa tu Barau na Tito nuĝanai maki etoreato. <sup>17</sup> Korana ĝia tu dia ĝai na ĝanoĝiato dainai moĝo easi raka-ĝitamini. Asiĝina. Ĝia tauĝena maki nuĝana mabarabarana eura-rakavani veĝata bene iaĝosi, ĝomi bene raka-ĝitami. <sup>18</sup> Ĝai tarikakama ta maki Tito ĝesi ĝatuĝu-iaĝosiani. Mai tarikaka maiĝa tu ekalesia doĝorori mabarari na ĝavaĝa-raĝeani, korana ĝia na Vari Namona eĝobata-iaĝiani ma nuĝana mabarana ĝesi. <sup>19</sup> Ema mai tarikaka maiĝa tu ekalesia doĝorori mabarari na ĝeĝabi-viriĝiato, ĝai bene kavama mai varevare moniri baĝa ĝwa-iaĝorini nai ĝetato. Mai ĝauvei ĝaveiani korana tu, tarimarima mabarari na Vereĝauka beĝene vaĝa-raĝe baregoa ĝana, ema ĝai ĝaurani tarimarima baĝana vaĝa-kavari ĝatoni maĝurina baĝana vaĝa-foforia ĝana. <sup>20</sup> Ĝai asi ĝaurani, tarima na ĝai beĝene rori-torema ma beĝene vaĝa-rakavama. Moĝesina naima mai veuravini ai ĝevinito monina maiĝa tu dabara namonai ĝaĝauvei-iaĝiani. <sup>21</sup> Korana ĝai ĝema ura baregona tu, veĝa roroĝotona baĝana veia, dia Barau ĝoiranai moĝo, senaĝi tarimarima maki ĝoirari ai.

<sup>22</sup> Ma ĝita tarikakara ta maki ĝia ĝesi ĝatuĝu-iaĝosiani, ĝia bekavarini. Mai tarikaka maiĝa tu ĝai na ĝaĝitaiani, ĝia tu moĝoni eura-baregoni, Barau vetuĝunaĝina bene iaĝo-vini etoni. Ema ĝia tu moĝoni ma ĝena vetuĝamaĝikau ĝomi ĝemi ai maki. <sup>23</sup> Tito maniĝa maki apostolo au kavana, ma ĝai tauma ruarua tu ĝomi vekaravami ai ĝaĝauvei-vegogoni. A mani ĝita tarikakara ruarua maniĝeri tu ekalesia doĝorori tata arari ai beĝe iaĝosi, ma ĝia tauri ruarua tu ĝeri ĝauvei ema veĝai Keriso ĝevaĝa-raĝe baregoani. <sup>24</sup> Moĝesina naima, ĝemi veuravini vetoĝana korikori ema ĝai na ĝomi ĝavaĝa-raĝemini tauna korikori, ĝia ĝoirari ai boĝono vaĝa-fofori korikoria, be ekalesia doĝorori mabarari na beĝene ĝitaia ema beĝene vaĝa-moĝonimi.

**9** Au na aḡitaiani tu, asi korana ta moḡo ḡomi na Barau ḡena tarima veaḡari moni ḡovarevare-vinirini guruḡari au na ma bakiraḡirini. <sup>2</sup> Korana ḡomi ḡemi ura boḡono vaḡa-kavari veḡata ḡotato moḡa tu ribagu, be moḡa tu Makedonia tarimari ḡoirari ai maki ḡomi aveiavi-iaḡimito. Au na ḡia avaḡa-guruḡarito, akirato, ḡomi Akaia ai ḡotanuni tarimami tu, ḡoraḡani laḡanina na veḡata beiaḡoma mo toma ḡorovina-toreto boḡono vini ḡana. Ma ḡomi na tarimarima boḡono vaḡa-kavari nuḡa-vekwaragaḡina ḡoveini guruḡana mani ḡeseḡaḡiatio, benamo Makedonia tarimari kotari maki ḡeura-dikadikato, ḡia maki beḡene vevaḡa-kava veḡata ḡetato. <sup>3</sup> A au na mai tarikakara maiḡeri atuḡu-iaḡosirini tauna korikori tu, beḡene riba, ḡai na ḡavaḡa-veiavimini guruḡari tu dia guruḡa koriri moḡo. Be au aurani, ḡomi ḡemi varevare moniri tu boḡono gogo-toreri vauro boḡono venari-taḡo, au na ḡia akiravararito ilailanai. <sup>4</sup> Asi namo Makedonia tarimari kotari au ḡesi beḡe rakakauni, benamo ḡomi beḡe ḡitamini tu, dia ḡai na ḡaveiavi-iaḡimini gabunai beḡe ḡoitaḡomini, ḡomi ḡemi varevare moniri tu asi gogotore. Ḳomi tu asi bakiraḡimi, senaḡi ḡai tu beḡe maiaka-korukorumani, korana ḡai ḡomi ḡemi ai tu ḡatuḡamaḡi-dadamaḡi-baregoni nai. <sup>5</sup> Moḡesina naima au batuḡamaḡi, mai tarikakara maiḡeri namona tu nanoḡiri, be beḡene iaḡosi-guine; be ḡomi ḡemi veuravini varevarena moniri, mo ḡokiraḡi-torerito moniri tu beḡene kirami, ma boḡono tore-vegogo guineri vauro, ḡai boḡono nari-taḡoma. Benamo ḡai baḡana votu nai, ḡemi veuravini varevarena moniri tu toretaḡo. Monana bevaḡa-foforiani ḡomi ma ḡemi veuravini ḡesi ḡia ḡeri ḡovinini, a dia nuḡami asi iakuri ḡesi ḡovarevareni.

### Vovoka bevaroni tarimana

<sup>6</sup> Mai guruḡa akiraḡiani maiḡa tu boḡono tuḡamaḡi-taḡoa: Ḳaniḡani ḡueri asi vovoka bevaroni tarimana tu, kwakwai maki ḡaniḡani asi vovoka bedoḡarini. A ḡaniḡani ḡueri ḡutuma gorogoro bevaroni tarimana tu, kwakwai maki ḡaniḡani ḡutuma lelevaḡi bedoḡarini. <sup>7</sup> Tarima ta nuḡanai evaḡa-moḡoniani ilailanai bene vini. A dia nuḡana ma daradarana ḡesi bene vini, o dia tarimarima ḡekirani beḡene tore veḡata ḡetoni naima beḡene vini. Korana nuḡana faka ema ma iakuna ḡesi evinini tarimana tu Barau na eura-viniani. <sup>8</sup> Ma Barau ḡena namo e varevare-bara lelevaḡina ḡomi iatami ai betorerini. Benamo monana ḡaro mabarari ai ḡemi ura dagarari mabarabarari boḡo ḡoitaḡorini, ema dia ḡoura-vinirini dagarari moḡo, senaḡi dagara kotari maki. Ema monana ḡauvei namori maki barego lelevaḡi boḡo veirini.

<sup>9</sup> Buka Veaḡai ekirani kavana,

“Barau na ḡena varevare tu  
asi-ḡeri e asi-ḡari tarimari  
barego lelevaḡi evinirini,  
ḡena vei-iobukaiobuka tu  
betanu-vanaḡi vanaḡini.”

<sup>10</sup> Barau na ḡaniḡani ḡueri vamoka vei tarimari evinirini beḡene varori ḡana, ema tarimarima ḡaniḡani evinirini beḡene ḡaniri ḡana. Mai Barau sebona mainana ḡemi ḡaniḡani ḡueri ḡovarorito moḡeri bevaḡa-vovoka tabutaburini, ema ḡemi veiḡa namori ḡwaḡwari beḡe ḡutuma-gorogoroni. <sup>11</sup> Ma dabara mabarari ai ḡomi bevaḡataḡamini, ma monana nuḡami sebonai e ma veuravinimi ḡesi varevare mabarari boḡo vinini. Benamo ḡai ḡemana boḡo tuḡurini varevareri tarimarima na beḡe ḡoitaḡorini nai, mabarari na Barau ma beḡe tanikiu-viniani. <sup>12</sup> Korana mai ḡauvei

gomi na goveiani maiġa tu, dia Barau ġena tarimarima veaġari na ġeura-vinirini dagarari moġo ġovinirini, senaġi mai ġomi ġemi vevvare bakuri ai, tarimarima vovoka na Barau ġetanikiu-vini baregoani. <sup>13</sup> Korana mai tarimarima ġovaġa-kavarini ġauveiri, mainana ġomi ġemi veiġa namori bevaġa-fofori ġinikaurini. Ma tarimarima beġe ribani, ġomi na Vari Namona tu dia murumi korina na moġo ġokiraġiani, senaġi ġokorana-iaġiani maki. Ema ġomi ġemi farefare e moni maki ma veuravinimi ġesi ġia e tarimarima mabarari ġesi ġovare-barabararini beġe ġitarini. Maiġeri veiġa namori loriri ai tarimarima na Barau beġe vonevone-raġeani. <sup>14</sup> Benamo ġia na ġomi beġe tuġamaġi-baregomini, ma iatami ai beġe ġauġauni. Moġesi beġe veini anina tu, Barau ġena namo e vevvare barego lelevaġina ġomi iatami ai etanuni dainai. <sup>15</sup> Barau sitanikiu-vinia, korana ġia ġena vevvare barego lelevaġina ġita evinirato bene.

### Paulo na ġena ġauvei ġevaġa-rakavaia ġetato tarimari guruġari eveito

**10** Maitoma au Paulo tauġegu na nuġagu ma manauna e maranana ġesi ġomi anoġimini. Mai nuġa manau e marana tu Keriso ġenana ġeiaġomani dagarari. Ġomi fakami ai tarima kotari na tu maiġesina ġeġofaġofa-iaġiguni, ġekirani, au ġomi ġoirami ai tu manau e aġarini, a ġomi sevimi na araka-ġerevaġini, irau ai atanuni, ġomi tu guruġa gwaġiġiri e metori atore-vinimini, ġetoni. <sup>2</sup> Au na ġomi anoġimini, mani ġofaġofa guruġari asi boġono ġabi-raġeri, be ġomi asi bana vaġa-guruġa gwaġiġimi au baiaġosini nai. Korana au baiaġosini nai tu, au atuġamaġini, ġai ġeġofaġofa-iaġimani tarimari tu basi vaġa-guruġa gwaġiġi-vinirini. Maiġeri tarima na ġai ġeġofaġofa-iaġimani tu ġekirani, ġai tu roġo tanobara maġurina ġatanuni tarimari ġeri veiġai ġaiaġoni. <sup>3</sup> Oba, ġai tu moġoni roġo tanobarai ġatanuni, senaġi ġai tu dia mai tanobara tarimari ġevetarini kavana ġavetarini. <sup>4</sup> Ġai ġema vetari farefareri tu dia tarimarima ġimari na ġevairini dagarari. Asiġina. Ġai ġema vetari farefareri tu kokore e seġuka baregori, Barau ġenana ġeiaġomani dagarari. Maiġeri na ġavetari-vinirini seġukari ema iaunegari baġa vaġa-rakavarini riba. <sup>5</sup> Ma maiġeri vetari farefareri na Barau ema ġena riba ġekoukou-ġaurini veġare-veġareri e veiġari mabarari ġavaġa-rakavarini. Ema tarimarima ġeri tuġamaġi irauirauri mabarari ġakira-fitoġarini. Ma tarimarima ġakirarini, ġeri tuġamaġi tu Keriso moġo beġene korana-iaġia. <sup>6</sup> Ma ġomi mabarami na Keriso moġoni boġo korana-iaġi korikoriani, moġa murinau vauro ġai na mani ġeseġafore-foreni tarimari ġeri rakava voiri metori baġa vinirini riba.

<sup>7</sup> Ġomi tarimarima tu tauġanina vetoġana ġereġana moġo ġoġitaiani. Bema tarima ta tauġena evekiraġini, ġia tu moġoni Keriso ġena tarima korikori nai tu, bene riba, ġai maki Keriso ġena tarimarima ġia kavana. <sup>8</sup> Au tu Vereġauka na maoro e seġuka eviniguto, ġomi ġemi maġuri e veġabidadama bana vaġa-ruġa gwaġiġiri ġana, a dia bana vaġa-rakavari ġana. Ma au mai ġauvei aveiani nuġanai, bavekokorokuni tu asi bemaikaguni. <sup>9</sup> Au tu asi aurani ġomi iniġesi boġono tuġamaġi, au na ġomi tu vevaġa-gari fefari moġo atore-vinimini. <sup>10</sup> Au moġesi akirani, korana tarima kotari ġekirani, "Paulo na fefa etorerini nai, guruġa tu baregori e ma seġukari etorerini, senaġi ġia tauġena ema foforini ġita ġerai, ġia ġitaġitana tu asi garina e ġena guruġa maki asi guguraġiri, ema asi mamiraġiri maki." <sup>11</sup> Maniġesina ġeguruġani tarimari tu beġene riba-maoro, ġai irau gabu na fefa kamasi ġatore-iaġosini vetoġari ema

mami-raġiri aiġesi, ġai baġasi foroforini tauġanima korikoriri ai, ġema veiġa o ġauvei seġukari ema guruġari maki moġesi moġo ilaila, fefai ġomami-raġirini kavana.

<sup>12</sup> Ġai mani tauġeri moġo ġevevaġa-raġeni tarimari ġesi tu asi baġa vevaġa-vetovoni, ema ġai ġema ġauvei maki ġia na kara ġeveiani ġauveina ġesi asi ilaila ġauvei sebonai baġa kiraġiani. Asiġina ġinavaġi. Maniġeri tarima tu tauġeri moġo ma ġevevaġa-vetovoni, karori tari ġeri riba e veiġa ġesi. Ema ġia tu tauġeri moġo ta evariġisini, tauġena ġena veiġa karona ta ġenai evaġa-ilailaiani. Ġia maniġesi ġeveini tauna korikori, ġia tu moġoni asi iaunegari. <sup>13</sup> Senaġi ġai tu Barau na evinimato maorori e gaburi makari, moġeri nuġari ai moġo baġa vekokoroku-iaġirini. Ma ġomi mani ġotanuni tanona maki Barau na ġai evinimato tanona makana nuġanai.

<sup>14</sup> Barau na ġai maoro evinimato, ġomi mani ġotanuni tanona maninai, Vari Namona baġa vari-fiuani e baġa vevaġa-riba-iaġiani. Moġesi naima maninai ġaġauveini vekokorokuna ġaveini tu ġamaoroni, korana ġai tu ġomi ġemi ai ġasi-raġasito. Moġa lorinai ġomi mani ġotanuni maniġa tu, ġai ġema ġauvei tanona nuġanai, korana tu ġai na Keriso ġena Vari Namona maninai ġasi-ġwa-raġasiato. <sup>15</sup> Ġai tu Barau na evinimato tanori e maorori asi ġavanaġirini. Ema ġai tu dia tarima boruri na ġauvei ġeveiato vekokorokuri ġaveirini. Asiġina. Ġomi tu Keriso Varina Namona tu ġai na ġavaġa-ribamito. Ma ġai ġema tuġamaġi baregona tu, ġomi ġemi veġabidadama bebarego-iaġoni, benamo ġai ġema ġauvei ġomi vekaravami ai maki bebarego-lelevaġini. <sup>16</sup> Moġa murinana tu mani gabu maninana, tanobara kotari ġana ma baġa iaġoni, monai Vari Namona ma baġa ġobata-iaġiani. Korana ġai tu asi ġaurani, tarima tari na varau ġeġauvei-iaġirito gaburi, ġai na baġana vekokoroku-iaġiri.

<sup>17</sup> Buka Veaġa ekirani, “Bema tarima ta eurani bene vekokoroku nai tu, Vereġauka moġo bene veiavi-iaġia.” <sup>18</sup> Korana dia tauġeri ġevkiraġi-varaġe varaġeni tarimari Barau na evaġa-moġoniani. Asiġina. Vereġauka na evaġa-raġeani tarimana moġo, Barau na evaġa-moġoniani.

### Paulo ema apostolo ġofaġofari

**11** Au ġegu ura sebona tu, au ġegu guruġa babori kota roġo boġoro seġaġiri e boġoro ġabi-raġeri. Mani ġemi veiġa ġoġabi-raġegu. <sup>2</sup> Au ġegu ura baregona vedaureana ġomi tu Keriso nuġanai moġo boġono tanu, ma Barau ġena ura baregona ġomi ġemi ai maki moġesi. Au tu moġa dainai ġomi ġemi ai amamani, mai tu Barau na eġabi-raġeani mamana. Au na ġomi tu tau sebona moġo ġana akirakaumito, mo tu Keriso. Moġesi naima au na ġomi anari-ginikaumini. Korana au ġegu ura tu, Keriso ema ekalesia ġeri veġaraġo ġaronai, ġomi tu noġa ġuiato ta futua ta ġesi asi ekima-karato ġuiatona kavana, namo vedaurea e vinuba, ġaraġori Keriso ġoirana ġana bana tuġu-kavimi. <sup>3</sup> Senaġi au tu aġarini, korana mota na ġena ġofaġofa iaunegari na Eva eġofaiato, benamo Barau ġena guruġa asi ekorana-iaġiato kavana, boġo veini garina. Ġomi maki ġofaġofa guruġari na ġemi tuġamaġi beġe vei-veġonurini, benamo Keriso ġokorana-iaġi korikoriani maġurina na boġo raka-veġitani. <sup>4</sup> Au na ġomi aġari-vinimini anina tu maiġa, bema tarima ta eiaġosini, benamo ġomi ġemi ai Keriso boruna ta eġobata-iaġiani, dia ġai na ġaġobata-iaġiato Kerisona; o iauka boruna ta ma ġoġabia ġetomini, dia ġai na ġomi iatami ai ġimama ġatore-kaurito, benamo ġoġoitaġoato iauka Veaġana; o Vari Namona boruna ġemi

gēgōbata-iaġiani, dia ġai ġemana ġoseġaġiatio ma ġoġabi-raġeato Vari Namona neganai, ġomi na moġeri tarima tu ġoseġaġirini, ma ġeri guruġai ġoġabi-raġerini moġo.

<sup>5</sup> Senaġi au atuġamaġini, mani ġevekiraġini apostolo irauri veġata barego lelevaġiri ġetoni tarimari na, au tu asi ġevanaġiġuto. <sup>6</sup> Aba, au guruġa-ġitaġita dabarana tu asi aribaiato, senaġi riba au ġegu ai tu etanuni. Ma maiġa tu dabara mabarari nuġari ai ġemi ai ġavaġa-fofori ginikaurito.

<sup>7</sup> Gomi ma ribami, au na ġomi ġemi ai Barau ġena Vari Namona aġobata-iaġiatio tu asi voina, be mo ġauvei voina ġomi na tu asi ġoviniguto. Ma mo maġuri aveiatio tu, au tauġegu avetore-variġoto, ġomi bana tore-varaġemi uranai. Ma ġomi ġotuġamaġini, mo veġa au na aveiatio tu avei-rakavato, ei? <sup>8</sup> Ġomi Vari Namona avaġaribamito-ġoi ġauveina voina tu, ekalesia doġorori tari na ġeviniguto-ġoi, noġa moġo alemarito-ġoi. <sup>9</sup> Ma au ġomi ġesi tatanuto-ġoi nuġanai, dagara kotari aurato-ġoi nai, au na ġomi tu asi avaġa-doġe ganiganimito-ġoi. Korana tu tarikaka tari, Make-donia na ġeiaġomato tarimari, ġia na aura-vinirini dagarari ġema-viniguto. Au tu ġomi vaġa-doġe-ganiganimi maġurina ta asi aveiatio. Moġesi moġo bavei-iaġoni, asi bavaġa-doġe-ganiganimini. <sup>10</sup> Keriso ġena guruġa moġonina tu aribaiato, ma nuġagu ai etanuni. Moġesi naima au baveiavini nai tu, mai Akaia tanona nuġanai etanuni tarimana ta asi bekira-ġoiguni riba. <sup>11</sup> Au na mai veġa aveiani tu, ġomi asi auravini-baregomini.

<sup>12</sup> Ma ġomi na au moni e farefare na asi boġono vaġa-kavagu atoni veġana tu, roġo bavei-iaġoani-ġoi. Mai veġa aveiani korana tu, mani apostolo ġofaġofari maniġeri beġene fofori-ginikau ġana. Mai tu noġa ġia kwakuri ai ġeruġa-taġoni tanona gaburena akwaiiani, beġene fana-kafua, benamo beġene keto-ġura, ma monana ġomi boġono riba-korikori, ġia tu moġoni dia ġai ġesi ġauvei sebona ġaveiani. Korana ġia na kara ġeveiani tu ġeveiavi-iaġiani, ġeri ura ġomi na boġono vaġa-moġoniri, boġono kira, ġia tu moġoni ġai ġesi ġauvei sebona moġo ġaveiani boġonosni ġana.

<sup>13</sup> Maniġeri tarima tu apostolo ġofaġofari, ġauvei ġofaġofari ġeveirini. Ġia maniġeri tu tauġeri moġo ġevekiraġini, Keriso ġena apostolo ġetoni, senaġi mani tu ġeġofaġofani, ġia tu dia Keriso ġena apostolo korikoriri. <sup>14</sup> Mani veġa maninana au nuġagu tu asi efarevaġini, korana Satani tauġena maki vetoġana ekefoani, noġa Barau ġena mama aneruna noġa moġo eveini, benamo tarimarima eġofarini. <sup>15</sup> Moġesina naima Satani ġena vetuġunaġi ġeiaġo-vinini tarimari maki tauġeri moġo tarimarima ġoirari ai beġe vekiraġini, ġia tu Barau ġena vetuġunaġi tarimari. Ġia tu Barau na vau ġeri veġa voiri bevinirini.

### **Paulo na ġena apostolo ġauveina ġaramanai midigumidigu barego eġabiato-ġoi**

<sup>16</sup> Mo guruġa ma akiraġi-ġoiani. Tarima ta asi bene kira au tu babo. Senaġi bema ġomi na au boġo kira-baboguni nai tu, babo tarimari ġoġabi-raġerini e ġoseġaġivinirini kavana, au maki boġono ġabi-raġegu e boġono seġaġi-vinigu, be au maki kota bana vekokoroku. <sup>17</sup> Mai kara akiraġiani tu, dia Vereġauka na maoro eviniguni nai, maiġesi ġena guruġa na aiaġoni. Asiġina. Mai tu naveiavi uranai, babo tarimari ġeri veġa na aiaġoni. <sup>18</sup> Korana tarima ġutuma tu tanobara maġurinai ġetanuni tarimari ġeri vekokoroku na ġeiaġoni. Moġesi naima au maki baveiavini. <sup>19</sup> Ġomi na mani babo tarimari ġeri vevaġa-riba ġoġabi-raġerini e ġoseġaġirini, korana ġomi tauġemi moġo ġoveġita-tarini, benamo ġokirani, “Ġomi tu moġoni ma iaunegami,”

gotoni. <sup>20</sup> Moĝoni, ĝomi tu tarima ta ĝomi ĝemi ai eiaĝosini, benamo ĝena tuĝu-rakaorakao tarimami ai evaĝa-iaĝomini, o ĝemi-ĝami everari-verari vaĝirini, o kara eura-vinirini dagarari tu ĝomi ĝemina eĝabini moĝo, e tauĝena moĝo evetore-varaĝe varaĝeni, ema ĝoirami eforo-bubuĝaurini, mo tu ĝena veĝa na e guruĝa na, tari-mana tu ĝoĝabi-raĝeani ema ĝoseĝaĝiani maki. <sup>21</sup> Au tu nakira emaiakaguni, korana ĝai nuĝama tu asi gwaĝiĝi, be maiĝeri veĝa ĝomi ĝemi ai tu asi ĝaveirito-ĝoi.

Bema tarima ta ĝia na eveirito veĝari eveiavi-iaĝiani nai tu, au maki au na aveirito veĝari bavekokoroku-iaĝiani riba. Au maiĝesi aguruĝani tu, babo ĝeri guru-ĝa na aiagoni. <sup>22</sup> Ĝia tu Heberu tarimari ĝetoni, ei? Au maki Heberu tarimagu. Ĝia Isaraela besena ĝetoni, ei? Au maki Isaraela besena. Ĝia Aberahamo tubuna ĝatana ĝetoni, ei? Au maki Aberahamo tubuna ĝatana. <sup>23</sup> Ĝia Keriso ĝena vetuĝunaĝi ĝeiaĝo-vinini tarimari ĝetoni, ei? Au na Keriso vetuĝunaĝina tu nuĝagu e tauĝanigu mabarabarana ĝesi Keriso vetuĝunaĝina aiagō-viniani. Au tu ababoni, maiĝeri guruĝa akiraĝirini, senaĝi ĝomi na roĝo ĝolaunaĝi-naĝiguni naima maiĝesi aguruĝani. Au tu avekwaragi-lelevaĝito, a ĝia tu asiĝi; ĝaro vovoka ĝediburaguto, ĝekwari-rakava rakavaguto, ema ĝaro ĝutuma dori amaseto-ĝoi. <sup>24</sup> Iuda tarimari na vaĝa-40 ĝevekwari-iaĝiani varona na tauĝanigu ai vaĝa-39 veĝata ĝekwariato. <sup>25</sup> Vaĝa-toitoi oro kwarina na ĝeribiguto, vaĝa-sebona fore na ĝetakiguto, vaĝa-toitoi davara nuĝanai au araĝeto boutina eĝwa-kirakiraiato, be dori amaseto, ma ĝaro ta tu davaraĵi boĝi vinubana ta e ĝaro vinubana ta arei-iaĝiato tuba ta iatanai. <sup>26</sup> Au tu gabu sebonai moĝo asi atanuni, vanaĝivanaĝi gabu boruri na arakanaĝi-rakanaĝini, Keriso Varina Namona avari-fiuani. Ĝaro tari ai tu ĝarukai dori areini, ma ĝaro tari ai tu seĝafore tarimari na vefakari ai araka-ĝurani, ma ĝaro tari ai tu ĝegu tanobara tarimari korikori na dori ĝevaĝiguni e ĝevaĝa-rakavaguni, ĝaro tari irau bese tarimari na dori ĝevaĝiguni; ma ĝaro tari vanuĝa barari ai meto barego araka-ĝoitaĝorini, ma ĝaro tari tu tano fakana nuĝanai meto barego aĝoitaĝoni, ma ĝaro tari tu davara nuĝari ai dori amaseni; ma ĝaro tari tu ĝevetarikaka-ĝofaĝofani tarimari na ĝevaĝa-rakavagu ĝetoni. <sup>27</sup> Gauvei metori aveini e avekwaragi-rakavani, boĝi ĝutuma asi agenani; avito-maseni, ananu-maseni; ĝaro vovoka tu ĝaniĝani aruĝarini, korana aĝani-veaĝani bene, ma ĝaro tari asi ĝegu dabuĝa, kefigu kori moĝo, be enasureguni. <sup>28</sup> Ma maiĝeri dagara ĝutuma ma bakiraĝirini riba; senaĝi iniĝa moĝo nakiraĝia: Ĝaro vanaĝivanaĝi rubu mabarari gabu tatai ĝetanuni anuĝa-vekwaragi iaĝi-baregorini. <sup>29</sup> Ekalesia ta Iauka rekenai emoirani nai tu, au maki ĝia ĝesi amoira-sebonani. Ma ekalesia ta tarima ta na eĝori-veĝonuani, benamo rakava eveini nai, au tu abaru-rakavani.

<sup>30</sup> Bema au asi ĝegu dabara ta, ma navekokoroku batoni nai, au tu ĝegu moira ĝevaĝa-ĝorarini gaburi moĝeri moĝo bavaĝa-veiavirini. <sup>31</sup> Ĝita ĝera Vereĝauka Iesu Keriso Tamana Barau ma ribana au tu asi aĝofaĝofani. Barau bitana vaĝa-raĝea mo vanaĝivanaĝi. <sup>32</sup> Damaseko ai atanuto-ĝoi nai tu, Kini Areta ĝena gavana na vetari tarimari ekirarito, vanuĝa barana maĝuna mabarana beĝene nari-ĝaua, au beĝene ĝabi-tarigu ĝana. <sup>33</sup> Senaĝi au tu tarikaka tari na boseĝa baregonai ĝevaĝa-tanu-ĝuraguto, benamo vanuĝa maĝuna windoana na varoseina ĝetuĝu-riĝoguto, benamo mo gavana ĝimana na araga-maĝurito.



### Paulo ġena mata-vanaġi

**12** Vekokoroku ai tu kara namona ta asi badoġariani, senaġi baveiavini roġo. Mata-vanaġi ai Vereġauka na evaġa-foforirito dagarari aġitarito ema aseġaġirito guruġari roġo nakiraġiri. <sup>2</sup> Au tarima ta Keriso nuġanai ma ribagu; ġia tu Barau na eġabi-varaġeato guba vaġa-toitoina ġana. Mo veiġa eġorato negana na beiaġoma mo initoma tu laġani gabanana vasivasi (14). Mo tau guba vaġa-toitoina ġana tu iaukana roġo tauġanina nuġanai, o iaukana tauġanina na eveġitato, ma iaukana ġereġana moġo eġabi-varaġeato, moġa tu au asi ribagu, a Barau ġereġana moġo ma ribana. <sup>3</sup> Mo tarima au tu ma ribagu. A mo tarima tu iaukana roġo tauġanina nuġanai o iaukana tauġanina na eraka-veġitato vau mo maġuri eġorato, moġa au tu asi ribagu, senaġi Barau ġereġana moġa ma ribana. <sup>4</sup> Mai tarima akiraġiani maiġa tu, paradaiso ġana eġabi-varaġeato. Benamo monai dagara tari ġita na asi ilaila bita kiraġi-fofori ginikaurini, ema dagara ta ġesi maki asi bita vaġa-vetovorini dagarari, Vereġauka na ekiraġirito, eseġaġirito. Moġeri dagara tu tarima ta na asi ilaila bekiraġi-foforirini dagarari. <sup>5</sup> Au na tu moġesina tarimana ġereġana moġo bavaġa-veiaviani. A au tauġegu tu asi bavekokorokuni, au tu ġegu moiramoira gaburi moġeri baveiavi-iaġirini, (korana tu moġeri dairi ai tarima na asi ġevaġa-raġeguni). <sup>6</sup> Au navekokoroku barasi maki, au tu dia babo ġeri veiġa na bara iaġo, korana au tu guruġa moġoniri moġo bara kiraġiri bene. Senaġi au tu asi veġata aurani moġeri bana kiraġi-rosiri, korana asi ġegu ura moġeri dairi ai, au tarimarima na beġene tuġamaġi-varaġe varaġegu. A au aurani tu, kara aveiani maiġa, tarimarima na beġene ġitaia vauro beġene riba-maoro, au tu tarima kamasigu.

<sup>7</sup> Au tu Vereġauka na dagara iaru-korokorori evaġa-foforirito, benamo aġitarito e aseġaġirito, senaġi moġeri bakuri ai au tauġegu bavekiraġi-varaġe varaġeni garinai tu, Barau na midigumidigu ta au tauġanigu ai etore-toġaiato. Moġa tu noġa gini masikona ta au viriġogu nuġanai etanuni. Mo gini masikona moġa tu iauka rakavana ta. Ġia tu Satani ġena vetuġunaġi eiāġo-vinini iaukana, au bene vaġa-midigu midigugu, benamo au asi bana vekiraġi-varaġe varaġe ġana au ġegu ai etanuni. <sup>8</sup> Vereġauka tu vaġa-toitoina veġata anoġiato, mai Satani ġena vetuġunaġi-iaġovini iaukana au ġeguna bene koki-vaġia ġana. <sup>9</sup> Senaġina Vereġauka na maiġesina eki-raguto, “Au ġegu namo e varevare-barana ġereġana moġo dagara baregona ġoi na oura-viniani, korana au ġegu seġuka tu moiramoira tarimana ġenana vauro efofori-korikorini.” Moġesina naima au na tu ġegu moiramoira gaburi moġeri moġo baveiavi-iaġirini, Keriso ġena seġuka au ġegu ai bene tanu ġana. <sup>10</sup> Moġesi naima Keriso bakunai ġegu ġauvei nuġanai amoiramoirani, o tarima na guruġa e veiġa rakavari ġegu ai ġeveirini, o avekwarāġini nai, o ġevaġa-midigu midiguguni nai, o ġegu dabara doko ġarori ai, au tu aiakuni avererani moġo, korana amoirani negari ai tu, kokore barego vedaureana ma aġoitāġoni.

### Paulo ġena ura sebna tu Korinto ekalesiana doġorona bene vaġa-kavaia

<sup>11</sup> Au tu tauġegu babo ai bavevaġa-iaġo, maiġesi aguruġani, senaġi mai dia au tauġegu nuġagu siga moġo maiġesi aveini, au ġomi na ġotuġu-naġinaġiguni naima, babo ai avevaġa-iaġoni. Au tu ġomi na namogu boġoro kiraġi, senaġi ġomi na au tu ġokure-toġaguni. Aba, au tu moġoni asi aragu, senaġi mani ġemi “apostolo iarukorokorori” na au tu asi beġe vanaġiguni. <sup>12</sup> Apostolo korikoriri vetoġari tu vevaġa-

gwaḡiḡi ai, vetoḡa boruri ai, nuḡa-farevaḡi veigari ai, ema seḡuka veigari boruri ai ḡevaḡa-foforirito ḡomi ḡoirami ai, be ḡoḡitarito maniḡeri. <sup>13</sup> Ḣomi tu kamara veigai au na ḡomi asi atuḡamaḡikau-baregomini, ekalesia doḡorori kotari atuḡamaḡikau-baregorini kavana, ei? Asi veigai tai. Asiḡina. Au na ḡomi tu moḡoni, ḡomi ḡesi tatanuto-ḡoi, monai moḡo asi aurato-ḡoi, au uragu ai boḡono vekwaraḡi. Benamo moḡa moḡo. Ma bema mai veigai maiḡa ḡomi na ḡoḡitaiani asi namo nai tu, benamo anoḡimini, ḡegu mai vei-rakava boḡono tuḡamaḡi-fitoḡaia.

<sup>14</sup> Au toma tu bavei-kavi, naiḡosini atoni. Mai ma baiḡosini maiḡa tu ḡomi rakaḡitami avaḡa-toitoiani maiḡa. Mai ma baiḡosini mainai maki, asi ma bavaḡa-vekwaraḡimini, korana au tu dia ḡomi ḡemi farefare e moni urari na baiḡosini, asiḡina, au tu ḡomi moḡo urami na baiḡosini. Au na ḡomi maiḡesina aveimini tauna korikori tu maiḡa, dia natu na tama sina ḡeri farefare e moni etore-ḡerevaḡirini. Asiḡina. Tama sina na naturi ḡeri farefare e moni ḡetore-ḡerevaḡirini. <sup>15</sup> Moḡesina naima au baiḡosini nai, ma iakugu ḡesi, kara ḡegu ai maiḡeri mabarari ḡomi bavini-mini, ema au maki nuḡagu mabarana ḡesi bavini-mini, ḡomi bana vaḡa-kavami ḡana. Bema au na ḡomi tu auravini-baregomini, karase nai ḡomi na au tu asi ḡouravini-baregoguni?

<sup>16</sup> Kotari na maki ḡevaḡa-moḡoniguni, au ḡomi tu asi avaḡa-vekwariḡimito-ḡoi, senaḡi maiḡesi ma ḡekiraguni. Au tu iaunega rakavarakava, be au na ḡomi ḡemi ai moni tu ḡofaḡofa dabarari tari na aḡabirito-ḡoi ḡetoni. <sup>17</sup> Be mo tarima tari ḡomi ḡemi ai atuḡu-iaḡosirito, moḡeri tu akirarito, ḡomi ḡemi ai au ḡegu moni maki beḡene gogo atato ba? <sup>18</sup> Au na Tito anoḡiato, ḡomi beneasi raka-ḡitami atato nai tu, ḡita tarikakara ta maki atuḡuato, be Tito ekavaiato, ḡeiaḡosito. Ma Tito eiaḡosito nai tu, ḡomi ḡemi moni easi ḡofaḡofa-iaḡirito, ei? Tito ema au tu iauka sebona nuḡanai moḡo ḡaḡauveini, ema dabara sebona na moḡo ḡaraka-iaḡoni.

<sup>19</sup> Ba ḡomi vanaḡivanaḡi ḡotuḡa-maḡini, ḡai tu bakuma ḡabiḡauri guruḡari ḡomi ḡemi ai ḡakiraḡini ḡotoni, ei? Moḡoni, ḡai tu Keriso nuḡanai ema ḡai kara ḡakiraḡirini tu Barau ḡoiranai ḡaguruḡani. Au na aura-vinimini tarimami, ḡoseḡaḡi, ḡai na mai kara ḡaveirini dagarari mabarari maiḡeri tu ḡomi boḡono kokore uranai ḡaveirini. <sup>20</sup> Au tu agarini, korana au basi-raḡasini nai, ḡomi tu dia au na auravini-veigari ḡovei-tanurini basi-ḡoitaḡomini, benamo ḡomi na ḡoura-viniani veigana au ḡegu ai asi boḡo doḡariani garina. Au agarini, ḡomi tu roḡo ḡovevaneni, ḡomamani, ḡovebaru-vini rakava-rakavani, ḡomata-ḡaniḡanini, karomi guruḡa asi namori ḡovinirini, ḡoverori-toreni, ḡoveiavini, nuḡami e ḡemi tuḡamaḡi dia gabu sebonai, senaḡi irairau. <sup>21</sup> Ma au agarini, au basi-votuni nai tu, au ḡegu Barau na au bevaḡa-maiakaguni ḡomi ḡoirami ai, benamo matagu gorari beḡe riḡoni, korana ḡevei-rakavato tarimari tu asi ḡevetuḡamaḡi-kureto veigai rakavari ḡerina, kima maḡurina na ema mata-boraḡa veigari na. Maiḡeri veigai ḡerina ḡia ḡevemiro-fatafatani.

### Vekira-toreḡau magona

**13** Mai tu vaḡa-toitoina au ḡomi ḡemi ai mai aiaḡosini. Ma Buka Veḡai ekirani kavana, “Tarima ruarua o toitoi na beḡe vaḡa-moḡonirini guruḡari tu moḡoni korikori.” <sup>2</sup> Au vaḡa-ruaruana ḡomi asi-raka-ḡitamito nai tu, ḡevei-rakavani tarimari e tarima kotari maki au na akira-toreḡaurito, au na kara baveiani au baiḡosini nai. Ma maitoma tu au manaḡai roḡo mai-ḡegu nuḡanai, ma avaḡa-guruḡamito ka-

vana ma akira-toregaurini. Bema au ma baiagosi-genoḡoini nai, deikara roḡo rakava veiḡari evei-tanuni tarimana tu, gwaina asi basi-g̃abiani, g̃ena vei-rakava voina metona baviniani. <sup>3</sup>Korana ḡomi ḡemi ura tu boḡono vaḡa-moḡonia veḡata, Keriso tu moḡoni au ḡeguna eguruḡani ba asiḡina. Goseḡaḡi, Keriso ḡomi ḡemi ai tu asi emoirani, asiḡi. Gia kara ḡomi fakami ai neveia betoni seḡukana tu barego lelevaḡi. <sup>4</sup>Aba, Keriso, mo tu tauḡanina g̃ena moiramoira lorinai, satauro tuḡunai ḡeikokokauato, benamo emaseto, senaḡi ḡia initoma tu Barau g̃ena seḡukai emaḡuri-tanuni. Iesu Keriso nuḡanai ḡai maki tauḡani ai tu moiramoira Iesu kavana, senaḡi Barau g̃ena seḡukai ḡamaḡuri-tanuni Keriso ḡesi. Ema ḡomi ḡemi ai ḡai na kara baḡa veiani tu mai Barau g̃ena seḡukai.

<sup>5</sup>Ḡomi tauḡemi nuḡami ema ḡemi maḡuri boḡono ragaḡi-ginikauri, ḡomi tu moḡoni ḡoveḡabidadamani ba asiḡina. Ḡomi tauḡemi ḡemi maḡuri na ema ḡemi veiḡa na boḡono vevaḡa-fofori korikori! Ba ḡomi tauḡemi tu asi ḡoriba-maoroni, Keriso Iesu tu ḡomi nuḡami ai etanuni ba? Bema moḡoni tauḡemi ḡovetovo-naḡini, benamo ḡoribani, Keriso tu dia ḡomi nuḡami ai, monai vauro ḡomi tu moḡoni asi ḡoveḡabi-dadama-korikorini. <sup>6</sup>Au moḡoni aribani, ḡomi tauḡemi na ḡai boḡo riba-maoromani, ḡai tu moḡoni Keriso vetuḡunaḡina ḡaiaḡo-vinini, a dia Barau na asi evaḡa-moḡonimato tarimama. <sup>7</sup>Ma ḡai ḡema ḡauḡau ai Barau ḡanoḡiani, ḡakirani, ḡomi bene vaḡa-kavami, be veiḡa rakavana ta asi boḡono veia. Ḡai tu dia ḡaḡuriḡurini, ḡakirani, tarimarima na ḡai vetovo-naḡi ai ḡakokoreto, moḡa beḡene ḡitaia ḡatoni. Asiḡina. Au ḡegu ura ḡomi tu vei-iobukaiobuka tarimami ai boḡono iaḡo. A tarima-rima beḡe kirani, ḡai tu ḡaketoto beḡe toni, moḡa ḡai na tu asi ḡatuḡa-maḡiani. <sup>8</sup>Korana tu ḡai na guruḡa moḡonina kouḡauna veiḡana ta tu asi ilaila baḡa veiani, a ḡai na tu guruḡa moḡonina moḡo baḡa vaḡa-foforiani. <sup>9</sup>Ḡai ḡamoirani nuḡanai, ḡomi ḡokokoreni tu, ḡai ḡema iaku ebaregoni. Ema ḡai ḡema ḡauḡau baregona ḡaveiani tu, ḡomi boḡono kokore-korikori ḡemi veḡabidadamai. <sup>10</sup>Moḡesina naima mai fefai maiḡeri guruḡa atore-vinimini, au mainai roḡo maiḡegu nuḡanai. Korana au asi aurani, au banasi-raḡasi nai tu, ḡomi bana vaḡa-guruḡa gwaḡiḡimi. Korana Vereḡauka na au mai maoro baregona eviniguto tu, ḡomi ḡemi veḡabidadama bana vaḡa-kokoreri, a dia bana vaḡa-rakavari ḡana.

### Veḡabituḡu dokona

<sup>11</sup>Tarikakagu, ḡegu guruḡa magona tu maiḡa, boḡono gena. Tuḡamaḡi barana ḡoirami ai boḡono torea tu, boḡono namo-vedaurea, ḡegu guruḡa mabarari boḡono korana-iaḡiri. Nuḡami beḡene gwaḡiḡi, mabarabarami tuḡamaḡi sebona moḡo boḡono ḡabia, maino ai boḡono tanu, ema veuravini e maino Barauna ḡomi sevisevimi ai bene tanu.

<sup>12</sup>Karomi tata vetarikaka verauna na boḡono vaḡa-namori.

<sup>13</sup>Veḡa o ekalesia tarimari mabarari na ḡeri vevaḡa-namo ḡemi ai ḡetuḡu-iaḡosiani.

<sup>14</sup>Vereḡauka Iesu Keriso g̃ena namo e varevare-bara ema Barau g̃ena veuravini ema Iauka Veḡa g̃ena vekako namona, ḡomi mabara-barami iatami ai bene tanu.

## PAULO ĜENA TORETORE GALATIA EKALESIARI ĜERI

Galatia vaĝa-foforina guruĝari

Paulo na mai fefa tu betaĝu Antioka, Efeso o Makedonia ai etanuto-ĝoi nuĝanai etoreato. Mai tu laĝani 48 ema 58 fakari ai ta etoreato. Mo tu Iesu maki emaseto murinai vau. Ĝia ĝena guruĝa baregori mai fefa nuĝanai tu karoa 2:19-21; 3:2-3; 3:11; 5:1 ekiraĝirito.

Paulo na mai fefa etoreato korana tu Iuda tarimari tari ĝe-ekalesiato moĝeri na Galatia ekalesiari vevaĝa-riba kerereri ĝevinirito-ĝoi naima. Ĝia ĝekirato-ĝoi, tari-marima tu Mose ĝena taravatu guruĝari beĝe korana-iaĝirini vauro vevaĝa-maĝuri korikori beĝe ĝoitagoani. Moĝesi naima evaĝa-guruĝa gwaĝiĝirito, ekirarito, maĝuri ema vei-iobukaiobuka tu veĝabidadama ĝereĝana ĝenana moĝo Barau ĝena namo ema varevare-bara nuĝanai bita ĝabiani, a dia ĝera ĝauvei e veiĝa ĝerina. Ema ekirarito, ĝita tu Keriso ĝena mase na taravatu ĝena seĝuka na eruĝa-vaĝirato, ema ĝita tu Iauka Veaĝa varau taĝabiato, be Iauka na bene ĝori-kaura.

Paulo na ĝena fefa tu maiĝesi eboioĝaiato:

1. Paulo tauĝena na Vari Namona guruĝana ekiraĝiato - karoa 1-2
2. Vevaĝa-maĝuri tu taravatu ĝenana ba Barau ĝena namo e varevare-bara ĝenana eiaĝomani - karoa 3-4
3. Veiĝa rakavari ĝerina bitana raka-faka ba roĝo bitana veiri - karoa 5-6

**1** Au Paulo, apostolo tarimagu na mai fefa tu ĝomi Galatia nuĝanai ekalesia doĝoromi ĝemi atore-iaĝosiani. Au tu dia tarimarima ĝeri urai mai ĝauvei aveiani, e dia tarima ta na etuĝuguto, mai apostolo ĝauveina bana veia etato. Asiĝina. Au tu Iesu Keriso ema Tamara Barau na etuĝuguto nai, mai apostolo ĝauveina aveiani. Iesu Keriso tu Barau na mase na ma evaĝa-variĝisi ĝenoĝoiato. <sup>2</sup> Ĝegu vevaĝa-namo tu tarikakara mabarari au ĝesi mainai ĝatanuni ĝesi, ĝomi Galatia nuĝanai ekalesia doĝoromi ĝemi ĝatuĝu-iaĝosiani.

<sup>3</sup> Barau ĝita Tamara ema Vereĝauka Iesu Keriso ĝerina namo e varevare-bara ema maino ĝomi ĝemi ai bene tanu. <sup>4</sup> Iesu Keriso na ĝita ĝera Barau ema Tamara ĝena ura ekorana-iaĝirito, ĝia tauĝena ĝena maĝuri ĝita ĝera rakava dainai etore-tariato. Mo veiĝa eveiato anina tu, ĝita toma mai tanobarai etanuni rakavana ĝenana bene vaĝa-maĝurira uranai. <sup>5</sup> Tamara Barau arana bitana vaĝa-raĝea vanaĝivanaĝi! Amen.

### Vari Namona tu sebona kwariĝutu moĝo

<sup>6</sup> Ĝomi na mani maĝuri boĝo veia nai, au tu badaradara-rakava moĝo. Korana ĝomi tu Keriso ĝena namo e varevare-bara lorinai, Barau na ekeamito, ĝena tari-marimai boĝono iaĝo ĝana. Ma nuĝanai ĝomi tu asikauna ĝia ĝenana ma boĝo ragaraka-veĝita, benamo vari boruna ta ma boĝo ĝabi-raĝea. <sup>7</sup> Mani vau boĝo ĝabi-raĝea maniĝa tu dia Vari Namona. Asiĝina ĝinavaĝi moĝo. Ĝomi mani tu moĝoni, tarima kotari na ĝeĝofa-veĝonumini. Ĝia ĝeurani tu, Keriso Varina Namona beĝene vei-veĝonua veĝata ĝetoni. <sup>8</sup> Senaĝi ĝai na ĝomi tu Keriso Varina Namona moĝo ĝemi ĝaĝobata-iaĝiato, ma vari boruna ta tu asiĝina. Bema ĝai o guba aneruna ta vari boruna ta ĝemi ma baĝa ĝobata-iaĝiani nai, dei moĝesina beveini tarimana tu, rakava baregona ĝenai betanu-vanaĝi vanaĝini. <sup>9</sup> Mai guruĝa tu bita kiraĝia, senaĝi au na mai akiraĝi-ĝenoĝoiani. Bema tarima ta na ĝemi ai “Vari Namona” easi-ĝobata

iaġiani, senaġi ġia na eġobata-iaġiani varina tu mo ġoġabi-raġeato varina moġa ġesi asi ilaila nai tu, mo tarima ġenai rakava metona baregona bene tanu-vanaġi vanaġi.

<sup>10</sup> Au maiġesina aguruġani tu, tarimarima na beġene ġabi-raġegu ġana, ba Barau na bene ġabi-raġegu? Ba mai tarimarima iauri navaġa-namori ġana aguruġani? Bema tarimarima iauri inította maki roġo navaġa-namori barasi, au toma Keriso ġena vetuġunaġi ai tu asi bara iaġo.

### Paulo apostolo tarimanai eiaġoto varina

<sup>11</sup> Tarikakagu mabarami, au na ġomi avaġa-guruġa korikorimini. Mo Vari Namona na ġomi ġemi ai aġobata-iaġiato, moġa tu dia tarima ta ġenana erefo-taġuito moġo varina. <sup>12</sup> Mai Vari Namona maiġa, au na tu dia tarima ta ġenana aġabiato, ema dia tarima ta na evaġa-ribaguto. Asiġina ġinavaġi. Mai Vari Namona maiġa tu Iesu Keriso tauġena na ġegu ai evaġa-foforiato vau aribaiato.

<sup>13</sup> Au guinenai luda ġeri doġoro nuġanai atanuto-ġoi nai, kara aveirito-ġoi variri tu ġoseġaġirito, be ġomi ma ribami. Barau ġena ekalesia doġorona aiġesi avaġa-midigu midigurito-ġoi e alai-lautilusirito-ġoi bana vaġa-rakavari veġata atato-ġoi variri tu ma ribami. <sup>14</sup> Au na Iuda seneri ġeri maġuri mabarabarari akorana-iaġi ginikaurito-ġoi. Ma au na mai maġuri aveiato-ġoi nuġanai tu, Iuda tarimari au ġuru karogu tauri mabarari au na aguine-iaġirito-ġoi.

<sup>15</sup> Senaġi au tu roġo sinagu legana nuġanai, Barau na eġabi-viriġiguto, ema ġena namo e varevare-bara lorinai ekeaguto, ġia ġena ġauvei bana veia etato. Benamo Barau na eura-viniato ġaronai, <sup>16</sup> Natuna au ġegu ai evaġa-foforiato. Keriso au ġegu ai, Barau na evaġa-foforiato, anina tu, ġia eurato, au na Natuna Varina Namona irau bese tarimari ġeri ai bana ġobata-iaġia ġana. Barau na Natuna ġegu ai evaġa-foforiato nai tu, tarima ta ġenai asi ma avedanaġito. <sup>17</sup> Ierusalemna ġana ġeapostologuineto tarimari ġeri ai vedanaġi maki asi avaraġeto. A au mo veġa aġoitaġoato murinai tu, maoromaoro Arabia ġana aiaġoto. Ma monana ma aġenoġoi-iaġoto Damaseko ġana. <sup>18</sup> Monai, laġani toitoi (3) ġevanaġito murinai vau, Ierusalemna ġana avaraġeto, Petero ġesi baġana guruġa-ġuruġa uranai. Petero ġesi Ierusalemna ġaro gabanana imaima (15) ġatanuto. <sup>19</sup> Au mo negai apostolo boruna ta tu asi aġitaiato. Au tu Vereġauka tarina Iakobo (o Iames) moġo aġitaiato. <sup>20</sup> Barau ġoiranai au na ġomi mai tu guruġa moġoniri atore-vinimini, asi aġofaġofani.

<sup>21</sup> Ierusalemna araga-kwaneato tu, Siria ema Kilikia tanori ġana aiaġoto. <sup>22</sup> Keriso ġena tarimarima, Iudea tanonai ġetanuni ekalesiari, au ġitaġitagu ġia tu asi ribari. <sup>23</sup> Senaġi ġia na au tu varigu korina moġo maiġesi eragato ġeseġaġiato-ġoi, ġekirato-ġoi, “Ġita guinenai evaġa-midigu midigurato-ġoi e elai-lautilusirato-ġoi tarimana, toma tu nevaġa-rakavaia etato-ġoi veġabidadamana ma eġobata-iaġiani.” <sup>24</sup> Benamo Barau na kara au ġegu ai eveiato, moġa ġeseġaġiato nai tu, Barau ġevaġa-raġeato.

### Apostolo tarimari na Paulo ġena ġauvei ġevaġa-moġoniato

**2** Laġani gabanana vasivasi (14) ġekorito murinai vau, Banabas ġesi Ierusalemna ġana ma ġaġenoġoi-iaġoto. Tito maki au na aġori-kauato, be ġia maki ġaiaġoto. <sup>2</sup> Au tu Barau na ġegu ai evaġa-foforiato, naima aiaġoto Ierusalemna ġana. Ma monai Vari Namona, irau bese tarimari ġeri aġobataiato-ġoi varina, Ierusalemna ekalesia ġeri akiraġiato. Ma mo Vari Namona tu veġorikau tarimari baregori ġereġari ġeri ai maki akiraġiato, ġia na ġegu ġauvei beġene vaġa-moġonia ġana; korana agarito,

akirato, asi namo au ġegu ġauvei guinena moġa, o mai ġauvei variġuna aveirini maiġa asi tauri ai beġe iaġoni gariri. <sup>3</sup>Tito tu Grik tarimana, ma au Ierusalemaj neganai, ġia tu au ġesi, senaġi ġia tauġanina kefina beġene lama-vaġia ġiġiraġena tu asi ġeveito. <sup>4</sup>Senaġi ekalesia o tarikaka ġofaġofari tari ġai fakamai ġerakatoġa-ġairito, ġeurato tu, Tito tauġanina kefina beġene lama-vaġia veġata ġetato. Ġia ġai fakamai ġema-rakatoġa-ġairito, korana ġeurato, ġai Keriso Iesu ġesi ġasebonato nai, ġai ġema maġuri namona e fakana maiġa, beġene ġita-lemaia uranai. Korana ġia ġeri ura tu, Iuda ġeri sene taravaturi na ġai ma beġene barubaruma maia. <sup>5</sup>Senaġi hora misina nuġanai ta maki ġia garori tu asiġina ġinavaġi veġata ġaseġaġirito. Gai moġesina ġaveito tauna korikori tu, Vari Namona guruġana moġonina ġomi rekemi ai bene tanu-vesiriġu uranai.

<sup>6</sup>Veġorikau tarimari baregori tu ma arari, a asi arari au ġegu ai, ġia tu ilaila moġo. Barau na tarimarima tu dia tauġanina murikana vetoġana eġitaiani. Maniġeri veġorikau tarimari na guruġa ta auna vari iatanai tu asi ġetore-kauato. <sup>7</sup>Senaġi ġeġitaguto, Barau na au ġauvei eviniguto tu, mero tauġaniri kefiri asi ġelama-vaġirito tarimari ġeri, mo tu irau bese tarimari ġeri, Vari Namona bana ġobata-iaġia etato, ilailana Petero mero tauġaniri kefiri ġelama-vaġirito tarimari ġeri ai, mo tu Iuda tarimari ġeri ai, Vari Namona bene ġobata-iaġia etato kavana. <sup>8</sup>Korana Barau Iuda tarimari ġeri apostolo tarimana Petero ġena ġauvei nuġanai eġauveito-ġoi kavana tu, au irau bese tarimari ġeri apostolo tarimagu ġegu ġauvei nuġanai maki eġauveini. <sup>9</sup>Iakobo (o Iames), Petero ema Ioane tu rubu duġuna tarimari monai. Ġia na au ġegu ai Barau ġena namo e varevare-bara ġeġita-leaiato, benamo ġimari aroribari na au e Banabas ġeġabi-rukumato. Moġa anina tu, ġia ma nuġari mabarari ġesi ġekirato, Banabas ema au tu irau bese tarimari ġeri ai, ma ġia tu Iuda tarimari ġeri ai beġe iaġoni. <sup>10</sup>Guruġa sebona moġo ġai ġevinimato tu ġekirato, asi ġeri-ġari tarimari baġana tuġamaġiri e baġana vaġa-kavari ġetato. Senaġi mai veġa tu au tauġegu na maki bana veia veġata atoni veġana.

### **Paulo na Petero ekira-feiato, korana veġa ġofaġofana eveiato nai**

<sup>11</sup>Petero Antioka ġana eiaġomato neganai tu, au na ġoirana ġutu-ġutunai akira-matana matanaiato, korana ġia na veġa eleaiato nai. <sup>12</sup>Tovotovonai Iakobo na etuġurito tarimari Petero ġenai roġosi roġo beġere laġasi neganai, Petero tu irau bese tarimari ġesi ġeġaniġani vegogoto-ġoi. Senaġi Iakobo na etuġurito Iuda tarimari ġevotuto nai, ġia tu irau bese tarimari fakari na ma eraka-veġitato. Petero irau bese tarimari fakari na eraka-veġitato, korana mero tauġaniri ġelama-vaġirini veġana ġekorana-iaġiani tarimari, Iuda tarimari, gariri eveito nai. <sup>13</sup>Iuda tarimari kotari maki Petero ġesi ġesebonato, be Petero ġena mo veġa ġofaġofana ġeveiato. Ma Banabas maki ġia ġeri mai ġofaġofa maġurina na, be ġia maki ġeġofa-darereato. <sup>14</sup>Senaġi au ġegu ġitaġitai ġia tu Vari Namona maġurina korikorinai tu asi ġerakato-ġoi naima ġia mabarabarari matari ġutuġuturi ai au na Petero akira-matana matanaiato, akirato, “Ġoi tu Iuda tarimamu, senaġi Iuda tarimari ġeri sene maġurinai tu asi otanuni, a ġoi tu irau bese tarimari ġeri tanu-maġurinai otanuni. Ma kara dainai tu irau bese tarimari ovaġa-naġirini, Iuda tarimari seneri ġeri taravatu lorinai beġene tanu otoni, ei?”

**Iesu bevaĝa-moĝoniani tarimana na moĝo, Barau na  
vei-iobukaiobuka tarimanai bekiraĝiani**

<sup>15</sup> Aba, ĝita Iuda tarimara tu Iuda korikoriri ĝerina taĝorato. Ĝita tu dia irau bese tarimari ĝerina taĝorato. Irau bese tarimari tu vei-rakava tarimari. <sup>16</sup> Ma ĝita Iuda tarimara tu ribara, Barau na tarimarima tu dia taravatu na ekiraĝirini veiĝari ĝekorana-iaĝi ginikaurini nai, ekirarini, asi ĝeri vei-rakava etorini. Asiĝina. Ĝia tu Keriso ĝenai ĝeveĝabidadamani naima ekirarini, asi ĝeri vei-rakava etoni. Ĝita maki moĝesi. Keriso Iesu tavaĝa-moĝoniato naima Barau ekirato, asi ĝera rakava etato. Dia taravatu na ekiraĝirini veiĝari takorana-iaĝi ginikaurini dainai. Asiĝina. Keriso ĝenai taveĝabi-dadamato nai. Korana tu taravatu ekorana-iaĝi ginikauani tarimana ta Barau na tu asiĝina ĝinavaĝi beĝabi-raĝeani. Asiĝina moĝo. <sup>17</sup> Bema ĝita Iuda tarimara tavekvaraĝini, taurani, Keriso ĝesi bitana sebona, be Barau na bene ĝabi-raĝera tatonai nai tu, ĝita tauĝera tavevaĝa-foforini, ĝita tu vei-rakava tarimara. Moĝa anina tu, Keriso eiaĝomato vei-rakava benema vaĝa-baregoa ba? Asiĝina ĝinavaĝi! <sup>18</sup> Bema au na mo taravatu, asi tauri ai avaĝa-iaĝorito dagarari, ma navaĝa-ruĝa ĝenoĝoiri atoni nai, au tu moĝoni vei-rakava tarimagu, taravatu asi akorana-iaĝiani. <sup>19</sup> Korana taravatu akorana-iaĝirito-ĝoi maĝurinai au tu varau amaseto, be taravatu au na asi ma bakorana-iaĝi ĝenoĝoiani. Taravatu akorana-iaĝiato-ĝoi maĝurinai au tu amaseto anina tu, Barau ĝena moĝo bana tanu uranai. <sup>20</sup> Au tu Keriso ĝesi ĝesatauro-sebonaguto; dagara sebona tu, roĝo maĝuri atanuni, senaĝi mai tu dia au tauĝegu ĝegu maĝuri. Asiĝina. Mai tu Keriso au nuĝagu ai maĝuri etanuni. Au mai tauĝani nuĝanai mai maĝuri atanu-iaĝiani maiĝa tu, Barau Natuna ĝenai aveĝabidadamani lorinai atanuni. Mai Barau Natuna na au eura-viniguto, ma au maĝuri bana ĝabia ĝana, tauĝena ĝena maĝuri evini-fitoĝaiato. <sup>21</sup> Au na Barau ĝena namo e varevare-bara tu asi atore-veĝitaiani. Asiĝina ĝinavaĝi. Korana bema tarima ta na taravatu bekorana-iaĝiani nai, vei-iobukaiobuka tarimanai beiaĝoni neganai, Keriso tu bere mase-kava, asi ĝena namo ta.

**Taravatu tana korana-iaĝia, ba veĝabidadamai moĝo bisini tanu**

**3** Ĝomi Galatia tarimami babomi! Iesu Keriso satauro ai ĝeikoko-kauato varina tu au ĝegu ĝobatai, be matami ĝutuĝutunai akiraĝi-fofori ginikauato. Ma ĝomi mai tu kamara ĝora tarimana na ĝemi tuĝamaĝi bemeĝa-veĝonuri maia, ei? <sup>2</sup> Au auran, mai dagara sebona ĝomi na ĝokira-varagu: Ĝomi na Iauka Veaĝa tu taravatu ĝokorana-iaĝi ginikauato nai ĝoĝabiato, ba Keriso Varina Namona ĝoseĝaĝiato, benamo ĝovaĝa-moĝoniato nai ĝoĝabiato? <sup>3</sup> Ĝomi tu moĝoni boĝo babo-korikori, ei? Ĝomi maĝuri variguna dabaranai raka tu Iauka Veaĝa ĝena seĝukai ĝosinaiato, maitoma ĝomi ĝourani, maĝona tauĝemi ĝemi kokore ai boĝono ĝoitaĝoa ĝotoni? <sup>4</sup> Be, ĝomi mo meto ma midigumidigu tu ĝoĝoitaĝo-kavarito, asi ĝeri namo ta? Senaĝi mo meto ma midigumidigu, au ribagu tu, asi ĝoĝwa-kavarito. <sup>5</sup> Ma nadanaĝimi atoni, Barau na ĝomi Iauka Veaĝa evinimimi e fakami ai nuĝa-farevaĝi veiĝari boruri eveirini, korana ĝomi na taravatu ĝokorana-iaĝi ginikauani nai ba? Ba Keriso Varina Namona ĝoseĝaĝiani, benamo ĝovaĝa-moĝoniani dainai?

<sup>6</sup> Ĝotuĝamaĝi-ĝenoĝoi, Aberahamo ĝotuĝamaĝia: “Ĝia tu Barau na ekiraĝi-toreato guruĝana evaĝa-moĝoniato naima, Barau ekirato, ĝia tu vei-iobukaiobuka tarimana, etato.” <sup>7</sup> Moĝesina naima boĝono riba, Barau ĝeĝabidadama-viniani tarimari

geregari moĝo Aberahamo natuna. <sup>8</sup> Buka Veagai etore-guineato guruĝana na eki-raĝiani, ekirani, ĝoirai Barau na irau bese tarimari tu ĝeri veĝabidadama ĝerina vau bekirarini, asi ĝeri rakava betoni. Moĝesina naima, Aberahamo ĝenai Vari Namona tu ekiraĝi-fofori guineato, ekirato, “Tanobara mabarabarari beseri tu, ĝoi ĝemuna vau vevaĝa-namo beĝe doĝariani.” <sup>9</sup> Aberahamo na Barau eĝabidadama-viniato, benamo Barau ĝenana vevaĝa-namo eĝoitaĝoato. Moĝa ilailanai Barau ĝenai ĝeveĝabidadamani tarimari mabarabarari tu, Barau ĝena vevaĝa-namo beĝe ĝabiani.

<sup>10</sup> Taravatu ĝekorana-iaĝi ginikauani vau, Barau ĝoiranai vei-iobukaiobuka tarimari ai beĝe iaĝoni ĝetoni tarimari mabarari iatari ai tu rakava metona lelevaĝina etanuni. Korana Buka Veagai tu maĝesina ekirani, “Taravatu bukanai ĝetorerito guruĝari asi ĝekorana-iaĝi vanaĝi-vanaĝirini tarimari iatari ai tu rakava metona lelevaĝina betanuni.” <sup>11</sup> Buka Veaga na bevaĝa-fofori ginikaua, taravatu bekorana-iaĝiani tarimana Barau ĝoiranai tu dia vei-iobukaiobuka tarimana. Korana “Barau beĝabidadama-viniani tarimana tu vei-iobukaiobuka tarimanai beiaĝoni, be maĝurini.” <sup>12</sup> Taravatu tu irau veĝata, ĝia tu dia veĝabidadama ĝenana eiaĝomani. Korana Buka Veaga ekirani, “Taravatu ekorana-iaĝi ginikauani tarimana tu taravatu ĝenana moĝo maĝuri beĝabiani.”

<sup>13</sup> Senaĝi ĝita tu taravatu ĝena rakava metona lelevaĝina ĝenana Keriso na varau evoi-vaĝirato. Ĝita tu ĝia tauĝena na eruĝa-boroĝirato, benamo mo rakava meto lelevaĝina tu ĝia na eĝabiato. Korana Buka Veagai etoreato, ekirani, “Ĝau ai ĝetoukaurini, ĝemaseni tarimari mabarabarari iatari ai tu Barau na rakava meto lelevaĝina etore-kauani.” <sup>14</sup> Keriso na ĝita taravatu ĝena rakava meto lelevaĝina ĝenana evoi-vaĝirato, tauna korikori tu, Barau na Aberahamo vevaĝa-namo eviniato, mo vevaĝa-namo moĝa tu irau bese tarimari na maki Iesu Keriso ĝenana beĝene ĝabia uranai. Korana mo dabarai tu, Barau na ekiraĝi-toreato Iaukana tu Iesu Keriso beĝe vaĝa-moĝoniani tarimari mabarari na maki beĝe ĝabiani.

### **Barau ĝena taravatu na Barau ĝena guruĝatore guinena asi ilaila bekoki-fitoĝaiani**

<sup>15</sup> Tarikakagu mabarami, tarimarima ĝera tanu-maĝurinai guruĝa vaĝa-ilailana ta nakiraĝia. Vaĝa-ilailana tarimarima ĝera kiraĝitore guruĝana emoĝonini, benamo tavaĝa-ruĝaiani nai tu, mo guruĝatore moĝa tarima ta na asi ma bekira-fitoĝaiani o iatanai guruĝa boruna ta asi ma betore-kauani. <sup>16</sup> Barau na mo guruĝatore guruĝari tu Aberahamo ema Aberahamo besena sebona moĝo ĝeri ai ekiraĝirito. Buka Veagai etoreato guruĝana tu dia maĝesi ekirani, “Ĝoi besemu ĝutumari ĝeri,” korana moĝesi bere kira tu tarimarima ĝutuma bere kiraĝiri; senaĝi ĝia tu ekirani, “Ĝoi besemu sebona ĝenai.” Mai tu tarima sebona kwariĝutu moĝo ekiraĝiani, mo tu Keriso ĝereĝana moĝo ekiraĝiani. <sup>17</sup> Au na kara akiraĝiani tu iniĝa: Barau ĝena guruĝatore guruĝana Aberahamo tu evini-guineato; ma laĝani sinau vasivasi ma gabana toitoi (430) evanaĝiato murinai vau, Barau na taravatu evaĝa-ruĝaiano. Ma vau ema ruĝato taravatuna na Barau ĝena guruĝatore guinena moĝa tu asiĝina ĝinavaĝi bekoki-fitoĝaiani, benamo Barau ĝena guruĝatore moĝa tu asi taunai bevaĝa-iaĝoani. Asiĝina ĝinavaĝi veĝata. <sup>18</sup> Bema Barau na evinirato dagarana tu taravatu bita korana-iaĝi ginikauani vau bita ĝabiani nai tu, mo bita doĝariani dagarana moĝa tu, ribara, dia ekiraĝi-toreato maĝurinai bita doĝariani. Senaĝi Barau tu ĝena namo e varevare-barai eguruĝa-toreto, ma Aberahamo eviniato.



<sup>19</sup> Bema moġesi nai tu, kara dainai taravatu eiaġomato? Taravatu eiaġomato anina tu, tarimarima na Barau ġekira-sirivaġiato-ġoi maġurina, moġa tu taravatu na bene vaġa-fofori ginikaua. Ma Barau na mai taravatu tu dia betanu-vanaġi vanaġini etato. Asigina. Mai taravatu tu betanu-iaġoni mo, Aberahamo natuna bemaġurini vau bea magoni. Korana Barau ġena mo guruġatore tu ġia ġenai eveiato. Mai taravatu tu Barau na aneru ta eviniato. Benamo mo aneru na tu Barau ma tarimarima vefakari ai eruġato tarimana eviniato. Ma mo vefakari ai eruġato tarimana na tu, ġita ġerai ekiraġi-foforiato, bitana korana-iaġia ġana. <sup>20</sup> Bema tarima sebona moġo eġauveini nai tu, vefakai eruġani tarimana tu asi ġena ġauvei. Ma Barau mainai tu ġereġana moġo, e ġereġana moġo eguruġa-toreto.

### Taravatu anina tu kara?

<sup>21</sup> Be, moġa tauna tu, taravatu na Barau ġena guruġatore guruġana ekira-fitoġaiiani? Asigina ġinavaġi. Korana bere Barau na tarimarima taravatu ta bere viniri, benamo mo taravatu ġenana tarima maġuri beġere doġaria nai tu, moġoni, ġita tu taravatu korana-iaġi-ginikauna ġenana, vei-iobukaiobuka tarimarai bitara iaġo. <sup>22</sup> Senaġi Buka Veaġai etoreato guruġana na ekiraġi-foforiani, ekirani, “Mai tanobara mabarabarana tu vei-rakava ġena seġuka gaburenai etanuni.” Moġa lorinai kara Barau na ekiraġi-toreato dagarana, moġa tu Iesu Keriso ġenai bita veġabidadamani vau bita doġariani. Moġa tauna tu, Keriso bevaġa-moġoniani tarimana tu Barau na ekiraġi-toreato varevarena beviniani.

<sup>23</sup> Iesu ġenai veġabidadama maiġa roġosi roġo bere fofori nuġanai, tovotovonai ġita tu taravatu ġena seġuka gaburenai tatanuto-ġoi, taravatu na ebiri-ġaurato mo, Iesu ġenai veġabidadama Barau na ma ema vaġa-foforiato. <sup>24</sup> Be, taravatu na tu ġita eguine-iaġirato mo, Keriso eiaġomato, benamo ekorito. Moġa anina, ġita tu Iesu ġenai bita veġabidadamani vau, Barau bekirani, ġita tu asi ġera rakava betoni. <sup>25</sup> Initoma tu veġabidadama ġena nega beraġasi, naima taravatu na ġita tu asi ma beġori-kaurani.

### Veġabidadamai Barau natunai bita iaġoni

<sup>26</sup> Ġomi mabarabarami tu Barau natuna, korana tu Keriso Iesu ġenai ġoveġabidadamani bene. <sup>27</sup> Ġomi babatiso ġoġabiato tarimami mabarami, Keriso ġesi ġosebonato, be Keriso nuġanai ġotanuni. <sup>28</sup> Ġomi mabarami fakami ai ta tu asi ġemu irau ta. Ġoi tu Iuda tarimamu o irau bese tarimamu, tuġu-rakaorakao tarimamu o fakai otanuni tarimamu, vavine o tau, senaġi ġomi mabarami tu sebona moġo. Keriso Iesu ġesi ġosebonato nai, ġomi mabarami tu sebona kwariġutu moġo. <sup>29</sup> Bema ġomi Keriso ġena tarimarima nai, ġomi tu Aberahamo besena, ema Barau na ekiraġi-toreato dagarana maki boġo ġabiani.

### Vetuġunaġi tauna tu irau, ma natuna korikoriri maki irau

**4** Au tu iniġesi akirani: Mero misina ta, bema ġia roġo mero kei neganai, tamana na eviniato dagarari mabarabarari asi roġo beġaunarini. Aba, mo dagara mabarabarari tu ġia ġena farefare, senaġi ġia tu roġo mero kei, naima ġia na asi roġo beġaunarini. A ġia tu tuġu-rakaorakao tarimana kavana roġo betanuni. <sup>2</sup> Mo mero misina benariani tarimari, ema mo ġena dagara beġe ġita-ġaurini tarimari ġeri veġitaġau gaburenai roġo betanuni, beiaġoni mo, tamana na ekiraġi-toreato ġarona bea

ġabiani. <sup>3</sup> Ġita maki moġesina, roġo mero misira e kekenira misira negari ai tu, taravatu irauirau e tanobara barauri ġeri tuġu-rakaorakao merora e kekenirai taiaġoto. <sup>4</sup> Senaġi Barau na eviriġiato ġarona evotuto nai, Barau na Natuna etuġu-iaġomaiato, vavine ta ġenana ema maġurito. Barau Natuna etuġu-iaġomaiato maiġa tu, taravatu ġena seġuka gaburenai ema maġurito. <sup>5</sup> Ġia taravatu ġena seġuka gaburenai ema maġurito korana tu, taravatu ġena seġuka gaburenai tatanuni tarimarimara benema voi-ġenoġoira, benamo Barau natunai bisini iaġo ġana.

<sup>6</sup> Gomi tu moġoni Barau natuna. Moġesi naima Barau na Natuna Iaukana etuġu-mariġoato, ġita tata lorurai o nuġarai eraka-toġato, ma etanuni. Mo Iauka moġa ġita lorura ġuturi na ekea-rosini, ekirani, “Tamagai, Tamagai!” etoni. <sup>7</sup> Moġesi naima ġomi toma tu dia taravatu ġena tuġu-rakaorakao tarimami. Asiġina. Ġomi toma tu Barau natuna. Ġomi tu moġoni Barau natuna lorinai, Barau na natuna bevinirini dagarari mabarabarari tu ġomi na maki boġo ġabirini.

### Paulo na Galatia tarimari etuġamaġi-baregorito

<sup>8</sup> Guinenai ġomi na Barau roġosi roġo boġoro ribaia neganai, ġomi tu ġofaġofa barauri ġotoma-rakarigo vinirito-ġoi, (ġia tu ġima veiveiri dagarari moġo), ġia ġeri tuġu-rakaorakao tarimari ai ġoiġoto. <sup>9</sup> Senaġi toma tu, Barau boġoma ribaia, ba nakira, Barau na ġomi bema ribami. Ma kamasi nai tu taravatu moiramoirari, asi tauri dagarari ma ġokorana-iaġi ġenoġoiri ġotoni? Ġomi ġourani tu, maniġeri taravatu na ma beġene barubaru-tarimi ġotoni, ei? <sup>10</sup> Ġomi tu ġaro e ġue, vereko ġarori e laġani tari ġotuġamaġi-baregorini e ġokorana-iaġi baregorini. <sup>11</sup> Au ġomi ġemi veiġa aġitarini tu, mai ama tuġamaġi-garini. Akirani, au ġomi ġemi ai tu, betaġu avekwarai-kavato banaġu atoni.

<sup>12</sup> Tarikakagu mabarami, anoġimini, au kavana boġono vei, korana au maki taravatu aiaġuiato nai, ġomi kavana aveito bene. Ġomi na au ġegu ai veiġa rakavana ta tu asi ġoveiato. <sup>13</sup> Ġomi maki ma ribami, au tovtovonai ġomi Vari Namona au na aġobata-vinimito tu, mo keve ta na eġabiguto, benamo maninai tatanuto-ġoi nai. <sup>14</sup> Aba, au ġegu ai mo keve moġa tu, ġomi ġemi ai vetovonaġi baregona ta, senaġi asi ġoġita-fitoġaguto, e asi ġoragakwane-moġovaġiguto. A ġomi na au tu Barau ġena aneru ta boġoro ġabi-raġea ilailanai ġoġabi-raġeguto. Ma au tu noġa moġo Keriso Iesu tauġanina korikorina noġa ġoveiguto. <sup>15</sup> Ġomi ġemi iaku e verere maki barego. A toma tu kamasi, mo iaku e verere tu aiġeri, ei? Mai tu moġoni aguruġani, mo negai bema boġoro ura, matami ġoġibo-vaġiri, benamo au ġovinigu boġoro si nai tu, ġoro ġibo-vaġiri, benamo boġoro vinigu. <sup>16</sup> Toma tu kamasi? Guruġa moġoniri akira-varamini nuġanai tu, ġemi vetari tarimanai ma boġo vaġa-iaġoġu?

<sup>17</sup> Maniġeri ġofaġofa tarimari na ġomi ġemi ai ura tu barego lelevaġina ġetoreani, senaġi ġia ġeri tuġamaġi e ura tu asi roroġoto. Ġia ġeri ura baregona ġeveiani tu, ġomi ġai ġemana moġo boġono raka-veġita, benamo ġia ġeri ai beġene ġabivanaġimi ġetoni. Ma ġia na beġene ġabi-vanaġimi, be ġia boġono ura-viniri ġetoni. <sup>18</sup> Vanaġivanaġi tarimarima namo beġene ġabia uranai, bita uravini-baregorini tu namo vedaurea. Ma namo bene ġora ġana, tarimarima bouravini-baregorini maġurina tu, dia au ġoiragu ai moġo boġono veia. Asiġina. <sup>19</sup> Natugu, ġomi tu au na atuġamaġi-kaumini. Au tu ġomi urami ai, be noġa vavine ma baniri na mero ġeruġu-vaġirini ġetoni nai, midigu ġeġabirini kavana, au midigu aġanini. Mai midigumidigu tu baġabi-iaġoani mo, Keriso vetoġana korikori ġomi ġemi ai bevetoreni. <sup>20</sup> Initoma

au ġegu ura barana tu, ġomi sevimi ai barasi ruġa-tari, be garogu bara kefoa, bara vaġa-kava ginikaumi. Korana au ġomi ġemi ai tu mai ama daradarani, asi aribani, kamasi bavaġa-kavamini.

### Hagar ma Sara

<sup>21</sup> Ġomi taravatu gaburenai tanu ura-dikana ġoveini tarimami na ġokira-varagu. Ġomi taravatu na kara ekiraġiani guruġana tu ġoseġaġi-ginikauani ba? <sup>22</sup> Buka Veaġa tu maiġesi etoreato: Aberhamo natuna tu ruarua, ta tuġu-rakaorakao vavinenena ġenana emaġurito, ma ta tu vavine fakana, dia tuġu-rakaorakao vavinenena, ġenana. <sup>23</sup> Tuġu-rakaorakao vavinenena ġenana emaġurito merona tu, Aberhamo e Hagar ġegenavogoto, monana eġorato. Senaġi vavine fakana ġenana emaġurito merona tu, Barau ġena guruġatore lorinai emaġurito. <sup>24</sup> Mai vetoġa maiġeri tu guruġa vaġa-ilailari veiġari moġo. Mai vavine ruarua maiġeri tu, Barau ġena kiraġitore ruarua ġevaġa-foforirini. Hagar tu Barau ġena kiraġitore ta Sinai Ġorona na eiaġomato dagnarana ekiraġiani, ma ġia na eruġa-vaġirito tarimari tu tuġu-rakaorakao tarimari. <sup>25</sup> Mai guruġa “Hagar” tu Arabia tarimari na Sinai Ġoronai ġekiraġiani. Ema Hagar maki toma etanuni Ierusalemna vetoġana kavana. Korana mai Ieruselema sitina e Ieruselema tarimari tu tuġu-rakaorakao tarimari. <sup>26</sup> Senaġi gubai etanuni Ierusalemna tu faka. Ma ġia tu ġita sinara. <sup>27</sup> Buka Veaġai tu maiġesina ekirani, “Vavine gabanimu,

mero asi oġabini vavinemu,  
e mero ġabi midiguna asi ribamu vavinemu,  
noiaku e noverere!

Korana tu ġaraġona na eiaġuiato vavinenena natuna tu ġutuma gorogoro, ma ġaraġona na asi eiaġuiato vavinenena natuna tu asi vovoka.”

<sup>28</sup> Tarikakagu mabarami, ġomi tu Isako kavana. Barau ġena guruġatore lorinai, Barau natunai ġoiaġoto. <sup>29</sup> Mo negai Aberhamo e Hagar ġegenavogoto nai, eġorato merona na Iauka Veaġa ġena seġukai emaġurito merona evaġa-midigu midiguato, moġesi kavana maitoma maki mo veiġa sebona eġorani. <sup>30</sup> Senaġi Buka Veaġai etoreato guruġana tu kara etoni? Ġia tu ekirani, “Mani tuġu-rakaorakao vavinenena ma natuna ġesi tu ġomi sevimi na boġono lai-veġitari. Korana vavine fakana natuna ġena farefare mani tuġu-rakaorakao vavinenena natuna ġesi tu asi veġata beġe ġauna-vegogoani.” <sup>31</sup> Ma, tarikakagu, ġita tu dia tuġu-rakaorakao vavinenena natuna. Asiġina. Ġita tu vavine fakana natuna.

### Taravatu irauirauri ġeri tuġu-rakaorakao tarimari ai asi ma boġono iaġo

**5** Ġita tu bitana faka uranai, Keriso na taravatu misimisiri ġerina eruġa-vaġirato. Be boġono ruġa-gigitari. Ma tauġemi mani Iuda tarimari ġeri taravatu misimisiri e vereko irauirauri ġeri tuġu-rakaorakao tarimami ai asi ma boġono vevaġa-iaġo.

<sup>2</sup> Ġoseġaġi! Au Paulo na akiramini, bema ġomi tauġanami kefirri beġe lama-vaġirini nai tu, Keriso na ġita bene ruġa-vaġira ġana, kara eveiato, moġa tu asi ġena seġuka ġomi ġemi ai. <sup>3</sup> Ema mani deidei tauġaniri kefirri beġe lama-vaġirini tarimami tu navaġa-guruġami, ġoseġaġi. Ġomi tu taravatu mabarari misikose boġono korana-iaġi ginikauri veġata. <sup>4</sup> Bema ġomi ġokirani, taravatu boġono korana-iaġi ginikaua, be Barau ġoiranai vei-iobukaiobuka tarimami ai boġono iaġo ġotoni tu, tauġemi moġo Keriso ġenana ġoveġabi-ġerevaġini. Ema ġomi tu Barau ġena namo e varevare-

bara ġenana ġoveġitani. <sup>5</sup> Iauka Veaġa ġena seġukai Barau ġenai taveġabidadamani, ema tavaġa-nogani, Barau na vei-iobukaiobuka tarimara benesi ġana. <sup>6</sup> Keriso Iesu ġesi esebonato tarimana tu tauġanina kefina ġelama-vaġiato ba asi ġelama-vaġiato tu asi ġeri irau ta; mai veiġa ruarua ġerina namo ta asi beġorani. Dagara baregona korikori tu veġabidadama, mo veġabidadama na veuravini evaġa-foforiani.

<sup>7</sup> Ġomi tu raga-iruiru ai ġoraga-ginikauto-ġoi. Ma kamara deikara na ġoirami easi-kouġauato, benamo toma tu guruġa moġonina asi ma ġokorana-iaġiani? <sup>8</sup> Mani vevaġa-ura veiġana maniġa tu dia ġomi ekeamito Barauna ġenana eiaġomani. <sup>9</sup> Boġono riba, farao evaġa-tuburini muramurana kotuna na farao evaġa-tubu baregoani. <sup>10</sup> Barau ġenai ġegu tuġamaġi tu atorekau-gwaġiġiani, korana ribagu, ġia na bevaġa-kavamini, benamo iaunega boruna ta asi ma boġo ġabi-raġeani. Mani ġomi evaġa-tuġamaġi daradaramini tarimana maniġa tu, ġena veiġa voina metona bedoġariani veġata.

<sup>11</sup> Tarikakagu mabarami, bema au na mero tauġaniri kefiri lamavaġi veiġana init-oma roġo aġobata-iaġiani nai, au karase nai tu roġo ġevaġa-midigu midiguguni? Bema au na mero tauġaniri kefiri lamavaġi veiġana roġo bara ġobata-iaġia nai tu, Keriso ġevaġa-satauroato varina aġobata-iaġiani, mainana tarimarima nuġari tu asi bere vaġa-metori. <sup>12</sup> Ġomi ġemi tuġamaġi ġevei-veġonu veġonurini tarimari maniġeri, namona tu tauġeri na seuri beġene farari.

<sup>13</sup> Moġoni, tarikakagu, ġomi Barau na ekeamito tu, taravatu irauirau korana-iaġiri ġerina boġono raka-faka ġana. Ma ġomi tata tu dia taravatu gaburenai ġotanuni, senaġi fakai ġotanuni. Mani fakai ġotanuni dainai tu, tauġani ġena ura rakavari boġono korana-iaġiri ba? Asiġina ġinavaġi! Ġomi tu ma veuravinimi ġesi karomi ġesi boġono vevaġa-kava, e karomi ġeri vetuġunaġi boġono iaġo-vini. <sup>14</sup> Taravatu mabarabarari tu taravatu guruġana sebonai moġo Barau na evaġa-iaġoato, ekirato, “Sevimu tarimana bono ura-vinia, ġoi tauġemu oveura-vinini ilailanai.” <sup>15</sup> Bema ġomi tauġemi karomi tata ġesi moġo boġo vekira-ġarama ġaramani e boġo vevaneni nai tu, boġono venari, korana karomi ġesi tauġemi moġo boġo vevaġa-rakavani, benamo veġabidadama na boġo ketoni garina.

### Tauġani ġena veiġa e Iauka ġena veiġa

<sup>16</sup> Au tu iniġesina akirani: Iauka Veaġa na ġemi maġuri bene guine-iaġiri, be tauġani ġena ura rakavari asi boġono korana-iaġiri. <sup>17</sup> Ġita ribara, tauġani na euravini-baregorini veiġari, Iauka na tu asi eura-vinirini, ema Iauka na euravini-baregorini veiġari, tauġani na tu asi eura-vinirini. Ġia tauri ruarua tu ġevevaġini. Moġesina naima, ġoi na veiġa namori bono veiri otoni veiġari tu asi oveirini. <sup>18</sup> A bema ġoi Iauka na eġori-kaumuni nai, ġoi tu dia taravatu gaburenai otanuni.

<sup>19</sup> Tauġani na euravini-iaġirini veiġari tu maiġeri: Mata-boraġa veiġari, veiġa mirori, kima veiġari, <sup>20</sup> kwaivakuku toma-rakarigo, ġora e meġameġa, vebaruvini, vevane, mama, niaraniara, arana beġene vaġa-raġea etoni veiġari, veġareveġare, vevare-kirakira veiġari, <sup>21</sup> dagara mata-kifakifari o mata-ġaniġaniri, niuniu ema ġoreġore, ma veiġa irauirau maiġesi kavari. Guinenai akira-toreġaumito kavana, toma maki akira-toreġaumini, maiġesi veiġari beġe veini tarimari tu, asiġina ġinavaġi Barau ġena Basileia nuġanai beġea raka-toġani.

<sup>22</sup> Senaġi Iauka ġwaġwana tu maiġeri: Veuravini, iaku, maino, vevaġa-gwaġiġi, veiau-namo, nuġa-namo, vetuġamaġikau, <sup>23</sup> nuġa-ġavemuko o manau, ema nuġa-

gwaḡiḡi. Maiḡeri veiḡa tu taravatu na asi ekourini, asi taravaturi. <sup>24</sup> Keriso Iesu ḡena tarimarima korikori vetoḡana tu maiḡesi: Ġia tu tauḡani na eḡabiraḡe-baregorini dagarari e euravini-iaḡirini dagarari mabarabarari eikoko-kaurito satauro tuḡunai Keriso ḡesi.

<sup>25</sup> Bema ḡita Iauka Veaḡa na ḡera maḡuri eguine-iaḡirini nai tu, Iauka Veaḡa ḡena dabarai maki bisini raka. <sup>26</sup> Ġita tauḡera asi sivekiraḡi-varaḡevaraḡe, e karora nuḡari asi sivei-barubaruri, ema karora tata ḡeri ai dagara tari moḡeri asi simata-ḡaniḡani-iaḡiri.

### Ekalesia karomi ḡesi boḡono vevaḡa-kava

**6** Tarikakagu mabarami, bema fakami ai tarima ta na veiḡa eleaiani ḡoḡitaiani nai tu, Iauka Veaḡa na ḡemu maḡuri eguine-iaḡiani tarimamu na nuḡamu ma manauna ḡesi bono vaḡa-kavaia, ḡena maḡuri bono toto-iobukaia maia. Senaḡi ḡoi tauḡemu maki bono venari. Asi namo Satani na ḡoi maki beriba-ḡanimuni ḡesi. <sup>2</sup> Karomi tata ḡesi boḡono vevaḡa-kava, ḡemi meto boḡono ḡwa-barabarari, korana moḡesi boḡo veini tu, Keriso ḡena taravatu boḡo korana-iaḡi ḡitakauani. <sup>3</sup> Bema tarima ta tauḡena bevetuḡa-maḡini, ḡia tu tarima korikori betoni, a nuḡanai ḡia tu asi ḡeiaviani tarimana. Ġia tu tauḡena kekei moḡo eveḡofaḡofa-iaḡini kekei. <sup>4</sup> Tarimarima mabarari tu tata ḡeri veiḡa e maḡuri beḡene vetau-ginikauro. Benamo moḡa murinai vauro tata ḡia tauḡena ḡena maḡuri namona iakuna bene vei. A dia ḡia ḡena maḡuri namona tarima ta ḡena maḡuri ḡesi bene vaḡa-vetovoa. <sup>5</sup> Korana tu tarima tata ḡereḡana na ḡena maruna metona bene ḡwaia.

<sup>6</sup> Tarima ta deikara riba eḡabini Barau ḡena guruḡai tarimana tu, ḡia ḡenai kara etanuni dagarari kota ḡena vevaḡa-riba tarimana bene varevare-vinia.

<sup>7</sup> Tuḡamaḡi kerereri na asi beḡene ḡabimi. Barau tu asi boḡo ḡofaiani. Tarimarima tu kara ḡuena evaroani, benamo moḡa ḡwaḡwana ḡereḡana moḡo eḡabiani.

<sup>8</sup> Tauḡani ḡena ura rakavari ekorana-iaḡirini tarimana tu, tauḡani ḡena ura rakavari ḡerina maḡuri rakava kwaikwaina e mase bedoḡaririni. A Iauka Veaḡa ḡena veiḡa namori ekorana-iaḡirini tarimana tu, Iauka Veaḡa ḡena veiḡa namori ḡerina maḡuri vanaḡivanaḡi beḡabiani. <sup>9</sup> Moḡesina naima veiḡa namori veiveiri ai asi bitana gau. Korana veiḡa namori veiveiri asi bita vaḡa-ketoani nai tu, kwakwa negana korikorinai tu ḡaniḡani bita kwa-doḡarini. <sup>10</sup> Moḡa lorinai ḡita ḡera mai nega namonai tu tarimarima mabarabarari ḡeri ai veiḡa namori bisini veiri. Ma mai veiḡa namori tu Keriso ḡenai ḡeveḡabadadamani besena mabarabarari ḡeri ai tu bisini veiri veḡata.

### Dia kefi lamavaḡi ḡenana maḡuri boḡoitaḡoani

<sup>11</sup> Mai fefa tu au tauḡegu na batorea ḡomi ḡemi. ḡoḡitaiani, mai guruḡa-matari baregori atorerini mai fefai. <sup>12</sup> ḡoseḡaḡi, ḡomi tauḡanimi kefiri beḡene lama-vaḡiri guruḡari ḡevei-gwadarini tarimari, maniḡeri tu tauḡani murika na dagarari koriri ḡevokoroku-iaḡirini tarimari. Mani tarimarima maniḡeri tu Keriso ḡena satauro dainai beḡe vaḡa-midigu midigurini garinai maniḡesi ḡeveini. <sup>13</sup> Tauḡaniri kefiri ḡelama-vaḡirini tarimari na taravatu tu asi ḡekorana-iaḡiani. A ḡia tu ḡeura-baregoni, ḡomi tauḡanimi kefiri beḡene lama-vaḡiri ḡetoni. Ġia ḡeura-dikani tauna korikori tu, ḡomi tauḡanimi kefiri beḡe lama-vaḡirini nai, beḡene veiavi ḡana. <sup>14</sup> Au dagara ta vekokorokuna tu asiḡina ḡinavaḡi baveini, a au tu ḡita ḡera Vereḡauka Iesu Keriso ḡena satauro moḡo bavekokoroku-iaḡiani. Korana mai satauro ḡenana

tanobara dagarari au ġegu ai tu ġemaseto satauro tuġunai, ema au maki tanobara dagarari ġeri ai tu amaseto satauro tuġunai. <sup>15</sup>Mero tauġaniri kefiru ġelama-vaġirini nai, namo ta asi beġorani, ema mero tauġaniri kefiru asi beġe lama-vaġirini nai, maki namo ta asi beġorani. Korana dagara baregona sebona Barau ġenai tu, Barau na tarima variġu geragerarai evaġa-iaġorani. <sup>16</sup>Mai maġuri maiġa beġe tuġamaġiani e beġe korana-iaġiani tarimari tu Barau ġena tarimarima o Isaraela tarimari korikori; ġia iatari ai maino e vevetuġaġwa bene tanu.

<sup>17</sup>Maitoma beiaġoni, tarima ta na au meto asi ma bene vinigu, korana Iesu ġebaru-viniani tarimari na ġekwariguto, be ġegu giri tauġanigu ai aġwa-rakaorini, moġeri na ġevaġa-foforinai, au tu Iesu Vereġauka ġena vetuġunaġi tarimana korikorina.

<sup>18</sup>Tarikakagu mabarami, ġita ġera Vereġauka Iesu Keriso ġena namo ma varevare-bara ġomi mabarami iaukami ġesi bene tanu. Amen.

## PAULO ĜENA TORETORE EFESO EKALESIARI ĜERI

Efeso vaĝa-foforina guruĝari

Paulo na mai fefa tu Romai dibura numanai etanuto-ĝoi nuĝanai etoreato (Apostolo 28). Mai fefa tu betaĝu laĝani 60 o 61 ai etoreato, mo tu Iesu maki emaseto murinai. Mai fefa anina baregona tu, “Ekalesia doĝorona tu Keriso Tauĝanina,” ema mai fefa ĝeĝori-kauani siriri tu karoa 4:1-4.

Paulo na mai fefa etoreato ĝena ura baregona tu, Efeso ema Asia Keina (o Asia Minor) mabarana nuĝanai maki Iesu Keriso ĝevaĝa-moĝoniani tarimari, 1) ĝeri veuravini ema veĝabidadama Keriso ĝenai ma beĝene tore-sirivaĝia ĝana; 2) bene launaĝiri, tarima guinena ma ĝena maĝuri rakavari ĝesi beĝene koki-fitoĝaia, ma tarima variĝu geragerana beĝene tore-kaua; 3) bene vaĝa-ribari, Keriso tauĝanina nuĝanai Iuda tarimari ema irau bese tarimari tu sebona moĝo, asi ĝeri irau ta; 4) Keriso ema ekalesia doĝorona nuĝari ai kara vekuretoĝana etanuni bene vaĝa-foforia ĝana.

Paulo na mai fefa tu maiĝesina eboioĝaiato:

1. Ĝita ĝera farefare ĝena barego Keriso ĝena maĝuri nuĝanai - karoa 1-3
2. Ĝita Keriso ĝena maĝuri nuĝanai tu aiĝesina bitana tanu - karoa 4-6

**1** Au Paulo, Barau ĝena ura lorinai Keriso Iesu ĝena apostolo tarimagu ai aiaĝoto. Mai fefa tu Efeso ai Barau ĝena veaĝa tarimami, Keriso Iesu ĝenai ma ĝemi vetuĝamaĝikau tarimami, atore-vinimini. <sup>2</sup>Barau ĝita Tamara ema Vereĝauka Iesu Keriso ĝerina varevare-bara e maino ĝemi ai bene tanu.

### Keriso ĝena maĝuri nuĝanai Barau na namo iauka rekenai evinirani dagarari

<sup>3</sup>Barau, ĝita ĝera Vereĝauka Iesu Keriso Tamana, sivaĝa-raĝea, korana Keriso ĝesi tasebonato maĝurina nuĝanai, ĝia na iauka rekenai gubai ĝetanuni dagarari namori moĝeri mabarari ĝita evinirato. <sup>4</sup>Tanobara roĝosi roĝo bere veia ĝaronai veĝata, Keriso na vevaĝa-maĝuri ĝauveina beveiani bakunai, Barau na ĝita ĝia ĝena eĝabiviriĝirato. Ĝita eĝabi-hidirato tu, ĝia ĝoiranai bitana veaĝa e asi ĝera vei-rakava ta bitana tanu ĝana. Barau ĝena veuravini lorinai, <sup>5</sup>ĝia na mai maĝuri eboioĝaguineato, ekirato, ĝita tu Keriso ĝenana ĝia natunai bevaĝa-iaĝorani. Mai tu ĝia tauĝena ĝena nuĝa-namo ai ĝena ura eveiato veiĝana. <sup>6</sup>Barau ĝena namo e varevare baregona marevana namo vedaureana sivaĝa-raĝea. Korana mai namo e varevare-bara maiĝa tu Barau na ĝita evini-kavarato moĝo, euravini-baregoani merona, Iesu Keriso, ĝena maĝuri nuĝanai.

<sup>7</sup>Ĝita tu, Keriso emaseto nai, rarana na evoi-ĝenoĝoirato, e ĝera rakava maki etuĝamaĝi-fitoĝarito. Mai tu Barau ĝena namo e varevare-bara namo vedaureana veiĝana, <sup>8</sup>ĝita ĝerai barego lelevaĝi evaĝa-foforiato, ema iaunega e tuĝamaĝi-faka evinirato. <sup>9</sup>Barau ĝena ura Keriso ĝenana beveiani veiĝana tu vekuretoĝa, senaĝi tauĝena ĝena nuĝa-namo ai ĝita evaĝa-ribarato. <sup>10</sup>Mai Barau ĝena ura o boioĝa maiĝa tu ekiraĝi-toreato ĝarona beĝabiani vauro bevaĝa-foforiani. Mo tu gubai ĝetanuni dagarari e tanobarai ĝetanuni dagarari mabarari Keriso kwakuna koranai beĝabi-vegogorini. Benamo Keriso na moĝeri dagara mabarari beguine-iaĝirini.

<sup>11</sup>Ĝita tu Keriso bakunai Barau na ĝena eĝabiviriĝirato, tauĝena na tovotovonai veĝata eboioĝaiato ilailanai. Ma dagara mabarari maki ĝia tauĝena na euraiaĝirmi dabarari ai eĝauvei-iaĝirini. <sup>12</sup>Moĝa lorinai ĝai Iuda tarimama, deiri Keriso

ġavaġa-moġoniato ma ġenai ġavetuġa-maġikau-guineto tarimama na Barau marevana baregona baġana vaġa-raġea.

<sup>13</sup>Ma ġomi irau bese tarimami na maki mai guruġa moġonina tu ġovaġa-moġoniato, mo tu Barau na ġomi bevaġa-maġurimini Varina Namona guruġana. Ġomi mai guruġa ġoseġaġiatio nai tu, ġovaġa-moġoniato, benamo Keriso ġenai ġovetuġamaġikauto. Moġesina naima Barau na ġomi maki ġia ġena tarimarima evaġa-iaġomito. Barau na ġomi eġabi-raġemito vetoġana ġemi ai eveiatio tu, Iauka Veaġa, ekiraġi-toreatio Iaukana, evinimito. <sup>14</sup>Ġita na Iauka Veaġa tu varau taġabiatato, moġesi naima ribara, Barau na ġena tarimarima ġeri ekiraġi-toreatio dagarana tu ġita na maki bita ġabiani. Initoma tu roġo tavenarini, beiaġoni mo, Barau na ġena tarimarima beġabi-iaġorini ġia sevina ġana. Barau marevana baregona sivaġa-raġea.

### Paulo ġena ġauġau

<sup>15</sup>Moġesina naima, au tu Iesu Vereġauka ġoġabidadama-viniani e Barau ġena tarimarima veaġari ġoura-vinirini varina ama seġaġiatio ġarona na veġata, <sup>16</sup>Barau tanikiu-vinina ġomi bakumi ai tu asi avaġa-magoani, e iatami ai aġauġauni. <sup>17</sup>Akirani, ġera Vereġauka Iesu Keriso ġena Barau na iaunega ema vevaġa-fofori Iaukana bene vinimi, be Barau boġono riba-ginikaua. Barau tu Tamara, ma ġia marevana ma mamana tu iaru-korokoro. <sup>18</sup>Ma Barau anoġiani, akirani, ġemi tuġamaġi mama bene vinimi, ġena vevaġa-namo irau vedaureana, voina baregona dagarana boġono ġabia uranai ekeamito ġotuġamaġikauani, moġa tu boġono riba-ginikaua. Be Barau ġena tarimarima veaġari na dagara namo vedaureari beġe ġabirini, moġeri tu boġono ribari. <sup>19</sup>Ema Barau tavaġa-moġoniani tarimara nuġarai Barau ġena seġuka iaru-korokorona eġauveini maiġa maki boġono ribaia. Barau ġena mai seġuka maiġa ġena ġauvei kokorena tu barego lelevaġi. <sup>20</sup>Ġia na tu mai seġuka kokorena Keriso ġenai evaġa-foforiatio nai, Keriso mase na evaġa-variġisi ġenoġoiatio, e gubai ġia ġimana aroribanai evaġa-tanuato. <sup>21</sup>Keriso tu monai tuġunai etanuni e evereni. Ġia tu iauka rakavari mabarari, ġeveġitaġauni iaukari, e ġeri maoro barego lelevaġi iaukari, e ma ġeri seġuka iaukari, ma seġuka lelevaġi aneruri, ema ara ġekiraġirini arari mabarari iata-raġeri ai evereni. Mai tu dia mai tatanuni neganai moġo, asiġina, mai tu ġoirai vau mani eiaġomani neganai maki ġia tu bevereni veġata. <sup>22</sup>Barau na dagara mabarari Keriso kwakuna fanafanana gaburenai etorerito, e Barau na ġia tu ekalesia mabarana bene debaia etato. <sup>23</sup>Ekalesia tu Keriso tauġanina. Ma mai tauġanina maiġa tu Keriso tauġena ġena maġuri na evaġa-vonu-raġeato, ema dagara mabarari maki gabu mabarari ai evaġa-vonurito.

### Barau na Keriso ġesi ma bevaġa-maġurirani

**2** Guinenai ġomi iaukami tu mase ġotanuto-ġoi, korana ġemi kira-sirivaġi e veġa rakavari ai bene. <sup>2</sup>Mo negai ġomi na mai tanobara ġena veġa rakavari ġoveirito-ġoi, ema iauka rakavari eġita-ġaurini iaukana ġokorana-iaġiatio-ġoi. Mai veġitaġau iaukana maiġa ġena basileia o veġitaġau seġukana tu barego lelevaġi guba e tanobara fakari ai. Ma ġia toma tu Barau asi ġeseġaġi-viniani tarimari nuġari ai etanuni e eġauveini. <sup>3</sup>Guinenai ġita mabarara maki ġia kavana taveito-ġoi, tauġani ġena veġa rakavari tavaġa-moġonirito-ġoi. Tauġanira e nuġara ġeri ura e tuġamaġi rakavari takorana-iaġirito-ġoi. Moġa lorinai ġita maki tarimarima kotari kavari Barau ġena baru baregona tu ġita iatarai etanuto-ġoi.



<sup>4-5</sup> Moġoni, ġita iaukara tu mase ġera kira-sirivaġi lorinai, senaġi vevetuġaġwabarara Barauna ġena veuravini barego vedaurea lorinai, Keriso ġesi ma evaġa-maġuri ġenoġoi-sebonarato. Boġono riba, ġita tu Barau ġena namo e varevare-bara moġo bakunai evaġa-maġurirato. <sup>6</sup> Keriso Iesu ġena maġuri nuġanai, ġita tu Barau na Keriso ġesi mase na evaġa-variġisi sebonarato, ma Keriso ġesi ġena vere seanai evaġa-tanu sebonarato guba vanuġanai. <sup>7</sup> Moġesi eveito korana tu, ġoirai ġia ġena veiau-namo vetoġana, ġena namo e varevare-bara barego lelevaġina ġerana bene vaġa-foforia uranai. Mai Barau ġena veiau-namo vetoġana, ġena namo e varevare-bara na eforito maġa tu, Keriso Iesu ġesi tasebonato nuġanai, ġita ġerai evaġa-foforiato.

<sup>8</sup> Ġomi tu ġemi veġabidadama ġenana Barau na ġena namo e varevare-barai evaġa-maġurimito. Ġomi tu dia tauġemi ġemi kokore na ġovevaġa-maġurito. Asiġina, mai tu Barau ġena varevare ġita evinirato. <sup>9</sup> E dia ġomi ġemi ġauvei dairi ai voimi ġoġabiato dagarana, be moġa veiavina tarima ta asi bene vei. <sup>10</sup> Ġita tu Barau ġimana veiveina tarimara. Barau na Keriso Iesu ġenana tarima variġurai evaġa-iaġorato, ġauvei e veiġa namori bisini veiri ġana. Mai ġauvei e veiġa namori tu Barau na varau erovina-torerito, ġita na bisini veiri ġana.

### **Keriso na bese ruarua evaġa-sebonarito**

<sup>11</sup> Ġomi boġono tuġamaġi, guinenai ġomi irau bese tarimami Iuda tarimari na ġekiraġimito-ġoi “kefimi asi lamavaġi tarimami”. Iuda tarimari tauġaniri kefiru tu lamavaġi. Ġia na mai mero tauġaniri kefiru lamavaġi veiġana tu tauġeri ġimari na ġeveiani veiġana. <sup>12</sup> Boġono tuġamaġi, ġomi mo negai Keriso ġesi tu ma fakami, e Isaraela besena nuġanai maki ġomi tu vanuġa boru tarimami nai asi ġeġabi-raġemito, ema Barau ġena kiraġitore eveirito nuġanai, eguruġa-toreto dagarari maki ġomi na tu asi boġo doġaririni. Ema ġomi mai tanobara nuġanai tu asi ġemi Barau ema dagara namona ta ġoirai asi ġotuġamaġi-kauani. <sup>13</sup> Ġomi guinenai tu manaġa rakava, senaġi toma Keriso Iesu ġesi ġosebonato nai, ġoma kavinaġito Barau ġenai. Ġomi Keriso rarana na ema ġabi-kavinaġimito.

<sup>14</sup> Korana Keriso tauġena tu ġita ġera maino evaġa-ġoraiani tarimana. Ġia na ġita bese ruarua bese sebonai moġo evaġa-iaġorato. Korana ġai Iuda besena ema ġomi irau bese tarimami vekaravarai ġita evare-kirarani kobena tu Keriso tauġanina satauro ai emaseto nai evare-kiraiato, benamo evaġa-rakava-ġosiġosiatu. <sup>15</sup> Ġia na Mose ġena taravatu nuġanai velaunaġi guruġari ġetanuni dagarari mabarari maki erovorito. Keriso na mo veiġa eveiato anina tu, ġia ġena ura ġita bese ruarua ġerana ġia tauġena ġesi bene vaġa-sebonara, tarima variġuna sebona moġo bene veia ġana; ema ġita fakarai maki maino bene vaġa-ġoraia ġana. <sup>16</sup> Ġia satauro ai emaseto korana tu, mai bese ruarua tauġani sebonai moġo bene vaġa-sebonari, benamo Barau ġenai ma bene ġabi-ġenoġoiri ġana. Ema ġia fakari ai ġeri veiau-rakava maki, satauro ai emaseto nai, evaġa-koririto.

<sup>17</sup> Keriso eiaġomato tu, maino varina ema ġobata-iaġiato. Mai maino varina ġomi irau bese, Barau ġesi fakami manaġa tarimami ġemi, e Iuda tauri, Barau ġesi fakari kavinaġi tarimari ġeri, ema vari-fiuato. <sup>18</sup> Ġita mabarara, irau bese tarimami e Iuda tarimama, tu Keriso ġenana lauka sebona nuġanai moġo Tamara ġenai bita iaġoni.

<sup>19</sup> Tauna moġa, ġomi toma tu dia tanukau e vanuġa boru tarimami. Asiġina, toma ġomi tu Barau ġena tarimari ġesi vanuġa sebona e Barau ġena numa tari-

mami. <sup>20</sup> Ĝomi tu numa, fore iatanai ĝeragarini kavana. Barau na ĝomi tu apostolo tarimari e peroveta tarimari iatari ai eraga-kaumito, ma Keriso Iesu tu ĝemi numa daigunina o duĝuna forena baregona. <sup>21</sup> Keriso ĝena maĝuri nuĝanai mo numa ĝauna mabarana evaĝa-tubu-tubukau ginikauato, ma ebaregoni Rubu Veaĝai eiaĝoni Vereĝauka ĝena maĝuri nuĝanai. <sup>22</sup> Keriso ĝesi ĝosebonato nai, ĝomi maki Barau na tarimarima tari ĝesi eĝabi-vegogomini, benamo Barau ĝena tanu numanai ĝoiaĝoni Iauka nuĝanai.

### Paulo ĝena ekalesia ĝauveina irau bese tarimari fakari ai

**3** Tauna moĝa, au Paulo na Vari Namona ĝomi irau bese tarimami ĝemi aĝobata-iaĝiani ĝaramanai, dibura numai atanuni maiĝegu. Au tu Keriso Iesu ĝena dibura tarimanai aiaĝoto, ma ĝomi iatami ai Barau ĝenai aĝurigurini. <sup>2</sup> Au atuĝamaĝini, ĝomi tu varau ĝoseĝaĝito, au Barau na ĝena namo lorinai mai ĝauvei eviniguto, Vari Namona, varevare-bara varina, ĝomi irau bese tarimami ĝemi bana ĝobata-iaĝia ĝana. <sup>3</sup> Mai vari vekuretoĝana, (mai tu ĝomi irau bese tarimami maki Barau ĝena tarimarimai ĝoiaĝoto varina), Barau na au ĝegu ai evaĝa-foforiato. Mai vari maiĝea tu kotuna varau batorea ini fefa nuĝanai. <sup>4</sup> Mai fefa maiĝa boĝo iaviani nai tu, boĝo riba-maoroni, au Keriso varina vekure-toĝana tu ma ribagu. <sup>5</sup> Barau na mai vari vekuretoĝana maiĝa guinenai ĝetanu-iaĝomato-ĝoi tarimari tu asi evaĝa-ribarito. Senaĝi toma tu Barau na Iauka Veaĝa ĝenana ĝena apostolo veaĝari e peroveta tarimari veaĝari ĝeri ai ema vaĝa-foforiato.

<sup>6</sup> Mai vari vekuretoĝana Barau na ema vaĝa-foforiato varina tu maiĝa: Irau bese tarimari maki Vari Namona ĝenana Iuda tarimari ĝesi bese sebonai e tauĝani sebonai moĝo beĝe iaĝoni. Benamo mabarabarari na Barau na ekiraĝi-toreato dagarana Keriso Iesu ĝenana beĝe ĝabiani. <sup>7</sup> Barau ĝena namo e varevare-bara lorinai, mai Vari Namona maiĝa bana varifiu-rakao rakaoa etato. Barau ĝena mai namo e varevare-bara varevarena tu ĝia ĝena seĝuka eĝauveini ĝenana au eviniguto. <sup>8</sup> Aba, au tu Barau ĝena tarimarima mabarari ĝeri dokodokona tarimagu, senaĝi Barau na ĝena namo lorinai mai ĝauvei eviniguto, irau bese tarimari ĝoirari ai Vari Namona bana ĝobata-iaĝia etato. Mai Vari Namona maiĝa tu Keriso ĝenai maĝuri e dagara namo vedaureari tarimarima tauĝera na asi bita ĝoitaĝorini dagarari ekiraĝirini. <sup>9</sup> Ema tarimarima mabarari ĝeri ai bana kiraĝi-fofori ginikau, Barau ĝena ura e boioĝa tu, irau bese tarimari maki ĝeri vevaĝa-maĝuri taunai bene iaĝo. Mai boioĝa o tuĝamaĝi maiĝa tu tanobara evesinato monana veĝata dagara mabarari eveirito Barauna ĝenai vekuretoĝa etanuni. <sup>10</sup> Barau ĝena tuĝamaĝi tu, maitoma vauro ekalesia ĝenana ĝia ĝena iaunega e tuĝamaĝi irauirauri, ĝeveĝitaĝauni iaukari e ĝeri maoro barego lelevaĝi iaukari ĝeri ai bene vaĝa-foforiri etato. Mai iauka maiĝeri tu guba fakanai ĝetanuni iaukari. <sup>11</sup> Mai tu Barau ĝenai vanaĝivanaĝi etanuni boioĝana. Barau na mai ĝena boioĝa maiĝa tu ĝita ĝera Vereĝauka Keriso Iesu ĝenana vauro ema vaĝa-foforiato. <sup>12</sup> Ĝita tu Keriso ĝena maĝuri nuĝanai tatanuni, ema ĝia ĝenai taveĝabidadamani lorinai, Barau sevina ĝana tu asi garina ĝesi e nuĝara gwaĝiĝi bita raka-kavini. <sup>13</sup> Moĝa lorinai au ĝegu ura baregona tu asi boĝono tuĝamaĝi-moiramoira, au amidigu-midiguni nai. Au midigu-midigu aĝoitaĝoni tu, ĝomi namo boĝono ĝoitaĝo ĝana.

### Paulo Efeso ekalesiari ġeri eġauġauto

<sup>14</sup> Au na moġeri mabarari Tamara na eveirito dagarari atuġamaġirini nai, ġoiranai avetui-tarini ma aġuri-ġurini. <sup>15</sup> Ġia tu bese sebna tarimari gubai e tanobarai ġetanuni Tamari. Ma ġia na mai bese sebna arana eturaiato. <sup>16</sup> Barau mamana marevana tu irau veġata ma barego lelevaġi naima, au na anoġiani, akirani: Ġia ġena mama marevana asikeikeina na ġia tauġena laukana ġenana seġuka bene vinimi, be nuġami e iaukani bene vaġa-kokoreri. <sup>17</sup> Korana mo dabarai tu Keriso maki ġemi veġabidadama lorinai, be ġomi nuġami ai betanuni. Ema Barau anoġiani, ġomi maki ġau ġokana e lamuna tano nuġana ġana ġevariġoni, benamo ġevelamulamu-tarini nai, ġau tano iatanai eruġa-gwaġiġini ilailanai, ġomi maki moġesina nuġami veuravini na bene vaġa-vonuri, be veuravini ai boġono ruġa-giġitari. <sup>18</sup> Be Barau ġena tarimarima veaġari mabarari ġesi Keriso ġena veuravini barego lelevaġina, raba-bana, e maukana, e varaġena, ema dodokuna boġono ribaia, <sup>19</sup> ema boġono riba, mai Keriso ġena veuravini tu riba mabarari maki evanaġirini. Mai veuravini boġono ribaia, be Barau tauġena ema ġena maġuri mabarana na ġomi bene vaġa-vonuvonuraġemi.

<sup>20</sup> Barau ġena seġuka ġita ġerai eġauveini tu, dagara barego lelevaġiri eveirini; ġita na ġia tanoġiani dagarari ema ġita na tatuġamaġirini dagarari mabarari maki evanaġirini. <sup>21</sup> Moġa lorinai ġita ekalesia nuġanai tarimara e Keriso Iesu ġena maġuri nuġanai tarimarimara ġuruna ġuruna na mabarabarara na Barau moġo bitana vaġaraġea vanaġivanaġi. Mai tu guruġa moġonina. Amen!

### Ekalesia mabarara tu Keriso nuġanai tauġani sebna

**4** Au Paulo tu dibura numai atanuni, korana Vereġauka vetuġunaġina aiaġo-viniani nai. Au na ġomi alaunaġimini, Barau na ekeamito maġurinai moġo boġono tanu, boġono tanu-namonamo moġo. <sup>2</sup> Karomi vekaravari ai ġomi tu boġono vetore-variġo, ema manau ai boġono tanu, boġono vevaġa-gwaġiġi. Ma karomi tari na veiġa ġelearini nai tu, veuravini ai nuġami boġono vaġa-gwaġiġiri karomi ġeri ai, be karomi tata ġesi asi boġono vebaru-vini, a boġono veiau-namo moġo. <sup>3</sup> Ġita tu lauka Veaġa na eġabi-vegogorato, be tasebonato, ma maino varona na ebaru-vegogorato, be maino ai tatanuni. Moġa lorinai mai tasebonato ma maino ai tatanuni maġurina maiġa tu boġono kokore, be boġono ġabi-giġitaria.

<sup>4</sup> Ġita mabarara tu tauġani sebna moġo, ema lauka maki sebna moġo ġerai etanuni. Ma Barau na ġomi ekeamito maki dagara sebna moġo uranai ekeamito, ma ġita toma tu mo dagara sebna moġo tatuġamaġi-kauani, (mo tu maġuri vanaġivanaġi). <sup>5</sup> Vereġauka sebna etanuni, veġabidadama sebna etanuni, babatiso veiġana sebna moġo etanuni. <sup>6</sup> Barau maki sebna etanuni, ma ġia tu ġita mabarabarara Tamara; e ġia tu barego ma tarimarima mabarara iata-raġerai etanuni, eġita-ġaurani, ema tarimarima mabarara fakarai eġauveini, ma tarimarima mabarara nuġarai etanuni.

<sup>7</sup> Ma ġita tata tu Keriso na varevare evinirato, ġia ġena namo e varevare-bara ilailari ai bene vinira etato kavana. <sup>8</sup> Moġesina naima Buka Veaġai Keriso varina maiġesi ekirani, “Ġia guba ġana ma evaraġeto nai tu, dibura tarimari ebarubarurito,

benamo ġia murinai evaġa-rakarito, ma eġori-kaurito, benamo tarimarima vavevare evinirito.”

<sup>9</sup> Mai guruġa, “Ġia ma evaraġeto,” anina tu kara? Mai guruġa, “Ġia ma evaraġeto,” na ġita evaġa-ribarani, Keriso tu dia evaraġeto moġo. Asiġina. Ġia tovotovonai tu tanobara gabigabina ġana roġo evariġoto. <sup>10</sup> Mo evariġoto tarimana moġa, ġereġana guba mabarari tu evanaġirito, ġia tu tuġuna vanigerena ġana evaraġeto. Ġia moġesi evaraġeto anina tu, guba e tanobara mabarana ġia na tauġena laukana na bene vaġa-vonua ġana. <sup>11</sup> Ma ġia tauġena na kotari tu apostolo ġauveina evinirito, (mai tu ekalesia vaġa-ruġana ġauveina), tari tu peroveta ġauveina evinirito, tari tu evanelia ġauveina evinirito, tari tu ekalesia nari ġauveina e Barau ġena guruġa vaġa-riba-iaġina ġauveina evinirito. <sup>12</sup> Moġeri ġauvei evinirito tauna korikori tu, Barau ġena tarimarima veaġari bene rovina-toreri, ġena ġauvei beġene veiri, e Keriso tauġanina beġene vaġa-tubu ginikaua, <sup>13</sup> bene iaġo mo, ġita ġera veġabidadama ema ġera riba Barau Natuna ġenai beġea baregoni e bita sebona-korikorini, benamo bita barego-ginikauni, ema Keriso ġena veiġa e maġuri mabarana maki ġita na bita ġabiani.

<sup>14</sup> Benamo mo dabarai ġita tu dia mero raraka-rarakari kavari, be vevaġa-riba iraurauri na e tarimarima ġeri iaunega ġofaġofari na ema tuġamaġi rakavari na asi beġene ġofa-iaġora e ġofa-iaġomara; noġa moġo ġasi iavara ema ureure na ekwari-iaġoani ekwari-iaġomaiani kavana. <sup>15</sup> Senaġi ġita tu veuravini ai guruġa moġoniri bitana kiraġi, be Keriso ġena maġuri nuġanai dagara mabarari ai tu bitana barego. Keriso tu ġita edebarani. <sup>16</sup> Keriso tu tauġani debana, ma tauġani mabarana tu ġia ġena seġukai legana tata ġia na etorerito gaburi ai ġeġauveini. Ma ġia ġena seġukai komukomuri evaġa-tubukau gwaġiġirini varovarori na turiġa komukomuri evaġa-tubutubu-kaurini, ema evaġa-tubutubukau gigitaririni. Benamo monana tauġani legana iraurau tauġani nuġanai tata ġena ġauvei ġeveiani, benamo tauġani ebaregoni, ema ma veuravinina ġesi tauġena etubu-baregoni.

### Barau ġena doġoro tarimari ġeri tanu dabarana

<sup>17</sup> Tauna moġa, au aurani, mai guruġa ta nakira-varami Vereġauka aranai. Au ġegu ura baregona, ġomi tu roġo mukunai ġetanuni tarimari ġeri tanu maġurinai tu asi ma boġono tanu-ġenoġoi. Korana ġia ġeri tuġamaġi tu asi aniri dagarari ġeri ai ġetorerini. <sup>18</sup> Ġia ġeri tuġamaġi tu mukuna furufuru, be asi ġeri tuġamaġi-faka dabarari. Barau ġena maġuri ai maki ġia tu murikanai ġetanuni, korana ġia tu asi ribari ġeri nuġa-bubu ai bene. <sup>19</sup> Ġia tu veiġa namori mamiraġiri ema veiġa rakavari mamiraġiri maki asiġina ġinavaġi ġemami-raġirini. Ġia tu tauġeri ġevevini-fitoġato rakava ġena, vei-taġuitaġui dabarari ai ġerakani e mata-boraġa veiġari ġeuravini-baregorini.

<sup>20</sup> Senaġi ġomi na Keriso ġena maġuri tu dia moġesina ġoribaiato. <sup>21</sup> Ġomi na ġia varina tu moġoni ġoseġaġiato, ema Iesu ġena maġuri nuġanai guruġa moġonina Iesu ġenai etanuni tu ġevaġa-riba-iaġimito. <sup>22</sup> Ġevaġa-ribamito tarimari ġekirato: Ġemi maġuri guineri boġono koki-fitoġari, dabuġa guineri ġokoki-fitoġarini kavana. Mo tu tarima guinena ġekiraġiato. Ġia tu dagara tari na ġeġofaiani, ma moġeri mata-ġaniġaniri ai be erakava-kwaikwaini. Ġia tu boġono koki-fitoġaia. <sup>23</sup> Be ġemi tuġamaġi mabarana ma bene veiareva-ġenoġoi. <sup>24</sup> Ema tarima variġuna ma boġono riġo-kaua, dabuġa variġuna ġoriġo-kauani kavana. Mai tarima variġuna tu Barau ilailana iobukaiobuka e veaġa eveiato.

<sup>25</sup> Moġa lorinai ġomi tata na veiġa ġofaġofari ġemina boġono tore-veġitari, be-namo sevimi tarimari ġesi guruġa moġoniri moġo boġono kiraġi. Moġesi boġono vei, korana ġita mabarara tu tauġani sebna legana tata. <sup>26</sup> Boġo baruni, senaġi vei-rakava tu asi boġono vei; e ġemi baru asi bene iaġo mo, ġaro benea keto-firiġo. <sup>27</sup> Diabolo faka ta asi boġono vinia. <sup>28</sup> Elemani tarimana asi ma bene lema-ġenoġoi, a bene iaġo, benea ġauvei. Ġia tauġena ġimana na ġauvei namori bene veiri, be bene ġoitaġori dagarari kotari tu asi ġeri-ġari tarimari bene vaġa-kava-iaġiri. <sup>29</sup> Bokami na guruġa rakavari asi beġene raka-rosi. Senaġi vevaġa-kokore guruġari moġo boġono kiraġi, moira tarimari vaġa-kavari ġana, be beġe seġaġirini nai, kokore beġene ġabi. <sup>30</sup> Ema Barau ġena Iauka Veaġa asi boġono vaġa-nuġa-metoe. Korana Iauka Veaġa tu Barau ġena vetoġa o maka ġomi ġemi ai etanuni. Moġa anina ġomi tu ġia ġena. Mani maka ġomi ġemi ai tu betanuni, beiaġoni mo, Barau na ġomi bevaġa-maġuri korikorimini ġarona. <sup>31</sup> Nuġa ġirimaġirima, baru e baru-rakavarakava, vevane ema vevaġi, e tarima vaġa-rakavari tuġamaġiri, ema guruġa rakavari mabarari boġono tore-veġitari ġemina. <sup>32</sup> Karomi ġesi boġono veiau-namo ema boġono veveura-vini. Tata karomi ġeri ai veiġa rakavari ġoveirini moġeri boġono tuġamaġi-fitoġari, Keriso ġena maġuri nuġanai Barau na ġemi rakava etuġamaġi-fitoġarito kavana.

### Mamai boġono tanu

**5** Ġomi tu Barau natuna, euravini-baregomini, moġa lorinai ġia boġono tovotovoa. <sup>2</sup> Veuravini ai boġono tanu Keriso kavana. Ġita eura-vinirato lorinai, tauġena tauġanina e ġena maġuri etore-tariato ġita urarai. Ġia na tauġanina tu varevare dagarana bonana namo vedaureana dagaranai evaġa-iaġoato, ema Barau ġena ginitaġo mamoenai evaġa-iaġoato.

<sup>3</sup> Ġomi tu Barau ġena tarima veaġami ai ġoiaġoto lorinai, kima ema mata-boraġa guruġari, veiġa mirori guruġari, e mata-ġaniġani guruġari ġomi fakami ai asi boġono kiraġiri. <sup>4</sup> Guruġa mirori, guruġa babori, ema vaseva rakavari maki asi boġono kiraġiri, korana maiġeri tu asi namo, senaġi ġomi tu Barau moġo boġono tanikiu-vinia. <sup>5</sup> Korana dagara sebna boġono riba: Ekimani tarimana, e veiġa mirori eveini tarimana, e emata-ġaniġanini tarimana tu Keriso ema Barau ġeri Basileiai ġia tu asi voina e asi ġena gabu. Mata-ġaniġani veiġana tu noġa moġo kwaivakuku tomarakiġo-vinina veiġana kavana.

<sup>6</sup> Tarimarima ġeri ġofaġofa guruġari na asi bene ġofami, korana Barau ġena baru-baregona tu maniġeri veiġa ġaramari ai ġeseġaforeni tarimari iatari ai bema vaġa-foforiani. <sup>7</sup> Moġa lorinai moġesi ġeveini tarimari ġesi asi boġono vekako. <sup>8</sup> Ġomi guinenai maki mukuna furufuru tarimari, senaġi toma ġomi Vereġauka ġena maġuri nuġanai tu mama tarimari. Ġomi tu mama natuna, be mama maġurinai boġono tanu ema boġono raka. <sup>9</sup> Mama ġwaġwana tu veiġa e tuġamaġi namori, veiġa iobukaiobukari, ema guruġa e maġuri moġoniri nuġari ai etanuni. <sup>10</sup> Vereġauka na kamara maġuri ema veiġa euravini-baregorini boġono vetauri, be boġono ribari. <sup>11</sup> Mukuna veiġari ema ġauveiri tu asi ġwaġwari namori, be asi boġono veiri ema asi boġono ġauvei-iaġiri. A ġomi na moġeri veiġa e ġauvei tu boġono vaġa-foforiri, mo tu vei-rakava veiġari. <sup>12</sup> Korana mai seġafore tarimari na kara ġevei-vekuretoġarini, moġeri tu bokiraġirini ai moġo bemaiakamuni. <sup>13</sup> Senaġi mama na tu moġeri dagara mabarari evaġa-fofori ginikaurini, be mamai tu vetoġari korikori ġefofoforini, <sup>14</sup> ko-

rana mama na vauro dagara vetoġari korikori evaġa-foforirini. Moġesi naima ġera guruġa ta ekirani,

“Roġo oġenani tarimamu notataġa!

Mase na novariġisi!

Be Keriso na bene mama-tarimu.”

<sup>15</sup> Moġa lorinai, ġemi veiġa loriri boġono toreri, babo tarimari kavari asi boġono vei, senaġi iaunega tarimari boġono tovtovori. <sup>16</sup> Ġemi taimi mabarana boġono ġauvei-iaġi ginikauri, a ta asi boġono fitoġa-kavaia, korana toma tu nega rakava-kwaikwaina. <sup>17</sup> Tauna moġa, asi boġono vei-babobabo, senaġi Vereġauka ġena ura tu kara, moġeri boġono tuġamaġi-fakari, be boġono ribari. <sup>18</sup> Wain asi boġono niu-lelevaġi, bevaġa-babomini ġesi. Mo veiġa na ġemi maġuri bevaġa-rakavaiani. A ġomi tu Iauka Veaġa na neġi bene vaġa-vonuvonu-raġemi. <sup>19</sup> Karomi Salamo ai e Barau vaġa-raġena mariri ai ema Iauka Veaġa na evinimini mariri ai boġono vaġa-guruġari. Boġono mari ema nuġami mabarari ma iakumi ġesi Vereġauka boġono vaġa-raġea. <sup>20</sup> Vanaġivanaġi ġera Vereġauka Iesu Keriso aranai Tamara Barau boġono tanikiu-vinia dagara mabarari dairi ai.

<sup>21</sup> Karomi gabureri ai boġono tanu, moġesi boġo veini tu Keriso boġo gubakauani.

### **Veġaraġo vavineri ema tauri**

<sup>22</sup> Veġaraġo vavinemi, Vereġauka ġena veġitaġau gaburenai ġotanuni kavana, ġaraġomi ġeri veġitaġau gaburenai boġono tanu. <sup>23</sup> Korana tau tu ġaraġona vavinena ġena deba tarimana, Keriso ekalesia ġena deba tarimana kavana. Keriso tu ekalesia ġena vevaġa-maġuri tarimana. Ekalesia tu Keriso tauġanina. <sup>24</sup> Vaġa-ilailana ekalesia Keriso ġena veġitaġau gaburenai etanuni kavana, vavine maki ġaraġori tauri ġeri veġitaġau gabureri ai beġene tanu dagara mabarari ai.

<sup>25</sup> Tau, ġaraġomi vavineri boġono ura-viniri, Keriso na ekalesia eura-viniato ilailanai, benamo ġia uranai Keriso tauġena ġena maġuri etore-tariato. <sup>26</sup> Keriso moġesina eveito tu, ekalesia bene vaġa-veaġaia, ġena tarimarimai beġene iaġo ġana. Ġia na ġena guruġa na e nanu na eġuriġiato, evaġa-veaġaiato. <sup>27</sup> Benamo Keriso tauġena ġoirana ekalesia marevana baregona na benema vaġa-ruġa-taria ġana. Benamo ekalesia ġia ġoiranai bene ruġa tu, ġenai miro misina ta maki asiġina, kefi ġemakuku-makukuni kavari maki asiġina, ema rakava misina ta maki asiġina ġinavaġi. Senaġi ekalesia Keriso ġoiranai tu veaġa ema vaġa-daġana ker-erena misina ta maki asiġina ġinavaġi bene ruġa-tari. <sup>28</sup> Mai dabara sebonai tau na ġaraġori vavineri beġene ura-viniri. Beġene ura-viniri tauġeri tauġaniri ġeura-vinirini ilailanai. Ġaraġona vavinena eura-viniani tarimana tu ġia tauġena maki eveura-vinini. <sup>29</sup> Korana tau ta na ġia tauġena tauġanina vaġa-rakavana tu asi euranai, senaġi eġubuani e eġitaġau-ginikauani, Keriso na ġena ekalesia eveiani kavana. <sup>30</sup> Korana ġita tu ġia tauġanina legana. <sup>31</sup> (Tau e vavine tu tauġanina sebona, Buka Veaġai ekirani kavana, ekirani), “Moġesi naima tau na tamana e sinana beragakwanerini, benamo ġaraġona vavinena ġenai bema-kafakauni, benamo tauri rurarua tauġani sebonai beġe iaġoni.” <sup>32</sup> Mai guruġa ema maġuri maiġa tu vekuretoġa, ma anina tu barego lelevaġi. Au na Keriso ema ekalesia ġeri veġaraġo aki-raġirini. <sup>33</sup> Senaġi ma nakira: Ġomi tata na maki ġaraġomi vavineri boġono ura-viniri, tauġemi tauġanimi ġoura-vinirini kavana. Vavine na maki ġaraġomi tauri boġono gubakauri.

### Natu e tama sina

**6** Natu, tamami e sinami garori boġono seġaġiri Vereġauka ġena maġuri nuġanai ġotanuni nai, korana mo tu veiġa maorona. <sup>2</sup>“Tamamu e sinamu bono gubakauri,” korana mai tu taravatu giniguinena ma kiraġi-torena ġesi dagarana: <sup>3</sup>“Be ġemu tanu maġurina bene namo ema mai tanobarai ġemu tanu-maġuriri beġene mauka.”

<sup>4</sup>Ma tama na maki, natumi asi boġono vaġa-baruri, senaġi Vereġauka ġena vevaġa-riba guruġari ema sisiba guruġari boġono viniri. Be moġeri guruġa e veiġa beġene korana-iaġiri ġeri tanu ġarori mabarari ai.

### Tuġu-rakaorakao merori e ġeri baregori

<sup>5</sup>Tuġu-rakaorakao meromi, ma vegubakaumi e ma garimi ġesi mai tanobarai ġeġita-ġaumini tarimari garori boġono seġaġiri. Ġomi ġeġita-ġaumini tarimari maniġeri tu ma nuġami mabarari ġesi boġono seġaġi-viniri, Keriso nuġami mabarari ġesi boġoro seġaġi-vinia ilailanai boġono seġaġi-viniri. <sup>6</sup>Tarima tari tu ġeġita-ġaurini tarimari iauri ġevaġa-namori ġana tu ġoirari ai ġeġauvei-ginikauni, senaġi ġeġita-ġaurini tarimari ġeraka-doġe-muriġini tu asi ġeġauvei-kokoreni. Ġia ġeri veiġa na asi boġono iaġo. Ġomi tu Keriso ġena vetuġunaġi tarimami lorinai, ma nuġami mabarari ġesi Barau ġena ura boġono veia. <sup>7</sup>Nuġami mabarari ma namori ġesi vetuġunaġi boġono iaġo-vini, Vereġauka ġenai boġoro veia kavana, a dia tarimarima ġeri. <sup>8</sup>Korana ribami, Vereġauka na ġemi ġauvei namori ġoveirini voiri tata bevinimini. Enabe ġomi tu tuġu-rakaorakao tarimami o fakai e maġuri namonai ġotanuni tarimami, voimi tata bevinimini veġata.

<sup>9</sup>Ġomi veġitaġau tarimami maki, ġemi tuġu-rakaorakao merori ġeri ai veiġa namori boġono vei. Veiġa metori e vaġa-gariri veiġari ġeri ai asi boġono vei, korana ġomi ma ribami, ġia ema ġomi eġita-ġaumini Verena baregona tu gubai etanuni. Ema ma ribami maki, ġia na tarimarima ġeri vetoġai tu asi eġabi-raġerini, ġia ġenai tarimarima tu mabarari ilaila moġo.

### Vetari dabuġari

<sup>10</sup>Ġegu guruġa magona tu maġa: Boġono kokore Vereġauka ġena maġuri nuġanai, ema Vereġauka ġena seġuka na bene vaġa-kokoremi. <sup>11</sup>Barau ġena vetari dabuġari mabarari boġono veiri, be Diabolo ġena iaunega boioġari ġoġaġofari eveirini nai, boġono kokore, be boġono tore-ġauri. <sup>12</sup>Korana ġita tu dia tarimarima ġesi tavetarini. Asiġina. Ġita tu ġeveġitaġauni iaukari baregori, e ġeri maoro barego iaukari, e mai tanobarai mukuna ġeġita-ġauani iaukari, ema iauka rakavari asisebo guba gaburi ai ġetanuni iaukari ġesi tavevaġini. <sup>13</sup>Moġa lorinai Barau ġena vetari dabuġari mabarari na ġovedabuġa, be ġaro rakava kwaikwaina bene iaġoma nai, ġomi tu boġono ruġa-gigitari, ema ġauvei mabarari boġo vei-ġosirini murinai, ġomi tu roġo boġono ritoġo-gwaġiġi.

<sup>14</sup>Be, boġono ruġa-gigitari, ma maġesi boġono vedabuġa: Gabakami ai guruġa moġonina boġono toua, gabaġau gabakami ai ġotouani kavana. Vei-iobukaiobuka tu koba kouġauna ġana, funu dabuġa kavana kobami ai boġono kafa-kauri. <sup>15</sup>Ema kwakumi ai tu maino varina namona boġono fiua veġana boġono veia, tamaka ġoveirini kavana. <sup>16</sup>Moġeri muriri ai tu veġabidadama ġesina boġono ġabi-vaisia,

monana Diabolo ġena veiġa rakavari na bedibamini dibari ma karava-karavari ġesi boġo kourini e boġo lau-busebuserini riba. <sup>17</sup> Ema vevaġa-maġuri boġono ġabia, ġemi kwaraġau ai boġono vaġa-iaġoa. Ema Barau ġena guruġa boġono ġabi-vaisia vetari baġana kavana, Barau ġena guruġa tu Iauka Veaġa ġena vetari baġana.

<sup>18</sup> Iauka Veaġa ġena seġuka nuġanai boġono ġauġau-vanaġi vanaġi. Ġemi ġauġau ai tu ġauġau dabarari irauirauri ai boġono ġuriġuri ema ġemi ura dagarari mabarari noġinoġiri boġono vei. Tauġemi lorimi maki boġono vetore e rakava boġono vaġa-darereri, ema Barau ġena tarima veaġari mabarari iatari ai boġono ġauġau-vanaġivanaġi. <sup>19</sup> Au maki iatagu ai boġono ġuriġuri. Be naguruġa ġana, bokagu bana keoa tu, Iauka Veaġa na guruġa bene vinigu, be mai Vari Namona vekuretoġana tu asi garigu ġesi tarimarima bana kira-varari. <sup>20</sup> Au tu mai Vari Namona maiġa bana fiua ġana tarimagu. Ma au tu mai Vari Namona uranai dibura numai ma seinigu atanuni. Boġono ġauġau, be Barau na bana kiraġia etoni ilailanai, asi garigu ġesi bana kiraġi-foforia.

### Guruġa magona

<sup>21</sup> Tikiko tu ġita tarikakara namona ta ema ġia tu ma ġena vetuġamaġikau Vereġauka ġena maġuri nuġanai. Dagara mabarari, au aiġesina atanuni e kara aveini variri mabarari tu boġono ribari ġana, be Tikiko na vauro beasi kira-varamini. <sup>22</sup> Au na ġia tu moġesina naima atuġu-iaġosiani. Bene iaġosi, be ġai ġema tanu maġurina mainai tu aiġesina boġonoasi ribari, ema beneasi vaġa-gwaġiġimi.

<sup>23</sup> Maino tarikaka mabarami ġesi bene tanu. Tamara Barau ema Vereġauka Iesu Keriso ġerina eiaġomani veuravinina ma veġabidadamana ġesi maki tarikaka mabarari ġesi bene tanu. <sup>24</sup> Barau ġena namo e varevare-bara tu, ġera Vereġauka Iesu Keriso asi ekorini veuravinina na ġeuravini-vanaġi vanaġiani tarimari mabarari iatari ai bene tanu.



## PAULO ĜENA TORETORE FILIPĪ EKALESIARI ĜERI

Filipi vaĝa-foforina guruĝari

Ekalesia doĝorona Filipi ai tu Paulo ema Silas ĝerina eĝorato, mo tu Paulo ĝena evanelia varivarina vaĝa-ruaruana eveiato taiminai (Apostolo 16).

Paulo na mai fefa tu Romai ediburato-ĝoi nuĝanai etoreato. Mai fefa tu laĝani 60 beiaĝo 61 fakanai ta etoreato, mo tu Iesu emaseto murinai.

Mai buka anina baregona tu "Iaku ema verere", ema ĝena siri baregona tu karao 4:4. Mai fefa nuĝanai "iaku" tu ĝutuma boiavi-ĝoitaĝorini: 1:4-6; 1:14-18; 1:25-26; 2:2; 2:14-16; 2:17-18; 2:25-29; 3:1-3; 4:4; 4:10-12; ema veĝabidadama, veuravini, nuĝa-sebona ema vetore-variĝo o vevaĝa-manau boĝo ĝitaiani tu iaku ĝenana etubu-raĝeni.

Mai fefa etoreato tu, 1) ekalesia doĝorona bene tanikiuri, ĝevarevare-viniato lori-nai, ema bene vaĝa-ribari bevarivaririni; 2) bene launaĝiri, Keriso ĝena tuĝamaĝi beĝene tovtotova, ĝeri tuĝamaĝi sebonai moĝo beĝene torea; 3) bene launaĝiri, taimi namori ai o rakavari ai beĝene iaku moĝo ema ĝeri vetarikaka Iesu Keriso ĝesi tu bene tanu asi bene iagaiaga.

Paulo na mai fefa tu maiĝesina eboiĝaiato:

1. Keriso tu ĝita ĝera maĝuri - karao 1
2. Keriso tu ĝita ĝera tuĝamaĝi ai bene tanu - karao 2
3. Keriso ĝenai matara bene tubukau - karao 3
4. Keriso tu ĝita ĝera kokore korana - karao 4

**1** Au Paulo ema Timoteo, Keriso Iesu ĝena vetuĝunaĝi tauma, na ĝomi Filipi ai Barau ĝena tarimarima veaĝari ma ĝemi ekalesia guine-iaĝina tarimari ema vevaĝa-kava tarimari ĝesi atore-vinimini. Ĝomi tu Keriso Iesu ĝesi varau ĝosebonato. <sup>2</sup>Barau ĝita Tamara ema ĝera Vereĝauka Iesu Keriso ĝerina varevare-bara ema maino ĝemi ai bene tanu.

### Paulo na Barau evaĝa-namoato

<sup>3</sup>Ĝomi atuĝamaĝimini negari mabarari ai, ĝegu Barau atanikiu-viniani. <sup>4</sup>Ĝegu ĝauĝau ai vanaĝivanaĝi ĝomi mabarami iatami ai aĝuriĝurini ma iakugu ĝesi, <sup>5</sup>korana ĝemi vevaĝa-kava dabarari namori na ĝovaĝa-kavaguto Vari Namona vari-fiunai, Vari Namona ĝoĝabi-raĝeato ĝarona na beiaĝoma mo initoma. <sup>6</sup>Ma ribagu maoro, Barau na mai ĝauvei namona, nuĝami ai evaĝa-foforiato ĝauveina tu, bevesiriĝuni, beiaĝoni mo, Keriso Iesu ĝena ĝenoĝoi ĝaronai vau bevaĝa-kori ginikauani.

<sup>7</sup>Ĝomi mabarami ĝegu vemamiraĝi na evaĝa-moĝoniani, ĝomi tu au nuĝagu ai roĝo ĝotanuni. Aba, dibura numai atanuni nuĝanai, o Kota ĝeseĝaĝini tarimari ĝoirari ai Vari Namona akiraĝi-foforiani e gogobana aragani nuĝanai maki, ĝomi tu au nuĝagu ai veĝata. Korana ĝomi mabarami maki Barau na ĝena varevare-bara evinimito, au eviniguto kavana. <sup>8</sup>Barau ma ribana vedaurea, au ĝomi akiramini, au ĝegu veuravini ĝomi mabarami ĝemi ai tu barego vedaurea, Keriso Iesu na euravini-baregomini kavana.

<sup>9</sup>Barau anoĝiani, ĝemi ai veuravini bene tubu-barego vedaurea, ma riba ema iaunega bene vinimi, be Barau ĝena ura boĝono riba-ginikauri. <sup>10</sup>Monana vauro

boĝo ribani, dagara namori tu aiĝeri na ĝemi tanu beĝe vaĝa-namorini rakava mabarari ĝerina, benamo Iesu Keriso ma beĝenoĝoi-iaĝomani ĝaronai, ĝomi tu asi vetoukaumi e asi ĝemi kerere ta maki. <sup>11</sup> Ema veiĝa namori e iobukaiobukari mabarari, Iesu Keriso ĝenana ĝeiaĝomani dagarari, ĝomi ĝemi ai beĝe tanuni, Barau vevato-iaĝina e vaĝa-raĝena ĝana.

### Paulo tu dibura numai etanuni, senaĝi Vari Namona ebaregoni

<sup>12</sup> Tarikakagu, ĝegu ura boĝono riba, au beĝe diburagu o kara beĝe ĝora ĝegu ai dagarari na Vari Namona ĝena tubu tu asi beĝe vaĝa-rakavaia. Asiĝina. Moĝeri na tu Vari Namona ĝena tubu beĝe vaĝa-baregoa. <sup>13</sup> Mai maĝuri ĝenana Kaisara, Roma ĝeri vere, ĝena numa ĝeĝita-ĝauani tauri ema tarimarima mabarari maki beĝe riba, au tu Iesu Keriso ĝena vetuĝunaĝi ai aĝo-vinini ĝaramanai, dibura numai atanuni. <sup>14</sup> Ma ĝegu tanu dibura numai ĝenana maki au tarikakagu ĝutuma ĝeri veĝabidadama Vereĝauka ĝenai beĝe gwaĝiĝi naima, Barau ĝena guruĝa ma kokoreri ĝesi ĝeĝobata-iaĝiani.

<sup>15</sup> Moĝoni, tarima kotari na ĝegu ĝauvei namo dainai, ĝemama-viniguni. Ĝeri ura tu au ĝevaĝa-rakavagu ĝetoni, naima Keriso ĝeĝobata-iaĝiani. Senaĝi kotari na tu nuĝa-namo ai ĝeĝobata-iaĝiani. <sup>16</sup> Maiĝeri tu veuravini ĝenana ĝeĝobatani, korana ribari, au diburai atanuni tu, Vari Namona gogobana bana raga ĝana Kota tarimari ĝoirari ai. <sup>17</sup> A tarima kotari na Keriso ĝeĝobata-iaĝiani tu dia nuĝa-namo ai, senaĝi tauĝeri arari beĝene vaĝa-raĝeri ĝana. Ĝeri tuĝamaĝi tu, au dibura numanai roĝo atanuni nuĝanai, ĝegu meto ĝevaĝa-baregoa ĝetoni. <sup>18</sup> Bevaitovo, au ĝegu iaku tu ebaregoni. Korana nuĝa-namo ai Keriso ĝeĝobata-iaĝiani ba asiĝina, senaĝi dagara baregona tu Keriso varina bene fiu-rovorovo dabara mabarari ai. Ma ĝegu iaku maki bebarego-iaĝoni moĝo. <sup>19</sup> Korana ĝemi ĝauĝau ai Barau ĝonoĝiani ema Iesu Keriso Iaukana na evaĝa-kavaguni. Moĝa lorinai au ribagu, au tu maĝuri badoĝar-iani. <sup>20</sup> Ĝegu ura baregona ema dabaragu mabarana ĝesi akirani, au tu asiĝina ĝinavaĝi bana moira ĝegu ĝauvei nuĝanai. Moĝesi nai initoma dibura numai vanaĝi-vanaĝi akokoreni kavana bana kokore, be au taugu mabarana ĝesi Iesu Keriso arana ma bana vaĝa-raĝea ĝegu maĝuri ĝenana o ĝegu mase ĝenana.

<sup>21</sup> Be au ĝegu ai maĝuri tu kara? Iesu Keriso moĝo! Moĝa lorinai mase au ĝegu ai tu dagara namona. <sup>22</sup> Betaĝu bema roĝo bamaĝuri-taĝoni nai, ribagu Keriso ĝena ĝauvei roĝo baveiani, senaĝi asi aribani, aiĝa bara ĝabia, mase ba maĝuri? <sup>23</sup> Au tu dagara ruarua auravini-baregorini: Ĝegu ura mai maĝuri bara raga-kwanea, be Keriso sevinai bara tanu tu dagara namo vedaureana moĝo; <sup>24</sup> senaĝi namona tu ĝomi bana vaĝa-kavami ĝana, be mai tauĝani nuĝanai roĝo bana tanu. <sup>25</sup> Au tu ribagu, au roĝo maĝuri batanuni. Ĝomi ĝesi roĝo bita tanuni, korana ĝemi veĝabidadama vaĝatuburi ema ĝemi iaku vaĝa-baregori ĝana. <sup>26</sup> Au ma baiaĝosini neganai, ĝomi tu boĝo iakuni au ĝegu ai, ema Keriso Iesu boĝo vaĝa-raĝeani.

### Ĝemi tanu

<sup>27</sup> Dagara sebona tu Keriso ĝena Vari Namona na ekiraĝiani ilailanai boĝono tanu. Baiaĝosini ĝitaĝitami ba manaĝa na moĝo varimi baseĝaĝini, baribani, ĝomi tu nuĝa-namo ai ĝoritoĝo-gigitarini ema nuĝa sebonai Vari Namona ĝovesesĝaĝi-vevini-iaĝiani ma kokoremi ĝesi. <sup>28</sup> Ĝebaru-vinimini tarimari na asiĝina ĝinavaĝi beĝene vaĝa-garimi. Monana ĝeri ai vetoĝa beveiani, ĝia tu Barau na bevaĝa-rakava kwaik-

wairini, a ġomi tu Barau na bevaġa-maġurimini. <sup>29</sup> Ġomi tu dia Keriso ġena varevarebara e namo lorinai Keriso ġovaġa-moġoniani tarimami ai ġoiagoto moġo, senaġi ġomi tu Keriso ġena midigumidigu ai maki boġono midigu ġana ġia aranai. <sup>30</sup> Ġomi maki initoma au ġesi bisini vetari-vegogo. Mai vetari tu vetari guinena ġoġitaiato-ġoi vetarina ini roġo ma ġoseġaġiani vetarina roġo avetari-iaġiani.

### Keriso ġena vevaġa-manau ema iaru-korokoro

**2** Ġemi maġuri Keriso nuġanai monana evaġa-kokoremimi ba? Ema ġena veuravini na ġemi tuġamaġi evaġa-gwaġiġirini ba? Gomi na Iauka Veaġa ġatami ai ġovaġa-iaġoato ma ġotanu-vegogoni ba? Ma ġemi vevetuġaġwa ema vevaġa-kava ġatami tata ġeri ai ġoveirini ba? <sup>2</sup> Moġa lorinai anoġimini, boġono vaġa-iaku korikorigu, ġemi tuġamaġi vegogo ai, veuravini sebonai ema nuġami e iaukami maki sebonai boġono tanu. <sup>3</sup> Dagara ta asi boġono veia vevaġa-raġe tuġamaġina maġurina ema veiavi maġuriri ai, senaġi ġomi tauġemi boġono vevaġa-variġo tata fakami ai, a karomi boġono ġabi-ġesitaġori. <sup>4</sup> Karomi ġeri namo maki boġono vetau, a dia ġomi tauġemi ġereġami ġemi namo moġo.

<sup>5</sup> Ġemi veiġai Keriso Iesu kavana boġono vei, ġena tuġamaġi boġono ġabia:

<sup>6</sup> Ġia tu dagara mabarari ai

Barau ġesi ilaila,

senaġi asi etuġamaġito,

mo maġuri moġa bene ġabi-taria.

<sup>7</sup> Ġia tu tauġena evekiraġi-fitoġato,

benamo vetuġunaġi merona kavanai eiaġoto.

Ġia maki tarimarima kavana eġorato,

benamo ġita fakarai ema tanuto.

<sup>8</sup> Ġia tu eveġwa-variġoto ema Barau eseġaġi-viniato-ġoi mo ġena mase,

aba, satauro ai emaseto noġa moġo vei-rakava tarimana ta kavana.

<sup>9</sup> Moġa lorinai Barau na eġabi-vaisiatio guba tuġunai,

ma ara namo vedaureana eviniato.

Mo ara tu ara ta ġesi asi ilaila.

<sup>10</sup> Iesu arana bakunai guba aneruri,

e tanobarai ġetanuni tarimari,

ema tanobara gaburenai o mase gabunai ġetanuni tarimari mabarari beġene

vetuitui-tari ġia ġoiranai.

<sup>11</sup> Ema mea mabarari na Iesu Keriso beġene kiraġia “Vereġauka”,

Barau ġita Tamara vevato-iaġina ġana.

### Bitana mama-rovorovo tanobara ġena mama

<sup>12</sup> Au ġatagu mabarami, vanaġivanaġi au ġoseġaġi-viniguto-ġoi ġera ġauvei vegogo ai kavana murigu ai maki boġono seġaġi-vinigu veġata. Boġono ġauvei ma garimi ema ma ġoġo-ġoġomi ġesi, maġuri boġono doġaria uranai. <sup>13</sup> Korana Barau tu ġomi nuġami ai eġauveini, ġomi elaunaġimini e kokore evinimini, ġena ura boġono veiri ġana.

<sup>14</sup> Ġauvei mabarari asi mugumugumi ema asi vanevanemi ġesi boġono ġauvei-iaġiri. <sup>15</sup> Be ġomi tu Barau natuna asi vetoukaumi ema namo vedaureami ai boġono iaġo, mai tanobara rakava kwaikwai ema ġevei-rakava-moġovaġini tarimari fakari

ai; be boĝono mama-rovorovo, noĝa moĝo visiĝu boĝi ai ĝemamani kavana. <sup>16</sup> Mo tu bema maĝuri guruĝana boĝo korana-iaĝiani e boĝo vari-fiuidi nai. Moĝa boĝo veuidi nai, au tu ma ĝegu maoro havekokorokuni ĝomi ĝemi ai Keriso ma beĝenoĝoi-iaĝomani ĝaronai. Korana mo ĝaro ai au tu baribani, au ĝegu vekwaraĝi ema ĝauvei ai tu asi avekwaraĝi-kavato.

<sup>17</sup> Bere au bara mase, ma raragu bere vebubu-rovorovo, noĝa moĝo ĝomi ĝemi veĝabidadama varevarena Barau ĝoviniani kavana. Irau moĝesi nai, au tu aiakuni, ema ĝegu verere maki ĝomi ĝesi tavei-sebonaiani. <sup>18</sup> Mai dabara sebonai ĝomi maki boĝono verere, be mabarara bitana verere-vegogo.

### Timoteo batuĝu-iaĝosiani

<sup>19</sup> Bema Iesu Vereĝauka ĝena ura nai tu, atuĝamaĝini, Timoteo tu batuĝu-iaĝosiani; be ĝomi varimi banama seĝaĝia nai, au nuĝagu benema gena-tari. <sup>20</sup> Timoteo ĝereĝana na moĝo au ĝegu vemamiraĝi eribaiani, ema ĝomi ĝobimi vetuĝamaĝina evei-baregoni. <sup>21</sup> Tarimarima mabarari tu tauĝeri ĝeri maĝuri moĝo loriri ĝetorerini, a Iesu Keriso ĝena ĝauvei tu asi ĝevetauidi. <sup>22</sup> Ĝomi tu ribami ginikau, ĝia vetoĝana ema ĝena vetuĝamaĝikau, kamasi ĝia e au, noĝa tama ma natuna ĝeĝauveivegogoni kavana, Vari Namona ĝaĝobata-iaĝiani. <sup>23</sup> Moĝa lorinai bana tuĝu-iaĝosi-ĝarimoĝia, maĝuri mainai kamasi bevetoreni ĝegu ai bana riba vau. <sup>24</sup> A ĝegu vetuĝamaĝikau Vereĝauka ĝenai atoreani, au maki vau mani ma baiaĝosini ĝemi ai.

### Epafrodito ĝena iaĝosi

<sup>25</sup> Ĝegu tuĝamaĝi ai akirani, namona tu tarikakara Epafrodito ma bana tuĝu-ĝenoĝoi-iaĝosia. Ĝia maki au ĝesi ĝaĝauveito e Keriso ĝena vetari ai ĝavetari-vegogoto tauna. Ĝomi maki vetuĝunaĝimi eveito, au ĝegu ai ĝotuĝuato nai, ĝemi varevare dagarari na bene vaĝa-kavagu ĝana. <sup>26</sup> Ĝia maki eura-baregoni ĝomi bene ĝitami. Ema enuĝa-vekwaraĝini ĝemi ai, korana ĝena keve varina ĝoseĝaĝiato nai. <sup>27</sup> Moĝoni veĝata, ĝia tu ekeve-rakavato, dori emaseto, senaĝi Barau ĝena vevetuĝaĝwa ĝia iatanai, ema dia ĝia iatanai moĝo, senaĝi au iatagu ai maki, korana ĝegu nuĝa-meto bebaregoni garina. <sup>28</sup> Moĝa lorinai ĝegu ura baregona bana ragatuĝu-iaĝosia ĝemi ai, be boĝono ĝitaia ma boĝono iaku, benamo au ĝegu nuĝa-vekwaraĝi bene meraĝa kekei. <sup>29</sup> Boĝono ĝabi-raĝea ma iakumi ĝesi ĝera Vereĝauka aranai, ema ĝemi vegubakau marevana bene fofori tarima maĝesiri ĝeri ai. <sup>30</sup> Korana ĝena maĝuri ĝaramana asi eveito, ema dori emaseto, korana Keriso Varina Namona ĝaramanai. Vetoĝa maĝesina ĝegu vevaĝa-kava ĝomi na ĝoro vinigu kavana tu ĝia na au ema vaĝa-kavaguto.

### Keriso evaĝa-moĝoniani tauna tu vei-iobukaiobuka tarimana

**3** Tarikakagu mabarami, ĝegu guruĝa magona nuĝanai maĝesi nakira: Boĝono iaku, korana Vereĝauka ĝesi ĝokaro-vekafani nai. Asi baĝauni, guruĝa guineri batuĝu-ĝenoĝoi ĝenoĝoini, korana ĝomi ĝobimi toretoreri ĝana.

<sup>2</sup> Lorimi boĝono vetore ekalesia vaĝa-rakavana tauri gariri. Ĝia tu kwaiva rakavari kavana, ĝeri tuĝamaĝi tu ĝita mabarara tauĝanira kefiru bitana lama-vaĝiri ĝetoni, Israela besena ĝeveini kavana. <sup>3</sup> Senaĝi tauĝani kefiru lamavaĝi veĝana korikorina tu ĝita na taĝabiato, a ĝia tu asiĝi: Ĝita tu Iauka Veĝa ĝena seĝukai Barau tatutuĝu-

tari viniani, ema Keriso Iesu ġenai tavetuġa-maġikauni, ema ġera veġabidadama tu dia tauġani ai vetoġa ġeveini moġeri ai tatoreani.

<sup>4</sup>Bere tauġani ġena vetoġa ema ġera veiġa dagara baregori nai, ġegu veġabidadama tu tauġani ġena vetoġa dagarari ema ġegu veiġa ġeri ai bara torea riba. Bema ta ġena veġabidadama tauġanina ġena vetoġa dagarari ema ġena veiġa ġeri ai bene torea etoni nai, au tu ma ġegu maoro moġeri dagarari bara veġabidadama. <sup>5</sup> Amaġurito, ġaro vaġa-imaima toitoinei (8) tauġanigu kefina ġelama-vaġiato. Au tu Isaraela tarimagu, Beniamina ġena doġoro tarimagu, Heberu rarari tarimagu korikori. Iuda tarimari ġeri taravatu akorana-iaġi ginikauato-ġoi, korana au tu Farisea tarimagu. <sup>6</sup> Barau ġena taravatu bana korana-iaġi ginikaua ġaramanai tu, ekalesia doġorona avaġa-midigu midigurito. Ema Iuda ġeri taravatu mabarabarari akorana-iaġi ginikaua ginikaurito-ġoi, asi ġegu vei-rakava ta.

<sup>7</sup> Moġeri dagara mabarari guinenai tu atuġamaġi-baregorito-ġoi; senaġi initoma Keriso ama ribaiato nai, mo dagara guineri mabarari aġitarini tu asi ġeri namo ta maki. <sup>8</sup> Moġoni veġata, dagara mabarari tu asi tauri dagarari, senaġi dagara baregona sebona moġo tu Keriso Iesu, ġegu Vereġauka, bana riba-ginikaua. Oba, dagara mabarari momo ai ġeiaġoto au ġegu ai, Keriso moġo bana ġabi-gigitaria ġana uranai. <sup>9</sup> Ġegu ura ġia ġesi bana sebona-korikori, korana ribagu, taravatu ekorana-iaġi ginikauani tarimana Barau ġoiranai ġia tu dia vei-iobukaiobuka tarimana, senaġi Keriso evaġa-moġoniani tarimana moġo; korana Barau na vei-iobukaiobuka tarimarai beki-raġirani dabarana sebona tu veġabidadama ġenana moġo. <sup>10</sup> Ġegu ura baregona tu Keriso bana riba-ginikaua, ema mase na evaġa-vaisi-raġeato seġukana bana ġabia; ema emidiguto midiguna maki bana mami-tovoa, ma ġia ġena mase kavanai au maki bana mase. <sup>11</sup> Mainana vau atuġamaġini, au maki mase na bavaisiraġe-ġenoġoini.

<sup>12</sup> Au asi akirani, moġeri mabarari varau aġabirito, o varau anamo-vedaureato, asiġina. Senaġi au tu avekwaraġi-rakavani, auna bana ġabia ġana, korana Keriso Iesu ġena kwalimu ai au maki eġabiguto ġia ġena. <sup>13</sup> Moġoni, tarikakagu, asi akirani varau akwalimuto atoni, asiġina. Dagara sebona moġo tu, maġuri guineri atuġarekwarito, ma ġoiragu dagarana bana ġoitaġoa kokorena moġo avetauani. <sup>14</sup> Initoma tu araga-maoromaoroni, kiraġitore makana aiaġo-viniani, mo kwalimu voina bana ġabia uranai, dagarana tu Barau ġena maġuri gubai. Korana Barau na Keriso Iesu ġenana ekeaguto, mo maġuri bana ġabia ġana.

<sup>15</sup> Ġita ġera veġabidadamai taruġa-gwaġiġito taura tu maiġesi bisini tuġamaġi-vegogo. A ġomi betaġu dagara tari ai ġemi tuġamaġi tu irau nai, Barau na vau tuġamaġi-faka bene vinimi. <sup>16</sup> Dagara sebona, iauka maġuriri namori ġita na varau taġabirito moġeri bitana ġabi-gigitariri.

<sup>17</sup> Tarikakagu mabarami, au boġono tovtovogu. Veiġa namo ġeveini tarimari boġono marereri e boġono tovtovori maki, vevaġa-ġita namori avaġa-ġitamini kavana. <sup>18</sup> Korana varau avaġa-guruġa ġenoġoi-ġenoġoimito-ġoi, senaġi ini tu ma avaġa-guruġamini ma taġigu ġesi: Ġutuma ġekirani, Keriso murinai ġerakani ġetoni, senaġi ġeġofaġofani, Iesu Keriso ġena satauro ġevetari-viniani. <sup>19</sup> Ġia varau rakava gabuna ġana ġeiaġoni, korana ġeri barau tu ġia tauġaniri na ġeiaġo-iaġirini dagarari. Ġeri veiġa rakavari, ġere maiaka-iaġiri veiġari, ġeveiavi-iaġirini. Ema mai tanobara dagarari moġo ġetuġamaġi-gigitaririni. <sup>20</sup> A ġita tu Guba Basileia tarimara. Moġa lorinai ġera vevaġa-maġuri tauna, ġera Vereġauka Iesu Keriso ma iakura ġesi tanariani, guba tuġuna na beiaġomani. <sup>21</sup> Ġia na ġita mai tauġanira moiramoirari

maiġeri bekurevorini, benamo ġia tauġanina namo vedaureana kavanai beġe iaġoni. Korana ġia seġukana na dagara mabarari ġia ġena veġitaġau gaburenai beġe tanuni.

### Sisiba guruġari tari

**4** Tauna moġa, tarikakagu, Vereġauka ġena maġuri nuġanai boġono ruġa-gwaġiġi. Au na auravini-baregomini ema bana ġitami veġata atoni, korana ġomi tu au ġegu verere korana e ġegu kwalimu vetoġana.

<sup>2</sup>Euodia ema Sintike, anoġimini, nuġami beġene sebona, korana ġomi tu Vereġauka ġena doġoro vavinemi. <sup>3</sup>Goi maki, Sisigo, au karogu namona, anoġimuni, mani vavine kika bono vaġa-kavari, ġia maki au ġesi ġaġauvei-vegogoto-ġoi Vari Namona fiufiunai, e Klement ema ġita karora tari maki. Ġia arari tu Barau ġena maġuri vanaġivanaġi bukanai varau etorerito.

<sup>4</sup>Vereġauka ġena maġuri nuġanai ġaro mabarari ai boġono iaku. Ma nakira: Boġono iaku. <sup>5</sup>Ġemi manau e nuġa-marana boġono vevaġa-ġita-iaġiri tarimarima ġeri ai. Korana Vereġauka ġena iaġoma bekavinaġi-rakava. <sup>6</sup>Dagara ta tuġamaġi-vekwaraġina asi boġono vei, senaġi vanaġivanaġi ġemi rabu dagarari ġauġau ai Barau boġono noġia ma tanikiumi ġesi. <sup>7</sup>Benamo Barau na ġena maino, ġita mabarara ġera riba e tuġamaġi-faka evanaġiato mainona, bevinimini, ma mo maino na ġomi lorumi ema ġemi tuġamaġi mabarari benari-ginikaurini, Keriso Iesu ġena maġuri nuġanai ġotanuni dainai.

<sup>8</sup>Tarikakagu mabarami, ġegu toretore magona rekenai nakira, vanaġivanaġi veġa maiġesi kavari boġono tuġamaġi-iaġiri: Maġuri moġoniri, dagara marevana irau veġata, vei-iobukaiobuka, veġa namo vedaureari, veuravini veġari, ema vegubakau maġuriri. Dagara namori ema tarimarima na ġevaġa-raġerini veġari mabarari boġono tuġamaġi-iaġiri. <sup>9</sup>Ġegu ġobata na ġoribarito guruġari ema ġegu veġa na ġodoġaririto veġari mabarari ġemi maġuri ai boġono ġauvei-iaġiri e boġono korana-iaġiri. Benamo maino evinirani Barauna ġomi ġemi ai bene tanu.

### Filipi tarimari ġeri vevaġa-kava

<sup>10</sup>Ġegu iaku tu asikei ema Vereġauka avaġa-namoani nuġagu mabarana ġesi, korana ġemi vevaġa-kava varevarena ma boġo tuġu-iaġomaia nai. Au ribagu, asi ġotuġarekwaguni, ġemi ura vanaġivanaġi boġono vaġa-kavagu, senaġi gabu man-aġai atanuni nai, asi ġemi dabara ta au vaġa-kavagu. <sup>11</sup>Au tu dia dagara tai akubini naima maiġesi aguruġani. Asiġina. Au tu ġegu-ġagu vovoka o asiġina, senaġi badukuani ilaila. <sup>12</sup>Au tu akubini vetoġana ma ribagu, ema ġegu-ġagu ġevovokani vetoġana maki ma ribagu, be taimi tai gabu tai maiġeri maġuri baraga-ġoitaġorini nai, aiġesina badukurini tu ribagu. Mai riba vekuretoġana tu varau aribaiato. Moġesina nai au tu beġe ġubu-maseguni o bevitoguni, ġegu-ġagu vovoka o bakubini au ġegu ai tu ilaila moġo. <sup>13</sup>Maġuri aiġesina ġegu ai evetoreni, senaġina asi ġegu daradara, korana Keriso na ġena seġuka eviniguni nai.

<sup>14</sup>Senaġi aiakuni, korana ġemi vevaġa-kava barego mai ġegu meto nuġanai bama doġaria. <sup>15</sup>Ġomi Filipi tarimami tu ribami: Makedonia aiaguiato, tovtovonai Vari Namona aġobata-iaġiato-ġoi nai, ekalesia doġorona ta na asi evaġa-kavaguto-ġoi ġeri moni e farefare na, ġomi moġo ġereġami. <sup>16</sup>Ġomi na vevaġa-kava dagarari vovoka ġotuġu-tuġukauto-ġoi au Tesalonika vanuġanai atanuto-ġoi nuġanai. <sup>17</sup>Au

asi atuḡamaḡini, au ḡomi ḡemina vevaḡa-kava dagarari bana doḡari, senaḡi ḡegu ura baregona tu, ḡomi ḡemi ai ḡemi vini auna bene barego bana ḡitaia.

<sup>18</sup> Au ḡegu ai ḡomi ḡemi varevare dagarari ḡotuḡu-iaḡomarito tu mabarari maiḡeri, be ḡegu-ḡagu tu vovoka ema ilaila. Ribagu, aura-vinirini dagarari mabarari maiḡeri Epafrodito na eḡwa-iaḡomarito ḡegu ai. Gemi varevare dagarari bonari irau veḡata Barau na eḡabi-raḡerini ginitaḡo varevareri, Barau ḡevaḡa-iakuani dagarari. <sup>19</sup> Ḥegu Barau na ḡena farefare namori ema vovoka tabutaburi Keriso Iesu ḡenana bevarevare-vini ginikaumini ḡemi rabu ḡarori ai. <sup>20</sup> Tamara Barau bitana vaḡa-raḡea vanaḡivanaḡi, Amen.

### Vevaḡa-namo guruḡari

<sup>21</sup> Iesu Keriso ḡena tarimarima mabarari ḡeri vevaḡa-namo ḡeguna eiaḡosini. Ḥita tarikakara au ḡesi ḡatanuni na ḡemi vevaḡa-namo beḡe tuḡu. <sup>22</sup> Barau ḡena vevaḡa tarimari mabarari ḡerina vevaḡa-namo beḡe tuḡu ḡemi, ema Kaisara, Roma ḡeri vere, ḡena numa tarimari na maki ḡemi vevaḡa-namo baregona beḡe tuḡua.

<sup>23</sup> Vereḡauka Iesu Keriso ḡena namo ema varevare-bara ḡomi tata iatami ai bene tanu.

## PAULO ĠENA TORETORE KOLOSE EKALESIARI ĠERI

Kolose vaġa-foforina guruġari

Paulo na mai fefa tu Romai ediburato-ġoi nuġanai etoreato. Mai fefa tu laġani 60 beiaġo 61 nuġanai etoreato, mo tu Iesu emaseto murinai.

Mai fefa siri baregori tu karoa 2:9-10.

Paulo na mai fefa etoreato korana tu tarima tari na Kolose ai ekalesia doġorori ġeri veġabidadama ġevei-veġonuato-ġoi nai. Moġesi naima Paulo na mai fefa etoreato tu Kolose ekalesiari evaġa-guruġa-toreġaurito ema maiġeri evaġa-ribarito, 1) tarimarima ġeri iaunega ema vevaġa-riba ġofaġofari tu aiġeri ema Keriso ġena maġuri korikorina tu aiġa; 2) Keriso tu moġoni ekalesia doġorona debana veġata; 3) tarima guinena ma ġena maġuri rakavari ġesi beġene koki-fitoġaia, ma tarima variġuna beġene torekaua; 4) tarimarima ġeri taravatu veġari ema ġeri ura asi beġene ġabi-raġeri e asi beġene korana-iaġiri.

Paulo na mai fefa tu maiġesina eboiġaiato:

1. Deba, Keriso, ġena mareva baregona - karoa 1:1-2:5

2. Tauġani, ekalesia doġorona, aiġesina bene tanu ema bene ġauvei - karoa 2:6-4:18

**1** Au Paulo, Barau ġena ura lorinai Keriso Iesu ġena apostolo tarimagu ai evaġa-iaġoguto, ema ġita tarikakara veġabidadama nuġanai Timoteo ġesi, ġemana mai fefa eiaġosini, <sup>2</sup> ġomi tarikakama Kolose nuġanai ġotanuni ġemi. Keriso ġena maġuri nuġanai ġita tu tarikaka. Ġomi tu Barau ġena tarima veaġami ema ma ġemi vetuġa-maġikau maki. Ġita Tamara Barau ġena varevare-bara ema maino ġomi ġemi ai bene tanu.

### Kolose tarimari na Keriso ġeġabidadama-vini korikoriatu

<sup>3</sup> Ġai vanaġivanaġi ġomi iatami ai ġaġauġauni nai, ġera Vereġauka Iesu Keriso Tamana, Barau, tu ġatanikiu-viniani. <sup>4-6</sup> Korana tu, ġai tauma ruarua na ġomi varimi tu maiġesi ġaseġaġiato: Ġomi na tovtovonai Vari Namona ġenana eiaġomato guruġana, guruġa moġonina, ġoseġaġiato nai tu, dagara namona Barau na gubai etoretaġoani ġemi, moġa varina tu ġovaġa-moġoni korikoriatu. Ma ġomi na tu moġesina naima Keriso Iesu ġoġabidadama-vini korikoriani, ema Barau ġena veaġa o ekalesia tarimari mabarari maki ġoura-vinirini. Mani Vari Namona ġomi ġemi ai eraġasito, maniġa tu tanobara mabaranaġi ġevarifiu-rakao rakaoani, ma ġwana namori maki ġeġorani, e tarimarima maki ġutuma lelevaġi na maki ġeġabi-raġeani. Mai Vari Namona ġwaġwana namona evetoreni tanobara mabaranaġi, ilailana ġomi na mani Vari Namona ġoseġaġiato e Barau ġena namo e varevare-bara korikorina ġoribaiato ġarona na veġata ġomi fakami ai evesinato, ma eiaġomani, maniġa kavana evetoreni. <sup>7</sup> Ġomi tu Epafra na mai Vari Namona easi vaġa-ribamito. Ġia tu ġai karoma namona, ema ġai ġesi Keriso ġena vetuġunaġi ġaiaġo-vinirini tarimana ta. Epafra tu Keriso ġena ġauvei tarimana namona, ma ġena vetuġamaġikau, ma ġomi maki evaġa-kava ginikaumini. <sup>8</sup> Ġomi ġemi veuravini Iauka Veaġa na evinimini, maniġa maki Epafra na ema kira-varamato.



### Paulo ġena ġauġau Kolose ekalesia tarimari iatari ai

<sup>9</sup> Moġesi naima ġai tu ġomi varimi ġaseġaġiatio ġarona na beiaġoma mo toma, ġomi iatami ai ġema ġuriġuri asi ġavaġa-ketoani. Vanaġivanaġi Barau ġanoġiani, ġakirani, ġia ġena ura mabarana bene vaġa-riba ġitakaumi, ema Iauka Veaġa ġenana eiaġomani iaunegana e tuġamaġi-fakana maki mabarana boġono ġabia. <sup>10</sup> Ġai maiġesina ġaġauġauni anina tu, Vereġauka na eura-viniani maġurinai boġono tanu ġana, ema ġemi veiġa e maġuri mabarabarari ai maki ġia boġono vaġa-vererea ġana. Aba, ġemi veiġa namori mabarari ġwaġwari beġene fofori, ema Barau maki boġono riba-ġinikaua. <sup>11</sup> E ġema ġuriġuri tu, Barau ġena seġuka iaru-korokorona na seġuka bene vinimi, be boġono kokore-koru. Korana mo kokore na tu meto ġoġoitaġorini maiġeri nuġari ai boġo ruġa-ġwaġiġini e boġo vevaġa-ġwaġiġini. E ma iakumi ġesi <sup>12</sup> Tamara Barau boġo tanikiu-viniani. Korana ġomi tu varau eġabi-raġemito, be ġia ġena tarima veaġari na ġena Basileia ma mamana baregona nuġanai kara beġe ġaunarini dagarari ġomi na maki boġo ġaunarini. <sup>13</sup> Ġita mabarara Barau na tu mukuna ġena seġuka barana nuġana na evaġa-maġurirato, ma Natuna ġena veġitaġau seġukana nuġanai etore-toġarato. Mo Natuna tu Barau na euravini-baregoani. <sup>14</sup> Ġita tu Barau Natuna na evoi-ġenoġoirato, ma Barau na ġia bakunai ġera rakava etuġamaġi-fitoġarito.

### Keriso ġena ġauvei

<sup>15</sup> Barau tu asi taġitaiani, senaġi Barau vetoġana korikorina tu Natuna ġenana eforito. Ma mai Barau Natuna maiġa tu Barau ġimana veiveiri dagarari mabarari fakari ai ġia tu guine, emaġuri-guinetto merona kavana. <sup>16</sup> Korana Keriso ġenana Barau na gubai ġetanuni dagarari mabarari ema tanobarai ġetanuni dagarari mabarari eveirito. Taġitarini dagarari ema asi taġitarini dagarari eveirito. Seġuka lelevaġi iaukari mabarari, e seġuka lelevaġi aneruri, e veġorikau iaukari, ema ġeri seġuka e maoro barego lelevaġi iaukari eveirito. Dagara mabarabarari tu Barau na Keriso ġenana eveirito, ma Keriso ġena moġo eveirito. <sup>17</sup> Keriso tu maiġeri dagara mabarari roġosi beġere ġora nuġanai veġata etanuto-ġoi. Ma dagara mabarari maki ġia ġena seġuka na eġabi-taġorini. <sup>18</sup> Ekalesia doġorona debana tu Keriso, ema ekalesia doġorona tu ġia tauġanina. Ekalesia ġena maġuri korikori tu ġia ġenana eiaġomato, ema ġia tu mero guinena, mase tarimari mabarari fakari na Barau na mase seġukana na evaġa-maġuriato. Korana dagara mabarari ġia ġena veġitaġau gaburenai beġene tanu ġana. <sup>19</sup> Korana Barau ġena ura baregona, Keriso ġenai ġia ġena maġuri e mareva mabarana bene tanu. <sup>20</sup> Ma Barau ġena ura dagarari mabarari Keriso ġenana ġia ġenai ma bene ġabi-ġenoġoiri etato, mai tu tanobarai ġetanuni dagarari mabarari ema gubai ġetanuni dagarari mabarari. Moġesina naima Keriso rarana sa-tauro ai eriġoto, benamo Barau na maino eveiato dagara mabarari ġesi.

<sup>21</sup> Ġomi guinenai Barau ġesi fakami tu manaġa rakava, e ġemi tuġamaġi ai maki Barau tu ġovetari-viniato-ġoi, korana ġomi tu veiġa rakavari ġoveirito-ġoi. <sup>22</sup> Senaġi toma tu Keriso tauġanina korikori ġevaġi-maseato, monana ġomi ġia ġenai ma eġabi-ġenoġoimito. Barau na Keriso ġena mase ġenana vau tauġena ġenai eġabi-kavamito, korana tu eurato, ġia ġoiranai tu veaġa tarimari bene vaġa-ruġa-tarimi, e asi ġemi kerere misina ta maki, e tarima ta na maki asi bene vaġa-daġami. <sup>23</sup> Senaġi ġomi tu ġemi veġabidadamai boġono kokore e boġono ruġa-gigitari, ema Vari Namona

gosegāgiato nai, gēmi tuḡamaḡikau ḡovaḡa-ruḡaiato, monana ta na asi bene ḡori-gerevaḡimi. Ġomi na tu mai Vari Namona maiḡa ḡosegāgiato. Ma tanobarai ḡetanuni tarimarimari mabarari ḡeri maki mai Vari Namona maiḡa ḡevari-fiuato. Au Paulo maki mai Vari Namona vetuḡunaḡina aiāḡo-viniani e aḡobata-iaḡiani.

### Paulo ḡena ḡauvei ekalesia urari ai

<sup>24</sup> Maitoma au tu aiakuni, korana au tu ḡomi urami ai amidigu-midiguto. Ekalesia tu Keriso tauḡanina, ma Keriso tu mai tauḡanina maiḡa uranai emidigu-midiguto. Ma au toma mai tauḡanigu ai mai midigumidigu aḡwaiiani tu, Keriso ḡena ekalesia navaḡa-kavaia uranai. Au tauḡanigu ai midigumidigu roḡo aḡwaiiani, korana tu Keriso ḡena ekalesia uranai mo midigumidigu Keriso na eḡwaiato moḡa tu roḡosi roḡo bene kori nai. <sup>25</sup> Au tu Barau na evaḡa-ruḡaguto, ekalesia ḡena vetuḡunaḡi bana iaḡo-vini etato. Barau na mai ḡauvei eviniguto tu, ḡomi ḡemi ai Barau ḡena guruḡa mabarana bana vaḡa-fofori korikoria ḡana. <sup>26</sup> Guinena na veḡata ema ḡuru mabarari ḡerina veḡata mai maḡuri vekuretoḡana maiḡa tu vekuretoḡa, beiaḡoma mo, Barau ḡena tarimarima veaḡari ḡeri ai vauro bema vaḡa-foforia. <sup>27</sup> Irau bese tarimari vekaravari ai, Barau eurato, ḡena tarimarima veaḡari ḡeri ai mai maḡuri vekuretoḡana marevana barego lelevaḡina bene vaḡa-foforia etato. Mai maḡuri vekuretoḡana marevana barego lelevaḡina bene vaḡa-foforia etato maḡurina tu maiḡea: Keriso ḡomi nuḡami ai etanuni. Ġita na mareva baregona tatuḡamaḡi-dadamaḡiani marevana tu maiḡa. <sup>28</sup> Ġai na tu mai Keriso maiḡa ḡaḡobata-iaḡiani. Ema iaunega irauirauri ḡerina tarimarima mabarabarari ḡakira-toreḡaurini e ḡavaḡa-ribarini, korana ḡaurani, tarimarima mabarari Keriso ḡena maḡuri nuḡanai tu beḡene namo-vedaurea vauro, Barau ḡenai baḡana ḡori-iaḡori. <sup>29</sup> Moḡa uranai avekwaraḡi-rakavani. Keriso ḡena kokore au nuḡagu ai eḡauveini seḡukana tu barego lelevaḡi. Moḡesina naima au tu Keriso ḡena kokore ai mai ḡauvei aveiani.

**2** Au aurani, ḡomi tu boḡono riba, au tu avekwaraḡi-rakavani, ḡomi Kolose ekalesiami, e Laodikea ekalesiari, ema au ḡoiragu roḡosi roḡo beḡene ḡitaia ekalesiari vovoka, mabarabarami navaḡa-kavami uranai. <sup>2</sup> Au ḡegu ura baregona sebona tu, ḡia nuḡari beḡene gwaḡiḡi, ema mabarari veuravini sebonai moḡo beḡene iaḡo. Korana tu moḡesi beḡe veini vauro beḡe tuḡamaḡi-faka ginikauni, benamo Barau ḡena vekuretoḡa dagarana beḡe ribaiani. Barau ḡena vei-vekuretoḡa dagarana tu Keriso. <sup>3</sup> Iaunega ema riba vonu-fokafokana mabarana tu Keriso ḡenai vekuretoḡa ḡetanuni. <sup>4</sup> Maḡeri guruḡa akira-varamini korana tu, irau tarima ta na nuḡa-ḡani guruḡari namori na beḡofa-veḡonumini garina. <sup>5</sup> Au tu moḡoni tauḡanigu ḡomi fakami ai tu asiḡina. Senaḡi iauka rekenai au tu ḡomi sevimi ai, be ḡauvei ḡovei-ginikaurini ema Keriso ḡenai ḡemi veḡabidadama tu roḡo barego aḡitaiani, moḡa lorinai avererakavani.

### Keriso ḡesi bisini sebona, be maḡuri bisini ḡabia

<sup>6</sup> Keriso Iesu tu ḡomi na ḡoḡabi-raḡeato, benamo ḡemi Vereḡaukai ḡovaḡa-iaḡoato. Moḡa lorinai ḡomi tu ḡia ḡena maḡuri nuḡanai moḡo boḡono raka e boḡono tanu. <sup>7</sup> Ġomi ḡemi maḡuri tu ḡau ḡokana tano nuḡana ḡana evariḡo-korikorini kavana, Keriso ḡenai beḡene variḡo. E numa fore iatanai ḡeragaiani kavana, Keriso iatanai ḡemi maḡuri boḡono vaḡa-ruḡakauri e boḡono ragari. Ema ḡevaḡa-ribamito ilailanai

ġemi veġabidadama beġene kokore-korikori, ma vanaġivanaġi Barau tu boġono tanikiu-vinia.

<sup>8</sup>Lorimi boġono vetore, asi namo tarima ta na tarimarima ġeri iaunega ġofaġofari koriri na ġomi nuġami beġanirini, benamo beġori-dareremini garina. Mai tarimarima ġeri iaunega ġofaġofari tu tarimarima na ġevaġa-ruġarini maġuriri e veiġari ġeri ai; senaġina moġeri tuġamaġi veġonuri tu tanobara barauri ġerina ġeiaġomani, a dia Keriso ġenana ġeiaġomani. <sup>9</sup>Korana Barau ġena maġuri e veiġa mabarari tu Keriso tauġanina nuġanai ġetanuni. <sup>10</sup>Ma Keriso nuġanai mai maġuri ġomi na ġoġabiato. Keriso tu veġorikau iaukari e aneruri mabarari ema ġeri maoro barego lelevaġi iaukari mabarari fakari ai ġeri Vere. <sup>11</sup>Ġomi Keriso ġesi ġosebonato nai tu, tauġanimi kefirri ġelama-vaġirito, senaġi mai tu dia tarimarima ġimari na ġeveiani veiġana akiraġiani. Asigina. Mai tu Keriso ġena kefi-lamavaġi veiġana. Moġa tauna tu, tauġani ġena veiġa rakavari ġomi ġemi na ġokoki-fitoġarito. <sup>12</sup>Korana babatiso ġoġabiato neganai, ġomi tu noġa Keriso ġesi ġeguri-sebonamito; ema Barau na Keriso ġesi evaġa-vaisiraġe ġenoġoimito, korana Barau ġena ġauvei seġukana ġovaġa-moġoniato nai. Mo seġuka na Barau na Keriso mase na ma evaġa-variġisi ġenoġoiato. <sup>13</sup>Guinenai ġomi iaukami tu mase, korana ġemi kira-sirivaġi e veirakava bene, ema tauġani ġena veiġa rakavari maki ġomi tauġanimi ġerina roġosi beġere lama-fitoġari. Senaġi toma ġomi iaukami tu Keriso ġesi Barau na evaġa-maġuri ġenoġoirito. Ġita ġera rakava mabarari tu Barau na etuġamaġi-fitoġarito. <sup>14</sup>Taravatu guruġari ema taravatu asi takorana-iaġiato voiri metori ġita iatarai ġetanuni, moġeri tu mabarari Barau na asi tauri ai evaġa-iaġorito, be ekoki-fitoġarito. Barau na mo taravatu moġeri ġeri seġuka tu eġabi-vaġiato, benamo Keriso ġena satauro ai eikoko-kauato. <sup>15</sup>Ema Barau na veġorikau iaukari rakavari e ġeri maoro barego lelevaġi iaukari, ġeri kokore mabarari asi tauri ai evaġa-iaġorito e evaġa-rakavarito. Keriso ġena satauro seġukana na iauka rakavari Barau na evaġa-ketorito, ma tarimarima ġoirari ġutuġuturi ai evaġa-maiakarito, ma muriri ai evaġa-rakarito.

<sup>16</sup>Moġesina naima ġaniġani e niuniu dagarari taravaturo irauirauri ġaramari ai tarima ta na asi bene ġau-fitoġami. Ema tarima ta na Barau tuġamaġi-iaġina verekona, o ġue variġuna verekona, o Sabadi ġarona ġaramanai maki asi bene ġau-fitoġami. <sup>17</sup>Mai dagara maiġeri tu ġoirai vau beġea ġorani dagarari laulauri moġo. A maġuri korikorina tu Keriso ġenana bita ġabiani. <sup>18</sup>Bema tarima ta ġoġitaiani, tauġena manau tarimanai evevaġa-iaġo ġofa-kauni e aneru etoma-rakarigo-vinirini, ema nuvi o mata-vanaġi ai asi eġitarini dagarari eguruġa-iaġirini nai tu, garona asi boġono seġaġia. Ġia mani ġena tuġamaġi maniġa tu eveġonu-fatafatato. Maniġesina tarimarima na tu ġomi moġo beġe ġofa-dareremini, benamo voimi namona asi boġo ġabiani. <sup>19</sup>Keriso tu deba; ma mani tarima tu deba ġenana ġeraka-veġitato, be deba ġenai ġia tu asi ġetubukauni. Mai deba na tauġani mabarana ġaniġani eviniani, ema tauġani nuġanai turiġa evaġa-tubukau gigitaririni, ema tauġani mabarana evaġa-tubu vegogoani, Barau ġena ura lorinai.

<sup>20</sup>Ġomi tu Keriso ġesi ġomase-sebonato, be ġomi na taravatu irauirau e tanobara barauri tu asi ma boġo korana-iaġirini. Ma kara dainai tu mai tanobara maġurinai ġotanuni tarimari noġa maiġeri taravatu ma ġokorana-iaġirini, ei? <sup>21</sup>Ġokirani, “Asi ġoġabi-karaia; asi ġomami-tovoa; ġimami na asi ġoġabi-tovoa,” ġotoni. <sup>22</sup>Senaġi mani dagara maniġeri tu boġono ġaniri e boġono ġauvei-iaġiri ġana. A maniġeri taravatu ema vevaġa-riba tu tarimarima ġerina moġo ġeiaġomani dagarari. <sup>23</sup>Moġoni,

maniġeri taravatu na tu ġita ġerai Barau toma-rakariġona tuġamaġina bevaġa-ġoraiani, e manau veiġana ġerai bevaġa-ġoraiani, tauġani vaġa-midigu-midiguna bevaġa-ġoraiani. Moġesi naima tarima kotari ġetuġamaġini, maiġeri taravatu tu iaunega tarimari ġerina ġeiaġomani. Senaġi maiġeri taravatu na tu ġita asi bevaġa-kavarani, ma tauġani ġena ura rakavari asi bevaġa-ketorini.

### Keriso ġesi tasebonani nai tu, maġuri variġuna taġabiani

**3** Ġomi tu Barau na Keriso ġesi evaġa-maġuri ġenoġoimito, naima gubai ġetanuni dagarari boġono vetau-baregori, e nuġami maki monai boġono toreri. Keriso tu monai Barau ġimana aroribana rekenai etanu-taġoni teronai. <sup>2</sup>Vanaġivanaġi ġemi tuġamaġi ai tu gubai ġetanuni dagarari boġono tuġamaġi-taġori, a tanobara dagarari tu asi boġono tuġamaġiri. <sup>3</sup>Korana ġomi tu varau ġomaseto tanobara maġurina ġenai, ma ġemi maġuri korikori tu vekuretoġgai etanuni Keriso ġesi, Barau ġenai. <sup>4</sup>Keriso tu ġomi ġemi maġuri korikorina. Ġia ma befoforini ġaronai, ġomi maki Keriso ġesi boġo fofori-sebonani, ema ġena mareva ma mamana baregona boġo ġabiani.

<sup>5</sup>Moġa lorinai tauġanina ġena veiġa e maġuri rakavari ġemi ai roġo ġetanuni, maniġeri mabarari boġono vaġi-maseri. Tauġanina ġena veiġa e maġuri rakavari tu maiġeri: Mata-boraġa veiġari, veiġa mirori, kima veiġari, matabara e veiġa rakavari uravini-baregori maġurina, ema mata-ġaniġani maġuriri. Mata-ġaniġani maġurina tu babarau toma-rakariġori veiġana. Maiġeri mabarari ġerina boġono raka-veġita. <sup>6</sup>Korana mai veiġa maiġeri ġaramari ai Barau ġena baru o Kota baregona seġafore tarimari ġeri ai bema vaġa-foforiani. <sup>7</sup>Guinenai ġomi maki tanobara ġena veiġa e maġuri rakavari nuġari ai ġotanuto-ġoi nai tu, moġeri veiġa rakavari ġomi na maki ġoveirito-ġoi.

<sup>8</sup>Senaġi toma mai veiġa maiġeri ġomi ġemina tu boġono tore-veġitari: Tuġamaġi-baru, baru rakavarakava, tarima vaġa-rakavari tuġamaġiri e veiġari, guruġa rakavari kiraġikiraġiri ema sivarai mirori kiraġikiraġiri. <sup>9</sup>Tauġemi fakami ai guruġa o veiġa ġofaġofari ai ta na ta asi bene ġofaia. Korana ġomi na ġemi maġuri guinena ma ġena veiġa rakavari ġesi tu dabuġa rakavana ġokoki-fitoġaiiani kavana ġokoki-fitoġarito, <sup>10</sup>ma tarima variġu geragerana ġoriġo-kauato, dabuġa variġu geragerana ġoriġo-kauani ilailanai. Ma ġia maiġa tu Barau na vanaġivanaġi evaġa-variġu ġenoġoiani, eveiato Barauna vetoġana korikori bene ġabia e bene riba-ginikaua ġana. <sup>11</sup>Mai maġuri variġuna taġabiato mainai tarima ta asi irau. Be iniġesi asi bisini kira, ġai tu Iuda tarimama, a ġia tu irau bese tarimari; ġai tu mero tauġaniri kefirri ġalama-vaġini doġorona, a ġia tu mero tauġaniri kefirri asi ġelama-vaġini doġorona; asi bisini kira maki, ġia tu asi ġesikulito tarimari e maġuri mamana roġosi roġo beġene ġitaia tarimari; ġai tu asi tuġu-rakaorakao tarimama, a ġia tu tuġu-rakaorakao tarimari. Asiġina, maiġesi asi bitana guruġa. Korana Keriso ġereġana moġo barego ema ġita mabarara nuġarai etanuni.

<sup>12</sup>Ġomi tu Barau na varau eġabi-viriġimito tarimami, e ġena veaġa tarimami, ema Barau na euravini-rakavamini tarimami. Moġa lorinai vevetuġaġwa, veiaunamo, manau, marana, ema vevaġa-gwaġiġi maġuriri na boġono vedabuġa. <sup>13</sup>Meto o maġuri gwaġiġiri tari ġoġoitaġorini karomi tari ġerina nai tu, boġono vevaġa-gwaġiġi karomi ġeri ai. Bema tarima ta ġomi fakami ai karona ta na evaġa-veġare veġareani nai tu, mo rakava moġa bene tuġamaġi-fitoġaia, Keriso na ġomi ġemi vei-

rakava etuġamaġi-fitoġarito kavana. <sup>14</sup> Maiġeri mabarari iatari ai tu veuravini na boġono vedabuġa. Korana tu mai maġuri namori mabarari tu veuravini na vauro ebaru-sebona ginikaurini, benamo ġeġauvei-ġitakauni. <sup>15</sup> Keriso ġena maino na nuġami bene ġori-kauri. Korana Barau na ġomi ekea-vegogomito anina tu, tauġani sebonai boġono iaġo, benamo maino ai moġo boġono tanu. Ema Barau boġono tanikiu-vinia. <sup>16</sup> Keriso ġena guruġa tauri korikori e ġeri seġuka ġomi nuġami ai tu beġene vonuvonu-raġe. Monana karomi tata ġesi Keriso ġena guruġa iaunega korikorina na boġono vevaġa-riba e boġono vekira-toreġau. Ma nuġami ai Barau ġotanikiu-viniani nai tu, Salamo boġono mari, e Barau vaġa-raġena mariri boġono mariri, ema lauka Veaġa na evinimini mariri boġono mariri. <sup>17</sup> Kamara ġauvei boġo veiani nai, guruġai boġo veiani o veiġai boġo veiani, mabara-barari Iesu Vereġauka aranai moġo boġono veiri. Ma ġia ġenana Tamara Barau boġono tanikiu-vinia.

**Ekalesia tarimana ma ġaraġona e natuna ema ġena  
tuġu-rakaorakao tarimari ġesi ġeri tanu maġurina korikori**

<sup>18</sup> Veġaraġo vavinemi, ġomi tu ġaraġomi ġeri veġitaġau seġukana gaburenai boġono tanu. Korana mai maġuri maiġa Vereġauka ġoiranai tu maġuri namona. <sup>19</sup> Veġaraġo taumi, ġaraġomi boġono uravini-baregori, e ġaraġomi ġeri ai nuġami asi boġono vei-ġirimaiġirimari. <sup>20</sup> Natu, dagara mabarari ai tamami e sinami tu garori boġono seġaġi-viniri. Korana mai veiġa tu Vereġauka iauna evaġa-namoani. <sup>21</sup> Tama, natumi asi boġono vaġa-baruri, korana beġe tuġamaġi-moirani, asi beġe kokoreni garina.

<sup>22</sup> Tuġu-rakaorakao tarimami, mai tanobarai ġeri vetuġunaġi ġoiaġo-vinini tarimari garori boġono seġaġiri. Ġia tu dagara mabarari ai garori boġono seġaġiri. Dia ġia ġoirari ai moġo, tarima iauri beġene vaġa-namori ġetoni nai ġevei-ġofakauni tarimari kavari. Asiġina. Ġomi tu Vereġauka gubakauna maġurinai nuġami ma raġeri ġesi ema nuġami mabarari ġesi boġono seġaġi-viniri. <sup>23</sup> Ma kamara ġauvei boġo veiani nai, boġono veia nuġami mabarari ġesi. Ġauvei tu asi tarimarima ġeri ġauvei ġoveiani noġa boġono veia. Asiġina. Ġomi na tu Vereġauka ġena ġauvei ġoveiani maġurinai boġono veia. <sup>24</sup> Ġomi tu ma ribami, Vereġauka na vau voimi bevinimini, korana ġomi na tu Keriso Vereġauka ġena vetuġunaġi ġoiaġo-viniani. <sup>25</sup> A tarima ta na veiġa beleaiani nai, mo veiġa beleaiani voina tu beġabiani veġata. Korana Vereġauka ġoiranai tarima mabarari tu ilaila moġo, dia ta tu egubakauani, ma ta tu asi egubakauani.

**4** Ġomi vetuġunaġi veremi, mani ġemi tuġu-rakaorakao tarimari maniġeri ġeri-ġari tu, ġeura-vinirini ilailari ai boġono viniri. Ġia ma ġeri maoro kara ġomi ġemina beġere ġoitaġori dagarari tu boġono viniri veġata, ema veiġa namori e moġoniri ġeri ai boġono veiri. Korana ġomi maki boġono riba, ġomi eġita-ġaumini Verena maki etanuni gubai.

**Vevaġa-riba guruġari kotari maia**

<sup>2</sup> Ġauġau asi boġono vaġa-kettoa. Vanaġivanaġi boġono ġuriġuri. Ġemi ġauġau ai boġono venari maki, e Barau boġono tanikiu-vinia. <sup>3</sup> Ma ġai ġema maki boġono ġuriġuri, be Vari Namona baġana vari-fiua ġana, Barau na ġatama-boka gabu tari ai bene keori. Be mo ġana baġana iaġo, ma Keriso varina vekuretoġana monai baġana vari-fiua. Au tu mai Keriso varina vekuretoġana maiġa ġaramanai seini

na ġebarubaruguto. <sup>4</sup>Boġono ġauġau, be au na mai vari vekuretoġana maiġa bana kiraġi-fofori ġitakaua, Barau ekirato bana kiraġi-fofori ginikaua etato ilailanai.

<sup>5</sup>Keriso roġosi beġene ġabi-dadama-vinia, roġo murikai ġetanuni tarimari ġeri ai tu, veiġa iaunegari e namori boġono veiri. Ema ġia vefakari ai boġo raka-ġurani negari ai, moġeri mabarari tu asi boġono vaġa-rakavari, korana ġia boġo vaġa-kavarini negana tu kubi moġo bene. <sup>6</sup>Vanaġivanaġi boġo guruġani nai, boġono garo-namo. Gemi guruġa maki ma damenari boġono kiraġiri e boġono guruġa-ġitaġita, be ġemi guruġa tarimarima na beġene ura-viniri e ġeseġaġi-namori moġo beġene si. Moġesina boġo veini nai, tarima sebori sebori aiġesina boġo vaġa-veserini dabarari boġo ribarini.

### Veġabituġu guruġari

<sup>7</sup>Au varigu mabarana tu tarikakara namona, Tikiko, na vauro beasi kira-varamini. Ġia Keriso ġena maġuri nuġanai tu ma vetuġamaġi-kauna ġesi evevaġa-kavani, ema ġia tu au ġesi Vereġauka ġena vetuġu-naġi ġaiaġo-viniani. <sup>8</sup>Au na Tikiko ġomi ġemi ai atuġu-iaġosiani tauna korikori tu, ġai mainai kamas i ġatanuni maġurina beneasi vaġa-ribami ġana. Ġia na ġai ġema tanu maġurina bene kira-varami, be ġomi nuġami bene vaġa-gwaġiġiri uranai. <sup>9</sup>Ġia tu Onesimo ġesi eiaġosini. Onesimo tu ma ġena vetuġamaġikau, ema ġia tu ġai tarikakama namona ta. Ġia maki ġomi ġemi tarima ta. Ġia tauri ruarua na mainai kara ġeġorani dagarari mabarabarari beġeasi vaġa-ribamini.

<sup>10</sup>Aristako na ġena vevaġa-namo ġomi ġemi ai etuġu-iaġosiani. Ġia tu au ġesi ġadiburato, be dibura numai ġatanuni mainai. Banabas tarikakana Mareko na maki ġemi vevaġa-namo betuġu. Mareko ma Banabas tu tarikaka, senaġi ġia sinari e tamari tu irau, dia sebona. Mareko ġomi ġemi ai beiaġosini nai, boġono ġabi-raġea ġana guruġari tu varau asi-kira-varamito. <sup>11</sup>Ema Iesu, arana ta ġekiraġiani Iusto, na maki ġemi vevaġa-namo betuġu. A Iuda tarimari fakari ai au ġesi Barau ġena Basileia ġauveina ġaveiani tarimari tu maiġeri moġo. Ġia na au ġevaġa-kava ginikauguni.

<sup>12</sup>Gomi karomi ta, Keriso Iesu ġena vetuġunaġi eiaġo-vinini tarimana, arana Epafras, na maki ġemi vevaġa-namo betuġua. Ġia tu vanaġivanaġi ġomi urami ai evekwaraġini ġauġau ai. Ġia ġena noġinoġi baregona Barau ġenai eveiani tu, Barau na ġomi ġia ġena urai bene vaġa-ruġatari korikorimi. Ema Barau ġena ura ġomi na nuġami mabarari ġesi boġono vaġa-moġonia, ema boġono korana-iaġi ginikaua. <sup>13</sup>Au aġuruġa-fofori korikorini, moġoni, Epafras tu ġomi maniġemi, e Laodikea tarimari, e Hierapoli tarimari mabarami urami ai moġoni evekwaraġi-rakavato. <sup>14</sup>Ġita ġatara namona Luka, doketa tarimana, ema Dema, tauri ruarua na ġemi vevaġa-namo beġe tuġu. Luka tu doketa tarimana.

<sup>15</sup>Au ġegu vevaġa-namo ġita tarikakara Laodikea ai ġetanuni tarimari boġono viniri. E ġegu vevaġa-namo Nimfa boġono vinia, e Nimfa na numai ekalesia doġorona ġeraka-vegogoni maniġeri maki boġono viniri. <sup>16</sup>Mai fefa ġomi ġemi ai boġo iavi-ġosiani murinai tu, boġono tuġu-iaġoa, ma Laodikea ekalesiari ġeri ma beġenea iavi-foforia. Ma Laodikea ekalesiari atore-vinirito fefana maki ġomi fakami ai boġono iavi-foforia. <sup>17</sup>Ma Arekipo maiġesi boġono kiraia, boġono kira, “Vereġauka ġena maġuri nuġanai ġauvei oġabiato maniġa tu bono ġauvei-iaġi ginikaua.”

<sup>18</sup> Mai vevaḡa-namo guruḡari tu au Paulo tauḡegu ḡimagu na atorerini. Au boḡono tuḡamaḡigu, au tu roḡo ma seinigu diburai. Barau ḡena namo e varevare-bara ḡomi iatami ai bene tanu.

## PAULO ĜENA TORETORE GINIGUINENA TESALONIKA EKALESIARI ĜERI

1 Tesalonika vaĝa-foforina guruĝari

Mai fefa ĝena tuĝamaĝi baregona tu Iesu ĝena ĝenoĝoi-iaĝoma vaĝa-ruaruana. Korana tu Iesu ĝena iaĝoma vaĝa-ruaruana mai fefai tu ekiraĝi-ĝutumaiato.

Paulo na mai fefa tu Korinto na etore-iaĝoato, mo tu ĝena evanelia varivarina vaĝa-ruaruana nuĝanai (Apostolo 17:1-14). Mai fefa Paulo na tu laĝani 50 ema 51 nuĝanai ta etoreato, mo tu Keriso maki emaseto murinai vau.

Mai fefai siri baregori tu karoa 4:15-18.

Paulo na mai fefa giniguinena etoreato korana eurato, Tesalonika ekalesiari 1) bene launaĝiri, Barau na ĝeri ai eveirito veiĝari tarimarima ĝoirari ai beĝene vaĝa-foforiri; 2) bene vaĝa-ribari, Iesu ma beiaĝomani; 3) bene launaĝiri, Barau korana-iaĝina maĝurina korikorinai beĝene tanu.

Paulo na mai fefa tu maĝesi eboioĝaiato:

1. Ĝia aiĝesi vevaĝa-maĝuri ĝeĝoitaĝoto - karoa 1-3

2. Ĝia aiĝesina beĝene tanu mo maĝuri variĝunai - karoa 4-5

**1** Ĝai tauma toitoi, Paulo, Silas, e Timoteo, na Tamara Barau ema Vereĝauka Iesu Keriso ĝena ekalesia Tesalonika nuĝanai ĝatore-vinimini.

Varevare-bara ema maino ĝemi ai bene tanu.

### Tesalonika tarimari ĝeri maĝuri

<sup>2</sup> Ĝai tu ĝaro mabarari ai Barau ĝavaĝa-namoani ĝomi mabarami daimi ai, ema ĝema ĝurigiuri nuĝari ai ĝakiraĝimini. <sup>3</sup> Korana Barau, ĝita Tamara, ĝoiranai ĝavetuĝamaĝi-taĝoni, ĝomi ĝemi veĝabidadama kamasi ĝotovo-naĝirini, e ĝemi veuravini ai kamasi ĝoĝunaĝaveni, ema ĝemi vetuĝamaĝikau ĝita ĝera Vereĝauka Iesu Keriso ĝenai kamasi ĝovaĝa-gwaĝiĝirini. <sup>4</sup> Tarikakama mabarami, ĝai ribama ĝomi tu Barau na eura-vinimini ema ĝia na eviriĝimito ĝia ĝena. <sup>5</sup> Korana Vari Namona ĝai na ĝavinimito tu dia guruĝai moĝo, senaĝi Iauka Veaĝa ma seĝukana e ma moĝonina ĝesi. Ĝomi maki ma ribami, ĝomi ĝemi namo uranai ĝai tu kamasi ĝatanuto ĝomi fakami ai.

<sup>6</sup> Benamo ĝomi na maki ĝai ĝotovotovomato ema Vereĝauka ĝotovotovoato enabe ĝevaĝa-midigu midigumito, senaĝi Barau ĝena guruĝa ĝoĝabi-raĝeato ma vereremi ĝesi. Mo verere Iauka Veaĝa na evinimito. <sup>7</sup> Tauna moĝa ĝomi tu vevaĝa-ĝita namonai ĝoiaĝoto veĝabidadama tarimari mabarari Makedonia ema Akaia ĝeri. <sup>8</sup> Korana ĝomi ĝemina Vereĝauka ĝena guruĝa eraka-rosito tu dia Makedonia ema Akaia nuĝari ai moĝo, senaĝi ĝomi ĝemi veĝabidadama Barau ĝenai tu gabu mabaranoi beĝe ribaia. Moĝa lorinai monai ĝai na guruĝa ta tu asi ma baĝa kiraĝiani. <sup>9</sup> Ĝia tauĝeri maki ĝeveturaĝito ĝai na ĝavarivarimito nai, ĝomi na ĝai kamasi ĝoĝabi-raĝemato, ema kamasi babarau ĝoiaĝuirito, Barau maĝurina ema moĝonina vetuĝunaĝina boĝono iaĝo-vini ĝana, <sup>10</sup> ema Natuna Iesu ĝonariani guba na ma beĝenoĝoi-iaĝomani. Ĝia tu Barau na mase na ma evaĝa-variĝisi ĝenoĝoiato, ema ĝena baru bevaĝa-foforiani o tarimarima bevaĝa-kotarini ĝaronai, Iesu na bevaĝa-maĝurirani.



### Paulo ġena ġauvei Tesalonika ai

**2** Tarikakama mabarami, ġomi tauġemi ma ribami, ġemi ai ġaiaġosito nai, asi ġaġauvei-kavato. <sup>2</sup> Ġomi ribami maki, ġai Tesalonika ġana roġosi roġo baġana iaġosi nai, Filipi ai ġevaġa-midigu midigumato e ġekira-fitoġamato. Moġoni, ġeiaġoma-vini baregomato, senaġina Barau na evaġa-kokoremato, ġena Vari Namona baġana kira-varami ġana. <sup>3</sup> Ġai ġema velaunaġi ġomi ġemi ai tu dia guruġa babobabo ai, dia tuġamaġi rakavari ai, e dia ta baġana ġofaia ġana. <sup>4</sup> Senaġi Barau na evaġa-moġonimato Vari Namona baġana fiua. Moġa lorinai ġakiraġiani, dia tarimarima baġana vaġa-iakuri ġana, senaġi Barau baġana vaġa-iakua ġana. Ġia na ġai nuġama evetaurini. <sup>5</sup> Ġomi ribami, e Barau maki ġoiranai, ġai ġaiaġosito nai tu, dia nuġa-ġani ai ġavaġa-raġe ġofakaumito-ġoi, e mata-ġaniġani ai ġaguruġa-ġofakauto-ġoi. <sup>6</sup> Ġai tu asi ġomi na boġono vaġa-raġema, o tarima tari na beġene vaġa-raġema ġatato. <sup>7</sup> Ġai tu Keriso ġena apostolo tarimama, be ma ġema maoro, ġema-ġama ġomi ġemi ai baġara kiraġi. Senaġi ġomi ġesi tatanuto-ġoi neganai, ġai tu marana, sina ta na natuna eġita-ġaurini kavana. <sup>8</sup> Ġauravini-rakavamito lorinai ġaurato, dia Barau ġena Vari Namona moġo ġemi baġana kiraġi, senaġi ġema maġuri maki ġatore-taririto, korana ġema veuravini ġemi ai tu barego lelevaġi.

<sup>9</sup> Tarikakama mabarami, ġai kamasi ġaġauveito-ġoi ema ġavekwaraġito-ġoi roġo ġotuġamaġi-taġorini, ene? Barau ġena Vari Namona ġaġobata-vinimito-ġoi nuġanai, boġi-laġani ġaġauveito-ġoi, ġema-ġama baġana doġari uranai, baġa vaġa-doġe-ġanimini garina.

<sup>10</sup> Ġomi na ġoġitamato ema Barau na maki eġitamato ġai kamasi ġaveaġato, ġavei-maoromaoroto ema asi ġema kerere ta ġomi vaġa-moġoni tarimami fakami ai. <sup>11</sup> Ġomi ma ribami, ġai na ġomi tata ġaveimito-ġoi tu tama na natuna korikorina eveiani kavana. <sup>12</sup> Ġai na ġavaġa-kokoremito-ġoi, ġemi tuġamaġi ġavaġa-gwaġiġirito-ġoi, ema ġalau-naġimito-ġoi Barau vaġa-iakuna veiġari boġono veiri ġana. Ġia na ekeamini, ġena Basileia ma marevana baregona bene vinimi ġana. <sup>13</sup> Ġai na Barau ġatanikiu-viniani ġaro mabarari ai, korana ta tu, ġena guruġa ġaġabi-iaġosiatu neganai, ġomi na ġoseġaġiatu ema ġoġabi-raġeato tu dia tarimarima ġeri guruġa, senaġi guruġa moġonina korikori, Barau ġena guruġa. Mo guruġa tu ġovaġa-moġoniani tarimami nuġami ai eġauveini. <sup>14</sup> Tarikakama mabarami, ġomi tu Barau ġena ekalesia Keriso Iesu nuġanai Iudea ġesi boġo ilaila, korana Iuda tarimari na ġia ġevaġa-midigu midigurito ilailanai, ġomi maki ġemi doġoro tarimari na ġevaġa-midigu midigumini. <sup>15</sup> Iuda tarimari na Iesu Vereġauka ema peroveta tarimari ġevaġirito, ema ġai maki ġelaimato. Barau tu asi ġevaġa-iakuani, ema tarimarima mabarari ġekira-sirivaġi vinirini. <sup>16</sup> Ġai maki ġekira-ġoimani irau bese tarimari ġeri ai Vari Namona asi baġana kiraġia, korana maġuri vanaġivanaġi beġe ġabiani garina. Moġesi ġeri rakava vanaġivanaġi ġevaġa-baregorini. Senaġi Barau ġena baru maki iatari ai tu varau bevotu.

### Paulo ġena ura baregona Tesalonika tarimari ma bene ġitari

<sup>17</sup> Tarikakama mabarami, nega kotari roġo ġai ġomi sevimi na ġeinu-veġitamato, dia tuġamaġi ai, senaġi tauġani ai, asi ma ġaġitamini. Ġema ura baregona ġoirami baġana ġitari. <sup>18</sup> Ġai ġaurato tu ma baġana iaġosi ġomi ġemi ai. Moġoni, au Paulo, vaġa-vira akirato, senaġi Satani na ġema dabara ekouato. <sup>19</sup> Baġana ġenoġoi veġata,

korana ġomi tu ġai ġema tuġamaġikau, ġema verere e ġema kokore voina ġera Vereġauka Iesu ġoiranai ġia ma beiaġomani ġaronai. <sup>20</sup> Moġoni, ġai ġema veiavi e verere korana tu ġomi.

### Paulo na Timoteo etuġuato Tesalonika ġana

**3** Ġai ġema vevaġa-gwaġiġi ġekorito, benamo ġakirato, namona tu ġai tauma ruarua moġo Atena ai baġana tanu, <sup>2</sup> a ġai tarikakama Timoteo tu baġana tuġua ġomi ġemi ai. Ġia tu ġai ġesi Barau ġena vetuġunaġi ġaiaġo-viniani, Keriso ġena Vari Namona ġaġobata-iaġiani. Ġia na bene vaġa-kokoremi ema ġemi tuġa-maġi bene vaġa-gwaġiġiri ġemi veġabidadama nuġanai. <sup>3</sup> Be, ġomi ta na ġena veġabidadama asi bene raga-kwanea mani midigumidigu ġoġoitaġorini nuġanai. Ġomi ribami, maniġeri tu bita ġoitaġorini veġata. <sup>4</sup> Ġai roġo ġomi ġesi tatanuto-ġoi nai, ġakiramito-ġoi, ġita tu beġe vaġa-midigu midigurani, benamo moġeri ġefo-forito, be ġoribarito. <sup>5</sup> Moġa lorinai, ġegu vevaġa-gwaġiġi ekorito, benamo Timoteo atuġu-iaġosiato, ġia ġenana banama riba, ġemi veġabidadama tu kamasi ġotoreani. Korana irau dabara tari ai veribaġani tauna na beriba-ġanimini, benamo ġai ġema vekwaraġi asi taunai beiaġoni garina.

### Timoteo ġena vevarifiu

<sup>6</sup> Toma Timoteo tu ġomi ġemina beġenoġoi, ġomi ġemi veġabidadama e veuravini variri namona bema kiraġiri. Bekirama, ġomi na ġai roġo ġotuġamaġi-taġomani, ema ġourani boġono ġitama, ġai na ġomi baġana ġitami ġatoni kavana. <sup>7</sup> Moġa lorinai, tarikakama, ġema midigumidigu ema dabara doko mabarari nuġari ai ġemi veġabidadama na ġevaġa-kokoremato. <sup>8</sup> Korana ġomi Vereġauka ġenai boġo ruġa-gigitarini neganai, ġai ġema maġuri toma tu moġoni beġe namoni. <sup>9</sup> Barau ġomi daimi ai kamasi baġa tanikiu-viniani, korana ġai ġema verere tu asikeikeina ġomi ġemi ai Barau ġoiranai. <sup>10</sup> Boġi-laġani ma nuġama mabarari ġesi ġaġauġauni, ġomi ġoirami ma baġana ġitari ema ġemi veġabidadamai ġorabuni dagarari na baġana vaġa-kavami ġana.

<sup>11</sup> Bere namo ġita Tamara Barau tauġena na ema ġera Vereġauka Iesu na ġema dabara beġene veia, ġomi ġemi ai baġana iaġosi. <sup>12</sup> Ġera Vereġauka na maki ġomi veuravini na bene vaġa-vonuvonu-raġemi, karomi tata ema tarimarima mabarari boġono ura-viniri uranai, ġai na ġomi ġaura-vinimini kavana. <sup>13</sup> Barau na nuġami bene vaġa-kokoreri, benamo asi ġemi vei-rakava ta e ma veaġami ġesi Tamara Barau ġoiranai boġono ruġa, ġera Vereġauka Iesu ma beiaġomani ma ġena veaġa tarimari-mari mabarari ġesi ġaronai. Amen.

### Barau na eura-viniani maġurina

**4** Tarikakama mabarami, ġegu guruġa vaġa-magona tu maiġa. Barau vaġa-iakuna ġana aiġesi boġono tanu tu ġavaġa-ribamito. Moġoni, ġomi tu moġesi ġo-maġurini. Iesu Vereġauka aranai ġanoġimini e ġalaunaġimini, ma boġono kokore-iaġiri ġana. <sup>2</sup> Korana vevaġa-riba guruġari Iesu Vereġauka ġena maoro na ġavinimito tu ġomi ma ribami.

<sup>3</sup> Barau ġena ura tu boġono veaġa, mata-boraġa e veġura-vanaġi veiġari ġerina boġono raka-veġita. <sup>4</sup> Ġomi tau tata maki ġaraġomi ġesi boġono tanu ma veaġami e ma vegubakaumi ġesi. <sup>5</sup> Dia mata-boraġa na bene ġori-kaumi noġa Barau asi ribari

beseri kavana. <sup>6</sup> Ema mo veīga rekenai tau ta na tarikakana asi bene gōfagōfa-iaḡia ema ḡena ura bene veia. ḡai na ma nuḡama mabarari ḡesi ḡakira-guinemito: Moḡesi eveini tarimana tu Vereḡauka na ḡena rakava voina beviniani. <sup>7</sup> Korana Barau na ekearato tu dia tana mata-boraḡa e tana veḡura-vanaḡi, senaḡi tana veaḡa ḡana. <sup>8</sup> Moḡa lorinai, dei na mo vevaḡa-riba ḡekira-fitoḡaiani tu dia tarimarima ḡekira-fitoḡarini, senaḡi Iauka Veaḡa evinimini Barauna ekira-fitoḡaiani.

<sup>9</sup> Au na tarikaka uraviniri guruḡari tu toma asi batore-vinimini, korana Barau na evaḡa-ribamito, ḡomi tata boḡono veura-vevini. <sup>10</sup> Moḡoni, ḡomi na tu tarikaka mabarari Makedonia nuḡanai ḡoura-vinirini. Senaḡi tarikakama, ḡai na ma ḡavaḡa-naḡimini, mani veīga boḡono vaḡa-baregoa. <sup>11</sup> Dagara baregona ḡomi kamasi boḡono tanu tu maiḡesi: Asi boḡono guru-raḡe. Tauḡemi ḡemi ḡauvei boḡono vei, ema tauḡemi ḡimami na boḡono ḡauvei ḡemi-ḡami boḡono doḡari ḡana, ḡai na ḡakiramito ilailanai. <sup>12</sup> Monana vau asi ekalesia tarimari na beḡe gubakaumini, ema ta ḡenai asi boḡo tuḡamaḡikauni, korana dagara tai asi boḡo rabuni.

### Iesu ḡena ḡenoḡoi ḡarona

<sup>13</sup> Tarikakama mabarami, ḡai ḡaurani boḡono riba, ḡemaseto tarimari tu kamasi. Be, asi boḡono tuḡamaḡi-meto, asi ḡeri tuḡamaḡi-dadamaḡi tarimari kavana. <sup>14</sup> ḡita na tavaḡa-moḡoniani tu Iesu emaseto, murinai tu ma evariḡisi-ḡenoḡoito. Moḡesi nai ma tavaḡa-moḡoniani deikara Iesu ḡeḡabidadama-viniato-ḡoi nuḡanai ḡemaseto tarimari tu Barau na ma bevaḡa-variḡisi ḡeno-ḡoirini, Iesu ḡesi beḡabi-vegogorini.

<sup>15</sup> ḡai na kara ḡavaḡa-ribamini dagarari tu Vereḡauka ḡena guruḡa: Vereḡauka beḡenoḡoini ḡaronai, ḡita deidei roḡo maḡuri tatanuni tarimara na ḡemase-guineto tarimari asi bita raga-kwanerini, asi bita guineni Vereḡauka ḡesi veḡoitaḡo. <sup>16</sup> Barau beguruḡani ma seḡukana ḡesi, aneru baregona maki bekeakeani, ema Barau ḡena dudu befururuani ḡaronai, Vereḡauka tauḡena guba na bemariḡoni. Benamo deikarari ḡemaseto, Keriso ḡevaḡa-moḡoniato-ḡoi nuḡanai ḡemaseto tarimari, beḡe variḡisi-guineni. <sup>17</sup> Moḡa murinai, ḡita roḡo tamaḡurini ema roḡo tatanuni tarimara Barau na ḡia ḡeri ai ma bevaḡa-raka-kaurani magube nuḡari ai Vereḡauka ḡesi bitana vedoḡari ḡana, guba e tanobara fakari ai. Benamo Vereḡauka ḡesi bita tanu-vanaḡi vanaḡini. <sup>18</sup> Moḡa lorinai maiḡeri guruḡa ḡerina ḡomi tata boḡono vevaḡa-kokorevevini.

### Boḡono rovina-tore Vereḡauka ma beiaḡomani

**5** Tarikakama mabarami, ḡai na ḡomi asi ma baḡa tore-vinimini, aitoma mo nega e hora beḡe foforini. <sup>2</sup> Korana ḡomi tauḡemi ma ribami ḡitakau, Vereḡauka ḡena iaḡoma ḡaronai tu lema tarimana, boḡi eiaḡomani kavana, beiaḡomani. <sup>3</sup> Tarimarima beḡe kirani, “Maino ema dagara mabarari namo moḡo.” Nuḡanai tu asikauna kerere baregona na beḡabirini, noḡa vavine ma banina diana eguruni kavana. Tarima ta asi beraga-maḡurini. <sup>4</sup> Senaḡi tarikakama, ḡomi tu dia mukuna nuḡanai ḡotanuni tarimami, be mo ḡaro na nuḡami tu asi bene vaḡa-farevaḡiri lema tarimana kavana. <sup>5</sup> ḡomi mabarami tu mama e laḡani tarimami. ḡita tu dia boḡi e mukuna ḡeri tarimarima. <sup>6</sup> Moḡa lorinai ḡita tu asi bitana gena, asi bitana tanukava, tarima tari ḡeveini kavana, senaḡi bitana tataḡa, bitana boḡeboḡe, ema ḡera tuḡamaḡi beḡene maoro. <sup>7</sup> Gegenani tarimari tu boḡi ai ḡegenani, ema ḡeniuniuni tarimari maki boḡi ai ḡeniuniuni. <sup>8</sup> Senaḡi ḡita tu laḡani ḡena tarimarima dainai,

ġera tuġamaġi beġene maoro. Ġita tu veġabidadama e veuravini ġesiri kobarai bitana toreri, ema vevaġa-maġuri vetuġamaġina debara kwaraġaunai tana vaġa-iaġoa. <sup>9</sup> Korana Barau na eġabi-viriġirato tu dia ġia ġena baru na tana midigumidigu ġana, senaġi vevaġa-maġuri bitana ġabia ġera Vereġauka Iesu Keriso ġenana. <sup>10</sup> Ġia ġita urarai emaseto tu, ġia ġesi bitana tanu-vanaġi vanaġi ġana, enabe ġita roġo maġuri o mase ġia ma beiaġomani ġaronai. <sup>11</sup> Moġa lorinai ġomi tata boġono vevaġa-kokorevevini e boġono vevaġa-kava-vevini, maitoma ġoveini kavana.

### Vevaġa-riba guruġari tari

<sup>12</sup> Tarikakama mabarami, ġanoġimini, ġomi fakami ai ġeġauvei-kokoreni, Vereġauka aranai ġenarimini e dabara korikori ai ġevaġa-ribamini tarimari boġono gubakauri. <sup>13</sup> Ġeri ġauvei dainai boġono gubakau-baregori ema boġono ura-viniri. Ma mainomi ġesi boġono tanu.

<sup>14</sup> Tarikakama mabarami, ġavaġa-naġimini, ġauvei asi ġeveini tarimari boġono sisiba-viniri, ġegarini tarimari boġono vaġa-kokoreri. Moira tarimari boġono vaġa-kavari, tarimarima mabarari ġeri ai boġono vevaġa-gwaġiġi.

<sup>15</sup> Boġono boġeboġe, tarima ta na rakava na rakava voina asi bene veia, senaġi vanaġivanaġi ġomi tata ġemi ai ema tarimarima mabarari ġeri ai maki veġa namori moġo boġono veiri.

<sup>16</sup> Ġaro mabarari ai boġono verere. <sup>17</sup> Ġaro vanaġivanaġi boġono ġauġau. <sup>18</sup> Barau boġono tanikiu-vinia dagara mabarari ġeri ai. Korana mani tu Barau ġena ura ġomi Keriso Iesu ġesi ġomaġurini nuġanai.

<sup>19</sup> Iauka Veaġa karavana asi boġono vei-busea. <sup>20</sup> Peroveta guruġari asi boġono kira-fitoġari. <sup>21</sup> Dagara mabarari boġono riba-ginikaauri; namori moġo boġono ġabi-raġeri. <sup>22</sup> Rakava dagarari mabarari ġerina boġono raka-veġita.

### Vevaġa-namo guruġari

<sup>23</sup> Maino Barauna na bene vaġa-veaġa ginikaumi. Iaukumi, e ġemi maġuri, ema tauġanimi mabarari ġia na bene nariri, kerere ta na maki asi bene ġabimi, bene iaġo mo, ġera Vereġauka Iesu Keriso ġena iaġoma ġaronai. <sup>24</sup> Ġomi ekeamito Barauna ġena guruġa mabarari tu moġoni, ġia na beveirini.

<sup>25</sup> Tarikakama mabarami, ġai maki iatamai boġono ġuriġuri.

<sup>26</sup> Tarikaka mabarari vetarikaka verauna na boġono vaġa-namori.

<sup>27</sup> Alaunaġimini Vereġauka aranai mai fefa boġono iavi-foforia tarikaka mabarari ġoirari ai.

<sup>28</sup> Ġera Vereġauka Iesu Keriso ġena varevare-bara ġomi ġemi ai bene tanu.

## PAULO ĜENA TORETORE VAĜA-RUARUANA TESALONIKA EKALESIARI ĜERI

2 Tesalonika vaĝa-foforina guruĝari

Paulo na mai fefa vaĝa-ruaruana tu mo fefa giniguinena etoreato ma ĝue imaima sebona (6) evanaĝiato murinai ma etoreato. Mo tu ĝia roĝo Korinto ai etanuto-ĝoi nuĝanai etoreato.

Mai fefa nuĝanai siri baregona tu karoa 2:3.

Paulo na mai ĝena fefa vaĝa-ruaruana etoreato mainai tu Tesalonika ekalesiari 1) ĝevaĝa-midigu midigurito-ĝoi nuĝanai evaĝa-gwadarito; 2) Iesu ĝena ĝenoĝoi-iaĝoma vaĝa-ruaruana guruĝari kotari ma ekira-vararito; 3) evaĝa-naĝirito, ĝeri veĝabidadamai beĝene ruĝa-gwaĝiĝi bene iaĝo mo, Iesu Vereĝauka bene ĝenoĝoi, ema elaunaĝirito maki, asi beĝene ĝubulefi.

Paulo na ĝena fefa vaĝa-ruaruana tu maiĝesi eboioĝaiato:

1. Nuĝari evaĝa-gwaĝiĝirito, ekirarito, Keriso tu ma beiaĝomani - karoa 1
2. Loriri beĝene vetore korana Keriso ĝofaĝofana tu beiaĝoma-guineni roĝo - karoa 2
3. Ekalesia aiĝesina beĝene tanu maĝurina - karoa 3

**1** Ĝai tauma toitoi, Paulo, Silas, e Timoteo na Tamara Barau ema Vereĝauka Iesu Keriso ĝena ekalesia Tesalonika nuĝanai ĝatore-vinimini.

<sup>2</sup>Barau ĝita Tamara ema Vereĝauka Iesu Keriso ĝerina varevare-bara e maino ĝemi ai bene tanu.

### **Keriso ma beiaĝomani ĝaronai, Barau na tarimarima ĝeri rakava voiri bevinirini**

<sup>3</sup>Tarikakama mabarami, ĝai na tu Barau baĝana tanikiu-vinia ĝaro mabarari ai ĝomi daimi ai. Moĝesi baĝa veini tu maoro, korana ĝemi veĝabidadama ebarego-rakavani, ema ĝemi veuravini karomi mabarari ĝeri ai maki ebaregoni. <sup>4</sup>Moĝa lorinai ĝomi ĝavaĝa-raĝemini Barau ĝena ekalesia nuĝari ai. Ĝavaĝa-raĝemini korana ĝomi tu enabe ĝelaimini e ĝevaĝa-midigu midigumini, senaĝi ĝemi veĝabidadama ĝoĝabi-gigitariani.

<sup>5</sup>Mo veiĝa mabarari na Barau ĝena vevaĝa-maoro vetoĝana namona ĝevaĝa-moĝoniani, moĝa anina ĝomi tu ilaila ĝia ĝena Basileia boĝo ĝabiani, korana mo Basileia dainai ĝomidigu-midiguni. <sup>6</sup>Barau tu maoro veiĝari moĝo beveini: Ĝomi dei na ĝevaĝa-midigu midigumini tarimari ĝia na ma bevaĝa-midigu midigurini. <sup>7</sup>Ema ĝemi midigumidigu ĝerina bevaĝa-iaĝaraĝimini ema ĝai maki. Moĝesi beveirani Iesu Vereĝauka ma ĝena aneru ma seĝuka baregori ĝesi guba na beĝe mariĝoni ĝaronai. <sup>8</sup>Ma karava moremorena ĝesi beiaĝomani; Barau asi ĝekorana-iaĝiani tarimari ema ĝera Vereĝauka Iesu ĝena Vari Namona asi ĝeĝabi-raĝeani tarimari ĝeri rakava voiri bema vinirini. <sup>9</sup>Ĝeri rakava voiri tu maiĝa: Ĝia tu Vereĝauka ĝenana e ĝena mama seĝukana ĝenana ma fakari beĝe tanuni, midigu vanaĝivanaĝi beĝe ĝabini. <sup>10</sup>Mo tu beĝorani Keriso ma beiaĝomani ĝaronai, ĝena tarimarima mabarari na beĝene vaĝa-raĝea, ema ĝevaĝa-moĝoniani tarimari na beĝene vaĝa-namoa ĝana. Ĝomi maki ĝia ĝesi, korana ĝaĝobata-vinimito, ĝoĝabi-raĝeato nai.

<sup>11</sup> Moġa lorinai vanaġivanaġi ġomi iatami ai ġaġuriġurini. Ġera Barau ġanoġiani, ġemi maġuri bene vaġa-namori, korana ġia na ekeamito tu boġono maġuri ġana. Ġia seġukana na ġemi ura namori mabarari ai bene vaġa-ġaunami, ema ġemi veġabidadama dainai ġoveirini ġauveiri e veġari bene vaġa-ġuġururi. <sup>12</sup> Monana, Iesu Vereġauka arana beġene vaġa-raġea ġomi daimi ai, ema ġomi beġene vaġa-raġemi ġia bakunai. Ġita ġera Barau e Vereġauka Iesu Keriso na ġeri varevare-bara ġerina moġeri dagara mabarari beġene vaġa-ġorari.

### Taravatu ekira-fitoġaiiani tarimana

**2** Tarikakama mabarami, ġai na ġanoġimini, ġera Vereġauka Iesu Keriso ġena iaġoma rekenai ema ġera veġoitaġo e raka-veġogo ġia ġesi: <sup>2</sup> Nuġami asi beġene veġonu-ġarimoġi, o beġe kirani Vereġauka ġena ġenoġoi ġarona tu bevotu beġe toni neganai, nuġami asi beġene meto. Mo guruġa asi boġono vaġa-moġonia, enabe beġe kirani, mo tu peroveta guruġana, o ġobatai ġekiraġiato guruġana, o ġai na fefa nuġanai ġatoreato guruġana. <sup>3</sup> Tarima ta na veġa irauri ai asi bene ġofami. Korana Vereġauka ġena ġaro tu asi roġo beraġasini, beiaġoni mo, tarimarima ġutuma ġeri veġabidadama beġe raga-kwanerini, ema taravatu ekira-fitoġaiiani tarimana befoforini. Ġia tu Barau na karava gabunai bea toreani. <sup>4</sup> Tarimarima ġetoma-rakariġo vinirini e ġeguba-kaurini dagara veaġari mabarari mo tarima na bekira-fitoġarini, ema ġia tauġena bevetore-varaġeni. Ġia beiaġoni Barau ġena Rubu Veaġa nuġanai betanu-tarini, benamo bekirani, “Au tu Barau,” betoni.

<sup>5</sup> Au ġomi ġesi roġo tatanuto-ġoi nai, moġeri mabarari akira-varamito. Ġomi na asi ġotuġamaġi-taġorini? <sup>6</sup> Taravatu ekira-fitoġaiiani tarimana tu toma bere fofori, senaġi dagara ta na elau-ġauani, ġomi tu ma ribami kara. Ġarona korikorinai vau mo taravatu ekira-fitoġaiiani tarimana befoforini. <sup>7</sup> Taravatu ekira-fitoġaiiani tarimana ġena veġa vekuretoġari initoma kota ġefoforini, senaġi kara beġe ġorani dagarari tu asi roġo beġe ġorani, beiaġoni mo, eruġa-ġaurini tarimana na dabara bekeoani. <sup>8</sup> Monai vau taravatu ekira-fitoġaiiani tarimana befoforini, senaġi Iesu Vereġauka ma beiaġomani ġaronai, muruna seġukana na bevaġiani, ema ekimore-kimoreni mamana ġesi beiaġomani, benamo bevaġa-rakavaiani. <sup>9</sup> Taravatu ekira-fitoġaiiani tarimana tu Satani ġena seġukai beiaġomani, ġofaġofa veġa boruri e nuġa-farevaġi veġari mabarari beveirini. <sup>10</sup> Ema ġena veġa ġeġevari na mase dabaranai ġerakani tarimari beġofarini. Ġia tu beġe rekwa-rekwani, korana beġene maġuri ġana guruġa moġonina tu asi ġeġabi-raġeato e asi ġeura-viniato. <sup>11</sup> Moġa lorinai Barau na tuġa-maġi veġonuri ġia nuġari ai bevaġa-raka-toġarini, ġofaġofa beġene vaġa-moġoniri ġana. <sup>12</sup> Moġa tauna tu, deikara na guruġa moġonina asi ġeġabi-raġeato, senaġi rakava ġeiau-viniato tarimari mabarari tu, Barau na ġeri rakava voiri bevinirini.

### Maġuri boġono ġabia ġana Barau na eġabi-viriġimito

<sup>13</sup> Tarikakama mabarami, ġai na tu Barau baġana tanikiu-vinia ġaro mabarari ai, moġesi baġa veini tu maoro, korana ġia na eura-vinimini, ema tovotovonai eviriġimito bene vaġa-maġurimi ġana. Mo maġuri boġo doġariani, korana Iauka Veaġa ġena seġuka na evaġa-maġurimini, Barau ġena tarima veaġami ai evaġa-iaġomini, ema Vereġauka ġena guruġa moġonina ġovaġa-moġoniani. <sup>14</sup> Barau na ekeamito Vari Namona ġaġobata-vinimito ġenana. Gomi ekeamito ġera Vereġauka Iesu Keriso ġena mareva baregona boġono ġabia ġana. <sup>15</sup> Moġa lorinai, tarikakama, boġono ruġa-

gigitari, ġaġobata-vinimito ema fefai ġatore-vinimito vevaġa-riba guruġari mabarari boġono korana-iaġiri.

<sup>16</sup> Ġera Vereġauka Iesu Keriso tauġena ema Barau ġita Tamara na ġeura-vinirani. Ema ġena varevare-bara ġenana ġita tata nuġara evaġa-kokorerini ema evaġa-kavarani ġera vetuġamaġikau ġia ġenai tatoreani nuġanai, toma bene iaġo vanaġi-vanaġi. <sup>17</sup> Ġia ġanoġiani, nuġami bene vaġa-kokoreri, ema bene vaġa-kavami guruġa e veiġa namori boġono veiri ġana.

### Ġema boġono ġuriġuri

**3** Tarikakama mabarami, ġema guruġa magonai tu, ġema boġono ġauġau, ben-amo Vereġauka ġena guruġa bene raga-rovorovo, ema gabu mabarari ai tarimarima na beġene ġabi-raġea ma vaġa-namona ġesi Barau ġenai, ġomi ġemi ai eġorato kavana. <sup>2</sup> Barau boġono noġia maki, ġia na rakava kwaikwai tarimari ġerina bene vaġa-maġurima. Korana dia tarimarima mabarari na Vereġauka ġena guruġa ġevaġa-moġoniani.

<sup>3</sup> Senaġi Vereġauka tu ma ġena vetuġamaġikau ġomi ġemi ai. Ġia na bevaġa-kokoremimi, ema Satani ġenana bevaġa-maġurimimi. <sup>4</sup> Ġai ġema veġabidadama ġomi ġemi ai tu Barau na evinimato, e ġaribani, ġakiramito veiġari ġoveirini ema roġo boġo vei-vesiriġurini. <sup>5</sup> Vereġauka na ġemi tuġamaġi e ura mabarari bene ġori-kauri, be Barau ġena veuravini ema Iesu Keriso na evinimimi vevaġa-gwaġiġina boġono riba-ġitakauri.

### Ġauvei tu dagara baregona

<sup>6</sup> Tarikakama mabarami, Vereġauka Iesu Keriso aranai ġakiramini, ekalesia tarimari ġubulefiri, ġavaġa-ribarito guruġari asi ġekorana-iaġirini tarimari, ġerina boġono raka-veġita. <sup>7</sup> Ġomi ribami ginikau, ġomi tu ġai ġaveito kavana boġono vei. Ġai tu asi ġavei-ġubulefito ġomi ġesi tatanuto-ġoi nai. <sup>8</sup> Tarima ta ġena-ġana asi ġaġabi-raġe kavarito-ġoi, senaġi ġavoirito-ġoi. Ġai tu boġi-laġani ġaġauveito-ġoi, ġavekwarāġito-ġoi, korana ġomi ta baġa vaġa-doġe-ganimimi garina. <sup>9</sup> Ġai ma ġema maoro, ġomi ġemi ai ġema-ġama baġa kiraġini. Senaġi ġema ura tu vevaġa-ġita namonai baġana iaġo, ema ġai boġono tovtovoma uranai moġesi ġaveito-ġoi. <sup>10</sup> Ġai ġomi ġesi tatanuto-ġoi nai, vevaġa-riba guruġana ta ġavinimito tu maiġesi: “Bema tarima ta ġauvei asi euranai nai, ġaniġani ta maki asi boġono vinia.”

<sup>11</sup> Moġesi ġakirani, korana ġaseġaġini tarima tari ġomi fakami ai tu ġubulefi ġetanuni, ġauvei asi ġeveini, senaġi tarima tari ġeri ġauvei ai ġevekougou-ġauni. <sup>12</sup> Vereġauka Iesu Keriso aranai ġavaġa-guruġa gwaġiġirini e ġasisiba-vinirini, beġene tanu-ġitakau, asi beġene raka-taġuitaġui, senaġi tauġeri beġene ġauvei, ġeriġari beġene doġari ġana.

<sup>13</sup> Senaġi ġomi, tarikakama, akiramini, asi boġono gau, veiġa namori veiveiri ai. <sup>14</sup> Bema tarima ta na mai fefai ġatore-iaġosirini guruġari asi euranai bene seġaġiri nai, nuġami ai bene tanu, ġia ġesi asi boġono vekako, be bene maiakaia. <sup>15</sup> Ġami vetari tarimanai asi boġono vaġa-iaġoa, senaġi tarikakami ġoveirini ilailanai boġono vaġa-ribaia.

**Vevaġa-namo guruġari**

<sup>16</sup> Vereġauka, ġita ġera maino korana, ġia na ġaro vanaġivanaġi ġena maino bene vinimi ġemi maġuri tata nuġari ai. Vereġauka ġomi mabarami ġesi bene tanu.

<sup>17</sup> Mai vevaġa-namo guruġana au, Paulo, tauġegu na atoreani. Ġegu fefa dokori ai vevaġa-namo guruġari maiġesi kavana ġimaġu na atorerini. Mo tu au ġegu fefa vaġa-moġoniri vetoġana.

<sup>18</sup> Ġera Vereġauka Iesu Keriso ġena varevare-bara ġomi mabarami ġemi ai bene tanu.



## PAULO ĜENA TORETORE GINIGUINENA TIMOTEO ĜENA

1 Timoteo vaĝa-foforina guruĝari

Paulo na mai fefa maiĝa tu dia ekalesia doĝorona ta ĝena etoreato, mai tu tarima sebona arana Timoteo moĝo ĝena etoreato. Timoteo tu betaĝu Paulo ĝena evanelia ĝauveina nuĝanai emaĝuri-ĝenoĝoito (Apostolo 14; 1 Timoteo 1:2).

Paulo na mai fefa Timoteo ĝena tu laĝani 61 ma 65 fakari ai ta etoreato, mo tu Iesu emaseto murinai.

Mai fefa nuĝanai siri baregori tu karoa 3:15; 4:12; 6:11-12.

Paulo na mai fefa etoreato tu, 1) Timoteo evaĝa-guruĝa toreĝauato, vevaĝa-riba tarimari ĝofaĝofari na beĝe ĝofaiani garina; 2) ekalesia doĝorona ĝorikauri tarimari ema diakono tu aiĝesina tarimari bene ĝabiri; 3) vevaĝa-riba moĝoniri bene vevaĝa-riba-iaĝi; 4) Timoteo elaunaĝiato, Vari Namona eribaiato moĝa ĝobina bene torea ema bene ĝobata-iaĝia.

Ĝena toretore tu maiĝesina eboioĝaiato:

1. Vevaĝa-riba guruĝari moĝoniri bene ĝabi-gigitariri - karoa 1
2. Ĝauĝau e toma-rakariĝo guruĝari - karoa 2
3. Veĝitaĝau tarimari baregori ema diakono tu kamasiri beĝene ruĝa - karoa 3
4. Vevaĝa-riba tarimari ĝofaĝofari - karoa 4
5. Vetuĝunaĝi-iaĝovini tarimana e ekalesia doĝorona aiĝesi beĝene tanu - karoa 5-6

**1** Au Paulo, Keriso Iesu ĝena apostolo tarimagu, ĝeguna mai fefa eiaĝosini. Mai apostolo ĝauveina aveiani tu ĝita ĝera vaĝa-maĝuri Barauna ema Keriso Iesu ĝeri guruĝa lorinai. Ĝita tu Keriso Iesu ĝenai moĝo tavetuĝamaĝikauni.

<sup>2</sup>Timoteo, ĝoi atore-vinimuni, natugu korikori veĝabidadama nuĝanai. Barau ĝita Tamara ema Keriso Iesu ĝita ĝera Vereĝauka ĝerina varevare-bara, vevetuĝaĝwa, e maino ĝemu ai bene tanu.

### Vevaĝa-riba ĝofaĝofa tarimari loriri bono toreri

<sup>3</sup>Makedonia ĝana niaĝo atato nai, ĝoi avaĝa-guruĝamuto, akirato, Efeso ai bono tanu. Korana tarima tari monai tu guruĝa ĝofaĝofari ĝevevaĝa-riba iaĝirini. Ĝoi na moĝeri tarima bonoa kirari, beĝene doko. <sup>4</sup>Bono kirari, sinasina e tuburi ĝatari arari tu asi beĝene vetauri, korana moĝeri na tu veĝareveĝare moĝo beĝe vaĝa-ĝorarini. Ema moĝeri maki ĝia ĝeri veĝabidadama asi beĝe vaĝa-kavarini, ema Barau na ĝita ĝerai kara neveia etoni dagarana asi beĝe ribaiani. <sup>5</sup>Au ĝegu mai guruĝa tauna korikori tu ĝegu ura veuravini bene fofori. Mo veuravini tu nuĝa namo vedaureana, tuĝamaĝi iobukaiobukana, ema veĝabidadama moĝonina ĝerina eiaĝo-mani. <sup>6</sup>Tarima tari tu moĝeri na ĝeraka-veĝitato, benamo guruĝa babori, asi tauri guruĝari ĝekiraĝirini. <sup>7</sup>Ĝia ĝeurani tu Barau ĝena taravatu vevaĝa-riba-iaĝiri tarimari ai beĝene iaĝo, senaĝina ĝia tauĝeri ĝeri guruĝa tu asi ĝetuĝamaĝi-fakarini, ĝeguruĝa-iaĝirini dagarari tauri korikori maki vekuretoĝa rakava, asi ribari.

<sup>8</sup>Ĝita ribara, taravatu tu namo bema tarima na beĝauvei-iaĝi ginikauani nai. <sup>9</sup>Maiĝa maki ma ribara: Taravatu ĝeveirito tu dia vei-iobukaiobuka tarimari ĝeri, senaĝi taravatu asi ĝekorana-iaĝirini tarimari ĝeri, ema kira-sirivaĝi tarimari ĝeri, Barau garina asi ĝegarini e vei-rakava tarimari ĝeri, asi veaĝa tarimari ema Barau asi ĝegubakauani tarimari, sinari e tamari ĝevaĝirini ema vaĝivaĝi tarimari. <sup>10</sup>Mata-

boraġa e veġuravanaġi tarimari, tau o vavine karori ġesi ġekimani tarimari, tarimarima ġelemarini benamo ma ġeivoivoi-iaġirini tarimari, ġofaġofa tarimari Kota nuġanai ġofaġofa guruġari ġekiraġini. Ema veiġa rakavari ġutuma ġeveini vevaġa-riba guruġari moġoniri ġesi asi ilaila. Taravatu tu moġeri tarimarima ġeri ġeveirito. <sup>11</sup> Mo vevaġa-riba guruġari moġoniri tu Vari Namona nuġanai, Barau na au eviniguto bana kiraġi-foforiri ġana. Mo Vari Namona tu mareva namo Barauna ġena mama e seġuka varina.

### Paulo na Keriso etanikiu-viniato

<sup>12</sup> Ġera Vereġauka Keriso Iesu na kokore eviniguto, ema etuġamaġiguto ma ġegu vetuġamaġikau ġena vetuġunaġi baiaġo-vinini. Moġesina naima etoreguto, ġena vetuġunaġi bana iaġo-vinia ġana. Moġa lorinai atanikiu-viniani. <sup>13</sup> Moġoni, guinenai au na Keriso tu aguruġa-rakava viniato-ġoi, alai-veġitaiato-ġoi ema avei-veġareveġare rakavaiato-ġoi. Senaġi Barau na evetuġa-ġwaguto, korana mo negai kara aveiato-ġoi tu au asi ribagu, ema Keriso asi avaġa-moġoniato-ġoi. <sup>14</sup> Ġera Vereġauka ġena varevare-bara barego lelevaġi au iatagu ai ebubu-kauato, veġabidadama e veuravini ġesi. Mo veġabidadama e veuravini tu Keriso Iesu ġesi bita sebonani vau bita ġabirini dagarari.

<sup>15</sup> Mai guruġa tu moġoni, ema tarimarima mabarari na beġene ġabi-raġea e beġene vaġa-moġonia tu namo: Keriso Iesu tanobara ġana eiaġomato tu vei-rakava tarimari vaġa-maġuriri ġana. Vei-rakava tarimari mabarari fakari ai rakava kwaikwai tarimana tu au. <sup>16</sup> Senaġi Barau ġena vevetuġaġwa au, rakava kwaikwai tarimagu, ġegu ai etoreato, korana Keriso Iesu ġena vevaġa-gwaġiġi bene vaġa-foforia ġana. Vevaġa-ġita namonai bene vaġa-iaġogou, tarimarima na beġene vaġa-moġonia vau, ġia ġenai beġene veġabidadama, maġuri vanaġivanaġi beġene ġabia ġana. <sup>17</sup> Barau tu tanu-vanaġivanaġi Verena, ġia mase asi ribana, asi ġitaġitana, ġia ġereġana kwar-ġgutu moġo Barau. Ġia moġo bitana gubakaua, bitana vaġa-raġea toma bene iaġo mo vanaġivanaġi. Amen.

### Timoteo na vetari namona bene vetari-iaġia

<sup>18</sup> Timoteo, natugu o, au mai vaġa-naġi ġoi avinimuni, peroveta tarimari na ġeperoveta-iaġimuto ilailanai, moġeri bono tuġamaġi-taġori. Mo peroveta guruġari bono korana-iaġiri, be Barau ġena vetari nuġanai vevaġi namona bono veia. <sup>19</sup> Ġemu veġabidadama bono ġabi-gigitaria, ema nuġamu iauna namo bene tanu. Tarima tari na nuġari garori asi ġeseġaġi-vinirito, benamo ġeri veġabidadama tu noġa bouti fore ai ġevaġa-daġi-kauani, benamo eġwa-kirakiraiani kavana. <sup>20</sup> Moġesi ġeveito tarimari ta tu Himenaio ma ta tu Alesanda. Ġia tauri ruarua tu Satani ġimana nuġanai atorerito. Korana ġia beġene riba, be Barau asi ma beġene vei-veġare veġarea ġana.

### Rubu toma-rakariġo dabarana korikori

**2** Au ġegu sisiba giniginena tu maiġa: Tarimarima mabarari urari ai Barau boġono noġi-vinia, boġono ġauġau, tarimarima urari ai Barau e tarima vekaravari ai boġono ruġa, Barau boġono noġia ema boġono tanikiu-vinia. <sup>2</sup> Kini e gava-manai mabarari ġeri maki boġono ġuriġuri, be bitana tanu-ginikau ma mainora ġesi, ema Barau bitana korana-iaġia ma moġonira ġesi. <sup>3</sup> Moġesi tu namo, ema Barau ġera vevaġa-maġuri tarimana bita vaġa-verereani. <sup>4</sup> Barau eurani tarimarima mabarari

beĝene maĝuri ema guruĝa moĝonina beĝene ribaia. <sup>5</sup> Korana Barau tu sebona kwar-iĝutu moĝo; ema Barau e tarimarima vefakari ai eruĝani tarimana maki sebona moĝo, Keriso Iesu. <sup>6</sup> Ĝia tauĝena ĝena maĝuri evinito, tarimarima mabarari bene voi-ĝenoĝoiri ĝana. Barau ĝena vevaĝa-moĝoni na tu mo ĝaro eĝabi-viriĝiato, monai vau ema fororito. <sup>7</sup> Moĝesina nai au etoreguto, apostolo e ĝobata tarimagu. Mai tu moĝoni, asi aĝofamini. Au etoreguto tu, irau bese tarimari ĝeri ai veĝabidadama korikorina bana vevaĝa-riba-iaĝiri.

<sup>8</sup> Au aurani gabu mabarari ai tau tu ĝimari veaĝari beĝene ĝabi-vaisiri ĝauĝau nuĝanai. Senaĝi ĝauĝau ai ĝimari veaĝari beĝe ĝabi-vaisirini nai tu, nuĝari tu asi baruri ema asi daradarari ĝesi.

<sup>9</sup> Au aurani vavine maki beĝene vedabuĝa-ginikau, ma vegubakauri ĝesi dabuĝa beĝene riĝo. Ĝuiri asi beĝene fego-irauirauri, ema golo o aĝeva ma marevari irauirau na asi beĝene vera, ema voiri baregori dabuĝari na maki asi beĝene vedabuĝa.

<sup>10</sup> Senaĝi veiĝa namori ema roroĝotori mabarari veravera noĝa beĝene veiri. Korana Barau ĝegubakauani vavineri ĝeri veiĝa korikori tu moĝesina. <sup>11</sup> Vavine na Barau ĝena guruĝa beĝene seĝaĝi-viniri ma nuĝa ĝave-mukori ĝesi, asi beĝene guru-raĝe.

<sup>12</sup> Au asi aurani vavine vevaĝa-riba ĝauveina beĝene vei, ema veĝorikau maĝurinaĝi na tau asi beĝene guine-iaĝiri, ema asi beĝene guru-raĝe. <sup>13</sup> Korana Barau na Adamu evei-guineato, murinai vauro Eva ma eveiato. <sup>14</sup> Ema Satani na tu dia Adamu eĝofaiato, senaĝi Eva eĝofaiato, benamo evei-rakavato. <sup>15</sup> Senaĝina vavine tu mero beĝene ĝabi. Korana monana vavine vevaĝa-maĝuri beĝe ĝabiani. Mo tu bema ĝeri veĝabidadama e veuravini beĝe ĝabi-taririni ema beĝe veaĝani e beĝe tanu-ginikauni.

### Veĝorikau tarimari rubu nuĝanai

**3** Mai guruĝa tu moĝoni: Bema tarima ta eura-rakavani, ekalesia ĝorikauna dag-ina bene ĝabia etoni, ĝia tu ĝauvei namo vedaureana eura-viniani. <sup>2</sup> Ekalesia ĝorikauna tarimana tu maĝesi bene tanu: Ĝia tu vei-iobukaiobuka tarimana, rakava ta ĝenai asi boĝoitaĝoani. Ĝia tu ĝaraĝona vavine sebona moĝo, vevaĝa-gwaĝiĝi tarimana, ĝena tuĝamaĝi e veiĝa maki roroĝoto. Tarima boruri eĝabi-raĝerini ĝena numai ema vevaĝa-riba ĝauveiri ma ribana tarimana. <sup>3</sup> Asi niuniu rakava-rakava tarimana ema asi eniara-niarani tarimana, senaĝi manau ema maino tarimana; moni asi emata-ĝaniĝanini tarimana. <sup>4</sup> Ĝena numa tarimari eĝitaĝau-ginikaurini tarimana ema natuna keikeiri na garona ĝeseĝaĝi-viniani ma vegubakauri ĝesi tarimana. <sup>5</sup> Korana bema tarima ta na ĝena numa tarimari korikori asi beĝitaĝau-ginikaurini nai tu, kamara dabarai Barau ĝena ekalesia doĝorona beĝita-ĝauani? <sup>6</sup> Ekalesia variĝuna na veĝorikau dagina asi bene ĝabia, korana beveivini ĝesi. Korana bevekoroĝokuni nai, Barau na vevaĝa-maoro beveivini Diabolo evei-viniato kavana. <sup>7</sup> Ĝia tu asi ekalesia na maki ĝegubakauani tarimana, ma tari na guruĝa rakavari asi beĝe kiraĝini ĝenai, ma Diabolo ĝena rigirigi ai maki asi bea toĝani.

### Diakono tarimari

<sup>8</sup> Diakono maki moĝesi, tarimarima na ĝeri veiĝa namori lorinai ĝegubakaurini tarimari, ema dia dagara ta kiraĝi-iaĝinai tu tarima ta ĝenai tu guruĝa ta ĝea kiraĝiani, ma ta ĝenai tu guruĝa boruna ta ma ĝea kiraĝiani tarimari. Wain asi ĝeniuĝutumaiani, ema moni e farefare asi ĝemata-ĝaniĝani-iaĝirini, ema veiĝa ĝofaĝo-

fari ġerina moni o farefare asi ġeġabini tarimari. <sup>9</sup> Ġia na guruġa moġoniri korikori vekuretoġari Barau na ġita taveġabadadamani tarimara ġerai ema vaġa-foforirito, moġeri ġeġabi-gigitaririni nuġari ma iobukaiobukari ġesi. <sup>10</sup> Ġia tu boġono tovonagi-guineri. Bema ġeri ai vetoukau ta asi boġo ġoitaġoani nai, diakono dagina beġene ġabi. <sup>11</sup> Ġaraġori vavineri maki tarimarima na ġegubakaurini vavineri, asi ġeveroritoreni, ma vevaġa-gwaġiġi ribari e ma ġeri vetuġamaġikau dagara mabarari ġeri ai. <sup>12</sup> Diakono tu ġaraġona vavine sebona moġo, natuna ema ġena numa tarimari ġitaġauri ma ribana. <sup>13</sup> Korana diakono ġauveina ġevei-ginikauani tarimari tu tarimarima na beġe gubakaurini, ema ġia tauġeri maki nuġari ma kokoreri ġesi Keriso Iesu ġenai ġeri veġabadadama beġe vaġa-ruġarini.

### Guruġa vekuretoġa mabarana

<sup>14</sup> Oba, au ġegu tuġamaġi tu bana raga-iaġosi, be banasi ġitamu, senaġina mai guruġa tu atore-vinimuni. <sup>15</sup> Bema bakwaiboni nai, mai guruġa na bene vaġa-ribamu, tarimarima Barau ġena bese nuġanai tu kamasi beġene tanu. Barau ġena bese tarimari tu maġuri Barauna ġena ekalesia, ema ġia tu guruġa moġonina duġuna baregona ema korana. <sup>16</sup> Moġoni, Barau korana-iaġina tu vekuretoġa ema dobumasemase, Barau na evaġa-foforiato tu maiġa:

Ġia tu efoforito tarima tauġaninai,  
Iauka Veaġa na iobukaiobukana ekiraġiato,  
aneri na ġeġitaiato.  
Tanobara mabarari fakari ai ġeġobata-iaġiani,  
tanobarai tarimarima na ġevaġa-moġoniani,  
ġena mareva baregonai Barau na eġabi-varaġeato.

### Vevaġa-riba ġofaġofa tarimari

**4** Iauka Veaġa na ekiraġi-foforiani, tarima tari ġoirara ġarori ai Keriso ġabadadama-vinina beġe raga-kwaneani, benamo ġofaġofa iaukari beġe seġaġi-vinirini, ema iauka rakavari ġeri vevaġa-riba beġe ġabi-raġerini. <sup>2</sup> Mo vevaġa-riba tu guruġa ġofaġofa tarimari na beġe kiraġirini. Ġia ġeri tuġamaġi iobukaiobuka dabarana tu emaseto, noġa moġo auri seġuka lelevaġi na ġegabu-maserito kavana. <sup>3</sup> Mo tarima na tarimarima ġekira-ġoirini asi beġene veġaraġo, ema ġaniġani tari beġe kiraġirini tu asi beġene ġani. A mo ġaniġani tu Barau na eveirito dagarari. Keriso ġevaġa-moġoniani e guruġa moġonina ġeribaiato tarimari na beġene ġaniri vaġa-namo ġauġauna murinai. <sup>4</sup> Korana tu dagara mabarari Barau na eveirito tu namo moġo. Ma ġaniġani ta tu asi bitana ruġaia, bema Barau tatanikiu-viniani vau taġabi-raġerini nai. <sup>5</sup> Korana mo tu Barau ġena guruġa na ema ġuriġuri na ġevaġa-veaġarini Barau ġoiranai.

### Keriso ġena vetuġunaġi tarimana namona

<sup>6</sup> Bema ġoi na moġeri guruġa tarikakara bovaġa-ribarini nai, ġoi tu Keriso Iesu ġena vetuġunaġi tarimamu namomu ta. Ema Iesu ġabadadama-vinina guruġari moġoniri ema vevaġa-riba guruġari namori okorana-iaġirini, maniġeri tu iauka ġaniġaniri, ġoi ġeġubu-iaġimuni. <sup>7</sup> Sinasina babori ġerina tu bono veġita ema bono raga-kwaneri. Barau korana-iaġi-korikorinai bono kokore. <sup>8</sup> Tauġanina vaġa-kokorena veġari ġeri namo tu misina moġo, senaġi Barau korana-iaġina ġena namo

tu barego lelevaḡi dabara mabarari ai tu-na. Korana monana tu namo bita doḡar-iani mai maḡuri nuḡanai ema ḡoira maḡurinai. <sup>9</sup>Mo tu guruḡa moḡonina, be bitana ḡabiraḡe-ginikaua. <sup>10</sup>Moḡa uranai tavekwarāḡini ema tamidigu-midiguni, korana tu maḡuri Barauna ḡenai ḡera tuḡamaḡikau tatore-kauani. Ġia tu tarimarima mabarari ḡeri vevaḡa-maḡuri Barauna, ma ḡia tu ḡevaḡa-moḡoniani tarimari ḡeri vevaḡa-maḡuri Barauna korikorina.

<sup>11</sup>Mai guruḡa maiḡeri bono velaunaḡi-iaḡiri e bono vevaḡa-riba-iaḡiri. <sup>12</sup>Ta na ḡoi asi bene ḡita-fitoḡamu, korana ḡoi tu maraḡa variḡu moḡo, senaḡi vevaḡa-ḡita-iaḡi tarimamu namomu ai bono iaḡo ḡemu guruḡai, veiḡai, veuravini ai, veḡabidadamai, ema maḡuri namo vedaureanai. <sup>13</sup>Buka Veḡa bono iavi-foforia tarimarima ḡeri ai, bono ḡobata-iaḡia, bono vevaḡa-riba-iaḡia, bene iaḡo mo, au bana iaḡosi. <sup>14</sup>Barau na evinimuto varevarena ḡauvei-iaḡinai asi bono moira. Mo varevare o seḡuka tu peroveta guruḡari ḡerina oḡabiato dagarana, ekalesia ḡorikauna tarimari ḡimari ḡoi debamu ai ḡetore-kaurito ḡaronai. <sup>15</sup>Moḡeri dagara bono ḡauvei-iaḡi ḡitakauri. Mai ḡauvei bono kokore-iaḡia nuḡamu e tauḡanimu mabarari ḡesi, be ḡemu kokore tarimarima mabarari na beḡene ḡitaia. <sup>16</sup>Ḳemu maḡuri ḡobina bono torea, ema ḡemu vevaḡa-riba guruḡari loriri bono toreri. Mai veiḡa maiḡeri bono veivanaḡi vanaḡiri. Korana bema moḡesi boveini nai, tauḡemu bovevaḡa-maḡurini ema ḡeseḡaḡi-vinimuni tarimari maki bovaḡa-maḡuririni.

### Ḳauvei veḡabidadama tarimari rekeri ai

**5** Tarima baregona ta asi bono kira-feia; senaḡi bono vaḡa-guruḡa ḡaveḡavea tamamu kavana. Maraḡa variḡu tu bono vaḡa-guruḡari tarikakamu kavana. <sup>2</sup>Vavine baregori sinamu kavana bono veiri, ema vavine variḡu tobamu kavana bono veiri, ma nuḡa namo vedaureana ḡesi.

<sup>3</sup>Vabu ḡereḡari kwariḡutu moḡo nai tu bono gubakauri. <sup>4</sup>Senaḡina vabu ta bema ḡia tu ma natuna, o ma tubuna nai tu, ḡia guine tu Barau korana-iaḡina veiḡana ḡeri bese nuḡanai roḡo beḡene riba-iaḡia e beḡene vaḡa-foforia. Mo tu ḡeri bese ḡobiri beḡene toreri ema vaḡa-kavari. Moḡesina veiḡari ai tu tamari e sinari ma tuburi ḡaukari ḡeri vekwaraḡi ḡevaḡa-voi ḡenoḡoirini. Ma maiḡesi veiḡari na tu Barau ḡevaḡa-iakuani. <sup>5</sup>A vabu, ḡereḡana moḡo asi tau ḡitaḡauna, ḡena tuḡamaḡikau tu Barau ḡenai moḡo betoreani. Boḡi-laḡani beḡauḡauni, Barau benoḡiani bene vaḡa-kavaia ḡana. <sup>6</sup>Senaḡi tauḡanina vaḡa-vererena moḡo veiḡana eveiani vabuna tu varau emaseto, enabe roḡo maḡuri etanuni. <sup>7</sup>Mai guruḡa tu vabu mabarari bono viniri, be ta ḡenai rakava ta asi beḡene doḡaria. <sup>8</sup>Senaḡi bema tarima ta na garagarana, o sikira ḡena numa tarimari korikori, ḡeri-ḡari asi eḡwaḡwa-raḡasini e eḡuburini nai, ḡia ḡena veḡabidadama Keriso ḡenai tu ekure-toḡaiiani. Ġia ḡena rakava na tu asi eveḡabidadamani tarimana ḡena rakava maki evanaḡiani.

<sup>9</sup>Vabu ta arana asi bono torea roḡo, vabu mabarari arari otorerini bukanai. Senaḡina bema ḡia ḡena maḡuri laḡanina 60 evanaḡiato, ema tau sebona moḡo eḡaraḡoato. <sup>10</sup>Ema ḡena veiḡa namo lorinai tarimarima na ḡeribaiani, e natuna ḡobiri etore-ginikaurini, varivari tarimari eḡabi-raḡerini ḡena numai, veaḡa o ekalesia tarimari kwakuri eḡuriḡirini, (moḡa anina tu tauḡena evetore-riḡoni), ḡevaḡa-midigu midigurini tarimari evaḡa-kavarini, ema veiḡa namori ai ekokoreni vabuna moḡo arana bono torea.

<sup>11</sup> Senaġi vabu variġuri tu arari asi bono toreri, korana ġeri tuġamaġi rakavari na beġe ġori-kaurini, benamo Keriso ġenana beġe raka-veġitani, benamo ma beġe veġaraġoni. <sup>12</sup> Benamo metona tauġeri na beġe ġabiani, korana ġeri guruġatore guinena Keriso ġenai ġefitoġaiani lorinai. <sup>13</sup> Ġubulefi beġe ribaiani ema numa loriri ai beġe raġekau-raġe-kauni. Dia ġubulefi moġo, senaġina beġe mugumuguni, raka-boġeraġe boġeraġe ema asi ġere kiraġiri guruġari beġe kiraġirini. <sup>14</sup> Moġa lorinai au aurani vabu variġuri tu beġene veġaraġo, be naturi beġene vaġa-ġorari, ema ġeri numa beġene ġita-ġauri, benamo evetari-vinirani iaukana faka ta asi beġene vinya ġita bene ġoġaġofa-iaġira ġana. <sup>15</sup> Korana vabu tari tu varau Iesu ġena dabara na beġe raka-veġita, benamo Satani murinai ġerakani.

<sup>16</sup> Senaġi bema Iesu evaġa-moġoniani vavinena ta ġena numai vabu tari ġetanuni, mo vavine na mo vabu bene ġitaġau-ginikauri, be ekalesia iatanai meto asi beġene tore-kaua. Moġesi tu vau ekalesia na tu ġereġari ġetanuni vaburi moġo beġita-ġaurini.

<sup>17</sup> Ekalesia ġeġori-kauani tarimari, ekalesia ġauveina ġevei-ginikaurini tarimari, tu boġono gubakau-baregori, ema voiri iatari ai boġono torekau. Mai tu Barau ġena guruġa ġeġobata-iaġirini e ġevevaġa-riba-iaġirini tarimari akiraġirini. <sup>18</sup> Korana Buka Veaġa tu maiġesina ekirani, “Boromakau na widi efanafana-iaġirini nai tu, muruna asi bono barubarua.” Ma ekirani, “Ġauvei tarimana ġena ġauvei tu voina bene ġabia, moġesina tu maoro.”

<sup>19</sup> Bema tarima ta na ekalesia eġori-kauani tarimana ekiraiani, ġia tu ekerereni nai tu, asi bono seġaġi-viniri, bene iaġo mo, tarima ruarua o toitoi na beġe vaġa-moġoniani vau. <sup>20</sup> Ġevei-rakavani tarimari tu ekalesia tarimari ġoirari ai bono vaneri, be tarimarima maki beġene gari.

<sup>21</sup> Barau e Keriso Iesu ema aneru veaġari ġoirari ai au ġoi avaġa-guruġamuni, mai vevaġa-naġi guruġari bono seġaġi-viniri nuġamu sebonai. Tarima baregori ema garagaramu moġo asi bono ġabi-raġeri. <sup>22</sup> Ġimamu tarima ta tubuanai asi bono torekau-ġarimoġia, tari ġeri veġa rakavai asi bono vei-rakava, tauġemu lorimu bono vetore, bono namo-vedaurea.

<sup>23</sup> Nanu korikori moġo asi bono niu, senaġi wain koturi kota maki bono niu, korana nuġamu bene iarevaia, okeve-kinikini ġutumani bene.

<sup>24</sup> Tarimarima tari ġeri rakava tu fofori-ginikau, ma moġeri rakava na ġia tu ġeraga-kwanerini, benamo ġeiaġo-guineni Barau ġena Kota gabuna ġana. Senaġi tari ġeri rakava tu vekuretoġa, gabivau muriri na ġerakanaġi-rakanaġini. <sup>25</sup> Moġesina moġo veġa namori maki maġatai foforitaġo. Senaġina veġa namori tari asi ġefofori-ġariġarini dagarari tu vekuretoġa moġo asi beġe tanuni, senaġi beġea foforini.

**6** Tuġunaġi ġeiaġo-vinini tarimari na ġeri baregona tu beġene gubakaua ema ġena veġorikau gaburenai beġene tanu. Moġesina beġe veini nai tu, ġeri baregona na Barau arana ema ġita ġera vevaġa-riba iatari ai guruġa rakavari asi bekiraġini.

<sup>2</sup> Bema tuġunaġi ġeiaġo-vinini tarimari ġeri baregori tu Iesu ġevaġa-moġoniani tarimari nai tu, maiġesi asi beġene tuġamaġi, “Mai tu au tarikakagu, be garona asi naseġaġia e asi nagubakaua.” Asiġina! Ġia tu maiġesi neġi beġene vei, ġeri baregori ġeri vetuġunaġi misikose mabarari beġene iaġovini-ginikau. Korana ġia ġeri ġauvei ġena namo tu ġeri baregori, Iesu ġevaġa-moġoniani tarimari, na beġe ġabiani, moġeri tu ġia ġatari namori.

### Vevaġa-riba ġofaġofa ema farefare moġoniri

Maiġeri dagara ġia bono vaġa-ribari ema bono launaġi-iaġiri. <sup>3</sup> Bema tarima ta vevaġa-riba gofaġofari bevevaġa-riba iaġirini, ema ġena vevaġa-riba ġita ġera Vereġauka Iesu Keriso ġena guruġa moġonina ġesi asi besebonani, ma Barau ġena maġuri asi bevaġa-ribarani, <sup>4</sup> ġia tu veiavi tarimana, ema dagara ta asi etuġa-maġi-fakaiani. Ġia tu vedanaġi irauirauri beveini, ema Barau ġena guruġa bebevane-iaġirini. Moġeri na tu mama, vevane, guruġa rakavari, tarimarima ġeri ai vevaġa-daġa tuġa-maġiri rakavari beġe vaġa-ġorarini, <sup>5</sup> ema vanaġivanaġi veġareveġare maki asi ġedokoni. Moġesina ġeveini tarimari ġeri tuġamaġi tu rakava kwaik-wai, ema guruġa moġonina na ġeraka-veġitato; ġia mataboru ġetuġamaġini, Barau korana-iaġina tu farefare ġutuma bodoġarini dabarana.

<sup>6</sup> Moġoni, Barau ġekorana-iaġiani, ema farefare voġori na ma asi ġeiaġoni tarimari tu farefare ġutuma lelevaġiri beġe ġoitaġoni. <sup>7</sup> Korana dagara ta tanobara ġana asi taġabi-iaġomaiato, ema dagara ta maki tanobara na asi bita ġabi-iaġoani, asiġina! <sup>8</sup> Moġa lorinai, bema ġita ma ġara ġaniġani e ma ġera dabuġa nai tu, bitana kira, maiġeri tu ilaila ġemai. <sup>9</sup> Tarimarima deikara ġeurani farefare ġutuma lelevaġi beġene doġari ġetoni tarimari tu veribaġani na eġabirini, ġeri ura babori ema ura rakavari na evaġa-daġa-raġerini, monana einu-riġorini rakava ġana ema karava gabuna ġana. <sup>10</sup> Korana moni uravinina tu rakava mabarari lamuna. Tarimarima tari moni ġeuravini-baregoani tu Iesu ġabi-dadama-vinina na ġeraka-veġitato, ema nuġa midigumidigu vovoka na nuġari egwanurini.

### Paulo ġena vevaġa-riba guruġari Timoteo ġenai

<sup>11</sup> Senaġi ġoi, Barau ġena tarima, moġeri dagara mabarari bono raga-kwaneri! Benamo veiġa iobukaiobukari, Barau korana-iaġina, veġabidadama, veuravini, vevaġa-gwaġiġi, nuġa manau bono vetauri ma kokoremu ġesi. <sup>12</sup> Veġabidadama vetarinai bono kokore. Maġuri vanaġivanaġi bono ġabi-taria, korana mai maġuri uranai tu Barau na ġoi maki ekeamuto, tarimarima ġutuma ġoirari ai ġemu veġabidadama okiraġi-foforiato ġaronai.

<sup>13</sup> Barau na dagara mabarari maġuri evinirini, ema Keriso Iesu Pontio Pilato ġoiranai evevarifuto tu guruġa namona ekiraġiato. Mai Barau e Keriso Iesu ġoirari ai ġoi avaġa-naġimuni: <sup>14</sup> Mai taravatu guruġari mabarari bono korana-iaġiri nuġamu asi vetoukauna ta ġesi ema kerere ta ġemu ai maki asiġina, roroġoto moġo, bene iaġo mo, ġita ġera Vereġauka Iesu Keriso ġena iaġoma ġarona. <sup>15</sup> Barau tauġena ġena ġaro korikori beraġasini ai vau, Iesu Keriso beforini. Barau ġereġana moġo Vere namo vedaureana, Veġitaġau Tarimana sebona kwariġutu tu, kini ġeri Kini ema vere ġeri Vere. <sup>16</sup> Ġia moġo ġereġana etanu-vanaġi vanaġini; ġia tu mama barego lelevaġina nuġanai etanuni, moġa lorinai ta na asi beraka-kaviani riba; ġia tu ta na asi eġitaiano ema ta na asi beġitaiani riba. Ġia ġenai vegubakau ema seġuka bene tanu mo vanaġivanaġi. Amen.

<sup>17</sup> Farefare ġutuma tarimari mai tanobarai bono kirari, asi beġene veiavi, tanobara farefareri ġeri ai ġeri tuġamaġi-dadamaġi asi beġene torea, korana moġeri mabarari beġe korini, senaġi Barau ġenai beġene vetuġamaġikau; ġia na dagara namori ġutuma evinirani ġera verere ġari. <sup>18</sup> Bono kirari, veiġa namori beġene vei, veiġa namori ġeri farefare namori ai beġene vaġa-iaġori. Veġabiraġe tarimari ai

beḡene iaḡo ema ḡeri farefare tarima tari maki kota beḡene viniri ma verereri ḡesi.

<sup>19</sup> Mo dabarai ḡia ḡeri farefare namori beḡe vaḡa-vegogo-torerini ḡoirari ḡarori ḡana, ema maḡuri korikori beḡe ḡabiani.

<sup>20</sup> Timoteo, Barau na evinimuto guruḡari bono ḡabi-tariri, guruḡa rakavari e guruḡa babori ema iaunega ḡofaḡofari vevaneri ai asi bono raka-toḡa. Tarima tari na mo iaunega ḡekiraḡirini, “Riba”. Mo tu ḡeḡofaḡofani. <sup>21</sup> Tarimarima tari na mo “Riba” ḡetoni moḡa ḡeḡabi-raḡerito, benamo ḡeri veḡabidadama Iesu ḡenai ḡeiaḡuiato.

Barau ḡena namo e varevare-bara ḡomi ḡemi ai bene tanu.



## PAULO ĜENA TORETORE VAĜA-RUARUANA TIMOTEO ĜENA

2 Timoteo vaĝa-foforina guruĝari

Paulo na Timoteo ĝena mai fefa vaĝa-ruaruana tu Paulo Romai ediburato taiminai etoreato. Etoreato laĝanina tu 66 ma 67 fakari ai ta etoreato, mo tu Iesu emaseto murinai.

Mai fefa nuĝanai siri baregori tu karoa 1:13-14; 2:15; 4:1-5.

Paulo na mai fefa vaĝa-ruaruana etoreato, ĝena ura tu, 1) Timoteo maĝuri moĝoni ai moĝo bene tanu; 2) meto baregori beĝoitaĝoni nuĝanai asi bene moira, senaĝi vetuĝunaĝi ĝauveina bene kokore-iaĝia.

Paulo na mai fefa tu maĝesina eboioĝaiato:

1. Keriso varina moĝonina Timoteo na bene ĝabi-gigitaria - karoa 1
2. Keriso ĝena vetuĝunaĝi ĝauveina bene korana-iaĝia - karoa 2
3. Keriso ĝenana beĝe veĝitani tarimari guruĝari ekiraĝito - karoa 3
4. Keriso ĝena guruĝa ĝereĝana moĝo bene ĝobata-iaĝia - karoa 4:1-5
5. Paulo ĝena veĝabituĝu guruĝari etuĝuto - karoa 4:6-22

**1** Au Paulo, Keriso Iesu ĝena apostolo tarimagu, Barau ĝena ura lorinai; ĝeguna mai fefa eiaĝosini. Barau na etuĝuguto, ekiraĝi-toreato maĝurina Keriso Iesu ĝenana bita doĝariani maĝurina bana ĝobata-iaĝia ĝana.

<sup>2</sup>Timoteo, ĝoi atore-vinimuni, natugu, aura-vinimuni. Barau ĝita Tamara ema Keriso Iesu ĝita ĝera Vereĝauka ĝerina varevare-bara, vevetuĝaĝwa, e maino ĝemu ai bene tanu.

### Paulo ĝena vevaĝa-namo e vevaĝa-kokore guruĝari

<sup>3</sup>Boĝi e laĝani vanaĝivanaĝi ĝegu ĝuriĝuri nuĝari ai ĝoi atuĝamaĝimuni. Ĝegu ĝauĝau nuĝari ai tu Barau, ma nuĝagu iau-namona ĝesi vetuĝunaĝina aiaĝo-viniani Barauna, atanikiu-viniani. Barau tu au tubugu ĝatagu na maki vetuĝunaĝina ĝeiaĝo-viniato. <sup>4</sup>Otaĝito atuĝamaĝiani, ema ĝegu ura baregona ĝoi ma bana ĝitamu, ĝegu iaku bene barego ĝana. <sup>5</sup>Goi ĝemu veĝabidadama moĝonina ma atuĝamaĝi-ĝenoĝoiani. Mani veĝabi-dadama maniĝa tu tovtovonai tubumu vavinena Lois e sinamu Eunike ĝeri ai maki etanuto-ĝoi. Au aribani, mo veĝabidadama sebona tu ĝoi ĝemu ai etanuni. <sup>6</sup>Moĝesina nai avaĝa-vetuĝamaĝi ĝenoĝoimuni, Barau na evinimuto varevarena, au ĝimagu iatamu ai atore-kauato nai, oĝabiato dagarana, bono ĝauvei-iaĝia. <sup>7</sup>Korana Barau na ĝita evinirato laukana na tu nuĝara asi bevaĝagaririni laukana, senaĝi kokore, veuravini, e nuĝa-gwaĝiĝi evinirani laukana.

<sup>8</sup>Ĝita ĝera Vereĝauka ĝena guruĝa kiraĝi-foforinai asi bene maiakamu, ema au Keriso ĝaramanai dibura numai atanuni nai maki, maiakagu na asi bene maiakamu. Senaĝi Barau ĝena kokore ai bono vevaĝa-gwaĝiĝi ema au ĝesi bono sebona, be Vari Namona ĝaramanai bitana midigumidigu. <sup>9</sup>Ĝia na evaĝa-maĝurirato ema ĝena keakea vevaĝana na ekearato ĝena tarimarimai bitana iaĝo ĝana. Moĝesi eveito tu, dia ĝita ĝera veĝa e ĝauvei namo naima, senaĝi ĝia tauĝena ĝena ura e ĝena varevare-bara na moĝo. Mo varevare-bara tu tovtovonai veĝata, guba e tanobara roĝosi roĝo bere veia nuĝanai, Barau na Keriso Iesu ĝenana evinirato. <sup>10</sup>Senaĝi maitoma tu ĝita ĝerai Vevaĝa-maĝuri Tarimana Keriso Iesu eiaĝomato lorinai, mai varevare-bara ĝita ĝerai ema foforito. Keriso na mase ĝena seĝuka evaĝa-koriato,

ema Vari Namona ġenana maġuri e tanu-vanaġivanaġi evaġa-foforiato. <sup>11</sup> Barau na au etoreguto tu mai Vari Namona bana ġobata-iaġia, bana ġwa-rosia, ema bana vevaġa-riba-iaġia ġana.

<sup>12</sup> Mo ġauvei ġaramanai au maiġesi amidigu-midiguni. Senaġi au tu asi emaiakaguni, korana aġabi-dadama-viniani tarimana tu ribagu ginikau. Ema au maki ribagu ġitakau, mai ġauvei ġimagu ai etoreato maiġa tu beġitaġau-ginikauani beiaġoni mo Kota baregona ġarona beraġasini. <sup>13</sup> Guruġa moġoniri au ġeguna oseġaġirito guruġari bono ġabi-gigitariri e bono korana-iaġiri veġabi-dadamai e veuravini ai. Mo veġabidadama e veuravini tu Keriso Iesu ġenana ġeiaġomani. <sup>14</sup> Barau na evinimuto varevarena bono ġita-ġaua. Ġita nuġarai etanuni Iauka Veaġana na mo varevare ġitaġaunai bene vaġa-kavamu.

<sup>15</sup> Ġoi ma ribamu Asia tanonai ġetanuni tarimari mabarari tu au ġeguna ġerakaveġitato, Figelo e Hemogenes maki. <sup>16</sup> Onesiforo ma ġena numa tarimari ġesi tu Vereġauka na ġena vevetuġaġwa iatari ai bene torea, korana ġia na nega ġutuma au nuġagu evaġa-gwaġiġiato-ġoi. Ema au dibura numai atanuto maiakana na asi emaiakaiato. <sup>17</sup> Ġia Romai eraġasito ġaronai tu, au evetau-kokore kokoreguto mo edoġariguto. <sup>18</sup> Vereġauka na ġena vevetuġaġwa iatanai bene torea mo, Kota baregona ġaronai! Ema ġoi ma ribamu ginikau Efeso ai au vetuġunaġigu aiġesi eiaġoviniato.

### Keriso Iesu ġena vetari tarimana moġonina

**2** Moġa lorinai, natugu, ġoi tu Keriso Iesu ġena varevare-bara nuġanai bono kokore. <sup>2</sup> Tarimarima vovoka ġoirari ai au ġeguna kara oseġaġirito dagarari vetuġamaġikau tarimari bono vaġa-ribari. Benamo moġeri na maki tarima tari ġeri ma beġenea kiraġi.

<sup>3</sup> Keriso Iesu ġena vetari tarimana namonai bono iaġo, ema midigumidigu nuġanai bono vevaġa-gwaġiġi au aveini kavana. <sup>4</sup> Vetari tarimana ġena maġuri ma ribamu. Evetarini nuġanai, ġauvei tari asi beveirini riba. Senaġina ġia ġena ura tu eġabi-toġaiato vetari verena vaġa-iakuna veiġana moġo bene veia. <sup>5</sup> Raga-iruiuru baranai eragani tarimana, asi bekokoreni riba o korona asi beġabiani riba, bema raga-iruiuru taravatuna asi bekorana-iaġiani nai tu. <sup>6</sup> Vamoka vei tarimana beġauveikokoreni tu tauġena roġo voina bene ġabi-guinea kwakwa ġaronai. <sup>7</sup> Vereġauka na vau tuġamaġi-faka bevinimuni, benamo mo guruġa mabarari bakiraġiri boribaginikaurini.

<sup>8</sup> Maiġa tu bono tuġamaġi-taġoa. Iesu Keriso tu Davida senena, mase na evariġisi-ġenoġoito. Au na tu maiġesina akiraġiani Vari Namona aġobata-iaġiani nai. <sup>9</sup> Moġesina naima ġevaġa-midigu midiguguni, dibura numai maki seini na ġebarubaruguni noġa vevaġideba o lema tarimagu. Senaġina Barau ġena guruġa tu asi barutari. <sup>10</sup> Moġa lorinai midigumidigu mabarari avevaġa-gwaġiġi-iaġirini Barau na eġabi-viriġirito tarimari dairi ai, be ġia maki Keriso Iesu ġenana eiaġomani vevaġamaġurina, ema etanu-vanaġi vanaġini marevana baregona beġene ġabia uranai.

<sup>11</sup> Mai tu guruġa moġonina:

“Bema ġita Keriso ġesi tamaseto nai tu, ġia ġesi maki bita maġurini.

<sup>12</sup> Bema tavevaġa-gwaġiġini nai, ġia ġesi maki bita veġorikau-sebonani.

Bema ġia takira-ġuniġauani nai,  
 ġia na maki ġita bekira-ġuniġaurani.

<sup>13</sup> Bema ġita asi tavetuġamaġikauni,

ġia tu roġo gabunai ma ġena vetuġamaġikau beruġa-taġoni;

Korana ġia tauġena tu asi bevekira-ġuniġauni, (mai tu ġena kiraġitore guruġari ġia na asiġina ġinavaġi bekeforini).”

### Ġauvei tarimana namona

<sup>14</sup> Mo guruġa ma bono vaġa-riba ġenoġoiri, ema Barau ġoiranai bono kira-toreġauri, guruġa koriri veġare-veġareri asi beġene vevaġi. Korana monana namo ta asi bevaġa-ġoraiani, senaġi beġe seġaġini tarimari ġeri maġuri moġo bevaġa-rakavarini. <sup>15</sup> Bono ġauvei-ġunaġave, be Barau ġoiranai bono fofori nai, bene vaġa-moġonimu, ġauvei tarimana asi emaiakaiani tarimana kavana. Korana ġia na tu Barau ġena guruġa moġonina evevaġa-riba ginikauani. <sup>16</sup> Sisiba rakavari e babori asi bono kiraġi, ema ġerina bono veġita, korana mo sisiba ġekiraġirini tarimari tu Barau ġenana ġeraka-manaġani. <sup>17</sup> Guruġa moġesina ġekiraġirini tu noġa manuġa rakavari ġebakarini kavana. Himenaio e Fileto tu moġesina tarimari. <sup>18</sup> Ġia tauri ruru na tu guruġa moġonina dabarana ġeraga-kwaneato. Ġekirani variġisi-ġenoġoi tu evetoreto, be ekorito. Moġesina ġeguruġani nai, tarima tari ġeri veġabidadama ġevaġa-rakavarini.

<sup>19</sup> Senaġi Barau ġena guruġa korana tu eruġa-gwaġiġini fore baregona noġa, asi beġareva-ġarevani. Iatanai tu mai guruġa etoreato, “Vereġauka ma ribana deikara tu ġia ġena.” Ma ekirani, “Deikara ekirani ġia tu Vereġauka ġena etoni tarimana tu vei-rakava ġenana bene raka-veġita.”

<sup>20</sup> Numa baregona nuġanai tu mereki irauirauri moġeri, dia mabarari golo e silva na ġeveirito dagarari moġo, senaġi ġau e tano na ġeveirito dagarari maki moġeri. Tari tu ġaro baregori ai vau beġe ġauvei-iaġirini, a tari tu ġeġauvei-iaġi vanaġi-vanaġirini ġaniġani ġari o momo fitoġa dagarari. <sup>21</sup> Bema maiġeri veġa rakavari ġerina tauġena eveiarevani tarimana tu, ġauvei namori ġauvei-iaġiri tarimanai Vereġauka na bevaġa-iaġoani ema bevaġa-veaġaiani. Ġia tu eġita-ġauani tarimana ġena ġauvei tarimana aroribanai beiaġoni ġauvei namori mabarari veiveiri ġana.

<sup>22</sup> Guru variġu ġeri ura rakavari mabarari bono raga-kwaneri, ema maiġeri bono korana-iaġiri: Vei-iobukaiobuka, veġabidadama, veuravini, ema maino. Ma nuġari namo vedaureari Vereġauka ġenoġiani bene vaġa-kavari ġana tarimari ġesi bono sebona. <sup>23</sup> Vedanaġi e veġareveġare babori ġerina bono raka-veġita, korana ġoi ribamu moġeri na tu vevane beġe vaġa-ġorarini. <sup>24</sup> Vereġauka ġena vetuġunaġi tarimana tu asi bene vevane, senaġi tarimarima mabarari bene iaunamo-viniri, bene vevaġa-riba ginikau, asi bene baru. <sup>25</sup> Ġekira-fitoġaiani tarimari bene kira-rogori ma manauna ġesi, betaġu Barau na bevaġa-vetuġamaġi kurerini, benamo guruġa moġonina beġe ribani. <sup>26</sup> Benamo ġia ġeri tuġamaġi beġe roroġoto-ġenoġoini ema Diabolo ġena rigi-rigi na beġe raga-veġitani, korana ġia na roġo eġabi-taririni ġena ura beġene veiri ġana.

### Ġaro magori ai

**3** Ema maiġa maki bono ribaia: Ġaro dokori ai tu rakava ġutuma beġe ġorani. <sup>2</sup> Tarima tu tauġeri moġo beġe veura-vevinini, moni beġe mata-ġaniġani iaġirini,

beĝe vekiraĝi-varaĝe varaĝeni, beĝe veiavini, ĝeri guruĝa beĝe rakavani, tamari sinari beĝe kira-sirivaĝi vinirini, tanikiu maki asi beĝe toni, ema asi beĝe veaĝani. <sup>3</sup> Asi beĝe veura-vini, tarima ĝeri rakava asi beĝe tuĝamaĝi-fitoĝarini, beĝe veroritoreni, asi beĝe vevaĝa-gwaĝiĝini, beĝe niara-niararini, beĝe kira-sirivaĝini. <sup>4</sup> Ĝia tu beĝe revani, ĝeri tuĝamaĝi rakavari ilailari ai beĝe vei-taĝuitaĝuini, nuĝari veiavi na beĝe vonuni, tanobara iakuri e verereri beĝe ura-vinirini, a Barau tu asi beĝe uraviniani. <sup>5</sup> Barau korana-iaĝina tu tauna korikori iouiouna murikana rekenai moĝo ĝetovotovoani, a ĝia tauna korikori seĝukana tu ĝeruĝaiani. Mo tarimarima ĝerina tu bono raka-veĝita.

<sup>6</sup> Moĝesina tarimari tu tarimarima ĝeri numa nuĝari ai ĝeraka-toĝani, benamo nuĝari moira vavineri ĝeĝofarini. Mo nuĝari moira vavineri tu ĝeri veiĝa rakavari metori na ĝelaulau-taririni, ema ĝeri ura rakavari na ĝeĝori-kaurini. <sup>7</sup> Moĝeri vavineri tu vanaĝivanaĝi riba ĝevetauni, senaĝina guruĝa moĝonina tu asi ĝedoĝariani. <sup>8</sup> Iane e Iambre, Aigupito ĝeri ĝora tarimari, na Mose ĝelaulau-ĝaŭato kavana, mai vevaĝa-riba ĝofaĝofa tarimari na guruĝa moĝonina ĝelau-ĝaŭani. Ĝia ĝeri tuĝamaĝi tu rakava kwaikwai, ema ĝia tu ĝeri veĝabidadamai asi ĝekokoreto, ĝeketoto. <sup>9</sup> Senaĝi asi beĝe raga-kwareĝani, korana tarimarima mabarari na ĝeri babo beĝe ĝita-doĝariani, Iane e Iambre ĝeri ai eĝorato kavana.

### Vevaĝa-naĝi magori

<sup>10</sup> Senaĝi ĝoi na tu au ĝegu vevaĝa-riba guruĝari mabarari okorana-iaĝirito, ĝegu veiĝa, ĝegu ura tauri, ĝegu veĝabidadama, ĝegu vevaĝa-gwaĝiĝi, ĝegu veuravini, ĝegu ruĝa-gwaĝiĝi otovovorito. <sup>11</sup> Ĝelai-veĝitaguto, ĝevaĝa-midigu midiguguto, ĝegu midigumidigu maĝeri mabarari au ĝegu ai ĝeĝorato Antioka, e Ikonja, ema Listera ai. Ĝevaĝa-midigu midiguguto nuĝanai avevaĝa-gwaĝiĝito. Vereĝauka na moĝeri mabarari ĝerina eĝabi-maĝuriguto. <sup>12</sup> Moĝoni, Keriso Iesu nuĝanai Barau korana-iaĝina beĝe urani tarimari mabarari tu moĝesina beĝe vaĝa-midigu midigurini. <sup>13</sup> Ma vei-rakava tarimari e ĝofaĝofa tarimari tu moĝesi moĝo beĝe vei-iaĝoni, rakava ĝenana rakava lelevaĝinai beĝe raĝasini, tarima tari beĝe ĝofarini, ema ĝia maki Diabolo na beĝofarini. <sup>14</sup> Senaĝi ĝoi tu kara oribaiato ema oĝabi-raĝeato manĝa moĝo bono korana-iaĝia. Korana ĝevaĝa-ribamuto tarimari ĝoi tu ma ribamu, <sup>15</sup> ema keimu na beiaĝoma maitoma Buka Veaĝa guruĝari ma ribamu; maĝeri Buka Veaĝa guruĝari na iaunega beĝe vinimuni, benamo Keriso Iesu ĝenai boveĝabidadamani vevaĝa-maĝuri ĝabiĝabina ĝana. <sup>16</sup> Buka Veaĝa guruĝari mabarari tu Barau nuĝana na ĝeraka-rosito, benamo tarimarima nuĝari ai Iauka Veaĝa na evaĝa-raka-toĝarito. Ma ĝia tu ma ĝeri namo guruĝa moĝoniri vevaĝa-riba-iaĝiri ĝana, rakava vaĝa-foforiri, rakava vaĝa-roroĝotori ĝana, ema dabara iobukaiobukana vevaĝa-riba-iaĝina ĝana. <sup>17</sup> Mo guruĝa ĝerina Barau ĝena tarimarima beĝene riba-ĝinikau, benamo veiĝa namori mabarari beĝene veiri.

**4** Barau e Keriso Iesu ĝoirari ai avaĝa-guruĝa gwaĝiĝimuni. Iesu beĝenoĝoini ĝaronai tu, ĝena veĝitaĝau gaburenai maĝuri tarimari e mase tarimari viriĝiviriĝi bea vei-vinirini. <sup>2</sup> Barau ĝena guruĝa bono ĝobata-iaĝia, ĝaro namori ai e ĝaro rakavari ai. Tarimarima ĝeri veiĝa rakavari na bono vaĝa-roroĝotori, bono kira-feiri, bono launaĝiri, bono vaĝa-ribari ma vevaĝa-gwaĝiĝimu ĝesi. <sup>3</sup> Korana ĝaro ta beiaĝomani, monai tarimarima na vevaĝa-riba moĝonina tu asi beĝe seĝaĝiviniani, a ĝeri ura rakavari loriri ai vevaĝa-riba tarimari ĝutumari ma beĝe ĝabirini,

ġia na ġeuravini-rakavarini guruġari beġene seġaġiri ġana. <sup>4</sup>Guruġa moġonina seġaġi-seġaġina ġenana beġe raka-veġitani, a ġia tu sinasina guruġari vau beġe ura-baregoni. <sup>5</sup>Senaġi ġoi tu bono veġitaġau dagara mabarari ġeri ai, midigumidigu nuġanai bono vevaġa-gwaġiġi, Vari Namona ġobata-iaġina ġauveina bono veia, Barau ġena vetuġunaġi ġauveina mabarana bono ġauvei-iaġi ġitakaua.

<sup>6</sup>Korana au tu dori amaseni, ema au raragu tu bebebubuni noġa vine nanuna Barau ġevarevare-viniani nai ġebubuanu kavana. Au ġegu rakaveġita ġarona tu be-raġasi. <sup>7</sup>Vetari nuġanai avevaġi-ġitakauto, au ġegu raga-iruiru tu varau bavaġa-koria, ġegu veġabidadama tu roġo aġabi-tariani. <sup>8</sup>Toma ġegu vei-iobukaiobuka korona evei-toreato, etanuni mo Kota baregona ġarona beraġasini nai, Vereġauka, Kota Tarimana Iobukaiobukana, na beviniguni. Dia au moġo, senaġi mo deikara-deikara ġia bema foforini ġaronai ġeura-viniani tarimari maki bevinirini.

### Veġabituġu guruġari

<sup>9</sup>Bono kokore, be au ġegu ai bono iaġoma-ġarimoġi. <sup>10</sup>Korana Dema na tu mai tanobara maġurina euravini-baregoani, benamo au eraga-kwaneguto, Tesalonika ġana eiaġoto. Kreske tu Galatia ġana eiaġoto, ema Tito tu Dalmatia ġana. <sup>11</sup>Luka ġereġana moġo au ġesi. Mareko bono ġoria, ġoi ġesi boġono iaġoma, korana ġia tu ġunaġave e au ġegu ġauvei nuġanai bevaġa-kavaguni riba. <sup>12</sup>Tikiko tu Efeso ġana atuġuato. <sup>13</sup>Ġoi boiaġomani nai tu, auna koudi bono ġwa-kaua, Troas vanuġanai Karpo ġenai araga-kwaneato, ema ġegu buka maki bono ġwa-kauri, dagara baregona tu mamoe e nanigosi kefiru na ġeveirito toretore ġana dagarari, asi bono tuġa-rewari.

<sup>14</sup>Alesanda, auri eġauvei-iaġirini tarimana, na au evaġa-rakava baregoguto. Mo kara eveiato tu Vereġauka na vau voina beviniani. <sup>15</sup>Ġia ġenai tu tauġemu bono venari, korana ġia tu ġai ġema vevaġa-riba guruġari ekira-fitoġa rakavarito.

<sup>16</sup>Tovotovonai Kota tarimari ġoirari ai aruġato nai tu, ta sevigu ai asi eruġa-tarito, asi evaġa-kavaguto, mabarari na ġeraga-kwaneguto. Aġau-ġauni, Barau na moġeri vei-rakava voiri asi bene viniri. <sup>17</sup>Senaġina Vereġauka tu au sevigu ai eruġa-tarito, benamo kokore eviniguto. Moġesina eveiguto korana tu, Vari Namona au na bana kiraġi-foforia, benamo irau bese tarimari mabarari na beġene seġaġia ġana. Ema au tu Barau na laion bokana na evaġa-maġuriguto. <sup>18</sup>Vereġauka na rakava mabarari ġerina beġabi-maġuriguni, ema ġena Guba Basileia ġana beġori-ginikauguni. Ġia arana bitana vaġa-raġea bene iaġo vanaġivanaġi, asi magona. Amen.

### Vevaġa-namo dokona

<sup>19</sup>Au ġegu vevaġa-namo atuġuani Priska (o Priskila) e Akwila ġeri ai, ema Onesiforo ma ġena numa tarimari ġeri ai. <sup>20</sup>Erasto tu Korinto ai betanu, ema Trofimo tu Mileto ai baraga-kwaneana, korana ekeveni nai. <sup>21</sup>Bono kokore, be bono iaġoma-ġarimoġi, faraka e iavara ġueri roġosi bene ġabia nuġanai.

Eubulo, Pude, Lino, e Klaudia ġeri vevaġa-namo ġetuġuani, ema ekalesia tarikaka mabarari na maki.

<sup>22</sup>Vereġauka tu ġoi iaukamu ġesi bene tanu. Barau ġena namo e varevare-bara ġomi ġemi ai bene tanu.

## PAULO ĜENA TORETORE TITO ĜENA

Tito vaĝa-foforina guruĝari

Mai fefa tu Paulo na Tito ĝereĝana ĝena etoreato. Mai fefa Paulo tu Roma dibura numana na etoreato. Mai fefa etoreato laĝanina tu 64 ma 65 fakari nuĝanai ta, mo tu Iesu maki emaseto murinai vau.

Mai fefai siri baregori tu karoa 2:11-14; 3:8.

Paulo na mai fefa etoreato korana ĝena ura, 1) Tito bene kiraia, ekalesia doĝorori ĝorikaŭri tarimari tu kamasiri bene ĝabiri; 2) Tito bene vaĝa-ribaia, Barau ĝena namo ema varevare-bara nuĝanai Barau korana-iaĝina maĝurina tu aĝesina bene tanu-iaĝia; 3) Tito bene launaĝia, vevaĝa-riba guruĝari moĝoniri bene vevaĝa-riba-iaĝiri.

Mai fefa Paulo na tu maĝesina eboiĝaiato:

1. Barau korana-iaĝina maĝurina ekalesia doĝorona nuĝanai - karoa 1
2. Barau korana-iaĝina maĝurina numa tatai - karoa 2
3. Barau korana-iaĝina maĝurina tanobara mabaranai - karoa 3

**1** Au Paulo, Barau ĝena vetuĝu-naĝi tarimagu ema Iesu Keriso ĝena apostolo, ĝe-guna mai fefa eiaĝosini. Au tu Barau na etuĝuguto, Barau na eĝabi-hidiroto tarimari ĝeri veĝabidadamai bana vaĝa-kavari, e guruĝa ema maĝuri moĝonina bana vaĝa-ribari ĝana. Mai guruĝa ema maĝuri moĝonina beĝe ribaiani tu, Barau beĝe korana-iaĝi-korikoriani. <sup>2</sup> Korana monana vauro maĝuri vanaĝivanaĝi beĝe tuĝamaĝi-dadamaĝiani e beĝe ĝabiani. Mai maĝuri vanaĝivanaĝi maĝurina maĝa tu tanobara roĝosi bene vesina nuĝanai veĝata, Barau na ekiraĝi-toreato. Ĝia tu asi eĝo-faĝofani Barauna. <sup>3</sup> Senaĝi maitoma vauro Barau tauĝena na eĝabi-toreato ĝaronai tauĝena na bema vaĝa-foforia. Mai Vari Namona maĝa tu ĝita ĝera Vevaĝa-maĝuri Barauna ĝena guruĝa lorinai au ĝegu ĝobatai akiraĝi-foforiani.

<sup>4</sup> Tito, mai fefa tu ĝoi ĝemu atore-iaĝosiani. Ĝoi tu au natugu korikori ĝita ĝera mai veĝabidadama sebona maĝa nuĝanai:

Tamara Barau ema Keriso Iesu ĝita ĝera Vevaĝa-maĝuri Verena ĝerina varevare-bara ema maino ĝemu ai bene tanu.

### Tito ĝena ĝauvei Krete motumotunai

<sup>5</sup> Au na ĝoi Krete ai araga-kwanemuto korana tu, kara maninai roĝosi bana veiri dagarari bono veiri ĝana. Ema vanuĝa baregori mabarari ai ekalesia ĝorikaŭri tarimari tari bono vaĝa-ruĝari mo akiramuto kavana. <sup>6</sup> Ekalesia ĝorikauna tarimana tu veiĝa namori moĝo eveini, rakava ta ĝenai asi boĝoitaĝoani tarimana. Ĝaraĝona tu sebona moĝo; natuna na Iesu Keriso ĝevaĝa-moĝoniani, asi ĝeniara-kava niarakavani, e asi ĝeseĝaforeni, ema guruĝa veroro asi ĝeseĝaĝini merori. <sup>7</sup> Korana ekalesia eguine-iaĝirini tarimana tu Barau ĝena ĝauvei eĝita-ĝauani tarimana. Moĝesina naima ĝia tu veiĝa namori moĝo bene vei, a rakava ta ĝenai asi bene tanu, asi bene kira, ĝia tu tarima baregona, benamo tarimarima na tu ĝia ĝereĝana ĝena ura moĝo beĝene korana-iaĝia benesi, asiĝi. Asi bene baru-ĝarimoĝi, dia niuniu rakavarakava tarimana, dia nuĝa-ĝirima-ĝirima tarimana, dia ĝofaĝofa veiĝari ai ĝenaĝana eĝoitaĝoni tarimana. <sup>8</sup> Ĝia tu veĝabiraĝe tarimana, veiĝa namori eura-vinirini tarimana, vevaĝa-gwaĝiĝi tarimana, vei-iobukaiobuka e veaĝa tarimana, ema nuĝa-

gwaḡiḡi tarimana. <sup>9</sup> Guruḡa moḡonina ḡevaḡa-ribaiato guruḡari bene ḡabi-gigitariri, be ḡia na moḡeri vevaḡa-riba moḡonina bene ḡabi-iaḡoa, benamo tarima kotari ma benea launaḡiri, e vevaḡa-riba moḡonina ḡekira-fitoḡaiani tarimari maki bene vaḡa-guruḡa gwaḡiḡiri, be ḡeri kerere gaburi beḡene ḡita-doḡariri.

### **Krete motumotunai tu vevaḡa-riba tarimari ḡofaḡofari vovoka moḡeri**

<sup>10</sup> Guruḡa moḡonina asi ḡekorana-iaḡiani, ḡekira-sirivaḡini tarimari, e guruḡa asi tauri ḡekiraḡirini tarimari, ema vevaḡa-riba babori na tarimarima ḡeḡofarini tarimari tu asisebo maniḡeri. Iuda tarimari fakari ai ekalesia nuḡanai ḡeraka-toḡato tarimari tu maniḡesina ḡeveini. <sup>11</sup> Maniḡeri tarima tu boḡono kira-ḡoiri. Korana ḡia na tu bese mabarari ḡeri veḡabidadama ḡevaḡa-rakavarini. ḡia tu asi ḡere vevaḡa-riba-iaḡiri dagarari ḡeveveḡa-riba-iaḡirini. Ema ḡia mani-ḡeri tu moni e farefare beḡene viniri uranai ḡevei-ḡofakauni. <sup>12</sup> ḡia fakari ai ḡeri peroveta tarimana ta tu maiḡesi ekirato, “Krete tarimari tu vanaḡivanaḡi ḡeḡofaḡofani, boḡa bairi rakava kwaikwairi, ḡubulefi ma boḡeka tarimari.” <sup>13</sup> ḡia ekiraḡirito guruḡana maiḡa tu moḡoni. Moḡa lorinai bono kira-matana matanari, be nuḡari mabarari ḡesi e ma moḡoniri ai beḡene veḡabidadama. <sup>14</sup> Ema Iuda seneri ḡeri sinasina asi beḡene seḡaḡiri, ema Barau ḡena guruḡa moḡonina ḡenana ḡeraka-veḡitani tarimari ḡeri taravatu maki asi beḡene korana-iaḡiri.

<sup>15</sup> Nuḡa namo vedaurea tarimari ḡeri ai dagara mabarari tu namo vedaurea e veiareva. Senaḡi nuḡa asi veiareva ema Keriso asi ḡevaḡa-moḡoniani tarimari ḡeri ai dagara ta tu veiareva asi betanuni. Asiḡina ḡinavaḡi. Korana ḡia tu ḡeri tuḡamaḡi e nuḡari tu rakava kwaikwai bene. <sup>16</sup> Moḡeri tarima ḡekirani, ḡia tu Barau ma ribari ḡetoni, senaḡi ḡeri veḡa na evaḡa-foforiani, ḡia tu Barau asiḡina ḡinavaḡi ribari. Maiḡeri tarima tu vei-rakava ma kira-sirivaḡi tarimari, ema veḡa namori veiveiri ḡia ḡeri ai tu gwaḡiḡi foroforo.

### **Vevaḡa-riba moḡonina e iobukaiobukana**

**2** Senaḡi ḡoi na tu vevaḡa-riba moḡonina bono vaḡa-ribari. <sup>2</sup> Tarima ḡaukari bono kirari, nuḡari beḡene ḡabi-tariri, beḡene tuḡamaḡi-roroḡoto e beḡene vevaḡa-gwaḡiḡi. Nuḡari mabarari e ma moḡoniri ḡesi beḡene veḡabidadama, e beḡene veura-vini, ema beḡene ruḡa-gwaḡiḡi. <sup>3</sup> Vavine ḡaukari maki mai vevaḡa-riba sebona moḡo bono viniri. Bono kirari, ḡia ḡeri maḡuri ema veḡa beḡene veaḡa. Tarimarima arari asi beḡene vaḡa-rakava-kavari, e asi beḡene niu-babobabo. A ḡia tu veḡa namori moḡo beḡene vevaḡa-riba-iaḡiri. <sup>4</sup> Benamo ḡia ḡeri mo vevaḡa-riba ḡerina vavine variḡuri na ḡaraḡori ema naturi beḡe ura-vinirini. <sup>5</sup> E beḡe vevaḡa-gwaḡiḡini, Barau ḡoiranai beḡe namo-vedaureani, ema ḡeri numa beḡe ḡita-ḡaurini, ema ḡauveiri maki beḡe vei-ginikaurini, ma vavine namori ai beḡe iaḡoni e ḡaraḡori beḡe gubakaurini ema beḡe seḡaḡi-vinirini. Maiḡesi veḡari beḡe veirini nai tu, Barau ḡena guruḡa tarimarima na asi beḡe kira-fitoḡaiani.

<sup>6</sup> Tau maraḡa variḡuri maki mai velaunaḡi sebona moḡo bono viniri. Bono kirari, beḡene vevaḡa-gwaḡiḡi. <sup>7</sup> Dagara mabarari veiveiri ai tu ḡoi tauḡemu na vevaḡa-ḡita-iaḡi veḡari namori bono veiri, be beḡene ḡitari. Bovevaḡa-ribani nuḡanai maki ḡere ai asi bono guruḡa, senaḡi guruḡa moḡoniri, guruḡa korikoriri, <sup>8</sup> ema guruḡa iobukaiobukari bono kiraḡiri, be tarima ta na ḡemu guruḡa asi bene ḡaoa. Moḡesina

boveini tu, ̄goi ̄gekira-fitōgamuni tarimari bēge maiakarini, benamo ̄gita iatarai gurūga rakavana ta asi bēge kirāgiani.

<sup>9</sup>Tūgu-rakaorakao tarimari bono launāgiri, ̄geri baregori garori bēgene sēgāgiri ema bēgene vāga-verereri ̄geri vetūgunāgi mabarari ̄geiāgo-vinirini nūgari ai. A asi bēgene gurūga-vāga-voiri bonosi. <sup>10</sup>E bono kirari, ̄geri baregori ̄geri farefare asi bēgene lemalema-vāgiri. Senāgi ̄geri vēīga namori mōgo bēgene vāga-foforiri. Ma mo vēīga namori na ̄geri baregori bēgene vāga-̄gitari, ̄gia ̄geri ai asi bēgene daradara, senāgi bēgene tūgamāgikau. Maīgesi bēge veini tu, ̄gita ̄gera Vevāga-māguri Barauna ̄gena vevāga-riba, tarimarima na tu bēge vāga-rāgeani dabara mabarari nūgari ai.

<sup>11</sup>Korana Barau ̄gena namo e varevare-bara ̄genana vevāga-māguri eiāgomato, mo vevāga-māguri tu tarimarima mabarari ̄geri ai ema fororito. <sup>12</sup>Barau ̄gena namo e varevare-bara na ̄gita evāga-ribarani, Barau asi takorana-iāgi korikoriani māgurina tu bitana fitōgari. A ̄gita mai tanobarai tatanuni tu, vevāga-gwāgīgi māguri-nai bitana tanu, vēīga iobukaiobukari bitana vei ema Barau bitana korana-iāgi korikororia, <sup>13</sup>̄garo baregona e namona tanari-tāgoani nūganai tu. ̄Gita initoma tu Iesu Keriso tanari-tāgoani; ̄gia tu ̄gita ̄gera Barau baregona e ̄gera Vevāga-māguri Tarimana; ̄gena iāgoma ma marevana asikeikeina ̄gesi mōgo tanari-vegogo-tāgoani. <sup>14</sup>Iesu Keriso ̄gita urarai taūgena evevinito, ̄gita vēīga rakava kwaikwairi nūgari na bene voi-vāgira ̄gana uranai. Ema ̄gita tu ̄gia ̄gerēgana ̄gena mōgo bene vāga-namo vedaureara, benamo bene tore-̄gerevāgira, ̄gena tarimarima namori ai bisini iāgo, ma ̄gauvei namori mōgo veiveiri bisini uradika ̄gana.

<sup>15</sup>̄Goi na tu maīgeri māguri e vēīga bono vevāga-riba-iāgiri. ̄Gemu maoro baregona manīga bono ̄gauvei-iāgia, tarimarima bono launāgiri, ema ̄gesēgaforeni tarimari bono kira-feifeiri. Tarima ta na asi bene kira-fitōgamu.

### Aīgesi ekalesia ̄gere tanu

**3** ̄Gemu tarimarima ma bono vāga-gurūgari, bono kirari, kini e gavamani ̄geri vēīgitāgau gaburenai bēgene tanu e bēgene sēgāgi-viniri. Ema vanāgivanagi bēgene venari-tāgo, vēīga namori bēgene veiri ̄gana. <sup>2</sup>Tarima ta ̄genai gurūga rakavana ta asi bēgene kirāgia, ta ̄gesi asi bēgene vekira o vevane. A ̄gia tu manau ai mōgo bēgene tanu ema tarimarima mabarari vēīga namori mōgo bēgene vei-viniri.

<sup>3</sup>Korana tu ̄gita maīgera maki guinenai tu babo, Barau asi ribara, Barau tasēgafore-viniato-̄goi, Satani na ēgofarato-̄goi, be Barau ̄gena dabarai asi tarakato-̄goi. ̄Gita mōgeri negari ai tu vēīga rakavari irairauri taura-vinirito-̄goi, e taūgani korina vāga-vererena vēīgari irairau ̄geri tūgu-rakaorakao tarimari ai tavevāga-iāgoto. Tarima vāga-midigumidiguri e vāga-vedāga-rāgeri tūgamāgiri tāgabito-̄goi ema tarima ̄geri ai tamamato-̄goi, baru na tavonuvonu-rāgeto-̄goi e karora ̄gesi taveiau-rakavato-̄goi.

<sup>4</sup>Senāgi ̄gita ̄gera Vevāga-māguri Barauna ̄gena veiau-namo ema ̄gena veuravini ̄gita tarimara ̄gerai ema fororito nai tu, <sup>5</sup>̄gita ema vāga-māgurirato. ̄Gita tu dia ̄gera vei-iobukaiobuka dainai ema vāga-māgurirato. Asīgina. ̄Gia taūgena ̄gena vevetūgāwai mōgo ema vāga-māgurirato. Ēgurīgi-matamatarato tamāguri-̄genōgoito ̄garonai, ema Iauka Vēāga na ̄gera māguri ma evāga-varīgu ̄genōgoirito. <sup>6</sup>Mai Iauka Vēāga tu Iesu Keriso ̄gita ̄gera Vevāga-māguri Tarimana ̄genana Barau na ̄gita iatarai ebubu-kauato. <sup>7</sup>Keriso na mai māguri eveiato, korana ̄gita tu ̄gia ̄gena namo e varevare-bara ̄genana mōgo vei-iobukaiobuka tarimarai evāga-iāgorato Ba-



rau gōiranai. Ema maḡuri vanaḡivanaḡi tatuḡamaḡi-dadamaḡiani maḡurina maki Barau na bevinirani, benamo bita ḡabiani.

<sup>8</sup>Mai velaunaḡi guruḡari maḡeri tu moḡoni korikori. Be au aurani, ḡoi na mai veḡa namori maḡeri tarimarima ḡeri ai bono kiraḡi-baregori, be mani Barau ḡe-nai ḡeveḡabidadamani tarimari maḡeri tu ḡeri maḡuri beḡene nariri; ema ḡauvei namori ḡeveini maḡeri tu roḡo beḡene vei-iaḡori. Korana mani veḡa maḡeri tu veḡa namori ema maḡeri na tarimarima mabarari maki beḡe vaḡa-kavarini. <sup>9</sup>A vedanaḡi babori e tubu ḡata o sene ainana ḡeiaḡomato moḡeri kiraḡi-ginikau ginikauri e veḡareveḡare, ema Mose ḡena taravatu vevaneri mabarari ḡerina tu bono veḡita. Korana maḡeri na vevaḡa-kava namona ta tu asi bodoḡariani. Mani tu asi tauri dagarari. <sup>10</sup>Ekalesia doḡorona nuḡanai vetavi-kirakira veḡana eveiani tarimana tu bono kira-toreḡaua, bono kiraia, mo veḡa asi bene veia. Beseḡaforeni, benamo mo veḡa roḡo beveiani nai, vaḡa-ruaruana ma bono kira-toreḡaua. Moḡa murinai roḡo eḡiḡiraḡeni nai tu, bono ḡita-fitoḡaia moḡo. <sup>11</sup>Korana maḡeḡesi vetavikirakira veḡari eveirini tarimana tu bono riba, ḡia ḡena maḡuri tu rakava kwaikwai ema vei-rakava nuḡanai etanuni. Ḡia tu tauḡena ḡena vei-rakava na evaḡamoḡoniani, ḡia tu moḡoni rakava tarimana.

### Vevaḡa-riba guruḡari magori

<sup>12</sup>Au na Atemas o Tikiko ḡoi ḡemu ai batuḡu-iaḡosiani nai tu, dabara ta bono vetaua, benamo au ḡegu ai bono iaḡoma Nikopoli ḡana. Korana au tu akirato, faraka e iavara ḡueri nuḡari ai tu monai baḡabiani atato bene. <sup>13</sup>Taravatu tarimana Senas e Apolos ḡeri dabara bono raga-vei, be bono ragatuḡu-iaḡomari. Botuḡu-iaḡomarini nai tu, ḡeri ura dagarari mabarari maki bono vini-ginikauri.

<sup>14</sup>Ḡita ḡera tarimarima mabarari ḡauvei namori veiveiri ai asi beḡene biga dabarari bono vaḡa-ribari, be beḡene ribari. Korana moḡeri dabara beḡe ribarini nai tu, ḡaro vanaḡivanaḡi ḡeri-ḡari tu tauḡeri beḡe ḡauveini, benamo beḡe ḡoitaḡoni, ema ḡeri ḡauvei maki ḡwaḡwari beḡe vetoreni.

<sup>15</sup>Mainai au karogu mabarari na ḡemi vevaḡa-namo beḡe tuḡu. Ḡema vevaḡa-namo maki veḡabidadama nuḡanai ḡai ḡeura-vinimani tarimari bono viniri.

Barau ḡena namo e varevare-bara ḡomi mabarami ḡemi ai bene tanu.

## PAULO ĜENA TORETORE FILEMONA ĜENA

Filemona vaĝa-foforina guruĝari

Paulo na mai fefa tu Filemona ĝena Roma dibura gabuna na etoreato. Mai fefa tu laĝani 60 ma 61 fakari nuĝanai ta etoreato, mo tu Iesu emaseto murinai vau.

Mai fefa anina baregona tu “Veĝabi-raĝe ĝenoĝoi”. Ma siri baregori mai fefai tu siri 15 ema 16.

Paulo na Filemona mai fefa etore-viniato korana tu ĝena ura, 1) Filemona bene kiraia, Onesimo ma bene ĝabi-raĝea tarikaka maĝurinai; 2) Filemona bene kira-varaia, ĝia tu dibura na dori eraka-rosini, ma beraka-rosini ĝaronai tu Filemona bea raka-ĝitaiani.

Paulo na Filemona ĝena mai fefa tu maiĝesina eboioĝaiato:

1. Paulo na Filemona evaĝa-veiaviato - siri 1-7
2. Paulo na Onesimo iatanai Filemona enoĝiato - siri 8-21
3. Veĝabituĝu ĝuruĝari ekiraĝirito - siri 22-25

**1** Au Paulo, Keriso Iesu ĝaramanai diburai atanuni tarimagu, ema tarikakara Timoteo, ĝemana eiaĝosini.

Ĝauvei sebona ĝaveiani tarimana e ĝatama namona Filemona ĝemu atorevinimuni. <sup>2</sup>Ema tobara Afia, ema ĝatara namona, Barau ĝena vetari nuĝanai iauka rekenai, Arekipo, ema ĝoina numai ĝevegogoni ekalesiari ĝeri atore-vinirini.

<sup>3</sup>Tamara Barau ema Vereĝauka Iesu Keriso ĝerina maino ema varevare-bara ĝemi ai bene tanu.

### Filemona ĝena veuravini ema veĝabidadama

<sup>4</sup>Filemona, ĝegu Barau atanikiu-viniani ema vanaĝivanaĝi ĝegu ĝauĝau ai aki-raĝimuni, <sup>5</sup>korana ĝemu veĝabidadama Vereĝauka Iesu ĝenai ema ĝemu veuravini Barau ĝena veaĝa tarimari mabarari ĝeri ai aseĝaĝimuni nai. <sup>6</sup>Moĝa lorinai aĝuriĝurini ĝemu veĝabidadama bono vari-fiua tarima tari ĝeri ĝana, be dagara namori taĝaunarini Keriso ĝenai taveĝabidadamani lorinai, bono riba-ĝitakauri. <sup>7</sup>Moĝoni, tarikakagu, ĝemu veuravini na evaĝa-iaku rakavaguto ema elaunaĝi-rakavaguto, korana ĝoi na veaĝa tarimari nuĝari ovaĝa-kokorerito.

### Paulo ĝena noĝinoĝi

<sup>8</sup>Au tu nuĝagu gwaĝiĝi Keriso nuĝanai ĝoi bara kiramu kara boro vei, <sup>9</sup>senaĝi veuravini nuĝanai moĝo anoĝimuni ĝemu veuravini dainai. Mai tu au, Paulo, baĝauka ema Keriso Iesu ĝaramanai diburai maiĝegu. <sup>10</sup>Onesimo, au natugu, uranai anoĝimuni. Ĝia tu Keriso nuĝanai au natugu ai eiaĝoto, korana au roĝo dibura numana nuĝanai, iaukai ĝia tamanai aiaĝoto. <sup>11</sup>Guinenai ĝia tu asi namo ĝoi ĝemu ai, senaĝina toma vetuĝunaĝi iaĝovininai ĝia tu ilaila nai, ĝoi na oura-viniani ema au na maki aura-viniani.

<sup>12</sup>Ĝia tu au lorugu ĝutuna, mai atuĝu-iaĝosi ĝenoĝoiani, be bono ĝabi-raĝea. <sup>13</sup>Au ĝegu ura ĝia tu mainai bana ĝabi-taria au seviĝu ai, be ĝoi gabumu bene ĝabia au bere vaĝa-kavagu, au Vari Namona ĝaramanai roĝo diburai nuĝanai. <sup>14</sup>Senaĝi ĝegu ura ĝoi na maoro boro vinigu vau bara ĝabi-taria, moĝesi naima asi aĝabi-tariato. Au asi aurani maki ĝoi bana kiramu kara bono veia. Au ĝegu tuĝamaĝi, bema veiĝa

namori tari au durudurugu ġana bourani veiveiri nai tu, nuġamu sigai moġo bono veiri.

<sup>15</sup> Betaġu ġoi ġemuna Onesimo eveġitato ġaro kotuna anina tu, ma boġabi-ġenoġoiani nai tu, ġoi ġesi bene tanu-vanaġi vanaġi ġana. <sup>16</sup> Dia ġemu tuġu-rakaorakao tarimana asi voina moġo. Asiġina. Moġoni, ġia tu ġemu vetuġunaġi tarimana, senaġi ġia toma tu ġoi tarikakamu moġoninai beiaġo, naima bono ura-vinia. Au na ġia tu anari-ġitakauani nuġagu mabarana ġesi, ema ġoi na maki bouravini-lelevaġiani nuġamu mabarana ġesi. Gia boura-viniani ema boġabi-raġeani tarima ta ema Vereġauka nuġanai tarikaka ta.

<sup>17</sup> Bema au oġabi-raġeguni ġoi ġatamu, Onesimo maki bono ġabi-raġea au boġabi-raġeguni ilailanai. <sup>18</sup> Bema kerere ta eveiato ġoi ġemu ai o ma ġena ġabitore ġoi ġemu ai nai tu, au aragu ai bono toreri. <sup>19</sup> Au Paulo ġimagu na mai fefa atoreani. Mo ġabitore tu voiri mabarari bavini-ġenoġoimuni. Ġoi maki ma ġemu ġabitore au ġegu ai. Ġoi maġuri tu au ġeguna oġoitaġoato, senaġi maniġeri tu asi bita kiraġirini. <sup>20</sup> Be, tarikakagu Vereġauka nuġanai, mani ġemu veiġa ġegu noġinoġi bono ġabi-raġea. Ġita taura ruarua tu Keriso nuġanai tatanuni, be bono vaġa-iakugu.

<sup>21</sup> Ġemu seġaġi ai avetuġa-maġikauni nai batore-vinimu. Au ribagu, dia anoġimuni veiġari moġo boveirini, senaġi veiġa namori boruri maki boveini. <sup>22</sup> Dagara ta maia. Ġegu gena daiġutuna ta bono ġabi-torea, korana atuġamaġini, Barau na ġemi ġauġau beġabi-raġeani, be beġabi-iaġosiguni ġemi ai.

### Vevaġa-namo guruġari

<sup>23</sup> Epafra, Keriso Iesu ġaramanai au ġesi dibura numanai ġatanuni, ġia na evaġa-namomuni. <sup>24</sup> Ema Mareko, Aristako, Dema ema Luka au ġesi ġaġauvei-sebonani tarimari, ġia na maki ġeri vevaġa-namo ġevinimuni.

<sup>25</sup> Vereġauka Iesu Keriso ġena varevare-bara mabarami ġemi ai bene tanu.

## HEBERU

Heberu vaġa-foforina guruġari

Mai fefa toretorena tarimana ta tu asi ribana. Tari ġekirani tu Luka na etoreato, tari ġekirani tu Apolos, o Banabas, o Priskila, o Akwila, o Paulo na etoreato ġetoni. Ġutuma ġekirani tu Paulo ġetoni korana fefa tu Paulo ġena fefa tore maġurinai ġetoreato. Mai fefa tu laġani 60 ema 70 fakari nuġanai ta ġetoreato, mo tu Iesu emaseto murinai.

Mai fefai siri baregori tu karoa 1:3; 4:14-16.

Mai fefa etoreato tarimana ġena ura baregona tu, 1) Heberu ekalesiari bene kirari, ekalesia maġurina korikorinai beġene tanu, a Iuda ġeri sene taravaturi ema maġuriri ġerina tu beġene raka-veġita ma ġeri ai asi ma beġene ġenoġoi-iaġo, maġuri vanaġi-vanaġi asi beġe doġariani garina (2:1; 6:4-6; 10:26); 2) Iesu Keriso bene vaġa-foforia, ġia tu moġoni Barau vetoġana korikori ema fororito tanobarai; 3) Barau ġena Gini-taġo Variġuna Iesu ġenai emoġonito moġa bene vaġa-fofori ginikaua etato.

Mai fefa tu maiġesina eboioġaiato:

1. Vevaġa-riba-iaġi guruġari - karoa 1-10:18
2. Ekalesia tanutanuna maġuriri - karoa 10:19-13:25

### Barau ġena guruġa Natuna ġenana

**1** Guinenai, ġaro vovoka e dabara ġutumai Barau na peroveta tarimari ġerina sen-  
era evaġa-guruġarito. <sup>2</sup> Senaġi toma, mai ġaro dokori ai, tu Natuna ġenana ema  
vaġa-guruġarato. Barau na dagara mabarari tu Natuna eviniato bene ġaunari. Ema  
ġia ġenana maki Barau na guba e tanobara eveirito. <sup>3</sup> Ġia tu Barau marevana e ma-  
mana baregona evaġa-foforiani, ema ġia tu Barau tauġena kavana. Ġia ġena guruġa  
seġukana na dagara mabarari eġabi-taġorini. Ġia tauġena na ġera rakava ġuriġi-  
vaġiri dabarana evei-ġitakuato murinai, Barau Iaru-korokoro aroribanai ea tanu-  
tarito gubai.

### Barau Natuna tu barego vedaurea, aneru maki evanaġirito

<sup>4</sup> Barau na Natuna tu etore-varaġeato, aneru evanaġirito. Korana tu arana eviniato  
maki varaġe lelevaġina, aneru arari evanaġirito. <sup>5</sup> Korana Barau na aneru ta tu asi  
ekiraiato, ekirato,

“Ġoi tu au Natugu,

toma au tu ġoi Tamamu ai baiaġo.”

O maiġesi maki asi ma ekiraiato, ekirato,

“Au tu ġia Tamanai baiaġoni,

ema ġia maki au Natugu ai beiaġoni.”

<sup>6</sup> Ema Barau na Natuna guinena tanobara ġana ma beġori-iaġomaiani nai tu  
bekirani,

“Barau ġena aneru mabarami na boġono toma-rakariġo vinia.”

<sup>7</sup> Aneru ekiraġirito nai tu ekirato,

“Barau na ġena aneru eveirito iavara kavana,

ġena vetuġunaġi tarimari karava emoreni noġa.”

<sup>8</sup> Senaġina Natuna ekiraġiani tu ekirani,

“Barau o, ġoi ġemu Vere dagina tu betanu-vanaġi vanaġini,  
 ġemu Basileia tu ma iobukaiobukamu ġesi oġori-kauani.

<sup>9</sup> Vei-iobukaiobuka tu oura-vinirini,  
 ma veiġa rakavari tu asi oura-vinirini.

Moġa lorinai, Barau o,  
 ġemu Barau na maki karomu fakari ai ġoi eġabi-viriġimuto,  
 debamu ai diġa esisiatu,  
 iaku na evaġa-vonumuto.”

<sup>10</sup> Ema ma ekiraiato, ekirato,

“Vere o, tovtovonai tu  
 ġoi na tanobara oveiato,  
 ema guba maki ġoi ġimamu veiveina.

<sup>11</sup> Ġia tu beġe korini,  
 senaġi ġoi tu botanuni;  
 mabarari dabuġa kavana beġe rakavani.

<sup>12</sup> Ġoi na koudi noġa boiokurini,  
 dabuġa kavana vetoġari beġe irauni,  
 senaġi ġoi vetoġamu tu asi beirauni,  
 ema ġoi ġemu maġuri laġaniri maki  
 asi beġe magoni.”

<sup>13</sup> Barau na aneru ta maki asi ekiraiato,

“Aroribagu ai noma tanu,  
 bene iaġo mo, ġoi ġevetari-vinimuni tarimari ġoi kwakumu fanakauna dagaranai  
 batore-taririni.”

<sup>14</sup> Aneru mabarari tu vetuġunaġi iaukari moġo, Barau na etuġurito deikara  
 vevaġa-maġuri beġe ġabiani tarimari vaġa-kavari ġana.

### Vevaġa-maġuri baregona

**2** Moġa lorinai kara taseġaġirito guruġari tu tana ġabi-gigitariri, asi namo ġer-  
 ana beġe rekwarkwani, benamo tiaiġo-viniani gabuna bita leaiani. <sup>2</sup> Korana  
 aneru na ġita senera ġeri ġevari-fiurito guruġari tu moġoni veġata, ma mo guruġa  
 moġeri ġekira-sirivaġi-iaġirito e asi ġekorana-iaġirito tarimari tu ġeri vei-rakava  
 ilailari ai metona ġeġabiato, <sup>3</sup> a ġita tu kamasi bita raga-maġurini, bema mai vevaġa-  
 maġuri baregona bita ġita-ġuirraġiani nai tu? Mai vevaġa-maġuri tu tovtovonai  
 Vereġauka tauġena na evari-fiuato. Moġa murinai tu ġeseġaġiatio tarimari na ġai  
 ġema-kiravaramato mo tu moġoni. <sup>4</sup> Barau na maki evaġa-moġoniato vetoġa boruri  
 ai, e nuġa-farevaġi veiġari ai, e seġuka veiġari boruri dabara irauirauri ai, ema Iauka  
 Veaġa ġena varevare dagarari na. Mo Iauka Veaġa ġena varevare dagarari tu Barau  
 ġena ura lorinai veġabidadama tarimari evinirito.

### Iesu na vevaġa-maġuri gabuna ġana eġori-iaġorani

<sup>5</sup> Mo tanobara beiaġomani ġai na ġakiraġiani tu Barau na dia aneru ġeri veġitaġau  
 gaburenai etoreato. <sup>6</sup> Senaġina Buka Veaġa nuġanai gabu tai tarima ta evarifiuto,  
 ekirato,

“Barau o, tarimarima tu dei,  
 be ġoi na otuġamaġi-gwaġiġiani?”

O Tarimarima Natuna tu dei,  
be ġoi na oraka-ġitaiani?

<sup>7</sup> Ġoi na kota oture-variġoato aneru gabureri ġana;  
murinai mareva baregona e vegubakau koronana ġenai oture-kauato,  
<sup>8</sup> ema dagara mabarari ġia kwakuna gaburenai otorerito.”

Korana Barau na dagara mabarari tu ġia ġena veġitaġau gaburenai etorerito. Moġoni, Barau na dagara ta tu asi oture-ragakwaneato, ġia ġena veġitaġau gabuna murikanai. Senaġina maitoma dagara mabarari tu dia ġia ġena veġitaġau gaburenai taġitarini. <sup>9</sup> Senaġi Iesu taġitaiani, ġia tu Barau na mo faka kotunai oture-variġoato aneru gabureri ġana, korana Barau ġena varevare-bara ġenana tarimarima mabarari urari ai bene mase. Toma Iesu tu taġitaiani, iatanai Barau na mareva e vegubakau baregona oture-kauato, korana tu midigumidigu ai emaseto.

<sup>10</sup> Dagara mabarari eveirito e eġaunarito Barauna, ġena ura tu Iesu roġo midigu-midigu ġenana asi vetoukaunai bene iaġo-guine. Moġa murinai vauro natuna ġutumari ma bene ġori-iaġomari, benamo ġia marevana e mamana baregona beġene ġabia. Barau ġenai dabara roroġotona sebona tu moġa moġo. Korana Iesu tu Barau natuna ġeri vevaġa-maġuri tarimana baregona. <sup>11</sup> Tarimarima evaġa-veaġarini tauna, Iesu, ema Iesu na evaġa-veaġarito tarimari Tamari tu sebona. Moġa lorinai Iesu tu asi emaiakaiani mo evaġa-veaġarito tarimari ekiraġirini ġia tarikakana.

<sup>12</sup> Ġia na Barau ekiraiani, ekirani,

“Ġoi aramu tu au tarikakagu ġeri ai bakiraġi-foforiani;  
ekalesia nuġanai ġoi mari ai bavonevone-raġemuni.”

<sup>13</sup> Ma ekirato,

“Barau ġenai haveġabidadamani.”

Ema ma ekirato maki,

“Au tu maiġegu Barau na eviniguto doġorona natuna ġesi.”

<sup>14</sup> Korana Barau natuna mabarari tu ma viriġori e ma rarari nai, ġia tauġena maki ġia ilailari ai eiaġoto. Moġesi eveito korana tu, ġena mase ġenana mase seġukana eġabi-taġoani tarimana, Diabolo, bene vaġa-rakavaia ġana. <sup>15</sup> Ema tarimarima deikara ġeri maġuri nuġanai mase garina na eġuġvirito bene vaġa-maġuriri ġana. <sup>16</sup> Moġoni, Iesu na tu dia aneru evaġa-kavarito, senaġi Aberahamo besena. <sup>17</sup> Moġa lorinai Barau na Iesu tu dabara mabarari ai tarina doġoro ilailari ai eveirito. Korana mo dabarai vau vetuġaġwa e vetuġamaġikau Rubu Veaġa verena baregonai beiaġoni. Ema Barau vetuġunaġina beiaġo-vinini, tarimarima ġeri rakava na bene voi-vaġiri ġana. <sup>18</sup> Korana Iesu tauġena na veribaġani midigumidiguna mamina eġabiato, toma kamara deikara veribaġani beġoitaġoni nai tu bevaġa-kavaiani riba.

### Iesu ġena seġuka na Mose ġena seġuka evanaġiato

**3** Moġa lorinai, tarikakagu veaġami, ġomi tu Barau na ekeamito guba na. Ġemi tuġamaġi boġono tore-gwaġiġia Iesu ġenai. Ġia tu Barau na etuġuato Rubu Veaġa verena barana. Ġita na tu ġia takiraġi-foforiani. <sup>2</sup> Iesu tu Barau na evaġaruġaiato Rubu Veaġa verena. Ema ġia tu ma ġena vetuġamaġikau Barau ġenai, ilailana Mose ma ġena vetuġamaġikau Barau ġena numai kavana. <sup>3</sup> Numa eragaiani tarimana tu ġegubakau-baregoani, a eveiani numana tu ġegubakau-keiani. Moġesi kavana Barau na Iesu tu mareva baregona eviniato, Mose na eġabiato marevana

evanaġiato. <sup>4</sup> Numa mabarari tu ma ragaragari tarimari, senaġina dagara mabarari veiveiri tu Barau ġereġana. <sup>5</sup> Mose tu vetuġunaġi-iaġovini tarimana, ġia ma ġena vetuġamaġikau Barau ġena numai. Ema ġena ġauvei tu ġoirai Barau na kara beki-raġirini guruġari ekiraġi-foforirito-ġoi. <sup>6</sup> Senaġina Keriso, Barau Natuna, tu Barau ġena numa eġita-ġauani. Ġita tu ġia ġena numa, bema ma kokorera e ma iakura ġesi taveiavi-iaġiani tuġamaġikaunai bita veġabi-gwaġiġini beiaġoni mo magona.

### Barau ġena tarimarima ġeri iaġaraġi

<sup>7</sup> Moġa lorinai Iauka Veaġa ekirani kavana bitana vei, maiġesi ekirani, “Toma bema Barau garona boġo seġaġiani nai tu, <sup>8</sup> nuġami asi boġono vaġa-gwaġiġi foroforori, senemi tanobara fakanai veribaġani ġaronai ġeseġaforeto kavana. <sup>9</sup> Oba, tamam i na laġani gabana vasivasi (40) tanobara fakanai ġegu ġauvei ġeġitaiao,

senaġina ġeribaġaniguto e ġevaġa-uraguto.

<sup>10</sup> Moġa lorinai mo bese abaru-vinirito,

benamo akirato, ‘Ġia nuġari tu vanaġivanaġi au ġeguna ġeveġitani, ema au ġegu veiġa maki asi ġeribarini.’

<sup>11</sup> Moġa lorinai ma baruġu ġesi aguruġa-foforito,

‘Ġia au ġegu iaġaraġi ai tu asi beġe raka-toġani.’”

<sup>12</sup> Tarikakagu mabarami, boġono venari. Asi namo tarikaka ta ġomi fakami ai loruna ġutunai vei-rakava betanuni, ema Barau ġena guruġa asi bevaġa-moġoniani, benamo maġuri Barauna ġenana beraka-veġitani. <sup>13</sup> Toma mai ġaro maiġa Barau ekirani, “Tomaġaro” etoni ġiranai, karomi tata ġesi boġono velaunaġi, be vei-rakava ġena ġofaġofa na ta nuġamu asi bene vaġa-gwaġiġia. <sup>14</sup> Ġita tu Keriso ġesi tasebonato, bema tovotovonai taġabi-raġeato veġabidadamana moġa bita ġabitari-gwaġiġiani beiaġoni mo magona. <sup>15</sup> Buka Veaġa ekirani kavana,

“Tomaġaro ai bema garona

boġo seġaġiani nai,

nuġami asi boġono vaġa-gwaġiġiri,

ġuinenai ġomi senemi seġafore ai ġeveito kavana.”

<sup>16</sup> Dei na tu Barau garona ġeseġaġiato, senaġi ġena guruġa ġekira-fitoġarito, benamo ġevaġa-baruato? Mo tu Mose na Aigupito na eġori-rosirito tarimari mabarari, ene? <sup>17</sup> Ema deikarari tu Barau na mo laġani gabana vasivasi (40) nuġanai ebaruvinirito? Tarimari tu moġeri, rakava ġeveito, benamo tano fakanai ġeketoto, benamo ġemaseto, ene? <sup>18</sup> Ema Barau na tu deikarari ekirarito, ekirato, “Au ġegu iaġaraġi gabunai tu asi beġe raka-toġani.” Ġeseġaforeto tarimari ekirarito, ene? <sup>19</sup> Moġa lorinai ġita taribani, ġia tu asi ġeraka-toġato, korana Barau asi ġevaġa-moġoniato-ġoi nai.

**4** Barau ġena iaġaraġi ai bita raka-toġani guruġatorena tu roġo eruġa-taġoni. Moġa lorinai bitana venari, ġita fakarai ta mo iaġaraġi ai asi beraka-toġani garina. <sup>2</sup> Korana mo Vari Namona ġita ġera ġeġobata-iaġiato tu Isaraela tarimari ġeri maki ġeġobata-iaġiato. Senaġi mo guruġa ġeseġaġirito ġerina namo ta asi ġeġoitaġoato, korana tu ġeseġaġirito moġo, ma asi ġevaġa-moġonirito.

<sup>3</sup> Senaġi ġita Barau tavaġa-moġoniani tarimara tu, mo iaġaraġi ai bita raka-toġani ġena guruġa ilailanai, ekirato,

“Au ġegu baru ai kiraġitore guruġana gwaġiġina akiraġi-foforiato, akirato, ‘Au ġegu iaġaraġi ai tu asi beġe raka-toġani.’”

Moġoni, Barau tu moġesi ekirato, senaġina ġia na tanobara eveiato nai, ġena ġauvei mabarari tu varau evaġa-koririto. <sup>4</sup> Gabu tai Buka Veaġa nuġanai ġaro vaġa-imaima ruaruana (7) ekiraġiato nai tu, maiġesina ekirani, “Ġaro vaġa-imaima ruaruana (7) Barau tu ġena ġauvei mabarari ġerina eiaġaraġito.” <sup>5</sup> Ema mai vau bita kiraġia gabunai maki ekirato, “Ġia au ġegu iaġaraġi ai tu asi beġe raka-toġani.”

<sup>6</sup> Senaġina tari mo iaġaraġi ai beġe raka-toġani guruġatarena tu roġo eruġani gabunai. Ma Isaraela tarimari, Vari Namona ġeseġaġi-guineato tarimari, tu mo iaġaraġi ai asi ġeraka-toġato, korana tu ġeseġaforeto nai. <sup>7</sup> Moġa lorinai Barau na ġaro ta ma eġabi-viriġiato, “Tomaġaro” ekiraġiato. Ma laġani vovoka ġekorito murinai, Barau, Davida ġenana maiġesi eguruġato, ekirato,

“Toma, bema Barau garona

boġo seġaġiani nai,

nuġami asi boġono vaġa-gwaġiġiri.”

<sup>8</sup> Bema Iosua na iaġaraġi bere viniri, Barau na moġa murinai iaġaraġi ġarona ta tu asi ma bere kiraġia. <sup>9</sup> Moġa lorinai Barau ġena tarimarima ġeri iaġaraġi tu roġo ġoirai eruġa-taġoni. <sup>10</sup> Korana Barau ġena iaġaraġi ai eraka-toġani tarimana tu ġena ġauvei na eiaġaraġini, ilailana Barau ġena ġauvei na eiaġaraġito kavana. <sup>11</sup> Moġa lorinai sikokore, Barau ġena iaġaraġi ai tana raka-toġa uranai. Ma ġita fakarai ta asi bene keto, guinenai ġeseġaforeto tarimari kavari.

<sup>12</sup> Barau ġena guruġa tu maġuri e ma seġukana. Matana maki raga-rakava, vetari baġana ta matana ruarua maki evanaġiato, erakatoġa-korikorini maġuri ma iauka vekaravarina, ema turiġa komukomuri ruarua ġeraga-sebonato vekaravarina. Tarima loruna ġutuna ġena ura e tuġamaġi maki eriba-viriġiani. <sup>13</sup> Barau na eveirito dagarari mabarari tu ta asi vekuretoġa ġia matanai. Ema ġia ġoiranai ġita mabarara ġera maġuri bita vari-fiurini.

### Iesu Rubu Veaġa verena barego vedaureana

<sup>14</sup> Barau Natuna Iesu tu ġita ġera Rubu Veaġa verena barego vedaureana; ġia tu guba eraka-vanaġirito. Moġa lorinai ġera veġabidadamai tana veġabi-gwaġiġi. Mo tu ġita na takiraġi-foforiani veġabidadamana. <sup>15</sup> Ġita ġera Rubu Veaġa verena baregona tu ġita ġera moiramoira ġia na maki emami-raġirini. Korana tu ġia maki ġenai veribaġani irairau mabarari ġefoforito ġita ġerai kavana. Senaġi ġia tu asi evei-rakavato. <sup>16</sup> Moġa lorinai ma kokorera ġesi Barau ġena namo e varevare-bara terona ġana siraka-kavi-iaġo. Monai Barau ġena vevetuġaġwa bitana ġabia, ema ġena varevare-bara tana ġoitaġoa, be bita ura-viniani nai, bene vaġa-kavara.

**5** Rubu Veaġa vereri baregori mabarari tu tarimarima fakari na Barau na eġabi-viriġirito, benamo evaġa-ruġarito, tarimarima arari ai Barau ġena ġauvei beġene veia ġana. Ġia ġeri ġauvei tu tarimarima ġeri rakava voi-vaġiri ġana varevare dagarari Barau beġene vinya ema boromakau, mamoe, e manu beġene vaġiri, benamo beġene gaburi, Barau na bonari bene noġori ġana. <sup>2</sup> Rubu Veaġa verena baregona tauġena maki ma ġena moira gaburi, naima ġia na asi ribari tarimari ema Barau ġena dabara na ġeraka-veġitani tarimari bevetuġa-ġwarini riba. <sup>3</sup> Ġia tauġena maki



ma ġena moira lorinai, ġia na rakava voi-vaġiri varevareri tu ġia ġena evinini, ema tarimarima ġeri maki evinini.

<sup>4</sup>Rubu Veāġa verena baregona dagina eġabini tarimana tu arana barego. Tarima ta na mai ginitaġo ġauveina tauġena na asi beġabi-kavaiani, senaġi ġia tu Barau na bene keaia vau, vaġa-ilailana Arona ekeaiato kavana.

<sup>5</sup>Keriso maki moġesi, dia tauġena eveġabi-varaġeto Rubu Veāġa verena baregonai evetoreto, senaġina Barau na evaġa-ruġaiato, ekiraiato, ekirato,

“Ġoi tu au Natugu,  
toma au tu ġoi Tamamu ai baiaġo.”

<sup>6</sup>Gabu tai maki ekirani,  
“Ġoi tu Rubu Veāġa verenai  
botanu-vanaġi vanaġini  
Melkisedek kavana.”

<sup>7</sup>Iesu tanobarai etanuto-ġoi ġarori ai tu ma taġi-koġokoġona ema matana ma nuri ġesi Barau ġenai eġuriġurito-ġoi, ema enoġi-raġeto-ġoi. Korana tu Barau na ġereġana na moġo mase ġenana bevaġa-maġuriani. Barau na eseġaġiato, korana tu ma vegubakauna ġesi Barau garina eveito-ġoi nai. <sup>8</sup>Ġia tu Barau Natuna, senaġi ġena midigumidigu na vau seġaġi dabarana eribaiato. <sup>9</sup>Enamo-vedaureato murinai vau, ġia beġe seġaġi-viniani tarimari mabarari ġeri maġuri vanaġivanaġi vaġa-ġorana tarimanai eiaġoto. <sup>10</sup>Ema Barau na evaġa-ruġaiato Rubu Veāġa verena baregona Melkisedek kavana.

### Asi boġono mero-kaukau

<sup>11</sup>Ġia varina tu vovoka bita kiraġirini, senaġina moġeri kiraġi-viriġiviriġiri tu gwaġiġi, korana ġomi tu asi ġotuġamaġi-faka ġarimoġini. <sup>12</sup>Mai nega mainai ġomi tu vevaġa-riba tarimami ai ġoro iaġo, be ġoro vevaġa-riba-ġoi. Senaġina ġomi tu roġo ġourani ta na Barau ġena guruġa moġoniri korari na ma bene vaġa-ribami ġo-toni. Ġomi tu roġo lata ġourani, ġaniġani gwaġiġiri tu asiġina. <sup>13</sup>Deikara lata roġo eruruni tu roġo mero keina. Ġia tu veiġa iobukaiobukari ema veiġa asi roroġotori vetoġari tu roġo asi ribana. <sup>14</sup>A ġaniġani gwaġiġiri tu tarima baregori ġari. Ġia na tu ġeġauvei-iaġi vanaġivanaġirini. Ġeġauvei-iaġirini ġarori ai tu tauġeri maki ġevevaġa-ribani namo e rakava vetoġari beġene ġita-leari ġana.

**6** Moġa lorinai namona tu Keriso ġena vevaġa-riba guruġari tovotovonai riba ġuineri ġeġoranai dagarari tu si-iaġuiri. Benamo ġia ġena vevaġa-riba baregori ġana si-iaġo. Tovotovonai riba ġuineri ġeġoranai dagarari moġo asi bitana vevaġa-riba-iaġi ġenoġoi-ġenoġoiri. Mo tu vei-rakava ġerina tuġamaġi-kure ma raka-kure e Barau ġenai veġabidadama. <sup>2</sup>Babatiso vevaġa-ribari e ġima tarima iatari ai torekau, mase na varिġisi-ġenoġoi e vevaġa-roroġoto vanaġivanaġi. <sup>3</sup>Moġa tu bita veiani bema Barau na bevaġa-moġoniani nai.

<sup>4</sup>Bema tarima ta ġena veġabidadama beraga-kwaneani tu, kamara dabarai ma bevetuġamaġi-kureni? Ġia nuġana tu evaġa-mamaiato, ema guba na eiaġomato varevarena emami-tovoato, ema Iauka Veāġa maki eġabiato. <sup>5</sup>Ema Barau ġena guruġa namona edoġariato e vau ma beiaġomani tanobarana seġukari maki emamirito. <sup>6</sup>Bema ġia veġabidadama na ma beketo-veġitani, ġia tu Barau Natuna ma evaġa-satauro ġenoġoiani, ema ġutuma barai ma etore-rosiani e evaġa-maiakaiani. Ġia ma novaġa-vetuġamaġi-kurea ġana tu asi dabarana ta.

<sup>7</sup> Ġaro vovoka ġura eraguni, benamo tano na mo nanu erimaiani. Benamo bema mo tano iatanai ġevaroni tarimari ġari ġaniġani namori bevaġa-ġorarini nai tu, Barau na mo tano namo beviniani. <sup>8</sup> Senaġina ġau ma giniri ema ġauġa ma ġiniġiniri evaġa-ġararini tanona tu asi ġena namo; Barau na mo tano bekiraġiani tu tano raka-vana, ema dokonai tu begabuani.

<sup>9</sup> Ġatagu mabarami, moġoni, maiġesina ġavaġa-guruġa gwaġiġimini, senaġina ġatuġamaġi-gwaġiġini, ġomi tu namo baregona ema vevaġa-maġuri boġoa ġoitaġoani. <sup>10</sup> Barau ġena veiġa tu asi ġeġeva. Barau ġemi ġauvei ema ġia arana ġoura-viniani nai, ġena tarimarima ġovaġa-kavarito ema initoma roġo ġovaġa-kavarini tu asi betuġa-rekwarini. <sup>11</sup> Ġai ġema ura baregona tu ġomi tata maniġesi moġo boġono ġauvei-kokore-iaġo, ġemi tuġamaġikau beġenea moġoni bene iaġo mo dokonai. <sup>12</sup> Be asi beġene ġubulefimi, senaġina mo tarimarima ġeri veġabidadama e ġeri vevaġa-gwaġiġi ġerina mo kiraġitore ġeġabiani, boġono tovtovori.

### Barau ġena kiraġitore

<sup>13</sup> Barau ġena kiraġitore guruġana Aberahamo ġenai eveiato tu tauġena aranai eguruġa-toreto, korana tu tarima ta ma asi varaġe ġia iatanai, aranai beguruġa-toreni lorinai. <sup>14</sup> Ekirato, “Moġoni, ġoi tu bavaġa-namomuni ema besemu ġutuma bavinimuni.” <sup>15</sup> Benamo Aberahamo evevaġa-gwaġiġito, asi eġubulefito mo Barau na ekiraġi-torerito dagarari ġenai ġefoforito.

<sup>16</sup> Tarimarima guruġatore gwaġiġiri mabarari ġeveini nai tu, tarima baregona ta ġia iatarāġeri ai aranai ġeguruġa-toreni. Monana mo guruġa-tore guruġana gwaġiġina evaġa-moġoniani, benamo veġareveġare guruġari mabarari elauġaurini. <sup>17</sup> Guinenai Barau ġena kiraġitore tu guruġatore guruġana gwaġiġinai eveiato. Korana ġia ġena ura ġia na kiraġitore beġe ġaunai tarimari beġene riba-ginikau, ġia ġena kiraġitore tu asi bevekefoni. <sup>18</sup> Mo guruġatore ruarua tu beġe tanuni, asi beġe vekefoni. Ema mo dagara ruarua ġerina ġita taribani, Barau tu asi beġofaġo-fani riba. Be ġita deidei rakava ġenana taraga-veġitato, benamo Barau ġenai taiaġo-mato tarimara tana kokore-korikori, be mo tuġamaġikau ġoirarai eruġa-taġoni tana ġabia. <sup>19</sup> Mo tuġamaġikau taġabiato tu ġita ġera maġuri eġabi-tariani dagarana. Mai tuġamaġikau tu moġonina e asi eirauni. Ġia tu vekouġau dabuġana na murina ġana eraka-toġani, eiaġoni mo, veaġa lelevaġi daiġutuna nuġana ġana. <sup>20</sup> Mo ġana tu Iesu eiaġo-ġuinetto ġita bene vaġa-maġurira uranai. Ġia tu Melkisedek ġena dabarai Rubu Veaġa verena baregonai betanu-vanaġi vanaġini.

### Melkisedek tu Rubu Veaġa verena baregona

**7** Mai Melkisedek tu Salem vanuġa barana verena, ema ġia tu Iaru-korokoro Barauna ġena Rubu Veaġa verena. Ġia na Aberahamo edoġariato, vanuġa barari ġeri vere baregori o kini tari vetari ai evaġirito, benamo eġenoġoito-ġoi nuġanai, Aberahamo evaġa-namoato. <sup>2</sup> Ema Aberahamo na vetari ai eġabirito farefareri, karava gabanana (10) eveirito, benamo karava ta Melkisedek eviniato. Melkisedek arana anina giniguinena tu “Veiġa Iobukaiobuka Verena”, ma arana ta tu “Salem Verena”, moġa anina tu “Maino Verena”. <sup>3</sup> Ġia asi tamana, asi sinana, asi besena ta, ema ġena maġuri evesinato ġarona e ġena maġuri emagoto ġarona maki asiġina. Ġia tu Barau Natuna kavana etanuni, Rubu Veaġa verena vanaġivanāġi.

<sup>4</sup> Melkisedek ġoġitaia, ġia tu tarima arana barego lelevaġi, korana Aberahamo tu senera baregona na maki vetari ai eġabirito farefareri karava gabanana (10) ġerina ta ġia eviniato. <sup>5</sup> Taravatu ekirani, Levi besena Rubu Veaġa verena dagina beġe ġabi-ani tarimari tu karava gabanana ġerina ta beġene gogo Isaraela tarimari ġerina, mo tu tarikaka ġerina. Moġoni, tarikakari maki Aberahamo ġena bese tarimari, senaġina ġia ġerina beġene gogo. <sup>6</sup> Melkisedek senena tu dia Levi ġenana eiaġomato, senaġina Aberahamo ġenana karava ta eġabiato. Ma ġia na Barau ġena kiraġitore eġabiato tarimana evaġa-namoato. <sup>7</sup> Asi bita daradara-iaġiani, tarima baregona na tarima keina vevaġa-namo eviniani. <sup>8</sup> Levi senena, karava gabanana ġerina ta ġeġabiato doġorori, tu ma ġemaseto-ġoi. A Melkisedek na maki karava ta eġabiato, senaġi ġia tu Buka Veaġa na ekiraġiani asi emaseto. <sup>9</sup> Benamo maiġesi ma nakira, Levi maki karava gabanana ġerina ta ġeġabiato-ġoi tarimana. Ġia na Aberahamo ġenana Melkisedek karava ta ma evini-ġoiato.

<sup>10</sup> Korana Melkisedek na Aberahamo eġoitaġoato ġaronai tu, Levi tu roġosi roġo bene maġuri, roġo ġatana Aberahamo tauġaninai.

### Iesu tu Melkisedek kavana

<sup>11</sup> Guinenai Barau na Isaraela tarimari taravatu evinirito. Mo taravatu ekirani, Levi besena na ginitaġo veaġa ġauveina beġene veia. Senaġi bema Levi besena ġeri Rubu Veaġa verena ġenana e ġeri ġauvei seġukana na mo namo vedaurea beġere ġabia nai tu, kara dainai Barau tu ma ekirato, Rubu Veaġa verena ta ma betuġuani Melkisedek ilailanai, ma dia Arona kavana? <sup>12</sup> Korana bema ginitaġo ġauveina ġeveiani tarimari ġeri doġoro ġesenisito nai tu, taravatu maki besenisini. <sup>13</sup> Korana Iesu mai taki-raġiani tarimana tu irau doġoro. Ġia ġena doġoro tarimana ta fata veaġana iatanai ginitaġo ġauveina asi eveito. <sup>14</sup> Korana ribara, ġita ġera Vereġauka tu Iuda besena na emaġurito. Ma Mose na Rubu Veaġa vereri ekiraġirito-ġoi nai tu, Iuda doġorona tu asi ekiraġiato.

<sup>15</sup> Ema kara bita kiraġia toma tu bita ġitafaka-ginikauani, korana Rubu Veaġa verena ta ma befori Melkisedek kavana. <sup>16</sup> Ġia tu dia senena kavari, taravatu seġukanai Rubu Veaġa verenai eiaġoto, senaġina maġuri vanaġivanaġi ġenana eiaġomani seġukana na Rubu Veaġa verenai eiaġoto. <sup>17</sup> Korana Barau na maiġesi ekiraiato, ekirato,

“Ġoi tu Rubu Veaġa verenai  
botanu-vanaġi vanaġini  
Melkisedek kavana.”

<sup>18</sup> Mo taravatu guinena tu etore-veġitaia, korana ġia tu asi seġukana ema asi bevevaġa-maġurini riba. <sup>19</sup> Korana Mose ġena taravatu na dagara ta tu asi evaġa-namo vedaureaiato. Moġesina naima Barau na tuġamaġikau lagilagina ta ma etore-rosiato, moġa ġenana ġita Barau sevina ġana bita raka-kavini.

<sup>20</sup> Barau na Iesu tu guruġatore guruġana gwaġiġina eveiato vau, Rubu Veaġa ver-enai etoreato! A Rubu Veaġa vereri mabarari ġeri ai tu guruġatore ta asi eveiato. <sup>21</sup> Senaġi Iesu Rubu Veaġa verenai eiaġoto tu Barau na guruġatore gwaġiġina eveiato vau. Barau na maiġesi ekiraiato,

“Vereġauka tu eguruġa-foforito  
ma ġena tuġamaġi asi ma bekefoani:  
‘Ġoi tu Rubu Veaġa verenai botanu-vanaġi vanaġini.’”

<sup>22</sup> Mai guruḡatore guruḡa gwaḡiḡina lorinai, Iesu tu ginitaḡo variḡuna ma namona korikori vaḡa-moḡoninai eiaḡoto.

<sup>23</sup> Guinenai Rubu Veaḡa vereri tu vovoka, korana tu ḡemaseto-ḡoi, be ta Rubu Veaḡa verenai asi etanu-rovaḡito. <sup>24</sup> A Iesu tu etanu-vanaḡi vanaḡini lorinai, ḡia tu Rubu Veaḡa verenai betanu-rovaḡini. <sup>25</sup> Moḡa lorinai deikara ḡia ḡenana Barau ḡenai beḡe iaḡoni tu bevaḡa-maḡuririni riba. Korana Iesu tu ḡia urari ai Barau ḡenai bene ḡauḡau ḡana etanu-vanaḡi vanaḡini.

<sup>26</sup> Maiḡesi Rubu Veaḡa verena baregona na ḡita ḡera ura dagarari evinirani. Ḗia tu veaḡa, asi ḡena vei-rakava, vetoukau ta ḡenai asiḡina, namo vedaurea; ḡia tu vei-rakava tarimari kavana asiḡi. Ma Barau na guba tuḡuna korikorinai ea tore-ato. <sup>27</sup> Ḗia tu dia guinenai Rubu Veaḡa vereri baregori kavana, ḡaro korikoriri ai varevare dagarari bevinini. Guine tu ḡia ḡena vei-rakava Barau na bene tuḡamaḡi-fitoḡari ḡana evinito, ma moḡa murinai tu tarimarima ḡeri rakava Barau na bene tuḡamaḡi-fitoḡari ḡana. Ḗia tu vaḡa-sebona moḡo tarimarima ḡeri vei-rakava ḡana ginitaḡo varevarena eviniato. Moḡa tu ḡia tauḡena ginitaḡo varevarenai eiaḡoto, benamo Barau ḡenai evevini-raḡeto. <sup>28</sup> Mose ḡena taravatu na tu ma ḡeri moira tarimari Rubu Veaḡa verena baregonai etorerito-ḡoi. Senaḡina Barau ḡena guruḡatore guruḡana gwaḡiḡina, Mose ḡena taravatu murinai ema foroforo dagarana, na tu Barau Natuna evaḡa-ruḡaiato. Ḗia tu Barau na evaḡa-namo vedaureaiato, ma namo vedaurea betanu-vanaḡi vanaḡini.

### Iesu tu ḡita ḡera Rubu Veaḡa verena baregona

**8** Ḗai na kara ḡakiraḡiani tu maiḡa. Ḗita tu ma ḡera Rubu Veaḡa verena baregona. Ḗia tu gubai Iaru-korokoro Barauna ḡena terona aroribanai etanu-tarito. <sup>2</sup> Barau ḡena veaḡa gabuna nuḡanai eḡauveini. Mo tu farai rubuna korikori Vereḡauka na eragaiato, dia tarimarima na ḡeragaiato.

<sup>3</sup> Rubu Veaḡa vereri baregori mabarari tu ḡevaḡa-ruḡarito, varevare dagarari ema boromakau, mamoe, manu beḡene vini ḡana. Moḡa lorinai mai Rubu Veaḡa verena baregona, Keriso, maki ma ḡena dagara tari, bene vini ḡana. <sup>4</sup> Bema ḡia tano-barai bere tanu tu, Rubu Veaḡa verenai asi bere iaḡo, korana tu maiḡa, Rubu Veaḡa vereri tu varau ḡetorerito maiḡeri, varevare dagarari ḡevini-tanuni, Iuda ḡeri taravatu ekiraḡiato ilailanai. <sup>5</sup> Ḗia varevare dagarari mainai veaḡa lelevaḡi daiḡutunai ḡevinini tu, gubai mo veaḡa lelevaḡi daiḡutuna kavana e vetoḡana moḡo. Moḡesina nai Barau na Mose toma-rakariḡo ḡana farai rubuna bene ragaia ḡana, naima ekira-toreḡauato, ekirato, “Bono ḡitaia, dagara mabarari boveirini nai tu, ḡoro ai avaḡa-ḡitamuto ilailanai moḡo bono veiri.” <sup>6</sup> Senaḡina toma Iesu na ginitaḡo varevareri vini-toreḡau veiḡana guinenai Rubu Veaḡa vereri ḡeri ḡauvei evanaḡiato. Korana Barau ḡena kiraḡitore variḡunai Iesu tu Barau e tarimarima vekaravari ai eruḡani, ginitaḡo variḡuna bene vaḡa-seḡukaia ḡana, ma mai ginitaḡo na mo ginitaḡo guinena seḡukana evanaḡiani. Ema Barau ḡena kiraḡitore variḡuna na mo ginitaḡo guinena kiraḡitorena maki evanaḡiato. <sup>7</sup> Bema mo ginitaḡo guinena asi ḡena rakava tu, Barau na ginitaḡo variḡuna ta asi ma bere kiraḡia. <sup>8</sup> Senaḡina Barau na tarimarima ḡeri ai rakava eḡoitaḡoto naima ekirato, “Vereḡauka eguruḡa-foforini, ‘Boḡono seḡaḡi, ḡaro ta mani eiaḡomani, au na ginitaḡo variḡuna ta ma baveiani,

Isaraela besena e Iuda besena ġeri.

<sup>9</sup>1 Mai ginitaġo tu dia guinenai ġia seneri ġeri aveiato moġa kavana.

Dia mo ġaro ai ġimari ai aġabito,

benamo Aigupito na aġori-rosirito ginitaġona kavana.

Korana ġia tu au ġegu ginitaġo ġenai

asi ġevetuġamaġikauni naima,

au na araga-kwanerito,'

Vereġauka tu moġesina eguruġani.

<sup>10</sup> Vereġauka ma ekirani,

'Goira ġarori ai au na mai ginitaġo Isaraela besena ġeri ma baveiani:

Au ġegu taravatu ġia debari ai batore-toġarini ema ġia nuġari ai batorerini.

Au tu ġia ġeri Barau ai baiaġoni ema ġia maki au ġegu tarimarimai beġe iaġoni.

<sup>11</sup> Tarima ta na sevina etanuni tarimana asi ma bevaġa-ribaiani,

ema tarima ta tarikakana asi bekiraiani,

'Vereġauka noribaia!'

Korana mabarari na beġe ribaguni,

misina na beiaġoni mo baregona.

<sup>12</sup> Ġeri kira-sirivaġi batuġamaġi-fitoġarini,

ema ġeri rakava mabarari asi ma batuġamaġirini."

<sup>13</sup> Barau na mai ginitaġo maiġa ekiraġiani, "ginitaġo variġuna" etoni nai tu, ġia na mo ginitaġo tovotovonai moġa tu guinena na ekiraġiani. Ma kara eguinenani e erakavani tu asikauna berekwarekwani.

**9** Ginitaġo guinena tu ma ġena taravatu misimisiri toma-rakariġo ġana, ema ma ġena gabu veaġana maki. Mo gabu veaġana tu tanobarai etanuni dagarana.

<sup>2</sup> Barau toma-rakariġona ġana farai rubuna ta ġeragaiato. Mo farai rubuna nuġanai daiġutu giniguenena tu Veaġa Gabuna ġetato. Ġia nuġanai tu lamefa torekana dagarana, teibolo e Barau ġeviniato berediri. <sup>3</sup> Kouġau dabuġana vaġa-ruaruana murinai tu daiġutu ta maia. Moġa tu Veaġa Lelevaġi Gabuna ġetato. <sup>4</sup> Ġia nuġanai tu golo fatana, goġu ma bonana iatanai beġene vei ġana, ema Kiraġitore Mauġana; ġia murikana mabarana tu golo na ġeveiato. Ma mauġa nuġanai tu golo ġurona ta, nuġana ma manana e Arona ġena togoi, egarakauto dagarana, ema fore ruarua Barau na iatari ai taravatu etoreto foreri. <sup>5</sup> Mo mauġa iatanai tu kerubi ruarua ġevaġa-ruġa veġoirarito. Mo kerubi tu ġau garagarari, vetoġari tu aneru kavari. Ta tavi ta dudu ai ġevaġa-ruġaiato, ma ta maki tavi ta dudu ai, ma faneri ġekeorito, benamo rakava voivaġiri gabuna ġegoru-tariato. Mo kerubi ruarua na tu Barau ġena mareva baregona ġekiraġiani. Senaġi maiġeri dagara misikoseri mabarari tu toma asi baġa kiraġirini.

<sup>6</sup> Dagara mabarari moġesi ġeveirito murinai, Rubu Veaġa vereri ġaro vanaġi-vanaġi daiġutu giniguenena nuġanai ġeraka-toġato-ġoi, benamo ġeri ġauvei ġeveirito-ġoi. <sup>7</sup> Senaġi rubu verena baregona ġereġana moġo laġani ta nuġanai vaġa-sebona daiġutu vaġa-ruaruana nuġanai eraka-toġato-ġoi. Ġena rakatoġa ġarori mabarari ai tu rara maki eġabi-taġoato-ġoi. Mo rara ġia na tu rakava tuġamaġi-fitoġari ġana ginitaġo dagarana evaġa-iaġoato-ġoi. Guine tu ġia ġena rakava ġana evinito-ġoi ema murinai tu tarimarima ġeri rakava ġana. Mo rakava tu asi ribari nai ġeveirito-ġoi rakavari. <sup>8</sup> Iauka Veaġa na maiġeri veġa mabarari ġerina ġita tu maiġesina evaġa-guruġarani: Bema Barau toma-rakariġona ġana farai rubuna

giniguinena roĝo eruĝa-taĝoni nai tu, Veaĝa Lelevaĝi Gabuna rakatoĝa dabarana tu roĝosi roĝo bene vekeo. <sup>9</sup>Mo farai rubuna tu toma mai negai kara beĝe ĝorani evaĝa-foforiani. Mai farai rubuna nuĝanai varevare dagarari e ginitaĝo dagarari vaĝa-ilailana boromakau, mamoe, manu Barau ĝeviniato-ĝoi dagarari mabarari na ĝetoma-rakariĝoto-ĝoi tarimari nuĝari asi ilaila beĝe iarevarini. <sup>10</sup>Korana mo Barau ĝeviniato-ĝoi dagarari tu ĝaniĝani e niuniu dagarari, ema tarima beĝene iareva ĝana veĝuriĝi maĝuriri irauirau. Mai tu mabarari tauĝani taravaturi moĝo. Barau na tarimarima evinirito beĝene korana-iaĝiri, bene iaĝo mo, ĝaro ta, dabara variĝuna bevaĝa-ruĝaiani.

### Iesu rarana

<sup>11</sup>Senaĝi Keriso tu dagara namori ĝema-foforito ĝeri Rubu Veaĝa verena baregona. Ĝia tu farai rubuna barana e namo vedaureana nuĝana na eraka-toĝato. Dia tarimarima na ĝeragaiato farai rubuna, korana mo farai rubuna tu dia mai tanobara dagarana. <sup>12</sup>Keriso tu dia nanigosi o boromakau naturi rarari seĝukari ai mo rubu ai eraka-toĝato. Senaĝi ĝia tu ĝia rarana seĝukanai Veaĝa Lelevaĝi Gabuna nuĝanai vaĝa-sebona moĝo eraka-toĝato. Benamo ĝita eĝabivaĝi-moĝovaĝirato rakava ĝena seĝuka na. <sup>13</sup>Nanigosi ma boromakau rarari ema boromakau natuna variĝuna ĝe-gabuato kauna, Rubu Veaĝa vereri na vei-rakavai ĝemiroto-ĝoi tarimari iatari ai misimisiri ĝefiu-kaurito-ĝoi. Moĝesina ĝeveirito-ĝoi tu tarimarima tauĝaniri ĝevaĝa-veaĝarito-ĝoi Barau ĝoiranai. <sup>14</sup>Senaĝi Keriso rarana na moĝeri evanaĝirito. Korana ĝita nuĝara, mase ĝevaĝa-ĝoraiani ĝauveiri ĝerina, eiarevarato, maĝuri Barauna ĝena vetuĝunaĝi bitana iaĝo-vini ĝana. Keriso tu asi vetoukauna ta, tauĝena tanu-vanaĝivanaĝi laukana ĝenana evevinito Barau ĝenai.

<sup>15</sup>Ginitaĝo variĝuna nuĝanai Keriso tu Barau e tarimarima fakari ai eruĝani. Korana tu Barau na ekearito tarimari mabarari na ekiraĝi-toreato maĝuri vanaĝi-vanaĝina beĝene ĝabia. Moĝesi nai Keriso emaseto, tovtovona ginitaĝona nuĝanai tarimarima ĝevei-rakavato ĝeri rakava na bene ruĝa-vaĝiri ĝana.

<sup>16</sup>Tarima ta roĝosi bene mase nuĝanai, beurani bene guruĝa-fofori, bemaseni nai tu, natuna na ĝena farefare bene ĝabiri. Mo ura o guruĝa-fofori tu fefai betoreani ĝia ĝena kiraĝitore guruĝana. Natuna na mo farefare asi roĝo beĝabirini bene iaĝo mo, tamana ĝena mase tarimarima ĝoirari ai bevaĝa-moĝoniani vau. <sup>17</sup>Korana tu mo ura ĝetoreani fefana tu eguruĝa-foforini tarimana bemaseni vau ma ĝena seĝuka, a bema ĝia roĝo maĝuri tu, mo ura ĝetoreani fefana tu asi seĝukana. <sup>18</sup>Moĝesina nai ginitaĝo giniguinena maki rarana vau evaĝa-seĝukaiato-ĝoi. <sup>19</sup>Korana Mose na taravatu guruĝari mabarari tarimarima ĝeri evarifitu-ĝosiato-ĝoi murinai, boromakau naturi variĝuri e nanigosi rarari eĝabirito-ĝoi, benamo nanu ĝesi egiro-sebonarito-ĝoi. Moĝa murinai isopo legana vulu kakakakana na ĝebaruato dagarana mo rara ma nanunai efereiato-ĝoi. Benamo Mose na mo isopo legana ma vulunai rara tu taravatu bukana e tarimarima iatari ai efiu-kaurito-ĝoi. <sup>20</sup>Mose ekirato, “Mai rara tu ginitaĝo vaĝa-moĝonina dagarana Barau na ekiramito boĝono korana-iaĝia.” <sup>21</sup>Farai rubuna ema mo rubu nuĝanai toma-rakariĝo ai ĝeĝauvei-iaĝirito-ĝoi farefareri mabarari iatari ai veiĝa sebona eveiatio-ĝoi. Iatari ai rara misimisiri efiufiukauto-ĝoi. <sup>22</sup>Moĝoni, taravatu ekirani ilailanai, dori dagara mabarari tu rara na beĝe iarevani. Korana rara asi beriĝoni nai tu, vei-rakava tuĝamaĝi-fitoĝari maki asiĝina.

<sup>23</sup> Senaġina maiġeri mai tu guba dagarari iouiouri moġo maiġesi ġeiarevarini. A gubai korikoriri ġetanuni dagarari iareva-iaevvari ġana ginitaġo varevarena tu namona lelevaġi. Maiġeri ginitaġo varevareri evanaġirini. <sup>24</sup> Korana Keriso tu dia tarimarima na ġeveiato veaġa lelevaġi daiġutuna nuġanai eraka-toġato. Iesu tu guba korikorinai eraka-toġato. Ma maitoma tu ġita urarai Barau ġoiranai efoforini. Mo tarima na ġeveiato moġa tu gubai veaġa lelevaġi daiġutuna moġo ġevaġa-ilailaiato. <sup>25</sup> Rubu Veaġa verena baregona tu laġani tata nuġari ai Veaġa Lelevaġi Gabunai rara eġabi-toġato-ġoi. Keriso moġesina tu asi eveini. Ġia tu dia gubai eraka-toġato muri-nai vau vanaġivanaġi tauġena ginitaġo varevarenai eiaġoni, benamo Barau ġenai evevinini. <sup>26</sup> Moġesina tu tanobara evesinato na veġata bene midigumidigu. Senaġi mai tanobara magona eġabi-iaġoani, mainai vau vaġa-sebona moġo ema foroforo. Mo tu ginitaġo varevarenai evevaġa-iaġoto rakava bene ġabi-veġitari ġana. <sup>27</sup> Eve-toreto, tarimarima mabarari tu vaġa-sebona moġo beġe maseni, ma murinai tu Barau na bevaġa-kotarini. <sup>28</sup> Keriso kavana vaġa-sebona moġo ginitaġo dagarana eiaġoto, tarimarima mabarari ġeri rakava bene ġabi-veġitari ġana. Senaġi ġia tu ma bema-fofori ġenoġoini. Mo tu dia rakava ma benema ġabi-vaġiri ġana, senaġina deikara ġia ġenari-taġoani tarimari vaġa-maġuriri ġana.

### Ginitaġo guinena na rakava asi beġabi-veġitarini

**10** Mose ġena taravatu tu dagara namori vau beġe ġorani iouiouri moġo, dia dagara tauri korikori. Ġia na mo ginitaġo dagarari laġani laġani ġevinito-ġoi, senaġina mo ginitaġo dagarari na toma-rakariġo ġeiaġoto-ġoi tarimari asi evaġa-namo vedaurearito. <sup>2</sup> Bema mo ginitaġo dagarari na ġetoma rakariġoto-ġoi tarimari beġere vaġa-namo vedaureari nai tu, asi ma beġere ginitaġo-ġenoġoi. Korana ġia tu ġere iareva-moġovaġi, ema ma ġeri vei-rakava guineri mamiraġiri asi ma ġere ġabi-ġenoġoiri. <sup>3</sup> Senaġi mo ginitaġo veġari laġani tatai ġeveirito-ġoi veġari na tu mo laġani tata nuġari ai ġevei-rakavato-ġoi, moġeri ġekira-vararito-ġoi. <sup>4</sup> Korana tu boromakau e nanigosi rarari na rakava tu asi ilaila beġabi-veġitarini. <sup>5</sup> Moġa lorinai Keriso tanobara ġana eiaġomato nai tu ekirato,

“Ġoi tu ginitaġo dagarari vaġa-ilailana boromakau, mamoe, nanigosi ema varevare dagarari asi ourani,

senaġi tauġani ta ovei-toreato au ġegu.

<sup>6</sup> Karava na boromakau, mamoe, nanigosi eġararini,

ema vei-rakava bono ġabi-vaġiri ġana ginitaġo varevareri ġeveini ġeri ai maki asi oiakuni.

<sup>7</sup> Moġesi naima au akirato,

‘Barau o, au tu iniġegu,

Buka Veaġai tu au ġekiraġiguto, au baiaġoma tu ġoi ġemu ura bana veia ġana.”

<sup>8</sup> Keriso ġena guruġa giniginena tu maiġa, “Ġoi tu ginitaġo dagarari e varevare dagarari asi ourani. Karavai ġegaburini varevareri e vei-rakava bono ġabi-vaġiri ġana ginitaġo varevareri ġeveini maki asi oura-vinirini, ema ġeri ai asi oiakuni.” Maiġeri veġa tu taravatu na ekiraġirini ilailanai, senaġi ġoi na tu asi oiaku-iaġirini.

<sup>9</sup> Moġesi nai ma ekirato, “Barau o, au tu iniġegu, au baiaġoma tu ġoi ġemu ura veġana bana veia ġana.” Benamo ginitaġo veġana giniginena etore-veġitaiato, benamo moġa gabunai tu ta ma evaġa-ruġaiato. <sup>10</sup> Benamo Barau ġena ura lorinai,

Iesu Keriso tauḡanina ginitaḡo dagarana i evaḡa-iaḡoato vaḡa-sebona moḡo. Benamo monana ḡita evaḡa-veaḡarato.

<sup>11</sup> Rubu Veaḡa vereri mabarari ḡaro vanaḡivanaḡi tata ḡeruḡa-tarito-ḡoi, benamo mo ginitaḡo ḡauveiri ḡevairito-ḡoi. Senaḡi ḡeri ginitaḡo dagarari tu dagara sebori moḡo ḡevinito-ḡoi vanaḡivanaḡi. Ema mo ginitaḡo dagarari na rakava tu asi ḡeḡabi-veḡitarito-ḡoi. <sup>12</sup> Senaḡi Keriso na rakava ḡabivaḡiri ḡana tu ginitaḡo sebona moḡo eveiato ḡaro mabarari ḡana. Benamo moḡa murinai Barau ḡimana aroribanai ea tanu-tarito. <sup>13</sup> Mo negai beiaḡoma maitoma tu evenarini, beiaḡoni mo, ḡia ḡevetari-viniani tarimari mabarari Barau na ḡia kwakuna fanakauna dagarana i betoretaririni. <sup>14</sup> Korana ginitaḡo dagarana sebona na moḡo evaḡa-veaḡarito tarimari evaḡa-namo vedaurearito. Ma ḡia tu namo vedaurea beḡe tanuni, vanaḡivanaḡi.

<sup>15</sup> Iauka Veaḡa na maki evaḡa-ribarani. Guine tu ekirato,

<sup>16</sup> “Vereḡauka ekirani,

‘Moḡeri ḡaro muriri ai,

au ḡia ḡeri tu mai ginitaḡo baveiani.

Au ḡegu taravatu ḡia nuḡari ai batore-toḡarini,

ema ḡia debari ai baberarini.”

<sup>17</sup> Ema ma ekirato,

“Ḳia ḡeri vei-rakava e veiḡa ḡeḡevaḡeḡevari asi ma batuḡamaḡi-ḡenoḡoirini.”

<sup>18</sup> Maiḡeri etuḡamaḡi-fitoḡarito nai tu, rakava ḡabi-veḡitari ḡana varevare dagarana ta tu asiḡina maia.

### **Barau sevina ḡana siraka-kavi ma tuḡamaḡi kokorera ḡesi**

<sup>19</sup> Moḡa lorinai, tarikakagu, ḡita tu nuḡara gwaḡiḡi Iesu rarana ḡenana Veaḡa Lele-vaḡi Gabunai bita raka-toḡani. <sup>20</sup> Mo vekouḡau dabuḡana o ketin evedare-kikimato, monana Keriso na ḡita ḡera maḡuri dabarana variḡuna ekeo-fakaiato. Mo vekouḡau dabuḡana tu Keriso tauḡanina. <sup>21</sup> Ḳita tu ma ḡera Rubu Veaḡa verena baregona, Barau ḡena numa eḡita-taḡoani. <sup>22</sup> Ḳita nuḡara tu eiarevarito rakava mamiraḡiri ḡerina, ema tauḡanira maki nanu namo vedaureana na eḡuriḡirito. Moḡesi naima Barau ḡenai siraka-kavinaḡi nuḡara ma moḡoniri ḡesi e ma ḡera veḡabidadama korikoriri ḡesi. <sup>23</sup> Ḳera tuḡamaḡikau tavaḡa-moḡoniani dagarana ḡenai tana veḡabi-gigitari, asi tana ḡareva-ḡareva. Korana Barau na kara ekiraḡi-toreato tu beveiani. <sup>24</sup> Ema karora bitana tuḡamaḡiri kamasi tata bita vaḡa-kavarini, benamo beḡe veura-vinini, ema ḡauvei namori beḡe veini. <sup>25</sup> Ḳita ḡera raka-vegogo ai bitana fofori-ḡoi, asi bitana tanu, tari ḡeveini kavana. Senaḡi karora ḡesi velaunaḡi bitana vaḡa-baregoa. Korana tu tauḡemi na varau ḡoḡitaiani, Keriso ḡena iaḡoma ḡarona tu mai ekavinaḡi-rakavani.

<sup>26</sup> Bema guruḡa moḡonina taribaiani murinai, ma taḡiḡiraḡeni, benamo tavei-rakavani nai tu, bitana riba, rakava ḡabi-veḡitari ḡana, ginitaḡo dagarana ta tu asiḡina maia. <sup>27</sup> Senaḡi ma garira ḡesi kara ḡoirai ḡerai beḡorani, moḡa moḡo bitana nari-taḡoa. Mo tu Barau ḡena Kota Baregona, ema Barau ḡevetari-viniani tarimari e iaukari beḡararini karavana. <sup>28</sup> Tarima ta na Mose ḡena taravatu asi ekorana-iaḡiato-ḡoi, benamo ḡeḡita-kauato-ḡoi tarimari ruarua o toitoi na ḡekiraḡi-foforiato-ḡoi. Mo tarima tu ḡevaḡi-maseato-ḡoi, asi ḡevetuḡa-ḡwaiato-ḡoi. <sup>29</sup> Ḳomi ḡotuḡamaḡini, Barau Natuna deikara na kwakuna fanakauna dagarana i evaḡa-iaḡoani tarimana tu kamasi? Mai tarima tu rakava voina baregona beḡabiani. Ḳia na tu mo ginitaḡo rarana,



ġia evaġa-veaġaiato dagarana, asi veaġa raranai evaġa-iaġoani. Ema varevare-bara laukana ġenai maki veiġa rakava kwaikwaina eveiani. <sup>30</sup> Korana ġita ma ribara Barau ekirato, “Rakava voina tu au na bavaġa-voiani, au na bavini-ġenoġoiani.” Ema ma ekirato, “Vereġauka na ġena tarimarima beġita-viriġirini.” <sup>31</sup> Maġuri Barauna ġimanai boketo-raġeni tu garina maki asikeikeina.

<sup>32</sup> Ġaro guineri ġotuġamaġi-ġenoġoiri. Barau ġena mama ġoġabiato murinai, midigumidigu barego ġodoġarito, senaġi ġoruġa-gigitarito. <sup>33</sup> Negatari ai tu ġutuma bara ġoirari ai ġevaġa-maiakamito-ġoi, ma ġevaġa-midigu midigumito-ġoi. Ema negatari ai tu ġomi kavana ġevaġa-midigu midigurito-ġoi tarimari seviri ai ġoruġatarito-ġoi, ġoruġa-duku dukurito-ġoi. <sup>34</sup> Gediburarito tarimari ġesi ġomidigumidigu sebonato-ġoi, ema ġemi farefare ġeverarimito-ġoi maki ġoiaku-iaġirito-ġoi moġo. Korana ma ribami, ġomi tu ma ġemi farefare namori, beġe tanu-vanaġi vanaġini dagarari.

<sup>35</sup> Moġa lorinai ġemi tuġamaġi kokore maniġa asi boġono fitoġari. Korana maniġa voina tu barego lelevaġina boġoa ġabiani. <sup>36</sup> Boġono vevaġa-gwaġiġi, korana Barau ġena ura veiġana boġo vaġa-koriani murinai tu, kara ekiraġi-toreato mabarana boġo ġabiani. <sup>37</sup> Korana Buka Veaġa ekirani,

“Nega tu misina moġo,

ma beiaġomani etoni tarimana tu beiaġomani, asi bekwaiboni.

<sup>38</sup> Au ġegu vei-iobukaiobuka tarimana tu ġena veġabidadama lorinai bemaġurini.

Senaġi murina ġana ma beraka-ġenoġoini nai,

au tu asi baiakuni ġia ġenai.”

<sup>39</sup> Senaġi ġita tu murira ġana asi ma bita raka-ġenoġoini, benamo bita rekwarekwani. Asiġina, ġita tu ma ġera veġabidadama, be maġuri bita ġabiani.

### Veġabidadama tarimari

**11** Veġabidadama anina tu mai-ġesi. Tatuġamaġi-dadamaġirini dagarari tavaġa-moġoni korikoririni. Matarai roġosi bitana ġitari, senaġina tavaġa-moġoni korikoririni, moġeri dagara tu moġoni ema bita ġabirini. <sup>2</sup> Sene tarimari tu ġeri veġabidadama lorinai, Barau na eġabi-raġerito.

<sup>3</sup> Taveġabidadamani lorinai taribani, Barau eguruġato, benamo guba e tanobara evetoreto. Moġa lorinai mai taġitarini dagarari tu Barau na asi taġitarini dagarari ġerina eveirito.

<sup>4</sup> Abela tu ma ġena veġabidadama Barau ġenai lorinai, Barau eviniato varevare dagarana na Kaino ġena varevare dagarana evanaġiato. E ma ġena veġabidadama lorinai, Barau na ġena varevare dagarana ekiraġiato varevare namona ema Barau na evaġa-moġoniatu ġia tu vei-iobukaiobuka tarimana. Ma Abela tu varau emaseto, senaġina ġena veġabidadama lorinai roġo eguruġani.

### Abela, Enoka, Noa

<sup>5</sup> Enoka ma ġena veġabidadama lorinai, Barau na eġabi-varaġeato moġo, asi emaseto. Ma tarimarima na maki asi ġedoġariato, korana Barau na eġabi-vaġiato. Roġosi bene ġabi-veġitaia nuġanai, Barau ġena bukai ekirani, Enoka na Barau iauna evaġa-iakuato. <sup>6</sup> Asi ġena veġabidadama tarimana na Barau tu asiġina ġinavaġi bevaġa-iakuani. Korana deikara Barau ġenai eiaġomani tarimana tu bene vaġa-

moĝoni Barau tu maĝuri etanuni. Ema Barau ĝevetauani tarimari mabarari tu voiri namori Barau na bevinirini.

<sup>7</sup>Noa ma ĝena veĝabidadama lorinai, Barau na ĝoirai beĝe ĝorani dagarari ekira-toreĝauato. Mo tu Noa na roĝosi bene ĝitari dagarari. Noa na Barau evaĝa-moĝoniato, benamo ma garina ĝesi bouti ta eragaiato, ĝaraĝona e natuna bene vaĝa-maĝuriri ĝana. Ĝia ĝena veĝabidadama na tanobara tarimari ekiraĝi-foforirini rakava tarimari. Ma ĝia tu ĝena veĝabidadama lorinai Barau na ekiraiato vei-iobukaiobuka tarimana. Mai vei-iobukaiobuka tu veĝabidadama ĝenana eiaĝomani dagarana.

### Aberhamo

<sup>8</sup>Aberhamo ma ĝena veĝabidadama lorinai, Barau na ekeaiato nai eseĝaĝiato. Barau na ekeaiato tu ĝena vanuĝa bene raga-kwanea, ma Barau na tanobara ta ma beviniani, mo ĝana bene iaĝo. Benamo Aberhamo eraka-rosito moĝo, asi ribana aiĝana eiaĝoni senaĝi eiaĝoto moĝo. <sup>9</sup>Ma ĝena veĝabidadama lorinai, Barau na ekiraĝi-toreato tanobaranai ea vanuĝato. Ma monai tu noĝa moĝo tanukau tarimana ta tanobara borunai etanuni kavana. Isako e Iakobo kavana farai numari ai ĝetanuto-ĝoi. Maiĝeri tarima toitoi tu Barau ĝena kiraĝitore ĝeĝabiato. <sup>10</sup>Korana Aberhamo tu vanuĝa baregona evaĝa-nogaiato-ĝoi. Mo vanuĝa tu fore baregona iatanai beruĝakauni. Mo vanuĝa tu Barau tauĝena na beboioĝaiani e beragaiani.

<sup>11</sup>Veĝabidadama lorinai Sara na kokore eĝabiato bene ĝabi ĝana, ema eĝaukarakavato, senaĝi mero keina evaĝa-maĝuriato. Ĝia ma ribana, Barau na kara ekiraĝi-toreato dagarana tu beĝorani. <sup>12</sup>Benamo mai tarima sebona eĝaukarakavato, senaĝi ĝia ĝenana senena ĝemaĝurito tu guba visiguri kavana vovoka tabutabu, ema kone mirina kavana asi iavi-iavina.

<sup>13</sup>Maiĝeri tarimarima mabarari tu veĝabidadamai ĝetanuto-ĝoi nuĝanai ĝemaseto. Barau na ekiraĝi-torerito dagarari ĝia na tu asi ĝeĝabito, senaĝi manaĝai moĝo ĝeĝita-guinerito, benamo ĝeĝabi-raĝerito. Ema ĝeguruĝa-foforito ĝia tu tanobara boruna tarimari. Ĝia mai tanobarai tu ĝetanukauni moĝo. <sup>14</sup>Moĝesina ĝeguruĝani tarimari tu ĝeri guruĝa na ĝevaĝa-foforirini, ĝia tu ĝeri tanobara korikorina ĝevetauani. <sup>15</sup>Bema ĝeraga-kwaneato tanobarana ĝere tuĝamaĝi-ĝenoĝoia nai tu, ma dabara ĝere ĝenoĝoi. <sup>16</sup>Senaĝi ĝia tu tanobara namo vedaureana ĝeuravini-rakavaiato-ĝoi. Mo tu gubai etanuni dagarana. Moĝa lorinai Barau tu asi emaiakaini, ĝia ĝeri Barau ĝetoni nai, korana Barau na ĝeri vanuĝa baregona ta eragatoreato.

<sup>17</sup>Aberhamo tu ma ĝena veĝabidadama. Moĝesina nai Barau na etovonaĝiato nai tu, natuna Isako ginitaĝo dagarana evaĝa-iaĝoato, benamo Barau ma evarevareviniato. Aberhamo ribana, Barau na kiraĝitore tu ĝia eviniato, senaĝina ĝia natuna sebona kwariĝutu moĝo tu ginitaĝo dagarana ĝana bene vaĝia etato. <sup>18</sup>Barau na Aberhamo maki maiĝesina ekiraiato, ekirato, “Isako ĝenana moĝo ĝoi senemu beĝe maĝurini.” <sup>19</sup>Aberhamo etuĝamaĝito tu Barau na Isako ma bevaĝa-maĝuri ĝenoĝoiani riba. Moĝesina naima iniĝesina ma sikiraĝia: Aberhamo na Isako mase na eĝabi-ĝenoĝoiato.

### Isako, Iakobo, Iosefa

<sup>20</sup> Isako ma ġena veġabidadama lorinai, Iakobo e Esau evaġa-namorito, ema ġeri ai vau beġea ġorani dagarari ekiraġirito.

<sup>21</sup> Iakobo ma ġena veġabidadama lorinai, dori emaseto-ġoi nuġanai tu Iosefa natuna ruarua evaġa-namorito, ema ġena togoi ġenai eveġabi-ritoġoto, benamo Barau etoma-rakarigo viniato.

<sup>22</sup> Iosefa ma ġena veġabidadama lorinai, eġauka-dorudoruto, dori emaseto-ġoi nuġanai tu, Isaraela tarimari Aigupito na beġe raka-vaġini ekiraġiato, ema turiġana kamasi beġene veia guruġana evinirito.

### Mose

<sup>23</sup> Mose tamana e sinana Barau ġenai tu ma ġeri veġabidadama. Moġa lorinai Mose emaġurito ġaronai ġeġitaiato mero keina namona korikori, benamo kini ġena guruġa garina tu asi ġeveito. Senaġi tamana e sinana na ġeġabiato, benamo numa nuġanai ġue toitoi ġetore-gumuato.

<sup>24</sup> Mose ma ġena veġabidadama lorinai, ebaregoto nai tu asi eurato beġene kira, ġia tu Pharaon natuna ġuiatona natuna merona. <sup>25</sup> Ġia tauġena eurato, Barau ġena tarimarima ġesi beġene vaġa-midigumidigu sebonaia. Ma asi eurato, vei-rakava nuġanai asi beġe tanu-maukani verereri ai bene tanu-namo. <sup>26</sup> Ġia na etuġamaġiato tu, Keriso uranai beġe vaġa-maiakaiani voina tu barego lelevaġi, Aigupito ai farefare voini bevanaġirini. Korana ġia tu eboġeguine-iaġoto, ġoirai voina eġita-iaġoato.

<sup>27</sup> Mose ma ġena veġabidadama lorinai, Aigupito na eraka-veġitato, Aigupito verena bebaruni garina asi egarito. Ġia tu ekokoreto, korana tu asi taġitaiani Barauna ġia na tu matana na noġa moġo eġitaiato. <sup>28</sup> Ma ġena veġabidadama lorinai, Rubu Veaġa verekona ekorana-iaġiato ema Isaraela tarimari ekirarito, rara ġeri ġatama-boka koberi murikari ai beġene dau. Benamo mase aneruna na naturi, ġemaġuri-guinetto merori, asi bene vaġiri.

### Isaraela tarimari na Barau ġeġabidadama-viniato

<sup>29</sup> Isaraela tarimari na Barau ġeġabidadama-viniato lorinai, Davara Kakakakana nuġana na tanobara kaukauna na noġa moġo ġeraka-vanaġito. Ma Aigupito tarimari maki ġevanaġi ġetato nai tu, davara na eġutu-ġaurito.

<sup>30</sup> Isaraela tarimari ma ġeri veġabidadama lorinai, Ieriko vanuġa maġuna ġaro vaġa-imaima ruarua (7) ġeraka-ġeġeraġiato murinai eketoto.

<sup>31</sup> Mata-boraġa ġuiatona Rahaba Barau ġenai eveġabidadamato lorinai, Isaraela ġeri maramara tarimari eġabi-raġerito, benamo Barau ġeseġafore-viniato-ġoi tarimari ġesi asi ġevaġi-sebonaia.

<sup>32</sup> Ma kara ma bakiraġiani? Asi ġegu taimi Gideona, Barak, Samson, Iefeta, Davida, Samuela ema peroveta tarimari variri bakiraġirini. <sup>33</sup> Ġia tu ma ġeri veġabidadama lorinai, tanobara basileiari ġevetari-vinirito nai, ġekokoreto-ġoi. Veġa iobukaiobukari ġeveito-ġoi, ema kiraġitore dagarari ġeġabirito laion bokari ġekou-ġaurito. <sup>34</sup> Karava seġuka rakava ema-moreni ġevei-buserito, ema vetari baġari matari na ġeraga-maġurito. Ġeri moiramoiri nuġari ai ġekokoreto; vetari ai tu guruġari maki seġuka rakava, ema ġevetari-vinirito-ġoi doġorori ġevaġa-ketorito-ġoi. <sup>35</sup> Ġemaseto-ġoi tarimari ma ġevaġa-maġuri ġenoġoirito-ġoi, benamo sinari

na ma gēgabi-ḡenoḡoirito-ḡoi. Ma tari tu dibura numai tauḡaniri ḡekwari-rakava kwaikwairito-ḡoi ma dori ḡemaseto-ḡoi, senaḡi asi ḡeurato-ḡoi Barau beḡene kira-ḡuniḡaua, benamo dibura numana na beḡene ruḡa-vaḡiri. Korana ḡeri ura tu vaḡa-variḡisi ḡenoḡoi namona beḡene ḡabia.

<sup>36</sup>Ma tari tu ḡevaseva-vaseva iaḡirito-ḡoi, ḡekwaririto-ḡoi, ma tari tu seini na ḡebarurito-ḡoi, benamo dibura numanai ḡetorerito-ḡoi. <sup>37</sup>Fore na ḡetakirito-ḡoi; ma tari tu ḡeso-ḡuturito-ḡoi; ma tari tu vetari baḡari na ḡevaḡirito-ḡoi. Mamoe kefiru e nanigosi kefiru ḡevei-rakaoto-ḡoi, asi ḡeri-ḡari, ḡevaḡa-midigu midigurito-ḡoi, ema tarimarima na veḡa asi namori ḡeri ai ḡevei-vinirito-ḡoi. <sup>38</sup>Tanobara ḡia ḡeri ai tu asi namo moḡo. Tanobara fakari na e ḡoro tuḡuri na, tano kouḡari na, ema guri na ḡetanu-rakaoto-ḡoi.

<sup>39</sup>Maiḡeri tarimarima mabarari ḡeri veḡabidadama loriri ai, Barau na evaḡa-maḡuririto. Senaḡina ta na Barau na ekiraḡi-toreato dagarana ta tu asi eḡabiato. <sup>40</sup>Korana Barau na dabara namona ta ḡita ḡera eboioḡaiato. ḡia ḡena ura ḡia maki ḡita ḡesi vaḡa-sebo vau bene vaḡa-namo vedaureara.

**12** Mo veḡabidadama tarimari, ḡita ḡeḡita-taḡorani tarimari, tu ḡutuma lelevaḡi, magube na noḡa moḡo beḡe ḡeḡeraḡira. Moḡa lorinai ḡita ḡekoukou-ḡaurani dagarari, ema vei-rakava ḡita ḡebarubaru-tarirani dagarari mabarari sifitoḡari. Benamo ma kokorera ḡesi ḡoirarai Barau na etoreato raga-iruirunai siraga. <sup>2</sup>Matara Iesu ḡenai sitore-kauri. Korana Iesu na ḡita ḡera veḡabidadama esinaiato, ema bevaḡa-ḡuḡuruani. ḡia na ḡoiranai mo iaku e verere etuḡamaḡiatio nai, satauro maiakana asi etuḡamaḡiatio. Benamo Barau ḡena terona aroribanai etanu-tarito.

<sup>3</sup>Iesu situḡamaḡia. ḡia tu vei-rakava tarimari na asi ḡeḡabi-raḡeato, ḡeseḡaforeviniato, senaḡina ekokoreto. Moḡa lorinai asi boḡono tuḡamaḡi-moira, e asi boḡono ruḡa-ḡuirraḡi. <sup>4</sup>Gomi tu rakava ḡesi ḡovevaḡi-tanuni. Senaḡina ḡomi mani vevaḡi nuḡanai tu, ta raramu roḡosi roḡo bere riḡo. <sup>5</sup>Ema ḡomi tu Barau na ekeamito ḡia natuna, senaḡi mai velaunaḡi guruḡana tu ḡotuḡarekwaiato, ekirato, “Natugu, Vereḡauka na vevaḡa-riba veḡari gwaḡiḡiri evinimuni nai, asi bono ḡabi-meraḡari, ema bekira-feimuni nai, nuḡamu asi bono vaḡa-moiraia.

<sup>6</sup>Korana Vereḡauka na eura-vinirini tarimari tu vevaḡa-riba gwaḡiḡiri evinirini, ema ḡia natunai evaḡa-iaḡorini tarimari mabarari tu ekwaririni.”

<sup>7</sup>Moḡa lorinai matakani veḡari ḡemi ai beḡe ḡorani nai tu boḡono kokore. Korana ḡomi tu Barau natuna naima moḡesina eveimini. Ma siḡitaia, kamara mero keina tu tamana na asi evaḡa-matakaniani? <sup>8</sup>Tama mabarari na naturi ḡevaḡa-matakanirini. Ma bema ḡomi Barau na asi evaḡa-matakanimini, moḡa anina ḡomi tu dia Barau natuna korikori, ḡomi tu gara meromi. <sup>9</sup>Vaḡa-ilailana tauḡani rekenai ḡita tamara korikoriri na ḡevaḡa-matakanirani, benamo moḡeri korari ai tamara taḡubakaurini. Moḡesina kavana namona tu ḡita tata iaukara Tamari Barau maki tana gubakaua, benamo bitana maḡuri. <sup>10</sup>ḡita tamara na tu ḡaro kotunai moḡo ḡevaḡa-matakanirani. Mo tu ḡia tauḡeri na ḡetuḡamaḡiani namo ḡetoni ḡarori ai moḡo. Senaḡi Barau na evaḡa-matakanirani tu ḡita ḡera namo ḡana, ema ḡia ḡesi bitana vevaḡa-vegogo ḡana. <sup>11</sup>Maitoma matakani veḡari ḡeiaḡomani tu ma midigumidiguri, asi iakuri. Senaḡina murinai vau mo matakani veḡari ḡerina beribani tarimana tu vei-iobukaiobuka ema maino tarimanai beiaḡoni.

### Nuğara bitana vağa-kokoreri ema bitana ruğa-gigitari

<sup>12</sup> Moğa lorinai ġimami beġe ġeroġero-riġo, ġoġabi-vaisiri, ema tuimi beġe moira ġeġoġo-ġoġorini, ġovaġa-kokoreri. <sup>13</sup> Benamo kwakumi na ġoraka-iaġirini fanari ġovei-oroġotori, be kwaku rakava tarimana kwakuna asi bene rakava-lelevaġi, senaġi bene namo.

<sup>14</sup> Boġono kokore-korikori, tarimarima mabarari ġesi maino ai boġono tanu uranai. Be ġemi maġuri beġene veaġa e asi vetoukaunai beġene iaġo bene. Korana tu ma vetoukauna e asi veaġa tarimana na Vereġauka tu asi beġitaiani. <sup>15</sup> Boġono venari, be tarima ta Barau ġena varevare-bara ġenana asi bene raka-veġita, ma nuġa-ġirima ġokana nuġanai asi bene tubu-raġe. Korana nuġa-ġirima ġokana betubuni, ġokana mamakina na ġomi fakami ai rakava bevaġa-ġoraiani, benamo tarimarima vovoka bevaġa-rakavarini Barau ġoiranai. <sup>16</sup> Boġono ġitaia, ta ġomi fakami ai mata-boraġa veiġari asi bene veiri, ema Esau na Barau asi ekorana-iaġiato kavana asi bene vei. Esau na tu ġena maġuri guine seġukana ġaniġani diġu sebona moġo uranai evare-fitoġaiato. <sup>17</sup> Moġa murinai ġomi ma ribami, mo maġuri guine vevaġa-namona tamana ġenana neġabia etato tu tamana na asi eġabi-raġeato. Moġoni, tamana ma taġina ġesi enoġiato, senaġi tamana asi ma etuġamaġi-ġenoġoito.

<sup>18</sup> Ġomi tu dia ġimami na boġo ġabi-karaiani ġorona ġana boġo iaġoma, Isaraela tarimari kavana. Ġia tu Sinai Ġorona sevina korikorinai ġeruġato, benamo karava emoreto ġeġitaiao, ema mukuna dubara kiukiuna e iavara barego lelevaġina; <sup>19</sup> ema kibi guruna asikeikeina eraġeto e garo baregona eguruġato ġeseġaġirito. Isaraela tarimari na mo garo ġeseġaġiato nai tu, Mose ġenoġiato mo garo na asi ma bene vaġa-guruġari. <sup>20</sup> Korana Barau na taravatu guruġari evinirito nai tu, ġegari-rakavato, Barau tu ekirato, “Bema tarima ta na o boromakau ta o nanigosi ta na mo ġoro bea vei-karaiani nai tu, fore na boġono taki-masea.” <sup>21</sup> Moġeri vetoġa ġe-foforito gariri tu asikeikeiri, benamo Mose ekirato, “Au tu eġoġo-ġoġoguni, agari-rakava rakavani.”

<sup>22</sup> Senaġina ġomi tu Siona Ġorona ġana boġo iaġoma e guba Ierusalemna maġuri Barauna ġena vanuġa baregona ġana, ema aneru ġutuma gorogoro asi iavi-iaviri ġeri ai boġo iaġoma. <sup>23</sup> Gomi tu vegogo baregona ġena e Barau natuna ġemaġuri-ġuineto ekalesiari ġeri ai boġo iaġoma. Ġia arari tu Barau na gubai etorerito. Ema ġomi tu tarimarima mabarari Kotai beġita-viriġirini Barauna ġenai e vei-iobukaiobuka tarimari iaukari, Barau na evaġa-namo vedaurearito iaukari, ġeri ai boġo iaġoma. <sup>24</sup> Ema Iesu ġenai boġo iaġoma. Iesu ġinitaġo variġunai tu Barau e tarimarima fakari ai eruġani. Ema ġia rarana ġenai boġo iaġoma. Iesu rarana tu ġomi ġemi ai eketokauto. Ma Iesu rarana na ekiraġiani guruġana seġukana na Abela rarana ġena guruġa seġukana evanaġiani.

<sup>25</sup> Boġono venari, Barau na evaġa-guruġamini nai, garona asi boġono kira-sirivaġi-vinia. Korana tanobarai Barau na ekira-toreġaurito tarimari ġekira-sirivaġito nai tu, asi ġeraga-maġurito. Ġeri kira-sirivaġi voina ġeġabiato. Ġita tu kamasi bita raga-maġurini? Barau toma tu gubai etanuni, benamo monana ġita ekira-toreġaurani. Bema ġia ġenana bita raka-veġitani nai tu, kamasi bita raga-maġurini. <sup>26</sup> Moġeri ġaro ai Barau garona na tanobara eruku-iaġaiaġaiao. Senaġina toma Barau tu eguruġa-toreto, ekirani, “Au na tanobara vaġa-sebona maia barukuani. Dia tanobara ġereġana moġo barukuani, senaġina guba maki barukuani.” <sup>27</sup> Mai guruġa “vaġa-

sebona maia” anina tu, guinenai Barau na eveirito dagarari beġe iagaiagani nai tu bekoki-veġitarini. Korana tu asi beġe iagaiagani dagarari moġo beġene tanu ġana.

<sup>28</sup> Ġita na taġabiani basileiana tu asi beġareva-ġarevani. Moġa lorinai Barau sitanikiu-vinia, ema Barau na eura-viniani maġurinai sitoma-rakariġo vinia ma veg-ubakaura e ma garira ġesi. <sup>29</sup> Korana ġita ġera Barau tu karava ġaraġara.

### Barau vaġa-iakuna veiġari

**13** Ġomi fakami ai tarikaka veuravinina bene tanu-vanaġi vanaġi. <sup>2</sup> Tarima boruri ġabiraġeri asi boġono tuġa-rekwaia, korana tarima tari maniġesi ġeveito-ġoi nai tu, aneru ġeġabi-raġerito. Senaġi ġia tu asi ġeriba-maoroto mo tu aneru ġeġabi-raġerini.

<sup>3</sup> Dibura numanai ġetanuni tarimari boġono tuġamaġiri. Boġono tuġamaġi, ġomi maki ġia ġesi dibura numanai ġoro tanu-vegogo. Ema ġevaġa-midigu midig-urini tarimari boġono tuġamaġiri. Boġono tuġamaġi ġomi maki ġere vaġa-midigu midigumi.

<sup>4</sup> Tarimarima mabarari na veġaraġo beġene gubakaua, ema veġaraġo tarimari ġeri genagena gabuna bene namo-vedaurea. Korana ma ġaraġona, senaġina ekimara-kakaoni, o ma eveġaraġo-sirivaġini tarimana, ema mata-boraġa veiġari ġeveini tarimari mabarari tu Barau na ġeri rakava voiri bevinirini.

<sup>5</sup> Moni asi boġono uravini-lelevaġiri. Kara dagara ġemi ai maniġeri boġono ġabiraġeri ma iakumi ġesi. Boġono kira, mai dagara ġemai maiġeri tu ġemai ilaila. Korana Barau tu ekirato,

“Au na asiġina ġinavaġi baraga-kwanemini,  
ema ġereġami asiġina ġinavaġi baiaġuimini.”

<sup>6</sup> Moġa lorinai nuġara ma kokoreri ġesi bitana kira,

“Vereġauka na au bevaġa-kavaguni,

be au asi bagarini.

Tarimarima na tu kara beġe veiani au ġegu ai?”

<sup>7</sup> Gotuġamaġi-ġenoġoi, ġeguine-iaġimito-ġoi tarimari ġotuġamaġiri. Ġia na Barau ġena guruġa ġemi ġekiraġito. Ġia ġeri maġuri na kara ġefoforito eiaġoto mo ġea maseto boġono tuġamaġiri, ema ġia ġeri veġabidadama boġono tovtovori.

<sup>8</sup> Iesu Keriso tu ġoraġani, toma, ema vanaġivanaġi asi beirauni. <sup>9</sup> Vevaġa-riba irauirauri na dabara moġonina na asi beġene ġori-veġitami. Namona tu Barau ġena varevare-bara na ġita iaukara bene vaġa-kokoreri. Ganiġani taravaturi irauirauri na ġita iaukara tu asi beġe vaġa-kokorerini. Moġeri taravatu ġekorana-iaġirito-ġoi tarimari tu namo ta asi ġeġoitaġoato.

<sup>10</sup> Ġita tu ma ġera fata veaġana. Senaġina Barau toma-rakariġona ġana farai rubuna nuġanai ġinitaġo ġauveiri ġeveito-ġoi tarimari tu mai fatai asi beġe ġaniġanini. <sup>11</sup> Rubu Veaġa verena baregona na boromakau, nanigosi, mamoe evaġirito-ġoi nai, tauġaniri tu eġabi-rosirito-ġoi Isaraela tarimari ġeri totoġa gabuna na, benamo murikai vau ea gaburito-ġoi. Rarari moġo Veaġa Lelevaġi Gabunai eġabi-toġarito-ġoi, rakava ġabiveġitari varevarena bene vei-iaġiri ġana. <sup>12</sup> Moġesina naima Iesu maki rarana na tarimarima bene vaġa-veaġari ġana tu, Ieruselema vanuġa barana maġuna murikanai emidigu-midiguto. <sup>13</sup> Moġa lorinai ġita maki Iesu ġenai totoġa murikana ġana siraka-rosi. Be, ġia na eġabiato maiakana ġita na maki bitana ġabia. <sup>14</sup> Korana mainai ġita tu asi ġera tanu-vanaġivanaġi vanuġana. A ġita

tu vanuḡa vau ma beiaḡomani dagarana tavetauani. <sup>15</sup> Moḡa lorinai vanaḡivanaḡi Barau vonevone-raḡena varevareri Iesu ḡenana bitana vini-raḡea Barau ḡenai. Barau arana vonevone-raḡena tu ḡita murura ḡwaḡwana. <sup>16</sup> Veiḡa namori veiveiri asi boḡono tuḡa-rekwari, ema ḡemi ai guruḡa moḡoniri maniḡeri karomi ḡeri maki boḡono kiraḡi. Korana tu maniḡesina veiḡari tu ginitaḡo dagarari namori Barau na eiaku-iaḡirini.

<sup>17</sup> Geḡuine-iaḡimini tarimari garori boḡono seḡaḡiri, ema ḡeri veḡorikau maorona gaburenai boḡono tanu. Korana ḡia na tu ḡomi ḡemi maḡuri ḡeḡita-ḡaurini, ema ḡomi ḡemi maḡuri aiḡesina Barau ḡenai beḡea kiraḡirini. Garori boḡono seḡaḡiri, be ma iakuri ḡesi ḡeri ḡauvei beḡene veia, a dia nuḡari ma metori ḡesi. Korana bema nuḡari ma metori ḡesi ḡomi beḡe narimini nai tu, ḡomi na namo ta asi boḡo doḡariani.

<sup>18</sup> Ḡema boḡono ḡuriḡuri. Ḡai ribama ḡai nuḡama tu veiareva Barau ḡoiranai, ema ḡema ura barana tu vegubakau ai moḡo baḡana tanu. <sup>19</sup> Ḡegu noḡinoḡi barego lelevaḡina ḡomi ḡemi ai tu boḡono ḡauḡau, be ḡemi ai ma bana ḡenoḡoi-ḡariḡari.

<sup>20</sup> Maino Barauna na ḡera Vereḡauka Iesu tu betanu-vanaḡi vanaḡini ginitaḡo rarana ḡenana ma evaḡa-maḡuri ḡenoḡoiato. Iesu tu mamoe nari tarimana baregona.

<sup>21</sup> Mai maino Barauna na dagara namori mabarari bene vinimi, ḡena ura boḡono veia ḡana. Ema kara ḡia na eiaku-iaḡirini dagarari Iesu Keriso ḡenana ḡita nuḡarai bene ḡauvei-iaḡiri. Mareva baregona tu ḡia ḡena bene iaḡo mo vanaḡivanaḡi. Amen.

<sup>22</sup> Tarikakagu mabarami, anoḡimini, ḡegu vevaḡa-naḡi guruḡari maiḡeri boḡono ḡabi-raḡeri ma nuḡami namori ḡesi; korana fefa tu kubina moḡo batorea. <sup>23</sup> Au aurani navaḡa-ribami, ḡita tarikakara Timoteo tu dibura numana na beḡe tuḡu-vaḡia. Bema ḡia bema raḡasi-ḡarimoḡini tu, tauma ruarua baḡa iaḡosini ḡitaḡitami.

<sup>24</sup> Ḡema vevaḡa-namo ḡemi veḡorikau tarimari ema Barau ḡena tarimarima veaḡari mabarari boḡono viniri. Itali tarimari na maki ḡemi vevaḡa-namo beḡe tuḡu.

<sup>25</sup> Barau ḡena namo e varevare-bara mabarami ḡemi ai bene tanu.

## IAKOBO (O IAMES) ĠENA TORETTORE

Iakobo (o Iames) vaġa-foforina guruġari

Mai fefa tu Iakobo (o Iames), Iesu tarina, na etoreato. Ġia tu Ierusalemia ekalesia ġorikauna tarimana ta. Mai fefa etoreato laġanina tu 45 ma 49 fakari nuġanai ta, mo tu Iesu emaseto murinai.

Mai fefa etoreato korana tu, 1) Heberu ekalesiari veribaġani ema meto baregori ġeġoitaġoto-ġoi nai, nuġari bene vaġa-gwaġiġiri etato; 2) Heberu ekalesiari vefakari ai tu veiġa ema maġuri asi roroġotori tari ġeġorato-ġoi, naima moġeri bene vei-roroġotori ġana uranai; 3) Heberu ekalesiari bene kira-varari, veġabidadama korikorina tu veiġa namori na bevaġa-foforiani.

Iakobo na mai fefa tu maiġesi eboiġaiato:

1. Veġabidadama veribaġani na betovo-naġiani ema bevaġa-foforiani - karoa 1:1-18
2. Veġabidadama ġera ġauvei e veiġa na bevaġa-foforiani - karoa 1:19-2:26
3. Veġabidadama ġera guruġa na bevaġa-foforiani - karoa 3
4. Veġabidadama Barau korana-iaġina maġurina korikorina na bevaġa-foforiani - karoa 4-5

**1** Au Iakobo (o Iames), Barau e Vereġauka Iesu Keriso ġeri vetuġunaġi tarimagu, ġeġuna mai fefa eiaġosini, ġomi Isaraela doġoromi gabanana ruarua (12) tano-bara boruri ai ġotanu-lausilausini ġemi ai. Avaġa-namomini.

### Veribaġani ġenana veġabidadama bekokoreni

<sup>2</sup>Tarikakagu mabarami, veribaġani iraurau boġo ġoitaġorini nai, boġono iaku-iaġiri moġo. <sup>3</sup>Korana ġomi ribami, veribaġani na ġemi veġabidadama etovo-naġirini nai, kokore ema vevaġa-gwaġiġi e vaġa-ġorarini. <sup>4</sup>Benamo kokore ema vevaġa-gwaġiġi ġemi ai bene barego-korikori, be ġemi ai maki kerere ta asi bene tanu e vetoukau ta maki asiġina, ema dagara tai asi boġono rabu.

<sup>5</sup>Senai bema ġomi fakami ai ta asi iaunegana nai tu, Barau bene noġia, ġia na beviniani, korana Barau tu nuġana mabarana ema nuġana ma iakuna ġesi ġia ġenoġiani tarimari mabarari evinirini. <sup>6</sup>Senai enoġini nai tu veġabidadamai moġo bene noġi, nuġana asi bene daradara. Korana eiauvo-iauvoni tarimana tu davara ure-urena iavara na ekwari-iaġo kwari-iaġomaiani kavana. <sup>7</sup>Moġesi tarimana tu bene riba, ġia Vereġauka ġenana dagara ta tu asi bedoġariani. <sup>8</sup>Etuġamaġi-ruarua tari-mana tu ġena ġauvei mabarari ai asi eruġa-giġitarini.

### Asi ġena-ġana tarimana ema ma ġena-ġana tarimana

<sup>9</sup>Tarikaka ta asi ġena e asi ġana tu bene iaku, korana Barau ġenai ġia tu barego. <sup>10</sup>Ema ma ġena ma ġana tarimana maki bene iaku, Barau na betore-variġoani neganai. Korana berekwa-rekwani boġa veraverari kavana. <sup>11</sup>Ġaro emaraġeni nai, ekirini gugurana na ġauġa etunu-maraiani, benamo veraverana eketo-vaġini, ġi-taġitana marevana ekorini. Ġena-ġana vovoka tarimana maki moġesina kavana berekwa-rekwani ġena taġa ġauveiri iaġoviniri nuġanai.



### Vetovonaġi ema veribaġani ainana eiaġomani

<sup>12</sup> Veribaġani nuġari ai evevaġa-gwaġiġini tarimana tu bene iaku, korana mo vetovonaġi bekorini nai, roġo beruġa-taġoni tu maġuri koronana beġabiani. Mo maġuri tu Barau na ekiraġi-toreato ġia ġeura-viniani tarimari ġeri. <sup>13</sup> Bema tarima ta veribaġani edoġariani nai, asi bene kira, “Mai veribaġani tu Barau ġenana eiaġomani.” Korana Barau tu veiġa rakavari na asi beġe tovo-naġiani riba, ema ġia na tarima ta maki asi eriba-ġaniani. <sup>14</sup> Senaġi tarimarima veribaġani edoġariani tu bema ġia eveġwa-veġitani, benamo tuġamaġi rakavari na nuġana ġeġaniani, ġeġofaiani. <sup>15</sup> Ġena ura rakavari na nuġana ġevaġa-vonuani, benamo rakava ġevaġa-ġoraiani. Ema rakava etubu-baregoni nai tu mase evaġa-ġoraiani.

<sup>16</sup> Tarikakagu namomi, ta na asi bene ġofami. <sup>17</sup> Vevaġa-ġauna dagarari namori mabarari ema varevare roroġotori dagarari mabarari tu tuġuna na ġeiaġomani, Mama Tamana, guba mamana eveiato Barauna, ġenana ġemariġoni. Guba mamana eirauni, senaġi ġia tu asi eirauni o mukuna na maki asi eġabiani. <sup>18</sup> Ġia tauġena ġena urai moġo ġena guruġa moġonina ġenana evaġa-maġurirato, korana tarimarima ema ġemaġurini dagarari tari ġimana na eveirito dagarari mabarari fakari ai bitana guine ġana.

### Seġaġi e veiġa

<sup>19</sup> Tarikakagu namomi, maiġa tu boġono ribaia: Ġomi tata guruġa seġaġi-seġaġiri ai boġono ġarimoġi, senaġi guruġai boġono veġabitari, ema asi boġono baru-ġariġari. <sup>20</sup> Korana tarimarima ġeri baru ġerina Barau ġena veiġa roroġotori asi beġe foforini. <sup>21</sup> Moġa lorinai maġuri rakavari ema veiġa mirori mabarari boġono fitoġari. Barau na nuġami ai evaroato guruġana boġono ġabi-raġea ma manaumi ġesi. Korana mani guruġa na bevaġa-maġurimini riba.

<sup>22</sup> Ġena guruġa tu asi boġono seġaġiri moġo, senaġi ġoseġaġirini guruġari tu ġemi veiġai boġono vaġa-foforia, tauġemi boġo veġofani garina. <sup>23</sup> Deikara Barau ġena guruġa eseġaġiani moġo, senaġi veiġana tu asi eveiani tu veiġa ai tauġena goirana eġitaiani kavana. <sup>24</sup> Tauġena veiġai eveġitani, benamo eraka-veġitani nai tu ma evetuġa-rekwani ġia vetoġana tu aiġesina. <sup>25</sup> Senaġi deikara taravatu namo vedaureana, tarimarima ġeri rakava eruġa-vaġirini taravatuna, eġita-ginikauani, eseġaġivanaġi vanaġiani ema asi eseġaġi-taġuini, senaġi ġena veiġai evaġa-foforiani, ġia tu Barau na ġena ġauvei mabarari nuġari ai bevaġa-namoani.

<sup>26</sup> Bema tarima ta tauġena evekiraġini tu Barau ekorana-iaġiani etoni, senaġi meana tu asi enariani, mani tarima tu tauġena moġo eveġofaġofa-iaġini ema Barau korana-iaġina veiġana maki asi tauna. <sup>27</sup> Ġita Tamara Barau na ekalesia tarimana namo vedaureana e moġonina maiġesi etuġamaġiani: Gara e vabu ġeri taġitaġi ai eġita-ġaurini ema tauġena evenarini tanobara mirona na bevemironi garina.

### Ekalesia mabarari tu ilaila moġo

**2** Tarikakagu mabarami, ġera Vereġauka Iesu Keriso mamana e seġukana tu barego, ġia ġovaġa-moġoniani tarimami, tarimarima mabarari boġono ġabiraġe-ilailari, dia ġeri vetoġai boġono ġabi-raġeri. <sup>2</sup> Bema tarima ta, ġimana ma golo aġevana e ġena dabuġa maki irau moġo, bema raka-toġani ġemi vegogo nuġanai, ema asi ġena-ġana tarimana ta ġena dabuġa tu kitakata bema raka-ġurani. <sup>3</sup> Benamo

gomi na dabuġa ma marevana eveiani tarimana tu boġo gubakau-baregoani, benamo boġo vaġa-guruġaiiani, boġo kirani, “Mai tanutanu namonai noma tanu,” a asi ġena-ġana tarimana tu boġo kiraiani, “Iomonai noa ruġa,” o, “Mai kurabo ai noma tanu au kwakugu koranai.” <sup>4</sup> Moġa ġenana ġomi tu tauġemi moġo ġovevaġa-irauni ema vevaġa-maoro maki ġoveiani ġemi tuġamaġi rakavari ġerina.

<sup>5</sup> Ġoseġaġi, tarikakagu namomi, Barau na mai tanobarai asi ġeri asi ġari tarimari eġabi-viriġirito, veġabidadama na beġene vonuvonu-raġe, ema ġena Basileia beġene ġabia uranai. Mo Basileia tu Barau na ekiraġi-toreato, ġia ġeura-viniani tarimari moġo beġe raka-toġani. <sup>6</sup> Senaġi ġomi na asi ġeri ema asi ġari tarimari tu ġoġita-ġuiragiirini. Dei na ġomi evaġa-rakavamini, ema einu-iaġomini Kota gabuna ġana? Ma ġeri-ġari tarimari maniġesi ġeveini, ene? <sup>7</sup> Ġia na mani ara namona, ġomi na ġovaġa-moġoniani tarimana arana Keriso, ġekiraġi-rakava rakavaiani.

<sup>8</sup> Dagara namona tu maiġa: Barau ġena Basileia taravatuna boġono korana-iaġia, Buka Veaġai ġetoreato maiġesi ekirani, “Sevimu tarimana bono ura-vinia tauġemu oveura-vinini kavana.” Maniġa ġokorana-iaġi korikoriani nai tu maorona ġoveiani. <sup>9</sup> Senaġi bema ġomi na tarimarima ġeri vedabuġa o dagi ilailari ai moġo ġoġabi-raġerini nai, ġomi tu rakava ġoveiani, ema taravatu na maki ekiramini, ġomi tu taravatu ġokira-fitoġaiiani tarimami. <sup>10</sup> Korana mo deikara na taravatu mabarana ekorana-iaġiani, senaġi sebona moġo eketoni, ġia na taravatu mabarana ekira-fitoġaiiani. <sup>11</sup> Korana mo Barau sebona ekirato, “Asi bono veġura-vanaġi,” ma ekirato, “Asi bono vaġivaġi.” Moġa lorinai bema ġoi asi boveġura-vanaġini, senaġi bovaġivaġini nai, ġoi tu taravatu okira-fitoġaiiani tarimamu. <sup>12</sup> Ġoguruġani ema veiġa ġoveirini nai, Barau ġena taravatu boġono tuġamaġia, korana mo tu ma seġukana tarimarima ġeri rakava ġerina beruġa-vaġirini. Moġa maki bea vevaġa-maoro vini-mini. <sup>13</sup> Deikara tarimarima asi evetuġa-ġwarini tu, Barau na maki ġia asi bevetuġa-ġwaiiani ġena Kota baregona ġaronai. Senaġi deikara ta na tarimarima evetuġa-ġwarini, Kota garina asi bene vei, korana vevetuġaġwa na vevaġa-maoro evanaġiani.

### Veġabidadama ma veiġana

<sup>14</sup> Tarikakagu mabarami, tarima ta bekirani, ġia tu ma ġena veġabidadama, senaġi bema ġena veiġa na asi evaġa-moġoniani nai, kara namona bevaġa-ġoraiiani? Mo veġabidadama na bevaġa-maġuriani riba ba? <sup>15</sup> Vaġa-ilailana, bema tarikaka tauna ta o vavinena ta asi ġena dabuġa ema asi ġana ġaniġani. <sup>16</sup> Benamo ġomi ta na bokiraiiani, bokirani, “Ma nuġa namomu ġesi noiaġo. Bono veseġo, be asi bene naguremu e bono ġanimase-ginikau!” Senaġi tauġanina eura-vinirini dagarari tu asi oviniiani, ġena namo tu kara? <sup>17</sup> Veġabidadama maki moġesi, bema veġabidadama ġereġana moġo ema veiġana asi evaġa-foforiani nai tu mase, asi tauna.

<sup>18</sup> Senaġi tarima ta ma bekirani, “Ġoi tu ma ġemu veġabidadama, senaġi veiġa tu au ġegu ai.” Benamo au ġegu vevaġa-veve tu iniġesi, “Ġemu veġabidadama naġitaia. Kamara dabarai bovaġa-ġitaguni bema veiġa asi evaġa-foforiani nai? Senaġi au ġegu veġabidadama tu fofori, ġegu veiġa na evaġa-ġitamuni.” <sup>19</sup> Ġoi na ovaġa-moġoniani, Barau tu sebona moġo. Namo! Senaġina iauka rakavari na maki ġevaġa-moġoniani, benamo ġeġoġo-ġoġorini korana ġegarini. <sup>20</sup> Ġoi babo! Ġoi ourani tauna korikori noġitaia veġabidadama veiġana asi evaġa-foforiani tu asi tauna. <sup>21</sup> Ġita senera Aberahamo tu kamasi nai Barau na evaġa-moġoniato ġia tu veiġa iobukaiobuka tarimana? Ġia tu ġena veiġa na natuna Isako fata veaġa iatanai Barau evarevare-viniato.

<sup>22</sup> Be oġitaiani, ġia ġena veġabidadama ema ġena veiġa tu ġeġauvei-vegogoto; ġena veġabidadama tu ġena veiġa na ġevaġa-moġoniato. <sup>23</sup> Benamo Buka Veaġai ġetore-ato guruġana emoġonito, maiġesi ekirani, “Aberahamo na Barau evaġa-moġoniato, benamo Barau na eġabi-raġeato ġia tu vei-iobukaiobuka tarimana.” Ema Barau na maki ekiraiato, ekirato, “Au ġatagu.” <sup>24</sup> Ġoġitaiani, tarimarima tu ġena veiġa na Barau na eġabi-raġeani, dia ġena veġabidadama ġenana moġo.

<sup>25</sup> Rahaba mata-boraġa vavinena maki moġesi. Ġia tu ġena veiġa ġenana Barau na eġabi-raġeato. Isaraela rivirivi tarimari ġena numai eġabi-raġerito ema dabara boruna ma etuġu-rosirito. <sup>26</sup> Vaġa-ilailana tauġani asi iaukana tu mase, veġabidadama maki moġesi, bema asi veiġana tu mase.

### Murumi boġono nariri

**3** Tarikakagu mabarami, ġomi ġutuma tu vevaġa-riba tarimami ai asi boġono iaġo. Korana ma ribami, Barau ġena Kota ġaronai ġia na ġai, vevaġa-riba tarimama, ġema veiġa tu bevetau-ġitakaurini, dia ekalesia tarimari tari kavana. <sup>2</sup> Ġita mabarara ġaro ġutuma kerere taveini. Senaġi bema tarima ta kerere ta asi eveiani ġena guruġai nai, ġia tu asi vetoukauna ema tauġanina mabarana benariani riba. <sup>3</sup> Hosi bokanai taritari aurina tatore-toġaiani, korana taurani bene seġaġira; moġesi tauġanina mabarana bita tariani riba. <sup>4</sup> Lagatoġi ġotuġamaġia: Asikeikeina, iavara baregona na vau ekwari-raġaiani, senaġi tarina tu misina korokoro. Mo tari misina korokorona na etariani tarimana ġena ura gaburi mabarari ġana etari-iaġoani. <sup>5</sup> Moġa ilailanai mea makina: Misina korokoro, senaġi dagara baregori eveiavi-iaġirini.

Boġa maki aiġa baregona, senaġi karava misina na beġara-ġosiani. <sup>6</sup> Mea maki karava kavana. Tauġanira mabarari fakari ai ġia tu rakava gabuna tauġanira mabarana evaġa-miroani. Tauġanira ema iaukara evaġa-rakavarini. Ġera tanu dabarari mabarari mea na bevaġa-kerererini riba, korana ġia tu karava kavana ġita eġararani. Mo karava tu eġara-vanaġi vanaġini gabuna na eġabini. <sup>7</sup> Tarimarima tu vevaġa-marana ma ribana, ema ġemaġurini dagarari irauirau maki mabarari evaġa-maranarini e evaġa-maranarito-ġoi ilailana manu, mota, davara dagarari, ema boġa bairi maki. <sup>8</sup> Senaġi tarima ta na mea tu roġosi roġo bene vaġa-maranaia. Ġia tu rakava ema asi vaġa-maranana, vevaġa-mase nanuna rakavana na evonuvonu-raġeto. <sup>9</sup> Ġita meara na ġera Vereġauka ema Tamara tavaġa-namoani, ema meara na maki Barau na ġia vetoġana kavana eveirito tarimarimari tavaġa-rakavarini. <sup>10</sup> Mo muru sebna na vevaġa-namo guruġari ema vevaġa-rakava guruġari ġeraka-vaġini. Tarikakagu mabarami, maniġesi veiġa asi bene ġora. <sup>11</sup> Nanu gurina sebna na nanu ma mamina ema nanu mamakina asi beraka-vaġini, ene? <sup>12</sup> Tarikakagu, figi ġaunai olive asi beġwani ema olive ġaunai maki figi asi beġwani. Moġa ilailanai damena nanuna na ġaruka nanuna asi beraka-rosini riba.

### Barau ġenana eiaġomani iaunegana

<sup>13</sup> Deikara ġomi fakami ai tu ma iaunegana ema etuġamaġi-fakani? Ġena maġuri namori na bene vaġa-moġonia, ema ġena veiġa namori bene veiri ma iaunegana e manauna ġesi. <sup>14</sup> Senaġi bema ġomi nuġami ai mama, baru, ema veiavi ġetanuni nai, asi boġono kira, “Ġai tu ma iaunegama!” Moġesina ġomi na guruġa moġonina ġokure-toġaiani. <sup>15</sup> Mani iaunega tu dia guba na o Barau ġenana ġemariġoni, senaġi ġia tu tanobara ġena, tarimarima nuġari na ġemaraġeni ema iauka rakavari ġerina

ġeiaġomani. <sup>16</sup> Korana mama ema veiavi ġetanuni gaburi tu daradara etanuni, ema veiġa rakavari mabarari maki ġetanuni. <sup>17</sup> Senaġi guba na eiaġomani iaunegana tu asi mirona e asi vetoukauna ta. Beġabi-raġeani tarimana ġena veiġa tu maġa: Maino, garo-namo, veġata. Ġia tu ma ġena vevetuġaġwa ema ġwaġwana maki namori. Veira-veira ema vei-ġofakau asi ribana. <sup>18</sup> Maino ai ġetanuni tarimari tu noġa moġo varovaro ġueri ġevaroni kavana. Maino na veiġa namori ġutumma evaġa-ġorarini. Moġeri veiġa namori tu tarimarima ġeri maġuri ai ġefoforini noġa kwakwa ġaronai dagara namori ġedoġaririni kavana.

### Tanobara veġatana

**4** Vevaġi e vevane ġomi fakami ai tu kara na ġevaġa-ġorarini? Mani tu ġemi ura rakavari nuġami ai tauġeri tata ġevevaġini ġerina ġeiaġomani. <sup>2</sup> Dagara kota ġourani, senaġi asi ġoġabirini, benamo ġovaġi-vaġini. Dagara kota ġouravini-rakavarini, senaġi asi ġodoġaririni, benamo ġovevaneni e ġovevaġini. Ġoura-vinirini dagarari asi ġodoġaririni, korana Barau asi ġonoġiani nai. <sup>3</sup> Ema ġonoġinoġini maki asi ġoġoitaġoni, korana ġemi tuġamaġi tu rakava; ġourani kara ġonoġirini dagarari tu ġereġami na boġono ġaunari.

<sup>4</sup> Ġomi veġuravanaġi tarimami, (Barau ġenana ġoveġitato tarimami)! Ġomi asi ribami tanobara ġesi boġo veġatani tu Barau asi boġo ura-viniani? Deikara euranani tanobara ġesi bene veġata etoni tarimana na tu Barau evetari-viniani. <sup>5</sup> Buka Veaġai guruġa ta tu maiġesi ekirani, “Barau na ġita nuġarai etoreato Iauka Veaġana eura-rakavani, ġia na bene guine-iaġira.” Ġomi ġotuġamaġini mo guruġa ġetorekavaiaato?

<sup>6</sup> Senaġi Barau ġena varevare-bara tu barego ġita ġerai. Moġa lorinai ġena Buka Veaġai maiġesi ekirani, “Eveiavini tarimana tu Barau na etore-veġitaiani, a manau tarimana tu ġena varevare-bara eviniani.”

<sup>7</sup> Moġa lorinai boġono vevaġa-manau, Barau gaburenai boġono tanu. Satani boġono kira-ġoia, benamo ġomi ġemi na beraga-kwareġani. <sup>8</sup> Barau ġenai boġono raka-kavi, benamo ġia maki ġomi ġemi ai beraka-kavini. Gimami boġono ġuriġiri, ġomi rakava tarimami! Nuġami boġono iarevari ġomi tuġamaġi ruarua tarimami! <sup>9</sup> Boġono dabara-doko, boġono nuġa-midigumidigu, ema boġono taġi. Ġemi riki tu nuġa midigumidigu ai bene iaġo, ema ġemi iaku tu nuġameto ai bene iaġo! <sup>10</sup> Vereġauka ġoiranai boġono tutuġu-tari, benamo ġia na bene ġabi-vaismi.

### Asi boġono vekira-rakava

<sup>11</sup> Tarikakagu mabarami, ġomi tata asi boġono vekira-rakava. Deikara na tarikakana ta ekira-rakavaiani o vevaġa-maoro evei-viniani tu Barau ġena taravatu ekira-rakavaiani ema vevaġa-maoro evei-viniani. Bema ġoi na taravatu vevaġa-maoro ovei-viniani nai, ġoi na tu asi okorana-iaġiani, senaġi vevaġa-maoro tarimanai oiaġoni. <sup>12</sup> Barau ġereġana moġo tu taravatu evini-riġoni e vevaġa-maoro evinini tarimana. Ġia ġereġana moġo ma seġukana bevaġa-maġurini ema bevaġa-rakavani. Ġoi tu deikara, be sevimu tarimana vevaġa-maoro ovei-viniani?

### Asi boġono veiavi o vekokoroku

<sup>13</sup> Ġoseġaġi, ġomi deikara maiġesi ġokirani, “Toma o boinani ġita tu bita iaġoni mai taoni o iomo taoni ġana. Monai laġani sebna bita tanuni, benamo bisinesi

bita ġwa-ragaiani, moni asi gadara bita doġarini.”<sup>14</sup> Ġomi asi ribami ġemi maġuri boinani tu kamasi bevetoreni. Ġomi ġemi maġuri tu kara? Ġomi tu goġu kavana, ebere-rosini negakotuna, benamo ma erekwarekwani.<sup>15</sup> Ġomi tu maiġesi boġoro kira, “Bema Vereġauka beurani nai tu bita maġurini ema maiġesi o moġesi bita veini.”<sup>16</sup> Senaġi ġomi tu ġovevaġa-raġeni ema ġoveiavini; moġesi vevaġa-raġeri tu rakava.

<sup>17</sup> Moġa lorinai, kamara tarima ma ribana, ġia na veiġa namona bere veia da-garana, senaġi asi eveiani nai, ġia tu veiġa rakava tarimana.

### Farefare ġutuma tarimami lorimi boġono vetore

**5** Ma ġemi farefare ġutuma tarimami, ġoseġaġi! Boġono taġi, boġono taġi-koġokoġo, korana midigumidigu asikeikeina ġemi ai mani eiagomani.<sup>2</sup> Ġemi farefare mabarari tu beġe boraġa, ema ġemi dabuġa tu faro na beġe ġaniri.<sup>3</sup> Ġemi golo ema ġemi silva tu beġe lala-lala o rasta. Mo lala-lala na tu ġomi bekiraġi-rosimini, ema viriġomi beġanirini karava kavana. Mai ġaro dokori ġana ġemi taġa ġosenurito.<sup>4</sup> Ġoseġaġi, ġemi vamokai ġeġauveito tarimari ġomi na voiri asi ġovinir-ito. Ġeri nuġa-vekwaraġi ġoseġaġi! Mo ġemi ġaniġani ġevaġa-vegogorito tarimari ġeri taġi tu varau Iaru-korokoro Vereġaukana na bea seġaġia.<sup>5</sup> Ġomi ġemi maġuri mai tanobarai tu taġai e iaku verere nuġanai, ema ġoġoreġore-rakavani. Boġo ġanimase ema boġo goba-rakava, vaġivaġimi ġarona tu varau bevotu.<sup>6</sup> Ġomi na asi ġeri rakava tarimari ġovaġa-daġa-kavarito ema ġovaġi-maserito, ġia na asi ġeġabi-iaunaġimito.

### Vevaġa-gwaġiġi ema ġuriġuri

<sup>7</sup> Tarikakagu mabarami, boġono vevaġa-gwaġiġi bene iaġo mo, Vereġauka bene iaġoma. Iaraġa tarimana ġoġitaia, evaġa-nogani, ġena vamokai varovaro dagarari tauri namori enaririni, evevaġa-gwaġiġini eiagoni mo, ġura guinena e ġura ma beragu-gabini ġurana eraguni.<sup>8</sup> Ġomi maki boġono vevaġa-gwaġiġi. Nuġami beġene kokore, korana Vereġauka ġena iaġoma maki varau bekavinaġi.

<sup>9</sup> Tarikakagu mabarami, tauġemi fakami ai asi boġono verori-tore, Barau na vevaġa-maoro bevinimini garina. Ġoseġaġi, Kota eseġaġini tarimana tu varau ġatama-bokai eruġa-taġoni.<sup>10</sup> Tarikakagu mabarami, Vereġauka aranai ġeguruġato-ġoi peroveta tarimari ġotuġamaġiri. Ġeri midigumidigu nuġari ai ġevevaġa-gwaġiġito-ġoi. Ġomi maki moġesi boġono vevaġa-gwaġiġi.<sup>11</sup> Goġitaiani, ġita na tavaġa-raġerini, korana ġevevaġa-gwaġiġito nai. Lobu ġena vevaġa-gwaġiġi varina tu ġoseġaġiato, ema ġomi ma ribami, Vereġauka na kamasi dokonai voina namona eviniato, korana Vereġauka ġena veuravini ema ġena vevetuġaġwa tu barego vedaurea.

<sup>12</sup> Tarikakagu mabarami, dagara barego vedaureana tu maiġa: Guruġa gwaġiġiri na asi boġono kiraġi-tore ġemi guruġa vaġa-moġoniri ġana. Guba o tanobara o dagara boruna ta aranai asi boġono kiraġi-tore. Bema “Oi” ġotoni nai tu, oi moġo boġono si, a “Asiġina” ġotoni nai maki, asiġina moġo boġono si. Moġesi tu Barau na asi bekiramini ġomi tu kerere.

### Ĝuriĝuri ma seĝukana

<sup>13</sup> Ĝomi fakami ai ta emidigumidiguni ba? Bene ĝuriĝuri. Ta eiakuni ba? Barau vaĝa-raĝena mariri bene ĝabi. <sup>14</sup> Ta ekeveni ba? Ĝia tu ekalesia ĝeĝori-kauani tari-mari vetuĝuri bene vei, beĝenema ĝuriĝuri ĝia iatanai ema diĝa na beĝenema daua Vereĝauka aranai. <sup>15</sup> Benamo ĝauĝau ma veĝabidadamari ĝesi nai tu, keve tari-mana benamoni. Barau na ĝena keve bevaĝa-namoani, ema bema rakava eveito nai, ĝena rakava betuĝamaĝi-fitoĝarini. <sup>16</sup> Moĝa lorinai, ĝemi rakava karomi tata ĝeri ai boĝono kiraĝi-foforiri, ema tata ĝeri boĝono ĝuriĝuri, be ĝemi keve na boĝono namo. Barau ĝena ura eveirini tarimana ĝena ĝauĝau tu seĝuka rakava. <sup>17</sup> Elia tu tarimarima ĝita kavana. Ĝia eĝuriĝuri-gwadagwadato ĝura asi bene ragu ĝana, benamo tanobarai ĝura laĝani toitoi (3) ma ĝue imaima sebona (6) asi eraguto. <sup>18</sup> Ma eĝuriĝuri-ĝenoĝoito, benamo guba evekeo-fakato, ĝura ma eraguto; benamo tano na ĝaniĝani ma evaĝa-ĝoraiato.

<sup>19</sup> Tarikakagu mabarami, bema ĝomi ta Barau ĝena guruĝa moĝonina ĝenana beraka-veĝitani, benamo ta na ma bea ĝori-ĝenoĝoiani nai tu, veiĝa namona beveiani. <sup>20</sup> Boĝono riba, deikara na veiĝa rakava tarimana ĝena dabara ĝeĝevana na eĝori-ĝenoĝoiani nai tu, ĝia na mo veiĝa rakava tarimana iaukana mase ĝenana evaĝa-maĝuriani, ema rakava ĝutuma maki Barau na etuĝamaĝi-fitoĝarini.

## PETERO ĜENA TORETORE GINIGUINENA

1 Petero vaĝa-foforina guruĝari

Petero tu kone ai maina tarimana, ma ĝia tu Iesu ĝena mo mero gabanana ruarua (12) nuĝanai maki. Mai fefa Petero na tu betaĝu Romai etoreato laĝani 62 ma 64 fakari nuĝanai ta. Mo tu Iesu maki emaseto murinai vau.

Siri baregori mai fefai tu karoa 1:7; 4:12-13.

Mai fefa etoreato nuĝanai ĝia ĝena ura tu Iuda ekalesiari ema irau bese ekalesiari 1) bene vaĝa-kokoreri, be tarimarima na ĝevaĝa-midigu midigurito-ĝoi nuĝanai beĝene ruĝa-gwaĝiĝi; 2) ĝoirai veribaĝani baregori beĝe raga-ĝoitaĝorini moĝeri ĝana erovina-torerito; 3) ĝoirai Barau ĝena mareva baregona ĝeĝoira-taĝoani moĝa ĝeri evaĝa-foforiato; 4) bene launaĝiri, be ekalesia ĝauveiri korikori beĝene veiri. Petero na ĝena fefa tu maĝesina eboioĝaiato:

1. Barau ĝena vevaĝa-maĝuri ma ekiraĝi-variĝu-ĝoiato - karoa 1:1-2:10

2. Midigumidigu nuĝanai aiĝesina beĝene tanu - karoa 2:11-4:11

3. Midigumidigu nuĝanai ĝeri veiĝa ĝobiri beĝene toreri - karoa 4:12-5:11

**1** Au Petero, Iesu Keriso ĝena apostolo taugu, na mai fefa atore-iaĝosiani. Ĝomi, Barau ĝena ĝabi-viriĝi tarimami, ĝemi ĝabu korikori ĝoraga-kwanerito, toma tu Ponto ai, Galatia ai, Kapadokia ai, Asia ai, ema Bitinia tano boruri ai ĝotanu-lautilausini tarimami ĝemi ai. <sup>2</sup> Ĝomi tu Barau, ĝita Tamara, na eriba-guinemito ema eĝabi-hidimito, ĝena tarimarimai boĝo iaĝoni. E ĝia Iaukana na evaĝa-veaĝamito korana tu, Iesu Keriso boĝono seĝaĝi-vinia ema ĝia rarana na bene ĝurigiĝimi ĝana, be veiareva boĝono tanu Barau ĝoiranai.

Barau ĝena varevare-bara ema maino na bene vaĝa-vonuvonu-raĝemi.

### Maĝuri vanaĝivanaĝi

<sup>3</sup> Barau, ĝita ĝera Vereĝauka Iesu Keriso Tamana, sivaĝa-namoa! Korana ĝena vetuĝaĝwa barego vedaureana lorinai, maĝuri variĝuna ĝita evinirato, Iesu Keriso mase na evaĝa-variĝisi ĝenoĝoiato ĝenana. Mai veiĝa ĝenana ĝita nuĝara tu maĝuri vanaĝivanaĝi tatuĝamaĝi-kauani dagarana na evaĝa-vonurini. <sup>4</sup> E Barau na ĝena tarimarima ĝeri etore-rogoani vevaĝa-namo baregona, bitana ĝabia dagarana, tu ĝoirai taĝita-iaĝoani. Barau na gubai etore-rogorini ĝomi ĝemi, korana monai tu asi beĝe boraĝani, asi beĝe rakavani, e asi beĝe verumuni. <sup>5</sup> Ĝomi tu ĝemi veĝabidadama dainai Barau seĝukana na eĝita-ĝaumini, beiaĝoni mo, ĝia na varau erovina-toreato vevaĝa-maĝurina nega magonai bevaĝa-foforiani, matami na boĝo ĝitaiani e boĝo ĝabiani.

<sup>6</sup> Ĝomi toma kotunai tu midigumidigu barego ĝoĝanini, korana veribaĝani irauirauri ĝoĝoitaĝoni bene. Senaĝi ĝemi iaku tu bene barego-lelevaĝi, korana Barau ĝena vevaĝa-maĝuri boĝo ĝabiani bene. <sup>7</sup> Maiĝeri veribaĝani irauirauri ĝeiaĝo-mani tu, Barau na ĝomi ĝemi veĝabidadama etoto-iobuka iobukarini, korana Iesu Keriso befoforini ĝaronai tu, Barau ĝenana vevaĝa-raĝe e mareva namona ema vegubakau boĝo doĝariani. Golo karava na evaĝa-namo vedaureaiani ma voina evaraĝe-lelevaĝini, senaĝi ĝomi ĝemi veĝabidadama voina tu ma varaĝe lelevaĝi. <sup>8</sup> Ĝomi na roĝosi roĝo maki ĝoro ĝitaia, senaĝi ĝoura-viniani. Initoma maki asi ĝoĝitaiani, senaĝi ĝoĝabidadama-viniani ema iaku na ĝovonu-vonu-raĝeni. Ĝemi iaku maki asi

tau kirari vaġa-namona ta. <sup>9</sup> Korana Keriso ġenai ġoveġabidadamani voina tu, ġomi vevaġa-maġuri ġoġoitaġoni.

<sup>10</sup> Mai vevaġa-maġuri maiġa tu peroveta tarimari na ġevetau-ginikau ginikau-ato, ema ġia na ġekiraġi-tore guineato, mai varevare dagarana tu Barau na ġomi bevinimini, (Keriso beiaġomani ġaronai). <sup>11</sup> Beiaġomani ġarona e kamasi beiaġomani beġene ribaia ġana ġetuġamaġi-vekwaraġito-ġoi. Mo negai Keriso laukana tu ġia nuġari ai eġauveito-ġoi ema ekira-vararito-ġoi, Keriso tu ġena midigumidigu bevevaġa-gwaġiġi-iaġiani, ma moġa murinai vau ġia marevana baregona beġabiani. <sup>12</sup> Barau na peroveta tarimari evaġa-ribarito, ġia na mo vari ġeġobata-iaġiato-ġoi tu dia ġia tauġeri ġeri namo ġana, senaġi ġomi ġemi. Korana ġia na mo dagara, ġekiraġirito dagarari, tu toma ġena vetuġunaġi tarimari na Vari Namona ġevari-fiuani guba na etuġu-mariġoato Iauka Veaġana seġukanai, be ġoseġaġini. Maiġeri dagara tu aneru maki ġeri ura baregona beġene ribaia.

### Boġono veaġa

<sup>13</sup> Moġa lorinai, nuġami beġene veiareva, boġono vevaġa-gwaġiġi. Iesu Keriso beforini ġaronai Barau na bevinimini varevarena ġenai, nuġami mabarana ġesi boġono torea. <sup>14</sup> Barau natunai ġoiaġoto nai, ġia boġono seġaġi-vinia. Barau asi ribami negari ai tauġani ġena ura rakavari na ġeġori-ġeġevamito-ġoi veiġari asi ma boġono vei-ġenoġoiri. <sup>15</sup> Senaġi ekeamito Barauna tu veaġa, ilailanai ġomi maki boġono veaġa ġemi veiġa mabarari nuġari ai. <sup>16</sup> Korana Buka Veaġa nuġanai etoreato, Barau ekirato, “Boġono veaġa, korana au tu veaġa.”

<sup>17</sup> Ġoġauġauni negari ai, Barau tu Tamami ai ġokiraġiani, ma ġia na tarimarima mabarari tu dabara sebonai moġo evaġa-maoro vinirini, tata ġeri veiġa ilailari ai; moġa lorinai mai tanobarai roġo ġotanukauni nuġanai tu, Barau boġono gubakaua e boġono seġaġi-vinia. <sup>18</sup> Korana ma ribami, senemi ġeri maġuri rakavari ġomaġuri-iaġirito-ġoi ġerina Barau na evaġa-maġurimito ginitaġo dagarana tu asi berakavani dagarana. Dia silva o golo kavari. <sup>19</sup> Senaġi evaġa-maġurimito ginitaġo dagarana tu Keriso rarana, rara namo vedaureana, Barau ġena mamoe natuna rarana asi mirona e kererena. <sup>20</sup> Ġia tu Barau na tanobara roġosi bere veia neganai veġata, eġabi-viriġiato. Senaġi ġita vaġa-maġurira ġana mai nega gabiri ai ema vaġa-foforiato. <sup>21</sup> Ġia bakunai Barau ġoġabidadama-viniani. Barau na mase ġenana evaġa-variġisi-ġenoġoio, e marevana baregona eviniato. Moġa lorinai ġomi na Barau ġoġabidadama-viniani, ema ġemi tuġamaġikau ġia ġenai ġotoreani.

<sup>22</sup> Toma, ġomi na guruġa moġonina ġoseġaġi-viniato lorinai, tauġemi ġoveiarevato, ema karomi veġabidadama tauri ġesi moġoni ai ġoveura-vevinini. Moġa lorinai boġono veura-vevini ma nuġami mabarari ġesi. <sup>23</sup> Korana ġomi tu ġomaġuri-ġenoġoito, tarima variġu geragerami ai ġoiaġoto, dia tama sina ġerina, ġia tu ġemaseni, senaġi Barau ġena maġuri guruġana, etanu-vanaġi vanaġini guruġana, ġenana evaġa-maġuri ġenoġoimito. <sup>24</sup> Buka Veaġa ekirani kavana,

“Tarimarima mabarari tu reġi kavana,  
ġia marevari tu reġi ġwaġwana kavana.

Reġi tu ġemaraini,  
ema veravera maki ġeketoni,

<sup>25</sup> senaġi Vereġauka ġena guruġa tu  
betanu-vanaġi vanaġini.”



Mai guruḡa tu Vari Namona ḡomi ḡemi ai ḡevari-fiuato.

### Vereḡauka tu maḡuri forena, fore namo vedaureana

**2** Moḡa lorinai, tuḡamaḡi rakavari mabarari, e ḡofaḡofa mabarari, e vemuriḡoi mabarari, e mama, ema guruḡa rakavari mabarari boḡono fitoḡa-kwareḡari. <sup>2</sup> Vau ḡemaḡurini mero keiri kavari boḡono vei, vanaḡivanaḡi iauka ratana boka-kokena boḡono boka-koke, be moḡa niuniunai boḡono barego e vevaḡa-maḡuri boḡono ḡabia. <sup>3</sup> Korana ḡomi tauḡemi na ḡodoḡariato, Vereḡauka ḡena namo tu aiḡesina.

<sup>4</sup> Vereḡauka ḡenai ḡoiḡoma, ḡia tu maḡuri forena, tarimarima na ḡefitoḡaiato, korana asi ḡena namo ta ḡetato. Senaḡi Barau na eḡabi-viriḡiatio, korana fore namo vedaureana ḡia ḡoiranai. <sup>5</sup> Maḡuri foreri kavana ḡoiḡoma, be ḡomi maki Barau iaukana na Rubu Veḡai bene raga-iaḡimi. Monai Rubu Veḡa vereri veaḡami ai boḡono iaḡo, ma Barau na Iesu Keriso bakunai eḡabi-raḡerini iauka varevareri, ḡemi maḡuri, boḡono vinia.

<sup>6</sup> Korana Buka Veḡa ekirani,  
 “Au na fore namo vedaureana ta aviriḡiatio,  
 ḡia tu Sionai (o Ierusalem) ai  
 duḡu forenai avaḡa-iaḡoato.  
 Dei na ḡia bevaḡa-moḡoniani  
 tarimana tu asi bemaikaiani.”

<sup>7</sup> ḡovaḡa-moḡoniani tarimami ḡemi ai mai fore tu namo vedaurea, senaḡi asi ḡevaḡa-moḡoniani tarimari ḡeri ai tu,  
 “Numa raḡaragana tarimari na  
 asi ḡeura-viniato nai ḡefitoḡaiato,  
 ḡekirato fore rakavana,  
 dagarana tu fore mabarari fakari ai fore namo vedaureana,  
 duḡu forenai eiaḡoto.”

<sup>8</sup> Ma toretore tai ekirani,  
 “Mai fore na tarimarima bevaḡa-kake-naḡirini,  
 e bevaḡa-ketorini forena.”

Barau ḡena guruḡa asi ḡeseḡaḡiatio dainai, ḡevekake-naḡito, mo tu Barau na ekiraḡi-guineato, moḡesi beḡe veiani.

<sup>9</sup> Senaḡi ḡomi tu ḡabi-viriḡi besena, Kini ḡena Rubu Veḡa veremi, bese veaḡana, Barau ḡena tarimarima. Eḡabi-viriḡimito, mukuna na ekea-rosimito, benamo ḡena mama namo vedaureana etoremite, korana tu ḡia ḡena veḡa namori boḡono kiraḡi-foforiri ḡana. <sup>10</sup> Guinenai ḡomi tu dia Barau ḡena tarimarima, senaḡi toma ḡomi tu ḡia ḡena tarimarima. Guinenai Barau ḡena vevetuḡaḡwa tu asi ribami, senaḡi toma ḡia ḡena vevetuḡaḡwa ḡodoḡariato.

### Barau ḡena vetuḡunaḡi tarimari

<sup>11</sup> ḡatagu mabarami, anoḡi-gwaḡiḡimini, ḡomi tu tarima boru e tanukau tarimami mai tanobarai. Tauḡani ḡena ura rakavari asi boḡono veiri, maniḡeri na vanaḡi-vanaḡi ḡomi iaukami ḡevetari-vinirini. <sup>12</sup> Senaḡi Barau asi ribari tarimari ḡoirari ai ḡemi veḡa beḡene namo. Beḡe rori-toremimi, rakava-vei tarimami ai beḡe ki-

raġimini, senaġi ġemi veiġa namori beġe ġitarini neganai, ġia na Barau beġe vaġa-raġeani, ġia na tarimarima bekota-vinirini ġaronai.

<sup>13</sup> Vereġauka ġovaġa-moġoniani nai, gavamani ġeri taravatu mabarari boġono korana-iaġiri: Kini boġono seġaġi-vinia, korana ġia tu varaġe vedaurea. <sup>14</sup> E gavana tauri boġono seġaġi-viniri. Ġia na veiġa rakava tarimari beġene vaġa-rakavari, ema veiġa namo tarimari beġene vaġa-namori ġana eġabi-torerito. <sup>15</sup> Korana Barau ġena ura tu, ġomi ġemi veiġa namori na asi ribari tarimari ġeri guruġa babobabori boġono lautariri. <sup>16</sup> Kokore ai boġono tanu, be dagara ta na asi bene barubarumi, Keriso na eruġa-vaġirito tarimari kavana. Senaġi asi boġono kira, “Ġai tu maġuri namonai e fakanai ġatanuni, be veiġa rakavari baġa veirini tu asi kara ta.” Asiġina. Barau ġena vetuġunaġi tarimami ai boġono tanu. <sup>17</sup> Tarima mabarari boġono gubakauri. Karomi veġabidadama tarimari boġono ura-viniri. Barau boġono vaġa-raġea, e kini boġono gubakaua.

### Keriso kwakuna gabunai boġono raka

<sup>18</sup> Tuġu-rakaorakao tarimami asi voimi, ġitaġaumi tauri boġono seġaġi-viniri, moġoni ai boġono gubakauri, dia veiġa-namo e garo-namo tarimari moġo, senaġi niara-niara tauri maki. <sup>19</sup> Korana Barau na eura-viniani veiġana tu maiġa: Barau ġena ura ġokorana-iaġirini dainai, enabe asi ġemi rakavai beġe vaġa-midigu midigumini, senaġi boġo vevaġa-gwaġiġini. <sup>20</sup> Ġemi rakava dairi ai beġe kwarimini ma boġo vevaġa-gwaġiġini, moġa ġena namo ġomi ġemi ai tu kara? Senaġi bema veiġa namori ġoveini nuġanai beġe vaġa-midigu midigumini ma boġo vevaġa-gwaġiġini moġo, Barau ġoiranai tu namo eġabi-raġeani. <sup>21</sup> Ġomi tu moġesi boġono vei ġana, Barau na ekeamito. Korana ġomi daimi ai Keriso tauġena emidigu-midiguto, e ġia na mai vevaġa-ġita ġomi ġemi ai eraga-kwaneato. Moġa lorinai ġomi tu ġia kwakuna gabunai boġono raka. <sup>22</sup> Ġia na rakava ta asi eveiato, e ta na ġia muruna na ġo-faġofa guruġana asi eseġaġiato. <sup>23</sup> Ġeguruġa-rakava-viniato, senaġi guruġa rakavari na asi evaġa-voirito; ġevaġa-midigu midiguato neganai, vaġa-voi guruġari asi eki-raġirito. Ġia ribana, Barau tu vevaġa-maoro tauna iobukaiobukana, naima ġia ġi-manai etoreato. <sup>24</sup> Keriso tauġena tauġaninai ġita ġera rakava eġwa-raġerito sa-tauro tuġuna ġana. Moġesi eveito tu, vei-rakava ġenai bitana mase, asi ma bitana vei-ġenoġoia, ema vei-iobukaiobuka ġenai bitana maġuri, Barau ġena ura bitana korana-iaġiri. Boġono tuġamaġi: Ġia manuġana dainai, ġoi onamoto. <sup>25</sup> Ġomi tu rekwarkwa mamoori kavari ġoraka-taġui taġuito-ġoi. Senaġi toma ġomi tu iaukami nariġauna e ġitaġauna tauna Keriso na ma beġabi-ġenoġoimi.

### Veġaraġo vavinemi ema taumi

**3** Ġomi veġaraġo vavinemi maki moġesi, ġaraġomi gabureri ai boġono tanu. Moġesi boġo veini nai, tari ġaraġomi tu Barau ġena guruġa asi ġevaġa-moġoniani tauri, senaġi ġemi veiġa namori na moġo nuġari beġabirini, benamo beġe vetuġamaġi-kureni; a Barau ġena guruġa ta ġeri tu asi boġo kiraġiani. <sup>2</sup> Korana ġemi veiġa roroġotori ema ġemi vegubakau ġia ġeri ai beġe ġitarini tu namo. <sup>3</sup> Marevami ġenamo-vedaurea urari ai tauġanimi asi boġono vaġa-veraverari. Ilailana, ġuimi ġovei-iraurini, golo ġotoreni e dabuġa namori vedaureari ġoriġorini. <sup>4</sup> Asiġina, ġomi tu lorumi ġuturi neġi boġono vaġa-veraverari, asi beġe rakavani veraverari na, manau e nuġa-namo. Moġeri tu Barau ġoiranai dagara baregori. <sup>5</sup> Guinenai, ġita

tubura ġatara ġeri negai maki vavine veaġari, Barau ġenai ġeveġabidadamato-ġoi vavineri, tu moġesi ġevevaġa-marevato-ġoi, e ġaraġori gabureri ai ġetanuto-ġoi. <sup>6</sup>Sara kavana, ġaraġona eseġaġi-viniato-ġoi; ġaraġona tu “Ġegu vereġauka” etato-ġoi. Ġomi toma tu ġia natuna, bema ġemi veiġa tu namo e kara ta garina asi ġoveini.

<sup>7</sup>Ġomi tau maki ġaraġomi ġesi ġotanuni nai, boġono riba-ġinikauri. Boġono riba, ġia tu asi fakosiri. Ġaraġomi boġono gubakauri, korana Barau na maġuri vanaġi-vanaġi tu ġia e ġomi bevaevare-vinimini. Moġesi boġono vei, be dagara ta na ġemi ġauġau-vegogo asi bene vaġa-rakavari.

### **Veiġa namori ai bitana midigu-midigu**

<sup>8</sup>Guruġa vaġa-magona maiġa: Mabarami nuġami boġono vaġa-sebonari, boġono vevaġa-kava-vevini, e boġono veura-vevini tarikaka kavari. Boġono vevetuġaġwa-vevini e boġono marana. <sup>9</sup>Veiġa rakavari e garo rakavari asi boġono vevaġa-voivevini, senaġi ġevaġa-rakavamini tarimari boġono vaġa-namori. Korana Barau na ekeamito tu moġesi boġono vei, benamo ġomi na maki ġena vevaġa-namo boġono ġabia. <sup>10</sup>Korana Buka Veaġa ekirani,

“Deikara maġuri eurani e ġaro namori bene ġitari etoni tarimana tu meana bene naria,

guruġa rakavari asi bene kiraġi,  
e muruna na ġofaġofa guruġari asi bene kiraġiri.

<sup>11</sup>Rakava bene raga-kwanea,  
veiġa namori bene vei.

Maino bene vetaua nuġana mabarana ġesi.

<sup>12</sup>Korana Vereġauka na tu vei-iobukaiobuka tarimari eġita-ġaurini,  
e ġeri ġauġau eseġaġirini.

Senaġi vei-rakava tarimari tu  
Vereġauka na asi eura-vinirini.”

<sup>13</sup>Veiġa namori bouravini-baregorini nai tu, dei na ġoi bevaġa-rakavamuni?

<sup>14</sup>Senaġi irau beġe vaġa-mididgu midigumini ġemi vei-iobukaiobuka dairi ai nai tu boġono iaku. Tarima ta garina asi boġono vei, e asi boġono daradara.

<sup>15</sup>Senaġi nuġami ai Keriso boġono korana-iaġia, boġono vaġa-raġea, ġia tu ġomi ġemi Vereġauka. E vanaġivanaġi boġono venari-taġo, bema ta na bedanaġimini, “Kara dainai Keriso ġoġabidadama-viniani” betoni nai, ġena boġono kiraġi-ġinikau.

<sup>16</sup>Senaġi manau ai e vegubakau ai ġena boġono kiraġi-ġinikau. Ġemi veiġa loriri boġono toreri, asi namo gabivau boġono riba ġomi tu asi maoro. Keriso murinai ġorakani ma veaġami ġesi dainai, ġemugumugu-iaġimini e rakavami ġekiraġini tarimari tu tauġeri roġo beġe maiakarini. <sup>17</sup>Barau ġena urai veiġa namori ġoveini dairi ai ġomidigu-midiguni nai tu namo. A asi namo ġemi veiġa rakavari dairi ai boġono midigu-midigu.

<sup>18</sup>Keriso emaseto, ġera rakava bene voi-vaġiri ġana. Ġia tu nega sebona moġo emaseto, asi ma bemaseni. Ġia tu vei-iobukaiobuka tauna, ġita rakava tarimara bene kurevora, be Barau ġenai bene ġori-iaġora ġana. Tauġani maġurinai tu ġevaġi-maseato, senaġi iauka maġurinai ġia tu evariġisi-ġenoġoito. <sup>19</sup>E iaukai ġia eiaġoto mase gabuna o dibura ġana, monai ġetanuni tarimari iaukari ġeri ea ġobatato. <sup>20</sup>Ġia tu guinenai ġekira-sirivaġito tarimari, Noa na ġasi baregona eveiato neganai, benamo Barau na evaġa-nogarito ma vevaġa-gwaġiġina ġesi, (ġeri rakava ġerina beġene

vetuġamaġi-kure ġana). Senaġi ġasi baregona nuġanai ġeraka-toġato tarimari tu asi ġutuma. Tauri mabarari tu imaima toitoi (8) moġo nanu na evaġa-maġuririto. <sup>21</sup> Mo nanu moġa tu babatiso vetoġana kavana, korana babatiso na toma ġomi evaġa-maġurimini, dia tauġani mirona ġuriġi-vaġina, senaġi Barau ġonoġiani nuġami bene iarevari ġana Barau ġoiranai. Iesu Keriso mase na evaġa-variġisi ġenoġoiato bakunai evaġa-maġurimini. <sup>22</sup> Ġia tu gubai eraka-toġato, Barau aroribana rekenai etanuni. Aneru, e ma ġeri maoro baregona iaukari, ema seġuka tauri mabarari tu ġia gaburenai ġetanuni.

### Ekalesia maġurina

**4** Keriso tu tauġaninai emidigu-midiguto lorinai, ġomi maki ġemi tuġamaġi boġono vaġa-gwaġiġiri, ġia ġena tuġamaġi ġesi beġene ilaila; korana tauġaninai emidigu-midiguni tarimana na veiġa rakavari eraga-kwanerini. <sup>2</sup> Tauna moġa, ġomi roġo mai tanobarai ġotanuni nuġanai tu, tauġanimi ġeri ura rakavari asi boġono korana-iaġiri, a Barau ġena ura neġi boġono korana-iaġia. <sup>3</sup> Ġomi tu kai-veġata Barau asi ribari tarimari ilailari ai ġotanuto-ġoi, mata-boraġa e veġura-vanaġi veiġari ġoveito-ġoi, ġoniu-lelevaġito-ġoi, ġovei-taġuitaġuito-ġoi, ġoniu-vegogoto-ġoi, e barau ġofaġofari ġotoma-rakariġo vinirito-ġoi. <sup>4</sup> Toma, ġia tu ġeveiauni, korana ġia ġesi asi ġovekakoni, e asi ġovei-taġuitaġuini. Moġa lorinai rakavami ġekiraġini. <sup>5</sup> Senaġi ġia tu maġuri tarimari e mase tarimari vaġa-maoro-viniri Barauna ġoiranai beġe ritoġoni, ġeri veiġa moġeri beġe kiraġirini. <sup>6</sup> Moġa lorinai Iesu na Vari Namona tu ġemaseto tarimari iaukari ġeri maki evari-fiuato. Moġesi eveito korana tu, enabe Barau na tauġani ai evaġa-maoro vinirito tarimarima mabarari kavana, (mai tu ġemaseto), senaġi iaukai tu roġo beġe maġurini, Barau emaġurini kavana.

### Barau ġena varevare dagarari ġitaġauri tarimari namori

<sup>7</sup> Dagara mabarari magori tu bekavinaġi. Boġono venari-taġo e boġono vevaġa-gwaġiġi, be ġemi ġauġau asi boġono vaġa-ketoa. <sup>8</sup> Barego vedaureana tu, tata boġono veura-vevini ma nuġami mabarari ġesi, korana veura-vevini na rakava ġutuma elautaririni. <sup>9</sup> Karomi tata ġesi veiġa namori boġono vei-vevini, boġono veġabiraġe-vevini, asi boġono vemugu-mugu e veroritore. <sup>10</sup> Ġomi tata mabarami tu, Barau na evaġa-ġaunamito varevare dagarari iraurau ġitaġauri tarimami namomi, moġa lorinai karomi dairi ai boġono ġauvei-iaġiri, kamara varevare dagarana Barau ġenana ġodoġariato ilailanai. <sup>11</sup> Deikara eġobatani nai, ġia tu Barau ġena guruġa bene vari-fiuva. Deikara evevaġa-kavani nai, ġia tu Barau ġena kokore na bene vevaġa-kava. Mo dabarai dagara mabarari nuġari ai Barau bita vaġa-raġeani, Iesu Keriso bakunai. Mareva namona e seġuka tu ġia ġena, bene iaġo mo vanaġi-vanaġi. Amen.

### Ekalesia midigumidiguna

<sup>12</sup> Ġatagu mabarami, midigumidigu karava mamiri noġa ġoġabini nai tu, nuġami asi beġene farevaġi, asi boġono kira, dagara boruna ta ġemi ai eġorani. (Asiġina, mani tu ġomi tovenaġimi dagarana moġo). <sup>13</sup> Senaġi Keriso emidigu-midiguto kavana ġomidigu-midiguni dainai, boġono iaku, gabivau ġia marevana baregona bevaġa-foforiani neganai vau ma boġo iaku-sirivaġini. <sup>14</sup> Keriso murinai ġorakani nai, rakavami beġe kiraġini neganai, boġono iaku, korana monana boġo ribani,

Barau Iaukana, mareva-namo Iaukana, tu ġomi iatami ai etanuni. <sup>15</sup>Bema ġomi ta omidigu-midiguni nai, mani midigumidigu tu dia ovevaġi-debani, o olemani, o seġafore veiġana rakavana ta oveiani, o tarima ta ġena ġauvei metona oveiani nai omidigu-midiguni. <sup>16</sup>Senaġi bema ġoi tu Keriso murinai orakani dainai omidigu-midiguni neganai, asi bene maiakamu, senaġi Barau bono vaġa-raġea, Keriso arana oġwa-rakaoani nai.

<sup>17</sup>Barau ġena vevaġa-maoro negana tu varau beraġasi, e vevaġa-maoro tu Barau ġena tarimarima ġeri ai bevesinani. Bema ġita ġerai bevesinani neganai, Barau ġena Vari Namona asi ġevaġa-moġoniani tarimari ġeri ai tu kamasi bea ġorani? <sup>18</sup>Korana Buka Veaġa ekirani,

“Maġuri ġabiġabina Barau ġeseġaġi-viniani tarimari ġeri ai tu gwaġiġi.

O Barau asi ġevaġa-moġoniani

e vei-rakava tarimari dabarari tu

kamasi bevetoreni? (Ġia ġeri ai tu meto lelevaġi!)”

<sup>19</sup>Tauna moġa, Barau ġena ura lorinai midigu ġeġanini tarimari tu veiġa namori moġo beġene vei, ema ġeri maġuri tu eveirito Barauna ġimana nuġanai beġene toreri, korana ġia na etuġamaġi-kaurini.

### Ekalesia ġorikauna tarimari

**5** Au na ġomi fakami ai ekalesia ġorikauna taumi avaġa-guruġamini. Au maki ekalesia ġori-kauna taugu. Keriso emidigu-midiguto-ġoi au tu matagu na aġi-taiato, e ġia marevana baregona bevaġa-foforiani neganai, au tu ma augu. Moġa lorinai au na ġomi anoġi-gwaġiġimini: <sup>2</sup>Barau ġena mamoe serina boġono ġitaġau-ġinikaua. Ġia na ġomi evinimito tu, nuġami na eura-iaġiani lorinai boġono ġita-ġaua, ġia ġena ura ilailanai. Dia mugumugu ai, senaġi nuġami na eura-iaġiani lorinai. Dia moni o farefare boġono doġari ġana, senaġi nuġami ġeri urai. <sup>3</sup>Barau na ġomi ġemi veġitaġau gaburenai etoreato mamoe serina (o ekalesia doġorona) asi boġono dori-naġinaġia noġa moġo vere baregori ġeveini kavana. Senaġi ġomi marevami boġono vaġa-ġitari, be beġene tovtovomi. <sup>4</sup>Moġesi boġo veini nai, mamoe Ġitaġauri Tauna Baregona, Keriso, beġoira-refoni ġaronai, korona namo vedaureana, asi berakavani dagarana, boġo ġabiani, mo tu maġuri vanaġivanaġi.

<sup>5</sup>Moġa ilailanai, ġomi tarima variġumi maki veġitaġau tauri boġono seġaġi-viniri, ma ġomi mabarami na manau dabuġana boġono vedabuġa-iaġia, boġono vevaġa-kava-vevini, korana Buka Veaġa ekirani, “Veiavi tarimari tu Barau na elautaririni, senaġi manau tarimari tu ġena namo e varevare-bara evinirini.”

<sup>6</sup>Moġa lorinai, tauġemi boġono vevaġa-manau, Barau ġimana seġukana gaburenai, benamo ġarona bene raġasi neganai, ġia na bene ġabi-vaisimi. <sup>7</sup>Ġemi nuġa-vekwaraġi dagarari mabarari ġia ġimanai boġono toreri, korana ġia na eġita-ġaumini. <sup>8</sup>Boġono tuġamaġi-roroġoto, boġono venari! Korana vaġa-rakavami tauna, Diabolo, tu erakao-rakaoni, laion noġa emagarani, emaramarani, ta neġania uranai. <sup>9</sup>Ġemi veġabidadamai boġono ruġa-gigitari, benamo Diabolo boġono kora-ġoia. Korana boġono tuġamaġi, ġoġanini midiguri ilailari tu ġomi karomi tanobara mabarana maki ġeġanini.

<sup>10</sup>Senaġi Barau, namo e vare-vare-bara mabarari na evonuto Barauna, na Keriso bakunai ekeamito, nega kotunai moġo boġo midigu-midiguni murinai, ġena tanu-vaġivanaġi marevana namona boġono ġabia ġana. Ġia na vau bevaġa-namo

ginikaumini, bevaḡa-ruḡa gigitarimini, e bevaḡa-kokoremini. <sup>11</sup> Seḡuka tu ḡia ḡena, bene iaḡo vanaḡivanaḡi! Amen.

### Vevaḡa-namo magona

<sup>12</sup> Siluano, (mai tu Silas), na bevaḡa-kavagu, mai fefa kubina baḡa tore-iaḡosia ḡomi ḡemi. ḡia au na aḡitaiani tu, ḡita tarikakara ma ḡena vetuḡamaḡikau ekalesia nuḡanai. Mai fefa batorea korana tu ḡegu ura bana vaḡa-kokoremi e bana vaḡa-ribami, Barau ḡena namo e varevare-bara moḡonina tu maiḡa. Be mai namo e varevare-bara nuḡanai boḡono ruḡa-gigitari.

<sup>13</sup> ḡomi karomi ekalesia tarimari Babulona ai maiḡeri, (mai tu ekalesia tarimari Romai ekiraḡirini), ḡia maki Barau na eḡabi-viriḡirito tarimari, na ḡemi vevaḡa-namo beḡe tuḡu, e natugu Mareko na maki ḡemi vevaḡa-namo betuḡu. <sup>14</sup> Veuravini verauna na boḡono vevaḡa-namo-vevini.

Keriso nuḡanai ḡotanuni tarimami mabarami maino ḡemi ai bene tanu.

## PETERO ĠENA TORETORE VAĠA-RUARUANA

2 Petero vaġa-foforina guruġari

Petero na mai fefa vaġa-ruaruana maki betaġu Roma na etoreato. Etoreato laġanina tu 65 ma 67 fakari nuġanai ta, mo tu Iesu emaseto murinai. Petero tu mai fefa etoreato murinai vauro ġebaru-seiriġoato, benamo ġevaġiato.

Mai fefa nuġanai siri baregori tu karoa 3:17-18.

Petero na mai fefa etoreato tauna korikori tu, 1) Barau ġena tarima veaġari bene vaġa-naġiri, be Barau korana-iaġina veiġari korikori beġene veiri ġana; 2) vevaġa-riba tarimari ġofaġofari na beġe ġofa-darererini garina ekira-toreġaurito; 3) riba korikorina Barau ġenana eiaġomani tu aiġesina ema Satani na riba ġofaġofana evaġa-raka-rosiani ribana tu aiġesina, moġeri ekiraġi-foforirito; 4) Vereġauka ġena ġaro ai Kota baregona beveġabini moġa ekiraġi-fofori ginikauato.

Petero na mai fefa tu maiġesina eboiġaiato:

1. Barau ġenana eiaġomani ribana korikorina tu kamasina - karoa 1
2. Riba moġonina na boraka-veġitani tu kara rakavana beġorani - karoa 2
3. Barau ġena kiraġitore moġoniri - karoa 3

**1** Au, Simona Petero, Iesu Keriso ġena vetuġunaġi ema ġena apostolo taugu; ġe-guna mai fefa eiaġosini.

Ġomi ġai ġesi ġera veġabidadama sebona taġabiato tarimami atore-vinimini. Ġera Barau, ġera Vevaġa-maġuri Tarimana Iesu Keriso, ġena vei-iobukaiobuka e vetuġa-maġikau lorinai, ġomi maki mo veġabidadama namo vedaureana sebona ġoġabiato ġai apostolo kavana. <sup>2</sup>Ġemi riba e tuġamaġi-faka Barau ġenai ema ġera Vereġauka Iesu Keriso ġenai beġene barego. Monana vau varevare-bara e maino maki ġemi ai beġene barego.

### Barau na ekeamito ġia ġena

<sup>3</sup>Ġena seġuka na Iesu Keriso na ġera maġuri vaġa-kokoreri dagarari mabarari varau evinirato, Barau ġena ura bitana korana-iaġi korikoriri ġana. Korana Keriso ġenana Barau tama ribaiato, ġena mareva baregona e namo ġerina ekearato tarimana.

<sup>4</sup>Ġena mareva baregona e namo ġerina ġena kiraġitore baregori e namo vedaureari varau evinirato vaġa-ilailana: Mai tanobara ġena ura rakavari ema mase ġevaġa-ġorarini veiġari ġerina bene vaġa-maġurira, ma Barau maġurina korikorina bitana ġabia.

<sup>5</sup>Moġa lorinai boġono kokore, ġemi veġabidadama ġenai veiġa namo boġono torekau; veiġa namo ġenai tuġamaġi-maġata boġono torekau; <sup>6</sup>tuġamaġi-maġata ġenai nuġa-gwaġiġi boġono torekau; nuġa-gwaġiġi ġenai vevaġa-gwaġiġi boġono torekau; vevaġa-gwaġiġi ġenai Barau korana-iaġina boġono torekau. <sup>7</sup>Barau korana-iaġina ġenai tarikakami veuraviniri boġono torekau; ema tarikakami veuraviniri ġenai veuravini tarimarima mabarari ġeri ai boġono torekau.

<sup>8</sup>Maiġeri maġuri tu ġomi ġemi ai beġene tanu, ema beġene barego, korana maiġeri na ġomi beġe launaġi-naġimini ema beġe vaġa-kokoremini, benamo ġemi riba Iesu Vereġauka ġenai tu asi beġe tanu-kavani, senaġi ġwaġwari namori vovoka beġe vetoreni. <sup>9</sup>A bema maiġeri maġuri ai erabuni tarimana, ġia tu mata-bubu tari-

mana kavana, korana Barau na ġena veiġa rakavari guineri varau eġuriġi-fitoġarito evetuġarekwani.

<sup>10</sup> Moġa lorinai, tarikakagu, boġono kokore, Barau na ekeamito e eviriġimito maniġa boġono vaġa-moġonia. Moġesi boġo veini nai tu, asi boġo ketoni. <sup>11</sup> Moġesi boġo veini nai, Barau na beġabiraġe-ginikaumini, benamo ġera Vereġauka e Vevaġa-maġuri Tarimana Iesu Keriso ġena tanu-vanaġivanaġi Basileiana nuġanai boġo raka-toġani.

<sup>12</sup> Mo maġuri namona tu ġomi ġoirami ai enarimini, moġa lorinai au na ġomi vanaġivanaġi basisiba-vini ġenoġoi-ġenoġoimini. Moġoni, maiġeri dagara mabarari varau ġoribarito, ema Barau ġena guruġa moġonina ġoġabiato ema ġoġabigigitariani maki. <sup>13</sup> Senaġi au atuġamaġini, mai dabara namori ġomi tu ġemi vetuġamaġi-taġo ai bana vaġa-foforiri, au roġo amaġuri-taġoni nuġanai. <sup>14</sup> Korana au ribagu, au tauġanigu korina tu dori atore-tariani, ġita ġera Vereġauka Iesu Keriso na evaġa-guruġaguto ilailanai. <sup>15</sup> Moġesi naima ġegu ura mai dagara mabarari bana sisiba-vini ġinikaumi. Benamo ġegu mase murinai, ġomi na boġono tuġamaġi-taġo vanaġi-vanaġiri ġana.

### Iesu marevana baregona matama na ġaġitaiato

<sup>16</sup> Ġai tu dia sinasina ġoġaġofari na ġita ġera Vereġauka Iesu Keriso ġena seġuka ema ġena iaġoma-ġenoġoi ġomi ġavaġa-ribamito. Asiġina! Ġai tauġema matama na ġia marevana baregona ġaġitaiato. <sup>17</sup> Ġai matama ġutuġutunai Barau ġita Tamara na ġia ara baregona ema mama ma seġukana eviniato. Mo mama baregona nuġanai etanuni Barauna guba na ekea-riġoto Iesu ġenai, ekirato, “Mai tu au Natugu, auraviniani; ema ġia ġenai aiaku-rakavani maki.” <sup>18</sup> Ġai tauġema na ġaseġaġiato, mai garo guba na emariġoto, ġia ġesi ġoro veaġanai ġatanuto-ġoi nai.

<sup>19</sup> Moġa lorinai ġai tu peroveta tarimari na ġekiraġi-torerito guruġari ġaġabigigitarinini. Ġomi maki moġeri guruġa boġo korana-iaġirini tu namo, korana peroveta tarimari ġeri guruġa tu lamefa kavana, gabu mukunai emamani, beiaġoni mo nega beraġasini, Keriso, laġani visiġuna ġomi nuġami ai bemama-rovorovoni. <sup>20</sup> Moġeri mabarari iatari ai ini guruġa asi boġono tuġarekwaia: Tarima ta ġia ġereġana ġena ribai peroveta guruġari tauri asi bekiraġirini. <sup>21</sup> Korana peroveta guruġari tu dia tarimarima ġeri ura na ġeiaġomato, senaġi Iauka Vevaġa na tarimarima evaġa-naġirito lorinai, ema guruġa evinirito ilailanai, Barau ġena guruġa ġeperoveta-iaġirito-ġoi.

### Vevaġa-riba tarimari ġoġaġofari

**2** Guinenai peroveta tarimari ġoġaġofari tu Isaraela tarimari fakari ai ġefoforito-ġoi. Mo dabara sebonai vevaġa-riba tarimari ġoġaġofari maki ġomi fakami ai beġe foforini. Ġia na vekuretoġai vevaġa-riba ġoġaġofari beġe vaġa-ribamini, ġemi veġabidadama vaġa-rakavari uranai. Ema ġeri Vereġauka, evoirito tarimana, maki ġia na beġe ruġaiani; moġesi beġe veini, ġia tauġeri na ġeri mase beġe vaġa-ġarimoġiani. <sup>2</sup> Ġutuma na maki ġia ġeri veiġa rakavari e mata-boraġa veiġari beġe tovotovorini, moġeri urari ai kotari na dabara moġonina tu dabara rakavanai beġe kiraġiani. <sup>3</sup> Ġeri mata-ġaniġani ġerina guruġa ġoġaġofari na nuġami beġe ġanirini, beiaġoni mo beġea ġabimini. Senaġi ġia tu kai-veġata na vevaġa-maoro-viniri tarimana tu enari-taġoni, ema ġia vaġa-maseri tarimana tu eġita-taġorini.



<sup>4</sup>Barau na ġevei-rakavato aneruri maki asi evaġa-maġuririto, senaġi rakava gabunai efiu-riġorito. Monai seini na ebarubarurito mukuna furufuru nuġanai, vevaġa-maoro ġarona ġevaġa-nogaiani. <sup>5</sup>Ema Barau na tanobara guinena maki asi evaġa-maġuriato, senaġi ġutuġutu evaġa-foforiato tu Barau asi ġekorana-iaġiato-ġoi tarimari ġeri ai; a Noa, vei-iobukaiobuka eġobata-iaġiato-ġoi tarimana, ema tarima imaima ruarua (7) moġo ġia ġesi evaġa-maġuririto. <sup>6</sup>Barau na Sodoma e Gomora maki evaġa-maoro vinirito, karava na evaġa-ġara ġosirito, kau ai ġeiaġoto. Mo veġa ġenana Barau asi ġekorana-iaġiani tarimari matari bene vaġa-kaniri ġana. <sup>7</sup>A Lota moġo eġabi-maġuriato, ġia tu vei-iobukaiobuka tarimana, ġia maki tarimarima ġeri veġa rakavari e boraġari tuġamaġiri ai egauto. <sup>8</sup>Mo tarima iobukaioubukana tu rakava tarimari fakari ai etanuto-ġoi, ġaro vanaġivanaġi enuġa-midigu midiguto-ġoi, korana ġia na Barau ġena taravatu kira-fitoġari veġari eġitarito-ġoi ema eseġaġirito-ġoi nai.

<sup>9</sup>Boġono tuġamaġi, Vereġauka na tu ġia ġekorana-iaġiani tarimari veribaġani e vedaġaraġe nuġari na beġabi-maġuririni riba, a vei-rakava tarimari bebiri-ġaurini, beiaġoni mo, Barau na bevaġa-maoro vinirini ġaronai. <sup>10</sup>Ma tarima kotari na rakava voina barego lelevaġina beġe doġariani, mai tu tauġanina ġena ura boraġari ġeiaġo-vinirini tarimari ema Barau ġena guruġa ġekira-fitoġaiani tarimari.

Mai vevaġa-riba tarimari ġofaġofari tu veiavi e vekiraġi-rakava rakava tarimari, iauka baregori asi ġegubakaurini, ġerikiriki-iaġirini. <sup>11</sup>Aneru tu kokore e seġuka lel-evaġi, mai ġofaġofa tarimari ġeri seġuka ġevanaġirito, senaġi aneru na iauka baregori tu asi ġevaġa-daġarini e asi ġevei-veġare veġarerini Vereġauka ġoiranai. <sup>12</sup>A maiġeri tarimarima tu asi ġetuġamaġini, ġeri vemamiraġi na moġo ġeġori-kaurini, noġa moġo boġa bairi kavana, ġemaġurini tu beġene vaġiri moġo ġana kavari. Asi ġeribarini dagarari ġerikiriki-iaġirini. Moġa lorinai ġia tu mo boġa bairi kavari beġe vaġa-rakavarini e beġe rekwarkwani. <sup>13</sup>Ġeri veġa rakavari voiri beġe ġabirini. Tauġaniri vaġa-iakuri veġari laġani matabarai ġeveirini, asi ġemaiakarini. Moġeri tarima ġomi ġemi ġanivegogo ġoveirini nai, ġia tu miro noġa ġomi fakami ai; korana ġeri vevaġa-riba ġofaġofari tu ġemi ġanivegogo ai maki ġekiraġirini. <sup>14</sup>Vavine ta ġeġitaiani nai, mata-boraġa tuġamaġiri moġo ġeveini; rakava veiveiri ai asi ġegauni. Veġabidadamai roġosi beġene gwaġiġi tarimari ġevaġa-toġarini. Ġia nuġari tu mata-ġaniġani ai ġevaġa-maranarito. Barau na ġeri rakava voiri bevinirini veġata. <sup>15</sup>Ġia na dabara maorona beġe raga-kwanea, ġeraka-taġuitaġuini, Balam, Beoro natuna, eveito kavana. Ġia tu moni uranai veġa rakavari eveirito-ġoi. <sup>16</sup>Senaġi ġena veġa rakavari lorinai, doniki na evaġa-guruġaiato. Doniki tu asi guruġa ribana, senaġi tarimarima garori ai evaġa-guruġaiato, naima mo tarima ġena veġa babori veiveiri evaġa-dokoato.

<sup>17</sup>Moġeri tarima tu nanu guriri kakorori kavana; ema magube iavara na ekwari-rakaorakaorini kavana. Barau na mukuna furufuru gabuna ġeri etoreato. <sup>18</sup>Ġeguruġa-kavani ema ġeveiavi-kavani, ma tarima kotari tu vau moġo dabara moġoninai asi ġerakani tarimari fakari na ġeraka-veġitani, senaġi ġia na tu tauġanina ġena ura rakavari e mata-boraġa veġari na ma ġema-gagare-ġaurini. <sup>19</sup>Tarima ġeġofarini, ġekirani, maġuri namona e fakana beġe doġariani ġetoni, senaġi ġia tauġeri tu ġeri ura rakavari vetuġunaġiri ġeiaġo-vinini. Korana tarimarima tu veġa rakavana ta na eboroġiani nai, ġia tu mo veġa rakavana ġena tuġu-rakaorakao tarimana. <sup>20</sup>Moġoni, ġia na ġita ġera Vereġauka e Vevaġa-maġuri Tarimana Iesu Keriso

gema-ribaiato dainai, tanobara gēna miro e vei-rakava gēnana gēraka-vegītato; senaḡi moḡa murinai bema rakavana nuḡanai ma gēraka-toḡani, benamo gēna seḡuka gaburenai ma gētanuni neganai, ḡia gēri maḡuri tu berakava-kwaikwaini dokonai, dia tovotovonai kavana. <sup>21</sup> ḡia tu dabara roroḡotona asi gēre riba-guinea tu namo, a asi namo, gēribaiato murinai, taravatu veaḡana, gēgabiato dagarana, ma gēruḡa-doḡemuriḡiani. <sup>22</sup> Moḡesi gēveini nai, ḡia na mai veḡausina o sisiba guruḡari ruarua maiḡeri gēvaḡa-moḡonirini, ekirani, “Kwaiva na emumuta-vaḡiani dagarana ma ea ḡani-gēnoḡoiani,” ema, “Gevaḡa-fouani baina tu ma eḡenoḡoini, ea vedokurani.”

### Iesu Keriso gēna gēnoḡoi

**3** Ḡatagu mabarami, maitoma tu fefa vaḡa-ruaruana mai atore-vinimini. Mai fefa ruarua gērina, au na ḡomi nuḡami ai tuḡamaḡi roroḡotori bana vaḡa-variḡu gēnoḡoiri atoni. <sup>2</sup> Au aurani peroveta veaḡari na gēkiraḡirito guruḡari guineri laḡaniri ai boḡono tuḡamaḡi-taḡori, ema apostolo tarimari na ḡera Vereḡauka e Vevaḡa-maḡuri Tarimana gēna vevaḡa-naḡi gēkira-varamito guruḡari maki.

<sup>3</sup> Guine tu, ḡomi boḡono riba-maoro: Ḡaro dokori ai vei-gāreḡare tarimari beḡe foforini, gēri ura rakavari na beḡe guine-iaḡirini. Ḡia na beḡe rikiriki-iaḡimini, <sup>4</sup> beḡe kirani, “Keriso eguruḡa-toreto, ma beḡenoḡoi-iaḡomani etato, nene? Be ḡia tu ainai? Ḡita tamara gēvaḡa-noga-kavato, kai-veḡata gēmaseto, senaḡi dagara mabarari tu tanobara evesinato kavana roḡo gaburi ai gētanuni!”

<sup>5-6</sup> Maiḡeri tarima asi gēurani mai guruḡa maiḡa beḡene seḡaḡia: Barau na tanobara guinena ḡutuḡutu nanuna na evaḡa-rakavaiaato. A guba e tanobara tu tovo-tovonai veḡata gēna guruḡa gēnana eveirito, ma tanobara tu nanu nuḡana na emaraḡeto ema nanu na etanu-gēḡeraḡiato. <sup>7</sup> Ma initoma guba e tanobara roḡo gētanuni tu, Barau gēna guruḡa sebona na eḡabi-taḡorini, karava na vau bene vaḡa-rakavaia tuḡamaḡinai. Barau asi gēkorana-iaḡiani tarimari vaḡa-roroḡotori ema vaḡa-mouri ḡaronai vau bevaḡa-rakava sebonarini.

<sup>8</sup> Ḡatagu mabarami, mai dagara sebona asi boḡono tuḡarekwaia: Vereḡauka gēnai taimi tu irau, ḡita gērai tu irau, korana ḡia gēnai ḡaro sebona tu laḡani 1,000 kavana, ema laḡani 1,000 tu ḡaro sebona kavana. <sup>9</sup> Vereḡauka na ekiraḡi-torerito dagarari veiveiri ai tu asi ekwaiboni, tarima kotari gētuḡamaḡini kavana. Asīḡina, ḡia ḡomi gēmi ai tu evevaḡa-gwaḡiḡini, korana ḡia asi eurani tarima ta bene rekwarekwa, senaḡi eurani mabarara ḡera rakava gērina bitana vetuḡamaḡi-kure ma bitana raka-kure.

### Guba tanobara beḡe rekwarekwani

<sup>10</sup> Senaḡi Vereḡauka gēna ḡaro beraḡasini tu lema tarimana ta eraḡasini kavana. Mo ḡaro ai guba beḡe rekwa-rekwani ma gurugururi ḡesi. Gubai gētanuni dagarari mabarari karava na bevaḡa-ḡara ḡosirini, ema tanobara ma iatanai gētanuni dagarari mabarari beḡe rekwa-rekwani. <sup>11</sup> Boḡono tuḡamaḡi, maiḡeri dagara mabarari tu maiḡesi dabaranai beḡe rakavani, be ḡomi tu kamasi boḡono tanu ḡotoni? Ḡomi gēmi maḡuri tu beḡene veaḡa ema Barau gēna ura boḡono korana-iaḡiri. <sup>12</sup> Barau gēna ḡaro boḡono naria, ema gēna raḡasi boḡono vaḡa-ḡarimoḡia. Mo ḡaro ai guba beḡe ḡararini e beḡe rakavani, ema gubai gētanuni dagarari seḡukana na bevaḡa-

veverini. <sup>13</sup> Senaḡi ḡita tu Barau na ekiraḡi-toreato dagarana tavaḡa-nogaiani, guba e tanobara variḡuri, monai veiḡa roroḡotori beḡe tanuni gabuna.

### Velaunaḡi e vevaḡa-namo guruḡari

<sup>14</sup> Moḡa lorinai, ḡatagu mabarami, alaunaḡimini, mo ḡaro ḡovaḡa-nogaiani nuḡanai, asi miromi e asi ḡemi kerere ta boḡono tanu Barau ḡoiranai, ema ḡia ḡesi maino ai boḡono tanu. <sup>15</sup> Gera Vereḡauka ḡena vevaḡa-gwaḡiḡi boḡono tuḡa-maḡia, ḡia tu ḡomi evaḡa-nogamini bene ḡabi-maḡurimi tuḡamaḡinai. Barau na ḡita tarikakara namona Paulo iaunega eviniato, benamo ḡia na moḡesi ilailanai etorevinimito. <sup>16</sup> ḡia ḡena fefa mabarari ai maki maniḡa ekiraḡiani. Dagara kotari ḡena fefa nuḡari ai tu gwaḡiḡi rakava, asi ribari tarimari ema ḡeri veḡabidadama asi gwaḡiḡi tarimari na ḡevevaḡa-riba-iaḡi ḡofaḡofarini. Buka Vevaḡa nuḡanai maki toretore mabarari moḡesi ḡeḡofaḡofa-iaḡirini. Moḡesi ḡeveini nai, tauḡeri ḡeri maḡuri ḡevaḡa-rakavarini.

<sup>17</sup> Senaḡi ḡomi, au ḡatagu namomi, tu varau ma ribami, maiḡeri dagarai lorimi boḡono vetore, be taravatu asi ḡekorana-iaḡiani tarimari na asi beḡene ḡofadareremi, ḡemi veḡabidadama namori na boḡo keto-firiḡoni garina. <sup>18</sup> A ḡita ḡera Vereḡauka e Vevaḡa-maḡuri Tarimana Iesu Keriso ḡena namo e veuravini ḡerai etoreani moḡa boḡono vaḡa-tubua-ḡoi, ema ḡia boḡono riba-ginikaua. ḡia marevana bisini vaḡa-raḡea toma bene iaḡo vanaḡivanaḡi! Amen.

## IOANE ĜENA TORETORE GINIGUINENA

1 Ioane vaĝa-foforina guruĝari

Ioane na mai fefa giniguinena maiĝa tu dia ekalesia ta ĝena o ekalesia doĝorona ta ĝena etoreato. Asiĝi. Mai tu irau bese ekalesia doĝorori tari, ema Keriso ĝevaĝa-moĝoniato-ĝoi gabu mabarari ai ĝetanuni tarimari ĝeri. Ioane ĝena Vari Namona, e Ioane ĝena fefa toitoi, ema Apokalupo tu ĝia na etorerito. Ioane na mai fefa tu laĝani 85 ma 100 fakari nuĝanai ta etoreato, mo tu Iesu maki emaseto murinai vau.

Mai fefa nuĝanai siri baregori tu karoa 4:16; 5:13.

Ioane na mai fefa etoreato korana tu eurato, 1) ekalesia bene vaĝa-ribari, Barau ĝenana eiaĝomani ribana moĝonina eĝabiani tarimana tu Barau sevisevinai vanaĝi-vanaĝi etanuni; 2) tarikaka bene vaĝa-naĝiri, ĝia tata ĝeri veĝata Barau ĝesi, e tarikaka tari ĝesi, e tanobara tarimari ema dagarari ĝesi, ema vei-rakava tarimari ĝesi beĝene ĝita-ĝinikauri. Asi beĝene vekako mata-bubu; 3) Keriso ĝevetari-viniani tarimari ĝeri ĝofaĝofa veiĝari bene kiraĝi-foforiri.

Ioane na mai fefa tu maiĝesina eboioĝaiato:

1. Barau tu lamefa mamana kavana emamani - karoa 1-2
2. Barau tu veuravini - karoa 3-4
3. Barau tu maĝuri - karoa 5

### Maĝuri guruĝana

**1** Tovotovona na veĝata etanuto dagarana, ĝaseĝaĝiato, matama na ĝaĝitaiato, ĝenai ĝaboĝekauto, ema ĝiamama na ĝaĝabi-karaiato: Mai tu Maĝuri Guruĝana ĝavari-fiواني. <sup>2</sup> Mo maĝuri efororito, benamo ĝai na ĝaĝitaiato. Moĝa lorinai ĝemi ĝavari-fiواني ema maĝuri vanaĝivanaĝi ĝakira-varamini. Mo maĝuri tu Tamara ĝesi etanuto-ĝoi ema ĝai ĝemai ema fororito. <sup>3</sup> Ĝai na ĝaĝitaiato ema ĝaseĝaĝiato maĝurina ĝomi ĝemi ĝakiraĝi-foforiani, be ĝomi maki ĝai ĝesi bitana sebona uranai, korana ĝai tu Tamara ema ĝia Natuna Iesu Keriso ĝesi doĝoro sebona. <sup>4</sup> Mai guruĝa ĝatore-vinimini, korana ĝita nuĝara iaku na beĝene vonuvonu-raĝe ĝana.

### Barau tu mama

<sup>5</sup> Iesu ĝenana ĝaseĝaĝiato varina ĝemi ĝavari-fiواني tu maiĝa: Barau tu mama, mukuna kotuna ta maki ĝia ĝenai asi etanuni. <sup>6</sup> Bema ĝita mukuna maĝurinai roĝo tarakani nuĝanai bita kirani, ĝita tu Barau ĝesi tadoĝoro-sebonani, ĝita tu taĝofaĝofani ema guruĝa moĝonina asi takorana-iaĝiani. <sup>7</sup> Senaĝi bema mama nuĝanai bita rakani Barau kavana, ĝita tata tu doĝoro sebona tarimara, ema ĝia Natuna Iesu rarana na ĝita ĝera rakava mabarari beĝuriĝi-vaĝirini.

<sup>8</sup> Bema ĝita bita kirani, ĝita tu asi ĝera vei-rakava, ĝita tu tauĝera taveĝofani, ema ĝita ĝerai guruĝa moĝonina tu asiĝina. <sup>9</sup> A bema ĝita ĝera vei-rakava bita kiraĝi-foforirini nai, ĝia tu ma ĝena vetuĝamaĝikau, ĝera veiĝa rakavari mabarari betuĝamaĝi-fitoĝarini, ema ĝera veiĝa ĝeĝevageĝevari beĝuriĝi-vaĝirini. <sup>10</sup> Bema ĝita bita kirani, nega sebona maki asi tavei-rakavato, Barau tu ĝofaĝofa baranai bita vaĝa-iaĝoani, ema ĝia ĝena guruĝa tu ĝita nuĝarai asi etanuni.

### Keriso ġita ġera vevaġa-kava tauna

**2** Natugu, mai guruġa atore-vinimini tu ġomi rakava asi boġono vei ġana. Senaġi bema tarima ta bevei-rakavani nai, ġita tu ma ġera vevaġa-kava tarimana Tamara ġesi etanuni, Iesu Keriso, vei-iobukaiobuka tarimana. <sup>2</sup> Keriso na ġita ġera rakava voivaġiri ġauveina eveiato, dia ġita ġera rakava moġo, senaġi tarimarima mabarari ġeri rakava.

<sup>3</sup> Bema ġita Barau ġena taravatu guruġari bita korana-iaġirini nai, monana bita ribani, ġita tu moġoni Barau taribaiato. <sup>4</sup> Bema ta bekirani, “Au tu Barau ribagu,” senaġi ġena taravatu guruġari asi bekorana-iaġirini, mo tarima tu ġoġaġofa tarimana, guruġa moġonina ġia nuġanai asi etanuni. <sup>5</sup> Senaġi deikara na Barau ġena guruġa ekorana-iaġirini tu, Barau moġoni eura-viniani ma nuġana mabarana ġesi. Monana vau taribani, ġita tu ġia ġesi moġoni sebona. <sup>6</sup> Deikara ekirani, ġia tu Barau ġesi doġoro sebona etoni tarimana tu, Iesu Keriso etanuto-ġoi kavana bene tanu.

### Taravatu variġuna

<sup>7</sup> Ġatagu mabarami, mai taravatu atore-vinimini tu dia variġu, senaġi taravatu guinena, tovotovona na veġata ġoġabiato dagarana. Mai taravatu guinena tu ġoseġaġi-guineato taravatuna. <sup>8</sup> Senaġi mai taravatu atore-vinimini maki tu variġu; mo taravatu ġena moġoni tu Keriso ġenai ema ġomi ġemi ai maki efoforini, korana mukuna tu mai ekorini ema mama moġonina tu varau emamani.

<sup>9</sup> Tarima ta ekirani, ġia tu mama nuġanai etanuni, senaġi tarikakana tu ebaru-viniani, ġia tu roġo mukuna nuġanai etanuni. <sup>10</sup> Tarikakana eura-viniani tarimana tu mama nuġanai etanuni. Ġia bevaġa-vedaġa-raġeani dagarana ta ġenai asi etanuni. <sup>11</sup> Senaġi tarikakana ebaru-viniani tarimana tu mukuna nuġanai etanuni e erakani. Ġia asi ribana aiġana eiaġoni, korana mukuna na matana evei-bubuani.

<sup>12</sup> Natugu, au na atore-vinimini korana tu, ġomi ġemi rakava tu Barau na etuġamaġi-fitoġarito Keriso aranai.

<sup>13</sup> Tamagu, atore-vinimini korana tu, tovotovona na veġata etanuto tarimana tu ġoribaiato.

Maraġa variġu, atore-vinimini korana tu, Satani ġovaġa-darereato.

<sup>14</sup> Natugu, atore-vinimini korana tu, Tamara ġoribaiato.

Tamagu, atore-vinimini korana tu, tovotovona na veġata etanuto tarimana tu ġoribaiato.

Maraġa variġu, atore-vinimini, korana ġomi tu ma gwadami; Barau ġena guruġa ġomi nuġami ai etanuni, ema ġomi na Satani ġovaġa-darereato.

<sup>15</sup> Tanobara asi boġono ura-vinia, ema tanobara dagarari maki asi boġono ura-viniri. Bema tarima ta tanobara eura-viniani nai, Barau ġena veuravini ġia nuġanai tu asi etanuni. <sup>16</sup> Korana tu tanobara veiġari mabarari, tauġani ġena ura rakavari, mata-ġaniġani, ema veiavi, tu dia Tamara Barau ġenana ġeiaġomani, senaġi tanobara ġenana ġeiaġomani. <sup>17</sup> Mai tanobara ema tarimarima na ġemata-ġaniġanirini dagarari mabarari tu beġe korini, senaġi Barau ġena ura eveiani tarimana tu betanuvanaġi vanaġini.

### Keriso evetari-viniani tarimana

<sup>18</sup> Natugu, ġaro dokona tu maiġa. Ġoseġaġito ilailanai Keriso evetari-viniani tarimana tu beiaġomani, maitoma maki Keriso ġevetari-viniani tarimari vovoka beġe iaġoma. Moġesi nai taribani, mai tu hora magona. <sup>19</sup> Moġeri tarimarima tu ġita ġesi tavegogoto-ġoi, senaġi ġia tu dia ġita ġera doġoro korikori. Moġa lorinai ġita ġeragakwanerato. Bema ġia moġoni ġita ġera doġoro korikori nai tu, ġita ġesi roġo tara tanu. Senaġi ġita ġerana ġeveġitato. Monana evaġa-foforiani, ġia mabarari tu dia ġita ġera doġoro.

<sup>20</sup> A ġomi na tu Iauka Veaġa ġoġabiato, Keriso na eboroġimito, moġa lorinai ġomi mabarami guruġa moġonina tu ma ribami. <sup>21</sup> Au na atore-vinimini tu dia guruġa moġonina asi ribami nai, senaġi guruġa moġonina tu ma ribami dainai, ema ribami maki, ġofaġofa tu guruġa moġonina ġenana asi eiaġomani.

<sup>22</sup> Ġofaġofa tarimana tu dei? Iesu tu dia Keriso, (Barau na ekiraġi-toreato vevaġa-maġuri tauna), etoni tarimana. Mo tarima tu Keriso evetari-viniani tauna. Ġia tu Tamara e Natuna ekira-fitoġarini tarimana. <sup>23</sup> Natuna ekira-fitoġaiani tarimana tu Tamana maki ġia ġenai tu asiġina. A deikara na Natuna eġabi-raġeani tarimana tu, Tamana maki eġabi-raġeani, ema Tamana maki ġia ġenai etanuni.

<sup>24</sup> Tovotovona na veġata ġoseġaġiato guruġana nuġami ai bene tanu. Bema nuġami ai betanuni tu, ġomi maki Natuna e Tamana nuġari ai boġo tanuni. <sup>25</sup> Ema mai maġuri vanaġivanaġi tu Keriso tauġena na ġita ġera ekiraġi-toreato dagarana.

<sup>26</sup> Maiġeri guruġa ġomi atore-vinimini tu, ġomi ġeġofa-veġitami ġetoni tarimari akiraġi-foforirini. <sup>27</sup> Senaġi ġomi na Iauka Veaġa ġoġabiato Keriso ġenana tu nuġami ai etanuni. Moġa lorinai initoma vevaġa-riba tarimana ta ġomi bene vaġa-ribami ġana tu asi boġo ura-viniani. Korana mo Iauka Veaġa na dagara mabarari evaġa-ribamini, ema ġena guruġa tu moġoni, dia ġofaġofa. Moġa lorinai evaġa-ribamito ilailanai, Keriso nuġanai boġono tanu.

<sup>28</sup> Natugu, Keriso nuġanai boġono tanu. Be ġia befororini ġaronai tu nuġara ma kokoreri ema asi beġene maiakara ġia ġoiranai ġena ġenoġoi ai. <sup>29</sup> Bema ġomi ma ribami Keriso ġena veġa tu iobukaiobuka nai, boġo ribani, ġevei-iobuka iobukani tarimari mabarari tu Barau ġenana ġemaġurito.

### Barau natuna

**3** Ġoġitaia, Tamara ġena veuravini tu asikeikeina ġita iatarai etoreato. Moġesi naima ġita ekiraġirani Barau natuna. Moġoni, ġita tu ġia natuna. Moġa lorinai tanobara na maki asi eribarani, korana Barau maki asi ġeribaiato. <sup>2</sup> Ġatagu mabarami, maitoma ġita tu Barau natuna. Ġita kara ai bita iaġoni tu roġosi bene fofori. Senaġi ġita ribara, Keriso befororini ġaronai, ġita tu ġia ilailanai bita iaġoni, korana ġia tu vetoġana korikorinai bita ġitaiani. <sup>3</sup> Tarimarima mabarari mai tuġa-maġikau ġeġabiani tu, tauġeri ġevevaġa-iarevani, korana Keriso tu asi mirona e asi vetoukauna ta.

<sup>4</sup> Rakava ġeveini tarimari mabarari tu Barau ġena taravatu ġekira-fitoġaiani, korana vei-rakava tu taravatu ġekira-fitoġaiani dagarana. <sup>5</sup> Senaġi ġomi tu ma ribami, Keriso efororito korana tu, ġita ġera rakava bene ġabi-veġitari ġana. Ġia ġenai rakava ta tu asiġi. <sup>6</sup> Keriso nuġanai etanuni tarimana tu asi evei-rakava rovaġi-rovaġini. Rakava eveini tarimana na Keriso tu asi eġitaato ema asi eribaiato maki.

<sup>7</sup>Natugu, ta na asi bene ġofami. Veiġa iobukaiobukari eveini tarimana tu vei-iobukaiobuka tarimana, vaġa-ilailana Keriso kavana vei-iobukaiobuka tarimana. <sup>8</sup>A vei-rakava eveini tarimana tu Diabolo ġena tarima, korana Diabolo tu tovotovona na veġata roġo evei-rakava-iaġomani. Barau Natuna efororito korana tu, Diabolo ġena ġauvei benema vaġa-rakavaia ġana.

<sup>9</sup>Barau ġenana emaġurito tarimana tu asi bevei-rakava rovaġi-rovaġini, korana Barau ġena maġuri tu ġia ġenai etanuni. Ġia tu vei-rakava asi ma bevei-ġenoġoini, korana Barau tu ġia Tamana. <sup>10</sup>Barau natuna ema Diabolo natuna vetoġari ġeri irau tu maiġesi beġe fororini: Veiġa iobukaiobukari asi eveini tarimana ema tarikakana asi eura-vinirini tarimana tu dia Barau natuna.

### Boġono veura-vevini

<sup>11</sup>Tovotovona na veġata ġoseġaġiato guruġana tu maiġesi: Ġita tata bitana veura-vevini. <sup>12</sup>Ġita tu Kaino eveito kavana tu asi bitana vei. Ġia tu Satani ġena tarima. Tarina korikorina Abela evaġi-maseato. Karase nai Kaino na evaġiato? Korana ġia ġena veiġa tu rakava, a tarina ġena veiġa tu iobuka.

<sup>13</sup>Tarikakagu mabarami, bema tanobara maġurinai ġetanuni tarimari na beiaurakavamini nai, nuġami asi beġene farevaġi. <sup>14</sup>Ġita ribara, ġita tu mase ġenana maġuri ġenai tavanaġito. Vetoġana tu tarikakara taura-vinirini. Tarikakana asi eura-viniani tarimana tu roġo mase nuġanai etanuni. <sup>15</sup>Deikara tarikakana eiaurakava-viniani tarimana tu vevaġideba tarimana. Ġomi ribami, vevaġideba tarimana nuġanai tu maġuri vanaġivanaġi asi etanuni. <sup>16</sup>Keriso na ġena maġuri etore-tariato, ġita bitana maġuri ġana. Monai veuravini anina bita ribaiani. Moġa lorinai ġita na maki tarikakara dairi ai ġera maġuri bitana tore-tariri neġi namo. <sup>17</sup>Bema tarima ta ma ġena fafare vovoka, benamo tarikakana ta beġitaiani ġena rabu ai, senaġi asi ma bevetuġa-ġwaiiani e asi bevaġa-kavaiani, kamara dabarai Barau ġena veuravini ġia nuġanai betanuni? <sup>18</sup>Natugu, ġera veuravini tu dia guruġa koriri ai moġo bitana kiraġiri, senaġi veiġai ema moġoni ai bitana vaġa-foforia.

<sup>19</sup>Monana vau bita ribani, ġita tu Barau ġena guruġa moġonina na beġori-kaurani, ema Barau ġoiranai nuġara beġe kokoreni. <sup>20</sup>Bema ġita nuġara beġe kirani, ġita tu kerere, bitana riba, Barau tu barego, a ġita nuġara tu kei, ema Barau tu dagara mabarari ma ribana. <sup>21</sup>Ġatagu mabarami, bema ġita nuġara na asi beġe kiraġi-kerererani nai tu, ġita nuġara tu ma gwadara ġesi Barau ġoiranai bita ruġa-tarini. <sup>22</sup>Ema bita noġiani dagarari mabarari Barau na bevinirani, korana ġena taravatu guruġari takorana-iaġirini ema Barau vaġa-iakuna veiġari taveirini nai. <sup>23</sup>Ġia ġena taravatu guruġana tu maiġa: Ġia Natuna Iesu Keriso arana bitana vaġa-moġonia, ema ġita tata bitana veura-vevini, Keriso na taravatu guruġana evinirato ilailanai. <sup>24</sup>Barau ġena taravatu guruġari ekorana-iaġirini tarimana tu Barau nuġanai etanuni, ema Barau maki ġia nuġanai etanuni. Barau na Iauka Veaġa evinirato, monana ġita taribani, ġia tu ġita nuġarai etanuni.

### Iauka moġonina ema ġofaġofa iaukana

**4** Ġatagu mabarami, iauka mabarari asi boġono vaġa-moġoniri, senaġi iauka boġono ribari ġana boġono tovanaġi-guineri. Ġia tu Barau ġenana ġeiaġomato ba? Korana peroveta tarimari ġofaġofari ġutuma tanobarai ġerakao-rakaoni. <sup>2</sup>Barau Iaukana tu mai vetoġai boġo ribaiani: Iauka mabarari beġe kirani, “Iesu Keriso tu

tarimarimai eiaĝoto,” ĝia tu moĝoni Barau ĝenana. <sup>3</sup>Ma iauka mabarari asi beĝe kirani, Iesu Keriso tu tarimarimai eiaĝoto, tu dia Barau ĝenana. Ĝia tu Iesu evetari-viniani iaukana. Goseĝaĝito, ĝia tu beiaĝomani, ema ĝia tu varau maĝa tanobarai.

<sup>4</sup>Natugu, ĝomi tu Barau ĝenana, ema ĝomi na peroveta tarimari ĝofaĝofari ĝovaĝa-darererito, korana ĝomi nuĝami ai etanuni Iaukana seĝukana na tanobara iaukari ĝeri seĝuka evanaĝirini. <sup>5</sup>Mo peroveta tarimari ĝofaĝofari tu tanobara ĝena, moĝesi naima ĝeri guruĝa tu tanobara ĝena dabarai ĝeguruĝani, ema tanobara na maki ĝia ĝeseĝaĝi-vinirini. <sup>6</sup>Senaĝi ĝita tu Barau ĝena. Be Barau ĝena tarimarima na tu beĝe seĝaĝi-vinirani, a Barau asi ĝekorana-iaĝiani tarimari na tu asi beĝe seĝaĝi-vinirani. Iauka moĝonina e ĝofaĝofa iaukana tu mo vetoĝai bita ĝita-learini.

### Barau tu veuravini

<sup>7</sup>Ĝatagu mabarami, ĝita tata bitana veura-vevini, korana veuravini tu Barau ĝenana eiaĝomani. Eveura-vinini tarimana tu Barau ĝenana emaĝurito, ema ĝia ma ribana Barau. <sup>8</sup>Asi ĝena veuravini tarimana tu Barau asi ribana, korana Barau tu veuravini. <sup>9</sup>Barau ĝena veuravini ĝita ĝerai tu maĝesi evaĝa-foforiato: Barau na Natuna ĝora-ĝereĝa tanobara ĝana etuĝuato, ĝia bakunai ĝita bitana maĝuri ĝana. <sup>10</sup>Veuravini anina tu maĝa: Dia ĝita na Barau taura-viniato, senaĝi ĝia na ĝita eura-vinirato, benamo Natuna etuĝuato, ĝena mase ĝenana ĝita ĝera rakava benema voi-vaĝiri ĝana.

<sup>11</sup>Ĝatagu mabarami, Barau na ĝita tu moĝesina eura-vinirato nai, ĝita maki tata bitana veura-vevini. <sup>12</sup>Tarima ta na Barau asi eĝitaiato. Senaĝi bema ĝita tata taveura-vevinini nai tu, Barau tu ĝita nuĝarai etanuni ema ĝena veuravini tu ebaregoni ĝita nuĝarai.

<sup>13</sup>Ĝita ma ribara ĝita tu Barau nuĝanai tatanuni, ema Barau maki ĝita nuĝarai etanuni, korana ĝia Iaukana ĝita evinirato. <sup>14</sup>Ĝai na ĝaĝitaiato, ema tari maki ĝakiravararito, Tamara na tu Natuna etuĝuato tanobara ĝena vevaĝa-maĝuri tarimanai bene iaĝo ĝana. <sup>15</sup>Bema tarima ta bekirani, “Iesu tu Barau Natuna,” ĝia nuĝanai tu Barau ema ĝia maki Barau nuĝanai etanuni. <sup>16</sup>Ema ĝita maki ribara e tavaĝa-moĝoniani, Barau na ĝita eura-vinirani.

Barau tu veuravini, ema veuravini ai etanuni tarimana tu Barau nuĝanai etanuni, ema Barau maki ĝia nuĝanai etanuni. <sup>17</sup>Moĝesi bita tanuni vau, Barau ĝena veuravini bebaregoni ĝita ĝerai, benamo Kota baregona ĝaronai ĝita tu ma kokorera ĝesi bita foforini. Korana ĝita ĝera maĝuri mai tanobarai tu Keriso ĝena maĝuri ĝesi ilaila. <sup>18</sup>Veuravini ai gari tu asi etanuni. Veuravini korikorina na gari elai-fitoĝaiani. Gari ai etanuni tarimana tu vei-rakava voina garina eveini. Bema tarima ta egarini, ĝia tu veuravini korikori ai roĝosi bene barego.

<sup>19</sup>Ĝita taveura-vinini, korana Barau na ĝita eura-vinirato. <sup>20</sup>Bema tarima ta ekirani, “Au na Barau aura-viniani,” senaĝi tarikakana tu ebaru-viniani, ĝia tu ĝofaĝofa tarimana. Korana bema ĝia tarikakana eĝitaiani, senaĝi asi eura-viniani, kamara dabarai asi eĝitaiani Barauna beura-viniani. <sup>21</sup>Keriso na mai taravatu guruĝana evinirato: Barau eura-viniani tarimana na tu tari-kakana maki bene uravinia.



### Ĝera kokore tanobara iatanai

**5** Deikara na evaĝa-moĝoniani Iesu tu moĝoni Keriso, (Barau na ekiraĝi-toreato vevaĝa-maĝuri tauna), ĝia tu Barau ĝenana emaĝurito. Ema Tamana eura-viniani tarimana na tu natuna maki eura-viniani. <sup>2</sup>Barau taura-viniani ema ĝena taravatu guruĝari takorana-iaĝirini nai tu, moĝeri na ĝita bita ribani, Barau natuna taura-vinirini. <sup>3</sup>Barau taura-viniani nai tu ĝena taravatu guruĝari takorana-iaĝirini. Ĝia ĝena taravatu guruĝari korana-iaĝiri tu asi gwaĝiĝi. <sup>4</sup>Korana tu Barau natuna mabarari na tanobara ĝevaĝa-darereani. Ĝita tu ĝera veĝabidadama na tanobara tavaĝa-darereani. <sup>5</sup>Deikara na tanobara evaĝa-darereani? Iesu evaĝa-moĝoniani ĝia tu Barau Natuna etoni tarimana moĝo.

### Barau na ĝia Natuna Iesu Keriso ekiraĝi-foforiani

<sup>6</sup>Iesu Keriso tu eiaĝomato nanu na ebabatisoato, ema rarana eriĝoto satauro ai. Ĝia tu dia nanu ĝereĝana na moĝo eiaĝomato, senaĝi nanu e rara ĝerina. Iauka Veaĝa na evaĝa-foforiani mai tu moĝoni, korana Iauka tu moĝoni. <sup>7</sup>Dagara tu toitoi na ĝevaĝa-foforiani: <sup>8</sup>Iauka, nanu, ema rara. Ĝia toitoi ĝeri guruĝa-fofori tu sebona.

<sup>9</sup>Tarimarima ĝeri vevaĝa-moĝoni guruĝari tu taĝabi-raĝerini, senaĝi Barau ĝena vevarifiu tu barego lelevaĝi, korana moĝa tu Barau ĝena vevaĝa-moĝoni, Natuna evaĝa-moĝoniani guruĝana. <sup>10</sup>Mo vevaĝa-moĝoni guruĝana tu Barau Natuna ĝevaĝa-moĝoniani tarimari nuĝari ai ĝetanuni. A Barau asi ĝevaĝa-moĝoniani tarimari na Barau tu ĝofaĝofa baraunai ĝevaĝa-iaĝoani, korana Barau na Natuna evarifiuato guruĝana asi ĝevaĝa-moĝoniani. <sup>11</sup>Guruĝa moĝonina tu maĝa: Barau na maĝuri vanaĝivanaĝi varau evinirato, ema mo maĝuri vanaĝivanaĝi tu ĝia Natuna nuĝanai. <sup>12</sup>Barau Natuna eĝabi-raĝeato tarimana na maĝuri eĝabiato. A Barau Natuna asi eĝabi-raĝeato tarimana na maĝuri asi eĝabiato.

### Maĝuri vanaĝivanaĝi

<sup>13</sup>Maiĝeri guruĝa tu ĝomi, Barau Natuna arana ĝovaĝa-moĝoniani tarimami, atore-vinimini, korana tu boĝono riba, ĝomi tu varau maĝuri vanaĝivanaĝi ĝoĝabiato. <sup>14</sup>Ĝita nuĝara tu maiĝesi vau ma kokoreri ĝesi Barau ĝoiranai bita ruĝani, mai tu bema dagara ta ĝia ĝena ura ilailanai bita noĝiani nai tu beseĝagirani. <sup>15</sup>Ĝita ribara, ĝia na ĝera noĝinoĝi mabarari eseĝagirini. Ema ĝita maki ribara, bita noĝini dagarari tu bita ĝabini ĝia ĝenana.

<sup>16</sup>Bema tarima ta tarikakana eĝitaiani vei-rakava eveiani, senaĝi mo rakava na asi bevaĝa-maseani, tu bene ĝauĝau ĝia ĝena, be Barau na maĝuri bene vinia. Moĝa tu evei-rakavani, senaĝi mo vei-rakava na asi bevaĝa-maseani tarimana akiraĝiani. Vei-rakavana ta tu mase evaĝa-ĝoraiani. Moĝa tu asi bene ĝauĝau-iaĝia atoni. <sup>17</sup>Veĝa ĝeĝeva-ĝeĝeva mabarari tu vei-rakava, senaĝi vei-rakava tari tu mase asi ĝevaĝa-ĝorarini.

<sup>18</sup>Ĝita ribara, Barau ĝenana ĝemaĝurito tarimari tu asi ĝevei-rakava rovaĝi-rovaĝini, korana Barau Natuna na enariĝau-ĝitakaurini, ema Diabolo na asi eĝabikararini. <sup>19</sup>Ĝita ribara, ĝita tu Barau natuna, ema tanobara mabarana tu Diabolo na eĝori-kauani.

<sup>20</sup>Ĝita ma ribara maki, Barau Natuna tu eiaĝomato, ĝia na tuĝamaĝi-faka evinirato, Barau moĝoni bitana ribaia ĝana. Ĝita tu Barau moĝonina nuĝanai tatanuni,

korana ġia Natuna Iesu Keriso nuġanai tatanuni. Iesu Keriso tu Barau moġonina ema ġia tu maġuri vanaġivanaġi.

<sup>21</sup> Natugu, barau ġofaġofari ġerina boġono veġita.

## IOANE ĠENA TORETORE VAĠA-RUARUANA

2 Ioane vaġa-foforina guruġari

Ioane na mai fefa tu Barau na eġabi-viriġiatio ekalesia vavinena ma natuna ġeri etoreato, moġa tu betaġu rubu ta ma ekalesiari ekiraġirini.

Mai fefa tu laġani 85 ma 100 fakari nuġanai ta Ioane na etoreato, mo tu Iesu maki emaseto murinai vau.

Mai fefa nuġanai siri baregori tu siri 9 beiaġo 11.

Ioane na mai fefa etoreato ġena ura tu, 1) mo ekalesia Keriso ġena vevaġa-ribai beġene ruġatari-gigitari ema vanaġivanaġi moġeri vevaġa-riba guruġari loriri ai beġene raka; 2) ġofaġofa tarimari, dia Keriso laukana na eġori-iaġomarini tarimari, beġene ġitari, beġe ġofa-darererini garina; 3) mo ġofaġofa tarimari ġeiaġomani nai tu, asiġina ġinavaġi beġene ġabi-raġeri etorito.

Ioane na mai fefa tu maiġesi eboioġaiato:

1. Vevaġa-riba moġonina lorina na moġo ema veuravini ai beġene raka - siri 1-6

2. Veiaġa kerereri asi beġene veiri - siri 7-13

**1** Au, ekalesia ġorikauna taugu, na mai fefa Barau na eġabi-viriġimito vavinemu ma natumu ġesi atore-vinimini. Ġomi tu nuġagu mabarana ġesi aura-vinimini, dia au na moġo aura-vinimini, senaġi guruġa moġonina ġeribaiaato tarimari mabarari na maki ġomi ġeura-vinimini. <sup>2</sup>Korana guruġa moġonina ġita nuġarai etanuni ema ġita ġesi betanu-vanaġi vanaġini.

<sup>3</sup>Tamara Barau ema Iesu Keriso, Tamara Natuna, ġerina varevare-bara, vevetuġaġwa, ema maino ġemi ai bene tanu, moġoni ai e veuravini ai.

### Guruġa moġonina ema veuravini

<sup>4</sup>Au tu averere-baregoni, korana ġoi natumu tari adoġaririto guruġa moġoninai ġetanuni nai, ġita Tamara na ekirarato ilailanai. <sup>5</sup>Vavine, maitoma ġoi anoġimuni tu, ġita tata bisini veura-vevini. Dia taravatu variġuna atore-vinimuni, senaġi mo tu tovotovona na veġata taġabiato dagarana. <sup>6</sup>Veuravini tu maiġesi: Barau ġena taravatu guruġari ilailari ai bitana raka. Tovotovona na veġata ġoseġaġiatio kavana, ġia ġena taravatu guruġana tu veuravini ai boġono raka.

<sup>7</sup>Ġofaġofa tarimari tu ġutuma tanobarai ġerakao-rakaoni. Iesu Keriso tu tarimari-mai eiaġoto tu asi ġevaġa-moġoniani e asi ġekiraġiani. Moġesi tarimari tu ġofaġofa tarimari, ema Keriso ġevetari-viniani tarimari. <sup>8</sup>Moġesina nai, lorimi boġono vettore, ġemi vekwaraġi ai kara ġoġoitaġorito dagarari ġomi ġemina beġe veġitani garina. Namona tu ġomi voimi mabarana boġono ġabi-ġosiri. <sup>9</sup>Deikara na Keriso ġena vevaġa-riba guruġari beraga-kwanerini, vevaġa-riba tari beġabi-raġerini tarimana, ġia ġenai Barau asi etanuni. A deikara Keriso ġena vevaġa-riba guruġari bekorana-iaġirini tarimana tu, Tamana e Natuna tauri ruarua eġabirito. <sup>10</sup>Bema tarima ta beiaġosini, vevaġa-riba guruġari irauri bekiraġirini tu, asi boġono ġabi-raġea ġemi numai, ema asi boġono vaġa-namoia maki. <sup>11</sup>Korana tu bevaġa-namoani tarimana tu mo tarima ġena vei-rakava beġabiani, benamo ġia maki vei-rakava tarimanai beiaġoni.

**Guruḡa magona**

<sup>12</sup> Au aurani guruḡa ḡutuma bara tore-vinimi, senaḡi asi aurani fefai bana toreri. Ḡegu ura tu bana iaḡosi ema ḡomi ḡesi bitana guruḡa-guruḡa, be ḡera verere bene barego-lelevaḡi.

<sup>13</sup> Ḡoi tarikakamu vavinena, Barau na eḡabi-toreato vavinena, ḡia natuna na ḡeri vevaḡa-namo ḡetuḡuani ḡoi ḡemu.

## IOANE ĠENA TORETORE VAĠA-TOITONA

3 Ioane vaġa-foforina guruġari

Ioane na mai fefa vaġa-toitona tu ekalesia gwaġiġina ta arana Gaius ġena etoreato.

Mai fefa tu laġani 85 ma 100 fakari nuġanai ta Ioane na etoreato, mo tu Iesu maki emaseto murinai vau.

Siri baregona tu siri 5.

Ioane na mai fefa etoreato ġena ura tu, 1) Gaius bene launaġia, mo tarikaka tari eġabi-raġerito moġeri dairi ai; 2) Gaius bene vaġa-ribaia, mo seġafore tarimana arana Diotrefe tu Ioane tauġena beiaġoni vauro bea kira-feifeiani etato; 3) Demetrio ġena veiġa namori bene ġitari etato.

Ioane na mai fefa tu maiġesi eboioġaiato:

1. Gaius evaġa-naġiato - siri 1-8

2. Diotrefe ekira-rakavaiato - siri 9-11

3. Demetrio evaġa-raġeato - siri 12-14

**1** Au, ekalesia ġorikauna taugu, na ġatagu namona Gaius atore-vinimuni. Ġoi aura-vinimuni ma nuġagu mabarana ġesi.

<sup>2</sup> Ġatagu namomu, Barau anoġiani dagara mabarari oveirini tu namo beġene vaġa-ġorari ġana, ema ġoi maki asi bono keve-misimisi, korana au ribagu ġoi iaukamu tu namo, be namo e iaku ai moġo bono tanu. <sup>3</sup> Tarikakara tari ġeiaġomato, benamo kamasi ġoi guruġa moġonina okorana-iaġiani e ġemu vetuġamaġikau ġema-varifuiato. Moġeri aseġaġirito nai, au tu aiaku-rakavato. <sup>4</sup> Aseġaġini, au natugu guruġa moġonina ġekorana-iaġiani nai, ġegu iaku e verere ġebarego-rakavani. Dagara tari iakuri oveini maki evanaġirini.

### Gaius ġena ġauvei ġevaġa-raġeato

<sup>5</sup> Ġatagu namomu, ġoi tu ma ġemu vetuġamaġikau mani ġauvei oveiani nai, korana tarikakara tari ġeri iaġoiaġo ai oġabi-raġerini, enabe asi ribamu tarimari. <sup>6</sup> Ġia na mai ekalesia ġoirari ai ġoi ġemu veuravini ġema-kiraġi-foforirito. Mani ġemu veiġa ma bono vaġa-kavari, be ġeri iaġoiaġo beġene iaġo-vinia Barau ġena ura dabarana ilailanai. <sup>7</sup> Korana tu Keriso arana dainai ġeraka-rosito, ema ġeri iaġoiaġo ai tu asi ekalesia tarimari ġerina kara ta asi ġeġabi-raġeato. <sup>8</sup> Ġita na tu moġesi tarimari bitana vaġa-kavari, korana moġesina tu guruġa moġonina varifiuna uranai bita ġauvei-vegogoni.

### Diotrefe ġena veiġa tu rakava

<sup>9</sup> Fefa kubina ta ekalesia doġorona atore-viniato, senaġi Diotrefe bene veġorikau etoni tarimana na au na kara akiraġirini tu asi eġabi-raġerini. <sup>10</sup> Moġa lorinai au baiaġosini tu, ġia na kara eveirini veiġari mabarari basi kiraġi-foforirini, guruġa rakavari ġai ġemai ekiraġirini guruġari ema eġofaġofani guruġari! Dia moġeri veiġa moġo, senaġi tarikakara tari ġema-varivarini maki asi eurani bene ġabi-raġeri. Mo varivari bene ġabi-raġeri etoni ekalesiari maki ekourini ema ekalesia na etore-veġitarini.

**Demetrio ġena veiġa tu namo**

<sup>11</sup> Ġatagu namomu, rakava veiġari asi bono tovotovori, senaġi veiġa namori moġo. Veiġa namori eveini tarimana tu Barau ġena tarima, a veiġa rakavari eveini tarimana tu Barau asi eġitaiato.

<sup>12</sup> Tarimarima mabarari ġekirani, Demetrio tu tarima namona ġetoni; Barau ġena guruġa moġonina na maki evaġa-foforiani tu tarima namona. Ġai na maki ġia tu moġesi ġakiraġiani, ema ġoi tu ma ribamu, ġai ġema guruġa tu moġoni.

**Dokona guruġari**

<sup>13</sup> Au aurani guruġa ġutuma bara tore-vinimi, senaġi asi aurani fefai bana toreri.

<sup>14</sup> Au ġegu tuġamaġi tu bana iaġosi, be taura ruarua tana tanu-veġoira vau tana guruġa-guruġa.

<sup>15</sup> Maino ġemu ai bene tanu. Ġatara maiġeri na ġevaġa-namomuni. Ġatara maninai tata ġegu vevaġa-namo bono viniri.

## IUDAS (O IUD) ĜENA TORETORE

Iudas (o Iud) vaĝa-foforina guruĝari

Mai fefa tu Iudas (o Iud), Iesu tarina, na etoreato. Mai fefa tu ekalesia mabarari ĝeri.

Iudas na mai fefa tu laĝani 65 ma 70 fakari nuĝanai ta etoreato, mo tu Iesu emaseto murinai.

Siri baregona tu siri 3.

Iudas na mai fefai ekalesia mabarari ekirarito, 1) ĝeri veĝabidadamai beĝene ruĝa-gwaĝiĝi; 2) beĝene venari, apostolo ĝofaĝofari na beĝe ĝofa-veĝonurini garina; 3) Barau ĝena vevaĝa-riba guruĝari beĝene korana-iaĝiri.

Iudas na mai fefa tu maiĝesina eboioĝaiato:

1. Veĝabidadama na ĝeveĝitani tarimari ĝeri veiĝa - siri 1-16

2. Veĝabidadama beĝene ĝabi-gwaĝiĝia - siri 17-23

**1** Au Iudas, Iesu Vereĝauka ĝena vetuĝunaĝi tarimagu, ema Iakobo (o Iames) tarina, ĝeguna mai fefa eiaĝosini. Ĝomi Barau na ekeamito tarimami, Tamara Barau na eura-vinimini ema Iesu Keriso na eĝita-ĝaumini tarimami, atore-vinimini.

<sup>2</sup> Vevetuĝaĝwa, maino, ema veura-vini na boĝono vonuvonu-raĝe.

### Vevaĝa-riba tarimari ĝofaĝofari

<sup>3</sup> Ĝatagu mabarami, ĝegu ura baregona ĝera vevaĝa-maĝuri dabarana guruĝana bana tore-vinimi atato, senaĝi au na aĝitaiato, namona tu ĝegu fefai bana launaĝimi, Barau ĝena veaĝa tarimari evinirito veĝabi-dadamana boĝono ĝabi-gigitaria. <sup>4</sup> Korana tarima kotari, Barau asi ĝekorana-iaĝiani tarimari, tu vekure-toĝai ĝomi fakami ai ĝerakatoĝa-ĝairito. Maniĝeri tarima na tu ĝita ĝera Barau ĝena varevare-bara ĝeĝabiani, ĝia ĝeri veiĝa rakavari beĝene veiri ĝana dabaranai ĝevaĝa-iaĝoani, ema Iesu Keriso ĝera Vereĝauka e Vere Baregona sebona kwariĝutu moĝo ĝekira-fitoĝaiani. Barau na kai-veĝata ĝena bukai etore-vanaĝiato, ĝeri rakava voiri beĝe doĝaririni.

<sup>5</sup> Ĝomi Buka Vevaĝa variri mabarari ĝoriba-guinerito, senaĝi aurani na navaĝa-riba ĝenoĝoimi, Vereĝauka na Isaraela tarimari tu aiĝesina evaĝa-maĝuririto Aigupito tanona na, senaĝi murinai asi ĝevaĝa-moĝoniato tarimari tu ma evaĝi-maserito. <sup>6</sup> Aneru tari maki ĝotuĝamaĝiri, ĝeri dagi korikori asi ĝeĝabi-gwaĝiĝirito, ema ĝeri tanu gabuna ĝeraga-kwaneato. Moĝa lorinai Barau na mukuna gabunai etorerito, tanu-vanaĝivanaĝi seiniri na ebaru-taririto, ĝena Kota baregona ĝarona ĝana. <sup>7</sup> Sodoma e Gomora, ema seviri ai taoniri asi boĝono tuĝarekwari. Moĝeri tarima ĝeri veiĝa maki aneru ĝeveito veiĝari kavana ĝeveirito, ĝemata-boraĝato e veiĝa boraĝari ĝeveito, benamo tanu-vanaĝivanaĝi karavana na eĝararito, mo tu ĝita ĝera ĝitaĝita ĝana.

<sup>8</sup> Moĝesi veiĝa ilailanai, mo nuvi tarimari na maki tauĝeri tauĝaniri moĝesi ĝevaĝa-rakavarini; Barau ĝena maoro ĝekira-fitoĝaiani, ema iauka baregori ĝevei-veĝare veĝarerini. <sup>9</sup> A Maikolo, aneru mabarari ĝeri vere ta, Diabolo ĝesi ĝevaneto, Mose tauĝanina dei na bene ĝabia ĝaramanai nai, Maikolo na Diabolo guruĝa rakavari na asi evaneato, senaĝi ekiraiato, "Vereĝauka na bene kira-feimu!" etato. <sup>10</sup> Senaĝi moĝeri tarima tu asi ĝetuĝamaĝi-maĝatarini dagarari ĝevei-veĝare

veġarerini; ema ġeri vemamiraġi ai ġeribarini dagarari bai kavari, moġeri dagara na ġia ġevaġa-rakavarini. <sup>11</sup> Vetuġari kika! Ġia tu Kaino ġena veġa beġe ġabia. Balam ekerereto kavana farefare boruri ragari beġe vei. Kora eseġa-foreto e tauġena evevaġa-rakavato kavana ġia maki beġe seġafore e tauġeri beġe vevaġa-rakava.

<sup>12</sup> Moġeri tarima ġomi ġemi ġanivegogo ġoveirini nai, ġia tu miro noġa ġomi fakami ai. Ġia tauġeri moġo ġevetuġamaġikauni. Ġia tu magube asi ġurari, iavara na eġwa-rakaorakao-kavarini kavana. Ema ġau korukoru meramerai maki asi ġwaġwana kavana, ma ġokaġokari ġelau-raġerini, ġemase-vaġa-ruaruani. <sup>13</sup> Ġia tu davara ureureri na kaburo-buro ġefoforini noġa, ġeri maiaka veġari ġefoforini. Ġia tu ġeri dabara ġeraga-kwanerito visiġuri kavana, Barau na mukuna furufuru gabuna ġeri etoreato etanu-vanaġi vanaġini.

<sup>14</sup> Adamu besena vaġa-imaima ruaruana (7), Enoka, ġia na moġeri tarima eperoveta-iaġirito, ekirato, “Ġoboġe, Vereġauka tu mai eiaġomani ma ġena aneru veaġari asi gadaragadara ġesi, <sup>15</sup> tarimarima mabarari vevaġa-maoro bene viniri ġana. Barau asi ġekorana-iaġiani tarimari ġeri rakava nuġana! Barau asi ġekorana-iaġiani veġari ġeveirini, ema vei-rakava tarimari, Barau asi ġekorana-iaġiani tarimari, na Barau guruġa rakavari ġeviniato, mabarari ġeri vei-rakava voina bene kiragiri ġana.” <sup>16</sup> Moġeri tarima tu mugumugu e veroritore moġo ribari. Ġia tu ġeri ura rakavari ġeiaġo-vinirini, tauġeri ġevevaġa-raġeni ema tarima tari ġevaġa-namo ġofa-kaurini ġia tauġeri namo beġene doġari uranai.

### Velaunaġi guruġari

<sup>17</sup> Senaġi ġomi, ġatagu mabarami, ġera Vereġauka Iesu Keriso ġena apostolo na ġevaġa-guruġamito guruġari boġono tuġamaġi-taġori. <sup>18</sup> Ġevaġa-guruġamito, ġekirato, “Ġaro dokori ai vei-veġareveġare tarimari beġe foforini, Barau muriri ai beġe toreani, benamo ġeri ura rakavari beġe iaġo-vinirini.” <sup>19</sup> Moġeri tarimarima na ġomi fakami ai vetavi-kirakira ġevaġa-ġoraiani. Ġia tu ġeri ura rakavari na ġeguine-iaġirini. Iauka Veaġa ġia ġeri ai maki asiġi.

<sup>20</sup> Senaġi ġomi, ġatagu mabarami, ġemi veġabidadama vevaġana boġono ġabigigitaria, ma iatanai ġemi maġuri boġono tore-varaġea. Iauka Veaġa seġukanai boġono ġauġau. <sup>21</sup> Barau ġena veuravini nuġana! boġono tanu ema ġera Vereġauka Iesu Keriso ġena vevetuġaġwa boġono naria, korana ġena vevetuġaġwai maġuri vanaġivanaġi bevinimini. <sup>22</sup> Ġetuġamaġi-iauvoiauvoni tarimari boġono vetuġaġwari. <sup>23</sup> Tarima kotari karava nuġana na boġono inu-vaġiri, boġono vaġa-maġuriri. Ma kotari boġono vetuġari, senaġi ma garimi ġesi, ġeri miro na beġe vaġa-rakavamini garina.

### Barau vaġa-raġena ġuriġurina

<sup>24</sup> Barau na benarimini riba, benamo asi boġo ketoni, ema ġia ġena mareva baregonai bea toremeni asi vetoukaumi e ma iakumi ġesi. <sup>25</sup> Ġita ġera Barau sebona, ġera Vereġauka Iesu Keriso bakunai evaġa-maġurirani Barauna, bitana vaġa-raġea. Ġia tu iaru-korokoro ma marevana baregona, kokore e seġuka mabarana tu ġia ġena, toma bene iaġo vanaġivanaġi! Amen.



## APOKALUPO

Apokalupo vaġa-foforina guruġari

Apokalipsis (o Apokalupo) Grik garo ai anina ta tu “vevaġa-fofori”. Mai buka tu Ioane na etoreato ekalesia doġorori imaima ruarua (7) ema Iesu ġevaġa-moġoniani tarimari tanobara mabaranoi ġetanuni tarimari ġeri.

Ioane na mai Apokalupo bukana tu motumotu tai arana Patmos ai ediburato-ġoi nuġanai etoreato. Mai buka tu laġani 90 ema 96 fakari nuġanai ta etoreato, mo tu Iesu maki emaseto murinai vau.

Siri baregori mai Apokalupo bukana nuġanai tu karoa 1:19; 21:5.

Iesu na Ioane ekiraiato, mai buka etoreato korana tu, Iesu ġena ura kara ġoirai dori ġeġorani dagarari tarimarima na beġene ribari. Mai buka Ioane na etoreato korana tari tu, 1) Keriso Iesu Vereġauka ġena ġauvei irauirauri tata bene vaġa-foforiri ġana uranai; 2) Asia Keina (o Minor) ai ekalesia doġorori imaima ruarua (7) moġeri bene kirari, e bene launaġiri, ema ġevei-rakavato-ġoi nai bene kira-feifeiri ġana; 3) Genese ai vevaġa-maġuri boioġana Barau na ekiraġiatio moġa dokona bemoġonini e bevetore-korikorini bene vaġa-fofori ginikaua ġana.

Ioane na mai Apokalupo bukana tu maiġesi eboioġaiato:

1. Keriso Barau na mareva baregona eviniato varina - karoa 1
2. Keriso vetuġunaġi ġauveiri maitoma eveirini - karoa 2-3
3. Keriso ġena kokore varina - karoa 4-22

### Ioane ġena mata-vanaġi guruġari

**1** Mai toretore maiġa tu Iesu Keriso ġenai Barau na kara evaġa-foforiatio guruġana. Barau na eviniato, korana tu eurato, Iesu na ġena vetuġunaġi tarimari dori moġo ġeġorani dagarari bene vaġa-ribari ġana. Keriso na aneru etuġuato, ġena vetuġunaġi tarimana Ioane evaġa-ribaiato. <sup>2</sup> Ioane na Barau ġena guruġa ema Iesu Keriso ġena vevarifiu eġitarito dagarari mabarari evari-fiurito. <sup>3</sup> Mai peroveta guruġari beiaviani tarimana tu beverereni, ema mai peroveta guruġari, Ioane na etorerito maiġeri, beġe seġaġirini ema beġe korana-iaġirini tarimari maki beġe verereni. Korana mai dagara mabarari beġe ġorani ġarona tu varau beraġasi-rakava.

### Ioane ġena vevaġa-namo guruġana ekalesia doġorori imaima ruarua (7) ġeri

<sup>4</sup> Au Ioane, Asia tanobaranai ekalesia doġoromi imaima ruarua (7) atore-vinimini: Varevare-bara e maino tu ġomi ġemi ai bene tanu. Mo varevare-bara e maino tu etanuni, etanuto, ema ma beiāġomani Barauna ġenana eiāġomani, ema iauka imaima ruarua (7) Barau ġena terona ġoiranai ġeruġani ġerina eiāġomani, <sup>5</sup> ema Iesu Keriso ġenana eiāġomani. Ġia tu Barau ġena guruġa evaġa-moġoniani ema evaġa-foforiani ma vetuġamaġikauna ġesi. Ġia tu mero guinena mase na evariġisi-ġenoġoito, ema ġia tu tanobara vereri mabarari ġeri Vere.

Ġia na eura-vinirani e ġera rakava rarana na eġuriġi-fitoġarito, <sup>6</sup> benamo Barau ġena Basileia doġorona tarimarai evaġa-iaġorato, ema Rubu Veāġa vereri ai evaġa-iaġorato, ġia Tamana e ġena Barau vetuġunaġina bitana iaġo-vini ġana. Ġia ġenai mareva baregona e seġuka bene tanu vanaġivanaġi! Amen.

<sup>7</sup> Ĝoĝitaia, ĝia tu magube nuĝana na eiaĝomani, mata mabarari na beĝe ĝitaiani, ĝegwanuato tarimari na maki. Ema tanobara tarimari mabarari ĝia koranai beĝe taĝi-rakavani. Mo tu moĝoni. Amen.

<sup>8</sup> Vereĝauka Barau ekirani, “Au tu Alefa ema Omega, (giniguinena ema dokona), atanuni, atanuto, e ma baiaĝomani, Iaru-korokoro Barauna.”

### Keriso Ioane ĝenai efororito

<sup>9</sup> Au Ioane, ĝomi tarikakami ema Vereĝauka ĝena ĝauvei tavei-vegogoani tarimagu. Au tu ĝomi ĝesi Iesu ĝena maĝuri nuĝanai tamidigu-midigu sebonani, e Barau ĝena Basilea nuĝanai tatanu-sebonani, ema meto nuĝari ai tavevaĝa-gwaĝiĝini e taruĝa-gwaĝiĝini. Au Barau ĝena guruĝa aĝobata-iaĝiani ema Iesu varina guruĝari avaĝa-moĝonirini e akiraĝi-foforirini ĝaramanai tu, Patmos motu-motunai ĝea tore-raga-kwaneguto. <sup>10</sup> Vereĝauka ĝena ĝaro ai Barau Iaukana na eborogiguto, benamo murigu ai garo baregona ta noĝa moĝo dudu guruna kavana aseĝaĝiato. <sup>11</sup> Mo garo tu maiĝesina ekirato: “Kara boĝitarini dagarari bukai bono tore-vanaĝiri, benamo mai ekalesia doĝorori imaima ruarua (7) maiĝeri ĝeri bono tuĝu-iaĝori: Efeso, Smena, Pegamo, Taiatira, Sadis, Filadelfia ema Laodikea ĝeri.”

<sup>12</sup> Aruĝa-kureto, deikara na au evaĝa-guruĝaguto naĝitaia ĝana, benamo au na golo na lamefa torekauri ĝeveirito dagarari imaima ruarua (7) aĝitarito. <sup>13</sup> Mo lamefa torekauri dagarari vekaravari ai tu tarima ta noĝa moĝo Tarimarima Natuna kavana, ĝena dabuĝa tu mauka kenene evariĝoto mo kwakuna fanafanana, ema kobana tu golo beletana na etore-ĝeĝeraĝiato. <sup>14</sup> Ĝia debana ema ĝuina tu kurokuro vulu kavana, snou noĝa kuro-ĝaroĝaro, ema matana tu karava moreri noĝa moĝo ekimore-kimoreato-ĝoi. <sup>15</sup> Ĝia kwakuna fanafanana tu auri boraborari karava na ĝegaburini, benamo ĝevei-ginikaurini nai ĝeveĝia-veĝiani kavana. Ma garona tu ĝaruka vovoka ĝeĝaru-gwadani gururi kavana. <sup>16</sup> Ĝia ĝimana aroribanai tu visiĝu imaima ruarua (7) eĝabirito, ma bokana na tu vetari baĝana matana reketa-reketa raga-rakava-rakava eraka-rosito. Ĝia ĝoirana ĝitaĝitana tu ĝaroĝota kirikiri, ĝaro etorani mamana kavana.

<sup>17</sup> Au na aĝitaiato nai, kwakuna koranai aketo-tarito mase tarimana ta noĝa moĝo. Benamo ĝia ĝimana aroribana au iatagu ai etore-kauato, bena ekirato, “Asi nogari! Au tu giniguinena ema dokona. <sup>18</sup> Au tu maĝuri atanuni. Amaseto, senaĝi toma au tu maĝuri batanu-vanaĝi vanaĝini. Ema Mase e mase tarimari iaukari ĝetanuni Gabuna (o Hades) kina tu au ĝegu ai. <sup>19</sup> Moĝesina naima mai oĝitarini dagarari mabarari bono tore-vanaĝiri, mai tu initoma ĝetanuni dagarari ema ĝoirai vauro beĝea ĝorani dagarari. <sup>20</sup> Mai visiĝu imaima ruarua (7) au ĝimagu aroribanai boĝitari ema lamefa torekauri dagarari golo na ĝeveirito imaima ruarua (7) anina vekuretoĝana tu maiĝa: Visiĝu 7 tu ekalesia doĝorori 7 ĝeri aneru. Ma golo na lamefa torekauri ĝeveirito dagarari 7 tu ekalesia doĝorori 7.”

### Vevaĝa-riba guruĝana Efeso ai ekalesia doĝorona ĝena

**2** “Efeso ai ekalesia doĝorona ĝeri aneru tu maiĝesi bono tore-vinia: Ĝimana aroribanai visiĝu imaima ruarua (7) eĝabi-taĝorini ema golo na lamefa torekauri ĝeveirito dagarari 7 vekaravari na erakaoni tarimana ĝena guruĝa tu maiĝeri. <sup>2</sup> Ĝoi ĝemu veĝa namori, ĝemu ĝauvei nuĝanai ĝemu vekwaraĝi ema ĝemu vevaĝa-gwaĝiĝi tu au ma ribagu. Ema au ribagu, tarima rakavari ĝoi na asi

boğabi-rağerini, ema asi apostolo tarimari, senaği tauğeri moğō apostolo tarimari ai ġevevağā-iağoni tarimari, maki ġoi na otovo-nağirito, benamo oribarito ġia tu ġo-fağofa tarimari. <sup>3</sup> Au aragu ġaramanai meto oğōitağoto, senaği ovevağā-gwağiğito ema okokoreto, asi kota maki oruğā-moirato.

<sup>4</sup> Senaği mai dagara sebona moğō ġemu ai asi aura-viniani: Tovotovonai ġemu veuravini baregona au ġegu ai otoreato-ğoi, moğā tu oiağuiato. <sup>5</sup> Bono tuğamaği-ğenoğoi, ġoi tu kamasi oğabi-rağeguto, ma boketo tu ainai mani boa rağasi! ġemu rakava ġenana bono vetuğamaği-kure, be tovotovonai oveirito-ğoi veiğari ma bono veiri. Bema asi bovetuğamaği-kureni ma asi boraka-kureni nai, au tu baiağosini, benamo ġemu lamefa vağā-ruğakauna dagarana gabuna na basi ġabi-veğitaiani. <sup>6</sup> Senaği ġoi ġemu namo tu Nikolaita tarimari ġeri veiğā rakavari asi oura-vinirini. Moğeri veiğā tu au na maki asi aura-vinirini.

<sup>7</sup> Ma seğana tarimana na Iauka Veağā na ekalesia doğorori kara ekiravara-vinirini guruğari tu bene seğāğiri. Bekokoreni tarimana tu au na maoro baviniani, ġia mağuri ġauna, Barau ġena paradaiso ai etubuni dagarana, ġwağwana beğaniani.”

### **Vevağā-riba guruğana Smena ai ekalesia doğorona ġena**

<sup>8</sup> Smena ai ekalesia doğorona ġeri aneru tu maiğesina bono tore-vinia:

“Giniguinena ema dokona, e emaseto benamo ma emağuri-ğenoğōito tarimana ġena guruğā tu maiğeri: <sup>9</sup> Ėoi meto ema midigumidigu oğōitağoni au ma ribagu, ema asi ġemu asi ġamu maki au ma ribagu. Senaği moğoni veğata ġoi tu farefare vovoka tarimamu! Mani tauğeri moğō ġevekirağini Iuda tarimari ġetoni tarimari na ġoi iatamu ai guruğā rakavari ġekirağirini guruğari tu au ma ribagu. Ėia tu dia Iuda tarimari korikori, a ġia tu Satani ġena doğoro tarimari. <sup>10</sup> Ėoirai midigumidigu tari dori oğōitağorini, senaği mo midigumidigu gariri asi bono vei. Bono ġitaia, ġomi kotari tu Diabolo na betovo-nağimini, be diburai betoremini, benamo monai ġaro gabanana (10) boğō midigu-midiguni. Monai maki enabe bomaseni, senaği ġemu vetuğā-mağikau au ġegu ai tu bene tanu. Moğesina boveini nai tu, mağuri koronana bavinimuni.

<sup>11</sup> Ma seğana tarimana na Iauka Veağā na ekalesia doğorori kara ekiravara-vinirini guruğari bene seğāğiri. Bekokoreni tarimana tu mase vağā-ruaruana na asi bevağā-rakavaiani.”

### **Vevağā-riba guruğana Pegamo ai ekalesia doğorona ġena**

<sup>12</sup> “Pegamo ai ekalesia doğorona ġeri aneru tu maiğesina bono tore-vinia:

Ėena vetari bağana matana reketa-reketa ma ragari tarimana ġena guruğā tu maiğeri: <sup>13</sup> Au ribagu ġoi ainai otanuni. Ėoi tu Satani ġena vere seana evağā-ruğā-tariato vanuğanai otanuni. Senağina ġoi na au aragu tu ma moğonimu ġesi okorana-iağiani, ġemu veğabidadama au ġegu ai maki asi veğata orağā-kwaneato. Antipas ġomi ġemi vanuğā baregona nuğanai ġevaği-maseato ġaronai maki, ġoi ġemu veğabidadama tu asi orağā-kwaneato. Antipas tu ma vetuğā-mağikauna ġesi au varigu evağā-moğoniato-ğoi ema ekiraği-foforiato-ğoi. Satani tu mani ġomi ġemi vanuğā baregona nuğanai etanuni. <sup>14</sup> Senaği dagara tari ġoi ġemu ai maniğeri au na tu asi aura-vinirini. Tarima kotari ġoi rekemu ai maniğeri tu Balam ġena vevağā-riba veiğari roğō ġekorana-iağirini. Balam na vevağā-riba kerereri Balak eviniato nai, Isaraela tarimari eğorikau-darererito, bena rakava ġeveito, kwaivakuku ġevinir-

ito buregari geganirito ema mata-borağa veigari geveirito-goi. <sup>15</sup> Moğa kavana goi rekemu ai tarima kotari maniğeri maki Nikolaita doğoro tarimari ġeri vevağa-riba ġofağofa veigari ġekorana-iağirini. <sup>16</sup> Ğovetuğamaği-kure! Bema asiğina nai tu, au goi ġemu ai baiağosi-ğarimoğini, benamo vetari bağana au murugu ai mainana basi vağa-vevağirini.

<sup>17</sup> Ma seğana tarimana na Iauka Veağa na ekalesia doğorori kara ekiravara-vinirini guruğari bene seğagiri. Bekokoreni tarimana tu, au na mana baviniani. Mai mana maiğa toma tu vekuretoğa etanuni. Ema ġia tu au na fore kurokurota ta baviniani. Mo fore kurokurota iatanai tu ara variğuna ta etoreato, mo tu ta asi beribani, beğabiani tarimana na moğoberibaiani.”

### **Vevağa-riba guruğana Taiatira ai ekalesia doğorona ġena**

<sup>18</sup> “Taiatira ai ekalesia doğorona ġeri aneru tu maiğesina bono tore-vinia:

Barau Natuna, matana tu karava moreri noğa moğokimorekimore, ma kwakuna fanafanari tu auri boraborari karava na gegaburini, benamo geveiginikaurini nai geveğia-veğiani kavana, ġena guruğa tu maiğeri: <sup>19</sup> Ğemu ġauvei, ġemu veuravini ema veğabidadama, ġemu vetuğunaği iağovini ema vevağa-gwağigi, ema toma ġauvei oveiani tu barego lelevaği, tovotovonai oveirito-goi moğeri tu ovanağirini. Moğeri mabarari ağita-iağomarini, be ribagu.

<sup>20</sup> Senaği mai dagara sebona goi ġemu ai maniğa tu asi veğata aura-viniani. Ğoi tu Iesebel, tauğena moğoevekiragini peroveta vavinena etoni maniğa, goi na tu oğabirağeani. Mani vavine ġena vevağa-riba na au ġegu vetuğunaği-iağovini tarimari ġemata-borağani ema kwaivakuku ġevinirini buregari geganirini. <sup>21</sup> Au na ġia tu ġena taimi aviniato, mo mata-borağa veigari na bene vetuğamaği-kure ġana. Senaği ġia tu asi veğata eurani bene vetuğamaği-kure. <sup>22</sup> Moğa lorinai ġia tu genagena gabunai bafu-kauani, monai bea midigu-midiguni. Ğia ġesi veğura-vanaği veigari geveini tarimari maki ġia ġesi midigumidigu baregona beğe ġabi-sebonaiani. Bema ġia Iesebel ġena veğura-vanaği veigari na asi beğe vetuğamaği-kureni nai tu, mo midigumidigu beğe ġabiani. <sup>23</sup> Ğia natuna maki au na bavaği-maserini. Benamo monana ekalesia doğorori mabarari beğe ribani, au tu tarimarima nuğari iağasiri ema ġeri tuğamaği aragağirini tarimagu. Ema ġomi tata maki ġemi veiğa ilailari ai voimi bavinimini.

<sup>24</sup> Ğomi Taiatira ai ekalesia kotari tu Iesebel ġena vevağa-riba rakavari asi ġokorana-iağirini ema Satani ġena iaunega vekuretoğari, dobudoburi ġekirağirini, tu asi ġoribarini. Ğomi mani ġemi tu avağa-guruğa korikorimini, ġemi ai meto ta tu asiğina ġinavaği batore-kauani. <sup>25</sup> Dagara baregona tu, mani kara ġemi ai maniğa, moğa boğono ġabi-gigitaria mo, au bana ġenoğoi-iağoma.

<sup>26</sup> Bekokoreni ema au ġegu ura bekorana-iağiani mo mağona bea ġabiani tarimana tu, au na maoro baviniani, tanobara beseri beguine-iağirini. <sup>27</sup> Ğia na tanobara beseri tu auri togoina na beğori-kaurini ma seğukana baregona ġesi, ma tano ġurori noğa bekwari-kira kirarini. Au na ġia seğuka baviniani, Tamagu ġenana seğuka ağabiato ilailanai. <sup>28</sup> Ema ġia tu au na lağani visiğuna baviniani, (mo seğuka vetogana). <sup>29</sup> Ma seğana tarimana na Iauka Veağa na ekalesia doğorori kara ekiravara-vinirini guruğari bene seğagiri.”

### Vevaġa-riba guruġana Sadis ai ekalesia doġorona ġena

**3** “Sadis ai ekalesia doġorona ġeri aneru tu maiġesina bono tore-vinia: Barau Iaukana imaima ruarua (7) ġia ġenai ġetanuni ema visiġu imaima ruarua (7) eġabi-taġorini tarimana ġena guruġa tu maiġeri: Goi na ġauvei oveirini tu au ma ribagu. Tarimarima na ġoi ġekiraġimuni, ġekirani, “Mani ekalesia tu maġuri” ġetoni, senaġi korikorina ġoi tu mase otanuni. <sup>2</sup>Notataġa, ġemu ai vegabidadama maġurina kotuna moġo dori emase-vaġini maniġea novaġa-kokorea. Korana au na ġoi ġemu ġauvei aġoitaġoato dia roroġoto au ġegu Barau ġoiranai. <sup>3</sup>Moġesina naima Vari Namona ġoseġaġiato ma ġoġabi-raġeato maniġa boġono tuġamaġia ema boġono korana-iaġia, be ġemi rakava ġerina ġovetuġamaġi-kure. Bema asi botataġani nai, au ġemu ai noġa moġo lema tarimana ta kavana baiaġosini. Be kamara taimi ai basi raġasini, moġa tu asi kota maki boribaiani.

<sup>4</sup>Senaġi ġoi ġemu tarima kotari Sadis ai maniġeri, ġeri dabuġa asi kota maki ġevaġa-miro-kararito. Ġia maniġeri tu au ġesi baġa rakao-rakao vegogoni, ma dabuġa kurokurori baġa riġorini, korana ġia ġeri veiġa tu iobukaiobuka bene. <sup>5</sup>Bekokoreni tarimana tu ġia kavari dabuġa kurokurori na bavaġa-dabuġaiani. Au na ġia arana maġuri bukana na asi barumu-fitoġaiani, a au Tamagu ma ġena aneru ġesi ġoirari ai ġia arana bakiraġi-foforiani.

<sup>6</sup>Ma seġana tarimana na Iauka Vevaġa na ekalesia doġorori kara ekiravara-vinirini guruġari bene seġaġiri.”

### Vevaġa-riba guruġana Filadelfia ai ekalesia doġorona ġena

<sup>7</sup>“Filadelfia ai ekalesia doġorona ġeri aneru tu maiġesina bono tore-vinia:

Davidu ġena ki, (vevaġa-maġuri kina), eġabi-taġoani tarimana, tarima vevaġana ema moġoni korikorina. Ġia na kara bekeo-fakaiani, tarima ta na asi ma bekou-ġauani riba, ema bekouani dagarana ta na asi ilaila ma bekeoani riba. Mai tarima ġena guruġa tu maiġesina: <sup>8</sup>Goi ġemu ġauvei oveirini au ma ribagu. Noboġe, ġoiramu noġitaia, ġoi ġoiramu ġatama bokana tu bakeo-fakaia, ma tarima ta asi ġena seġuka ma bekouani. Au ribagu ġoi ġemu kokore tu misina moġo, senaġi au ġegu guruġa tu oġabi-gigitariato, ema au aragu maki asi okira-ġuniġauato. <sup>9</sup>Bono ġitaia, mani Satani ġena rubu tarimari maniġeri tu tauġeri ġevkiraġini Iuda tarimari ġetoni, senaġi ġia tu dia Iuda tarimari. Ġia maniġeri tu au na baġabi-iaġosirini, ġoi kwakumu koranai beġeasi tutuġu-tarini. Benamo beġe riba-maaroni, ġoi tu au na aura-vinimuni. <sup>10</sup>Ġoi tu au ġegu vevaġa-naġi guruġari okorana-iaġirito ma ovevaġa-gwaġiġito naima, tanobarai veribaġani taimina bevotuni nai, ġoi tu baġitaġau-ginikaumuni. Mo veribaġani na tu mai tanobara iatanai ġetanuni tarimari mabarari batovo-naġirini. <sup>11</sup>Au tu dori aiaġosini. Kara oġabiato maniġa tu bono ġabi-gigitaria, be tarima ta na ġemu korona, ġemu kokore auna, asi bene ġabia. <sup>12</sup>Bekokoreni tarimana tu au Tamagu ġena Rubu Vevaġana duġuna tarimanai bavaġa-iaġoani. Mo gabu asiġina ġinavaġi ma beiaġuiani. Au na ġia ġenai au ġegu Barau arana ema au ġegu Barau ġena vanuġa baregona o siti arana baberaiani. Ierusalemu variġuna tu au ġegu Barau ġena siti, ma mai siti maiġa tu guba na au Tamagu ġenana bemariġoni. Au aragu variġuna maki ġia ġenai batoreani.

<sup>13</sup>Ma seġana tarimana na Iauka Vevaġa na ekalesia doġorori kara ekiravara-vinirini guruġari bene seġaġiri.”

### Vevaġa-riba guruġana Laodikea ai ekalesia doġorona ġena

<sup>14</sup>“Laodikea ai ekalesia doġorona ġeri aneru tu maiġesina bono tore-vinia:

Guruġa moġoni korikorina ekiraġiani tarimana arana Amen ġenana eiāġosini. Ġia tu ma ġena vetuġamaġikau e Barau ġena guruġa evaġa-moġoni korikoriani ema ekiraġi-foforiani tarimana, ema Barau na eveirito dagarari mabarari ġenana ġeiāġo-mato tarimana ġena guruġa tu maiġeri: <sup>15</sup>Goī ġemu ġauvei oveirini au ma ribagu. Au ribagu, ġoi tu dia faraka ema dia seġuka. Au ġegu ura sebona ġoi tu boro faraka moġo o boro seġuka moġo! <sup>16</sup>Senāġi ġoi tu seġuseġu, a dia seġuka moġo o dia faraka moġo. Moġesina naima ġoi tu au bokagu na bakanunu-fitoġamuni. <sup>17</sup>Goī tu okirani, ‘Au tu ġegu farefare vovoka tabutabu, ġegu-ġagu ġutuma gorogoro bavaġa-vegogori, be au tu ilaila, kara ta asi ma atuġamaġiani.’ Senāġi ġoi tu asi oriba-maoroni ġoi tu madi kekei ma vetuġamu, asi ġemu asi ġamu, ġoi tu mata-bubu ema asi dabuġamu, korimu. <sup>18</sup>Au na ġoi asisiba-vinimuni, akiramuni, au ġeguna golo bono voi. Korana auna golo tu karava na evaġa-veveato, benamo momori mabarari tu ġeiarevarito. Be au ġegu ai mai golo bovoiani nai tu, botāġani. Ema dabuġa kurokurori maki bono voi, be bono vedabuġa-iaġi, kefimu korina maiakana bono kou-ġaua. Ema mata muramurana maki bono voi, be matamu ai bono torea, bena bono boġeboġe. <sup>19</sup>Au na aura-vinirini tarimari tu akira-feirini ema atoto-maororini. Moġesina naima ġemu maġuri ema veiġa bono tuġamaġi-ginikaua, benamo bono vetuġamaġi-kure ma bono raka-kure.

<sup>20</sup>Noseġaġi! Au ġatama-bokai aruġa-taġoni ma afidifidini. Bema tarima ta na au garogu beseġaġiani, benamo ġatama-boka bekeo-fakaiani nai, au baraka-toġani, benamo ġia ġesi baġa ġaniġanini ema ġia maki au ġesi beġaniġanini. <sup>21</sup>Bekokoreni tarimana tu au na maoro baviniani, au ġesi ġegu teronai baġa tanuni. Au kavana, au akokoreto nai Tamagu ġena teronai Tamagu ġesi ġatanuni.

<sup>22</sup>Ma seġana tarimana na Iauka Veaġa na ekalesia doġorori kara ekiravara-vinirini guruġari bene seġaġi.”

### Barau ġena terona gubai

**4** Maiġa murinai au aboġe-iaġoto tu, ġatama-boka vekeofaka-taġo guba vanuġanai aġitaiato. Benamo garo ta kibi guruna noġa, mo tovotovonai aseġaġiato garona moġa ekirato, “Maiġana noma raġe, be maiġa murinai kara dori ġeġorani dagarari nama vaġa-ġitamu.” <sup>2</sup>Asikauna Iauka Veaġa na eboroġiguto, benamo ġoiragu ai tu tarima ta guba teronai etanu-taġoto-ġoi aġitaiato. <sup>3</sup>Mo teronai etanu-taġoto-ġoi tarimana vetoġana tu fore arana iaspa ġekimore-kimorerini marevari, ema fore kakakakari arana kanelia marevari kavana, marevana tu irau moġo. Ma mo terona tu kevau na eġeġeraġiato. Mo kevau vetoġana tu noġa moġo emeral forena kavana. <sup>4</sup>Mo terona moġa tu terona gabana ruarua ma vasivasi (24) na ġetore-ġeġeraġiato. Ma mo terona 24 ai tu veġitaġau tarimari baregori tata ġetanuto. Ġia mabarari tu dabuġa kurokurori moġo ġeriġoto, ema tata debari ai tu golo koronari sebori sebori ġeveito. <sup>5</sup>Mo terona monana kiriku ekimoreato-ġoi, garo baregori ema ġaita eragato-ġoi. Ma mo terona ġoiranai tu lamefa imaima ruarua (7) ġeġarato-ġoi. Mo lamefa ġeġarato-ġoi moġeri, mo tu Barau iaukana imaima ruarua (7). <sup>6</sup>Ema mo terona ġoiranai maki davara veġiaveġiana, nega-vaġuravaġura aisi kavana.

Ma maḡuri dagarari vasivasi (4) tu nuḡana buroburonai, mo terona ḡeruḡa-ḡeḡeraḡiati. Ġia ḡoirari ema muriri tu matari tu ḡutuma. <sup>7</sup>Mo maḡuri dagarana guinena tu noḡa moḡo laion, vaḡa-ruaruana dagarana tu noḡa moḡo boromakau tauna, vaḡa-toitoina ḡoirana tu tarimarima kavana, ema vaḡa-vasivasina tu noḡa moḡo erovoni ugavana kavana. <sup>8</sup>Mai maḡuri dagarari maiḡeri tata faneri tu imaima sebona (6), ma mai faneri maiḡeri mabarari tu mata na moḡo ḡevonuto, faneri nuḡana rekeri dagarari maki mata moḡo. Ġia tu vanaḡivanaḡi boḡi-laḡani asi ḡeiaḡaraḡini, mai guruḡa maiḡa asi ḡevaḡa-ketoani, ḡekirani:

“Veḡa, veḡa, veḡa,

Vereḡauka, Barau tuḡutuḡu, tu veḡa,

guinenai etanuto-ḡoi,

maitoma maki etanuni,

ema ma beiaḡomani!”

<sup>9</sup>Mai teronai etanu-taḡoto-ḡoi tarimana tu maḡuri etanu-vanaḡi vanaḡini. Ma maiḡeri maḡuri dagarari na mo teronai etanu-taḡoto-ḡoi tarimana ḡevaḡa-raḡeato-ḡoi, e ma vegubakauri ḡesi ḡetoma-rakariḡoato-ḡoi, ema ḡetanikiu-viniato-ḡoi nai, <sup>10</sup>mo veḡitaḡau tarimari baregori gabana ruarua ma vasivasi (24) tu mo teronai etanuni tarimana ḡoiranai ḡevetui-tarito-ḡoi. Benamo mai maḡuri etanu-vanaḡi vanaḡini tarimana ḡetoma-rakariḡo viniato-ḡoi. Ġeri korona maki ḡia ḡoiranai ḡetore-taririto-ḡoi, benamo ḡekirato-ḡoi,

<sup>11</sup>“Ġai ḡema Vereḡauka ema Barau,

ḡoi tu iaru-korokoro,

be tarimarima ema maḡuri dagarari mabarari na ḡoi tu beḡene vaḡa-raḡemu, beḡene gubakaumu,

ema seḡuka maki mabarana ḡoi ḡemu.

Korana dagara mabarari tu

ḡoi na oveirito,

ema ḡoi ḡemu urai moḡo oveirito

ema initoma ḡetanuni.”

### Mamoe natuna ema toretore fefana maukana

**5** Benamo aboḡeto, mo teronai etanu-taḡoto-ḡoi tarimana ḡimana aroribanai tu toretore fefana maukana ta aḡitaiato. Mo fefa tu tavita-tavitai ma toretorena, ḡeiokuato, ema vaḡa-imaima ruarua (7) veḡata ḡekada-ḡauato. Mo ḡekada-ḡaurito gaburi mabarari tu tabu vetoḡana ḡetoreato. <sup>2</sup>Ma gwada rakavarakava aneruna ta aḡitaiato, garona tu asikeikeina eḡobatato, ekirato, “Deikara tu ilaila mai kumuka tabuna bekokiani riba, e mai fefa maukana ma toretorena bekeoani?” <sup>3</sup>Senaḡi tarima ta gubai o tanobarai o tanobara gaburenai ta asi ilaila veḡata mo fefa bekeo-fakaiani ema nuḡanai beboḡe-ḡurani. <sup>4</sup>Benamo ataḡi-rakava rakavato, korana tarima sebona kwarikwari ta maki asi veḡata ḡeḡoitaḡoato, mo fefa maukana ma toretorena bekeoani ma nuḡanai beboḡe-ḡurani. <sup>5</sup>Benamo mo veḡitaḡau tarimari baregori ta na ekiraguto, ekirato, “Asi notaḡi! Noboḡe! Iuda doḡorona ḡeri laion, Davida Natuna noḡitaia, ḡia tu ekokoreto. Ġia na mani fefa maukana ma toretorena bekeoani bene, ema mani ḡekumuato kumukari taburi imaima ruarua (7) maki bekokirini bene.”

<sup>6</sup> Benamo aboĝeto, Mamoe Natuna aĝitaiato. Ĝia tu terona nuĝana buroburonai eruĝa-taĝoto-ĝoi, mo maĝuri dagarari vasivasi (4) ema veĝitaĝau tarimari baregori tu ĝeruĝa-ĝeĝeraĝiato. Mamoe Natuna ĝitaĝitana tu tari na ĝevaĝi-maseato. Ĝia guduna tu imaima ruarua (7) ema matana maki 7. Mo tu Barau iaukana 7 ekiraĝirini. Ĝia tu Barau na tanobara mabarana ĝana etuĝu-iaĝorito. <sup>7</sup> Mamoe Natuna eiaĝoto, benamo teronai etanu-taĝoto-ĝoi tarimana ĝimana aroribanai mo fefa maukana ma toretorena moĝa eĝabiato. <sup>8</sup> Fefa maukana ma toretorena eĝabiato nai, maĝuri dagarari vasivasi ema veĝitaĝau tarimari baregori 24 Mamoe Natuna ĝoiranai ĝevetui-tarito. Ĝia tata tu ma ĝeri hap (gita noĝa) ema golo ĝurori nuĝari ai tu muramura goĝuna ma bonari. Mo goĝu ma bonari tu Barau ĝena tarima veaĝari ĝeri ĝauĝau guruĝari. <sup>9</sup> Benamo ĝia na mari variguna ta maiĝesina ĝemariato,

“Ĝoi na fefa maukana ma toretorena boĝabiani ilaila,  
ema ĝia kumuna ma taburi maki bokeo-fakarini ilaila,  
korana ĝoi tu ĝevaĝi-masemuto,

ma ĝoi raramu na tau vavine Barau ĝena ovoi-vaĝirito doĝoro mabarari ĝerina, e garo mabarari ĝerina, ema bese mabarari ema tanobara mabarari na.

<sup>10</sup> Ĝoi na ĝia tu Barau ĝena Basileia doĝorona tarimari ai ovaĝa-iaĝorito, ema Barau vetuĝunaĝina beĝene iaĝo-vini ĝana Rubu Veaĝa vereri ai ovaĝa-iaĝorito. Ĝia tu tanobara mabarana iatanai beĝe veĝorikauni.”

<sup>11</sup> Ma aboĝe-iaĝoto, aneru garori asisebo-asisebo aseĝaĝirito. Moĝeri aneru tu asi iavi-iaviri, milion ĝutuma maki ĝevanaĝirito. Ĝia na terona ema maĝuri dagarari vasivasi ema veĝitaĝau tarimari baregori ĝeruĝa-ĝeĝeraĝirito. <sup>12</sup> Ma mai mari ĝemari-gigitariato,

“Mamoe Natuna,  
ĝevaĝi-maseato dagarana,  
tu ma ĝena maoro, seĝuka beĝabiani,  
e farefare vovoka, e iaunega,  
ema kokore beĝabiani!

Ema ĝia ma ĝena maoro tarimarima mabarari na beĝe gubakauani,  
ma beĝe vaĝa-raĝeani  
ema beĝe vonevone-raĝeani!”

<sup>13</sup> Benamo Barau na eveirito dagarari mabarari guba nuĝanai, tanobara iatanai, tanobara gaburenai, e davara nuĝanai dagarari mabarari na mai mari ĝevaisiato aseĝaĝirito,

“Teronai etanu-taĝoni Barauna  
ema Mamoe Natuna,  
tauri ruarua na vevaĝa-raĝe,  
vegubakau, mareva baregona,  
ema seĝuka beĝene ĝabiri,  
bene iaĝo mo vanaĝivanaĝi asi magona!”

<sup>14</sup> Benamo maĝuri dagarari vasivasi na ĝevaĝa-moĝoniato, ĝekirato, “Amen!” Ema veĝitaĝau tarimari baregori 24 ĝevetui-tarito, Barau ĝetoma-rakariĝo viniato.



**Fefa maukana ma toretorena ġekumukaiato kadari o  
tabu vetoġari Mamoe Natuna na ekeorito**

**6** Benamo au na Mamoe Natuna aġitaiato, fefa maukana ma toretorena vaġa-imaima ruarua (7) ġekada-tariato dagarana kadana giniguinena ekeo-fakaiato. Moġa ekeoato-ġoi nuġanai tu, maġuri dagarari vasivasi fakari ai ġia ta eguruġato, garona tu noġa guba eguruato, ekirato, “Noiaġoma!” <sup>2</sup> Aboġe-iaġoto nai tu, hosi kurokuro na aġitaiato, eraġeto tarimana ġimana tu ma fevana, ema ġia tu korona ta maki eviniato. Ġia eraka-rosito tu, vetari ai ekokoreto-ġoi ema eiaġoto tu ma bene kokore ġana.

<sup>3</sup> Benamo Mamoe Natuna na kumuka vaġa-ruaruana kadana ekeo-fakaiato nai, maġuri dagarana vaġa-ruaruana aseġaġiato, ekirato, “Noiaġoma!” <sup>4</sup> Benamo hosi ta ma eraka-rosito. Moġa tu hosi kakakakana. Eraġeto tarimana tu seġuka eviniato, tanobara na maino bene ġabi-veġitaia, be tarimarima tauġeri beġene vevaġi-masemase ġana. Mo tarima tu vetari baġana asikeikeina ta eviniato.

<sup>5</sup> Kumuka vaġa-toitoina kadana ekeo-fakaiato nai tu, maġuri dagarana vaġa-toitoina aseġaġiato, ekirato, “Noiaġoma!” Au aboġe-iaġoto nai, hosi dubadubana aġitaiato, eraġeto tarimana ġimanai tu dagara ġeri meto vaġa-foforiri o sikele dagarana ta eġabiato. <sup>6</sup> Benamo au na garo ta maġuri dagarari vasivasi (4) fakari na eiaġomato aseġaġiato, ekirato, “(Bitu doġe be), widi kilo sebona davana tu ġaro sebona ġauveina voina, ema bali (widi kavana) kilo toitoina davana tu ġaro sebona ġauveina voina. Senaġi olive diġana ema vine nanuna tu asi boġono vaġa-rakavari.”

<sup>7</sup> Ma Mamoe Natuna na kumuka vaġa-vasivasina kadana ekeo-fakaiato nai tu, maġuri dagarana vaġa-vasivasina aseġaġiato, ekirato, “Noiaġoma!” <sup>8</sup> Aboġe-iaġoto nai tu, hosi ta aġitaiato, tauġanina ġitaġitana noġa kurokuro. Eraġeto tarimana arana tu Mase, ma mase tarimari iaukari ġetanuni Gabuna (o Hades) tu ġia murina na eraganaġi-raganaġito-ġoi. Tauri ruarua seġuka evinirito, tanobara taviri vasivasi nuġanai tavi sebona beġene ġita-ġaua, be vetari ai, doġe ai, keve rakavari na, ema boġai ġetanuni veġaniveġani dagarari na tarimarima beġene vaġi-maseri.

<sup>9</sup> Ma kumuka vaġa-imaimana kadana ekeo-fakaiato nai tu, Barau ġena guruġa ġaramanai, e mo guruġa ġevaġa-moġoniato ema ġevari-fuato ġaramanai ġevaġi-maserito tarimari iaukari maġuri fata veaġana gaburenai aġitarito. <sup>10</sup> Ġia mabarari ġekoġo-baregato, ġekirato, “Vere tuġutuġu, ġoi tu veaġa ema moġoni veġata, aitoma vau ġoi na tanobarai ġetanuni tarimari bovaġa-maoro vinirini, benamo ġai rarama ġevaġa-riġorito bovaġa-voirini?” <sup>11</sup> Benamo ġia mabarari tata dabuġa kurokurori evinirito, ekirarito, negakota roġo ma beġene naritari etato. Beġene vaġa-noga mo, ġia karori toma vetuġunaġi ġeiġo-vinini tarimari ema tarikakari kotari, ġia ġevaġir-ito kavana, beġe vaġi-maserini mo, ġeri numera korikori bene ġabia.

<sup>12</sup> Au na Mamoe Natuna aġitaiato, kumuka vaġa-imaima sebona (6) ekeo-fakaiato nuġanai, tano-iaga asikeikeina eragato, e ġaro eduba-dubato, dabuġa dubadubari noġa, e ġue evekurevoto, ekakarato rara kavana. <sup>13</sup> Ema guba na visiġu ġeketo-firiġoto tanobara ġana, noġa figi maġitari iavara na figi ġauna na eruku-keto ketorini kavana. <sup>14</sup> Guba maki erekwa-rekwato, noġa moġo fefa maukana, ġetoretore-iaġiani dagarana, ġeikuani kavana. Ma ġoro ema motumotu mabarari gaburi ekoki-veġitarito. <sup>15</sup> Benamo tanobara kiniri, e vereri, e vetari ġitaġauna tauri baregori, e ġeri farefare asisebo tarimari, e kokore rakavarakava tarimari, tuġu-rakaorakao

tarimari ema maḡuri namona e fakanai ḡetanuni tarimari, ḡia mabarari kouḡa nuḡari ai ema ḡoro ai fore baregori vekaravari ai ḡea gumuto. <sup>16</sup> Benamo ḡoro ema fore baregori ḡenoḡirito, ḡekirato, “Ḡai iatamai ḡoma ketokau, ḡoma lautarima, be teronai etanuni Barauna ḡoirana ḡenana ema Mamoe Natuna ḡena baru baregona ḡenana ḡoma kure-toḡama! <sup>17</sup> Korana ḡia ḡeri baru ḡarona baregona tu varau bevotu, deikara beruḡa-tarini riba?”

### Barau ḡena vetuḡunaḡi tarimari 144,000

**7** Moḡa murinai aneru vasivasi (4) aḡitarito, tanobara daiguniri vasivasi ai ḡeruḡato. Mo aneru na tu tanobara iavarari vasivasi ḡelautaririto, tanobarai e davarai asi beḡene raga, ema ḡau maki asi beḡene kwari-ḡarevari ḡana. <sup>2</sup> Ma murinai tu aneru ta ma aḡitaiao, ḡaro eraḡeni rekena na emaraḡeto. Mo aneru na maḡuri Barauna ḡena vevaḡa-moḡoni vetoḡana o makana eḡabi-taḡoato-ḡoi. Ḡia na mo aneru vasivasi, Barau na seḡuka evinirito tanobara ema davara beḡene vaḡa-rakavari aneruri, efarara-vinirito, ekirato, <sup>3</sup> “Tanobara, davara, ema ḡau asi roḡo boḡono vaḡa-rakavari, bene iaḡo mo, Barau ḡena vetuḡunaḡi tarimari bakuri ai ḡia ḡena vetoḡa baḡana toreri murinai vau.” <sup>4</sup> Moḡa murinai Barau ḡena vetoḡa bakuri ai ḡetorerito tarimari mabarari tu 144,000 aseḡaḡiato. Ḡia tu Isaraela doḡorori gabanana ruarua (12) mabarari ḡerina, doḡorori tu maiḡeri:

<sup>5</sup> Iuda ḡena doḡoro tarimari - 12,000

Reubena ḡena doḡoro tarimari - 12,000

Gad ḡena doḡoro tarimari - 12,000

<sup>6</sup> Asere ḡena doḡoro tarimari - 12,000

Naftali ḡena doḡoro tarimari - 12,000

Manase ḡena doḡoro tarimari - 12,000

<sup>7</sup> Simeona ḡena doḡoro tarimari - 12,000

Levi ḡena doḡoro tarimari - 12,000

Isakara ḡena doḡoro tarimari - 12,000

<sup>8</sup> Sebulun ḡena doḡoro tarimari - 12,000

Iosefa ḡena doḡoro tarimari - 12,000

Beniamina ḡena doḡoro tarimari - 12,000

### Tarima ḡutuma lelevaḡi dabuḡa kurokurori ḡeveito

<sup>9</sup> Moḡa murinai aboḡe-iaḡoto, tarima ḡutuma lelevaḡi, asi tau iaviḡosina, aḡitarito. Mo tu tanobara irauirau mabarana tarimana, e doḡoro irauirau mabarana tarimana, e bese irauirau mabarana tarimana, ema garo irauirau mabarana tarimana. Ḡia mabarabarari tu terona ema Mamoe Natuna ḡoirari ai ḡeruḡato. Ḡia mabarari dabuḡa maukari kurokurori ḡeveito, ema ḡimari ai tu galamo lauri noḡa dagarari ḡeḡabito. (Mo tu ḡia ḡeri kokore vetoḡari). <sup>10</sup> Ḡia ḡekoḡo-baregato, ḡekirato, “Vevaḡa-maḡuri tu ḡita ḡera Barau, teronai etanukauni Barauna, e Mamoe Natuna ḡerina eiaḡomani.” <sup>11</sup> Ma aneru mabarari na tu terona e veḡitaḡau tarimari baregori ema maḡuri dagarari vasivasi (4) ḡeruḡa-ḡeḡeraḡirito. Benamo Barau ḡena terona koranai ḡevetui-tarito, ḡoirari tano ai, Barau ḡetoma-rakariḡo viniato, <sup>12</sup> ḡekirato, “Moḡoni veḡata! Vevaḡa-raḡe, e mareva baregona, e iaunega, e vevaḡa-namo, e vegubakau, e seḡuka, ema kokore tu ḡita ḡera Barau ḡena toma bene iaḡo vanaḡi-vanaḡi, Amen!

<sup>13</sup> Benamo veġitaġau tarimana baregona ta na edanaġiguto, ekirato, “Mai dabuġa kurokurori na beġe vedabuġa tarimari tu deikara, ema ġia tu ainana beġe iaġoma?”  
<sup>14</sup> Benamo аваġa-veseto, akirato, “Ġegu vere, au asi ribaġu. A ġoi tu ribamu.” Benamo ġia na ekira-varaguto, ekirato, “Mai tarima maiġeri tu midigumidigu baregori nuġari na ġeiaġomato. Ġeri dabuġa tu Mamoe Natuna, ginitaġo mamoenā, rarana na ġevei-kurokuro-rito. <sup>15</sup> Moġesina naima, ġia tu Barau ġena terona ġoiranai ġeruġani, ema ġena Rubu Veaġa nuġanai boġi-laġani ġia vetuġunaġina ġeiaġo-vinini. Ema teronai etanuni Barauna na enari-ġaurini. <sup>16</sup> Ġia tu asi ma beġe vito-ġenoġoirini, e bokari asi ma beġe koke-ġenoġoini. Ġaro iatari ai asi ma bekirini ema ġaro seġukana na asi ma begugurarin. <sup>17</sup> Korana terona nuġanai etanuni Mamoe Natuna na beġita-ġaurini. Ġia na beġori-iaġorini maġuri nanuna eġaruani gabuna ġana. Ema Barau na matari gorari mabarari bedau-vaġirini.”

### Kumuka vaġa-imaima ruaruana (7) kadana

**8** Mamoe Natuna na kumuka vaġa-imaima ruaruana (7) kadana ekeo-fakaiato nai, guba vanuġanai aoa tavina ta veġata guru ta maki asi eraġeto. <sup>2</sup> Benamo Barau ġoiranai ġeruġato aneruri imaima ruaruana (7) aġitarito, dudu 7 evinirito.

<sup>3</sup> Benamo aneru ta ma eiaġomato, fata veaġana sevinai eruġato, ġimanai tu golo ġurona ta. Ġia tu muramura ma bonana barego lelevaġi ġeviniato, Barau ġena tarima veaġari ġeri ġau-ġau ġesi terona ġoiranai golo fatana veaġanai Barau bene varevarevinia ġana. <sup>4</sup> Mo muramura goġuna ma bonana goġuna ema Barau ġena tarima veaġari ġeri ġauġau ġesi, mo aneru ġimana na ġevaraġeto Barau ġoirana ġana. <sup>5</sup> Moġa murinai aneru na golo ġurona eġabiato, fata veaġana karavana na evaġa-vonuato, benamo tanobara iatana ġana efiu-riġoato. Monana ġaita guruna eraġeto, garo gururi tari ġeraġeto, e kiriku eraġato, ema tano eiagato.

### Aneru na ġeri dudu ġefurururito

<sup>6</sup> Benamo aneru imaima ruaruana (7) ġeri dudu ġeġabi-torerito, beġene furururi ġana. <sup>7</sup> Aneru giniginena na ġena dudu efururuato, benamo aisi foreri misimisiri ema karava rara ġesi ġesebonato ġevetoreto. Benamo moġeri mabarari tanobara ġana ebubu-riġorito. Ma tanobara tavi toitoi nuġanai tavi sebona eġara-ġosiato, ġau toitoi nuġari ai tu sebori tu ġeġara-ġosirito, e ġauġa ema reġi mabarari ġeġara-ġosirito.

<sup>8</sup> Aneru vaġa-ruaruana na ġena dudu efururuato nai tu, dagara ta, ġoro-dagara-bara ta noġa ma karavana, davarai evefiu-reito. Benamo daġaru-bara tavi toitoi nuġanai tavi ta tu rarai eiagoto. <sup>9</sup> E daġaru-bara maġuri dagarari toiri-toiri nuġari ai sebori tu ġemaseto, e bouti toiri-toiri nuġari ai sebori tu ġeburuto.

<sup>10</sup> Aneru vaġa-toitoina ġena dudu efururuato nai tu, visiġu-dagara-bara ta kere morena kavana guba na eketoto, benamo ġaruka toiri nuġari ai sebori ai, e ġeġaruġarurini nanuri ai eketo-reito. <sup>11</sup> Mo visiġu arana tu “Mamaki”. Nanu gaburi toiri nuġari ai sebori tu ġemamakito. Benamo tarimarima vovoka na mo nanu makiri ġeniurito nai ġemaseto.

<sup>12</sup> Aneru vaġa-vasivasina ġena dudu efururuato nai, ġaro e ġue ema visiġu tu taviri toitoiri nuġari ai tavi sebori tu ġesemorito, naima mo tavi toitoiri nuġari ai tavi sebori tu ġemukunato. Moġa lorinai ġaro mamana tavi toitoi nuġanai tavi sebona

tu asi emamato, ema boġi tavi toitoi nuġanai tavi sebona ta ġue e visiġu tu asi emamato.

<sup>13</sup> Benamo aboġeto, ugava ta guba tuġuna vanigerenai erovoto-ġoi aġitaiato, maiġesi ekea-fararato, ekirato, “Tanobarai ġotanuni tarimami, vetuġami kika! Vetuġami kika! Vetuġami kika! Korana tu aneru toitoi, ġeri dudu roġosi ġere furururi aneruri, na ġeri dudu beġe furururini gururi ai tu, meto ema midigumidigu barego lelevaġina beġorani.

### Dudu vaġa-imaimana (5)

**9** Aneru vaġa-imaimana na ġena dudu efururuato, benamo visiġu ta aġitaiato, guba na eketoto tanobarai. Mo visiġu tu guri varigo kwareġana, (iauka rakavari ġeri dibura), kina eviniato. <sup>2</sup> Mo guri ekeo-fakaiato nai tu, goġu evebubu-rosito noġa moġo karava baregona goġuna kavana. Benamo mo guri goġuna na ġaro mamana ema guba fakana emukuna-ġaurito.

<sup>3</sup> Goġu nuġana na madudu ġeraka-rosito tanobarai, ema seġuka evinirito, seġukana tu kavikavi seġukari kavana. <sup>4</sup> Ġia ekirarito, tanobarai ġauġa ta, e tanobarai ġetubuni dagarana ta, ema ġau ta asi beġene vaġa-rakavaia, senaġi deidei bakuri ai Barau ġena vetoġa o maka asi etanuni tarimari moġo beġene vaġa-rakavari etato. <sup>5</sup> Ekirarito maki, mo tarima asi beġene vaġi-maseri, senaġi ġue imaima (5) nuġanai beġene vaġa-midigu midiguri. Mo midigumidigu ġeġanito moġeri tu kavikavi na tarima ekavirini midiguna kavana. <sup>6</sup> Mo ġue imaima nuġanai tarimarima tu ġemase ġana mase beġe vetauani, senaġi asi beġe maseni. Ġeri ura baregona ġemase beġe toni, senaġi mase ġerina beveġitani.

<sup>7</sup> Mo madudu ġitaġitari tu hosi noġa, ġea vetari ġana ġeruġa-toreto. Ġia debari ai tu golo koronana noġa moġo dagarana ta, ema ġoirari ġitaġitari tu tarima ġoirari kavana. <sup>8</sup> Ġuiri tu vavine ġuiri noġa moġo, doġari tu laion doġari kavana. <sup>9</sup> Kobari kouġauri ġana dabuġana tu auri dabuġana kavana. Faneri gururi tu hosi asisebo kwakuri gururi ema kariota asisebo vetari nuġanai ġeraka-toġani gururi kavana. <sup>10</sup> Ġia tu ma ġiġuri, ema ġiġuri bonari tu kavikavi ġiġuri bonari kavana. Ġiġuri nuġari ai tu tarimarima ġue imaima (5) beġene vaġa-midigu midiguri seġukana etanuni. <sup>11</sup> Ġia tu ma ġeri vere baregona o kini. Ġia na eġita-ġaurini. Ġia dagarana tu mo guri varigo kwareġana aneruna. Mo aneru arana Heberu garori ai tu Abadon, ma Griġ garori ai tu Apolion, (anina tu vaġa-rakava kwaikwai tarimana).

<sup>12</sup> Rakava baregori giniguinena tu beġori moġa, ma ruarua tu vau beġe iaġomani.

### Aneru vaġa-imaima sebona (6) na dudu efururuato

<sup>13</sup> Aneru vaġa-6 na ġena dudu ma efururuato, benamo fata veaġana daiguni vasi-vasi ai gudu vasivasi moġeri ġerina garo ta eiaġomato aseġaġiato. Mo fata tu golo na ġeveiato, ma Barau ġena terona ġoiranai etanuni. <sup>14</sup> Mo garo na aneru vaġa-6 na ma ġena dudu moġa ekiraiato, ekirato, “Aneru vasivasi, ġaruka baregona arana Eufrate ai ġebaru-taririto, moġeri noruġa-vaġiri.” <sup>15</sup> Benamo mo aneru vasivasi eruġa-vaġirito, mai laġani, mai ġue, mai ġaro, mai aoa ġana Barau na eġabi-torerito tu, tarima toitoiri nuġanai sebona tu beġene vaġia. <sup>16</sup> Hosi tarimari hosi ai ġeraġeto ġena numera tu milion sinau ruarua (200). Mai numera tu aseġaġiato. <sup>17</sup> Mo hosi e iatari ai ġeraġeto tarimari au ġegu mata-vanaġi ai vetoġari tu maiġesina aġitarito: Ġia kobari kouġauna ġana auri dabuġana tu karava ġeġarani kakakaka kar-

avari kavana, e blu, ema karava moreri o salfa borabora kavana. Hosi debari tu laion debari kavana, ma bokari tu karava e goġu ema karava moreri ġeraka-rosito. <sup>18</sup> Mo tarimarima vaġa-midigumidiguri dagarari toitoi moġeri, karava, goġu, ema karava moreri o salfa, hosi bokari na ġeraka-rosito dagarari, na tarimarima toiritoi nuġanai sebori-sebori tu ġevaġi-maserito. <sup>19</sup> Mo hosi ġeri seġuka tu bokari ai ema ġiġuri ai maki. Korana ġiġuri tu mota kavana, ma debari. Mo ġiġuri debari na tarimarima ġevaġa-midigu midigurito-ġoi.

<sup>20</sup> Tarimarima oreri, mo vevaġa-midigumidigu dagarari toitoi na asi ġevaġi-maserito tarimari, tu roġo asi ġevetuġamaġi-kureto ġimari ġauveiri ġerina. Iauka rakavari toma-rakarigiġori ema asi ġeboġeboġeni e asi ġeseġaġini ema asi ġerakani kwaivakukuri, golo, silva, auri boraborari, fore e ġau na ġeveirito dagarari toma-rakarigiġori asi ġevaġa-dokoato. <sup>21</sup> Ema ġeri vevaġideba, ġeri meġameġa, ġeri mata-boraġa veigiġari, ema ġeri lema ġerina maki asi ġevetuġamaġi-kureto ma asi ġeraka-kureto.

### Aneru ema toretore fefana maukana misina

**10** Benamo aneru ta, kokore lelevaġi aneruna, guba na ma emariġoto-ġoi aġi-taiato. Ġia tu magube na ġevaġa-dabuġa maukaiato, ma debana iatanai tu kevau ta. Ġia ġoirana tu ġaro mamana noġa, ema kwakuna tu karava ġemoreni kavana. <sup>2</sup> Ġimanai tu toretore fefana maukana misina ta vekeo eġabitaġoato-ġoi. Ġia kwakuna aroribana tu davarai etoreato, ma kwakuna kaurina tu tanobarai etoreato. <sup>3</sup> Benamo eġaba-baregoto, laion eniarani nai eġabani kavana. Ġia eġabato murinai, ġaita imaima ruarua (7) garori ġeguruġato, (ġia ġevaġa-veveato). <sup>4</sup> Mo ġaita 7 ġeguruġato moġeri dori atore-vanaġirito, senaġi guba na garo ta eiaġomato, ekirato, “Mani ġaita 7 kara beġe kiraġiri maniġeri tu nokure-toġari, asi bono tore-vanaġiri.”

<sup>5</sup> Benamo mo aneru, davarai e tanobarai kwakuna etorerito aneruna, aġitaiato, ġimana aroribana eġabi-vaisiatio, guba vanuġana eduġiatio, <sup>6</sup> benamo tanu-vanaġivanaġi Barauna aranai guruġa-fofori gwaġiġina eveiatio. Guba ema nuġari ai ġetanuni dagarari mabarari, e tanobara ema nuġari ai ġetanuni dagarari mabarari, ema daġaru-bara ema nuġari ai ġetanuni dagarari mabarari tu ġia na eveirito. Ġia aranai mai guruġa-fofori gwaġiġina eveiatio, ekirato, “Taimi varau bekori, Barau asi ma bevaġa-nogani. <sup>7</sup> Senaġina aneru vaġa-imaima ruaruana (7) na ġena dudu befururuani neganai, Barau ġena guruġa vekuretoġari veigiġari ema boioġari beġe ġorani, ġena peroveta tarimari ġeri ai ekiraġi-foforirito ilailari ai.”

<sup>8</sup> Benamo guba na aseġaġiatio garona na ma evaġa-guruġaguto, ekirato, “Noiaġo, mo aneru davarai e tanobarai eruġani aneruna, ġimanai toretore fefana maukana evekeo-taġoni, moġea noġabia.” <sup>9</sup> Benamo aiaġoto, mo aneru akiraiatio, mani toretore fefana maukana misina nevinigu atato. Benamo ġia na ekiraguto, ekirato, “Noġabia, be noġani-ġosia! Bokamu ai mamina tu gode mamina maki bevanaġiani, senaġi nuġamu tu bevemukini.” <sup>10</sup> Benamo toretore fefana maukana misina mo aneru ġimana na aġabiatio, benamo aġaniatio. Aġaniatio mamina murugu ai tu gode mamina maki evanaġiatio, senaġi aġani-ġosiatio nai, nuġagu tu evemukito.

<sup>11</sup> Benamo evaġa-guruġaguto, ekirato, “Tanobara beseri ġutuma, garo irauirau tarimari ema ġeri vere baregori o kini ġeri ai karakara beġe ġorani dagarari ma bono peroveta-iaġiri.”

### Vevaĝa-moĝoni tarimari ruarua

**11** Benamo vaĝa-vetovo ĝauna ta, ĝitaĝitana togoi noĝa, eviniguto, benamo eki-raguto, ekirato, “Noiaĝo, Barau ĝena Rubu Veaĝa ema fata veaĝana noa makaia, ema monai toma-rakariĝo tarimari vira bono iaviri. <sup>2</sup> Senaĝi mani Rubu Veaĝa nuĝanai luda tarimari ĝeri toma-rakariĝo gabuna maĝuna murikana, maniĝa tu bono iaĝuia, asi bono makaia, korana maniĝa tu irau bese tarimari ĝeri (ĝuriĝuri gabuna) evinirito, ĝia na mai vanuĝa baregona veaĝana ĝue gabana vasivasi ma ruarua (42) nuĝari ai beĝe fanafana-tariani. <sup>3</sup> Au vaĝa-moĝonigu tarimari ruarua seĝuka bavinirini, benamo ĝaro mabarana 1,260 Barau na bevinirini guruĝari beĝe kiraĝi-foforirini. Ĝia tu fuse-dabuĝari na beĝe vedabuĝani.”

<sup>4</sup> Mai vaĝa-moĝonigu tauri ruarua tu mo olive ĝauri ruarua ema mo lamefa torekauri dagarari ruarua, tanobara Verena ĝoiranai ĝeruĝani moĝeri. <sup>5</sup> Bema tarima ta na nevaĝa-rakavari betoni nai tu, bokari na karava beĝe raka-rosini, benamo in-airi beĝe vaĝa-buataririni. Ĝia ĝevaĝa-rakavari beĝe toni tarimana tu moĝesina bemaseni. <sup>6</sup> Maiĝeri tarima ruarua tu ma seĝukari guba beĝe kou-ĝauani, benamo ĝia peroveta guruĝari beĝe kiraĝirini ĝarori ai tu, ĝura asi beraguni. Ema ma seĝukari maki, nanu beĝe kurevoani, rarai beiaĝoni, e beĝe urani ĝarori ai tarimarima vaĝa-midigumidiguri dagarari irauirau tanobarai beĝe vaĝa-ĝorarin.

<sup>7</sup> Ĝeri vevarifiu beĝe vaĝa-magoani ĝaronai, vevaĝa-rakava dagarana guri var-iĝo kwareĝana, (iauka rakavari ĝeri dibura), nuĝana na beraka-rosini, benamo ĝia bevaĝa-vevaĝirini. Ĝia ĝeri seĝuka bevanaĝiani, benamo bevaĝi-maserini. <sup>8</sup> Benamo ĝia tauĝaniri tu vanuĝa baregona dabarana nuĝanai gena-fitari beĝe tanuni. Guruĝa veabanaĝinai mo vanuĝa barana arana ĝekiraĝiani tu Sodoma ema Aigupito. Ĝia tauri ruarua ĝeri Vereĝauka tu mo vanuĝai ĝevaĝa-satauroato. <sup>9</sup> Ĝaro toitoi ma kwana nuĝari ai bese irauirau, doĝoro irauirau, garo irauirau, e tanobara irauirau tarimari ĝia tauĝaniri beĝe ĝitarini, senaĝi guriguriri tu asi beĝe urani. <sup>10</sup> Ĝia ĝeri mase dainai tanobarai ĝetanuni tarimari tu beĝe iakuni, beĝe ĝani-vegogoni e karori tata ĝeri varevare beĝe tuĝuni; korana tu mai peroveta tarimari ruarua na tanobarai ĝetanuni tarimari ĝeri ai midigumidigu baregona ĝevaĝa-ĝoraiato.

<sup>11</sup> Senaĝi mo ĝaro toitoi ma kwana ĝekorito murinai, maĝuri iaĝana Barau ĝenana ĝia tauri ruarua nuĝari ai eraka-toĝato, benamo ĝeruĝa-vaisito. Ĝia tauri ruarua ĝeĝitarito tarimari mabarari ĝegari-rakavato. <sup>12</sup> Benamo vevaĝa-moĝoni tauri ruarua na garo baregona ta ĝeseĝaĝiato, guba na emariĝoto, ĝia evaĝa-guruĝarito, ekirato, “Maiĝana ĝomarage!” Benamo tauri ruarua magube ta nuĝanai guba ĝana ĝevarage, ĝari inai tarimari ĝoirari ai. <sup>13</sup> Mo aoa nuĝanai moĝo tano-iaga baregona eragato, benamo vanuĝa baregona taviri gabanana (10) nuĝanai tavi sebona tu evaĝa-mouato, ma tarima mabarari 7,000 ĝemaseto. Senaĝi tarimarima oreri tu ĝegari-rakavato, benamo Guba Barauna ĝevaĝa-raĝeato.

<sup>14</sup> Rakava vaĝa-ruaruana tu bekori moĝa, senaĝi vaĝa-toitoina tu dori eiaĝomani.

### Dudu vaĝa-imaima ruaruana (7)

<sup>15</sup> Aneru vaĝa-imaima ruaruana (7) na ĝena dudu efururuato, benamo garo baregori gubai ĝeguruĝato, ĝekirato, “Tanobara basileiana o veĝitaĝau seĝukana tu ĝita ĝera Vereĝauka ema ĝena Keriso ĝeri basileiai beiaĝo. Be ĝia tu beverevanaĝi vanaĝini!” <sup>16</sup> Benamo veĝitaĝau tauri gabana ruarua ma vasivasi (24), Ba-

rau ġoiranai ġeri teronai ġetanuni tarimari, ġevetui-tarito, ġoirari tano ai, Barau ġetoma-rakariġo viniato, <sup>17</sup> ġekirato, “Vereġauka o, Iaru-korokoro Baraumu, otanuni, e otanuto-ġoi, ġai na ġoi ġatanikiu-vinimuni, korana ġoi ġemu seġuka baregona oġabiato, e ġemu Basileia o veġitaġau tu varau osinaiato. <sup>18</sup> Tanobara irauirau beseri ġebaruto, benamo ġoi ġemu baru ma beraġasi. Mase tarimari kota-viniri taimina, ema mo peroveta tauri, ġoi ġemu vetuġunaġi tarimari, e ġemu tarima veaġari, ema ġoi aramu ġematauraiani tarimari keiri baregori voiri viniviniri ġarona, ema tanobara ġevaġa-rakavaiato tarimari vaġa-rakavari ġarona beiaġoma.”

<sup>19</sup> Benamo Barau ġena Rubu Veaġa guba nuġanai evekeoto, benamo ġena Kiraġi-tore Mauġana Rubu Veaġa nuġanai eforito aġitaiao. Benamo kiriku-ġaita, e garo gururi tari, e guba eguruato guruna baregona, e tano-iaga, ema aisi foreri asikeikeiri ġeiaġomato.

### Vavine ema ġuġaia kavana dagarana asikeikeina

**12** Benamo nuġa-farevaġi vetoġana baregona ta gubai eforito: Vavine ta, ġaro na evedabuġato, ma ġue tu kwakuna gabureri ai, ema visiġu gabanana ruarua (12) tu korona noġa, ġia debanai ġevetore-ġeġeraġito. <sup>2</sup> Ġia tu ma banina, ma dori eġabito-ġoi, moġesina nai mero-ġabi midiguna eġabiato, be eġabito-ġoi.

<sup>3</sup> Benamo nuġa-farevaġi vetoġana ta gubai ma eforito: Ġuġaia kavana dagarana asikeikeina ta, kakakakana, debana mabarari tu imaima ruarua (7), guduna mabarari tu gabanana (10), ema korona maki 7 debana tata iatari sebori-sebori torekau. <sup>4</sup> Ġia ġiġuna guba visiġuri toiri-toiri ġerina sebori-sebori tu tanobara ġana eiari-firiġorito. Ġia tu mo vavine, dori eġabito-ġoi, ġoiranai eruġato, beġabini nai, asikauna mero misina bene ġabia, bene ġania uranai. <sup>5</sup> Vavine eġabito nai tu, mero evaġa-ġoraiato. Mo mero na tanobara irauirau beseri mabarari auri togoina na roġo beġori-kaurini ma seġukana baregona ġesi. Benamo mero emaġurito nai ġeraga-ġabi-veġitaiao, Barau e ġena terona ġoirana ġana ġeġwa-iaġoato. <sup>6</sup> Mo vavine tu Barau na ġena erovina-toreato gabuna tano fakana ġana egari-iaġoto. Monai beġe nariani e beġe ġubuanu ġaro mabarari 1260 nuġari ai.

<sup>7</sup> Benamo gubai vetari ta eġorato: Maikolo ma ġena aneru ġesi ġuġaia kavana dagarana asikeikeina ġevetari-viniato, benamo ġuġaia ma ġena aneru na maki ġia ma ġevetari-vinirito. <sup>8</sup> Senaġi ġuġaia kavana dagarana tu asi ekokoreto, naima gubai asi ġeri gabu ai ġevaġa-iaġorito. <sup>9</sup> Mo ġuġaia kavana dagarana asikeikeina, irau laġani veġata motana, arana “Diabolo” o “Satani”, tanobara mabarana eġofaiato dagarana, tu ġedori-rosiato, e tanobarai ġefiu-riġoato. Ġena aneru mabarari maki ġia ġesi ġefiu-riġorito.

<sup>10</sup> Benamo gubai garo baregona ta eguruġato aseġaġiato, ekirato, “Toma ġita ġera Barau ġena vevaġa-maġuri, e ġena seġuka, e ġena veġitaġau baregona, ema ġena Keriso ġena maoro baregona varau beraġasi. Korana Barau ġoiranai ġita tari-

kakara boġi-laġani evaġa-daġarito-ġoi dagarana tu varau beġe fiu-riġoa. <sup>11</sup> Ġia tu tarikakara na Mamoe Natuna, (ginitaġo mamoe), rarana ema ġia ġena guruġa moġoniri ġevari-fiurito-ġoi, moġerina ġekokoreto, be ġevaġa-ketoato. Ġeri maġuri asi ġetuġamaġi-kaurito, eiaġoto mo, ġea maseto. <sup>12</sup> Guba o, ema gubai ġotanuni tarimami o, boġono iaku! Senaġi tanobara e daġaru-bara ġomi tu vetuġami kika! Korana Satani tu ġomi ġemi ai varau bevariġosi, nuġana tu baru na bevonuvonuraġe, korana ribana, ġia ġena nega tu varau bekubi-rakava.”

<sup>13</sup> Mo ġuġaia kavana dagarana eribato, ġia tu tanobarai ġefiu-riġoato neganai, mero evaġa-ġoraiato vavinena murina na ekureto. <sup>14</sup> Senaġi mo vavine tu ugava asikeikeina fanena ruarua Barau na eviniato, mo tano fakana, erovina-toreato gabuna, ġana bene rovo-iaġo uranai. Ġia monai tu laġani toitoi ma kwana beġene naria ema beġene ġubu-tanua ġana. Korana monai tu ġuġaia, mo mota rakavana, na asi ilaila beġabi-karaini. <sup>15</sup> Benamo ġuġaia, mota rakavana, bokana na nanu evaġa-ġaru rosiato noġa ġabata kavana. Ġia eurato mo vavine tu mo ġabata na bene ġarukwareġaia etato. <sup>16</sup> Senaġi tano na mo vavine evaġa-kavaiato, korana tano evekeoto, benamo ġuġaia bokana na eraka-rosito ġarukana mabarana eboġeato. <sup>17</sup> Benamo ġuġaia kavana dagarana na mo vavine ebaruvini-rakavaiato, benamo eiaġoto, mo vavine besena, Barau ġena taravatu guruġari ġekorana-iaġirito-ġoi ema Iesu ġena vevarifiu guruġari ġevaġa-moġonirito-ġoi tarimari mabarari evetari-vinirito. <sup>18</sup> Benamo ġuġaia tu kone ai ea ruġato.

### Davara na vevaġa-rakava dagarana ebere-rosito, moġa tu Keriso ġofaġofana

**13** Benamo au na vevaġa-rakava dagarana ta aġitaiato, daġaru-bara na eraka-raġeto. Ġia guduna mabarari tu gabanana (10), e debana mabarari tu imaima ruarua (7). Korana mabarari tu gabanana (10). Moġeri korona tu ġia guduna tata ġeri ai, ma debana tata ġeri ai tu Barau vaġa-rakavana arana. <sup>2</sup> Mo vevaġa-rakava dagarana aġitaiato, moġa ġitaġitana tu lepadi noġa, (lepadi tu taiga noġa), a kwakuna tu bea kwakuri kavana, ema bokana tu laion bokari kavana. Benamo ġuġaia kavana dagarana asikeikeina tauġena ġena seġuka, ġena terona, ema ġena maoro eġabirito, mo vevaġa-rakava dagarana eviniato. <sup>3</sup> Vevaġa-rakava dagarana debana tai tu giri baregona ta, ġevaġi-maseato girina, senaġi mo manuġa baregona tu enamoto. Tanobara tarimari mabarana mo vevaġa-rakava dagarana ġenai nuġari ġefarevaġi-rakavato, benamo ġia murinai ġerakato. <sup>4</sup> Tarimarima mabarari na ġuġaia ġetomarakarriġo viniato, korana ġia ġena seġuka tu mo vevaġa-rakava dagarana eviniato. Ema vevaġa-rakava dagarana maki ġetomarakarriġo viniato, ġevedanaġito, ġekirato, “Dei tu mai vevaġa-rakava dagarana kavana? Dei na ġia bevetari-viniani riba?”

<sup>5</sup> Mo vevaġa-rakava dagarana tu maoro eviniato tu, veivavi guruġari ema Barau vaġa-rakavana guruġari bene kiraġiri ġana, ema ġue gabana vasivasi ma ruarua (42) nuġari ai ġena maoro bene ġauvei-iaġiri. <sup>6</sup> Benamo muruna ekeoato, ma Barau vaġa-rakavana guruġari ekiraġi-matamato; Barau arana ema ġena tanu gabuna ekira-rakavarito, ema gubai ġetanuni tarimari mabarari evaġa-rakavarito. <sup>7</sup> E maoro eviniato, Barau ġena vevaġa tarimari bene vetari-viniri nuġanai bene kokore, be ġia bene vaġa-darereri ġana. Ema seġuka eviniato, doġoro mabarari, e bese mabarari, e garo mabarari, ema tanobara mabarari bene ġori-kauri ġana. <sup>8</sup> Tanobarai ġetanuni tarimari mabarari na ġia beġe toma-rakarriġo viniani. Maiġeri tarima tu, Barau



na tanobara roĝosi bere veia veĝata, arari mo Mamoe Natuna, ĝevaĝiato dagarana, ĝena maĝuri bukanai arari asi etorerito tarimari.

<sup>9</sup>Ma seĝana tarimana tu bene seĝaĝi. <sup>10</sup>Barau beurani dibura numanai beĝene baru-taria betoni tarimana tu, dibura numanai beĝe baru-tariani veĝata. Barau beurani vetari baĝana na beĝene vaĝi-masea betoni tarimana tu, vetari baĝana na beĝe vaĝi-maseani. Maiĝeri guruĝa na Barau ĝena tarima veaĝari evaĝa-guruĝarini, beĝene vevaĝa-gwaĝiĝi, ema ma ĝeri vetuĝamaĝikau ĝesi beĝene tanu.

### **Vevaĝa-rakava dagarana vaĝa-ruaruana, moĝa tu peroveta tarimana ĝofaĝofana**

<sup>11</sup>Moĝa murinai au na vevaĝa-rakava dagarana ta ma aĝitaiato, tano na everaĝa-raĝeto. Ĝia guduna tu ruarua, Mamoe Natuna guduna kavana, ema ĝia tu ĝuĝaia kavana eguruĝato-ĝoi. <sup>12</sup>Ĝia na vevaĝa-rakava dagarana giniguinena moĝa aranai ĝena maoro e seĝuka mabarari eĝauvei-iaĝirito. Ma ĝia na tanobara tanu-iaĝina tarimari mabarari elau-naĝirito, mo vevaĝa-rakava dagarana giniguinena, debana giri baregona, ĝevaĝi-maseato girina, manuĝana enamoto dagarana, beĝene toma-rakariĝo vinia etato. <sup>13</sup>Mai vevaĝa-rakava dagarana vaĝa-ruaruana mainana veiĝa boruri baregori ema vetoĝa irauri tari eveirito-ĝoi. Ta tu, ĝia na tarimarima mabarari ĝoirari ĝutuĝutunai karava guba na evaĝa-mariĝoato. <sup>14</sup>Ĝia tu vetoĝa boruri kotari eviniato, mo vevaĝa-rakava dagarana giniguinena ĝoiranai eveirito, tanobarai ĝetanuni tarimari eĝofa-darererito. Ma ekirarito, mo vetari baĝana na ĝevaĝa-beroato, ma toma roĝo emaĝuri-tanuni vevaĝa-rakava dagarana, moĝa gubakauna ĝana tu vetoĝana dagarana o laulauna ta beĝene veia, benamo ĝene vaĝa-ruĝa-vaisia etato. <sup>15</sup>Mo vevaĝa-rakava dagarana vaĝa-ruaruana tu seĝuka eviniato, vevaĝa-rakava dagarana laulauna giniguinena moĝa iaĝa bene vinia, be bene guruĝa, ema mo vevaĝa-rakava dagarana laulauna asi ĝeurani toma-rakariĝo-vinina tarimari mabarari bene vaĝi-maseri ĝana.

<sup>16</sup>Benamo tarimarima mabarari, misiri e baregori, ma ĝeri farefare ĝutuma tarimari e asi ĝeri farefare tarimari, tuĝu-rakaorakao tarimari e fakai ĝetanuni o dia tuĝu-rakaorakao tarimari, etuĝu-naĝinaĝirito vetoĝa o maka ta ĝimari aroribari ai o bakuri ai beĝene ĝabia etato. <sup>17</sup>Moĝesi beĝene vei, be tarima ta dagara ta asi bene voivoi-kava o asi bene voivoi-iaĝi-kavaia, senaĝi mo vevaĝa-rakava dagarana giniguinena ĝena vetoĝa o maka, mai tu ĝia arana o arana eruĝa-boroĝiato numerana, ĝenai tarimana ĝereĝana moĝo dagara bene voi e bene ĝwa-voivoi. <sup>18</sup>Iaunega tu maiĝa: Nuĝa-mama o tuĝamaĝi-faka tarimana na mo vevaĝa-rakava dagarana numerana bene vaĝa-gaua, korana mo numera tu tarima ta numerana. Numerana tu maiĝa: 666.

### **Ginitaĝo mamoen na evoi-vaĝirito tarimari ĝeri mari**

**14** Benamo aboĝeto tu, Mamoe Natuna ĝoiragu ai aĝitaiato, Siona Ĝoronai eruĝa-taĝoto-ĝoi, ema ĝia sevinai tarimarima 144,000 ĝeruĝa-taĝoto-ĝoi. Bakuri ai tu ĝia arana ema Tamana arana ĝevetoreto. <sup>2</sup>Benamo guba na garo ta ĝaruka vovoka ĝeĝaru-gwadani gururi ema guba eguruani guruna noĝa aseĝaĝirito. Mo guru tu noĝamo hap ĝelauni tarimari na ĝeri hap ĝelaurito-ĝoi gururi kavana. <sup>3</sup>Ĝia tu mo terona, e maĝuri dagarari vasivasi (4), ema veĝitaĝau tarimari baregori ĝoirari ai mari variĝuna ta ĝemariato. Tarima ta na mo mari moĝa marimarina

tu asi bedoĝariani riba, senaĝi mo tanobara na ginitaĝo mamoe na evoi-vaĝirito tarimari 144,000 ĝereĝari na moĝo. <sup>4</sup>Mai tarima maiĝeri tu vavine ĝesi asi ĝekimato o asi ĝeveĝura-vanaĝito, be asi ĝemiroto, ĝia tu tauĝeri ĝevenaumato, be ĝia tu namo vedaurea. Ĝia tu Mamoe Natuna aiĝana aiĝana eiaĝoni nai, murina na ĝerakani. Tarimarima vekaravari ai ĝia tu Barau na evoirito, ma Barau ema Mamoe Natuna ĝeri tarimarima giniguineri ai ĝeiaĝoto. <sup>5</sup>Mururi na ĝofaĝofa guruĝana ta asi ĝekiraĝiato, ĝia ĝeri ai rakava misina ta maki asiĝina ĝinavaĝi.

### Aneru toitoi

<sup>6</sup>Benamo au na aneru ta maia guba e tano fakari na erovoto-ĝoi aĝitaiato. Ĝia ĝenai tu Vari Namona, betanu-vanaĝi vanaĝini varina. Ĝia na mai Vari Namona tu tanobara mabarari, e doĝoro mabarari, e garo mabarari, ema bese mabarari tanobarai ĝetanuni ĝeri beĝene vari-fiua ĝana. <sup>7</sup>Eguruĝa-fararato, ekirato, “Barau garina boĝono vei ema Barau boĝono vaĝa-raĝea! Korana tu ĝia ĝena vevaĝa-kota aoana tu varau beraĝasi. Guba, e tanobara, e daĝaru-bara, ema nanu eĝaruani gaburi eveirito Barauna boĝono toma-rakariĝo vinia.”

<sup>8</sup>Aneru vaĝa-ruaruana murina na eiaĝomato, benamo ekirato, “Beketo, Babulona baregona varau beketo. Ĝia na tanobara irauirau beseri mabarari ĝia ĝena veĝura-vanaĝi wainina gwaĝiĝina evaĝa-niurito.”

<sup>9</sup>Ma aneru vaĝa-toitoina ĝia murina na eiaĝomato, benamo eguruĝa-fararato, ekirato, “Bema tarima ta na mo vevaĝa-rakava dagarana ema iouiouna dagarana betoma-rakariĝo viniani, ema ĝena maka bakunai o ĝimanai beĝabi-raĝeani tu, <sup>10</sup>ĝia maki Barau ĝena baru baregona wainina beniuani. Mo baru baregona wainina gwaĝiĝina moĝa tu mabarana Barau ĝena baru kapusina nuĝanai ebubu-ĝurajato. Ĝia tu aneru veaĝari ema Mamoe Natuna ĝoirari ai karava morena e salfa nuĝanai bemidigu-midiguni. <sup>11</sup>Ĝia mo karava moreri nuĝanai beĝe midigu-midiguni goĝuna tu beraĝe-vanaĝi vanaĝini asi magona. Ma vevaĝa-rakava dagarana ema ĝia ve-toĝana o laulauna dagarana beĝe toma-rakariĝo viniani tarimari o ĝia arana makana beĝe ĝabiani tarimari tu, boĝi-laĝani asi beĝe iaĝaraĝini.”

<sup>12</sup>Mainana Barau ĝena tarimarima veaĝari, Barau ĝena taravatu ĝekorana-iaĝiani ema Iesu ĝenai ĝevetuĝamaĝikauni tarimari, evaĝa-guruĝarini, beĝene vevaĝa-gwaĝiĝi ema beĝene kokore.

<sup>13</sup>Benamo guba na garo ta ma aseĝaĝiato, ekirato, “Maiĝeri guruĝa notoreri: Maitoma beiaĝoni tu, Vereĝauka ĝena maĝuri nuĝanai ĝetanuni tarimari beĝe maseni tu beĝene iaku.” Iauka Veaĝa evaĝa-veseto, “Oi, ĝia tu ĝeri ĝauvei e vekwaraĝi na beĝe iaĝaraĝini, korana tu ĝeri veiĝa namori ĝia ĝesi beĝe iaĝo-sebonani.” (Moĝa anina tu, ĝeri vekwaraĝi voina namona beĝe doĝariani veĝata).

### Tanobarai kwakwa ĝarona

<sup>14</sup>Benamo aboĝe-iaĝoto, magube kurokurona ta aĝitaiato, ma mo magube kurokurona iatanai tu Tarimarima Natuna noĝa tarimana etanuto. Ĝia debanai tu golo koronana ta, ma ĝimanai tu baĝa ĝeĝevana masikona ta. <sup>15</sup>Benamo aneru ta maia Rubu Veaĝa na ema raka-rosito, bena magube kurokurona iatanai etanuto tarimana ekea-farara viniato, ekirato, “Ĝemu baĝa ĝeĝevana noĝabi-vaisia, benamo ĝaniĝani dagarari nobasi-vaĝiri! Korana kwakwa o basibasi ĝarona varau beraĝasi, tanobarai ĝaniĝani tu beĝe maĝe-ĝosi.” <sup>16</sup>Benamo mo magube iatanai etanuto ta-

rimana ġena baġa ġeġevana tanobara iatana na edave-vanaġiato, benamo tanobara ġaniġanina ebasi-vaġiato, eġbiato.

<sup>17</sup> Aneru ta maia guba na Rubu Veaġa nuġana na ema raka-rosito. Ġia maki ġimanai tu baġa ġeġevana masikona ta. <sup>18</sup> Aneru ta maia fata veaġana na eiaġomato. Ġia tu karava eġita-ġauato-ġoi aneruna. Ġia eiaġomato, benamo baġa ġeġevana masikona eġbiato aneruna ekea-farara viniato, ekirato, “Ġemu baġa ġeġevana masikona noġabia, ma tanobara vinena ġwari ġureri nokari-vegogori, korana vine ġwari (o grapes) tu varau beġe maġe. <sup>19</sup> Benamo mo aneru na ġena baġa ġeġevana moġa vaġa-sebona edaveato, benamo tanobara iatana vine ġwari mabarari ebasi-vaġa-vegogorito. Benamo moġesi mabarabarari eġabirito, ma vine ġwari ġefanarini gabunai ea bubu-toġarito. Mo vine ġwari ġefanarini gabuna moġa, mo tu Barau ġena baru ekiraġiani gabuna. <sup>20</sup> Mo vine ġwari mabarari vanuġa baregona murikanai vine ġwari ġefanarini gabunai ġefanafana-taririto-ġoi gorari beġene riġo ġana. Benamo vine ġwari ġefanarini gabuna na rara eġaru-rosito. Rara eġaru-rosito ġena geboka tu tano bevaraġe mo, hosi muruna dokona, ma ġena mauka tu stadia 1,600 o 300 kilomita.

### Aneru imaima ruarua (7) ġeri ai vevaġa-midigumidigu dagarari rakavari 7

**15** Benamo gubai vetoġa baregona ta, nuġa-farevaġi dagarana aġitaiato: Aneru <sup>7</sup> aġitarito, ġeri ai tu dagara rakava kwaikwairi 7, tarimarima vaġa-midigumidiguri dagarari. Mo tu dagara rakavari magona. Korana moġeri na Barau ġena baru bevaġa-kori ginikauani.

<sup>2</sup> Ma davara ta veġia kavana ma karavana aġitaiato. Mo davara sevinai tu mo tarimarima, vevaġa-rakava dagarana ema ġia laulauna dagarana ema ġia arana eki-raġiani numerana ġevaġa-ketorito tarimari, ġeruġa taġoto-ġoi aġitarito. Ġia ġimari ai tu Barau na evinirito hapiri ġeġabi-taġorito-ġoi, <sup>3</sup> ma Barau ġena vetuġunaġi tarimana, Mose, ġena mari ema Mamoe Natuna ġena mari ġemariato-ġoi,

“Vereġauka o, ġoi tu

laru-korokoro Barauna,

ġemu ġauvei tu barego,

asi tau vaġa-ilailana

ema namo vedaurea. Ġuru mabarari ġeri Vere o,

ġoi ġemu dabara tu iobukaiobuka ema moġoni veġata.

<sup>4</sup> Vereġauka o, deikara na ġoi asi begari-vinimuni,

ma ġoi aramu asi bevaġa-raġeani?

Korana tu ġoi moġo ġereġamu veaġa.

Tanobara mabarari tarimari beġe iaġomani,

benamo ġoi beġema toma-rakariġo vinimuni.

Korana tu ġemu veiġa iobukaiobukari varau beġema fofori.”

<sup>5</sup> Maiġa murinai au aboġe-iaġoto, benamo gubai Rubu Veaġa, mo tu Barau na ġena guruġa moġoniri evaġa-foforirini farai numana veaġana, evekeoto aġitaiato.

<sup>6</sup> Mo aneru imaima ruarua (7), ġeri ai tu tarimarima vaġa-midigumidiguri dagarari rakavari; farai numana veaġana na ġeraka-rosito, dabuġa gwaġiġiri namori ema veġia-veġiari na ġevedabuġato, ema kobari ai tu golo beletari ġetore-ġeġeraġirito.

<sup>7</sup> Benamo mo maġuri dagarari vasivasi vekaravari ai ta na mo aneru 7 golo diġuri 7 evinirito. Mo golo diġuri tu tanu-vanaġivanaġi Barauna ġena baru na evaġa-vonu

fokafokarito. <sup>8</sup>Benamo mo Rubu Veāga tu Barau marevana goḡuna ema seḡukana goḡuna na evaḡa-vonuato. Tarima ta Rubu Veāga nuḡanai asi roḡo beraka-toḡani riba, beiaḡoni mo, tarimarima vaḡa-midigu-midiguri dagarari rakavari 7 beḡe korini vau.

### Barau ḡena baru diḡu imaima ruarua (7) nuḡari ai

**16** Benamo garo baregona ta Rubu Veāga nuḡana na eiaḡomato aseḡaḡiatio. Mo garo na tu aneru 7 evaḡa-guruḡarito, ekirato, “Goiaḡo, Barau ḡena baru na evaḡa-vonurito diḡuri 7 maniḡeri tanobara iatanai ḡoa bubu-firiḡori.”

<sup>2</sup>Aneru giniguinenena eiaḡoto, ḡena diḡu tanobara iatanai ea bubu-kauato. Benamo manuḡa ḡitaḡitari rakava kwaikwairi ma midiguri maki asikeikeiri vevaḡa-rakava dagarana ḡena vetoḡa o maka ḡeḡabiatio ema ḡia iouiouna dagarana ḡetomarakariḡo viniatio tarimari na ḡeḡoitaḡorito.

<sup>3</sup>Aneru vaḡa-ruaruana ḡena diḡu tu davarai ebubu-riḡoato. Benamo mo davara tu mase tarimana rarana kavana eveito, ma nuḡanai maḡuri ḡetanuni dagarari mabarari ḡemaseto.

<sup>4</sup>Aneru vaḡa-toitoina ḡena diḡu tu ḡarukai ema nanu eḡaruani gaburi ai ebuburato, benamo rarai ḡeiaḡoto. <sup>5</sup>Benamo nanu eḡita-ḡauani aneruna garona aseḡaḡiatio, ekirato,

“Veāga Baraumu,  
ḡoi tu tovotovonai otanuto-ḡoi,  
ema initoma maki otanuni.

Goi ḡemu kota-vini ḡauveina tanobara tarimari ḡeri ai maiḡesina oveiani tu maoro korikori moḡo.

<sup>6</sup>Korana ḡia na ḡoi ḡemu tarimarima veaḡari ema peroveta tarimari rarari ḡevaḡa-riḡorito.

Moḡesina naima ḡeri veḡa lorinai,  
be rara boviniri beḡe niu.”

<sup>7</sup>Benamo Barau ḡena fata veaḡana na garo ta eiaḡomato aseḡaḡiatio, ekirato, “Vereḡauka o, ḡoi tu moḡoni veḡata Iaru-korokoro Barauna, ḡemu kota-vini ḡauveiri tu dabara moḡoninai ema maoronai oveiani.”

<sup>8</sup>Aneru vaḡa-vasivasina ḡena diḡu tu ḡaro iatanai ebubu-kauato. Benamo ḡaro seḡuka eviniatio, tarimarima karava na bene ḡarari ḡana. <sup>9</sup>Benamo mo ḡaro seḡukana gugurana baregona na tarimarima eḡararito. Ma monana tarimarima tu asi ḡevetuḡamaḡi-kureto, benamo Barau asi ḡevaḡa-raḡeato, ne ḡia na tu Barau arana ḡevaḡa-rakavaiatio. Barau tu ma ḡena maoro baregona maiḡeri midigumidigu dagarari rakavari bevaḡa-ḡorarini e asi bevaḡa-ḡorarini.

<sup>10</sup>Aneru vaḡa-imaimana ḡena diḡu tu vevaḡa-rakava dagarana ḡena terona iatanai ebubu-kauato, benamo ḡena veḡitaḡau gabuna tu emukuna-furufuruto. Benamo tarimarima midigumidigu baregona na eḡabirito, ma meari ḡekafu-taririto.

<sup>11</sup>Mo midigumidigu ema manuḡa dairi ai, ḡia na gubai etanuni Barauna ḡevaḡa-rakavaiatio. A ḡia tu asi ḡeurato ḡeri veḡa rakavari ḡerina beḡene vetuḡamaḡi-kure.

<sup>12</sup>Aneru vaḡa-imaima sebonana (6) ḡena diḡu tu Eufrate ḡarukana baregona nuḡanai ebubu-ḡuraiatio. Benamo mo ḡaruka baregona eroroto, ḡaro eraḡeni rekena na kini (ma ḡeri vetari doḡorori ḡesi) beḡe iaḡomani, moḡeri ḡeri dabara evaḡa-fakaiatio. <sup>13</sup>Moḡa murinai iauka rakavari toitoi farakeḡo noḡa moḡo aḡitarito. Ta

tu dagara ta ġuġaia kavana, (mai tu Satani), bokana na ema raka-rosito, ta tu vevaġa-rakava dagarana, (mai tu Keriso ġofaġofana), bokana na ema raka-rosito, ma ta tu peroveta ġofaġofa tarimana bokana na ema raka-rosito. <sup>14</sup> Mo iauka moġeri tu demoni iaukari, ġia na vetoġa irauirauri ġeveirito-ġoi, ema ġeiaġoto tanobara mabarana kiniri ġeri ai, beġenea vaġa-vegogori, be Iaru-korokoro Barauna ġena ġaro baregonai tu Barau beġene vaġa-vevaġia ġana.

<sup>15</sup> “Noseġaġi! Au tu lema tarimari kavana baiaġomani! Bevaġa-noga-taġoni ema ġena dabuġa kefinai bevei-taġorini tarimana tu bene iaku. Korana ġia tu kefina kori asi beiaġoni, benamo ġutuma-bara nuġanai asi bemaiaikaiani.”

<sup>16</sup> Benamo demoni iaukari toitoi na kini mabarari ġeġori-vegogorito ġabu tai, Heberu garori ai mo ġabu arana tu Amagedon.

<sup>17</sup> Aneru vaġa-imaima ruaruana (7) ġena diġu tu guba fakanai ebubuato, benamo Rubu Veaġa nuġana na garo baregona ta terona na eiaġomato, ekirato, “Varau bekori!” <sup>18</sup> Benamo kiriku eragato, e garo gururi tari ġeraġeto, e guba eguruato, ema tano-iaga baregona eragato. Tarimarima tanobarai ġetanu-guineto, monana beiaġoma mo initoma moġesi tano-iaga ta tu asi eġorato. Moġa tu tano-iaga barego lelevaġina veġata. <sup>19</sup> Benamo vanuġa baregona evetavito, tavi toitoi ġevetoretto, ema tanobara mabarari vanuġari maki ġeġwa-kafu kafurito. Barau na vanuġa baregona Babulona ma etuġamaġi-ġenoġoiato, benamo Barau ġena baru ema nuġa-ġirimaġirima wainina na evaġa-vonu fokafokaiato kapusina eviniato, bene niua ġana. <sup>20</sup> Benamo motumotu mabarari ġeraga-rekwarekwato ema ġoro maki ġerekwarekwato, be asiġina. <sup>21</sup> Ma guba na aisi, fore noġa asikeikeiri, ġeri meto tu pauna sinau sebona (100) kavana, tata tarimarima iatari ai ġeketokauto. Benamo mo tarimarima na Barau guruġa rakavari ġeviniato-ġoi, korana mo aisi, fore noġa asikeikeiri, iatari ai ġeketokauto-ġoi dainai. Korana mo vevaġa-midigumidigu dagarana rakavana moġa tu rakava kwaikwaina.

### Babulona - veġura-vanaġi vavinena baregona

**17** Benamo mo diġu imaima ruarua (7) ġeġabi-taġorito-ġoi aneruri fakari ai ta tu au rekegu ġana eiaġomato, benamo au ema vaġa-guruġaguto, ekirato, “Noiaġoma, be veġura-vanaġi vavinena baregona ġena veġura-vanaġi voina metona beġabiani metona navaġa-ġitamun. Ġia tu nanu vovoka iatari ai etanuni. <sup>2</sup> Tanobarai ġetanuni vereri baregori o kiniri mabarari tu ġia ġesi ġeveġura-vanaġito. Ema tanobarai ġetanuni tarimari maki ġia ġena veġura-vanaġi wainina na ġeniu-babobaboto.”

<sup>3</sup> Benamo iauka Veaġa na eboroġiguto, aneru ta na eġwa-rakaguto, tano fakana ġana eġwa-iaġoguto. Monai vavine ta aġitaiato, vevaġa-rakava dagarana kakakakana ta iatanai etanu-taġoto-ġoi. Mo vevaġa-rakava dagarana tauġanina tu Barau vaġa-rakavana arari ġevaġa-vonuato. Ġia debana mabarana imaima ruarua (7), ema guduna tu gabanana (10). <sup>4</sup> Mo vavine tu dabuġa kakakakari ema koturi kakakakari o pepolori namo vedaureari eriġoto, ema golo e fore nauġanauġari ema aġeva ma marevari na everato. Ġimanai tu golo kapusina ta eġabiato. Mo golo kapusina tu veġa rakava kwaikwairi ema ġena veġura-vanaġi mirori na evonufokafokato. <sup>5</sup> Ġia bakunai tu ara ta ġeberaiato, anina maki vekuretoġa, maġesi ġevetoretto, “Babulona barana, veġura-vanaġi sinari ema tanobarai veġa rakava kwaikwairi mabarari sinari.” <sup>6</sup> Benamo au na mo vavine aġitaiato, Barau ġena tarimarima

veaġari, ġevaġi-maserito tarimari, rarari eniurito, be eniu-babobaboto. Mo tu Iesu ġevaġa-moġoniato-ġoi nai, ġevaġi-maserito tarimari rarari. Au na ġia aġitaiato nai, aġaba-rakavato.

<sup>7</sup>Benamo mo aneru na ekiraguto, ekirato, “Ġoi tu kara dainai oġaba-rakavani? Mani vavine maniġa varina vekuretoġana ema mani vevaġa-rakava dagarana iatanai beraġe maniġea, mani debana 7 ma ġena gudu 10, varina vekuretoġari tu nakiravara-ġinikaumu. <sup>8</sup>Mo vevaġa-rakava dagarana boġitaia, moġa tu guinenai etanuto-ġoi, ma ġia toma tu asi tauna. Ġia tu tano gabigabina guri variġo kwareġana na bema raka-rosini, benamo beiaġoni gabuna rakava kwaikwaina, midigumidigu baregona bea ġabiani. Tanobarai ġetanuni tarimari, Barau na tanobara eveiatio monana veġata arari maġuri bukanai asi etorerito tarimari, na mo vevaġa-rakava dagarana ġeġitaiato nai tu, nuġari ġefarevaġi-rakavato. Korana ġia tovotovonai tu etanuto-ġoi, ma toma tu asi tauna, senaġi ġia tu ma beiaġomani.

<sup>9</sup>Iaunega tarimana na maiġa bene tuġamaġi-fakaia. Mo deba 7 tu mo vavine etanukauni ġorori 7. <sup>10</sup>Ma ġia aniri ta maki vere baregori o kini 7. Vere barari imaima tu ġeketoto, sebona tu roġo eruġa-taġoni, ma ta tu roġosi bene iaġoma. A ġia beiaġomani tu, mai tanobarai asi betanu-maukani. <sup>11</sup>Mo vevaġa-rakava dagarana guinenai etanuto-ġoi, ma initoma ġia tu asi tauna, maniġa tu kini vaġa-imaima toitoina (8). Ġia tu mani vere baregori o kini 7 karori ta, ma ġia tu beiaġoni gabu rakava kwaikwaina midigumidigu barego bea ġaniani.

<sup>12</sup>Mo gudu 10 oġitarito, moġeri mo tu kini 10. Ġia tauri 10 tu kini dagina ema beġe ġita-ġaurini tano-barari roġosi beġene ġabiri. Senaġina ġia tu aoa sebona mo vevaġa-rakava dagarana ġesi kini kavana veġitaġau maorona baregona beġe ġabiani. <sup>13</sup>Ġia ġeri tuġamaġi tu sebona moġo, ema ġeri seġuka e maoro baregona tu mai vevaġa-rakava dagarana beġe viniani. <sup>14</sup>Ġia na Mamoe Natuna beġe vetari-viniani, senaġi Mamoe Natuna na bevaġa-ketorini, korana ġia tu vere mabarari ġeri Vere, ema kini mabarari ġeri Kini. Ema ekearito e eġabi-viriġirito ema ma vetuġa-maġikauri ġesi ġia murinai ġerakani tarimari maki ġia ġesi beġe kokoreni.”

<sup>15</sup>Benamo mo aneru na ekiraguto, ekirato, “Mo veġura-vanaġi vavinena etanutaġoni nanuri boġitari, moġeri tu tanobara beseri, tarima ġutuma gorogoro, tanobara irauirau tarimari, ema garo irauirau tarimari boġitari. <sup>16</sup>Mo vevaġa-rakava dagarana ema mo gudu 10 boġitari dagarari, mani veġura-vanaġi vavinena tu beġe iau-rakavaiani. Ġia na asi ġena farefare ai beġe vaġa-iaġoani, e dabuġana ġenana beġe fuki-vaġirini, tauġanina kori beġe vaġa-rakaiani; viriġona beġe ġaniani ema karavai beġe gabu-raġeani. <sup>17</sup>Korana Barau na maniġeri kini nuġari ai evaġa-urato, ġia ġena ura beġene veia etato. Moġesina naima ġia maki ġeurato nai, ġeri seġuka mo vevaġa-rakava dagarana beġene vinia, be bene veġorikau, bene iaġo mo, Barau ġena guruġa mabarari beġene ġuġuru. <sup>18</sup>Ema mo boġitaia vavinena tu vanuġa baregona. Ġia na tanobara vereri o kiniri mabarari eġori-kaurini.”

### Babulona beketoni

**18** Maiġa murinai aneru ta ma ġena seġuka baregona ġesi guba na emariġoto aġitaiato. Ġia marevana mamana na tanobara emama-vaġa-ġauato. <sup>2</sup>Benamo tuġana maki asi ekoġoto, ekirato, “Beketo! Vanuġa baregona Babulona tu beketo!

Ĝia tu demoni ĝeri tanu gabunai beiaĝo, e iauka rakavari ema iauka mirori, e manu rakava kwaikwairi ĝeri tanutaĝo gabunai beiaĝo.

<sup>3</sup> Korana tu bese mabarari na ĝena wain ĝeniuato nai ĝevei-babobaboto; mo wain tu ĝena veĝura-vanaĝi ĝauveiri.

Tanobarai ĝetanuni kiniri mabarari tu ĝia ĝesi ĝeveĝura-vanaĝito, ema tanobarai dagara ĝeĝwa-voivoirini tarimari maki ĝia ĝena farefare namori ĝerina farefare vovoka tarimari ai ĝeiaĝoto.”

<sup>4</sup> Moĝa murinai tu guba na ĝaro ta eiaĝomato ma aseĝaĝiato, ekirato, “Ĝegu tarima mabarami,

mai vanuĝa baregona ĝenana ĝoma raka-rosi.

Be ĝia ĝena vei-rakava veĝari asi boĝono veiri,

ĝia na vevaĝa-midigumidigu dagarari rakavari beĝabirini dagarari ĝomi na asi boĝono ĝabiri.

<sup>5</sup> Korana ĝia ĝena vei-rakava tu iatai-iatai bevesenu-senukau, bevaraĝe mo, guba vanuĝana maki bea doĝaria.

Senagi Barau na ĝena veĝa, asi maorori dagarari, etuĝamaĝi-taĝorini, asi etuĝa-rekwarini.

<sup>6</sup> Ĝia na ĝomi evinimito ilailana ma boĝono vini-vaĝa-voia.

Ĝena veĝa voina ilailana moĝa boĝono vaĝa-ruaia, benamo boĝono vinia.

Niuniu wainina kapusi sebona ĝomi evinimito nai tu, ĝena kapusi korikori ai niuniu wainina moĝa nuĝanai ta maia boĝono bubu-ĝuraia, boĝono vaĝa-ruaia, benamo voina boĝono vinia.

<sup>7</sup> Tauĝena eveĝabi-varaĝeto ema eĝani-namoto-ĝoi ema etanu-namoto-ĝoi ilailanai, midigumidigu boĝono vinia ema boĝono vaĝa-taĝitaĝia.

Ĝia nuĝanai tu eveiavini, ekirani,

‘Au tu kwin o vere vavinena kavana atanuni.

Au tu dia vabu ema asiĝina ĝinavaĝi bataĝi-vanoro vanoroni.’

<sup>8</sup> Moĝesina naima ĝia tu ĝaro sebona nuĝanai moĝo midigumidigu irauirau na beĝe vaĝa-ketoani, mo tu mase, taĝi-vanorovanoro, ema doĝe ĝenai beĝe raĝasini.

Ma ĝia tu karava na beĝaraiani.

Korana ĝia ĝeri rakava voina beviniani Barauna tu Barau Vereĝauka,

ma ĝia tu ma seĝukana.”

<sup>9</sup> Tanobara kiniri, ĝia ĝesi veĝura-vanaĝi veĝari ĝeveito ema ĝia ĝesi ĝeĝani-namoto-ĝoi e ĝetanu-namoto-ĝoi kiniri, na ĝia beĝaraiani goĝuna beĝe ĝitaiani nai tu, taĝina beĝe veini, ema beĝe taĝi-vanoroani. <sup>10</sup> Ĝia ĝena midigumidigu beĝe ĝitaiani, moĝa garina na manaĝai beĝe ruĝani, benamo beĝe taĝi-guruĝani, beĝe kirani, “Vetuĝamu! Siti baregona vetuĝamu kekei!

Babulona o, seĝuka rakava sitina!

Ĝoi tu aoa sebona nuĝanai moĝo ĝemu rakava voina metona boĝabia!”

<sup>11</sup> Tanobarai dagara ĝeivoivoi-iaĝirini tarimari beĝe taĝini ema beĝe taĝi-vanoroani, korana ĝeri voivoi-iaĝi farefareri tu asi voivoiri tarimana ta. <sup>12</sup> Mo tu ĝeri golo, e silva, e fore namo vedaureari voiri barego foreri, ema aĝeva marevari asi-gadara dagarari; dabuĝa namori gwaĝiĝiri, e dabuĝa kota kakakakari o pepolori, e dabuĝa silikari, ema dabuĝa kakakakari; ma bonari ĝauri, e elefani doĝari na ĝeveirini dagarari irauirauri, e ĝau voiri barego ĝauri na ĝeveirito dagarari, e auri boraborari e auri namori ema mabolo na ĝeveirito dagarari; <sup>13</sup> ĝaniĝani mamiri

vaḡa-namori muramurana arana sinamon, e ma bonari muramurari, e goḡu ma bonana eveiani muramurana, e bonana namona muramurana arana muro, e tauḡani ai ḡedauani muramurana arana frenkinsens; vine nanuna, e olive diḡana, farao ema widi, boromakau ema mamoe, hosi ema kariota, ema tarimarima maki. <sup>14</sup> Beḡe kirani, “ḡau ḡwaḡwana bono ḡabia otato-ḡoi uradikana oveito-ḡoi dagarana tu ḡemuna beveḡita. Gemu farefare vovoka ema ḡemu mareva mabarari beḡe rekwarekwa, asi bodoḡari-ḡenoḡoirini maia!”

<sup>15</sup> Dagara ḡeḡwa-voivoini tarimari na maiḡeri dagara ḡevoivoi-iaḡirito ema ḡia ḡenana farefare vovoka ḡeḡoitaḡoto, moḡeri tu manaḡai beḡea ruḡani, mo midigu-midigu ḡia na beḡabiani moḡa garina. ḡia tu beḡe taḡi-rakava rakavani ema beḡe taḡi-vanoroni, <sup>16</sup> ema beḡe taḡi-guruḡa guruḡani, beḡe kirani, “Vetuḡamu! Vanuḡa baregona, vetuḡamu kekei!

Dabuḡa namori gwaḡiḡiri, e dabuḡa kota kakakakari o pepolori, ema kakakakari na ovedabuḡato; golo kimorekimoreri, e fore namo vedaureari, ema gudugudu marevari asi-gadarana oveiato-ḡoi.

<sup>17</sup> Aoa sebona nuḡanai moḡo ḡemu farefare vovoka tabutabu mabarari benamo beḡema kori-ketovaḡi!”

Bouti baregori ḡeḡwa-ragarini tarimari mabarari, e bouti ai davara na ḡeragani tarimari mabarari, e bouti ai ḡeḡauveini tarimari, ema davara maḡaniri ma dagara tari ḡerina ḡeri-ḡari ḡeḡoitaḡoni tarimari mabarari manaḡai ḡea ruḡato. <sup>18</sup> Benamo eḡaraiato goḡuna ḡeḡitaiato nai tu, maiḡesina ḡekirato, ‘Mai vanuḡa baregona tu irau veḡata, siti ta maiḡesina kavana tu asi etanuto-ḡoi.’ <sup>19</sup> Benamo tano-kauri debari ai ḡebubukauto, ḡetaḡito e ḡetaḡi-vanoro vanoroto, ḡekirato, “Vetuḡamu kekei! Vanuḡa baregona vetuḡamu kekei!

Ma ḡeri bouti davarai tarimari tu ḡia ḡena taḡa ḡenana farefare vovoka ḡeḡoitaḡoto, ene?

Aoa sebona nuḡanai ḡia tu asi ḡena farefare tai moḡo beiaḡo.

<sup>20</sup> Guba vanuḡana o, ḡia ḡena keto iakuna ḡovei.

Barau ḡena tarima veaḡami,

e apostolo tarimami,

ema peroveta tarimami,

ḡoiaku ḡoverere;

korana ḡomi veḡa rakavari evei-vinimito dainai, Barau na ḡena rakava voina bevinia.”

<sup>21</sup> Benamo aneru kokore rakavana ta na fore ta widi ḡegiro-iaḡirini diḡuna baregona ta kavana eḡabiato. Mo fore-diḡuna moḡa eḡabi-vaيسيato, benamo davarai efu-rieto, benamo ekirato,

“Vanuḡa baregona Babulona tu maiḡesi ma baruri ḡesi beḡe fiu-tariani,

benamo berekwarekwa-moḡovaḡini,

asi ḡitaḡitanai ma beiaḡoni.

<sup>22</sup> Hap ḡelauni ma mari ḡeḡabini gururi, e ivirikou ḡefururuni ema dudu ḡefururuni gururi ḡoi ḡemu maninai asi ma beḡe seḡaḡi-ḡenoḡoirini.

ḡauvei namori ma ribari tarimari ḡoi nuḡamu ai asi ma beḡe tanu-ḡenoḡoini.

Widi ḡegiro-iaḡirini foreri gururi maki maninai asi ma beḡe seḡaḡi-ḡenoḡoirini.

<sup>23</sup> Maninai lamefa mamari asi ma beḡe ḡara-ḡenoḡoini.



Veğaraḡo variḡu tauna e vavinena garona ta maki maninai asi ma beḡe seḡaḡi-ḡenoḡoiani.

Ġoina dagara voivoi-iaḡiri tarimari mai tanobara nuḡanai ḡia tu tarima baregori. Ġoi ḡemu meḡameḡa tovoḡari na tanobara irauirau mabarari oḡori-darererito.

<sup>24</sup>Peroveta tarimari e Barau ḡena tarimarima veaḡari ḡevaḡirito rarari, ema tano-bara iatanai tarimarima ḡevaḡirito rarari mabarari maki Babulona vanuḡa baregona nuḡanai ḡea ḡoitaḡorito.”

### Kokore marina gubai

**19** Moḡa murinai tu noḡa moḡo tarimarima asisebo-asisebo garori gururi gubai ḡekoḡoto-ḡoi aseḡaḡirito, ḡekirato,

“Haleluia!

Vevaḡa-maḡuri, e mareva baregona, ema seḡuka tu ḡita ḡera Barau ḡena.

<sup>2</sup>Korana ḡia tu dabara roroḡotonai evevaḡa-kotani ema rakava voiri evinini.

Ġia na veḡura-vanaḡi vavinena baregona vei-rakava voina meto lelevaḡina bevinia.

Mai veḡura-vanaḡi vavinena na mai tanobara mabarana ḡena veḡura-vanaḡi veiḡana na bevaḡa-rakava kwaikwaia.

Barau na ḡena vetuḡunaḡi tarimari rarari evaḡa-riḡorito ḡaramanai, rakava voina meto lelevaḡina bevinia.”

<sup>3</sup>Ma ḡekoḡo-ḡenoḡoito, ḡekirato,

“Haleluia!

Vanuḡa baregona ḡenana eraḡeni goḡuna tu asi bedokoni, mo goḡu tu beraḡe-vanaḡi vanaḡini.”

<sup>4</sup>Benamo mo veḡitaḡau tarimari gabanana ruarua ma vasivasi (24) ema mo maḡuri dagarari vasivasi ḡevetui-tarito, benamo Barau ḡena teronai tanutaḡo ḡetomarakariḡo viniato-ḡoi, maiḡesi ḡekirato, “Amen, Haleluia!”

### Mamoe Natuna ḡena veḡaraḡo verekona

<sup>5</sup>Benamo mo terona na garo ta eiaḡomato, ekirato,

“Barau ḡena vetuḡunaḡi

tarimami mabarami,

e Barau garina ḡogarini tarimami,

misina na beiaḡo mo baregona,

ḡera Barau ḡovaḡa-raḡea!”

<sup>6</sup>Benamo au na guru ta noḡa moḡo ḡutuma-bara gururi kavana aseḡaḡiatio, noḡa ḡaruka ḡutuma ḡeḡaru-gwadani gururi kavana, ema noḡa guba eguruani guruna baregona kavana, ḡekoḡoto-ḡoi, ḡekirato,

“Haleluia!

Ġita ḡera Iaru-korokoro Barauna tu roḡo Vere baregona etanuni.

<sup>7</sup>Mabarara si-iaku, siverere, ema sivaḡa-raḡea,

korana tu Mamoe Natuna ḡena

veḡaraḡo ḡarona varau bema raḡasi,

ema ḡaraḡona maki beḡe ḡabi-torea.

<sup>8</sup>Dabuḡa kurokurori gwaḡiḡiri namori, namoka-namokana, miro misina ta maki asiḡina ḡinavaḡi na ḡevaḡa-dabuḡaiato.”

Mo dabuġa kurokurori gwaġġiri namori tu Barau ġena veaġa tarimari ġeri vei-iobukaiobuka ekiraġirini.

<sup>9</sup> Benamo mo aneru na au ekiraguto, ekirato, “Maiġesi notorea: ‘Mamoe Natuna ġena veġaraġo ġani-vegogona uranai ġekea-kaurito tarimari tu beġene iaku!’” Ma ekiraguto, ekirato, “Mai tu Barau ġena guruġa moġoniri!” <sup>10</sup> Benamo au mo aneru kwakuna koranai avetui-tarito, natoma-rakarigo vinia ġana. Senaġi ġia na ekira-ġoiguto, ekirato, “Maniġesi tu asi novei! Au maki vetuġunaġi tarimagu ġoi kavana, ema ġoi tarikakamu Iesu varina guruġari ġevaġa-moġonirini tarimari kavana. Barau moġo notoma-rakarigo! Korana Iesu ġena vevarifiu guruġari na tu tarimarima elaunaġirini, peroveta guruġari beġene kiraġi-foforiri.”

### Hosi kurokuronai eraġeto tarimana

<sup>11</sup> Ma au aboġeto, guba evekeoto, benamo ġoiragu ai hosi kurokuronu ta aġita-iato. Mo hosi iatanai eraġeto tarimana arana tu “Vetuġamaġikau” ema “Moġoni” ġetato. Ġia tu veiġa iobukaiobukanai evevaġa-maaroni ema evetarini. <sup>12</sup> Ġia matana tu karava moreri kavana, ema debanai korona tu asisebo. Ġia ġenai ara ta eve-toreto, mo ara tu ta asi ribana, ġia ġereġana moġo ribana. <sup>13</sup> Ġia tu rara na evonuto dabuġana na evedabuġato, ema arana tu “Barau ġena Guruġa”. <sup>14</sup> Guba vanuġana ġena vetari doġorona tu ġia murina na ġeraka-naġi-rakanaġito-ġoi. Ġia mabarari tu dabuġa gwaġġiri namori, kurokurori ema namoka-namokari na ġevedabuġato, ma hosi kurokurori ai ġeraġeto. <sup>15</sup> Ġia bokana na tu vetari baġana raga-rakavarakava ema raka-rosito. Tanobara iraurau beseri tu mai vetari baġana ma ragana mainana bebasirini. Ġia na auri togoina na beġori-kaurini ma seġukana baregona ġesi. Ma vine ġwaġwari ġefanarini kavana bea fana-taririni. Moġa mo tu Iaru-korokoro Barauna ġena baru baregona bevaġa-raka-rosiani gabuna. <sup>16</sup> Dabuġa maukana eriġoato ġenai ema manininai tu mai ara maiġa etoreato, “Kini mabarari ġeri Kini ema vere mabarari ġeri Vere.”

<sup>17</sup> Benamo au na aneru ta ġaro nuġanai eruġa-taġoto-ġoi aġitaiato. Mo aneru na guba fakana ġerovoni manuri ekea-farara vinirito, ekirato, “Goiaġoma, Barau ġena ġanivegogo baregonai ġoma rovo-vegogo. <sup>18</sup> Be tanobara vereri barari viriġori, e vetari doġorori ġeri veġorikau tauri baregori viriġori, e kokore lelevaġi tarimari viriġori, ema hosi viriġori e hosi ai ġeraġeni tarimari viriġori, ema tarimarima mabarari, tuġu-rakaorakao tarimari e fakai ġetanuni tarimari, tarima keiri e baregori, mabarari viriġori boġonoma ġaniri!”

<sup>19</sup> Benamo au na vevaġa-rakava dagarana ema tanobara vereri baregori ma ġeri vetari doġorori ġesi vegogotaġo aġitarito. Ġia tu hosi kurokuronai eraġeto tarimana ma ġena vetari doġorori ġesi beġene vetari-viniri ġana ġevegogoto. <sup>20</sup> Senaġi mo vevaġa-rakava dagarana ġeġabi-tariato, ema peroveta tarimana ġofaġofana maki, mai tu nuġa-farevaġi vetoġari boruri vevaġa-rakava dagarana aranai eveirito-ġoi tarimana. Mai vetoġa boruri maiġeri na vevaġa-rakava dagarana ġena maka ġeġabiato tarimari ema ġia vetoġana o laulauna dagarana ġetoma-rakarigoani tarimari eġofa-darererini. Ġia tauri ruarua tu kou karavana morena asikeikeinai e salfa nuġanai ġefiu-ġurarito. <sup>21</sup> Ma kotari tu hosi ai eraġeto tarimana bokana na vetari baġana eraka-rosito monana evaġi-masemaserito, ma manu mabarari ġeiaġoto, ġia viriġori ġeġani-ġosiġosirito.

### Laĝani 1,000 nuĝanai kara beĝorani

**20** Benamo au na aneru ta guba na emariĝoto aĝitaiato. Ĝimanai tu guri variĝo kwareĝana, (iauka rakavari ĝeri dibura), kina, ema tavi ta ĝimanai tu seini asikeikeina ta. <sup>2</sup> Ĝia na mo ĝuĝaia kavana dagarana baregona eĝabi-tariato, mo tu sene bava motana, arana tu Diabolo o Satani. Mo aneru na seini na ebarubaruato, benamo ĝia tu laĝani 1,000 moĝesi barutarinai betanuni. <sup>3</sup> Ma aneru na eĝabiato, guri variĝo kwareĝanai efiu-ĝuraiato, benamo guri eloka-ĝauato, ema ekadakada-ĝauato. Aneru na Satani moĝesina eveiato anina tu, tanobara irauirau beseri asi bene ĝofari, bene iaĝo mo, laĝani 1,000 benea kori. Moĝa murinai bekeo-vaĝiani, benamo murikai ĝaro viravira ta moĝo ma betanuni.

<sup>4</sup> Ma terona kotari ma aĝitarito. Mo terona iatari ai tu Barau na Kota beĝene seĝaĝi maorona evinirito tarimari ĝetanuto. Ma aboĝeto tu, Iesu varina guruĝari ĝevaĝa-moĝonirito e ĝekiraĝi-foforirito ema Barau ĝena guruĝa ĝaramanai debari ĝebasi-ĝuturito tarimari iaulari maĝuri aĝitarito. Ĝia tu mo vevaĝa-rakava dagarana ema ĝia vetoĝana o laulauna ĝeveiato dagarana asi ĝetoma-rakariĝo viniato, ema ĝena maka bakuri ai o ĝimari ai asi ĝevaĝa-kafarito. Ĝia tu ĝemaĝuri-ĝenoĝoito, benamo Keriso ĝesi laĝani 1,000 ĝevereto. <sup>5</sup> Mase na variĝisi-ĝenoĝoi giniguinena tu moĝa. Mase tarimari kotari tu asi roĝo ĝemaĝuri-ĝenoĝoito mo, laĝani 1,000 ea korito. <sup>6</sup> Mai mase na variĝisi-ĝenoĝoi giniguinena beĝe variĝisini tarimari tu beĝe iakuni ema vevaĝa-namo barego beĝe doĝariani. Ĝia tu mase vaĝa-ruaruana seĝukana na asi beĝabirini. Ĝia tu Barau ema Keriso ĝeri Rubu Veaĝa vereri ai beĝe iaĝoni, ema Keriso ĝesi mo laĝani 1,000 nuĝanai beĝe vereni.

### Satani ĝena keto

<sup>7</sup> Mo laĝani 1,000 bekorini murinai, Satani tu ĝena dibura gabuna na beĝe keo-vaĝiani, <sup>8</sup> benamo beiaĝoni, tanobara irauirau beseri tanobara daiguni vasivasi nuĝanai ĝetanuni, mai tu Gog ema Magog, bea ĝofa-taĝuitaĝuirini. Ĝia mabarari bea ĝori-vegogorini, vetari beĝene veia ĝana. Ĝia mabarabarari beĝe vegogoni tu, noĝa kone mirina kavana asisebo-asisebo. <sup>9</sup> Tanobarana na beĝe raka-iaĝoni, benamo Barau ĝena tarimarima ĝetotoĝato gabuna beĝe gana-ĝeĝeraĝiani. Mo totoĝa gabuna tu Barau na eura-viniani sitina. Senaĝi guba na karava emariĝoto, benamo Satani ĝena vetari doĝorori ema ĝararito. <sup>10</sup> Benamo Diabolo, eĝofarito tauna, tu karava moreri e salfa kouna nuĝanai beĝe fiu-ĝuraiani. Vevaĝa-rakava dagarana ema peroveta tarimana ĝofaĝofana tu monai varau ĝefiu-ĝurarito. Tauri toitoi tu monai mo karava moreri na vanaĝivanaĝi asi dokona asi magona beĝara-tanurini.

### Kota Baregona

<sup>11</sup> Moĝa murinai au na terona kurokurona baregona ema terona iatanai etanuto tarimana aĝitaiato. Tanobara ema guba ĝia ĝoirana na ĝeraka-veĝitato, benamo asi ma ĝeĝita-ĝenoĝoirito. <sup>12</sup> Benamo mase tarimari baregori ema keiri aĝitarito mo terona kurokurona baregona ĝoiranai. Benamo buka tari ekeorito. Mo buka ekeorito murinai tu, buka ta ma ekeoato, maĝuri bukana tu moĝa. Benamo mase tarimari mo buka tari moĝeri ai ĝeri veiĝa etore-vanaĝirito ilailari ai Barau na ekotavirinirito. <sup>13</sup> Davarai ĝemaseto tarimari davara na ĝevariĝisito, e Mase ema mase tarimari iaulari ĝetanuni Gabuna (o Hades) na ĝevariĝisito. Benamo mabarabarari

tata karakara ġeveirito ilailari ai ekota-vinirito. <sup>14</sup> Benamo Mase ema mase tari-mari iaukari ġetanuni Gabuna (o Hades) na ġevariġisito tarimari tu, karava kouna nuġanai ġefiufiu-ġurarito. Mo karava kouna moġa, mo tu mase vaġa-ruaruana. <sup>15</sup> Bema tarima ta arana maġuri bukanai asi ġeġoitaġoato tarimana tu, mo karava kounai ġefiu-ġuraiato.

### Guba ema tanobara variġuri

**21** Benamo guba variġuna ema tanobara variġuna aġitarito, korana tu guba guinena ema tanobara guinena tu ġerekwa-rekwato. Davara maki asiġi. <sup>2</sup> Ma vanuġa baregona veaġana aġitaiato, mo tu Ierusalemema variġuna guba vanuġana na Barau ġenana emariġoto-ġoi. Ġia tu veġaraġo variġu vavinena ġaraġona ġena ġevaġa-dabuġaiani ema ġevaġa-vera ginikauani kavana. <sup>3</sup> Benamo garo baregona ta aseġaġiato terona na eiaġomato, maiġesi ekirato, “Toma Barau ġena tanu gabuna tu tarimarima ġesi, ġia toma tu tarimarima vefakari ai betanuni. Ġia tu Barau ġena tarimarimai beġe iaġoni, ema Barau tauġena ġia seviseviri ai betanuni, [ema ġia ġeri Barau ai beiaġoni]. <sup>4</sup> Ġia na matari gorari mabarari bedaurini. Mase e taġi-vanorovanoro e taġitaġi guruna ta ema midigumidigu tu beġe kori-ketovaġini, korana tu dagara guineri mabarari ġekorito.”

<sup>5</sup> Mo teronai etanuto Tarimana maiġesi ekirato, “Ġoġitaia, au tu dagara mabarabarari avaġa-variġu ġenoġoirini.” Ma ekirato, “Maiġeri guruġa tu notore-vanaġiri, korana mai tu guruġa moġoniri ema ġeri ai boġo vetuġamaġi-dadamaġini maki.” <sup>6</sup> Ma ekiraguto, ekirato, “Mabarari beġe kori. Au tu Alefa ema Omega, (giniguinena ema ginigabina), matamana ema dokona. Bokana bekokeni tarimana tu au na maġuri nanuna, eġaruġaruani dagarana, asi voina, baviniiani beniuani. <sup>7</sup> Rakava e meto bevaġa-darererini tarimana, ġena kokore voina tu maiġeri mabarari beġaunarini, ema au tu ġia ġena Barau ai baiaġoni, ema ġia maki au natugu ai beiaġoni. <sup>8</sup> Senaġi gari ai asi ġeruġa-gwaġiġini e asi ġeveġabi-dadamani tarimari, vei-rakava na ġevevaġa-miroto tarimari, vevaġi-deba tarimari, ġekimarakaraorakaoni tarimari, ġemeġameġani e kwaivakuku ġetoma-rakariġo viniani tarimari, ema ġeġofaġofani tarimari, mabarabarari ġeri gabu tu karava moreri e salfa ġeġarani kouna. Mai tu mase vaġa-ruaruana.”

### Ierusalemema variġuna

<sup>9</sup> Ma aneru ta au ġegu ai eiaġomato. Ġia tu mo aneru 7 guinenai ġimari tu diġu 7, mo diġu nuġari ai tu tarimarima vaġa-midigu-midiguri dagarari oreri na ġevonuto aneruri ta. Ġia eiaġomato, benamo au ema kiraguto, ekirato, “Noiaġoma, be veġaraġo variġu vavinena nama vaġa-ġitamtu, ġia tu Mamoe Natuna ġaraġona!” <sup>10</sup> Benamo Barau Iaukana na eboroġiguto, ma aneru na ġoro baregona e mauka kenenena ġana eġwa-iaġoguto. Benamo monana vau siti veaġana, Ierusalemema, Barau ġenana guba vanuġana na emariġoto-ġoi evaġa-ġitaguto. <sup>11</sup> Ġia ġenai tu Barau marevana mamana emamato-ġoi, ema siti marevana vetoġana tu fore namoka-namokari voiri asi keikeiri kavana, ema iaspa forena, fore veġiaveġiana kavana emamato-ġoi. <sup>12</sup> Ġia maġuna tu asikeikeina ema maukana, ma ġatama bokana tu gabanana ruaruana (12). Mo ġatama-boka 12 tu aneru 12 na ġeġita-ġaurito-ġoi. Mo ġatama-boka tata iatari ai tu Isaraela doġorori tata arari ġetorerito, mo tu Isaraela doġorori 12 moġeri. <sup>13</sup> Ġatama-boka tu toitoi ġaro eraġeni rekenai (o east), ma toitoi ġaro evariġoni reke-

nai (o west), ma debana rekenai (o north) toitoi, ema gabina rekenai (o south) toitoi ġeveirito. <sup>14</sup> Vanuġa baregona maġuna tu korana o duġu foreri 12 iatari ai ġevaġa-ruġa-vaiaiatu. Moġeri fore iatari ai tu Mamoe Natuna ġena apostolo 12 arari tata ġetorerito, fore ta ara ta, ma fore ta ara ta.

<sup>15</sup> Au ġesi ġaguruġa-guruġato-ġoi mo aneru moġa ġimanai tu makamaka rulana o vevaġa-vetovo dagarana, golo na ġeveiato dagarana. Mo rula monana vanuġa baregona e ġatama bokana ema maġuna bemakarini. <sup>16</sup> Siti ġevaġa-ruġaiatu daigunina tu vasivasi (4), e ġena baġaka ema mauka tu ilaila. Mo aneru na siti vevaġa-vetovo dagarana na etovoato, makana eġabiato tu stadia 12,000 o 2,400 kilomita. Ġia ġena mauka e baġaka ema varaġe maukana tu ilaila moġo. <sup>17</sup> Maġuna ġena barego maki etovoato, makana tu kiubit 144 o 70 mita. Tarimarima ġeri vevaġa-vetovo dagarana mo aneru na eġauvei-iaġiatio tu moġesina.

<sup>18</sup> Vanuġa baregona maġuna tu iaspa, fore marevari asi gadara dagarari, na ġeragaiato, ema siti tauġena tu golo namo vedaureari, ekimore-kimorerini galasi maki ġevanaġirito golori na ġeragaiato. <sup>19</sup> Vanuġa baregona maġuna ġevaġa-ruġaiatu korana o duġu foreri tu fore namoka-namokari irauirauri na ġevaġa-veraiato: Duġu forena giniguinena tu iaspa forena, vaġa-ruaruana tu safaia, vaġa-toitoina tu kalakedo, vaġa-vasivasina tu emeral, <sup>20</sup> vaġa-imaimana tu sadoniki, vaġa-6-na tu konilian, vaġa-7-na tu krisolait, vaġa-8-na tu beril, vaġa-9-na tu topas, vaġa-10-na tu krisopres, vaġa-11-na tu haiasin, vaġa-12-na tu ametis. <sup>21</sup> Mo ġatama-boka gabanana ruarua (12) moġeri tu tata galasi foreri o pel voiri barego lelevaġiri e marevari irau veġata na ġeveirito. Ġatama-boka ta pel ta, ġatama-boka ta pel ta. Siti dabarana baregona tu golo namo vedaureana na, noġa galasi kavana na ġeveiato.

<sup>22</sup> Vanuġa baregona nuġanai Rubu Veaġa ta asi aġitaiato, korana Vereġauka, Iarukorokoro Barauna, ema Mamoe Natuna, ġia tu mo vanuġa barana ġena Rubu Veaġa. <sup>23</sup> Mo vanuġa baregonai ġaro mamana ema ġue mamana tu asi bemamani, korana Barau marevana mamana monai bemamani, ema Mamoe Natuna tu mo siti ġena lamefa. <sup>24</sup> Tanobara mabarana besena tu ġia mamanani beġe rakani, ema tanobara vereri o kiniri mabarari na dagara e farefare marevari namori monai beġea ġwa-toġarini. <sup>25</sup> Ġaro sebona ta maki vanuġa barana ġatama bokana asi beġe biririni, korana mo siti tu boġi na asi beġabi-ġauani. <sup>26</sup> Tanobara irauirau mabarari ġeri farefare marevari ema ġeri taġa mabarana ġia ġena beġea ġwa-toġarini. <sup>27</sup> Dagara ma mirona ta tu asi beraka-toġani, e maiaka ema ġofaġofa veġari beveini tarimana ta maki asiġina ġinavaġi beraka-toġani. Deidei Mamoe Natuna ġena maġuri bukanai arari etore-vanaġirito tarimari ġereġari moġo beġe raka-toġani.

### Maġuri nanuna ġarukana

**22** Moġa murinai aneru na maġuri nanuna ġarukana evaġa-ġitaguto. Mo nanu tu nega-vaġura-vaġurana galasi kavana. Ma mo nanu tu Barau ema Mamoe Natuna ġeri terona na eġaru-rosito. <sup>2</sup> Siti dabarana baregona nuġana ġana ġeġaru-iaġoto-ġoi. Mo ġaruka rikina reketa-reketai tu maġuri ġauri ġetubuto. Mo ġau tu ġue tata nuġari ai ġwaġwari ġeġorato-ġoi, mai tu laġani sebona nuġanai nega vaġa-12 ġeġwato-ġoi; ema ġau lauri na tanobara mabarari beseri evaġa-namorito-ġoi e evaġa-maġuririto-ġoi. <sup>3</sup> Monana bevesinani beiaġoni, tarima ta iatanai o tanobara iatanai tovoġa ta tu asi ma betanuni. Barau ema Mamoe Natuna ġeri terona tu vanuġa baregona nuġanai, ma ġena vetuġunaġi tarimari na vetuġunaġina beġe

iaġo-vinini. <sup>4</sup> Ġia ġoirana beġe ġitaiani, ema ġia arana maki ġia bakuri ai betanuni. <sup>5</sup> Monai boġi tu asiġina. Lamefa ema ġaro mamari ta asi beġe ġitaiani e asi beġe urani, korana Barau, Vereġauka na mama bevinirini. Ema ġia tu vere beġe tanu-vanaġi vanaġini.

### Iesu Vereġauka ma beġenoġoi-iaġomani

<sup>6</sup> Benamo mo aneru na au evaġa-guruġaguto, ekirato, “Mai guruġa tu moġoniri ema ġeri ai maki bovetuġamaġi-dadamaġini. Vereġauka, ġia laukana tu peroveta tarimari mururi na eguruġani Barauna, ġena aneru etuġuato, ġia ġena vetuġunaġi tarimari kara dori ġeġorani dagarari bene vaġa-ġitari ġana. <sup>7</sup> Goseġaġi, au tu dori aiaġosini. Mai buka nuġanai peroveta guruġari bekorana-iaġirini tarimana tu bene iaku.”

<sup>8</sup> Maiġeri dagara aseġaġirito ema aġitarito tarimana tu au, Ioane maiġegu. Maiġeri dagara aseġaġirito ema aġitarito nai tu, ekira-varaguto ema evaġa-ġitaguto aneruna kwakuna koranai avetui-tarito, natoma-rakariġo vinia atato. <sup>9</sup> Senaġi ġia na ekiraguto, ekirato, “Maniġesi asi novei. Au tu ġoi, e ġoi tarikakamu peroveta tarimari, ema mai buka guruġana ġekorana-iaġirini tarimari ġesi ilaila, Barau vetuġunaġina aiaġo-vinini. Barau notoma-rakariġo vinia!” <sup>10</sup> Moġa murinai ekiraguto, ekirato, “Mai bukai peroveta guruġari asi bono kada-ġauri, asi bono kure-toġari, korana nega tu varau bekavinaġi. <sup>11</sup> Vei-rakava tarimana bene vei-rakava-iaġo roġo, veiġa mirori eveini tarimana veiġa mirori bene vei-iaġo roġo, veiġa iobukaiobukari eveini tarimana veiġa iobukaiobukari bene vei-iaġo roġo, ema veaġai etanuni tarimana veaġai bene tanu-iaġo.”

<sup>12</sup> Iesu maiġesi ekirato, “Goseġaġi! Au tu dori aiaġosini! Tarimarima ġeri ġauvei voiri tu au ġegu ai, be aġwa-iaġosirini. Tarimarima mabarari ġeri veiġa e ġauvei ilailari ai voiri bavinirini. <sup>13</sup> Au tu Alefa ema Omega, (giniguinena ema dokona), au tu tovotovona veġata ema magona.”

<sup>14</sup> Geri dabuġa ġeġuriġirini tarimari tu beġe iakuni. Ġia tu Barau na maoro bevinirini, maġuri ġauna ġwana beġe ġaniani, ema vanuġa baregona ġatama bokana na beġe raka-toġani. <sup>15</sup> A kwaiva (o vei-rakava tarimari), ġemeġameġani tarimari, ġekimani e ġeveġura-vanaġini tarimari, vevaġi-deba tarimari, kwaivakuku ġetomarakariġo viniani tarimari, ema ġofaġofa ġeuradikani tarimari, mabarabarari tu siti murikanai beġe tanuni. <sup>16</sup> “Au, Iesu, na ġegu aneru batuġu-iaġosia, ekalesia doġorori ġeri mai vari moġonina ġomi neasi vaġa-ribami ġana. Au tu Davida garakana ema ġia ġenana aiaġomato Tarimagu. Au tu laġani visiġuna, ma mamana baregona.”

<sup>17</sup> Iauka Veaġa ema veġaraġo variġu vavinena ġekirani, “Noiaġoma!” Ema be-seġaġini tarimana maki nekira, “Noiaġoma!” Bokana bekokeni tarimana bene iaġoma; ema beurani tarimana, mai maġuri nanuna, asi voina nanuna, bene niua.

### Guruġa dokona

<sup>18</sup> Mai bukai peroveta guruġari beġe seġaġirini tarimari mabarari akira-toreġaurini: Bema deikara na mai guruġa iatari ai guruġa tari betore-kaurini tarimana tu, mai bukai tarima vaġa-midiguri dagarari, ekiraġirini dagarari, Barau na ġia iatanai betore-kaurini. <sup>19</sup> Ma bema tarima ta na mai peroveta bukana na guruġa tari bekoki-vaġirini nai, ġia tu Barau na voina maġuri ġauna ġenai ema siti veaġana

nuḡanai monai tanu-vanaḡivanaḡi moḡa, mai bukai ekiraḡirini maiḡeri, ḡia ḡenana beḡabi-vaḡirini.

<sup>20</sup> Maiḡeri dagara bekiraḡi-foforirini tarimana ekirani, “Oi, au tu dori aiaḡosini!”  
Amen. Iesu Vereḡauka o, noiaḡoma!

<sup>21</sup> Iesu Vereḡauka ḡena namo ema varevare-bara ḡomi mabarami iatami ai bene tanu. Amen.